

საქართველოს ისტორიის ნარკვევები



რვა ტომად

სარედაქციო კომპეტია:

საქართველოს სსრ მეცნიერებათა აკადემიის აკად.
ბ. მელიქიშვილი (მთ. რედაქტორი), პროფ. ი. ანთი-
ლავა, პროფ. მ. დონდუა, პროფ. მ. ლუმაბაძე, პროფ.
ი. პაპარაშვილი, საქართველოს სსრ მეცნიერებათა აკადემიის
წევრ-კორ. შ. მესხია, პროფ. ნ. სურგულაძე.
პროფ. ა. სურგულაძე.

საქართველოს ისტორიის ნარკვევები



ტომი V

საქართველო XIX საუკუნის 30—90-იან
წლებში

ტომის რედაქტორი
ირაკლი ანთელავა

წიენი მოწონებულია და რეკომენდებულია გამოსაქვეყნებლად საქართველოს სსრ მეცნიერებათა აკადემიის ივ. ჯავახიშვილის სახელობის ისტორიის, არქეოლოგიისა და ეთნოგრაფიის ინსტიტუტის სამეცნიერო საბჭოს მიერ.

„საქართველოს ისტორიის ნარკვევების“
მეხუთე ტომის ავტორები:

ისტ. მეც. დოქტ. პროფ. ი. ანთელავა (თავი I, § 1, თავი II, III, V, VI, XI, XII), ისტ. მეც. დოქტ. ა. ბენ-დინანიშვილი (თავი VII, VIII, § 1, თავი IX, XV), ისტ. მეც. კანდ. დოც. მ. ბაზრინდაშვილი (თავი X, XVII), ისტ. მეც. დოქტ. პროფ. ლ. გორბილაძე (თავი XVI), ისტ. მეც. დოქტ. პროფ. ა. იოსელიანი (თავი XIII), ისტ. მეც. დოქტ. პროფ. ა. კიპშიძე (თავი XIV), ისტ. მეც. კანდ. ე. ორჯონიკიძე (თავი I, § 1 და § 3, თავი IV, VIII, § 4), ისტ. მეც. დოქტ. ე. ხოშტარია (თავი I, § 2 და § 4, თავი VIII, § 3, § 4 და § 5).

ტომის შესავალი დაწერილია ი. ანთელავას, ალ. ბენ-დინანიშვილისა და მ. გაფრინდაშვილის მიერ.

ეპოქა. საქართველოს ისტორიის ნარკვევების წინამდებარე V ტომი გადმოგვცემს ჩვენი ქვეყნის ისტორიის ძირითად ფაქტებსა და მოვლენებს X.IX საუკუნის 30—90-იან წლებში. ეს პერიოდი აღსავსეა უალრესად მნიშვნელოვანი ძვრებით ქართველი ხალხის სოციალ-ეკონომიური, პოლიტიკური და კულტურული ცხოვრების სფეროში. აღნიშნული დროის მონაკვეთში განვითარდა და გაბატონებულ ფორმაციად იქცა ადრე ჩასახული კაპიტალისტური ურთიერთობა, რასაც მოჰყვა ძირეული ხასიათის ცვლილებები სოციალურ ურთიერთობაში, კლასობრივი ძალების განლაგებაში, საზოგადოებრივ აზროვნებაში, სულიერი და მატერიალური კულტურის დარგში და ა. შ. ე. ი. საზოგადოებრივი ცხოვრების ყველა სფეროში იჭრებოდა ახალი მოვლენები, რომლებიც ძველთან მიმე შერკინებაში ბოლოს მაინც გამარჯვებული გამოდიოდა. მაგრამ ეს ახალი ერთნაირი ტემპით როდი იკაჭავდა გზას მთელი შესასწავლი პერიოდის განმავლობაში. იგი გაცილებით მეტ წინააღმდეგობას აწყდებოდა 30—50-იან წლებში, ვიდრე მომდევნო ხანაში. ეს ბუნებრივიცაა, რადგანაც 30—50-იან წლებში ბურჟუაზიული ურთიერთობა ვითარდებოდა ბატონყმური სისტემის დომინირების პირობებში. რაც შეეხება საგლეხო რეფორმის (1864 წ.) შემდგომ პერიოდს, 60—90-იან წლებს, იქ ახალს ბრძოლა უხდებოდა ძველთან, ფეოდალიზმთან არა როგორც გაბატონებულ ფორმაციასთან, არამედ როგორც გადმონაშთების სახით არსებულ მოვლენასთან. წამყვანს კი ხსენებულ წლებში თვით ეს ახალი, ე. ი. კაპიტალიზმი წარმოადგენდა.

როგორი იყო მაინც ეკონომიური განვითარების მაგისტრალური ხაზი რეფორმამდელი ხანის 30—60-იან წლებში? რა ცვლილებებსა და ძვრებს ჰქონდა ადგილი ქვეყნის სამეურნეო ცხოვრებაში?

როგორც წინამდებარე ტომის პირველ თავშია ნაჩვენები, საქართველოს სამეურნეო განვითარება იმ დროს კაპიტალისტური გზით წარიმართა. ახალი ურთიერთობის წარმატება იგრძნობოდა ყველა სფეროში — მრეწველობაში, სოფლის მეურნეობაში, ვაჭრობასა და საქა-

ლაქო ცხოვრებაში. საქართველოში მაშინ, როგორც აგრარულ ქვეყანაში, მრეწველობა არ წარმოადგენდა წამყვანსა და მაღალ დონეზე დაყენებულ დარგს, მაგრამ გასული საუკუნის 30-იანი წლებიდან, როდესაც დამთავრდა რუსეთ-ირანისა და რუსეთ-თურქეთის ომები და შედარებით მშვიდობიანობა დამყარდა, აქაც საგრძნობი გახდა ძვრები და წარმატებები. მართალია, ცარიზმი ყოველნაირად ხელს უშლიდა პერიფერიის სამრეწველო დაწინაურებას, მაგრამ ის მაინც ვერ ახერხებდა ამ მიზნის სრულად განხორციელებას და მრეწველობა, თვით დამმუშავებელიც კი, მეტ-ნაკლებად მაინც ვითარდებოდა იმპერიაში შემავალ ქვეყნებში. ვითარდებოდა ის, კერძოდ, საქართველოშიც. საკმარისია ითქვას, რომ 60-იანი წლების შუა ხანებისათვის საქართველოში, ჩვენს განკარგულებაში მყოფი არაზუსტი ცნობებით, არსებობდა 495 მარტო წ ვ რ ი ლ ი კ ა პ ი ტ ა ლ ი ს ტ უ რ ი, მ ა ნ უ ფ ა ქ ტ უ რ უ ლ ი და ფ ა ბ რ ი კ ა-ქ ა რ ხ ნ უ ლ ი დ ა მ მ უ შ ა ვ ე ბ ე ლ ი საწარმო, რომელთა მიერ დამზადებული პროდუქციის საშუალო წლიური ღირებულება 1 046 ათას მანეთს აღემატებოდა. ამ თანხის მოსახლეობის რიცხვთან შეფარდება გვიჩვენებს, რომ ერთ სულ მოსახლეზე მოდიოდა 2 მანეთამდე დამმუშავებელი მრეწველობის პროდუქცია, ხოლო მთელ საქართველოში — ერთ მანეთამდე. ეს, რა თქმა უნდა, მაღალი მაჩვენებელი არ არის, მაგრამ მისი შედარებითი განხილვა ცხადყოფს, რომ ჩვენი ქვეყანა შესასწავლ პერიოდში, სამრეწველო განვითარების თვალსაზრისით, იდგა ევროპული რუსეთის, განსაკუთრებით კი მისი სამიწათმოქმედო რაიონების (გუბერნიების) ნაწილის დონეზე. დასახელებული მონაცემების შეფასებისას, ვიმეორებთ, მხედველობაში უნდა ვიქონიოთ, რომ მასში შეტანილია მხოლოდ დამმუშავებელი მრეწველობის პროდუქციის ნაწილი, დამზადებული მეტ-ნაკლებად კაპიტალისტურ საფუძვლებზე მოწყობილ საწარმოებში (წვრილი კაპიტალისტური, მანუფაქტურული და ფაბრიკა-ქარხნული).

ქვეყნის საერთო ეკონომიურმა პროგრესმა თავისი გამოხატულება პოვა ვაჭრობის, ქალაქებისა და საქალაქო ცხოვრების განვითარებაში. მართალია, XIX საუკუნის რეფორმამდელ ხანაში, კერძოდ 30—60-იან წლებში, საქართველოში არ წარმოქმნილა არც ერთი ახალი ქალაქი და არც ცოტად თუ ბევრად მნიშვნელოვანი სავაჭრო-სამრეწველო დაბა, მაგრამ ჩვენ მაინც ვლაპარაკობთ საქალაქო ცხოვრების შემდგომ განვითარებაზე მასში მომხდარი მნიშვნელოვანი თვისებრივი ცვლილების გამო. ისეთი მოვლენები, როგორიცაა წვრილ საქონლურ წარმოებაში ამქრულ-ფეოდალურ შეზღუდვათა გადალახვა, სახელოსნოთა გამსხვილების ტენდენცია, დაქირავებული შრომის ხვედრითი წონის ზრდა, ამქრის გარეშე სახელოსნოთა გამრავლება და თავისუფალი კონკურენციის შემოჭრა, მანუფაქტურების გავრცელება და მანქანური წარმოების დანერგვის ცდე-

ბი და სხვ., მნიშვნელოვნად ცვლიდნენ ქალაქების ეკონომიურ ხასიათს. ქალაქებში მარტივი სასაქონლო წარმოება თანდათანობით ადგილს უთმობდა თვისებრივად ახალ კაპიტალისტურ (უპირატესად წვრილ) წარმოებას.

ნატურალური მეურნეობის რღვევის შედეგად შეინიშნება ქალაქისა და სოფლის დაპირისპირების გაღრმავება, ქალაქის საეკრო-სამრეწველო პოტენციალის გადიდება, მისი როგორც სამრეწველო ნაწარმის მიმწოდებლისა და სასოფლო-სამეურნეო პროდუქციის მომხმარებლის როლის განუხრელი ზრდა და სხვ., რაც ეგრეთ წოდებული შინაგანი ბაზრის შექმნის მჩვენებელი იყო საქართველოს სინამდვილეში.

საქალაქო ცხოვრების განვითარების პარალელურად, მასთან ერთად და მის შედეგად მიმდინარეობდა ქალაქების მოსახლეობის აბსოლუტური და შედარებითი ზრდა. საკმარისია ითქვას, რომ აღმოსავლეთ საქართველოს ქალაქების (თბილისი, გორი, თელავი, სიღნაღი, დუშეთი) მოსახლეობა 1821—1865 წლებში გაიზარდა 4-ჯერ და მეტად (22513 სულიდან 93 336 სულამდე). განუხრელად იზრდებოდა ქალაქების მობინადრეთა ხვედრითი წონა, რაც აღმოსავლეთ საქართველოში 1821 წელს უდრიდა 12,2%-ს, 1865 წელს კი 18,3%-ს. დასავლეთ საქართველოშიც საქმე გვაქვს ქალაქური ცხოვრების შემდგომ განვითარებასთან, თუმცა მისი ტემპები და მასშტაბი გაცილებით უფრო ნელი და ზომიერი იყო.

აღსანიშნავია, რომ ქალაქის მოსახლეობის ზრდა მიმდინარეობდა უმთავრესად და პირველ ყოვლისა თვით საქართველოს სოფლის მკვიდრთა ხარჯზე. ფულად-სასაქონლო ურთიერთობათა განვითარებისა და კლასობრივი ბრძოლის გამწვავების შედეგად სოფლის მკვიდრმა დატოვა თავისი მუღმივი საცხოვრებელი და ქალაქს მიაშურა. გარკვეულ როლს (თუმცა გაცილებით ნაკლებს, ვიდრე პირველი) თამაშობდნენ ამიერკავკასიის სხვა რაიონებიდან, აგრეთვე რუსეთიდან, სპარსეთიდან და თურქეთიდან ჩამოსულები, სამხედრო ნაწილები და ადმინისტრაცია, რომელთა ადგილსამყოფელს ძირითადად საგუბერნიო და სამაზრო ქალაქები წარმოადგენდა.

საქართველო მაშინ, როგორც უკვე ითქვა, აგრარულ ქვეყანას წარმოადგენდა. მწარმოებელი კლასის აბსოლუტური უმრავლესობა სოფლის მეურნეობის სხვადასხვა დარგში იყო დასაქმებული. ასეთ ვითარებაში ქვეყნის ეკონომიური განვითარების საერთო დონის განსაზღვრისას დიდი მნიშვნელობა ენიჭება იმ ცვლილებების წარმოჩენას, რომელსაც განსახილველი ხანის ქართულ სოფელში ჰქონდა ადგილი. ამ ცვლილებების საერთო ხასიათი და ტენდენცია ბურჟუაზიული იყო.

ყურადღებას იპყრობს სასაქონლო წარმოების საგრძნობი განვითარება გასული საუკუნის 30-იანი წლებიდან, ე. ი. იმ დროიდან, როდესაც ჩვენს ქვეყანაში შედარებით მშვიდობიანობა დამყარდა.

ამიერიდან მწარმოებელი კლასი ცდილობს მოიყვანოს არა მარტო მისთვის, მის მოთხოვნილებათა დასაკმაყოფილებლად აუცილებელი პროდუქცია, არამედ ზედმეტი, საბაზრო. ბაზარს უკავშირდება სოფლის მეურნეობის ყველა დარგი, მათ შორის მარცვლეული კულტურისაც, რომელიც შედარებით ნაკლებ საქონლური იყო. საკმარისია ითქვას, რომ 1845 წელს თბილისის გუბერნიის მოსახლეობას მთელი დამზადებული პურის 18% გაუყიდა¹. რუსეთში კი თვით XIX საუკუნის 50-იან წლებშიც სასაქონლო პურის ხვედრითი წონა 17%-ს არ აღემატებოდა². კიდევ უფრო ძლიერად იყო შეჭრილი ფულადი სასაქონლო ურთიერთობა მევენახეობა-მელენეობაში, მეაბრეშუმეობაში, მებამბეობასა და მეთამბაქოეობაში. საბაზრო პროდუქციის ხვედრითი წონა ამ დარგებში უდრიდა (შესაბამისად): 25%-ს (კახეთი, 1830 წ.), 70%-ს 40-იან წლებში, 75%-ს (იმერეთი, 1864 წ.) და 67,5%-ს (თბილისის გუბერნია, 1859 წ.). ეს მონაცემები მკაფიოდ ადასტურებს საკმაოდ განვითარებული შინაგანი ბაზრის, სასაქონლო წარმოებისა და ფულადი ურთიერთობის, ე. ი. კაპიტალიზმის ერთ-ერთი აუცილებელი პირობის³ არსებობას რეფორმის წინარე ხანის საქართველოში.

თუმცა სასაქონლო წარმოების გარეშე არ არსებობს კაპიტალიზმი, მაგრამ მარტო ის ვერ წარმოშობს ამ ფორმაციას. ამისათვის საჭიროა და აუცილებელი თავისუფალი სამუშაო ძალა, თავისუფალი ორმაგი გაგებით — პირადად და საწარმოო საშუალებებისაგან. წინამდებარე ტომში მოტანილი ფაქტობრივი მასალა ნათლად გვიჩვენებს, რომ XIX საუკუნის რეფორმამდელ ხანაში, განსაკუთრებით კი 30—60-იან წლებში, მიმდინარეობდა გლეხობის კლასობრივი დიფერენციაციის პროცესი, რაც, ერთი მხრივ, საწარმოო საშუალებებით უხვად მომარაგებული ბობოლეების, ხოლო, მეორე მხრივ, ამ საშუალებებს მთლიანად ან ნაწილობრივ მოკლებულ, თავისი სამუშაო ძალის გაყიდვით მოარსებე გლეხთა ჯგუფის წარმოშობაში გამოიხატა. 1842 წლის კამერალური აღწერის თანახმად, მაგალითად, თელავის მაზრის სახელმწიფო გლეხთა 13,5%-ს არ ჰქონია არც ერთი მეტრი სახნავ-სათესი და სავენახე მიწა. ისინი თავს ირჩენდნენ დღიური ქირით (ან მიწის იჯარით ალებით). სამუშაო ძალას ყიდდნენ საწარმოო საშუალებებით (მიწა, გამწევი ძალა, ინვენტარი) ცუდად მომარაგებული გლეხებიც. საერთოდ, სოფლის მშრომელი მოსახლეობის იმ ნაწილის ხვედრითი წონა, რომელიც თავისი სამუშაო ძალით გამოდიოდა

¹ სსცია, ფონდი 16, საქმე 8888; შედარე ფ. 4, ანაწერი 8, საქმე 43.

² В. К. Я ц у н с к и й, Аграрное развитие России с 80-х годов XVIII века до 80-х годов XIX столетия (Рукопись доклада, прочитанного в г. Риме в мае 1966 года на коллоквиуме советско-итальянских историков), გვ. 17.

³ ვ. ი. ლ ე ნ ი ნ ი, თხზ., ტ. 29, გვ. 560.

ბაზარზე, არცთუ ისე მცირე იყო განსახილველი ხანის საქართველოში. სამწუხაროდ, ჩვენ არა გვაქვს ამ საკითხის სათანადო სისრულით გამშუქებული ცნობები, მაგრამ, რაც გვაქვს, ისიც დამახასიათებელია. ირკვევა, მაგალითად, რომ სოფ. შილდის და ყვარლის სახელმწიფო გლეხთა 28,6% და 59,4% (შესაბამისად) საშუალო ძალის გაქირავებით ირჩენდა თავს. ამათ გვერდით, როგორც აღვნიშნეთ, იყვნენ შეძლებული და ბობოლა გლეხები, რომლებიც ფლობდნენ მიწისა და პირუტყვის დიდ რაოდენობას. იყენებდნენ დაქირავებულ შრომას და ფართო მასშტაბით აწარმოებდნენ საბაზრო პროდუქციას. ამის საილუსტრაციოდ შეიძლება დავასახელოთ იმავე 1842 წლის თელავისა და სიღნაღის მაზრის კამერალური აღწერის მასალები. ამ მასალებიდან ირკვევა, რომ დასახელებული მაზრების, ე. ი. კახეთის, სახელმწიფო გლეხთა 47,4%-ს საერთოდ არ ჰყავდა არც ერთი სული მსხვილფეხა რქოსანი საქონელი, ხოლო 17,4%-ის ხელში მოქცეული იყო მსხვილფეხა რქოსანი პირუტყვის საერთო რაოდენობის 66,6%. ამ შეძლებულ და კულაკ გლეხებს შორის იყვნენ ისეთებიც, რომელთა ფერმები ასობით შინაურ საქონელს ითვლიდნენ. ისინი გამოირჩეოდნენ მიწის მფლობელობის სიმსხვილითაც. ბევრ მათგანს 50, 100, 200 და მეტი დესეტინა მიწა ჰქონდა. ცხადია, მწარმოებელი კლასის ეს შედარებით მცირერიცხოვანი ბირთვი მდიდარი გლეხებისა ვერ ახერხებდა ესოდენ მსხვილ მეურნეობათა საკუთარი ძალებით გამართვას და სისტემატურად მიმართავდა ნებით დაქირავებულთა შრომას. აქ უკვე საქმე გვაქვს სასოფლო-სამეურნეო წარმოების კაპიტალისტურ ორგანიზაციასთან.

ანგარიშგასაწევი ცვლილებები ხდება ფეოდალური კლასის წრეში. მცირე ნაწილმა ალღო აუღო ვითარებას, მეურნეობა რაციონალურ (ბურჟუაზიულ) საფუძვლებზე მოაწყო და ფეხი აუწყო ცხოვრების დინებას. დიდმა უმრავლესობამ კი ბურჟუაზიული თაოსნობა სამარცხვინოდ ჩათვალა, მამაპაპურ ტრადიციებს არ უღალატა და საბაზრო პროდუქციის დამზადებას მამულების გაყიდვა-დაგირავება არჩია. შეირყა ფეოდალურ-ბატონყმური ურთიერთობის საფუძველი — ფეოდალური საკუთრება მიწაზე. პრივილეგიურმა წოდებამ დიდი რაოდენობით დაკარგა ადგილ-მამული, რომელიც გადავიდა გლეხების, ვაჭრების და სხვათა ხელში. ე. ი. შეიქმნა უწოდებრიო (бессловная собственность) ბურჟუაზიული საკუთრება — საფუძველი ახალი საზოგადოებრივი წყობილებისა.

1843—1845 წლებში მრეწველობის, ვაჭრობის, ქალაქებისა და საქალაქო ცხოვრების განვითარებამ განაპირობა სახელმწიფო გადასახადების კომუტაცია. ამიერიდან ყველა კატეგორიის გლეხი ხაზინასთან ანგარიშს მხოლოდ ფულით ასწორებდა. ფულადი საგადასახადო სისტემის შემოღება, თავის მხრივ, ხელს უწყობდა ქვეყნის შემდგომ ეკონომი-

ურ პროგრესს, ბურჟუაზიულ ურთიერთობათა განვითარებას. თუმცა ფუ-
ლადი ვადასახადების დაწესების შემდეგაც, როგორც მარქსი წერს, „უშუ-
ალო მწარმოებელი კვლავ თვითონვე აწარმოებს თავის საარსებო საშუა-
ლებათა უდიდეს ნაწილს მინც, მაგრამ მისი პროდუქტის ერთი ნაწილი
ახლა საქონლად უნდა გადაიქცეს, საქონლის სახით უნდა იწარმოებოდეს.
მაშასადამე, მთელი წარმოების წესის ხასიათი მეტ-ნაკლებად იცვლება.
იგი კარგავს თავის დამოუკიდებლობას, თავის მოწყვეტას საზოგადოებ-
რივი კავშირისაგან“¹.

სამწუხაროდ, ჯერჯერობით სათანადოდ არ არის შესწავლილი საკით-
ხი ფეოდალური რენტის, მისი ევოლუციის შესახებ. ის, შედარებით მცი-
რე მასალა კი, რაც დღემდეა მოპოვებული, საფუძველს გვაძლევს ვამ-
ტკიცოთ, რომ ფულადი რენტა XIX საუკუნის რეფორმამდელი ხანის,
განსაკუთრებით 30—60-იანი წლების, საქართველოს ეკონომიურ ცხოვ-
რებაში გაცვილებით მეტი მნიშვნელობისა იყო, ვიდრე აქამდე
გვქონდა წარმოდგენილი.

ახალი მოვლენის ზრდა-განვითარებასთან დაკავშირებით და მის შედე-
გად საგრძნობლად გამწვავდა კლასობრივი ბრძოლა. სოფლისა და ქალა-
ქის მშრომელთა მოსახლეობამ, რომლის ცხოვრების პირობები შესამჩნე-
ვად გაუარესდა შესასწავლი პერიოდის განმავლობაში, გაბედულად შეუ-
ტია ფეოდალურ-ბატონყმურ სისტემას და მის დამცველს — ცარიზმს. ხა-
ლხი თავგანწირვით იბრძვის სოციალური და კოლონიური ჩაგვრის მოს-
პობისათვის. დღის წესრიგში მთელი სერიოზულობით დადგა გლეხთა სა-
კითხი, რომლის სიმწვავე, თანამედროვის მოწმობით, ყირიმის ომის შემ-
დეგდროინდელ საქართველოში ღრმავდებოდა „არა დღეობით, არამედ
საათობით“². აშკარად გამოხატული ანტიბატონყმური ლოზუნგებით მიმ-
დინარე 1856—1857 წლების სამეგრელოს გლეხთა აჯანყება და კლასობ-
რივი ბრძოლის მრავალი სხვა ეპიზოდი რეფორმის წინარე ხანაში შექმ-
ნილი რევოლუციური სიტუაციის მკაფიო დადასტურება იყო. კავკა-
სიის ადმინისტრაცია საგონებელში ჩავარდა. მას აგრარულ-გლეხური სა-
კითხის სასწრაფოდ მოგვარება აუცილებელ და გადაუდებელ საქმედ
მიაჩნდა³.

ბატონყმურ ურთიერთობათა წინააღმდეგ შედარებით ადრე აღიმალღეს
ხმა მოწინავე ქართველმა ადამიანებმა. გავიხსენოთ თუნდაც იოანე ბაგ-
რატიონის (1772—1830 წწ.) „კალმასობა“, რომელშიც მოცემულია ფეო-
დალური წყობილების მახინჯი მხარეების გაბედული და მკაცრი კრიტიკა.

¹ კ. მარქსი, კაპიტალი, ტ. III, ნაწ. II, თბ., 1959, გვ. 418.

² ნ. ნიკოლაძე, თხზულებანი (პროფ. დ. გამეზარდაშვილის რედაქციით),
I, თბ., 1962, გვ. 151—152.

³ ЦГИАМ, ф. 678, оп. I, д. 607, лл. 26—27.

ახალ ვითარებაში კიდევ უფრო მძლავრად გაისმა ძველის საწინააღმდეგო მოტივები, უფრო მომწიფდა პროგრესული საზოგადოებრივი აზრი და თერგდალეულების სამოღვაწეო ასპარეზზე გამოსვლით იგი მწყობრ ანტიბატონყმურ იდეოლოგიად ჩამოყალიბდა. თერგდალეულებმა მედგრად შეუტიეს ძველ წყობილებას და თავიანთ მხატვრულ თუ პუბლიცისტურ ნაწერებში ახალი საქართველოს მეზაირახტრედ გამოვიდნენ. ქართველი სამოციანელები, წერს თანამედროვე, — „თავიანთ ძალას, ჭკუას... იმისათვის ხმარობდნენ, რომ მოესპოთ ძველი უსამართლობა, ბატონყმობა. ცდილობდნენ ჩამოერთმიათ მათრახი, პალაჩობა ყმებზედ და გამოეყვანათ (ისინი) ქვეყანაზე კაცად“¹. თერგდალეულთა მოღვაწეობამ დიდად შეუწყო ხელი რევოლუციური სიტუაციის შექმნას, რომელმაც, სხვა მომენტებთან ერთად, განაპირობა საგლეხო რეფორმის გატარება ჩვენს ქვეყანაში.

ქართველმა სამოციანელებმა მალა ასწიეს ოცდაათიანელებისაგან (1832 წლის შეთქმულება, ნიკოლოზ ბარათაშვილი და სხვ.) მემკვიდრეობით მიღებული ეროვნულ-განმათავისუფლებელი მოძრაობის დროსა. მათ შეუპოვარ ბრძოლას ცარიზმის რუსიფიკატორული პოლიტიკის წინააღმდეგ ფასდაუდებელი მნიშვნელობა ჰქონდა ქართველი ხალხის მრავალსაუკუნოვანი კულტურული მონაპოვრის დაცვა-შენარჩუნების საქმეში.

სოციალ-ეკონომიურ ცხოვრებაში მიმდინარე ძვრებმა თავისი კეთილმყოფელი ზეგავლენა მოახდინა ხალხის სულიერ და მატერიალურ კულტურაზე. განვითარების უფრო მაღალ საფეხურზე ავიდა ლიტერატურა და ხელოვნება, აღსდგა (1850 წ.) ქართული თეატრი. დაწინაურდა პრესა. ცვლილებები მოხდა მწარმოებელი და ექსპლოატატორთა კლასების ყოფის ყველა სფეროში.

ასეთია დაახლოებით იმ მოვლენებისა და პროცესების მოკლე დახასიათება, რომლებსაც ადგილი ჰქონდა 30—60-იანი წლების საქართველოში და რომლებიც განსაზღვრავდნენ დასახელებული ხანის ხასიათს. მაშინ შეიქმნა ჩვენს ქვეყანაში ეგრეთ წოდებული კაპიტალისტური წყობა (ყკადა), რაც ახალი ურთიერთობის ბირთვის იმ მასშტაბით არსებობას გულისხმობს, რომელიც არღვევს ძველს, სასიკვდილოდ განწირულ სოციალ-ეკონომიურ ფორმაციას. ეს გამოიხატა: სასაქონლო წარმოების განვითარებაში, ბურჟუაზიულ პრინციპებზე დამყარებული ფერმებისა და სამრეწველო უჯრედების შექმნაში, განვითარებულ სასოფლო-სამეურნეო იარაღებისა და დაჭირავებული შრომის შედარებით ფართოდ გამოყენებაში, საშინაო და საგარეო ვაჭრობის ზრდაში, ქალაქებისა და სა-

¹ „ივერია“, 1883, № 4, გვ. 87—88.

ქალაქო ცხოვრების დაწინაურებაში, გლეხებისა და მემამულეების კლასობრივი დიფერენციაციის საკმაოდ სიღრმით მიმდინარეობაში, ფეოდალური საკუთრების თანდათანობით მოშლაში, ანტიბატონყმური იდეოლოგიის ჩამოყალიბებაში, კლასობრივი ბრძოლის ჩვეულებრივზე მეტად გამწვავებაში და ა. შ.

ყოველივე ამან, მთავრობის საერთო პოლიტიკასთან ერთად, განაპირობა ბატონყმობის გაუქმება (1864—1871 წწ.), რომელმაც დასაბამი მისცა კაპიტალიზმის, როგორც გაბატონებული ფორმაციის არსებობას საქართველოში.

* * *

რეფორმის შემდეგდროინდელ ხანაში ბევრად უკეთესი პირობები შეიქმნა სოციალ-ეკონომიური განვითარებისათვის, მიუხედავად ფეოდალურ-ბატონყმურ ურთიერთობათა გადმონაშთების საგრძნობი მასშტაბით არსებობისა. მოიხსნა საწარმოო ძალების წინსვლა-განვითარების მრავალი დამაბრკოლებელი გარემოება და ქვეყანა მტკიცედ დაადგა საერთო აღმავლობის გზას. ამას დიდად შეუწყობ ხელი რკინიგზის გაყვანამ 70—90-იან წლებში. შეიძლება გადაუჭარბებლად ითქვას, რომ მიმოსვლის ამ ახალი საშუალების დანერგვამ ნამდვილი გადატრიალება მოახდინა ქართველი ხალხის სამეურნეო (და არა მარტო სამეურნეო) ცხოვრების ყველა დარგში. მან ერთმანეთს მჭიდროდ დაუკავშირა ჩვენი ქვეყნის სხვადასხვა რაიონი, აამოძრავა მოსახლეობა, ხალხმა სოფლიდან ქალაქს მიაშურა და იქ სავაჭრო-სამრეწველო საქმიანობა გაშალა, ბოლო მოეღო კარჩაკეტილობას. „საცა არ გაიხედავ,—წერდა გ. წერეთელი 1873 წელს,— ყველგან ნიშნავ უცხო ამბებსა ამ ჩვენს პაწაწინა ქვეყანაში. მიხვალ სურამის სტანციაზე და იქ დაგიხვდებიან იმერლები, რომელნიც გზაზე გადასარბენ ცეცხლის ეტლს ეშმაკივით ებლაუჭებიან და როგორც უნდათ და საითაც უნდათ, იქით წაიყვანენ. იქვე გადმოხვალთ ცეცხლის ეტლითგან და შეხედავ მეკურტნეებს... „ბატონო, მიბოძეთ თქვენი ბარგი, მოვიკიდებ ზურგზე და გასტინიცისკენ გავშებები“—ეს გურულებია. ობ, დიდება შენთვის ღმერთო. გურული და მეკურტნე, ეს რა ამბავია. გურულს იარაღი ხელში და წინ მტერი, — აი მისი საქმე... უწან რომ გურულისათვის კურტანი მიგეცა, თოფს გესროდა; ახლა კი თვითონ გეხვეწება, მიბოძე, მე წავიღებო, და თან კურტანსაც იკიდებს. გახვარა ზაზარში და შეხვალ ცეცხლის გემზე. იქ მატროსი ვინ არის? მეგრელი ან იმერელი... იქიდან ჩაჯდები ცეცხლის ეტლში და წამოხვალ. გზაზე ხონელი მიდის, ძარში ქათმები დაუმწყვდევია და კალათები კვერცხებით აქის სავსე. სად მიხვალ? — ვეუბნები — ტფილისში გიახლებით, საქმეც მაქვს და სავაჭროცო. ტფილისში მიხვალ,

მოიხედავ-მოიხედავ, გაეცნობი, ყველგან ლიხის მთის იქით მცხოვრებლებს ხედავ, რკინის გზა თითქოს იმერეთის ხალხისათვის გაეკეთებინოს, თითქოს მხოლოდ იმათ სცნეს იმისი სარგებლობა, ეცენ და ამის საშუალებით ტფილისი თავის სავაჭრო ქალაქად გახადესო. ისინი დღითიდღე მრავლდებიან ტფილისში და ტფილისის ბაზარში ამრავლებენ საქართველოს მიწა-წყლის ნაწარმოებს და აღიღებენ... აღებმიცემობას... რკინის გზამ ამ ხალხს მისცა საშუალება ტფილისში მოგზაურობისა და იქ აღებმიცემობის დაწყებისა. მართალია, ჯერ სამი წელიწადი არ გასულა, რაც რკინის გზა გაიხსნა, მაგრამ იმერლები ერთი-ორად გამრავლდნ ტფილისში“¹.

საერთო ეკონომიურმა აღმავლობამ თავისი გამოხატულება პოვა მრეწველობის შემდგომ განვითარებაში, სახალხო მეურნეობის ამ დარგში ადგილი ჰქონდა არა მარტო რაოდენობრივი, არამედ თვისებრივი ხასიათის ცვლილებებს. საქმე იმაშია, რომ მრეწველობაში მსხვილმა კაპიტალისტურმა წარმოებამ თანდათანობით უკან მოიტოვა წვრილი კაპიტალისტური და მანუფაქტურული წარმოება და გაბატონებული მდგომარეობა მოიპოვა. თუკი, მაგალითად, 1865—1866 წლებში მსხვილი კაპიტალისტური წარმოების ხვედრითი წონა საერთოდ კაპიტალისტურ სექტორში დამზადებული პროდუქციის ღირებულებაში მხოლოდ 7,7%-ს უდრიდა, მომდევნო ხანაში ის საგრძნობლად გაიზარდა და 1885—1886 წლებში 55,1%-ს მიაღწია, ხოლო 1900 წელს — 78,3%-ს. საკმაოდ სწრაფი იყო საფაბრიკო-საქარხნო წარმოების განვითარების ტემპი. რაღაც 3,5 ათეული წლის (1865—1900 წწ.) განმავლობაში ამ ტიპის საწარმოთა რაოდენობა 16-ჯერ გადიდა, 4-დან 64-მდე, ხოლო მათ მიერ გამოშვებული პროდუქციის ღირებულება — 20-ჯერ და მეტად (80 ათასი მანეთიდან 16 513 ათას მანეთამდე).

მოტანილი მასალიდან მკაფიოდ ჩანს, რომ უკვე გასული საუკუნის მიწურულისათვის მანქანურ წარმოებას დამუშავებელ მრეწველობაში წამყვანი ადგილი ეკავა. მან მრეწველობის ხსენებული დარგიდან ძირითადად გამოდევნა ხელით შრომა და ტონის მიმცემი თვითონ გახდა. სხვანაირად რომ ვთქვათ, მოხდა სამრეწველო რევოლუცია (გადატრიალება). რაც შეეხება სამთამადნო მრეწველობას, იქაც იგივე პროცესები მიმდინარეობდა, იმ განსხვავებით, რომ იქ სიახლე უფრო მოგვიანებით და შედარებით ნელი ტემპით იკაფავდა გზას.

მრეწველობის პროგრესს თან სდევდა ვაჭრობის, ქალაქებისა და საქალაქო ცხოვრების შემდგომი განვითარება, ახალი სავაჭრო-სამრეწველო დაბების გაჩენა. ამ პროცესის ერთ-ერთი მაჩვენებელია ქალაქის მოსახ-

¹ გ. წ ე რ ე თ ე ლ ი, ამ დროის მოძრაობა, ურნ. „კრებული“, 1873, №3, გვ. 213 - 214.

ლეობის შეუნელებელი ზრდა რეფორმის მომდევნო ხანაში. თუ მაგალითად, 1886 წელს საქართველოს ქალაქების მცხოვრებთა რაოდენობა 175 069 სულს უდრიდა, 1897 წელს ამ ციფრს საგრძნობლად გადააჭარბა და 300 590 მიაღწია, ე. ი. სულ რაღაც 11 წლის განმავლობაში 71,7%-ით გაიზარდა. უნდა აღინიშნოს ისიც, რომ ქალაქების მოზინადრეთა ზრდის ტემპი გაცილებით უფრო სწრაფი იყო, ვიდრე სოფლის მოსახლეობისა. პირველი მეორეს ოთხჯერ უსწრებდა.

რეფორმის შემდეგდროინდელ საქართველოში საკმაოდ ინტენსიურად მიმდინარეობდა ბურჟუაზიისა და პროლეტარიატის კლასებად ჩამოყალიბების ადრე დაწყებული პროცესი. ისინი უმთავრესად თავს იყრიდნენ თბილისში, ბათუმში, ქუთაისსა და ჭიათურაში. კაპიტალისტური საზოგადოების ამ კლასების კონცენტრირებამ ხსენებულ ქალაქებში საფუძვლიანად შეცვალა მოსახლეობის სოციალური სახე. შესაბამისად შეიცვალა ქალაქების კულტურა, წარსულს ჩაბარდა (ან ბარდებოდა) ფეოდალური ყოფის დამახასიათებელი ნიშნები და ატრიბუტები.

ძვრები სოფლის მეურნეობაში აღინიშნა სასაქონლო წარმოების შემდგომი განვითარებით. მისმა ყველა დარგმა, განსახილველ ხანაში, მკაფიოდ გამოხატული სავაჭრო-სამრეწველო ხასიათი მიიღო. ბატონყმობის გაუქმების შემდეგ მარცვლეული კულტურა, მევენახეობა-მელვინეობა, მესაქონლეობა, მებაღეობა, მებოსტნეობა და სხვ. უფრო მჭიდროდ დაუკავშირდა ბაზარს, ვიდრე ადრე, რეფორმამდე (სასაქონლო ღვინის ხვედრითი წონა, მაგალითად, კახეთში გაიზარდა 25%-დან 75%-მდე!). რაც შეეხება ისეთ კულტურებს, როგორიცაა ჩაი და თამბაქო, იქ წარმოება თავიდანვე უპირატესად კაპიტალისტურ საფუძვლებზე მოეწყო და ძირითადად საბაზრო პროდუქციის დამზადების სამსახურში ჩადგა. გასული საუკუნის 90-იანი წლების შუა ხანებში ქუთაისის გუბერნიის მოსახლეობა მხოლოდ ოთხი დარგის — მარცვლეულის, მევენახეობა-მელვინეობის, მეაბრეშუმეობისა და მეთამბაქოეობის — პროდუქციის გაყიდვით ღებულობდა ყოველწლიურად (საშუალოდ) 11 მილიონი მანეთის შემოსავალს. ამდენივეს ღებულობდა კახეთის მოსახლეობა, მაგრამ მარტო მევენახეობა-მელვინეობასთან დაკავშირებული საქმიანობიდან².

მნიშვნელოვნად გაღრმავდა გლეხთა კლასობრივი დიფერენციაციის პროცესი. კულაკების ძლიერი ბირთვი შეიქმნა მეურნეობის ყველა დარგში, მათ შორის მესაქონლეობაშიც. 80-იან წლებში, მაგალითად, სიღნაღის მაზრის სახელმწიფო გლეხთა საკუთრებაში მყოფი ცხვრების სა-

¹ И. Г. Антелава, Э. А. Орджоникидзе, Э. В. Хоштария, К вопросу о генезисе и развитии капитализма в сельском хозяйстве и промышленности Грузии, Тб., 1967, გვ. 47.

² იქვე.

ერთო რაოდენობის (249 848) 45,4% (ან 103 380 სული) კულაკების ხელში ყოფილა, რომელთა ხვედრითი წონა მხოლოდ 1,7%-ს უდრიდა¹. კიდევ უფრო ნათლად ვლინდება კლასობრივი დიფერენციაციის პროცესი გლეხთა ბიუჯეტების შესწავლისას. მათზე დაკვირვება გვიჩვენებს, რომ განსახრველი ხანის საქართველოს სოფელში ისეთი კულაკი გლეხების გვერდას, რომელთა ყოველწლიური წმინდა შემოსავალი რამდენიმე ათას მანეთს უდრიდა, არსებობდა უარყოფითი ბალანსის მქონე უშუალო მწარმოებელთა ძალზე მრავალრიცხოვანი ბირთვი². პირველს არა მარტო ლაღად ცხოვრების, არამედ მეურნეობის გაშლა-გაფართოების დიდი შესაძლებლობა ჰქონდა, ხოლო მეორე ძლივს იღვამდა სულს და დანაკლისს მესარეწოებითა და სამუშაო ძალის გაყიდვით ინაზღაურებდა. სამუშაო ძალის გაყიდვამ მასობრივი ხასიათი მიიღო. საგრძნობლად გაიზარდა იმათი რაოდენობა, ვისთვისაც ეს ცხოვრების ერთადერთ (ან უმთავრეს) წყაროს წარმოადგენდა. დაქირავებულ შრომაზე კი დიდი მოთხოვნილება იყო, რადგანაც მნიშვნელოვნად გაიზარდა კაპიტალისტურ საფუძვლებზე მოწყობილ წარმოება-მეურნეობათა რაოდენობა.

მძიმე დღეები დაუდგა ფეოდალურ საკუთრებას, შეუწელებელი ტემპით მიმდინარეობდა მისი მოშლა-ნგრევის პროცესი. სულ უფრო და უფრო მცირდებოდა „ბრწყინვალე“ წოდების მიწის ფონდი (გამონაკლისს შეადგენდნენ მეთაოსნე მემამულეები), რომელიც დიდი რაოდენობით გადიოდა გლეხების, ვაჭრებისა და სხვა არათავადაზნაურული წარმოშობის პირთა ხელში. თუ როგორი კატასტროფული სიჩქარით მიდიოდა ფეოდალური საკუთრების ნგრევის პროცესი იქიდანაც ჩანს, რომ მიმდინარე საუკუნის დასაწყისისათვის, უფრო ზუსტად 1904 წლისათვის, თბილისის გუბერნიის თავადაზნაურობის მიერ დაგირავებული იყო 652 898 დესეტინა მიწა ან კერძო მფლობელობაში მყოფი მიწების საერთო რაოდენობის 50%-ზე მეტი³. დამგირავებელი, როგორც წესი, დაგირავებულს უკან ვერ იბრუნებდა და სამუდამოდ ეთხოვებოდა მას. სწორედ ამიტომ ატეხა დიდი განგაში პრივილეგიურმა წოდებამ და ამ პროცესის შემჩერებელ ღონისძიებათა გატარება მოითხოვა. მაგრამ ცხოვრება ამას ანგარიშს არ უწევდა, უღმობლად არღვევდა საკუთრების ძველ ფორმას და განამტკიცებდა ახალ, უწოდებრივ საკუთრებას.

ფეოდალურ-ბატონყმურ ურთიერთობათა გადმონაშთების ამოძირკვისა და კაპიტალისტური ფორმაციის განმტკიცება-გამაგრების საქმეში მნიშვნელოვანი როლი ითამაშა კლასობრივმა ბრძოლამ, რომელიც, თითქოს, ერთგვარი მინელების შემდეგ უშუალოდ რეფორმის მომდევნო ხანაში,

¹ И. Г. Антелава, Э. А. Орд жоникидзе, Э. В. Хоштария,— К вопросу о генезисе и развитии капитализма в сельском хозяйстве и промышленности Грузии, Тб., 1967, გვ. 56—57.

² იქვე, გვ. 57—59.

³ იქვე, 65—66.

ისევე აზვირთდა ახალი ძალით. მართალია, 1864—1900 წლებში ჩვენს ქვეყანაში არ მომხდარა არც ერთი ისეთი სახალხო მღელვარება, რომელიც მონაწილეთა სიმრავლით და გავრცელების ტერიტორიით შეიძლება შევადაროთ, ვთქვათ, სამეგრელოს გლეხთა აჯანყებას უტუ მიქავას ხელმძღვანელობით, მაგრამ ეს გარემოება ოდნავადაც არ არღვევს ზემოთ გამოთქმულ შეხედულებას კლასობრივი ბრძოლის აღმავლობის შესახებ რეფორმის შემდეგდროინდელ საქართველოში. საქმე მარტო იმაში როდია, რომ ამ დროს უსამართლობასთან შერკინება უფრო სისტემატური გახდა, არამედ იმაშიც, რომ ამ შერკინებას უფრო მიზანდასახული, ორგანიზებული ხასიათი მიეცა და, რაც მთავარია, უფრო ძლიერი, მანამდე უცნობი მამოძრავებელი ძალა შეემატა. პროლეტარიატის გამოჩენამ ისტორიულ ასპარეზზე არა მარტო ახალ დონეზე აიყვანა საუკუნეების მანძილზე მიმდინარე გლეხთა კლასობრივი ბრძოლა, არამედ საფუძველი ჩაუყარა ბრძოლის სრულიად ახალსა და დამოუკიდებელ ფორმას — მუშათა მოძრაობას.

საზოგადოებრივ-ეკონომიური ცხოვრების აღორძინებამ გადამწყვეტი როლი შეასრულა ქართველი ხალხის ერად ჩამოყალიბების მრავალსაუკუნოვანი პროცესის დასრულებაში, ქართველთა ეროვნების ბურჟუაზიულ ერად კონსოლიდაციის საქმეში. კაპიტალიზმის განვითარების საფუძველზე წარმოშობილმა საზოგადოებრივმა მოთხოვნილებებმა ახალი იერი მისცა ქართველი ხალხის ყოფა-ცხოვრებას, აზროვნებას, კულტურას.

ძველი ქართული კულტურის განახლების მრავალსაუკუნოვანი პროცესი XIX საუკუნეში ახალი, ფორმით ეროვნული და შინაარსით ბურჟუაზიული ქართული კულტურის შექმნით და საბოლოო დამკვიდრებით დაგვირგვინდა; დიდი აღმავლობა განიცადა ახალმა ქართულმა ლიტერატურამ და საზოგადოებრივმა აზროვნებამ, სკოლამ და პრესამ, ხელოვნებამ და მეცნიერებამ. ახალი ქართული ჰუმანისტური და დემოკრატიული კულტურა, უწინარეს ყოვლისა, საქართველოს საზოგადოებრივი ცხოვრების განახლების, საკუთარი მოწინავე ტრადიციების განვითარების საფუძველზე წარმოიშვა, მაგრამ მისი ზრდა-განვითარებისათვის დიდი მნიშვნელობა ჰქონდა ქართველი ხალხის კულტურული ურთიერთობის გაფართოებას მეზობელ თუ შორეულ ხალხებთან. ახალი ქართული კულტურის გამარჯვება ერთბაშად და უბრძოლველად არ მომხდარა, მისი დამკვიდრების პროცესი საკუთარი და უცხოური კონსერვატიზმის თანდათანობით დაძლევის გზით მიმდინარეობდა. საქართველოში, ისევე როგორც ყველგან, ახლისა და ძველის ბრძოლაში საბოლოო ანგარიშით პროგრესული იმარჯვებდა კონსერვატულზე და ამის შედეგია ის დიდი კულტურული აღმავლობა, რომელიც XIX საუკუნეში შეიმჩნევა.

ქართველი ხალხის ბურჟუაზიულ ერად ჩამოყალიბების პროგრესული

პროცესის გაძლიერებას ხელი შეუწყო რუსეთთან საქართველოს შეერთებამ, რასაც დადებითი მნიშვნელობა ჰქონდა ჩვენი სამშობლოს მაშინდელი და მომავალი განვითარებისათვის. მაგრამ თვითმპყრობელურ-მემულურ-ბურჟუაზიული რუსეთი წარმოადგენდა ხალხთა საპყრობილეს, სადაც თვით რუსი ხალხის სოციალურ ჩაგვრასთან ერთად, გამეფებული იყო არარუს ხალხთა ეროვნულ-სოციალური ჩაგვრისა და შევიწროების, მათი ძალდატანებითი ასიმილაციის კოლონიური პოლიტიკა. ეროვნულ-კოლონიურმა ჩაგვრამ უკიდურეს საზღვარს მიაღწია 80—90-იან წლებში, როცა თვითმპყრობელობა აშკარად ცდილობდა ქართული კულტურის საბოლოოდ მოსპობასა და ქართველობის ძალდატანებით ასიმილაციას.

თავისუფლებისმოყვარე ქართველი ხალხი, რომელიც დიდად აფასებდა „საკუთარი“ თვითმპყრობელობის წინააღმდეგ მებრძოლი რუსი ხალხის დახმარებას, არასოდეს არ შერიგებია ეროვნულ-კოლონიური და სოციალური ჩაგვრის თვითმპყრობელურ პოლიტიკას. მან XIX საუკუნის დამდეგიდანვე აღიმალა ხმა ადგილობრივ და უცხო მჩაგვრელთა წინააღმდეგ. საქართველოს ეროვნულ-განმათავისუფლებელი მოძრაობა მთელი XIX საუკუნის მანძილზე წარმოადგენდა რუსეთის რევოლუციურ-განმათავისუფლებელი მოძრაობის და მისი მეშვეობით მსოფლიო რევოლუციური პროცესის შემადგენელ ნაწილს. მასში, ისევე როგორც სხვა ჩაგრულ ხალხთა მოძრაობაში, მეტ-ნაკლებად საზოგადოების ყველა პროგრესული კლასი და ფენა მონაწილეობდა. XIX საუკუნის საქართველოს განმათავისუფლებელმა მოძრაობამ ორი პერიოდი განვლო — თავადაზნაურულ-პროგრესული (1832—1863 წწ.) და ბურჟუაზიულ-დემოკრატიული (1864—1901 წწ.). პირველ პერიოდში და მთელი XIX საუკუნის მანძილზე გლეხთა მოძრაობა იყო ძირითადი მასობრივი ძალა, რომელიც ცარიზმის კოლონიურ პოლიტიკას ეწინააღმდეგებოდა. ეროვნულ მოძრაობაში მონაწილეობდნენ თავადაზნაურობის საშუალო და წვრილი ფენებიც, რომელთა განათლებული წარმომადგენლები ლიბერალურად იყვნენ განწყობილნი, მაგრამ ვერ მადლდებოდნენ ეროვნულთან ერთად სოციალური თავისუფლებისათვის ბრძოლის აუცილებლობის გაგებაზე. პროგრესული პატრიოტიზმის სულისკვეთებით იყო გამსჭვალული ი. ბაგრატიონის, ა. ჭავჭავაძის, გრ. ორბელიანისა და გ. ერისთავის, ს. დოდაშვილის და ნ. ბარათაშვილის მოღვაწეობა და მსოფლმხედველობა.

განმათავისუფლებელი მოძრაობის მეორე პერიოდში ეროვნული საკითხი აგრარულ საკითხს, ბატონყმობის ლიკვიდაციის საკითხს დაუკავშირდა. პატრიოტული მოძრაობა გაფართოვდა და გაღრმავდა. ჯერ კიდევ XIX საუკუნეებზე წარმოშობილი ახალი ქართული ეროვნული ენა, ლიტერატურა და აზროვნება საბოლოოდ დამკვიდრდა. სოციალური დიფერენცი-

აცია გაღრმავდა, კლასობრივი ბრძოლა გაძლიერდა. გაჩნდნენ ახალი სოციალური ძალები, რომლებიც ერის მეთაურობისათვის იბრძოდნენ. ეროვნულ საბურველში ნათლად ჩანდა აღმავალი ბურჟუაზიული დემოკრატიის (მესამე წოდების — გლეხობის, ხელოსნების, ინტელიგენციის, წვრილი და საშუალო ბურჟუაზიის) სოციალ-ეკონომიური ინტერესების დაპირისპირებულობა ბატონყმობისა და მისი გადმონაშთების — ცარიზმისა და კონსერვატიული თავადაზნაურობისადმი. ერთ ბანაკში ერთიანდებოდა ყველა პროგრესიტი, რომელნიც ვერ ურიგდებოდნენ კოლონიურ პოლიტიკას და მოითხოვდნენ საქართველოს ტერიტორიული მთლიანობის აღდგენას და დაცვას, მის ეკონომიურ აღორძინებას და პოლიტიკურ დემოკრატიზაციას, სხვა ხალხებთან ქართველი ხალხის ეროვნული თანასწორუფლებიანობის აღიარებას, ადგილობრივი თვითმმართველობის მინიჭებას ქართველი ხალხისათვის, ქართული ენისა და კულტურის დაცვას და დაუბრკოლებელ განვითარებას. იბრძოდა რა ამ პროგრამის პრაქტიკული განხორციელებისათვის, ეროვნული და სოციალური ჩაგვრის წინააღმდეგ სტიქიურად ამხედრებული ქართველი გლეხობა, იარაღით ცდილობდა ექსპლოატაციის ორმაგი უღლის მოშორებას, ხოლო დემოკრატიული ინტელიგენცია ბრძოლის იდეურ საშუალებებს აძლევდა უპირატესობას და უმთავრესად კულტურულ-საგანმანათლებლო მოღვაწეობით კმაყოფილდებოდა. ეროვნულ-განმათავისუფლებელი მოძრაობის გამოჩენილმა ხელმძღვანელებმა ი. ჭავჭავაძემ, ა. წერეთელმა, ი. გოგებაშვილმა, გ. წერეთელმა და სხვებმა შექმნეს მრავალი კულტურულ-საგანმანათლებლო დაწესებულება და ორგანო (ყურნალ-გაზეთები, თეატრი, წერა-კითხვის გამავრცელებელი, დრამატული და სხვა საზოგადოებანი, სკოლები, ბიბლიოთეკები), რომლებიც ქართველი ხალხის განათლებას და ეროვნული თვითშეგნების გაძლიერებას ემსახურებოდა.

განმანათლებლურმა მოძრაობამ და იდეოლოგიამ ყველაზე ფართოდ იჩინა თავი მწერლობაში. უფრო ადრინდელ თუ არა, XVIII საუკუნის მეორე ნახევრის ქართულ ლიტერატურაში მაინც ნათლად გამოჩნდა ახალ იდეურ-მხატვრულ ნაკადთა ჩანასახები, რომლებიც XIX საუკუნეში მძლავრ რომანტიკულ და კრიტიკულ-რეალისტურ ლიტერატურულ მიმდინარეობებად განვითარდნენ. XIX საუკუნის ახალმა ქართულმა ლიტერატურამ წარმოშვა ისეთი დიდი პოეტები და მწერლები, როგორც იყვნენ ნ. ბარათაშვილი, ი. ჭავჭავაძე, ა. წერეთელი, ა. ყაზბეგი, ვაჟა-ფშაველა და სხვ.

განმანათლებლური იდეოლოგია საქართველოში არა მარტო ლიტერატურული, არამედ ეროვნულ-სოციალური მოძრაობის თეორიული საფუძველიც იყო. ცალკეული ლიბერალურ-განმანათლებლური იდეები გზას იკაფავდა განმათავისუფლებელი მოძრაობის ჭერ კიდევ პირველ,

თავადაზნაურულ პერიოდში, ხოლო ბუჩუქუაზიულ-დემოკრატიულ პერიოდში ქართული განმანათლებლობა განვითარდა ჰუმანისტურ, რადიკალურ და ხალხოსნურ ნაკადთა შექცევლ მრავალმხრივ, რევოლუციურ-დემოკრატიულ მსოფლმხედველობად, რომელმაც მნიშვნელოვანი როლი შეასრულა მომავალი ბუჩუქუაზიულ-დემოკრატიული რევოლუციისათვის მშრომელი მასების მომზადებაში.

განმათავისუფლებელი მოძრაობის პროლეტარულ პერიოდში განმანათლებლობის მემკვიდრედ გამოვიდა სოციალ-დემოკრატია, რომლის რევოლუციურ-მარქსისტულმა მიმდინარეობამ, შეიარაღებულმა მეცნიერული სოციალიზმის თეორიით, უბრალოდ კი არ აითვისა რევოლუციურ-დემოკრატიული აზროვნების ტრადიციები, არამედ განავითარა, გააღრმავა, მეცნიერულად დაასაბუთა ისინი და გადატრიალება მოახდინა ქართული საზოგადოებრივი აზროვნების ისტორიაში.

წყაროები. საქართველოს ახალი ისტორიის წყაროები მეტად ვრცელია და მრავალფეროვანი. რუსეთის მთავრობა, ცდილობდა რა ახალი კოლონიის ათვისებას, თავის მოხელეებს მითითებებს აძლევდა შეესწავლათ ამიერკავკასიის ბუნებრივი პირობები, მისი წარმოება-აღებ-მიცემობის მდგომარეობა და ეკონომიური განვითარების შესაძლებლობანი. სპეციალისტი სტატისტიკოსები თუ უბრალო მოხელეები კრებდნენ და ამუშავებდნენ სათანადო მასალებს, რომელთა ნაწილი იმთავითვე სტამბურად იბეჭდებოდა და პრაქტიკულ საქმიანობაში გამოიყენებოდა.

1835 წელს პეტერბურგში გამოიცა ერთ-ერთი პირველი სტატისტიკური კრებული¹, რომელიც ფრაგმენტულ ცნობებს შეიცავდა და ვერ პასუხობდა პრაქტიკოს კოლონიზატორთა მოთხოვნილებას. 1838—1840 წლებში გამოქვეყნდა გაცილებით ვრცელი და სრულყოფილი სტატისტიკური ნაშრომები², რომლის პირველი და მეორე ნაწილი საქართველოს ეხება. იგი დაახლოებით სწორ წარმოდგენას იძლევა XIX ს-ის 20—30-იანი წლების საქართველოს სოციალ-ეკონომიურ მდგომარეობაზე.

საქართველოს XIX ს-ის პირველი ნახევრის ისტორიის უაღრესად ვრცელი და მრავალფეროვანი წყაროა კავკასიის არქეოლოგიური კომისიის მიერ შეკრებილ-გამოცემული აქტები³. მიუხედავად იმისა, რომ მასალის შერჩევაში შეიმჩნევა რედაქციის ტენდენციურობა, ამ ფუნდამენტალურ პუბლიკაციას გვერდს ვერ აუვლის საქართველოს XIX ს-ის პირველი ნახევრის ისტორიის ვერც ერთი მკვლევარი. აქტებში განსაკუთრებით ვრცლადაა ასახული მეფის მთავრობის პოლიტიკა და მის მოხელეთა

¹ Статистическое описание Закавказского края, СПб., 1835.

² Обзорение Российских владений за Кавказом, ч. I—IV, СПб., 1838—1840.

³ Акты, собранные Кавказской археографической комиссией, т. I—XII.

პრაქტიკული საქმიანობა, მაგრამ მკვლევარი ბევრ რამეს პოულობს აგრეთვე ქვეყნის სოციალ-ეკონომიური და კულტურული მდგომარეობის შესასწავლად.

ჩვენთვის საინტერესო ხანის ისტორიის შესასწავლად ძვირფას წყაროს წარმოადგენს რუსეთის იმპერიის კანონთა კრებულები¹. ამ კრებულებში მოთავსებულ მთავრობის დადგენილებებში მკითხველი იპოვის საყურადღებო მასალას ცარიზმის სოციალ-ეკონომიური პოლიტიკისა და საქართველოსა და ამიერკავკასიის საერთო მდგომარეობის დასახასიათებლად.

XIX ს-ის რეფორმის მომდევნო ხანაში რუსეთის ცენტრალურ გუბერნიებში საკმაოდ ნაყოფიერ საქმიანობას იწყებენ ერობები. ვ. ი. ლენინი მაღალ შეფასებას აძლევდა საერობო სტატისტიკას და მნიშვნელოვან როლს ანიჭებდა მას რუსეთის სოციალ-ეკონომიური განვითარების შესწავლის საქმეში. მაგრამ საქართველოში საერობო რეფორმა არ გატარებულა და, ბუნებრივია, ჩვენი ქვეყანა საერობო სტატისტიკის მოქმედების მიღმა დარჩა. ამიერკავკასიაში შემაჯამებელი ხასიათის სტატისტიკური მასალის შეკრება-დამუშავება დავალებული ჰქონდა მეფის მთავრობის ადგილობრივი მოხელეებისაგან შემდგარ სტატისტიკურ კომიტეტს, რომელმაც გამოსცა რამდენიმე კრებული². მისივე ხელმძღვანელობით გამოდიოდა კავკასიის კალენდრის ყოველწლიური ტომები და სხვა მასალა. მაგრამ ამ პუბლიკაციების კრიტიკული ანალიზი ცხადყოფს, რომ მრეწველობის, სოფლის მეურნეობის, მიწათმფლობელობის ფორმების და აგრარულ ურთიერთობათა სტატისტიკური შესწავლა ცუდად იყო დაყენებული. უვარგისი პროგრამით, არაპირდაპირი გზით შეგროვილი, მნიშვნელოვანწილად ისედაც დეფექტური სტატისტიკური მასალის დამუშავება წარმოებდა არამეცნიერული მეთოდებით.

შედარებით მეტ ნდობას იმსახურებს უწყებრივ დაწესებულებათა მიერ შეკრებილ-გამოცემული მასალები. სახაზინო ქონებათა ამიერკავკასიის სამმართველოს დავალებით მომზადებული პუბლიკაცია³, რომელშიც შესულია ა. არღუთინსკი-დოლგორუჟის, ს. მაჩაბლის, ფ. მარკოვის, ა. ერიცოვის, ე. იოსელიანის, დ. ნოსოვიჩის, ი. ბახტაძის, ქ. ვერმიშევაჟა, ნ. ნიკიფოროვის და სხვ. მიერ შედგენილი საქართველოს სხვადასხვა შაზრის სახელმწიფო გლეხთა სოციალ-ეკონომიური მდგომარეობის საკმაოდ დეტალური აღწერა, უდავოდ კარგი წყაროა მიწათმფლობელობა-

¹ Полное собрание законов Российской империи.

² Сборник сведений о Кавказе, т. I—IX, 1871—1885; Сборник статистических данных о землевладении и способах хозяйства в пяти губерниях Закавказского края, 1899; Сборник статистических сведений по Закавказскому краю, 1902.

³ Материалы для изучения экономического быта государственных крестьян Закавказского края, т. I—VII, 1885—1887.

სარგებლობის ფორმების, სავაჭრო მიწათმოქმედების, მევახშეობის, გლეხთა სოციალური ღიფერენციაციის და სხვ. საკითხების შესასწავლად. ბეერ საყურადღებო ცნობას შეიცავს აგრეთვე ზემოხსენებული მასალების საფუძველზე დაწერილი ეგიაზაროვის, ი. ანდრონიკაშვილის, ქ. ვერმიშევის, მ. კუჩაევის და სხვათა გამოკვლევები, რომელნიც შედის ხუთტომეულში¹. მართალია ჩამოთვლილ მკვლევართა ბევრი დასკვნა არასწორია, მაგრამ მასალის მნიშვნელოვანი ნაწილი უდავოდ გასათვალისწინებელია.

სავაჭრო მიწათმოქმედების განვითარების და სოფლის მეურნეობის დარგობრივი სპეციალიზაციის პროცესის გასაშუქებლად დიდი მნიშვნელობა აქვს სააქციზო სამმართველოს, საფილოქსერო კომიტეტისა და რკინიგზის სამმართველოს პუბლიკაციებს², რომლებიც ყოველწლიურად გამოდიოდა. სასაქონლო-ფულადი ურთიერთობის განვითარების დონისა და აგრარული ევოლუციის ზოგი საკითხის შესასწავლად საყურადღებო ცნობებს შეიცავს სახელმწიფო საგლეხო ბანკის მოქმედების ამიერკავკასიაზე გავრცელებასთან დაკავშირებით შეკრებილ-დამუშავებული მასალა³. საქართველოს კერძო მესაკუთრეებისა და მიწათმფლობელების სიდიდის მიხედვით მათი ღიფერენციაციის გასათვალისწინებლად თითქმის ერთადერთი წყაროა ფ. გოგიჩაიშვილის რედაქციით შესანიშნავად გამოცემული კრებული⁴. მოსახლეობის რაოდენობის, მხარის ეკონომიური და კულტურული მდგომარეობის შესახებ გარკვეული ცნობები მოიპოვება გუბერნატორთა ყოველწლიურ ანგარიშებსა და მათ დამატება „ობზორებში“. კაპიტალისტური ურთიერთობის განვითარების დონის დასადგენად უდავოდ დიდი მნიშვნელობა აქვს 1897 წლის საყოველთაო აღწერის მასალას, რომელიც საინტერესო ცნობებს შეიცავს დამჭირავებელთა და დაჭირავებულთა რაოდენობის შესახებ.

სტატისტიკური მასალის დამუშავება-გამოცემის საქმეში თვისებრივი გარდატეხა ხდება რევოლუციის შემდეგ. XX ს. 20-იანი წლებიდან თანდათან გამდიდრდა ისტორიული მეცნიერების დოკუმენტური ბაზა. მეცნიერულად დამუშავებული სტატისტიკური და სხვა სახის მასალა დიდი

¹ Свод материалов по изучению экономического быта государственных крестьян Закавказского края, т. I—V, 1881—1888.

² Обзор отраслей промышленности в Закавказском крае, служащих источником косвенных налогов и поступления акцизного по краю дохода, 1900—1912; Сборник сведений по виноградарству и виноделию на Кавказе, вып. I—VIII, 1896—1897; Краткий обзор коммерческой деятельности Закавказской железной дороги.

³ Материалы по вопросу о распространении действий крестьянского поземельного банка на Закавказский край, 1904.

⁴ Сборник статистических сведений о частном земледелии в Тифлисской и Кутаисской губерниях, 1910.

რაოდენობით იბეჭდება „საისტორიო მოამბის“ ტომებში. სოფლის მეურნეობის და აგრარულ ურთიერთობათა შესახებ არსებული საარქივო მასალის დამუშავება-პუბლიკაციის საქმეში დიდი როლი შეასრულა პ. გუგუშვილმა¹. საგლეხო რეფორმის ისტორიის გაშუქებისათვის შესანიშნავი დოკუმენტური ბაზა შექმნა შ. ჩხეტიამ². იგი სათავეში უდგას აგრეთვე საქართველოს ისტორიის დოკუმენტთა მრავალსერიიანი კრებულის მომზადების საქმეს, რომლის პირველი ტომი უკვე გამოქვეყნდა³.

მართალია, მასალების პუბლიკაციის საქმე გაუმჯობესდა და გაფართოვდა, მაგრამ გამოქვეყნებული კრებულები საკმაოდ დოკუმენტურ ბაზას როდი ქმნის ისტორიული მეცნიერებისათვის. მკვლევარებს კვლავ დიდი შრომის ჩატარება სჭირდებათ საბჭოთა კავშირის არქივებში. არქივის მტვერწყარილი დოკუმენტები, რომლებიც თანდათან შემოდის სამეცნიერო ბრუნვაში, პერიოდულ პრესასთან ერთად, ჯერ კიდევ მეცნიერული ნაშრომის მთავარ საშენ მასალას წარმოადგენს.

XIX საუკუნის საქართველოს ეკონომიური და პოლიტიკური ისტორიის ზემოხსენებულ პირველწყაროებთან ერთად ახალი ქართული კულტურისა და საზოგადოებრივი აზროვნების მეცნიერული შესწავლისათვის პირველწყაროებს წარმოადგენენ მხატვრულ-ლიტერატურული ნაწარმოებები, საზოგადოებრივ-პოლიტიკური და ესთეტიკურ-ფილოსოფიური, პედაგოგიური და ისტორიულ-ეთნოგრაფიული ნაშრომები. დიდმნიშვნელოვან წყაროა აგრეთვე, მწერალთა, მოაზროვნეთა, ეროვნულ-კულტურული და სოციალურ-პოლიტიკური მოძრაობის მოღვაწეთა ბიოგრაფიული და სხვა ხასიათის დოკუმენტების შემცველი კრებულები⁴ და მემუარული მასალები⁵.

ჯერჯერობით არ მოგვეპოვება სპეციალური ბიბლიოგრაფიული ან ისტორიოგრაფიული ნაშრომი, რომელშიც სრულად იქნებოდა აღრიცხული და კრიტიკულად მიმოხილული ახალი ქართული კულტურისა და აზ-

¹ П. Г у г у ш в я л и, Сельское хозяйство и аграрные отношения, т. I, III, IV.

² შ. ჩ ხ ე ტ ი ა, საგლეხო რეფორმის ისტორიისათვის საქართველოში, თბ., 1950.

³ Документы по истории Грузии, т. I, 1957.

⁴ ი. მ ე უ ნ ა რ გ ი ა, ქართველი მწერლები, I, II, 1944—1954; გ. გ ო ზ ა ლ ი - შ ვ ი ლ ი, 1832 წლის შეთქმულება, 1933; Г. Т у м а н о в, Характеристики и воспоминания, 1913. კრ. „ილია ჭავჭავაძის სიკვდილი და დასაფლავება“. 1907, „იაკობ გოგებაშვილის სახსოვრად“, 1913. ა. ი ო ვ ი ძ ე, „იაკობ გოგებაშვილი“, 1951; გ ი ო რ გ ი ვ ი რ ე თ ე ლ ი — მასალები („საისტორიო მოამბე“, VI, 1952).

⁵ ბ. ყ ი თ ი ა ნ ა, მემუირები, ს. ხუნდაძის რედ., 1931; ნ. ნ ი კ ო ლ ა ძ ე, მოგონებანი (რჩ. ნაწერები, 1, ს. ხუნდაძის, რედ., 1931); И. Д ж а б а д а р и, Процесс 50-ти (Былое, 1907, № 8, 9, 10); შ. დ ა ვ ი თ ა შ ვ ი ლ ი, ნაროდნიკული მოძრაობა საქართველოში, 1937; ს. მ გ ა ლ ო ბ ლ ი შ ვ ი ლ ი, მოგონებანი, 1938; გ. ლ ა ს ხ ი შ ვ ი ლ ი, მემუარები, 1934; ე. თ ა ყ ა ი შ ვ ი ლ ი, მოგონებანი (რჩ. ნაშრომები, 1, 1968); ი. მ ა ნ ს ვ ე ტ ა შ ვ ი ლ ი, მოგონებანი, 1936.

როვნების ისტორიის პირველწყაროები. ამ რთულ და ძნელ საქმეს მნიშვნელოვნად აადვილებს ქართული წიგნებისა და ჟურნალ-გაზეთების უკანასკნელ დროს არცთუ მცირერიცხოვანი ბიბლიოგრაფიული გამოცემანი¹, რომლებშიც გაბნეულია საჭირო, თუმცა არასრული ცნობები ახალი ქართული კულტურისა და აზროვნების ისტორიის წყაროებზე. ამგვარი ცნობების მოშველიება აუცილებელია რუსული და დასავლური ბიბლიოგრაფიული და ისტორიოგრაფიული გამოცემებიდანაც; იქაურ მასალას გვერდი ვერ აევლება, ჯერ ერთი, იმიტომ რომ ახალი ქართული კულტურა და აზროვნება რუსულ-დასავლეთეგროპულთან ურთიერთობაში ვითარდებოდა და, მეორეც, არაერთი ქართული პირველწყარო, არა მარტო ხელნაწერი, არამედ ბეჭდვითიც, ზოგჯერ თვით პერიოდული პრესის მთელი ორგანოც, მხოლოდ მოსკოვისა და ლენინგრადის წიგნსაცავებსა და არქივებშია დაცული.

ახალი ქართული კულტურისა და საზოგადოებრივი აზროვნების პირველწყაროთა უდიდესი უმრავლესობა საქართველოს წიგნსაცავებსა და საარქივო დაწესებულებებში ინახება (ე. მარქსის სახელობის საქართველოს რესპუბლიკური საჯარო ბიბლიოთეკა, უნივერსიტეტის და მეცნიერებათა აკადემიის ბიბლიოთეკები, ე. კეკელიძის სახელობის ხელნაწერთა ინსტიტუტი, გ. ლეონიძის სახელობის ლიტერატურული მუზეუმი, ქუთაისის ისტორიულ-ეთნოგრაფიული მუზეუმი, საქართველოს ცენტრალური ისტორიული არქივი). პირველწყაროთა შედარებით მცირე ნაწილი გამოუქვეყნებელია, უფრო დიდი ნაწილი პრესაშია გამოქვეყნებული², ბევრიც ცალკე წიგნებად და კრებულებებად გამოცემული³. XIX საუკუნის ქარ-

¹ ქართული წიგნი, I, 1941; გ. ი. ბ ა ქ რ ა ძ ე, ქართული პერიოდიკის ბიბლიოგრაფია, 1947; თ. მ ა ჭ ა ვ ა რ ი ა ნ ი, ქართული ჟურნალებისა და გაზეთების ანალიტიკური ბიბლიოგრაფია, I, 1940; ქართული გაზეთების ანალიტიკური ბიბლიოგრაფია I—V, 1942—1967; А. А б р а м и ш в и л и, Грузинская периодика, 1968; დ. კ ა რ ი - კ ა შ ვ ი ლ ი, ქართული პერიოდული გამოცემების ბიბლიოგრაფიული მიმოხილვა („წიგნის მეგობარი“, 1925, № 1—2); თ. მ ა ჭ ა ვ ა რ ი ა ნ ი, ნიკო ნიკოლაძის არქივის კატალოგი, 1—11, 1954—1964.

² „სალიტერატურონი ნაწილნი ტფილისის უწყებათანი, „ცისკარი“, „საქართველოს მოამბე“, „დროება“, „ივერია“, „ტიფლისკი ვესტნიკი“, „სასოფლო გაზეთი“, „კრებული“, „ობზორი“, „ნოვოე ობზორენიე“, „კვალი“, „მოამბე“ და სხვ.

³ ი. ბ ა გ რ ა ტ ი ო ნ ი, კალმასობა, ე. კეკელიძის და ა. ბარამიძის რედ., I, II, 1936—1948; ა. ჭ ა ვ ჭ ა ვ ა ძ ე, თხზულებანი, ი. გრიშაშვილის რედ., 1946; გ. რ. ო რ . ბ ე ლ ი ა ნ ი, თხზ., ი. გაწერელის რედ., 1948; ნ. ბ ა რ ა თ ა შ ვ ი ლ ი, თხზულებანი, 1938; გ. ე რ ი ს თ ა ვ ი, თხზულებანი, 1966; ს. დ ო დ ა შ ვ ი ლ ი, თხზულებანი, ა. ბოქორიშვილის და ს. ხუციშვილის რედ., 1961; დ. ჭ ო ნ ჭ ა ძ ე, სურამის ციხე, მ. ზანდუკელის რედ., 1932; ი. ჭ ა ვ ჭ ა ვ ა ძ ე, თხზ., სრ. კრებული, პ. ინგოროყვას რედ., I—X, 1949—1961; ა. წ ე რ ე თ ე ლ ი, თხზ., სრ. კრებული, გ. აბზიანიძის, ლ. ასათიანის და სხვათა რედ., I—XV, 1950—1963; ი. გ ო გ ე ბ ა შ ვ ი ლ ი, თხზ., სრ. კრე-

თველ მწერალთა და მოაზროვნეთა ნაწერებიდან ჯერჯერობით გამოცემულია ა. ჭავჭავაძის, გრ. ორბელიანის, ს. დოდაშვილის, გ. ერისთავის, ნ. ბარათაშვილის, ა. წერეთლის, ი. გოგებაშვილის, ა. ყაზბეგის, ვაჟა-ფშაველას, ი. ჭავჭავაძის, ს. მესხის თხზულებათა სრული კრებულები. არქივებსა და ძველ ჟურნალ-გაზეთებშია საძიებელი ი. ბაგრატიონის, გ. წერეთლის, ნ. ნიკოლაძის, ა. ფურცელაძის, ს. ჭრელაშვილის ნაწერების უმრავლესობა. სრული კრებულებიც ყოველთვის როდია ნამდვილად სრული და აკადემიური გამოცემანი, რომელნიც დააკმაყოფილებდა თანამედროვე მეცნიერულ მოთხოვნებს, თუმცა საერთოდ ამისათვის დიდი ხანია ზრუნავენ მკვლევარ-გამომცემელნი (დ. ბაქრაძე, ზ. ჭიჭინაძე, ს. ფირცხალავა, გედევანიშვილი, ს. ხუნდაძე, ე. კეკელიძე, ა. აბაშელი, ლ. ასათიანი, პ. ინგოროყვა, ა. ბარამიძე, ს. ყუბანიეიშვილი, ვ. ქაჯაია, გ. აბზიანიძე, დ. გამეზარდაშვილი, ი. ბოცვაძე, ს. ხუციშვილი და სხვ.). დღესდღეობით თვით ი. ჭავჭავაძის თხზულებათა ნამდვილად სრული აკადემიური გამოცემაც არ მოგვეპოვება. დღემდე არაა დასრულებული გ. წერეთლისა და ნ. ნიკოლაძის თხზულებათა მრავალტომიან მეცნიერულ გამოცემათა ს. ხუნდაძის მიერ დაწყებული საქმე (ს. ხუნდაძემ გამოსცა გ. წერეთლის ერთი ტომი, ნ. ნიკოლაძისა — ორი, დ. გამეზარდაშვილმა — ნ. ნიკოლაძის ხუთი ტომი). ორ წიგნად დაბეჭდილი ნაწილი ი. ბაგრატიონის „კალმასობისა“ არ შეიცავს ზოგ ისეთ თავს, რომელსაც გარკვეული მნიშვნელობა აქვს საკუთრივ კულტურის და აზროვნების ისტორიის შესწავლისათვის. მეტ-ნაკლებად იგივე ითქმის ახალი ქართული აზროვნებისა და კულტურის ზოგი სხვა მოღვაწის ცალკეულ ნაწარმოებებზე, რომლებიც ჟურნალ-გაზეთებსა თუ არქივებშია საძებარი (ა. ფურცელაძე, ს. ჭრელაშვილი და სხვ.). ამგვარი ხარვეზების მიუხედავად, ახალი ქართული კულტურისა და საზოგადოებრივი აზროვნების წყაროთმცოდნეობამ განსაკუთრებით უკანასკნელი ორმოცი წლის მანძილზე ისეთ დონეს მიაღწია, რომ მის საფუძველზე შეიქმნა საკმაოდ მდიდარი სამეცნიერო-საისტორიო ლიტერატურა.

ისტორიოგრაფია. მეტად ვრცელია XIX ს-ის საქართველოს რევოლუციამდელი ისტორიოგრაფია, მაგრამ ჩვენ დავასახელებთ მხოლოდ ზოგიერთ შრომას. კავკასიის ომების გაშუქებაში შედარებით მეტი

ბული, I—X, ვ. ქაჯაიას და სხვათა რედ., 1952—1965; ა. ყაზბეგი, თხზ. სრ. კრებული, I—IV, 1947—1950; ვაჟა-ფშაველა, თხზ. სრ. კრებული, I—V, 1961; ე. ნინოშვილი, თხზ. სრ. კრებული, I—III, ს. ხუნდაძის რედ., 1930; გ. წერეთელი, თხზ. სრ. კრებული, I, ხუნდაძის რედ.; ნ. ნიკოლაძე, რჩ. ნაწერები, I—II ს. ხუნდაძის რედ., 1931; ნ. ნიკოლაძე, თხზ. სრ. კრებული, I—V, დ. გამეზარდაშვილის რედ., 1961—1966 და სხვ.

წვლილი აქვთ შეტანილი დუბროვინს¹, პოტოს², მურავიოვს³, ზიკოვს⁴ და სხვ. ავტორებს. საქართველოსა და ამიერკავკასიის სოციალურ-პოლიტიკური ისტორიის ბევრი საკითხი გაშუქებულია ს. ესაძის ნაშრომებში⁵. სავაჭრო მევენახეობა-მეღვინეობის შესწავლით დაინტერესებული მკვლევარი საჭირო ცნობებს პოულობს მ. ბალასის ვრცელ ნაშრომში⁶ და ს. ტიმოფეევის პატარა გამოკვლევაში⁷. აგრარული საკითხის დამუშავების დროს მკვლევარი გვერდს ვერ აუვლის ს. ავალიანის ოთხტომეულს⁸. ამავე საკითხებზე საინტერესო მასალას შეიცავს აგრეთვე ო. სიომინის⁹, ი. სეგალის¹⁰ და სხვ. ავტორთა ნაშრომებიც.

რევოლუციამდელ ხანაში გამოცემული პირველი წყაროები და ლიტერატურა საკმაო მასალას შეიცავს მეფის მთავრობის სოციალ-ეკონომიური პოლიტიკის, მხარის მოსახლეობის, ეკონომიკის და სხვ. საკითხების გაშუქებისათვის. მაგრამ ძალიან ხშირად ეს მასალა არასანდო და წინააღმდეგობრივია. მკვლევარს მართებს დიდი სიფრთხილით შეარჩიოს ცნობები და მხოლოდ ის გამოიყენოს მეცნიერული ისტორიის საშენ მასალად.

ცარიზმის ოფიციალური ისტორიკოსები ყოველნაირად აზვიადებდნენ მეფის მთავრობის „ცივილიზატორულ“ როლს, ცდილობდნენ ყველა დადებითი მოვლენა მისი პოლიტიკის ნაყოფად გამოეცხადებინათ, მიეჩქმალათ ადგილობრივი ძალების დამსახურება ქვეყნის პროგრესულ განვითარებაში და სხვ.

გარკვეული ტენდენციურობა ახასიათებდა ოპოზიციურ ისტორიოგრაფიასაც.

რევოლუციამდელი არამარქსისტი ისტორიკოსები კაპიტალიზმს განიხილავდნენ როგორც მხოლოდ ტექნიკურ პროგრესს. ისინი სწავლობდნენ სამრეწველო და სასოფლო-სამეურნეო საწარმოთა ტექნიკურ-ეკონომიურ მხარეს, კაპიტალისტური ფორმაციის სოციალური შინაარსი კი მათი კვლევა-ძიების ინტერესთა სფეროში არც შედიოდა. კიდევ მეტი: ხალხოსნური, სოციალ-ფედერალისტური და ლიბერალურ-ბუტრკუაზიული

VI. ¹ В. Дубровин, История воин и владычества русских на Кавказе, т. I—

² В. Потто, Кавказская война, т. I—IV.

³ Муравьев, Война за Кавказом в 1855 году.

⁴ С. Зиков, Война в Малой Азии, т. III.

⁵ С. Эсадзе, Историческая записка об управлении Кавказом, т. I—II, 1907.

⁶ М. Баллас, Виноделие в России, т. II, III, 1896.

⁷ С. Тимофеев, Сбыт Кавказских вин, 1895.

⁸ С. Авалиани, Крестьянский вопрос в Закавказье, т. I—IV, 1912—1920.

⁹ О. Семин, Великая годовщина, 1911.

¹⁰ И. Сегаль, Крестьянское землевладение в Закавказье, 1912.

მიმდინარეობის პუბლიცისტები და მკვლევარები, წინასწარ შემუშავებული თვალსაზრისის გავლენით თუ სხვა მოსაზრებათა გამო, თითქმის ყურადღების გარეშე ტოვებდნენ ქვეყნის კაპიტალისტური განვითარების პროცესს. თვალს ხუჭავდნენ და არ ამჩნევდნენ გლეხობის კლასობრივ დიფერენციაციას, ბურჟუაზიისა და პროლეტარიატის ჩამოყალიბების ფაქტს. მათი უმრავლესობა წვრილ წარმოებას არსებულ პირობებში ნორმალურ, სამარადისო მოვლენად თვლიდა, მსხვილ კაპიტალისტურ საწარმოებს კი შემთხვევითობად აცხადებდა. ამიტომ, რომ რევოლუციამდელ ლიტერატურაში, თუ მხედველობაში არ მივიღებთ მარქსისტთა მემკვიდრეობას, კაპიტალიზმის შესახებ არ გვხვდება არც ერთი სერიოზული გამოკვლევა. ს. გულიშამბაროვის ნაშრომები¹ საქართველოსა და ამიერკავკასიაში არსებული ფაბრიკა-ქარხნების ზერელე მიმოხილვას წარმოადგენს. ქ. ვერმიშევმა ი. მუხრან-ბატონის მეურნეობის მაგალითზე შეისწავლა მემამულური მეურნეობის ევოლუცია, მაგრამ მის გამოკვლევაშიც წინა პლანზეა წამოწეული შრომამოგების საფუძველზე არსებული მარცვლელი მეურნეობა და შედარებით მიჩქმალულია კაპიტალისტურად გამართული მეღვინეობა.

ვ. ი. ლენინი თავიდანვე იბრძოდა ქვეყნის განვითარების ისტორიულ-ობიექტური პროცესის მრუდე სარკეში წარმოჩენის წინააღმდეგ. ჭერ კიდევ XIX ს-ის 90-იან წლებში მან სიცხადე შეიტანა ხალხოსნების მიერ დაბურღული სტატისტიკური მასალის ლაბირინთში და გვიჩვენა, რომ მთელი რუსეთის იმპერია XIX საუკუნეში კაპიტალისტურად ვითარდებოდა, რომ კაპიტალისტურ ხასიათს ატარებდა არა მარტო ფაბრიკულ-ქარხნული მრეწველობა, არამედ ამავე გზით ვითარდებოდა შინამრეწველობა — ხელოსნობა და სოფლის მეურნეობაც.

მარქსისტულ-ლენინური მოძღვრებით შეიარაღებული ქართული საბჭოთა ისტორიული მეცნიერება დიდ ყურადღებას აქცევს საქართველოს XIX საუკუნის ისტორიის დამუშავებას.

საბჭოთა ისტორიკოსებმა დაძლიეს რევოლუციამდელი არამარქსისტული ისტორიოგრაფიის მსოფლმხედველობრივ-მეთოდოლოგიური ნაკლი და კვლევა-ძიება ახალ მაღალ საფეხურზე აიყვანეს. უკვე XX ს-ის 20 — 30-იან წლებში გამოქვეყნდა ფ. მახარაძის, გ. გიორგაძის, ნ. ბერძენიშვილის, პ. გუგუშვილის, გ. ხაჭაპურიძის და სხვ. ნაშრომები. განსაკუთრებით დიდი ყურადღება ექცეოდა საქართველოს XIX საუკუნის ისტორიის უმთავრესი პრობლემის — კაპიტალიზმის ჩასახვა-განვითარების პრობლემის დამუშავებას.

ნ. ბერძენიშვილი XVIII ს-ის ქართლ-კახეთში არსებული სამღებრო-

¹ С. Гулишамбаров, Обзор фабрик и заводов Тифлисской губернии, 1888; Обзор фабрик и заводов Закавказского края, 1894.

ების დეტალური შესწავლის საფუძველზე იმ დასკვნამდე მივიდა, რომ ეს საწარმოები იყო ჩვენში უფრო გვიან წარმოქმნილი კაპიტალისტური მანუფაქტურების წინამორბედი, რომ XVIII ს-ის მეორე ნახევრის ქართლ-კახეთში უკვე ჩნდებოდა კაპიტალისტური ურთიერთობის ჩანასახები¹.

პ. გუგუშვილმა წამოაყენა დებულება, რომ ბურჟუაზიული ურთიერთობა ჩიხისა ფეოდალიზმის წიაღში XIX ს-ის პირველ ნახევარში, რომ კაპიტალისტურმა მრეწველობამ საქართველოში გაიარა ყველა სტადია პირველიდან უმაღლეს ფორმამდე. რამდენიმე საწარმოს შესწავლის საფუძველზე პ. გუგუშვილი ასკვნიდა, რომ რეფორმამდელ საქართველოში უკვე სახეზეა კაპიტალისტური მრეწველობის მანუფაქტურული სტადია².

კაპიტალიზმის გენეზისის საკითხის დამუშავებას თავიდანვე დიდი მნიშვნელობა ენიჭებოდა საქართველოს ახალი ისტორიის პერიოდიზაციის დადგენისა და საერთოდ ახალი ისტორიის სისტემატური კურსის შექმნისათვის. ამ საკითხის კვლევა საგრძნობლად წავიდა წინ XX ს-ის 40—50-იან წლებში. თანდათან გამოიკვეთა ორი ტენდენცია, ორი თვალსაზრისი. მკვლევართა ერთი ნაწილი იმ დასკვნამდე მივიდა, რომ საქართველოში კაპიტალისტური ურთიერთობის ჩანასახები არსებობდა ჯერ კიდევ XVIII ს-ის მეორე ნახევარში, XIX ს-ის შუა ხანებისათვის ჩამოყალიბდა კაპიტალისტური წყობა, ხოლო 60—70-იანი წლების მიჯნაზე საბოლოოდ გაიმარჯვა კაპიტალისტურმა ფორმაციამ. მკვლევართა მეორე ნაწილს მიაჩნია, რომ რეფორმამდელ საქართველოში კაპიტალიზმის მხოლოდ მცირე ჩანასახები არსებობდა და კაპიტალისტური წყობა მხოლოდ ბურჟუაზიული რეფორმების შემდეგ, XIX ს-ის 70-იან წლებში ჩამოყალიბდა.

1954 წლის ივნის-ივლისში ივ. ჯავახიშვილის სახ. ისტორიის ინსტიტუტმა კაპიტალიზმის გენეზისის საკითხებზე მოაწყო დისკუსია, რომელზეც ხსენებულმა ორმა თვალსაზრისმა მკაფიოდ იჩინა თავი.

ამ დისკუსიის შემდეგ კიდევ უფრო ინტენსიურად გაგრძელდა კაპიტალიზმის გენეზისის საკითხების კვლევა. გამოქვეყნდა მრავალი საყურადღებო ნაშრომი³. სამეცნიერო ბრუნვაში დიდი როლდენობით შევიდა ახალი მასალა. ამჟამად მკვლევართა უმრავლესობა კაპიტალისტური წყო-

¹ ნ. ბ ე რ ძ ე ნ ი შ ვ ი ლ ი, სამღებროთა შესახებ XVIII ს-ის საქართველოში. მკსი, ნაკ. VI, 1937.

² პ. გ უ გ უ შ ვ ი ლ ი, მანუფაქტურული წარმოების ისტორიისათვის ამიერკავკასიაში, მსკი, ნაკ. III, 1939.

³ პ. გ უ გ უ შ ვ ი ლ ი, საქართველოსა და ამიერკავკასიის ეკონომიკური განვითარება. I—V; Развитие промышленности в Грузии и Закавказье в XIX—XX вв; Ш. К. Ч х е т и я, Тифлис в XIX столетии, 1942; И. Г. А н т е л а в а, К вопросу о характере экономического развития Грузии в предреформенный период, ТАИ, 1956;

ბის ქრონოლოგიურ ჩარჩოებს განსაზღვრავს XIX საუკუნის 30 — 60-იანი წლებით და არ გამორიცხავს ახალი ფორმაციის ჩანასახთა არსებობას. XVIII ს-ის მეორე ნახევარსა და XIX ს-ის პირველ მესამედში.

ქვეყნის კაპიტალისტური განვითარების ძალა და მოთხოვნილება, ანტიბატონწყმური საზოგადოებრივი აზრი, გლეხთა მოძრაობა და საერთოდ რევოლუციური სიტუაცია აიძულებდა ცარიზმს გაეტარებინა ბურჟუაზიული რეფორმები და დროის მოთხოვნილების შესაბამისად შეეცდებინა რუსეთის იმპერიის სოციალურ-პოლიტიკური შენობა. საქართველოში ფეოდალური და კაპიტალისტური ფორმაციების წყალგამყოფად ბურჟუაზიული რეფორმებია მიჩნეული. ამ რეფორმების წინაპირობების, რეფორმების გატარებისა და შედეგების შესახებ საკმაო ლიტერატურა დაგროვდა (პ. გუგუშვილი, შ. ჩხეტია და სხვ.).

განსაკუთრებით დიდი ყურადღება ეთმობა რეფორმის მომდევნო ხანის საქართველოში კაპიტალისტური ურთიერთობის განვითარების შესწავლას. კაპიტალიზმის განვითარება მრეწველობაში გაშუქებულია პ. გუგუშვილის დასახელებულ მონოგრაფიებში, გ. ბაქრაძის, შ. ტყეშელაშვილის, ედ. ხოშტარიას, ნ. როდონაიას, გ. მარგიანის და სხვ. ნაშრომებში¹. ამ გამოკვლევებში მეტ-ნაკლები სიღრმე-სისრულითაა შესწავლილი მრეწველობის სხვადასხვა ფორმა (ხელოსნობა, შინამრეწველობა, კაპიტალისტური საწარმოები), კაპიტალისტური მრეწველობის სტადიები (მარტივი კაპიტალისტური კოოპერაცია, მანუფაქტურა, მანქანური ინდუსტრია), ამ ფორმა-სტადიათა ბატონობის ქრონოლოგიური ჩარჩოება. მათი ხვედრითი წონა და მნიშვნელობა საქართველოს ეკონომიკაში.

საინტერესო ნაშრომები დაიწერა სოფლად კაპიტალისტური ურთიერთობის ჩასახვა-განვითარების საკითხებზე², რომლებშიც მეტ-ნაკლები

И. Г. Антелава, Э. Орджоникидзе, Э. Хоштария, К вопросу о генезисе и развитии капитализма в сельском хозяйстве и промышленности Грузии, Тб., 1967; А. Я. Панцхавა, К вопросу о развитии аграрных отношений в дореформенной восточной Грузии, М., 1957; დ. გოგოლაძე, კაპიტალისტური საწარმოები სოფლის მეურნეობასა და მრეწველობაში რეფორმამდელი ხანის საქ-ში; З. В. Аничабадзе, Очерки экономической истории Грузии первой половины XIX века, Тб., 1966.

¹ Г. Қ. Бакрадзе, Возникновение и развитие капиталистической промышленности в Грузии в XIX в., Тб., 1958; ნ. ტყეშელაშვილი, ნარკვევები საქართველოს მრეწველობის ისტორიიდან (1864—1920 წწ.), თბ., 1958; ე. ხოშტარია, მრეწველობის განვითარება და მუშათა კლასის ჩამოყალიბება XIX საუკუნის საქართველოში (დამუშავებული მრეწველობის განვითარება), თბ., 1966; ნ. როდონაია, თბილისის მრეწველობა რეფორმის შემდეგდროინდელ ხანაში; გ. მარგიანი, სამთამადნო მრეწველობა და სამარეწველო პროლეტარიატი საქართველოში 1879—1921 წწ., 1968.

² В. Мочалов, Крестьянское хозяйство в Закавказье к концу XIX в., М., 1958; ი. უთურაშვილი, გლეხობის კლასობრივი დიფერენციაცია საქართველოში.

სიღრმე-სისრულით გაშუქებულია საეკონომიკური მიწათმოქმედების განვითარება, ვაჭრობა და კრედიტის ფორმები, აგრარულ ურთიერთობათა ბურჟუაზიული ევოლუცია, გლეხობის სოციალური დიფერენციაცია, მემამულური მეურნეობის კაპიტალისტური ევოლუცია, დაქირავებული შრომის გამოყენების მასშტაბი სოფლის მეურნეობაში და სხვ. საკითხები.

ამრიგად, ზემოჩამოთვლილი გამოკვლევები ცხადყოფენ, რომ საქართველო XIX საუკუნეში განვითარების საკმაოდ მაღალ დონეზე იდგა, რომ ამ საუკუნის პირველ ნახევარში იგი განიცდიდა ვარდამავალი ეპოქისათვის დამახასიათებელ ტკივილებს, ხოლო 60-იანი წლებიდან გაბატონებული ხდება კაპიტალისტური ფორმაცია.

საბჭოთა ისტორიკოსები თავიდანვე დიდ ყურადღებას აქცევდნენ კაპიტალისტური საქართველოს სოციალური ძალების შესწავლას, მშრომელი კლასების მდგომარეობისა და უკეთესი მერმისისათვის მისი ბრძოლის გაშუქებას.

კაპიტალისტური საქართველოს ყველაზე მრავალრიცხოვანი კლასის გლეხობის შესახებ ბევრი ნაშრომია დაწერილი. ი. ანთელავას ფუნდამენტური მონოგრაფიის¹ პირველ ტომში შესწავლილია სახელმწიფო გლეხთა სოციალ-ეკონომიური მდგომარეობა XIX ს-ის პირველ ნახევარში, ნაჩვენებია ამ სოციალური ფენის როლი ქვეყნის ეკონომიკასა და განთავისუფლებულ ბრძოლაში. მეორე ტომში კი გაშუქებულია ის ცვლილებები, რაც განიცადა სახელმწიფო გლეხობამ რეფორმის მომდევნო ხანაში.

საბატონო გლეხთა ანტიბატონყმურ ბრძოლაზე გამოკვლევები დაწერეს ივ. ჯავახიშვილმა, ფ. მახარაძემ, გ. ხაჭაპურიძემ, გ. ძიძარამ, ი. სიხარულიძემ, შ. ჩხეტიამ, დ. ლემონჯავამ და სხვ.² რეფორმის მომდევნო

თბ., 1958; მისივე, გლეხობის სოციალურ-ეკონომიური გვითვების თანფარდობა აღმოსავლეთ საქართველოში, „მაცნე“, 1967, № 1; ალ. ბენდიანიშვილი, აგრარული ურთიერთობანი საქართველოში 1890—1917 წწ., თბ., 1965; კაპიტალისტური მეურნეობანი საქართველოს სოფელში XIX—XX სს. მიჯნაზე, „მაცნე“, 1968, № 1; Грузинская деревня в 1864—1917 гг., Тб., 1968, სადოქტორო დისერტაციის ავტორეფერატი; ნ. ნაცვლიშვილი, ი. მუხრანბატონის მეურნეობის კაპიტალისტური ევოლუცია, ისტორიის ინსტიტუტის შრომები, ტ. VI, 1961; ა. სურგულაძე, სასაქონლო წარმოების განვითარება საქართველოს სოფლის მეურნეობაში XIX ს. მეორე ნახევარში, ბათუმი, 1957; თ. ჩხეიძე, საუფლისწულო მამულები კახეთში, თბ., 1968; ნ. შველიძე, საქართველოს სოციალურ-ეკონომიური განვითარების ისტორიიდან, თბ., 1967.

¹ И. Антелава, Государственные крестьяне Грузии в XIX веке, т. I, 1955. т. II, 1962.

² И. А. Джавахов, Общественно-политическое движение в Грузии в XIX столетии, 1906; Ф. Е. Махарадзе, Г. Хачапуридзе, Очерки по истории рабочего и крестьянского движения в Грузии, М., 1932; Г. А. Дзидзария, Восстание 1866 года в Абхазии, Сухуми, 1956; ი. სიხარულიძე, გურიის გლეხთა 1841 წლის აჯანყება, ბათუმი, 1955; შ. ჩხეტიანი, გლეხთა მოძრაობა გურიაში 1862 წ., „საისტორიო მოამბე“, ტ. VII, 1953; დ. ლემონჯავა, სამეგრელოს გლეხთა აჯანყება 1856—1857 წწ.

ხანის საქართველოს გლეხობის სოციალ-ეკონომიური მდგომარეობა და მისი განმათავისუფლებელი ბრძოლა გაშუქებულია ი. ანთელავას, ვ. გუჩუას¹, ი. მირცხულავას², ალ. ბენდიანიშვილის და სხვ. ნაშრომებში.

მუშათა კლასის წარმოშობის, მისი თვითმეგნების ზრდასა და განმათავისუფლებელი ბრძოლის ისტორიაზე ნაშრომები გამოაქვეყნეს ფ. მახარაძემ, გ. ხაჭაპურიძემ, აბ. კიკვიძემ, ნ. ჩახვავილმა, ე. ხოშტარიამ და სხვ.³.

ქართველ საბჭოთა ისტორიკოსებს არც სხვა საკითხები დაუტოვებიათ ყურადღების გარეშე. საქართველოში რუსული მმართველობის დამყარებას და მის ევოლუციას სპეციალური ნაშრომი მიუძღვნა შ. ჩხეტიამ⁴. დასავლეთ საქართველოს რუსეთთან შეერთების ხანგრძლივი პროცესი, აქ არსებული ავტონომიური სამთავროების გამძლეობის მიზეზები და საერთოდ XIX ს-ის პირველი ნახევრის დასავლეთ საქართველოს პოლიტიკური და სოციალ-ეკონომიური ისტორიის ბევრი საკითხი კარგად არის გაშუქებული მ. დუმბაძის მონოგრაფიაში⁵. არაერთი ნაშრომი დაიწერა ქართველი ხალხის მონაწილეობაზე რუსეთ-ირანისა და რუსეთ-თურქეთის ომებში (ე. ბურჭულაძე, ი. ანთელავა, ნ. ახვლედიანი, შ. მეგრელიძე, ნ. ქორთუა და სხვ.).

მნიშვნელოვანი წარმატებაა მოპოვებული საქართველოს XIX საუკუნის ისტორიის სისტემატური კურსის შექმნის მიმართულებითაც. გამოქვეყნდა აბ. კიკვიძის ორტომეული⁶, შეიქმნა საქართველოს ახალი ისტორიის სახელმძღვანელო და საკითხავი წიგნი⁷.

წარმოშობისთანავე შესწავლის ობიექტად იქცა ახალი ქართული კულტურა, ეროვნული მოძრაობა და საზოგადოებრივი აზროვნება. XIX საუკუნის პირველ ნახევარს განეკუთვნება ახალი კულტურისა და აზროვნების ზოგადი შინაარსის გარკვევის და კრიტიკული შეფასების პირველი

¹ ი. ანთელავა, ვ. გუჩუა, საქართველოს სოციალური ურთიერთობის ისტორიდან, თბ., 1967.

² ი. მირცხულავა, აგარაულ-გლეხური საკითხი საქართველოში, თბ., 1964.

³ აბ. კიკვიძე, მუშათა მოძრაობის ისტორიისათვის საქართველოში (1870—1901 წწ.), თბ., 1945; Н. Ч а х в а ш в и л и, Рабочее движение в Грузии (1870—1904 гг.), Тб., 1858; ედ. ხოშტარია, მრეწველობის განვითარება და მუშათა კლასის ჩამოყალიბება XIX საუკუნის საქართველოში, (პროლეტარიატის ფორმირება და მუშათა მოძრაობის პირველი ნაბიჯები), თბ., 1963.

⁴ შ. ჩხეტია, რუსული მმართველობის სისტემა საქართველოში.

⁵ მ. დუმბაძე, დასავლეთ საქართველო XIX ს. პირველ ნახევარში, თბ., 1957 წ.

⁶ აბ. კიკვიძე, საქართველოს ისტორია (XIX—XX სს.), ტ. I—II, თბ., 1954—1959.

⁷ საქართველოს ისტორია, ნ. ბერძენიშვილის რედ., ტ. II, თბ., 1962.

ცდები¹. 60—90-იან წლებში იქმნება მეცნიერულ-პუბლიცისტური ნარკვევები, რომლებშიც მოცემულია ახალი ქართული კულტურისა და აზროვნების ძირითადი საკითხების უფრო გაღრმავებული შესწავლა-განზოგადება და შეფასება. 90—900-იან წლებში განმანათლებლური და ხალხოსნური ისტორიოგრაფიის² წინააღმდეგ ბრძოლაში ყალიბდება სოციალ-დემოკრატიული³ და ნაციონალურ-დემოკრატიული⁴ ისტორიოგრაფია. ამავე დროს ფორმალურად უპარტიო მეცნიერი ისტორიკოსები და

¹ ს. დოდაშვილი, მოკლე განხილვა ქართულისა ლიტერატურისა ანუ სიტყვიერებისა (თბზ., 1961); მ. ბროსე, ქართული ლიტერატურის დღევანდელი მდგომარეობა („ახალი სააზიო ეურნალი“, 1828, № 1); განხილვა საქართველოს ისტორიისა და ლიტერატურისა („ცისკარი“, 1861, № 8); დ. ჩუბინაშვილი, ქართული ლიტერატურა; Краткая грузинская грамматика, 1855.

² ი. ჭავჭავაძე, ცისკარი 1857 წლიდან 1862 წლამდინა; ორიოდ სიტყვა...; პასუხი; საქართველოს მოამბეზედ; თერგდალეულნი და ახალი თაობა; უარყოფილობა ჩვენში; ივერიის წინასიტყვაობანი; წერილები ქართულ ლიტერატურაზე (თბზ., ტ. III, პ. ინგოროყვას რედ.). ა. წერეთელი, რამოდენიმე სიტყვა „ჩანგურის“ შესახებ (თბზ. ტ. I, 1950, გ. აბზიანიძის რედ.); ვინ სტყუის (თბზ., ტ. II). ი. გოგებაშვილი, შინაური მიმოხილვა (თბზ., ტ. I, 1952, გ. თაგვიშვილის, ვ. ქაჩიას რედ.). ე. მჭედლიძე, კრიტიკული მიმოხილვა (ნაწერები, ს. ხუციშვილის რედ., 1961). გ. წერეთელი „ცისკარს“ რაკაკანებდა? („საქართველოს მოამბე“, 1963); დავით გურამიშვილი და იმის წინა დროები („დავითიანი“, 1870); რამდენიმე აზრი ჩვენს ცხოვრებაზედ (თბზ., ტ. I, ს. ხუნდაძის რედ., 1931); კიტა აბაშიძე და ჩვენი ახალგაზრდობა („კვალი“, 1897, № 46). ნ. ნიკოლაძე, ჩვენი ახალგაზრდობა (თბზ., ტ. 2, დ. გამეზარდაშვილის რედ.); ახალი ახალგაზრდობა; ჩანდაბა; ჩვენი მწერლობა (თბზ., ტ. 3,); მრუდე გამოსარჩლება; „ივერიის“ პირველი ნომერი; გაზეთი „დროება“, პირველი ნაბიჯი ჩვენი ბანკირებისა (თბზ., ტ. 4); მამულის სიყვარული და მსახურება, 1914, ხომლეული, ზოგიერთი ფიქრი; ჩვენი ლიტერატურის მდგომარეობა. ქართული ლიტერატურა (რჩ. ნაწერები, დ. გამეზარდაშვილის რედ., 1963). ა. ფურცელაძე, ქართული ლიტერატურა („ცისკარი“, 1863, № 2, 6, 7). ს. ჭრელაშვილი, ჩვენი დევგმირები, 1878; დამტკრეული ოცნებანი („იმედი“, 1882); მცირე შენიშვნა „ოთარაანთ ქერიის“ გამო („ივერია“, 1888). ზ. ჭიჭინაძე, წერილები ქართულ ლიტერატურაზე, 1888. გ. მაიაშვილი, წერილი ჩვენ საზოგადოებრივ მოღვაწეთა მიმართ. ძველი და ახალი თაობა (რჩ. ნაწ. მ. კანდელაკის რედ. 1). ი. ჭაბადარი, ფიქრი და შენიშვნა გარეთყოფილისა („ივერია“, 1886, № 100); Процесс 50-ти („Былосе“, 1907, № 8, 9, 10).

³ ს. ჭიჭინაძე, სიტყვა ე. ნინოშვილის დეკრძალვაზე („კვალი“, 1894). ნ. ურდანიანი, მესამოცე წლების მოღვაწენი („კვალი“, 1894, № 35); პრესა („კვალი“, 1899, № 3); ი. წერეთელი, მამულიშვილობა, ეროვნება თუ ხალხის სამსახური, აკაკანებული მამულიშვილები („კვალი“, 1902); პ. გელეიშვილი, ილია ჭავჭავაძე როგორც პუბლიცისტი, 1914; ი. გომართელი, ილია ჭავჭავაძის პოეზია („კვალი“, 1902).

⁴ კ. აბაშიძე, ეტუდები მეცხრამეტე საუკუნის ქართული ლიტერატურის ისტორიიდან, დ. გამეზარდაშვილის რედ. 1962; ა. ჯორჯაძე, თავდ-აზნაურობის პოლიტიკური აზროვნება მეცხრამეტე საუკუნეში (თბზ., ტ. II, 1911); მეოთხმოციანი და მეოთხმოცდაათიანი (თბზ., ტ. 1); მასალები ქართველი ინტელიგენციის ისტორიისათვის (თბზ., ტ. , 19 4).

პუბლიცისტები განაგრძობენ ქართული კულტურისა და აზროვნების ისტორიის მასალების შეკრებისა და განზოგადების ადრე დაწყებულ საქმეს¹. 90-იანი წლების ბოლოს წარმოიშვა მეცნიერულ-მარქსისტული ისტორიოგრაფიაც². განმანათლებელმა პუბლიცისტებმა და ისტორიკოსებმა ი. ჭავჭავაძემ, ა. წერეთელმა, ი. გოგებაშვილმა, გ. წერეთელმა, დ. ბაქრაძემ და სხვ. თვითმპყრობელობის შემოტევას დაუპირისპირეს მრავალსაუკუნოვანი ქართული კულტურისა და აზროვნების მოწინავე ტრადიციების მხურვალე პროპაგანდა და წამოაყენეს ხალხის ფართო მასების ყოველმხრივი, მაგრამ უწინარეს ყოვლისა ეროვნულ-კულტურული აღზრდის იდეა. მათ ბევრი საყურადღებო მოსაზრება გამოთქვეს ძველი და ახალი ქართული კულტურის შესახებ, მაგრამ თავიდან ვერ აიცილეს ერთგვარი გადაჭარბება მისი შეფასების დროს. ხალხონები ი. ჯაბადარი, ზ. ჭიჭინაძე და სხვები კულტურის ისტორიას უპირატესად გლეხობის სოციალური ინტერესების დაცვის თვალსაზრისით უდგებოდნენ და ხშირად ეროვნულ ნიპილიზმამდე ეშვებოდნენ. ეროვნულ-სოციალური ასპექტის გაზვიადების თუ უგულვებლყოფის ტენდენციები მძლავრად იჩენდა თავს ნაციონალ-დემოკრატი და სოციალ-დემოკრატი პუბლიცისტთა და ისტორიკოსთა ნაშრომებში. ეროვნულ ფორმაზე ყურადღების გამახვილებას ხშირად ნაციონალიზმამდე მიჰყავდა ა. ჯორჯაძე და სხვები; კულტურის სოციალურ შინაარსზე ყურადღების კონცენტრაცია კი ეროვნული ნიპილიზმისაკენ უბიძგებდა ნ. ყორღანიას, პ. გელეიშვილს და სხვ. ახალი ქართული კულტურისა და აზროვნების მეცნიერული შესწავლისათვის ნიადაგი შეამზადა ა. წულუკიძის და ი. სტალინის მიერ ეროვნული საკითხის მარქსისტულმა გაშუქებამ. მიუხედავად ამისა, ზოგმა რევოლუციონერმა მარქსისტმაც ვერ დააღწია თავი ნიპილიზმს და ვულგარიზმს ახალი ქართული კულტურის გამოჩენილ მოღვაწეთა შეფასებისას.

¹ დ. ბ ა ქ რ ა ძ ე, „კალმასობის“ 1862 წლის გამოცემის წინასიტყვაობა. მ. ჯ ა ნ ა - შ ვ ი ლ ი, Вахушти и его труд, 1882; ნ. მ ა რ ი, ქართველთა ეროვნება, 1905; ი. ჯ ა ვ ა ხ ი შ ვ ი ლ ი, მამულშვილობა და მეცნიერება, 1904, Политические и социальные движения в Грузии в XIX в. 1906, დამოკიდებულება რუსეთსა და საქართველოს შორის XVIII საუკუნეში, 1919; ილია ჭავჭავაძე და საქართველოს ისტორია, 1938; ა. ხ ა ხ ა ნ ა შ ვ ი ლ ი, ქართული სიტყვიერების ისტორია, I—IV, 1895—1911; ს. გ ო რ გ ა ძ ე, ჩვენი ახალი მწერლობა, 1917; გ. ა. ჯ ა ვ ა ხ ი შ ვ ი ლ ი, ილია ჭავჭავაძე, როგორც მგოსანი, 1913; შეცხრაძეც საუკუნის ქართული სიტყვაჯამული მწერლობა, 1920; გ. ქ ი ქ ო ძ ე, ილია ჭავჭავაძე — მგოსანი და მოაზროვნე, 1913.

² ნაციონალიზმი და სოციალიზმი („ბრძოლა“, 1901); ა. წ უ ლ უ კ ი ძ ე, ღია წერილი ბ-ნ ვიორგი წერეთელს, ახირებული პრეტენზია. ოცნება და სინამდვილე (თხზ. ი. თავაძის და ქუთელიას რედ., 1943); ფ. მ ა ხ ა რ ა ძ ე, დანიელ ჭონქაძე და მისი დრო, 1903; ი. ბ. ს ტ ა ლ ი ნ ი, როგორ ესმის სოციალ-დემოკრატიას ნაციონალური საკითხი? (თხზ., ტ. I); მარქსიზმი და ნაციონალური საკითხი (თხზ., ტ. II).

პირველი ნაშრომები, რომლებშიც ვრცლად და სისტემატურად იყო გაშუქებული ახალი ქართული კულტურისა და აზროვნების საკითხები, შექმნეს ისტორიკოსმა ა. ხახანაშვილმა, კრიტიკოსმა კ. აბაშიძემ და პუბლიცისტმა ა. ჯორჯაძემ. მათი ნაშრომები შორსაა თანმიმდევარი მეცნიერული მეთოდოლოგიისაგან, მაგრამ თავის დროზე მაინც მნიშვნელოვანი როლი შეასრულეს ქართული ლიტერატურულ-საზოგადოებრივი აზროვნების ისტორიის შესწავლაში. ჯერ კიდევ რევოლუციამდე ვრცელი ნაშრომი მიუძღვნა ახალი ქართული მუსიკის ისტორიას დ. არაყიშვილმა, ხოლო ზ. ჭიჭინაძემ და გრ. ყიფშიძემ საფუძველი ჩაუყარეს ქართული პრესის ისტორიის შესწავლას!

ახალი ქართული კულტურისა და საზოგადოებრივი აზროვნების მეცნიერული კვლევა უაღრესად გაფართოვდა და გაღრმავდა საბჭოთა პერიოდში. უკვე 20—30-იან წლებში გამოქვეყნდა ვრცელი განმაზოგადებელი ნაშრომები მთლიანად ლიტერატურისა და საზოგადოებრივი აზროვნების ისტორიის ან ცალკეულ მწერალთა და მოაზროვნეთა შესახებ. საბჭოური ისტორიოგრაფიის პირველი ეტაპის (1921—1937 წწ.) მნიშვნელოვან მონაპოვართა რიცხვს მიეკუთვნება კ. კეკელიძის „ძველი ქართული მწერლობის ისტორია“ (I, II, 1924 წწ.), ვ. კოტეტიშვილის „ქართული ლიტერატურის ისტორია“ (I—III, 1925—1927 წწ.), კ. კაპანელის „ქართული სული ესთეტიკურ სახეებში“ (1926 წ.), ს. ხუნდაძის „ქართველი ინტელიგენციის პროფილი მეცხრამეტე საუკუნეში“, „სოციალიზმის ისტორიისათვის საქართველოში“ (I, II, 1927 წ.), „დიმიტრი ყიფიანი“ (1931 წ.), მ. ზანდუკელის „ახალი ქართული ლიტერატურა“ (I, II, 1932—1933 წწ.), ლ. ასათიანის „გოლტერიანობა საქართველოში“ (1933 წ.), „ცხოვრება აკაკი წერეთლისა“ (1941 წ.), გ. ქიქოძის „ნარკვევები“, ქრ. რაჭველიშვილის „ილია ჭავჭავაძე“ (1937 წ.), კრებულები „ილია ჭავჭავაძე“ და „იაკობ გოგებაშვილი“ (1939—1940 წწ.), გრ. გიორგაძე „საზოგადოებრივი ურთიერთობა საქართველოში ბატონყმობის გადავარდნიდან პირველ რევოლუციამდე“ (1928 წ.). დროის ვითარებით გამოწვეული უსრულლობის, მეთოდოლოგიური უზუსტობის თუ ცალკეული შეცდომების მიუხედავად, დასახელებულ ფუნდამენტალურ გამოკვლევებში გათვალისწინებულია ადრინდელი ხანის ისტორიოგრაფიული მონაპოვარი, თავმოყრილი და სისტემატიზირებულია არქივებსა და პრესაში გაბნეული დიდძალი ფაქტობრივი მასალა და ამ საფუძველზე პირველადაა მოცემული ახალი ქართული ლიტერატურისა და საზოგადოებრივი აზროვნების, მათი განვითარების ეტაპების, მიმდინარეობათა, იდეურ წყაროთა და კლა-

¹ დ. არაყიშვილი, ქართული მუსიკის ისტორია, 1919; Гр. К и п ш и д з е, Периодическая печать на Кавказе, 1901; ზ. ჭიჭინაძე, ისტორია ქართული გაზეთებისა და ჟურნალებისა, 1902.

სობრივი ბუნების ზოგადი მეცნიერული დახასიათება. ამ დახასიათების მიხედვით ახალი ქართული საზოგადოებრივი აზროვნება ფეოდალიზმის რღვევისა და კაპიტალიზმის განვითარების პროცესის იდეოლოგიური ასახვაა; ახალი იდეოლოგია ძველის წიაღში ჯერ კიდევ XVIII საუკუნის მეორე ნახევრიდან ისახება და XX საუკუნემდე განვითარების აღრინდელ, კლასიკურ და გვიანდელ ეტაპებს გაივლის. XIX საუკუნის მეორე ნახევარში იგი ნაწილდება სამ იდეურ მიმდინარეობად (დასად), რომელთა ეროვნული და სოციალური პროგრამები ბურჟუაზიული დემოკრატიის და დემოკრატიული ბურჟუაზიის ინტერესებს გამოხატავდა ცარიზმის, კონსერვატიული მსხვილი თავადაზნაურობის და ბურჟუაზიის წინააღმდეგ მიმართულ ეროვნულ-განმათავისუფლებელ მოძრაობაში. ვახტანგ კოტეტიშვილს, კონსტანტინე კაპანელს, გერონტი ქიქოძეს, სიმონ ხუნდაძეს, ისევე როგორც ადრე რიგ განმანათლებელ, ხალხოსან, სოციალ-ფედერალისტ და სოციალ-დემოკრატ ისტორიკოსებს, XIX საუკუნის დიდი ქართველი მოაზროვნენი ი. ჭავჭავაძე, ა. წერეთელი, გ. წერეთელი, ნ. ნიკოლაძე, ს. მესხი, ა. ფურცელაძე და სხვები ხალხის ყოველგვარა ჩაგვრის, უწინარეს ყოვლისა თვითმპყრობელურ-ბატონყმური ჩაგვრის წინააღმდეგ მებრძოლ განმანათლებლებად, დემოკრატებად და უტოპისტებად ესახებოდათ. მათს ნაშრომებში ეს სწორი ზოგადი თვალსაზრისი ხშირად ყოველმხრივ როდი იყო დასაბუთებული ცალკეულ მწერალთა და მოაზროვნეთა მსოფლმხედველობის ცოტად თუ ბევრად სრული და მთლიანი ანალიზის გზით. მკვლევარნი ზოგჯერ ვერ ახერხებდნენ იდეოლოგიის კლასობრიობის მარქსისტულ-ლენინური თვალსაზრისის მარჯვედ გამოყენებას, მხოლოდ კლასობრივი პოზიციებიდან განიხილავდნენ მოვლენებს ან უგულუბელყოფდნენ იდეოლოგიურ მოვლენათა კლასობრიობას, ჯეროვნად ვერ აფასებდნენ XIX საუკუნის საქართველოს ეროვნულ-განმათავისუფლებელი მოძრაობის და ეკონომიური ცხოვრების თავისებურებებს, საკმარის ვერ ითვალისწინებდნენ მაშინდელ ქართულ საზოგადოებრივ აზროვნებაში განმანათლებლობისა და ჰუმანიზმის, რევოლუციური დემოკრატიზმისა და უტოპიური სოციალიზმის განუყრელ კავშირს. მეცნიერულ მოსაზრებებს არაიშვიათად გადაულახავ დაბრკოლებად ელობებოდა რაპველ ნიჰილისტთა სუბიექტივისტური, ვულგარულ-სოციოლოგიური სქემები, რომელნიც აიძულებდნენ, მაგალითად, სიმონ ხუნდაძეს, რომლის თვალსაზრისი ახალი ქართული აზროვნების კლასობრივი ბუნების შესახებ ჯერ კიდევ 1916 წლიდან სწორად ვითარდებოდა, წამდაუწუმ, ზოგჯერ თითქმის ყოველ ფურცელზე, ელაპარაკნა. ი. ჭავჭავაძის, ა. წერეთლის, გ. წერეთლის, ნ. ნიკოლაძის ცალკეულ შეხედულებათა ლიბერალურ-თავადაზნაურული თუ ლიბერალურ-ბურჟუაზიული ხასიათის შესახებ.

1937 წლიდან, როცა გაზეთმა „პრავდამ“ ილია ჭავჭავაძეს XIX საუკუნის ეროვნულ-რევოლუციური მოძრაობის ყველაზე გამოჩენილი მოღვაწე უწოდა, ახალი ქართული ლიტერატურისა და საზოგადოებრივი აზროვნებისადმი ნიჰილისტურმა მიდგომამ საბოლოოდ დაუთმო ადგილი მეცნიერულ მიდგომას, ერთხანს გაბატონებული დოგმატიზმიც თანდათანობით იდევნება ისტორიოგრაფიიდან. აქედან დაწყებული დღემდე ახალი ქართული ლიტერატურისა და საზოგადოებრივი აზროვნების ისტორიის პრობლემებზე გამოქვეყნებულ მრავალრიცხოვან ნაშრომებში მეტ-ნაკლები საბუთიანობითაა ნაჩვენები, რომ XIX საუკუნის საქართველოს ეროვნულ-განმათავისუფლებელი მოძრაობის მოღვაწენი არც კონსერვატორები და რეაქციონერები ყოფილან, არც თანმიმდევარი სოციალისტები, არც თავადაზნაურობის ან ბურჟუაზიის იდეოლოგები, არამედ ისინი იყვნენ პროგრესისტები, პატრიოტები და დემოკრატები, უწინარეს ყოვლისა მშრომელი ხალხის ინტერესთა დამცველნი, რომელთაც იდეურად ცხადყვეს დრომოჭმული წყობილებიდან ახალ საზოგადოებაზე, მოძველებული აზროვნებიდან ახალ მსოფლმხედველობაზე გადასვლის გარდუვალობა. წინანდელთან შედარებით უფრო ვრცელი ფაქტიური მასალის ობიექტურ-მეცნიერულმა ანალიზმა იმ წლებში საშუალება მისცა აზროვნების ისტორიკოსებს კონკრეტულად გამოეკვლიათ ქართველ მოღვაწეთა მსოფლმხედველობის არაერთი საკითხი. იმ დროიდან ბევრი მკვლევარი XIX საუკუნის გამოჩენილ ქართველ მოაზროვნეებს მეტი გაბედულებით და საფუძვლიანად მიიჩნევს განმანათლებლებად და რევოლუციონერ-დემოკრატებად, რომლებიც ობიექტურად ეროვნულ-რევოლუციური მოძრაობის და იმ ახალი ცხოვრების მედროშეებად წარმოგვიდგებიან, ბატონყმობის ნანგრევებზე რომ უნდა აშენებულიყო.

ეს, ცხადია, იმას არ ნიშნავს, თითქოს ახალი ქართული საზოგადოებრივი აზროვნების მაშინდელ ან ახლანდელ მკვლევართა შორის აზრთა სხვადასხვაობა არ არსებობდეს. მართალია, ახლა აღარავინ კამათობს, პროგრესისტი იყო, ვთქვათ, ილია ჭავჭავაძე თუ კონსერვატორი, დემოკრატი თუ ლიბერალი, მჩაგვრელი თუ ჩაგრული კლასების ინტერესთა დამცველი, მაგრამ მისი დემოკრატიზმის კონკრეტულ კლასობრივ ბუნებაზე კამათი გრძელდება. ამ ოცი წლის მანძილზე გამოქვეყნებულ ზოგჯერ თვით ერთი და იგივე ავტორის სხვადასხვა ნაშრომშიც კი ილია ჭავჭავაძე ხან თავისი დროის სამივე ძირითადი კლასის იდეოლოგადაა მიჩნეული, ხან ბურჟუაზიისა, ხან კიდევ გლეხობისა. ზოგი მკვლევარი მას უპირატესად განმანათლებელს უწოდებს, ზოგი რევოლუციონერ-დემოკრატს, ზოგიც გლეხურ დემოკრატს თუ ბურჟუაზიულ დემოკრატს. იგივე ითქმის სერგი მესხის და ზოგი სხვა მოაზროვნის შესახებ. ასე რომ ასწლიანი ისტორია მეორდება, თუმცა ახალ საფუძველზე. აზრთა ამგვარი სხვადა-

სხვაობა განმანათლებელთა და ხალხოსანთა ურთიერთობის საკითხშიც. ზოგიერთი მკვლევარი მათს ურთიერთობაში პრინციპულ იდეურ-კლასობრივ დაპირისპირებას ხედავს, ზოგიც სავსებით აიგივებს განმანათლებელურ და ხალხოსნურ შეხედულებებს. „იმედისა“ და „შრომის“ ჯგუფი ზოგს ლიბერალურად მიაჩნია, ზოგს კი რადიკალურ-რევოლუციურად. ქართული საზოგადოებრივი აზროვნების მკვლევართა იმ ნაშრომებიდან, რომლებიც ამ პრობლემის გადაწყვეტის ძირითადად სწორ გზას სახავენ და საერთოდ XIX საუკუნის ქართული საზოგადოებრივ-პოლიტიკური, ეკონომიური, ფილოსოფიური და ლიტერატურული აზროვნების თანამედროვე მიღწევათა რიცხვს მიეკუთვნებიან, შეიძლება დავასახელოთ გ. ქიქოძის, პ. გუგუშვილის, ლ. გორგილაძის, გ. ჯიბლაძის, პ. ინგოროყვას, მ. კვესელავას, პრ. რატიანის, ი. ანთელავას, დ. გამეზარდაშვილის, ა. კენჭოშვილის, გ. მეგრელიშვილის, ვ. ბახტაძის, ვ. გაგოძის, მ. გაფრინდაშვილის და სხვების ვრცელი გამოკვლევები¹, მიუხედავად იმისა, რომ დასახელებული ავტორების თვალსაზრისიც ყოველთვის როდი ემთხვევა ერთმანეთს.

საბჭოური ისტორიოგრაფიის მეორე ეტაპზე (1932—1968 წწ.) ახალი ქართული კულტურისა და აზროვნების შესწავლა ისე მძლავრად განვითარდა, რომ ცალკეულ ლიტერატორთა და ისტორიკოსთა ნაცვლად ჰუმანიტარულ-სამეცნიერო ინსტიტუტში მომუშავე მკვლევართა მრავალრიცხოვანი რაზმის კვლევის საგანი გახდა. განმანათლებელთა და ხალხო-

¹ გ. ქიქოძე, რჩ. თხზულებანი, I—III, 1963—1965; პ. გუგუშვილი, ქართული ჟურნალისტიკა, I, 1941; კარლ მარქსი ქართულ პუბლიცისტიკასა და საზოგადოებრიობაში, 1952; Карл Маркс В грузинской публицистике и общественности, 1956; ლ. გორგილაძე, სამოციანი წლების ქართველი განმანათლებლები („მნათობი“, 1948, № 9); ქართული საზოგადოებრივი აზროვნების ისტორიიდან, 1961; სოციალიზმის ისტორიიდან, 1967; გ. ჯიბლაძე, ილია ჭავჭავაძის მემკვიდრეობის ზოგიერთი საკითხი („მნათობი“, 1948, № 11); კრიტიკული ეტიუდები, I—IV, 1950—1963; ილია ჭავჭავაძე, 1957; მ. კვესელავა, ფუსტური პარადიგმები, I—II, 1961; პრ. რატიანი, ილია ჭავჭავაძე, 1949—1965; თერგდალეულთა რევოლუციური მოღვაწეობის ისტორიიდან, 1962; იხ. აგრეთვე საქართველოს ისტორია, I, 1958; ი. ანთელავა, საზოგადოებრივ-პოლიტიკური მოძრაობისა და საზოგადოებრივი აზრის ისტორიიდან საქართველოში, 1867; დ. გამეზარდაშვილი, ნარკვევები ქართული რეალიზმის ისტორიიდან I—II, 1954—1957; ა. კენჭოშვილი, ილია ჭავჭავაძე, 1962; Г. Мегрелишвили, Грузинская общественно-экономическая мысль второй половины 19 века и начала 20 века, I—III, 1960—1964; В. Бахтадзе, Очерки по истории грузинской общественно-экономической мысли, 1960; ვ. გაგოძე, ილია ჭავჭავაძის მსოფლმხედველობა, 1962; ფილოსოფიური აზრის ძირითადი მიმდინარეობანი მე-19 საუკუნის საქართველოში, 1964; მ. გაფრინდაშვილი, გიორგი წერეთლის მსოფლმხედველობა, 1955; ნარკვევები ქართული საზოგადოებრივი აზროვნების ისტორიიდან, I, 1959; ქართული განმანათლებლობა, 1966.

სანთა მსოფლმხედველობას სხვადასხვა კუთხით სწავლობენ ისტორიკოსები და ფილოსოფოსები, ლიტერატორები, ეკონომისტები და სამართლის მცოდნენი, ხალხის მატერიალურ და სულიერ ყოფას — ეთნოგრაფები და ფოლკლორისტები, ენის ისტორიას — ენათმეცნიერები, განათლებას — სახალხო განათლებისა და პედაგოგიური აზროვნების მკვლევარნი, კულტურის სხვა დარგების ისტორიას — ხელოვნებათმცოდნენი და სხვ. დასახელებულ ნაშრომებს გარდა ამ ოცდაათი წლის მანძილზე გამოქვეყნდა მრავალი საყურადღებო გამოკვლევა, რომელთაც მნიშვნელოვანი წვლილი შეაქვთ მთლიანად ახალი ქართული კულტურის თუ აზროვნების ან მათი ცალკეული მომენტების შესწავლაში¹.

ახალი ქართული საზოგადოებრივი აზროვნების შესწავლაში თითქმის 50 წლის მანძილზე მოპოვებულ დიდ წარმატებათა მიუხედავად, ხარვეზებიც ცოტა როდია. ჭერჭერობით ზუსტად არ არის შესწავლილი მისი ადრინდელი პერიოდი. კლასიკური ხანის ახალი აზროვნების შესწავლაშიც ზოგჯერ დაძლეული არაა სქემატიზმი, სათანადოდ არ არის გათვალისწინებული თანადროულ მსოფლიო აზროვნებასთან ქართული აზროვნების მიმართება, ანდა, პირიქით, იგრძნობა არაქართველ მოაზროვნებთან ქართველ მოაზროვნეთა მექანიკური გათანაბრების და „რომელიმე კარგად

¹ საქართველოს ისტორია, II, ნ. ბერძენიშვილის რედ., 1962; ნ. ბ ე რ ძ ე ნ ი შ ვ ი ლ ი, ა. კიკვიძის ნაშრომი „საზოგადოებრივ-პოლიტიკური მოძრაობა საქართველოში მეცხრამეტე საუკუნეში“ (ისტორიის ინსტიტუტის შრომები, I, 1955); ქართული ისტორიოგრაფიის განვითარების მთავარი ხაზი, 1964; ა. ი ო ს ე ლ ი ა ნ ი, ილია ჭავჭავაძე და საქართველოს ისტორიის საკითხები, 1951; ა. კ ი კ ვ ი ძ ე, საქართველოს ისტორია, I—II, 1954—1959; ი. კ ა ჭ ა რ ა ვ ა, ქართული ისტორიოგრაფიის საკითხები, 1962; ნ. შ ვ ე ლ ი ძ ე, რევოლუციურ-ხალხსნული მოძრაობის ისტორიიდან ამიერკავკასიაში, 1964; ვ. ს ი ფ რ ა შ ვ ი ლ ი, რუსი რევოლუციონერ-დემოკრატებისა და თერგდალეულების იდეური ურთიერთობა, 1962; Сн., «Народы Кавказа», II, 1961; შ. რ ა ღ ი ა ნ ი, ახალი ქართული ლიტერატურა, 1955; მ. დ უ დ უ ჩ ა ვ ა, ილია ჭავჭავაძის ესთეტიკა, 1960; გ. ა ბ ზ ი ა ნ ი ძ ე, ნარკვევები ქართული საზოგადოებრივი აზროვნების ისტორიიდან, 1959; ტრ. რ უ ხ ა ძ ე, რუსულ-ქართული ლიტერატურული ურთიერთობის ისტორიიდან, 1960; კ. მ ე ძ ე ლ ი ა, თერგდალეულები და რუსეთის სამოციანი წლების რევოლუციონერი მოღვაწეები, I, 1959; კ. კ ე ვ ე ლ ი ძ ე, ა. ბ ა რ ა შ ი ძ ე, ქართული ლიტერატურის ისტორია, 1954; ავტორთა კოლექტივის წიგნი ამავე სახელწოდებით, II, 1965; ა. ჭ ი ლ ა ი ა, გიორგი წერეთელი, 1964; ა. გ ა ჩ ე ჩ ი ლ ა ძ ე, ნარკვევები ქართული დრამატურგიისა და თეატრის ისტორიიდან, 1958; ა. ნ ი კ ო ლ ა ძ ე, რუსი კლასიკოსები და ქართული კულტურა, 1961; ა. შ ა ხ ა რ ა ძ ე, ნარკვევები ქართული ლიტერატურის ისტორიიდან, I—III, 1957—1963; ო. ჭ უ რ დ უ ლ ი ა, კრიტიკული წერილები, I—II, 1958—1961; ვ. ვ ა ხ ა ნ ი ა, ანტონ ფურცელაძის მსოფლმხედველობა, 1956; ქართული ლიტერატურის ისტორია, დ. გამეზარდამვილის რედ., I, 1956; ა. ჩ ა ვ ლ ე ი შ ვ ი ლ ი, ილია ჭავჭავაძე ლიტერატურის თეორეტიკოსი, 1939; ი. ბ ო ც ვ ა ძ ე, ილია ჭავჭავაძე ქართულ სალიტერატურო კრიტიკაში, I, 1957; სერგი მესხი. 1965; ვეაფ-ფშაველა ქართულ სალიტერატურო კრიტიკაში, 1963; ა. თ ა ვ ა ძ ე, ილია ჭავჭავაძის ფილოსოფიური და ესთეტიკური შეხედულებები

ცნობილ სქემაში მათი მოთავსების სურვილი“¹. დღემდე არ მოგვეპოვება გამოკვლევა, რომელშიც ცოტად თუ ბევრად სრული და სისტემატური სახით იქნებოდა გადმოცემული ახალი ქართული საზოგადოებრივი აზროვნების მთლიანი ისტორია. ასეთი ნაშრომის შექმნა, ცხადია, ერთი ადამიანის ძალ-ღონეს აღემატება. იგი ისტორიკოსთა, ფილოსოფოსთა, ლიტერატურისმცოდნეთა, ეკონომისტთა და სამართლისმცოდნეთა კომპლექსურ შრომას, მათი კვლევითი მუშაობის კოორდინაციას მოითხოვს. იგივე უნდა ითქვას ახალი ქართული კულტურის მთლიანი ისტორიის შესახებაც, რომელიც, აგრეთვე, ჯერ არ დაწერილა, თუმცა კულტურის ცალკეული შემადგენელი ნაწილები (ყოფა, განათლება, პრესა, თეატრი, მუსიკა, სახვითი ხელოვნება) ამ ორმოცდაათი წლის მანძილზე გამოქვეყნებულ მრავალ ნაშრომში ვრცლადაა განხილული.

მთლიანად XIX საუკუნის ქართული კულტურისა და საზოგადოებრივი აზროვნების მოკლე და ყოველმხრივი დახასიათების პირველი ცდები მოცემულია საქართველოს ისტორიის არსებულ სახელმძღვანელოებში²,

ბანი, 1954; ქს. ს ი ხ ა რ უ ლ ი ძ ე, ნარკვევები, I, 1958; ი. გ რ ი შ ა შ ვ ი ლ ი, ძველ თბილისის ლიტ. ბოჰემა, 1927; ა. ქ უ თ ე ლ ი ა, ილია ჭავჭავაძე რევოლუციური დემოკრატი („მნათობი“, 1954); შ. ნ უ ც უ ბ ი ძ ე, ქართული ფილოსოფიის ისტორია, 1958—1960; თ. კ უ კ ა ვ ა, ნარკვევები მე-19 ს. პირველი ნახევრის ქართული საზოგადოებრივი აზროვნების ისტორიიდან, 1956; ქართული ფილოსოფიური აზრის ისტორიიდან, 1967; ს. ა ვ ა ლ ი ა ნ ი, გიორგი წერეთლის ფილოსოფიური მსოფლმხედველობა, 1954; პ. ც ი ნ - ც ა ძ ე, ილია ჭავჭავაძე, 1938; გრ. თ ო დ უ ა, ქართველ მესამოციანელთა ეკონომიური მოძღვრების სათავეებთან, 1967; გ. ჩ ა დ უ ნ ე ლ ი, ეურნალ „იმედის“ ეკონომიური შეხედულებანი, 1961; მ. ს ი ხ ა რ უ ლ ი ძ ე, ეურნალ „შრომის“ ეკონომიური შეხედულებანი, 1962; ა. ჩ ი ქ ო ბ ა ვ ა, ილია ჭავჭავაძე ენის შესახებ, 1938; ქართული ენის ზოგადი განხილვა („ქართული ენის განმარტებითი ლექსიკონი“, I, 1959). გ. თ ა ვ ზ ი შ - ვ ი ლ ი, სახალხო განათლებისა და პედაგოგიური აზროვნების ისტორია საქართველოში, II, 1948; ტ რ ი ფ. ხ უ ნ დ ა ძ ე, ცარიზმი და სახალხო განათლება საქართველოში, 1948; ნ. პ ა პ ა ვ ა, სახალხო განათლების ისტორია მე-19 ს. მეორე ნახევრის საქართველოში, 1963; მ. გ ო ც ა ძ ე, ქართულ ეურნალისტიკის ისტორია, 1954; ა. კ ა ლ ა ნ დ ა - ძ ე, საქართველოს მოამბე, 1963; ნარკვევები ქართული ეურნალისტიკის ისტორიიდან, 1965; ლ. ჩ ი ქ ო ვ ა ნ ი, გაზეთ „თბილისის მოამბის“ სოციალურ-პოლიტიკური პროფილი, 1967; ჯ. ჭ უ მ ბ უ რ ი ძ ე, ქართული კრიტიკის ისტორია, 1964; ვ ა ხ ტ ა ნ გ ბ ე რ ი - ძ ე, ქართული ხელოვნება 1865 წლიდან 1921 წლამდე, 1967 (ხელნაწერი); გ. ბ უ რ თ ი - კ ა შ ვ ი ლ ი, წერილები თეატრზე, 1964. ვ. შ ი ლ ა კ ა ძ ე, ქართული ხალხური მუსიკის შესწავლისათვის 1948; პ. ხ უ ჭ უ ა, ქართული სამუსიკო კულტურა, 1961, კრ. „ქართული ისტორიოგრაფია“, 1968.

¹ გ. მ ე ლ ი ქ ი შ ვ ი ლ ი, საქართველოს ისტორიის შესწავლა ოქტომბრის დიდი სოციალისტური რევოლუციის 50 წლისთავზე („საისტორიო წერილები“, I, 1968, გვ. 37).

² ა. კ ი კ ვ ი ძ ე, საქართველოს ისტორია, I—II, 1954—1959; ავტორთა კოლექტივი, საქართველოს ისტორია, I, 1958. საქართველოს ისტორია, ნ. ბერძენიშვილის რედ., II, 1962.

მაგრამ თავისი დროისათვის მნიშვნელოვანი დახასიათება ახლა საკმარისი აღარ ჩანს.

საქართველოს ისტორიის V ტომის ავტორთა კოლექტივი, რა თქმა უნდა, ემყარება ქართული საბჭოთა ისტორიული მეცნიერების მიღწევებს და ასახავს მისი განვითარების თანამედროვე დონეს. მაგრამ დღემდე გამოქვეყნებულ ისტორიულ ლიტერატურაში XIX ს-ის საქართველოს ისტორიის ყველა საკვანძო საკითხი როდია მთელი სიღრმე-სისრულით გაშუქებული. ავტორთა კოლექტივი ცდილობდა დამოუკიდებელი კვლევებით შეეცხო ისტორიული მეცნიერების მთელი რიგი ხარვეზები და ფართო მკითხველი საზოგადოებისათვის მიეწოდებინა სათანადო მეცნიერულ დონეზე შესრულებული წიგნი.

ტომის მომზადებაში მონაწილეობა მიიღეს ალ. ბენდიანიშვილმა და მის. გაფრინდაშვილმა.

**§ 1. ფეოდალურ-ბატონყმური სისტემის რღვევა და კაპიტალისტურ
 ურთიერთობათა განვითარება სოფლის მეურნეობაში**

სასაქონლო წარმოების განვითარება. გასული საუკუნის პირველი მე-სამედი, როგორც ცნობილია, აღინიშნა რუსეთ-ირანისა და რუსეთ-თურქეთის ხანგრძლივი ომებით და შინაგანი არეულობით, რომელთა სიმძიმე ძირითადად მწარმოებელ კლასს აწვა კისრად. ამას ერთვოდა მეფის მოხელეთა გაუკითხაობა, სურსათისა და სატრანსპორტო საშუალებათა განუწყვეტელი მოთხოვნა, სამხედრო ეგზეკუციების გამანადგურებელი საქმიანობა, ფეოდალური ექსპლოატაცია და სხვ. ყოველივე ეს დიდ ზიანს აყენებდა ქვეყნის ეკონომიურ ცხოვრებას, აფერხებდა მის წინსვლა-განვითარებას.

ძვრები საქართველოს ეკონომიკაში, კერძოდ კი სოფლის მეურნეობაში, შესამჩნევი გახდა XIX საუკუნის 30-იანი წლებიდან, განსაკუთრებით კი 40 — 50-იან წლებში. რუსეთ-ირანისა და რუსეთ-თურქეთის ომებთან წარმატებით დამთავრების შემდეგ ჩვენს ქვეყანაში შედარებით მყუდროება დამყარდა და ბოლო მოეღო გაუთავებელ თავდასხმებს, რომლებიც დიდი ხნით სწყვეტდა მშრომელ მოსახლეობას თავის პირდაპირ საქმიანობას.

მეტ-ნაკლებად ნორმალურ საგარეო და საშინაო პირობების შექმნას შედეგად მოჰყვა მოსახლეობის ზრდა. გაიზარდა, კერძოდ, მწარმოებელი კლასის — გლეხობის რიცხვი. სახაზინო ექსპედიციის მიერ 1811 წელს შედგენილი უწყისის თანახმად, თბილისის გუბერნიაში, რომელიც მაშინ მოიცავდა თბილისის, თელავის, სიღნაღის, გორისა და ანანურის მაზრებსა და ელიზავეტპოლის ოკრუგს ბორჩალოს, შამშადილისა და ყაზახის

დისტანციებით, ითვლებოდა ორივე სქესის სულ 153 077 სული გლეხი¹, ხოლო 1861 წლისთვის ეს რაოდენობა თითქმის 3,5-ჯერ გაიზარდა და 518 100 სულს გადააჭარბა². მეტ-ნაკლებად იგივე ვითარება იყო დასავლეთ საქართველოშიც.

კარგეში საშიშროების მოსპობამ და მშვიდობიანობის დამყარებამ საგრძნობლად გააძლიერა მშრომელი ხალხის სტიმული სამეურნეო საქმიანობისადმი. გადიდდა, კერძოდ, ნათესების ფართობი. თუ, მაგალითად, 1821 წელს საშემოდგომო (ОЗИМЫЙ) პურის ფართობი თბილისის გუბერნიაში 47 308 დესეტინას უდრიდა³, 1861 წლისთვის 3-ჯერ და მეტჯერ გაიზარდა და 157 340 დესეტინას მიაღწია. იზრდებოდა აღებული მარცვლეულის რაოდენობაც. 1807—1850 წლებში ის თბილისის გუბერნიაში გაიზარდა 5-ჯერ, 398 254 ჩეთვერტიდან 2 054 000 ჩეთვერტამდე⁴, ხოლო ქუთაისის გუბერნიაში პური შემდეგი რაოდენობით მოუყვანიათ: 1847 წელს — 865 436 ჩეთვერტი, 1849 წელს — 1 097 484 ჩეთ., 1852 წელს — 1 962 590 ჩეთ. და 1853 წელს — 2 157 239 ჩეთვერტი⁵.

საერთო წარმატებაზე მეტყველებს ისეთი ფაქტიც, როგორცაა პურის წარმოების გაცილებით უფრო ჩქარი ტემპით ზრდა. ვიდრე მოსახლეობისა. პირველი მათგანი, როგორც ზემოთაც აღვნიშნეთ, აღმოსავლეთ საქართველოში გასული საუკუნის პირველ ნახევარში 5-ჯერ გაიზარდა, ხოლო მეორე — მხოლოდ ორჯერ.

მაგრამ მთავარია არა რაოდენობრივი ხასიათის ცვლილებები, არამედ ის თვისებრივი ძვრები, რომლებსაც ადგილი ჰქონდა სოფლის მეურნეობაში საერთოდ. ჩვენ მხედველობაში გვაქვს ფულად-სასაქონლო ურთიერთობათა შექრა სოფლის ცხოვრების სხვადასხვა დარგში, მათი კავშირის გაძლიერება ბაზართან და სასაქონლო პროდუქციის წარმოების გაფართოება. საგრძნობლად გადიდდა, კერძოდ, საბაზრო პურის ხვედრითი წონა. მაგალითად, ის 1845 წელს უდრიდა: თბილისის მაზრაში — 25%-ს⁶, თელავის მაზრაში — 26%-ს⁷, ახალციხის მაზრაში — 21%-ს⁸ და ქუთაისის მაზრაში — 20,1%-ს⁹. მთელ გუბერნიაში კი მოსახლეობას იმავე 1845 წელს

¹ ЦГВИА, Ф. ВУА, д. 18495. ეს ცნობები, ჩვენი აზრით, რამდენადმე შემეცირებულად წარმოგიდგენს გლეხთა რაოდენობას.

² სსცია, ფ. 678, ანაწ. I, საქ. 275, ფურც. 107—109.

³ სსცია, ფ. 16, საქ. 2725, ფურც. 55.

⁴ СХАО, I, გვ. 29, 34—35. ჩეთვერტი უდრის 9 ფუთს.

⁵ იქვე, გვ. 30, 31, 37, 40.

⁶ სსცია, ფ. 16, საქ. 8888, ფურც. 45.

⁷ იქვე.

⁸ იქვე, ფურც. 71.

⁹ იქვე, საქ. 6244, ფურც. 89.

დამზადებული პურის 18% გაუყიდა¹. რუსეთში კი XIX საუკუნის 50-იან წლებშიც სასაქონლო პურის ხვედრითი წონა 17%-ს არ აღემატებოდა².

მარცვლეული რაიონების გლეხები და მემამულეები საკმაოდ ფართოდ ეწეოდნენ პურით ვაჭრობას. „В Борчалинском участке, — ვკითხულობთ თბილისის მაზრის უფროსის 1842 წლის 26 სექტემბრის პატაჟში, — жители, в особенности казенные крестьяне, имея во владение своим земли весьма удобные к хлебопашеству, обрабатывают все без остатка, и делая значительные посевы, как озимого, так и ярового хлеба, получают большое количество оногo, так что, кроме потребности на продовольствие, продают в другие места ежегодно от 5 до 6 тысяч четвертей»³.

პურით ვაჭრობის ზრდასთან ერთად და მის შედეგად მარცვლეულ კულტურათა ფართობებს ზრდიდნენ არა მარტო გლეხები, არამედ მემამულეებიც. დიდებოდა ეგრეთ წოდებული საბატონო ნათესების მასშტაბი და მოცულობა. ამ ფაქტს ჯერ კიდევ ბარონ როზენმა მიაქცია ყურადღება. იგი თავის 1832 წლის 25 თებერვლის მიმართვაში იუსტიციის მინისტრისადმი არაორაზროვნად ლაპარაკობდა იმ ქართველ მემამულეთა შესახებ, რომლებიც მჭიდროდ იყვნენ ბაზართან დაკავშირებულნი, აწარმოებდნენ სასაქონლო პროდუქციას და ამ მიზნით აფართოებდნენ „მინდვრების დამუშავებასა და მეღვინეობას“⁴. უფრო გვიანი დროისთვის კი ჩვენ გაგვაჩნია კონკრეტული ციფრობრივი მასალა, რომელიც იმსვე ადასტურებს. ირკვევა, მაგალითად, რომ 1857 წელს 1850 წელთან შედარებით თბილისის გუბერნიის საბატონო მეურნეობაში საშემოდგომო პურის ნათესების ფართობი გადიდებულა 83,1%-ით, ხოლო საგაზაფხულო პურისა — 132,9%-ით⁵.

სათანადოდ რომ შევაფასოთ ზემომოტანილი ფაქტების მნიშვნელობა, საჭიროა გავიხსენოთ ლენინის სიტყვები: „მემამულეთაგან პურის გასაყიდად წარმოება, რაც განსაკუთრებით განვითარდა ბატონყმობის არსებობის უკანასკნელ დროს, უკვე ძველი რეჟიმის დაშლის მათწყებელი იყო“⁶.

ქართული პური საზღვარგარეთაც გადიოდა, მაგრამ მისი ძირითადი მომხმარებელი მაინც ადგილობრივი მოსახლეობა იყო. ყველაზე მეტი რაოდენობით ამ პროდუქტს თბილისის მოსახლეობა ყიდულობდა. იგი

¹ სსცია, ფ. 16, საქ. 8888; შეადარე ფ. 4, ანაწ. 8, საქ. 43.

² В. К. Я ц у н с к и й, Аграрное развитие России с 80-х годов XVIII века до 80-х годов XIX столетия (Рукопись доклада, прочитанного в г. Риме в мае 1966 г. на коллоквиуме советско-итальянских историков), გვ. 17.

³ სსცია, ფ. 16, საქ. 6244, ფურც. 89.

⁴ АКАК, VII, I, გვ. 32.

⁵ СХАО, I, გვ. 34—35, 44.

⁶ ვ. ი. ლ ე ნ ი ნ ი, თხზ., ტ. 3, გვ. 207—208.

გასული საუკუნის 60-იანი წლების დამდეგს ყოველწლიურად 400 ათასამდე ფუთ პურის ფქვილს ხმარობდა¹. პურის შემსყიდველი და მომხმარებელი იყო აგრეთვე ჯარი, რომელიც საქართველოს სხვადასხვა რაიონში იყო განლაგებული. მაგრამ პურის შესყიდვა საინტენდანტო უწყების მიერ არსებითად ბოჭავდა სოფლის მშრომელი მოსახლეობის თავისუფალ ვაჭრობას, ხელს უშლიდა მის გამლა-გაფართოებას. საქმე იმაშია, რომ მარცვლეულის შექმნა სამხედრო ნაწილების მიერ, რომელსაც რამდენადმე იძულებითი ხასიათი ჰქონდა, ამცირებდა თავისუფალი ბაზრისთვის გამიზნულ პურის საერთო რაოდენობას².

შედარებით მეტი სავაჭრო მნიშვნელობა ჰქონდა სიმინდს, რომლის ექსპორტი ცოტად თუ ბევრად საგრძნობი ვახდა XIX საუკუნის 40-იანი წლებიდან, განსაკუთრებით კი გაიზარდა 60-იანი წლებიდან. მაშინ საქართველოდან საზღვარგარეთ ყოველწლიურად გადიოდა 1 მილიონ ფუთამდე სიმინდი³.

სოფლის ვაჭრობის განვითარებაში განსაკუთრებით დიდი იყო მევენახეობა-მელვინეობის როლი, რომელიც საქართველოს სახალხო მეურნეობის ერთ-ერთ ძირითად და წამყვან დარგს წარმოადგენდა. ფულად-სასაქონლო ურთიერთობათა განვითარების, ქალაქების მოსახლეობის ზრდისა და ბაზართან კავშირის გაფართოების შედეგად მევენახეობა-მელვინეობა სულ უფრო და უფრო ღებულობდა სავაჭრო-სასაქონლო ხასიათს და მისი პროდუქციის საგრძნობი ნაწილი ბაზარზე იყიდებოდა. თვით კამერ-იუნკერი პელჩინსკიც კი (1830 წ.), რომელსაც, საერთოდ, ბრალს ვერ დავდებთ საქართველოს ვაჭრობის გადაჭარბებით შეფასებაში, იძულებული იყო აღენიშნა, რომ თელავისა და სიღნაღის მაზრების მოსახლეობას დამზადებული ღვინის ერთი მეოთხედი ბაზარზე გაჰქონდა გასაყიდად⁴. მეორე თანამედროვის ცნობით კი, გასული საუკუნის 30-იან წლებში მარტო თელავის მაზრა ყოველწლიურად ყიდდა 1 300 000 ვედრო ღვინოს⁵. თუმცა ეს ციფრი, ჩვენი აზრით, ძლიერ გადაჭარბებულია, მაგრამ ის მაინც დამახასიათებელია და სავაჭრო მევენახეობა-მელვინეობის განვითარების შედარებით მაღალ დონეზე ლაპარაკობს.

სასაქონლო ღვინოს, თუმცა ნაკლები რაოდენობით, დასავლეთ საქართველოც ამზადებდა. გასული საუკუნის 50-იან წლებში, მაგალითად, მარტო იმერეთის მოსახლეობას ყოველწლიურად საშუალოდ ბაზარზე გა-

¹ КК за 1846, отд. III, гл. 53.

² А. В. Ф а д е е в, Очерки экономического развития степного предкавказья в дореформенный период, Москва, 1957, гл. 199—200.

³ «Кавказ», 1862, № 99.

⁴ АКАК, VII, 2, I, гл. 189.

⁵ «Обозрение российских владений за Кавказом», I, СПб, 1836, гл. 383.

ჰქონდა 50 000 ვედრო ღვინო. ამდენსავეს გამოჰყოფდნენ სარეალიზაციოდ სამეგრელოს რაიონებიც.

ქართული ღვინო საკმაო რაოდენობით საქართველოს ფარგლებს გარეთაც გადიოდა, მაგრამ მისი ძირითადი მომხმარებელი მაინც თბილისი იყო. არსებული ცნობების თანახმად, XIX საუკუნის 60-იანი წლების პირველ ნახევარში დედაქალაქის მოსახლეობა ყოველწლიურად ხმარობდა თურმე 500 ათას ვედრო ღვინოსა და 50 ათას ვედრო არაყს, რაშიც ხარჯავდა 1 მილიონ 250 ათას მანეთს (ვერცხლით)¹.

მნიშვნელოვანი ძვრები იგრძნობოდა მეაბრეშუმეობის დარგშიც, რომელიც ფართოდ იყო გავრცელებული როგორც აღმოსავლეთ, ისე დასავლეთ საქართველოში. აბრეშუმის პარკი, როგორც ცნობილია, ადრეც გადიოდა საზღვარგარეთ, მაგრამ მისი ექსპორტი განსაკუთრებით 40-იანი წლებიდან გაძლიერდა. მარტო რედუტ-კალედან 1850 წელს გაუტანიათ 2 775 ფუთი აბრეშუმის პარკი, 1851 წელს — 2 408 ფუთი, 1852 წელს — 9 034 ფუთი და 1853 წელს — 10 506 ფუთი².

როგორც იყო სასაქონლო აბრეშუმის ხვედრითი წონა ზუსტად თქმად ძნელია, მაგრამ საერთოდ ის საკმაოდ დიდი ჩანს. პროფ. პ. გუგუშვილის გამოანგარიშებით, გასული საუკუნის 40-იან წლებში ამიერკავკასიაში მიღებული აბრეშუმის 60—70% შორეულ (უმათავრესად რუსეთის) ბაზრებზე იყიდებოდა თურმე³. თუ გავითვალისწინებთ იმ გარემოებასაც, რომ ამჟამად ჩვენთვის საინტერესო ნედლეული ადგილობრივ ბაზარზეც საღებოდა, ბუნებრივია, ზემოთ დასახელებული პროცენტიც შესაფერისად უნდა გაიზარდოს.

როგორც ამიერკავკასიაში, საერთოდ, საქართველოშიც დიდი ჩანს სასაქონლო აბრეშუმის ხვედრითი წონა. ქუთაისის გუბერნიაში, მაგალითად, ის 1856 წელს, ჩვენი მიახლოებითი გამოანგარიშებით, 40 — 45%-ს უდრიდა⁴.

60-იანი წლების დამდეგს კახეთს საშუალოდ მოჰყავდა 1 200 ფუთი

¹ КК, за 1864 г., отд. III, кв. 53—54; III. К. Ч х е т и я, Тбилиси в XIX столетии, Тб., 1942, кв. 217.

² სსცია, ფ. 4, ანაწ. 8, საქ. 450, ფურც. 227.

³ П. В. Г у г у ш в и л и, Щелководство в Грузии и Закавказье в XIX—XX вв., Тб., 1960, кв. 32.

⁴ ეს გაანგარიშება შემდეგ მონაცემებს ეყარება. 1856 წელს მხოლოდ პირველი ექვსი თვის განმავლობაში მარტო ქუთაისის გუბერნიიდან რედუტ-კალეს ნავსადგურით 5147,5 ფუთი აბრეშუმის ნართი და პარკი გაუტანიათ. მისი საერთო მოსავალი გუბერნიაში იმ დროს (უფრო ზუსტად 60-იანი წლების დამდეგს) 16 000 ფუთს უდრიდა. სხვანაირად რომ ვთქვათ, საქართველოს ფარგლებს გარეთ დამზადებული აბრეშუმის 32,2% გასულა. თუ ამას მივეუმატებთ ადგილზე გაყიდულს, რომლის ხვედრითი წონა 10 13%-ზე ნაკლები არაფრით არ უნდა ყოფილიყო, მაშინ სწორედ ის ზემოთ დასახელებული 40—45% გამოვა-

აბრეშუმის პარკი, დასავლეთ საქართველოს (იმერეთსა და სამეგრელოს) — 16 000 ფუთი¹, ხოლო ამიერკავკასიას მთლიანად—30 000 ფუთი.

40—50-იანი წლებიდან ჩვენში საგრძნობლად განვითარდა მეთამბაქოეობა და თანდათანობით სასაქონლო ხასიათი მიიღო. რუსეთის მთავრობა ცდილობდა ამ კულტურის ფართოდ დანერგვას, რათა ნელნელად უზრუნველყო მეტროპოლიის თამბაქოს მრეწველობა. რუსეთის ხელისუფლების ნებართვითა და სურვილით საქართველოში დაარსებული სხვადასხვა საზოგადოება, ზრუნავდა რა სოფლის მეურნეობის განვითარებაზე, უცხოეთიდან იწერდა თამბაქოს საუკეთესო ჯიშის თესლს, ურიგებდა ქართველ მემამულეებსა და გლეხებს და ამით ხელს უწყობდა ამ დარგის უკეთ დაყენების საქმეს.

1859 წელს თბილისის გუბერნიაში მოყვანილ იქნა 11 772 ფუთი თამბაქო, ხოლო გაყიდული — 7 944 ფუთი², ან საერთო რაოდენობის 67,5%. იმავე დროისათვის დასახლებულ გუბერნიაში მეთამბაქოეობას თურმე 1 600 კაცი ეტანებოდა, იმერეთსა და გურიაში კი — 1 000 კაცი. უკანასკნელ რაიონებში მეთამბაქოეობას უპირატესად სამომხმარებლო ხასიათი ჰქონდა. სამრეწველო მიზნით თამბაქო მოჰყავდათ იმერელი მემამულის ჩიჯავაძის მეურნეობასა და სოფელ ხონში. „სოფელ ხონის მოსახლეობა თითქმის მთლიანად საბაზრო თამბაქოს წარმოებითაა დაკავებული“³, წერდა 1858 წელს ქუთაისის გუბერნატორი. თამბაქოს რეალიზაციის მიზნით ხონში საფუძველი ჩაეყარა სპეციალურ „თამბაქოს იარმარკას“.

ფართოდ იყო გავრცელებული ეს დარგი სამეგრელოშიც; მთავარ დავით დადიანის ცნობით, სამეგრელო ადგილობრივ (თბილისი) თუ შორეულ (მოსკოვი) ბაზარზე ყიდდა ყოველწლიურად 15-დან 20 ათასამდე ფუთ თამბაქოს⁴.

რეფორმამდელი ხანის საქართველოში მოსახლეობა მებამბეობასაც ეტანებოდა. ბამბა მოჰყავდათ ქუთაისის, შორაპნისა და ოზურგეთის მაზრებში. მოსავლის ერთი ნაწილი თვით მწარმოებელი ოჯახის მოთხოვნილებას ხმარდებოდა, ხოლო მეორე ბაზარზე გადიოდა. გასული საუკუნის 50-იან წლებში, მაგალითად, იმერეთი ყოველწლიურად საშუალოდ 5 ათასამდე ფუთ ბამბას ამზადებდა, რომლიდანაც 1 000 ფუთი მარტო სოფ. ხონზე მოდიოდა⁵. 60-იან წლებში მისი წარმოება საგრძნობლად გაიზარდა. დ. გოგოლაძის გამოანგარიშებით, 1864 წელს იმერეთში 15 ათასამდე

¹ სსცია, ფ. 10, საქ. 47), ფუჯ. 7.

² იქვე, ფ. 225, საქ. 1479, ფურტ. 66—69.

³ იქვე, ფ. 1268, ანაწ. 9, საქ. 101.

⁴ ი. მ. ე. უ. ნ. ა. რ. ი. ა., სამეგრელო დავით დადიანის დროს, თბ., 1939, გვ. 103.

⁵ Статистическое описание губернии и областей Российской империи, т. XVIII, ч. V, გვ. 96.

ფუთი ბამბა მიუღიათ; აქედან 10 ათასი ფუთი ან მთელი მოსავლის 75%¹ გაუყიდიათ¹.

ფულად-სასაქონლო ურთიერთობა საგრძნობი მასშტაბით შეიჭრა მეცხოველეობაში. ფართო ხასიათი მიიღო ვაჭრობამ რძით, ყველით, ხორციით, მატყლით, ტყავით და სხვა პროდუქტებით. წლიდან წლამდე იზრდებოდა სავაჭრო ბრუნვა. არსებული ცნობების თანახმად², 1847 წელს ქუთაისის გუბერნიაში 15 000 სული საქონელი გაყიდულა, 1849 წელს — 17 000 სული, 1850 წელს — 19 000 სული, 1851 წელს — 20 000 სული, 1852 წელს — 23 000 სული, 1853 წელს — 26 000 სული და 1854 წელს — 32 000 სული, ე. ი. სულ რაღაც 7 წლის (1847—1854 წწ.) განმავლობაში შინაური საქონლით ვაჭრობა ორჯერ და მეტჯერ გადიდებულა.

ქალაქებისა და საქალაქო ცხოვრების განვითარების შედეგად სავაჭრო ხასიათი მიეცა სოფლის მეურნეობის ისეთ დარგებსაც, როგორცაა მებაღეობა-მეხილეობა და მებოსტნეობა. «Огороды и плодовые сады, — ნათქვამია თბილისის გუბერნატორის 1857 წლის ანგარიშში, — имеются во всех почти частях губернии, исключая трех горских округов... Первое содержится преимущественно у крестьян казенных, немецких колонистов и русских поселян... Овощи и плоды идут не на одну домашнюю потребность, ими снабжаются постоянно городские рынки и от продажи их хозяева огородов и садов получают хороший доход. Особенно огородничество и садоводство составляют лучший и распространенный промысел у жителей ближайших к Тифлису мест по огромному требованию тифлисцев на ягоды и овощи»³.

უფრო ადრე, სახელდობრ 1843 წელს, სავაჭრო მებაღეობა-მეხილეობის განვითარების შესახებ გორის მაზრაში, დოკუმენტში ნათქვამია: „ხილი, თავის მაზრის გარდა (მოსახლეობას), დიდი რაოდენობით გააქვს თბილისის ბაზარზე“.

ზემოთქმულის შემდეგ არ შეიძლება არ დავუჭეროთ ბარონ როზენს, რომელიც 1837 წელს ხაზგასმით ლაპარაკობდა საქართველოში საშინაო ვაჭრობის საგრძნობლად განვითარების შესახებ⁴.

ყველა ზემომოტანილი კონკრეტული მასალა მკაფიოდ ადასტურებს საკმაოდ განვითარებული შინაგანი ბაზრის, სასაქონლო წარმოების და

¹ დ. გ. გ. ლ. ა. ძ. ე. კაპიტალისტური საწარმოების სოფლის მეურნეობასა და მრეწველობაში რეფორმამდელ საქართველოში (1830—1864 წწ.), თბ., 1959, გვ. 30.

² СХАО, I, გვ. 114, 115, 116, 117, 118.

³ იქვე, ' გვ. 44.

⁴ АКАК, VIII, ч. I, გვ. 183.

ფულადი ურთიერთობის, ე. ი. კაპიტალიზმის ერთ-ერთი აუცილებელი პირობის არსებობის ფაქტს. „ბატონყმურ საზოგადოებაში, — ამბობდა ლენინი თავის ლექციაში სახელმწიფოს შესახებ, — ვაჭრობის განვითარებასა, მსოფლიო ბაზრის წარმოშობასა და ფულის ტრიალის განვითარებასთან ერთად ჩნდებოდა ახალი კლასი — კაპიტალისტების კლასი“¹.

ავითარებდა რა ამ აზრს, ლენინი აღნიშნავდა: „ვაჭრობის, საქონლის გაცვლა-გამოცვლის განვითარებამ გამოიწვია ახალი კლასის — კაპიტალისტების გამოყოფა“². და კიდევ: „ეს პოლარული მიმდინარეობანი (ლაპარაკია სოფლის ბურჟუაზიასა და სოფლის პროლეტარიატის შექმნაზე — ავტ.) იბადებიან და ძლიერდებიან იქ და იმდენად, სადაც და რამდენადაც ვითარდება და მტკიცდება სასაქონლო მეურნეობა“³.

მემამულური მეურნეობის ევოლუციის ხასიათი (ბურჟუაზიული მეთაოსნობის წარმოშობა). ფულად-სასაქონლო ურთიერთობათა განვითარებამ ქართველი თავადაზნაურობა, ყოველ შემთხვევაში მისი ერთი ნაწილი, აიძულა, ეფიქრა მეურნეობის გარდაქმნა-გადახალისებაზე დროის მოთხოვნილებების შესაბამისად. ამას კი, ე. ი. მემამულური მეურნეობის ბურჟუაზიულ ევოლუციას, ხელს უშლიდნენ იმდროინდელ საქართველოში გაბატონებული ფეოდალური საკუთრების ფორმა (სავარაუდოდ მფლობელობა) და ამ თავად-აზნაურთა მიწების გაუმჯობესებლობა. მაგრამ. მიუხედავად ამისა ფეოდალური კლასის გარკვეულმა ნაწილმა მაინც მოახერხა თავისი მეურნეობის რაციონალურ საფუძვლებზე გარდაქმნა. მისი მთავარი მიზანი ამიერიდან იყო საბაზრო პროდუქციის, გაცვლითი ღირებულების წარმოება. მემამულე-რაციონალიზატორები იყვნენ: სოლომონ გურგენიძე, დიმიტრი აფხაზი, ალექსანდრე ჭავჭავაძე, სოლომონ ანდრონიკაშვილი, თორნიკე ანდრონიკაშვილი, გრიგოლ ანდრონიკაშვილი, სიმონ შალიკაშვილი, ივანე სულხანიშვილი, ივანე მუხრან-ბატონი, ბებურიშვილი, მიხეილ ნაკაშიძე, ნიკო ჩიჯავაძე, კონსტანტინე ერისთავი, მიხეილ ერისთავი და სხვ.

არ ვჩერდებით რა დაწვრილებით მათი სამეურნეო საქმიანობის დახასიათებაზე⁴, აღვნიშნავთ, რომ ისინი აწარმოებდნენ დიდ საბაზრო პრო-

¹ ე. ი. ლენინი, თხზ., ტ. 29, გვ. 560.

² იქვე, გვ. 568.

³ იქვე, ტ. I, გვ. 216.

⁴ დაწვრილებით ამ მეურნეობათა შესახებ იხ.: И. Г. Антелава, К вопросу о характере экономического развития Грузии в предреформенный период. Труды АИЯЛИ, т. XXVII, Сухуми, 1956; დ. გოგოლაძე, კაპიტალისტური საწარმოები სოფლის მეურნეობასა და მრეწველობაში რეფორმამდელ საქართველოში (1830—1864 წწ.), თბ., 1959; ე. ორჯონიკიძე, სავაჭრო მიწათმოქმედების განვითარება XIX ს. რეფორმამდელი საქართველოს საბატონო მეურნეობაში, ივ. ჯავახიშვილის სახ. ისტორიის ინსტიტუტის შრომები, ტ. VI, ნაკვეთი I.

დუქციას და იძულებითი შრომის გვერდით იყენებდნენ თავისუფალ დაქირავებულ შრომასაც.

მათთვის, ისე როგორც ფერმერული მეურნეობებისათვის; უცხო არ იყო განვითარებული სასოფლო-სამეურნეო იარაღების გამოყენება. ი. ხატისოვი, ეხება რა ანანოვის მეურნეობას, სადაც იგი აგრონომის თანამდებობაზე მუშაობდა, წერდა, რომ მის დაქირავებულს გამოყენებული ჰქონდა გეგენგეიმის გუთანის, რომელიც მიწას „ორიდან ხუთ ვერშოკის სიღრმით ხნავდა“ და, რომელიც მოძრაობაში მოჰყავდა „ერთ ან ორ წყვილ... ხარს“¹. მას არ ჩამორჩებოდა ქართველი მემამულე ივანე მუხრან-ბატონი. მან, დარწმუნებულმა იმაში, რომ მეურნეობის გაძლოლის ძველებური წესი არ იძლევა სათანადო მოგებას, თანამედროვის სიტყვით, ხელი მიჰყო „ფერმის ევროპულ ყაიდაზე მოწყობას“. მუხრანსკიმ დაიქირავა ფრანგი სწავლული აგრონომი და შეიძინა განვითარებული სასოფლო-სამეურნეო იარაღები. მის ვრცელ ველებს ამუშავებდა შუმანის მარკის ამერიკული გუთანის, რომლის წინასწარმა გამოცდამ შესანიშნავი შედეგი გამოიღო. „ერთი სიტყვით, — წერს თანამედროვე, — (მუხრანსკიმ) დააწესა ყოველივე, რაც არის საჭირო კარგად გამართულისა ევროპულისა ფერმისათვის“². სხვადასხვაგვარ რაციონალურ ღონისძიებათა გატარებით მან საგრძნობლად გააღიდა მეურნეობის შემოსავალი. ალ. ორბელიანის მოწმობით, ივ. მუხრან-ბატონმა, რომლის საშუალო წლიურა შემოსავალი გასული საუკუნის 40-იან წლებში 400 მანეთს არ აღემატებოდა, 60-იანი წლებისათვის რამდენჯერმე გააღიდა და 30 000 მანეთამდე აიყვანა³.

განვითარებული სასოფლო-სამეურნეო იარაღების გამოყენების თვალსაზრისით ივ. მუხრან-ბატონი ქართველ ფეოდალებში გამონაკლისს არ წარმოადგენდა. ზოგმა მათგანმა, თანამედროვის სიტყვით, „ათობით სათიბი მანქანა“⁴ გამოიწერა. იმავე თანამედროვის მოწმობით, 1862 წლის გაზაფხულზე თბილისის მახლობლად მოუწყვიათ ინგლისიდან მიღებული სხვადასხვა სასოფლო-სამეურნეო მანქანა-იარაღების გამოცდა⁵. ამასთან, ახალი ტექნიკის შექმნის მსურველთა რიცხვი საკმაოდ დიდი ყოფილა. „თავის დღეში არა ყოფილა ამთენი მსურველი ახალი მაშინების ანუ ახალი თესლების დაბარებისა, არც ამთენი მთხოვნელი სხვადასხვა თესვის ნაწილებზედ დარიგებისა, არც მომხმარები მამულზედ ამთენი ფულისა. ბოლო დროს თბილისში და გარეშე აშენდა რამთენიოდე ქარხნები, რომელნიც


¹ ЗКОСХ, № 2, 1863; СХАО, I, გვ. 480.

² СХАО, I, გვ. 471.

³ პ. გუგუშვილი, ქართული ჟურნალისტიკა, ტ. I, გვ. 261.

⁴ ЗКОСХ, 1863, № 2, СХАО, I, 70.

⁵ СХАО, I, გვ. 65.



გუთანი და სხვა სასოფლო-სამეურნეო იარაღები.

არ შეარცხვენდნენ თვით ევროპის მხარესა და გამოჩნდნენ მამულის მკეთებელნი სოფლებშიაც, სადაც მოაწყვეს თავიანთი მამულები მშვენიერს და ანგარიშიან წესზედ“ — წერდა გაზეთი „გუთნის დედა“ 1863 წლის დასაწყისში¹.

მიუხედავად იმისა, რომ უახლესი ტექნიკის გამოყენებას რეფორმამდელი ხანის მემამულეთა მეურნეობებში მასობრივი ხასიათი არ ჰქონდა, მაინც არ შეიძლება სათანადოდ არ შევაფასოთ ის პირველი ნაბიჯები, რომლებიც ამ მიმართულებით იქნა გადადგმული. „როცა მემამულე იძენს მანქანას ან გაუმჯობესებულ იარაღს, — წერს ვ. ი. ლენინი, — ის სცვლის გლეხის ინვენტარს (რომელიც მისთვის მუშაობდა) თავისი ინვენტარით; ის, მაშასადამე, გადადის მეურნეობის შრომამიგებითი სისტემიდან კაპიტალისტურზე. სასოფლო-სამეურნეო მანქანებზე გავერცელება მოასწავებს შრომამიგების გამოდევნას კაპიტალიზმის მიერ“².

ძალიან ძნელია მეთაოსნე მემამულეთა საერთო რიცხვის დადგენა რეფორმამდელი ხანის საქართველოში. მიახლოებითი გამოთვლით კი მათი რაოდენობა თბილისის გუბერნიაში გასული საუკუნის 50-იან წლებში 35-ს ან თავად-აზნაურთა ოჯახების საერთო რიცხვის³ 2,3%-ს უდრიდა. რუსეთში კი ასეთების ხვედრითი წონა დაახლოებით 3% იყო⁴.

¹ „გუთნის დედა“, 1863, № 1.

² ვ. ი. ლენინი, თხზ., ტ. 3, გვ. 255.

³ რეფორმის წინ თბილისის გუბერნიაში თავად-აზნაურთა 1751 ოჯახი ითვლებოდა.

⁴ История СССР с древнейших времен до наших дней, т. IV, М., 1967, გვ. 238.

გლებთა მესარეწობა და გარე სამუშაოზე გასვლა. გლების მეურნეობის ევოლუციაზე დიდი გავლენა ჰქონდა სოფლის მშრომელ მოსახლეობაში მესარეწობის განვითარებისა და გარე საშოვარზე გასვლის პრაქტიკის საგრძნობლად გავრცელებას. საბჭოთა ისტორიკოსებმა ნათელჰყვეს¹, რომ ბურჟუაზიული ურთიერთობა უფრო სწრაფად სწორედ ქვეყნის იმ ნაწილში ვითარდებოდა, რომლის მშრომელი მოსახლეობა უპირატესად მესარეწობას ეტანებოდა.

ჩვენს განკარგულებაში მყოფი მასალები მკაფიოდ ადასტურებენ მესარეწობისა და გარე საშოვარზე გასვლის ფართოდ გავრცელების ფაქტს საქართველოს უმიწო და მცირემიწიან გლებებში. 1813 წელს შედგენილ ერთ აღწერილობა-უწყისში ლილოს, კუკისა და ხატისთელეთის 121 კომლ (362 მამრობითი სქესის) სახელმწიფო გლებთა შესახებ ნათქვამია, რომ «нанимаются Тифлисским жителям для доставления в Тифлис из Сальян рыбы и из Карса соли»². ხელთუბნის, გორისჯვრის, კარალეთისა და სამთავისის სახაზინო გლებთა საქმიანობა კი იმავე საბუთში შემდეგი სიტყვებითაა დახასიათებული, — «снискивают пропитание заработками». ზუსტად იგივეა ნათქვამი კავთისხევის, ახალქალაქის, სამწევრისის, ქემერეთისა და ქეხვის გლებთა შესახებ. იმავე წყაროს მოწმობით, თელავის სახელმწიფო გლებები, რომელთა რაოდენობა 100 კომლს უდრიდა, მიწის უქონლობის გამო ეწეოდნენ „ვაჭრობას, სხვადასხვა სახის ხელოსნობას და ამით ირჩენდნენ თავს“. ნაქალაქევის, ტურისციხის, ენისელის, შილდისა და სანავარდოს მცხოვრებნი (191 კომლი), გარდა ხენათესვისა, დოკუმენტის გადმოცემით „ამზადებდნენ აბრეშუმს და მისი ნამატის გაყიდვით ცხოვრობდნენ“.

რაც დრო გადიოდა, მით უფრო იშლებოდა და ფართოვდებოდა გლებების სავაჭრო-სამრეწველო საქმიანობა. 1821 წლის კამერალური აღწერის თანახმად, მაგალითად, სოფ. საგარეჯოს 118 კომლ სახელმწიფო გლებიდან 36, ან საერთო რაოდენობის 30%; უმიწობა-მცირემიწიანობის გამო ვაჭრობა-მესარეწობასა და გარე სამუშაოზე გასვლას ეტანებოდა³. სოფ. შილდაში კი ასეთების ხვედრითი წონა 46,3%-ს უდრიდა, ხოლო სოფ. ყვარელში — 78,3%-ს⁴.

კიდევ უფრო საინტერესოა ცნობები სოფ. ცხინვალისა და სურამის შესახებ. პირველ მათგანში 1842 წლის კამერალური აღწერით 120 კომ-

¹ Н. Д. Ковальченко, О характере и формах расслоения помещичьих крестьян России в первой половине XIX века. ИЗ, т. 78, 1965.

² ЦГВИАМ, Ф. ВУА, д. 18480.

³ იქვე.

⁴ ე. ო რ ჯ ო ნ ი კ ი ძ ე, მასალები თელავის მაზრის გლებთა დიფერენციაციის შესახებ XIX საუკუნის პირველ ნახევარში, მსკი, ნაკ. 33, გვ. 219—221. პროცენტები გამოანგარიშებულია ჩვენ მიერ სპეციალურად მრავალტომეულის ამ თავისათვის (აბტ.).

ლი სახელმწიფო გლეხი ირიცხებოდა, რომელთაგან მიწათმოქმედებას 50 კომლი ან 41,6%¹ ეწეოდა. დანარჩენი 70 კომლი ან კომლთა საერთო რიცხვის 58,4% ვაჭრობა-მესარეწეობით იყო დასაქმებული¹, სურამში მცხოვრები 103 კომლი გლეხიდან კი 70 კომლი ან 68%¹ მხოლოდ ვაჭრობა-მესარეწეობით არჩენდა ოჯახს².

მასალები რიგ შემთხვევაში მარტო მესარეწე გლეხებით დასახლებულ სოფლებსაც ასახელებენ. ასეთი იყო, მაგალითად, სოფელი ახალგორი. მასში 1831 წელს ირიცხებოდა სულ 98 კომლი საბატონო გლეხი, რომელთაგან 96, ან საერთო რაოდენობის 97,9%, თავის ერთადერთ საქმიანობად ვაჭრობას, მესარეწეობასა და დღიურ ქირაზე გასვლას თვლიდა³. იმავე ახალგორში ცხოვრობდა 10 სახაზინო გლეხი და ათივე არასამიწათმოქმედო შრომით ირჩენდა თავს⁴.

სოფლის მშრომელი მოსახლეობის დიფერენციაციის გაღრმავებას დიდად უწყობდა ხელს საშოვარზე გასვლა. მრავალგვარი ვალდებულებებით გადატვირთული უმიწო და მცირემიწიანი გლეხები ქალაქებში მიდიოდნენ იმ მიზნით, რათა მძიმე შრომით ეშოვათ ფული მემამულისა და ხაზინის გასასტუმრებლად, ოჯახის წევრების მოთხოვნილებათა დასაკმაყოფილებლად. მიუხედავად იმისა, რომ მთავრობა (კავკასიის აღმინისტრაცია) ხელს უშლიდა ამ საქმეს, იგი მაინც წინ წავიდა და გასული საუკუნის 30-იანი წლებიდან საკმაოდ მასიური ხასიათი მიიღო. გარე სამუშაოზე გასვლა განსაკუთრებით ქუთაისის გუბერნიაში გავრცელდა, სადაც მწარმოებელი კლასი მეტად ცუდად იყო მიწით მომარაგებული. იქ, ხელისუფლებას, არსებული ცნობების თანახმად, მარტო 1862 — 1863 წლებში 6 000 ათასამდე ბილეთი გაუცია გარე სამუშაოზე გასასვლელად⁵.

თუ რაოდენ დიდი იყო გარე სამუშაოზე გასვლისა და გლეხთა მესარეწეობის როლი კაპიტალიზმის წარმოშობა-განვითარების საქმეში, ამაზე ამომწურავ პასუხს იძლევა ლენინი. იგი წერს: „გლეხების უმრავლესობას კი სრულებით არ შეუძლია მეურნეობის გაფართოებით დაიკმაყოფილოს ფულის საჭიროება, რადგან არავითარი მარაგი არ მოეპოვება და არც წარმოების საშუალებები აქვს საკმაოდ. ასეთი გლეხი ფულის საშოვნელად, „საშოვრებზე“ მიდის, ე. ი. ბაზარზე გააქვს უკვე არა თავისი პროდუქტი, არამედ თავისი სამუშაო ძალა, საშოვრებზე წასვლა, ბუნებრივია, იწვევს სამიწათმოქმედო მეურნეობის შემდგომ დაცემას, და ეს გლეხი იმით ამთავრებს,

¹ სსცია, ფ. 254, საქ. 10031.

² იქვე.

³ იქვე, ანაწ. I, საქ. 975.

⁴ იქვე.

⁵ ЦГИА СССР, ф. 1268, оп. 10, д. 137, л. 118.

რომ თავის მიწის ნაკვეთს იჯარით აძლევს თავისივე თემის მდიდარ წევრს, რომელიც აფართოებს თავის მეურნეობას და, გასაგებია, თვითონ კი არ მოიხმარს იჯარით აღებულ მიწის ნაკვეთიდან მიღებულ პროდუქტს, არამედ ბაზარზე გზავნის მას. ხდება „ხალხის გაღარიბება“, კაპიტალიზმის ზრდა და ბაზრის გადიდება“¹ (ხაზი ჩვენია — ავტ.).

სახელმწიფო გადასახადების კომუტაცია. სასაქონლო წარმოების განვითარებამ და შინაგანი ბაზრის ზრდამ განაპირობებს სახელმწიფო გადასახადების კომუტაცია. „პირველად სპორადიულად, ხოლო შემდეგ კი — მეტ-ნაკლებად ეროვნული მასშტაბით მიმდინარე გადაქცევა პროდუქტებით გამოხატული რენტისა ფულად რენტად გულისხმობს ვაჭრობის, საქალაქო მრეწველობის, საერთოდ საქონელწარმოების და ამასთან ერთად ფულადი მიმოქცევის მნიშვნელოვან განვითარებას“² (ხაზი ჩვენია — ავტ.).

ბეზაკის რეფორმის გატარებამდე (ე. ი. 1843—1845 წწ.), ფულადი გადასახადების ხვედრითი წონა საქართველო-იმერეთის გუბერნიის სახელმწიფო გადასახადების საერთო მასაში 45,4%-ს უდრიდა, ხოლო ნატურალურის — 54,6%-ს³. 1843—1845 წლებში გატარებული საფინანსო რეფორმით კი მომავალში ყველა კატეგორიის გლეხს (სახაზინო, საბატონო და საეკლესიო) სახელმწიფოსთან ანგარიში მხოლოდ ბრჭყვიალა მონეტით უნდა გაესწორებინა.

ფულადი საგადასახადო სისტემის შემოღება, რომელიც, როგორც ზემოთაც აღვნიშნეთ, სასაქონლო წარმოებისა და შინაგანი ბაზრის განვითარების პირდაპირი შედეგი იყო, თავის მხრივ, ხელს უწყობდა ქვეყნის შემდგომ ეკონომიურ პროგრესს, ახალ (ბურჟუაზიულ) ურთიერთობათა განვითარებას. თუმცა ფულადი გადასახადების დაწესების შემდეგაც, — როგორც წერს მარქსი, — „უშუალო მწარმოებელი კვლავ თვითონვე აწარმოებს თავის საარსებო საშუალებათა უდიდეს ნაწილს მაინც, მაგრამ მისი პროდუქტის ერთი ნაწილი ახლა საქონლად უნდა გადაიქცეს, საქონლის სახით უნდა იწარმოებოდეს. მაშასადამე, მთელი წარმოების წესის ხასიათი მეტ-ნაკლებად იცვლება. იგი კარგავს თავის დამოუკიდებლობას, თავის მოწყვეტას საზოგადოებრივი კავშირისაგან“⁴ (ხაზი ჩვენია — ავტ.).

¹ ვ. ი. ლენინი, თხზ., ტ. I, გვ. 132—133.

² კ. მარქსი, კაპიტალი, ტ. III, ნაწ. II, თხ., 1959, გვ. 419.

³ И. Г. Антелава, Государственные крестьяне Грузии в первой половине XIX века, Сухуми, 1955, გვ. 358.

⁴ კ. მარქსი, კაპიტალი, ტ. III, ნაწ. II, გვ. 418.

გლახთა კლასობრივი დიფერენციაცია. სასაქონლო ურთიერთობის განვითარება ხელსაყრელ პირობებს ქმნიდა გლახთა კლასობრივი დიფერენციაციისათვის.

„...ეს პოლარული მიმდინარეობანი იბადებიან და ძლიერდებიან იქ და იმდენად, სადაც და რამდენადაც ვითარდება და მტკიცდება სასაქონლო მეურნეობა“¹.

XIX ს-ის I მესამედის მასალებიდან (ნაწილობრივ უფრო ადრეული პერიოდის საბუთებიდანაც) უკვე აშკარად ჩანს გლახთა კლასობრივი დაშლის პროცესი. მეფისნაცვალ ვორონცოვის 1849—1851 წლების ანგარიშში ჩვენთვის საინტერესო საკითხის შესახებ ნათქვამია: „გვხვდებიან ისეთი გლახებიც, რომელთა შესახებ თამამად შეიძლება ითქვას, რომ ისინი თავიანთ მფლობელებზე უფრო მდიდრები არიან. იხლიან რა გადასახადების სახით ღვინის მოსავლის $\frac{1}{10}$ -ს, და სვამენ რა თითქმის ნახევარს თავიანთი ვენახების მომვლელ დაქირავებულ მუშებთან ერთად, მათ შეუძლიათ ბაზარზე იმდენი ღვინის გატანა და მისი გაყიდვით ისეთი მნიშვნელოვანი თანხის მიღება, რომ... ხშირად ბატონსაც კი ასესხებენ ფულს“². როგორც ჩანს, საქართველოში გლახები მნიშვნელოვანი რაოდენობით აწარმოებდნენ ღვინოს საბაზროდ, რაც, თავის მხრივ, დაქირავებული შრომის გამოყენებას მოითხოვდა. ბარონი პაქსტაუზენი სახელმწიფო გლახების ეკონომიური მდგომარეობის შესახებ აღნიშნავდა (1843 წ.), რომ ისინი ხშირად ათას მანეთამდე ფულს აგროვებენ და ამ ფულს მიწების შესაძენად იყენებენ³. იმავე პაქსტაუზენის მოწმობით, თბილისის მაზრის სახელმწიფო გლახები თავისი ქონებრივი მდგომარეობის მიხედვით 4 ჯგუფად იყოფოდნენ. აქედან პირველ ჯგუფს განეკუთვნებოდნენ ოჯახები, რომელთა განკარგულებაში 70 და მეტი დესეტინა მიწა იყო⁴.

უმცირესობის ხელში მიწების თავმოყრის პროცესზე მიუთითებს აგრეთვე სახელმწიფო ხელისუფლების მიერ მიღებული საგანგებო ღონისძიებანი, რომელთა მიზანი იყო სახაზინო ქონების დაცვა სხვადასხვა პირთა მიერ ხელყოფისაგან. „გაყიდვის და დაგირავების გარდა, — ნათქვამია 30—40-იანი წლების ერთ-ერთ საბუთში, — შეინიშნება შემდეგი პროცესიც: ვალში ჩაყარდნილი გლახები, რომელთაც არა აქვთ საშუალება ნაღდი ფულით გაუსწორდნენ კრედიტორებს, ვალის ანგარიშში მიწის ნაწილს უთმობენ მას... ზოგიერთ სახელმწიფო გლახს თავის მფლობელობაში აქვს როგორც ნასყიდი, ისე ვალში დარჩენილი მიწები, ვენახები და სხვა სამეურნეო ნაგებობანი არა იმ სოფელში, სადაც თვითონ ცხოვრობენ, არამედ გამყიდველის ან მევალის სოფელში“⁵.

¹ ვ. ი. ღვინისი, თხზ., ტ. I, გვ. 216.

² АКАК, X, ч. II, гв. 879.

³ СХАО, I, гв. 11.

⁴ იქვე, გვ. 2.

⁵ И. Г. Антелава, Государственные крестьяне Грузии..., т. I, гв. 173.

შეძლებული და ღარიბი გლეხების მიერ მიწების ყიდვა-გაყიდვამ იმდენად მასობრივი ხასიათი მიიღო, რომ ხელისუფლება იძულებული გახდა 1844 წლის 25 აგვისტოს გამოეცა სპეციალური კანონი „სახელმწიფო გლეხების მიერ კერძო პირთათვის სახაზინო მიწების საკუთრებად გადაცემის საწინააღმდეგო ზომების შესახებ“¹. ამ კანონის საფუძველზე 1845 წლის 27 თებერვალს საქართველო-იმერეთის სახელმწიფო ქონებათა პალატამ გადაწყვეტილება მიიღო საქართველოს მმართველობისათვის ეთხოვნა „გაეცა განკარგულება... რომ ამიერიდან სახელმწიფო გლეხებს პალატის განსაკუთრებული ნებართვის გარეშე არ შეეძინათ არავითარი უძრავი ქონება“; წინააღმდეგ შემთხვევაში პალატას უფლება ჰქონდა ჩამოერთმია იგი ყოველგვარი ანაზღაურების გარეშე².

1821 და 1842 წლების კამერალური აღწერების ანალიზი საშუალებას გვაძლევს დავასკვნათ, რომ ამ დროისათვის საქართველოს სოფელში უკვე საკმაოდ ძლიერი კულაკური ბირთვი იყო ჩამოყალიბებული. კერძოდ, 1821 წელს თელავის მაზრაში აღწერილი 2 000 კომლი სახელმწიფო გლეხი სახნავ-სათესი მიწების სიდიდის მიხედვით შემდეგნაირად ჯგუფდებოდა³:

არ ჰქონდა არც სახნავ-სათესი მიწა და არც ვენახი — 333 კომლს (16,6%)
 1 დღიურიდან — 10 დღიურამდე⁴ მიწა ჰქონდა — 12169 კომ. (63,6%)
 10 “ “ 25 “ “ “ 272 კომ. (13,6%)
 25 “ “ 50 “ “ “ 78 კომ. (3,9%)
 50 “ “ 100 “ “ “ 27 კომ. (1,4%)
 100 დღიური და მეტი მიწა ჰქონდა 20 კომ. (1%)

1842 წლის თელავის მაზრის კამერალური აღწერის მიხედვით კი 1 515 კომლი სახელმწიფო გლეხიდან⁵:

სავსებით არ ჰქონდა არც სახნავ-სათესი მიწა და არც ვენახი — 199 კომლს (13,2%)
 არ ჰქონდა სახნავ-სათესი მიწა, ჰქონდა ვენახი — 75 კომ. (5,0%)
 “ 10 “ 25 “ “ — 368 კომ. (20,3%)
 ჰქონდა 1 დღიურიდან 10 დღიურამდე მიწა — 890 კომ. (58,7%)
 “ 10 “ 25 “ “ — 368 კომ. (20,3%)
 “ 25 “ 50 “ “ — 38 კომ. (2,5%)
 “ 50 “ 100 “ “ — 5 კომ. (0,3%)

¹ И. Г. Антелава, Государственные крестьяне..., გვ. 285.

² იქვე.

³ ე. ო რ ჯ ო ნ ი კ ი ძ ე, მასალები თელავის მაზრის გლეხთა დიფერენციაციის შესახებ XIX ს-ის I ნახევარში, მსკი, ნაკვ. 33, 1960, გვ. 219.

⁴ დღიური=0,5 დესეტინას.

⁵ ე. ო რ ჯ ო ნ ი კ ი ძ ე, მასალები თელავის მაზრის გლეხთა დიფერენციაციის შესახებ XIX ს-ის I ნახევარში, გვ. 229.

თუ 50 და მეტი დღიური სახნავ-სათესი მიწის მქონე გლეხებს კულაკების ჯგუფს მივაკუთვნებთ, 25-დან — 50 დღიურამდე — შეძლებულთა ჯგუფს, 10-დან — 25 დღიურამდე — საშუალოს, 1-დან 10 დღიურამდე მიწის პატრონებს და სავსებით უმიწო გლეხებს — ღარიბებისა და უღარიბესების ჯგუფს, მაშინ თითოეული ჯგუფის ხვედრითი წონა შემდეგნაირად წარმოგვიდგება:

	1821 წლის კამერალური აღწერით	1842 წლის კამერალური აღწერით
ღარიბებისა და ძალიან ღარიბების ჯგუფი	— 80,1% ¹	71,9%
საშუალო	— 13,6% ¹	20,3%
შეძლებულებისა და კულაკების	— 6,3%	2,8% ¹

ცხრილი 1

მსხვილფეხა რქოსანი საქონლის განაწილება თელავის მაზრის სახელმწიფო გლეხებს შორის 1842 წ.*

სოფლების დასახელება	კომლთა რაოდენობა		სავსებით არ ჰყავდათ საქონელი		ჰყავდათ საქონელი 1-დან 10 სულამდე		ჰყავდათ საქონელი 10 სულ და მეტი		10 და მეტი სული საქონლის პატრონ გლეხებს სულ ჰყავდათ	
	კომლთა რაოდენობა	საქონლის რაოდენობა	კომლთა რაოდენობა	%	კომლთა რაოდენობა	%	კომლთა რაოდენობა	%	საქონლის რაოდენობა	%
ენისელი	129	379	69	53,5	48	37,2	12	9,3	148	39,1
სანავარდო	64	205	31	43,3	23	36,6	10	15,1	117	57,0
ქიკიანი	61	493	18	29,5	18	49,5	25	41,0	399	80,5
ტურის ციხე	69	291	37	53,6	22	40,9	16	5,5	207	70,1
შილა	19	71	6	31,7	9	47,3	4	21,0	48	67,6
შაქრიანი	116	496	43	34,8	49	44,5	24	20,7	298	76,0
ფშაველი	115	411	53	46,0	43	41,9	14	12,1	185	45,0
ქისტაური	57	396	22	38,6	17	29,9	18	31,5	296	74,8
გავაზი	161	1072	36	22,4	66	41,0	59	36,66	812	75,7
ზემო ხოდა-შენი	75	307	34	45,3	30	40,0	11	14,7	151	49,2
ქუქატანი	85	394	31	36,7	41	46,9	13	16,4	216	54,9
შალაური	53	283	21	39,1	20	38,2	12	22,6	183	64,7
ურიათუბანი	91	565	34	37,5	36	39,5	21	23,0	383	67,6
ველისციხე	291	771	168	57,8	104	35,7	19	6,5	275	36,8
სულ	1515	6852	645	43,3	598	38,8	272	17,9	4144	60,0

* ცხრილი შედგენილია 1842 წლის თელავის მაზრის კამერალურ აღწერათა მასალების საფუძველზე. სსცია, ფონდი 254, ანაწ. 1, საქ. 19024, 19025, 19055.

თუ 75 კომლი გლეხიდან, რომელთა ვენახების ფართობი არ არის ცნობილი, 10 კომლს მაინც შეძლებულეებისა და კულაკების ჯგუფს მივაკუთვნებთ, მაშინ ამ უკანასკნელი ჯგუფის ხვედრითი წონა 1842 წლის კამერალური აღწერის მიხედვით 3,5%-ს მიაღწევს.

შეძლებული გლეხები ფლოზდენენ არა მარტო სახნავ-სათესი მიწების უდიდეს ნაწილს, არამედ მსხვილფეხა რქოსანი საქონელიც უმთავრესად მათ ხელში იყო თავმოყრილი. ამის ნათელ ილუსტრაციას წარმოადგენს ზემოთ მოტანილი ცხრილი (იხ. ცხრ. 1).

თუ 10 და მეტი სული მსხვილფეხა რქოსანი საქონლის პატრონ გლეხებს შეძლებულთა და კულაკების ჯგუფს მივაკუთვნებთ, მაშინ გამოვა, რომ 1842 წლისათვის გლეხობის ამ ზედაფენამ, რომლის ხვედრითი წონა 17,9%-ს უდრიდა, მოახერხა ხელში ჩაეგდო მსხვილფეხა რქოსანი საქონლის საერთო რაოდენობის 60%. მათ გვერდით იგივე თელავის მაზრაში არსებობდნენ ისეთი სახელმწიფო გლეხები, რომელთაც სავსებით არ ჰყავდათ საქონელი. ასეთების ხვედრითი წონა 43,3%-ს შეადგენდა.

განსაკუთრებით საგულისხმოა ცნობები ცალკეული სოფლების შესახებ, მაგალითად, ენისელის 12 კომლ სახაზინო გლეხს, ანუ საერთოდ ამ სოფელში მცხოვრებ სახელმწიფო გლეხთა 9,3%-ს, თავის საკუთრებაში ჰყავდა მთელი სოფლის მსხვილფეხა რქოსანი საქონლის 40,0%; 16 კომლ ტურისციხელ გლეხს ანუ 5,5%-ს ჰყავდა საქონლის 70,1%; სოფელ ფშაველში მცხოვრებ სახელმწიფო გლეხების 12%-ის განკარგულებაში კი მთელი სოფლის საქონლის 45% იყო. ამავე დროს, როგორც ჩვენ მიერ ჩამოთვლილ, ისე სხვა სოფლების მშრომელი მოსახლეობის საკმაოდ მნიშვნელოვან ნაწილს საერთოდ არ ჰყავდა მსხვილფეხა რქოსანი საქონელი. ასეთების ხვედრითი წონა სოფელ ენისელში შეადგენდა 53,5%-ს, ტურისციხეში — 53,6%-ს, ფშაველში — 46,0%-ს, ხოლაშენში — 45,3%; ველისციხეში — 57,7%-ს.

გლეხთა კლასობრივი დიფერენციაციის პროცესი კიდევ უფრო ღრმად იყო წასული სიღნაღის მაზრაში, სადაც მოსახლეობის საქმიანობის ერთ-ერთ მთავარ დარგს მესაქონლეობა წარმოადგენდა. სათანადო ცნობები ამ პროცესის შესახებ მოტანილია მე-2 ცხრილში.

როგორც ცხრილიდან ჩანს, მდიდარი სახელმწიფო გლეხების ხელში, რომლებიც სიღნაღის მაზრის სახელმწიფო გლეხთა 17,2%-ს შეადგენდნენ, კონცენტრირებული იყო მთელი მაზრის მსხვილფეხა რქოსანი საქონლის 71%. ამავე დროს იმავე სიღნაღის მაზრაში არსებობდა სახელმწიფო გლეხების საკმაოდ მრავალრიცხოვანი ფენა, რომელთაც სავსებით არ ჰყავდათ პირუტყვი; ასეთი გლეხების ხვედრითი წონა 49,4%-ს უდრიდა.

ცალკეული სოფლების განხილვისას ჩვენ წინაშე მეტად საინტერესო სურათი იშლება. სოფ. ანაგის 37 კომლ სახელმწიფო გლეხს, ანუ მათი საერთო რაოდენობის 9,5%-ს, ჰყავდა მთელი მსხვილფეხა რქოსანი საქონ-

მსხვილფეხა რქოსანი საქონლის განაწილება სიღნაღის მაზრის სახელმწიფო
გლეხებს შორის 1842 წ.*

სოფლების დასახელება	კომლთა რიცხვი	მსხვილფეხა რქოსანი საქონლის საერთო რაოდ.	საერთოდ არ ჰყავდათ საქონელი		ჰყავდათ საქონელი 1-დან 10-დე		ჰყავდათ საქონელი 10 და მეტი სული		10 და მეტი საქონლის პატრონ გლეხებს ჰყავდათ სულ	
			კომლების რაოდენობა	%	კომლების რაოდენობა	%	კომლების რაოდენობა	%	პირუტყვის რაოდენობა	საერთო რაოდენობა
ანავა	389	1054	257	66,0	95	24,1	37	9,5	654	62,2
ვაჭირი	469	1895	263	54,5	149	31,6	57	12,1	1289	68,0
პატარა საქობო	174	806	78	45,7	68	39,0	28	16,0	438	54,3
დიდი საქობო	232	871	114	49,9	90	36,2	28	12,0	675	80,0
ჭუვანა	221	1077	104	57,0	79	35,7	38	17,1	685	63,6
ფანინა	84	451	47	55,9	22	26,2	15	17,8	847	76,2
ქვემო მაჩხანა	203	1210	101	50,0	63	31,0	39	19,2	932	77,0
ტიბაანი	101	553	47	46,5	35	34,6	19	18,8	382	67,4
პრასიანი	35	125	22	62,9	8	22,9	5	14,2	60	48,0
ოზაანი	53	253	21	40,0	19	36,0	13	24,3	170	67,2
ცლუნკაანი	52	247	22	42,0	19	36,4	11	21,1	166	68,0
მირზაანი	240	1753	89	37,5	105	43,8	46	19,1	1329	75,9
კოტაანი	37	192	16	43,2	11	29,7	10	27,0	154	75,5
არბოშვი	112	689	37	33,0	55	50,0	20	18,7	387	56,2
ზემო მაჩხანა	301	1855	140	46,5	97	32,2	64	21,2	1424	76,7
მალარო	424	2260	202	77,6	142	33,5	80	18,8	1745	77,2
კოტორი	65	686	17	26,1	21	32,3	27	41,5	598	87,1
ნუკრიანი	173	1046	93	53,7	48	38,9	32	18,5	852	81,4

ს უ ლ | 3365 | 17023 | 1670 | 49,4 | 1116 | 33,4 | 579 | 17,2 | 12287 | 71,5

ლის 62,2%, ვაჭირის სახელმწიფო გლეხთა 57 კომლს, ანუ 12,1%-ს — 68,1%, ნუკრიანის სახელმწიფო გლეხთა 18,5%-ს — 81,4%. ამავე დროს ჩვენ მიერ ჩამოთვლილ სოფლებში, ისევე როგორც სიღნაღის მაზრის სხვა სოფლებშიც, მოსახლეობის მნიშვნელოვან ნაწილს საერთოდ არ ჰყავდა მსხვილფეხა პირუტყვი. ასეთების ხვედრითი წონა შეადგენდა: ანავაში — 66,0%-ს, ვაჭირში — 54,5%-ს, ნუკრიანში — 53,7%-ს.

თუ როგორი მდგომარეობა იყო ამ მხრივ საერთოდ ქახეთში, ამ კითხვაზე ნათელ წარმოდგენას გვაძლევს მე-3 ცხრილი.

* ცხრილი შედგენილია სიღნაღის მაზრის 1842 წლის კამერალური აღწერების მასალების მიხედვით. სსცია, ფ. 254, ანაწ. 1, საქ. 1933.

მსხვილფეხა რქოსანი საქონლის განაწილება კახეთის სახელმწიფო
გლეხებს შორის 1842 წ.

რაიონის დასახელება	კომლების რიცხვი	მსხვილფეხა რქოსანი საქონლის დასახელება	სავსებით არ ჰყავდათ საქონელი		ჰყავდათ საქონელი 1—10-მდე სული		ჰყავდათ საქონელი 10 და მეტი სული		10 და მეტი სული საქონლის მფლობელებს გლეხებს ჰყავდათ სულ	
			კომლთა რაოდენობა	%	კომლთა რაოდენობა	%	კომლთა რაოდენობა	%	საქონლის რაოდენობა	%
კახეთი	4880	23875	2315	47,4	1714	35,2	851	17,4	17031	66,6

ცხრილში მოტანილი ცნობებიდან ჩანს, რომ კახეთში (თელავისა და სიღნაღის მაზრები) 17,4% (851 კომლი) მდიდარი სახელმწიფო გლეხების განკარგულებაში იყო მთელი მსხვილფეხა რქოსანი საქონლის 66,6% (23875 სული), ხოლო იმავე კატეგორიის გლეხების 47,4%-ს (2315 კომლი) სავსებით არ ჰყავდა მსხვილფეხა საქონელი.

ბუნებრივია, რომ გლეხობის ზედაფენა, რომლის ხელშიც იყო სახნავ-სათესი მიწებისა და მსხვილფეხა რქოსანი საქონლის უმეტესი ნაწილი, წარმოადგენდა სასაქონლო პროდუქციის ძირითად მწარმოებელს.

მართლაც, პროფ. ა. ფანცხავას გამოანგარიშებით, სოფლების შილდას, შაქრიანის, ზემო ხოდაშენის, ენისელის, ყვარელის, ურიათუბნისა და შალაურის შეძლებული და კულაკი გლეხების ხელში იყო მთელი საგლეხო მიწის ფონდის 46% და გლეხური ღვინის პროდუქციის 49%-ს სწორედ ისინი ამზადებდნენ¹.

1821 წლის კამერალურ აღწერებში შემონახულია ცალკეული კულაკების გვარები, რომელნიც თავიანთ მეურნეობაში იყენებდნენ დაქირავებულ მუშახელს და დიდი რაოდენობით ამზადებდნენ სასაქონლო პროდუქციას. ასეთების რიცხვს შეიძლება მივაკუთვნოთ, მაგალითად, პატარ-ძეულელი გლეხი სოლომონ ბუთურაშვილი. მას ჰქონდა 150 დესეტინა სახნავ-სათესი მიწა, სამი ვენახი 840 ფუთი ღვინის შემოსავლით, ჰყავდა 120 ცხვარი და 140 ღორი. იმავე სოფელში თავისი ქონებით გამოირჩეოდნენ გლეხები ოთარაშვილი, ხუშიტაშვილი, ზუკაკიშვილი და სხვ. თითოეული მათგანის მფლობელობაში იყო 100—100 დესეტინა სახნავ-სათესი მიწა, ღვინის შემოსავალი კი 200-დან 400 ფუთამდე მერყეობდა².

¹ А. А. П а н ц х а в а, К вопросу о развитии аграрных отношений в дореформенной Восточной Грузии, М., 1957 გვ. 109.

² ე. ო რ ჯ ო ნ ი კ ი ძ ე, მასალები თელავის მაზრის გლეხთა..., გვ. 218—219.

შედლებული გლეხებისა და კულაკების შესახებ კიდევ უფრო საინტერესო ცნობებს ვნახულობთ თელავისა და სიღნაღის მაზრების 1842 წლის კამერალურ აღწერებში. ამ მასალებზე წარმოდგენას გვაძლევს მე-4 ცხრილი.

ცხრილი 4

ცნობები თელავისა და სიღნაღის მაზრების შედლებული გლეხებისა და კულაკების შესახებ (1842 წ.)*

გლეხების გვარი და სახელი	მოჰყავდათ ხორბალი (ფუთი)	მოჰყავდათ ღვინო (ფუთი)	ჰყავდათ ცხენები (სულელების რაოდ.)	ჰყავდათ მსხვილფეხა რქოსანი საქონ.	ჰყავდათ წერილფეხა რქოსანი საქონელი (სულელების რაოდენობა)
კარდენახაშვილი ბეჟან	315	1008	2	12	—
ჭინჭიბუხაშვილი იოსებ	450	630	2	52	—
მჭედლიშვილი ზაქარია	450	160	2	23	200
მაზანაშვილი სიმონ	675	336	4	40	300
მოსაშვილი იოსებ	1350	450	40	160	300
მოსაშვილი ბეჟან	1350	336	15	80	200
ყაზარაშვილი სტეფანე	720	1260	2	30	150
ალადაშვილი ბიძინა	675	700	1	20	400
ხითარიშვილი არუთინ	1010	336	8	50	500
ბასილაშვილი სოსია	1080	210	5	40	400
ბეგიაშვილი გოგია	1100	336	10	80	700
ჯალიაშვილი ნინა	900	250	9	4	400
ქანკორაშვილი დავით	800	130	4	18	780
მენტეშაშვილი სოლომონ	1100	450	4	30	400
გონაშვილი მოსე	1150	50	10	120	700
კოჩიაშვილი ლუარსაბ	1170	170	15	55	800
ქართველიშვილი გიორგი	700	150	7	50	400
ტაბლანიშვილი გლახა	472	378	2	40	—
კუპრაშვილი იოვა	600	504	1	80	—
კუპრაშვილი მახარე	472	250	1	80	—
20 კომლ გლეხს სულ	16639	8194	144	1064	7170

როგორც ცხრილიდან ჩანს, მხოლოდ 20 კომლ სახელმწიფო გლეხს—კულაკს¹ ეკუთვნოდა თელავისა და სიღნაღის მაზრებში 1850 წელს აღ-

* ცხრილი შედგენილია თელავისა და სიღნაღის მაზრების 1842 წლის კამერალური აღწერების მასალების მიხედვით; სსცია, ფ. 254, ანაწ. 1, საქ. 19055 და 19023.

¹ თელავისა და სიღნაღის მაზრების მხოლოდ 10 სოფელში 1842 წლის კამერალური აღწერების მასალების მიხედვით მკვლევარები 50-ზე მეტ კულაკს თვლიან (იხ. დ. გოგოლაძე, კაპიტალისტური საწარმოები სოფლის მეურნეობასა..., გვ. 96—99).

რიცხული ცხენების საერთო რაოდენობის 1,5%, მსხვილფეხა რქოსანი საქონლის და წვრილფეხა საქონლის 7,8%¹.

ცხრილში ჩამოთვლილი გლეხებიდან განსაკუთრებით გამოირჩეოდნენ ს. ყაზარაშვილი, ი. მოსაშვილი, ქ. მოსაშვილი, გ. ბეგიაშვილი, დ. ჭანკო-რაშვილი, მ. გონაშვილი, ლ. კოჩიაშვილი, გ. ქართველიშვილი და სხვ. მათ დიდი რაოდენობით ჰყავდათ საქონელი და მარცვლეულის მოსავალი მოჰყავდათ თავის მოთხოვნილებებზე გაცილებით უფრო მეტი რაოდენო-ბით. ზოგიერთ მათგანს შეეძლო ბაზარზე გასაყიდად გამოეტანა 1 000 ფუთამდე ღვინო და მარცვლეული. უნდა ვიგულისხმოთ, რომ ასეთი მსხვილი მეურნეობების წარმოება დაქირავებული მუშახელის გარეშე შეუძლებელი იქნებოდა.

სოფლის ბურჟუაზიას ეკუთვნოდა ველისციხელი სახელმწიფო გლეხი ც გუტრაძე მიჩიტაშვილი (1842 წ.). მისი ოჯახი შედგებოდა 4 სულისაგან, ჰქონდა 40 დესეტინა სახნავ-სათესი მიწა, საიდანაც ყოველწლიურად მოჰყავდა 500 ფუთი მარცვლეული, ჰყავდა 30 სული მსხვილფეხა რქო-სანი საქონელი, 2 ცხენი და 100 სული ცხვარი. მასვე ეკუთვნოდა ვენახი, რომლის ყოველწლიური შემოსავალი საშუალოდ 900 ფუთს უდრიდა².

მიჩიტაშვილს არ ჩამოუვარდებოდა შილდელი გლეხი პეტრე ცეცხლა-შვილი (1842 წ.), რომელიც ყოველწლიურად 900 ფუთ ღვინოს ამზა-დებდა³.

კულაკი გლეხები იყვნენ არა მარტო კახეთში, არამედ საქართველოს სხვა რაიონებშიც. თბილისის მაზრაში, მაგალითად, კულაკად შეიძლება ჩავთვალოთ სოღანლუდელი სახელმწიფო გლეხი ედიგაროვი, რომელმაც (თავის კომპანიონებთან გამაზოვთან და შაიკოვთან ერთად) თავად ამი-ლახერისაგან ნაყიდ მიწაზე გახსნა „დუქნები და მოაწყო უშველებელი მეურნეობა, სადაც მხოლოდ მსხვილფეხა რქოსანი საქონლის რიცხვი ყო-ველწლიურად 1 000 სულს უდრიდა“ (1846 წ.)⁴.

ქონებრივი მდგომარეობის მიხედვით გორის მაზრაში გამოირჩეოდა საბატონო გლეხის ხრიკულის ოჯახი. XIX საუკუნის 50-იანი წლების ცნობების მიხედვით, ხრიკულს ჰქონდა 30 დესეტინა სახნავ-სათესი მიწა, 2 ვენახი, 3-თვლიანი წისქვილი, ჰყავდა 8 კამეჩი, 12 ხარი, 20 ძროხა და 40 ღორი. საბუთში, საიდანაც ამოკრეფილია ეს ცნობები, ნათქვამია, რომ ხრიკული ეწეოდა ფულის გასესხებას სარგებლით. მისი ყოველწლიური

¹ СХАО, I, გვ. 115—116; იმის გამო, რომ თელავისა და სიღნაღის მაზრის 1842 წლის ცნობა საქონლის რაოდენობის შესახებ შემონახული არ არის, პროცენტები გამო-თვლილია 1850 წლის ცნობების მიხედვით.

² ე. ო რ ჯ ო ნ ი კ ი ძ ე, მასალები თელავის მაზრის..., გვ. 228.

³ იქვე, გვ. 231.

⁴ И. Г. Антелава, Государственные крестьяне..., გვ. 65.

გადასახადის რაოდენობა 700 მანეთს უდრიდა, აქედან ფულად იხდიდა 400 მანეთს¹.

რეფორმამდელი საქართველოს სოფელში ხშირი იყო გლეხების მიერ ბატონყმობისაგან თავდახსნის შემთხვევები. პირადი თავისუფლების მისაღებად გლეხებს საკმაოდ მნიშვნელოვანი თანხის გადახდა უხდებოდათ. მაგალითად, საბატონო გლეხმა სვანიძემ ბატონყმობისაგან გასანთავისუფლებლად გადაიხადა 520 მანეთი, ანუ თითქმის 2000 სული ცხვრის ფასი, პაპულაშვილმა — 1000 მანეთი, ცეცხლაშვილმა კი — 1500 მანეთი. ის ფაქტი, რომ გლეხებს ამდენი თანხის გადახდა შეეძლოთ, კიდევ ერთხელ მიუთითებს იმაზე, რომ რეფორმამდელი საქართველოს სოფელში უკვე საკმაოდ საგრძნობი კულაკური ბირთვი იყო შექმნილი.

ყველა შემოთხამოთვლილი გლეხი წარმოადგენდა რეფორმამდელი სოფლის ბურჟუაზიას, რომელიც დაქირავებული მუშახელის ექსპლოატაციით (რათქმაუნდა, ეს ფაქტი არ გამოირიცხავდა ოჯახის წევრების შრომასაც) აწარმოებდა მნიშვნელოვან სასაქონლო პროდუქციას.

სოფლის მეურნეობის ბურჟუაზიული ევოლუციის დამჩქარებელ ფაქტორს წარმოადგენდა სახელმწიფო გლეხთა მრავალრიცხოვანი ფენის არსებობა რეფორმამდელი ხანის საქართველოში. აღნიშნული კატეგორიის გლეხები პირადი თავისუფლებით სარგებლობდნენ, სხვა კატეგორიის გლეხებთან შედარებით გაცილებით ნაკლებ ფეოდალურ ექსპლოატაციას განიცდიდნენ, დამოუკიდებელი მეურნეობის საწარმოებლად მეტი შესაძლებლობა ჰქონდათ და უფრო იოლად ებმებოდნენ სავაჭრო-კომერციულ ურთიერთობასა და საწარმოო საქმიანობაში. ამიტომაც ახალი ურთიერთობანი უპირველეს ყოვლისა სწორედ სახელმწიფო გლეხებს შორის იჩენდა თავს.

კაპიტალისტური წყობის წარმოქმნის მეორე მნიშვნელოვან ხელის შემწყობ ფაქტორს წარმოადგენდა გლეხთა ხელში საკუთარი, ნაყიდი მიწების არსებობა. საკუთარი მიწების ქონა გლეხებს ნაწილობრივ მაინც ათავისუფლებდა ამ მთავარი საწარმოო საშუალებებით ბატონყმური წესით უზრუნველყოფისაგან².

ყოველივე ამის შედეგს წარმოადგენდა სახელმწიფო და საბატონო გლეხებს შორის ღრმად წასული ქონებრივი დიფერენციაცია, რომელიც XIX ს-ის 30—40-იან წლებში უკვე სოციალურ დიფერენციაციაში იყო გადაზრდილი.

¹ სსცია, ფ. 9, საქ. 2122, ფურც. 8—22.

² И. Д. Ковальченко, О характере и формах расслоения помещичьих крестьян России в первой половине XIX века, ИЗ т. 78, 1965.

დაქირავებული მუშახელი. კაპიტალიზმის აუცილებელ პირობას წარმოადგენს დაქირავებული მუშახელის არსებობა. ბურჟუაზიული ურთიერთობა გულისხმობს არა მარტო შრომის შედეგის, არამედ სამუშაო ძალის გაყიდვასაც. რეფორმამდელი საქართველოს სოფელში უკვე მრავლად იყვნენ გლეხები, რომლებიც თავიანთ სამუშაო ძალას სხვას სთავაზობდნენ. როგორც მოსალოდნელიც იყო, სამუშაო ძალის გაყიდვას მისდევდნენ უმთავრესად მცირემიწიანი და უმიწო გლეხები¹.

გაქირავების საკმაოდ მრავალრიცხოვანი ფაქტები გვხვდება ჯერ კიდევ XIX ს-ის დასაწყისში. მაგალითად, 1813 წლის საბუთის მიხედვით, სოფლების ლილოს, კუკიისა და ხატისთელეთის გლეხებს ქირაობდნენ „თბილისელი მაცხოვრებლები სალიანიდან თევზისა და ყარსიდან მარილის თბილისში ჩამოსატანად“². იმავე საბუთიდან ჩანს, რომ ხელთუზნის, გორისჯვრის, კარალეთის, ჭალის და სამთავისის გლეხების ცხოვრების წყაროს უმთავრესად წარმოადგენდა სამუშაო ძალის გაქირავება³. ზუსტად იგივეა ნათქვამი კავთისხევის, ახალქალაქის, სამწევრისის, კამერეთის, კეხვისა და სხვა სოფლების მცხოვრებლების შესახებ.

ჩვენთვის საინტერესო საკითხის შესახებ კიდევ უფრო მეტი ცნობები მოიპოვება 1821 წლის კამერალურ აღწერებში. ამ ცნობებიდან ირკვევა, რომ სოფელ საგარეჯოს სახელმწიფო გლეხების 9,2%, სოფ. შილდას 28,6% და ყვარელის სახელმწიფო გლეხების 59,4% სამუშაო ძალის გაქირავებით ცხოვრობდნენ⁴. ბარონი ჰაქსტჰაუზენი (1843 წ.) წერდა: „მეოთხე ჯგუფს (სოფ. სართიჭალას გლეხებისა) აქვს მხოლოდ სახლი, ამ უკანასკნელ ჯგუფს მიეკუთვნება გლეხები, რომლებიც ქირით ცხოვრობენ სხვებთან“⁵.

ორმოციანი წლების თბილისის საგვ. იყო სამუშაო ძალის გამქირავებელი ხალხით. „შეხედეთ, — წერდა თანამედროვე, — ამ უშველებელ მასას შავი მუშებისას თბილისსა და სხვა ადგილებში. ისინი ყველა იმერლები და ოსები არიან, მძიმე შრომით შოულობენ საზრდოს... მათი მთავარი საზრუნავია როგორმე იშოვონ ფული სახელმწიფო გადასახადების, საბატონო დალის გადასახდელად და ოჯახის გამოსაკვებად“⁶.

დაქირავებულ სამუშაო ძალას, როგორც ზემოთ აღვნიშნეთ, იყენებდნენ კულაკი გლეხები თავიანთ მეურნეობაში. 1842 წლის კამერალური

¹ ვ. ი. ლენინი, თხ., ტ. I, გვ. 133—134.

² ЦГВИАМ, ф. ВУА, д. 18480.

³ იქვე.

⁴ ე. ო რ ჯ ო ნ ი კ ი ძ ე, მასალები თელავის მაზრის..., გვ. 219, 221, 222, 224, 225.

⁵ СХАО, I, გვ. 9.

⁶ И. Г. Антелава, Государственные крестьяне..., გვ. 167.

აღწერის თანახმად, სწორედ კულაკი გლეხები ქირობდნენ ჯიშითელ, ჩაილურელ და სხვა სახელმწიფო გლეხებს.

დაქირავებული შრომა გამოყენებული იყო (მეტ-ნაკლები ზომით) ბარონ ნიკოლაის, ანანოვის, ბაგრატიონ-მუხრანსკის, გურგენიძის, სულხანი-შვილის, დიასამიძის, ჩიჯავაძის და სხვ. მეურნეობებში. ანანოვის მეურნეობას, მაგალითად, თანამედროვეები დაქირავებული შრომის გამოყენების ნიმუშად მიიჩნევდნენ¹. ფართოდ იყენებდა ნებით დაქირავებულ შრომას ბარონი ნიკოლაიც. „იმის გამო, რომ აქ მე ყმები არა მყავდა. — წერდა იგი 1857 წ., — იძულებული ვიყავი მიმემართა თავისუფალი მუშახელისათვის“².

მართალია, ჩვენ მიერ ჩამოთვლილი ფაქტებიდან არ შეიძლება ისეთი დასკვნის გაკეთება, თითქოს დაქირავებული შრომა მასობრივად იყო გავრცელებული, ანდა სამუშაო ძალის გამქირავებელნი საბოლოოდ მოწყვეტილი იყვნენ სოფლის მეურნეობას, მაგრამ უნდა გავიხსენოთ, ჯერ ერთი, რომ მასობრივ ხასიათს დაქირავებული შრომის გამოყენება იღებს კაპიტალიზმის, როგორც გაბატონებული ფორმაციის არსებობის პირობებში და არა კაპიტალისტური წყობის დროს (რუსეთში, მაგალითად, მრეწველობაშიც კი 1800 წლისათვის დაქირავებული მუშების ხვედრითი წონა 41%-ს შეადგენდა)³; მეორეც, რომ სოციალ-ეკონომიური მოვლენის რწმუნელობის შეფასებისას მთავარია არა იმდენად რაოდენობრივი მხარე, რამდენადაც ამ მოვლენებით გამოხატული განვითარების ტენდენცია და ურთიერთობათა ხასიათი. „...იქნებ თქვან, — წერდა ლენინი, — რომ ამ შემთხვევაში (ლაპარაკია შინამრეწველურ სარეწების კონკრეტულ მაგალითზე — ავტ.) საერთოდ მეტად დიდია დაქირავებულ მუშათა პროცენტი? მაგრამ საქმე ის არის, რომ აქ მნიშვნელოვანია სრულიად არა აბსოლუტური ციფრები, არამედ ურთიერთობანი, რომელთაც ისინი ააშკარავენ, ურთიერთობა, რომელიც არსებითად ბურჟუაზიულია და ასეთად რჩება ძლიერ გამოხატული ბურჟუაზიულობის დროსაც და სუსტად გამოხატული ბურჟუაზიულობის დროსაც“⁴. რაც შეეხება იმას, რომ რეფორმამდელი საქართველოს მუშებს წმინდა პროლეტარული ხასიათი არ ჰქონდათ, რომ მათ უმრავლესობას კიდევ გააჩნდა მცირე მიწის ნაკვეთები, საბოლოოდ გაწყვეტილი არ ჰქონდათ კავშირი სოფელთან და ამდენად კაპიტალისტური ეპოქის მუშების წინამორბედად არ ჩაითვლებოდნენ. ამის საპასუხოდ შეიძლება ითქვას, რომ სოფელთან კავშირი არ ჰქონდა გაწყვეტილი რუსეთის მუშების აბსოლუტურ

¹ СХАО, I, გვ. 480, შენიშვნა I; И. Г. Ант е л а в а, К вопросу о характере экономического развития предреформенной Грузии.

² СХАО, I, გვ. 460.

³ История СССР (Вузовский учебник), т. I, 1956, გვ. 627.

⁴ ვ. ი. ლ ე ნ ი ნ ი, თხ., ტ. I; გვ. 247.

უმრავლესობას არა მარტო რეფორმამდელ პერიოდში, არამედ რეფორმის შემდგომაც. ეს გარემოება, რა თქმა უნდა, გარკვეულ დალს ასვამდა რუსეთის სოციალ-ეკონომიურ ცხოვრებას, მაგრამ ეს იმას როდი ნიშნავს, რომ რუსეთი ამის გამო წყვეტდა კაპიტალისტური გზით განვითარებას, რომ იგი არ იყო კაპიტალისტური ქვეყანა. „მათ (ნაროდნიკებმა — ავტ.), მგონია, არც კი იციან, რომ კაპიტალიზმმა — თავისი განვითარების შედარებით დაბალ საფეხურებზე — ვერსად ვერ შეძლო მუშის სრულიად მოწყვეტა მიწისაგან. დასავლეთ ევროპისათვის მარქსმა ის კანონი დაადგინა, რომ მხოლოდ მსხვილი მანქანური ინდუსტრია ახდენს მუშის საბოლოო ექსპროპრიაციას. ამიტომ გასაგებია, რომ მთარული მსჯელობანი ჩვენში კაპიტალიზმის არარსებობის შესახებ, რასაც იმით ასაბუთებენ, რომ „ხალხი მიწას ფლობს“ — მოკლებულია ყოველივე აზრს, რადგან მარქვი კოოპერაციისა და მანუფაქტურის კაპიტალიზმი არასოდეს და არსად დაკავშირებული არ ყოფილა მიწისაგან მუშაკის სრულ მოწყვეტასთან, მაგრამ, რასაკვირველია, კაპიტალიზმი მაინც კაპიტალიზმად რჩებოდა“¹ (ხაზი ჩვენია — ავტ.).

რეფორმამდელი საქართველოს ეკონომიკაში, როგორც მოსალოდნელიც იყო, იძულებითი შრომა იყო გაბატონებული, მაგრამ თანდათანობით საზოგადოებრივი აზრი სულ უფრო და უფრო დაქირავებული შრომის სასარგებლოდ იხრებოდა. გლეხის იძულებითი შრომის არარენტაბელობის მესახებ ბარონი ნიკოლაი საჯაროდ გამოთქვამდა თავის მოსაზრებას. მისი სიტყვებით რომ ვთქვათ, ყმა „ბატონის სამუშაოზე ბევრს ჭამს და ცოტას მუშაობს“². „კავკასიის სოფლის მეურნეობის საზოგადოების“ ჟურნალის რედაქცია (1859 წ.) პირდაპირ აცხადებდა, რომ „ყმის შრომა თანდათანობით კარგავს ყოველგვარ აზრს“ და რომ „ამჟამად, უფრო მეტად ოდეს-მე მორალური პრინციპი და აუცილებლობა მოგვიწოდებს მეურნეებსა და საერთოდ ყველა ჩვენთაგანს დავიწყოთ ცხოვრების ახალი წესი“³.

ქართველი სამოციანელი დავით ყიფიანი ჟურნალ „საქართველოს იოამბეში“ წერდა (1863 წ.): „საზოგადოებაში რომ ერთი ნაწილი სულ არა შრომობდეს და სხვისი შრომით ირჩენდეს თავსა და იმ შრომასაც რომ თავისუფლება არა ჰქონდეს, ე. ი. ურთიერთნებაყოფლობაზე დამოკიდებული რომ არ იყოს, საზოგადოებისათვის ცუდია თუ არა? ამ კითხვაზე:

¹ ვ. ი. ლენინი, თხ., ტ. 1, გვ. 241

² СХАО, 1, გვ. 459, И. Г. Антелава, К вопросу о характере..., გვ. 63.

³ СХАО, 1, გვ. 181.

შენა, მკითხველო, რასაკვირველია შედეგები, იქნება — შეჰკრთე კიდევცა, პასუხს კი ვერას მოიგებ ჯერა, ვიცი. ეს მდგომარეობა (ბატონყმობა — ავტ.) ორივე ნაწილისათვის, მეტადრე მთელი საზოგადოებისათვის — სენია. აი რათა, ჯერა, მე რომ ეხლა თავისუფალი კაცი არ ვიყო, ფეხებში ბორკილი გაყრილი მქონდეს, ხეირიანი შრომა, ცხადია, არ შემეძლებოდა. ჩემი ნებაყოფლობის წინააღმდეგობით ბატონმა პურის გამწვავებელი რომ გამხადოს, რასაკვირველია, ნახევარ ზორბალს ბზეს გაეყოლებ... რა გამოვიდა აქედამა? ჯერ ისა, რომა თავისუფალი შრომა უფრო ნაყოფიერია, მეორე ისა, რომა მთელ საზოგადოებაში ყოველი კერძობითი კაცი უნდა იყოს მშრომელი და მშრომელი თავისუფლათა... ამას უთუოთა გრძნობს ქართველობის კეთილშობილი ნაწილი და გლეხებს თავისუფალ შრომაზე დაყენება ეძლევათ“¹.

„საქართველოს მოამბის“ ერთ-ერთ ნომერში დაიბეჭდა ფრანგი ეკონომისტის ბასტიას (1801—1850 წწ.) „მძარცველობის ფიზიოლოგიის“ ქართული თარგმანი, შესრულებული ილია ჭავჭავაძის მიერ. იქ ჩვენთვის საინტერესო საკითხზე ნათქვამია: „საპოლიტიკო ეკონომიამ ისიც დაამტკიცა, რომ ნებაყოფლობითი შრომა თავის ბუნებით პროგრესული, წარმატებული არის, ხოლო შრომა მონისა — უძრავია, ამის გამო ნებაყოფლობითის შრომის გამარჯვება მონის შრომაზე და აუცილებელია“² (ხაზი ჩვენია — ავტ.).

საგლეხო რეფორმის გატარების წინ ჩვენ მიერ განხილული საკითხის შესახებ საგულისხმო აზრი გამოთქვა 69 კახელმა მემამულემ. „ეჭვს გარეშეა, — წერდნენ ისინი, — რომ ...გლეხები უნდა განთავისუფლდნენ ბატონყმური დამოკიდებულებისაგან. აუცილებელია მოვუწოდოთ კერძობით შრომისაკენ სოფლის მეურნეობაში თაოსნობის გასავითარებლად, რომელიც შეზღუდული და შეფერხებულია ბატონყმური დამოკიდებულების გამო“³ (ხაზი ჩვენია — ავტ.).

დაქირავებულ შრომაზე მსჯელობისას აუცილებელია აღინიშნოს, რომ რეფორმამდელ საქართველოში თავისუფალი მუშახელის ნაკლებობა იგრძნობოდა; მაგრამ ეს გარემოება ქვეყანაში კაპიტალიზმისათვის დამახას-

¹ „საქართველოს მოამბე“, 1863, № 4, გვ. 109—110.

² იქვე, № 8, გვ. 70.

³ Ш. К. Ч х е т и я, К истории крестьянской реформы в Грузии, Тб., 1950, გვ. 174.

⁴ „ქვეყნის სოფლის მეურნეობის საზოგადოება“ 1863 წლის ეურნალში წერდა, რომ „თავისუფალი მუშახელის კლასი ჩვენი დროისათვის აუცილებელია და მისი ნაკლებობა მრავალ ახალ სასარგებლო წამოწყებათა გავრცელების საქმეში მთავარ დაბრკოლებას წარმოადგენს“ (СХАО, I, გვ. 484).

სიათბელი ნიშნების არარსებობით კი არ იყო გამოწვეული, არამედ საწარმოო ძალების განვითარების დონესა და საწარმოო ურთიერთობათა ხასიათს შორის არსებული წინააღმდეგობებით. ახალი საწარმოო ძალები ვეღარ თავსდებოდნენ მოძველებულ წარმოებით ურთიერთობაში. უკანასკნელი აყოვნებდა ქვეყნის ეკონომიურ პროგრესს.

ფეოდალურ-ბატონყმური სისტემის სოციალ-ეკონომიური საფუძვლების დაშლის პროცესი. როგორც არსებული მასალებიდან ჩანს, ჯერ კიდევ რეფორმამდელ პერიოდში მიმდინარეობდა გლეხობის ბატონყმური დამოკიდებულებისაგან განთავისუფლების საკმაოდ მნიშვნელოვანი პროცესი. ბატონყმობისაგან განთავისუფლება უპირველეს ყოვლისა შესაძლებელი იყო იმ დროს შედარებით დიდი თანხის გადახდით. ოფიციალური ცნობების თანახმად, 1850—1863 წლების განმავლობაში მხოლოდ ქუთაისის გუბერნიაში ფეოდალური დამოკიდებულებისაგან გლეხების განთავისუფლების 1314 შემთხვევას ჰქონდა აღვლილი. 1858—1863 წლებში კი განთავისუფლების 468 აქტი გაფორმებულა—351 უძრავი ქოხებით (მიწით), ხოლო 117 ამის გარეშე. ამ 468 აქტით პირადი თავისუფლება მიიღო 2750 სულმა ყმა გლეხმა, ანუ გუბერნიის ყმა გლეხთა საერთო რაოდენობის 1,5%-მა¹. ანალოგიით თუ ვიმსჯელებთ 1850—1863 წლებში ბატონყმობისაგან განთავისუფლებდებოდა 7 250 სული², ანუ ქუთაისის გუბერნიის ყმა გლეხების 4,45%.

გლეხები მემამულეთა დამოკიდებულებისაგან განთავისუფლებას ახერხებდნენ არა მარტო თავგამოსყიდვით, არამედ სასამართლოს საშუალებითაც. გლეხთა მიერ ბატონყმობისაგან თავის დასაღწევად წარმოებულმა საჩივრებმა განსაკუთრებით მასობრივი ხასიათი მიიღო XIX ს-ის 30-იანი წლებიდან. თუ ამ გარემოებას გავითვალისწინებთ, აშკარაა, რომ ბატონყმობისაგან განთავისუფლებული გლეხების ხვედრითი წონა გაცილებით მეტი იქნება, ყოველ შემთხვევაში მათი შეფარდება საერთო რაოდენობასთან 10—12%-ს მაინც მიაღწევს.

ეს ფაქტი დრომოქმული ფეოდალური ფორმაციის საფუძვლების თანდათანობითი, მაგრამ განუხრელი დაშლის მომასწავებელი იყო.

თვით ცხოვრება იმგვარად მიმდინარეობდა, რომ ხელისუფლება იძულებული იყო „ხელი შეეწყო“ ძველის დაშლისათვის, გამოეცა კანონები, რომლებიც აჩქარებდა ამ პროცესს. ასეთი კანონებია მაგალითად: მებატონის ქონების საჯაროდ გაყიდვის შემთხვევაში ყმა გლეხებისათვის თავგამოსყიდვის უფლების მიცემის შესახებ³ (1831), იმერელი და გურული

¹ СХАО, I, გვ. 436. 1860 წლის კამერალური აღწერის მიხედვით ქუთაისის გუბერნიაში 180000 სული ყმა გლეხი ირიცხებოდა.

² ყოველ შემთხვევაში, არანაკლები.

³ ВПСЗРИ, VI, № 4884.

გლახებისათვის ყმების ყოლის აკრძალვის შესახებ (1843 წ.)¹, ბატონყმური დამოკიდებულებისაგან განთავისუფლებული გლახებისათვის სახელმწიფო გლახების კატეგორიაში ან მოქალაქეთა წოდებაში ჩარიცხვის ნებართვის შესახებ (1848 წ.)² და სხვ.

მემამულეების ის ნაწილი, რომელიც არ ცდილობდა, ან ვერ ახერხებდა ცხოვრების ახალ პირობებთან შეგუებას, არსებობის შესანარჩუნებლად იძულებული იყო თავისი უძრავი ქონება და ყმა გლახები გაეყიდა ან დაეგირავებინა. არსებული ცნობების მიხედვით 1863 წლის 1 იანვრისათვის თბილისის გუბერნიის თავადაზნაურობას დაგირავებული ჰყავდა 30 714 სული ყმა გლახი, ანუ მათი საერთო რაოდენობის 25%³. ერთი სიტყვით, ფეოდალური სისტემის სოციალური საფუძველი, თუ შეიძლება ასე ითქვას, 1/4-ით უკვე მოშლილი იყო. ამავე დროისათვის, იმავე თბილისის გუბერნიის თავადაზნაურობას საზოგადოებრივი მზრუნველობის საგანგოში უკვე დაგირავებული ჰქონდა თავისი მიწების მნიშვნელოვანი ნაწილი. ასე მაგალითად, 1861 წლისათვის დაგირავებული იყო მათი მამულების 20%; 1863 წლისათვის კი — 32%⁴. საგლახო რეფორმის გატარების მომენტისათვის მათი სესხი 1 652 940 მანეთს შეადგენდა და, რაც მთავარია, ამ ვალს განუხრელი ზრდის ტენდენცია ჰქონდა⁵. მემამულეთა მიერ დაგირავებული მიწების მნიშვნელოვან ნაწილს ყიდულობდნენ მიჩიტაშვილის, ბუთურაშვილის, ზუჟაკიშვილის, ედიგაროვისა და სხვ. ტიპის კულაკ-გლახები. ასე იშლებოდა ფეოდალურ-ბატონყმური სისტემის საფუძველი — მიწის ფეოდალური საკუთრება და იქმნებოდა უწოდებრიო, ბურჟუაზიული საკუთრება.

§ 2. საქართველოს მრაველობის განვითარება XIX ს-ის 30—60-იან წლებში

30-იანი წლებისათვის საქართველოს სამრეწველო განვითარებისათვის, ისევე როგორც საერთოდ ქვეყნის სამეურნეო წინსვლისათვის, შედარებით ხელსაყრელი პირობები იქმნება. ქვეყანაში მშვიდობიანობა მყარდება. რუსული ხელისუფლება აქ თავისი პოლიტიკური მდგომარეობის განმტკიცების შემდეგ, ზრუნვას იწყებს მეურნეობის გარკვეული დარგების


¹ ВПСЗРИ. VI, XVIII, № 16653.

² იქვე, XXIII, № 21928.

³ СХАО, I, გვ. 434.

⁴ დ. გოგოლაძე, კაპიტალისტური საწარმოები... გვ. 91.

⁵ ამის შესახებ სრული საფუძვლიანობით წერდა დ. ყიფიანი: „თვითონ ხელისუფლებისათვის ცნობილია, რომ ჩვენს შორის არ მოიპოვება ისეთი მემამულე, რომლის გლახები და მამული არ იყოს დაგირავებული ან სახელმწიფოსთან, ან პრიკაზთან, ან კერძო პირებთან“ (Ш. Четия, «К истории...», გვ. 259).



ოქრომკედელთა სახელოსნო.

განვითარებაზე, კერძოდ, ისეთი დარგებისა, რომლებიც მის კოლონიურ მიზნებს ემსახურებოდა. რუსეთთან ეკონომიური კავშირის გაძლიერება ხელს უწყობდა საქართველოში რუსი და, რუსეთის გზით, უცხოელი საქმოსნების მოზიდვას. 20-იან წლებში, ე. წ. „შეღავათიანი ტრანზიტის“ მოქმედების პერიოდში, ადგილობრივ ვაჭართა ხელში დაგროვდა მნიშვნელოვანი ფულადი კაპიტალი, რომლის ნაწილი მრეწველობაში მოედინებოდა. უცხოეთიდან და რუსეთიდან მოძალებულ ხელოსნებს სიახლე შემოჰქონდათ საქალაქო ცხოვრებაში. ჩნდება ამქრისგარეშე ხელოსნობა, რომელიც თანდათან ძირს უთხრიდა ტრადიციულ ამქრულ წყობილებას. სასაქონლო-ფულადი ურთიერთობა უფრო და უფრო იჭრება სოფლადაც და შესაბამის გავლენას ახდენს გლეხის საოჯახო მრეწველობაზე.

ერთი სიტყვით, XIX ს-ის 30-იანი წლებიდან საქართველო შედგა სამ-

რეწველო განვითარების ახალ საფეხურზე, ფეოდალურიდან კაპიტალისტურ წარმოებით ურთიერთობებისაკენ გარდამავალ საფეხურზე.

ქვეყანაში ახალი ურთიერთობის განვითარებას ხელი შეუწყო რუსეთთან ერთად საქართველოს ჩართვამ მსოფლიო კაპიტალისტურ სისტემაში, რომელსაც ახასიათებს გაფართოების, ნაციონალური ჩარჩოების რღვევის ტენდენცია.

საოჯახო მრეწველობა და ხელოსნობა, წვრილი საქონლური წარმოების განვითარება. საქართველოში, ისევე როგორც მთელ ამიერკავკასიაში, რომელიც „უფრო გლეხური“ იყო, ვიდრე რუსეთი, გლეხური მეურნეობის დამატების სახით არსებული მრეწველობის მარტივი ფორმები — ოჯახური მრეწველობა და ხელოსნობა — სოფლად ძლიერად იყო წარმოდგენილი, ქალაქად გაბატონებული მდგომარეობა ეჭირა ამქრულ ხელოსნობას. მაგრამ ქვეყნის საერთო ეკონომიური განვითარების ზეგავლენით მრეწველობის აღნიშნული მარტივი ფორმებიც ან იცვლიან სახეს, ეგუებიან ახალ პირობებს და ებმებიან სასაქონლო წარმოების, კაპიტალისტური ურთიერთობის განვითარების საერთო ფერხულში, ან თანდათან ქრებიან.

1844 წლისათვის აღმოსავლეთ საქართველოს სოფლებში აღრიცხული იყო 3 ათასზე მეტი შინაური დაზგა, რომლებზედაც ბამბის, შალის და აბრეშუმის ქსოვილებს ამზადებდნენ, ქუთაისის მაზრაში კი ათასამდე დაზგა¹.

გორის მაზრის უფროსის 1845 წლის ანგარიშის თანახმად, „მაზრის მცხოვრებთაგან ზოგიერთნი შინაურ დაზგებზე ქსოვდნენ ხამს (ნარმას) და მაუდს, რომელთაც მდაბიო მოსახლეობა იყენებდა სამეურნეო ყოფაში. ამ ნაწარმის მცირე ნაწილი იყიდებოდა მაზრაში“².

სამაზრო ადმინისტრაციის არასრული ცნობების თანახმად, 1845 წ. საქართველოში გაიყიდა დამზადებული „სოფლის ნაწარმის“ დაახლოებით 30—60%; სულ 15 ათასამდე მანეთის ღირებულებისა. ასეთი ნაწარმიდან ჩამოთვლილია ხალიჩები, ჩული, ქეჩა, ფლოსტები, შალის ქსოვილი, ტილო, აბრეშუმის ქსოვილი, კილოფი, შალის ზონარი, მატრამა და სხვ.³

მართალია, „სოფლური ნაწარმის“ გარკვეული ნაწილი გასაყიდად გამოდიოდა, მაგრამ ოჯახური მრეწველობა ძირითადად მაინც გლეხის ოჯა-

¹ სსცია, ფ. 16, საქ. 8392, ფურც. 24—26.

² იქვე, საქ. 8888, ფურც. 5—9.

³ ე. ხ. შ. ტ. ა. რ. ი. ა, მრეწველობის განვითარება და მუშათა კლასის ჩამოყალიბება XIX საუკუნის საქართველოში (დამმუშავებელი მრეწველობის განვითარება), თბ., 1966, გვ. 66—67; შეადარე: Г. К. Б а к р а д з е, Возникновение и развитие капиталистической промышленности в Грузии в XIX веке, Тб., 1958, გვ. 18—19.



აარღების სახელოსნო.

ხის მოთხოვნილებათა დაკმაყოფილებას ემსახურებოდა. ამავე დროს დიდი რაოდენობით რუსული და უცხოური შუა ნაწარმის, განსაკუთრებით კი ტექსტილური პროდუქციის შემოტანა ოჯახური მრეწველობის შესაბამის დარგებს იმთავითვე უზომბდა გაფართოების და წვრილ კაპიტალისტურ სარეწად გადაქცევის პერსპექტივას.

რაც შეეხება ხელოსნურ წარმოებას, ოფიციალური ცნობებით, 1845 წელს ქალაქებში 3 555 ოსტატი იყო (აქედან 2 065-მდე თბილისში), ხოლო სოფლად — 2 800-მდე. მათთან მომუშავე მუშების რიცხვი (თბილისის გარდა) შეადგენდა 3 530-ს. თბილისში კი (თუ ვიანგარიშებთ თი-

თო ოსტატზე საშუალოდ 2 მუშას) — 4000-მდე კაცს. ხელოსნური ნაწარმის ღირებულება ამ დროს დაახლოებით 368 ათას მანეთს უდრიდა¹, ე. ი. თითო ოსტატზე საშუალოდ მოდიოდა 50—60 მანეთის პროდუქცია და 1—2 მუშა. როგორც ჩანს, ძირითადად ეს იყო წვრილი სახელოსნოები, აუქცა მათ გარდა არსებობდა ცალკეული, შედარებით მსხვილი საწარმოებიც. ხელოსანთა შორის ჩამოთვლილი არიან: მეტყავეები, მეაგურები, მკედლები, დურგლები, ოქრომკედლები, მექვაბეები (მესპილენძები), მეუნაგირეები, სარაჯები, მკალავეები, ზეინკლები, ხარაზები, თერძები, ჰონები, ხაბაზები, დალაქები, ფეიქრები და სხვ.

ხელოსნური წარმოების ცენტრი იყო ქ. თბილისი, სადაც დიდხანს შემორჩა ამქრული ორგანიზაცია.

60-იანი წლების შუა ხანებში, ამქრების რეორგანიზაციამდე, თბილისში იყო 76 ამქარი. ადგილობრივ ხელოსანთა რაოდენობა (ოსტატი და ქარგალი) 2 894-ს უდრიდა, ხოლო მუშათა რიცხვი — 245-ს. ამ ხელოსანთა შორის იყო 208 ტვირთის მზიდავი („მუშა“) და 95 წყლის დამტარებელი („თულუხჩი“) 25 მუშით. არაადგილობრივი, ანუ „ევროპელი“ ხელოსნებიდან 291 ოსტატი იყო, 382 — ქარგალი, 450 — შეგირდი და 91 — მუშა².

როგორც ირკვევა, ყველა ადგილობრივი ხელოსანი არ ყოფილა გაერთიანებული ამქარში. მაგალითად, კონდიტრები, მეძეხვეები, მეშუშეები, მეთუნუქეები, მკინძავეები და სხვ. არ შედიოდნენ ამქრებში, ხოლო ნაწილი ადგილობრივი ხელოსნებისა (დურგლებისა და ავეჯის მკეთებლების, ზეინკლების, ეტლების მკეთებლების, მღებავებისა და სხვ.) გაერთიანებული იყო ამქრებში „ევროპელ“ ხელოსნებთან ერთად. ასე რომ უცხოელ ხელოსანთა ნაწილიც გაერთიანებული აღმოჩნდა ამქრებში, ხოლო მათი დიდი ნაწილი ამქრის გარეშე მოღვაწეობდა.

ხელისუფლება ადრე (1852 წ.) ცდილობდა მოსულ ხელოსანთა ცალკე გაერთიანების შექმნას, მაგრამ, როგორც ჩანს, ეს ვერ მოხერხდა და 1859 წელს ადგილობრივი ხელისუფლების შუამდგომლობის საფუძველზე იმპერატორის განკარგულებით ყველა ხელოსანი, ადგილობრივი და მოსული, დაექვემდებარა თბილისის საქალაქო მმართველობას. ამით მოხდა ამქრების დამოუკიდებლობის პირველი სერიოზული შეზღუდვა. ამქრული ორგანიზაცია თანდათან შიგნიდანაც იშლებოდა. 60-იანი წლების დასაწყისში თვით ამქრების საიჭრები აძლევდნენ საფუძველს ოფიციალურ პირებს დაესკვნათ, რომ „უსტაბაშებმა დაკარგეს თავისი გავლენა, მათ აღარავენ ემორჩილება და მათ გადაწყვეტილებებს არავითარი ყურა-

¹ Г. К. Б а к р а д з е, Возникновение и развитие..., გვ. 19—20; ე. ხ. ო. ტ. ო. ი. ა., მრეწველობის განვითარება..., გვ. 80—81.

² სსცია, ფ. 7, ანაწ. 2, საქ. 2229, ფურც. 81—92.

დღეა არ ექცევა; შეგირდები და ქარგლები აღარ ემორჩილებიან უფროსებს; ისინი აღარ სცნობენ ამქრების არავითარ წესებს და თვითნებურად, ყოველგვარი ატესტაციის გარეშე დამოუკიდებლად კიდებენ ხელს საქმეს. მაგრამ, რადგანაც სათანადო მომზადება აკლიათ, მხოლოდ სცემენ წარმოების დონეს და ამით სახელს უტეხენ საერთოდ ხელოსანთა წოდებას. ხელოსანთა კეთილსინდისიერება დაეცა, მომხმარებლებთან მათი ურთიერთობა გაფუჭდა და პატრიარქალური ამქრული ცხოვრების ყველა საფუძველი მოიშალა“¹.

ჩვენ ხელთ არსებული მასალებით კარგად დასტურდება ხელოსნური წარმოების დარგებში მომხდარი ცვლილებები, კერძოდ, ხელოსნობის ახალი დარგების გაჩენა, უპირატესად უცხოელ ხელოსანთა მოსვლის შედეგად, და ადგილობრივ ხელოსანთა ჩაბმა ამ დარგებში. ასე მაგალითად, ხელოსნობის ძველი, ტრადიციული დარგების გვერდით (მხედველობაში რომ არ მივიღოთ „ევროპული“ ფეხსაცმლის და ტანსაცმლის შეკერვა, რომელიც დიდი ხანია, რაც შემოვიდა და უკვე ამქრებს განეკუთვნებოდა) ჩნდება სრულიად ახალი დარგებიც: საკონდიტრო წარმოება, ძეხვის დამზადება, თუნუქის ნაწარმის დამზადება, მეშუშეობა, მკინძაობა და სხვ. ასეთ საქმიანობას 60-იანი წლებისათვის ადგილობრივი ხელოსნებიც მისდევდნენ. ამავე დროისათვის მხოლოდ უცხოელ ხელოსანთა ხელში იყო: ეტლების დამზადება და შეკეთება, ლუდის გამოხდა, კასრების კეთება, ხელთათმანების, საგალანტერიო საქონლის წარმოება და სხვ.

ყოველივე ზემოთქმული ილუსტრაციას წარმოადგენს თბილისში ამქრის გარეშე, ანუ თავისუფალი ხელოსნობის გაჩენისა, რაც ამქრული ხელოსნობის დაშლის პირდაპირი მაჩვენებელი იყო. იგივე მოვლენაზე მიგვივითივებს წვრილ სახელოსნოთა გვერდით შედარებით მსხვილ სახელოსნოთა წარმოქმნა, სადაც ერთდროულად მნიშვნელოვანი რაოდენობით დამხმარე მუშახელის გამოყენებას ჰქონდა ადგილი. სამწუხაროდ, ჩვენ ხელთ არსებულ მასალაში ადგილობრივი ოსტატებისა და ქარგლების რიცხვი ერთად არის ნაჩვენები, რის გამოც შეუძლებელია იმის დადგენა, თუ თითო ოსტატზე რამდენი ქარგალი და მუშა მოდიოდა, მაგრამ „ევროპელ“ ოსტატებთან მომუშავე ქარგლებისა, შეგირდებისა და მუშების შესახებ შემონახული მონაცემები მოწმობენ, რომ 60-იანი წლების შუახანებში თბილისში წვრილი სახელოსნოების გვერდით, სადაც თითო ოსტატი და 1—2 ქარგალი და მუშა მუშაობდა, გვხვდება სახელოსნოები, სადაც თითო ოსტატთან 1—2 ქარგალი და 2—4 მუშა მუშაობდა. გვაქვს ისეთი შემთხვევებიც, როდესაც თითო სახელოსნოში 10—20 ქარგალი და მუშა მუშაობდა. აღნიშნული სახელოსნოების ანალიზი მოწმობს, რომ ისინი უმეტესწილად უკვე წვრილი საქონლური წარმოების სფეროს განეკუთ-

¹ ЦГИА СССР, ф. 1287, оп. 38, д. 696, лл. 28—41.

ვენებოდნენ, ხოლო უმსხვილესნი უკვე კაპიტალისტურ მარტივ კოოპერაციასა და ზოგ შემთხვევაში მცირე მასშტაბის მანუფაქტურის ტიპის საწარმოებს წარმოადგენდნენ.

საფუძველი გვაქვს ვიფიქროთ, რომ 60-იანი წლებისათვის ასეთი გამსხვილებული სახელოსნოები ქუთაისშიც არსებობდა. ასე მაგალითად, 1860 წლის აღწერილობაში ჩამოთვლილია 45 ოსტატი, ადგილობრივი და უცხოელიც, რომელთა წლიური გამომუშავება თითოეულისა 100-დან 1 000 მანეთამდე აღწევდა¹. საშუალოდ კი 200—300 მანეთს შეადგენდა. ჩანს, ესენი შედარებით მსხვილი სახელოსნოების პატრონებია. აქვე უნდა ყოფილიყო სხვა, უფრო წვრილი სახელოსნოებიც.

უკვე 50-იან წლებში თბილისის საქალაქო მმართველობა აყენებდა საკითხს ამქრული ორგანიზაციის ლიკვიდაციის შესახებ იმ საბაბით, რომ იგი აფერხებდა თავისუფალ სავაჭრო-ხელოსნურ საქმიანობას, მით უმეტეს, რომ ამ დროს არსებობდა ვაჭართა ამქრებიც. ხელისუფლება დიდ ხანს ვერ ელეოდა ამქრულ ორგანიზაციას, რადგან იგი მას სჭირდებოდა ქალაქის ვაჭრულ-ხელოსნურ ფენებში წონასწორობის დასაცავად და საგადასახადო საქმის მოსაგვარებლად. მაგრამ 1865 წ. ქალაქის დაბალი ფენების გამოსვლის შემდეგ ცარიზმის და პოლიციურ-ბიუროკრატიული რეჟიმისა და მსხვილი ბურჟუაზიის წინააღმდეგ², ამქართა რეორგანიზაციის საქმე დაჩქარდა. 1867 წელს მიღებული „წესდებით“ თუმცა ამქრები შენარჩუნებულ იქნენ შეზღუდული რაოდენობით (სულ ხელოსანთა 17 ამქარი და მუშათა 4 არტელი), მაგრამ ისინი მთლიანად დაექვემდებარნენ „სახელოსნო მმართველობას“ („Ремесленная управа“), რომელიც ხელისუფლების ნების აღმსრულებელი იყო. ვაჭართა ამქრები საერთოდ გაუქმდა.

„წესდებაში“ განსაკუთრებით საინტერესოა იმ ახალი მოვლენების ასახვა, რომელნიც თავს იჩენენ ხელოსნურ წარმოებაში. ესაა პირველ რიგში ოსტატისათვის სახელოსნოს გაფართოებისა და ქარგლების რიცხვის ნებისმიერად გაზრდის უფლების მიცემა, არა მარტო იმ ხელოსნის მიჩნევა ოსტატად, რომელიც თვითონ მუშაობს, არამედ სახელოსნოს მფლობელისაც, რომელიც დაქირავებულ მუშახელს იყენებს, აგრეთვე ქარგლებისა და შეგირდების ჩათვლა დაქირავებულ მუშებად. „წესდების“ თანახმად ოსტატად იწოდება ის, „რომელიც ან თვითონ მოქმედებს რომელიმე ხელობით ცალკე დუქანში, ან უჭირავს საოსტატო სახლი, რომელ-

¹ სტია, ფ. 10, საქ. 496, ფურც. 88—98; ე. ხ. ო. ტ. ა. რ. ი. ა, მრეწველობის განვითარება..., გვ. 83—84.

² Ш. К. Ч х е т и я, Тбилиси в XIX столетии, 1865-ые годы, გვ. 271.; პ. გ. უ. შ. ვ. ი. ლ. ი, საქართველოს და ამიერკავკასიის ეკონომიკური განვითარება XIX—XX სს. V, თბ., 1962, გვ. 280—281; საქართველოს ისტორია, ტ. II, თბ., 1962, გვ. 12—17 და სხვ.

შიც ყვანან მოჯამაგირე ქარგლები და შეგირდები“. უფრო ქვემოთ „წესდებაში“ ნათქვამია. „ქარგალი არის ხელოსანი, რომელიც მუშაობს ჯამაგირით სახელოსნოს სახლის ანუ დუქნის პატრონთან“¹.

ამქრის უსტაბაშუმებს ხელოსნურ ნაწარმზე ფასების დაწესებისას სასტიკად ეკრძალებოდათ რაიმე ზემოქმედება ოსტატებზე. ამქრებში შესვლის უფლება ჰქონდა ყველას, ვინც კი თბილისში რაიმე ხელობას ეწეოდა. ამქრიდან გამოსვლაც არაფრით არ უნდა ყოფილიყო შეზღუდული.

ყოველივე აღნიშნული ამქრული ორგანიზაციის რღვევის, ხელოსნობაში ახალი ურთიერთობის ელემენტების შექრის მაჩვენებელი იყო, რის შედეგადაც თვით ამქრები თანდათან რუდიმენტულ ორგანოდ იქცნენ და მხოლოდ ტრადიციას ემყარებოდნენ².

დაქირავებული შრომის გამოყენება და საქონლის ბაზრისათვის წარმოება ხელოსნობის წვრილ სასაქონლო წარმოებად გადაქცევას მოასწავებდა. ფეოდალური ხანის ხელოსანთა წოდების დაშლის ნიადაგზე საფუძველი ეყრება ქალაქის წვრილბურჟუაზიული ფენის ჩამოყალიბებას.

წვრილი კაპიტალისტური წარმოება. კაპიტალისტური მარტივი კოოპერაცია. წვრილი საქონლური წარმოების განვითარებას კაპიტალისტური საწარმოების დაარსებამდე მივყავართ. ვ. ი. ლენინი წერდა: „წვრილ საქონელმწარმოებელთა მიერ შედარებით მსხვილ სახელოსნოების დაარსება წარმოადგენს მრეწველობის უფრო მაღალ ფორმაზე გადასვლას. დაქსაქსული წვრილი წარმოებიდან იქმნება კაპიტალისტური მარტივი კოოპერაცია“³.

ჩვენ მიერ ზემოგანხილული მასალა მოწმობს, რომ სახელოსნოთა ნაწილი სწორედ დაქსაქსულ წვრილ საქონლურ წარმოებას განეკუთვნებოდა, ხოლო ზოგიერთ მათგანში უკვე აშკარა კაპიტალისტური ურთიერთობის ნიშნებს ვხვდებით. განსაკუთრებით ეს ეხება ისეთ სახელოსნოებს, სადაც დამხმარე მუშახელი დიდი რაოდენობით გამოიყენებოდა (10—20 კაცი).

XIX ს-ის პირველი ნახევრის სტატისტიკამ, მიუხედავად არასიზუსტისა, შემოგვინახა მონაცემები უკვე ამ დროისათვის საქართველოში წვრილი კაპიტალისტური წარმოების ფართო გავრცელებაზე. კერძოდ, ამ მონაცემების თანახმად საქართველოს ქალაქებსა და სოფლებში მნიშვნელოვანი რაოდენობით არსებობდა აგურის, კრამიტის, თიხის ჭურჭლის, კირის გამოსაწვავი, სახერხი, საპნის, ტყავის, არყის, ზეთსახდელი, სამ-

¹ ЦГИАЛ СССР, ф. 1287, оп. 38, д. 696, лл. 45—56.

² ვ. გუგუშვილი, საქართველოს და ამიერკავკასიის ეკონომიკური განვითარება..., გვ. 284—295; ნ. როდონაია, თბილისის მრეწველობა მე-19 ს-ის მეორე ნახევარში, თბ., 1961, გვ. 103—104.

³ ვ. ი. ლენინი, თხზ., ტ. 3, გვ. 413.




თითისტარების დამამზადებელი სახელოსნო.

ღებრო და სხვა საწარმოები, რომელთა საერთო ჯამი ასეულებს შეადგენდა¹.

აღნიშნულ საწარმოთა ხასიათის შესახებ, მართალია, ხელთ გვაქვს ძალზე მწირი ცნობები, მაგრამ ზოგიერთ მათგანზე არსებული მასალის


¹ ე. ხო შ ტ ა რ ი ა, დამმუშავებელი მრეწველობის განვითარება საქართველოში 30—50-იან წლებში, ივ. ჯავახიშვილას სახ. ისტორიის ინსტიტუტის შრომები, III, 195ა, გვ. 157—165.



სარაჯის სახელოსნო.

შესწავლა და დანარჩენებთან ანალოგიის გატარება შესაძლებელს ხდის წარმოდგენა ვიქონიით იმაზე, თუ რას წარმოადგენდა საერთოდ ამდროინდელი წვრილი წარმოება.

ასე მაგალითად, შედარებით მეტი ცნობები მოგვეპოვება ქუთაისში 50-იან წლებში არსებულ აგურის „ქარხნების“ შესახებ. ამ მონაცემებით აზნაურ ფარან ვარდანეიშვილის კუთვნილ აგურის „ქარხანაში“ მუშაობდა 1 ოსტატი და 2 მუშა. ასევე იყო ივანე გურულის „ქარხანაში“. ამ საწარმოთა წლიური პროდუქცია შეადგენდა 240 მანეთის ღირებულების 30 ათას ცალ აგურს. აქვე არსებობდა უფრო მსხვილი საწარმოებიც. აზნაურ მაქსიმე გაბაევის, მღვდელ ივანე ნაცვალოვის და გლეხ ბეჟან დაღუნაშვილის „ქარხნებში“ მუშაობდა ორ-ორი ოსტატი და 3—6 მუშა.



წყლის წისქვილები და სამხერხაობი.

ამ საწარმოთა პროდუქცია თითოეულისა შეადგენდა 800 მან. ლირებულე-ბის 100 ათას ცალ აგურს. წყაროში (ე. წ. „უწყისებში“) პირდაპირ არის მითითებული, რომ ოსტატები და მუშები ამ საწარმოებში „ნებით დაქი-რავებულეები“ იყვნენ¹.

სხვა მონაცემებით, ქუთაისის მაზრაში 40-იანი წლების ბოლოს და 50-იანი წლების დასაწყისში იყო 3 არყის სახდელი „ქარხანა“, რომე-ლიც ეკუთვნოდა „ტიტულიარნი სოვეტნიკს“ ნიკოლოზ ბაქრაძეს, აზნა-ურ იოსებ ჩარეკოვს და აზნაურ ნიკოლოზ რევიას. ამ საწარმოთა წლიუ-რი პროდუქცია შეადგენდა თითოეულისა 400—500 მან². 40-იან წლებში გორის მაზრის სოფ. ენაგეთში ყორღანოვს ჰქონდა ზეთსახდელი „ქარ-ხანა“, სადაც მუშაობდა 2 ოსტატი და 5 მუშა. საწარმოში მამოძრავებელ ძალად წყლის ენერგია იყო გამოყენებული. ამავე ხანებში თავად ერისთა-ვებს მოწყობილი ჰქონდათ სახერხი „ქარხნები“—ერთი ატენში, მეორე კი გორში. პირველში 4 ხერხი მოქმედებდა და პროდუქციის ლირებულეობა 2 800 მან. შეადგენდა, მეორეში კი — 2 ხერხი და პროდუქცია 400 მა-ნეთს უდრიდა³.

¹ სსცია, ფ. 4, საქ. 125, ფურც. 48—112.

² იქვე, 46.

³ იქვე, ფ. 16, საქ. 8888, ფურც. 5—9; «Кавказ», 1850, №20.

ანალოგიური ცნობების მოტანა კიდევ შეიძლებოდა, მაგრამ, ვფიქრობთ, ესეც საკმარისია, რათა წარმოდგენა ვიქონიოთ წვრილ წარმოებაზე საერთოდ. ასეთ საწარმოთა დიდი ნაწილი ეკუთვნოდა ან ქალაქის მცხოვრებთ, უმეტესწილად გლეხთა წოდებიდან გამოსულ წვრილ ვაჭარსაქმოსნებს, ან თავადაზნაურობის წარმომადგენლებს, მოხლეებსა თუ სასულიერო წოდების პირებსაც კი. საშუალოდ ამ საწარმოებში მუშაობდა 1—2 ოსტატი და 3—6 მუშა. როგორც ზემოთ აღვნიშნეთ, ანალოგიურ ხასიათს ატარებდნენ ხელოსანთა გაფართოებული სახელოსნოებიც.

ყურადღებას იქცევს ის გარემოება, რომ წვრილი კაპიტალისტური საწარმოები XIX საუკუნის პირველ ნახევარში აღმოცენდებოდნენ ძირითადად ისეთ დარგებში, სადაც არ არსებობდა ხელოსნური წარმოება (მაგალითად, საპნის, კრამიტის, ზეთსახდელი, არყისსახდელი წარმოება და სხვ.), ანდა სადაც ხელოსნური პროდუქცია ვერ აკმაყოფილებდა ბაზრის მოთხოვნილებას (აგურის, ტყავის და სხვ.). დამახასიათებელია, რომ ქ. ქუთაისში 50-იან წლებამდე არ არსებობდა აგურის წარმოება, ხოლო ამ დროიდან იგი ისახება წვრილ კაპიტალისტურ საწარმოთა სახით.

XIX საუკუნის 60-იანი წლების შუა ხანებისათვის, ჩვენი გამოანგარიშებით, საქართველოში დაახლოებით იყო 460-მდე წვრილი კაპიტალისტური საწარმო (ლითონდამმუშავებელი — სამჭედლო, საზეინკლო, სახარატო, ხის დამმუშავებელი — სახერხი და სადურგლო სახელოსნოები, აგურისა და კრამიტის, ტყავის, ფეხსაცმლის და ტანსაცმლის, არყისსახდელი, ლუდისსახდელი, საპნისა და სანთლის, ზეთსახდელი, ეტლების საწარმოები, სამღებროები და სხვ.), ამ საწარმოებში მუშაობდა სულ 2 ათასამდე მუშა, ხოლო პროდუქციის ღირებულება შეადგენდა 720 ათასამდე მანეთს, ე. ი. საშუალოდ თითო საწარმოზე მოდის 4—5 მუშა და 1 500 მანეთამდე პროდუქცია. ზოგიერთ მსხვილ სახელოსნოში მუშაობდა 7—8 კაცი. აღნიშნულ საწარმოთა პროდუქციის ღირებულება მერყეობდა 1 ათასიდან 3—5 ათას მანეთამდე¹. ამ საწარმოთაგან უმსხვილესნი უნდა განეკუთვნონ კაპიტალისტურ მარტივ კოოპერაციას.

¹ მონაცემები ასეთ საწარმოებზე იხ: ე. ხოშტარიძე, მრეწველობის განვითარება და მუშათა კლასის ჩამოყალიბება..., გვ. 106—150 და შემაჯამებელი ცხრილი — გვ. 211.

საყურადღებოა, რომ ჩამოთვლილი საწარმოები თავიანთი ხასიათით და მასშტაბებით მოგვაგონებენ XIX ს-ის პირველ ნახევარში რუსეთის სამაზრო ქალაქების, განსაკუთრებით კი ცენტრალურ-სამიწათმოქმედო ოლქის ქალაქების — ვორონეჟის, ოსტროგოვსკის და სხვათა სამრეწველო საწარმოებს. პ. გ. რინდზიტუნსკი მათ შესახებ წერს: «Бросается в глаза большое однообразие тех заведений, которые именуются «фабриками» и «заводами». По Воронежской губернии это салотопленные и мыловаренные, воскобелильные и свечные, кожевенные и кирпичные «заводы», мельницы, крупорушки и пивоварки». იგივე ვითარება იყო ტამბოვისა და რიაზანის გუბერნიებში. მხოლოდ საგუბერნიო ქალაქებში (ვორონეჟში, სარატოვში, ხარკოვში, ტამბოვში და სხვ.) ანალოგიური

მანუფაქტურა. ფაბრიკული წარმოების ჩასახვა. შედარებით მსხვილი კაპიტალისტური საწარმოები საქართველოში აღმოცენდა XIX საუკუნის პირველ ნახევარში, კერძოდ, 20 — 30-იანი წლებიდან, როდესაც ტექნიკური პროგრესი ევროპაში და აგრეთვე რუსეთშიც მნიშვნელოვან წარმატებას აღწევს. საქართველოს სამრეწველო განვითარებას არ შეეძლო არ განეცადა ევროპისა და რუსეთის მრეწველობის გავლენა¹. საქართველოში დაარსებულ პირველსავე შედარებით მსხვილ საწარმოებში ვხვდებით უცხოეთიდან თუ რუსეთიდან შემოტანილ მანქანა-იარაღებს (დაზგებს, ლუმელებს, ქვაბებს და სხვ.), მაგრამ ტექნიკური სიახლენი მხოლოდ ნაწილობრივ მოიცავდნენ წარმოებას. ხელით შრომა ჯერ კიდევ გაბატონებული იყო. სათანადო მომზადების მქონე ადგილობრივი კადრების არარსებობა ქმნიდა წინააღმდეგობას ტექნიკურ დონესა და მუშათა დაბალ კვალიფიკაციას შორის. ამიტომ საზღვარგარეთიდან და რუსეთიდან სხვადასხვა დანადგარებთან ერთად იწერდნენ კვალიფიცირებულ ოსტატებს და მუშებსაც. მანქანური ტექნიკის დანერგვის გზაზე არსებული დაბრკოლებანი (დანადგარების შემოტანის დიდი ხარჯები, კვალიფიცირებული მუშათა კადრების და აგრეთვე სათანადო ენერგეტიკული ბაზის არარსებობა) განაპირობებდა ხელით შრომის ბატონობას. მთელ რიგ საწარმოებში. ხელით მოპყავდათ მოძრაობაში დაზგებიც კი, თუმცა ამ მიზნით გამოიყენებოდა ცხოველების და წყლის ენერჯიაც. ორთქლის ძრავას არსებობა რეფორმამდელ ხანაში თუმცა დადასტურებულია რამდენიმე საწარმოში, მაგრამ მაინც იშვიათობას წარმოადგენდა.

XIX ს-ის პირველ ნახევარში საქართველოში არსებულ შედარებით მსხვილ საწარმოთაგან ყურადღებას იმსახურებს ფრანგი ვაჭრის კასტელას მიერ თბილისში ხაზინის დახმარებით დაარსებული აბრეშუმსახვევი და საძახავი „ფაბრიკა“, რომელიც 1828 წლიდან ამოქმედდა². კას-

წერილი საწარმოების გვერდით, მსგავსად თბილისისა, იყო სხვა სახის შედარებით მსხვილი სამრეწველო დაწესებულებანიც. დამახასიათებელია, რომ ქ. ოსტროგოვსკის აჯურის „ქარხნები“, საშუალოდ 2—3 მუშით და 350—700 მან. პროდუქციით ძალზე გვიან საქართველოს, კერძოდ, ქუთაისის, ასეთსავე „ქარხნებს“. იგივე ითქმის ქ. ბოვლჩარის ტყავის „ქარხნებზეც“, რომელთა პროდუქცია შეადგენდა 400-1000 მან. (იხ. П. Г. Р и н д - з ю н с к и й, Городское гражданство дореформенной России, М., 1958, გვ. 268—271, 274).

¹ ვ. ი. ლ ე ნ ი ნ ი მიუთითებს, რომ „კაპიტალიზმის განვითარება ახალგაზრდა ქვეყნებში საგრძნობლად ჩ ქ ა რ დ ე ბ ა ძველი ქვეყნების მაგალითით და დახმარებით“, თხზ. ტ. 3, გვ. 580.

² აღნიშნული საწარმო კარგად არის ცნობილი ჩვენს სამეცნიერო ლიტერატურაში. იხ. П. В. Г у г у ш в и л и, Развитие промышленности в Грузии и Закавказье в XIX-XX вв., Тб., 1957, გვ. 248—266; ე. ხ ო შ ტ ა რ ი ა, დამუშავებული მრეწველობის განვითარება სა-

ტელას სიკვდილის შემდეგ იგი ხაზინის ხელში გადავიდა და, როგორც სახაზინო საწარმომ, იარსება 40-იანი წლების დასაწყისამდე. „ფაბრიკაში“ თავიდანვე მოქმედებდა საფრანგეთიდან გამოწერილი დაზგები და სხვა მოწყობილობა. იქიდანვე იყენენ მოყვანილი კვალიფიცირებული ოსტატებიც, მაგრამ წამყვან როლს წარმოებაში ასრულებდნენ ადგილობრივ მცხოვრებთაგან დაქირავებული მუშები. უკანასკნელთა რიცხვი ზოგჯერ 50-მდე აღწევდა, ხოლო საშუალოდ 15—20 კაცს შეადგენდა. პერიოდულად, ძირითადად დამხმარე სამუშაოებზე (დაზგების მოძრაობაში მოყვანა, ყაჭის დახარისხება, შეშის დაპობა და სხვ.) გამოიყენებოდა ტყვე თურქებისა და უმთავრესად რუსეთიდან ჩამოყვანილი პატიმარი ქალების შრომა. „ფაბრიკის“ პროდუქცია თვეში 4—5 ფუტს შეადგენდა, რომელიც ნაწილობრივ ადგილზე იყიდებოდა, ხოლო ნაწილობრივ მოსკოვში გადიოდა. თბილისის აბრეშუმსახვევი და საძახავი „ფაბრიკა“, იმ მონაცემების მიხედვით, რომელიც ხელთ გვაქვს (დაქირავებული შრომის გამოყენება, შრომის დანაწილება და სხვ.), წარმოადგენდა მანუფაქტურის ტიპის შედარებით მსხვილ საწარმოს, მანქანური წარმოების ელემენტებით¹.

შედარებით უფრო გვიან, კერძოდ, 50—60-იან წლებში, დასავლეთ საქართველოში არსებობდა რამდენიმე აბრეშუმსახვევი საწარმო, რომელთაგანაც ყურადღებას იქცევს უცხოელების როზმორდიუკის „ფაბრიკა“ ზუგდიდში და გოხშტრაზერისა — ორპირში. დაზგები ამ საწარმოებშიც უცხოეთიდან (საფრანგეთი, იტალია) იყო გამოწერილი. წარმოებას ხელმძღვანელობდნენ უცხოელი სპეციალისტები, მუშახელს კი ადგილობრივ მცხოვრები ქალები წარმოადგენდნენ. მათი რიცხვი როზმორდიუკის საწარმოში 30-ს შეადგენდა. ეს საწარმო იძლეოდა 6 300 მანეთის ღირებულების 30 ფუტამდე ნაწარმს. აქ დამზადებული აბრეშუმები იყიდებოდა რუსეთსა და უცხოეთში (კონსტანტინოპოლში, საფრანგეთში). წყაროებში მოიპოვება მითითება ამ საწარმოებში ორთქლის მანქანების გამოყენების შესახებ, თუმცა ხელით შრომა ჯერ კიდევ დიდ როლს ასრულებდა.

აღსანიშნავია, რომ აბრეშუმსახვევი საწარმოები ჰქონდა ადგილობრივ

ქართველოში XIX ს 30—60-იან წლებში, ივ. ჯავახიშვილის სახ. ისტორიის ინსტიტუტის შრომები, ტ. III, 1958, გვ. 111—175; დ. გოგოლაძე, კაპიტალისტური საწარმოები სოფლის მეურნეობასა და მრეწველობაში რეფორმამდელ საქართველოში (1830—1864), თბ., 1959, გვ. 106—122; მ. სამსონაძე, თბილისის სამრეწველო განვითარება მეცხრამეტე საუკუნის რეფორმამდელ ხანაში, თბ., 1968, გვ. 83—100 და სხვ.; ამავე ნაშრომებში განხილულია საქართველოში XIX-ს-ის 60-იან წლებამდე არსებული სხვა მსხვილი საწარმოებიც, რომელთაც ქვემოთ შევხვებით.

¹ ვ. გუგუშვილი, საქართველოს და ამიერკავკასიის ეკონომიკური განვითარება..., გვ. 266—273; ე. ხოშტარია, დამმუშავებელი მრეწველობის განვითარება საქართველოში 30—60-იან წლებში, გვ. 175—176; დ. გოგოლაძე, კაპიტალისტური საწარმოები, გვ. 123—131.

მემამულე ნ. ჩიჯავაძეს (სოფ. საბეაკში) და ვაჭარ სიჭინავას (სოფ. ლესიქინეში).

მაგრამ, ყირიმის ომის დროს სამეგრელოს ტერიტორიაზე წარმოებულმა საომარმა მოქმედებამ, ხოლო შემდეგ, 60-იანი წლების შუა ხანებიდან გავრცელებულმა აბრეშუმის ჭიის ავადმყოფობამ, დროებით შეაფერხა აბრეშუმის წარმოება დასავლეთ საქართველოში. აღნიშნული საწარმოები თავისი ხასიათით არსებითად წარმოადგენდა მანუფაქტურებს მანქანური ტექნიკის ჩანასახებით.

30-იანი წლების მიწურულს თელავში ადგილობრივმა ვაჭარმა შავერდოვმა გახსნა ბამბის სართავი „ფაბრიკა“, რომელმაც სულ რამდენიმე წელი იარსება. სართავი დაზგები გამოწერილი იყო მოსკოვიდან. იქიდანვე აყენენ ჩამოყვანილნი კვალიფიცირებული ოსტატები. დაზგები მოძრაობაში ხარების საშუალებით მოჰყავდათ. საწარმოს პროდუქცია გასაყიდად გაჰქონდათ მოსკოვში. მაგრამ არ გასულა დიდი ხანი და რუსი ოსტატების სამშობლოში დაბრუნების გამო „ფაბრიკამ“ შეწყვიტა მოქმედება.

ამავე პერიოდში ბორჯომის ხეობაში, ხოლო შემდეგ აწყურის მახლობლად არსებობდა ზავილეისკის მინის „ქარხანა“, რომლისთვისაც პეტერბურგიდან გამოწერილ იქნა ჰოლანდიური მინის საღობი ქურა. წარმოებას ხელმძღვანელობდნენ რუსი ოსტატები. აქვე მუშაობდა 16 რუსი მუშა. 30-იანი წლების მიწურულს, წარმოების დახურვის წინ, მისი პროდუქციის ღირებულება 20 ათას მანეთამდე აღწევდა.

მეორე მინის „ქარხანა“ გორის მაზრის სოფ. ღვარჯში მოწყობილი ჰქონდათ თავად ერისთავებს. ამ საწარმომ იარსება 40-იანი წლებიდან 70-იან წლებამდე. „ქარხანაში“ მუშაობდა 20—30 დაქირავებული მუშა, ხოლო დამხმარე სამუშაოებს (შეშის მოჭრა, სილის მოთხრა და სხვ.) ასრულებდნენ ერისთავების ყმები. წარმოებაში ჩაბმული იყო სულ 100-მდე კაცი. საწარმოს პროდუქციის ღირებულება აღწევდა 15 ათას მანეთამდე. ნაწარმი (ბოთლები, ფანჯრის მინა, სააფთიაქო ჭურჭელი) იყიდებოდა მთელ საქართველოში და გადიოდა ჩრდილოეთ კავკასიაშიც.

ერთ-ერთი ყველაზე მსხვილი საწარმო XIX ს-ის პირველ ნახევარში იყო 30-იანი წლების მიწურულს თბილისში ზუბალაშვილისა და სხვა ვაჭრების მიერ დაარსებული შაქრის „ქარხანა“, რომელმაც 40-იანი წლების შუა ხანებამდე იარსება. მუშათა რაოდენობა საწარმოში 50 კაცს აღწევდა (ადგილობრივ მცხოვრებთაგან). აქვე იყო 10-მდე ნოქარი და ზედამხედველი. საწარმოს მაქსიმალური გამომუშავება 40-იანი წლების დასაწყისში 186 ათას მანეთს შეადგენდა, მაგრამ მან შეწყვიტა არსებობა იმის გამო, რომ არ გააჩნდა ადგილობრივი ნედლეული. საწარმო თავდაპირველად ამუშავებდა შეღავათიანი ტარიფით საზღვარგარეთიდან შემოტანილ შაქრის ფხვნილს, ხოლო შემდგომისათვის კომპანიას ადგილობრივ

(ამიერკავკასიაში) უნდა გაეშენებინა შაქრის ლერწმის პლანტაციები, რაც არ შესრულდა. დიდი როლი ითამაშა აგრეთვე რუსული „ქარხნების“ ნაწარმის კონკურენციამ.

30—40-იან წლებში თბილისში სხვადასხვა დროს მოქმედებდნენ საპნის „ქარხნები“ ლორის-მელიქოვის, მეღვინოვის, შულცის და ხატისოვის. ამ საწარმოებში მუშაობდა 10-დან 30-მდე მუშა. თითოეული „ქარხნის“ საშუალო წლიური გამომუშავება შეადგენდა 15 ათასამდე მანეთს.

ასეთივე საწარმო იყო 40-იან წლებში თბილისის მახლობლად (სოფ. დრეში) არსებული ანდრეევსკის ტყავის „ქარხანა“. მუშათა რაოდენობა აქ 16 კაცს შეადგენდა, ხოლო პროდუქციის ღირებულება 16 ათას მანეთს აღწევდა. „ქარხანაში“ არსებული ხის ქერქის სანაყი მანქანა ცხენის საშუალებით მოდიოდა მოძრაობაში.

თბილისში ამავე დროს არსებული ზავრიევის სპილენძის ჭურჭლის „ქარხანა“ წლიურად იძლეოდა 18 ათასი მანეთის ნაწარმს. აქ 40—50 ოსტატი და მუშა მუშაობდა.

50-იანი წლების დასაწყისში თბილისის მახლობლად სოფ. დრეში უცხოელმა კარლ მეიციწერმა მეფისნაცვალ ვორონცოვის დახმარებით შოაწყობა მათულის „ფაბრიკა“. ვორონცოვი ვარაუდობდა, რომ ამ „ფაბრიკის“ ნაწარმათ უზრუნველყოფდა კავკასიის არმიას შეღარებით იაფი მათულით. მაგრამ რუსული ფაბრიკანტების ინტერესებიდან გამომდინარე. ფინანსთა მინისტრმა უარი განაცხადა თბილისის მათულის საწარმოსათვის სახელმწიფო დაკვეთის მიცემაზე. წარმოების წინაშე წამოჭრილი სიძნელეების გამო (კაპიტალის სიმცირე და სხვ.), განსაკუთრებით ადგილობრივ ბაზარზე „ფაბრიკის“ ნაწარმზე მოთხოვნილების არარსებობის პირობებში („ფაბრიკა“ უშვებდა ისეთ უხეშ მათულს, რომლის ხმარება. ჩანს, ადგილობრივი მოსახლეობისათვის უცხო იყო) საწარმო დაიხურა.

მეიციწერის მათულის „ფაბრიკის“ ხვედრი მაგალითია საქართველოში ცარაზმის ეკონომიური პოლიტიკისა, რომელიც თავდაპირველად ერიდებოდა ადგილობრივი წარმოების ხელის შეწყობას რუსეთის ფაბრიკების ნაწარმის გასაღების შეკვეცის შიშით. ამასთანავე ამ საწარმოს მაგალითზე კარგად ჩანს, თუ რამდენად იყო დამოკიდებული ესა თუ ის ახალი წარმოება ადგილობრივ ბაზარზე, ადგილობრივი მოსახლეობის გემოვნებასა და მოთხოვნილებაზე.

50-იანი წლებიდან თბილისში ამოქმედდა უცხოელ შტუესს „ლითონ-სასხმელი და მექანიკური ქარხანა“. აქ არსებული უცხოეთიდან შემოტანილი დანადგარები ცხენის საშუალებით მოჰყავდათ მოძრაობაში. ჯერ კიდევ 40-იან წლებში თბილისშივე დაარსდა ყორღანოვის თუქსასხმელი „ქარხანა“. იგივე უნდა იყოს 60-იან წლებში თბილისში არსებული

მექანიკური და თუქსასხმელი საწარმოები, რომელთა წლიური გამომუშავება ამ დროს თითოეულისა 15—16 ათას მანეთამდე აღწევდა.

შედარებით მსხვილი საწარმოები 50—60-იან წლებში თბილისში, იყო ზეიტცერის ავეჯის „ფაბრიკა“, ეტლების ზოგიერთი საწარმო, სახაზინო საწახნაგო „ფაბრიკა“. უნდა აღინიშნოს აგრეთვე 50-იანი წლებიდან თბილისში გახსნილი ენფიანჯიანცის და ბოზარჯიანცის თამბაქოს „ფაბრიკები“, სადაც ამ დროს 10—15 მუშა მუშაობდა. ეს უკანასკნელნი შემდგომ მსხვილ ფაბრიკულ საწარმოებად გადაიქცა.

ამრიგად, 40—50-იან წლებში საქართველოში, კერძოდ, თბილისში მრეწველობის თითქმის ყველა დარგში — ლითონისა და ხე-ტყის დამამუშავებელ წარმოებაში, მინის, ტყავის, აბრეშუმის, საპნის წარმოებაში, ტექსტილურ და კვების მრეწველობაში — არსებობდა შედარებით მსხვილი საწარმოები. ყველა მათგანში გამოყენებული იყო დაქირავებული ძუშების შრომა. იქაც კი, სადაც შესაძლებლობა იყო იძულებითი შრომის გამოყენებისა (ყმები — ერისთავების მინის „ქარხანაში“, პატიმარი ქალები — თბილისის აბრეშუმის „ფაბრიკაში“), ძირითად სამუშაოებს ასრულებდნენ დაქირავებული მუშები. აღნიშნულ საწარმოთა უმრავლესობა ემსახურებოდა საკმაოდ ფართო ბაზარს. აბრეშუმის ნაწარმი გადიოდა საზღვარგარეთ და რუსეთში; ტყავის, საპნის, მინის, თამბაქოს საწარმოთა პროდუქცია სალდებოდა მთელ ამიერკავკასიაში და ნაწილობრივ ჩრდილოეთ კავკასიაშიც.

ჩამოთვლილ საწარმოთაგან უმრავლესობა წარმოადგენდა მთლიანად ხელით შრომაზე დამყარებულ ტიპიურ მანუფაქტურას. ზოგიერთი მათგანი კი უფრო რთულ ხასიათს ატარებდა. სხვადასხვა ტექნიკურ გაუმჯობესებათა, უცხოეთიდან შემოტანილი დაზგებისა და სხვა დანადგარების დანერგვა, განსაკუთრებით ცხოველებისა თუ წყლის ენერჯის გამოყენება და ზოგიერთ შემთხვევაში ორთქლის ძრავის არსებობა საფუძველს გვაძლევს ტექნიკური თვალსაზრისით ეს საწარმოები განვიხილოთ, როგორც მანუფაქტურიდან ფაბრიკაზე გარდამავალი საფეხური, მაგრამ, მეორე მხრივ, პირადი დამოკიდებულების და პატრიარქალური ურთიერთობის ნაშთების არსებობისა და კადრის მუშათა უქონლობის გამო, რომელთა კონტინგენტი მხოლოდ ეხლა იქმნებოდა, მთლიანობაში აღნიშნულ საწარმოებს ჩვენ უპირატესად მანუფაქტურულ წარმოებას მივაკუთვნებთ.

მართალია, ჩამოთვლილი, შედარებით მსხვილი საწარმოები, როგორც წესი, არ გამოირჩეოდნენ ხანგრძლივი არსებობით, რაც თავისთავად მანუფაქტურისათვის არის დამახასიათებელი, მაგრამ რადგანაც მათი უმრავლესობა აღმოცენებული იყო ადგილობრივი ბაზრის განვითარების შედეგად, მთლიანად მნიშვნელოვან როლს ასრულებდნენ ქვეყნის სოციალ-ეკონომიურ ცხოვრებაში, კერძოდ, ამ საწარმოებს არ შეიძლება არ მოეხდინ-

ნათ ზეგავლენა ძველი, ფეოდალური ურთიერთობების რღვევისა და ახალი ბურჟუაზიული ურთიერთობების ჩამოყალიბებაზე, საგლეხო რეფორმის გატარებისათვის ადგილობრივი, შინაგანი პირობების მომზადებაზე.

XIX საუკუნის პირველ ნახევარში საქართველოში არსებულ შედარებით მსხვილ საწარმოთა მაგალითზე კარგად ჩანს ის თავისებურება, რომელიც აქ მრეწველობის განვითარებას თავიდან დაჰყვება ქვეყანაში შექმნილი პირობების გამო. რუსეთის ცარიზმი განიხილავდა რა საქართველოს, როგორც კოლონიას, თავდაპირველად ზრუნავდა, რათა აქ განვითარებულიყო მხოლოდ მრეწველობის ისეთი დარგები, რომელნიც არამცთუ ხელს არ შეუშლიდა საკუთრივ რუსეთის მრეწველობას, არამედ, პირიქით, ხელს შეუწყობდა მას წინასწარ დამუშავებული ნედლეულისა თუ ნახევარფაბრიკატების მიწოდებით. მეორე მხრივ, ცარიზმი, საკუთრივ რუსეთის სამრეწველო განვითარების შედარებითი სისუსტის გამო, ხელს უწყობდა ადგილზე ისეთი დარგების აღმოცენებასაც, რაც აუცილებელი იყო სოფლის მეურნეობის განვითარებისათვის (კერძოდ, ლითონდამამუშავებელი წარმოება). მაგრამ საბოლოოდ ასეთი „ზრუნვა“, მიუხედავად იმისა, რომ ცალმხრივ ხასიათს ატარებდა, ობიექტურად ნიშნავდა საწარმოო ძალთა განვითარებისათვის ხელის შეწყობას.

მეტად საინტერესოა საკითხი საქართველოს მრეწველობაში დაბანდებული კაპიტალის წყაროების შესახებ. ასეთი წყარო რამდენიმე იყო, რაც თავიდანვე იჩენს თავს. დამახასიათებელია ამ მხრივ კასტელას აბრეშუმსახვევი „ფაბრიკის“ მაგალითი. კასტელა ეკუთვნოდა ტიპიური უცხოელი საქმოსნების რიცხვს, რომელნიც მრავლად იყვნენ ამ დროს რუსეთსა და მის განაპირა მხარეებში. მან კარგად შეაფასა ამიერკავკასიის ბუნებრივ სიმდიდრეთა, კერძოდ, აბრეშუმის ნედლეულის გამოყენების ხელსაყრელობა და ამ საქმით დააინტერესა რუსეთის მმართველი წრეებიდან მეტად გავლენიანი პირები. აღსანიშნავია, რომ მას მხარს უჭერდა თვით რუსეთის ფინანსთა მინისტრი კანკრინი, ხოლო კომპანიონებად ჰყავდა თავადები გოლიცინი, პოტიომკინი, და კურაკინი. ამ უკანასკნელების წილი წარმოებაში შეადგენდა ნახევარ მილიონზე მეტ მანეთს ასიგნაციებით (135 ათას მანეთს ვერცხლით). კასტელას კომპანიონები იყვნენ სხვა უცხოელი საქმოსნებიც, რომელთაც თავის მხრივ გარკვეული სახსრები დააბანდეს წარმოებაში და აგრეთვე ქართველი ვაჭარი ეგორ ქედხუდაშვილიც. ამ უკანასკნელს კასტელასთვის მიუცია 5 ათასი მანეთი¹.

ამრიგად, წარმოებაში კაპიტალი თავიდანვე მოედინება რუსეთიდან და უცხოეთიდან. ამასთანავე მასში უკვე მონაწილეობს ადგილობრივი კაპიტალიც. ადგილობრივი სავაჭრო კაპიტალის მრეწველობაში დაბანდე-

¹ П. В. Гугушвили, Развитие промышленности в Грузии и Закавказье в XIX—XX вв., I, Тб., 1957. გვ. 258.

ბის საუცხოო მაგალითია ზუბალაშვილის და კომპანის შაქრის „ქარხანა“. როგორც ცნობილია, საქართველოს მრეწველობის განვითარებაში მნიშვნელოვანი როლი შეასრულა ხაზინამაც ცალკეულ საწარმოთა დაფინანსებისა, თუ მიწების გამოყოფის გზით.

კაპიტალის იგივე წყაროებია დადასტურებული მომდევნო ხანაშიაც. 60-იანი წლების შუა ხანებისათვის წვრილი კაპიტალისტური, მანუფაქტურული და ფაბრიკული წარმოების შეფარდებაზე წარმოდგენას გვიქმნის ქვემოთმოტანილი მონაცემები¹.

ც. ხ. რ. ი. ლ. 5

მრეწველობის ფორმები	საწარმოთა რაოდენობა	მუშათა რაოდენობა	პროდუქცია (ათას მან.)
წვრილი კაპიტალისტური წარმოება	462	1921	722,2
მანუფაქტურა	29	483	244,0
ფაბრიკა-ქარხნული წარმოება	4	132	80,0
ს უ ლ	495	2536	1046,2

მართალია, ერთი წლის მონაცემებით ძნელია მსჯელობა საერთოდ რეფორმამდელი ხანის საქართველოს სამრეწველო განვითარების დონის შესახებ, რადგან მთელმა რიგმა მნიშვნელოვანმა საწარმოებმა სხვადასხვა მიზეზის გამო ადრევე შეწყვიტეს არსებობა და ვერ მიაღწიეს 60-იანი წლების შუა ხანებამდე, მაგრამ მოტანილი მასალა ერთგვარ წარმოდგენას გვაძლევს მრეწველობის განვითარების მასშტაბებსა და ხასიათზე.

60-იანი წლების შუა ხანების საქართველოს სამრეწველო განვითარების დონის განსაზღვრისათვის საინტერესოა ერთ სულ მოსახლეზე სამრეწველო პროდუქციის გაანგარიშება.

1865 წლისათვის აღმოსავლეთ საქართველოში დაახლოებით 566 ათასი მცხოვრები იყო, ხოლო დასავლეთ საქართველოში — 624 ათასი, ე. ი. სულ დაახლოებით 1 190 ათასი სული². ამდენად, მარტო აღმოსავლეთ საქართველოში ერთ სულ მოსახლეზე მოდიოდა დაახლოებით 2 მანეთამდე სამრეწველო პროდუქცია, მთელი საქართველოს მასშტაბით კი 1 მანეთამდე. თუ ამ მონაცემებს შევუდარებთ უშუალოდ რეფორმის მომდევნო ხანის რუსეთის ევროპული გუბერნიების მდგომარეობას, დავინახავთ,

¹ ცხრილში არ არის გათვალისწინებული წვრილი საქონლური („ხელოსნური წარმოება“).

² Сборник статистических сведений о Кавказе, т. I, Тиф., 1869, отд. II, გვ. 10—11. თბილისის გუბერნიის მოსახლეობის მონაცემებიდან გამოვრიცხავთ ელიზავეტპოლის მაზრას, ხოლო შეგვაქვს ახალციხის მაზრა (ახალქალაქითურთ), რომელიც ამ დროს ქუთაისის გუბერნიის ითვისებოდა. შესაბამისად ქუთაისის გუბერნიის მოსახლეობას ვაკლებთ ახალციხის მაზრის მოსახლეობას.

რომ საქართველო სამრეწველო განვითარების თვალსაზრისით იდგა ევროპული რუსეთის, განსაკუთრებით სამიწათმოქმედო ოლქის გუბერნიათა ნაწილის, დონეზე¹.

სამთამადნო და სამთო-საქარხნო წარმოება. სამთამადნო წარმოების დარგებიდან XIX ს-ის პირველ ნახევარში საქართველოში ყველაზე მნიშვნელოვანი იყო ალავერდის და შამბლულის სპილენძის საწარმოები. ალავერდის მადნების დამუშავება დაიწყო ჯერ კიდევ XVIII ს-ის მეორე ნახევარში, ერეკლე II-ს მიერ ანატოლიიდან გადმოსახლებული ბერძენი ოსტატების მეშვეობით. თავდაპირველად ეს წარმოება მსხვილი სახელმწიფო მანუფაქტურის ხასიათს ატარებდა. საქართველოს რუსეთთან შეერთების შემდეგ, 1803—1816 წლებში. იგი ხაზინის ხელში გადავიდა და „სამთო ექსპედიციას“ დაექვემდებარა. ამ ხნის განმავლობაში აქ რუსი ოსტატები და მუშებიც იყვნენ დასაქმებულნი, თუმცა წარმოებას ძირითადად ისევ ბერძენები ეწეოდნენ. ხაზინის ხელში სპილენძის დამუშავების წესებსა და ტექნოლოგიაში არსებითი ცვლილებები არ მომხდარა. ბერძენი ოსტატები მადნის ამოსაღებად აღგენდნენ ამხანაგობებს. თითოეულ ოსტატს დაქირავებული ჰყავდა 1—8 მუშა. ერთ მათგანს 16 მუშაც კი ჰყავდა. მუშათა კონტინგენტს უმთავრესად საქართველოს სხვადასხვა რაიონებიდან. (ქართლიდან, ჯავახეთიდან და უმთავრესად იმერეთიდან) მოსული გლეხები ქმნიდნენ. შეშის მიწოდება და ნახშირის გამოწვა დაკისრებული ჰქონდათ მახლობელი სოფლების მცხოვრებთ. მადნის მოპოვების შემდეგ ხდებოდა მისი გამოწვა საგანგებო ქურებში, შემდეგ კი „შავი სპილენძის“ გამოდნობა. „შავი სპილენძიდან“ დაწმენდის გზით იღებდნენ სუფთა სპილენძს. აღნიშნულ ოპერაციებს აწარმოებდნენ ცალკე ოსტატები და მუშები, მადნის მოპოვებელი ოსტატების ხარჯზე. მიღებული პროდუქციის მეათედს ბერძენი ოსტატები ხაზინას უსასყიდლოდ აბარებდნენ. დანარჩენს კი გარკვეული საზღაურის ფასად აძლევდნენ.

¹ თანახმად ოფიციალური მონაცემებისა (Статистический временник Российской империи, I, СПб, 1866) 1863 წლისათვის ევროპული რუსეთის 49 გუბერნიიდან ერთ სულ მოსახლეზე 1 მანეთამდე სამრეწველო პროდუქცია მოდიოდა 13 გუბერნიაში, 1-დან 2 მანეთამდე—18 გუბერნიაში, ხოლო 2 მანეთიდან 6—7 მანეთამდე—15 გუბერნიაში. თავისი სამრეწველო განვითარებით თვით რუსეთშივე გამოირჩეოდა მოსკოვის, პეტერბურგის და ვლადიმირის გუბერნიები, სადაც 1 სულ მოსახლეზე მოდიოდა 20—50 მანეთის პროდუქცია (იგულისხმება აქციზით დაუბეგრავი წარმოება).

თბილისის გუბერნია, რომ ავიღოთ 1863 წლის ოფიციალური მონაცემები, რომელთა თანახმადაც ერთ სულ მოსახლეზე აქ მოდიოდა 1 მან. და 20 კაპიკი, იდგა ისეთი გუბერნიების რიგში, როგორცაა ვოლინის, ვიატკის, ეკატერინოსლავის, კურსკის, მოგილევის, ორენბურგის, სამარის, სარატოვის, თავრიდის, ტამბოვის, ხარკოვის, პუნხის, ჩერნიგოვისა და სხვ., სადაც ერთ სულ მოსახლეზე დაახლოებით მოდიოდა 1—1,6 მანეთამდე პროდუქცია.

ამრიგად, სპილენძის წარმოების პროცესში შეიმჩნევა შრომის დანაწილება (მადნის მოპოვება, გამოწვა, გამოდნობა, დაწმენდა), მაგრამ იმის გამო, რომ ოსტატ-მწარმოებელთა კაპიტალი დაქსაქსული იყო და ისინი ცალ-ცალკე უძღვებოდნენ წარმოებას, არა გვაქვს საფუძველი მთლიანად აღნიშნული წარმოება ამ დროისათვის ერთ მანუფაქტურად მივიჩინოთ¹. კაპიტალისტური ურთიერთობის, კერძოდ, მანუფაქტურის საწყისებს ვხედავთ მხოლოდ ცალკეულ, შედარებით მსხვილ, მრეწველთა წარმოებაში. უმეტესწილად კი საქმე გვაქვს კაპიტალისტური მარტივი კოოპერაციის ტიპის ან წვრილ („კუსტარულ“) წარმოებასთან.

უნდა აღინიშნოს, რომ თვით სამთო ექსპედიციაც ზღუდავდა ცალკეულ ოსტატ-მრეწველებს იმით, რომ ნებას არ რთავდა მადნის მოპოვებისას 15 მუშაზე მეტი ჰყოლოდათ. ამავე დროს იგი მათ ინიციატივას ართმევდა თავიანთი პროდუქციის გასაღების საქმეში.

შამბლულის სპილენძის საბადოები აღმოჩენილ იქნა 1818 წელს. 1820 წლისათვის ალავერდსა და შამბლულში გამოდნობილ იქნა 2 500-მდე ფუთი სპილენძი. მუშათა რაოდენობა აქ 120 კაცს აღწევდა, მიწერილი გლეხებისა კი 156-ს. უკანასკნელებს სამუშაოდ გამოჰყავდათ 78 ცხენი. 40-იან წლებში წლიურად გამოდნობილი სპილენძის რაოდენობა 4—8 ათას ფუთს უდრიდა². 50-იანი წლებიდან მახლობელი სოფლების გლეხებს მოეხსნათ სამთამადნო სამუშაოებში მონაწილეობის ვალდებულება და მათ ამიერიდან დაქირავებული მუშებიც ცვლიან.

60-იანი წლების შუა ხანებისათვის ალავერდში, შამბლულსა და ახტალაში წლიურად აღნობდნენ 6 500-მდე ფუთ სპილენძს. მუშათა რაოდენობა აქ დაახლოებით 280-ს აღწევდა. დამხმარე სამუშაოებს 40-მდე მუშა ასრულებდა, ე. ი. წარმოებაში დასაქმებული იყო 320-მდე კაცი³.

ამრიგად, მიუხედავად იმისა, რომ სპილენძის დამუშავება აღებულ პერიოდში ვერ აღწევს ფართო მასშტაბებს და აქ ჯერ კიდევ ადგილი არა აქვს წარმოების კონცენტრაციას, რეფორმამდელ ხანაში ეს იყო საქართველოს სამთამადნო მრეწველობის მნიშვნელოვანი უბანი, სადაც ადგილი ჰქონდა კაპიტალისტურ ურთიერთობათა შემოჭრას. რაც მთავარია, ამ ურთიერთობებში ებმება საქართველოს მოსახლეობის გარკვეული ნაწილი სხვადასხვა ადგილიდან მოსული მუშების სახით. უფრო გვიან უც-

¹ ასეთ თვალსაზრისზე დგას დ. გოგოლაძე. იხ. მისი სამთამადნო, სამთო-საქარხნო მრეწველობა საქართველოში და კაპიტალიზმის გენეზისის ზოგიერთი საკითხი, თბ., 1966, გვ. 155.

² მონაცემები ალავერდისა და შამბლულის სპილენძის მადნის დამუშავების შესახებ 20-იანი წლების ჩათვლით აღებული გვაქვს გამოცემიდან: Материалы к истории горной промышленности Грузии, (1799—1829), Тб., 1936.

³ Сб. статист. свед. о Кавказе, 1869, I, разд. II, გვ. 78—79.

ხოური კაპიტალის წყალობით ეს წარმოება მსხვილ კაპიტალისტურ ხასიათს იღებს.

რკინის მადნის მოპოვება და გამოდნობა XIX ს-ში საქართველოში შემორჩენილი იყო წვრილ („კუსტარულ“) საწარმოთა სახით სხვადასხვა რაიონებში და განსაკუთრებით რაჭის სოფლებში — წედისსა და ქვედში. მაგრამ ეს წარმოება ადგილობრივი მნიშვნელობისა იყო და ისიც რუსეთიდან რკინის შემოტანის ზრდისკვალად ეცემოდა.

რკინის გამოდნობის მსხვილი წარმოების დაარსების პირველი ცდა საქართველოში ეკუთვნის უცხოელ ერნსტ ლიბს, რომელმაც ადგილობრივი ხელისუფლების დახმარებით ჩათახში, ბოლნისის მახლობლად არსებული რკინის მადნის ბაზაზე, 60-იანი წლების დასაწყისში საფუძველი ჩაუყარა თუჯის ჩამომსხმელ ქარხანას. მაგრამ მოსამზადებელ სამუშაოთა დამთავრებამდე, 1862 წელს ლიბი გარდაიცვალა. წარმოებას სათავეში ჩაუდგა ლიბის მეუღლე და მისი რწმუნებული ვიტე.

1862 წლის მიწურულს ქარხნის მშენებლობა ძირითადად დამთავრებული იყო და დაიწყო თუჯის საცდელი გამოდნობა. ხაზინის ვალი კი ამ დროს 105 ათას მანეთს შეადგენდა. 1863 წელს ქარხანა კონტრაქტით გადაეცა უცხოელ ინჟინერ ბერნულს და ვიტეს. მაგრამ წარმოების საქმეების გამოსწორება მაინც ვერ ხერხდებოდა. 1868 წელს, ვიტეს სიკვდილის დროისათვის, წარმოებას 678 ათასი მანეთი ვალი ჰქონდა, აქედან ხაზინისა — 190 ათასი მანეთი.

როგორც ვხედავთ, ჩათახის ქარხნის მოწყობაზე მნიშვნელოვანი თანხა იქნა გაღებული. ეს წარმოება ტექნიკური აღჭურვილობის თვალსაზრისით იმ დროისათვის საკმაოდ მაღალ დონეზე იდგა. კერძოდ, 70-იანი წლების დასაწყისის აღწერილობის თანახმად, აქ გამართული იყო 2 ბრძმედი (доменные печи), 2 საღობი ქურა (вагранки), 2 საგუნდე ქურა (кричные горны), 10-ტონიანი საგუნდე ურო (кричный молот), სპილენძის საღობი თვითმბერი ქურა, 6 სამჭედლო ქურა. ცალკე იყო გამართული საჩამომსხმელო, საყალიბე და მექანიკური საამქროები („ფაბრიკები“). მექანიკურ საამქროში იყო 40-მდე სახვრეტი, სახარატო, ხრახნსაჭრელი და სხვა დანაშა („მანქანები“). მთელი ეს ტექნიკა მოძრაობაში მოდიოდა წყლის დამრტყმელი ბორბლის (наливное колесо) საშუალებით. კერძოდ, ბრძმედებისა და ქურებისათვის განკუთვნილი საბერველი „მანქანა“ მოძრაობაში მოჰყავდა 20 ცხენისძალიან ბორბალს. უშუალოდ წარმოებაში ჩაბმული იყო 65 მუშა¹.

ქარხანამ თავისი არსებობის მანძილზე დაამზადა ყუმბარები სამხედრო უწყების დაკვეთით, მიღები თბილისის საქალაქო საავადმყოფოსათვის,

¹ „საისტორიო მოამბე“, № 9, 1956, გვ. 53—54.

ქალაქის ბაღის რკინის გალავანი, ბოძები ინგლის-ინდოეთის სატელეგრაფო ხაზისათვის, რკინის ნაწილები ხიდებისათვის და სხვ. 15 წლის არსებობის მანძილზე ქარხანაში სულ გადადნობილ იქნა 346 ათასი ფუთი მადანი, რამაც მოგვცა 120 ათასი ფუთი თუჯი და 17 ათასი ფუთი საგუნდე რკინა (кричное железо). ქარხანას უნდა დაემზადებინა რელსები რკინიგზის მშენებლობისათვის, რაზედაც გაფორმებულ იქნა კონტრაქტი. მაგრამ ეს საქმე არ განხორციელდა¹.

იმის გამო, რომ ქარხანა თავიდანვე არ იყო უზრუნველყოფილი მსხვილი შეკვეთებით და მან თავისი არსებობა ვერ გაამართლა, 1875 წელს დაინიშნა მისი საჯარო გაყიდვა.

40-იანი წლებიდან იწყება ტყიბულის ქვანახშირის საბადოების დამუშავება. 1856 წელს ხაზინასა და ადგილობრივ მემამულეებს აგიაშვილებს, კანდელაკებსა და აბაშიძეებს შორის დაიდო კონტრაქტები, რომლის ძალითაც ხაზინას მემამულეებისათვის თითოეულ ფუთზე $\frac{3}{4}$ კაპიკი უნდა გადაეხადა. თავდაპირველად მადნის მოპოვება ხდებოდა ჭარის ნაწილების შემწეობით. 1847 წლიდან კი აქ ლუგანსკიდან გადმოიყვანეს სამთო ინჟინრები და მუშები (სულ 10 კაცი). წარმოებაში გამოყენებული უნდა ყოფილიყო ადგილობრივი მუშახელიც, რაც იქიდან ჩანს, რომ მემამულეებსა და ხაზინას შორის დადებული კონტრაქტი ითვალისწინებდა შენობების აგებას როგორც სამხედრო ნაწილისათვის, ასევე წარმოებაში დასაქმებული სხვა სახის მუშახელისათვის (всякого рода рабочие люди). უნდა ვიფიქროთ, რომ მადნის მოპოვების შემდეგ შესასრულებელი მეტად შრომატევადი სამუშაოები: მადნის მალაროდან გამოტანა, მისი კუბიკურ საყენებად დაწყობა გაზომვის მიზნით და სხვა, ძირითადად სრულდებოდა სწორედ ზემოაღნიშნული მუშახელის საშუალებით². 1848 წლიდან ტყიბულიდან ქუთაისამდე და რედუტ-კალემდე ქვანახშირის გადმოზიდვა კონტრაქტით იკისრა „გუბერნსკი სეკრეტარმა“ კრეჩიანოვსკიმ, მაგრამ უგზოობის გამო მან მხოლოდ მცირე რაოდენობის მადნის გადაზიდვა შეძლო. გადაზიდვას აწარმოებდნენ ადგილობრივი აზნაურებიც, მათ შორის ალხაზიშვილი³. მაგრამ იმ დროისათვის ქვანახშირის მოპოვება მეტად უმნიშვნელო იყო. 1848 წელს მოპოვებულ იქნა მხოლოდ 60 ათასი ფუთი⁴. 1860 წელს კი 150 ათასი ფუთი⁵. ქვანახშირის გამოყენება

¹ ЦГИА СССР, ф. 37, оп. 67, д. 434, лл. 15—17; სსცია, ფ. 10, საქ. 1251; იქვე, საქ. 1457; „საისტორიო მოამბე“, 9, 1956, გვ. 41—43.

² სსცია, ფ. 16, საქ. 9024, ფურც. 2; იქვე, ფ. 10, საქ. 369.

³ სსცია, ფ. 10, საქ. 374.

⁴ АКАК, I, გვ. 867.

⁵ ნ. ტყეშელაშვილი, წარკვეცივი საქართველოს მრეწველობის ისტორიიდან, თბ., 1958, გვ. 15.

თავდაპირველად ხდებოდა გემებზე (შავ ზღვაზე) და აგრეთვე ქალაქებში შენობების გასათბობად.

XIX ს-ის პირველ ნახევარშივე იწყება ნავთის მოპოვება და გადამუშავება შირაქის ველზე. პაგრამ ამ წარმოების მასშტაბები უმნიშვნელო იყო.

საქართველოს სამთამადნო და სამთო-საქარხნო მრეწველობაში 60-იანი წლების შუა ხანებისათვის ჩაბმული იყო დაახლოებით 500-მდე მუშა.

* * *

ზემოთ განვიხილეთ საქართველოში 30—60-იან წლებში დამამუშავებელი მრეწველობის განვითარება დაწყებული მისი უმარტივესი ფორმებიდან (საოჯახო მრეწველობა, ხელოსნობა) შედარებით მსხვილ წარმოებამდე. შევეხეთ სამთამადნო და სამთო-საქარხნო წარმოების დარგებსაც.

საქართველოს სამრეწველო განვითარების ტენდენციები რეფორმამდე ზანაში, კერძოდ, ამქრული ხელოსნობის მსხვერვა და წვრილსაქონლური წარმოების გაფართოება, წვრილი კაპიტალისტური წარმოების ფართო გავრცელება და აგრეთვე შედარებით მსხვილ, მანუფაქტურულ საწარმოთა აღმოცენება მანქანური ტექნიკის ჩანასახებით, კაპიტალისტურ ურთიერთობათა შეჭრა სამთამადნო წარმოებაში, დაქირავებული შრომის სისტემატური გამოყენება როგორც წვრილ, ასევე შედარებით მსხვილ წარმოებაში, ვფიქრობთ საფუძველს იძლევა ვამტყიცოთ მოცემული პერიოდის საქართველოში კაპიტალისტური წყობის არსებობა¹.

§ 3. ვ ა ჯ რ ო ბ ა

ვაჯრობა უცხო ქვეყნებთან და რუსეთთან. საქართველოს რუსეთთან შეერთების პირველი დღეებიდანვე რუსეთის ხელისუფლება ყოველმხრივ ცდილობდა აქ მყოფი მრავალრიცხოვანი არმია ადგილობრივი საქონლით და სურსათ-სანოვაგით დაეკმაყოფილებინა. ძირითადად ამის გამო მთელი მისი სავაჭრო პოლიტიკა მიმართული იყო იქითკენ, რომ საქართველოში ვაჯრობის მონაპოლია თვითონ ჩაეგდო ხელთ და სასწრაფოდ უზრუნველყო ვაჯრობის ნორმალური მიმდინარეობა. გარდა ამისა, სავაჭრო მონაპოლიის მოპოვება რუსეთის ხელისუფლებას ამიერკავკასიაში პოლიტიკური ბატონობის განსამტკიცებლადაც გამოადგებოდა. 800-იანი წლების ბოლოს საქართველოს მთავარსარდალი ტორმასო-

¹ განსხვავებული თვალსაზრისი აქვთ ზ. ანჩაბაძეს, მ. დუმბაძეს, გ. ბაქრაძესა და სხვ. ისინი უარყოფენ კაპიტალისტური წყობის არსებობას რეფორმამდე ზანის საქართველოს მრეწველობაში.

ვი აღნიშნავდა, რომ ის საქონელი, რომელიც წინათ საქართველოში ოს-
მალეთს შემოჰქონდა (მარილი, რკინა, დამარილებული თევზი და სხვ.),
ახლა რუსეთს უნდა შემოეტანა, თორემ მის აქ ბატონობას მყარი საფუ-
ძველი ვერ ექნებოდა. ამ მიზნით მთავრობა ყოველგვარ ზომებს იღებ-
და სავაჭრო-საქარავნო გზების გასაუმჯობესებლად და საერთოდ ვაჭრო-
ბის შემაფერხებელი მიზეზების აღმოსაფხვრელად.

ვაჭრობის ნორმალური მიმდინარეობისათვის ერთ-ერთი მთავარი და-
შაბრკოლებელი გარემოება მრავალრიცხოვანი შინაგანი ფეოდალური სა-
ბაჟოების არსებობა იყო. საქართველოში შემოტანილი საქონელი სამეფო-
სახელმწიფო გადასახადებს გარდა, მრავალ სხვადასხვა კერძო პირთა, საეკ-
ლესიო თუ საერო ფეოდალთა სასარგებლოდაც იბეგრებოდა.

სულ საბაჟო შემოსავალი ყოველწლიურად აღმოსავლეთ საქართვე-
ლოში 63 000 მანეთს (ვერცხლით) უდრიდა.

1807 წლიდან დაწყებული 40-იან წლებამდე ხელისუფლების მხრიდან
მიღებული ღონისძიებების შედეგად თანდათანობით მოხერხდა შინაგანი
ბაჟების გაუქმება. ფეოდალური ბაჟების გაუქმება და ერთიანი საბაჟო
სისტემის შემოღება ვაჭრობის შემდგომი განვითარებისათვის მნიშვნე-
ლოვან ფაქტორს წარმოადგენდა:


10-იანი წლებისათვის საქართველოს საგარეო ვაჭრობა კვლავ უპი-
რატესად სპარსეთსა და ოსმალეთთან წარმოებდა. მთავარსარდალი ტორ-
მასოვი აღნიშნავდა, რომ აქაურ ვაჭრებს თითქმის არ უხდებოდათ რუსე-
თის ქალაქებში ყოფნა, მთელი მათი სავაჭრო ოპერაციები სპარსეთთან
და საერთოდ აზიის ქვეყნებთან იყო დაკავშირებული¹.

საქართველოში მეზობელი სახანოებიდან, სპარსეთისა და თურქეთის
პროვინციებიდან ჩამოდიოდნენ ვაჭრები, რომელთაც ჩამოჰქონდათ თავი-
ანთი ქვეყნების საქონელი. ამ დროისათვის აზიის ქვეყნებიდან საქარ-
თველოში წლიურად სულ 800 000 მანეთის (ვერცხლით) ღირებულების
აბრეშუმი, ბამბა, აბრეშუმის, ბამბისა და შალის ქსოვილები, შაქარი, ყავა,
სანელებლები, ფოლადი, ტყვია და სხვა წვრილმანი საქონელი შემოჰქონ-
დათ.

საქართველოდან ირანსა და თურქეთში გაჰქონდათ თბილისელი ვაჭ-
რების მიერ მოსკოვის, მაკარიევისა და რუსეთის სხვა ქალაქების იარმარ-
კებიდან ჩამოტანილი რუსული მრეწველობის ნაწარმი, ადგილობრივი სა-
ქონლიდან ოქროსა და ვერცხლის ბუზმენტები, ქართული ოქრომკედით
ნაქარგი ქსოვილები, დიდი რაოდენობით ენდრო და სხვ.

საერთოდ XIX ს-ის დასაწყისისათვის საქართველოს ვაჭრობის შესა-
ხებ რუსი მოხელე აღნიშნავდა, რომ „ალექსანდრე I-ის მეფობიდან
მოყოლებული საქართველოს ვაჭრობა წლითიწლობით აყვავებას განიც-

¹ AKAK, IV, № 37.



თბილისის ქარვასლა.

დის და ისეთი სავაჭრო ოპერაციები წარმოებს, როგორც ქართველი მეფეების დროს არ ახსოვთ“.

XIX ს-ის I მეოთხედისათვის ხდება რუსეთისა და აზიის ვაჭრობის გაფართოება. რუსეთიდან თანდათანობით უფრო მეტი და შესაფერისი საქონელი გააქვთ აზიის ქვეყნებში, მაგრამ ამ დროისათვის რუსეთის სამრეწველო ბურჟუაზია ჯერ კიდევ არ თხოულობს არამცთუ აზიის ბაზრების, არამედ თვით ამიერკავკასიის ბაზრების უცხოეთის კონკურენციისაგან დაცვას. რუსეთის სამრეწველო ბურჟუაზიას თავისი საკუთარი ბაზრებიც კი არ ჰქონდა სავსებით ათვისებული.

ამიერკავკასიაში ჩაყენებული რუსი ჯარების მომარაგების აუცილებლობა, საფრანგეთის კაპიტალთან კავშირი და ინგლისთან მეტოქეობა, ხოლო საბოლოო ანგარიშში თავისი პოზიციების განმტკიცება საქართველო-ამიერკავკასიაში აიძულებდა რუსეთს, რომ აქ დროებით „ვაჭრობის თავისუფლება“ გამოეცხადებინა. ამ დროისათვის რუსეთში აზიასთან ვაჭრობის ამოცანა შემდეგნაირად ესახებოდათ: რუსეთი უნდა ჩაბმულიყო ევროპისა და აზიის ვაჭრობაში. იგი თავისი გეოგრაფიული მდებარეობის წყალობით უნდა გამხდარიყო გვერდაუხვეველი საშუამავლო ქვეყანა ევროპასა და აზიას შორის საქონლის გაცვლა-გამოცვლაში. ამიერკავკასიის თანდათანობითი დაპყრობის შემდეგ კვლავ გამოცოცხლდა იდეა შავი და კასპიის ზღვების სავაჭრო გზის გადაბმის შესახებ. ამიერკავკასია ერთგვარ ბუნებრივ ხიდს წარმოადგენდა ევროპასა და აზიას შორის და

ძალიან მოსახერხებელი გზა იყო სატრანზიტო ვაჭრობისათვის. რუსეთი შეეცადა აღედგინა ძველიდანვე არსებული, ამიერკავკასიაზე გამავალი სატრანზიტო გზა და 1821 წ. 8 ოქტომბრის ბრძანებით ამიერკავკასიაში შემოღებულ იქნა შეღავათიანი ტარიფი, რომლის მიხედვითაც ევროპიდან შემოტანილ საქონელზე საბაჟო გადასახადი დაწესებული იყო საქონლის ღირებულების მხოლოდ 5%-ის რაოდენობით და ნებადართული იყო ევროპული საქონლის უბაჟო ტრანზიტი ამიერკავკასიის გავლით ირანისაკენ. შეღავათიანი ტარიფი წესდებოდა 10 წლის ვადით, მისი განხორციელება 1822 წლის 1 ივლისიდან დაიწყო. ამიერიდან ამიერკავკასიის ტერიტორიაზე, ოდესა-ყულევ-თბილისის გავლით უნდა წარმართულიყო ევროპის ვაჭრობა აზიასთან.

მართალია, 5%-იანი ტარიფი და თავისუფალი ტრანზიტი ნიშნავდა ამიერკავკასიის და ირანის ბაზრების ევროპის ქვეყნებისათვის, კერძოდ, საფრანგეთისათვის ხელში ჩაგდებას, მაგრამ რუსეთის მთავრობას იმედი ჰქონდა, რომ შეღავათიანი ტარიფის ვადაში, 10 წლის განმავლობაში ამიერკავკასიისა და ირანის ბაზრები გაფართოვდებოდა, გაიზრდებოდა მოთხოვნილება ევროპულ საქონელზე და ვადის დამთავრებისას მფარველობითი ტარიფის დაწესებით, უკვე შექმნილ ბაზრებს რუსეთის ბურჟუაზია ჩაიგდებდა ხელში.

1821 წლის 8 ოქტომბრის ბრძანებულებამ მნიშვნელოვანი ბიძგი მისცა საერთოდ ამიერკავკასიისა და, კერძოდ, საქართველოს ვაჭრობის განვითარებას. იგი არღვევდა ამიერკავკასიის ბაზრების კარჩაკეტილობას და საქართველოს მსოფლიო ვაჭრობის საქონელბრუნვაში აბამდა.

1822 წლიდან თანდათანობით იწყება თბილისელი ვაჭრების მიერ ლაიპციგის იარმარკიდან საქართველოში საქონლის შემოტანა. პირველად თბილისელი ვაჭრები ლაიპციგის იარმარკაზე გამოჩნდნენ 1824 წ. აქ ამ წელიწადს თბილისიდან ჩამოსული იყო 10 ვაჭარი, რომელთაც შეიძინეს 1 600 000 მანეთის (ასიგნაციებით) საქონელი, 1828 წელს კი ლაიპციგის იარმარკაზე 13 თბილისელი ვაჭარი ღებულობდა მონაწილეობას, რომელთაც ამ წელიწადს 4 400 000 მანეთის საქონელი წამოიღეს საქართველოში¹.

შეღავათიანი ტარიფის მოქმედების განმავლობაში თბილისის საბაჟოში უმთავრესად შემდეგი საქონელი შემოდიოდა. ევროპის ქვეყნებიდან — ატლასები, ფარჩა, მაუდი, ტაფტა, მიტკალი, ნარმა, ჩითი, შაქარი, რომი, ძვირფასი ღვინოები: შამპანური, მადერა, ბორდო; ქაშანურის ჭურჭელი და სხვ.; სპარსეთიდან — ბამბა, ნარმა, ბუზმენტები, შალის საბნები, ოქროქსოვილები, დარაია, შალები, თავშლები, ხალიჩები, ქეჩა, აბრეშუ-

¹ Коммерческая газета, 1825, № 40, 1828, № 7 и 43.

მის ქსოვილები და ნართი, სხვადასხვა ბეწვეული, მარილი და სხვ.: თურ-
ქეთიდან — ფოლადი, ნარმა, მარილი, თამბაქო და სხვ.¹

1827 წელს თბილისის საბაჟოში ევროპული საქონელი შემოტანილი იყო 383 090 მანეთისა, სპარსული საქონელი — 1 116 696 მანეთისა ევრო-
ცხლით². საერთოდ. შეღავათიანი ტარიფის მოქმედების პერიოდში იმდენად
გაცხოველდა საქონელბრუნვა, რომ მიუხედავად 5% ტარიფისა თბი-
ლისის საბაჟოს შემოსავალი მნიშვნელოვნად გაიზარდა.

შეღავათიანი ტარიფის დაწესების პირველ წელიწადს, 1822 წელს, ამი-
ერკავკასიაში შემოტანილი იყო სულ 825 985 მანეთის საქონელი, 1830
წელს კი ამ ციფრმა 2 518 303 მანეთს მიაღწია. ე. ი. 8 წლის განმავლო-
ბაში საქონლის შემოტანა გაიზარდა 3-ჯერ. შეღავათიანი ტარიფის მოქმე-
დების 10 წლის განმავლობაში საშუალო წლიური შემოტანა საქონლისა
1 700 000 მანეთს უდრიდა³. მაგრამ აქვე უნდა აღინიშნოს, რომ შეღავა-
თიანი ტარიფის პირველ წლებში ადგილობრივ ვაჭრებს ამიერკავკასიიდან
თოქმის არავითარი საქონელი არ ვაჭონდათ. ვაჭრობა ძირითადად
ნაღდ ფულზე წარმოებდა. ვაჭრობის განვითარებასთან დაკავშირებით თან-
დათანობით დაიწყო ადგილობრივი საქონლის გატანაც და 30-იანი წლე-
ბისათვის ადგილობრივი საქონლის გატანით მიღებული საშუალო წლიური
შემოსავალი 700 000 მანეთს აღწევდა⁴. თუმცა, როგორც ზემოთ მოტა-
ნილი ციფრებიდან ჩანს, შემოტანილი საქონლის რაოდენობა ბევრად აღე-
მატებოდა გატანილს და, ამრიგად, სავაჭრო ბალანსი კვლავ პასიური
რჩებოდა.

შეღავათიანი ტარიფის მოქმედების პერიოდში არაჩვეულებრივად გა-
მოცოცხლებული ვაჭრობისა და ალებ-მიცემობის შედეგად ქ. თბილისში
წარმოიშვა კომერციული სახლები და მაღაზიები. აქ თანდათანობით ხდე-
ბოდა ფულადი კაპიტალის დაგროვება. მაგრამ შეღავათიანი ტარიფის და-
წესების თითქმის მეორე წელსვე, ფინანსთა მინისტრად კანკრინის დანიშნ-
ვის შემდეგ, დაიწყო ბრძოლა ამიერკავკასიისათვის მინიჭებული შეღავა-
თების აღკვეთისათვის. კანკრინი გვევლინება რუსეთის მრეწველობისა და
კაპიტალისტების მფარველად. იგი ამიერკავკასიის ბაზრების რუსი კაპიტა-
ლისტებისათვის დამორჩილებას ცდილობდა და შეღავათიანი ტარიფის
გაუქმებას მოითხოვდა.


კანკრინის ბრძოლა ამიერკავკასიის თავისუფალი ვაჭრობის აღკვეთი-

¹ АКАК, VI, ч. I, гл. 227.

² АКАК, VII, гл. 132.

³ КК на 1853 г.—Д ю к р у а с и, О заграничной торговле Зак-го края.
გვ. 410.

⁴ იქვე.



თბილისი. ბაზარი.

სათვის წარმატებით დამთავრდა. მით უმეტეს, რომ საქართველო-ამიერკავკასიის შესახებ თვით იმპერატორი შემდეგი აზრისა იყო: „ამიერკავკასია, — წერდა იმპერატორი 1826 წელს თავის წერილში „ფაქტები საქართველოზე“, — შეიძლება რუსეთის უმდიდრეს კოლონიალ იქცეს — კოლონიას ვამბობთ იმიტომ, რომ იგი რუსეთის სხვა პროვინციების თანაბარუფლებიან და ვალდებულებიან პროვინციად ჯერ კიდევ დიდ ხანს ვერ გახდება. აქედან გამომდინარეობს, რომ ამ ქვეყნის მართვა საჭიროა გონიერი კოლონიალური სისტემის შესაბამისად სწარმოებდეს. ამიერკავკასიას შეუძლია მოგვეცეს ჩვენ დიდი რაოდენობით საუკეთესო ხარისხის აბრეშუმი, ბამბა, ბრინჯი, ინდიგო. გემთსაშენებელი ხე-ტყე და სხვა. იგი უნდა იქნეს ჩვენი ფაბრიკული ნაწარმის მომხმარებელი და რუსეთის სპარსეთთან ვაჭრობის შუამავალი“¹.

1832 წლის 1 იანვრიდან ამიერკავკასიის თავისუფალი ტრანზიტის და შეღავათიანი ტარიფი უქმდებოდა. ამიერიდან საქართველო-ამიერკავკასიაზე ვრცელდებოდა საერთო საიმპერიო ტარიფი, რომლის მიხედვითაც

¹ ЦГИА СССР, ф. 560, оп. 22, д. 18³, л. 117.

ევროპის ქვეყნებიდან შემოტანილი საქონელი მისი ღირებულების 25%-დან 50%-მდე იბეგრებოდა.

რუსეთის ხელისუფლება სთვლიდა, რომ შეღავათიანმა ტარიფმა თავისი შედეგები გამოიღო. ადგილობრივმა ვაჭრებმა დააგროვეს ფულადი კაპიტალი, მიიღეს სავაჭრო გამოცდილება და განათლება და რომ ამიერიდან, როცა რუსული მანუფაქტურული საქონელი გაუმჯობესებულია და გამრავლებული, ადგილობრივმა ვაჭრებმა თავისი კაპიტალი, სავაჭრო ცოდნა-გამოცდილება უნდა გამოიყენონ რუსული საქონლით ირანსა და თურქეთთან ვაჭრობაში.

რუსეთის მმართველი წრეების იმედები არ გამართლდა. 1831 წ. ამკრძალავი წესების შემოღების შემდეგ ევროპის ქვეყნებსა და ირანს შორის ვაჭრობამ ტრაპიზონ-ერზერუმის გზისაკენ გადაინაცვლა. ტრაპიზონში ინგლისმა დააარსა სავაჭრო კომპანია და მისი საშუალებით მთელი მცირე აზიისა და ირანის ვაჭრობა ჩაიგდო ხელში. ირანის ქალაქები ინგლისური საქონლით იყო გავსებული, მთელმა მოგებამ, რომელსაც თავისუფალი ტრანზიტის შედეგად იღებდა თბილისი და რედუტ-კალე, ტრაპიზონ-ერზერუმისაკენ გადაინაცვლა. ყოველივე ამის შედეგად ამიერკავკასიაში და, კერძოდ, თბილისში კრედიტი დაეცა, ფულადი კაპიტალი თანდათან ამოიწურა, განშირდა ვაჭრების გაკოტრება და რუსულ საქონელზე მოთხოვნილება შემცირდა. გარდა ამისა, მრავალმა თბილისელმა ვაჭარმა არჩია ევროპული საქონლით სატრანზიტო ვაჭრობა ტრაპიზონ-ერზერუმის გზით. 1832 წელს თბილისელი ვაჭრები: შერმაზან ვართანოვი, სპირიდონ და დავით ბაისაგლოვები და კარაპეტ ტერ-მინასოვი 125 000 მან. (ვერცხლით) წავიდნენ საზღვარგარეთ, შეიძინეს ზემოაღნიშნული თანხის საქონელი და ტრაპიზონ-ერზერუმის გზით ჩაიტანეს ირანში, სადაც ამ საქონლის გაყიდვის შედეგად 25% მოგება მიიღეს. 1833 წელს კვლავ მომგებიანად გაიმეორეს ეს ოპერაცია. 1834 წელს მათ მაგალითს უკვე სხვა თბილისელმა ვაჭრებმაც მიბაძეს და 200 000 მანეთით თურქეთისაკენ გაეშურნენ; ამავე წელს თურქეთში მნიშვნელოვანი თანხით წავიდნენ თბილისელი მსხვილი ვაჭრები შადინოვები, ბაბანასოვები და ფრიდონოვი. ამრიგად, ადგილობრივი ვაჭრების მიერ თავისუფალი ვაჭრობის დროს დაგროვილი ფული თანდათანობით თურქეთისაკენ მიედინებოდა.

ტრაპიზონში ინგლისური სავაჭრო კომპანიის დაარსების შემდეგ, სერთოდ ამიერკავკასიაში და, კერძოდ, საქართველოში უამრავი კონტრაბანდული საქონელი შემოვიდა. რუსეთის იმპერიის მიერ დაარსებული საბაჟოები კონტრაბანდასთან ბრძოლაში უძლური აღმოჩნდა. კონტრაბანდის გარდა ინგლისური საქონელი, უმთავრესად ბამბის ქსოვილები, ირანული საქონლის სახელით დიდი რაოდენობით შემოდიოდა ამიერკავკასიაში. ინგლისს ბამბის ქსოვილების ნახევრად მზა პროდუქცია მიჰ-

ქონდა ირანში. იქ ხდებოდა მათი საბოლოო დამუშავება: დაჩითვა, შეღებვა, შეფუთვა და ირანული საქონლის მარკით 5%-იანი ბაჟის გადახდით იოლად შემოდის საქართველოსა და ამიერკავკასიაში. რუსი მოხელეების გამოანგარიშებით, 1843 წლისათვის ასეთი სახით შემოტანილი საქონლის ღირებულებამ 350 000 მანეთს მიაღწია.

ცხადი იყო, რომ ამკრძალავი ტარიფის შემოღებით რუსეთმა მარცხი განიცადა. მან ამიერკავკასიის ბაზრები თავისთვის ჩაკეტა, მაგრამ რუსეთის მრეწველობის განვითარების დაბალი დონის გამო თავისი საქონლით მათი უზრუნველყოფა ვერ მოახერხა და ამიერკავკასია კონტრაბანდული და ირანის გზით შემოტანილი საქონლით აივსო, ხოლო რუსეთ-ირანის ვაჭრობა თითქმის სავსებით შეწყდა.

ყოველივე ამის გამო ორმოციანი წლების დასაწყისში კვლავ დაისვა საკითხი ამიერკავკასიის სავაჭრო კანონმდებლობის გადასინჯვის შესახებ. ირანსა და ამიერკავკასიაში რუსეთის ვაჭრობის შემცირების მიზნების გამოსარკვევად და სათანადო ღონისძიებების შესამუშავებლად ფინანსთა სამინისტროდან რამდენიმე კომისიაც იყო გამოყოფილი. ადგილობრივი ხელისუფლება, განსაკუთრებით მეფისნაცვალი ვორონცოვი, ყოველმხრივ ცდილობდა შეღავათების დროინდელი უფლებების აღდგენას. იგი ამტკიცებდა, რომ შეღავათების აღდგენის შემთხვევაში არამცთუ არ შემცირდებოდა თბილისში რუსული საქონლის გასაღება, არამედ ვაჭრობისა და აღებ-მიცემობის გამოცოცხლებასთან დაკავშირებით გაიზრდებოდა რუსულ საქონელზე მოთხოვნილება, განსაკუთრებით ისეთ საქონელზე, რომელიც მხოლოდ ნიჟინ-ნოვგოროდის იარმარკიდან შემოდის საქართველოში. ვორონცოვის აზრით, ამიერკავკასიის მდგომარეობა მოითხოვდა არსებული სავაჭრო სისტემის კარდინალურ ცვლილებას. იგი წინადადებდა იძლეოდა ამიერკავკასიაში ყველა საქონლის თავისუფლად შემოტანის ნება მიეცათ მხოლოდ 5% ბაჟის გადახდით.

მართალია, ვორონცოვის ენერგიული ბრძოლის შედეგად შეღავათების დროინდელი უფლებების მინიჭება ამიერკავკასიისათვის ვერ მოხერხდა, მაგრამ 1846 წ. 14 დეკემბერს გამოიცა დებულება, რომლის მიხედვითაც ევროპულ საქონელზე ბაჟი ოდნავ მცირდებოდა, იხსნებოდა გზა ევროპული საქონლისათვის ირანში ამიერკავკასიის გავლით.

40-იანი წლების დასაწყისისათვის საქართველოს ვაჭრობა ევროპისა და აზიის ქვეყნებთან შემდეგნაირად წარმოგვიდგება. ევროპიდან შემოქონდათ: შაქარი, ძვირფასი ღვინოები: შამპანური, მადერა, ბორდო და სხვ. ყავა, საღებავები: ინდიგო, კოშენილი, სანელებლები; ფოლადი, ტყვია, თუჯი და სხვ. ამ დროისათვის ევროპული საქონელი საქართველოში შემოტანილი იყო სულ 100 393 მანეთისა¹. ამ თანხაში პირველი ადგი-

¹ სსცია, ფ. 380, საქ. 84, ფურც. 1.

ლი შაქრის ღირებულებას ეკავა (76 531 მან.). რაც შეეხება საფეიქრო-საქონელს, განსაკუთრებით კი ბამბის ქსოვილებს, 1832 წ. დაწესებულ ზომოდ მაღალი ტარიფის გამო, ის სრულიად არ შემოდოდა. ირანიდან და თურქეთიდან შემოჰქონდათ ბამბის, აბრეშუმისა და შალის ქსოვილები; აბრეშუმის ნართი, საღებავები, გამოყვანილი ტყავები, თამბაქო, ბეწვეული, სხვადასხვა ხმელი ხილი: 40-იანი წლების დასაწყისში საქართველოში შემოტანილი იყო სულ 709 149 მანეთის აზიური საქონელი, აქედან მთავარი ადგილი ბამბისა და აბრეშუმის ქსოვილების იმპორტს ეკავა (397 823 და 292 715 მან. შესაბამისად)¹.

მთლიანად ევროპისა და აზიის ქვეყნებიდან საქართველოში შემოზიდული იყო 809 542 მანეთის საქონელი, რაც, საერთოდ, ამიერკავკასიის იმპორტის 1/4-ს უდრიდა².

საქართველოსა და ამიერკავკასიაში უკვე 40-იანი წლების დასაწყისისათვის უამრავი საფეიქრო და სხვა პირველი მოხმარების საქონელი შემოდის რუსეთიდან, კერძოდ, სახმელეთო გზებით შემოდოდა ბამბის, სელის, შალისა და აბრეშუმის ქსოვილები, რკინა და რკინის ნაწარმი, ფაიფურისა და ქაშანურის ჭურჭელი, შაქარი, ფქვილი და სხვ., სულ 2 500 000 მანეთის ღირებულებისა. სახელდობრ საქართველოში რა ღირებულების რუსული საქონელი რჩებოდა, ამის შესახებ ცნობები არა გვაქვს, მაგრამ უნდა ვივარაუდოთ, რომ ამიერკავკასიაში იმპორტირებული რუსული საქონლის ნახევარი მაინც საქართველოში მოიხმარებოდა.

50-იანი წლების ბოლოსათვის საქართველო-ამიერკავკასიის სავაჭრო ვაჭრობა კიდევ უფრო გაზრდილი ჩანს. ამ დროისათვის, სახელდობრ, 1857 წელს ამიერკავკასიაში ევროპისა და აზიის ქვეყნებიდან შემოტანილი იყო 4 774 960 მანეთის საქონელი. აქედან ევროპული — 1 334 298 მანეთისა, აზიური კი — 3 688 144 მანეთისა. თითქმის მთელი ევროპული საქონელი (1 086 816 მანეთის) შემოდოდა საქართველოში თბილისის, რედუტ-კალეს, შეკვეთილის და ოზურგეთის საბაჟოებით. აზიური საქონელი კი საქართველოში შემოტანილი იყო 934 063 მანეთისა³. ე. ი. ამიერკავკასიის იმპორტის ნახევარზე ცოტა ნაკლები საქართველოზე მოდიოდა.

ევროპიდან შემოზიდულ საქონელში მთავარი ადგილი კვლავ შაქარს ეკავა. აზიის ქვეყნებთან ვაჭრობის მთავარ საგანს კი კვლავ საფეიქრო ნაწარმი — ბამბის, აბრეშუმისა და შალის ქსოვილები წარმოადგენდა.

50-იანი წლების ბოლოსათვის, კერძოდ, 1857 წელს რუსეთიდან ამიერ-

¹ სსცია, ფ. 380, საქ. 84, ფურც. 2.

² ორმოციანი წლების დასაწყისისათვის ამიერკავკასიაში ევროპისა და აზიის ქვეყნებიდან შემოტანილი იყო 3 640 607 მანეთის საქონელი КК на 1853, გვ. 427.

³ ЦГИА СССР, ф. 1268, 1858, оп. 9, д. 257, л. 13—16.

კავკასიაში საკაბოტაჟო გზებით შემოტანილი იყო 3 546 629 მანეთის საქონელი¹, აქედან საქართველოში — 718 528 მანეთისა რედუტ-კალესა და შეკვეთილის ნავსადგურებით. გარდა ამისა, საფიქრებელია, რომ ბაქოს ნავსადგურში შემოტანილი 1 306 268 მანეთის რუსული საქონლიდან ნაწილი საქართველოშიც იგზავნებოდა. ამიერკავკასიაში შემოზიდული რუსული საქონლის მხოლოდ უმნიშვნელო ნაწილი (446 644 მან.) გადიოდა საზღვარგარეთ—ირანში, დანარჩენი კი ადგილობრივ მოიხმარებოდა.



ზაქარია სარაჯიშვილი.

როგორც აღვნიშნეთ, შეღავათიანი ტარიფის მოქმედების პერიოდში, გაცხოველებული საგარეო ვაჭრობის მიუხედავად, ამიერკავკასიიდან საზღვარგარეთ საქონლის გატანა საშუალო წლიურად 700 000 მანეთს არ აღემატებოდა. 1832 წლიდან 1850 წლამდე (19 წლის განმავლობაში) ამიერკავკასიიდან გატანილი საქონლის საშუალო წლიური ღირებულება 832 412 მანეთს უდრიდა, ე. ი. გატანილი საქონლის ღირებულების ზრდა საკმაოდ უმნიშვნელო იყო და 100 000—150 000 მანეთს არ აღემატებოდა. ამ მხრივ სულ სხვა სურათი გვაქვს 50-იან წლებში. 1851 წლიდან 8 წლის განმავლობაში ამიერკავკასიიდან გატანილი საქონლის საშუალო წლიურმა ღირებულებამ 1 233 777 მანეთს მიაღწია, ხოლო, თუ გამოვიცნავთ 1854 და 1855 წლებს, როდესაც ყირიმის ომის გამო საქართველოდან საზღვარგარეთ საქონლის გატანა თითქმის შეწყვეტილი იყო, მაშინ ამიერკავკასიიდან საზღვარგარეთ გატანილი საქონლის საშუალო წლიური ღირებულება თითქმის 1 500 000 მანეთს მიაღწევს. მართალია, საზღვარგარეთიდან შემოტანილი საქონლის ღირებულება კვლავ სჭარბობდა გატანილისას, მაგრამ 50-იან წლებში ამ უკანასკნელი ციფრის ყოველწლიური ზრდა ადგილობრივი სოფლის მეურნეობის განვითარებასა და ნატურალური მეურნეობის რღვევაზე მიუთითებდა.

მართალია, ამიერკავკასიიდან საზღვარგარეთ გაქონდათ როგორც რუსეთის ფაბრიკა-ქარხნების ნაწარმი, ისე ადგილობრივი საქონელიც, მაგ-

¹ ЦГИА СССР, ф. 1268, 1858, оп. 9, д. 257, л. 13—16.

რამ, როგორც აღვნიშნავდით, რუსეთის ფაბრიკა-ქარხნების ნაწარმის გატანა საკმაოდ უმნიშვნელო იყო და საერთოდ გატანილი საქონლის ღირებულების 1/4-საც ვერ აღწევდა.

ამიერკავკასიის ექსპორტში საქართველოს ხვედრითი წონის დასადგენად ზუსტი ცნობები არ მოგვეპოვება, მაგრამ თუ გავითვალისწინებთ იმ გარემოებას, რომ ყუღევი-ოზურგეთი-სოხუმის საბაჟოებიდან უმთავრესად საქართველოს შინამრეწველური და სოფლის მეურნეობის პროდუქცია გაჰქონდათ, ხოლო ამ საბაჟოებიდან 1857 წელს გატანილი იყო 914 522 მანეთის ღირებულების საქონელი¹, არ შევცდებით თუ დავასკვნით, რომ ამ მხარიდან გატანილი საქონლის ღირებულების ნახევარზე მეტი საქართველოზე მოდიოდა. საქართველოდან ევროპის ქვეყნებში გატანილ საქონელში პირველი ადგილი აბრეშუმის ნედლეულს ეკავა. 1857 წელს საქართველოდან გაზიდულ იქნა 547 206 მანეთის აბრეშუმის ნედლეული, ტყავი და ტყავის ნაწარმი კი — 59 217 მანეთისა. 1857 წელს საქართველოდან საზღვარგარეთ პირველად გაიტანეს მატყლი 27 996 მანეთისა, სხვა საქონელი, უმთავრესად ხე-ტყე (კაკლისა და ბზის ხეები) გატანილი იყო 223 502 მანეთისა.

გარდა ზემოჩამოთვლილი საქონლისა, საქართველოდან თურქეთში მოუსავლიანობის წლებში გაჰქონდათ სიმინდი. 50-იანი წლების ბოლოსა და 60-იანი წლების დასაწყისში საექსპორტო საქონელში სიმინდი წამყვან ადგილს იკავებდა². იგი ძირითადად ინგლისსა და ირლანდიაში გააქვთ.

50-იანი წლების ბოლოს ამიერკავკასიიდან შიგა რუსეთის გუბერნიებში, უმთავრესად ნოვგოროდის იარმარკაზე, დიდძალი ღირებულების ადგილობრივი და სპარსული საქონელი გაჰქონდათ. 1850 წელს ნოვგოროდის იარმარკაზე ამიერკავკასიიდან ჩაუტანიათ 1 195 019 მანეთის საქონელი, 1851 წ. — 1 344 500 მანეთისა, 1853 წელს — 1 551 650 მანეთისა, 1854 წელს — 1 861 825 მანეთისა და 1855 წელს — 1 953 015 მანეთისა³.

1857 წელს ამიერკავკასიიდან საკაბოტაჟო გზებით რუსეთში 2 941 886 მანეთის საქონელი გაუტანიათ. დიდი რაოდენობით გაჰქონდათ ენდრო, თევზი და ხიზილალა, აბრეშუმის ნედლეული, ბამბა, ხე-ტყე და სხვ. გატანილ საქონელში საქართველოს მონაწილეობა შედარებით მცირე იყო, ძვირფასი ხე-ტყისა და კახური ღვინოების გატანით ამოიწურებოდა.

საშინაო ვაჭრობა. XIX ს-ის 30 — 40-იანი წლებიდან ფეოდალური შინაგანი ბაჟების მოსპობის, სასაქონლო-ფულადი ურთიერთობის განვითარებისა და სავაჭრო სამომოსვლო გზების მეტ-ნაკლებად გაუმჯობესების

¹ ამიერკავკასიიდან 1857 წელს გატანილ იქნა სულ 1 309 526 მანეთის საქონელი.

² 60-იანი წლებიდან საქართველოდან სიმინდი გააქვთ წელიწადში 1 მლნ ფუთამდე.

³ ЦГИА СССР, ф. 40, оп. I, д. 14, л. 206, 417.

შედეგად საქართველოს საშინაო ვაჭრობა თანდათანობით ფართოვდებოდა, რაც, თავის მხრივ, ნატურალური მეურნეობის აღმოფხვრას უწყობდა ხელს.


ჯერ კიდევ 30-იან წლებში დასავლეთ საქართველოს დაბა-ქალაქებში იმართებოდა ყოველკვირეული ბაზრობა, სადაც თითქმის ყველა კუთხიდან იყრიდა თავს მოსახლეობა და ვაჭრობას აწარმოებდა სასოფლო-სამეურნეო პროდუქტებით, მანუფაქტურული და ფაბრიკა-ქარხნების ნაწარმით. როგორც საქართველოს მთავარმმართველი როზენი წერს, 1837 წლისათვის ქუთაისში იმართებოდა ყოველწლიური ბაზრობა, სადაც იყიდებოდა სხვადასხვაგვარი როგორც უცხოური, ისე რუსული საქონელი; გარდა ამისა, კვირაობით ქუთაისის ბაზარზე თავს იყრიდა მოსახლეობა იმერეთის ყველა კუთხიდან, სამეგრელოდან და გურიიდან, რომელთაც გასაყიდად მოჰქონდათ პური, ღვინო, მოჰყავდათ საქონელი და სხვ. ასეთივე ბაზარი იყო ხონში და ჩხარში. საჩხერისა და ონის ბაზრებზე ჩამოდოდნენ რაჭველები, ოსები და ლეჩხუმელები. ამ ბაზრებზე იყიდებოდა პირველი მოხმარების საგნები როგორც ადგილობრივი, ისე უცხოური წარმოშობისა.

გურიაში, დაბა დეაბზუში, ეწყობოდა ყოველკვირეული ბაზრობა. აქ სავაჭროდ მოდიოდნენ იმერლები, გურულები და ქობულეთში მცხოვრები თურქები. გურიისავე სოფლებში ნაგომარში, ლანჩხუთში, ვანის ქედსა და ჯუმათში წელიწადში ერთხელ იმართებოდა იარმარკები.

სამეგრელოში სოფ. მურში გამართულ იარმარკაზე თავს იყრიდნენ მეგრელები სამეგრელოს ყველა კუთხიდან, იმერლები, ოსები და სვანები. მურში ვაჭრობდნენ აბრეშუმის, ბამბისა და შალის ადგილობრივი ნაწარმით: სპილენძის, რკინის, თიხისა და ხის ჭურჭლით; მარცვლეულით, სიმინდითა და ღომით; ცხენებით, მსხვილფეხა და წვრილფეხა რქოსანი საქონლით და სხვ. ასევე ერთკვირიანი იარმარკა იმართებოდა სენაკში, სადაც, მეგრელების გარდა, სავაჭროდ მიდიოდნენ იმერლები, გურულები, აფხაზები და სვანები. აქ უმთავრესად ცხენებითა და რქოსანი საქონლით ვაჭრობდნენ. იარმარკის გარდა სენაკში იმართებოდა ყოველკვირეული ბაზრობაც. მარანსა და ლაილაშში მუდმივი ყოველკვირეული ვაჭრობა წარმოებდა ადგილობრივი და უცხოური საქონლით და სხვ.¹

უნდა აღინიშნოს, რომ საიარმარკო ვაჭრობის ფორმა საქართველოში მაინცდამაინც არ ყოფილა გავრცელებული. 1832 წელს თბილისის სამოქალაქო გუბერნატორი საშინაო საქმეთა მინისტრს აცნობებდა, რომ საქართველოში არ არსებობს არც ხელისუფლების მიერ და არც ადამიანთ

¹ АФАК, VIII, № 101, გვ. 182—186.



მეკოთნეები.

დაწესებული იარმარკები. მართალია, საქართველოს რუსეთთან შეერთების შემდეგ, ხელისუფლების მიერ როგორც აღმოსავლეთ, ისე დასავლეთ საქართველოში რამდენიმე იარმარკა იყო დაწესებული, მაგრამ მათი საქონელბრუნვა საკმაოდ უმნიშვნელოდ გამოიყურებოდა. 60-იანი წლების დასაწყისისათვისაც კი დასავლეთ საქართველოს იარმარკების საქონელბრუნვა 205 166 მანეთს არ აღემატებოდა, აღმოსავლეთ საქართველოსი კი მხოლოდ 48 910 მანეთს უდრიდა¹. რა თქმა უნდა, თუ არ გავითვალისწინებთ საქართველოს ქალაქებში, დაბეზსა და სოფლებში მოქმედ ყოველკვირეულ და ყოველდღიურ ბაზრებს და საქართველოს საშინაო ვაჭრობაზე მხოლოდ საიარმარკო ვაჭრობის საქონელბრუნვის მიხედვით ვიმსჯელებთ, როგორც ამას უმთავრესად გუბერნატორები აკეთებდნენ, მაშინ საქართველოს საშინაო ვაჭრობის შესახებ ყოველად მცდარი შეხედულება შეგვექმნება.

საქართველოს საშინაო ვაჭრობის საგანს უმთავრესად სასოფლო-სამეურნეო პროდუქცია და შინამრეწველური საქონელი წარმოადგენდა. როგორც აღვნიშნავდით, 30—40-იანი წლებიდან სოფლის მეურნეობის თითქმის ყველა დარგს — მარცვლეულის მეურნეობას, მეღვინეობას, მესაქონლეობას, მებაბრეშუმეობას, მეთამბაქოეობას, მეხილეობა-მეზოსტენეობას

¹ ს. ციცი, ფ. 17, საქ. 8954 — ბ. ფურც. 19, 60, 113—116.

და სხვ.—მეტ-ნაკლებად სასაქონლო ხასიათი ჰქონდა და სპეციალურად წარმოებდა პროდუქტების დამზადება საბაზროდ. 1845 წელს საქართველო-იმერეთის გუბერნიის (ერევნის, ნახჭევანის, ალექსანდროპოლის და ულიზავეტპოლის მაზრების გამოკლებით) საშინაო ბაზარზე გამოტანილი და გაყიდული იყო 1 763 450 მანეთის სოფლის მეურნეობისა და შინამრეწველობის პროდუქტია. აქედან 540 617 მანეთისა იყო მარცვლეული და ბოსტნეული, 956 976 მანეთის — ღვინო და აბრეშუმი, 232 672 მანეთის — რქოსანი საქონელი და მესაქონლეობის პროდუქტები და 3 185 მანეთის — თაფლი და ცვილი¹. იმავე წელს ადგილობრივი ხელოსნური და „მანუფაქტურული“ ნაწარმი დაუმზადებიათ და გაუყიდიათ 227 837 მანეთისა². 1858 წელს კი სიღნაღის მაზრის უფროსის ცნობით, მხოლოდ სიღნაღის მაზრაში გაყიდულა 3 583 350 მანეთის სოფლის მეურნეობის პროდუქტია, აქედან 290 000 მანეთისა იყო მარცვლეული, 1 350 000 მანეთის — ღვინო, 180 000 მანეთის — არაყი, 1 930 000 მანეთის — რქოსანი საქონელი და მესაქონლეობის პროდუქტია და სხვ. ადგილობრივი ხელოსნური და „მანუფაქტურული“ ნაწარმი ნარმა, აგური, თიხის და სპილენძის ჭურჭელი, ფესსაცმელი, ქუდები, თოკები და სხვ. გაყიდულია 108 900 მანეთისა³. სიღნაღის მაზრის სოფლის მეურნეობისა და შინამრეწველური ნაწარმი იყიდებოდა როგორც ადგილზე, ისე თელავისა და თბილისის მაზრებშიც. ეს მონაცემები, რა თქმა უნდა, გადაჭარბებულია, მაგრამ მაინც საყურადღებოა და ნატურალური მეურნეობის რღვევასა და საქართველოს საშინაო ვაჭრობის განვითარებაზე მიუთითებს.

საქართველოს როგორც საგარეო, ისე საშინაო ვაჭრობის ცენტრს ქ. თბილისი წარმოადგენდა. 50-იანი წლების ბოლოსა და 60-იანი წლების დასაწყისისათვის თბილისის ბაზრებზე — თათრის, სეიდ-აბადის, ავღანებისა და ერევნის მოედნებზე ყოველწლიურად შემდეგი თანხის სურსათ-სანოვაგე იყიდებოდა:

პუტის ფქვილი	400 000	ფუთი	240 000	მანეთიდან	320 000	მან.-მდე	ლირებულების
კახური ღვინო	500 000	ვედრო	500 000	მან.-დან	100 000	მან.-მდე	ლირებულებისა
სპირტი და არაყი	50 000	„	150 000	„	250 000	„	„
საქონლის ხორცი	300 000	ფუთამდე	450 000	მან.-დან—	540 000	მან.-მდე	„
თევზი და ხიზილალა	25 000	„	125 000	„	200 000	„	„
ზეითი	50 000	„	300 000	„	400 000	„	„
ერბო და კარაქი	40 000	„	240 000	„	320 000	„	„

¹ ЦГИА СССР, ф. 560, оп. 22, д. 112, л. 12—19.

² იქვე, ფ. 8—11.

³ სსცია, ფ. 26, ანაწ. 6, საქ. 119, ფურც. 52—53.

ბოსტნეული ხილი და რძე დაახლოებით	— 200 000 მან.-მდე
ქერი	150 000 ფუთამდე 450 000 მან.-მდე
თივა	350 000 50 000 „
შეშა	40 000 საყენი 600 000 „

თბილისის მოსახლეობა წლიურად დაახლოებით სულ 3¹/₂—5¹/₂ მილიონამდე ღირებულების სურსათ-სანოვაგეს მოიხმარდა. თბილისის ბაზრებზე სურსათ-სანოვაგე საქართველოს ყველა მაზრიდან შემოჰქონდათ. ამავე დროისათვის თბილისის საგარეო ვაჭრობის ბრუნვა 11 მილიონ მანეთს შეადგენდა.

1862 წლისათვის თბილისში 100 000 სული მცხოვრებიდან 3 000-მდე ვაჭარი იყო, აქედან 122 ცოტად თუ ბევრად მსხვილი ვაჭრის ფულადი კაპიტალი 1 988 200 მანეთს შეადგენდა¹.

მართალია, საქართველოს სხვა ქალაქების აღებ-მიცემობა, თბილისისას მასშტაბით დიდად ჩამოუყვარდებოდა, მაგრამ 40—50-იანი წლებისათვის მათი ვაჭრობაც საკმაოდ განვითარებული იყო.

ქ. გორში 50-იანი წლებისათვის ადგილობრივი მსხვილი ვაჭარი იყო 65. მათი საბრუნავი თანხა დაახლოებით 250 000 მანეთამდე აღწევდა. ევროპისა და თურქეთის ქალაქებთან ლაიპციგსა, ლონდონსა და კონსტანტინოპოლში სავაჭრო ოპერაციებს აწარმოებდა 10 კაცი, დაახლოებით 12 ვაჭარი მიდიოდა მოსკოვსა და ნიჟნი ნოვგოროდში, ხუთი ვაჭარი ვაჭრობდა ადგილობრივი საქონლით. მნიშვნელოვანი იყო ვაჭრობა სოფლის მეურნეობის პროდუქტებითაც. განსაკუთრებით ქ. გორსა და გორის მაზრაში ამ დროისათვის განვითარდა სავაჭრო მეხილეობა-მებოსტნეობა: გორის მაზრა ხილ-ბოსტნეულით ამარავებდა ქ. თბილისსა და გორს. როგორც ერთ-ერთ საბუთშია ნათქვამი, „მოსავლიან წლებში გორიდან თბილისისაკენ მიედინებოდა ხილით დატვირთული ურმების მთელი ქარავნები“². ასევე ბოსტნეული, კომბოსტო, კარტოფილი, ხახვი და სხვ. დიდი რაოდენობით იყიდებოდა ქ. გორსა და თბილისში. თელავში ამავე ხანებისათვის 250-მდე ვაჭარი იყო, რომლებიც აღებ-მიცემობას ეწეოდნენ როგორც ადგილობრივი, ისე შემოტანილი საქონლით. 1845 წელს თელავის მაზრის უფროსი წერდა, რომ „სოფლის მეურნეობის პროდუქტებით ვაჭრობა, შეიძლება ითქვას, საკმაოდ ფართოდაა განვითარებული. სხვა კლასის წარმომადგენლებზე რომ არაფერი ვთქვათ, ყველა გლეხს მოეპოვება ზედმეტი პროდუქცია, რომლის გაყიდვითაც იგი იკმაყოფილებს სხვა მოთხოვნილებებს“³. კიდევ უფრო განვითარებული იყო საშინაო ვაჭ-

¹ Документы по истории Грузии, изд Ш. Чхетия, II, 1960, გვ. 65.

² იქვე, გვ. 880.

³ სცია, ფ. 16, საქ. 8888, ფურც. 56.

რობა სიღნაღში. „ვაჭრობა სიღნაღის მაზრაში; — ვკითხულობთ სიღნაღის მაზრის უფროსის 1845 წლის ანგარიშში, — შეიძლება ითქვას, რომ დიდად აყვავებულა; აქ დიდი რაოდენობით იყიდება ხორბალი, ქერი, ღვინო. არაყი და სხვა პროდუქტები“¹. სასოფლო-სამეურნეო პროდუქტების გაყიდვით მიღებული თანხა ქ. სიღნაღში 491 961 მანეთს აღწევდა.

სიღნაღში ამ დროისათვის 239 ადგილობრივი და 20 უცხოელი ვაჭარი იყო. ისინი ვაჭრობდნენ უმთავრესად რუსეთიდან ჩამოტანილი და ადგილობრივი საქონლით; მათი საბრუნავი თანხა 400 000 მანეთს უდრიდა.

დაახლოებით ასეთივე სურათი იყო აღ. და დას. საქართველოს სხვა ქალაქებშიც.

ყოველივე ზემოთქმულის შემდეგ შეგვიძლია დავასკვნათ, რომ 40—50-იანი წლებისათვის ნატურალური მეურნეობის რღვევა სწრაფი ტემპით მიმდინარეობდა და საქართველოს სხვადასხვა რაიონს შორის მჭიდრო სააღმავლობელო ურთიერთობა იყო დამყარებული.


§ 4. საქართველოს ქალაქების ზრდა XIX ს-ის რეფორმამდე ხანაში. ცვლილებები ქალაქში მცხოვრებ მოსახლეთა სოციალურ მდგომარეობაში

XIX ს-ის პირველ ნახევარში საქართველოს სოციალ-ეკონომიურ ცხოვრებაში მომხდარი ძვრები თავის გამოხატულებას ქალაქების განვითარებაშიც პოულობს, თუმცა ეს განვითარება თავდაპირველად ხდებოდა თითქმის მთლიანად იმ მემკვიდრეობის საფუძველზე; რომელიც ახალმა ხანამ მიიღო წინაპროინდელი (XVII—XVIII სს.) საქალაქო ცხოვრებისაგან. არსებითად XIX ს-ის პირველი ნახევრის საქართველოს ქალაქების განვითარება იყო ფეოდალური ხანის საქალაქო ცხოვრების ტრადიციების გაგრძელება, ცხადია, მასში მომხდარი მნიშვნელოვანი ცვლილებებით და სიახლეებით.

დამახასიათებელია, მაგალითად, ის, რომ XIX ს-ის პირველ ნახევარში საქართველოში არ წარმოქმნილა არც ერთი ახალი ქალაქი, არც ცოტად თუ ბევრად მნიშვნელოვანი სავაჭრო-სახელოსნო დაბა. მაგრამ ეს იმას

¹ სსცია, ფ. 16, საქ. 8888, ფურც. 56.

² XIX ს-ის რეფორმამდელი ხანის საქართველოს ქალაქების სოციალური ისტორია საერთოდ სამეცნიერო ლიტერატურაში სუსტად არის გაშუქებული. მხოლოდ თბილისზე არსებობს რამდენიმე სპეციალური გამოკვლევა. მათ შორის აღსანიშნავია; შ. ჩხეტიანი, ტფილისის ისტორიისათვის, მის. საქართ. დაკავ. ისტ., ნაკვ. 1, 1938; მისივე, Тбилиси в XIX столетии, 1942; გ. ჯამბურია, თბილისის მოსახლეობა XIX საუკუნის რეფორმამდე ხანაში, ივ. ჯავახიშვილის სახ. ისტორიის ინსტ. შრ. ტ., III, 1958; ალ. ბენდიანიშვილი, საქალაქო თვითმმართველობის წინამორბედი დაწესებულებანი თბილისში, ივ. ჯავახიშვილის სახ. ისტორიის ინსტ. შრ., ტ. IV, ნაკვ. 2, 1959; თ. ბერიაშვილი, რეფორმამდელი ხანის საქართველოს ქალაქების სოციალური ფერები (მოქალაქე), თბ., 1964.



თბილისი. ფეთხაინის ქუჩა.

ო ნიშნავს. რომ ამ დროს აქ იგრძნობოდა ქალაქების, თუ ასეთი დაბა-
სოფლების ნაკლებობა. პირიქით, მათი რიცხვი მცირე არ იყო, მაგრამ,
თითქმის ყველა ადრევე იყო აღმოცენებული. მხედველობაში გვაქვს სა-
გუბერნიო ქალაქები — თბილისი, ქუთაისი; სამაზრო ცენტრები —
გორი, სიღნაღი, თელავი, ახალქალაქი, ახალციხე; ე. წ. „მცირე ქალაქები“,
რომელნიც რუსული ხელისუფლების დამყარების შემდეგ აგრეთვე სამაზ-
რო ცენტრებად გადაიქცნენ — ზუგდიდი, ოზურგეთი, სოხუმი, ონი; სხვა
„მცირე ქალაქები“: ალი, სურამი, ახალგორი, ცხინვალი, ხონი, რუხი და
სხვ.¹; ზღვისპირა პუნქტები — ყულევი და ანაკლია.

XIX ს-ის პირველ ნახევარში საქართველოს ქალაქებს შემორჩათ წინა
ხანისათვის დამახასიათებელი არაერთი არსებითი ნიშანი. უპირველეს
ყოვლისა, ეს იყო ამქრული წყობილება, ყველაზე უფრო სრულყოფილად
წარმოდგენილი თბილისში, და ფეოდალური ხანის წოდებანი: ყმა ვაჭარ-
ხელოსნები, ქალაქის ვაჭრულ-ხელოსნური მოსახლეობის პრივილეგიური
ფენა — „მოქალაქენი“ და თავად-აზნაურთა წარმომადგენლები — ქალა-
ქის არისტოკრატია.

როგორც წინა ხანაში, ასევე XIX ს-ის პირველ ნახევარში, საქართ-
ველოს ქალაქები წარმოადგენდნენ ვაჭრობისა და უპირატესად წვრილი
საქონლური წარმოების ცენტრებს (ერთგვარი გამონაკლისი იყო თბი-
ლისი, სადაც ვხვდებით შედარებით უფრო მსხვილ საწარმოებსაც).

რაში მდგომარეობს ის სიახლე, რომელიც ახასიათებს XIX ს-ის პირ-
ველი ნახევრის საქართველოს ქალაქებს?

უპირველეს ყოვლისა, ეს გამოიხატებოდა თვით წვრილი საქონლური
წარმოების ხასიათის შეცვლაში. ცნობილია, რომ საქონლური წარმო-
ება არსებობდა ადრეც და მომსახურებას უწევდა ფეოდალურ საზოგა-
დობასაც. მაგრამ, მაშინ იგი შეზღუდული იყო ფეოდალური წესწყობი-
ლებით და, კერძოდ, ამქრული რეგლამენტაციით, რომელიც მიზნად ისა-
ხავდა წარმოების სტაბილიზაციას, ამქრის მონოპოლიისა და ოსტატებს
შორის ქონებრივი თუ სოციალური წონასწორობის შენარჩუნებას.

უკვე ითქვა, რომ XIX ს-ის რეფორმამდელი ხანის საქართველოს ქა-
ლაქებში იგრძნობოდა ამქრული წყობილების რღვევის ინტენსიური პრო-
ცესი.

წვრილ საქონლურ წარმოებაში ამქრულ-ფეოდალურ შეზღუდვათა
გადალახვა, სახელოსნოთა გამსხვილების ტენდენცია, დაქირავებული შრო-
მის სულ უფრო მეტად გამოყენება, ამქრის გარეშე სახელოსნოთა ზრდა
და თავისუფალი კონკურენციის შემოჭრა, როგორც კაპიტალისტური წარ-
მოების სტიმული, — ყოველივე ეს მეტყველებდა იმაზე, რომ XIX ს-ის

¹ აღნიშნული ქალაქების თუ „მცირე ქალაქების“ მნიშვნელობის შესახებ ფეოდალურ
ხანაში იხ. III. А. Месхия, Города и городской строй феодальной Грузии (XVII-XVIII
вв.), Тб., 1959, გვ. 117, 124.

რეფორმამდელი ხანის საქართველოს ქალაქებში წამყვან როლს თამაშობდა თვისებრივად ახალი წვრილი საქონლური წარმოება, რომელშიც სულ უფრო და უფრო ღრმად იჭრებოდა ახალი, კაპიტალისტური ურთიერთობანი; მარტივი საქონლური წარმოება ადგილს უთმობდა წვრილ კაპიტალისტურს, რაც ძირითადად განსაზღვრავდა კიდევ იმდროინდელი ქალაქების სამრეწველო სახეს. თუმცა, ამავე დროს, საქართველოს ქალაქებში, უპირატესად თბილისში, ვითარდება შედარებით მსხვილი მრეწველობაც (მანუფაქტურა, ზოგ შემთხვევაში მანქანური წარმოების ელემენტებით)¹.

არსებითი მომენტი რეფორმამდელი საქართველოს ქალაქების სამრეწველო განვითარებაში იყო თითქმის მთლიანად ნებით დაქირავებული შრომის გამოყენება როგორც წვრილ წარმოებაში, ასევე შედარებით მსხვილ საწარმოებში (კაპიტალისტური მარტივი კოოპერაცია, მანუფაქტურა)².

XIX საუკუნის პირველი ნახევრის საქართველოს ქალაქების განვითარებაზე დაკვირვება გვიჩვენებს, რომ ამ ხანაში შეიმჩნევა ქალაქების როლის და მნიშვნელობის ზრდა ქვეყნის სამეურნეო ცხოვრებაში. თუკი ადრე — XVII—XVIII სს-ის ნატურალური მეურნეობის ბატონობის პირობებში, დაპირისპირება სოფელსა და ქალაქს შორის ნაკლებად იგრძნობოდა და ქალაქების სამეურნეო ფუნქციები შემოიფარგლებოდა შედარებით შეზღუდული მასშტაბის საშუამავლო ვაჭრობით და წვრილ-საქონლური (უპირატესად ხელოსნური) წარმოების განვითარებით, რომელიც მომსახურებას უწევდა ვიწრო ბაზარს (გარდა თბილისისა, რომელიც როგორც საქართველოს, ასევე მეზობელი მხარეების მნიშვნელოვანი სავაჭრო-სახელოსნო ცენტრი იყო), XIX ს-ის პირველ ნახევარში, განსაკუთრებით კი 40 — 50-იანი წლებიდან, ნატურალური მეურნეობის რღვევის ინტენსიურ პროცესთან დაკავშირებით ხდება ქალაქისა და სოფლის დაპირისპირების გაღრმავება, ქალაქების უფრო აქტიური ზემოქმედება სოფელზე. ქალაქების სამრეწველო და სავაჭრო პოტენციალის გადიდება. მათი, როგორც სამრეწველო ხელოსნური ნაწარმის მიმწოდებლისა და სასოფლო-სამეურნეო პროდუქციის მომხმარებლის როლის განუხრელი ზრდა, წარმოადგენდა ქვეყნის შიგნით შრომის საზოგადოებრივი დანაწილების გაღრმავებისა და შინაური ბაზრის შექმნის გამოხატულებას.

¹ საყურადღებოა, რომ XIX ს-ის პირველ ნახევარში გარდა მსხვილი სამრეწველო ცენტრებისა წვრილი საქონლური წარმოება მრეწველობის წამყვან ფორმას წარმოადგენდა რუსეთის ქალაქებშიც. იხ. П. Г. Ры н д з ю н с к и й, Городское гражданство дореформенной России, М., 1958, გვ. 210, 253, 274.

² იხ. ე. ხოშტარია, მრეწველობის განვითარება საქართველოში XIX ს-ის 30-60-იან წლებში, ივ. ჯავახიშვილის სახელობის ისტორიის ინსტიტუტის შრომები, ტ. III. თბ., 1958 წ.

ამავე პროცესის ერთ-ერთი არსებითი მხარე იყო ქალაქების სავაჭრო-სამრეწველო მოსახლეობის ზრდა სამიწათმოქმედო მოსახლეობის ხარჯზე. XIX ს-ის პირველ ნახევარში ქალაქები ხდება სოფლიდან გამოდევნილი მოსახლეობის თავშესაფარად. იქ მზარდი მოთხოვნილება არსებობდა წარმოების საშუალებებისმოკლებულ პირთა თავისუფალ შრომაზე.

აღმოსავლეთ საქართველოს ქალაქების მცხოვრებთა ზრდაზე 60-იანი წლების შუახანებამდე წარმოდგენას გვიქმნის ქვემოთ მოტანილი ცხრილი, სადაც გათვალისწინებულია ორივე სქესის მკვიდრი მოსახლეობა¹.

ც ხ რ ი ლ ი 6

ქალაქების დასახელება	1821 წ.	1835 წ.	1847 წ.	1865 წ.
თბილისი	15 374	25 290	29 853	67 770
გორი	2 322	3 000	3 763	5 054
თელავი	1 677	2 680	4 000	7 300
სიღნაღი	1 997	3 500	4 801	9 687
ღუშეთი	1 143	1 700	1 800	2 525
	22 513	36 170	44 217	92 336

1865 წლამდე ასეთივე სრული ცნობები არა გვაქვს ახალციხის, ახალქალაქისა და აგრეთვე დასავლეთ საქართველოს ქალაქების მოსახლეობაზე. 1865 წლისათვის კი ახალციხეში ითვლებოდა 11 617 სული, ახალქალაქში — 2260, ქუთაისში 11807, სოხუმში — 1612, ფოთში — 1309 სული². საქართველოს ქალაქებში 1865 წლისათვის იყო სულ 120 941 მცხოვრები.

სათანადო ცნობების უქონლობის გამო მოკლებული ვართ შესაძლებლობას ვიმსჯელოთ მთლიანად საქართველოს შესახებ, მაგრამ ჩვენ ხელთ

¹ 1821 წლის მონაცემები იხ. სსცია, ფ. 16, საქ. 2725, ფურც. 121—122; 1835 წლის ცნობები—О. Евецкий, Статистическое описание Зак. края, СПб, 1835. 1847 წლის მონაცემები—Сборник материалов для описания Тифл., губ., т. I, вып. I. Тиф., 1870, გვ. 64; აღნიშნულ კრებულში თელავისა და ღუშეთის მოსახლეობა არ არის გამოყოფილი მათი მაზრების მოსახლეობიდან, რის გამოც ამ ქალაქების მცხოვრებთა რაოდენობა ცხრილში აღებულია პირობითად, სხვა წყაროებზე დაყრდნობით. 1865 წლის მონაცემები იხ. Сборник статистических сведений о Кавказе, т. I, отд. I, часть IV, გვ. 44, отд. 2, გვ. 62.

² Сборн. статист. свед. о Кавказе, т. I. отд. 2, გვ. 63. ცნობები ქუთაისის მოსახლეობის შესახებ XIX ს. პირველ ნახევარში მეტად წინააღმდეგობრივია: 1825 წლისათვის აქ მითითებულია 3367 სული, 1856 წლისათვის 3856 სული (ЦГИА СССР, ф. 1288, оп. 25, дело 34, л. 57). სხვა ცნობებით 1835 წელს აქ იყო 2000 სული (О. Е в е ц к и й, статистич. описание), ხოლო 1844 წელს 2188 სული. (სსცია, ფ. 16, საქ. 8155).

არსებული მონაცემებით აღმოსავლეთ საქართველოს მაგალითზე თვალნათლივ დასტურდება XIX ს-ის რეფორმამდელ ხანაში ქალაქების სავაჭრო-სამრეწველო მოსახლეობის გაცილებით უფრო სწრაფი ზრდა შედარებით სამიწათმოქმედო მოსახლეობასთან. კერძოდ, 1821 წელს აღმოსავლეთ საქართველოს (თბილისის, გორის, დუშეთის, თელავის, სიღნაღის მაზრები, ბორჩალოს, თუშეთის და ფშავ-ხევსურეთის დისტანციები) მოსახლეობა შეადგენდა 185 600 სულს, აქედან ქალაქებისა (თბილისი, გორი, დუშეთი, თელავი, სიღნაღი) — 22 500 სულს¹, ანუ მთელი მოსახლეობის 12,2%-ს. 1865 წლისათვის აღმოსავლეთ საქართველოს მოსახლეობა (იმავე ფარგლებში) გაიზარდა 489 100 სულამდე, ე. ი. 163%-ით, ხოლო ქალაქებისა — 92 360 სულამდე, ე. ი. 310%-ით². ესე იგი ქალაქების მოსახლეობა იზრდება მთელ მოსახლეობაზე თითქმის ორჯერ უფრო სწრაფად. 1865 წლისათვის აღმოსავლეთ საქართველოს ქალაქების მცხოვრებნი შეადგენდნენ მთელი მოსახლეობის 18,8%-ს³.

აღმოსავლეთ საქართველოს მოსახლეობის თვალსაზრისით ზრდა საერთოდ, და ქალაქებისა, კერძოდ, ნაწილობრივ უნდა აიხსნას ქვეყანაში მშვიდობიანობის დამყარებით.

ქუთაისის გუბერნიაში, რომელსაც 60-იან წლებში მიეკუთვნებოდა ახალციხის მაზრაც (ახალქალაქის ჩათვლით), 1865 წლისათვის მთელი მოსახლეობა შეადგენდა 700 ათასამდე სულს⁴, ხოლო ქალაქებისა (ქუთაისი, ახალციხე, სოხუმი, ფოთი) — 30 ათასამდე სულს, ე. ი. 4,3%-ს.

მთლიანად საქართველოს მოსახლეობა 60-იანი წლების შუა ხანებში შეადგენდა 1 190 ათასამდე სულს, ქალაქებისა კი — 121 ათასს, ე. ი. მთელი მოსახლეობის 10,1%-ს. მარტო თბილისის მკვიდრი მოსახლეობა (67 ათასი სული) მთელი საქართველოს მოსახლეობის 5,6%-ს უდრიდა.


საქართველოს ქალაქების დიდი ნაწილი არ გამოირჩეოდა მნიშვნელოვანი მასშტაბებით. აქ 50 ათასზე მეტი მცხოვრები იყო მხოლოდ ერთ ქალაქში (თბილისი), 10 ათასზე ოდნავ მეტი — 2 ქალაქში (ქუთაისი, ახალციხე), 10 ათასამდე მცხოვრები — 3 ქალაქში (გორი, სიღნაღი, თე-

¹ სსცია, ფ. 16, საქ. 2725, ფურც. 121—122.

² Сборник статистич. сведений о Кавказе, I, отд. 2, ч. IV, გვ. 44. აღმოსავლეთ საქართველოში აქ არ არის შეტანილი ახალციხე და ახალქალაქი, აღმინისტრაციულად ისინი ამ დროს ქუთაისის გუბერნიას განეკუთვნებოდნენ.

³ ოფიციალური ცნობით თბილისის გუბერნიის ქალაქების მცხოვრებნი ელიზავეტპოლის ჩათვლით 1865 წელს შეადგენდნენ მთელი მოსახლეობის 17%-ს., Сборник статистич. сведений о Кавказе, I, ч. IV, გვ. 45.

⁴ აქედან ახალციხის მაზრაში 76 800 სული, სოხუმის სამხედრო განყოფილებაში 79 ათასი სული, ქუთაისის გუბერნიის დანარჩენ მაზრებში 454 ათასი სული (Сборник статист. свед. о Кавказе, т. I, отд. 2, გვ. 11—12).



თბილისი. სახლი აბას-აბაღის მოედანზე.

ლავი). 4 შედარებით მცირე ქალაქში 1000-დან 3 ათასამდე კაცი ცხოვრობდა (სოხუმი, ფოთი, ახალქალაქი, ღუშეთი), მაგრამ ასეთი ვითარება რეფორმამდელი პერიოდის საქალაქო ცხოვრების სუსტი განვითარების მაჩვენებელი არ იყო¹.

¹ აღსანიშნავია, რომ 1863 წლისათვის ევროპულ რუსეთში მსხვილი ქალაქების (50 ათასზე მეტი მცხოვრებით) მოსახლეობა შეადგენდა მთელი მოსახლეობის 2,7%-ს, ხოლო ყველა ქალაქისა—9,9%-ს (ვ. ი. ლენინი, თხზ., ტ. 3, გვ. 660).

თუ ვის ხარჯზე იზრდებოდა ქალაქების მოსახლეობა, პასუხს გვაძლევს 50-იანი წლების მიწურულსა და 60-იანი წლების დასაწყისში ქალაქების ბეგარავალდებულო მოსახლეობის კამერალური აღწერის დავთრები. თბილისის 1866 წლის კამერალური აღწერის მასალების მიხედვით¹, 1850—1860 წლებში აქ მოსული და სახაზინო პალატის მიერ ქალაქის მცხოვრებლებად აღიარებული მოსახლეობიდან, საკუთრივ აღმოსავლეთ საქართველოს სოფლებიდან მოსულა 1 006 კომლი (მათ შორის 171 კომლი ყმობიდან განთავისუფლებული ქართველი), ქალაქებიდან კი — 120 კომლი. დასავლეთ საქართველოდან გადმოსული იყო 32 კომლი, ამიერკავკასიის სხვა ადგილებიდან — 192, რუსეთის გუბერნიებიდან — 425 (მათ შორის ყმობიდან განთავისუფლებულნი) და ბოლოს სპარსეთიდან და თურქეთიდან — 30 კომლი.

როგორც ვხედავთ, თბილისში 1850—1860 წლებში მარტო აღმოსავლეთ საქართველოს სოფლებიდან მოსულნი შეადგენდნენ ათას კომლზე მეტს, ხოლო სხვა ადგილებიდან (ამიერკავკასიის სხვა კუთხეებიდან, რუსეთიდან, სპარსეთიდან და თურქეთიდან) — 650-მდე კომლს. ამრიგად, თბილისის მოსახლეობა უფრო მეტად აღმოსავლეთ საქართველოს სოფლების მოსახლეობის ხარჯზე იზრდებოდა. თუ გავითვალისწინებთ აღმოსავლეთ საქართველოს სხვა ქალაქებში მოსულ დაბეგრულ მოსახლეობასაც, მაშინ 1850—1860 წლებში სოფლებიდან ქალაქში ახლად ჩამოსახლებულთა შეფარდება ქალაქების მთელ მოსახლეობასთან, შემდეგნაირად წარმოგვიდგება (იხ. ცხრ. 7)².

ც ხ რ ი ლ ი 7

ქალაქების დასახელება	მათ შორის						სულ კომლების რაოდენ. ქალაქებში	1850—60 წ.-ში მოსულთა შეფ. მთელ მოსახლეთ. ში%
	სულ მოსული კომლები	სახაზინო გლეხები	ყმობიდან განთავისუფ.	საბატონო გლეხები	საეკლესიო გლეხები	სხვა		
თბილისი	1006	600	171	138	97	10115	10	
გორი	186	166	9	3	8	943	19,7	
თელავი	168	105	59	1	3	1199	14	
სიღნაღი	856	428	412	5	11	1654	51,3	
უქცეთი	45	32	6	6	1	391	11,4	
	2261	1331	657	153	120	14310	15,3	

¹ სსცია, ფ. 255, საქ. 390, 392—398.

² თბილისის გარდა სხვა ქალაქების მასალები აღებულია შესაბამისი კამერალური აღწერის დავთრებიდან: გორის—სსცია, ფ. 255, საქ. 245, თელავის—საქ. 198, სიღნაღისა—საქ. 217, დუშეთისა—საქ. 221.

ზემომოტანილი მონაცემები ითვალისწინებს ქალაქებში მოსული მოსახლეობის მხოლოდ იმ ნაწილს, რომელიც სახაზინო პალატის მიერ მიწერილ იქნა ქალაქებზე. მაგრამ ქალაქებში, და განსაკუთრებით კი თბილისში, დიდი რაოდენობით იყვნენ ისეთებიც, რომელთაც ადმინისტრაცია არ სცნობდა ქალაქების მცხოვრებლებად¹.

როგორც ცნობილია, თბილისში კამერალური აღწერით გათვალისწინებულ და აგრეთვე დათხოვნის ფურცლებითა თუ „პასპორტებით“ მოსული მოსახლეობის გარდა, რომელიც საერთო ჯამში, დაუბეგრავ წოდებებთან ერთად (თავადაზნაურობა, საპატიო მოქალაქენი და სხვ.), 60-იანი წლების შუა ხანებში დაახლოებით 65—67 ათას სულს შეადგენდა, ყოველგვარი ნებართვის გარეშე მოდიოდა დიდძალი მუშახელი. ოფიციალური ცნობით, 1863 წელს ამიერკავკასიის სხვადასხვა მხარიდან და სპარსეთიდან ზაფხულის სეზონურ სამუშაოებზე 20 ათასამდე კაცი მოსულა. დედაქალაქის არამკვიდრი მოსახლეობა კი სულ 50 ათას კაცამდე აღწევდა, ე. ი. მთლიანად მცხოვრებთა რიცხვი 100 ათას სულს აღემატებოდა².

საქართველოს ქალაქებში სოფლიდან მოსულთა საქმიანობის შესახებ წარმოდგენა შეიძლება ვიქონიოთ ისევ კამერალურ აღწერათა მონაცემების მიხედვით. კერძოდ, 50-იანი წლების მანძილზე ქალაქებში მოსულთა დანაწილება საქმიანობის მიხედვით შემდეგნაირად წარმოგვიდგება (იხ. ცხრ. 8)³.

ცხრილში ასახულია სოფლიდან მოსული და კამერალურ აღწერებში მოხვედრილი მოსახლეობა. ამას გარდა, ქალაქებში დიდი რაოდენობით მოდიოდნენ სეზონური მუშები და სხვა მშრომელნი. ამ მხრივ საინტერესოა 30-იანი წლების დამკვირვებლის ერთი ცნობა, რომელშიც ნათქვამია შემდეგი: „ხელოსანთაგან ბევრნი მოსულნი არიან სხვა ადგილებიდან, მაგრამ მუშაობენ აქ (თბილისში — ავტ.) მუდმივად, რადგან არსად სხვაგან არ შეუძლიათ იშოვონ სამუშაო ესოდენ მაღალი ხელფასით, როგორც თბილისში. ქალაქში დიდი რაოდენობით მყოფი იმერლები ასრულებენ

¹ მაგალითად, თბილისის 1863 წლის კამერალური აღწერის ჩამტარებელმა კომისიამ მიიჩნია, რომ ამიერკავკასიის სოფლებიდან და ქალაქებიდან (უპირატესად საქართველოდან) მოსული 916 კომლი უნდა დაბრუნებულიყო მათ საცხოვრებელ ადგილზე (მათ შორის 246 კომლი სამეგრელოში). იგივე გ დაწვევტილება იქნა მიღებული რუსეთის გუბერნიების მცხოვრებ 270 კომლის შესახებაც.

ამავე დროს თბილისში იყო აღრიცხული 3608 კომლი, რომელნიც გატარებულნი იყვნენ კამერალურ აღწერებში სოფლად. მათ საცხოვრებელი ადგილების მიხედვით დაქონდათ სათანადო დათხოვნის ფურცლები ან სხვა საბუთები. ამ უკანასკნელთა დროებით ცხოვრება თბილისში კანონიერად ჩაითვალა და მათ მიმართ არავითარი ზომები არ ყოფილა მიღებული (მოტანილი მონაცემები აღებულია: სსცია, ფ. 255, საქ. 223, ფურც. 350—351).

² Сборник статист. свед. о Кавказе, отд. I, ч. IV, გვ. 84.

³ თბილისში მოსულთაგან გათვალისწინებულია კომლის მეთაურის, ხოლო სხვა ქალაქებში ყველა შრომისუნარიანი მამაკაცის საქმიანობა.

ქალაქების დასახელება	ვაჭრები	ხელოსნები	შავი მუშები	სხვა სახის შრომით საქმიანობაში ჩაბმულნი	სხვანი	ს უ ლ
თბილისი	221	409	112	221	43	1006
გორი	27	11	107	—	41	186
თელავი	36	50	163	—	24	273
სიღნაღი	114	169	323	—	14	620
ღუშეუი	12	7	22	—	27	68
	410	646	727	221	125	2153

ყოველგვარ შავ სამუშაოს: ისინი არიან ტვირთის და წყლის მზიდებები, ბალ-ბოსტნებში მომუშავენი და სხვ. მათი რიცხვის განსაზღვრა შეუძლებელია, რადგან ისინი მოდიან და მიდიან ყოველგვარი ნებართვის გარეშე, რომელსაც დამქირავებლები მათ არ სთხოვენ. ეს ეხება ქალაქის სხვა შავ მუშებსაც¹.

XIX ს-ის შუა ხანებისათვის, თბილისში სავაჭრო-სამრეწველო საქმიანობის აღმავლობასთან დაკავშირებით, მოთხოვნილება მუშახელზე სულ უფრო და უფრო იზრდებოდა. 50-იანი წლებიდან აქ სპარსეთიდან ჩამოსულთა გარდა, დიდი რაოდენობით მოდიოდნენ რუსეთის შიდა გუბერნიების მცხოვრებნი², ნაწილობრივ დროებით სამუშაოზე, ნაწილობრივ მუდმივად საცხოვრებლად.

ამრიგად, სოფლებიდან ქალაქად წასული მოსახლეობა ძირითადად სავაჭრო-სამრეწველო საქმიანობაში ებმებოდა. მისი მნიშვნელოვანი ნაწილი სამუშაო ძალის გაყიდვით ირჩენდა თავს («чернорабочий», «просторабочий», «работник» და სხვ.). ეს ეხება ხელოსანთა იმ ნაწილსაც, რომელიც ვერ ახერხებდა დამოუკიდებელი წარმოების გახსნას და სხვის სახელოსნოში მუშაობდა. თბილისში ახალმოსულთა დიდი ნაწილი თავს ირჩენდა მხერხაობით, მეურმეობით, მზარეულობით, მეთევზეობით, მენახშირეობით და სხვ.

XIX ს-ის პირველ ნახევარში საქართველოს ქალაქებში მომხდარი ძვრები წოდებათა შიგნით მიმდინარე ცვლილებებშიც პოვებდა თავის გამოხატულებას. პირველ რიგში ეს შეიმჩნეოდა მწარმოებელთა ფენაში (ბეგარავალდებულ მოსახლეობაში), რომლის უმრავლესობა გლეხთა წოდებას განეკუთვნებოდა. „გლეხებში“ ჩვეულებრივ ოფიციალური სტატის-

¹ Обзорение российских владений за Кавказом, I, გვ. 214.

² Сборник статистических сведений о Кавказе, I, отд. I, ч. IV, გვ. 61—62.

ტიკა აღრიცხავდა ქალაქში მცხოვრებ ვაჭარ-ხელოსნებს, რომელნიც ადრე პირადი თავისუფლებით არ სარგებლობდნენ (სახაზინო, საბატონო და საეკლესიო გლეხები), ან, თუ მიაღწიეს პირად თავისუფლებას, მაინც თავის წოდებაში ითვლებოდნენ. ქალაქში მცხოვრები „გლეხები“ დიდი უმრავლესობა სახაზინო უწყებისა იყო. როგორც ცნობილია, სახაზინო გლეხობის დამოკიდებულება სახელმწიფოსაგან ფეოდალურ წესზე იყო დამყარებული, მაგრამ თუ სოფლად ამ დამოკიდებულებას აძლიერებდა საადგილმამულო ურთიერთობა, ქალაქებში ასეთ ვითარებას, როგორც წესი, ადგილი არ ჰქონდა. ეს განაპირობებდა სახაზინო „გლეხთა“ შედარებით თავისუფლებას ქალაქად¹. მათი დამოკიდებულება ხანინისაგან ფაქტიურად სახელმწიფო გადასახადის გადახდით ამოიწურებოდა, რაშიც უნდა ვხედავდეთ ფეოდალური დამოკიდებულების მხოლოდ ელემენტებს².

შემთხვევითი არ უნდა იყოს, რომ უფლებრივადაც სახაზინო გლეხები ქალაქებში განსხვავებულ ვითარებაში ექცეოდნენ. ასე მაგალითად, 1840 წელს შემოღებული თბილისის „სამოქალაქო მმართველობის“, კერძოდ, ქალაქის თავისა და ხმოსნების, არჩევნებში მოქალაქეებთან ერთად მონაწილეობდნენ როგორც ქალაქში ახალმოსული, ისე დანარჩენი სახაზინო გლეხები. თითოეული ამ „საზოგადოებიდან“ არჩეულ იქნა ორ-ორი ხმოსანი და ორ-ორი კანდიდატი³.

მართალია, ახალი დებულებით ხმოსნები უნდა აერჩიათ უძრავი ქონების მესაკუთრეებს, ვაჭრებს და ხელოსნებს, მაგრამ ფაქტიურად უძრავი საკუთრების პატრონებად გამოვიდნენ მთლიანად მოქალაქენი და ნაწილობრივ სახაზინო გლეხები როგორც ახალმოსულნი, ისე მკვიდრნი. ამ უკანასკნელთა შორის, ვაჭრების გარდა, იყვნენ ხელოსნებიც, რომელთა შესახებაც არ არის აღნიშნული, რომ ისინი უძრავ ქონებას ფლობდნენ.

როგორც ვხედავთ, 40-იანი წლების თბილისში ბურჟუაზიული ურთიერთობის სუსტი განვითარების გამო თვით დებულებაშიც ბოლომდე არ არის დაძლეული წოდებრიობის პრინციპი. ამან თავი იჩინა არჩევნების ჩატარებისას. ქალაქელთა ქონებრივი მდგომარეობა ჯერ კიდევ ვერ გახდა ძირითადი ამოსავალი არჩევნების დროს. საყურადღებოა, რომ არჩევ-

¹ შეადარე: П. Г. Рындзюнский, Городское гражданство..., გვ. 40—42.

² იქვე, გვ. 383.

³ სსცია, ფ. 16, საქ. 6144, ფურც. 15, 17—18, 80—81;

საყურადღებოა, რომ რუსეთში XIX ს-ის პირველ ნახევარში სახაზინო გლეხები ჩვეულებრივ არ მონაწილეობდნენ საქალაქო მმართველობის არჩევნებში. აქ ერთადერთი შემთხვევაა დადასტურებული, რომ ქ. ოსტროგოვსკში ვაჭრებთან (купцы) და მეშჩანებთან ერთად ხმოსნები აირჩიეს „ქალაქში მცხოვრებმა სახაზინო მოსახლეებმა“, რაც განიხილებოდა, როგორც არსებული წესიდან დაუშვებელი გადახვევა. იხ. П. Г. Рындзюнский, Городское гражданство..., გვ. 407.

ნებში საბატონო და საეკლესიო გლეხები არ იღებდნენ მონაწილეობას, საფიქრებელია, როგორც ქალაქის არათავისუფალი მოსახლეობა.

უფრო გვიან, კერძოდ, 50-იანი წლების მიწურულსა და 60-იანი წლების დასაწყისში შედგენილ ქალაქების კამერალურ აღწერილობათა დავთრებში სახაზინო გლეხები, როგორც ასეთნი, აღარ გვხვდებიან. ისინი განიხილებიან, როგორც „სახაზინო მოსახლენი ანუ ქალაქელნი“ («казенные обыватели или граждане»). ეს ეხება არა მარტო თბილისის, არამედ საქართველოს სხვა ქალაქების — ქუთაისის, სიღნაღის, გორის, თელავის და სხვ. — მცხოვრებლებსაც. „სახაზინო მოსახლენი ანუ ქალაქელნი“ ერთგვარად მოგვაგონებენ რუსეთის ქალაქების მეშჩანებს, რომელთა მდგომარეობა ბევრად წააგავდა სახაზინო გლეხთა მდგომარეობას!

50-იანი წლების მიწურულსა და 60-იანი წლების დასაწყისის ქალაქების „საგადასახადო ტაბელები“, რომელნიც შესაბამის კამერალურ აღწერათა მონაცემებს ემყარებოდნენ, შემდეგ სურათს წარმოგვიდგენენ ქალაქების დაბეგრული წოდებების კომპლობრივ შემადგენლობაზე (იხ. ცხრ. 9)².

თუ მხედველობაში მივიღებთ იმას, რომ სახელმწიფო გლეხები ფაქტი-

ც ხ რ ი ლ ი 9

ქალაქების დასახელება	მოქალაქენი	სახაზინო მოსახლენი ანუ ქალაქელნი	საეკლესიო ყმები	საბატონო ყმები	სულ კომლი
თბილისი	1195	8680	699	1162	11736
გორი	—	768	110	65	913
თელავი	—	1141	12	46	1199
სიღნაღი	—	1600	41	13	1654
ღუშეთი	—	358	8	25	391
ქუთაისი	243	304	144	33	724
ახალქალაქი	—	363	—	—	363
	1438	13214	1014	1344	17010

¹ იხ. П. Г. Рындзюнский, Городское гражданство..., გვ. 40—42.

² თბილისის გუბერნიის ქალაქების საგადასახადო ტაბელი იხ.: სსცია, ფ. 255, საქ. 223, ფურც. 109, ქუთაისის გუბერნიისა, საქ. 200, ფურც. 81 (აქ შეტანილია ქუთაისი და ახალქალაქი. ახალციხის მონაცემები დოკუმენტში არ არის). თბილისის 1860 წლის აღწერას ვერ მივაგენით, ამიტომ ვსარგებლობთ 1866 წლის ტაბელით (სსცია, ფ. 255, საქ. 223, ფურც. 399). მართალია, ეს ტაბელი მოგვიანო დროისაა, მაგრამ ჩვენ ხელთ გვაქვს თბილისის 1860 წლის კამერალური აღწერის ინსტრუქცია, სადაც ქალაქში მცხოვრებთა შემდეგი წოდებები აღნიშნული: მოქალაქენი, ქალაქელნი (граждане), საეკლესიო და საბატონო გლეხები (სსცია, ფ. 225, საქ. 223, ფურც. 176, 178). ასე, რომ სახაზინო გლეხები აქაც არ არიან მოხსენებული, იგულისხმებიან ქალაქელებში.

ურად თავისუფალნი იყვნენ, მაშინ თავისუფალ „ქალაქელთა“ ხვედრითი წონა ბეგარვალდებულ მოსახლეობაში გაცილებით მეტი იქნება, ვიდრე აქამდე ვარაუდობდნენ. კერძოდ, მოქალაქენი და „სახაზინო მცხოვრებნი, ანუ ქალაქელნი“ შეადგენდნენ ქალაქების მთელი დაბეგრული მოსახლეობის ხუთ მეექვსედზე მეტს. ამდენადვე, მთლიანად თბილისის თავისუფალი მოსახლეობა 60-იანი წლების შუა ხანებისათვის შეადგენდა არა 45-ან 55%-ს, როგორც ეს აქამდე იყო მიღებული¹, არამედ 88%-ს². რაც შეეხება ქალაქებში მცხოვრებ საბატონო და საეკლესიო გლეხებს, რომელთა დიდი ნაწილი სავაჭრო-სამრეწველო საქმიანობაში იყო ჩაბმული (საბატონო ყმების გარკვეული ნაწილი პირადად ემსახურებოდა მათ მებატონეებს), არც ისინი შეიძლება მივიჩნიოთ ძველი დროის წმინდა წყლის ყმურ მოსახლეობად, რადგან თანდათან სულ უფრო და უფრო იგრძნობოდა მათი ქალაქის „თავისუფალ“ მწარმოებლებთან ფაქტიური გათანაბრება და მათ მფლობელთაგან დამოკიდებულების შესუსტება. ამ ფენასაც ახასიათებდა იურიდიული თავისუფლებისაკენ გაძლიერებული ლტოლვა. თბილისის 1866 წლის კამერალური აღწერა უჩვენებს ასობით განთავისუფლებულებს («вольнотпущенные», «отсужденные»), რომლებიც გამოსულნი იყვნენ როგორც სოფლებიდან, ისე ქალაქის ყმური მოსახლეობიდან.

ოფიციალური სტატისტიკა 60-იანი წლების შუა ხანებშიც და შემდგომაც კვლავ ხმარობდა ტერმინს „სახაზინო გლეხი“, მაგრამ ეს იყო არა იმდენად ფაქტიური ვითარების ამსახველი, რამდენადაც ძველი ტრადიციის გაგრძელება. იმ დროისათვის ქალაქების ბურჟუაზიული განვითარების შედეგად ფაქტიურად სულ უფრო და უფრო იშლება ზღვარი წოდებათა შორის და განმსაზღვრელი როლი ენიჭება ქალაქელთა ქონებრივ მდგომარეობას, მათი საქმიანობის ხასიათს. ამ მხრივ „სახაზინო გლეხები“ სხვა ქალაქელთაგან უკვე არაფრით არ გამოირჩეოდნენ. ასე მაგალითად, თბილისის ამქრების 44 უსტაბაშიდან, რომელთაც ბრალად ედებოდათ 1865 წლის გამოსვლის წინააღმდეგ ზომების მიუღებლობა, 11 იყო სახაზინო გლეხი, 20 — ახალმოსული ქალაქელი, 5 — მოქალაქე, 1 — მეძველდრეობით საპატიო მოქალაქე, 2 — აზნაური, თუ აზნაურობის მაძიებელი, 1 — დროებით ვალდებული და 3 — საეკლესიო გლეხი³. როგორც ჩანს, ყველა კატეგორიის გლეხები მეტ-ნაკლებად აქტიურად მონაწილე-

¹ Ш. Ч х е т и я, Тбилиси в XIX столетии, 1942, გვ. 142 — 143; გ. ჯ ა მ ბ უ რ ი ა, თბილისის მოსახლეობა XIX ს-ის რეფორმამდე ზანაში, ისტორიის ინსტიტუტის შრ., ტ. III, 1958, გვ. 146—147 და სხვ.

² ქალაქის არათავისუფალ მოსახლეობაში ჩვენ ჩავთვალეთ საბატონო, საეკლესიო გლეხები და შინაყმები, სულ 8 ათასამდე სული, ანუ მთელი მოსახლეობის 12% (იხ. ДИГ, I, ვ. 2, 1960, გვ. 61).

³ ДИГ, I, ვ. 2, გვ. 154—156.

ობდა ქ. თბილისის წოდებრივ-პროფესიულ დაწესებულებათა საქმიანობაში, განსხვავება მათ შორის თითქმის აღარ არსებობდა.

სხვადასხვა კატეგორიის ქალაქელ „გლეხთა“ ნიველირებაზე ლაპარაკობს აგრეთვე მათი დაბეგვრის წესი.

სავადასახადო ტაბელების თანახმად, თბილისელი მოქალაქენი დაბეგრილნი იყვნენ კომლზე 9 მან. და 20 კაპიკით, ქუთაისის მოქალაქენი — 6 მანეთით. დანარჩენი წოდებანი — სახაზინო მოსახლენი ანუ ქალაქელნი, საეკლესიო და სახაზინო გლეხები — კომლზე 3 მანეთით. ქალაქელთა გადასახადები ზემოაღნიშნულით როდი ამოიწურებოდა. გარდა სახელმწიფო საკომლო გადასახადისა, რომელსაც მახტა ეწოდებოდა (3 მან. კომლზე), თბილისის მცხოვრებნი — ვაჭრები თუ ხელოსნები — იხდიდნენ გადასახადს ქალაქის სასარგებლოდ — მასრაფს 2 მან.-ის ოდენობით. განსაკუთრებული გამოსადები იყო დაწესებული ვაჭრობისა და ხელოსნობის ნებართვის მიღებისათვის¹.

არსებულ სავადასახადო სისტემაში მთელი სიძლიერით ელინდებოდა ფეოდალური წყობილების შემაფერხებელი ზეგავლენა საქალაქო ცხოვრების განვითარებაზე. ქალაქის დაბეგრილი მოსახლეობის — წვრილბურჟუაზიული ფენის დიდი უმრავლესობა გადასახადების სიმძიმის გამო მოკლებული იყო კაპიტალის დაგროვების საშუალებას².

რეფორმის წინა პერიოდში უკვე არსებითად საქმე გვაქვს როგორც ქალაქის ბურჟუაზიული ფენის, ასევე ნახევრადპროლეტარული მასების ჩამოყალიბების საწყისებთან. სოციალურ ძალთა ეს დაჯგუფება კარგად აქვს შენიშნული ნ. ნიკოლაძეს თბილისის მოსახლეობის 1865 წლის მღელვარებასთან დაკავშირებით დაწერილ წერილში. ნ. ნიკოლაძე წერს: „საქართველოს ქალაქთა მოსახლეობა მრავალრიცხოვანი არ არის. იგი თავმოყრილია თბილისში და ორ-სამ უმნიშვნელო ქალაქში, მაგალითად, ქუთაისსა, გორსა და სხვა. ამ ქალაქებში იგი დღევანდლამდე მკვეთრად იყოფოდა ორ კლასად: მოქალაქეებად („მეშჩანებად“) და მუშეებად“³. ავტორის თანახმად, „მოქალაქეები“ ანუ „წვრილბურჟუაზიული ექსპლოატატორები“ და „პროლეტარიატი“ — „ქალაქის მუშა მოსახლეობა“ ანუ „ნებაყოფლობით დაქირავებული ქალაქის მუშეები“ „ოდითვე მტრულად განწყობილი“ იყვნენ; ამ ორ ფენას შორის „საზოგადოებრივი და ეკონომიური მდგომარეობის სხვადასხვაობის გამო მთელი უფსკრულია გათხრილი“. „ინტერესების სხვადასხვაობას, უკმაყოფილებას, რომელსაც ექსპლოატაცია ქმნიდა და ასაზრდოებდა, ხშირად მოქალაქეებისა

¹ ДИГ, I, ч. 2, гл. 74, 121—122.

² შეადარე: П. Г. Рындзюнский, Городское гражданство..., гл. 383—384.

³ ნ. ნიკოლაძე, თხზ., ტ. 1, გვ. 298—304.

და მუშების გამწვავებული ურთიერთობა დანისა და ხანჯლის ტრიალამდე მიჰყავდა“¹.

ვის გულისხმობს ნ. ნიკოლაძე ქალაქის „პროლეტარიატში“? მუშების „დიდი უმრავლესობა ქვასა, ქვიშასა და კირს ეზიდება შენობების ასაგებად, ტომრებსა და სხვა მძიმე ტვირთს — ვაჭრებისათვის, წყალსა და შეშას — მცხოვრებთათვის...“. ეს ძირითადად არის სოფლიდან გამოქცეული გლეხობა, რომელიც ბატონისაგან თავისუფლების მიღების ფასად „ბურჟუაზიისა და მოხელეობის ხელქვეითი, ლუკმაპურის ძეხნის მონად ხდება“².

ჩანს, ნ. ნიკოლაძე ჯერ ვერ ამჩნევს ქალაქის მრეწველობაში ჩაბმულ შედარებით მცირერიცხოვან მუშახელს და ოსტატებთან მომუშავე ქარგლებსა და შეგარდებს, რომელნიც ფაქტიურად დაქირავებული მუშების მდგომარეობაში ექცევიან და ავსებენ ქალაქის „პროლეტარული“ მასების რიგებს. მაგრამ ავტორის მიერ დახატული სურათი ქალაქის წვრილბურჟუაზიულ-ექსპლოატატორული კლასისა და ექსპლოატირებული მშრომელი მოსახლეობის დაპირისპირებისა, რომელთა შორის უკვე კლასობრივი ბრძოლის ფაქტები იჩენს თავს, მეტად ნიშანდობლივია ეპოქის სოციალურ ძალთა დაჯგუფების დასახასიათებლად.

რეფორმამდელ ხანაშივე საგრძნობი ცვლილებები ხდება ქალაქების, კერძოდ, თბილისის, დაუბეგრავი მოსახლეობის შემადგენლობაშიც. ქალაქში მცხოვრები ფეოდალური არისტოკრატის — მემკვიდრეობით თავდაზნაურობის გვერდით იზრდება ფენა პირადი ანუ მსახურეული აზნაურებისა. ამავე დროს მოქალაქეებს გამოეყოფიან საპატიო მემკვიდრეობითი მოქალაქეები, ხოლო მათ გვერდით იზრდება და ძლიერდება პირადი საპატიო მოქალაქეთა და ვაჭართა ფენა, რომელიც ქალაქის მსხვილ და საშუალო ბურჟუაზიას შეადგენს.

ქალაქებში ჩნდება რაზნოჩინული ფენაც, რაც უკვე ახალი დროისათვის არის დამახასიათებელი.

ერთი სიტყვით, რეფორმამდელი საქართველოს ქალაქების განვითარება მაჩვენებელი იყო ქვეყანაში ფეოდალურ-ბატონყმური წყობილების ინტენსიური რღვევისა და ახალი, ბურჟუაზიული ურთიერთობის განუხრეგლი ზრდისა.

* * *

რაც ზემოთ ითქვა, საფუძველს გვაძლევს დავასკვნათ, რომ გასული საუკუნის 30—50-იან წლებში საქართველოს ეკონომიურ ცხოვრებაში

¹ ნ. ნიკოლაძე, თხზ., ტ. 1, თბ., 1962, გვ. 298—304.

² იქვე, გვ. 300.

ადგილი ჰქონდა მნიშვნელოვან ძვრებსა და ცვლილებებს, რაც გამოიხატა: სასაქონლო წარმოების განვითარებაში, ბურჟუაზიულ პრინციპებზე დამყარებული ფერმებისა და სამრეწველო საწარმოთა შექმნაში, განვითარებულ სასოფლო-სამეურნეო იარაღებისა და დაქირავებული შრომის შედარებით ფართოდ გამოყენებაში, საშინაო და საგარეო ვაჭრობის ზრდაში, ქალაქებისა და საქალაქო ცხოვრების დაწინაურებაში, გლეხებისა და მემამულეების კლასობრივი დიფერენციაციის საკმაო სიღრმით მიმდინარეობაში, ფეოდალური საკუთრების თანდათანობით მოშლაში, ანტიბატონყმური იდეოლოგიის ჩამოყალიბებაში, კლასობრივი ბრძოლის ჩვეულებრივზე მეტად გამწვავებაში და ა. შ.

ეს კი მკაფიო მაჩვენებელია იმისა, რომ აღნიშნული ხანის საქართველოში უკვე შეიქმნა ეგრეთ წოდებული კაპიტალისტური წყობა, რაც ახალი ურთიერთობის ბირთვის იმ მასშტაბით არსებობას გულისხმობს, რომელიც უკვე არღვევს ძველს, სასიკვდილოდ განწირულ სოციალ-ეკონომიურ ფორმაციას.

XIX ს-ის 20-იანი წლების მიწურულის რუსეთ-ირანისა და რუსეთ-თურქეთის ომების წარმატებით დამთავრების შემდეგ, მეფის მთავრობას შედარებით მეტი საშუალება მიეცა განეხორციელებინა ამიერკავკასიისა და, კერძოდ, საქართველოს ყოველმხრივი ათვისება. ამოცანა მდგომარეობდა იმაში, რომ მხარე „სამოქალაქო და პოლიტიკური თვალსაზრისით მჭიდროდ შეეკრათ რუსეთთან“, ექციათ იგი მის განუყოფელ ნაწილად და აეძულებინათ მოსახლეობა „ენით, გონებით და გრძნობით რუსი გამხდარიყო“¹. უზენაესი ხელისუფლების მიზანი იყო საქართველო გადაეცია ისეთ მხარედ, რომელიც პოლიტიკურად სანდო იქნებოდა, ხოლო ეკონომიურად — მაქსიმალურად მომგებიანი. ამ პროგრამის განხორციელებას ცარიზმი ცდილობდა სხვადასხვა გზით, რომელთა შორის უმთავრესს ქვეყნის კოლონიზაცია წარმოადგენდა.

§ 1. ქვეყნის კოლონიზაცია

მთავრობის წრეების აზრით, კოლონისტებს ახალი დასახლების რაიონებში მიჰქონდათ „მეტროპოლიის წესები, ჩვეულებები, ენა და ხელოსნობა“ და ამავე დროს ინარჩუნებდნენ „ბავშვური სიყვარულისა და ერთგულების გრძნობას თავიანთი ადრინდელი სამშობლოსადმი“².

ამრიგად, ცარიზმმა, რომელსაც კოლონიზაცია მხარის ათვისების ერთ-ერთ უმთავრეს საშუალებად მიაჩნდა, ადრინდნევი მიჰყო ხელი ამ საქმი-

¹ Колонизальная политика царизма в Азербайджане (შემდეგში შემოკლებით КПЦА), 1, М—Л., 1936, გვ. 280.

² იქვე, გვ. 286.

ნობას, მაგრამ განსაკუთრებით ფართოდ გაშალა თავისი მოღვაწეობა ამ მიმართულებით გასული საუკუნის 30-იანი წლებიდან. სწორედ ამ დროიდან სულ უფრო და უფრო გაისმოდა ხმები ამიერკავკასიაში (და, მაშასადამე, საქართველოშიც) რუსული კოლონიებისა და, კერძოდ, სამხედრო დასახლებათა შექმნის აუცილებლობის შესახებ. ეს უკანასკნელი უნდა შეექმნათ სამსახურიდან გადამდგარი დაოჯახებული ჯარისკაცებისაგან, რომლებსაც მთავრობა უზრუნველყოფდა „მიწის საჭირო რაოდენობით“ და სამუშაო იარაღებით. კოლონისტებს მთავრობა განიხილავდა, როგორც „დასაყრდენ ძალას, რომელიც განსაცდელის ჟამს მუდამ მზადყოფნის მდგომარეობაში“¹ უნდა ყოფილიყო. მათ, ნიკოლოზ 1-ის აზრით, უნდა განემტკიცებინათ ცარიზმის ბატონობა კავკასიაში და უზრუნველყოთ ადგილობრივი მოსახლეობის სრული მორჩილება².

მალე, სახელდობრ 1835 წელს, კავკასიის არმიის მთავარსარდალ ბარონ როზენს წერილობით უბრძანეს შეედგინა სათანადო პროექტი, ხოლო ორი წლის შემდეგ საქართველოში უკვე გაჩნდა პირველი სამხედრო დასახლებანი. ისინი დააარსეს თბილისის მახლობლად წალკაში, მანგლისში, კოჯორში და აგრეთვე ახალციხის რაიონში³. 1837—1860 წწ. პერიოდში ამიერკავკასიაში შეიქმნა სულ 10 სამხედრო კოლონია. მთავრობა ყოველნაირად ზრუნავდა მოახალშენთა მატერიალურ უზრუნველყოფაზე. ასე მაგალითად, 1841 წელს კავკასიის ადმინისტრაციას ებრძანა, რომ მას თავისუფალი სახაზინო მიწების მთელი ფონდი გამოეყენებინა მხოლოდ სამხედრო და სხვა კოლონიების საჭიროებისათვის⁴.

მიუხედავად იმისა, რომ მოახალშენები შედარებით უკეთესად იყვნენ უზრუნველყოფილნი წარმოების საშუალებებით, მათ მაინც ვერ შექმნეს სანიმუშო მეურნეობები. კიდევ მეტი, დიდი ხნის სამხედრო სამსახურმა ისინი საგრძნობლად გადააჩვია სოფლის სამუშაოებს და თითქმის სრულებით უვარგისი გახადა მეურნეობისათვის. ასე, რომ ამ მხრივ სამხედრო კოლონისტებმა ვერ გაამართლეს მთავრობის იმედები, მაგრამ სამაგიეროდ ისინი ხელს უწყობდნენ მოსახლეობის გარუსების საქმეს, თუმცა მიზანს, როგორც ცნობილია, მაინც ვერ მიაღწიეს.

მხარის კოლონიზაცია რუსული ელემენტებით: ბორციელდებოდა არამართო სამხედრო დასახლებათა შექმნით. 1830 წლის კანონის საფუძველზე „სამხრეთის ციმბირში“ (როგორც იმ დროს საქართველოს უწოდებდნენ რუსეთის რეაქციული წრეები) მოდიოდნენ საკუთარი ნებითაც და სასა-

¹ КПЦА, 1, გვ. 286.

² АКАК, VIII, გვ. 381.

³ პ. გ. უ. გ. უ. ვ. ი. ლ. ი., საქართველოსა და ამიერკავკასიის ეკონომიკური განვითარება XIX—XX ს. (შემოკლებით საეგ.), თბ., 1949, გვ. 623—624.

⁴ იქვე, გვ. 624.

მართლო დადგენილებების ძალითაც ყველა ჯურის „რასკოლნიკები“ (სექტანტები) — დუხოზორები, მალაკნები, სკოპები, სუბოტნიკები და სხვანი, რომელთა დატოვება რუსეთის შიდა გუბერნიებში სასურველად არ იყო მიჩნეული, რათა მათ გავლენა არ მოეხდინათ ორთოდოქსალურ მართლმადიდებელ ქრისტიანებზე. რაც შეეხება მათსაქართველოში ყოფნას, ეს სახიფათოდ არ მიაჩნდათ, რადგან სექტანტების ზნე-ჩვეულებანი მკვეთრად განსხვავდებოდა ადგილობრივი მოსახლეობის ზნე-ჩვეულებებისაგან და რაკი მათ არც კავკასიელ ხალხთა ენები იცოდნენ, უზენაესი ხელისუფლება დარწმუნებული იყო, რომ ისინი ვერც კონტაქტს დაამყარებდნენ აბორიგენებთან და ვერც რაიმე მავნე გავლენას მოახდენდნენ მათზე¹. უფრო მეტიც, მთავრობის აზრით, „რასკოლნიკებს“ შეეძლოთ ერთგვარი სარგებლობაც კი მოეტანათ იმ მხრივ, რომ ისინი ხელს შეუწყობდნენ მხარის გარუსებას და მასში სხვადასხვა ხელოსნობის განვითარებას².

სექტანტების დასახლება ამიერკავკასიისა და, კერძოდ, საქართველოში, დაწყებული 30-იანი წლებიდან, განსაკუთრებით გაიშალა გასული საუკუნის 40—50-იან წლებში. საკმარისია ითქვას, რომ 1856 წლის 1-ლი იანვრისათვის თბილისისა და ქუთაისის გუბერნიებში აღრიცხული იყო სულ 21 რუსული სოფელი, რომლებშიც ცხოვრობდა 1 133 კომლი³, ორივე სქესის დაახლოებით 6 000 სული.

კოლონისტებმა (მათ შორის არარუსული წარმოშობისა⁴) მიიღეს საკმარისად მოზრდილი მიწის ნაკვეთები⁵, რაც, ბუნებრივია, ადგილობრივი გლეხების ინტერესების საზიანოდ ხორციელდებოდა.

მართალია, იმ მიწებს, რომლებსაც გადმოსახლებულებს ურიგებდნენ, „თავისუფალი“ მიწები ეწოდებოდა, მაგრამ სინამდვილეში ეს ასე არ იყო. თავისუფალი იყო მიწა იმ გავებით, რომ იგი მაშინ არავის ეჭირა, მაგრამ ეს იმას როდი ნიშნავს, რომ ის ზედმეტი იყო ადგილობრივი მოსახ-

¹ პ. გუგუშვილი, საეკ. ტ. 1, გვ. 630.

² Обзорение Российских владений за Кавказом (ОРВЗК), ч. I, С.-Петербург, 1836, გვ. 163.

³ АКАК, XI, ч. II, გვ. 163.

⁴ მხედველობაშია გერმანელი კოლონისტები, გადმოსახლებულნი საქართველოში 1817—1818 წლებში (486 ოჯახი) და 1842 წელს (10 კომლი) და აგრეთვე სომხები და ბერძნები (600-ზე მეტი კომლი), რომლებიც დასახლეს თბილისის გუბერნიაში 1828—1829 წლების რუსეთ-თურქეთის ომის შემდეგ.

⁵ მაგალითად, გერმანელი კოლონისტის თითო ოჯახისათვის განკუთვნილი იყო მართლმადიდებლურ სახნავ-სათესი მიწების შემდეგი რაოდენობა: ალექსანდერსდორფის კოლონიაში 36,52 დეს, მარიენფელდის კოლონიაში 35,43 დეს. და ეკატერინენსფელდის კოლონიაში 27,92 დეს. (იხ. Н и к и ф о р м, Экономический быт немецких колонистов в Закавказье, МИЭБГКЗК, I, გვ. 105).

ლეობისათვის, რომელიც მწვავედ განიციდა მცირემიწიანობას. ამას თვით კავკასიის მეფისნაცვალი ბარიატინსკიც აღიარებდა, რომელსაც საერთო რუსული კოლონიზაცია ჩვენში ძალიან საჭირო და სასარგებლო საქმედ მიაჩნდა, «...Умножение в здешнем крае промышленных русских переселенцев, — სწერდა ის კავკასიის კომიტეტის თავმჯდომარეს 1857 წლის 15 აგვისტოს, — было бы очень полезно, но средства к наделению их казенными землями становятся весьма затруднительными. Свободных к новому заселению казенных земель в виду весьма немного и точные сведения о том могут раскрыться только с производством генерального межевания. Сверх того, справедливость требует наделять сими землями преимущественно крестьян туземных, из коих значительная часть имеет в том крайний недостаток»¹.

არაიშვიათი იყო ისეთი შემთხვევები, როდესაც კოლონისტების მიწით უზრუნველსაყოფად მამაპაპისეული მიწებიდან აპყრიდნენ ხოლმე ქართველ, სომეხ თუ აზერბაიჯანელ გლეხებს და სამაგიეროდ აძლევდნენ უხარისხო მიწის ნაკვეთებს სულ სხვა ადგილას². აი, რატომ წერდა ი. სტალინი³, რომ ცარიზმი განზრახ ასახლებდა განაპირა მხარეთა საუკეთესო კუთხეებში კოლონიზატორულ ელემენტებს, ხოლო „ტუზემცებს ქვეყნის უვარგის რაიონებში ერეკებოდა“, ხშირად კი სულაც ბედის ანაბრად ტოვებდა მათ. ყოველივე ეს, რა თქმა უნდა, ამძაფრებდა ეროვნულ შუღლს და ადგილობრივ მკვიდრთ მოსულების წინააღმდეგ აქეზებდა.

§ 2. ეროვნობრივი პოლიტიკის ხასიათი

ცარიზმი, როგორც აღვნიშნეთ, არა მარტო იქითკენ მიისწრაფოდა, რომ განემტკიცებინა თავისი სამხედრო-პოლიტიკური პოზიციები ამიერკავკასიაში, არამედ იმასაც ცდილობდა, რომ ეს მხარე მაქსიმალურად მომგებიანი ყოფილიყო მეტროპოლიისათვის. სათანადო მასალის შესწავლამ ცხადყო, რომ ამ მიმართულებით XIX საუკუნის 30-იან წლებამდე ცოტა რამ იყო გაკეთებული. ფინანსთა მინისტრი კონკრინი თავის პროექტში, რომელიც 1827 წელს სახელმწიფო საბჭოს წარუდგინა, პირდაპირ აღნიშნავდა, რომ ამიერკავკასიის პროვინციები, რომლებსაც „არც თუ უსაფუძვლოდ... შეიძლება ვუწოდოთ ჩვენი კოლონიები“, ჯერჯერო-

¹ АКАК, XII, ч. 1, гл. 12.

² И. Г. Антелава, Государственные крестьяне Грузии в первой половине XIX века, Сухуми, 1955, гл. 274.

³ იხ. მისი სტატია «Политика советской власти по национальному вопросу в России, соч., т. 4, гл. 356.

შით არავითარ მოგებას არ გვაძლევენ და, რაც მთავარია, ჩვენ აქამდე, სხვადასხვა მიზეზთა გამო, არავითარი ნაბიჯები არ გადაგვიდგამს, რომ გადაეკეციოთ ისინი მდიდარი შემოსავლის წყაროდ¹. რამდენიმე წლის შემდეგ, სახელდობრ, 1837 წელს, ბარონი განი, ეხებოდა რა იმავე საკითხს, წერდა: „ვრცელი და ძალიან ნაყოფიერი მიწები ამიერკავკასიაში ჯერ აუთვისებელია... სოფლის მეურნეობა ჩვილ მდგომარეობაშია... ყურძნის, აბრეშუმის, ბამბის, თამბაქოს, ინდიგოს, ენდროს მოვლა-პატრონობას ან გაუმჯობესებას საჭიროებს ან სულაც თავიდან დაწყებას“².

ცარიზმის წარმომადგენლები, რომლებიც ცდილობდნენ საქართველო გადაეკეციათ რუსეთისათვის შემოსავლიან მხარედ, გარკვეულ ეკონომიურ პროგრამას აყენებდნენ. ამ პროგრამის თანახმად, ამიერკავკასიის ქვეყნებს უნდა ეწარმოებინათ მარტოოდენ სოფლის მეურნეობის პროდუქტები და ზედლეული რუსეთის მრეწველობისათვის. საკუთარი მრეწველობის განვითარება კი მიჩნეული იყო არა მარტო არასასურველ, არამედ მეტროპოლიისათვის პირდაპირ საზიანო საქმედ. აი რას წერდა 1830 წლის 5 ოქტომბერს პასკევიჩი გრაფ კონკრინს: „განა საქართველო ისე არ უნდა განვიხილოთ როგორც კოლონია, რომელიც დაამზადებს რა უხემ მასალას (აბრეშუმს, ბამბეულს და სხვ.) ჩვენი ფაბრიკებისათვის, რუსეთიდან ჩამოიტანს მანუფაქტურულ ნაწარმს. საქართველოში მანუფაქტურების დაარსების შემთხვევაში კი დაირღვევა უკანასკნელის კავშირ-ურთიერთობა რუსეთთან“³. კიდევ უფრო გარკვეულად ლაპარაკობდა ბარონი განი: „ნაწარმის მრავალფეროვნება და სიმდიდრე ამიერკავკასიაში, — წერდა იგი 1837 წ., — სულ მცირე შრომისა და უმნიშვნელო კაპიტალის დაბანდებით ძალიან დიდ მოგებას გვპირდება; ამიტომ უთუოდ საკმარისი იქნება, რომ მთავრობა დაკმაყოფილდეს მარტოოდენ მიწის მოქმედების წაქეზებით, ყველა მისი დარგი თურთ და მოაშენოს ის ნედლი მასალა, რაც შეესაბამება აქაურ ნიადაგსა და კლიმატს. რაც შეეხება ფაბრიკებისა და მანუფაქტურების შემოღებას, ეს წავგვართმევდა დიდ ძალღონეს, რაც ესოდენ აუცილებელია მიწათმოქმედებისათვის და ადგილობრივი მხარისათვის, ყოველგვარი სარგებლობის გარეშე ხელს შეუშლიდა რუსეთის მრეწველობასა და ვაჭრობას, რადგან ჩვენი ფაბრიკები მთავრობის ბრძნული წინასწარხედვის წყალობით ისე მომრავლ-

¹ ВПСЗРН, II, № 1019; ОРВЗК, I, 33. 12.

² КПЦА, I, 33. 302.

³ АКАК, II, 33. 140.

დნენ და ისეთ სრულქმნილებას მიაღწიეს, რომ პროდუქტების დამუშავება ძვირი არ ჯდება და მარტო მათ შეუძლიათ მოიხმარონ აბრეშუმი, ბამბა, ზეთოვანი მცენარეულობანი, საღებავი ნივთიერებანი და ამიერკავკასიის სხვა მდიდარი ნაწარმოები“¹ (ხაზი ჩვენია — ავტ.).

ამგვარ რეაქციულ პროგრამებთან ერთად, რომლებიც საქართველოს სამუდამო ჩამორჩენილობას უქადდნენ, ისეთი პროექტებიც იყო წამოყენებული, რომლებიც ქვეყნის ყოველმხრივ განვითარებას, მათ შორის სამრეწველო განვითარებასაც ითვალისწინებდა. ამ უკანასკნელთა რიცხვს ეკუთვნის ა. ს. გრიბოედოვისა და პ. დ. ზავილეისკის მიერ 1828 წელს პასკევიჩისათვის წარდგენილი «Проект Россиской Закавказской компании»² და აგრეთვე ა. გ. ჭავჭავაძის მიერ 1833 წელს იმპერატორ ნიკოლოზ I-სათვის მიმართული „საქართველოს და მისი მდგომარეობის მოკლე ისტორიული ნარკვევი 1801 წლიდან 1831 წლამდე“³. მაგრამ ამ პროექტებს იმხანად განხორციელება არ ეწერათ. ისინი უარყო მთავრობამ, რომელიც საქართველოს განიხილავდა, როგორც რუსეთის მრეწველობის ნედლეულის ბაზას.

ასეთი ეკონომიური პოლიტიკა, რა თქმა უნდა, საგრძნობლად აფერხებდა ამიერკავკასიის ქვეყნების სამრეწველო განვითარებას; ამგვარი პოლიტიკის წყალობით, დასახელებულ ქვეყნებში არამცთუ რეფორმამდე, არამედ მის შეძლეგაც შედარებით მცირე რაოდენობით მოიპოვებოდა ფაბრიკა-ქარხნები. რაც შეეხება სოფლის მეურნეობას, ისიც ბუნებრივია, ცარიზმისა და ბატონყმურ ურთიერთობათა ბატონობის პირობებში, ნორმალურად არ ვითარდებოდა, მაგრამ მასზე მთავრობა უფრო ზრუნავდა. ისეთი ღონისძიებები, როგორიცაა კანონი „მებაღეობისათვის მიწების გამოყოფის შესახებ ამიერკავკასიაში“ (1834 წ.), „საქართველოს ღვინის კომპანიის“ შექმნა (1836 წ.), „ამიერკავკასიის სასოფლო-სამეურნეო საზოგადოების“ დაარსება (1850 წ.) და სხვა, სწორედ იმაზე მეტყველებს, თუ როგორ ცდილობდა უმაღლესი ხელისუფლება მეტროპოლიის მრეწველობისათვის ნედლეულის ბაზის შექმნას.

¹ КПЦА, 1, გვ. 314.

² Исторический архив, VI, 1951, გვ. 325—390; პროექტის ტექსტი ო. მარკოვას შესავალი სიტყვით. ამ პროექტის შესახებ იხ. აგრეთვე, Г. Хачапуридзе, К истории Грузии первой половины XIX века, Тб., 1950, გვ. 196—201 და დ. გოგოლაძე, კაპიტალისტური საწარმოები რეფორმამდელი საქართველოს სოფლის მეურნეობაში და მრეწველობაში, თბ., 1959, გვ. 12—14.

³ Кавказский сборник, XXIII, გვ. 1—35.

1840 — 1841 წლების რეფორმები. საქართველოს რუსეთთან „შერწყმის“ საქმეში მთავრობა მნიშვნელოვან ადგილს მმართველობის სისტემას უთმობდა. ის წესები, რომლებიც შემოღებულ იქნა საქართველოში 1801 წლის კანონის საფუძველზე და თითქმის უცვლელად მოქმედებდა 40 წლის განმავლობაში, ოფიციალური წრეების აზრით, უკვე აღარ პასუხობდა გაზრდილ მოთხოვნილებებს. ამ წესების უეარგისობის შესახებ ლაპარაკი განსაკუთრებით დაჟინებით რუსეთ-ირანისა (1826 — 1828 წწ.) და რუსეთ-თურქეთის (1828 — 1829 წწ.) ომების შემდეგ დაიწყო. სენატორი მეჩნიკოვი, რომელმაც ამიერკავკასიის ქვეყნები შეამოწმა, თავის 1831 წლის 20 იანვრის პატაკში ხაზგასმით აღნიშნავდა — აუცილებელია რაც შეიძლება ჩქარა ჩატარდეს მმართველობის სისტემის რეფორმებით. „დატოვო იგი (ე. ი. მმართველობა — ავტ.) ამ მდგომარეობაში, ხანგრძლივი დროით გადადო მისი გარდაქმნა, — წერდა იგი, — ეს ნიშნავს მტრულად იყო განწყობილი რუსეთისადმი და ითმინო პოლიტიკური სხეულის ავადმყოფობა იმ ზომამდე, როცა მისი განკურნება შეუძლებელი იქნება. ამიტომ ჩემი აზრია — ახლავე ჩაუყაროთ საფუძველი მის გარდაქმნას, გადადება მანეც იქნება დ სახიფათოც“¹. ცოტა უფრო ადრე იგივე მოითხოვა პასკევიჩმაც.

იმ დროს არსებული მმართველობის სისტემის ძირითად ნაკლად რევიზორებს მიაჩნდათ ადგილობრივი ელემენტის მონაწილეობა მასში. სენატორების მეჩნიკოვისა და ქუთაისოვის, როგორც პასკევიჩის აზრით, საჭირო იყო ამ ადგილობრივი ელემენტის განდევნა და სრული რუსული მმართველობის შემოღება². ამასთან, ყოველივე ეს უნდა გაკეთებულიყო სწრაფად, დაუყოვნებლივ, ერთი საერთო განკარგულებით³.

ჩვენ არ გამოვუდგებით იმ დეტალების გადმოცემას, რასაც ადგილი ჰქონდა რეფორმის მომზადებისა და გატარების დროს; ვიტყვი მხოლოდ, რომ იგი დამთავრდა შემდეგი სამი დოკუმენტის გამოქვეყნებით: „უზენაესად დამტკიცებული დებულება ამიერკავკასიის მმართველობისათვის“⁴, რომელიც შედგენილი იყო ბარონ განის პროექტის საფუძველზე⁵,

¹ КПЦА, I, გვ. 231.

² იქვე, АКАК, VII, გვ. 37; შ. ჩხეტიანი, რუსული მმართველობის სისტემა საქართველოში, „საქართველოს სახელმწიფო მუზეუმის მოამბე“, XII, თბ., 1944, გვ. 10.

³ С. С а д з е, Историческая записка об управлении Кавказом, I, 1907, გვ. 67—73; შ. ჩხეტიანი, რუსული მმართველობის სისტემა საქართველოში, გვ. 10—28.

⁴ ВПСЗРИ, XV, № 13368.

⁵ განის პროექტი და, მამასაღამე, 1840 წ. 10 აპრილის კანონი, რომელიც მიღებულ იქნა მის საფუძველზე, შეიცავდა სენატორების მეჩნიკოვის და ქუთაისოვის მიერ და აგრეთვე ფელდმარშალ პასკევიჩის მიერ წამოყენებულ ძირითად დებულებებს.

„დებულება საქალაქო საზოგადოებრივი მმართველობის შესახებ თბილისში“¹ და „დებულება საერობო საბეგრეო კომიტეტების შესახებ ამიერკავკასიაში“².

პირველი კანონის თანახმად, ამიერკავკასია იყოფოდა ორ მსხვილ ადმინისტრაციულ ერთეულად—საქართველო-იმერეთის გუბერნიად, რომელიც შედგებოდა თბილისის, გორის, თელავის, გურჯაანის, ქუთაისის, ელიზავეტოლის, ალექსანდროპოლის, ერევნის, ნახჭევანის, ახალციხისა და გურიის მაზრებისაგან და კასპიის ოლქისაგან, რომელიც შეიცავდა შირვანის, ყარაბაღის, შაქის, თალიშის, ბაქოს, დარუბანდისა და ყუბის მაზრებს. მმართველობა სამსაფეხურიანი იყო: მთავარი (რომელიც მოქმედებდა მთელი ამიერკავკასიის მასშტაბით); საგუბერნიო (საოლქო) და სამაზრო. მთავარსამმართველო შედგებოდა: ამიერკავკასიის მთავარმმართველისაგან, თბილისის სამხედრო გუბერნატორისა და მთავარსამმართველოს საბჭოსაგან. „დებულებაში“ დაწვრილებით იყო გადმოცემული თითოეულის უფლება-მოვალეობანი. ასე მაგალითად, მე-14 მუხლის თანახმად, მთელი ამიერკავკასიის უფროსად მიჩნეული იყო მთავარმმართველი, რომელიც განაგებდა ყველა სამოქალაქო და სასაზღვრო საქმეებს. იგი იყო აგრეთვე ზემოხსენებული საბჭოს თავმჯდომარე და კავკასიის განსაკუთრებული კორპუსის სარდალი. მთავარმმართველი თავისი უფლებებით გათანაწორებული იყო რუსეთის შიდაგუბერნიების გენერალ-გუბერნატორებთან, მაგრამ იმის გამო, რომ კავკასია განაპირა მხარე იყო და განსაკუთრებული პირობებითაც ხასიათდებოდა, მას გენერალ-გუბერნატორებისაგან განსხვავებით ზოგი დამატებითი უფლებები ენიჭებოდა. ჭერ ერთი, მას უფლება ჰქონდა გაეუქმებინა საგუბერნიო სამმართველოში შემავალ დაწესებულებათა დადგენილებანი და საკუთარი განკარგულებანი გაეტარებინა, ოღონდ იმ პირობით, რომ ის ამის შესახებ შესაფერის ახსნა-განმარტებას წარუდგენდა მმართველ სენატსა და სათანადო სამინისტროებს³. მეორეც, არაკეთილსაძლოებისა და თანამდებობის ბოროტად გამოყენების შემთხვევაში, ან საერთოდ ისეთ შემთხვევებში, როდესაც საქმე მნიშვნელოვანი იყო და გადადებას ვერ ითმენდა, მთავარმმართველს უფლება ჰქონდა გადაეყენებინა ასეთი მოხელეები, დამოუკიდებლად იმისა, გუბერნიის სამმართველოს მუშაეები იყვნენ ისინი, თუ განსაკუთრებულ ნაწილთა (საბაჟო, სასწავლო ოლქი, ფოსტა და ა. შ.) გაჰყვები. მესამე, თავადაზნაურთა არჩევნები საქართველო-იმერეთის გუბერნიაში შეიძლებოდა განხორციელებულიყო მხოლოდ მთავარმმართველის განსაკუთრებული განკარგულებით. მეოთხე, საგანგებო გარემოებების

¹ ВПСЗРИ, V, გვ. 13369.

² იქვე, № 13370.

³ ВНСЗРН, XV, № 13368, მუხლო 23.

დროს, მას უფლება ჰქონდა ემოქმედნა ყველა მისთვის მინიჭებული სა-
შუალებებით, ისე რომ არ მოეცა და უმაღლესი ხელისუფლების მითითე-
ბისათვის, ოღონდ იმ პირობით, რომ მას მოხსენება უნდა წარედგინა (სა-
დაც ჯერ არს) მიღებული ზომებისა და იმ მიზეზების შესახებ, რომლებმაც
მას ეს ნაბიჯი გადაადგმევინეს¹ და ა. შ.

თბილისის სამხედრო გუბერნატორი ფაქტიურად მთავარმმართველის
მოადგილე იყო ყველა დარგში. მისი ადგილზე არყოფნის, ავადმყოფობის
თუ სალაშქროდ გამგზავრების შემთხვევაში ქვეყანას სამხედრო გუბერ-
ნატორი განაგებდა. მაგრამ განსაკუთრებული საპასუხისმგებლო საქმეების
გადაწყვეტას (კერძოდ, ისეთების, რომლებიც რაიმე ეჭვებს ჰბადებდნენ)
იგი თავის თავზე არ იღებდა და მთავარმმართველის დაბრუნებას ელო-
დებოდა. ამ წესიდან, — ნათქვამია კანონში, — გამონაკლისს შეადგენს სა-
განგებო ზომები, რომელთა გადადება და დაყოვნება შეუძლებელიაო.
ასეთ შემთხვევაში სამხედრო გუბერნატორი მოქმედებდა გადაჭრით და
ყოველგვარი დაუდევრობისათვის პასუხს აგებდა².

მთავარმმართველის საბჭო შედგებოდა თვით მთავარმმართველის (თავ-
მჯდომარე), თბილისის სამხედრო გუბერნატორისა და წევრებისაგან, რომ-
ლებიც „უმაღლესი განკარგულებით“ ინიშნებოდნენ. მას ევალებოდა საქ-
მეთა მსვლელობისათვის თვალყურის დევნება (საგუბერნიო და საოლქო
სამმართველოების ყოველწლიური ანგარიშების, კერძო მიმოხილვათა, რე-
ვიზიებისა და მათი შედეგების განხილვა, საგუბერნიო და საოლქო პრო-
კურორების პროტესტების გარჩევა, მართლმსაჯულების საკითხების გადა-
წყვეტა და ა. შ.), კანონების შესრულებისას წარმოშობილ გაუგებრობათა
ლიკვიდაცია, სხვადასხვა წოდებათა უფლებებისა და პრივილეგიების წეს-
რიგში მოყვანა და აგრეთვე ზოგიერთი სამეურნეო ფუნქცია³.

დებულებების თანახმად, როგორც ზემოთაც აღვნიშნეთ, უნდა შექმ-
ნილიყო საქართველო-იმერეთის გუბერნიის (ისე როგორც კასპიის ოლქის)
მმართველობა, რომელსაც ქმნიდნენ სამოქალაქო გუბერნატორი, სახაზი-
ნო პალატა, სახელმწიფო ქონებათა პალატა, სისხლის სამართლისა და
სამოქალაქო სამართლის პალატა, საზოგადოებრივი მეურვეობის საგანგო,
თავად-აზნაურთა დეპუტატების საკრებულო და საპროკურორო ნაწილი.
საგუბერნიო სამმართველოსვე მიეკუთვნებოდა საგუბერნიო სამშენებლო
კომისია, ყვავილის საწინააღმდეგო, სტატისტიკური და საერობო ბეგარა-
თა კომიტეტები.

ყველაზე დაბალ ინსტანციად ითვლებოდა სამაზრო სამმართველო,
რომელიც წარმოდგენილი იყო მაზრის უფროსების, მათი თანაშემწეების,

¹ ВНСЗР, XV, № 13368, მუხლი 30.

² იქვე.

³ იქვე.

უბნის მსაჯულის, საქალაქო პოლიციის, სამაზრო ხაზინადარების, სამაზრო სასამართლოებისა და მაზრის პროკურორების სახით.

მაზრის უფროსები, — ნათქვამია კანონში, — არიან მაზრაში კანონის უშუალო აღმსრულებლები, დამცველები წესრიგისა და ყოველივე იმისა, რაც შედის საქალაქო და საერობო პოლიციის მოვალეობაში. ამიტომ მათ ემორჩილება ყველა ის ჩინოვნიკი, ვინც ამ უწყებებში მსახურობს. გარდა მრავალი სხვა ფუნქციისა, მათ ევალებოდათ: 1) ყოველწლიური ანგარიშის შედგენა სახელმწიფო ქონებათა მდგომარეობის შესახებ, 2) მოხსენების წარდგენა საგადასახადო დავალიანების ლიკვიდაციის მიმდინარეობის შესახებ, 3) საჯარო ვაჭრობის ორგანიზაცია და „პოლრიადების“ გაფორმება, 4) საქალაქო და საერობო გადასახადების განაწილება და სათანადო მასალის შესაბამისი უმაღლესი ინსტანციისათვის მიწოდება, 5) პურისა და სხვა კულტურათა ნათესებისა და მოსავლის შესახებ უწყობის შედგენა, 6) გაქცეულთა დაჭერა, დამნაშავეთა სამართალში მიცემა და ა. შ.

1840 წლის 10 აპრილს, როგორც აღვნიშნეთ, მიღებულ იქნა აგრეთვე დებულება საქალაქო მმართველობის შემოღების შესახებ თბილისში. თანახმად ამ დებულებისა, საქართველოს დედაქალაქში იქმნებოდა „საზოგადოებრივი საქალაქო მმართველობა“ ქალაქის თავისა და ექვსი ხმონის შედგენილობით. პირველ მათგანს ირჩევდა ქალაქის მთელი მოსახლეობა, ხოლო მეორეს — უძრავი ქონების მფლობელნი, ვაჭრები და ხელოსნები, ანგარიშით ორ-ორი ხმოსანი თითო წოდებიდან. გარდა ამისა, სახაზინო გადასახადებისა და ბეგარის განაწილებაში მონაწილეობის მისაღებად აღნიშნული წოდებები ირჩევდნენ აგრეთვე 30 კაცს და დამატებით კიდევ 6 კაცს — გადასახადების ამკრეფთ. ქალაქის მმართველობას ევალებოდა: 1) ზრუნვა ქალაქის კეთილმოწყობისათვის, შემოსავლის გადიდებისა და ხარჯების შემცირებისათვის, 2) საშოვარზე გამსვლელ პირთათვის სათანადო კონტროლის დაწესება და მათი საჭირო საბუთებით მომარაგება, 3) მოსახლეობის სურსათ-სანოვაგითა და სამრეწველო საქონლით უზრუნველყოფა, 4) ხელოსნობის, მეზღვეობისა და მეურნეობის სხვა დარგის განვითარებისათვის ხელის შეწყობა, 5) მოქალაქეთა უძრავ-მოძრავი ქონებისა და ხაზინის საკუთრების ფხიზლად დაცვა, 6) სახელმწიფო გადასახადების დროულად და სრულად აკრეფა, 7) შეგროვილი სახაზინო ფულის გაფლანგვის თუნდაც ცალკეული შემთხვევების თავიდან აცილება და სხვ.

იმავე 1840 წლის 10 აპრილს მიღებული მესამე დებულება კი ითვალისწინებდა საგუბერნიო და სამაზრო საერობო საბეგრო კომიტეტების შექმნას. პირველი მათგანის შემადგენლობაში შედიოდნენ: სამოქალაქო გუბერნატორი, გუბერნიის თავად-აზნაურთა წინამძღოლი, სახაზინო პალატის თავმჯდომარე და სახელმწიფო ქონებათა პალატის მმართველი.

ხოლო მეორის — მაზრის უფროსი, მაზრის თავად-აზნაურთა წინამძღო-
ლი და სამაზრო სასამართლოების მსაჯულები. კომიტეტების მოვალეობა
იყო: 1) საერობო, სამოქალაქო და სამხედრო ბეგარათა ხარჯთაღრიცხვის
შედგენა, 2) ფულადი და ნატურალური გადასახადების განაწილება მცხოვ-
რებთა შორის, 3) ზუსტი აღრიცხვა ყველა იმ ფულადი გამოსაღებისა, რო-
მელსაც იხდიდა ქალაქის თუ სოფლის მოსახლეობა და სხვ.

ამ რეფორმებთან თითქმის ერთსა და იმავე დროს მთავრობამ განა-
ხორციელა აგრეთვე სახელმწიფო ქონებათა მმართველობის რეფორმა.
ჩვენ მხედველობაში გვაქვს 1841 წლის 5 იანვარს გამოცემული „უმაღლე-
სად დამტკიცებული დებულება სახელმწიფო ქონებათა მმართველობის
შესახებ ამიერკავკასიაში“¹. ეს კანონი თითქოს ადასტურებდა საქართვე-
ლო-იმერეთის გუბერნიაში, ისევე როგორც კასპიის მხარეში, სახელმწიფო
ქონებათა პალატის გახსნის ფაქტს. ადასტურებდა, იმიტომ, რომ ამ ორგა-
ნოს „შემოღება, როგორც ცნობილია, გათვალისწინებული იყო ჯერ კიდევ
1840 წლის 10 აპრილის დებულებით ამიერკავკასიის მმართველობის შე-
სახებ. მაგრამ ამ უკანასკნელ დოკუმენტში არსებითად არაფერი იყო
ხატქვამი ამ ახლად შექმნილი, უფრო სწორად, ჩამოყალიბების პრო-
ცესში მყოფი დაწესებულების ფუნქციების შესახებ. 1841 წლის 5 იანვ-
რის კანონი კი, პირიქით, დაწვრილებით გადმოგვცემს სახელმწიფო ქონე-
ბათა პალატის უფლებებსა და მოვალეობებს. იმიტომ 1841 წლის 5 იანვ-
რის დებულება, გარკვეული აზრით, შეიძლება ჩავთვალოთ 1840 წლის
10 აპრილის დადგენილების შემდგომ დაზუსტებად.

მარტოდენ რუსი მოხელეებისაგან შემდგარ სახელმწიფო ქონებათა
პალატის უმთავრეს ამოცანად მიჩნეული იყო სახაზინო გადასახადების ასი
პროცენტით აკრეფა; პალატა ვალდებული იყო შეემოწმებინა ანგარიშე-
ბი, რომლებსაც ადგენდნენ სამაზრო ხაზინადარები სახაზინო გადასახა-
დების აკრეფის მიმდინარეობის შესახებ და სათანადო უწყისები გადაე-
ცა გუბერნიის უფროსის განკარგულებაში. თუკი დაწესებულ გამოსაღებ-
თა შეტანა ხდებოდა არაწესიერად, პალატა ვალდებული იყო დაუყოფ-
ნებლივ დაედგინა ამის „ნამდვილი მიზეზი“ და ეთხოვნა გუბერნატორი-
სათვის სათანადო ზომების მიღება დავალიანების სალიკვიდაციოდ. ასევე
მოქმედებდა იგი, როცა გლეხები არ ასრულებდნენ დაწესებულ საერობო
ბეგარას.

სახელმწიფო ქონებათა პალატას ევალებოდა ზრუნვა სახაზინო გლეხ-
თა ყოფის გაუმჯობესებისათვის, მაგრამ მისი უმთავრესი ამოცანა მაინც
იმაში მდგომარეობდა, რომ მიწით უზრუნველყო კოლონისტები და რუ-
სეთის შიდა გუბერნიებიდან გადმოსახლებულები. პალატას ეკისრებოდა
სახელმწიფო მიწის ფონდის მოვლა-პატრონობა და ამ მიწების შენახვა,

¹ ВПСЭРИ, XVI, № 14157.

უწინარეს ყოვლისა, მოსული ელემენტების საჭიროებათა დასაკმაყოფილებლად.

მმართველობის ზემოაღწერილი სისტემის განხორციელებას შედეგად უნდა მოჰყოლოდა ცარიზმის პოზიციების შემდგომი განმტკიცება საქართველოსა და მთელ ამიერკავკასიაში, ადგილობრივი კანონების, ადათებისა და ჩვეულებათა გაუქმება, ადმინისტრაციულ და სასამართლო ორგანოების საქმის წარმოებიდან ქართული, სომხური და აზერბაიჯანული ენების საბოლოო განდევნა და მის ნაცვლად მოსახლეობისათვის გაუგებარი რუსული ენის შემოღება, თითქმის ყველა თანამდებობიდან ადგილობრივი წარმომობის მოხელეთა გადაყენება და ახლადშექმნილ დაწესებულებათა დაკომპლექტება რუსი ჩინოვნიკებით, რომლებიც, ცალკეული გამონაკლისის გარდა, სრულებით არ იცნობდნენ მხარეს და საქმიანი თვისებების მხრივ უაღრესად უარყოფით დახასიათებას იმსახურებდნენ. გარდა ამისა, რეფორმას მნიშვნელოვნად უნდა განემტკიცებინა რუსეთის ფეოდალურ-ბატონყმური სახელმწიფოს მატერიალური ბაზა გადასახადებისა და სხვა შემოსავალთა მაქსიმალური გადიდების გზით. სწორედ ამით აიხსნება ის გარემოება, რომ საგუბერნიო და სამაზრო ადმინისტრაციას 1840 წლის 10 აპრილისა და 1841 წლის 5 იანვრის დებულებებით ძირითად ამოცანად ესახებოდა სახელმწიფო შემოსავლის ზრდის, დავალიანების ლიკვიდაციისა და ხაზინის საკუთრების დაცვის გზებისა და საშუალებების გამოხახვა. ამ ფართო პროგრამის შესრულებას, კერძოდ, სახაზინო გადასახადების გადიდებას, არ შეიძლებოდა არ გამოეწვია ქართველი (ისე როგორც სომეხი და აზერბაიჯანელი) გლეხების ეკონომიური მდგომარეობის შემდგომი გაუარესება. ამასვე იწვევდა მნიშვნელოვანი ზრდა მოხელეთა შტატისა, რომელიც ახლად შექმნილი მმართველობის ბიუროკრატიულ აპარატს ემსახურებოდა¹.

§ 4. მმართველობის სისტემის შემდგომი ცვლილებანი.

ა. ვორონცოვი, ა. ბარიბატინსკი

იმ წესებმა, რომლებიც დამყარდა რეფორმების, კერძოდ, 1840 წლის 10 აპრილის დებულების შემოღებით, საყოველთაო დრტეინვა და უკმაყოფილება გამოიწვია². საქმე შეიარაღებულ გამოსვლებამდეც კი მივიდა. შეშფოთებული იმპერატორი ნიკოლოზ I იძულებული გახდა 1842 წელს პოზენი და სამხედრო მინისტრი ჩერნიშოვი მოევილინებინა ამიერკავკასიაში ჯალხის აღშფოთების მიზეზთა გამოსარკვევად. პოზენმა შეადგინა

¹ В. И в а н е н к о, Гражданское управление Закавказьем, გვ. 299; შ. ჩ ხ ე ტ ი ა, რუსული მმართველობის სისტემა საქართველოში, გვ. 38.

² И. Д ж а в а х о в, Политическое и социальное движение в Грузии в XIX в., С.-Петербург, 1906, გვ. 32.

ვრცელი მოხსენება, რომელშიც ადასტურებდა იმ ფაქტს, რომ ცვლილებები მმართველობის სისტემაში განხორციელდა მოსახლეობის ადათ-ჩვეულებათა და ცხოვრების ნორმების გაუთვალისწინებლად. მთელი მმართველობა, — წერდა იგი, — ბარათების შედგენასა და ქალაქების უსასრულო გადაწერაში გამოიხატება. უკმაყოფილების ერთ-ერთ მიზეზად აღიარებულ იქნა აგრეთვე გაჭიანურებული მართლმსაჯულება¹, რაც მძიმე ტვირთად აწევებოდა მოსახლეობას. ყოველივე ამან აიძულა მთავრობა ეფიქრა იმაზე, რომ ზოგიერთი კორექტივი შეეტანა ახლად გატარებულ რეფორმაში². კერძოდ, ცვლილებები განიცადა მართლმსაჯულების დარგმა. ჩერნიშოვის (იგი ჩამოვიდა თბილისში, როგორც აღვნიშნეთ, 1842 წელს) განკარგულებით, მაზრის სასამართლოებს უფლება მიანიჭეს ამა თუ იმ საქმეზე, რომლის ღირებულება 200 მანეთს არ აღემატებოდა, მიეღოთ საბოლოო გადაწყვეტილებანი და ამრიგად, არ გადაეტანათ ისინი უმაღლეს ინსტანციაში. ამასთან ერთად, გადაიდგა ნაბიჯი აღედგინათ ძველი ქართული ზეპირი მართლმსაჯულება და მსაჯულთათვის უფლება მიეცათ სამოქალაქო საქმეები განეხილათ ადგილობრივი ადათ-ჩვეულებების საფუძველზე³.

მაგრამ გასაგებია, რომ ეს უმნიშვნელო ხასიათის ცვლილებები ვერ დააშოშმინებდა ხალხის ფართო მასებს და ისინი შემდეგაც განაგრძობდნენ ენერგიულ ბრძოლას მეფის რეჟიმის წინააღმდეგ. უკმაყოფილებას გამოთქვამდა თავადაზნაურობაც, რომელიც მთავრობის სოციალური პოლიტიკით რამდენადმე „შეზღუდული“ და 1840—1841 წწ. რეფორმებით ქვეყნის მმართველობისაგან თითქმის სავსებით. ჩამოშორებული აღმოჩნდა.

უფრო მოგვიანებით, სახელდობრ 1844 წლის ბოლოდან, მთავარ-მმართველის თანამდებობა მეფისნაცვლის ინსტიტუტით შეიცვალა. მეფისნაცვალი, მთავარმმართველისაგან განსხვავებით, ნიკოლოზ I-ის სიტყვით, აღჭურვილი იყო „შეუზღუდველი უფლებამოსილებით“ და მხარის მმართველობასთან დაკავშირებული თითქმის ყველა საკითხი შეეძლო დამოუკიდებლად გადაწყვიტა. „ყველა ეს საქმე, — ნათქვამია იმპერატორის რესკრიპტში ამ ტიტულის პირველი მატარებლის მ. ვორონცოვი-სადში, — რომელიც, ამჟამად არსებული წესების მიხედვით, ამიერკავკასიის მთავარმმართველობის მიერ წარედგინებოდა გადასაჭრელად სამინისტროებს, უფლება გეძლევათ თქვენ თვითონ გადაჭრათ ადგილზე... ამას გარდა, ნება გაქვთ, სადაც საჭიროდ დაინახავთ, ადგილობრივად

¹ С. Э с а д з е, Историческая записка..., 1, გვ. 81.

² დაწერილებით ამის შესახებ იხილეთ С. Э с а д з е, Историческая записка, 1, გვ. 78—79; შ. ჩ ხ ე ტ ი ა, რუსული მმართველობის სისტემა საქართველოში, გვ. 42—45.

³ შ. ჩ ხ ე ტ ი ა, რუსული მმართველობის სისტემა საქართველოში, გვ. 42.

მიიღოთ აუცილებლობით გამოწვეული ყველა საჭირო ზომა და ამის შესახებ, ისევე როგორც მათ გამომწვევ მიზეზებზე, მომახსენოთ პირადად მე¹.

1844 წლის დამლევის კავკასიის მეფისნაცვლად დანიშნული მ. ვორონცოვი² (1844—1854 წწ.) უღმობელი კოლონიზატორი იყო, მაგრამ იგი, თავის წინამორბედთაგან განსხვავებით, ქვეყნის კოლონიზაციის პოლიტიკას მეტად მოქნილად და ელასტიურად ატარებდა. ახალ უფროსსაც თავის უმთავრეს ამოცანად მიაჩნდა რუსული წესების დანერგვა საზოგადოებრივი და პოლიტიკური ცხოვრების ყველა დარგში, მაგრამ ყოველივე ამის გაკეთება, მისი აზრით, საჭირო იყო არა ერთბაშად და უხეშად, არამედ თანდათან და მოხერხებულად. ადგილობრივი მოსახლეობის დასამორჩილებლად და მისი გარუსებისათვის ვორონცოვს უწინარეს ყოვლისა საჭიროდ მიაჩნდა არა ადმინისტრაციულ, არამედ „კულტურულ“ ღონისძიებათა განხორციელება³. ამ პრინციპის შესაბამისად, მეფისნაცვალმა ნება დართო აღედგინათ ქართული თეატრი, გაეხსნათ საჯარო ბიბლიოთეკა, გამოეშვათ გაზეთი და ა. შ.⁴. ადგილობრივ მოსახლეობაში რუსული ენის გავრცელების მიზნით ვორონცოვი სხვა ღონისძიებებთან ერთად ქართველ თავად-აზნაურთა შვილებს სასწავლებლად გზავნიდა ბოლშე მოსკოვისა და პეტერბურგის სასწავლებლებში⁵. ქართველ ფეოდალთა კლასის სიმპათიის მოსაპოვებლად, მისი მხარდაჭერისა და გულის მოსაგებად, ვორონცოვმა 1849 წელს მთავრობას მიაღებინა კანონი, რომელმაც შემამულები გაანთავისუფლა სასამართლო ორგანოებში ყმების კუთვნილების შესახებ საბუთების წარდგენის მოვალეობისაგან. ამიერიდან თვითონ გლეხებს უნდა დაემტკიცებინათ, რომ ისინი თავისუფალნი იყვნენ და შემამულის საკუთრებას არ წარმოადგენდნენ⁶. კავკასიის მეფისნაცვლის დიდი ამაგიტა და ხელშეწყობით დაახლოებით 30 ათასი კაცი დამტკიცებულ იქნა თავადაზნაურულ წოდებაში, რასაც მათთვის გადამწყვეტი მნიშვნელობა ჰქონდა.

ზემოაღნიშნულ და მათ მსგავს ღონისძიებათა განხორციელებით მ. ვორონცოვმა მართლაც შეძლო საერთო ენის გამონახვა ქართველ თავადაზნაურობასთან და მისი მნიშვნელოვანი ნაწილის გადაქცევა ცარიზმის ერთგულ მსახურად.

ვორონცოვის დროინდელი მმართველობის სისტემის დახასიათები-

¹ АКАК, X, გვ. 2.

² თბილისში იგი ჩამოვიდა 1845 წლის მარტში.

³ შ. ჩხეტიია, რუსული მმართველობის სისტემა საქართველოში, გვ. 48—49.

⁴ იქვე, გვ. 49.

⁵ იქვე, გვ. 53.

⁶ АКАК, X, ч. I, გვ. 96; И. Г. Антелава, Государственные крестьяне Грузии в первой половине XIX века, гв. 151—152.

სას საჭიროა აღინიშნოს ცვლილებებიც, რომელიც მოხდა ამიერკავკასიის ადმინისტრაციულ დანაწილებაში. 1846 წ. 14 დეკემბრის ბრძანებულებით საქართველო-იმერეთის გუბერნიისა და კასპიის ოლქის ნაცვლად შეიქმნა ოთხი გუბერნია: თბილისის, ქუთაისის, შემახისა და დარუბანჯის. 1849 წელს კი მათ მიემატა კიდევ ერთი გუბერნია — ერევნისა¹.

მეფისნაცვლის უფლებების შემდგომი გაფართოება დაკავშირებულია ბარიატინსკის (1856—1862 წწ.) სახელთან. მის დროს მეფისნაცვალმა უფრო მეტი დამოუკიდებლობა მოიპოვა და შეზღუდულობის ის უმნიშვნელო ნიშნებიც კი გაქრა, რომელიც ჯერ კიდევ იგრძნობოდა ზოგი (მაგალითად, საფინანსო) უწყების ხაზით. იმპერატორმა ნება მისცა ბარიატინსკის ისე მოეწყო ამიერკავკასიის მმართველობა, როგორც ის ამას საჭიროდ დაინახავდა და მასში შეეტანა ყველა ის ცვლილება, რომელიც, მისი შეხედულებით, მეტროპოლიის ინტერესებით იყო ნაკარნახევი.

ახალი დებულება ამიერკავკასიის მხარის მმართველობის შესახებ მიღებულ იქნა 1858 წლის 21 დეკემბერს. ამ დებულების თანახმად მეფისნაცვალთან არსდებოდა მთავარმმართველობა და საბჭო. პირველი მათგანი შემდეგი ოთხი დეპარტამენტისაგან შედგებოდა: 1) საერთო საქმეთა, 2) სასამართლო საქმეთა, 3) საფინანსო საქმეთა და 4) სახელმწიფო ქონების საქმეთა.

ს ა ე რ თ ო ს ა ქ მ ე თ ა დ ე პ ა რ ტ ა მ ე ნ ტ ს ექვემდებარებოდა საინსპექტორო, სასწავლო, საფოსტო, სამკურნალო, სამშენებლო საქმეები. ის განაგებდა, აგრეთვე, საჯარო ბიბლიოთეკას, გაზეთების რედაქციებს, მთავარმმართველობის არქივს, სტამბას და სხვ.² სასამართლო საქმეთა დეპარტამენტის ფუნქციებში შედიოდა: სამოქალაქო, სისხლის სამართლისა და სამხედრო სასამართლოთა განაჩენების განხილვა-დამტკიცება, პასუხისგებაში მიცემულ თუ ადმინისტრაციული წესით გადასახლებულ პირთა საჩივრების გარჩევა, მოხელეთა და კერძო მოქალაქეთა პრეტენზიებისათვის პასუხის გაცემა და სხვ.³ საფინანსო საქმეთა დეპარტამენტს ეხებოდა ბაყების, სავაჭრო-მრეწველობის, ფულადი გადასახადებისა და წიაღისეული მეურნეობის საქმეები. მასვე ემორჩილებოდა მთავარმმართველობის ხაზინა⁴. დასასრულს, სახელმწიფო ქონებათა დეპარტამენტის მოვალეობას შეადგენდა სახელმწიფო ქონებათა და სახაზინო მამულებიდან შემოსავლის მიღებისათვის თვალყურის დევნება, ამ შემოსავლის გადიდე-

¹ С. Эсадзе, Историческая записка..., I, გვ. 81; შ. ჩხეტია, რუსული მმართველობის სისტემა საქართველოში, გვ. 58.

² შ. ჩხეტია, რუსული მმართველობის სისტემა საქართველოში, გვ. 69.

³ იქვე.

⁴ იქვე.

ბის გზებისა და საშუალებების გამოძებნა, ხაზინის საკუთრებისა და საერთოდ მისი ინტერესების ფხიზლად დაცვა და სხვ.¹.

მეფისნაცვლის საბჭო, რომელიც, როგორც ზემოთაც მოვიხსენიეთ, იმავე 1858 წელს შეაქმნა წინანდელი მთავარმმართველის საბჭოს მაგივრად, გაუქმებულთან შედარებით გაცილებით ნაკლები უფლებებით სარგებლობდა, ვითარცა პირადად მეფისნაცვალთან არსებული სათათბირო ორგანო. იქ დასმული საკითხები წინასწარ სათანადო დეპარტამენტში იხილებოდა, მერე, მთავარმმართველობის უფროსის მეშვეობით, მეფისნაცვალს წარედგინებოდა და მხოლოდ ამ უკანასკნელის წერილობითი ნებართვის შემდეგ ხდებოდა საბჭოს მსჯელობის საგანი². საბჭოს დადგენილებას ძალა მხოლოდ მაშინ ენიჭებოდა, როდესაც მას მეფისნაცვალი დაამტკიცებდა.

ამ ცვლილებების შედეგად, ვიმეორებთ, უჩვეულოდ გაფართოვდა მეფისნაცვლის უფლებები. იგი გადაიქცა ვეებერთელა რანგის მოხელედ, რომელიც, გვერდს უვლიდა რა ყველა სამინისტროს, უშუალოდ იმპერატორს უკავშირდებოდა. ის გ'და სრულიად დამოუკიდებელი მმართველი ამიერკავკასიისა. ამას კი, როგორც სამართლიანად შენიშნავს პროფ. შ. ჩხეტია³, შეიძლებოდა დადებითი შედეგი მოჰყოლოდა მხოლოდ იმ შემთხვევაში, თუ მეფისნაცვალი თავის შეუზღუდველ უფლებებს მხარისა და მისი მკვიდრი მოსახლეობის სასარგებლოდ გამოიყენებდა. წინააღმდეგ შემთხვევაში კი კავკასიის ადმინისტრაციის ფუნქცია-მოვალეობის არაჩვეულებრივი გაფართოება ხალხისათვის ზიანის მომტანი იქნებოდა. ის გაცილებით უფრო მეტ გასაქანს მისცემდა სხვადასხვა რანგის მოხელეებს უმსგავსო საქციელისა და ბოროტმოქმედების ჩასადენად. „სინამდვილეში სწორედ ასეც მოხდა. ბარიატინსკის მიერ შექმნილმა მმართველობის აპარატმა... არამცთუ გაუმჯობესება ვერ შეიტანა არსებულ მდგომარეობაში, არამედ მრავალ შემთხვევაში გააუარესა კიდევაც ეს მდგომარეობა: კავკასიის ადმინისტრაციას (ეხლა) უფრო მეტი საშუალება მიეცა, ვიდრე წინათ, თვითნებურად წარემართა ქვეყნის საქმე და სამსახური გამოეყენებინა თავისი პირადი ინტერესებისათვის. თვით მმართველობის სისტემა, ბარიატინსკის მიერ შემოღებული, თავისთავად ერთობ დაშორებული იყო იმ პირობებისაგან, რომელნიც აქ არსებობდა. ამასთანავე ასეთი რთული ბიუროკრატიული აპარატის შენახვა... მძიმე ტვირთად აწვეებოდა მოსახლეობას“⁴.

¹ შ. ჩხეტია, რუსული მმართველობის სისტემა საქართველოში, გვ. 69; об. И. Антелава, Государственные крестьяне Грузии в первой половине XIX века. Сухуми, 1955, გვ. 74—75.

² შ. ჩხეტია, რუსული მმართველობის სისტემა საქართველოში, გვ. 70.

³ იქვე.

⁴ იქვე, გვ. 71.

გლეხები, რომლებიც განსახილველი ხანის საქართველოში, ისე როგორც მანამდეც, წარმოადგენდნენ ძირითად მწარმოებელ კლასს, მფლობელობის მიხედვით იყოფოდნენ სახელმწიფო (სახაზინო), საბატონო და საეკლესიო გლეხებად. პირველი მათგანის რიცხობრივი შემადგენლობა შეუჩერებელი იზრდებოდა და უკვე XIX საუკუნის 50-იანი წლების ბოლოსთვის თავის რიგებში მთელი გლეხური მოსახლეობის ნახევარზე მეტს ითვლიდა. იმ 116 875 კომლი გლეხიდან, 1860—1861 წლების მონაცემებით, საქართველოს ორივე გუბერნიაში (აფხაზეთის, სვანეთისა და სამეგრელოს გამოკლებით) რომ ირიცხებოდა, სახელმწიფო გლეხებზე მოდიოდა 65 908 კომლი ან გლეხთა საერთო რაოდენობის 56,4%; საბატონო გლეხებზე — 37 971 კომლი ან 32,4%¹ და საეკლესიო გლეხებზე — 13 482 კომლი ან 11,2%¹.

ისინი ცხოვრობდნენ და შრომობდნენ ფეოდალურ-ბატონყმური და კოლონიური ჩაგვრის მძიმე პირობებში. ელემენტარული კანონიერების არარსებობა და ადმინისტრაციის გამყიდველობა ფართო გასაქანს აძლევდა ყოველგვარ ბოროტმოქმედებას, რომლის ხასიათი და მასშტაბი ანკვიფრებდა თვით ოფიციალური ხელისუფლების წარმომადგენლებსაც კი. «Собранные по сие время нами сведения, — მოახსენებდნენ უმაღლეს მთავრობას 1830 წლის 12 მარტს ამიერკავკასიაში სარევიზიოდ მოვლინებულნი გრაფი ქუთაისოვი და მეჩნიკოვი, — ясно показывают, что злоупотребления и беспорядки по управлению собственно Грузиею превышают всякую меру, а рассматривая управление мусульманскими провинциями, воображение содрогается от неистовства управляющих и страдания народа. Здесь уже совершенно попорно человечество, забыто всякое правосудие, закон служил только орудием к притеснению, а корысть и буйное самовластие руководствовали действиями окружных начальников, комендантов, приставов и прочих начальствующих лиц»².

¹ И. Г. Антелава, Государственные крестьяне Грузии в первой половине XIX века, 1955, გვ. 32.

² КПЦА, I, გვ. 232.

ასეთი ვითარება, ბუნებრივია, თითქმის ყოველგვარ საშუალებას უსპობდა მშრომელ მასებს დაეცვათ საკუთარი თავი და ინტერესები სასამართლო თუ ადმინისტრაციულ ორგანოებში, რომელთა ენა მათთვის სრულიად უცხო და გაუგებარი იყო. თუმცა ამ ჩაგვრა-უფუძლებობას, გამოწვეულს ფეოდალურ-ბატონყმური ურთიერთობითა და მეფის მთავრობის ანტიხალხური კოლონიური პოლიტიკით, მეტ-ნაკლებად ყველა უწყებისა და კატეგორიის გლეხი განიცდიდა. ისინი, თავიანთი სოციალ-ეკონომიური მდგომარეობით, მაინც განსხვავდებოდნენ ერთიმეორისგან და ამიტომ ცალ-ცალკე განვიხილავთ მათი შრომისა და ცხოვრების პირობებს.

§ 1. სახელმწიფო გლეხთა სოციალ-ეკონომიური მდგომარეობა

განსახილველი ხანის ქართველი გლეხის ეკონომიური მდგომარეობის მთავარ განმსაზღვრელ ფაქტორს მიწა წარმოადგენდა. მწარმოებელი კლასის განკარგულებაში მყოფი მიწის სიდიდე და ხარისხი გადამწყვეტ გავლენას ახდენდა (სხვა ფაქტორებთან ერთად) მისი ცხოვრებისა და შრომის პირობებზე და სწორედ ამ ძირითადი საწარმოო საშუალებით, როგორც ქვემოთ ვნახავთ, ძალზე ცუდად იყო მომარაგებული რეფორმამდელი ხანის სოფლის მშრომელი მოსახლეობა, მისი ყველა კატეგორია. თვით სახელმწიფო გლეხებიც კი, რომელთა ეკონომიური მდგომარეობა საერთოდ შედარებით უკეთესი იყო, არ იყვნენ მიწით უზრუნველყოფილნი. საკმარისია ითქვას, რომ საქართველოს მაზრების უმრავლესობაში სახაზინო გლეხის თითო ოჯახზე მოდიოდა საშუალოდ ორიდან სამ დესეტინამდე სახნავ-სათესი მიწა, ზოგან კი ამაზე ნაკლებიც. ასე მაგალითად, გასული საუკუნის 50-იანი წლებისათვის ხსენებული კატეგორიის გლეხთა სახნავ-სათესი მიწების საშუალო საკომლო ნაღელი უდრიდა: თელავისა და ოზურგეთის მაზრებში — 2,5 და გორის მაზრაში — 2 დესეტინას¹.

უმიწობა-მცირემიწიანობის მეტად მკაფიო და დამაჯერებელ სურათს წარმოგვიდგენენ თვით გლეხთა საჩივრები, ოფიციალურ პირთა მიწერ-მოწერა და სხვა მასალა, რომლის ერთ ნაწილს აქვე მოვიტანთ. ახასიათებდა რა, მაგალითად, ყვარლის სახელმწიფო გლეხთა ცხოვრების პირობებს, თელავის მაზრის უფროსის თანაშემწე წერდა (1843 წ.): «Живущие в селении Кварелах 59 дымов казенных крестьян не имеют

¹ И. Г. Антелава, Государственные крестьяне Грузии в первой половине XIX века, გვ. 238, 266—268, 241, 263.

ცივრები, ზუსტი სტატისტიკური მონაცემების უქონლობის გამო, მიახლოებითია. საჭიროა აღენიშნოთ, რომ საქართველოს ზოგ მაზრაში (მაგალითად, თიანეთისა და ახალციხის) მიწის საშუალო საკომლო ნაღელი ვაცილებით მეტი იყო, მაგრამ ამას არ ჰქონდა პრინციპული მნიშვნელობა, რადგანაც მიწების უდიდესი უმრავლესობა ხსენებულ მაზრებში სრულიად გამოუსადეგარი იყო მეურნეობისათვის.

ни пахотной земли, ни садов, редко кто из них имеет оседлость и (то) на церковной или помещичьей земле. Все они переносят крайность во всех отношениях чрез невыгоду жительства их на означенных землях, снискивая себе пропитание только через услугу у церковных и помещичьих крестьян и плату ими за землю... Большая часть из них не только не могут платить казне повинности, но даже едва могут иметь пропитание, и ежели начальство не обратит на это внимания и не переселит их отсель на казенные земли, то вследствие времени крестьяне эти падут в нищету»¹. (ხაზი ჩვენია — ავტ.).

1849 წელს თბილისის გუბერნიის დუშეთის უბნის სახაზინო გლეხთა საჩივრების შესამოწმებლად ადგილზე მივლინებული მოხელე არაორაზროვნად მოახსენებდა თავის უფროსს, რომ ყველა ისინი მიწის დიდ ნაკლებობას განიცდიანო². გორის მაზრის უფროსის მოწმობითაც (1852 წ.), მის სამმართველო ტერიტორიაზე მცხოვრებ სახელმწიფო გლეხებს არსად არ ჰქონიათ საკმაო რაოდენობით მიწა, რის გამოც ისინი იძულებული ყოფილან დაემუშავებინათ კერძო მფლობელთა მიწები და ეხადათ „დაწესებული დალა“³. „მთიანეთის მოსახლეობას, — ნათქვამია 1852 წლის ერთ საბუთში, — არამცთუ ზედმეტა მიწები არა აქვთ, არამედ ის მიწის აუცილებელი ფართობითაც არაა მომარაგებული. ყველა დიდ გაჭირვებაშია, რადგანაც მათ შორის იშვიათია ისეთი, რომელსაც პურის წლიური მოსავალი ნახევარი წელი ეყოს“⁴.

კიდევ უფრო მძიმე ვითარება იყო დასავლეთ საქართველოში. ქუთაისის მაზრაში, მაგალითად, 1848 წელს სახელმწიფო გლეხთა 3,3%-ს საერთოდ არ ჰქონია სახნავ-სათესი და სავენახე მიწა, ხოლო 87,7%-ის საშუალო საკომლო ნაღელი მერყეობდა 0,2 და 6 დესეტინას შორის. მხოლოდ სახაზინო გლეხთა საერთო რაოდენობის 9% იყო მფლობელი თხუთმეტიდან ოც დესეტინამდე მიწისა⁵. თუ მხედველობაში მივიღებთ იმ გარემოებას, რომ იმერეთში გასული საუკუნის 40—50-იან წლებში მშრომელი კაცის ოჯახის რამდენაღმე მაინც ნორმალური ცხოვრება-არსებობისათვის საჭირო იყო სულ მცირე 6 დესეტინა მიწისა, მაშინ იძულებული ვიქნებით ქუთაისის მაზრის სახელმწიფო გლეხთა 91,0% (ე. ი. აბსოლუტური უმრავლესობა) უმიწო და მცირემიწიან მშრომელთა ჯგუფში მოვაქციოთ.

სწორედ ასეთმა ვითარებამ მისცა საფუძველი ქუთაისის გენ. გუბერ-

¹ სსცია, ფ. 16, საქ. 8326, ფურც. 1—2.

² იქვე, ფ. 4, ანაწ. 2, საქ. 66, ფურც. 30.

³ იქვე, ფ. 26, ანაწ. 6, საქ. 173, ფურც. 15.

⁴ იქვე, ფურც. 7.

⁵ И. Г. Антелава, Государственные крестьяне..., გვ. 258.

ნატორს გაგარინს კავკასიის უმაღლესი ადმინისტრაციისათვის მოესხენე-ბინა შემდეგი (1853 წ.): «При объезде Кутаисского уезда я увидел необыкновенную, соразмерно с потребностями, скудность земель казенных. Поверяя на месте лично и самым тщательным образом жалобы крестьян казенных на недостаток земли, я удостоверился, что некоторые крестьяне, состоящие уже семь и десять лет в ведомстве казенном, не имея вовсе земли или имея не более одной и полторы кцевы, дошли до крайней бедности»¹.

სოფლის მშრომელი მოსახლეობის მიწით უზრუნველყოფის თვალსაზრისით დასავლეთ საქართველოს არც სხვა მაზრაში ყოფილა სახარბილო მდგომარეობა. საკმარისია აღვნიშნოთ, რომ რაჭის მაზრაში, მაგალითად, 1842 წელს უმიწო და მცირემიწიან სახელმწიფო გლეხთა ხვედრითი წონა 97,2%-ს უდრიდა².

რას აკეთებდა და როგორ ცხოვრობდა მიწით ესოდენ ცუდად მომარაგებული მასა? ის დღიურ შრომასა და მესარეწიობას ეტანებოდა და, რაც მთავარია, მემამულეთა მიწებს იღებდა იჯარით. ასე მაგალითად, სოფ. ყვარლის 8 კომლ სახელმწიფო გლეხთა შესახებ თელავის მაზრის უფროსის 1858 წლის ანგარიშში ნათქვამია, რომ ისინი, სახაზინო და საკუთარი მიწების უქონლობის გამო, „ცხოვრობენ საეკლესიო მიწებზე“ და ამისთვის იხდიან სათანადო გადასახადს³. ნაფარეულის სახაზინო უწყების გლეხების შესახებ დასახელებულ დოკუმენტში მითითებულია, რომ ისინი, ვითარცა უმამულონი, ხიზნებად ცხოვრობენ თავად ჭავჭავაძის კუთვნილ მიწებზე⁴. სოფ. შაშიანის 100 კომლი სახელმწიფო გლეხი თავის ცხოვრება-არსებობას ინარჩუნებდა თურმე საეკლესიო მიწების იჯარა-დამუშავებით⁵. იმავე გზას დასდგომია სოფ. კალაურის 144 კომლი სახაზინო გლეხიც⁶. გამონაკლისი არც სოფ. ყარაჯალის მშრომელები ყოფილან. ისინიც, ვითარცა სრულიად მოუმარაგებელნი სახაზინო მიწებით, შრომობდნენ კერძო მფლობელთა მიწებზე⁷. კერძო მფლობელთა და საეკლესიო-სამონასტრო მიწებს ამუშავებდა საერთოდ (რა თქმა უნდა, სათანადო გასამრჯელოს გაღებით) ყველა უმიწო (ან მცირემიწიანი) სახელმწიფო გლეხი. ასეთების რაოდენობა კი ყველგან ძალიან დიდი იყო. თელავის მაზრაში, მაგალითად, 1858 წელს მათი ხვედრითი წონა 41,6%-ს უდრიდა⁸.

¹ И. Антелава, Государственные крестьяне..., 83. 264.

² სსცია, ფ. 19, საქ. 23, ფურც. 36.

³ იქვე, ფ. 26, ანაწ. 6, საქ. 955, ფურც. 3.

⁴ იქვე, ფურც. 4.

⁵ იქვე.

⁶ იქვე, ფურც. 5.

⁷ იქვე, ფურც. 6.

⁸ И. Антелава, Государственные крестьяне..., 83. 236.

სახელმწიფო გლეხებს, ისე როგორც სოფლის მშრომელი მოსახლეობის დანარჩენ კატეგორიას, აწუხებდათ არა მარტო მცირემიწიანობა-უმიწობა, არამედ მრავალრიცხოვანი გადასახადების მძიმე ტვირთიც. 1843—1845 წლების საგადასახადო სისტემის რეფორმამდე ჩვენთვის საინტერესო უწყების გლეხები ხაზინას უხდიდნენ სხვადასხვა სახის პროუქტად და ფულად გადასახადებს. პირველ მათგანს განეკუთვნებოდა სურსათი, კოდის პური, ღალა, ყალანი, ბეგარა, საჩუქარი და ნაწილობრივ კულუხი; ხოლო მეორეს — საბალახო, მალი და ფულადი მახთა.

სურსათს, წყაროების ჩვენებით, იღებდა ხაზინა სამივე კატეგორიის გლეხისგან. მას ერთნაირად და თანაბარი ზომით (2 კოდი ხორბალი და 1 კოდი ქერი კომლზე) იხდიდნენ სახელმწიფო, საეკლესიო და საბატონო გლეხები. იმ წესდებაში, რომელიც 1802 წელს იქნა შედგენილი სურსათით დაბეგვრის თაობაზე, პირდაპირაა მითითებული, რომ ეს გადასახადი სავალდებულოა ყველა უწყების სოფლის მშრომელი მოსახლეობისათვის¹. ამას საცესებით ემთხვევა უფრო გვიანდელი ხანის საბუთების მოწმობაც. ერთ მათგანში, მაგალითად, ნათქვამია: «Сурсат собирается вообще с церковных крестьян... наравне с казенными и помещичьими крестьянами»². საქართველოს უმაღლესი მთავრობის 1820 წლის 27 ოქტომბრის წარდგინებაშიც აღნიშნულია, რომ „სოფელ ვეფხვისციხის სახაზინო გლეხები დაბეგრილი არიან ყოველწლიური პურის გადასახადებით — სურსათითა და კოდის პურით, ხოლო საეკლესიო და საბატონო გლეხები — მარტო სურსათით“³. დასასრულ, იმ მიწერ-მოწერაშიც, რომელიც მიმდინარეობდა 1821—1825 წლებში გორის მაზრის მშრომელი მოსახლეობის დაბეგვრის თაობაზე, მითითებულია, რომ სახელმწიფო გლეხები «Обязаны, сверх сурсата, платимого казне наравне с помещичьими крестьянами, вносить и другие подати, подобные тем, какие помещичьи крестьяне дают своим владельцам»⁴. ამ საბუთში, როგორც ვხედავთ, სურსათის გადამხდელ გლეხებს შორის არ არიან დასახელებული საეკლესიო გლეხები, რაც, ჩვენი აზრით, ციტირებული დოკუმენტის ავტორის უბრალო შეცდომით აიხსნება.

წყაროების ცოტა არ იყოს წინააღმდეგობრივი მოწმობის გამო, რამდენადმე უფრო რთულია იმის დადგენა, თუ ვინ იყო მეორე გადასახადის—კოდის პურის—გადამხდელი. ვახტანგ VI ს-ის კანონების თანახმად, მაგალითად, რომლებიც, როგორც ცნობილია, გასული საუკუნის 50-იანი წლების ბოლომდე მოქმედებდნენ ფორმალურად, კოდის პურის გადამხ-

¹ АКАК, II, გვ. 7.

² ЦГВИАМ, Ф. ВУА, д. 407, л. 43.

³ სსცია, ფ. 2, საქ. 814, ფურტ. 11—14.

⁴ იქვე, ფ. 1, საქმე. 969, ფურტ. 1—6.

დღელებად იგულისხმებიან არა მარტო სახელმწიფო, არამედ საბატონო გლეხებიც. „თუ კაცმან, — ნათქვამია 162-ე მუხლში, — სოფელი ან გლეხი თავადისაგან ან აზნაურისაგან სასყიდლად მოინდომოს, ხელმწიფესაც უნდა დაკითხვა; მაგრამა უკითხავადაც სყიდულა და არც ხელმწიფე გამოკიდებია, ამიტომ რომე ვინც უნდა იყიდოს, ხელმწიფეს კოდის პური, ბეგარა, საბალახე... არც ერთი არ დააკლდება, ყველა უნდა ქნას, თუ ხელმწიფემ არ გაათარხნა“¹ (ხაზი ჩვენია — ავტ.).

ი. ბახტაძე, სახელმწიფო გლეხთა ეკონომიური მდგომარეობის შემსწავლელი გასული საუკუნის 80-იან წლებში, წერდა, რომ კოდის პურს, სურსათს ზევით, იხდიდა „ზოგი, თავისი მატერიალური შესაძლებლობით ცნობილი, სოფელიო“². ამ სიტყვებს, როგორც ჩანს, სათანადო სიცხადე არ შეაქვს საკითხის გარკვევაში. ჭერ ერთი, გაუგებარია რომელ შეძლებულ სოფლებზეა ლაპარაკი — საბატონო, საეკლესიო თუ სახაზინო უწყების. და, მეორეც, ცნობილია, რომ ასეთი საერთოდ შეძლებული სოფლები სინამდვილეში არ არსებობდა. განსახილველი ხანის საქართველოს ყოველ ეგრეთ წოდებულ შეძლებულ სოფელში, რომელი უწყებისაც არ უნდა ყოფილიყო, ეკონომიურად ძლიერ გლეხთა მცირერიცხოვანი ჯგუფის გვერდით არსებობდა დიდძალი მასა მატერიალურად შევიწროებული მშრომელებისა, რომლებიც რის ვაივავლახით ახერხებდნენ ცხოვრების შენარჩუნებას. ყოველივე ეს საფუძველს გვაძლევს ვიფიქროთ, რომ ი. ბახტაძეს კოდის პური მიაჩნია გადასახადად, რომლითაც იბეგრებოდნენ სახაზინო, საეკლესიო და საბატონო გლეხები, მაგრამ არა ყველა, არამედ მხოლოდ მათი ეკონომიურად შეძლებული ნაწილი.

მაგრამ საკითხის ასეთ გადაჭრას წყაროები მზარს არ უჭერს. ისინი აღასტურებენ, რომ კოდის პურით მარტო სახელმწიფო გლეხები იბეგრებოდნენ. ამის სასარგებლოდ ლაპარაკობს ის მიწერ-მოწერა, რომელსაც ადგილი ჰქონდა 1803 წელს ქიზიყელებიდან კოდის პურის აღების თაობაზე. სიღნაღის მაზრის კაპიტან-ისპრავნიკი, რომელსაც დავალებული ჰქონია ქიზიყში სახაზინო კოდის პურის შეგროვება, დიდად გოაცუბულა დასახელებული გადასახადის გადამხდელი სოფლების სიაში სამი სამონასტრო აოფლის — მაშნაარის, ბოდბისა და ბოდბისხევის შეტანით, რომლებიც მანამდე „ამ გადასახადს არასდროს არ იხდიდნენ“³ თურმე. ცოტა ხნის შემდეგ ადგილობრივმა ხელისუფლებამ ამასთან დაკავშირებით მიიღო საქართველოს მმართველის კოვალენსკის მითითება აღნიშნუ-

¹ ვახტანგ VI საქართლის წიგნი (თ ი ნ ა ე ნ უ ქ ი ძ ი ს გამოცემა), თბ., 1955, გვ. 90.

² И. Л. Бахтадзе, Податное обложение государственных крестьян Закавказского края, Тиф., 1887, გვ. 8.

³ სსცია, ფ. 254, საქ. 19, ფურც. 8; И. Антелава, Гос. крест..., გვ. 292.

ლი სოფლების კოდის პურისგან განთავისუფლებისა და ამ გადასახადის „მხოლოდ და მარტო სახელმწიფო სოფლებზე განაწილების“ შესახებ¹.

ზუსტად იგივეა დადასტურებული 1820 წლის ერთ საბუთში. იქ ნათქვამია, რომ ვეფხვისციხის სახელმწიფო გლეხები ხაზინის სასარგებლოდ იხდიან სურსათსა და კოდის პურს, ხოლო „საეკლესიო და საბატონო გლეხები — მარტო სურსათს“².

ტერიტორიულად კოდის პური საქართველოს მხოლოდ ორი მაზრით — სიღნაღისა და თელავის — იყო შემოფარგლული. მაგრამ იქაც ამ გადასახადით, როგორც ზემოთაც აღვნიშნეთ, იბეგრებოდა არა სათითაოდ ყველა სახელმწიფო გლეხი, არამედ (ყოველ შემთხვევაში ფორმალურად მაინც) მხოლოდ ის, რომელიც „ვარგისი მიწის საკმაო რაოდენობით“ იყო მომარაგებული და შეძლებულ მეურნედ ითვლებოდა.

წყაროებში არ არის მითითებული, თუ როგორ და რა ზომით იხდიდა სახაზინო გლეხი კოდის პურს. ზოგი სოფლის მოსახლეობა, როგორც უკვე ვთქვით, საერთოდ არ იბეგრებოდა ამ გადასახადით, მაგრამ დაბეგრისებზე არაერთნაირი ზომით იხდიდნენ მას. სხვადასხვა იყო ამ გადასახადის საშუალო საკომლო რაოდენობა თელავის მაზრის სხვადასხვა სოფელში. კონკრეტულად ის უდრიდა: შაშიანში — 3,9, ტონიანში — 3,6, შალაურში — 1,7, გიორგიწმინდაში — 1,4, პატარძელში — 1 კოდს და ა. შ.

როგორც მასალების გულდასმით შესწავლა გვიჩვენებს, კოდის პურით დაბეგრისას ძირითად განმსაზღვრელ ფაქტორს მაინც გადამხდელის ეკონომიური მდგომარეობა, კერძოდ, მისი მიწით მომარაგება წარმოადგენდა. პატარძელის სახელმწიფო გლეხები, მაგალითად, რომელთა თითო კომლზე საშუალოდ მოდიოდა არა უმეტეს ერთი ღესეტიანა ვარგისი მიწისა, იხდიდნენ ოთხჯერ ნაკლებ კოდის პურს, ვიდრე სოფელ შაშიანისა, რომელთა საშუალო საკომლო ნადელი დაახლოებით 6,6 ღესეტიანას უდრიდა³.

ამ რიგად, კოდის პურის მთელი სიმძიმე მხოლოდ სახელმწიფო გლეხებს აწვიათ კისერზე, მაგრამ არა სათითაოდ ყველას, არამედ შედარებით შეძლებულ კომლებს. სხვა უწყების გლეხები კი მას საერთოდ არ იხდიდნენ. ტერიტორიულად ის მხოლოდ ქახეთით, უფრო ზუსტად მაშინდელი

¹ სსია, ფ. 254, საქ. 19, ფურც. 9—10, 60, 61 და სხვ.; И. Антелава, Гос. крест..., გვ. 292.

² იქვე, ფ. 2, საქ. 814, ფურც. 11—14; ი. ანთელავა, იქვე, გვ. 293.

³ იქვე, ფ. 241, ანაწ. 7, საქ. 562, ფურც. 16.

⁴ И. Антелава, Государственные крестьяне..., გვ. 295.

სიღნაღისა და თელავის მაზრებით შემოიფარგლებოდა.

იმ გადასახადების რიცხვს, რომელსაც მწარმოებელი კლასი პურით უხდიდა ხაზინას, ეკუთვნოდა დალაც. დალა, განსხვავებით კოდის პურისა და სურსათისაგან, წარმოადგენდა მიწის გადასახადს, რენტას, რომელსაც იღებდა სახელმწიფო გლეხებისაგან, როგორც მსხვილა მიწის მფლობელი, ფეოდალი. მისი რაოდენობა მერყეობდა ჩვეულებრივ შემოსავლის $\frac{1}{10}$ -დან $\frac{1}{5}$ -მდე. მასალების შესწავლიდან ჩანს, რომ დალას იხდიდა არა ყველა სახელმწიფო გლეხი, არამედ მხოლოდ ის, რომელიც სარგებლობდა ნადელის ზევით სახაზინო მიწით. ერთ საბუთში, მაგალითად, მითითებულია, რომ ჩვენთვის საინტერესო გადასახადი ეწერებოდა „მხოლოდ სახაზინო საღალო მიწებით“ მოსარგებლე გლეხებს. «Сной этот (ე. ი. დალა — ავტ.), — наоткупа мёртв, 1852 წლით დათარიღებულ საბუთში, — производится... с тех только казенных крестьян, кои, сверх отведеных им для хлебопашества земель, еще обрабатывают некоторые пустопорожные участки»¹ (ხაზი ჩვენია — ავტ.).

ი. ბახტაძის აზრით, დალას მხოლოდ სახელმწიფო გლეხები იხდიდნენ², რაც სინამდვილეს არ შეეფერება. დანამდვილებით შეიძლება ითქვას, რომ დალას იხდიდა ყველა ის საბატონო და საეკლესიო გლეხი, რომელიც სახაზინო მიწას ამუშავებდა. გადამხდელები იყვნენ არა მარტო სახელმწიფო, არამედ „სახაზინო მიწებით მოსარგებლე მემამულეთა გლეხებიც“³. იმერეთის მმართველის გენერალ გორჩაკოვის მოწმობითაც (1825 წ.), დალას აძლევდნენ სახელმწიფოს სოფ. ვარციხისა და კვახჩირის ახლომახლო მდებარე სახაზინო მიწებით მოსარგებლე საბატონო და საეკლესიო გლეხებიც⁴.

შემოთქმული საფუძველს გვაძლევს დავასკვნათ, რომ დალა იყო მიწის გადასახადი, რენტა, რომელსაც იხდიდნენ სახელმწიფო გლეხები, მაგრამ არა ყველა, არამედ მხოლოდ ნადელის ზევით სახაზინო მიწით მოსარგებლე ნაწილი. მასვე იხდიდნენ აგრეთვე საბატონო და საეკლესიო გლეხებიც, თუკი ისინი იჯარით იღებდნენ სახაზინო მიწებს.

სახელმწიფო გლეხთა გადასახადებს შორის მასალები კულუხსაც ასახელებენ. მას, როგორც ჩანს, იხდიდნენ უმთავრესად გორის, თე-

¹ სსცია, ფ. 239, საქ. 340, ფურტ. 8.

² И. Л. Бахтадзе, Податное обложение..., გვ. 6.

³ სსცია, ფ. 239, საქ. 340, ფურტ. 8, შეადარე ЦГВИАМ, ф. ВУА, д. 18481, л. 38.

⁴ იქვე, ფ. 2, ანაწ. 1, საქ. 1531, ფურტ. 1.

ლავისა და სიღნაღის მაზრის სახელმწიფო გლეხები, რომელთაც სახაზინო მიწებზე ვენახები ჰქონდათ გაშენებული. კულუხს იხდიდა უშუალო მწარმოებელი პირველ რიგში სახაზინო სანადელო მიწიდან. «Кахетинские деревни, — წერდა 1820 წელს სახაზინო ექსპედიცია, — населенные казенными крестьянами и снабженные в достаточном количестве землею, удобною для хлебопашества и разведения виноградных садов, платят казне подати, сверх обыкновенной, на все крестьянское состояние наложенной, называемой сурсат, еще две особые, как-то: хлебную подать под названием кодис-пури и винную под названием кулухи»¹. რომ კულუხს პირველ რიგში სწორედ სანადელო მიწაზე ვენახის მქონე სახელმწიფო გლეხი იხდიდა, ამას ბევრი სხვა საბუთიც ადასტურებს. ერთ მათგანში, მაგალითად, გორის სახელმწიფო გლეხთა გადასახადების ჩამოთვლას რომ შეიცავს, დასახელებულია კულუხიც, რომელსაც ჩვენთვის საინტერესო უწყების სოფლის მშრომელი მოსახლეობა აძლევდა თურმე ხაზინას «За разведение виноградных садов на уделенной в участок им земле»² (ხაზი ჩვენია — ავტ.).

მაგრამ ცხოვრება ხშირად გვერდს უვლიდა, არღვევდა ამ საერთო წესს და ბევრად ისეთ სახელმწიფო გლეხებს, რომელთაც ვენახები საბატონო და საეკლესიო მიწებზე ჰქონდათ გაშენებული. ამ მხრივ დამახასიათებელია ვეფხვისციხის სახაზინო გლეხთა მაგალითი. ისინი, მიუხედავად იმისა, რომ მათი ვენახები საეკლესიო მიწებზე იყო გამართული, იძულებული გამხდარან 1821 წლიდან ეხადათ კულუხი არა მარტო ეკლესიის, არამედ ხაზინის სასარგებლოდაც³.

უნდა ითქვას, რომ კულუხის გადახდა, როგორც წესი, ხდებოდა ნატურით, მიღებული ღვინის $\frac{1}{10}$ — $\frac{1}{7}$ ნაწილის რაოდენობით. მაგრამ იყო გამონაკლისი შემთხვევებიც, როდესაც ხაზინა ამ გადასახადს ფულადი ანაზღაურებით იღებდა⁴.

პროდუქტადი გადასახადების რიცხვს ეკუთვნოდა ყალანიც, რომელსაც მხოლოდ დუშეთის მაზრის სახელმწიფო გლეხები იხდიდნენ პურის შემოსავლის ნაწილის სახით. 1844 წლიდან კი ხაზინა ამ გადასახადს ფულად იღებდა. ტიტულიარული სოვეტნიკი დობრონრაოვი, რომელიც 1845 წელს მივლინებულ იქნა ხსენებულ მაზრაში გლეხთა საჩივრების აღგოლზე შესამოწმებლად, წერდა: «Из произведенного мною обследования и переписки оказалось, (что) крестьяне еще при грузинских

¹ სსცია, ფ. 239, საქ. 814, ფურტ. 11—14.

² იქვე.

³ И. Антелава, Государственные крестьяне..., გვ. 299.

⁴ იქვე, გვ. 300.

царях были обложены постоянною хлебною податью, называемую сурсат и калань, которая взималась с них по 1844 год, а с этого года хлебная подать заменена денежною»¹. როგორც ვხედავთ, ყალანი მოხსენიებულია კოდის პურის მაგივრად, აღმოსავლეთ საქართველოს სხვა რაიონების (კერძოდ, კახეთის) გლეხები რომ იხდიდნენ.

ყალანით, განსხვავებით სურსათისგან, იბეგრებოდნენ არა კომლები, არამედ საკომლოს სახელწოდებით ცნობილი გლეხთა მიწის ნაკვეთები. საკომლო ეწოდებოდა მიწის იმ ფართობს, რომელიც საჭირო იყო ერთი ოჯახის ცხოვრება-არსებობისათვის. მისი რაოდენობა სხვადასხვა იყო საქართველოს სხვადასხვა რაიონში და მერყეობდა 7,5 და 10 დესეტინას შორის. მთიან ზონაში, მაგალითად, საკომლო, ყოველ შემთხვევაში ოფიციალურად, უფრო მაღალი ნორმის შემცველი იყო, ვიდრე ბარში და უდრიდა 20 დლიურს ან 10 დესეტინას. სინამდვილეში კი იგი ხშირად ამაზე გაცილებით ნაკლები იყო და ერთ დესეტინა მიწის ფართობსაც არ აღემატებოდა. ნადვორნი სოვეტნიკ ჭილაშვილის მოწმობით (1827 წ.), მაგალითად, ხევის სოფლებში თითქმის ყველა საკომლოზე დასახლებული იყო რამდენიმე ოჯახი, რომელთაგან თითოეულზე მოდიოდა საშუალოდ „არა უმეტეს ერთი დესეტინა სახნავ-სათესი მიწისა“².

ყალანით დაბეგვრისას ანგარიში არ ეწეოდა საკომლოზე დასახლებულ კომლთა რაოდენობას. ხაზინა იღებდა ყალანს არა კომლთა რაოდენობის, არამედ საკომლოთა რიცხვის მიხედვით. უფრო მეტად სწორედ ის სოფელი იბეგრებოდა, რომელშიაც საკომლოთა მეტი რაოდენობა ითვლებოდა.

პროდუქტადი გადასახადების ფორმას განეკუთვნებოდა აგრეთვე ეგრეთ წოდებული ბ ე გ ა რ ა და ს ა ჩ უ ქ ა რ ი. ორივეს მხოლოდ გორის მაზრის სახელმწიფო გლეხები იხდიდნენ, მაგრამ არა ყველა, არამედ ნაწილი. საქმარისია აღვნიშნოთ, რომ 629 კომლ სახაზინო გლეხიდან, რომელიც 1813 წლის ერთი უწყისის თანახმად გორის მაზრაში ირიცხებოდა, ბეგარით მხოლოდ 97 კომლი (ან საერთო რაოდენობის 15,7%) ჩანს დაბეგრილი³. ვინ იყო მანც მისი გადამხდელი? ეტყობა მას მარტო ოსი სახელმწიფო გლეხები იხდიდნენ, რომლებიც გორის მაზრის ცხრა სოფელში ცხოვრობდნენ. ისინი მიწათმოქმედებასაც ეტანებოდნენ, მაგრამ მთავარ საქმიანობად მანც მეჯოგეობა-მესაქონლეობა ჰქონდათ. ბეგარა სწორედ ამ მეჯოგე ოს სახელმწიფო გლეხთა გადასახადი იყო, რომელსაც ისინი ცხვრებით იხდიდნენ. «Под названием бегаро, — ნაქვაშია 1823

¹ სსცია, ფ. 4, საქ. 126, ფურც. 10.

² АКАК, VII, ч. I, გვ. 349.

³ И. Антелива, Государственные крестьяне..., გვ. 303.

წლის ერთ საბუთში, — разумеется сбор по два барана и по одному барашку с сакомло»¹.

საჩუქრის გადამხდლებიც იგივე ოსი, გორის მაზრის 9 სოფელში მობინადრე, სახელმწიფო გლეხები ყოფილან. მისი გადახდის პრინციპების შესახებ საბუთში ვკითხულობთ: «Сачукаро взимается в течение трех лет один раз в последнем году с каждого сакомло по одному быку сверх вышеизложенных двух баранов и одного барашка»². ეს მოწმობა დადასტურებულია სხვაგანაც, მხოლოდ იმ განსხვავებით, რომ იქ საკომლოს მიერ გადასახდელი ხარების რაოდენობად ნაჩვენებია არა ერთი, არამედ ორი³.

გარდა ზემოთ ჩამოთვლილი პროდუქტადი გადასახადებისა, სახელმწიფო გლეხები, როგორც ვთქვით, ფულად გადასახადებსაც იხდიდნენ. ფულადი გადასახადი იყო, კერძოდ, ს ა ბ ა ლ ა ხ ო. იმით იბეგრებოდნენ სახაზინო საძოვრებით მოსარგებლე გლეხები. ასეთები იყვნენ პირველ რიგში თუშები, ფშავეები და ხევსურები. ისინი ყოველწლიურად, დაწყებული 1808 წლიდან, სახელმწიფოს უხდიდნენ ყოველ სულ ცხვარზე 2 მანეთს და ყოველ ბატკანზე — 1 მან. 20 კაპიკს⁴.

ყველაზე მეტი მნიშვნელობა ფულად გადასახადებს შორის ეგრეთ წოდებულ ფულად მ ა ხ ტ ა ს ჰქონდა. ერთი ანონიმი ავტორის მოწმობით, მახტით იბეგრებოდნენ მხოლოდ „ვაჭრები და სახელმწიფო გლეხები“⁵. გენ.ერმოლოვის სიტყვით კი, მახტას, ამ ქართველ მეფეთადროინდელ გადასახადს, იხდიდა მხოლოდ თბილისის მცხოვრებთა ის ნაწილი, რომელიც ცნობილი იყო «Под названием мокалаков или граждан государственных»⁶. სინამდვილეში კი მახტას აწერდნენ არა მარტო თბილისის მოქალაქეებს, არამედ აღმოსავლეთ საქართველოს სახაზინო გლეხებს საერთოდ, რომლებიც ვაჭრობა-მესარეწოებას ეტანებოდნენ⁷. მასვე იხდიდა აგრეთვე ყაზახის, ბორჩალოსა და შამშადილის დისტანციების სახაზინო უწყების მშრომელი მოსახლეობაც.

მახტა, როგორც აღვნიშნეთ, ყველაზე მნიშვნელოვანი ფულადი შემოსავლის წყარო იყო. საკმარისია ითქვას, რომ 1842 წელს, მაგალითად, საქართველო-იმერეთის გუბერნიის ფულადი შემოსავლის დაახლოებით 85,3% სწორედ მახტაზე მოდიოდა⁸.

¹ სსცია, ფ. 2, ანაწ. 1, საქ. 969, ფურც. 49—53.

² იქვე.

³ И. А н т е л а в а, Государственные крестьяне..., გვ. 304.

⁴ იქვე, გვ. 305.

⁵ ЦГВИАМ, ф. ВУА, д. 18481, л. 38.

⁶ АКАК, VI, გვ. 9.

⁷ И. А н т е л а в а, Государственные крестьяне..., გვ. 306—307.

⁸ იქვე, გვ. 307.

ფულადი გადასახადი მალი, შემოღებული ჯერ კიდევ XV საუკუნის მეორე ათეული წლების დასაწყისში მტრის მიერ დანგრეული ქვეყნის აღდგენის მიზნით, როგორც მოსალოდნელიც იყო, დატოვებულ იქნა. საქართველოს რუსეთთან შეერთების შემდეგაც. მას იხდიდნენ გორისა და თბილისის მოქალაქენი და სახელმწიფო გლეხები, მაგრამ არა ყველა, არამედ მხოლოდ მამრობითი სქესის წარმომადგენლები. რუსული მმართველობის შემოღების შემდეგ მას ხაზინა შემდეგი რაოდენობით იღებდა: ცოლიანებისგან — 6 აბაზს, ხოლო უცოლოებისგან — 3 აბაზს¹.

გადასახადების მძიმე ტვირთი აწვა დასავლეთ საქართველოს მოსახლეობასაც. რუსეთის მთავრობამ, რომელიც ყოველი სიახლის ცხოვრებაში გატარებას მიაჩნდა გარკვეული შიშით ეკიდებოდა, გადაწყვიტა, ყოველ შემთხვევაში პირველ ხანებში, უცვლელად დაეტოვებინა ძველიდანვე არსებული საგადასახადო სისტემა. ასე მოიქცა ის, კერძოდ, იმერეთში. იქაც მწარმოებელი კლასი, კონკრეტულად კი სახელმწიფო გლეხები, ფულად და პროდუქტად გადასახადებს გარდა, ასრულებდნენ მეტად მძიმე, დიდი ღრობის, ფიზიკური ძალისა და მატერიალური მსხვერპლის მომთხოვნ შრომით ბეგარას.

იმერეთის დამოუკიდებლად არსებობის პერიოდში სამეფო ხაზინის უმთავრეს შემოსავალს წარმოადგენდა საური, საუდიერო და საციხე. საურით, რომელიც ფულადი გადასახადების რიცხვს განეკუთვნებოდა, იბეგრებოდა კომლი ორი მარჩილის² რაოდენობით. იმავე რაოდენობით და ასევე კომლობრივად იკრიფებოდა აგრეთვე მეორე ფულადი გამოსაღები — საციხეც, რომელიც სამხედრო დანიშნულებისათვის იყო გამიზნული. რაც შეეხება საუდიეროს, მისი გადახდა ხდებოდა სასოფლო-სამეურნეო პროდუქტებით. ის თითოეულ კომლს ხაზინაში შეჰქონდა 15 ბათმანი³ ღომისა (ან 6 ბათმანი ხორბლის) და 40 კოკა (600 ბოთლი) ღვინის რაოდენობით. ამას ემატებოდა მსხვილფეხა რქოსანი საქონელი, ანგარიშით თითო სული ყოველ 20 — 25 კომლზე⁴.

ამ გადასახადებიდან სახელმწიფოს რუსული მმართველობის დროს მეტად მცირე თანხა შესდიოდა. საკმარისია ითქვას, რომ ხაზინა, 1817 წელს შეგროვილი ცნობების თანახმად, მთელი იმერეთის მშრომელი მოსახლეობიდან ყველა სახის გადასახადებისა და შემოსავლის სახით ღე-

¹ И. Антелава, Гос. крестьяне..., გვ. 309. მალის შესახებ 1801 წლამდე იხ. „დასტურლამალი“ („ქართული სამართლის ძეგლები“, ი. დოლიძის გამოცემა, თბ., 1965, გვ. 281); შ. მ ე ს ხ ი ა, „მასალები“, გვ. 2; ი. ს უ რ გ უ ლ ა ძ ე, ნარკვევები „საქართველოს სახელმწიფოსა და სამართლის ისტორიიდან“, თბ., 1963, გვ. 177.

² მარჩილი — დაახლოებით 26 კაპიკი.

³ ბათმანი — წონის ერთეულია, უდრის 18 გირვანქას.

⁴ АКАК, V, გვ. 475.

ბულობდა სულ მხოლოდ 16 745 მანეთს. შემოსავლის ასეთი სიმცირე აიხსნება შემდეგი გარემოებით. პირველი, ბევრმა იმერელმა საერო და სასულიერო ფეოდალმა ადრე, ჯერ კიდევ რუსული მმართველობის დამყარებამდე, მიიღო ეგრეთ წოდებული სითარხნის სიგელი, რომლის მიხედვით მათი ხელქვეითი გლეხები მთლიანად ან ნაწილობრივ განთავისუფლდნენ სახელმწიფო გადასახადების ხაზინაში შეტანის მოვალეობისგან. ამას, ბუნებრივია, მწარმოებელი კლასისთვის არავითარი მნიშვნელობა არ ჰქონდა, რადგანაც იგი ამ გადასახადს მერეც იხდიდა, თუმცა არა ხაზინის, არამედ მისი უშუალო ბატონის სასარგებლოდ. მეორე, ზოგ შემთხვევაში, განსაკუთრებული დამსახურებისათვის თარხნობას უშუალოდ თვით გლეხებსაც აძლევდნენ. ისევე როგორც ვაჭრებსა და ხელოსნებს, რაც მათ საერთოდ ათავისუფლებდა სახელმწიფო გადასახადების ტვირთისაგან. მესამე, სახაზინო გადასახადებით არ იყო დაბეგრული სახელმწიფო თუ სხვა კატეგორიის გლეხთა ერთი ნაწილი, რომელიც ცნობილი იყო თავისი სიღარიბით. მათ დაბეგვრას, ცხადია, არავითარი აზრი არ ჰქონდა და სრულიად უპერსპექტივოდ გამოიყურებოდა. დასასრულ, მეოთხე, გადამხდელ კომლთა რიცხვის შემცირებას ხელს უწყობდა აგრეთვე მექრთამეობა, ყალბი საბუთების ფაბრიკაცია, კომლების გადამალვა და საერთოდ ზუსტი ცნობების უქონლობა სოფლის მშრომელი მოსახლეობის სხვადასხვა კატეგორიის რიცხობრივი შემადგენლობის შესახებ.

მართალია, აქ ჩამოთვლილი გადასახადებით უკლებლივ ყველა სახაზინო გლეხი არ იბეგრებოდა, მაგრამ ის, რითაც იგი იბეგრებოდა, მაინც მეტად ძნელად საზიდ ტვირთს წარმოადგენდა და უშუალო მწარმოებლისგან სერიოზულ მატერიალურ და ფიზიკურ მსხვერპლს მოითხოვდა. მდგომარეობას ართულებდა ისეთი ფაქტორები, როგორცაა მშრომელი მოსახლეობის მცირემიწიანობა, გადამხდელი წოდების ნივთიერი შესაძლებლობის გაუთვალისწინებლობა, ტექნიკის დაბალი დონე, სტიქიური უბედურებანი, სამრქალაქო და სამხედრო მოხელეთა აღვირახსნილობა და სხვ. ყველაფერი ეს ხელს უწყობდა საგადასახადო დავალიანების წარმოქმნას, დავალიანებისა, რომელსაც მთავრობამ ვერაფერი მოუხერხა. მიუხედავად მიღებული ზომებისა.

თუ როგორ არაწესიერად შედიოდა ხაზინაში სახელმწიფო გადასახადები, ჩანს შემდეგი მაგალითიდან. 1830—1842 წლებში თელავის მაზრის სახელმწიფო, საბატონო და საეკლესიო გლეხებს კოდის პურისა და სურსათის ანგარიშში უნდა შეეტანათ 364 408 კოდი ხორბალი და ქერი. გადაიხადეს კი 128 307 კოდი, ან შეწერილი რაოდენობის მხოლოდ 59,47%¹.

¹ И. Антелава; Государственные крестьяне..., გვ. 321—322.

ზემოთ აღწერილი საგადასახადო სისტემა არსებობდა საქართველოში 1843—1845 წლებამდე: ამ წლებში კი გატარდა რეფორმა, რომელმაც ყველა პროდუქტადი სახაზინო გადასახადი ფულადი გადასახადით შეცვალა. აღნიშნული რეფორმის გატარების საფუძველს წარმოადგენდა სასაქონლო წარმოებისა და ფულად ურთიერთობათა განვითარება გასული საუკუნის 30—40-იანი წლების საქართველოში. ამ საქმის ცხოვრებაში გატარება დააჩქარა სოფლის მშრომელი მოსახლეობის ენერგიულმა პროტესტმა, რომელიც მიმართული იყო პროდუქტადი გადასახადების უკუღმართი მხარეების წინააღმდეგ. ის განუსაზღვრელი ბოროტმოქმედება, რომელსაც ადგილი ჰქონდა კოდის პურის, სურსათის, ყალანისა და სხვათა აღება-აკრეფის დროს, გადამხდელ წოდებას აიძულებდა უპირატესობა ფულადი დაბეგვრისათვის მიეცა და მოეთხოვა კიდევ მისი შემოღება.

უშუალოდ რეფორმის მომზადება 1842 წელს დაიწყო. წარმოდგენილი რამდენიმე პროექტიდან მარტო ერთი, სახაზინო პალატის თავმჯდომარის ნიკოლოზ ბეზაკის, პროექტი იქნა მოწონებული. აკრიტიკებდა რა არსებულ საგადასახადო სისტემას, იგი მოითხოვდა: პირველი, გაუქმებულიყო ყველა მანამდე არსებული, სხვადასხვა სახელწოდებით ცნობილი გადასახადი და დაწესებულიყო ერთი ფულადი საკომლო გადასახადი, და მეორე, გადასახადის სიდიდის განსაზღვრისას მაქსიმალურად მხედველობაში მიეღოთ გადამხდელი წოდების ეკონომიური მდგომარეობა, რასაც აქამდე ანგარიში თითქმის არ ეწეოდა.

უმალღესმა ხელისუფლებამ მოიწონა ბეზაკის პროექტის ძირითადი პრინციპები და 1843 წ. მისცა მას დასტური. დაიწყო რეფორმის პრაქტიკულად განხორციელება. ყველაზე ადრე იგი ახალციხის მაზრაში გატარდა (1843 წ.). მის ტერიტორიაზე მობინადრე სახელმწიფო გლეხები გადასახადის გადახდის მხრივ ორ ჯგუფად (разряд) დაჰყვეს. სახაზინო მიწაზე მცხოვრები პირველი ჯგუფის სახელმწიფო გლეხი 6 მანეთით იბეგრებოდა, ხოლო მეორესი — 4 მანეთით. სახაზინო მიწების არმქონე გლეხების გადასახადი კი უდრიდა: პირველი ჯგუფისა 3 მანეთს, მეორესი — 2 მანეთს. რაც შეეხება მომთაბარე სახ. გლეხებს, რომელთა რაოდენობა ახალციხის მაზრაში სულ 137 კომლს უდრიდა, იბეგრებოდნენ ისე, როგორც სახაზინო მიწებზე მცხოვრები მეორე ჯგუფის გლეხები, ე. ი. 4 მანეთის რაოდენობით.

მომდევნო 1844 წელს რეფორმა აღმოსავლეთ საქართველოს სხვა ნაწილშიც გატარდა. გამონაკლისს თუშეთი, ფშავეთი და ხევსურეთი წარმოადგენდა, სადაც «во уважение военных обстоятельств», ახალი წე-

სების შემოღება 1845 წლამდე იქნა გადადებული. „ცილობდა“ რა გადასახადის სიდიდე-მოცულობის მწარმოებელი კლასის ეკონომიური მდგომარეობასთან შეფარდებას, ხელისუფლებამ აღმოსავლეთ საქართველოს სოფლის მშრომელი მოსახლეობა (კერძოდ, სახელმწიფო გლეხები) მატერიალური შესაძლებლობის მიხედვით რამდენიმე ჯგუფად დაჰყო. ჯგუფების რაოდენობა სხვადასხვა მაზრაში სხვადასხვა იყო. თბილისისა და გორის მაზრაში, მაგალითად, მათი რიცხვი 4-ს უდრიდა, ხოლო თელავის და სიღნაღის მაზრაში — 3-ს. თითოეული ჯგუფისათვის შესაფერისი სიდიდის გადასახადი იყო დაწესებული. იგი მერყეობდა: თბილისის მაზრაში 1,5 მანეთიდან 10 მანეთამდე (კომლზე), გორის მაზრაში — 2 მანეთიდან 7 მანეთამდე, თელავის მაზრაში — 3,5 მანეთიდან 5 მანეთამდე და სიღნაღის მაზრაში — 3 მან-დან 6 მანეთამდე.

აღმოსავლეთ საქართველოს გლეხები, გარდა საკომლო გადასახადისა, იხდიდნენ აგრეთვე საერობო გამოსაღებსაც (земский сбор). მას ყველა ჯგუფის გლეხი იხდიდა თანაბარი რაოდენობით — 2 მანეთს კომლზე.

ქუთაისის, შორაპნის და რაჭის მაზრებში სახელმწიფო გადასახადების კომუტაცია 1845 წელს განხორციელდა, ხოლო ოზურგეთის მაზრაში (გურიი) — 1860 წელს. პირველ სამ მაზრაში სახაზინო მიწებზე მცხოვრები სახელმწიფო გლეხები, ისე როგორც საეკლესიო ყმები, სამ ჯგუფად იყვნენ დაყოფილი. სახელმწიფო გლეხთა გადასახადები მერყეობდა (ჯგუფების მიხედვით) 3-დან 5 მანეთამდე, საეკლესიო ყმების კი — 1 მანეთიდან 2 მანეთამდე. რაც შეეხება კერძო მემამულეთა მიწებზე მცხოვრებ გლეხებს, ისინი ჯგუფებად არ იყოფოდნენ და ყველა ხაზინის სასარგებლოდ იხდიდა ერთნაირ გადასახადს — ერთ მანეთს კომლზე.

ქუთაისის, შორაპნის და რაჭის მაზრის სახელმწიფო, საეკლესიო და საბატონო გლეხები, მსგავსად აღმოსავლეთ საქართველოს სოფლის მშრომელი მოსახლეობისა, ხაზინას აძლევდნენ საერობო გამოსაღებსაც. თითოეული კომლი, განურჩევლად უწყებისა და ეკონომიური მდგომარეობისა, იხდიდა 1 მანეთსა და 35 კაპ.-ს.

გურიის გლეხები (კერძოდ, სახელმწიფო ყმები) ხელისუფლებას ჯგუფებად არ დაუყვია, რადგანაც ისინი, სრულიად უსაფუძვლოდ, ერთნაირი ეკონომიური მდგომარეობის მქონე მწარმოებლებად აღიარეს. გადასახადების სიდიდე გურიაში ისაზღვრებოდა იმისდა მიხედვით, თუ რომელ უწყებას ეკუთვნოდა გადამხდელი — სახელმწიფოს, კერძოს თუ საეკლესიოს. სხვადასხვა უწყების გლეხები სხვადასხვანაირად იბეგრებოდნენ. სახაზინო ყმები, მაგალითად, იხდიდნენ კომლზე 4 მანეთს, საბატონო და საეკლესიო ყმები კი 1 მან. და 1 მან. და 50 კაპ.-ს (შესაბამისად).

ამისგან დამოუკიდებლად და მის ზევით ოზურგეთის მაზრის სახელმწიფო, საბატონო და საეკლესიო გლეხები ხაზინას აძლევდნენ საერაობა გამოსალეხსაც 75 კაპიკს კომლზე.

ჩვენ მიერ წარმოდგენილი სურათი სრული არ იქნება, თუ ნათქვამს არ დავმატა ზოგიერთი ცნობა ეგრეთ წოდებული ნატურალური ან შრომითი ბეგარის შესახებ. შრომითი ბეგარა (მარაგზების მშენებლობა, სატრანსპორტო საშუალებათა გაყვანა და სხვ.) მეტად მძიმე ტვირთად აწვა მწარმოებელი კლასის ყველა კატეგორიას, მათ შორის სახელმწიფო გლეხებსაც. ისინი მათ დიდ ღროსა და ენერგიას ართმევდნენ და, როგორც წესი, ვეებერთელა მატერიალურ ზიანს აყენებდნენ. 1843—1845 წლების რეფორმამ, რომელმაც, როგორც ვნახეთ, მანამდე არსებული მრავალრიცხოვანი გადასახადი ერთი ფულადი ეკვივალენტით შეცვალა. ხელუხლებლად დატოვა ნატურალური (შრომითი) ბეგარა და მისი მოხდის აღრიცხვითი წესები. თუ რა მძიმე ტვირთად აწვა იგი მშრომელ მოსახლეობას, ჩანს შემდეგი მონაცემებიდან: 1851 წელს, მაგალითად, საქართველოს სახელმწიფო გლეხებს (აჭარის, აფხაზეთის, სვანეთისა და სამეგრელოს გამოკლებით) ხელისუფლების მოთხოვნით გამოუყვანიათ: 12 770 ურემი, 90 833 კაცი და 1 490 საპალნე¹. ყველაფერი ეს ფულზე გადატანით უდრიდა დაახლოებით 142 000 მანეთს. თუ ამ თანხას გავყოფთ თბილისისა და ქუთაისის გუბერნიის სახელმწიფო გლეხების კომლთა რაოდენობაზე², მივიღებთ ნატურალური ბეგარის საშუალო საკომლო მაჩვენებელს — 3 მანეთსა და 20 კაპიკს.

ნატურალური ბეგარა ძლიერ აწუხებდა ყველა რაიონის მშრომელ მოსახლეობას, მაგრამ ზოგან ის განსაკუთრებით სამძიმო იყო. ასე იყო, კერძოდ, სიღნაღის, გორისა და ახალციხის მაზრებში. უკანასკნელში, მაგალითად, 1851 წელს სახელმწიფო გლეხის თითო ოჯახზე მოდიოდა საშუალოდ 5 მანეთის ნატურალური ბეგარა, ხოლო სიღნაღის მაზრაში — 12 მანეთის. წარმოდგენა რომ ვიქონიოთ ამ თანხის სიდიდეზე, აღვნიშნავთ, რომ მაშინ ერთი ცხვრის საბაზრო ფასი 1 მანეთსა და 20 კაპს არ აღემატებოდა.

საკითხთან დაკავშირებულ ოფიციალურ საბუთებში არაერთხელაა ხაზგასმით აღნიშნული, რომ მთავრობა, ატარებდა რა რეფორმას, მიზნად ისახავდა არა გადასახადების გადიდებას, არამედ გამომღები წოდების ეკონომიური მდგომარეობის გაუმჯობესებას, საგადასახადო ტვირთის შემსუბუქებას. სინამდვილეში კი საქმე სულ სხვაგვარად იყო. საკმარისია

¹ И. Антелава, Государственные крестьяне..., გვ. 428.

² ვორონოვის ანგარიშის თანახმად, 1852 წლის I-ლი იანვრისათვის ხსენებულ გლეხთა კომლთა რაოდენობა 43 134 უდრიდა (АКАК, X, ч. II, გვ. 982).

ითქვას, რომ რეფორმის გატარების შედეგად აღმოსავლეთ საქართველოს სახელმწიფო გლეხთა სახაზინო გადასახადები (საერობო გამოსაღების ჩაუთვლელად) გაიზარდა 76,4%-ით (57 339 მანეთიდან 101 022 მანეთამდე).

ახალი საგადასახადო სისტემის უდიდეს ნაკლს წარმოადგენდა ის, რომ გადასახადების სიდიდის განსაზღვრა-დაწესებისას არსებითად არ ეწეოდა ანგარიში გამოძღვები წოდების ეკონომიურ მდგომარეობას, თუმცა ამ უკანასკნელის მხედველობაში მიღების აუცილებლობაზე ბევრს ლაპარაკობდნენ უმაღლესი მთავრობისა და კავკასიის ადმინისტრაციის წარმომადგენლები. ამას ვერ მაღავედნენ თვით ოფიციალური პირებიც კი. ერთი მათგანი პირდაპირ მიუთითებდა, რომ 1843—1845 წლებში ნატურალური გადასახადების ფულადით შეცვლა „მოხდა მოსახლეობის ეკონომიური მდგომარეობის სათანადო შესწავლის გარეშე“¹. სახელმწიფო ქონებათა მინისტრი გრაფი კისელიოვიც მიუთითებდა, რომ რეფორმის გატარებისას დარღვეულ იქნა ერთი მთავარი პრინციპთაგანი, რომლის თანახმადაც «Мера податей должна быть основана на точном вычислении чистого дохода, полученного земледельцем от предоставленных ему выгод»².

ამ პრინციპის დარღვევას შედეგად მოჰყვა სრული უსამართლობის დამკვიდრება მწარმოებელი კლასის დაბეგვრის საქმეში. ძალიან ხშირად მცირე შეძლების გლეხი, რომელიც ძლივს ახერხებდა ოჯახის რჩენას. უფრო მეტად იბეგვებოდა, ვიდრე მიწით და საწარმოო იარაღებით უხვად მომარაგებული, დიდი შეძლების მქონე გლეხი. ეხებოდა რა საკითხის ამ მხარეს, ქუთაისის სამხედრო გუბერნატორის მოვალეობის აღმსრულებელი კოლუბიაკინი წერდა (1852 წ.): «Подымное обложение очевидно несправедливо, ибо крестьянин, имевший трех возмужалых сыновей и снабженный пространством земли, соразмерным с средствами (и) рабочими, или примерно сорока кцевами, платит наравне с мужиком одиноким или обремененным детьми и обрабатывающим всего кцев восемь. Бывает и так, что два или три брата женатые, с сыновьями в силе лет, живут нераздельно, пользуясь землею, достаточною для трех семей, и платят все же за один дым, наравне с крестьянином, обрабатывающим участок, едва достаточный для прокормления семьи, состоящей из жены и малых детей»³.

¹ სსცია, ფ. 243, ანაწ. 1, საქ. 14, ფურც. 279.

² იქვე, ფ. 13, ანაწ. 24, საქ. 17, ფურც. 14. ЦГИА СССР, ф. 1268, оп. I, д. 268, лл. 310—319.

³ სსცია, ფ. 1115, საქ. 1, ფურც. 6.

ქართველმა გლეხმა, რომელიც საერთოდ დადებითად შეხვდა საგადასახადო სისტემის რეფორმას (კარგად შეხვდა იგი მის ძირითად პრინციპს — მრავალრიცხოვანი პროდუქტადი გადასახადების ფულადი ეკვივალენტით შეცვლას), ენერგიულად გაილაშქრა ახალი წესების უკუღმართი მხარეების წინააღმდეგ. მას არ შეუწყვეტია ბრძოლა გადასახადის მაღალი ნორმის წინააღმდეგ, ისეთი დაბეგვრის წინააღმდეგ, რომელიც აშკარად არ შეესაბამებოდა მის მატერიალურ მდგომარეობას.

მიუხედავად იმისა, რომ რეფორმის ბევრი უარყოფითი მხარე ჰქონდა და მან უფრო დაამძიმა მწარმოებელი კლასის საგადასახადო ტვირთი, ის მაინც მთლიანად დადებით შეფასებას იმსახურებს. ფულადი გადასახადების შემოღება, რაც სასაქონლო წარმოების განვითარებამ განაპირობა, თავის მხრივ, ხელს უწყობდა ქვეყნის შემდგომ ეკონომიურ პროგრესს. გლეხთა ფართო მასები, რომლებიც ამიერიდან ხაზინას ფულით უსწორდებოდნენ, იძულებული გახდნენ სულ უფრო ხშირად მიემართათ ბაზრისთვის და მეტი რაოდენობით ეწარმოებინათ სასაქონლო პროდუქცია. სოფლის მშრომელი მოსახლეობის დიდი მასშტაბით ჩათრევა სასაქონლო წარმოებისა და ვაჭრობა-კომერციის სფეროში წარმოადგენდა დიდად პროგრესულ მოვლენას, რომელიც ხელს უწყობდა ნატურალური მეურნეობის რღვევას, კლასობრივი დიფერენციაციის გაძლიერებასა და საერთოდ ფეოდალურ-ბატონყმურ ურთიერთობათა საფუძვლების მოშლას.

§ 2. საბატონო გლეხთა სოციალ-ეკონომიური მდგომარეობა

საბატონო გლეხებს რიცხობრივი თვალსაზრისით, როგორც ზემოთაც აღვნიშნეთ, მეორე ადგილი ეკავათ (37,831 კომლი ან 32,4%). მათი ეკონომიური მდგომარეობა უფრო მძიმე და უარესი იყო, ვიდრე სახელმწიფო გლეხისა. ეს კი, პირველ ყოვლისა, მიწის სიმცირით იყო გამოწვეული, რაც, როგორც უკვე ითქვა, სოფლის მშრომელი მოსახლეობის ყველა კატეგორიას აწუხებდა, მაგრამ განსაკუთრებით ის საბატონო ყმებს სტანჯავდა. საილუსტრაციოდ შეიძლება დავასახელოთ რაჭის სოფელი მოსტანო. იქ 20-იან წლებში, არსებული ცნობების თანახმად, 23 კომლ საბატონო გლეხის განკარგულებაში ყოფილა სულ 37 დესეტინა სახნავ-სათესი მიწა¹, რაც ოჯახზე გაანგარიშებით უდრიდა საშუალოდ 1,6 დესეტინას.

კიდევ უფრო საინტერესოა ცნობები ს. თერჯოლის (იმერეთი) საბატონო ყმათა მიწათმფლობელობის შესახებ რეფორმის წინარე ხანაში, უფ-

მკი, ნაკ. III, 1942, გვ. 39.

რო ზუსტად კი გასული საუკუნის 50-იან წლებში¹. ხსენებულ წლებში თერჯოლაში ირიცხებოდა სულ 98 კომლი საბატონო გლეხი, რომლებიც მათ განკარგულებაში მყოფი სავენახე, სახნავ-სათესი და სამოსახლო მიწის ფართობის მიხედვით შემდეგნაირად ნაწილდებოდნენ. 6 კომლს, ან კომლთა საერთო რაოდენობის 6,1%-ს, სულ არ ჰქონდა მიწა², 8 კომლში (8,4%) ორივე სქესის თითო სულზე მოდიოდა მხოლოდ 0,1 დესეტინა მიწა, 13 კომლში (13,3%) — 0,2 დესეტინა, 16 კომლში (16,3%) — 0,3 დესეტინა, 12 კომლში (12,2%) — 0,4 დესეტინა, 14 კომლში (14,3%) — 0,5 დესეტინა, 14 კომლში (14,3%) — 0,6 დესეტინა, 5 კომლში (5,1%) 0,7 დესეტინა, 1 კომლში (1,0%) — 0,8 დესეტინა, 3 კომლში (3,0%) — 0,9 დესეტინა, 2 კომლში (2,0%) — 1 დესეტინა, 3 კომლში (3,0%) — ერთიდან ორ დესეტინამდე და, დასასრულ, 1 კომლში (1,0%) — ორიდან სამ დესეტინამდე.

საშუალოდ კი სოფელ თერჯოლის საბატონო გლეხის თითო კომლზე მოდიოდა 2,8 დესეტინა სახნავ-სათესი, სავენახე და სამოსახლო მიწა, ხოლო ორივე სქესის თითო სულზე — 0,42 დესეტინა.

კიდევ უფრო სავალალო სურათს წარმოადგენდა მონაცემები, რომლებიც მთლიანად ქუთაისის გუბერნიას ეხება (აფხაზეთ-სამეგრელოს გამოკლებით). იქ რეფორმის წინარე ხანაში, ს. ავალიანის ცნობით³, საბატონო გლეხის თითო ოჯახზე მოდიოდა საშუალოდ 1,5-დან 2 დესეტინამდე მიწის ფართობი. ეს მაშინ, როდესაც, თვით ოფიციალურ პირთა მოწმობითაც, არამცთუ XIX საუკუნის პირველ ნახევარში, არამედ მიმდინარე საუკუნის დასაწყისშიც კი, როდესაც სასოფლო-სამეურნეო ტექნიკა შედარებით უკეთ იყო განვითარებული, ღარიბი გლეხის ოჯახის გამოსაკვებად ქუთაისის გუბერნიაში აუცილებელი იყო არანაკლებ 4—5 დესეტინა ვარგისი მიწისა⁴.

აღმოსავლეთ საქართველოში, როგორც ცნობილია, საერთოდ რამდენადმე უკეთესი სურათი იყო, მაგრამ სახარბიელო ვითარება არც იქ ყოფილა. იქაც სოფლის მშრომელი მოსახლეობის (მათ შორის საბატონო გლეხების) უდიდესი უმრავლესობა მცირემიწიანობა-უმიწობით იტანჯებოდა და მძიმე ეკონომიურ მდგომარეობაში იმყოფებოდა. არსებობის შესანარჩუნებლად მას უხდებოდა მიწის იჯარით აღება, გარე სამუშაოზე

¹ სსცია, ფ. 5, საქ. 56, ფურც. 368—403.

² უფრო ზუსტად რომ ვთქვათ, ამ 6 კომლიდან სამი საერთოდ უმიწო ჩანს, ხოლო სამს მიწა სხვასთან საზიაროდ ჰქონია.

³ С. А в а л и а н и, Крестьянский вопрос, I, გვ. 511—512.

⁴ სსცია, ფ. 39, ფურც. 21; И. А н т е л а в а, Государст. крестьяне..., II, გვ. 95. ზოგი თანამედროვის (მაგ. სახელმწიფო სამინისტროს ამიერკავკასიის რწმუნებულის ი. მედევედვის) აზრით, კი, გლეხისათვის საჭირო მიწის ფართობი ამაზე ვაცილებით მეტი უნდა ყოფილიყო (И. Антелава, Государственные крестьяне..., გვ. 75).

გასვლა და სხვა გზების ძებნა, რაც დიდი მატერიალური, ფიზიკური და მორალური მსხვერპლის გაღებასთან იყო დაკავშირებული.

საბატონო გლეხთა ცხოვრების პირობების განმსაზღვრელ მნიშვნელოვან ფაქტორს საგადასახადო სისტემა წარმოადგენდა. გადასახადი, როგორც უკვე ითქვა, მძიმე ტვირთად აწვა სოფლის მშრომელი მოსახლეობის ყველა კატეგორიას, მაგრამ ყველაზე მეტად ის მაინც საბატონო ყმებს აწუხებდა. მთავარი იყო არა გადასახადების სიდიდე-სიმრავლე, რაც თავისთავად მეტად ანგარიშგასაწვევი მომენტიცაა, არამედ სრული უწყსრიგობა ამ საქმეში და გადასახადების განუსაზღვრელობა. საქართველოს უმაღლესი მთავრობის შეკითხვაზე, თუ რა და რა გადასახადს იღებენ მემამულეები თავიანთი ხელქვეითი გლეხებისაგან, თბილისის, სიღნაღის, გორისა და დუშეთის მაზრის თავად-აზნაურთა წინამძღოლებმა უპასუხეს (1826 წ.), რომ აღნიშნულ საგანზე ცოტად თუ ბევრად სრული სურათის წარმოდგენა შეუძლებელია, რადგანაც კერძო მფლობელები თავიანთ ყმებს საკუთარი ნება-სურვილის მიხედვით ბეგრავენო¹. მემამულეთა წინაშე გლეხთა ვალდებულებების განუსაზღვრელობა-დაუდგენლობაზე ლაპარაკობდა აგრეთვე სტატსკი სოვეტნიკი ზავილეისკი თავის 1829 წლის 17 ნოემბრის პატაკში სტრეკოლოვისადმი². ასევე წერდა ცოტა მოგვიანებით, სახელდობრ 40-იანი წლების დასაწყისში, თბილისის მაზრის უფროსი. «Вообще принятыми обычаями, — ნათქვამია მის მოხსენებით ბარათში, — представлено помещиками право требовать повинности от своих крестьян по своему усмотрению... и потому повинности, взыскиваемые помещиками..., неодинаковы»³.

მიუხედავად ამ საყოველთაოდ აღიარებული გაურკვევლობა-არეულობისა, თანამედროვე დოკუმენტები მაინც იძლევა ერთგვარ საშუალებას მიახლოებით დავადგინოთ გადასახადების სია და ხასიათი. საბუთებიდან ჩანს, რომ გლეხები ჩვენთვის საინტერესო ხანაში მემამულეების სასარგებლოდ იხდიდნენ გადასახადებს შრომითი, პროდუქტადი და ფულადი რენტის სახით. წამყვანს ქვეყნის მასშტაბით რენტის მეორე სახე წარმოადგენდა. რაც შეეხება ფულად რენტას, მისი განვითარება განსაკუთრებით საგრძნობი მხოლოდ გასული საუკუნის 30-იანი წლებიდან გახდა იმ ძვრებთან დაკავშირებით, რასაც ადგილი ჰქონდა მხარის ეკონომიურ ცხოვრებაში.

რაში მდგომარეობდა შრომითი რენტა ან საბატონო ბეგარა, რასაც იმდროინდელი წყაროები «издольные повинности»-ს სახელით იცნობენ. «Повинности издольные (бегара), — ვკითხულობთ ერთ თანამედროვე:

¹ სსცია, ფ. 2, ანაწ. 1, საქ. 1202, ფურც. 10. СХАО, I, გვ. 254.

² АКАК, VII, 4, I, გვ. 27.

³ შ. ჩხეტიია, საგლეხო რეფორმის ისტორიისათვის აღმოსავლეთ საქართველოში, თბ., 1950, გვ. 327.

მოსხენებით ბარათში, — заключаются в том, что крестьяне обязаны пахать для помещика землю, засеивать, поливать и удобрять её; убирать хлеб, свозить его на гумно, обмолачивать, провеивать; обрабатывать и огораживать сады, косить сено, доставлять дрова и лес и работать при постройках, перевозке тяжестей и проч. Все эти работы отправляются без определенного числа рабочих дней, по мере хозяйственных нужд помещика и... средств самих крестьян»¹.

ზრომითი რენტა ან ბეგარა გლეხს ყოველწლიურად ართმევდა რამდენიმე ათეულ ღლეს² და ამდენად ის მისი მძიმე ეკონომიური მდგომარეობის განმსაზღვრელ ერთ-ერთ მნიშვნელოვან ფაქტორს წარმოადგენდა.

პროდუქტად რენტაში ან ნატურალურ გადასახადებში მთავარი ადგილი ღალასა და კულუხს ეკავა. პირველი მათგანი იყო პურის გადასახადი, რომელსაც იხდიდნენ გლეხები მემამულის მიწაზე მოყვანილი მოსავლიდან. ღალის რაოდენობა და მისი ადების წესი ყველგან ერთნაირი არ იყო. ზოგან ეს რაოდენობა უპირატესად მიწის ხარისხით განისაზღვრებოდა და ყოველდღიური მიწის ფართობში უშუალო მწარმოებელი ერთიდან ორ კოდამდე ბორბლეულს იხდიდა. ზოგან კი გადასახადის რაოდენობა მოსავლის $\frac{1}{7}$ — $\frac{1}{3}$ ნაწილს უდრიდა³.

კულუხი ღვინის გადასახადი იყო. მას იხდიდნენ გლეხები, რომელთაც ჰქონდათ ვენახები, განურჩევლად იმისა თუ ვისი იყო სავენახე ადგილი — მემამულის თუ საკუთარი. მისი რაოდენობა, წყაროების მოწმობით, მიღებული ღვინის $\frac{1}{7}$ — $\frac{1}{4}$ ნაწილით განისაზღვრებოდა⁴.

გარდა ამ ორი გადასახადისა, გლეხები ვალდებული იყვნენ ყოველ ღლესასწაულზე ბატონისათვის მიერთმიათ სოფლის მეურნეობის პროდუქტები, მიეღოთ და გამასპინძლებოდნენ „სტუმრად“ მოსულ ბატონს და მის თანმხლებ პირებს, ქორწილის დროს დახმარებოდნენ მემამულეს ფულით და სოფლის ნაწარმით, მიერთმიათ, კერძოდ, საქორწილო საკლავი (ძროხა), საკლავი მიეცათ მისთვის მოსავლის ადების დროს და სხვ.⁵

ფულადი გადასახადების შესახებ ზემოხსენებულ დოკუმენტში ნათქვამია: «Повинности денежные составляют: а) г а ц е р а — раскладочный сбор, производимый обыкновенно при особенных событиях в быту помещика, как-то: при свадьбах, отправлении в поход,

¹ სსცია, ფ. 220, საქ. 1064, ფურტ. 332. შდრ. АКАК, VIII, ч. I, გვ. 24.

² იხ. „მოსხენებითი ბარათი ბატონყმობაზე საქართველოში“ (1844), გამოკვეყნებული იმ. ჩ ხ ე ტ ი ა ს წიგნში „საგლეხო რეფორმის ისტორიისათვის აღმოსავლეთ საქართველოში“, გვ. 360.

³ სსცია, ფ. 220, საქ. 1064, ფურტ. 333. Барон Н и к о л а и, Воспоминания. «Русский архив», 1892 г., кн. 2, ч. 5, გვ. 97.

⁴ იქვე, ფურტ. 334, შდრ. АКАК, VIII, ч. 1, გვ. 24.

⁵ იქვე, ფ. 2, ანწ. 1, საქ. 1202, ფურტ. 10—13. შდრ. СХАО, I, გვ. 255—257.

похоронах, а нередко и без этих случаев; по заявляемой помещи-
ками надобности; количество этого сбора не определено; б) са-
чекмо — подать при выдаче замуж крестьянской девицы, смотря
по состоянию её жениха; в) саквриво — подать при выходе за-
муж крестьянской вдовы в количество 15 рублей. К этому же раз-
ряду повинностей относится г а с а м к р е л о — десятая часть из
движимого имущества крестьян при разделе оного по их желанию,
гносимая большею частью деньгами»¹.

როგორც იმ უწყისიდან ჩანს, რომელიც 1826 წელს გენერალმა ვე-
ლიამინოვმა წარუდგინა საქართველოს უმაღლესი მთავრობის საერთო
კრებას, თბილისის, სიღნაღის, გორისა და დუშეთის მაზრის გლეხები თა-
ვიანთ შემამულებებს უხდიდნენ 38 დასახელების სხვადასხვა გადასახადს².
იმავე წყაროს მოწმობით, გადასახადების ეს სია სრული არ იყო. სინამ-
დვილეში გლეხები დაბეგრული იყვნენ თურმე რიგი სხვა, ამ სიაში არ-
მოხვედრილი გადასახადებით.

ზემოთ მოტანილი მასალა მთლიანად აღმოსავლეთ საქართველოს ეხე-
ბა. რაც შეეხება დასავლეთ საქართველოს, იქ, მიუხედავად ზოგი სპე-
ციფიურობისა, საგლეხო გადასახადები ძირითადად იგივე იყო³. მაგრამ ეს,
რა თქმა უნდა, სრულებითაც არ ნიშნავს იმას, რომ გადასახადების ტვირ-
თი ერთნაირი იყო ჩვენი ქვეყნის ორივე მხარეში. დასავლეთ საქართვე-
ლოში ის გაცილებით მეტი იყო, რაც, სხვა გარემოებასთან ერთად (სოფ-
ლის მშრომელი მოსახლეობის განსაკუთრებული მცირე მწივანობა). აიხ-
სნება საერო და სასულიერო ფეოდალების შედარებით მეტი სიმრავლით.
«Несоразмерное число дворянства, — წერდა 1819 წელს რუსი
დამკვირვებელი ენგოლმი იმერეთის, გურიის, სამეგრელოსა და აფხაზე-
თის შესახებ, — противу народонаселения сих владений, не находя-
щего... способов к удовлетворению возникшей роскоши, гордость
оного, не позволяющая оному помышлять о способах к удовлетво-
рению оной посредством собственного трудолюбия, либо промыш-
ленностью, но заставляющая его в праздности ожидать всего от
своего поселянина..., производит главные источники
народного бедствия»⁴.

¹ სსცია, ფ. 220, საქ. 1064, ფურც. 333.

² იქვე, ფ. 2, ანაწ. 1, საქ. 1202, ფურც. 10—13. შდრ. СХАО, I, გვ. 255—257;
შ. ჩხეტიია, საგლეხო რეფორმის ისტორიისათვის, გვ. 340—343.

³ ა. კიკვიძე, საქართველოს ისტორია (XIX ს.), თბ., 1954, გვ., 146—149; მ. დუმ-
ბაძე, დასავლეთ საქართველო XIX ს. პირველ ნახევარში, თბ., 1957, გვ. 384—385; ო.
სოსელია, მასალები კლასობრივი ბრძოლის ისტორიიდან ფეოდალური ხანის და-
სავლეთ საქართველოში, თბ., 1966, გვ. 121—140.

⁴ ЦГВИАМ, ф. ВУА, д. 18497, лл. 32—43.

შრომით დაუსაქმებელი საერო და სასულიერო ფეოდალების ამ შედარებითმა სიმრავლემ განაპირობა სწორედ დასავლეთ საქართველოს (კერძოდ, იმერეთისა და გურიის) საბატონო გლეხის განსაკუთრებით მძიმე მატერიალური მდგომარეობა. საკმარისია ითქვას, რომ ჩვენი ქვეყნის ამ ნაწილში ყოველ 6 გლეხს ერთი ფეოდალი აწვა კისერზე, მაშინ როდესაც აღმოსავლეთ საქართველოში ეს ტვირთი საშუალოდ 9 გლეხის ოჯახზე იყო განაწილებული¹.

უფრო კონკრეტულ წარმოდგენას საგადასახადო ტვირთის სიმძიმეზე, დასავლეთ საქართველოში, კერძოდ, იმერეთში, იძლევა ცნობები საწერეთლოს ყმების ვალდებულებათა შესახებ, შედგენილი 1828—1843 წლებში². ამ საბუთის მიხედვით, გადამხდელები ოთხ ჯგუფად იყოფიან.

პირველი ჯგუფის („უდიდესი ან პირველი გადამხდელი და მუშა გლეხნი“), თითო გლეხს ემართა 30 კოკა ღვინო, 10 კოდი პური, საშობაო ხორცის ფასი 2 მანეთი, სააღდგომოს. — ამდენივე, წელიწადში 8 ქათამი, ქორწილის დროს ერთი ძროხა, ზოგს (და არა ყველას) საშობაოდ „9 პური და ერთი ქათამი“, ბატონის სტუმრობის დროს მისი და მისი ამალის ღამის გასათევით და პურის ჭმევის უზრუნველყოფა და კვირაში სამი დღე უღელი ხარით მუშაობა. „მთის ადგილებშიო, — ნათქვამია საბუთში, — მოსახლენი არ აძლევენ ღვინოს, პურს მისცემენ თხუთმეტს კოდს, რომელ კოდში გამოვა ოთხი ბათმანი, ხორცის ფასს როგორც ზემოთ აღწერილი არს. ხარით არ ხვენენ, არც ლეწავენ. სხვებო კვირაში სამ დღეს იმუშავენ და სხვა ყოველივე ზემორებო“.

მეორე ჯგუფის გლეხი, დოკუმენტის სიტყვით, იხდიდა 20 კოკა ღვინოს, 6 კოდ პურს, 5 ქათამს, ძროხის მესამედს (ქორწილის დროს), 1 მანეთ საშობაო ფულს და 4 აბაზს — სააღდგომოს. გარდა ამისა, იგი მემამულის ყანაში მუშაობდა „ხარით და კაციო“ ყოველ კვირას და ლეწვის დროსაც იმავე წესით შრომობდა, როგორც პირველი ჯგუფის გლეხი. რაც შეეხება მთიან ადგილებში მცხოვრებთ, ისინი ბატონს აძლევენ 8 კოდ პურს, ერთ მანეთ საშობაო ფულს და ამდენსავე სააღდგომოს, მუშაობა კი — „როგორც ზემოაღწერილი არის“. გამონაკლისს მხოლოდ მარტოხელები წარმოადგენდნენ.

მესამე ჯგუფის ყმა გლეხის გამოსაღები იყო: 10 კოკა ღვინო, 4 კოდი პური, ძროხის მეექვსედი ნაწილი (ქორწილის დროს), 3 აბაზი საშობაო ფული და ამდენივე — სააღდგომო. იგი შრომით რენტასაც ასრულებდა

¹ И. Г. Антелава, Государственные крестьяне Грузии в первой половине XIX века, გვ. 89.

² ო. ს. ო ს ე ლ ი ა, ...ფეოდალური ხანის დას. საქართველოში, გვ. 142.

³ საბუთი გამოქვეყნებულია გაზ. „კვალში“, 1896, № 34 და 5. მ ა ხ ა რ ა ძ ი ს . წიგნში—Восстание в имеретий 1819—1820 гг. მკისი, ნაკ. III, 1942, გვ. 45.

(თუ მართლაც არ იყო) „ზემოაღნიშნულისამებრ“, ე. ი. იმდაგვარად, როგორც მეორე ჯგუფის ყმა. მთიანი ადგილების მოზინადრეთა ვალდებულებას კი შეადგენდა: 5 კოდი (თითო სამი ბათმანის შემცველი) პური, ორ-ორი აბაზი საშობაო და სააღდგომო ფული და მუშაობა.

დასასრულ, მეოთხე ჯგუფის, „აზატად წოდებული“ გლეხის შესახებ დასახელებულ წყაროში ნათქვამია: „გადასახადს არ აძლევს, ბატონი თუ ბატონის კაცი... ეწვევა, აჭმევს, არ მუშაობს; ქორწილის დროს ძროხას გარდინთის: შეძლებული — მთელს, შუა — ნახევარს, მესამე — მესამედს; ასევე „მთის აზატი გლეხი კაცი“, რომელიც დამატებით „მსახურს აძლევს მოუცილებლად“.

გარდა ამისა, ოთხივე ჯგუფის გლეხები ვალდებული იყვნენ „ყმისა და მამულის ყიდვის დროს მემამულეთა თეთრით შეწვევის, ასევე ვალში ჩავარდნის დროსა, და ასევე, თუ ჰყავს, ცხენის თხოვებისა ლაშქრობის დროს ანუ სხვა დიდ საქიროების დროსაც“.

როგორც ამ მონაცემებიდან ირკვევა, საწერეთლოს ყმები შერეული სახის რენტით იყვნენ დაბეგრნილი, ე. ი. მათ საბატონო ვალდებულებაში შედიოდა როგორც პროდუქტადი და ფულადი გადასახადები, ისე შრომითი ბეგარა. თუ ყველა მათგანის ღირებულებას ფულზე გადავიტანთ და ერთმანეთს შევადარებთ, პირველ ადგილზე თავისი ხვედრითი წონით პროდუქტადი რენტა გამოვა; მეორეზე — შრომითი და მესამეზე — ფულადი. გლეხთა სავადასახადო ტვირთი, საერთოდ, მეტად მძიმე ჩანს. თვით მესამე ჯგუფის ყმაც კი, რომელიც თავისი ეკონომიური შესაძლებლობით ძლიერ სავალალო მდგომარეობაში იმყოფებოდა (სწორედ ამიტომ მოექცა იგი ამ ჯგუფში), ყოველგვარი „ნორმების“ დარღვევით იყო დაბეგრილი (10 კოკა ღვინო, 4 კოდი პური, ძროხის მეექვსედი ნაწილი, „ხარით და კაცით“ მუშაობა ყოველ კვირას, საშობაო და სააღდგომო ფულადი გადასახადი და სხვ.). ყურადღებას იპყრობს „აზატად წოდებული“ გლეხის დაბეგვრის ფაქტი. მართალია, ბარის აზატი, დოკუმენტის მიხედვით, მემამულის სასარგებლოდ არ მუშაობდა და მას გადასახადს არ აძლევდა, მაგრამ სინამდვილეში ის ზოგიერთი ვალდებულებებისგან თავისუფალი არ იყო. მაგალითად, ქორწილის დროს იგი ბატონს ძროხას (ან მის ნაწილს) უხდიდა, ხოლო „სტუმრად“ მისვლისას — მას და მის ამაღლას შესაფერისად უმასპინძლებოდა. და რაკი ეს გამასპინძლება გლეხის ნება-სურვილზე კი არ იყო დამოკიდებული, არამედ მას სავალდებულო ხასიათი ჰქონდა, ცხადია, ის ჩვეულებრივი გადასახადი იყო და მისგან არაფრით განსხვავდებოდა. დასასრულ ძალიან ნიშანდობლივია ის გარემოებაც, რომ მთის აზატი, ბარის აზატისაგან განსხვავებით, ბატონს მსახურსაც აძლევდა „მოუცილებლად“.

დასავლეთ საქართველოს, კერძოდ, იმერეთის საბატონო გლეხთა ვალ-

დებულებებზე კიდევ უფრო მკაფიო წარმოდგენას გვაძლევს სოფ. თერჯოლის წულუკიძის ყმათა საგადასახადო ნუსხა, რომელიც, როგორც ზემოთაც აღვნიშნეთ, გასული საუკუნის 50-იანი წლების სინამდვილეს გამოხატავს. აქაც, ისე როგორც საწერეთლოში, გლეხები შრომით, პროდუქტად და ფულად გადასახადებს იხდიდნენ. გლეხი ნიკო გეწაძის ვალდებულებანი, მაგალითად, დოკუმენტში ასეა განსაზღვრული: 42 ჩაფი ღვინო, ერთი ცხვარი, 0,5 ბათმანი ხორბალი, 0,5 ბათმანი ღომი, ერთი ქათამი, კვირაში სამი დღე მუშაობა (ხარებით) და ერთი მანეთი ფულად¹. იგივე ითქმის ნიკოლოზ გურგენიძის შესახებაც, რომელიც, იმავე წყაროს ჩვენებით, მემამულეს აძლევდა 24 ჩაფ ღვინოს, ერთ ცხვარს, ერთ მანეთს და მუშაობდა ბატონის მეურნეობაში კვირაში სამი დღე ხარებით (ზოგჯერ კი უხაროდ)². დასახელებულ მაგალითებში, როგორც ვხედავთ, რენტის სამივე სახეა წარმოდგენილი. საკმაოდ იყო ისეთი შემთხვევებიც, როდესაც გლეხები თავიანთ ვალდებულებას მხოლოდ შრომით და პროდუქტადი რენტის სახით ასრულებდნენ. ასეთი იყო, მაგალითად, ყმა გლახუა სამხარაძის ოჯახი, რომელიც ყოველწლიურად თავის ბატონს აძლევდა 14 ჩაფ ღვინოს, ერთ ქათამს, 9 გამომცხვარ პურს და, გარდა ამისა, მუშაობდა მის მეურნეობაში კვირაში ორი დღე (ხარებით ან, ზოგჯერ, უხაროდ)³. ძალიან იშვიათად საბატონო გადასახადს მხოლოდ შრომითი რენტის სახე ჰქონდა. თერჯოლის გლეხთა ვალდებულებათა სიაში ასეთი მხოლოდ სამი შემთხვევაა დასახელებული და შეეხება გლეხებს ფირან და სიმონ ბოჭორიშვილებს და ბეჟან კოტიაშვილს, რომელთა შესახებ დოკუმენტში მითითებულია, რომ ისინი, ვითარცა მოკლებულნი ყოველგვარ საკუთრებას, ცხოვრობენ მოჯალაბეებად ბატონის სახლში და მისი მოთხოვნით ასრულებენ ყველა სახის სამუშაოს⁴.

წულუკიძეების ყმებს რენტის ფორმების მიხედვით თუ დავაჯგუფებთ, ჩვენ თვალწინ შემდეგი სურათი გადაიშლება. იმ 98 გლეხის ოჯახიდან, რომლებიც თერჯოლაში ცხოვრობდნენ და ერთ დროს თავად წულუკიძეების საკუთრებას შეადგენდნენ, 2 ოჯახი (დაახ. 2%) საერთოდ არ იხდიდა არავითარ გადასახადს⁵, 3 ოჯახი (დაახ. 3%) იხდიდა მას მხოლოდ შრომითი რენტის სახით, 25 ოჯახი (დაახ. 25,6%) — შრომითი, პროდუქტადი და ფულადი რენტის სახით და 68 ოჯახი (69,4%) — შრომითი და პროდუქტადი რენტის სახით.

¹ სცია, ფ. 5, საქ. 56, ფურც. 360.

² იქვე, ფურც. 362.

³ იქვე, ფურც. 381.

⁴ იქვე, ფურც. 354, 355, 388.

⁵ შრომით რენტაში შევიტანეთ გლეხის მიერ მემამულისათვის მუდმივი მსახურის მიცემა.

რენტის ცალკეული ფორმების ადგილი და მნიშვნელობა, რა თქმა უნდა, ერთნაირი არ იყო. თერჯოლის გლეხებში აბსოლუტური დომინირება შრომით რენტას ჰქონდა. მისი ხვედრითი წონა 81,5 %-ს უდრიდა. მას მოსდევდა პროდუქტადი რენტა — 18,1%. რაც შეეხება ფულად რენტას, მისი ეკონომიური მნიშვნელობა ჩვენს კონკრეტულ შემთხვევაში წარმოუდგენლად მცირეა, სულ რაღაც 0,4 %.

შრომითი რენტის ასეთი დომინირება, ისე როგორც ფულადი რენტის ესოდენ მიზეზული ხვედრითი წონა, განპირობებულია რაღაც განსაკუთრებული, ჭერჭერობით ჩვენთვის უცნობი მიზეზებით და ამდენად ეს კონკრეტული შემთხვევა ვერ გამოდგება ქვეყნის საერთო ეკონომიური განვითარების დასახასიათებლად, სადაც განსახილველ ხანაში, ყველა ნიშნის მიხედვით, წამყვანს პროდუქტადი რენტა წარმოადგენდა.

როგორი იყო მაინც, ჩვენი მაგალითის მიხედვით, გლეხის საგადასახადო ტვირთი? ის ნამდვილად მძიმე და ძნელად საზიდი იყო. საკმარისია ითქვას, რომ წულუკიძეების გლეხთა თითო კომლზე მოდიოდა საშუალოდ (ფულზე გადატანით) 57 მანეთი და 20 კაპიკი ყველა სახის გადასახადი, ხოლო სულზე—8 მანეთი და 77 კაპიკი. ზოგი კი ამაზე გაცილებით მეტსაც იხდიდა. ასეთები იყვნენ მაგალითად, სიმონ, გიორგი, ივანე და ლევან ცხადაძეები, გაბრიელ მახარაშვილი და სხვ., რომელთა ყოველწლიური საბატონო გადასახადი 80 მანეთს უდრიდა. თუ რაოდენ დიდო იყო ეს თანხა იქიდან ჩანს, რომ იმ დროს ძროხის საბაზრო ფასი 10—12 მანეთს არ აღემატებოდა.

როგორც ზემოთქმულიდან ჩანს, საბატონო ყმები საქართველოში მეტად მძიმე საგადასახადო ტვირთს ეზიდებოდნენ. მაგრამ მთავარია მაინც არა ამ ფაქტის გახაზვა, არამედ იმისა, რომ გლეხთა ვალდებულებანი სისტემატურად იზრდებოდა და დროთა განმავლობაში სრულიად აუტანელი ხდებოდა. ექსპლოატაციის ნორმის ზრდა განსაკუთრებით საგრძნობი გასული საუკუნის 30-იანი წლებიდან გახდა სასაქონლო ფულადი ურთიერთობისა და კაპიტალისტური წყობის განვითარების შედეგად¹. ქვეყნის ეკონომიურ ცხოვრებაში მომხდარი ძვრები გაზრდილ მოთხოვნილებებს აყენებდა ქართველ მემამულეთა წინაშე, რომელნიც მათ დაკმაყოფილებას ხელქვეითი გლეხების საშუალებით ცდილობდნენ. ისინი უცერემონიოდ აღიდებდნენ ადრე არსებულ ვალდებულებებს, იგონებდნენ ახალ, მწარმოებელი კლასისათვის მანამდე უცნობ გადასახადებს და სხვ. ამიტომ შემთხვევითი როდია საბუთებში ისეთი ტერმინების გაჩენა, როგორცაა „უქანონო დებულება“, „უქანონო სამსახური“, „უღები სამსახური“

¹ И. Г. Антелава, Э. А. Орджоникидзе, Э. В. Хоштария, К вопросу о генезисе капитализма в сельском хозяйстве и промышленности Грузии, Тб., 1967.

და ა. შ. ყმები ცხადაშვილები ჩიოდნენ 1835 წელს, რომ მათ მებატონებ მოსთხოვა „უკანონო სამსახური, რომლისა ჩვეულება არა გვაქვს“¹. ისინი მოითხოვენ „უღები სამსახურიდან“² განთავისუფლებას და წინანდელი რიგის დაცვას.

მემაჟულეთა მიერ საგლეხო ვალდებულებათა გადიდებას და ამის გამო გლეხთა ურჩობას, ეტყობა, ისეთი მასობრივი ხასიათი მიუღია, რომ საჭირო გამხდარა ამ საქმეში მთავრობის ჩარევა. ამ მხრივ მეტად დამახასიათებელია ბარონ როზენის მიწერილობა იმერელ თავად გრიგოლ წერეთლისადმი (1835 წ.), რომელშიც სხვათა შორის ნათქვამია შემდეგი: „მმართველობა მოუწყვეტლად ზრუნავს, რომ გლეხნი იყვნენ სრულიადსა მორჩილებასა შინა თვისთა მფლობელთასა... (მაგრამ ამავე დროს თვალყურს ადევნებს), რათა მებატონენიცა არა გადავიდნენ გარეშე მინიჭებულისა მათდამი უფლებისა გლეხთა ზედა. ჩემთვის ფრიად უსიამოვნო არის დანახვაი მოუკვეთელად წარმოებულთა ურიგობათა მაჟულსა შინა იმა თავადთასა, რომელნიცა იმერეთსა შინა არიან უპირველესნი თვისიხ გვართა და რომელთაც ჯერ არს რათა სხვათა უჩვენონ კეთილი მაგალითი. ამის გამო მე უკვე მივიღე ჯეროვანი ღონისძიებანი მოსაკვეთელად ახლად აღძრულთა მუნ ურიგობათა. გარნა კვალად არა მომეტებულად შევრაცხე ვთხოვო თქვენს ბრწყინვალებას, ვითარცა პატივის მექონესა თვისთა ერთგვართა თავადთაგან, რათა თქვენ შეაგონოთ ყოველთა იმა თავადთა წერეთელთა, რომელთა მაჟულსა შინა ესოდენ ხშირად სწარმოებენ უფოთნი ურიგობანი და არა დასათმობელნი შევიწროებანი, რათამც, იგინი შემდეგ დროში უკუდგნენ შეუწყნარებელისა მოქცევისაგან ხელქვეითთა თვისთა ყმათათანა და ეგრეთვე უზომოთა მათ ზედა ხარჯის დადებისაგან და მით არა იძულებულ ჰყონ იგი უმორჩილებისადმი. ხოლო სხვაგვარი იგი თავადნი მიმცემელ იქნებიან სასტიკისა პასუხისგებისა წინაშე მართველობისადმი, რომელიცა არა მიხედავს ყოველსა თვისსა სიწყნარესა და მიმართავს კანონიერისა ფიცხელისა მოქმედებისადმი“³ (ხაზი ჩვენია — ავტ.).

მაგრამ მთავრობის ასეთ ჩარევას, ბუნებრივია, არ შეეძლო ძლიერად და დიდი მასშტაბით დაწყებული მოვლენის შეჩერება და ის ისევ თავი-

¹ ო. ს. ს. ე. ლ. ი. ა., მასალები კლასობრივი ბრძოლის ისტორიიდან ფეოდალური ხანის დასავლეთ საქართველოში, თბ., 1960, გვ. 120.

² იქვე.

³ იქვე, გვ. 122.

სი გზით მიემართებოდა: გლეხთა გადასახადები საერთოდ და საბატონო ყმათა, კერძოდ, სწრაფად იზრდებოდა, რამაც (ზოგ სხვა გარემოებასთან ერთად) წარმოშვა კლასობრივი ბრძოლის ისეთი ფორმა, როგორცაა შემამულეთა გლეხების მასობრივი მოძრაობა სახაზინო უწყებაში გადასასვლელად.

საბატონო გლეხთა ექსპლოატაციას ეწეოდნენ არა მარტო მათი უშუალო მფლობელები, არამედ სახელმწიფოც. ამ უკანასკნელის სასარგებლოდ შემამულეთა გლეხები იხდიდნენ სხვადასხვა გადასახადს, რომლებიც ბეზაის რეფორმის შემდეგ ერთ ფულად საკომლო და საერობო გადასახადად შეიცვალა. როგორც ვიცით, ამავე გადასახადებით იყვნენ დაბეგრილნი სახაზინო გლეხებიც, მაგრამ იმ განსხვავებით, რომ მათი გამოსაღები გაცილებით მეტი იყო, ვიდრე საბატონო და საეკლესიო ყმებისა¹. საკომლო გადასახადი, მაგალითად, გურიის სახელმწიფო გლეხისა 4 მანეთს უდრიდა, ხოლო საეკლესიო და საბატონოსი — მანეთ ნახევარსა და ერთ მანეთს შესაბამისად². ასევე იყო დასავლეთ (და აღმოსავლეთ) საქართველოს სხვა რაიონებშიც. იქაც სახელმწიფო გლეხი უფრო მეტ საკომლო გადასახადს იხდიდა, ვიდრე სოფლის მშრომელი მოსახლეობის დანარჩენი კატეგორიები.

საბატონო ვალდებულებებით მეტად შეწუხებული ქართველი გლეხისთვის სახელმწიფო საკომლო გადასახადი, ცხადია, დამატებით ტვირთს წარმოადგენდა. მაგრამ ხაზინის წინაშე მოსახლელ ვალდებულებებს შორის ყველაზე მძიმე და დამტანჯველი, ყველაზე დიდ მსხვერპლთან დაკავშირებული იყო ეგრეთ წოდებული ნატურალური გადასახადები ან შრომითი ბეგარა, რომლის ტვირთსაც კერძო შემამულეთა ყმები თითქმის სახელმწიფო გლეხების თანაბრად ეზიდებოდნენ. ამ გადასახადებში ყველაზე გამანადგურებელი იყო ის, რომელიც ადამიანების, ურმების, ცხენებისა და სხვათა გაუთავებელ და დიდი მასშტაბით გამოყვანაში მდგომარეობდა. «Но все повинности крестьян, — წერდა სიღნაღელი შემამულე ივანე ანდრონიკაშვილი, — отбываемые в казну и помещикам, не могли сравниться с непрерывными требованиями военного ведомства касательно защиты границ Кахетии от лезгин, на коих стояли вооруженные несколькими сотнями и сверх того составлялись из конных и пеших дружин, требовались доставка ароб и про-

¹ აქ ლაპარაკია მხოლოდ იმ გადასახადებზე, რომლებსაც გლეხები იხდიდნენ (სახაზინო, საბატონო და საეკლესიო) სახელმწიფოს სასარგებლოდ. ამ შედარების დროს მხედველობაში არ არის მიღებული საბატონო და საეკლესიო ყმების მრავალრიცხოვანი და ძალიან მძიმე (ვანსაკუთრებით საბატონო გლეხების) გადასახადები უშუალო მფლობელთა სასარგებლოდ.

² И. Антелава, Государственные крестьяне в первой половине XIX в., გვ. 418.

ლოჟენი პროსეკი ვ ლესაჲ ვიმოჲ, ი ოცენ ჩაჲ ვ ოდნო ი თო ჲე ვრე-
 მია ოდნოჲ სემეჲსტუ ვრიჲდილს ოტპრავლენი ტრი ობჲანნოსტი
 ვმესე, იჲ კოიჲ ბოლშუჲ ჩაჲ ონ ვინუჲჲენ ბილ ისჲლნიჲჲე ჩერეჲ
 ნაიმიჲ სრედსტვა, თაკ ჲო ჲიჲ ისჲლნიჲჲე ტრებოვანიჲ ვოენოი
 სლუჲბი ჲოტიჲჲე ვიჲსტავლენი ს კაჲჲჲი დუჲჲ დიჲოვ ბო
 ოდნოჲჲე ჩელოვეკუ, ა ჲიჲ პრესლედოვანიჲჲე ნეპრიჲთელჲ ვიჲჲოდილი პოგო-
 ლოვნი. ვ ოსობენნოსტი ვო ვრეჲჲე ტურეჲკოი ვოიჲნი (1853 — 1856 გრ.)
 ვსე, კო თოლკო მოგ ვლადენი ორუჲჲი, ბილნი ონ სლუჲბე პოგოლოვნი, ვ
 ჩემ პრინიჲმლი ოჲაჲსეჲჲე ი პომეჲიკი. პოდობნიჲჲე ნედოსუგ ი იჲდერჲჲი
 პომეჲიკოვნი ი კრესტჲნი ვერგლი იჲჲ თაკიჲჲე დოლგი, ჲო ვიჲპლათიჲ იჲ
 ნეთ ნიკაკოი ნადეჲჲი, ვსლედსტვიჲჲე კაკოვნიჲჲე ჲატრუდნიჲჲე კრესტჲნი,
 პოკინუვ კოენნიჲ სვოჲჲე ჲიტელსტვო ი სემეჲსტვა, რასეჲილსიჲ ვ რაჲ-
 ნიჲჲე ოუჲჲაჲ»¹.

თუ რა დიდი მასშტაბი ჰქონდა აღნიშნულ გადასახადს, ჩანს შემდე-
 გი მონაცემებიდან. მარტო 1854 წელს, როდესაც მიმდინარეობდა თურ-
 ქეთის (ყირიმის) ომი, ქუთაისის გუბერნიის სახელმწიფო, საბატონო და
 საეკლესიო ყმებს გამოუყვანიათ 32 120 ურემი და 176 141 კაცი². 1857
 წელს კი, ე. ი. პირველი ომის შემდგომ წელს, მათ სახელმწიფოსთვის
 მიუტიათ ნაკლები, მაგრამ მაინც არცთუ ისე მცირე — 18 411 ურემი და
 128 663 კაცი (ფეხოსანი თუ ცხენოსანი)³.

საბატონო გლეხთა საერთო მდგომარეობისას ყოველთვის უნდა გვახ-
 სოვდეს მათი სრული უუფლებობა და მფლობელთა თითქმის შეუზღუდ-
 ველი თვითნებობა. ხშირად სულ უბრალო საბაბიც კი საკმარისი იყო იმი-
 სათვის, რომ მემამულეს თავისი ყმა სამაგალითოდ დაესაჯა. გადასახადე-
 ბის გადახდაზე უარის თქმა კი თითქმის ყველა შემთხვევაში მეტად მკა-
 ცრი ზომების მიღებასთან იყო დაკავშირებული. რომ „ჰკუა“ ესწავლე-
 ბიათ ურჩი ხელქვეითებისათვის, მემამულეები არაიშვიათად თავს ეს-
 ხმოდნენ მათ, ძარცვავდნენ, იტაცებდნენ მიწებს, ბაღებს, შინაურ საქო-
 ნელს, ფრინველებს, სახლის მოწყობილობას და სხვ. ასეთი ბედი ეწიათ,
 მაგალითად, 1845 წელს გორის მაზრის ხილისთავის უბნის გლეხებს გი-
 ორგი, პეტრე და სიმონ ღურგლიშვილებს, რომლებმაც „გაბედეს“ თავი-
 სუფლების ძიება მემამულე თარხნიშვილებისაგან. ბრახმორეული თავა-
 დები თავს დაესხნენ „სახლვარსგადასულ“ გლეხებს და სულ ერთიანად
 ააწიოკეს. იმ უწყისიდან, რომელიც თან ერთვის ვრონცოვის სახელზე
 დაწერილ მათ განცხადებას, აღნიშნულია, რომ თარხნიშვილებმა გლე-
 ხებს წაართვეს ერთი ძროხა, 6 ხარი, 2 ლორი, 2 კამეჩი, 12 ქათამი, 19

¹ შ. ჩხეტია, საგლეხო რეფორმის ისტორიისათვის..., გვ. 166.

² И. Антелава, Государственные крестьяне..., гв. 430.

³ იქვე.

კოდი ხორბალი, 5 კოდი ქერი, ერთი თოფი და 12 მანეთი ფულად¹. თარ-სნიშვილების ასეთმა თვითნებობა-გაუკითხაობამო, წერდნენ დაზარალე-ბულნი, „ისე გაგვანადგურა ჩვენ ოჯახებით, რომ დაგვრჩა მხოლოდ ცა-რიელი სული“². ასეთივე დღეში ჩაუყენებიათ თავიანთი გლეხები იმერელ (სვირელ) მეჰამულე ერისთავებს იმისათვის, რომ მათ სახაზინო უწყებაში მოუსურვებიათ გადასვლა³.

ხელქვეითებისადმი არაადამიანური დამოკიდებულებით განსაკუთრე-ბით თავად თემურყვა ანჩაბაძეს გამოუჩენია თავი. მას სასტიკად დაუსჯია თავისი ყმა ბახუტა აბშილავა იმის გამო, რომ მას ბატონის ქორი გაქცევია. ვაბრაზებულ ბატონს კუბოს მსგავსი ყუთი გაუკეთებია, შიგ „დამნაშავე“ მოუთავსებია და „რამდენსამე დროშიდ... აპურებდა მას გამოჭრილ მას შინა ფანჯრიდგან“⁴. სამეგრელოს მთავრის მეგვიდრის დავით დადი-ანის „გამოცხადებაში“, საიდანაც მოტანილია ციტირებული სიტყვები, ნათქვამია, რომ მეჰამულეების მიერ გლეხებისადმი სასტიკი და უმოწყალო დამოკიდებულების მაგალითები „მრავალგზის არის შენიშნული“⁵.

გლეხებს არა შარტო ცუდად ექცეოდნენ, არამედ მათ მასობრივად ჰყიდიდნენ. ყმა საჯარო ვაჭრობით იყიდებოდა ისევე, როგორც რომელიმე უსულო საგანი ან პირუტყვი. აი სათანადო მაგალითებიც. „1849 წლის აპრილს, — ნათქვამია ერთ განცხადებაში, — თელავის უეზდის სამმარ-თველოში გაისყიდება ივანე ჯორჯაძის ვალში 15 დღის სახნავი მიწა, რომელიც დაფასებულია 20 მანეთად, ყვარლის ნაწილში მცხოვრები ხუთი კომლი გლეხი, თავიანთის უძრავის და შოძრავის ქონებით, მესამე ნაწილი... ტყისა, დაღები სოფელ გრემში. სულ დაფასებულია 27 414 მანეთად“⁶. „1853 წლის 16 თებერვალს, — ვკითხულობთ მეორე განცხადებაში, — ზურაბ ერისთავის ვალში გასყიდულ იქმნება მისივე ყმათა 41 კომლი. ამათში 145 მამაკაცია, 116 დედაკაცი. ისინი სცხოვრობენ ქუთაისის გუ-ბერნიის შორაპნის უეზლში... დაფასებულნი არიან 11 184 მანეთად და 50 კაპიკად“⁷.

აბა რა ფასი აქვს ამის შემდეგ ალექსანდრე ორბელიანის განცხადებას ბატონსა და ყმას შორის მამა-შვილური დამოკიდებულების არსებობის შესახებ საქართველოში⁸.

¹ И. Антелава, Государственные крестьяне..., გვ. 37.

² იქვე.

³ იქვე.

⁴ ქუთაისის მუზეუმის არქივი, საქმე 1565. მომყავს ი. ახალაიას წიგნიდან, საგლეხო რეფორმა სამეგრელოში, სოხუმი, 1958, გვ. 28.

⁵ იქვე.

⁶ საქართველოს ბატონყმობის ფაქტიური მასალები, ტ. 2—3, ტფ., 1924, გვ. 121.

⁷ იქვე, გვ. 132.

⁸ „ცესკარი“, 1859, № 11. ასევე წერდა დაახლოებით ბარონ ნიკოლაი. «Должно, впро-

საეკლესიო გლეხები, რომელთაც რიცხოვნობივად იმესამე ადგილი ეკავათ (იხ. ამ თავის დასაწყისი), თავიანთი სოციალ-ეკონომიური მდგომარეობით დიდად არ განსხვავდებოდნენ სხვა კატეგორიის სოფლის მშრომელი მოსახლეობისაგან. არც ისინი იყვნენ თავისუფალნი ფეოდალურ-ბატონყმური ექსპლოატაციისა და კოლონიური ჩაგვრისაგან. მართალია, მათი მატერიალური ცხოვრების დონე შედარებით უფრო მაღალი იყო, ვიდრე საბატონო ყმებისა (აწაზე ქვემოთ), მაგრამ სიუხვესა და განცხრომაში, ცხადია, არც ისინი ცხოვრობდნენ. ამის ერთ-ერთი მთავარი მიზეზი აქაც ძირითადი საწარმოო საშუალებების — მიწის — სიმცირე იყო. სანუწუხაროდ, ჩვენ არა გვაქვს სათანადო მასალა, რომ საფუძვლიანად და ამოქწურავად დავახსიათოთ საეკლესიო ყმათა მიწათმფლობელობა, მაგრამ მიახლოებითი სურათის წარმოდგენა მაინც შესაძლებელია.

ჩვენ ხელთ არის ერთი საბუთი, რომელიც ეხება გორის მაზრის სოფელ მეტეხის გლეხთა ეკონომიურ მდგომარეობას გასული საუკუნის 40—50-იან წლებში. იქ, როგორც საბუთიდან ჩანს, სულ 78 კომლი გლეხი ცხოვრობდა: 8 სახელმწიფო, 12 საბატონო და 58 საეკლესიო. მათ დიდ უმრავლესობას, დოკუმენტის სიტყვით, სახნავ-სათესი მიწა საერთოდ არა ჰქონია¹, ნაწილი კი თუმცა ასეთი მიწებით მეტ-ნაკლებად მომარაგებული ყოფილა, მაგრამ ისინი თითქმის მთლიანად ბალ-ვენახებს სჭერია, რომლებიც ხშირად „ვერ ანაზღაურებდნენ (თურმე) გაწეულ ხარჯებს“². საშუალოდ კომლზე მოდიოდა 2,5 დესეტინა მიწა, რაც, თვით ოფიციალურ პირთა მოწმობითაც, ოდნავადაც არ იყო საკმარისი იმისათვის, რომ გლეხს ოჯახიც შეენახა და საბატონო და სახელმწიფო გადასახადებიც გადაეხადა! «Главный промысел жителей, — წერდა 1851 წლის 22 იანვარს თბილისის გუბერნიის სამოქალაქო საქმეთა მმართველი, — состоит в садоводстве, хлебопашестве и скотоводстве, а за употреблением бывшей свободной их земли под разведением садов и огородов, они крайне нуждаются в ней для хлебопашества и выгона скота, поэтому нанимают таковую у смежных владельцев с отбыванием за неё повинностей»³. ეს გადასახადები კი გამოიხატებოდა ყანის მოხვნაში, პურის მოსავლის აღებაში და სხვა სამუშაოთა შესრულებაში⁴.

чем...сказать, что сношения их (помещиков — авт.) с их крепостными в большинстве случаев были добронодушно — патриархальные» (Русский архив, 1892, кн. II, ч. 5, гл. 98).

¹ სსცია, ფ. 4, ანაწ. 2, საქ. 177, ფურც. 3.

² იქვე.

³ იქვე.

⁴ იქვე.

ხსენებული ოფიციალური პირი არ მალავს, რომ გლეხები მეტად „შევიწროებულ მდგომარეობაში არიან“ და რომ მათი დიდი ნაწილი უკიდურეს „სიღარიბესა და გაჭირვებაში ცხოვრობს“¹.

საეკლესიო უწყება, რომელიც გამომდინარე ფისკალური ინტერესებიდან, ერთგვარად დანტერესებული იყო თავისი ხელქვეითი გლეხების ეკონომიური მდგომარეობის გაუმჯობესებით, აყენებდა საკითხს სოფ. მეტეხიდან სხვა კატეგორიის მშრომელების გადასახლებისა და მათ განკარგულებაში მყოფი მიწების საეკლესიო ყმების სარგებლობაში გადაცემის შესახებ². მაგრამ სასულიერო უწყების ეს თხოვნა, რომელსაც კავკასიის ადმინისტრაციამაც მხარი დაუჭირა, ცხოვრებაში ვერ გატარდა, რადგანაც სახაზინო და საბატონო გლეხებმა კატეგორიულად უარი განაცხადეს დაეტოვებინათ წლების განმავლობაში გაწეული შრომის შედეგად მოწყობილი ოჯახი და მეურნეობა³. ამის გამო კი მეტეხის ყველა მობინადრე, მათ შორის საეკლესიო გლეხებიც, დარჩნენ ისევ მიწით არასაკმაო რაოდენობით მომარაგებულნი.

მონაცემები მეტეხის საეკლესიო გლეხთა მიწათმფლობელობაზე თავისთავად საინტერესოა, მაგრამ ამ მონაცემების მიხედვით მაინც არ შეიძლება მსჯელობა შესასწავლი კატეგორიის სოფლის მშრომელი მოსახლეობის საერთო ეკონომიური მდგომარეობის შესახებ მთელი ქვეყნის მასშტაბით. როგორც მასალებიდან ჩანს, საქართველოს ყველა რაიონში ერთნაირი ვითარება არ იყო. ზოგან საეკლესიო ყმები უფრო ცუდად იყვნენ მიწით მომარაგებულნი, ვიდრე მეტეხში, ზოგან კი, პირიქით, უკეთესად. უკეთესი მდგომარეობა ჰქონიათ, კერძოდ, საგენათლო ყმებს. მათი ერთი ნაწილის მიწათმფლობელობაზე წარმოდგენას გვაძლევს ქვემოთ მოტანილი ცხრილი, რომელიც შედგენილია 1825 წლის აღწერის მონაცემების საფუძველზე⁴ (იხ. ცხრ. 1).

როგორც ცხრილიდან ჩანს, საგენათლო ყმების მიწით უზრუნველყოფა არცთუ ისე სავალალო ყოფილა. იქ საშუალოდ თითო კომლზე მოდიოდა 12,3 ქევეა (ან დაახლოებით 5 დესეტინა). ეს ფართობი თავისთავად, რა თქმა უნდა, არაა ძალიან დიდი და მის მფლობელს ჩვენ ვერ ჩავთვლით მიწით უხვად მომარაგებულად, მაგრამ მას ვერც მცირემიწიანებაში მოვაქცევთ, როგორც იქცევა ს. კაკაბაძე⁵.

1 სტია, ფ. 4., ანაწ. 2, საქ. 177, ფურც. 4.

2 იქვე.

3 იქვე, ფურც. 5.

4. აღწერის მასალები 1929 წელს გამოაქვეყნა ს. კაკაბაძემ („საისტორიო კრებული“, IV, ტფ., 1929, გვ. 76—95).

5 ს. კაკაბაძე, იმერეთის საეკლესიო ყმათმფლობელობა 1820 და 1825 წ. აღწერათა მიხედვით, „საისტორიო კრებული“, IV, ტფ., 1929, გვ. 95.

ქუთაისის ოლქში მცხოვრებ საგენათლო ყმების მიწათმფლობელობა
1826 წელს

სოფლების დასახელება	კომლთა რაოდენობა	ორივე სქესის სულთა რაოდენობა	სახნავი მიწის რაოდენობა (ქვევებში)	სახნავი მიწის საშუალო საკომლო რაოდენობა (ქვევებში)	სახნავი მიწის საშუალო რაოდენობა ორივე სქესის თითო სულზე (ქვევებში)
1	2	3	4	5	6
ვაკის უბანი	7	28	85	12,1	3,0
შუა ქვიტირი	7	19	109	15,6	5,7
ქვემო ქვიტირი	5	24	139	27,8	5,8
ღიმი	2	8	60	30,0	7,6
კლარიში	3	16	60	20,0	3,7
სიმონეთი	39	139	205	5,2	1,4
ეწერი	14	58	91	6,5	1,5
ქვერი	14	49	85	6,0	1,7
ჩხარი, სომეხნი	4	8	14	3,5	1,7
ჩხარი, ქართველნი	18	75	205	11,3	2,7
ბოსლევი	25	123	145	5,8	1,2
თელეფა	3	13	22	7,3	1,7
საზანო	6	21	32	5,3	1,5
მუხურა	5	18	23	4,6	1,3
ალისუბანი	38	178	214	5,6	1,1
თბილწყარო	12	60	51	4,2	0,8
ძიროიანი	7	39	57	8,1	1,4
საწირე	14	89	111	7,9	1,2
სოჩხეთი	10	57	95	9,5	1,7
ხისორეთი	5	42	175	35,0	4,1
გურნა	12	55	142	11,9	2,6
ჯვარისა	14	53	158	11,3	3,0
ციხია	7	44	87	12,4	1,8
ლაფეთა	6	23	76	12,7	3,3
მანდიკორი	2	10	15	7,5	1,5
გელათი	15	46	91	6,0	1,9
კურხები	50	179	696	13,9	3,8
რიონი	10	37	109	10,9	2,9
სორმონი	6	19	65	10,8	3,4
ნოლა	3	10	53	17,6	5,3
ქოლვეი	1	4	4	4,0	1,0
ნაბოსლევი	23	76	156	6,7	2,0
კოკა	15	61	124	8,2	2,0
ოჯოლა	2	10	18	9,0	1,8
ნაგარევი	23	97	267	11,6	2,7
ქოგნარი	17	59	159	9,3	2,7
სამტრედია	23	96	624	30,1	6,5
მუხაყრუა	25	94	1130	45,2	12,0
გუმისთავი	9	29	139	15,4	4,7
ბანოჯა	7	36	146	20,8	4,0

1	2	3	4	5	6
უმლაური	11	49	140	12,7	2,8
ამალღება	1	5	60	60,0	15,0
კოდოგანი	23	97	267	11,6	27
ოდლაური	10	29	95	9,5	3,4
სულ	553	2282	6799	12,3	3,0

ქვე უნდა აღინიშნოს, რომ ამ საშუალო ციფრების უკან, თითქოს საერთო კმაყოფილების სურათს რომ წარმოგვიდგენს, იმაღება მიწების არათანაბარი განაწილების მწარე სინამდვილე. ირკვევა, მაგალითად, რომ საგენათლო ყმების საერთო რაოდენობის (2 282 სული) 2,9% (64 სული) საშუალო სასულე ნადელი ერთ ქცევას არ აღემატებოდა, 40,9% (1 039 სული) მიწისმფლობელობა ერთსა და ორ ქცევას შუა მერყეობდა, 38,7% (923 სული) — ორსა და ხუთ ქცევას შუა და 15,9% (256 სული) — ხუთსა და თხუთმეტ ქცევას შუა. გლეხის ოჯახი, რომლის თითო წევრზე მოდიოდა საშუალოდ ხუთ ქცევაზე მეტი მიწის ფართობი, მდიდართა რიცხვს განეკუთვნება, ხოლო კომლი, სადაც საშუალო სასულე ნადელი ორსა და ხუთ ქცევას შუა მერყეობდა, შეძლებულთა ჯგუფში ჩაირიცხება¹. გვიან, კერძოდ, გასული საუკუნის 30—50-იან წლებში, ე. ი. იმ პერიოდში, რომელიც ჩვენ აქვამად გვინტერესებს, იმერეთის ყმათა მიწათმფლობელობა, ვფიქრობთ, საგრძნობლად უნდა შემცირებულყო მათი რიცხობრივი შემადგენლობის ზრდისა და სასულიერო ფეოდალების ინტენსიური შეტევის შედეგად და შესაბამისად მათი ეკონომიური მდგომარეობაც უნდა გაუარესებულყო. მაგრამ ისინი თავიანთი ცხოვრებას დონით (პირველ რიგში კი მიწისმფლობელობის მხრივ) არასოდეს (არც 30-იან წლებამდე და არც მის მერე) არ ჩამოქვეითებულან საბატონო გლეხების ცხოვრების დონემდე.

საბუთები საეკლესიო ყმების გადასახადების შესახებ განსახილველ პერიოდში, სამწუხაროდ, დღემდე ძალიან ცოტაა გამოვლინებული. ის კი, რაც უკვე გამოქვეყნებულია და სამეცნიერო ბრუნვაშია, ეხება უმთავრესად XV—XVIII საუკუნეებს და ნაწილობრივ XIX საუკუნის პირველ

¹ ა. ფ ა ნ ც ხ ა ვ ა ს მონაცემებით, ასეთივე არათანაბრობა შეინიშნებოდა აღმოსავლეთ საქართველოს საეკლესიო ყმებშიც; კერძოდ, გორის მაზრაში, 1818 წლის კამერალური აღწერის მიხედვით, შემდეგი მდგომარეობა ყოფილა: გლეხების საერთო რაოდენობის 11,7% სახნავ-სათესი მიწა საერთოდ არ ჰქონია, 30,2% — ერთიდან ოთხ დღიურამდე ჰქონია, 33,8% ხუთიდან ათ დღიურამდე, 17,1% — თერთმეტიდან ოცდაცხრა დღიურამდე და 5,4% — ოცდაათი და მეტი დღიური. А. П а н ц х а в а, К вопросу о развитии аграрных отношений в дореформенной восточной грузии, М., 1957, გვ. 113 (აქ დასახელებულ პროცენტებს ასამდე არ ყოფნის 1,8%. ესენი არიან შეეხნაზე, ყანების არმქონე საეკლესიო გლეხები, რომლებიც ავტორს ცალკე ჰყავს გამოყოფილი).

ათეულ წლებს. მაგრამ ვინაიდან საგადასახადო სისტემა, არსებული საქართველოს რუსეთთან შეერთებამდე, მის მერეც საკმაო ხანს დარჩა თითქმის უცვლელად, ამიტომ ჩვენი ამოცანის გადასაჭრელად აღზინდელი ზანის საბუთების გამოყენება სავსებით გამართლებული იქნება.

ამ საბუთებიდან კი ირკვევა, რომ საეკლესიო ყმებიც გადასახადებს შრომითი, პროდუქტადი და ფულადი რენტის სახით იხდიდნენ. მაგალითად ქრისტეს საფლავის ყმების საგადასახადო ნუსხაში, რომელიც 1787 წლითაა დათარიღებული, სამივე ზემოდასახელებული რენტა გვხვდება. ჩხარელი გლეხების ბერიკელა და გაბრიელა ზარნაძეების ვალდებულებათა შესახებ აღნიშნულ დოკუმენტში ნათქვამია: მართებთ „ბეგარა ცხრა თორმეტიანი ღვინო, ორი ფოხალი პური, ორი ფოხალი ღომი, ორა ფოხალი ქერი, ორი ქათამი, ერთი საბაზიერო და საშობაო დედალი და ძღვენი“¹. ბასილა ზარნაძესა და მის ძმას მიქელს კი ემართათ: „ბეგარა თხუთმეტი თორმეტიანი ღვინო, ერთი კოდი პური, ერთი კოდი ღომი, ერთი კოდი ქერი, სამი ქათამი, საშობაო დედალი, ძღვენი და სამი დღის სეფობა“². დასასრულ, სეხნიკა ზარნაძისა და ვინმე გონიჩკას ვალდებულება იმავე დოკუმენტში ასეა განსაზღვრული: „თორმეტი კოკა ღვინო, ორი ფოხალი პური, ორი ფოხალი ქერი, ორი ფოხალი ღომი, სამი ქათამი, საშობაო დედალი და ძღვენი, ათი შაური საკლავი და სამი დღის სეფობა“³.

როგორც ვხედავთ, პირველ შემთხვევაში საქმე გვაქვს მხოლოდ პროდუქტად რენტასთან, მეორე შემთხვევაში — შრომით და პროდუქტად რენტასთან და მესამე შემთხვევაში — შრომით, პროდუქტად და ფულად რენტასთან.

გასული საუკუნის მთელ პირველ ნახევარში რენტის წამყვან ფორმას საეკლესიო გლეხებშიც პროდუქტადი რენტა წარმოადგენდა. მაგრამ ფულადი რენტა სულ უფრო იკიდებდა ფეხს. «Зная сколько происходит может затруднений в сборе доходов церковных натурою. тость: хлебом, вином, фруктами и прочим, — წერდა 1811 წ. მთავარ-სარდალი ტორმოსოვი, — я согласил архиепископа Варлама, чтобы, во избежание затруднений, те доходы, кои употреблены должны быть на церкви, гимназии, училища и прочие заведения, обратить на деньги..., а те доходы, которые назначены на содержание архиереям и архимандритам, предоставить им получать натурою»⁴.

მაგრამ იმჯერად ეს ღონისძიება ვერ განხორციელდა. ამ საქმეს უფრო ენერგიულად მოჰკიდა ხელი სინოდალურმა კანტორამ, რომელიც დაარ-

¹ ს. კაკაბაძე, დასავლეთ საქართველოს საეკლესიო საბუთები, წიგნი II, ტფ., 1921, გვ. 89.

² იქვე.

³ იქვე.

⁴ ЦГВИАМ. ф. ВУА, д. 407, л. 30.

სდა 1814 წელს დეკასტერიის მაგივრად. უკვე 1818 წლის 6 ნოემბერს საქართველოს ეგზარხოსი ფეოფილაქტი მოახსენებდა სინოდს, რომ «церковные доходы, по соглашению с крестьянами, взамен бывших доселе повинностей натурой обращены в деньги, коих сбор уже начат и продолжается без сопротивления»¹.

ფულად რენტას არც ამის შემდეგ მოუპოვებია გაბატონებული მდგომარეობა საეკლესიო გლეხების გადასახადებში, მაგრამ 1818 წელს გატარებულ ღონისძიებას მაინც ჰქონდა გარკვეული მნიშვნელობა. მან ხელი შეუწყო ფულად-სასაქონლო ურთიერთობათა შემდგომ განვითარებასა და სახელმწიფო გადასახადების კომუტაციას, განხორციელებულს გასული საუკუნის 40-იან წლებში:

საეკლესიო ყმები გადასახადებს უხდიდნენ არა მარტო თავიანთ უშუალო მფლობელებს, არამედ სახელმწიფოსაც. ისინი, როგორც აღვნიშნეთ, სახაზინო და საბატონო გლეხების მსგავსად, სახელმწიფოს აძლევდნენ სურსათს 3 კოდი მარცვლეულის (2 კოდი ხორბალი და ერთი კოდი ქერი) რაოდენობით კომლზე. ბეზაკის რეფორმის შემდეგ კი, ე. ი. 1844 წლიდან, აღმოსავლეთ საქართველოს საეკლესიო გლეხები საკომლო გადასახადსა და საერობო გამოსაღებს ხაზინას უხდიდნენ ფულად. მარტო თბილისის, გორის, თელავის მაზრების და ქსნის უბნის 5 516 კომლი საეკლესიო გლეხი დაბეგრილი იყო 25 851 მან. ყოველწლიური გადასახადით²-ს ხვანაირად რომ ვთქვათ, თითო კომლ საეკლესიო ყმაზე მოდიოდა საშუალოდ 5 მანეთი და 70 კაპიკი სახაზინო გამოსაღები.

თუ ყოველივე ზემოთქმულს დავუმატებთ იმ ნატურალურ გადასახადებს (სატრანსპორტო საშუალებათა გამოყვანა, შარავნების გაკეთება-შეკეთება, ჭარის ნაწილებისა და მოხელეთა უზრუნველყოფა ბინითა და საქმელ-სასმელით და სხვ.), რომელთა ტვირთი საეკლესიო ყმებსაც აწვავთ კისერზე, მაშინ სურათი შედარებით სრული და ნათელი იქნება.

ამ ნაწილს დავამთავრებთ ამის აღნიშვნით, რომ 1852 წლის 5 ნოემბრის კანონით თბილისის გუბერნიის საეკლესიო გლეხები და მამულებო გადავიდნენ სახაზინო უწყებაში, რომელიც დანაკლისის ასანაზღაურებლად სინოდალურ კანტორას ყოველწლიურად ურიცხავდა გარკვეულ თანხას. მარტო 15 წლის (1853 — 1868 წწ.) განმავლობაში ხსენებულმა კანტორამ 1 129 332 მანეთი მიიღო.

¹ ЦГИА СССР, ф. 796, оп. 99, № 1065. 1818, л. 1, მომყავს ა. ფანცხავას წიგნიდან «К вопросу о развитии аграрных отношений в дореформенной Восточной Грузии», М., 1957, გვ. 230.

² სსცია, ფ. 16, საქ. 7481, ფურც. 53. ამ თანხიდან 14819 მანეთი საკომლო გადასახადზე მოდიოდა, ხოლო 11 032 მანეთი — საერობო გამოსაღებზე.

როგორც ზემოთ აღვნიშნეთ, არც ერთი უწყების გლეხის მდგომარეობა არ ყოფილა სახარბიელო, თუ, რა თქმა უნდა, მხედველობაში არ მივიღებთ შედარებით მცირე პროცენტს, რომელიც მატერიალურად უზრუნველყოფილი იყო და ვითარცა საწარმოო საშუალებებით ჭარბად მომარაგებული, განეკუთვნებოდა სოფლის ბურჟუაზიის ჯგუფს. მშრომელი მოსახლეობის დიდ უმრავლესობას მიწის სიმცირე აწუხებდა. წყაროების ერთობლივი მოწმობით მიწის სიმცირე აიძულებდა მწარმოებელ კლასს ერთი და იგივე ნაკვეთი მის სრულ გამოფიტვამდე ესმარა. XIX საუკუნის პირველი მეოთხედის ერთი ანონიმი ავტორის სიტყვით, თელავის მაზრის გლეხები, მაგალითად, სახნავ-სათესი მიწის სიმცირის გამო იძულებული იყვნენ 10—15 წელი ზედიზედ დამეშუშავებინათ ერთი და იგივე მიწის ფართობი¹. «Земли удобной для хлебопашества весьма мало, и поэтому жители распахивают каждый год один и те же пашни», — წერდა 1843 წელს თბილისის მაზრის უფროსი. მეტ-ნაკლებად იგივე ითქმის საქართველოს სხვა რაიონებზეც.

ასეთი ვითარება კი, სხვა არახელსაყრელ გარემოებასთან ერთად (ტექნიკის შედარებით დაბალი დონე, მუშა საქონლის საგრძნობი სიმცირე და სხვ.), განაპირობებდა სასოფლო-სამეურნეო კულტურათა დაბალ მოსავლიანობას. 1857 წელს, მაგალითად, საშემოდგომო პურის მოსავალი ოსეთში ერთს ოთხზე უდრიდა, ხოლო თუშეთ-ფშავ-ხევსურეთში — ერთს სამზე².

თანამედროვენი კი ამ მოსავალს სავსებით დამაკმაყოფილებლად თვლიდნენ³.

გლეხის ეკონომიური მდგომარეობის ერთ-ერთ განმსაზღვრელ ფაქტორს მესაქონლეობა წარმოადგენს. მას დიდი მნიშვნელობა ჰქონდა არა მარტო, ვთქვათ, ფშავში, თუშეთსა და ხევსურეთში, სადაც მოსახლეობის წამყვანი საქმიანობა მესაქონლეობა იყო, არამედ მიწათმოქმედების რაიონებშიც. და პირდაპირ უნდა ითქვას, რომ ქართველი გლეხები არც ამ მეორე მნიშვნელოვანი პირობით იყვნენ უზრუნველყოფილნი. 1845 წლის ერთი ოფიციალური ანგარიშის თანახმად, ქუთაისის, გორის, სიღნაღისა და ზოგ სხვა მაზრაში ხვნა-თესვის ნორმალურად წარმოება ძალზე გაძნელებული იყო „მუშა საქონლის უყოლობის გამო“⁴. შინაური პირუტყვით, იმავე თანამედროვის სიტყვით, არა მარტო მშრომელი მოსახლეობა

¹ ЦГВИАМ, ф. ВУА, д. 18481, л. 89.

² სსცია, ფ. 16., საქ. 6244, ფურც. 88.

³ იქვე, ფ. 26, საქ. 772, ფურც. 25. ი. ანთოლოგია, დასახ. ნაშრომი, გვ. 379.

⁴ იქვე, ფ. 4, ანაწ. 7, საქ. 766, ფურც. 34.

არ ყოფილა უზრუნველყოფილი, არამედ თვით მემამულეებიც განიცდიდნენ თურმე მის ღიდ ნაკლებობას¹.

თუ რაოდენ არასახარბიელო მდგომარეობა იყო მწარმოებელი კლასის საქონლით მომარაგების მხრივ, ამას მკაფიოდ ადასტურებს მონაცემები თბილისის მაზრის სართიჭალის უბნის სახაზინო გლეხების შესახებ. იქ 1859 წ. ხსენებული კატეგორიის გლეხის თითო კომლზე მოდიოდა საშუალოდ²: ცხენი — 0,3, კამეჩი — 0,8, ძროხა და დედა-კამეჩი — 0,3, ხარი — 1, ხბო — 0,3, ცხვარი და თხა — 5, ღორი — 0,9 და ვირი — 0,09. აქედან კარგად ჩანს, რომ საშუალოდ სართიჭალის უბნის არც ერთი გლეხი არ ყოფილა შინაური საქონლის საჭირო რაოდენობით მომარაგებული, რაც რა თქმა უნდა, ოდნავადაც არ გამოიციხავს თვით სართიჭალაში და საქართველოს სხვა რაიონებში პირუტყვით მდიდარი ოჯახების არსებობას. ასეთი ფაქტები საკმაო რაოდენობით იყო დასახელებული წინამდებარე ტომის პირველ თავში. აქ მხოლოდ იმას შევნიშნავთ, რომ შინაური საქონლით საკმაოდ და ჭარბად უზრუნველყოფილ უშუალო მწარმოებელთა რიცხვი ძალზე მცირე იყო გლეხთა იმ კომლებთან შედარებით, რომელთაც ან სულ არ ჰყავდათ ეს საქონელი, ან ჰყავდათ მცირე რაოდენობით.

აპრიგად, მიწისა და შინაური საქონლის სიმცირე, ტექნიკის დაბალი დონე, აგრონომიული წესების უცოდინარობა-გამოუყენებლობა — აი ის ძირითადი მიზეზები, რომლებიც სხვა არახელსაყრელ გარემოებასთან ერთად (სოციალური და ეროვნული ჩაგვრა და აქედან გამომდინარე მრავალი უბედურება) განაპირობებდნენ გლეხის მეურნეობის დაბალ პროდუქტიულობას, მის დეფიციტურობას და სოფლის მშრომელი მოსახლეობის დიდი უმრავლესობის სიღატაკეს. თვით საშუალო შეძლების გლეხიც კი ძლივს ახერხებდა მეურნეობის უდეფიციტოდ წარმართვას³.

მეტად ღარიბული და ერთფეროვანი იყო გლეხთა ფართო მასების კვება, მათი საჭმელ-სასმელი. მიწის სიმცირე, გადასახადების მძიმე ტვირთი, მეფას მოხელეთა და ადგილობრივი ფეოდალების თვითნებობა-გაუკითხაობა და სხვა, განაპირობებდნენ მწარმოებელი კლასის გაჭირვებულ ცხოვრებას. თვით ოფიციალური პირებიც კი იძულებული იყვნენ დაედასტურებინათ, რომ პროდუქტები, მოყვანილი მშრომელი კაცის მიერ. ყოფნიდა მას ხშირ შემთხვევაში მხოლოდ ნახევარა წელიწადი ან უფრო ნაკლებ ხანს⁴.

როგორც წესი, ძალიან ცუდი და დაბალი ხარისხის იყო გლეხის საცხოვრებელი სახლი. «При чрезвычайном изобилии лесов и других

¹ სტოა, ფ. 16, საქ. 6244, ფურტ. 106—107.

² И. А н т е л а в а, Государственные крестьяне..., გვ. 382 — 383.

³ იქვე, გვ. 384.

⁴ იქვე, გვ. 257.

материалов, — წერდა გასული საუკუნის 30-იან წლებში ერთი თანამედროვე, — жилища их (კახელი გლეხების. — ავტ.) похожи более на погреба, или на сараи, и бывают двух родов: в долине... дома строятся с выведенными наружу стенами, большею частью из плетня с трехугольною соломенною крышею. В домах нет ни полов, ни труб, ни окон, ни потолков... За горами — в западной и южной стороной уезда (ლაპარაკია თელავის მაზრაზე — ავტ.) — строения... делаются другим образом: там вырывают ямы, по краям ставя столбы, на которых утверждают стропила в виде купола. оставляя вверху для выхода дыма и для освещения сакли дневным светом небольшое отверстие».¹

სახლის მოწყობილობაც ასევე ცუდი იყო, ხშირ შემთხვევაში კი გლეხს ის საერთოდ არ ჰქონდა. ჰექსტჰაუზენი (1843 წ.) ირწმუნება, მაგალითად, რომ მას მეგრელი გლეხის ოჯახის დათვალიერებისას არაფერი უნახავს ისეთი, რასაც შეიძლება ავეჯი ეწოდოს². გურულ გლეხთა ცხოვრების პირობების აღწერისას იგი თითქოს სავანგებოდ აღნიშნავს ისეთი აუცილებელი საგნების უქონლობას, როგორცაა მაგიდა, სკამი და სხვ.

მაგრამ შეცდომა იქნებოდა ყველა გლეხის სახლისა და მისი ავეჯის ამ სახით წარმოდგენა. შეიძლებული გლეხები, რა თქმა უნდა, სულ სხვა პირობებში ცხოვრობდნენ. თანამედროვეთა მოწმობით, გასული საუკუნის 30-იან წლებში, თელავის მაზრის მთელ რიგ სოფლებში (მაგალითად, ყვარელში, შილდაში, საგარეჯოში, ენისელში, პატარძელში და სხვ.) ყოფილა «порядочные дома, с окнами и каминами, построенные из булыжника на извести».³

მეტად არასახარბიელო საბინაო პირობები, ცუდი კვება და შიმშილიანობა, სრულიად არადაამკმაყოფილებელი სამედიცინო მომსახურება და სხვ. ხელს უწყობდა ეპიდემიურ და სხვა საშიშ ავადმყოფობათა ხშირ და მასობრივ გავრცელებას. ძალიან მძიმე აღმოჩნდა, მაგალითად, თავის შედეგებით ხოლერა, 1830 წლის ზაფხულში რომ გავრცელდა საქართველოში. მან მოიკვა თბილისის, თელავის, სიღნაღის, დუშეთისა და გორის მაზრები და აგრეთვე ბორჩალოსა და ბამბაკის დისტანციები. მარტო 24 დღის განმავლობაში, ე. ი. 7 აგვისტოდან 31 აგვისტომდე. ხოლერამ დასახელებულ რაიონებში 1878 კაცი იმსხვერპლა⁴. მომდევნო, სექტემბრის, თვეში კი მას 894 კაცი გაუსტუმრებია იმქვეყნად⁵. კიდევ უფრო საშინელი ყო-

¹ «Обозрение», I, გვ. 191—192.

² СХАО, I, გვ. 3.

³ იქვე, გვ. 13.

⁴ И. Антелива, Государственные крестьяне..., გვ. 373.

⁵ იქვე.

ფილა ხოლერის ეპიდემია 1857 წელს. ამ ავადმყოფობით, არსებული აბასრული ცნობებით, 16 377 კაცი დაავადებულა, რომელთაგან 5 914 კაცი (ან დაავადებულთა საერთო რაოდენობის 36 %) დაღუპულა¹. დაღუპულებში, ბუნებრივია, პრივილეგიური წოდების წარმომადგენლებიც იყვნენ, მაგრამ დაზარალებულთა აბსოლუტური უმრავლესობა, ცხადია, მინც მშრომელ მოსახლეობაზე მოდიოდა.

ეპიდემიისა და სხვა დაავადებათა წინააღმდეგ ბრძოლა მიმდინარეობდა ძალიან სუსტად და წარუმატებლად. ცარიზმი ნაკლებად ზრუნავდა ხალხის ჯანმრთელობაზე და ამ საქმეზე ხარჯავდა უმნიშვნელო თანხას. იგრძნობოდა ექიმების, საავადმყოფოების, აფთიაქებისა და სხვა სამედიცინო დაწესებულებათა დიდი ნაკლებობა «Для подания медицинских пособий, — ნათქვამია 1857—1858 წლების მეფისნაცვლის ანგარიშში, — во всех уездах и округах и в некоторых более значительных городах положены по штатам медики. К сожалению, на Кавказе постоянно чувствуется недостаток врачей для замещения штатных должностей»².

ბარიატინსკის დროს, ე. ი. გასული საუკუნის 50-იანი წლების ბოლოს, მთელ კავკასიაში სულ მხოლოდ 5 სახელმწიფო აფთიაქი ყოფილა, აქედან ორი სათადარიგო (სტავროპოლსა და თბილისში) „ჯარისა და ჰოსპიტლების მედიკამენტებით მომმარაგებელი“ და სამი რეცეპტორული პიატიგორსკში, თბილისსა და ერევანში³. ეგრეთ წოდებული თავისუფალი აფთიაქების რაოდენობა კი 10-ს უდრიდა, რომლიდანაც ორი საქართველოს დედაქალაქში მოქმედებდა. ბარიატინსკის მოწმობით, ისინი მოსახლეობის მინიმალურ მოთხოვნილებასაც კი ვერ აკმაყოფილებდნენ, ვერ ამარაგებდნენ აუცილებელი მედიკამენტებით.

სახალხო ჯანმრთელობის საქმის ესოდენ ცუდად დაყენება დიდ გასაქანს აძლევდა ექიმბაშებს, მკითხავეებს, მღვდლებს და სხვა მათ მსგავს „სპეციალისტებს“, რომლებიც მასობრივად ამახინჯებდნენ და ღუპავდნენ ადამიანებს. ავადმყოფ, ფიზიკურად დასუსტებულ გლეხს კი, ცხადია, მუშაობა უჭირდა და ეს კი უფრო აუარესებდა მის ისედაც არასახარბიელო ეკონომიურ მდგომარეობას.

ძლიერ იჩიავებოდა სოფლის მშრომელი მოსახლეობა წერა-კითხვის უცოდინარობით, რასაც, გადაუჭარბებლად შეიძლება ითქვას, საყოველთაო ხასიათი ჰქონდა. 1846 წლის 26 იანვრის ერთ ოფიციალურ დოკუმენტში პირდაპირაა ნათქვამი, რომ გორის მაზრის სახაზინო სოფელ შინდისში „მღვდლისა და დიაკონის გარდა, არ არის არც ერთი წერა-კითხვის

¹ И. Антелава, Государственные крестьяне..., გვ. 373.

² АКАК, XII, ч. II, гв. 1324.

³ იქვე.

მკოდნე გლეხი“, რომელსაც შეეძლოს საქმის წესიერად წარმოებაო¹. იმ აუარებელ თხოვნა-საჩივრებიდან, გლეხებს რომ ხელისუფლების წარმომადგენლებისთვის მიუციათ, ჩვენ ვერ ვნახეთ ვერც ერთი თვით გლეხების მიერ ხელმოწერილი. მაზრის უფროსების ანგარიშებიდან აშკარად ჩანს, რომ განსახილველი ხანის საქართველოს სოფელში არ იყო თითქმის არც ერთი, მშრომელი ხალხის შვილებისთვის განკუთვნილი, სასწავლებელი. ასე მაგალითად, თანამედროვე მიმომხილველის მოწმობით, გასული საუკუნის 30-იან წლებში თბილისის მაზრაში არ ყოფილა არც ერთი სკოლა, სადაც მეცადინეობა შეეძლოთ გლეხების წრიდან გამოსულ ბავშვებს². მართალია, იმ დროს საქართველოში (კერძოდ, ქუთაისში, გორში, თელავში, სიღნაღში, ახალციხეში, დუშეთში, თბილისში და სხვ.) იყო რამდენიმე სამაზრო სასწავლებელი, მაგრამ მათი კარები, როგორც ცნობილია, თითქმის დაკეტილი იყო გლეხური წარმოშობის ბავშვებისათვის. იმ 444 მოწაფიდან, რომელნიც საქართველოს სამაზრო სკოლებში ირიცხებოდა 1834 წელს, 284 კაცი ან 63,9% თავად-აზნაურებისა და მოხელეთა შვილები იყვნენ, 153 კაცი ან 34,4% — ვაჭრებისა და მეშჩანების, ხოლო 7 კაცი ან 1,7% — ყველა დანარჩენი წოდების³.

კიდევ უფრო საინტერესოა ცნობები 1830 წელს დაარსებული გორის სამაზრო სასწავლებლის მოსწავლეთა შემადგენლობის შესახებ. იქ ხსენებულ წელს, როგორც ჩანს, ირიცხებოდა თურმე 98 მოწაფე. აქედან: 15 — თავადური წარმოშობისა, 37 — აზნაურული, 11 — ოფიცერთა შვილები, 7 — სასულიერო პირთა, 24 — მოქალაქეთა, 3 — სახაზინო გლეხთა და 1 — საეკლესიო ყმისა⁴.

ოდნავ მეტი იყო გლეხების წრიდან გამოსულ ბავშვთა რაოდენობა ეგრეთ წოდებულ სამრევლო სკოლებში, მაგრამ საქმეს ესაც არ შველოდა და სოფლის მშრომელი მოსახლეობის აბსოლუტური უმრავლესობა მაინც წერა-კითხვის უცოდინარი რჩებოდა. ამ გარემოებას კი მწარმოებელი კლასისათვის ჰქონდა არა მარტო მორალური, არამედ დიდი მატერიალური მნიშვნელობა. გლეხს, რომელსაც არ შეეძლო თავის გაჭირვების წერილობით ჩამოყალიბება, ძვირად უჯდებოდა თხოვნა-საჩივრების შედგენა. ერთ საბუთში პირდაპირაა მითითებული, რომ «сочинение жалоб, которые отыскивающий свободы подает обыкновенно почти всем властям, становится ценою всего его достатка»⁵.

¹ სსცია, ფ. 4, ანაწ. 2, საქ. 98, ფურც. 8.

² «Обозрение», I, გვ. 291.

³ გ. თ ა ვ ზ ი შ ვ ი ლ ი, სახალხო განათლებისა და პედაგოგიური აზროვნების ისტორია საქართველოში, თბ., 1948, გვ. 109.

⁴ ტრ. ზ უ ნ დ ა ძ ე, საერო განათლება საქართველოში XIX ს. პირველ ნახევარში, იბ. კრებული „განათლების ისტორია საქართველოში“, თბ., 1937, გვ. 98.

⁵ სსცია, ფ. 220, საქ. 1064, ფურც. 22.

ასეთია მოკლედ სხვადასხვა უწყების გლეხთა საერთო მდგომარეობის ზოგადი დახასიათება. ამ დახასიათებიდან, ისე როგორც სახაზინო, საბატონო და საეკლესიო გლეხების მიწათმფლობელობისა და გადასახადების მიმოხილვიდან, ნათლად ჩანს, რომ ყველა ისინი ცხოვრობდნენ და შრომობდნენ სოციალური და ეროვნული ჩაგვრის მძიმე პირობებში. მაგრამ ეს, რა თქმა უნდა, იმას არ ნიშნავს, რომ აბსოლუტურად ერთნაირი იყო მათი ეკონომიური და უფლებრივი მდგომარეობა. ჩვენს ხელთ არსებული საკმაოდ უხვი ფაქტობრივი მასალა ერთხმად ადასტურებს, რომ ფეოდალურ-ბატონყმურ ურთიერთობათა უკუღმართ შედეგებს ყველაზე ნაკლებად სახელმწიფო გლეხები განიცდიდნენ. მეორე ადგილზე საეკლესიო ყმები იყვნენ, ხოლო მესამეზე — საბატონო. საქართველო-იმერეთის გუბერნიის 1845 წლის ანგარიშში არაორაზროვნადაა ნათქვამი, რომ ყველაზე უზრუნველყოფილად ითვლებიან „სახელმწიფო, მერე... საეკლესიო და ბოლოს მემამულეთა გლეხები“¹. ასევე წერდა უფრო მოგვიანებით, სახელდობრ 1851 წელს, გენერალ-მაიორი გაგარინი. «В уездах... Кутаисском, Шоропанском, Рачинском и Озургетском, —зкитохულობთ მის მოხსენებაში, — состоят крестьяне казенные, церковные и помещичьи... Последние, т. е. помещичьи крестьяне, беднее, казенные же гораздо состоятельнее и более имеют средств на обзаведение сельского хозяйства, несмотря на недостатки земель»². ამ მოწმობით გასაგები ხდება ის „უძლეველი სწრაფვა“ სახელმწიფო უწყებისაკენ, რომელსაც, დოკუმენტის სიტყვით, ამჟღავნებდნენ ხოლმე საბატონო გლეხები³.

რით იყო უკეთესი სახელმწიფო გლეხთა მდგომარეობა სხვა უწყების მშრომელებთან შედარებით? პირველ ყოვლისა მიწით. მართალია, მიწა, რომელიც მათ განკარგულებაში იმყოფებოდა, არ იყო დიდი, მაგრამ ის მაინც რამდენადმე სჭარბობდა, კერძოდ, საბატონო ყმათა მიწათმფლობელობას. ს. ავალიანის გამოანგარიშებით, მაგალითად, რეფორმამდელი ხანის ქუთაისის გუბერნიაში მემამულეთა გლეხების თითო კომლზე საშუალოდ მოდიოდა ერთნახევრიდან ორ დესეტინამდე მიწის ფართობი⁴. სახელმწიფო გლეხებს კი, როგორც ცნობილია⁵, ასეთი მცირე საშუალო ნაძლეები არ ჰქონიათ არც ქუთაისის, არც რაჭის, არც ოზურგეთის და. შით უმეტეს, არც ახალციხის მაზრებში.

მაგრამ საბატონო ყმების, ისე როგორც ნაწილობრივ საეკლესიო გლეხების, მთავარი უბედურება მაინც მცირემიწიანობაში კი არ მდგომარეობ-

¹ სსცა, ფ. 4, ანაწ. 7, საქმე 766, ფურც. 34.

² იქვე, ანაწ. 8, საქ. 211, ფურც. 73.

³ იქვე, ფ. 1115, საქ. 1, ფურც. 2.

⁴ С. А в а л и а н и, Крестьянский вопрос..., I, გვ. 511, 512.

⁵ И. А н т е л а в а, Государст. крестьяне..., გვ. 251, 261, 264, 265—267..

და¹, არამედ იმ მრავალრიცხოვან გადასახადებში, რომლითაც ისინი, განსაკუთრებით კი პირველნი, იყვნენ დაბეგრნილი უშუალოდ მფლობელთა სასარგებლოდ. მემამულეთა და საეკლესიო უწყების გლეხები მეზატონის მიწით სარგებლობისთვის იხდიდნენ ღალას პურის (საერთოდ მარცვლეულის) მოსავლის $\frac{1}{7}$ — $\frac{1}{3}$ (ხშირად კი უფრო მეტი) ნაწილის სახით და შრომით ბეგარას 10—50 და მეტი დღის რაოდენობით წელიწადში. სახელმწიფო გლეხებს კი ნადელები ეძლეოდათ უსასყიდლოდ, ყოველ შემთხვევაში, ოფიციალურად ამაში ისინი არაფერს იხდიდნენ. რაც შეეხება ღალას, მას სახაზინო გლეხებიც იხდიდნენ, მაგრამ ჩვეულებრივ მოსავლის $\frac{1}{10}$ ნაწილის რაოდენობით და ისიც მხოლოდ იმ მიწებზე, რომლებსაც ისინი ნადელის ზევით ამუშავებდნენ. აი ერთ-ერთი სერიოზული მიზეზი იმისა, რომ საერო (და ნაწილობრივ სასულიერო) ფეოდალების გლეხები ასე თავგამოდებით იბრძოდნენ სახაზინო უწყებაში გადასვლისათვის. ამ ბრძოლას ბოლო რომ მოღებოდა, ქართველი თავადაზნაურობა მოითხოვდა სახელმწიფო გლეხებს ეხდათ ღალა (გადიდებული რაოდენობით) სანადელო მიწით სარგებლობისათვის. «Увидя прибовку налогов на казенных крестьян, — წერდნენ ქართველი თავადები და აზნაურები, — наши крестьяне захотят остаться в помещичьих деревнях, но без того ни за что не останутся, какую бы жертву не принесли им, так как всякий через посредство родственников легко найдет свободные земли при казенных... деревнях»².

განსაკუთრებით მძიმე, დიდ მატერიალურ და ფიზიკურ მსხვერპლთან იყო დაკავშირებული საბატონო (და ნაწილობრივ საეკლესიო) ყმათა ეგრეთ წოდებული პირადი გადასახადები, რისგანაც სახელმწიფო გლეხები საერთოდ თავისუფალნი იყვნენ. ამ გადასახადების რაოდენობა კი, ჩვენი გამოანგარიშებით³, დაახლოებით 74 მანეთს უდრიდა წელიწადში და სულ ცოტა 6-ჯერ მაინც აღემატებოდა სახელმწიფო გლეხთა საკომლო გადასახადისა და საერობო გამოსაღების ყველაზე მაღალ ნორმას, დაკანონებულს 1843—1845 წლების საფინანსო რეფორმით. საქმეს საგრძობლად ართულებდა ის გარემოება, რომ საბატონო (ნაწილობრივ კი საეკლესიო) ყმათა გადასახადები მტკიცედ რეგლამენტირებული არ იყო და მფლობელები უმეტეს შემთხვევაში თვითნებურად საზღვრავდნენ მათ სიდიდემოცულობას. სულ სხვა მდგომარეობაში იყვნენ სახელმწიფო გლეხები.

¹ ზუსტი სტატისტიკური ცნობების უქონლობის გამო ძნელია გადაჭრით ითქვას, ვინ უფრო იყო მიწით უკეთ უზრუნველყოფილი—სახაზინო თუ საეკლესიო გლეხი. საფიქრებელია, რომ უქანასენელი პირველთან შედარებით უკეთესად თუ არა, ყოველ შემთხვევაში უარესად მაინც არ იყო მიწით მომარაგებული.

² მომყავს შ. ჩ ხ ე ტ ი ა ს წიგნიდან „საგლეხო რეფორმის ისტორიისათვის...“, გვ. 169.

³ И. А н т е л а в а, Государственные крестьяне..., გვ. 388—389.

მათ გამოსაღებთა რაოდენობა კანონით იყო დადგენილი და სახაზინო უწყების ყველა გლახმა ეს ძალიან კარგად იცოდა.

შედარებით სხვა კატეგორიის გლახებთან, სახელმწიფო გლახები უკეთეს უფლებრივ მდგომარეობაშიც იმყოფებოდნენ. ფაქტიურად ისინი ისეთივე ყმები იყვნენ, როგორც საერო და სასულიერო ფეოდალების გლახები¹, მაგრამ იურიდიულად თავისუფალ მწარმოებლებად ითვლებოდნენ და ეს მათ მაინც გარკვეულ შეღავათებს აძლევდა. ბევრი რამ, რაც საბატონო (და საეკლესიო) გლახებს ეკრძალებოდათ, ნებადართული იყო სახელმწიფო გლახებისათვის. 1834 წლის 21 აპრილის კანონი², მაგალითად, ნებას აძლევდა ყველას ვენახების, ხილის, ბაღების, თუთის პლანტაციებისა და მეურნეობის სხვა დარგების მოსაწყობად აეღო სახაზინო მიწები. სახელმწიფო გლახებისგან განსხვავებით, გამოწილის წარმოადგენდნენ საბატონო და, საფიქრებელია, საეკლესიო ყმებიც. ასეთი მაგალითების დასახელება საკმაო რაოდენობით შეიძლებოდა, მაგრამ ჩვენ ამისგან თავს ვიკავებთ³. ნათქვამს მხოლოდ იმას დაეუმატებთ, რომ კანონით აკრძალული იყო და პრაქტიკაც გამორიცხავდა სახელმწიფო გლახის ყიდვა-გაყიდვას, რაც უეჭველად დიდი მნიშვნელობის ფაქტი იყო.

ყოველივე ზემოთქმულიდან ჩანს, რომ სოფლის მშრომელი მოსახლეობა, მისი ყველა კატეგორია, შრომობდა და ცხოვრობდა სოციალური და ეროვნული ჩაგვრის მძიმე პირობებში, მაგრამ ყველა თანაბარ მდგომარეობაში მაინც არ იყო. შედარებით უკეთესი მდგომარეობა ჰქონდათ სახელმწიფო გლახებს, მერე — საეკლესიო და ყველაზე უარესი კი — საბატონო ყმებს.

§ 5. გლახების ბრძოლა სოციალური და ეროვნული ჩაგვრის წინააღმდეგ

სოფლის მშრომელი მოსახლეობა ყოველთვის მედგრად იბრძოდა მიწისა და თავისუფლებისათვის, მაგრამ განსაკუთრებით ენერგიულად მან თავის კლასობრივ მტერს გასული საუკუნის 30-იანი წლებიდან შეუტია. ფულად-სასაქონლო, ბურჟუაზიულ ურთიერთობათა განვითარებამ საგრძნობლად გააძლიერა უშუალო მწარმოებელთა ექსპლოატაცია, მათი საგადასახადო თუ სხვაგვარი ტვირთი. ეგრეთ წოდებულ უღები სამსახურისა და გადასახადების შესახებ ზემოთ გვქონდა საუბარი, მაგრამ ვფიქრობთ, ზედმეტი არ იქნება კიდევ ერთი მოწმობა მოვიტანოთ. ამ მოწ-

¹ Архив Маркса и Энгелса, XII, გვ. 91.

² ВПСЗРИ, IX, № 7016.

³ დაწერილებით იხ. И. Антелава, Государственные крестьяне..., გვ. 389—390.

მოზის ავტორია სენატორი განი, რომელიც 1838 წელს მოვლინებულ იქნა საქართველოში მისი მდგომარეობის ადგილზე შესასწავლად. იგი იძულებული იყო ხაზი გაესვა გლეხების ცხოვრების მძიმე პირობებისათვის, ამ პირობების გაუარესებისათვის, რაც, მისი სამართლიანი შენიშვნით, მემამულეთა მხრით თავიანთი ხელქვეითებისადმი გაძლიერებული მოთხოვნების წაყენებით იყო გამოწვეული. «Новые нужды, — მოახსენებდა იგი უმაღლეს მთავრობას, — распространяемые в сем крае по сближению его с Европою, к удовлетворению коих недостаточны прежние средства..., повели дворян к требованиям от крестьян повинностей, превосходящих прежнюю меру. На сем пути противозаконных взысканий, помещики уже не знают границ и часто отнимают у крестьян собственность движимую и недвижимую и даже детей»¹.

მრავალმხრივ შევიწროებული გლეხები ბრძოლის სხვადასხვა ფორმას მიმართავდნენ, რომელთა შორის მნიშვნელოვანი ადგილი ეჭირა ბრძოლას სახაზინო უწყებაში გადასვლისათვის. ეს, რა თქმა უნდა, სოფლის მშრომელ მოსახლეობას არ ანთავისუფლებდა ფეოდალურ-ბატონუური ექსპლოატაციისაგან, მაგრამ რამდენადმე მაინც ამსუბუქებდა მის მდგომარეობას და ამიტომ ყოველნაირად, მათ შორის სასამართლო ძიების გზით, ცდილობდნენ დამეტკიცებინათ, რომ მათ მემამულეები „არაკანონიერად“ ფლობენ და რომ ისინი ხაზინის კუთვნილებას წარმოადგენენ. «Присутственные места, — წერდა ბარონ როზენი იუსტიციის მინისტრს დაშკოვს 1833 წლის 26 ოქტომბერს, — в настоящее время, можно сказать, наводнены делами ищущих вольности, которые количеством, запутанностью и продолжительным производством слишком много обременяют оные, и если не положить преграды искам сего рода, то на будущее время они еще более умножаются»². 1832 წლის შეთქმულების მონაწილემ ელიზბარ ერისთავმა დაკითხვაზე უჩვენა, რომ მემამულეების წინააღმდეგ ჯანყდებიან მთელი სოფლები, ხოლო ერთმა მათგანმა გორის მაზრაში თავი ხაზინის კუთვნილებად გამოაცხადა³. საქართველოს უმაღლესი მთავრობის აღმასრულებელმა ექსპედიციამ თავის 1831 წლის 27 ივლისის სხდომაზე აღიარა მემამულეთა მხრივ გაუთავებელი საჩივრების მიღების ფაქტი „გლეხების ურჩობისა და მათ მიერ მთელი სოფლებით თავისუფლების ძიების შესახებ“⁴. 1832 წელს იმერელი აზნაური აბაშიძე ჩიოდა, რომ

¹ ЦГИА СССР, ф. 1268, оп. I (68), д. 70, л. 25.

² АКАК, VIII, в. I, гв. 6.

³ სსცია, ლენინგრადის ფონდი, III, ფურც. 696.

⁴ იქვე, ფ. 214, საქ. 3269, ფურც. 1—6.

მისი ყმები თაზიკა და თანდილა ნადირაძეები, ვითარცა „ცუდის ყოფაქცევისა, წინააღმდეგობითა არ მემორჩილებიან მე ვალისამებრ ყმობრივისა და სხვათა აგულიანებენ რა ურჩობისადმი, ნერგავენ შორის საზოგადოებისა ყმათა სოფლის ღურავისათა სხვათა და სხვათა განუსვენებლობათა და განხეთქილებათა“¹. დასასრულ, ქართველი თავადაზნაურობა თავის სამხედრო მინისტრ ჩერნიშოვისადმი 1842 წელს მირთმეულ თხოვნაში წერდა მემამულეთა გლეხების თავისუფლებისათვის ბრძოლის მასობრივი ხასიათისა და მათი სახაზინო უწყებაში გადასვლის დიდი სურვილის შესახებ².

არსებული ცნობების თანახმად, 1843—1846 წლებში მარტო აღმოსავლეთ საქართველოს გლეხებმა აღძრეს 771 საქმე, ისინი ამტკიცებდნენ — მემამულეებს არ ვეკუთვნითო³. იმავე წლებში ქვეყნის სხენეზულ ნაწილში ადგილი ჰქონდა გლეხთა აშკარა ურჩობის 133 შემთხვევას⁴. ამასთან საყურადღებოა ის გარემოება, რომ დოკუმენტში, საიდანაც ამოღებულია ეს ცნობები, პირდაპირაა ნათქვამი, რომ „ურჩობის ერთ შემთხვევად ითვლება ურჩობა მთელი სოფლის ან საზოგადოებისა“, ისევე როგორც თავისუფლების ძიების ერთ საქმედ ითვლება ბრძოლა მთელი სასოფლო კოლექტივისა⁵.

ჩანს, კლასობრივი ბრძოლის აღნიშნულ ფორმებს, ე. ი. შეუწელებელ სწრაფვას სახაზინო უწყებისაკენ და აშკარა ურჩობას, არანაკლები მასშტაბი ჰქონია დასავლეთ საქართველოშიც⁶. როგორც აღვნიშნეთ, სხვა საკითხთან დაკავშირებით, ბარონ როზენი ერთ-ერთ წერილში ხაზს უსვამდა ამ მოვლენის მასიურობას და მისი სწრაფად ლიკვიდაციის აუცილებლობას. „მოსხენებითაგან იმერეთის მეუფროსეთა, — წერდა იგი 1835 წელს თავად გრიგოლ წერეთელს, — ვცანი, რომელ მამულსა შინა საზოგადოთ ყოველთავე წერეთელთასა მოუკლებლად სწარმოებენ ურიგობანი, უმორჩილებისა გამო გლეხთასა თვისთა მფლობელთადმი“⁷.

ძალიან ხშირად მემამულეებისა და მოხელეთა მიერ შევიწროებულ გლეხს თავს ანებებდა დიდი ხნის საცხოვრებელ ადგილს და უკეთესი ხვე-

¹ ო. ს. ო. ს. ე. ლ. ი. ა., მასალები კლასობრივი ბრძოლის ისტორიისათვის ფეოდალური ხანის დასავლეთ საქართველოში, გვ. 117.

² И. А. Н т е л а в а, Из истории социально-политического и освободительного движения Грузии в 30—50 годах XIX века, „მაცნე“, 1964, № 1, გვ. 51.

³ იქვე, გვ. 51—52.

⁴ იქვე, გვ. 52.

⁵ იქვე.

⁶ დაწვრილებით] თავისუფლების ძიების შესახებ აღმოსავლეთ და დასავლეთ საქ-ში, იხ. И. А. Н т е л а в а, Государственные крестьяне Грузии в первой половине XIX в., თავი II.

⁷ ო. ს. ო. ს. ე. ლ. ი. ა., მასალები კლასობრივი ბრძოლის ისტორიისათვის..., გვ. 122.

დრის ძებნაში სხვაგან გარბოდა. მიუხედავად იმისა, რომ ბატონის დატო-
ვება იოლი საქმე არ იყო და ბევრ წინააღმდეგობას აწყდებოდა, გაქცეულ
გლეხთა რაოდენობა მაინც საკმაოდ დიდი იყო. არსებული არასრული
ცნობებით, 1831 წელს მარტო გორის მაზრასა და ქალაქ თბილისში ირი-
ცებოდა 1600 იმერეთიდან გამოქცეული გლეხი, ხოლო კახეთში
(1837 წ.) — ორი ათასი¹.

ძალიან საინტერესოა სტატისტიკური მასალა (რა თქმა უნდა, არა-
სრული) გლეხთა საჩივრების შესახებ, საჩივრებისა, რომელთა შეტანით
მთავრობის ინსტანციებში ისინი თავის დაცვასა და უსამართლობის ამოკ-
ვეთას ცდილობდნენ. ქუთაისის გენერალ-გუბერნატორის ცნობით², 1850
წელს საგუბერნიო სამმართველოს 311 წერილობითი საჩივარი მიუღია,
1852 წელს — 359, 1854 წელს — 315, 1856 წელს — 800 და 1857
წელს 980. გუბერნატორთა ანგარიშებში დაცულია, აგრეთვე, ცნობები
გლეხების მიერ სამაზრო ორგანოებში სიტყვიერად შეტანილი საჩივრების
შესახებ. მათ რიცხვს 1857 წელს და ისიც მარტო ქუთაისის გუბერნიაში
2 232 მიუღწევია³.

სოფლის მშრომელი მოსახლეობა, როგორც ვთქვით, უჩიოდა არა მარ-
ტო უშუალო მფლობელებს, არამედ სასოფლო, სამაზრო და საგუბერნიო
ადმინისტრაციის წარმომადგენლებსაც. გლეხები უარს აცხადებდნენ არა
მარტო საბატონო, არამედ სახაზინო გადასახადების გადახდაზედაც, რაც
აწიურად მთავრობის მხრივ ძალის გამოყენებასთან იყო დაკავშირებული⁴.

ბრძოლის ამ ფორმებთან ერთად, უმიწობა-მცირემიწიანობით, მძიმე
გადასახადებით, ადგილობრივი ფეოდალებისა და ცარიზმის უსინდისო
შოხეღეთა მიერ მეტად შეწუხებული და შევიწროებული ქართველი გლე-
ხები განსახილველ ხანაში, ისე როგორც მანამდეც, შეიარაღებულ გამოს-
კვლებსაც აწყობდნენ და უფრო ენერგიულად უტევდნენ თავიანთ კლასობ-
რივ მტერს.

ერთ-ერთი ასეთი გამოსვლა მოხდა 1830 წელს სამხრეთ ოსეთში. ხე-
ლისუფლებამ, რომელმაც იშვიდობიანი გზით ვერ მიაღწია აჯანყებულ-
თა დაშოშმინებას, ძალა გამოიყენა. მან ხსენებული წლის ზაფხულში ოსე-
თის სოფლებში სამხედრო ნაწილი გაგზავნა, გენერალ რენენკამფის მე-
თაურობით. ამ უკანასკნელს ნაბრძანები ჰქონდა უმოწყალოდ ამოეწყვი-
ტა ყველა, ვინც იარაღს არ დაყრიდა და მორჩილებაზე უარს იტყოდა.

¹ А. Г. М а т и а ш в и л и, Движение помещичьих крестьян Грузии в 20—30
годах XIX в. (автореферат кандидатской диссертации), Тб., 1965, გვ. 19;

² И. А н т е л а в а, Из истории социально-полит..., „მაცნე“, 1964, № 1, გვ. 52.

³ იქვე.

⁴ И. А н т е л а в а, Государственные крестьяне Грузии в первой половине XIX
века, გვ. 465—469.

უფრო მეტიც, დამსჯელი ექსპედიციის უფროსს არც წინააღმდეგობის გაწვევთა სახლები უნდა დაენდო და ისინი სულ ერთიანად უნდა გადაეხუტა „სხვების სამაგალითოდ და დასაშინებლად“¹. ცხინვალში ჩასვლისთანავე რენენკამფმა აჯანყებულებს წერილობით მიმართა და უსიტყვო კაპიტულაცია მოსთხოვა. წინააღმდეგ შემთხვევაშიო, ნათქვამი იყო მის მიმართვაში, „თქვენ ამოგწყვეტენ, როგორც ურჩ ქვეშევრდომებს, როგორც საერთო სიმშვიდის მტრებს, როგორც ადამიანებს, რომელთაც სწყურიათ დაღუპვა“².

მაგრამ ამას, ჩანს, არავითარი ზეგავლენა არ მოუხდენია გლეხებზე. ისინი არამტოუ არ ეახლენ გენერალს „ცოდვის“ მონანიებით, არამედ პირიქით, დატოვეს რა საცხოვრებელი ადგილები, მთებს შეეხიზნენ და გადამწყვეტი ბრძოლებისათვის სამზადისს შეუდგნენ. მტერთან შერკინებაში ქალებიც აქტიურად მონაწილეობდნენ.

„ამბობენ, — წერს სამხედრო ისტორიკოსი პოტო, — რომ ერთხელ, როდესაც კაზაკები სალ-კლდეზე აღიოდნენ, ლოდებიდან გამოვარდა ერთი ახალგაზრდა ოსი ქალი და როგორც გაცოფებული ძუ ვეფხვი ეცა პირველსავე კაზაკს, მთელი ძალები დაჰვიძა იმისათვის, რომ მასთან ერთად გადაშვებულყო უფსკრულში... კიდევ წამიც და ქალი ჩაიდენდა თავგანწირულ გმირულ საქციელს, მაგრამ ძალამ უმტყუნა: მას ხელიდან გაუსხლტა ნადავლი და მარტო გადაეშვა უძირო უფსკრულში. სადაც ბასრმა ქვებმა ნაკუწ-ნაკუწად აქციეს მისი სხეული“³.

სისხლისმღვრელი ბრძოლები მოხდა ციხე-სიმაგრე კოლასთან. არც სიმაგრის დაბომბვას, არც მის იერიშით აღების მრავალგზის ცდას შედეგი არ მოჰყოლია. მაშინ გაბრაზებულმა რენენკამფმა ბრძანა კოლასთვის ცეცხლი წაეკიდებინათ, რომ ამ გზით იქ გამაგრებული აჯანყებულები იძულებული გაეხადა წინააღმდეგობა შეეწყვიტათ და მორჩილება ეთხოვათ. მაგრამ არც ამან გასჭრა. ჩამოინგრა ჭერი. ალყაშემორტყმულთა მდგომარეობა მეტად მძიმე და უპერსპექტივო იყო. მაშინ ციხიდან თოქებით გადმოეშვა 10 კაცი ბეგა კოჩიევის მეთაურობით და ხანჯლებით ხელში გაშმაგებით ეკვეთა კაზაკებს. ამ უთანაბრო ბრძოლაში დაიღუპა ყველა, გარდა ერთი კაცისა. რაც შეეხება ციხეში დარჩენილებს, ისინიც სულ ერთიანად დაიღუპნენ⁴.

¹ АКАК, VII, გვ. 360.

² მომყავს ზ. ვანეევის წიგნიდან, Крестьянский вопрос и крестьянское движение в Юго-Осетии в XIX веке, Цхинвали, 1956, გვ. 189.

³ В. Потто, Кавказская война, V, в. I, 1884, გვ. 135; З. Н. Ванеев, Крестьянский вопрос..., გვ. 192.

⁴ З. Н. Ванеев, Крестьянский вопрос..., გვ. 196; Г. В. Хачапуридзе, К истории Грузии первой половины XIX века, Тб., 1950, გვ. 218.

ამის შემდეგ დამსჯელმა ექსპედიციამ მორჩილებაში მოიყვანა ყველა აჯანყებული სოფელი. რეგულარული ჯარის ნაწილებისა და მემამულეთა რაზმების დახმარებით ჩაქრობილ იქნა 1830 წლის გლეხთა აჯანყება ოსეთში.

1841 წელს იფეთქა გლეხთა ახალმა აჯანყებამ გურიაში, მაგრამ მან იმერეთის რამდენიმე სოფელიც მოიცვა. ხალხის მღელვარება ფეოდალური ექსპლოატაციის ზრდით, სახელმწიფო გადასახადების სიმძიმითა და სამხედრო და სამოქალაქო მოხელეთა თვითნებობა-უმსგავსოებით იყო გამოწვეული¹. უშუალო მიზეზი, რომელმაც იარაღ ქვეშ დააყენა სახაზინო, საბატონო და საეკლესიო გლეხები, იყო ხმების გავრცელება, რომ მთავრობა აპირებს სავალდებულო სამხედრო სამსახურის შემოღებას, ხალხის ჯარში გაწვევას. არანაკლებ შეაშფოთა გურიის სოფლის მშრომელი მოსახლეობა კანონმა, რომლითაც მოპაველში, 1841 წლიდან მოყოლებული, სახელმწიფო გადასახადები ფულადი სახით უნდა აკრეფილიყო².

აჯანყებამ, რომელიც 22 მაისს დაიწყო, მთელი გურია მოიცვა. გლეხობამ უარი განაცხადა გაეღო სახაზინო გადასახადი. მოტივად მათ ნატურალური ვალდებულებებით (ადამიანებისა და ურემების გამოყვანა, საკორდონო ხაზის შენახვა და სხვ.) გადატვირთვა წამოაყენეს³. ხელისუფლების მიერ გამოყენებულმა შთაგონების მეთოდმა წარმატებას ვერ მიაღწია—აჯანყება არამცთუ არ ნელდებოდა, არამედ ყოველდღიურად ღრმადებოდა და ძლიერდებოდა ახლად შემომატებული ძალებით. აჯანყებულებმა, რომელთა რიგებში 7 200 კაცი ითვლებოდა, ხელთ იკვდეს გურიის თითქმის ყველა მეტ-ნაკლებად მნიშვნელოვანი სტრატეგიული ადგილი. 9 აგვისტოს მათ სოფელ გოგორეთთან პოლკოვნიკ ბრუსილოვის რაზმი დაამარცხეს, ხოლო 10 აგვისტოს ნიკოლაევის საგუშაგოს დაეუფლენ და იქ მყოფი ჯარისკაცები და კაზაკები განაიარაღეს. მომდევნო დღეებში გლეხებმა ორჯერ განიზრახეს ოზურგეთის იერიშით აღება. მაგრამ ორჯერვე ცუდმა ამინდმა შეუშალა ხელი⁴. 1 სექტემბერს ღამის სამ საათზე ოზურგეთის აღების ცდა ისევ განმეორდა. სამი ათასმა კაცმა ყველა მხრიდან შეუტია მას. იერიშმა საათნახევარი გასტანა და დამთავრდა აჯანყებულთა დამარცხებით, რომლებმაც, მთავარმართებლის გოლოვინის სიტყვით, დიდი დანაკლისი განიცადეს⁵. მართალია, ამაზე ცოტა ადრე გლეხებმა სერიოზული ზიანი მიაყენეს მეგრელ და იმერელ ფეო-

¹ Г. В. Х а ч а п у р и д з е, Гурийское восстание в 1841 году, 1931. გვ. 47—48.

² АКАК, IX, ч. I, გვ. 175.

³ იქვე, გვ. 164.

⁴ იქვე, გვ. 170.

⁵ იქვე, გვ. 173.

დალთა რაზმს, ოზურგეთის ალყაშემორტყმული გარნიზონის დასახმარებლად რომ ჩავიდა გურიაში, მაგრამ ამან საქმეს ვერ უშველა და ხსენებული პუნქტი მაინც მოწინააღმდეგეს დარჩა. და მაინც უკანასკნელის მდგომარეობა შეტად საგანგაშო იყო. ყველგან, მთელ გურიაში, ოზურგეთის გამოკლებით, მემამულეების და მეფის მოხელეთა ხელისუფლება ლიკვიდირებულ იქნა. ძალა-უფლება აჯანყების ხელმძღვანელ „მთავარი შტაბის“ ხელში გადავიდა. საგონებელში ჩავარდნილმა ხელისუფლებამ ძალების მობილიზაცია გააძლიერა. სექტემბრის დასაწყისში გურიაში 2 064 კაცისგან შემდგარი რეგულარული ჯარი და 1 750 კაცისგან შემდგარი თავდაზნაურთა რაზმი გაიგზავნა. აჯანყების ჩაქრობაში აქტიური მონაწილეობა მიიღეს გურიის, იმერეთისა და სამეგრელოს ფეოდალებმა. საქმე იმაშია, რომ მოძრაობა მიმართული იყო არა მარტო კოლონიური ჩაგვრის, არამედ გურიაში მაშინ გაბატონებულ ფეოდალურ-ბატონყმურ ურთიერთობათა წინააღმდეგ¹.

სამხედრო ნაწილებისა და თავად-აზნაურთა რაზმების ერთობლივი მოქმედების შედეგად, აჯანყება ბოლოს და ბოლოს ჩაქრობილ იქნა. მოძრაობის მეთაურები (50 კაცი) ქუთაისის ციხეში ჩასვეს და მერგე კ, მოგვიანებით, გაასამართლეს. მთავარმმართველ გოლოვინის მიერ დამტკიცებული განაჩენი ძალიან მკაცრი იყო². მაგრამ ნიკოლოზ I-მა იგი

¹ რომ აჯანყება ანტიბატონყმურ ხასიათსაც ატარებდა, ამას ფოლკლორული მასალაც ადასტურებს. ჩვენთვის საინტერესო მოვლენისადმი მიძღვნილ ერთ ხალხურ ლექსში ნათქვამია:

გურია, აბუნტებულა,
აღარ მოსწონს ძველი წესი,
არც თავად-აზნაურობა,
არც ბერი და არც ხუცესი...
თავდაზუ და აზნაურზე
სწორეთ გულს კი გვაკლია,

იძახიან: „უფროსი ვართ“,
ჩვენ არაფერს გვარგია.
რა უჭირს რომ იმუშაოს,
ხელი ხომ კი აბია
მის მამულში რა მოდის,
რომ შეიტყოს კარგია.

(ქართული ხალხური საისტორიო სიტყვიერება, III, თბ., 1967, გვ. 60—61. ტექსტის მომზადება, რედაქცია, შესავალი და შენიშვნები პროფ. ქ. სიხარულიძისა).

აჯანყების ანტიბატონყმურ ხასიათს ადასტურებს ისიც, რომ გლეხები ლეწავდნენ და ცეცხლს უკიდებდნენ მემამულეთა კარ-მიდამოს. მათი მატერიალური ზარალი შეფასებულ იქნა 17 743 მანეთად და 73 კაპიკად (გ. ხაქაპურიძე, დასახ: წიგნი, გვ. 72).

² სასამართლოს განაჩენი იხ. ხაქაპურიძის «Гურიїское восстание в 1841 году», გვ. 79.

საგრძნობლად შეარბილა. იმპერატორს იმედი ჰქონდა, რომ «такая милость к лицам, оказавшимся по сему делу преступными, не только исполнит сердца их живейшею признательностью и благоговением к монаршему милосердию, но внушит и всем прочим их согражданам полное усердие хранить нерушимо святость данной ими присяги и служить верою и правдою престолу и отечеству»¹.

ერთი წლის შემდეგ, 1842 წლის 13 დეკემბერს, დაიწყო თელავის მაზრის სოფელ ზიარის საბატონო გლეხთა მღელვარება. აჯანყდნენ თავადების ანდრონიკაშვილების, შალიკაშვილებისა და აბაშიძეების ყმები. უკმაყოფილების უშუალო საბაბი გახდა დასახელებულ მემამულეთა მიერ აღებული ფულადი ვალის გადახდის ყმა გლეხებზე დაკისრება. ამ უკანასკნელთ ვალი პურით უნდა დაეთარათ. გლეხებმა არა მარტო უარი თქვეს დაკისრებულის შესრულებაზე, არამედ მტკიცედ გადაწყვიტეს ჩაეშალათ ეს ღონისძიება და ერთიმეორეს შეპფიცეს არავის დაერღვია მიღებული გადაწყვეტილება — არავის გაეღო მემამულეთა ვალის დასაფარავი პური². 13 დეკემბერს, მღელვარების დაწყების დღეს, დასახელებული თავადების ყმებს ეახლა სოფელ ზიარში ბოდბისხევის მცხოვრები ფრიდონ კიკოლოვი შვილით (ივანე) და მათ პურის გაღება მოსთხოვა. გლეხებმა, შეთანხმების თანახმად, მოთხოვნას კატეგორიული უარით უპასუხეს. პირობა მხოლოდ თორნიკე ერისთავის ხელქვეითებმა დაარღვიეს — ისინი დასთანხმდნენ კიკოლოვისთვის პური მიეცათ. ამან საშინლად აღაშფოთა დანარჩენები. გლეხები 60 კაცის რაოდენობით თავს დაესხნენ თორნიკე ერისთავის ყმებს და კიკოლოვის შვილს. ერთ-ერთ მათგანს, სახელდობრ მჭედელ შიოშვილს, უკანასკნელის მოკვლაც კი მოუნდომებია. საქმეში თვით თორნიკე ერისთავი ჩარეულა, მაგრამ უშედეგოდ. აჯანყებულთ მისთვისაც შეურაცხყოფა მიუყენებიათ და თავის განზრახვაზე ხელის აღება მოუთხოვიათ. წინააღმდეგ შემთხვევაში სახლ-კარის გადაბუგვით დამუქრებიან³.

მთავრობამ ეს მღელვარებაც, ისე როგორც სხვა, რეგულარული ჯარის ნაწილების გამოყენებით ჩააქრო.

¹ АКАК, IX, ч. I, гв. 173.

² ვ. ჯ ი ქ ი ა, გლეხთა მღელვარება სოფ. ზიარში 1842 წელს (დოკუმენტები პუბლიკაცია შესავალი წერით), „საისტორიო მოამბე“, 13—14, თბ., 1961, გვ. 274—275.

³ იქვე.

რაკი საშუალება არა გვაქვს ცალ-ცალკე აღვწეროთ სოფლის მშრომელი ძონახლეობის სოციალური და კოლონიური ჩაგვრის წინააღმდეგ ბრძოლის ყველა ეპიზოდი, ამიტომ ჩვენ ამ თავის დასასრულს, შევჩერდებით კიდევ ერთ აჯანყებაზე, რომელიც არსებითად, რამდენიმე წელი მიმდინარეობდა და მიმართული იყო ქართლის თავადების მახაბლების წინააღმდეგ. უკანასკნელთა ყმები, ოსი გლეხები, 2 000 კომლის რაოდენობით, რუსული მმართველობის დამყარების თითქმის პირველი წლებიდანვე ცდილობდნენ ხსენებული თავადების ხელქვეითობიდან განთავისუფლებას და სახაზინო უწყებაში გადასვლას, მაგრამ უშედეგოდ. ბრძოლამ განსაკუთრებით მძაფრი ხასიათი 40-იანი წლებიდან მიიღო. ისინი დაუნიებით მოითხოვდნენ აღრე დაყენებული საკითხის მათ სასარგებლოდ გადაჭრას. «По приезде моем в Закавказский край в 1845 г., — სწერდა ვორონცოვი ჩერნიშოვს 1848 წლის 13 თებერვალს, — жалобы их (გლეხების — ავტ.) возобновились; в ожесточении своем против князей Мачабеловых они отказались от платежа владельцам всяких повинностей и целыми толпами начали являться ко мне, прося о защите прав их и оказания им правосудия, которого они тщетно домогаются в течение нескольких лет»¹.

1845 წლის 31 მაისს გლეხების მიერ აღძრული საქმე გაარჩია გორის სამაზრო სასამართლომ, მაგრამ მთხოვნელებს უარი უთხრა და ისინი თავად მახაბლების კანონიერ ყმებად აღიარა. ამით უკმაყოფილო ოსებმა ბრძოლა გააგრძელეს. ისინი დაუსრულებელ თხოვნა-საჩივრებს სწერდნენ ამიერკავკასიის ადმინისტრაციის წარმომადგენლებს და მათგან საქმეში ჩარევას მოითხოვდნენ. ვორონცოვი იძულებული იყო სპეციალური კომისია გამოეყო და მისთვის ამ საკითხის შესწავლა დაევალებინა. კომისიამ (მისი ორი წევრის გამოკლებით) გორის სამაზრო სასამართლოს დადგენილება არასწორად ჩათვალა, რადგანაც მახაბლებმა „საბუთებით ვერ დაამტკიცეს თავიანთი უფლება ოს გლეხებზე“².

ამის შემდეგ ეს საქმე თბილისის სამოქალაქო და სისხლის სამართლის პალატაში გადავიდა, ხოლო 1850 წელს — მმართველ სენატში. მაგრამ სანამ საკითხი აღნიშნულ ინსტანციებში იხილებოდა, მახაბლებმა „თავიანთი უკუღმართი საქციელით“ კიდევ უფრო გაამწარეს გლეხები. მათ დაკარგეს რა თხოვნის მშვიდობიანი გზით დაკმაყოფილების იმედი. იარაღს მოჰკიდეს ხელი. ხელისუფლებამ გლეხებს ულტიმატუმი წაუყენა დაუყოვნებლივ დამორჩილებოდნენ თავადებს და მათთვის ეხადათ გადასახადები, წინააღმდეგ შემთხვევაში ძალის გამოყენებით დაემუქრა. ამაზე აჯანყებულებმა ასე უპასუხეს: „ჩვენ მთავრობის ურჩებს შორის

¹ СХАО, I, გვ. 307.

² იქვე. გვ. 308.

არასოდეს არ ვყოფილვართ, ვცხოვრობდით მშვიდად, ვემსახურებოდით ხელმწიფეს ერთგულად და ახლაც მზადა ვართ ვემსახუროთ მას და ვიყოთ იქ, სადაც გვიბრძანებს, ვიხალოთ გადასახადი რამდენსაც დაგვაწერს, მაგრამ თუ თქვენ ფიქრობთ იარაღის გამოყენებით გვიძულათ გავხდეთ თავად მაჩაბლების ხელქვეითები, ცდებით: ყველანი გავწყდებით, იარაღით ხელში დავიცავთ ჩვენს სამართლიან საქმეს, მაგრამ მაჩაბლების მონები არ გავხდებით, ჩვენ დავამტკიცებთ, რომ ბრძოლა შეგვიძლია“¹.

მთავრობამ აჯანყებულთა წინააღმდეგ სამხედრო ნაწილები გაგზავნა. ამ ნაწილების მეთაურმა თავადმა ანდრონიკაშვილმა არაერთგზის სცადა გლეხების მშვიდობიანი გზით დამორჩილება, მაგრამ არაფერი გამოვიდა. მაშინ ანდრონიკაშვილმა ძალა გამოიყენა და მღელვარება ჩააქრო.

მართალია, გლეხებმა მოწინააღმდეგესთან უშუალო შერკინება წააგეს. მაგრამ მათ ბრძოლას უშედეგოდ მაინც არ ჩაუვლია. ვორონცოვმა, რომელიც ღრმად იყო დარწმუნებული, რომ „ოსები სამხედრო ძალის გამოყენების გარეშე არასოდეს არ გადაიხდიან მათზე დაკისრებულ გადასახადებს“, თავად მაჩაბლებს წინადადება მისცა ხაზინისთვის დაეთმოთ თავიანთი გლეხები, რა თქმა უნდა, სათანადო ანაზღაურების მიღებით. მემამულეები დაეთანხმნენ ამ წინადადებას და შეჰპირდნენ მეფისნაცვალს, რომ მალე წარუდგენდნენ მოსაზრებას ანაზღაურების ოდენობის შესახებ. მაგრამ ამ ღრობისთვის სენატმაც მიიღო დადგენილება მაჩაბლების ყმების (2 000 კომლი) სახაზინო უწყებაში გადარიცხვის შესახებ, რასაც ხსენებული თავადები, ცხადია, დიდი აღშფოთებითა და განგაშით შეხვდნენ.

მაგრამ მთავრობამ საბოლოოდ მაინც არ გასწირა ქართველი ფეოდალები და მათ 1852 წელს, ვორონცოვის უშუაღვომლობის საფუძველზე, დაენიშნათ ყოველწლიური შემკვიდრეობითი პენსია 6 000 მანეთის რაოდენობით. ამასთან, ის მიწები, სადაც გლეხები ცხოვრობდნენ, მაჩაბლების განკარგულებაში იქნა დატოვებული.

ასე თუ ისე, 2 000 კომლი საბატონო გლეხი, რომელმაც ენერგიული ბრძოლით დააღწია თავი კერძო მემამულეთა ხელქვეითობას, სახაზინო უწყებაში გადავიდა. ეს, რა თქმა უნდა, სრული თავისუფლების მოპოვებას არ ნიშნავდა, მაგრამ მას მაინც გარკვეული მნიშვნელობა ჰქონდა, როგორც მეტი ბოროტებიდან ნაკლებისკენ მკაფიოდ გადადგმულ ნაბიჯს.

სოფლის მშრომელი მოსახლეობის ბრძოლა სოციალური და კოლონიური ჩაგვრის წინააღმდეგ, რომლის უმთავრესი ეპიზოდები ზემოთ აღვწერთ¹, ხელს უწყობდა ფეოდალურ-ბატონყმურ ურთიერთობათა რღვევას, ცარიზმის პოზიციის შესუსტებას და რეფორმის წინარე ხანის საქართველოში რევოლუციური სიტუაციის შექმნას.

¹ გვერდი აეუარეთ გლეხთა ისეთ აჯანყებებს, როგორცაა: 1837 წლის (ახალციხის მაზრაში), 1840 წლის (აფხაზეთში), 1842 [და 1848 წლების (ქუთაისის მაზრაში), 1852 წლის (რაჭის მაზრაში) და ა.შ.

§ 1. ყირიმის ომი

50-იანი წლების დასაწყისში ნიკოლოზ პირველმა გადაწყვიტა საბოლოოდ შოგვარებინა ე. წ. „აღმოსავლეთის საკითხი“. ამ დროისათვის რუსეთს ევროპის სხვადასხვა სახელმწიფოებში რევოლუციების ჩახშობით საკმაოდ დიდი გავლენა ჰქონდა მოპოვებული და მეფეს მიაჩნდა, რომ ოსმალეთის მიმართ თავისი ზრახვების სისრულეში მოყვანისათვის ხელსაყრელი მომენტი იყო დამდგარი. მართალია, 1829 წლის ადრიანოპოლის ზავმა რუსეთს გარკვეული უპირატესობანი მიანიჭა, კერძოდ, გაიზარდა მისი გავლენა მოლდავეთსა და ვლახეთში და განმტკიცდა პოზიციები ამიერკავკასიაში, მაგრამ რუსეთი თავისი ზრახვების სისრულეში მოყვანისაგან—კონსტანტინოპოლისა და სრუტეების ხელში ჩაგდებისაგან — ჯერ კიდევ შორს იყო. 1833 წელს უნკიარ-ისკელესის ხელშეკრულება ამ მიმართულებით წარმოებული პოლიტიკის კიდევ ერთ გამარჯვებას წარმოადგენდა. უნკიარ-ისკელესის ხელშეკრულებით თურქეთი ვალდებული იყო საჭიროების შემთხვევაში რუსეთისადმი მტრულად განწყობილი სახელმწიფოებისათვის ჩაეკეტა დარდანელის სრუტე. ამ ხელშეკრულებამ დიდად აღაშფოთა ევროპის სახელმწიფოები (ინგლისი, საფრანგეთი, ავსტრია და პრუსია), რომლებიც აშკარად ხედავდნენ იმ საფრთხეს, რაც აღმოსავლეთში რუსეთის პოზიციების გაძლიერებასა და ხმელთაშუა ზღვისკენ მისთვის გზების გახსნას მოსდევდა. ინგლისი ადვილად ვერ შეუირიდებოდა აღმოსავლეთში რუსეთის მიერ ხელსაყრელი პოზიციების დაკავებას, ვინაიდან ეს გარემოება რუსეთს დიდ უპირატესობას ანიჭებდა ირან-ოსმალეთთან ვაჭრობაში. მართალია, რუსეთის სუსტ ბურჟუაზიას არ შესწევდა უნარი სათანადო კონკურენცია გაეწია თურქეთ-ირანში ინგლისის ვაჭრობისათვის, რომელიც ტრაპიზონში სავაჭრო კამპანიის დაარსების შემდეგ განსაკუთრებით გაფართოვდა, მაგრამ პოლიტიკური ბატონობა რუსეთს ადრე თუ გვიან არამც თუ თურქეთ-ირანის ბაზრების, არამედ ინდოეთის მითვისების საშუალებასაც მისცემდა. მოლდავეთის, ვლახეთის, სერბიის,

გალიუპოლისა და კონსტანტინოპოლის რუსეთის ხელთ გადასვლა ავსტრიის იმპერიისათვის მარტო სავაჭრო ინტერესების შეზღუდვას კი არ ნიშნავდა, არამედ ეს გარემოება, ამ უკანასკნელის დაშლას გამოიწვევდა, რასაც ჰაბსბურგთა დინასტია ასე ადვილად ვერ შეუთრიგდებოდა. დაბოლოს აღმოსავლეთში რუსეთის გაძლიერებასა და ხმელთაშუა ზღვაზე მის გამოჩენას არც საფრანგეთი შეხედებოდა გულგრილად. ნიკოლოზი ყოველივე ამას კარგად ითვალისწინებდა, უნკიარ-ისკელესის ხელშეკრულების ვადის გასვლის შემდეგ 1840—1841 წლების კონვენციებით ოსმალეთზე „კოლექტიური პროტექტორატის“ დაწესებით კმაყოფილდებოდა და თავისი გეგმების განხორციელებას მომავლისათვის, ხელსაყრელი მოქმენტიისათვის სდებდა. 50-იანი წლების დასაწყისი ნიკოლოზმა სწორედ ასეთ მომენტად მიიჩნია. მისი წარმოდგენით, 1848 — 1849 წლების რევოლუციურმა ქართველებმა ინგლისის გარდა ევროპის ყველა სახელმწიფოს დიდი ხნით გამოაცალეს ძალა, ე. ი. საჭირო იქნებოდა მხოლოდ ინგლისთან მოლაპარაკება, მასთან წინასწარ თურქეთის სამფლობელოების განაწილება და სხვა მხრივ გზა გახსნილი იქნებოდა. ნიკოლოზმა, რომელიც თავისი მეფობის განმავლობაში აღმოსავლეთის საკითხში გარკვეულ სიფრთხილეს იჩენდა და ანგარიშს უწყევდა ამ სამი სახელმწიფოს აშკარა თუ ფარულ წინააღმდეგობას, 1853 წლისათვის სავსებით შეგნებულად აღარ გაითვალისწინა საფრანგეთისა და ავსტრიის ინტერესები და პეტერბურგში მყოფ ინგლისის ელჩს, გამილტონ სეიმურს, არაოფიციალური მოლაპარაკების დროს აშკარად გაუმეღაუნა თავის ზრახვები და თურქეთის სამფლობელოების განაწილება შესთავაზა. ნიკოლოზი დუნაის სამთავროების, კონსტანტინოპოლის და სრუტეების ხელში ჩაგდების ფასად ინგლისს, ეგვიპტესა და კრეტის კუნძულს „უთმობდა“. იგი დარწმუნებული იყო, რომ თუ ინგლისი და რუსეთი შეთანხმდებოდნენ, მაშინ საფრანგეთი და ავსტრია ამ ყველაზე ძლიერი სახელმწიფოების კავშირის წინააღმდეგ ხმის ამოღებასაც კი ვერ გაბედავდნენ¹.

მაგრამ ნიკოლოზი ღრმად სცდებოდა. ინგლისმა თურქეთის იმპერიის „გადარჩენის“ მომიზეზებით რუსეთთან შეთანხმება არ მოინდომა. სინამდვილეში კი რუსეთის წინადადება მას თავისთვის საშიშად მოეჩვენა. მოლდავეთში, ვლახეთში, სერბიაში, ბულგარეთსა და საბერძნეთში რუსეთის გავლენის განმტკიცების, მის ხელში სრუტეებისა და კონსტანტინოპოლის საკომპენსაციოდ ეგვიპტისა და კრეტის მიღება მეტად მცირედ ეჩვენებოდა, მით უმეტეს, რომ თურქეთის იმპერიის დაცემას, ადრე თუ

¹ Е. В. Тарле, Крымская война, т. I, М., 1950.

გვიან, უნდა მოჰყოლოდა მცირე აზიის მთლიანად თუ არა, ნაწილის მაინც რუსეთის ხელთ გადასვლა. ინგლისმა ამ წინადადებაზე უარი განაცხადა.

მეორე, არანაკლებ დამღუპველი, შეცდომა შეეხებოდა მომავალ ომში საფრანგეთის პოზიციების გაუთვალისწინებლობას. ნიკოლოზი, ისევე როგორც რუსეთის მმართველი წრეები, თვლიდა, რომ ნაპოლეონის იმპერიის დაცემის შემდეგ საფრანგეთის არც ერთი მთავრობა არ მოისურვებდა რუსეთის მიმართ აგრესიული პოლიტიკის წარმოებას, თუნდაც მოესურვებია საშინაო საქმეებით გართულსა და რევოლუციურ ქარტეხილებით ძალაგამოცლილ იმპერატორს შორეული კონსტანტინეპოლისათვის ბრძოლის საშუალება არ ექნებოდა.

ნიკოლოზს მხედველობიდან გამორჩა როგორც საფრანგეთის მსხვილი ბურჟუაზიის სავაჭრო და ფინანსური ინტერესები, ისე ის გარემოება, რომ ნაპოლეონ III-ის დინასტიურ ინტერესებში შედიოდა საფრანგეთის ფართო მასების ყურადღება საშინაო საქმეების ნაცვლად საგარეო პოლიტიკისათვის მიექცეო.

ნიკოლოზი და მისი კანცლერი ნესელროდღე თავს იმით იმშვიდებდნენ, რომ ნაპოლეონ III, თავისი ბიძის, ნაპოლეონ I-ის მოსისხლე მტერთან, ინგლისთან კავშირს არ დაამყარებდა. სინამდვილეში კი ინგლისიც და საფრანგეთიც რუსეთზე თავდასხმის შემთხვევაში ერთმანეთთან კავშირს აუცილებლად თვლიდნენ.

ასევე ცდებოდა ნიკოლოზი ავსტრიის მიმართაც, ინგლისის ელჩთან საუბარში იგი აშკარად აცხადებდა, რომ თურქეთის საკითხის განხილვისას ავსტრიას მხედველობაში არ იღებდა, რადგანაც არცთუ ისე დიდი ხნის წინ ავსტრიის იმპერატორი ფრანც-იოსები და მისი ფელდმარშალი კაზოგა ლამის ფეხებში უვარდებოდნენ ნიკოლოზსა და პასკევიჩს ხევწნამუდართ — ეხსნათ ავსტრია საბოლოო დაღუპვისაგან — დახმარებოდნენ უნგრეთის რევოლუციის ჩაქრობაში. ნიკოლოზი დაწმუნებული იყო, რომ ავსტრია თავისი კეთილისმყოფელი რუსეთის საწინააღმდეგოდ არაფერს მოიმოქმედებდა, კიდევ რომ უმადური გამომდგარიყო ავსტრიის იმპერატორი და რუსეთის წინააღმდეგ გამოსვლა განეზრახა. უნგრეთის რევოლუციის ჩახშობის შემდეგ მისი ჯარები ისეთ მდგომარეობაში იყვნენ, რომ იგი ამ განზრახვის შესრულებას ვერ გაბედავდა.

რუსეთმა აქაც ვერ გაითვალისწინა, რომ უკვე 1812 წ. თურქეთისაგან ბესარაბიის წართმევის და 1829 წლის ადრიანოპოლის ზავის შემდეგ მოლდავეთსა და ვლახეთში რუსეთის გავლენის გაძლიერება ავსტრიას ძალიან აწუხებდა, ეს გარემოება მის სავაჭრო ინტერესებს აურაცხელ ზარალს აყენებდა. მოლდავეთის, ვლახეთის, სერბიის, ბულგარეთის, გალიუპოლისა და კონსტანტინოპოლის რუსეთთან შეერთება კი ავსტრიის იმპერიას სამი მხრიდან რუსეთის ძალებით გარშემორტყმასა და მის საბოლოო დაშლას

უქადდა. ასეთ პირობებში, რა თქმა უნდა, ავსტრია ნეიტრალური ვერ დარჩებოდა. მით უმეტეს, რომ ნაპოლეონ III ყოველ ღონისძიებას ხმარობდა მოკავშირეების მხარეზე ავსტრიის ომში ჩასაბმელად.

ასეთი, თავისთვის მეტისმეტად არახელსაყრელი, პირობების გაუთვალისწინებლად აპირებდა რუსეთი თურქეთთან ომის დაწყებას.

ინგლისთან მოლაპარაკების წარუმატებლობის შემდეგ ნიკოლოზმა გადაწყვიტა უკვე აშკარად ემოქმედა. მან „წმინდა ადგილების“ დაცვის მომიზეზებით თურქეთში გააგზავნა ელჩობა მენშიკოვის მეთაურობით, რომელსაც დავალებული ჰქონდა თუ დიპლომატიური გზით ვერ მოახერხებდა ეცნო თურქეთს რუსეთის პროტექტორატი თურქეთის იმპერიაში მცხოვრებ ქრისტიანულ მოსახლეობაზე, იმ შემთხვევაში აშკარა კონფლიქტი გამოეწვია. საფრანგეთისა და ინგლისის ელჩების მიერ დაიმედებულმა თურქეთის სულთანმა რუსეთის წინადადებანი არ მიიღო და 1853 წლის ნოემბერში თურქეთი რუსეთთან ომში ჩააბა.

მარქსი და ენგელსი გულდასმით ადევნებდნენ თვალყურს ყირიმის ომის მსვლელობას. მათთვის ეს ომი მოულოდნელი არ იყო. მათ დიდი ხნის წინ დაადგინეს, რომ, როგორც კი ევროპაში რევოლუციური მოძრაობა მიწყნარდებოდა, ნიკოლოზი მაშინვე ეცდებოდა „სწეული ადამიანის“ მემკვიდრეობის, ანუ თურქეთის სამფლობელოების განაწილების საკითხის წამოჭრას. მარქსი და ენგელსი დარწმუნებული იყვნენ, რომ არც ინგლისი და არც ავსტრია გულჯრილად არ შეხედავდნენ იმ ეკონომიურ და პოლიტიკურ საფრთხეს, რომელიც მათ მოელოდათ „პეტერბურგის დესპოტის“ მიერ ბალკანეთის ნახევარკუნძულისა და მცირე აზიის დაპყრობის შედეგად.

მარქსი და ენგელსი ევროპის რევოლუციების ინტერესებიდან გამომდინარე მიესალმებოდნენ ამ კონფლიქტის წარმოქმნას, რადგანაც მათთვის ნათელი იყო, რომ რომელი თვითმპყრობელური სახელმწიფოც არ უნდა დამარცხებულიყო, რევოლუცია ამით მხოლოდ მოიგებდა, მაგრამ ნიკოლოზ I-ისა და ბატონყმური რუსეთის, როგორც ყველა რევოლუციების ერთგული ჩამხშობის, დამარცხების მომხრე უფრო იყვნენ. ამავე დროს, ისინი კარგად ხედავდნენ და უღმობლად ამხილებდნენ ინგლისის ბურჟუაზიისა და ნაპოლეონ III-ის მტაცებლურ ზრახვებს. მარქსისა და ენგელსისათვის ნათელი იყო, რომ საფრანგეთი და ინგლისი თურქეთის „დასაცავად“ კი არ აპირებდნენ ომში ჩაბმას, როგორც ამას თვითონ აცხადებდნენ, არამედ იმ გარემოებით იყვნენ შეწუხებული, რომ თურქეთის სამფლობელოების დანაწილების დროს სხვა სახელმწიფოებს უფრო მეტი არ შეხვედროდათ.

რუსეთ-თურქეთის კონფლიქტის შედეგად კავკასია, კერძოდ საქართველო, უშუალო საფრთხის წინაშე აღმოჩნდა. რუსეთ-თურქეთის ომის

დროს კავკასიის ფრონტს მეორეხარისხოვანი მნიშვნელობა ენიჭებოდა და მეფის მთავრობას სრულიადაც არ ჰქონდა გათვალისწინებული დამხმარე ჯარის ნაწილების გამოგზავნა. კავკასიაში მყოფი მოქმედი რუსეთის არმია კი სავსებით არ იყო საკმარისი თურქეთის ჰარბი ძალებთან გასაძლავებლად. მხოლოდ მეფისნაცვალ ვორონცოვის დაჟინებითი მოთხოვნის შემდეგ ნიკოლოზმა შესაძლებლად ცნო მე-13 დივიზიის გამოგზავნა, მაგრამ ამ დახმარების მიღების შემდეგაც კავკასიის მდგომარეობა სავალალოდ გამოიყურებოდა. 530 ვერსამდე მანძილზე გადაჭიმული მისი სასაზღვრო ხაზის არც ერთი სექტორი არ იყო უზრუნველყოფილი მტრის თავდასხმისაგან და მხოლოდ აქა-იქ იყო გამაგრებული უმხიშვნელო საგულშაგოებით. სამიმოსვლო გზების უვარგისობისა და ბუნებრივ-ტოპოგრაფიული პირობების გამო ერთიანი საომარი მოქმედების ფრონტზე ლაპარაკიც კი ზედმეტი იყო. კავკასიის კორპუსის ცალკეული რაზმები დამოუკიდებელ ერთეულებს წარმოადგენდნენ და ერთმანეთისაგან სრულიად მოწყვეტილად უხდებოდათ მოქმედება. ასეთ პირობებში განსაკუთრებული მნიშვნელობა ენიჭებოდა სახალხო ლაშქარს ე. წ. „ძილიციას“. მართლაც, ქართველმა ხალხმა, რომელიც 1806—1812 და 1828—1829 წლების რუსეთ-თურქეთის ომებში ოსმალეთის მიერ მოტაცებული მიწა-წყლის დასაბრუნებლად ცხოველ მონაწილეობას იღებდა, ამჯერადაც მთელი თავისი ძალები დარაზმა და აქტიურად ჩაება საუკუნოვანი მტრის წინააღმდეგ ბრძოლაში.

მდგომარეობას განსაკუთრებით ის გარემოება აართულებდა, რომ საქართველოს ჩრდილოეთის მხრიდანაც განუწყვეტელი საფრთხე ემუქრებოდა. აქედან ყოველთვის მოსალოდნელი იყო რუსეთის წინააღმდეგ ბერძნულ მიურიდების შამილისა და მაჰმად-ემინის შემოჭრა და ადგილობრივი ხელისუფლება იძულებული იყო კავკასიაში მოქმედი ჯარების მნიშვნელოვანი ნაწილი მიურიდების წინააღმდეგ მოსალოდნელი ბრძოლისათვის მუდმივ მზადყოფნაში ჰყოლოდა.

რუსეთ-თურქეთის ომის დაწყებამდე დიდი ხნით ადრე თურქები შეუდგნენ თავის ძალების კონცენტრაციას საქართველო-ამიერკავკასიის საზღვრების გასწვრივ. 1853 წლის სექტემბრის დასასრულისათვის ყარსთან 50 000 კაცისაგან შემდგარი თურქების რეგულარული და ირეგულარული ჯარების კორპუსი იდგა. ეს კორპუსი 65 ზარბაზნით იყო აღჭურვილი. არდავანთან იდგა რაზმი 14 ზარბაზნით, ბაიაზეთშიც დაახლოებით ასეთივე „შეძადგენლობის რაზმი იყო, ხოლო ბათუმის ახლოს თურქებმა 10 000 ჯარისკაცისაგან შემდგარი კორპუსი გადმოსხეს¹.

მოწინააღმდეგის მთელი ყურადღება თბილისისკენ იყო მიმართული. თბილისი, მარქსის სიტყვებით რომ ვთქვათ, „აზიაში რუსების ძალაუფ-

¹ ე. ბ უ რ ჯ უ ლ ა ძ ე, ყირიმის ომი და საქართველო, თბ., 1960, გვ. 200.

ლების ცენტრალურ პუნქტს წარმოადგენდა“ და სტრატეგიული თვალსაზრისითაც მნიშვნელოვან გზაჯვარედინზე მდებარეობდა. თბილისის ხელში ჩაგდება ამიერკავკასიაში ბატონობას განაპირობებდა. ასე რომ თურქეთსათვის კავკასიის ფრონტზე წარმოებული საომარი მოქმედების მთავარი მიზანი თბილისის აღება იყო. რუსეთისათვის კი კავკასიის შესანარჩუნებლად თბილისის დაცვა უპირველეს სტრატეგიულ აუცილებლობას წარმოადგენდა და ადგილობრივი ხელისუფლების მიერ საპატიო და პირველხარისხოვან ამოცანად იყო გამოცხადებული. თბილისის დასაცავად განსაკუთრებული მნიშვნელობა ენიჭებოდა ალექსანდროპოლის (დღევანდელი ლენინაკანი) ციხე-სიმაგრეს, რომელიც კეტავდა ყარსიდან თბილისისაკენ მიმავალ პირდაპირ გზას. ასეთივე მნიშვნელობისა იყო ყარსიდან არდაგანზე და ბორჯომის ხეობისაკენ მიმავალ გზაზე მდებარე ახალციხეც. ითვალისწინებდა რა ამ მდგომარეობას, ადგილობრივი მთავარსარდლობის მიერ რეგულარული ჯარების და მილიციის ყველაზე დიდი ნაწილი სწორედ ყარსის მიმართულებით ალექსანდროპოლსა, ახალციხესა და ახალქალაქში იყო თავმოყრილი. სახელდობრ, საომარი მოქმედების გადამწყვეტ პუნქტში რეგულარული ჯარების 23,5 ბატალიონი, კახაკთა 24 ასეული, 60 ზარბაზანი, მილიციის 8 დრუჟინა და რამდენიმე ასეული იყო განლაგებული; აქედან ალექსანდროპოლში 11 ბატალიონი, 10 ესკადრონი, კახაკთა 9 ასეული, ადგილობრივი მილიციის რამდენიმე დრუჟინა და ასეული იმყოფებოდა. თბილისში ბაიანზეთიდან წამოსულ მტერს არარატის და ერევნის გავლითაც შეეძლო შემოჭრა. ერევანში მისი ვამაგრების მიზნით, 4 ბატალიონი, 8 ზარბაზანი, კახაკთა 6 ასეული და ადგილობრივი მილიციის 14 ასეული იდგა¹.

კავკასიის ფრონტის უკიდურეს მარჯვენა ფლანგზე, გურიის, სამეგრელოსა და იმერეთის, ანუ, როგორც მაშინ უწოდებდნენ „რიონის მხარის“, დასაცავად მყოფი „გურიის რაზმი“ მხოლოდ ქვეითი ჯარის 8 ბატალიონის, კახაკთა 2 ასეულისა და 12 ზარბაზნისაგან შედგებოდა. ბათუმში და ქობულეთში მდგარი თურქთა მძლავრი კორპუსი კი გურია, სამეგრელო, იმერეთ, აფხაზეთს სრული განადგურებით ემუქრებოდა. საერთოდ, კავკასიის საზღვრებზე თავმოყრილი თურქთა არმია რუსების ძალებს არა მარტო რიცხობრივად ბევრად აღემატებოდა, არამედ გაცილებით უკეთესადაც იყო შეიარაღებული. მისი არტილერია მთლიანად ინგლისური წარმოშობისა იყო და ჯარისკაცები შორსმსროლელი შაშხანებით იყვნენ აღჭურვილნი, მაშინ როცა რუსული ჯარის ნაწილების უმრავლესობის იარაღს კაჟიანი თოფები შეადგენდა.

ნიკოლოზ I მე-13 დივიზიის საქართველოში გამოგზავნით კავკასიის საქმეებს მოგვარებულად თვლიდა და სავსებით ვერ ითვალისწინებდა იმ

¹ ე. ბ უ რ ჯ უ ლ ა ძ ე, ყირიმის ომი და საქართველო, გვ. 211—212.

საფრთხეს, რომლის წინაშეც აღმოჩნდა ეს მხარე რუსეთ-თურქეთის ომის დაწყების შედეგად. ნიკოლოზი კავკასიის მეფისანცვლისაგან შეტევით მოქმედებებზე გადასვლასა და ყარსისა და არდაგანის აღებას მოითხოვდა. «Выждав первые нападения турок, желаю я чтобы ты непременно перешел в наступление, направяс на Карс и овладев оным, равно как и Ардаганом»¹. მაგრამ კავკასიის სარდლობამ კარგად იცოდა, რომ იმ მცირერიცხოვანი ლაშქრით, რომელიც მის განკარგულებაში იმყოფებოდა, არათუ შეტევაზე არ შეიძლებოდა ფიქრი, არამედ კავკასიის საზღვრის რამდენადმე ეფექტური დაცვაც კი დიდი სიძნელეების გადალახვასთან იყო დაკავშირებული. ამიტომ იგი ყოველმხრივ არიდებდა თავს შეტევითი ომის დაწყებას.

კავკასიის ფრონტზე საომარი მოქმედებები რუსეთ-თურქეთის ომის გამოცხადებამდე დაიწყო. ოსმალეთმა ისარგებლა იმ მდგომარეობით. რომ რუსეთის ძალები ჭერ კიდეც არ იყვნენ კონცენტრირებული საზღვრებთან და 15—16 ოქტომბერს ღამით მოულოდნელად თავს დაესხა გურიის საზღვარზე შეკვეთილის საგუშაგოს, სადაც იმყოფებოდა მხოლოდ მცირერიცხოვანი რუსთა რაზმი და გურიის სახალხო ლაშქარი გიორგი გურიელის მეთაურობით. ერთი მუჟა გარნიზონმა და სახალხო მილიციამ გააფრთხილებული წინააღმდეგობა გაუწია მტრის 5000-მდე კაცისაგან შემდგარ რაზმს. უთანასწორო ბრძოლამ შეკვეთილის საგუშაგოს დასაკავებლად მთელ ღამეს გასტანა, გარნიზონისა და მილიციის წინააღმდეგობა არ შეწყვეტილა, ვიდრე საბოლოოდ არ ამოწურეს ტყვია-წამლის მარაგი. თურქები სასტიკად გაუსწორდნენ მამაც მებრძოლებს. მათ თითქმის მთლიანად ამოხოცეს გარნიზონი. ისინი ბავშვებსა და ქალებსაც კი არ ინდობდნენ და უმოწყალოდ ხოცავდნენ. ბრძოლაში დაიღუპა მილიციის მეთაური გიორგი გურიელიც.

გურიაში ოსმალების შემოსევის ერთდროულად ადგილი ჰქონდა აღმოსავლეთ საქართველოში შამილის მეთაურობით მიურიდების შემოსევასაც. შამილი საინგილოში შემოიჭრა და ზაქათალისა და ბელაქნის ციხეების აღებას ლამობდა, მაგრამ ქართველთა და რუსთა რაზმებმა გენერალ გრიგოლ ორბელიანის მეთაურობით ალაზნანზე მომდგარი მტერი უკუაგდეს. შამილის ამ დივერსიას არავითარი გავლენა არ მოუხდენია ომის საერთო მსვლელობაზე².

2 ნოემბერს ალექსანდროპოლის მახლობლად სოფ. ბაიანდურთან რუსის ჯარებს მორიგი ბრძოლა ჰქონდათ თურქებთან. ალექსანდროპოლიდან

¹ ციტირებულია ე. ტარლეს ნაშრომიდან «Крымская война», გვ. 298.

² მ. დუშბაძე, აღმოსავლეთ კახეთის (საინგილოს) ისტორიიდან, თბ., 1953, გვ. 222—223.

დასაზვერად გასულ რუსთა მცირერიცხოვან ჯარს, რომლის შემადგენლობაში მხოლოდ 7 ბატალიონი შედიოდა, სრულიად მოულოდნელად თავს დაესხა მთელი ანატოლიის კორპუსი. რუსთა ჯარი იღია ორბელიანის მეთაურობით მთელი დღის განმავლობაში გმირულად იგერიებდა მტრის თავდასხმას. საღამოთი გენ. ბებუთოვის მიერ მაშველი ჯარის მოყვანის შემდეგ თურქები უკან გაბრუნდნენ და არფაჩაი გადალახეს, ბებუთოვმა კი იმავე ღამით სასწრაფოდ წამოიყვანა ჯარი ალექსანდროპოლში.

4 ნოემბერს ოფიციალურად იყო გამოცხადებული რუსეთ-თურქეთის ომი.

1853 წლის ნოემბრის დასაწყისში თურქების მნიშვნელოვანი ძალები დაიძრა ახალციხისაკენ. ახალციხის ხელში ჩაგდება თურქებს ბორჯომის ხეობისა და სურამის გავლით თბილისისაკენ გაუხსნიდა გზას. მტერი ყოველი მხრიდან გარსემოერტყა ახალციხის ციხე-სიმაგრეს. თურქების ძალები გაცილებით სჭარბობდნენ ახალციხეში დაბანაკებულ რუსის ჯარებს. ყარსიდან, არდაგანიდან და აჭარიდან მტერს ახალ-ახალი ძალები ემატებოდა და ახალციხის მდგომარეობა სულ უფრო და უფრო კრიტიკული ხდებოდა. ახალციხის რაზმის უფროსი გენერალი კოვალენსკი შემოფოთებული სასწრაფოდ დახმარებას თხოულობდა. იგი ამიერკავკასიაში სახელგანთქმულ გენერალს, ივანე მალხაზის ძე ანდრონიკაშვილს ემუდარებოდა ჩამოსულიყო ახალციხეში და ხელში აეღო ახალციხის მისადგომებთან ოსმალების განდევნის ორგანიზაცია. 12 ნოემბერს გენ. ანდრონიკაშვილი მაშველი ჯარებით მივიდა ახალციხეს. პირველივე დაზვერვამ იგი: დაარწმუნა, რომ მტერს მეტად ძლიერი, ბატარეებით და თხრილებით გამაგრებული პოზიციები ეკავა. ანდრონიკაშვილის განკარგულებაში მყოფი ახალციხის რაზმი 800 კაცისაგან შედგებოდა. მათ რიცხვში 2 დრუჟინა და ერთი ასეული ქართული მილიცია და მოხალისეები იყო. ოსმალთა რაოდენობა კი 20 000-ს აღწევდა. ახალციხეში მისვლისთანავე 14 ნოემბერს დილიდან ანდრონიკაშვილმა ოსმალებს საარტილერიო ცეცხლი დაუშინა, მაგრამ დაინახა, რომ არტილერიით სასურველ მიზანს ვერ მიაღწევდა და ჯარი ხელჩართულ ბრძოლაზე გადაიყვანა. მისი იერიში იმდენად ელვისებური და მედგარი იყო, რომ მტერი შედრკა და უკან დახევა დაიწყო. იერიში რამდენიმე საათს გაგრძელდა და 14 ნოემბრის საღამოსათვის სრულიად დემორალიზებული თურქეთის არმია სასტიკად დამარცხებული არდაგანისაკენ გარბოდა. რუსებისა და ქართველების ლაშქარს ხელთ ჩაუვარდათ მდიდარი ნადავლი. თურქებმა ბრძოლის ველზე დატოვეს ზარბაზნები, საარტილერიო ყუმბარები, თოფისწამალი, ვაზნები და სხვ. მოკლული იყო 1 500-ზე მეტი თურქი ჯარისკაცი, დაჭრილი — 2 000¹. ახალციხეს-

¹ ე. ბ უ რ ჯ უ ლ ა ძ ე, ყირიმის ომი და საქართველო, 33. 229.

თან მოპოვებულ გამარჯვებაში განსაკუთრებით ისახელა თავი გორის რაზმმა.

ახალციხესთან გამარჯვების შემდეგ თბილისში დაბრუნებულ გენერალ ანდრონიკაშვილს ქართველმა ხალხმა საზეიმო შეხვედრა მოუწყო. ქალაქის შემოსასვლელთან მას შეეგება ქართველი თავად-აზნაურების ცხენოსანი რაზმი, მეფისნაცვლის ამაღა და მთელი თბილისის მოსახლეობა, საბურთალოს მინდორი მთლიანად მოფენილი იყო ეტლებით და საზეიმოდ განწყობილი ხალხით. მეზურნეები და საზანდრები სიმღერით მოაცილებდნენ ახალციხის გმირს.

ქართველი ხალხი თურქებთან პირველ გამარჯვებას ზეიმობდა. ახალციხის ბრძოლის მონაწილენი უხვად იყვნენ დაჯილდოებულნი. რუს რეგულარულ ჯარებთან ერთად დაჯილდოებული იყვნენ ქართული მილიციის 150-მდე მეთაური და მებრძოლი.

ახალციხესთან გამარჯვების შემდეგ ალექსანდროპოლის რაზმის მეთაურმა და კავკასიის ჯარების მთავარსარდალმა ბებუთოვმა თავისი ჯარები ყარსისაკენ დაძრა. 19 ნოემბერს ყარსის მახლობლად სოფელ ბაშკადიკლართან მოხდა გადამწყვეტი შეტაკება ბებუთოვის რაზმსა და თურქების ძირითად ძალებს, ანატოლიის კორპუსს შორის. აქაც, მიუხედავად მტრის მრავალრიცხოვნობისა, ბებუთოვმა სასტიკად დაამარცხა ისინი. ბაშკადიკლარის ბრძოლაში განსაკუთრებით გამოიჩინა თავი ჭავჭავაძემ, რომელიც შემდეგში ამ ბრძოლისათვის გიორგის ჯვრით იყო დაჯილდოებული.

ბაშკადიკლართან გამარჯვებით დამთავრდა 1853 წლის კამპანია. ბაშკადიკლართან ბრძოლის ერთი დღით ადრე, 18 ნოემბერს აღმირალ ნახიმოვმა სინოპთან თითქმის მთლიანად გაანადგურა თურქეთის ფლოტი.

ამიერკავკასიის ცენტრალურ პოზიციებზე მტრის განადგურების პარალელურად გურია-სამეგრელო-იმერეთის საზღვრებზე კვლავ დაძაბული მდგომარეობა გრძელდებოდა. გურიის საზღვრებზე თურქები აძლიერებდნენ ჯარების თავმოყრას, მათი რიცხვი იმ დროისათვის უკვე 30 ათასს აღემატებოდა. ისინი გურია-სამეგრელოდან აფხაზეთში გაჭრასა და მაჰმადემინისა და შამილის ჯარებთან შეერთებას აპირებდნენ. რეგულარული ჯარების ნაკლებობის გამო გურია-სამეგრელო-იმერეთის საზღვრების დაცვის სიმძიმე ადგილობრივ მილიციას დააწვა, რომელიც მედგრად იცავდა თავის სამშობლოს. ძალთა სიჭარბის მიუხედავად ახალციხესთან, ბაშკადიკლართან და სინოპთან რუსების გამარჯვების შემდეგ ოსმალები გურია-იმერეთის საზღვრებზე შეტევითი ომების დაწყებას ვეღარ ბედავდნენ და მხოლოდ მილიციასთან შეტაკებებით კმაყოფილდებოდნენ.

სინოპთან თურქების ფლოტის განადგურებამ შეაშფოთა ინგლის-საფრანგეთი, ისინი აშკარად ხედავდნენ იმ საშიშროებას, რაც შავ ზღვაზე რუ-

სეთის გაბატონებისაგან მოელოდათ და 1854 წლის იანვარში მოკავშირეთა ფლოტი თურქეთის გემების დაცვის საბაბით, შავ ზღვაში შემოვიდა. ინგლის-საფრანგეთის გაერთიანებული ფლოტის შავ ზღვაში გამოჩენა და უახლოეს მომავალში მოსალოდნელი ომის გაჩაღება, ერთი მხრივ, რუსეთსა და, მეორე მხრივ, მოკავშირე სახელმწიფოთა შორის ძირფესვიანად ცვლიდა კავკასიისა და, კერძოდ, საქართველოს მდგომარეობას — იგი აშკარა კატასტროფის წინაშე იდგა. მეფისნაცვალ ვორონცოვს კარგად ესმოდა ის საფრთხე, რომელიც შავ ზღვაში მოკავშირეების ფლოტის შემოსვლით შეექმნა საქართველოს. მართალია, მოკავშირეების მთავარი მიზანი სევასტოპოლი იყო. მათ რუსეთის ფლოტის განადგურება და ყირიმის თურქეთისათვის დაბრუნება უნდოდათ, მაგრამ მათი მხოლოდ გამოჩენაც კი შავ ზღვაზე საკმარისი იყო იმისთვის, რომ რუსეთი კავკასიის საბოლოოდ დაკარგვის სერიოზული საფრთხის წინაშე დამდგარიყო.

შავი ზღვის აღმოსავლეთ სანაპირო ხაზის სიმაგრეებს ორი მხრიდან მოელოდა შეტევა, ზღვიდან და ხმელეთიდან, სადაც ჩერქეზები მუდამ მზად იყვნენ მათ შესამუსრავად. შავ ზღვაზე რუსეთის ფლოტის მიერ გაბატონებული მდგომარეობის დაკარგვის შემდეგ, სახმელეთო გზების უვარგისობის გამო, სანაპირო სიმაგრეების გარნიზონის საკვებით და საჭურველით მომარაგებაც კი შეუძლებელი გახდებოდა და გარდა იმისა, რომ სანაპიროს გარნიზონები წინასწარ განწირული იქნებოდნენ, მთელი დასავლეთ საქართველო დაუცველი რჩებოდა.

ვორონცოვი ითვალისწინებდა, თუ რა განსაცდელში ჩაეარდებოდა რუსეთი დასავლეთ ევროპის სახელმწიფოებთან აშკარა განხეთქილების შედეგად და 1854 წლის 18 იანვრის წერილში ნიკოლოზ I-ს სთხოვდა ყველა ღონე ეხმარა, რომ ინგლის-საფრანგეთთან დიპლომატიური ურთიერთობის გაწყვეტამდე არ მისულიყო საქმე. იგი ურჩევდა იმპერატორს კეთილგონიერებისათვის მოეხმო და ზომიერება გამოეჩინა, ზოგიერთი უმნიშვნელო დათმობის ფასად მშვიდობიანი განწყობილება შეენარჩუნებინა ამ სახელმწიფოებთან, ყველაფერი გაეკეთებინა იმისათვის, რომ ეს უკანასკნელნი ნეიტრალური დარჩენილიყვნენ. წინააღმდეგ შემთხვევაში, იმის გამო, რომ შავ ზღვაზე მტრის ძლიერ ფლოტს რუსეთი ვერ გაუმკლავდებოდა, მას ხელი უნდა აეღო შავი ზღვის აღმოსავლეთ სანაპიროს ყველა სიმაგრეზე. აქ მდგარ გარნიზონებს, გელენჯიკიდან დაწყებული აფხაზეთის საზღვრებამდე, უკანდასახევი გზა არ ჰქონდათ და, ე. ი. წინასწარ განწირული იყვნენ. ყოველივე ამას დამღუპველი შედეგები უნდა მოჰყოლოდა კავკასიაში რუსეთის ძლიერების შენარჩუნებისათვის¹. როგორც ნიკოლოზ I-ის საპასუ-

¹ АКАК, X, გვ. 341—342.

ხო წერილიდან ირკვევა, მასაც კარგად ჰქონია შეგნებული ის საფრთხე, რომელიც მოელოდა კავკასიის შავ ზღვაზე მოკავშირეების ფლოტის გაბატონებით, მაგრამ მიუხედავად ამისა, სრულიად შეუძლებლად და „დამამცირებლად“ თვლიდა დათანხმებოდა ვორონცოვს და ევროპის სახელმწიფოების მიმართ წასულიყო თუნდაც უმნიშვნელო დათმობებზე. «...нет сомнения, что положение нашей береговой линии плачевно, — сწერდა იგი ვორონცოვს, — помочь ему ни в твоих, ни в моих силах. Предвидя потери наших фортов и гарнизонов, нельзя не соболезновать о их злой участи, но из сего однако сделать уступки, ни с чем не сообразные, было бы унижительно и недостойно. В военном быту бывают несчастные случаи, где частью войск жертвуют, хотя скрепя сердце, для достижения главной цели»¹.

ომის შემდგომი მსვლელობისათვის ნიკოლოზ I აუცილებლად თვლიდა გაერკვია ავსტრიის პოზიციები და ყოველი ღონე ეხმარა მისი მხარდაჭერის თუ არა ნეიტრალიტეტის შესანარჩუნებლად მაინც. მაგრამ რუსეთის მოსალოდნელი გამარჯვებით შეშფოთებულმა ავსტრიამ აგრძობინა მას, რომ რუსი ჯარების მიერ დუნაის გადალახვის შემთხვევაში ავსტრია ყოველმხრივ ეცდებოდა ხელი შეეშალა მისთვის, რუსეთის ჯარების მიერ ბალკანეთის გადალახვის შემდეგ კი მტრულ პოზიციებს დაიკავებდა. ავსტრიიდან, საზღვარზე, დუნაის სამთავროებისაკენ, სასწრაფოდ აგზავნიდნენ ჯარს 50 000 კაცის შემადგენლობით.

1854 წლის მარტში რუსეთსა და ინგლის-საფრანგეთს შორის დიპლომატიური ურთიერთობა გაწყდა და ინგლის-საფრანგეთმა ომი გამოუცხადა რუსეთს. ყოველივე ამის გამო მეფის რუსეთი ძალიან მძიმე მდგომარეობაში ვარდებოდა; ომის შემდგომი მსვლელობა მას კარგს აღარაფერს უქადდა. როგორც აღენიშნავდით, მოკავშირე სახელმწიფოების მიერ მტრული პოზიციების დაკავების შემდეგ, რუსეთი იძულებული იყო შავი ზღვის აღმოსავლეთ სანაპიროს სიმაგრეები დაეტოვებინა. ამ სანაპიროებისაკენ ვიცე-ადმირალ სერებრიაკოვის მეთაურობით გაიგზავნა ესკადრა გარნიზონის გამოსაყვანად. ესკადრამ ეს ოპერაცია წარმატებით ჩაატარა და გელენჯიკის, ნოვოროსიისკისა და ანაპის გარნიზონები დალუპვას გადაარჩინა. 1854 წლის მარტში მეფისნაცვლის მოვალეობის შემსრულებელმა გენერალმა რეადმა², საჭიროდ მიიჩნია რუსი ჯარების გამოყვანა აფხაზეთიდან. ამ უაღრესად ძნელი ოპერაციის შესრულება მან აფხაზეთის მთავარს გენერალ-ადიუტანტ მიხეილ შარვაშიძეს მიანდო. შარვაშიძეს ჩრდილო კავკასიის ტომებთან კარგი ურთიერთობა ჰქონდა და დიდი გავ-

¹ Кавказский сборник, XXVI, Тиф., 1907.

² 1854 წლის მარტში ვორონცოვმა ავადმყოფობისა და ხანშიშესულობის გამო განთავისუფლება ითხოვა.

„ღენით სარგებლობდა მათ შორის. მიხეილმა ყოველი ღონე იხმარა ამ დავალების წარმატებით შესასრულებლად და, მართლაც, მოახერხა სრულიად უდანაკარგოდ გადმოყვანა რუსის ჯარი აფხაზეთიდან სამეგრელოში.

„შავი ზღვის აღმოსავლეთ სიმაგრეებიდან და აფხაზეთიდან ჯარების გადმოყვანის შემდეგ, დასავლეთ საქართველო სრულიად უნუგეშო მდგომარეობაში ვარდებოდა — მტერს სამეგრელოსა და იმერეთში შემოსაჭრელად გზა გახსნილი ჰქონდა. მართალია, აფხაზეთიდან გამოყვანილი 5 ბატალიონით გურიის რაზმი გაძლიერდა, მაგრამ ეს უმნიშვნელო გაძლიერება იმ საფრთხესთან შედარებით, რაც დასავლეთ საქართველოს სანაპირო სიმაგრეებისა და აფხაზეთის ევაკუაციით მოელოდა, არაფერს ნიშნავდა. 1854 წლის კამპანიაში კავკასიის ფრონტზე „რიონის მხარის“ დაცვას გადამწყვეტი მნიშვნელობა ენიჭებოდა, საჭირო იყო გურიის რაზმის გაძლიერება, კავკასიის ცენტრალური პოზიციებიდან მამუველი ჯარების გადასროლა დასავლეთ საქართველოში, მაგრამ ამ დროისათვის ყარსთან 60 000 კაცისაგან შემდგარი ანატოლიის კორპუსი მოვიდა და სრულიად შეუძლებელი გახდა ამ ღონისძიების ჩატარება.

ომის კრიტიკულ ეტაპზე ახალციხე-გურიის რაზმების უფროსად დაინიშნა გენერალი ივანე ანდრონიკაშვილი. ანდრონიკაშვილი სასწრაფოდ გაემგზავრა ოზურგეთში და ენერგიულად შეუდგა გურიის რაზმის საბრძოლო წესრიგში მოყვანას. 1854 წლის მარტის ბოლოსათვის გურიის რაზმში სულ 10 ბატალიონი, 2 ასეული რეგულარული ჯარი და 40 ასეულამდე სახალხო მილიცია ითვლებოდა. ისინი განლაგებული იყვნენ ოზურგეთის განაპირა მხარეებსა და ჩოხატაურის მადლობებზე¹. მოსალოდნელი იყო მტრის თავდასხმა ბათუმისა და სოხუმ-კალეს მხრიდან, გარდა ამისა შესაძლებელი იყო თურქები შეტევაზე გადმოსულიყვნენ არდაგანიდან და აჭარიდან და თავს დასხმოდნენ ახალციხეს. ანდრონიკაშვილმა აუცილებლად მიიჩნია მჭიდრო კავშირის დამყარება გურიისა და ახალციხის რაზმებს შორის, რათა მათ შესაძლებლობა ჰქონოდათ საჭიროების შემთხვევაში მსწრაფლ დახმარებოდნენ ერთმანეთს. ამ მიზნით მან ბრძანა წესრიგში მოეყვანათ იმერეთ-ახალციხის დამაკავშირებელი ყველაზე უფრო მოსახერხებელი აბასთუმნის გზა. აბასთუმნის გზის დაცვა ქუთაისის მცხოვრებლებს დაევალოთ.

ზამთრის განმავლობაში თურქებმა ახალციხესთან განადგურებული რაზმის ნაცვლად შეადგინეს 34 ათასკაციანი კორპუსი, რომელიც საუკეთესო მებრძოლებით იყო დაკომპლექტებული, ჯარს სელიმ ფაშა მეთაურობდა. იგი ბათუმიდან უნდა შემოჭრილიყო გურიაში. ამავდროს ყარსში დაბანაკებული 60-ათასიანი ანატოლიის კორპუსი ალექსანდროპოლს

¹ ე, ბ უ რ ჭ უ ლ ა ძ ე, ურიმის ომი და საქართველო, გვ. 276.

ემუქრებოდა, ხოლო ბაიაზეთიდან თურქებმა ერევნისაკენ ძლიერი რაზმი წამოსწიეს წინ. ამ ჯარებს თბილისში მოეყარათ თავი, ე. ი. კავკასიის კორპუსი იძულებული იყო 3 მხრით ებრძოლა.

თურქები ბათუმიდან ქობულეთში გადმოვიდნენ, მოკავშირეებს ფლოტმა რედუტ-კალეში, ანაკლიაში, სოხუმსა და სხვა მიტოვებულ სიმაგრეებში დესანტი გადმოსხა. ასეთ პირობებში ანდრონიკაშვილმა ოზურგეთში გაჩერება აღარ სცნო მიზანშეწონილად და გადაწყვიტა, ვიდრე ციებ-ცხელებისაგან განაწამები ჯარი გამოკეთდებოდა, საკვების, ფურაჟისა და ტყვია-წამლის მიწოდების საქმეს წესრიგში მოიყვანდა, დროებით რიონისაკენ დაეხია უკან. იგი სრულიად სამართლიანად ფიქრობდა, რომ თუ რუსის ჯარი ოზურგეთში იქნებოდა გაჩერებული, სელიმ ფაშა მოვლითი გზებით ქუთაისისაკენ გასწევდა, ხოლო მის რიონზე დაბანაკების შემთხვევაში, მტერი ოზურგეთში შეჩერდებოდა. ანდრონიკაშვილმა ჯარი რიონის ორივე ნაპირზე აკეთის სიმაღლეებთან დააბანაკარეგულარული ჯარის ოზურგეთიდან გამოყვანის შემდეგ თითქმის ნახევარი გურია სახალხო მილიციის ამარა რჩებოდა. მშვიდობიანი მოსახლეობა იარაღს ისხამდა და მტრის დასახვედრად ემზადებოდა. გურული თავდაზნაურები და გლეხები საზეიმოდ დებდნენ ფიცს, რომ უკანასკნელ ამოსუნთქვამდე იბრძოლებდნენ. გურიის მილიცია მალაქია გურიელის მეთაურობით სოფ. მაკვანეთში გურიის საზღვრებთან დაბანაკდა. მალაქია გურაელი შეკვეთილში დაღუპული გიორგი გურიელის ძმა იყო. იგი დიდი პოპულარობით სარგებლობდა ხალხში და, როგორც თანამედროვენი გადმოგვცემენ, ძალიან მოხდენილი ვაჟაკიც ყოფილა. კავკასიის მეფისნაცვალნი შურავიოვი მას „გურული ხალხის მშვენებას“ უწოდებდა.

სელიმ-ფაშა თავისი რაზმით მოუახლოვდა გურიის საზღვრებს, მაგრამ დიდხანს ვერ ბედავდა მდ. ჩოლოქის გადმოლახვას. ბოლოს მის ყურამდე მიაღწია ივანე ანდრონიკაშვილის მიერ განზრახ მის შემოსატყუებლად დარჩეულმა ხმებმა იმის შესახებ, რომ თითქოს ინგლის-საფრანგეთის ლაშში ჩაბმით შეშინებული რუსები გურია, სამეგრელო, იმერეთიდან აპირებდნენ ჯარის გაყვანას და თბილისთან თავმოყრას. ამ ხმებით გათამამებული სელიმ-ფაშა გურიაში შემოიჭრა და ოზურგეთში დაბანაკდა. თურქებს მოჰყვნენ საქონლით დატვირთული ინგლისელი ვაჭრები და მოსახლეობის მოზიდვას ცდილობდნენ. მაგრამ გურულმა მოსახლეობამ მალაქია გურიელის მეთაურობით, რომლის რაზმი დღითი დღე იზრდებოდა, თურქების წინააღმდეგ ნამდვილი პარტიზანული ბრძოლა გააჩაღა და მტერს მნიშვნელოვანი ზიანი მიაყენა. სასაზღვრო ზოლის დაცვა თურქების მხრიდან გურიის, იმერეთისა და სამეგრელოს მილიციის საშუალებით ზორციელდებოდა. მილიცია რეგულარულად აწვდიდა სარდლობას ცნობებს თურქთა ჯარების განლაგების შესახებ. გურიის მილიციამ შეატყო-



გენერალი ი. ანდრონიკაშვილი

მოწინააღმდეგის შორისმსროლელ შაშხანებთან ვერაფერს გახდებოდა და ჯარი ხელჩართულ ბრძოლაზე გადაიყვანა. მტერმა დიდხანს ვერ გაუძლო შეტევას და უკან დახვევა დაიწყო. თავადი ერისთავი ქვეითი ჯარით და მილიციით ფეხდაფეხ მიჰყვებოდა მტერს. მან ტყიდან გასასვლელი ბილიკები ჩაკეტა და უკანდასახევი გზა მოუჭრა. მტრის დევნაში გართულ მეომრებს მხედველობიდან გამორჩათ, რომ ჰასან-ბეი ბაში-ბუზუყების რაზმით ჩუმად ხელიდან გაუსხლტა. ჰასან-ბეიმ ზურგიდან შემოუარა ერისთავის რაზმს და რუსთა ბანაკს დაეცა, მაგრამ ერისთავი დროზე მიხვდა მტრის ფანდს და სასწრაფოდ გაეშურა ბანაკში მყოფი ჯარის დასახმარებლად. რუსთა რეგულარულმა ჯარებმა და მილიციამ სასტიკად დაამარცხეს ჰასან-ბეის რაზმი. თვით ჰასან-ბეი გაქცევას ლამობდა, მაგრამ გურულმა აზნაურმა ერასტი ჭყონიამ მას ხმლის ერთი მოქნევით მოჰკვეთა თავი და გენერალ ანდრონიკაშვილს მიაართვა.

ნიგოთთან თურქების დამარცხების მერე ანდრონიკაშვილმა გადაწყვიტა, რომ დრო იყო ოზურგეთის თურქების მთავარი კორპუსისათვის შეეცნა და ოზურგეთისაკენ გასწია. ამ დროისათვის სელიმ-ფაშას ოზურგეთი დაეტოვებინა, მდ. ჩოლოქზე გადასულიყო და გურიის საზღვართან იყო დაბანაკებული. ანდრონიკაშვილის განკარგულებაში იყო 11 ბატალიონი ქვეითი რეგულარული ჯარით, ღონელი კახაკების 4 ასეული, გური-

ბინა სარდლობას, რომ თურქების 12-ათასიანმა რაზმმა მდინარე სუფსა გადმოლახა და ლანჩხუთის ხეობით ს. ნიგოთისაკენ მოეშურებოდა. რაზმი უმთავრესად ბაში-ბუზუყებისაგან შედგებოდა. იგი მოჰყავდა რენეგატ ჰასან-ბეი თავდგირიძეს. სოფ. ნიგოთთან ქუთაისისაკენ მიმავალ გზას იცავდა ნიკოლოზ ერისთავი 2 ბატალიონით და 4 ქვემებით. ერისთავის დასახმარებლად ანდრონიკაშვილმა 12-მდე ცხენოსანი და ქვეითი მილიციის ასეული გაგზავნა. 27 მაისს განთიადისას სოფ. ნიგოთთან ლანჩხუთის ტყეში ნიკოლოზ ერისთავი ანაზღად თავს დაესხა თურქებს. ერისთავმა იცოდა, რომ კაჟიანი თოფებით შეიარაღებული ჯარით


ის ექვსი ქვეითი რაზმი, იმერეთის მილიციის 6 ქვეითი და 5 ცხენოსანი ასეული, რომლის ერთ-ერთ ასეულს ხელმძღვანელობდა იმერეთის მეფის სოლომონ I-ის თანამედროვე — 75 წლის — ქაიხოსრო მიქელაძე. ქაიხოსრო მთელ იმერეთში განთქმული იყო თავისი ვაჟაკობით და გარეგნობით. მან მიქელაძეების გვარის თავადებისაგან შეადგინა მთელი ასეული და, როგორც თანამედროვე გადმოგვცემს, საბრძოლოდ ამხედრებულმა ქაიხოსრომ სახალხოდ გამოაცხადა, რომ იგი მტრის საბოლოოდ დამარცხებამდე და უკანასკნელ გასროლამდე თავდადებით იბრძოლებდა. აქვე ორიოდ სიტყვით უნდა შეეჩერდეთ ანდრონიკაშვილის განკარგულებაში მყოფ ქართული ნაკრები ცხენოსანი ლაშქრის აღწერაზე. ეს ლაშქარი 1854 წლის გაზაფხულზე ჩამოყალიბდა და სპეციალური სამხედრო სწავლება გაიარა. იგი შედგებოდა საუკეთესო ნარჩევი ვაჟაკებისაგან. ლაშქრის უფროსი იყო მამაცობით განთქმული გიორგი ჯანდიერი, რომელსაც მეტსახელად „დროშა-გიორგის“ უწოდებდნენ. ლაშქრის პირველ ასეულში იყვნენ მხოლოდ ოსები, რომლებიც სხვა ასეულებისაგან გამოსარჩევად წითელ ნიშანს ატარებდნენ და წითელფსკერიანი ფაფახები ეხურათ. მათი მეტაური იყო თავადი გიორგი მაჩაბელი. მეორე ასეული სიღნაღის მაზრის მცხოვრებთაგან იყო შედგენილი, ჰქონდათ თეთრი ნიშანი და თეთრი ფაფახები. მათ მეტაურობდა თავადი ზაქარია ანდრონიკაშვილი. მესამე ასეულში თელავის მაზრის მცხოვრებლები იყვნენ, მეტაურობდა ნიკო ჭავჭავაძე, ჰქონდათ მოყვითალო-ოქროსფერი ნიშანი. მეოთხე ასეული შედგენილი იყო თბილისისა და გორის მაზრის მცხოვრებლებისაგან, მეტაურად ჰყავდათ თავადი დავით ვახვახიშვილი, ატარებდნენ ცისფერ ნიშანს. მეხუთე ასეულში იყვნენ თუშები და ფშავეები შავი ნიშნით და შავი თუშური ქუდით, მათ მეტაურობდა ვაჟაკობით განთქმული ელისაბერიძე, რომელსაც, როგორც ამბობდნენ, მთელი სხეული ჭრილობებით ჰქონდა დაფარული. მეექვსე ასეული მწვანე ნიშნით გამოდიოდა და მის შემადგენლობაში მხოლოდ აღმოსავლეთ საქართველოს უძველესი გვარების თავადაზნაურობის წარმომადგენლები შედიოდნენ, მეტაური იყო თავადი გიორგი ერისთავი. ლაშქარს მიუძღვებოდა თეთრ ცხენზე ამხედრებული გოლიათური აგებულების ბოდბისხეველი ნატროშვილი, რომელსაც შავი დროშა მოჰქონდა. თანამედროვენი ერთხმად აღნიშნავენ, რომ ქართული ლაშქარი თავისი ჩაცმულობით და საბრძოლო გარეგნობით თვალწარმტაც სანახაობას წარმოადგენდა.

ოზურგეთში მისვლისას ანდრონიკაშვილმა თავისი გენერლები შეკრიბა და მომავალი ბრძოლის შესახებ თათბირი გამართა. უმრავლესობის მოთხოვნის მიუხედავად, რამდენიმე დღით გადაედოთ შეტევა, ვიდრე კარგად არ შეისწავლიდნენ მტრის ძალებს, ანდრონიკაშვილმა გადაწყვიტა სწრაფი და გაბედული იერიში მიეტანა მტერზე, რათა ესარგებლა ნიგოითთან მათი დამარცხების შემდეგ თურქების დემორალიზაციით. 205

4 ივნისს, გათენებისას, „გურიის რაზმმა“ დატოვა ოზურგეთი და გაემართა გურიის საზღვრებისაკენ, სადაც მდ. ჩოლოქს გაღმა, მისთვის ხელსაყრელ პოზიციებზე იყო განლაგებული ბათუმის 35-ათასიანი კორპუსი სელიმ-ფაშას მეთაურობით.

ავანგარდში მიდიოდა გურული მილიცია მაჭავარიანისა და თავდგირიძის მეთაურობით, რომელნიც გზაში თურქების მეწინავე რაზმს წააწყდნენ. მილიცია შეებრძოლა ამ რაზმს, სასტიკად დაამარცხა და გაფანტა ისინი, თვითონ ჩოლოქისაკენ დაეშვა და თურქების უკანდასახევი გზა დაიკავა.

გურიის რაზმმა გადალახა ჩოლოქი და საბრძოლოდ განლაგებულ მტრის პირდაპირ აღმოჩნდა. ბრძოლა საარტილერიო ცეცხლით დაიწყო. შემდეგ ანდრონიკაშვილის განკარგულებით ბრძოლაში უნდა ჩაბმულიყო 2 კოლონა, გენერლების მეიდელისა და ბრუნერის მეთაურობით. მეიდელის კოლონა პირდაპირ ეკვეთა მტერს, ხოლო ბრუნერის კოლონასა და ქვეით მილიციას მტრის მარჯვენა ფლანგიდან უნდა შემოეარა და მეიდელთან ერთდროულად დაეცხო მისთვის. გენ. მეიდელმა ხელჩართული ბრძოლა გამართა და კარგად შეაეწროვა თურქები, ამავე დროს ბრუნერის კოლონასაც რომ დაერტყა მტრისათვის, ბრძოლის ბედი გადაწყვეტილი იქნებოდა, მაგრამ ბრუნერი გაუგებარი მიზეზის გამო იგვიანებდა. მეიდელის კოლონა თავისიანებისაგან მოწყვეტილი აღმოჩნდა და ბრძოლის ბედი ბეწვზე ეკიდა. გათამამებული თურქები მთელი ფრონტით შეტევაზე გადავიდნენ, მაგრამ ანდრონიკაშვილი არ დაიბნა. მან უბრძანა კავალერიას ჩაბმულიყო ბრძოლაში. როგორც ამ ბრძოლის უშუალო მონაწილე ქართული ლაშქრის ინსტრუქტორი ივანე ამილახვარი მოგვითხრობს, კავალერია, იმერეთის ცხენოსანი მილიცია ქართული ლაშქარი გააფთრებული ეკვეთა მტერს. დონელი კაზაკების ასეულები პოლკოვნიკ ხარიტონოვის მეთაურობით და იმერეთის ცხენოსანი მილიცია ქაიხოსრო მიქელაძის მეთაურობით მტრის მოწინავე პოზიციებში შეიჭრა, ხოლო ქართულმა ლაშქარმა მარჯვენა ფლანგიდან შემოუარა და ზურგიდან დაესხა მტერს. შეტევაზე გადასული ქართული ლაშქარი ისეთი ელვის სისწრაფით მიაგეღვებდა ცხენებს, რომ წინა რიგებში მყოფი ასეულის მეთაურები დავით ვახვახიშვილი და ზაქარია ანდრონიკაშვილი ღრმად შეიჭრნენ თურქების რიგებში და მტრის ხიშტებზე წამოგებულებმა ბრძოლის ველზე განუტევეს სული. აქვე უნდა აღინიშნოს, რომ დავითი ამ ომში დაღუპული 4 ძმა ვახვახიშვილების მეხუთე ძმა იყო. ლაშქარმა ამ ბრძოლაში 120 კაცი დაკარგა, მაგრამ თითქმის სავსებით გაანადგურა მტრის რეგულარული ჯარის გვარდიის ბატალიონი; წაართვა მათ დროშა, ასეულის ნიშნები და ქვემეხი. ასევე შეუპოვრად ებრძოდა მტერს დონელ კაზაკთა პოლკი, რომელთა მეთაური ხარიტონოვი ბრძოლის ველზე დაეცა.



„საქართველოს ცხენოსანი ღრუეინის“ დროშა.

ამ ბრძოლაშივე დაიღუპა იმერეთის მილიციის სახელოვანი მეთაური ქაიხოსრო მიქელაძე.

შეტევაზე გადასულ კავალერიას ანდრონიკაშვილმა ფეხდაფეხ მიაცილა ჯარის დანარჩენი ნაწილები და მტრის წინააღმდეგ გაშლილ შეტევაზე გადავიდა. სისხლისმღვრელი ხელჩართული ბრძოლის შემდეგ თურქები იძულებული გახდნენ უკან დაეხიათ. მაგრამ რუსი და ქართველი ცხენოსნები მათ ფეხდაფეხ დაედევნენ და იქამდე სდიეს, ვიდრე სელიმ-ფაშას ჯარების გზააბნეული ნაშთები მდ. ლელვს იქით არ გადაკარგეს. თვითონ სელიმ-ფაშა რამდენიმე მხლებელით ქობულეთს გაიქცა. ჩვენ ჯარს ხელთ ჩაუვარდა თურქების ბანაკის სამხედრო ქონება-ინვენტარის მთელი მარაგი, არტილერია და სხვ. თურქების რიცხოვრები სიჭარბის მიუხედავად (სელიმ-ფაშას განკარგულებაში 35 ათასამდე ჯარისკაცი ითვლებოდა, როცა ანდრონიკაშვილს 10 000-კაციანი ჯარი ჰყავდა) გამარჯვება სრული იყო. ჩოლოქთან ბრძოლაში თითქმის სავსებით განადგურდა ბათუმის კორპუსი.

ჩოლოქთან გამარჯვებამ ბოლო მოუღო უცხოელი გენერლების მიერ შედგენილ გეგმას, რომლის მიხედვითაც ახალციხე-ახალქალაქის მიმართულებით წამოსული თურქთა რაზმი სურამის უღელტეხილის გადავლით უნდა შეერთებოდა სელიმ-ფაშას ბათუმის კორპუსს, რათა შემდეგ „გაშლილი კომბინირებული შეტევა“ დაეწყო, რასაც, მათი აზრით, უნდა მოჰყოლოდა — „რუსეთის ბატონობის დასასრული ამ მხარეში“¹.

იმავე ხანებში შამილმა კვლავ სცადა საქართველოში შემოჭრა და თურქების ჯარებთან შეერთება. 1854 წლის ივლისში შამილი 12-ათასიანი არმიით შეიჭრა კახეთში, ხანმოკლე ბრძოლით დაიკავა სოფ. შილდა. ერთ-ერთმა რაზმმა დაარბია ალაზნის ნაპირები, ისინი წინანდალისაკენ გაიჭრნენ, გაძარცვეს თავად დავით ჭავჭავაძის სახლი, დაატყვევეს ქალები და ბავშვები. დატყვევებულთა რიცხვში იყვნენ დავითის მეუღლე, და ბაშყადიკლართან დაღუპული ილია ორბელიანის მეუღლე. შამილი, რაზმის სრული განადგურების შიშით, იძულებული იყო მალევე გაბრუნებულიყო უკან. ამ დივერსიას თითქმის არავითარი გავლენა არ მოუხდენია ომის საერთო მსვლელობაზე, გარდა იმისა, რომ ჩოლოქთან გამარჯვების შემდეგ ალექსანდროპოლის მთავარი კორპუსის დასახმარებლად მიმავალი გენერალი ანდრონიკაშვილი თავისი ჯარებით იძულებული იყო თბილისში დაბრუნებულიყო, სადაც გაიგო, რომ შამილის შემოსევა უკვე მოგერიებული იყო.

ჩოლოქთან გურიის რაზმის გამარჯვებამ ამიერკავკასიის ფრონტის სხვა უბნებზე მოქმედ ჯარებს საშუალება მისცა შეტევაზე გადასულიყვნენ.

17 ივლისს გენერალ ვრანგელის მეთაურობით რუსის ჯარები თავს დაესხნენ ბაიაზეთის მახლობლად ჩინგილის მალლობზე განლაგებულ თურქებს. ბაიაზეთის ეს რაზმი ქურთების ცხენოსანი მილიციის მხარდაჭერით სარგებლობდა და ერევნის ციხე-სიმაგრეს ემუქრებოდა. ბრძოლა ჩინგილის მალლობზე 2 საათს გრძელდებოდა და რუსების სრული გამარჯვებით დამთავრდა. რუსებმა განადგურეს ბაიაზეთის რაზმი და შორს გარეკეს იგი. 2 დღის შემდეგ გენერალ ვრანგელმა დაიკავა ქალაქი ბაიაზეთი. მალე ამას მოჰყვა 1854 წლის კამპანიის ყველაზე ბრწყინვალე გამარჯვება. ალექსანდროპოლის რაზმის უფროსს ბებუთოვს მოუვიდა ცნობა, რომ ყარსში მდგარი თურქების ანატოლიის 60-ათასიანმა კორპუსმა, მუსტაფა ზორიფ-ფაშას მეთაურობით, დატოვა ყარსი და სოფ. კიურეკ-დართან განლაგდა. ბებუთოვმა თავისი რაზმი მსწრაფლ წაიყვანა შეტევაზე. 24 ივლისს თურქეთის ტერიტორიაზე სოფ. კიურეკ-დართან მოხდა ბრძოლა, რომელიც გარდამავალი უპირატესობით მიმდინარეობდა. მიუხედავად იმისა, რომ ჯარების რიცხობრივი თანაშეთარდება თურქების სასარგებლოდ იყო, მტერმა ვერ შეძლო თავისი უპირატესობით ესარგებლა და კიურეკ-დართან ბრძოლა გენერალ ბებუთოვისა და მისი

¹ ე. ბ უ რ ქ უ ლ ა ძ ე, ყირიმის ომი და საქართველო, გვ. 311—312.

რაზმის სრული გამარჯვებით დამთავრდა. მაგრამ ამ გამარჯვებებს და საერთოდ მთელ 1854 წლის კამპანიას ამიერკავკასიის ფრონტზე ყირიმის ომისათვის გადამწყვეტი მნიშვნელობა მაინც არ ჰქონია.

1854 წლის იელისში გურიის რაზმის უფროსად გენერალი ივანე მუხრან-ბატონი დანიშნეს. მუხრან-ბატონმა შეადგინა საბრძოლო გეგმა, რომლითაც ითვალისწინებდა, რომ თურქეთსა და მოკავშირე სახელმწიფოებს ყოველთვის ადვილად შეეძლოთ ძლიერი დესანტის გადმოსხმა გურია-სამეგრელოს სანაპიროებზე. ამ დროისათვის შავ ზღვაზე მოკავშირეთა ფლოტი ბატონობდა, ხოლო რუსეთის ფლოტი სევასტოპოლთან იყო ჩაკეტილი. შავი ზღვის მთელი სანაპირო კი, რუსეთის გარნიზონების ევაკუაციის შემდეგ, მოწინააღმდეგეთა ფლოტისა და ჯარებისათვის სასვებით გაშიშვლებულ პლაცდარმს წარმოადგენდა და მოსალოდნელი იყო იტრის შემოსევა ერთდროულად, ან ნაწილ-ნაწილ ქობულეთის, რედუტ-კალესა და აფხაზეთის მხრიდან. ამიტომ ჯარს უნდა დაეკავებია ისეთი პოზიციები, საიდანაც უფრო ადვილად შეაჩერებდა მოწინააღმდეგის შემოტევას. მუხრან-ბატონმა უპირველეს ყოვლისა, რომ გაეძნელებია მტრისათვის აფხაზეთიდან ინგურზე გადმოსვლა, ყურადღება მიაქცია სამურზაყანოს, იქაური მოსახლეობისგან ჩამოაყალიბა მილიცია და აფხაზეთიდან მომავალი გზები გაუსვლელი გახადა. მისი გეგმის მიხედვით სამეგრელოს წინა ხაზი დაიკავა ადგილობრივმა მილიციამ, რეგულარული ჯარები კი განლაგებული იყო ზუგდიდსა, ხეთასა და ხობის მონასტერთან. თუ მტერი შემოუტევდა ერთდროულად რედუტ-კალედან და ინგურიდან, ჯარი უნდა შეგროვილიყო ხეთაში. ეს პოზიცია რედუტ-კალესა და ინგურიდან გადმოსულ მტრის ჯარს შუაში ყოფდა.

გურიის დასაცავად იგივე საფუძველზე იყო შედგენილი გეგმა. ქობულეთის საზღვარი და ზღვისპირი დაკავებული იყო ძლიერი მილიციით, რომელიც მტერს უნდა შეხვედროდა უშუალოდ საზღვრის გადმოლახვის შემდეგ. რეგულარული ჯარების განსალაგებლად არჩეული იყო აკეთის მთის პოზიციები. აკეთის მთები ბუნებრივად მიუვალი იყო და ქუთაისისკენ მიმავალ ორ გზას (ერთი მხრივ ლანჩხუთ-ნიგოთის გავლით, მეორე მხრივ ჩოხატაურის გავლით) შორის იყო გადაჭიმული. გურია-სამეგრელოს დამცველი რაზმების დასაკავშირებლად და საერთო რეზერვის განსალაგებლად არჩეული იყო ორივე პოზიციებიდან თანაბარი მანძილით დაშორებული სოფელი სორტა. რაზმების უკეთ დასაკავშირებლად რიონზე მოაწყვეს გადასასვლელი. ქვეითი ჯარის 6 ბატალიონი განლაგდა სამეგრელოში ზუგდიდ-ხეთა-ხობის პოზიციებზე, გურიაში აკეთის პოზიციებზე დააყენეს 4 ბატალიონი, 6 ბატალიონი კი რეზერვად იღვა სოფელ სორტაში. მუხრან-ბატონის გეგმის დედააზრი იმაში მდგომარეობდა, რომ მტერთან შეხვედრას მორიდებოდა, არ მიეცა მისთვის გადა-

მწყვეტი მოქმედებების საშუალება. საჭირო იყო მოეგოთ დრო, ვიდრე აღმ. საქართველოდან შეტევისათვის რეზერვი მოვიდოდა, რომელსაც უნდა შეეთია უკვე ნაწილობრივ ბრძოლით დასუსტებული მტრისათვის.

ზამთრის დაწყებამდე გურია-სამეგრელო-იმერეთის საზღვრებზე სახალხო მილიცია და პარტიზანები იგერიებდნენ თურქების ლივერსიულ გამოხდომებს.

მთელი ზამთრის განმავლობაში თურქეთი გამალებული ემზადებოდა 1855 წლის კამპანიისათვის. მათ მთავარი ყურადღება მიაქციეს, ისედაც ბუნებრივი გეოგრაფიულ-ტოპოგრაფიული მდებარეობით მიუვალი ყარსის ციხის გამაგრებას. ინგლისელი სპეციალისტების ზედამხედველობით აგებულ იქნა საფორტიფიკაციო ზღუდეები და ბასტიონები, რომელთაც ყარსი მრისხანე ციტადელად აქციეს. ყარსში განლაგებულ ძლიერ თურქეთის არმიას მეთაურობდა ინგლისელი გენერალი ვილიამსი. ამავე დროს თურქეთი ყოველმხრივ ცდილობდა დაეყოლიებინა მოკავშირეები დასავლეთ საქართველოში ძლიერი დესანტის გადასხმაზე, მაგრამ მოკავშირე სახელმწიფოებს შორის გარკვეულ უთანხმოებას ჰქონდა ადგილი. საფრანგეთი საქართველო-ამიერკავკასიით სრულებით არ იყო დაინტერესებული, მის უპირველეს ამოცანას სევასტოპოლ-ყირიმის აღება წარმოადგენდა და ინგლისიც საქართველო-ამიერკავკასიის პრობლემის გადაწყვეტას ყირიმში სრული გამარჯვების მოპოვებამდე სდებდა.

მთელი ზამთრის განმავლობაში თურქები და რუსები ერთმანეთს უთვალთვალებდნენ და არც ერთი მხარე არ აპირებდა გადამწყვეტი მოქმედების დაწყებას.

1855 წლის გაზაფხულზე ხანში შესული და სერიოზულად დაავადმყოფებული მეფისნაცვალი ვორონცოვი გენერალმა მურავიოვმა შეცვალა.

იენისის დასაწყისში მურავიოვი 25 ათასამდე ჯარით ყარსის ასაღებად გაემურა. მან თანდათანობით დაიწყო ყარსისათვის ალყის შემორტყმა, ყარსისა და ერზერუმის დამაკავშირებელი ყველა გზა ჩაკეტა და მჭიდრო მარყუჟში მოაქცია ყარსის ციხე-სიმაგრე.

ოსმალეთი ყარსის ალყამ ძალზე შეაშფოთა, რადგანაც მისი ალებით რუსებს მცირე აზია-ანატოლიისაკენ გზა გახსნილი ექნებოდათ. ოსმალეთი ევროპელი მოკავშირეებისაგან დაუყოვნებლივ მოითხოვდა ყარსის გადასარჩენად ზომების მიღებას, მაგრამ ინგლის-საფრანგეთი სევასტოპოლის აღებამდე არ აპირებდა ყარსის გადარჩენისათვის მაშველი არმიის გამოგზავნას.

ოსმალთა ჯარების სარღობამ გადაწყვიტა მრავალრიცხოვანი არმიის გადმოსხმა სამეგრელოში. ამით ძლიერ მუქარას შეუქმნიდნენ და იძულებულს განდიდნენ რუსებს, რომ ყარსის ალყა მოეხსნათ. მარქსის თქმით,

ეს იყო „ერთადერთი სტრატეგიული იდეა, რომელიც ამ ომმა წარმოშვა“¹.

ოსმალთა ჯარების გადმოსხმა საქართველოში მხოლოდ სევასტოპოლის აღების შემდეგ გახდა შესაძლებელი. 1855 წლის 2 სექტემბერს ბათუმში 8-ათასიანი ჯარი გადმოსხეს. მთელი სექტემბრის განმავლობაში ბათუმში, ყულევსა და ტრაპიზონში გრძელდებოდა ოსმალთა ჯარების გადმოსხმა. ჯარების მთავარსარდალმა ომერ-ფაშამ ყარსისკენ გაჭრა სცადა, მაგრამ ეს მოსატყუებელი მანევრი უფრო იყო. ომერ-ფაშას სავსებით არ შესწევდა ძალა, რომ ბათუმიდან ყარსამდე უამრავი დაბრკოლებებით აღსავსე მანძილი გადაეღახა და ალყაშემორტყმულ ყარსის გარნიზონს მიშველებოდა, მითუმეტეს, რომ „ყარსის ციხე-სიმაგრისა და მისი გარნიზონისათვის ნამდვილი დახმარების აღმოჩენა სულაც არ შედიოდა ომერ-ფაშასა და მის ევროპელ შეფების ანგარიშში. მათი ყურადღების ცენტრში ამიერიდან საქართველოსა და ამიერკავკასიის დაპყრობისა და დანაწევრების პრაქტიკული ამოცანები იდგა“².

ცნობები ომერ-ფაშას მოქმედებისა და სევასტოპოლის დაცემის შესახებ ალყაშემორტყმულმა ყარსის გარნიზონმა თითქმის ერთდროულად მიიღო, რამაც ისინი სულიერად გაამხნევა. მურავიოვმა კი გადაწყვიტა თურქთა დამხმარე კორპუსის მოსვლისათვის დაესწრო და იერიშით აეღო ყარსის ციხე-სიმაგრე. წარმატების შემთხვევაში იგი შეძლებდა არდაგანის გზით ბათუმისკენ გალაშქრებას და თურქეთის მეორე არმიის განადგურებას. რაც მთავარია, მურავიოვი განსაკუთრებით მონდომებული იყო გაეფანტა ის მძიმე შთაბეჭდილება, რომელიც მოახდინა რუსეთში სევასტოპოლის აღებამ. მურავიოვი ისე გაიტაცა ამ იდეამ, რომ მან ყურად არ იღო გამოცდილ კაზაკთა გენერლის — ბაკლანოვის მტკიცება იმის შესახებ, რომ მათ განკარგულებაში მყოფი ძალებით ყარსის აღება სავსებით შეუძლებელი იქნებოდა. 17 სექტემბერს ყარსის გარშემო განლაგებულმა ჯარებმა იერიში მიიტანეს ციხეზე. მიუხედავად იმისა, რომ რუსი და ქართველი ჯარები არნახული თავგამოდებით და შეუპოვრობით იბრძოდნენ, ყარსის აღება მაინც ვერ მოხერხდა. იერიში განსაკუთრებით სისხლისმღვრელი გამოდგა რუსებისათვის. ბრძოლაში დაჭრილი და მოკლული იყო რუსების 4 გენერალი, 248 ოფიცერი და 7226 ჯარისკაცი. 17 სექტემბრის იერიშმა, მართალია, ძალიან შეასუსტა რუსების არმია, მაგრამ სულიერად არ დაცემულა. მურავიოვი ამ უბედური იერიშის შემდეგ კვლავ აგრძელებდა ყარსის ალყას. კავკასიის არმიის ყველა ბრძოლისუნარიან რაზმებს ყარსთან მოუყარეს თავი, გურიის რაზმი კი, რომელიც ყოველ წუთს მოელოდა გურია-სამეგრელოს მხრიდან მტრის ძლიერი

¹ К. Маркс и Ф. Энгельс, Соч., т. X, гл. 555.

² ე. ბ უ რ ჯ უ ლ ა ძ ე, ყირიმის ომი და საქართველო, გვ. 336.

დესანტის თავდასხმას, მაშველი ჯარის მიღების შესაძლებლობას მოკლებული აღმოჩნდა.

ომერ-ფაშამ 1856 წლის სექტემბერ-ოქტომბერში 36-ათასიანი არმია გადასხა აფხაზეთში. აშკარა იყო, რომ ომერ-ფაშას ალყაშემორტყმული ყარსისათვის დახმარება კი არ ამოძრავებდა, არამედ იგი მთელი დასავლეთ საქართველოს თუ არა, აფხაზეთ-სამეგრელოს ხელში ჩაგდებათ იყო დაინტერესებული.

აფხაზეთში დიდი არმიის გადასხმის შემდეგ ომერ-ფაშას სამეგრელოში შემოჭრას დღე-დღეზე ელოდებოდნენ. გურიის რაზმის უფროსი, მუხრან-ბატონი გამალებული ემზადებოდა გადამწყვეტი შეტაკებისათვის, მაგრამ მის განკარგულებაში მყოფი მცირერიცხოვანი რაზმით სამეგრელოს გაჭიმული საზღვრის დაცვა თითქმის შეუძლებელი იყო.

გურიის რაზმი ამ დროისათვის 16 ბატალიონისაგან შედგებოდა, აქედან 5 ბატალიონი გურიის დასაცავად იყო საჭირო, ყულევისა და ანაკლიიდან მოძავალი გზების ჩასაკეტად 4 ბატალიონი გაიგზავნა, ინგურის ფრონტისათვის კი, საიდანაც მოსალოდნელი იყო აფხაზეთიდან წამოსული თურქების სამეგრელოში შემოჭრა, მხოლოდ 7 ბატალიონი რჩებოდა. რეგულარულ ჯარებთან ენგურზე დასავლეთ საქართველოს სახალხო ლაშქარიც იბრძოდა — დაახლოებით 5 ათას კაცამდე.

1856 წლის ოქტომბერში ომერ-ფაშა აფხაზეთიდან სამეგრელოსკენ დაიძრა. ჩვეულებრივ ამ დროისათვის მდინარე ენგური წყალდიდობის გამო თითქმის გაუვალი ხდებოდა. არსად არ შეიძლებოდა ნამდვილი ფონის მონახვა, ხოლო ხიდებს აგება, მისი სწრაფი დინების გამო; თითქმის შეუძლებელი იყო. მაგრამ იმ წელიწადს ვალეებმა დიდხანს გასტანა. მდინარე ისე იყო დაპატარავებული, რომ მისი გადალახვა არავითარ სიძნელეს აღარ წარმოადგენდა. საჭირო იყო ანაკლიიდან ჯვარამდე ენგურის სახაპიროს გამაგრება, მაგრამ იმ მცირე ძალებით, რომელიც მუხრან-ბატონის განკარგულებაში იმყოფებოდა, ამის გაკეთება ყოველად შეუძლებელი იყო. მუხრან-ბატონი შეეცადა რამდენიმე უფრო მოხერხებული გადასასვლელის გამაგრებას. ყველაზე უკეთ გაამაგრეს რუხის გადასასვლელი, რომელიც ზუგდიდისკენ მიმავალ მოსახერხებელ გზას კეტავდა. აქ დააყენეს 2 ბატალიონი 4 სამთო ქვემეხით, კაზაკთა 3 ასეული და სამეგრელოს ლაშქრის ცხენოსანთა ორი რაზმი. რუხთან ჩაყენებულ რაზმს მეთაურობდა გრიგოლ დადიანი. რუხის ქვევით კახათის გადასასვლელთან იდგა ქვეითი ჯარის 1 ბატალიონი და ლეჩხუმის ცხენოსანთა რაზმი, კონსტანტინე დადიანის სარდლობით. კახათის ოდნავ მოშორებით, ე. წ. სანარმანიოს გადასასვლელთან — ერთი ბატალიონი 2 ქვემეხით. ამ რაზმს რეზერვად ჰყავდა, პოლკოვნიკ იოსელიანის მეთაურობით, ორი ასეული საარტილერიო ქვემეხით. სანარმანიოს გადასასვლელის დაცვას ზელმძღვა-

ნელობდა აფხაზი პოდპოლკოვნიკი ზვამბაია. სანარმანიოდან ორი ვერსის დაშორებით, კოკის გადასასვლელთან იდგნენ რეგულარული ქვეითი ჯარის ორი ასეული და კაზაკთა ორი ასეული 2 ქვემეხით. იქვე მახლობლად ტყეში დაბანაკებული იყო საერთო რეზერვი კურინსკის 2 ბატალიონი და იმერეთის ცხენოსანთა მილიციის 4 რაზმი. კახათის, სანარმანიოსა და კოკის გადასასვლელებზე ჩაყენებული ჯარების და რეზერვის საერთო სარდლობა ევალეზოდა დიმიტრი შარვაშიძეს.

1855 წლის 25 ოქტომბერს მოხდა ენგურის ცნობილი ბრძოლა.

ომერ-ფაშა მთელი თავისი ჯარით პირველად რუხის გადასასვლელს ეკვეთა, მაგრამ აქ ძლიერ წინააღმდეგობას წააწყდა. მაშინ ომერ-ფაშამ გადაწყვიტა მოწინააღმდეგე მოეტყუებინა; მან რუხის პოზიციებთან ორი ზარბაზანი დატოვა, რომლებიც განუწყვეტლივ ისროდნენ, თვითონ კი მთავარი ძალებით ფარულად დაეშვა ქვევით და სრულიად მოულოდნელად სანარმანიოს გადასასვლელზე მიიტანა იერიში. სანარმანიოს პოზიციებთან გაჩაღდა უთანასწორო სისხლისმღვრელი ბრძოლა, რომელიც თითქმის საღამომდე გაგრძელდა. თურქები იერიშზე გადავიდნენ კოკის რაიონშიც და გარემოცვის მუქარით რუსებისა და ქართველების შეერთებული ჯარები აიძულეს უკან დაეხიათ. სანარმანიოსთან ბრძოლაში დაიღუპნენ ამ ბრძოლის სარდლები ზვამბაია და შემდეგ მისი შემცვლელები პოლკოვნიკები იოსელიანი, ივინი და კობეღევი. 25—26 ოქტომბრის დამით რეგულარულმა ჯარებმა და მილიციამ უკან დაიხია, ხოლო ენგურის ბრძოლის რამდენიმე დღის შემდეგ გენერალმა ივანე მუხრან-ბატონმა სრულიად მოულოდნელად დატოვა სამეგრელო, გურიაში აკეთის პოზიციები და მთელ ჯარებს ცხენისწყლის მარცხენა ნაპირთან სოფ. მარანთან მოუყარა თავი.

რუსის ჯარების წასვლის შემდეგ სამეგრელო ომერ-ფაშას ხელთ რჩებოდა. მთელი საქართველო სახიფათო მდგომარეობაში ჩავარდა, მაგრამ მოსახლეობა ადვილად როდი შეეგუა თურქთა ჯარების მიერ ქვეყნის ოკუპაციას. მთელი სამეგრელოს ტერიტორიაზე ნამდვილი პარტიზანული ბრძოლა გაჩაღდა.

ომერ-ფაშა შეეცადა სამეგრელოს მთავრის ეკატერინე დადიანის გადმობირებას. იგი ეკატერინეს სწერდა, რომ ოსმალეთი რუსეთის დამპყრობლურ მისწრაფებათა ჩასაშლელად იბრძვის, — ეკატერინესა და მის მცირეწლოვან შვილს, ლეჩხუმის სოფელ მურში გახიზნულებს, ზუგდიდში ეპატიუებოდა და ორივეს სამეგრელოს მმართველად აცხადებდა.

ეკატერინე დადიანი, როგორც თვით ომერ-ფაშას წერილიდან ირკვევა, მას საყოველთაოდ აჯანყებულ სამეგრელოს მოსახლეობის დასამორჩილებლად სჭირდებოდა. მაგრამ ეკატერინე მტკიცედ იდგა რუსეთის ორიენ-

ტაციაზე. იგი ომერ-ფაშას მიერ გამოგზავნილ წერილებს რუსეთის სარდლობას უგზავნიდა, თვითონ კი ფაშას დუმილით პასუხობდა.

რუსეთის რეგულარული ჯარების სარდლობამ სათანადოდ ვერ შეაფასა ადგილობრივი მოსახლეობის მიერ წარმოებული ბრძოლა და სახალხო ლაშქრის დარაზმვას არ მოკიდა ხელი. მიუხედავად ამისა, ადგილობრივმა მოსახლეობამ ოსმალთა განდევნის საქმეში დიდი როლი შეასრულა. მათ ზრძოლას სათავეში ჩაუდგა ეკატერინეს მაზლი გენერალი გრიგოლ დადიანი და ყოველგვარ პირობებში, ავდარსა თუ დარში, დღისით თუ ღამით, სამეგრელოს მილიცია მოსვენებას არ აძლევდა „დაუპატიჟებელ სტუმრებს“. იმ ხანებში სამეგრელოში კოკისპირული წვიმები დაიწყო. აღიღდა და სრულიად გადაულახავი შეიქმნა მდინარეები, გზები და მიწებ-რები ერთიან გაუვალ ჭაობებად იქცა. პარტიზანული ბრძოლის გაშლისათვის საუკეთესო პირობები შეიქმნა. ომერ-ფაშამ ვერც დაპირებებით, მოსყიდვით და შთაგონებებით, ვერც რეპრესიებით შეძლო მოსახლეობის მიმხრობა-დამშვიდება.

ოსმალები სასტიკად უსწორდებოდნენ მათ წინააღმდეგ მებრძოლ მოსახლეობას, წვაენდნენ სახლებსა და სოფლებს მთლიანად. მარტო სენაკში, თეკლათსა და ზუბში განადგურებული იყო 700 სახლი. ზუგდიდის მაზრაში 22 სოფელი დაინგრა.

ამავე ხანებში ყარსის ციხე-სიმაგრის აღებისათვის წარმოებულ ბრძოლა დასასრულს უახლოვდებოდა. ყარსში მომწყვედეულ თურქეთის ჯარებსა და მათ მთავარსარდალს ვილიამსს ომერ-ფაშასაგან დახმარების მიღების იმედი აღარ ჰქონდათ. გარსშემორტყმულმა რუსეთის არმიამ კი გენერალ ბაკლანოვის ხელმძღვანელობით სრულიად დაუხშო გარნიზონს გარესამყაროსთან ურთიერთობის ყოველგვარი საშუალებანი. თურქეთის ჯარს გამოელია სურსათი, წყაროებისა და მდინარეების გაყინვის გამო სასმელი წყლის კრიზისსაც განიცდიდნენ, გავრცელდა ეპიდემიური ავადმყოფობანი და სხვ.

1855 წლის 12 ნოემბერს ყარსის გარნიზონის უფროსმა მუშირ ვასიფ-ფაშამ და ინგლისის გენერალმა ვილიამსმა გადაწყვიტეს, რომ წინააღმდეგობის გაწევას აზრი აღარ ჰქონდა და 14 ნოემბერს ყარსის ციხე-სიმაგრე დანებდა რუსებს. ყარსის აღებამ დააჩქარა ყირიმის ომის დამთავრება. რუსების ხელში აღმოჩნდა კარგად გამაგრებული და თავისი გეოგრაფიული მდებარეობით თურქეთის დაცვისათვის მეტად მნიშვნელოვანი ციხე-სიმაგრე ყარსი და ყარსის საფაშო. მომავალ საზავო მოლაპარაკების დროს რუსებს საშუალება ექნებოდათ ყარსის საკომპენსაციოდ ყირიმისა და სევასტოპოლის განთავისუფლება მოეთხოვათ.

ყარსის გარნიზონის კაპიტულაციის შემდეგ ომერ-ფაშამ გასცა განკარგულება საქსპედიციო ჯარების უკანდახევის შესახებ. ამავე დროს

დასავლეთ საქართველოს სახალხო ბრძოლა კიდევ უფრო გაძლიერდა. ეკატერინე დადიანი თვითონ შეუერთდა სახალხო ლაშქარს და პარტიზანულ ბრძოლებში პირადად მონაწილეობასაც კი იღებდა. დასავლეთ საქართველოში რუსეთის რეგულარული ჯარების დამატებითი ნაწილები გადმოვიდა. დაიწყო ომერ-ფაშას ჯარების წინააღმდეგ შეტევა. სამეგრელოს მილიცია მოწინავე პოზიციებზე იბრძოდა. ოსმალები ზღვისპირისკენ იხევდნენ და გზადაგზა ყველაფერს ანადგურებდნენ. მათ გაძარცვეს და დასწვეს სამეგრელოს მთავრის სასახლეები, უწყალოდ გაჩეხეს ეკატერინე დადიანის მიერ ზუგდიდში გაშენებული იშვიათი პარკი და სხვ.

ოსმალთა ჯარებს ყირიმის ომის საზავო მოლაპარაკებამ ყულევში მოუსწრო. 1856 წ. 18 მარტს დადებული ზავის საფუძველზე მებრძოლ მხარეებს ერთმანეთისათვის უნდა დაებრუნებიათ დაპყრობილი ტერიტორიები. ყარსის ნაცვლად რუსეთმა დაიბრუნა ყირიმში დაკარგული ქალაქები, სამეგრელოს ნაწილი (ყულევის მიდამოები) და აფხაზეთი. სოხუმში ოსმალებმა 27 მაისს დასცალეს. დასავლეთ საქართველოში მშვიდობიანობა დამყარდა, მაგრამ ომიანობის გამო ქვეყნის მეურნეობა საფუძველიანად შერყეული იყო.

ომის დროს მეფის რუსეთმა თავი დააღწია საქართველოს დაკარგვის საფრთხეს. საქართველო-ამიერკავკასიის შენარჩუნება მან ქართველი, აზერბაიჯანელი და სომეხი ხალხის ენერგიული მხარდაჭერით შეძლო. თვით სამეფო ხელისუფლების ოფიციალური წარმომადგენლებიც კი იძულებული იყვნენ ზაზგასმით აღენიშნათ ქართველი ხალხის დეაწლი თურქეთის წინააღმდეგ ბრძოლაში. ქუთაისის სამხედრო გუბერნატორი პოლკოვნიკი კოლუბიაკინი წერდა, რომ „ომმა მთელი თავისი ბრწყინვალეობით გამოავლინა ადგილობრივი თავადაზნაურობის გულადობა. 1854 წელს ადგილობრივი მილიციის ჩინებულმა იერიშმა გადაწყვიტა ჩოლოქის ბრძოლის ბედი. ძლევამოსილად დაამთავრა პირველი კამპანია და დიდი ხნით უზრუნველყო ამიერკავკასიის საზღვაო სანაპირო ზოლი. 1855 წელს იმერეთის მწყობრმა ლაშქარმა თავისი მონაწილეობით ენგურზე, ისეთი მონაწილეობით, რომელიც მოწინააღმდეგეს დაუნდობელ სახალხო ომით ემუქრებოდა, დიდხანს შეაკავა ომერ-ფაშა შემოჭრისაგან. ბოლო დროს თავისი ყოველდღიური პარტიზანული თავდასხმებით სამეგრელოში მან დაამტკიცა ენერგიულობა, შეუპოვრობა და ქედმოუხრელი ერთგულება.

ყარსის აღებას რუსეთი ადგილობრივ თავადაზნაურობას უნდა უმადლოდეს, რადგან იმერეთი, ასე ვთქვათ, მოალყე კორპუსის კონტრვალაციურ ზაზს წარმოადგენდა. მთავარსარდალს მხოლოდ იმერლების სიმტკიცით სრულიად დაიმედებულს, შეეძლო არ შეშფოთებულიყო ომერ-ფაშას შემოტევით, ან ჩვენი გენერლების წარუმატებლობით ალყა არ მოეხსნა“¹.

¹ ე. ბ უ რ ქ უ ლ ა ძ ე, ყირიმის ომი და საქართველო, გვ. 425—426.

ყირიმის ომმა რუსეთის იმპერიის ისტორიაში განსაკუთრებული როლი ითამაშა და იგი მნიშვნელოვანი სოციალ-ეკონომიური ძვრებისა და ცვლილებების საწყისად იქცა. ამ ომმა გამოავლინა ბატონყმური რუსეთის ჩამორჩენილობა და კიდევ უფრო გაამწვავა ქვეყნის შიგნით მიმდინარე კლასობრივი ბრძოლა. რევოლუციური სიტუაციისაგან თავის დასაღწევად მეფის მთავრობა იძულებული იყო რეფორმების გზას დასდგომოდა. „ყირიმის ომმა ცხადყო ბატონყმური რუსეთის სიღატაკი და უძლურება. გლეხთა „ამბოხებებმა“, რომლებიც განთავისუფლებამდე ფართოვდებოდა ყოველ ათწლეულში, აიძულა პირველი შემამულე ალექსანდრე II ელიარზინა, სჯობს გლეხობა „გავათავისუფლოთ ზევიდან, ვიდრე ქვევიდან დაგვამხობდნენო“¹.

მაგრამ, ვიდრე ეს რეფორმები იმპერიის განაპირა მხარეებს, კერძოდ, კავკასიას შეეხებოდა, მეფის მთავრობას აუცილებლად მიაჩნდა პირველ რიგში კავკასიის საბოლოო შემომტკიცება და აქამდე შემორჩენილი სამთავროების სამეგრელოს, სვანეთისა და აფხაზეთის ავტონომიის გაუქმება.

როგორც აღვნიშნეთ, ყირიმის ომის დროს რუსეთი საქართველო-კავკასიის დაკარგვის საშიშროების წინაშე აღმოჩნდა, რასაც განსაკუთრებით ამწვავებდა ჩრდილო-დასავლეთ კავკასიაში მიმდინარე ბრძოლა და ცალკეული ავტონომიური ერთეულების არსებობა. ომის დამთავრების შემდეგ რუსეთის ხელისუფლებას საშუალება ეძლეოდა მეტი ყურადღება მიექცია კავკასიის მთიანეთის დამორჩილებისათვის და თანდათანობით შესდგომოდა ავტონომიური ერთეულების გაუქმებას. დასავლეთ საქართველოს სამთავროებმა XIX ს-ის პირველი ნახევრის მანძილზე, ცარიზმის კოლონიური პოლიტიკის გატარებაში აქტიური როლი შეასრულეს, ხოლო ქვეყნის საბოლოო კოლონიურ-ეკონომიური ათვისების დროს მათი არსებობა რუსეთის ხელისუფლების თვალში გაუმართლებელი და ხელის შემშლელი ჩანდა.

ომის დამთავრების შემდეგ კავკასიაში გამოგზავნილ მეფისნაცვალს ბარიატინსკის ალექსანდრე II ძირითად მიზნად უსახავდა „კავკასიის დამშვიდება-დამორჩილება და მის შერწყმას იმპერიის დანარჩენ ნაწილებთან“².

XIX ს-ის პირველი ნახევრის მანძილზე დასავლეთ საქართველოს სამეფო-სამთავროების შემოერთებისათვის ბრძოლაში რუსეთის ხელისუფლება ოსტატურად იყენებდა ამ სამთავროებს შორის არსებულ შუღლს და

¹ ვ. ი. ლენინი, თხზ., ტ. 17, გვ. 127.

² AKAK, XII, გვ. 355.

ცალკეული მათგანის განდიდებით თავის მიზნების განხორციელებას აღწევდა. განსაკუთრებულ ერთგულებას რუსეთის ხელისუფლების მიმართ სამეგრელოს მთავრები დადიანები იჩენდნენ, რომელთაც დიდად შეუწყვეს ხელი იმერეთის სამეფოს და გურიის სამთავროს რუსეთთან შეერთებას, სამაგიეროდ კი „თავისი ხელისუფლება“ განიმტკიცეს. დასავლეთ საქართველოსა და დასავლეთ კავკასიის მთიანეთში ცალკეული პოლიტიკური ერთეულების არსებობის პირობებში ცარიზმი სრულიადაც არ ჩქარობდა სამეგრელოსა და აფხაზეთის სამთავროების საბოლოო ინკორპორაციას, რადგანაც მათი მთავრები მას თავისი პოლიტიკური ზრახვების გამტარებლად მიაჩნდა. „ამ მთავრის უფლებათაგან რაიმეს შებღალვა, — წერდა ბარონი როზენი 1837 წელს დადიანის შესახებ, — რომელიც გამოირჩევა უქვეშევრდომილესი ერთგულებით ხელმწიფე იმპერატორის ტახტისადმი, მე შეუძლებლად მიმაჩნია, განსაკუთრებით მისი მხრიდან ხელისუფლების ყველა ღონისძიებებისადმი აქტიური ხელისშეწყობის პირობებში...“¹.

1834—1837 წლებში დადიანისა და შარვაშიძის დახმარებით რუსეთის მთავრობამ წებელდის დამორჩილება შეძლო. წებელდას უაღრესად ხელსაყრელი გეოგრაფიული მდებარეობა ეკავა და მისი დამორჩილება ხელისუფლებას საშუალებას აძლევდა ერთგვარი კონტროლი გაეწია აფხაზეთის მთავრის მოქმედებისათვის. წებელდის დაპყრობას აფხაზეთსა და სამეგრელოს შორის მდებარე სამურზაყანოს ტერიტორიის შემოერთებაც მოჰყვა. ცარიზმმა ოსტატურად გამოიყენა სამეგრელოსა და აფხაზეთის მთავრებს შორის სამურზაყანოსთვის ატეხილი დავა და 1840 წ. იქ რუსული მმართველობა დაამყარა. იმავე ხანებში რუსეთის მთავრობამ დადიანს ზღვის სანაპირო ზოლიც ჩამოართვა². ყოველივე ეს აფხაზეთისა და სამეგრელოს მთავრების უფლებების შეზღუდვას ნიშნავდა. მათი ავტონომიური უფლებების საბოლოო გაუქმებას კი ცარიზმი მომავლისათვის სდებდა.

ყირიმის ომის შემდეგ, როცა მეფის ხელისუფლებამ მტკიცედ დაისაზა მიზნად საქართველო-ამიერკავკასიის კოლონიურ-ეკონომიური ათვისება და მისი მმართველობის უნიფიკაცია, ცალკეული პოლიტიკური ერთეულების არსებობა ცარიზმის მიერ დასახული კურსის გატარებისათვის ხელის შემშლელ ფაქტს წარმოადგენდა, მით უმეტეს რომ ამ სამთავროებისათვის რუსეთის ხელისუფლების მიერ დაკისრებული მისია ამოწურული იყო და ქვეყნის გაერთიანებისათვის ეკონომიური საფუძვლებიც მომზადებული ჩანდა.

¹ AKAK, XII, გვ. 185,

² მ. დ უ მ ბ ა ძ ე, დასავლეთ საქართველო XIX ს. პირველ ნახევარში. თბ. 1957, გვ. 267—269.

ომის დროს სამეგრელოს მთავარმა ეკატერინე დადიანმა რუსეთის მთავრობას გარკვეული სამსახური გაუწია. მან არამცთუ არ უღალატა სამეგრელოს მთავრების ტრადიციულ ერთგულებას რუსეთისადმი და თურქი დამპყრობლებისა და უცხოელი ინტერვენტების მიერ არაერთხელ შემოთავაზებულ წინადადებას — გადასულიყო მათ მხარეზე — უარით უპასუხა, არამედ პირადადაც კი მიიღო მონაწილეობა ომერ-ფაშას სამეგრელოდან გასადევნად წარმოებულ პარტიზანულ ბრძოლებში. მაგრამ ისეთ ვითარებაში, როცა სამთავროების არსებობა აბრკოლებდა მეფის რუსეთის პოლიტიკურ-ეკონომიური მიზნების განხორციელებას, მის ერთგულებას არავითარი მნიშვნელობა არ ჰქონდა და ხელისუფლება მხოლოდ ხელსაყრელ მომენტს ელოდებოდა, როცა შესაძლებელი იქნებოდა ყოველგვარი კონფლიქტების გარეშე ამ საქმის მშვიდობიანი გზით მოგვარება.

ასეთ ხელსაყრელ მომენტად რუსეთის მთავრობამ 1857 წლის სამეგრელოს გლეხთა აჯანყება მიიჩნია.

ომერ-ფაშას შემოსევით აოხრებული სამეგრელოს აღდგენა-მოშენება ომით გაჩანაგებულ გლეხობას მძიმე ტვირთად დააწვა; მათ ველარ შეძლეს მთავრისა და ფეოდალების გაზრდილ მოთხოვნილებათა დაკმაყოფილება და 1857 წლის გაზაფხულზე სამეგრელოში გლეხთა აჯანყებამ იფეთქა. ეკატერინე დადიანმა საშველად რუსეთის ხელისუფლებას მიმართა. იგი ქუთაისის სამხედრო გუბერნატორს კოლუბიაკინს სთხოვდა რუსის ჯარი გამოეგზავნა; კოლუბიაკინი დაუყოვნებლივ პირადად წარუძღვა ჯარს სამეგრელოში. ეკატერინე ახალი დაბრუნებული იყო რუსეთიდან, სადაც იგი ხელმწიფის კარზე ალექსანდრე II-ის მეფედ კურთხევის ცერემონიაზე იყო მიწვეული. იგი პეტერბურგში განსაკუთრებული პატივით მიიღეს, როგორც ეს სამეფო პიროვნებას შეჰფეროდა. იმპერატორმა განვლილი ომის დროს ერთგულებისა და დამსახურებისათვის წმ. გიორგის მედალითაც კი დააჯილდოვა. მის ვაჟიშვილს, მცირეწლოვან ნიკოს, ფლიგელ-ადიუტანტობა, ხოლო ქალიშვილს, სალომეს ფრეილინობა უბოძა. ეკატერინე დარწმუნებული იყო, რომ რუსეთის ხელისუფლება მას აჯანყებულ სამთავროს დამორჩილებაში დაეხმარებოდა და სრულიად ვერ ითვალისწინებდა იმ საფრთხეს, რაც მის საშინაო საქმეებში რუსეთის სამხედრო ძალის ჩარევას შეიძლებოდა მოჰყოლოდა.

რუსი გენერლები აჯანყების ჩასაქრობად გადამწყვეტი ზომების მიღებას აჭიანურებდნენ. ქუთაისის გენერალ-გუბერნატორი გაგარინი ეკატერინესთან საუბარში იმასაც კი აცხადებდა, რომ რუსეთის ხელისუფლებას ბატონყმობის გაუქმება მტკიცედ აქვს გადაწყვეტილი და ეს ეხლავე მოხდება, თუ ცოტა ხნის მერე ამას უკვე პრინციპული მნიშვნელობა ალარ

ენიჭებაო¹. ასეთი საუბრით და აჯანყებულ გლეხობასთან გარკვეული კონტაქტის დამყარებით რუსი გენერლები აჯანყების უსისხლო ფორმებში გაბანგრძლივებას განზრახ უწყობდნენ ხელს, ვიდრე მმართველობის უვარგისობის საბაბით ავტონომიის გაუქმების საჭიროებას სააშკარაოზე არ გამოიტანდნენ.

კოლუბიაკინმა ქუთაისიდან ჩამოყვანილ მოხელეებს რ. ერისთავსა და მიქელაძეს დაავალა განეხილათ რამდენად სამართლიანი იყო გლეხთა საჩივრები მებატონეების თავგასულობის შესახებ.

გაგარინი და კოლუბიაკინი აცხადებდნენ, რომ აჯანყება სამეგრელოს სამთავროში გამეფებული „უწესრიგობის“ შედეგიაო და საჭიროდ სცნობდნენ „ახალი წესების შემოღებას“.

რუსეთის მთავრობა შეეცადა ეკატერინე დადიანისათვის ნებაყოფლობით ეთქმევინებინა უარი სამთავრო-სამემკვიდრეო უფლებებზე. ამ მიზნით სამეგრელოში მიავლინეს რუსი მოხელე ფლიგელ-ადიუტანტი ჩერტკოვი. მაგრამ მისმა მისიამ მარცხი განიცადა. ჩერტკოვი ურჩევდა ეკატერინეს მიეწერა იმპერატორისათვის, რომ მას აღარ ძალუძს სამეგრელოს მართვა-გამგეობა და მიეღო იგი თავისი მფარველობის ქვეშ. ეკატერინემ უარით უპასუხა. მაშინ რუსმა მოხელემ დაუფარავად განუცხადა, რომ შეფისნაცვალს გადაწყვეტილი აქვს სამეგრელოში რეფორმის გატარება, რომლის საფუძველზედაც სამეგრელოს მმართველად გენერალი დაინიშნებოდა, მაზრების უფროსებად კი — ოფიცრები. გარდა ამისა, ჩერტკოვმა მისი დაშინებაც კი სცადა. იგი ემუქრებოდა ეკატერინეს, რომ სამეგრელოში გამეფებული უკანონობის გამორკვევა კარგს არაფერს მოუტანდა მას². მაგრამ ყოველივე ამას იყო. ეკატერინე მტკიცედ იდგა თავის გადაწყვეტილებაზე — შეენარჩუნებინა სამთავრო ტახტი შვილისათვის.

აჯანყების ჩაქრობის საბაბით გაგარინმა სამეგრელოს მაზრებში რუსი ოფიცრები განაწესა, რომელთაც დავალებული ჰქონდათ მშვიდობიანობის აღდგენაზე ეზრუნათ. ამ ოფიცრებს მდივანბეგებისაგან სრულიად დამოუკიდებლად უნდა ემოქმედათ, რათა, როგორც გაგარინი ხსნიდა, „ეს ოფიცრები მეგრელ მოხელეებს არ გამოეყენებიათ ხალხზე შურისძიებისა და მიკერძოების იარაღად“³. ყოველივე ეს კი სხვას არაფერს ნიშნავდა, თუ არა რუსული მმართველობის თანდათანობით დანერგვას.

ამავე დროს გაგარინი მეფისნაცვლისაგან გადამჭრელი ღონისძიებების გატარებას მოითხოვდა. მისი აზრით, სამეგრელოს დასამშვიდებლად აუცილებელი იყო მმართველობის ძირფესვიანი გარდაქმნა. შეესაბამებოდა თუ არა ეს გარდაქმნა სათხოვარ პუნქტებს, ეს მას მეორეხარისხოვან

¹ AKAK, XII, გვ. 266—267.

² იქვე.

³ იქვე, გვ. 278.

საკითხად მიაჩნდა, რადგანაც, სწერდა იგი, ყოველ დროს თავისი აუცილებელი მოთხოვნილებანი გააჩნია, რომელთა წინაშე ხელშეკრულებანი და დაპირებანი ძალას კარგავენ, სამეგრელოსათვის კი, მე მგონი, ეს დრო უკვე დადგა¹.

მეფისნაცვალმა, ვითომ ეკატერინეს დასამშვიდებლად, რომელიც ადგილობრივი რუსი მოხელეების მოქმედებას ეჭვის თვალთ უყურებდა, სამეგრელოში მიავლინა რუსი მოხელე დიუკრუასი. ბარიატინსკი ეკატერინეს სწერდა, რომ დიუკრუასს, როგორც გარეშე პირს, ყველაზე უკეთ შეუძლია მიუკერძოებლად გამოავლინოს აჯანყების მიზეზებიო². სინამდვილეში კი დიუკრუასს აჯანყების მიზეზების დეტალურად გამოძიება-გარკვევასთან ერთად საიდუმლოდ დავალებული ჰქონდა სამეგრელოს ახალი — „დროის შესაბამისი“ მმართველობის პროექტის შედგენა³.

დიუკრუასთან საჩივრების აღძვრის უფლება სამეგრელოს მთავრის მოქმედებით უკმაყოფილო თავადაზნაურობასაც ეძლეოდა. ამგვარად ცდილობდა რუსეთის ხელისუფლება სამეგრელოს მთავრის იზოლირებას. მთავრის მოწინააღმდეგე თავადაზნაურთა პარტია სასწრაფოდ ამოქმედდა. როგორც ეკატერინე დადიანის წერილიდან ირკვევა, ჯერ კიდევ დავითის. ხოლო შემდეგ ეკატერინეს უკმაყოფილო სამთავრო სახლის წევრები გიორგი და პეტრე დადიანები სამეგრელოს მთიან მოსახლეობას დიუკრუასისა და მთავრობის სახელით აჯანყებისაკენ მოუწოდებდნენ. ისინი მათ ჩააგონებდნენ არ დაწყნარებულეყვნენ, ვიდრე შეშინებულ ეკატერინეს არ აიძულებდნენ სამეგრელოდან წასულიყო⁴. თავის მხრივ დიუკრუასიც შეეცადა დაერწმუნებინა ეკატერინე ნებაყოფლობით წასულიყო სამთავროდან. მან აგრძნობინა მთავარს, რომ რუსული მმართველობის შემოღებამდე აჯანყების ჩაქრობაზე სერიოზულად არავინ იზრუნებდა. იგი ჩამოთვლიდა რა იმ უკანონობებს, რასაც ადგილი ჰქონდა სამეგრელოში, დასძენდა, რომ „რუსეთის სახელმწიფოს ძლევამოსილების გამოყენება არ შეიძლება ისეთი ხელისუფლების დასახმარებლად, რომელიც თავის ქვეშევრდომებს ჩაგრავეს რუსეთის გაუგებრად და მისი თანხმობის გარეშე“⁵ და რომ სამეგრელოს დამშვიდება და აქ წესრიგის დამყარება შესაძლებელი იქნებოდა მხოლოდ ეკატერინეს აქედან წასვლის შემთხვევაში.

დიუკრუასის სამეგრელოში გაგზავნის პარალელურად ბარიატინსკი იმპერატორს აცნობებდა, რომ სამეგრელოს აჯანყების მიზეზი მხოლოდ

¹ AKAK, XII, გვ. 269.

² იქვე, გვ. 275.

³ იქვე, გვ. 274.

⁴ იქვე, გვ. 296.

⁵ იქვე, გვ. 291—292.

და მხოლოდ ადგილობრივი მმართველობის უვარგისობა არის და სთხოვ-
და მისთვის ნება დაერთოთ გარემოების შესაფერისად ემოქმედა, ანგარი-
ში აღარ გაეწია მფარველობითი პუნქტებისათვის, რომლის საფუძველზე-
დაც არსებობდა სამეგრელოს ავტონომია¹.

მალე შეფინსაცვალმა იმპერატორისაგან ასეთი მოქმედების ნებართვა
მიიღო² და სასწრაფოდ შეუდგა სამეგრელოს მმართველობის რეორგანი-
ზაციას. იგი 1857 წ. 31 ივლისს სწერდა დიუკრუასს, რომ შეეწყვიტა
აჭახყების მიზეზების გამოძიება და უშუალოდ შესდგომოდა სამეგრელოს
ახალი მმართველობის დებულების შემუშავებას³.

რუსეთის ხელისუფლებამ, რაკი ვერ მოახერხა ეკატერინეს სამეგრე-
ლოდან ნებაყოფლობით გაყვანა, მას სამთავროს სამემკვიდრეო უფლე-
ბების შენარჩუნების გარანტია მისცა. სამეგრელოში შემოღებული ახა-
ლი მმართველობა დროებით, მემკვიდრის სრულწლოვანებამდე ცხადდე-
ბოდა; ხოლო ეკატერინეს და მის შვილებს იმპერატორი პეტერბურგში
საცხოვრებლად იწვევდა, რათა შესაფერისი აღზრდა მიეცათ „მომავალი
მთავრისათვის“⁴.

1857 წლის 26 სექტემბრის რესკრიპტით სამეგრელოს „დროებით“
მმართველად გენ. კოლუბიაკინი დანიშნა⁵. ფაქტიურად ეს იყო სამეგრე-
ლოს ავტონომიის გაუქმება. რუსეთის ხელისუფლებას იმთავითვე გათვა-
ლისწინებული ჰქონდა და ყოველგვარ პირობებსაც ქმნიდა ამისათვის,
რომ მემკვიდრე ნიკო დადიანს სრულწლოვანების შემდეგ სამთავრო უფ-
ლებებზე ხელი აეღო. მართლაც, 1867 წელს 20 წლის ნიკოლოზ დადიანმა
სამთავრო უფლებებზე უარი განაცხადა და სამეგრელოში რუსული მმარ-
თველობა სამუდამოდ დამყარდა.

სამეგრელოს სამთავროს საშინაო მმართველობის ავტონომიის ლიკვი-
დაციის პარალელურად რუსეთის ხელისუფლება გარკვეულ ზომებს
იღებდა სვანეთის სამთავროს გასაუქმებლადაც.

50-იან წლებში სვანეთში შინაფეოდალური ბრძოლა იყო გაჩაღებული.
დადემქელიანების ორი შტო სვანეთში განუყოფელი ბატონობისათვის
ერთმანეთს ებრძოდა, ხოლო რუსეთის მთავრობა ამ შუღლის თავისი მიზ-
ნებისათვის გამოყენებას ცდილობდა⁶.

50-იანი წლების ბოლოს დადემქელიანების უფროსი შტოს წარმო-
მადგენელი კონსტანტინე განსაკუთრებით გაძლიერდა. მისმა ძმებმა ის-

¹ АКАК, XII, გვ. 276—277.

² იქვე, გვ. 281.

³ იქვე, გვ. 298—299.

⁴ იქვე, გვ. 316.

⁵ იქვე, გვ. 308.

⁶ შ. დ უ მ ბ ა ძ ე. აღმოსავლეთ კახეთის ისტორიიდან, გვ. 405.

ლამმა და თენგიზმა მოჰკლეს დადემშქელიანების მეორე სახლის მემკვიდრე ჯანსული. კონსტანტინემ ჯანსულის მამული შემოიერთა და უბატონო სვანეთის თემების დამორჩილებასაც მიჰყო ხელი. თავისუფალი სვანეთის თემებს კი 1853 წლიდან რუსეთის ქვეშევრდომობა ჰქონდათ მიღებული და აქ საბოჭაულო იყო დაწესებული. რა თქმა უნდა, კონსტანტინეს ასეთ მოქმედებას რუსეთი სახიფათო მოვლენად მიიჩნევდა.

სვანეთს ცენტრალური მდებარეობა ეკავა ყაბარდოს, ყარაჩაის, წებელდასა და სამურზაყანოს შორის და აქ რუსეთის გავლენის გაძლიერებას მთელ დასავლეთ კავკასიაში მისი ბატონობის განმტკიცებისათვის განსაკუთრებული მნიშვნელობა ჰქონდა. სვანეთი თავისი მიუვალობის გამო ყოველთვის შეიძლებოდა გამხდარიყო ცარიზმით უკმაყოფილო ელემენტების თავშესაფარიც. ამიტომ სვანეთის რომელიმე მთავრის გაძლიერება-დამოუყიდებლობისადმი სწრაფვას რუსეთი ადვილად ვერ შეურიგებოდა.

დადემშქელიანების მეორე შტოს უფლებების აღდგენის საბაბით 1857 წლის ივლისისათვის გათვალისწინებული იყო სვანეთში ოთხი მხრიდან (სამეგრელოდან, წებელდიდან, კისლოვოდსკიდან და ნალჩიკიდან) რუსის ჯარის შეყვანა. სამეგრელოში შეკრებილი რაზმების სარდლობა და დადემშქელიანებთან მოლაპარაკების წარმოება დაევალა გაგარინის შტაბის უფროსს, პოლკოვნიკ უსლარს. ეს სამხედრო ექსპედიცია თავისუფალი სვანეთის შესახებ ცნობების შეგროვებასა და მათ დაშინებასაც ისახავდა მიზნად¹.

კონსტანტინემ რუსებთან ბრძოლა მიზანშეწონილად არ მიიჩნია და გადაწყვიტა მთავრობასთან შერიგება. იგი ზემო სვანეთში დაბანაკებულ უსლართან გამოცხადდა და ყოველგვარი წინააღმდეგობის გაწევის გარეშე ჩაჰბარდა მას. კონსტანტინე და მისი ძმა ალექსანდრე თბილისში გაისტუმრეს.

კონსტანტინეს იმის გამო, რომ მას უშუალო მონაწილეობა არ მიუღია ჯანსულის მკვლელობაში, დანაშაული აპატიეს; მის უმცროს ძმებს თენგიზსა და ისლამს კი რუსეთის შორეულ გუბერნიაში გადასახლება გადაუწყვიტეს.

ბარიატინსკიმ ორივე შტოს მისწრაფება—ხელში ჩაეგდოთ. ერთმანეთის მამული — უკანონოდ მიიჩნია და გადაწყვიტა ორივესთვის აღედგინა უფლება მათ მამულებზე. სვანეთის მფლობელთა შორის დავის აღსაკვეთად პოლკოვნიკ უსლარს დადემშქელიანთა ორივე სახლის მამულების სიების შედგენა და საზღვრების დაზუსტება დაავალეს².

მართალია, ოფიციალურად გადაწყვიტეს კონსტანტინესათვის მამუ-

¹ ა. ჩარკვიანი, სვანეთი, თბ., 1967.

² იქვე.

ლის დაბრუნება, მაგრამ ხელისუფლება მაინც არ ენდობოდა მას და მისი ძმების თენგიზისა და ისლამის გამოცხადებამდე ქუთაისიდან არ უშვებდნენ. კონსტანტინეს „მზრუნველად“ დაუნიშნეს მოხელე ბარტოლომეი, რომელიც ყოველ ნაბიჯზე აბუჩად იგდებდა და თავისი გაურკვეველი მდგომარეობით ისედაც განერვიულებულ კონსტანტინეს სიცოცხლეს უმწარებდა. ამასობაში სვანეთიდან დაბრუნდა პოლკოვნიკი უსლარი. მან აუარებელი მასალა ჩამოიტანა და მეფისნაცვალს წარუდგინა მოხსენებითი ბარათი, რომელშიც ამტკიცებდა, რომ კონსტანტინეს კვლავ სვანეთში გაგზავნა ყოველად დაუშვებელი იქნებოდა, რადგანაც ეს უკანასკნელი არავითარ შემთხვევაში არ აიღებდა ხელს თავის მისწრაფებაზე დაჰპატრონებოდა თავისუფალი სვანეთის თემებს. ბარიატინსკიმ, დროებით, ვიდრე იმპერატორი განიხილავდა საქმეებს, კონსტანტინეს ერევანში გადასახლება გადაუწყვიტა.

1857 წლის 24 ოქტომბერს კონსტანტინე დადემქელიანს ქუთაისის გენერალ-გუბერნატორმა გაგარინმა გამოუცხადა ეს განაჩენი. იგი შეეხვეწა რამდენიმე თვით სვანეთში წასვლის ნება მიეცათ მისთვის, რათა მოეგვარებინა საშინაო საქმეები, გამოთხოვებოდა ცოლ-შვილს, რის შემდეგაც ის დაემორჩილებოდა მეფისნაცვლის განკარგულებას. გაგარინმა ხვეწნას არავითარი ანგარიში არ გაუწია, მათ შელაპარაკებაც კი მოუვიდათ და გენერალ-გუბერნატორმა ბრძანა განეიარაღებინათ მთავარი. ეს კი კონსტანტინემ ველარ მოითმინა, ამოღებული სატყვერით ეძგერა გაგარინს, სასიკვდილოდ დაჭრა იგი, მოკლა იქვე მყოფი მოხელეები ილინი და არდიშვილი, რომლებიც მიშველებას ლამობდნენ, დაჭრა გაგარინის მცველი და გაიქცა¹.

კონსტანტინე მალე შეიპყრეს და დახვრეტა მიუსაჯეს. დახვრეტის შემდეგ მისი მამულები ხაზინას გადასცეს, ოჯახის წევრებს კი ფულადი საზღაური მისცეს და სვანეთიდან გადასახლეს. 1859 წელს სამთავრო უფლებებზე უარი ათქმევინეს მეორე სახლის წარმომადგენელს თენგიზ დადემქელიანსაც და სადადემქელიანო სვანეთში საბოქაულო დაწესდა.

სამეგრელოსა და სვანეთის ავტონომიის ლიკვიდაციის შემდეგ აფხაზეთის სამთავროს ჯერი დგებოდა. ჯერ კიდევ 1856 წელს მურავიოვმა დასვა საკითხი აფხაზეთის სამთავროს გაუქმების შესახებ. იგი მთავარს მიხეილ შარვაშიძეს — ყირიმის ომის დროს — „ლალატს“ სწამებდა.

რუსეთ-თურქეთის ომის დასაწყისში მიხეილ შარვაშიძემ დიდი სამსახური გაუწია რუსეთის მთავრობას. მან უდანაკარგოდ გამოიყვანა აფხაზეთიდან რუსული გარნიზონები. რუსის ჯართან ერთად მან თავისი ოჯახიც გახიზნა სამეგრელოში, მაგრამ ომის შემდგომი მსვლელობა — შავ ზღვაზე

¹ კ. ბ. ო. ზ. დ. ნ. ი., სამეგრელო და სვანეთი, 1934, გვ. 222.

შოკავშირეთა ფლოტის გაბატონება, აფხაზეთში ოსმალთა ჯარის გადასხმა და სხვ.—მას აიძულებდა თავის სამთავრო სახლის ინტერესებისათვის ეზრუნა და 1855 წელს მიხეილ შარვაშიძე აფხაზეთში დაბრუნდა. მართალია, მან საჯაროდ უარყო და ფეხქვეშ გათელა სულთანის ფირმანი, რომლითაც მას აზიასა და კავკასიაში მყოფი ოსმალეთის ჯარის მთავარსარდლობას სთავაზობდნენ და შავი ზღვის მთელი სანაპიროს მფლობელად აღიარებდნენ¹, მაგრამ შემდგომ მის პოზიციებს ორჭოფობა ეტყობოდა. შარვაშიძე უფრო გარკვეული სამხედრო სიტუაციის მოლოდინში მერყეობდა და იმ შემთხვევაში, თუკი რუსეთი აფხაზეთს სულთანს დაუთმობდა, ისიც ოსმალეთს დაემორჩილებოდა². როცა ამიერკავკასიის ფრონტზე თურქეთის დამარცხება აშკარა გახდა, მიხეილმაც აქტიურად დაიწყო რუსეთის მთავარსარდლობასთან თანამშრომლობა. რა თქმა უნდა, შარვაშიძის მერყეობა სულ აღვილად შეიძლებოდა მონათლულიყო ლალატად და სამთავროს გაუქმების საბაბი გამხდარიყო, მაგრამ აფხაზეთის სამთავროს არსებობა რუსეთის ხელისუფლების ჩრდილოეთ კავკასიის მთიანეთის საბოლოოდ დამორჩილებამდე აუცილებლად მიაჩნდა და მურავიოვის შუამდგომლობა აფხაზეთის სამთავროს გაუქმების შესახებ ამჯერად უარყოფილ იქნა.

რუსეთის მიერ ჩრდილოეთ კავკასიის დასამორჩილებლად წარმოებულ ომის დროს აფხაზეთს განსაკუთრებული მნიშვნელობა ენიჭებოდა. იგი ესაზღვრებოდა ურჩ ჩერქეზეთის მიწა-წყალს; ეს იყო ერთადერთი გზა, საიდანაც დასავლეთ კავკასიის მთიელ ტომებს შეეძლოთ საქართველოში შემოჭრა და პირუკუ—ჩერქეზეთში რუსული გავლენის გაძლიერება აფხაზეთის საშუალებით უნდა მომხდარიყო. აფხაზეთის დაკარგვის შემთხვევაში სამხედრო საზღვარი მდინარე ენგურზე გადმოინაცვლებდა და საჭირო გახდებოდა ამ მდინარის მთელ სიგრძეზე სამხედრო-საკორდონო ხაზის აგება, რაც რიგ სიძნელეებთან იქნებოდა დაკავშირებული.

მიხეილ შარვაშიძე დიდი გავლენით სარგებლობდა ცარიზმის წინააღმდეგ მებრძოლ დასავლეთ კავკასიის მთიელ ტომებს — უბიხებს, ჩიქებს, პსხუელებსა და ახჩიპსხუელებს — შორის. იგი უბიხთა ტომის ბელადის პაჭი-დაგუმოყვა ბარზეგის გაზრდილი იყო. კარგად იცოდა ამ ტომების ზნე-ჩვეულებები, მათთან ურთიერთობის დამყარებას. აღვილად ახერხებდა და ამ ტომების დამორჩილებისათვის ბრძოლაში მნიშვნელოვანი დახმარების გაწევა შეეძლო. ასეთ პირობებში რუსეთის ხელისუფლება განსაკუთრებულ სიფხიზლეს იჩენდა მთავრის მიმართ და მასთან კეთილმოყვრული ურთიერთობის შენარჩუნებას ლამობდა. მეფისნაცვალ მიხეილ

¹ ს. ჯ ა ნ ა შ ი ა, გიორგი შარვაშიძე, სოხუმი, 1946, გვ. 11.

² მ. დ უ მ ბ ა ძ ე, დასავლეთ საქართველო XIX ს-ის პირველ ნახევარში, გვ. 307.

რომანოვს იმ დროისათვის აფხაზეთის სამთავროს არსებობა გამართლებულად მიაჩნდა. 1864 წელს იგი წერდა, რომ როცა რუსეთის ხელისუფლება შავ და კასპიის ზღვამდე გაჭიმულ მთელ ტერიტორიაზე შეუპოვარ ბრძოლას აწარმოებდა მთიელების დასამორჩილებლად, მას აფხაზეთის შემოერთება-მართვისათვის საჭირო ძალების გამოყოფა არ შეეძლო და იქ წესრიგის დამყარებისა და აფხაზეთში თავისი გავლენის შენარჩუნების მიზნით მთავრისათვის მხარდაჭერით კმაყოფილდებოდა¹.

1859 წლის 25 აგვისტოს აიღეს შამილის უკანასკნელი ციხე-სიმაგრე ღუნიბი და ამით დასრულდა ჩრდილოეთ კავკასიის დასაპყრობად წარმოებული მრავალწლიანი ომის კიდევ ერთი ეტაპი. ამის შემდეგ რუსეთს საშუალება მიეცა უფრო მეტი ძალებისათვის მოეყარა თავი დასავლეთ კავკასიის მთიანეთის დასამორჩილებლად.

1863 წ. რუსებმა დაიმორჩილეს ყუბანის მხარე, 1864 წლის მარტში დაიმორჩილეს უბიხები, ხოლო იმავე წლის 21 მაისს ახჩიპსხუს ცენტრში, სოფელ კბადაში მეფის რუსეთის ჯარებმა ზეიმით აღნიშნეს კავკასიის დამორჩილებისათვის წარმოებული თითქმის საუკუნოვანი ომის დასასრული².

კავკასიის ომის დამთავრების შემდეგ აფხაზეთის სამთავროს ავტონომია უკვე განწირული იყო. 1864 წლის მარტში მეფისნაცვალმა იმპერატორ ალექსანდრე II-ს სწერდა, რომ ადრე მიხეილ შარვაშიძის მიერ აფხაზეთის მართვა რუსეთისათვის სასარგებლო იყო, დამოუკიდებელი აფხაზეთის არსებობას აზრი ჰქონდა, ვიდრე შავი ზღვის აღმოსავლეთ სანაპიროს შემოუერთებდით რუსეთს, მით უმეტეს, რომ ჩვენი შეიარაღებული ძალების უდიდესი ნაწილი დაკავებული იყო აღმოსავლეთ ამიერკავკასიაში, მაგრამ ეხლა მდგომარეობა ძირფესვიანად შეიცვალა³ და იგი აფხაზეთის ავტონომიის გაუქმებას თხოულობდა.

მეფისნაცვალმა აფხაზეთის მთავრის უფლებების ლიკვიდაციას განსაკუთრებით იმიტომაც ჩქარობდა, რომ სისრულეში მოეყვანა უმაღლესი მთავრობის მიერ მოწონებული განზრახვა შავი ზღვის აღმოსავლეთ სანაპიროს მდინარე ყუბანის შესართავთან ბზიფამდე, ყაზახ-რუსებით დასახლების შესახებ. აფხაზეთის სამთავროს გაუქმების შემდეგ კი იგი ყაზახთა ასეთი სტანიციების მოწყობას ვარაუდობდა მდინარე ბზიფსა და ენგურს შორისაც.

1864 წლის 1 აპრილს კავკასიის მეფისნაცვალს სამხედრო მინისტრი აცნობებდა იმპერატორის გადაწყვეტილებას მიხეილის სამთავრო ხელი-

¹ Очерки истории Абхазской АССР, I, Сухуми, 1960, გვ. 198.

² შ. დ. უმბაძე, დასავლეთ საქართველო XIX ს-ის პირველ ნახევარში, გვ. 409.

³ Очерки истории Абхазской АССР, I, გვ. 199.

სუფლების გაუქმებისა და აფხაზეთში რუსული ადმინისტრაციის შემოღების შესახებ.

რუსეთის მთავრობას აფხაზეთის სამთავროს გაუქმება მშვიდობიან ფორმებში უნდოდა ჩაეტარებინა და მიხეილ შარვაშიძეს, ისევე როგორც თავის დროზე ეკატერინე დადიანს, შესთავაზეს ნებაყოფლობით ეთქვა უარი მთავრის ხელისუფლებაზე. მიხეილი ხედავდა, რომ მისი ხელისუფლება განწირული იყო, ურჩობით მას არაფერი გაუვიდოდა და მთავრობის წინადადებაზე იმ პირობით თანხმდებოდა, თუკი მას აფხაზეთიდან არ გადაასახლებდნენ და აქ მუდმივად ცხოვრების ნებას დართავდნენ. 1864 წლის ივნისში აფხაზეთის სამთავროს გაუქმება და აქ „დროებითი სახალხო მმართველობის“ შემოღება იყო გამოცხადებული.

ივლისში ქუთაისის გენერალ-გუბერნატორი სვიატოპოლკ-მირსკი აფხაზეთში რუსული მმართველობის შემოღებისათვის საჭირო ღონისძიებების ჩასატარებლად სოხუმში ჩავიდა. მისთვის სრულიად მოულოდნელად მიხეილ შარვაშიძემ არამც თუ არავითარი დაბრკოლება არ შეუქმნა, არამედ პირადად გამოუცხადა აფხაზებს რუსული მმართველობის დამყარება და ყოველგვარი ამბოხება-არეულობის გარეშე მოახერხა ამ მეტად საჭოჭმანო აქტის ჩატარება. მიუხედავად ამისა, მეფის ხელისუფლება მიხეილის აფხაზეთში დატოვებას საშიშრად თვლიდა და რადგანაც იგი ნებაყოფლობით არ თანხმდებოდა აქედან წასვლაზე, მას „სახელმწიფო ღალატი“ (თურქეთთან ურთიერთობა) დასწამეს და 1864 წ. ნოემბერში ავადმყოფი მთავარი ჯერ სტავროპოლსა, ხოლო შემდეგ ვორონეჟში გადაასახლეს, სადაც გარდაიცვალა 1865 წელს.

სამთავროების გაუქმებას, მიუხედავად იმისა, რომ იქ რუსული მმართველობა ინერგებოდა, მაინც ქვეყნის შემდგომი სოციალ-ეკონომიური განვითარების თვალსაზრისით პროგრესული მნიშვნელობა ჰქონდა¹. 50-იან წლებში სასაქონლო-ფულადი ურთიერთობის შემდგომ განვითარებას უკვე აბრკოლებდა ცალკეული სამთავროების არსებობა. მათი გაუქმების შემდეგ კი საბოლოოდ ისპობოდა. ფეოდალური დაქუცმაცებულობა და საქართველოს ცალკეულ მხარეთა შორის მჭიდრო კავშირი მყარდებოდა.

სამთავროების გაუქმება და ბურჟუაზიული რეფორმების (საგლეხო რეფორმა) გატარების დასაწყისი ერთმანეთს დაემთხვა; ეს კი იმის მაჩვენებელი იყო, რომ ქვეყანა კაპიტალისტური ურთიერთობის ახალ სტადიაში გადადიოდა.

j

¹ საქართველოს ისტორია, დამხმარე სახელმძღვანელო, ტ. I, 1958, გვ. 445.

**§ 1. კლასობრივი ბრძოლის გამწვავება რეფორმის წინააღმდეგ
ხანის საქართველოში**

საგლეხო რეფორმის წინა ათწლიანი პერიოდი, ე. ი. 1854 — 1864 წლები, აღინიშნა სოფლის მშრომელი მოსახლეობის სოციალ-ეკონომიკური მდგომარეობის შემდგომი გაუარესებით და კლასობრივი ბრძოლის ჩვეულებრივზე მეტად გამწვავებით. ეს გამწვავული იყო მთელი რიგი მიზეზებით, რომელთა შორის მთავარია ფულად-სასაქონლო ურთიერთობათა განვითარების შედარებით უფრო სწრაფი ტემპი (რაც, როგორც ზემოთაღნიშნულთაგან, აღვნიშნეთ, აძლიერებდა უშუალო მწარმოებლის ექსპლოატაციას), კარზე მომდგარი საგლეხო რეფორმა და ყირიმის ომი მისი მძიმე შედეგებით.

ჩვენ ხელთ არსებული საბუთები ადასტურებენ, რომ ქართველმა ფეოდალებმა, რომლებიც, როგორც მოსალოდნელიც იყო, მტრულად შეხვდნენ გადაწყვეტილებას ბატონყმობის გაუქმების შესახებ, მაქსიმალურად გამოიყენეს რეფორმამდე დარჩენილი დრო და საგრძნობლად გააღვიძეს საგლეხო გადასახადები. «Помещики, — წერდა მეფისნაცვალის მიხეილ ნიკოლოზის ძე, — предвидя приближение срока разрешения крестьянского вопроса, хотят воспользоваться последним временем, чтобы присвоить себе от крестьян как можно более и, так сказать, выжать из них последний сок»¹. მაგრამ გაბატონებული კლასის წარმომადგენელთა ყოველი ასეთი ცდა უშუალო მწარმოებელთა ძლიერ პროტესტს აწყდებოდა. გლეხები, გათამამებულნი მოახლოებული რეფორმით, უარს ამბობდნენ არა მარტო „უკანონო“, არამედ კანონით გათვალისწინებულ გადასახადებზედაც. ტიტულარული სო-

¹ ЦГИАМ, ф. 678, оп. I, л. 27; И.Г. Ант е л а в а, Государственные крестьяне Грузии в первой половине XIX века, გვ. 471.

ვეტნიკი ზადოლინი, მაგალითად, პირდაპირ მიუთითებდა, რომ გლეხები „ახალი მდგომარეობის მოლოდინში... ყოველგვარ საშუალებას ხმარობენ იმისათვის, რათა თავი აარიდონ მემამულის სასარგებლოდ გადასახადების გადახდას“¹. ლეჩხუმელი ყმები კი, რომელთა საჩივარი მემატონეთა თავგასულობაზე უპასუხოდ დატოვა ხელისუფლებამ, ნიშნის მოგებით სწერდნენ ამ უკანასკნელს, რომ «Эти невнимательности начальства несообразны с духом времени»².

„ახალი მდგომარეობის მოლოდინში“ კლასობრივი ბრძოლის გამწვავების ფაქტს ხაზგასმით აღნიშნავდა ნ. ნიკოლაძეც 1865 წელს „კოლოკოლის“ ფურცლებზე დაბეჭდილ სტატიაში. „რეფორმის შესახებ გავრცელებულმა ხმათა, — წერდა იგი, — ცეცხლს ნავთი დაასხა და გლეხთა მოძრაობა უკიდურესად გაძლიერდა“.

გლეხთა ეკონომიური მდგომარეობის გამაუარესებელ ფაქტორს, როგორც უკვე ვთქვით, ყირიმის ომიც წარმოადგენდა. კ. ბოროზდინის მოწმობით, ომით დაზარალებული ყველა მემატონე იმას ცდილობდა, რომ დანაკლისი „გლეხების ოფლით აენაზლაურებინა“³. მემამულეთა შეტევით შეწუხებული მეგრელი გლეხები ეკატერინე დადიანს სწერდნენ, რომ ისინი მემატონეთა და სამთავრო ხელისუფლების თავგასულობა-გაუკითხაობის შედეგად შიმშილით დახოცვის აშკარა საშიშროების წინაშე იმყოფებიან⁴. ასევე სწერდნენ ქუთაისის მაზრის სოფ. ივანდიდის გლეხები ბარიატინსკის 1857 წელს. თუ ყურადღება არ მოგვაქციეთ, ჩვენი სიკვდილი და სიღუბნეში დაღუპვა გარდაუვალიაო — არწმუნებდნენ ისინი მეფისნაცვალს⁵.

მწარმოებელი კლასი სხვადასხვა გზით ცდილობდა თავი დაეცვა პრივილეგიურ წოდებათა იერიშისაგან. ბრძოლა-თავდაცვის ყველაზე მასიურ ფორმას საჩივრების შეტანა წარმოადგენდა. მათი რაოდენობა, საერთოდ, და განსახილველ ხანაში, კერძოდ, წლიდან წლამდე იზრდებოდა. ჩვენ ხელთ არსებული არასრული ცნობების თანახმად⁶, ქუთაისის გუბერნიის სოფლის მშრომელ მოსახლეობას, მაგალითად, 1854 წელს

¹ სსცია, ფ. 9, საქ. 2122, ფურც. 17. 1864, 10 აპრილი. შდრ. მ. ახობაძე, საბატონო ყმების მოძრაობა გორის მაზრაში ბატონყმობის გაუქმების წინ, „მოამბე“, 1962, № 1, გვ. 159—160.

² იქვე, ფ. 5, საქ. 29, ფურც. 23, 1864, 4 მაისი.

³ კ. ბოროზდინი, სამეგრელო, თბ. 1934, გვ. 72.

⁴ ზუგდიდის მუზეუმის არქივი (ზმა), ფ. 3, საქ. 4391, ფურც. 9. მომყავს დ. ლემონჯავას წიგნიდან „გლეხთა აჯანყება სამეგრელოში 1856—1857 წწ.“ თბ., 1957, გვ. 48.

⁵ სსცია, ფ. 5, ანაწ. I, საქ. 30, ფურც. 7.

⁶ იქვე, ფ. 4, ანაწ. 8, საქ. 153, საქ. 450, ფურც. 281; საქ. 472, ფურც. 29.

საგუბერნიო სამმართველოში 315 საჩივარი შეუტანია, 1856 წელს — 800, ხოლო 1857 წელს — 980. გუბერნატორის ანგარიშებში დატულია აგრეთვე ცნობა იმ საჩივართა შესახებ, რომლებიც გლეხებს უშუალოდ სამაზრო ხელისუფლებისათვის წარუდგენიათ. მათი რაოდენობა, როგორც დასახელებული წყაროდან ჩანს, მარტო 1857 წელს 2230 უდრიდა¹. «Из всех приносимых жалоб, — წერდა ქუთაისის გენერალ-გუბერნატორი, — было наиболее о насильных завладениях и помещичьими крестьянами на помещиков своих о притеснениях, делаемых ими»².

საჩივრებს გარდა წყაროები ბრძოლის ისეთ ფორმასაც ასახელებენ, როგორცაა, კერძოდ, გადასახადებზე უარის თქმა. ზემოთ დამოწმებული ზადოლინის ცნობით (1864 წ. აპრილი), მაგალითად, თბილისის მაზრის დუშეთის უბნის ზოგ სოფელში გლეხობას საერთოდ შეუწყვეტია როგორც ფულადი, ისე ნატურალური გადასახადების გადახდა³. ასევე მოქცეულან გორელი თავადის გიორგი ერისთავის ყმებიც⁴. წესიერი გადახდებები არც სახელმწიფო გლეხები ყოფილან. ამის საილუსტრაციოდ შეიძლება დავასახელოთ ახალციხის მაზრის ხერთვისის უბნის სახაზინო გლეხთა კოლექტიური უარი გადასახადებზე 1854 წელს, რომელმაც კავკასიის ადმინისტრაცია დიდ საგონებელში ჩააგდო⁵. სამწუხაროდ, ჩვენ არ გავაჩნია შემაჯამებელი ხასიათის სტატისტიკური მასალა, რომ ვიმსჯელოთ კლასობრივი ბრძოლის ხსენებული ფორმის მასშტაბის შესახებ განსახილველი ხანის საქართველოში, მაგრამ მას რომ მასობრივი ხასიათი ჰქონდა — ამას მებატონეთა მიერ წარდგენილი საჩივრების სიმრავლეც ადასტურებს.

კლასობრივი ბრძოლის ზემოთ დასახელებულ ფორმებს, ისევე როგორც წინააღმდეგობის გაწევის სხვა სახეებს (ტერორისტული აქტები, აყრა-გაქცევები, ცეცხლის წაკიდებანი და სხვ.), ცხადია, გარკვეული მნიშვნელობა ჰქონდა ქველის დათრგუნვა-მოსპობის საქმეში, მაგრამ გადამწყვეტ ძალას მაინც, ბუნებრივია, სოფლის მშრომელი მოსახლეობის შეიარაღებული გამოსვლა წარმოადგენდა. განსახილველ ხანაში ადგილი ჰქონდა რამდენიმე ასეთ გამოსვლას, რომელთა შორის ყველაზე დიდი 1856—1857 წლების სამეგრელოს გლეხთა აჯანყება იყო. მას ქართველი ხალხის სოციალ-გამათავისუფლებელი ბრძოლის ისტორიაში განსაკუთრებული ადგილი უკავია, როგორც მონაწილეთა სიმრავლით, ისე მკაფიოდ

¹ სსცია, ფ. 4, საქ. 472, ფურც. 29.

² იქვე, საქ. 211, ფურც. 72, შდრ. საქ. 274, ფურც. 150.

³ იქვე, ფ. 9, საქ. 2122, ფურც. 17 (1864 წლის აპრილი).

⁴ სსცია, ფ. 48, საქ. 1012, ფურც. 38; ფ. 9, საქ. 2122, ფურც. 15 — 22 (1864 წლის აპრილი).

⁵ АКАК, XI, ч. II, гв. 625; И. Г. Антелава, Государственные крестьяне Грузии в первой половине XIX века, гв. 470.

გამოხატული ანტიბატონყმური ხასიათით. ის იყო ექსპლოატირებული მოსახლეობის უძლიერესი აზვირთება ფეროდალურ-ბატონყმური ურთიერთობის წინააღმდეგ.

ყირიმის ომის დროს ფიზიკურად და მატერიალურად დაზარალებულ გლეხობას თავადაზნაურობაც მიესია და მან, როგორც ზემოთაც აღვნიშნეთ, დანაკლისის ანაზღაურება მწარმოებელი კლასის გაძლიერებული ექსპლოატაციით სცადა. ამ საქმეში კერძო მფლობელებს არც სამთავრო ხელისუფლება ჩამორჩებოდა. 1856 წლის 23 მარტს, მაგალითად, ეკატერინე დადიანი ბრძანებდა, რომ სასწრაფოდ შეემოწმებინათ სამთავრო მამულები და გაეძვებინათ იქიდან ის კომლები, რომლებიც იქ თურქების საოკუპაციო ჯარების სამეგრელოში თარეშის დროს დასახლდნენ. „გაცნობებით თქვენს ბრწყინვალებას, — სწერდა დედოფალი სახლთუხუცეს დავით ჩიქოვანს, — რომელ დასაცველად სამეგრელოს მთავრის სახლის საკუთვნელთა ტყეთა და ადგილმამულთა უფლებით თქვენდა მინიჭებულთა დაიცვათ შეუხებლად ვისმესაგან ესრეთ, ვითარც... აქომამდე და რათამცა ყოველივე შემახები მათი ანუ უწყესოდ მათ შინა შემოსული განდევნოთ“¹.

სახლთუხუცესმა არ დააყოვნა ბრძანების სისრულეში მოყვანა, რითაც სრულიად გამოუვალ მდგომარეობაში ჩააყენა გლეხობა. ეს უკანასკნელი იძულებული იყო დაეტოვებინა დამუშავებული ყანები და თავის გავერანებულ-გაპარტახებულ სამოსახლოს დაბრუნებოდა².

მდგომარეობა ყოველდღე უფრო და უფრო რთულდებოდა. დამოკიდებულება კლასებს შორის საგრძნობლად მწვეავდებოდა. სამეგრელოს მშრომელები გადამწყვეტი შერკინებისათვის ემზადებოდნენ. სულ მცირე საბაბიც კი საკმარისი იყო, რომ გაძარცულ და უკიდურესად შეწუხებულ ხალხს იარაღი აეღო ხელში. ეს საბაბიც მალე გამოჩნდა.

1856 წლის ივლისის ბოლოს ეკატერინე დადიანი მოსკოვ-პეტერბურგს გაემგზავრა ალექსანდრე II-ის იმპერატორად კურთხევის ცერემონიაში მონაწილეობის მისაღებად. გამგზავრების წინ დედოფალმა თავის მრჩეველებთან ერთად მთელი „სამეურნეო პროგრამა“ შეიმუშავა და შესასრულებლად დავით ჩიქოვანს დაუტოვა. ამ უკანასკნელს ევალებოდა: „ენერგიულად მოეკიდა ხელი ომისაგან აოხრებული ქონების აღდგენისათვის, აეკრიფა დაგროვილი გადაუხდელი გადასახადები და, რადგან ზუგდიდში ჯერ დაბინავება არ შეიძლებოდა, — ისკანდერ ფაშამ დედოფლის სასახლე გადააწვევინა და ზუგდიდის ბალი სულ ერთიანად გადააჭრევინა. — პეტერბურგიდან დედოფლის დაბრუნებამდე შეეკეთებინა სალხინოს სასახლე“³.

¹ ზმა, ფ. 3, საქ. 4351, ფურც. 2. მომყავს დ. ლემონჯავას წიგნიდან „გლეხთა აჯანყება...“, გვ. 47.

² დ. ლემონჯავა, გლეხთა აჯანყება..., გვ. 47.

³ კ. ბოროზდინი, სამეგრელო, გვ. 69.



სამეგრელოს გლეხთა აჯანყება. უტუ მიკავას ხელმძღვანელობით.

სახლთუხუცესი ჩიქოვანი გულმოდგინედ შეუდგა ამ „სამეურნეო პროგრამის“ განხორციელებას. მან სასწრაფოდ შეკრიბა ხალხი და სალხინოს სასახლის შეკეთება დაიწყო. მთელი დღე საქმით დაკავებულ გლეხებს საჭმელ-სასმელზეც უარი უთხრეს. ისინი იძულებული იყვნენ თვითონვე ეზრუნათ ამაზე და „გულში ჩამარხული უკმაყოფილებით“ მეორე დღეს მშენებლობაზე საკუთარი სიმიწინდით გამოცხადდნენ. სახლთუხუცესმა მათ ნება მისცა სიმიწინდით მთავრის წისქვილში დაეფქვათ, მინდის გადახდის პირობით. გლეხებმა ამის წინააღმდეგ პროტესტი განაცხადეს და სასწრაფოდ კაცი აფრინეს ზუგდიდში გრიგოლ დადიანთან, ეკატერინეს მზლთან, რომელიც მაშინ დროებით, დედოფლის რუსეთში ყოფნის გამო, სამეგრელოს განაგებდა. პასუხით უკმაყოფილო გლეხებმა მუშაობა შეწყვიტეს. ჩიქოვანმა სცადა ძალის გამოყენება და ურჩთა მორჩილებაში მოყვანა, მაგრამ უშედეგოდ — მათ არამცთუ არ განაახლეს მუშაობა, არამედ ფიცი დასდეს „ერთიმეორისთვის მხარი დაეჭირათ და პეტერბურგიდან დედოფლის დაბრუნებამდე სახლთუხუცესს არაფერში დამორჩილებოდნენ“¹.

¹ კ. ბოროზდინი, სამეგრელო, გვ. 72.

ასე დაიწყო 1856 წლის გვიან შემოდგომაზე გლეხთა მღელვარება, რომელიც მალე მთელ სამეგრელოს მოედო და ვეებერთელა მასშტაბი მიიღო.

სალხინოს ამბებს გამოეხმაურა მდინარე ხობსა და ენგურს შუა განლაგებული სოფლები. პირველად იარაღი ლიისა და ჯვარის (თანამედროვე წალენჯიხის რაიონი) გლეხებმა აისხეს. მათი გამოსვლის უშუალო საბაზი გახდა გრიგოლ დადიანის განკარგულება ხსენებული სოფლებიდან გლეხების აყრისა და იქ საფუტკრის გაშენების შესახებ¹. ისინი მართლაც აყარეს ამ ათვისებული ადგილებიდან. ამან აავსო გლეხთა მოთმინების ფილა და მჭედელ უტუ მიქავას მეთაურობით აჯანყების დროშა ააფრიალეს. 1857 წლის მაისის თვეში კი მოძრაობის სხვადასხვა კერა ერთად გაერთიანდა და მიქავა აჯანყების საერთო ხელმძღვანელად აირჩიეს.

აჯანყებულთა რაოდენობამ მალე 20 ათას კაცამდე მიაღწია². ისინი წარმატებით მოქმედებდნენ. მათ დაიკავეს სოფლები ოზუჯი, ჭაქვინჯი, ყულისკარი, კორცხელი, ლედგებიე, კირცხი, ზიბულა და სხვ., ხოლო 1857 წლის 12 მაისს ხელთ იგდეს სამეგრელოს სამთავროს რეზიდენცია — ზუგდიდი. დაკავებულ ადგილებში გლეხები ამყარებდნენ ახალ წესებს, ქმნიდნენ დროებით მმართველობას, ახორციელებდნენ სამართალს, აწესებდნენ ფასებს და სხვ.³

მოძრაობამ დიდი განგაში გამოიწვია არ მარტო სამეგრელოს მემამულეთა შორის, არამედ მთელ ქართველ თავადაზნაურობაში. მათ აშინებდა აჯანყებულთა ანტიბატონყმური ლოზუნგი, რომელიც ერთი ადამიანის მიერ მეორის ექსპლოატაციის მოსპობასა და მისი განმსაზღვრელი პირობების დაუყოვნებლივ ლიკვიდაციას მოითხოვდა. კაცის კაცი არ უნდა იყოსო — აცხადებდნენ ისინი და ეს არსებულ სოციალ-ეკონომიურ ურთიერთობათა ძირფესვიან შეცვლასა და რაღაც ახალ, გლეხების მიერ ცუდად წარმოდგენილი, მაგრამ უეჭველად სამართლიან საფუძველზე დამკვიდრებული წყობილების დამყარებას ნიშნავდა. „ჩემს მიერ შეკრებილმა ცნობებმა, — წერდა ქუთაისის გენერალ-გუბერნატორი გაგარინი, — კიდეც უფრო დამარწმუნეს იმაში, რომ ისინი (აჯანყებულები — ავტ.) ოცნებობდნენ მემამულეთა ხელისუფლებისაგან სრულ განთავისუფლებაზე“⁴.

1857 წლის აპრილში, როდესაც ეკატერინე დადიანი პეტერბურგიდან ჩამოვიდა, სახალხო მოძრაობა აღმავლობის სტადიაში იმყოფებოდა. დედოფალმა თვალნათლივ დაინახა, რომ მთელი მისი სამთავრო მღელვა-

¹ Д. А. Лемонджавა, Вооруженное восстание крестьян в менгрелии в 1856—1857 гг. Автореферат кандидатской диссертации, Сухуми, 1950, г. 2.

² იქვე, გვ. 23.

³ იქვე, გვ. 40.

⁴ სსცია, ფ. 8/28, საქ. 4890, ფურც. 294

რებით იყო მოცული და ამას ცუდი და საშიში პირი უჩანდა. მან აზვირთებულ მასას წინააღმდეგობის შეწყვეტა ურჩია, მაგრამ ამას შედეგი არ მოჰყოლია. მაშინ იგი ძალის გამოყენების გზას დაადგა, რისთვისაც ქუთაისის ადმინისტრაციას მიმართა. „სამეგრელო მთლად აჯანყებულია, — სწერდა დედოფალი ქუთაისის გუბერნატორს კოლუბიაკინს, — მე სრულებით არ შემძლია თავი გავართვა. გლეხები სულ თავს გავიდნენ; შეიარაღებული ბრბოები არ გვემორჩილებიან. თუ ღმერთი გწამთ, თქვენ თვითონ მომეშველენით, ნიკოლოზ პეტრეს ძევ, და თან წამოასხით სულ უკანასკნელი, 500 ყაზახ-რუსი მაინც; მაშინ-ღა შემეძლება აჯანყება ჩავაქრო. ერთი წუთიც არ დაახანოთ. მე ქვაშხორში ვიმყოფები და ყველა მხრიდან აჯანყებული გლეხები მარტყია. მიფარავენ ჩემი ერთგული თავადები“¹.

კოლუბიაკინმა არ დააყოვნა და რეგულარული ჯარის ნაწილებით სამეგრელოსაკენ გაეშურა. 1857 წლის 20 მაისს იგი შეხვდა აჯანყებულებს. აქ გლეხების ბელადმა უტუ მიქაევამ ბრწყინვალე სიტყვა წარმოთქვა, რომელშიც მაქსიმალური დამაჯერებლობით დახასიათებულია სოფლის მშრომელი მოსახლეობის მძიმე სოციალ-ეკონომიური მდგომარეობა და სახალხო მოძრაობის ნამდვილი მიზეზები. „ამ ერთი წლის წინათ, — თქვა მიქაევამ, — ჩვენს ქვეყანას ოსმალთა ჯარი შემოესია, მტერმა გაანიორწყალა ყველაფერი, რაც ხელში მოხვდა. შველა არსაიდანა გვექონია; რუსის ჯარმა თავი დაგვანება, ხოლო ჩვენი ბატონები, იმის მაგივრად რომ დავეფარნეთ, ბიჭებსა და გოგოებს გეტაცებდნენ და ოსმალებზე ჰყიდდნენ. აუარებელი წაასხეს ოსმალებმა... ისინი წავიდნენ და ჩვენი ბატონები წინანდელზე უარესად... მოგვდგნენ. ზედმეტია იმაზე ლაპარაკი, რომ მთელი ჩვენი შრომის ნაყოფი იმათ რჩებათ; მათ რომ კაცმა ჰკითხოს, გლახს არაფერი უნდა ჰქონდეს, და რაც რამ აბადია, ყველაფერს ართმევენ თუ მოხერხებით არა, ძალით მაინც. ჩვენ ამას შევეჩვიეთ. ამას კიდევ თქვენი ჭირი წაუღია, საქმე ის გახლავთ, რომ ისინი ჩვენში ადამიანებსაც კი არ ჰხედავენ. მათი აზრით, ჩვენ ყველა პირუტყვი გვჯობნის. ვსთქვათ, ბატონს მეზობლის მიმინო მოეწონა, ადგება და ერთ კომლ გლახს მისცემს მასში; მწვეარში ან მეძებარში, რამდენსამე კომლს აძლევს. პირუტყვება უფრო ფასობენ, ვიდრე ადამიანები... როცა ბატონს თავისას ვაძლევდით, მხოლოდ იმასა ვსთხოვდით, ისე მოგვეცეოდნენ, როგორც ამას ჩვენი, მამაპაპათა მიერ დადგენილი ჩვეულება მოითხოვდა, მაგრამ ამ წმინდა ჩვეულებას მებატონებმა დიდი ხანია ფეხი დააბიჯეს, უგულვებელჰყვეს, ხოლო ომის შემდეგ მათმა სისასტიკემ ყოველგვარ საზღვარს გადააჭარბა. გვეჩივლა? აბა ვისთან? დედოფალი აქედან შორს იყო, ხოლო მის მდივანბეგებს მებატონეთა მხარე უჭირავთ, მათგან ძალდატანების მეტი არა-

¹ კ. ბოროზდინი, სამეგრელო, გვ. 59.

ფერი გვახსოვს... გვეგონა დედოფალი ჩქარა დაბრუნდებოდა, მაგრამ (მის მოლოდინში) თვეები გავიდა; ჩვენ აქეთ-იქით დავეხეტებოდით, მებატონებებს ვემალებოდით, და როცა დევნა და ძაღლებით ნადირობა დაგვიწყეს, შევერთდით და ძალას ძალა დავუპირისპირეთ. ამასობაში დადგა გაზაფხული, ყანები არ დათესილა, მებატონეები არ გვითმობდნენ და არც ჩვენ ვუთმობდით. ბოლოს... დედოფალიც ჩამოვიდა. მაგრამ რა გამოვიდა? არამცთუ მფარველობა არ გაგვიწია, არამედ ჩვენი გაჭირვების მოსპენაც არ ისურვა. „როგორ გაბედეთ და ბატონებს ხელი ახლეთ“, — გვითხრა მან. ჩვენი ხელისხლება კი ის გახლდათ, რომ ჩამოვართვით ხაჯალურები და დადიანურები, რომლითაც ისინი ზოგჯერ წლობით გეტანჯავდნენ, გამოვიყვანეთ იმათ სახლებიდან ჩვენი დები და ქალიშვილები... და ქრისტიანული წესებით გავათხოვეთ... ჩვენ სამშობლო შეგვჯავრდა, გადავწყვიტეთ მოვშორდეთ აქაურობას სამუდამოდ და სადმე ჯანდაბას გადავიკარგოთ... ერთმანეთს შეეფიცეთ — არაფრის გულისათვის არ დავბრუნდეთ უკან. ოხრადაც კი დარჩეს ისეთი სამშობლო, როცა თავიც კი ვერ შეგვიფარებია სადმე, საცა შენზე ნადირობენ, ნადირივით დაგსდევენ... ჩვენ არც ავაზაკები ვართ და არც მემამბოხენი, სამართალს ვითხოვთ, მეტს არაფერს, გვიწყალობე, გენერალო, ეს სამართალი, გვიყავი სიკეთე, თქვენი უურმოჭრილი ყმები ვიქნებით, ყველაფერს გაგიგონებთ“¹.

ამის შემდეგ მიქავამ კოლუბიაკინს რვა მუხლისაგან შემდგარი მოთხოვნილება წარუდგინა: 1) კაცის კაცი არ უნდა არსებობდეს, 2) ალიკვეთოს ყმებით ვაჭრობა, 3) აიკრძალოს გადასახადების თვითნებური გადადება, 4) ძიეცეს გლეხს ყველა ადამიანური უფლება, 5) დაწესდეს კანონებზე დამყარებული მმართველობა მებატონეთა გაუკითხავი მმართველობის მაგივრად, 6) მოისპოს ტანჯვა-წვალების დღემდე არსებული მეთოდები, 7) დაკანონდეს გლეხთა საკუთრების ხელშეუხებლობა და 8) გაძლიერდეს მემამულეთა და ხელისუფალთა პატივისცემა ხალხის ადამიანურ-ჩვეულებებისადმი².

კოლუბიაკინმა, რომელმაც დიდი ყურადღებით მოისმინა მიქავას სიტყვა, აჯანყებულთ დახმარება და სამართალი აღუთქვა, მაგრამ იმ პირობით, რომ ისინი დაუყოვნებლივ დაიშლებოდნენ. „აი თქვენი ბატონები, — უთხრა გუბერნატორმა გლეხებს, — თქვენ ისევ იმათ დაუბრუნდით და იგივე გააკეთეთ, რაც აქამდე გიკეთებიათ მათთვის. იცოდეთ, რომ კანონი უსაძრთლობისგან დაგიფარავთ. თუ დაგჩაგრეს, მიდით დედოფლის მიერ დაყენებულ მდივანბეგთან, თუ მდივანბეგმა დაგჩაგრა, დედოფალს შეს-

¹ კ. ბოროდინი, სამეგრელო, გვ. 114—116 (თარგმანი ზოგან შესრულებულია ჩვენ მიერ).

² დ. ლემონჯავა, გლეხთა აჯანყება სამეგრელოში 1856—1857 წწ., გვ. 107.

ჩივლეთ მის უკანონო საქციელის შესახებ. გახსოვდეთ, რომ ყოველ ურჩობისათვის მკაცრად დაისჯებით“¹.

გლეხებმა გულუბრყვილოდ იწამეს გენერლის სიტყვები და მართლაც დაიშალნენ, თუმცა იარაღი არ დაუყრიათ. მაგრამ ეს, როგორც სამართლიანადაა მითითებული სამეცნიერო ლიტერატურაში, არც აჯანყების დასასრულს ნიშნავდა და არც მის ბელადთა კაპიტულაციას. მომდევნო ხანის, კერძოდ, 1857 წლის მეორე ნახევრის, ამბებმა ცხადყო, რომ მოძრაობის მონაწილენი ოდნავადაც არ ფიქრობდნენ მორჩილებაზე და არსებულ ვითარებასთან შერიგებაზე. გლეხების გაბედული შერკინება რეგულარულ ჯარებთან აგვისტო-სექტემბრის თვეებში, სისხლისმღვრელი ბრძოლები ზემო ქვალონთან² (აწინდელი ხობის რაიონი), ჯვართან³ (დღევანდელი წალენჯიხის რაიონი) და სხვა ადგილებთან, ეჭვიუტანლად ადასტურებს, რომ აჯანყება ისევ თავის აღმავლობის ფაზაში შევიდა. კავკასიის ადმინისტრაციამ საგრძნობლად გააძლიერა მოქმედი ძალები და ამბოხებულთა წინააღმდეგ დაიწყო ნამდვილი მასობრივი ლაშქრობა. მათთან ბრძოლებში გლეხებმა გასაოცარი მიზანსწრაფვა, ორგანიზებულობა და ვაჟკაცობა გამოამჟღავნეს, რამაც დამსჯელი რაზმები არაერთხელ უკუაქცია, მაგრამ ძალები, შეიარაღების თვალსაზრისით, მეტად არათანაბარი იყო და ამან სასწორი გაბატონებული კლასის მხარეზე გადახარა. გლეხები დამარცხდნენ. პრივილეგიური წოდება კი განსაცდელისგან თავის დაღწევას ზეიმობდა.

უსამართლობის წინააღმდეგ გაბედული პროტესტით გამოსული გლეხები ხელისუფლებამ მკაცრად დასაჯა. ორმოც მათგანს, მათ შორის ისეთ გამოჩენილ მეთაურებს, როგორც იყვნენ უტუ მიქავა, კოჩა თოდუა, ლევან კვარაცხელია და სხვ., დიდი ხნით (სამიდან ათ წლამდე) გადასახლება მიესაჯათ კოსტრომის, პერმის, ოლონეცკისა და რუსეთის იმპერიის სხვა გუბერნიებში.

სამეგრელოს გლეხთა აჯანყება ჯერ დამთავრებული არ იყო, რომ 1857 წლის ნოემბერში თავი იჩინა იმერეთის (ამალღებისა და ბაღდადის უბნის) საბატონო ყმათა მღელვარებამ, რომელშიც, თანამედროვეთა მოწმობით, მხოლოდ ეს უკანასკნელნი ლებულობდნენ მონაწილეობას და სხვა კატეგორიის სოფლის მშრომელი მოსახლეობა არ ყოფილა გარეული. ქუთაისის მაზრის უფროსის მაზანდაროვის ერთ პატაკში, მაგალითად, მითითებულია, რომ მოძრაობის დამწყებნი და სულის ჩამდგმელნი მარტო კერძო მფლობელთა გლეხები იყვნენო⁴, სახალხო პროტესტი ფეოდალური ექს-

¹ კ. ბოროზდინი, სამეგრელო, გვ. 117—118.

² დ. ლემონჯავა, გლეხთა აჯანყება სამეგრელოში, გვ. 158.

³ იქვე, გვ. 170—171, AKAK, XII, 321, CXAO, I, გვ. 674.

⁴ მ. გაბრიჩიძე, საბატონო ყმების მღელვარება იმერეთში 1857 წელს (დოკუმენტები შესავალი წერილით), სმ. 1, 1945, გვ. 302.

პლოტაციის სიმძიმით და პრივილეგიური წოდების თვითნებობა-გაუკითხაობით იყო გამოწვეული. „ჩუენი საჭირვება და შეწუხება ფრად დაუთვლელი არს“ — სწერდნენ 1857 წლის 20 ნოემბერს ბაღდადის უბნის გლეხები გუბერნიის ადმინისტრაციას¹. აკონკრეტებდნენ რა ამ ზოგად განცხადებას, ისინი აღშფოთებით ლაპარაკობდნენ მათზე დაკისრებულ ბეგარა-ვალდებულებათა გამანადგურებელ ხასიათზე. „თითოეული ჩვენგანი, ნათქვამია ბაღდადის უბნის გლეხთა საჩივარში, ვალდებულია მებატონეს შინამოსამსახურე მისცეს; თუ ეს უკანასკნელი „ავათ გახდება ნამეტური სარჯელისაგან“, მაშინ იგი მეორით ან ფულადი გადასახადით უნდა შეიცვალოს. გლეხს აკრძალული აქვს ქალიშვილის გათხოვება, ნებართვის მისაღებად აუცილებელია 12—15 მანეთის გადახდა. არც ქვრივი ქალის შერთვაა ნებადართული — ამისათვის მისი პატრონი ხარს ან მის საფასურს ითხოვს გასამრჯელოდ. წინად, როდესაც ჩვენ მეფის ყმები ვიყავით მას ორ მარჩილს (ე. ი. 20 კაპიკს) ვუხდიდით, ეხლა კი მებატონეს ამის მაგივრად სამ მანეთს ვაძლევთ. ძველად „ნეფე რომ სოფელშიდ გვესტუმრებოდა, მოვბოჭავდით თვითეულს კვამლზედ ოთხს ფარას, უყიდლით ძროხას ხარჯად“ და იოლად გავდიოდით, ახლა კი მებატონე „იმა საგანზედ“ ითხოვს ცალ ხარს ან მის საფასურს ფულად. ხშირად გვიწვევენ ჩვენ მილიციაში „ჩვენის ცხენით და ხარჯით“, მაგრამ ფულსაც ვგახდევინებენ თითო თუმნის რაოდენობით. მემამულეებმა მილიციელებისათვის დაწესებული ჯამაგირიც შეგვიჭამეს და კარგი სამსახურისათვის ჯილდოს მიღებაც ჩავვიშალეს“².

ყველაფერი ეს გლეხებმა მღელვარების ჩაქრობის შემდეგ ხელისუფლების მიერ მოწყობილი გამოძიების დროსაც დაადასტურეს. ასე მაგალითად, პასუხისგებაში მიცემულმა ჯამინიკა დავითის ძე ხურციძემ დაკითხვაზე განაცხადა: „შევიწროებანი, რომელთაცა ვითმენდი მე ძმებითურთ... მებატონისაგან ჩვენისა კნიაზის გიორგი ლორთქიფანიძისაგან, იყვნენ შემდგომნი: დროსა პასკევიჩისასა (1829 წელსა)... გარდაქვეყონდა ქუთაისიდან ახალციხეს პროვიანტი, რისთვისაც მებატონემან ჩვენმან წაიღო 25 მანეთი და ფულები ესე არ მოგვცა ჩვენ. იმავე დროს, კნიაზმა გიორგი ლორთქიფანიძემ წაიყვანა საბალახოდამ ცხენი და თუმცა ამაზედ შევიტანეთ საჩივარი..., გარნა ვერა მივიღეთ ვერავითარი დაკმაყოფილება. 1838 წელშიდ მე ვიმყოფებოდი, ბაღდად ჩემის ბატონის მაგიერ, მილიციაშიდ, წარსული სოჩას და მასთან ერთად 1848 წელშიდ... სამურზაყანოს. თუმცა-და ბატონისაგან იყო შეკრებილი... სალაშქრო ფული, გარნა ამა ფულებისაგან მე არა მიმიღია რა, რაისთვისაც იძულებული ვიყავი მე წასვლად საკუთარის ხარჯით. პოხოღშიდ სოჩას მე ვიმონაწილე ოთხს

¹ მ. გაბრიჩიძე, საბატონო ყმების მღელვარება იმერეთში 1857 წლის (დოკუმენტები შესავალი წერილით), სმ. 1, 1945, გვ. 299.
² იქვე, გვ. 299—300.

ცხელს ჩხუბშიდ, რაისთვისაც მიპირებდნენ მე მოცემას ხელმწიფის წყალობისა, გარნა შურისძიებისა გამო მებატონისა ჩემისა მოვაკლდი ამა წყალობასა. 1851 წელს კნიაზმა გიორგი ლორთქიფანიძემ გარდამახდევინა მე 16 მანეთი გარდასახადი საქორწილოდ, სრულიად ჩვენთვის ახალი მოგონილი. დროსა ყოფილის ჩხუბისა 1853—1855 წლებშიდ მე, ერთად გიორგი ლორთქიფანიძესთანა, ვიმყოფებოდი მილიციაში თერთმეტს თვეს და დაწესებულის ხაზინისაგან ჯამაგირს, თვეში ხუთ მანეთსა და ხუთ შაურს, ჩემს ნაცვლად იღებდა იგი საკუთრივ, არა მაძლევდა მე არაფერს... წასვლის დროს ჩემისა პახოდში 1853 წელს მებატონემა ჩემმა წამართვა ერთი საპალნე (10 ფუთი — ავტ.) ოტკა, ღირებული მაშინ 60 მახეთად... მებატონე ჩვენი გვამძიმებს ჩვენ უჩვეულოს ვალდებულებით: დროსა საშინელის ძვირიანობისასა და შიმშილობისა წარსულს და 1840 წელსა მოვიდა იგი სოფელს უხუთს და... თითო თვეს სცხოვრობდა ხარჯსა ზედა აქაურთს მისთა ყმებითა უმრავლესის მისის სახლეულებით და მოსამსახურეებით—სრულად 30 სული, გვაიძულებდა ჩვენ რჩენად მათისა, რომელნიც უმისოდაც ვიყავით უკიდურესს მდგომარეობაშიდ... სახლსა შინა ჩემსა მყვანან მე სამი მოზრდილი ასულნი ძმისა ჩემისა და ჩემიცა ასულები სამი, მათგანს უფროსს აქვს 30 წელი. ყველანი ისინი რჩებიან გაუთხოვრად, მისთვის მხოლოდ, რომელ მებატონე ჩემი თხოულობს უზომო ხარჯს ნებადართვისათვის. მიცემისა მათსა საქმროდ, სახელდობრ მანეთიდან ათ მანეთამდე, ხოლო მე ეგ ფულები არა მაქვს...¹

ამ ჩვენების სისწორე დაადასტურეს და ზოგი ახალი მომენტიც აღნიშნეს პასუხისგებაში მიცემულმა დანარჩენმა გლეხებმა².

ზემომოტანილი მასალებიდან მკაფიოდ ჩანს, რომ სახალხო მღელვარების მიზეზი მემამულეთა თვითნებობა-გაუკითხაობა, ფეოდალური ექსპლოატაციის საგრძნობი გაძლიერება ყოფილა. ყოველივე ეს სოფლის მშრომელ მოსახლეობას, ეტყობა, დიდხანს უთმენია და გულში დაგრო-

¹ სმ, 1, გვ. 312—313.

² აი რა განაცხადა, მაგალითად, თავად ერისთავის ყმამ მურზაყან ხურციძემ: „საჩივარი ჩემი არს შემდგომი: ამა მებატონემ ჩემმა, კნიაზ ერისთავმა, ვალისათვის მართებულისა მის მიერ მეგრელისადმი, აძლევდა მამასა ჩემსა ცოლშვილიანად, გარნა მცხოვრებთა სოფლის უხუთისა დაიხსნეს იგი. შემდგომ კნიაზმა ერისთავმა დაიწყო თხოვა ყმური სამსახურისა. ამა ყმობისაგან მამამან ჩემმან კვლავ დაიხსნა თავი; გარნა არა მინედა (?!) ამას მიცემის დროს ბატონისა მიერ ასულისა თავისისა (მეუღლედ) კნიაზის მანუჩარ ჩიჯავაძისადმი; მისცა მამა ჩემი ცოლშვილიანად მზითევად ასულსა თვისსა. კნიაზმა ოტია ერისთავმა წაგვიყვანა ჩვენ უკანავე, გვაიძულა კვლავ მიცემად მისდამი თავისუფლებისათვის ფულებისა. არა მიხედა ამას (ე. ი. იმას, რომ ერთხელ უკვე ჰქონდა ყმობიდან განთავისუფლებისათვის თანხა აღებული—ავტ.) კნიაზმა ერისთავმა, არა გაგვიშვა ყმობისაგან მისისა; სხვათაშორის წაგვართვა ჩვენ ყოველი მოძრავი მამული (ქონება—ავტ.) და საცხოვრებელი“ (სმ. 1, გვ. 315).

ვილი ბოლმა გარკვეულ დრომდე ჩუმად უტარებია, მაგრამ 1857 წლის ნოემბერში ეს სიჩუმე დაურღვევია და თავის უკმაყოფილება აშკარად გამოუხატავს. მოძრაობის უშუალო საბაზი, რომელიც ბაღდადის უბნის სოფ. დიშში დაიწყო, გახდა თავად ბეჟან ჩხეიძის განკარგულება მისთვის კვირიკაძის კულაშის უბანში გადასახლების შესახებ. ბატონის ამ განკარგულებამ აღაშფოთა ხსენებული და მეზობელი სოფლების გლეხები და მტკიცედ გადაწყვიტეს ჩაეშალათ ეს საქმე. ნამდვილი ვითარების გამოსარკვევად ისინი კიკოლა კვირიკაძეს ეახლნენ, რომელმაც მათ მედგარი წინააღმდეგობის გაწევით მსგავსი უბედურების თავიდან აცილებსაქენ მოუწოდა. უკეთუ ჩვენ შევერთდებით და ერთპირად ვიქნებით, განუცხადებია მას ამ შეკრებაზე, არ დავემორჩილებით მებატონეებს და არ შევასრულებთ მათ განკარგულებებს, მაშინ მთავრობა იძულებული იქნება ყურადღება მოგვაქციოს, ერთგვარ ჩარჩოებში ჩააყენოს ჩვენი მტარვლები, და საერთოდ გაგვანთავისუფლოს ყმური მდგომარეობიდან¹. კრების მონაწილეებს სრული თანხმობა უთქვამთ და ეს თანხმობა ფიცით დაუდასტურებიათ. ამ ცერემონიის მეორე დღეს, ე. ი. იმავე 1857 წლის 17 ნოემბერს, გლეხებმა თავიანთი წარმომადგენლები — პავლე ჭრიალაშვილი და ქრისტესა გუმბერიძე — ამაღლების უბნის სოფლებში გაგზავნეს იმ მიზნით, რათა ისინიც ჩაებათ საერთო მტერთან შერკინებაში. ბაღდადელთა გამოწვევას მხურვალედ გამოეხმაურნენ გოდიდის, ონჯოხეთის, დვალიშვილების, უხუთის, ზენობნის, ციხისუბნისა და ზოგი სხვა სოფლის მკვიდრნი², იარაღი აისხა ამაღლების უბნის 400-მდე გლეხმა. აზვირთებული მასა სოფ. უხუთის მახლობლად მდებარე ტყეში დაბანაკდა. მალე მღელვარების ორივე კერა უნდა გაერთიანებულიყო და საერთო შეტევა დაწყებულიყო.

18 ნოემბერს ცნობა ხალხის საეჭვო თავყრილობის შესახებ მიიღო ქუთაისის მაზრის უფროსმა მიზანდაროვმა, რომელიც დაუყოვნებლივ წავიდა სოფ. უხუთში, სადაც, როგორც უკვე ვთქვით, ამაღლების გლეხები იყვნენ გამაგრებულნი. კითხვაზე, თუ რამ აიძულა ისინი იარაღი აეღოთ ხელში, მათ ერთხმად უპასუხნიათ, რომ ამის მიზეზი მემამულეთა თავგასულობა და ფეოდალური გადასახადების სიმძიმეა³. სამაზრო ხელისუფლების წარმომადგენელს გლეხების დაშოშმინება უტდია — დაიშალეთ, მშვიდობიან შრომას მიუბრუნდით და მაშინ იქნება დაკმაყოფილებული ყველა თქვენნი სამართლიანი მოთხოვნაო, — უთქვამს მას შეკრებილთათვის⁴, მაგრამ შთაგონება-დაშინების მეთოდს შედეგი არ მოჰყო-

¹ სმ. 1, გვ. 320, პავლე ჭრიალაშვილის დაკითხვის ოქმი.

² იქვე, გვ. 298, 300. პავლე ჭრიალაშვილის დაკითხვის ოქმი.

³ იქვე, გვ. 300.

⁴ იქვე.

ლია. გლეხებს მტკიცედ განუცხადებიათ, რომ ჩვენ მხოლოდ მაშინ დავერით იარაღს, როდესაც მთავრობა ბოლოს მოუღებს მემამულეთა თვითნებობას და შეგვიქმნის ცხოვრება-არსებობის რამდენადმე მაინც ნორმალურ პირობებსო¹.

საქმეში მალე ქუთაისის სამხედრო გუბერნატორის მოვალეობის აღმსრულებელი პოლკოვნიკი ივანოვი ჩაერია. იგი რეგულარული ჯარის ნაწილების თანხლებით სასწრაფოდ სოფ. უხუთს გაემგზავრა. მას მხარს უჭერდა 300 კაცისაგან შემდგარი ადგილობრივი თავად-აზნაურთა რაზმი². ივანოვმა აჯანყებულებს დაუყოვნებლივ დაშლის წინადადება მისცა. ამის საპასუხოდ გლეხებმა მას თავისი კაცი მიუგზავნეს და მოთხოვნილებათა პუნქტების გადაცემა სცადეს, მაგრამ წარუმატებლად, რადგანაც გუბერნატორმა მორჩილებიდან გამოსული მშრომელი ხალხის წარმომადგენლები არ მიიღო. «Крестьянину этому, — ნათქვამია ივანოვის 1857 წლის 25 ნოემბრის პატაკში ბარიატინსკისადმი, — я приказал возвратиться и объвить пославшим его, что для разбора жалоб и удовлетворения их есть путь законный, — не крик взволнованной толпы, не просьба с оружием в руках, и что я требую во всем безусловной покорности и, прежде всего, чтобы толпа немедленно разошлась по своим домам, (вернулась) к своим обычным занятиям»³.

მაგრამ გლეხებმა ეს წინადადება უარყვეს და „აჯანყების ცეცხლის ალის“ დიდ სივრცეზე გავრცელების შიშით შეპყრობილი გუბერნატორი იძულებული გახადეს მიეღო ხალხის დელეგაცია და მის მიერ წარდგენილი წერილობითი საჩივარი. მან პირობა მისცა დელეგატებს, რომ ყველა მათი კანონიერი მოთხოვნა დაკმაყოფილებული იქნებოდა, მაგრამ წინასწარ სრული მორჩილება მოითხოვა და დასაფიქრებლად ორი საათი მისცა. ხალხმა, რომელმაც რეგულარული ჯარის ნაწილებთან შერკინება უპერსპექტივოდ ჩათვალა, ბრძოლას თავი აარიდა და დაიშალა⁴.

ამის შემდეგ იერიში ბლდადის უბნის გლეხების წინააღმდეგ იქნა მიტანილი. მათი მორჩილებაში მოყვანა ქუთაისის მაზრის უფროსის თანაშემწეს ბაქრაძეს დაევალა. იგი 50 კაზაკითა და ორი ქვემეხით სასწრაფოდ გაემურა აჯანყებულთა ბანაკისაკენ და შედარებით ადვილად შეძლო მოძრაობის მონაწილეთა გაფანტვა⁵.

¹ სმ, I, გვ. 300.

² იქვე გვ. 304.

³ იქვე.

⁴ «В назначенный мною... час,—სწერდა ივანოვი ბარიატინსკის,—в сопровождении... прабывших со мною г. г. офицеров, с сотнею казаков на том месте, где были расположены бунтующие, я не видел уже ни одного человека, все они возвращались по домам» (სმ, I გვ. 305).

⁵ იქვე, გვ. 305—306.

აჯანყება ჩაქრობილ იქნა. ხელისუფლებამ მისი მონაწილეები დააპატიმრა. სახალხო მღელვარების ინიციატორებად და ხელმძღვანელებად აღიარებულ ოქნა 16 კაცი¹, რომელთაგან ოთხს ხუთი წლით, ხოლო თორმეტს სამი წლით რუსეთის შიდა გუბერნიებში გადასახლება მიესაჯა.

ზემოაღწერილი მოვლენების შემდეგ საქართველოში რამდენიმე წლის განმავლობაში მსგავსი მასშტაბის შეიარაღებული გამოსვლები არ ყოფილა, ყოველ შემთხვევაში, ჭერჯერობით არაა ცნობილი. მაგრამ ეს, რა თქმა უნდა, იმას არ ნიშნავს, რომ კლასობრივი ბრძოლა შენეულა და სოფლის მშრომელმა მოსახლეობამ შეწყვიტა აქტიური მოქმედება მიწისა და თავისუფლების მოსაპოვებლად. იმპერატორ ალექსანდრე მეორის მიერ მოსკოვის თავად-აზნაურთა კრებაზე რეფორმის თაობაზე წარმოდგენილი სიტყვის 1858 წელს ჟურნალ „ცისკრის“ ფურცლებზე დაბეჭდვამ საგრძნობლად გაართულა მდგომარეობა². ამ დოკუმენტებმა გლეხებს „კანონიერი“ საფუძველი მისცა უარი ეთქვათ წინანდელ სამსახურზე და თავი დაშოუკიდებელ ადამიანებად ეცნოთ. გახშირდა ურჩობა-დაუმორჩილებლობის ფაქტები. ამ მხრივ განსაკუთრებით ქართლი გამოირჩეოდა. არსებული ცნობების თანახმად იქ, კერძოდ გორის მაზრაში, თითქმის ყველა მემამულის სამფლობელოს აგრარული მღელვარების ცეცხლი ჰქონია მოდებული. 1858 წელს, მაგალითად, ურჩობა გამოუჩენიათ მებატონე ამირეჯიბის ყმებს (სოფ. აბისი)³. მომდევნო წელს ასევე მოქცეულან ქსნის ხეობაში მოპინადრე თავად ერისთავების გლეხები⁴. უფრო სერიოზული და მეტი მასშტაბის ყოფილა 1859 წლის მემამულე მაჩაბლების წინააღმდეგ მიმართული გლეხთა მღელვარება⁵. მასში მონაწილეობა მიუღია გორის მაზრის 60 სოფელს, მათ შორის ქარელს, ყინწვისს, არბოს, აჯამეთს, ვანთას, ვანურს, მხურვალეთს, სამცხისს და სხვ. არანაკლებ შიშისმომგვრელი ყოფილა ფხვენისის, ბრეთის, ხვითის, გოგეთის, კავთისხევის და სხვა სოფლების გლეხთა გამოსვლა მებატონე ავალიშვილების, ამილახვარების, თაქთაქიძეების, ერისთავების და მაჩაბლების წინააღმდეგ⁶.

¹ აი ესენი: კიკოლა კვირიკაძე, გოგია კვირიკაძე, ოტია გოცირიძე, ფრიდონ გოცირიძე, ტატულა ვაშაყმაძე, პავლე ჭრიალაშვილი, სიმონ ჭრიალაშვილი, გლახუა ჭრიალაშვილი, ქრისტესა გუმბერიძე, პეტრე ხიზანეიშვილი, მაქსიმე თედორაძე, ჯამინიკა ხურციძე, მურზუყან ხურციძე, კიკოლა შარაძენიძე, დიმიტრი რუხაძე და ეგნატე პაიკაძე (სმ. I, გვ. 330).

² მ. ა. ხ. ბ. ა. ძ. ე., საბატონო ყმების მოძრაობა გორის მაზრაში ბატონყმობის გაუქმების წინ (1857—1864 წწ.), „მოამბე“, 1962, 1, გვ. 159.

³ იქვე, გვ. 161—162.

⁴ იქვე, გვ. 163.

⁵ იქვე, გვ. 164.

⁶ იქვე, გვ. 164—165.

დიდი კლასობრივი ბრძოლებით აღინიშნა 1862 წელი. ამ წელს ადგილი ჰქონდა გლეხთა სამი შეიარაღებულ გამოსვლას გურიაში. პირველი მოხდა მარტში, მეორე — აგვისტოში, ხოლო მესამე — სექტემბერ-ოქტომბერში. მათ შორის, მკვლევართა აზრით¹, უშუალო ორგანიზაციული და ეტაობრივი კავშირი არ ყოფილა, მაგრამ იდეური კავშირის არსებობას ისინი უეჭველად მიიჩნევენ. ასევე უეჭველად თვლიან სპეციალისტები მღელვარების აშკარად გამოხატულ ანტიბატონყმურ ხასიათს, რაც, მათი სამართლიანი განცხადებით, დასტურდება იმითაც, რომ მოძრაობაში მონაწილეობდნენ მხოლოდ და მხოლოდ საბატონო ყმები².

ცოტად თუ მეტად სრული ცნობა გლეხთა მარტის თვის მღელვარების შესახებ დაცულია 1862 წლის 13 აპრილის ერთ საბუთში, რომელიც წარმოადგენს ქუთაისის გენერალ-გუბერნატორ კოლუბიაკინის მოხსენებას ნამესტნიკის მთავარმმართველობის უფროსის კრუზენშტერნისადმი. იქ ნათქვამია: „მანიფესტაცია გურიაში, რომლის შესახებაც მე თქვენ დეპეშით გაცნობებთ³, ერთ-ერთი იმათგანია, რომელსაც აქ ხშირად მიმართავენ ხოლმე მემამულეთა გლეხები საბატონო ბეგარა-გადასახადების გადახდასთან დაკავშირებით, ოღონდ იმ განსხვავებით, რომ მანამდე გლეხებს საჩივრები გამოსაღებთა ზედმეტი ზომით მოთხოვნის შესახებ მოჰქონდათ ცალ-ცალკე; უკანასკნელი მანიფესტაცია კი, ოზურგეთის მაზრის გურიანთას უბნის ყმებმა რომ მოაწყვეს მარტის დასაწყისში, უფრო ფართო მასშტაბისა იყო და თავის რიგებში ითვლიდა 200-მდე შეიარაღებულ კაცს. მაზრის უფროსის დროზე გამოცხადებამ შემთხვევის ადგილზე და მისმა კეთილგონიერმა შთაგონებამ იმის შესახებ, რომ კანონი, რომელიც მფარველობას უწევს ყველა უსამართლოდ დაჩაგრულს და ნებას აძლევს თვითეულს საჩივარი შეიტანოს შემვიწროებელთა წინააღმდეგ, კატეგორიულად კრძალავს მანიფესტაციების მოწყობას — სასურველი გავლენა იქონია გლეხებზე და ისინი სასწრაფოდ დაიშალნენ... ასევე ლანჩხუთის უბნის გლეხებმაც, რიცხვით 100 კაცამდე, შეადგინეს ზროვა, მაგრამ ისინიც მაზრის უფროსის მონაწილეობით მოურიგდნენ თავიანთ მებატონეებს იმ ბეგარის თაობაზე, რომლის გამოც მათ დავა ჰქონდათ“⁴.

¹ შ. ჩხეტია, გლეხთა მოძრაობა გურიაში 1862 წელს (საბუთები შესავალი წერილთ) სმ. 7, თბილისი, 1953 წ., გვ. 173 (ქვემოთ წერილზე მითითება მოცემული იქნება ასე: შ. ჩხეტია, გლეხთა მოძრაობა გურიაში, ხოლო საბუთებზე—სმ).

² იქვე.

³ იგულისხმება კოლუბიაკინის 1862 წლის 1-ლი აპრილის დეპეშა, სადაც მოკლედ ნათქვამი იყო: „ჩვენთან, გურიაში, ადგილი ჰქონდა მანიფესტაციას, რომელიც კეთილსაღურველად დამთავრდა“ (სმ, 7, გვ.190—191).

⁴ სმ, 7, გვ. 190—191.

როგორც ამ საბუთიდან ჩანს, მღელვარება ხელჩართულ ბრძოლამდე არ მისულა და ის სამაზრო-საგუბერნიო ადმინისტრაციას შედარებით იოლად ჩაუქრია, მაგრამ, რა თქმა უნდა, არა კეთილგონიერი შთაგონების გზით, როგორც ირწმუნება კოლუბიაკინი, არამედ სხვა, უფრო რადიკალური საშუალებების გამოყენებით, რომელთა შორის „სამხედრო ძალისა და პოლიციის გამოყენებაც იგულისხმება“¹.

გლახთა მეორე გამოსვლა იმავე წლის აგვისტოს თვეში მოხდა. იარაღი აისხეს შემამულე გურიელებისა და ნაკაშიძეების ყმებმა. მოძრაობაში ჩაბმული აღმოჩნდა ბახვი, შემოქმედი, გოგოლეთი, აჭი, ლიხაური, გურიანთა, კახური, მაკვანეთი, სუფსა, კაილეთი და სხვა სოფლები. მღელვარებაში მონაწილეთა ერთი ჯგუფი შემოქმედის მონასტერში დაბანაკდა, ხოლო მეორე — გურიანთაში. დაიწყო ხელისუფლების ენერგიული მოქმედება მორჩილებიდან გამოსული გლეხების წინააღმდეგ. დამსჯელ რაზმებს ხელმძღვანელობდნენ ქუთაისის სამოქალაქო გუბერნატორი იზიუმსკი და ოზურგეთის მაზრის უფროსი შტაბსკაპიტანი პრინცი. მათ პირველ რიგში შემოქმედის ჯგუფის ლიკვიდაცია სცადეს. თავდაპირველად მათ მშვიდობიანი მოლაპარაკების საშუალებას მიმართეს და ამ მიზნით გლეხებს მაზრის უფროსის თანაშემწე ბაქრაძე მიუგზავნეს. ამ უკანასკნელმა აჯანყებულებს გადასცა გუბერნატორის ბრძანება იმის შესახებ, რომ ისინი სასწრაფოდ დაშლილიყვნენ და „კაინიერი“ გზით ეძიათ სამართალი. მაგრამ აქედან არაფერი გამოვიდა. გლეხებმა გადაჭრით უარყვეს ეს წინადადება და განაცხადეს, რომ მათ „არა სურთ ხელმწიფის გარდავინმეს ემსახურონ“².

ამის საპასუხოდ იზიუმსკიმ შტაბსკაპიტანი პრინცი, მისი თანაშემწე ბაქრაძე, უბნის უფროსი ბერაძე და თარჯიმანი ყენია გააგზავნა და თან 70 ჯარისკაცი და 10 კაზაკი გააყოლა. დამსჯელი ექსპედიცია შემოქმედის მონასტერს მიაღწა, სადაც მას თოფებითა და ჯოხებით შეიარაღებული 300-მდე კაცი დაუხვდა. ზემოთ დასახლებული პირები ქვის გალავანშემოვლებული მონასტრის ეზოში შევიდნენ. მათ აჯანყებულებს ჯოხების გადაგდება და თოფების ეკლესიის კუთხეებში დალაგება მოსთხოვეს, რაც პრინცის სიტყვით, დაუყოვნებლივ შესრულდა. «Потом я, — ნათქვამია მის 1862 წლის 11 აგვისტოს პატაკში იზიუმსკისადმი, — обратил противузаконность сходок вообще и тем более вооруженных, спрашивал их о претензиях, которые они имеют на помещиков, убеждал их разойтись, но после долгих убеждений они на все отсылались, что разойтись не могут до тех пор, пока просьба их не бу-

¹ შ. ჩხეტია, გლახთა მოძრაობა გურიაში, გვ. 175.

² იქვე, გვ. 193.

დღე უდღე უდღე, თ-ე შოკა ნე ბუდუტ ოსვობოჯდენი ოტ პომეშიჩუბი ჯიშის ოფიციუმი»¹.

მღელვარების მონაწილეთა მდგარმა წინააღმდეგობამ იზიუმსკი აიძულა თვითონაც ჩარეულიყო საქმეში. იგი სათანადო ძალებით მართლაც გაემართა შემოქმედისაკენ, სადაც შეხვდა გლეხებს, «Все они, — მოახსენებდა ქუთაისის სამოქალაქო გუბერნატორი მეფისნაცვლის თანამდებობის აღმასრულებელს გრ. ორბელიანს, — в один голос жаловались (мне) на свое крайне угнетенное положение вследствие претерпеваемых ими утеснений от своих помещиков, и что они вынуждены были заявить свое подобное положение в виде восстания для обращения на себя внимания начальства»². იზიუმსკიმ ყურადღებით მოისმინა რა ყოველივე ეს, დახმარება აღუთქვა გლეხებს, მაგრამ იმ აუცილებელი პირობით, რომ ისინი დაუყოვნებლივ დაიშლებოდნენ და თავ-თავიანთ სახლებში დაბრუნდებოდნენ, წინააღმდეგ შემთხვევაში იგი მკაცრი ზომების მიღებით იმუქრებოდა. გლეხები მოერიდნენ უთანაბრო ბრძოლას და დაიშალნენ³.

ამის შემდეგ სამაზრო-საგუბერნიო ხელისუფლებამ იერიშები აჯანყების მეორე კერის წინააღმდეგ მიმართა, რომელიც, როგორც ზემოთაც აღვნიშნეთ, გურიანთას რაიონში იმყოფებოდა. „მივიღე რა დღეს ცნობა, — მოახსენებდა იზიუმსკი გრ. ორბელიანს 1862 წლის 11 აგვისტოს, — რომ შემოქმედის, მაკვანეთისა და ლიხაურის მცხოვრებნი გაემართნენ გურიანთაში ალბათ იქ აჯანყებულ გლეხებთან შესაერთებლად და რომ ბრბომ სოფელ კახურიდან მიმართულება მდინარე სუფსისკენ აიღო, რათა მივიდეს თავად იასე გურიელის კუთვნილ ბაილეთში, მე სოფელ გოგოლეთში, სადაც აჯანყება დაიწყო, ჯარისკაცთა როტა, ხოლო შემდეგ 25 კაზაკი გავაგზავნე მაზრის უფროსის თანაშემწის ბაქრაძის მეთაურობით, რათა შეჩერებულ იქნას მემამბოხეთა შემდგომი სვლა სუფსის მიმართულებით. ამასთან ერთად, გაცემულია განკარგულება სოფელ კახურიდან ბაილეთისკენ მიმავალი გზის შეკვრის შესახებ“⁴. მდგომარეობა საკმაოდ სერიოზული იყო. საქმეში თვით ქუთაისის გენერალ-გუბერნატორი კოლუმბიაკინი ჩაერია. 11 აგვისტოს ის გურიაში ჩავიდა და ნახა, რომ მღელვარება უბრალო აფეთქება კი არ იყო, არამედ ხანგრძლივი დროის განმავლობაში დაგროვილი ბოღმის გამომხატველი შეთქმულება, რომლის ლიკვიდაცია

¹ სმ, 7, გვ. 195

² იქვე, გვ. 194

³ იქვე.

⁴ იქვე, გვ. 197, 1862 წლის გურიის მღელვარებასთან დაკავშირებულ საბუთების თითქმის ყველა თარგმანი მომაქვს პროფ. შ. ჩხეტიას სტატიიდან.

დიდ დავიდაარაბასთან იქნებოდა დაკავშირებული¹. როგორც კოლუბიაკინის ერთი შედარებით გვიანდელი პატაკიდან ჩანს, მას გურიანთას გლეხები მორჩილებაში მოუყვანია და „წესრიგი“ დაუმყარებია. „მეამბოხეთა მეორე (გურიანთას) ბრბო, — სწერდა იგი კრუზენშტერნს 1862 წლის 1-ლ ნოემბერს, — რომელიც 500 — 600 კაცისგან შედგებოდა, უფრო მედგარი აღმოჩნდა (ვიდრე შემოქმედის ჯგუფი). მის მიერ დაკავებული პოზიციების გარშემო, სხვა ჯერ არაჯანყებულ სოფლებთან კავშირის შეწყვეტის მიზნით, დაყენებულ იქნა ჯარის ნაწილები... მეამბოხეთა წინააღმდეგობის დაძლევის მიზნით მე მივუღზავნე მათ ჩემთან მყოფი არტილერიის პორუჩიკი თავადი შარვაშიძე და დავავალე მას დაეყოლიებინა გლეხები. ბრბო დაიშალა, ხოლო მეორე დღეს ყველა, მცირე გამონაკლისის გარდა, გამოცხადდა ჩემთან ოზურგეთში... მე დავაპატიმრე ხუთი მოთავე, ხოლო შემდეგში შეპყრობილ იქნა კიდევ სამი კაცი“². ესენი იყვნენ მაქსიმე ღლონტი, ალექსანდრე მამულაიშვილი, მაქსიმე საღრაძე, გოგია მამინაიშვილი, ლევან მალაზონია, ნიკოია ბაქანიძე, ივანე გუჯაბიძე და ანტონ მოისწრაფიშვილი³.

გურიის გლეხების მესამე გამოსვლა იმავე წლის სექტემბერ-ოქტომბერში მოხდა. მის მთავარ მამოძრავებელ ძალას თავად მაჭუტაძეების ყმები წარმოადგენდნენ. მღელვარების უშუალო მიზეზი მებატონეთა გლეხებისათვის ტყის მასივით სარგებლობის აკრძალვა გახდა. ტყე კი აუცილებელი იყო სოფლის მშრომელი მოსახლეობისათვის. მას იყენებდა არა მარტო საწვავ-საშენი მასალის მოსამარაგებლად, არამედ საყანე ადგილებდაც. მცირემიწიანი და სრულიად უმიწო გლეხები იძულებული იყვნენ გაეჩეხათ ტყის გარკვეული ნაწილი, გაესუფთავებინათ იგი და საყანედ გამოეყენებიათ. ასე გააკეთეს მაჭუტაძეების ყმებმაც. მებატონებმა კი, რომლებიც ტყეს თავიანთ ხელუხლებელ საკუთრებად თვლიდნენ, გლეხების ასეთი „თავგასულობა“ ვერ მოითმინეს და მათ მომავალში ტყით სარგებლობა აუკრძალეს, ხოლო დამუშავებული ყანის მოსავლიდან მეთადი ნაწილის გადახდა დააკისრეს. პოლიციის იძულებით გლეხები ერთხანს კიდევ ასრულებდნენ ამ მოთხოვნას, მაგრამ მერე უარი თქვეს⁴.

მაჭუტაძეები, რა თქმა უნდა, არ სთმობდნენ თავიანთ პრივილეგიებს და დახმარებისათვის ისევ და ისევ ხელისუფლებას მიმართავდნენ. ასეთი მიმართვის შედეგად გლეხები ჯერ კიდევ 1862 წლის მარტში კატეგორიულად გააფრთხილეს, «Чтобы они не смели портить лесов без особого дозволения помещиков, не вывозили лесных материалов и

1 შ. ჩხეტიია, გლეხთა მოძრაობა გურიაში, გვ. 198.

2 იქვე, გვ. 200.

3 იქვე, გვ. 215.

4 იქვე, გვ. 181.

не расчищали лесных мест для посевов»¹. მაგრამ ამას შედეგი არ მოჰყოლია. სამაზრო ხელისუფლებამ გლეხებს ისევ მოუწოდა დაკისრებული ვალდებულების წესიერად შესრულებისკენ. მაზრის უფროსმა პრინცმა თავი მოუყარა ნიგოთის, ჯკონაგვარისა და ქვიანის მშრომელებს და გამოუცხადა, რომ მათ, მკაცრი სასჯელის შიშით, შეეწყვიტათ მიწითა და ტყით თვითნებური სარგებლობა და რომ ყანად ქცეული ადგილები-სთვის „ეხდათ შემოსავლის ერთი მეათედი“². შედეგი არც ამას მოჰყოლია. მაშინ პრინცმა ნიგოთში თავისი მოხელე, თარჯიმანი ყენია გაგზავნა, თან კაზაკები გააყოლა და გლეხებისაგან მაჭუტაძეების „კუთვნილი“ გადასახადების აკრეფა დაავალა. ყენიამ სასწრაფოდ შეკრიბა მოსახლეობა, მაზრის უფროსის ბრძანება გააცნო და წინააღმდეგობის შეწყვეტა ურჩია. ამის საპასუხოდ გლეხებს, საგამომძიებლო საქმის თანახმად, განუცხადებიათ, «Что они о неправильном требовании с них 10-й части с уро-жая принесли жалобу г-ну кутаисскому генерал-губернатору (И) что впредь до разрешения этой жалобы они не могут заплатить требуемого»³.

ყენიამ საქმეში მღვდელი ბესარიონ კალანდარიშვილი ჩარია და მისი შემწევობით სცადა ურჩთა მორჩილებაში მოყვანა, მაგრამ წარუმატებლად. სამაზრო ხელისუფლების წარმომადგენელი მაინც თავისას არ იშლიდა და გლეხებს გადასახადის ძალით აკრეფით ემუქრებოდა. ამან, როგორც იტყვიან, აავსო მოთმინების ფიალა და მაჭუტაძიანთ ყმები ყენიასა და მის რაზმს შეებნენ. გაიმართა ძლიერი ხელჩართული ბრძოლა, რომლის დროსაც დაიჭრნენ თვით ყენია, აზნაურები: ბეჟუყე ბოლქვაძე, ლევან ქორდანია, ნიკოლოზ ებრალიძე, გლეხები: ბესოშინაძე, ბესეიშვილი და სხვები⁴. ეს მოხდა 1862 წლის 10 ოქტომბერს.

ორი დღის შემდეგ ნიგოთის თვით პრინცი გაემგზავრა. 13 აპრილს მისი ბრძანებით ხალხი ერთ მინდორზე შეიკრიბა. მაზრის უფროსმა მასთან მოსალაპარაკებლად თავადი შარვაშიძე გაგზავნა, მაგრამ კვლავ უშედეგოდ⁵. ამის შემდეგ გლეხებმა დატოვეს კრების ადგილი და მახლობლად მდებარე ტყეს შეათარეს თავი. მათ იქ თვით პრინცი ეწვია და ერთხელ კიდევ სცადა ტყბილი სიტყვით მორჩილებაში მოყვანა, მაგრამ ისინი ყვირილით შეხვდნენ მას და ლაპარაკის საშუალება არ მისცეს. მაზრის უფროსი მოერიდა მათთან შეხვედრას. მან დამატებითი ძალები

¹ სმ, 7, გვ. 209.

² იქვე, გვ. 211.

³ იქვე, გვ. 212—213.

⁴ შ. ჩხეტიია, გლეხთა მოძრაობა გურიაში, გვ. 203—204.

⁵ იქვე, გვ. 204.

⁶ იქვე.

გამოითხოვა და მხოლოდ ამის მერე შეუდგა იგი აჯანყების რადიკალური ზომებით ჩაქრობას. ოქტომბრის მეორე ნახევრისათვის ნიგოთში „წესრიგი“ უკვე დამყარებული ჩანს. ზელისუფლებამ დააპატიმრა მღელვარების მთავარი მონაწილენი — გრიგოლ, ბიჭია, ივანიკა და კაკაბა კალახდარიშვილები, გურგენ ნარსია, ივანე მანჯგალაძე, მაქსიმე გოგიშვილი, გიორგი თავდიშვილი, ბიჭია ფირცხალაიშვილი და დიანოზ ფილია¹. ესენი ქუთაისის ციხეში მოათავსეს, განსხვავებით იმ 8 კაცისაგან, რომლებიც აგვისტოს თვეში დააპატიმრეს და ცოტა მოგვიანებით თბილისს გაისტუმრეს.

საქმის გამოძიება ძალიან ნელი ტემპით მიმდინარეობდა, პატიმრებს თვეობით არავინ არაფერს ეკითხებოდა, ციხის პირობები კი მეტად ძნელი ასატანი იყო. გლეხები ძიების დაჩქარებასა და სამართალს ითხოვდნენ. ჩვენ, სწერდნენ მეფისნაცვალს თბილისის ციხის პატიმრები 1863 წლის 16 დეკემბერს, ვუჩიოდით ჩვენს ბატონს იმისათვის, რომ მისგან „ღიღი შეწუხება გვექონდა და განუკითხავათ ვიმყოფებოდით დასჯილი; ჩვენმა მწუხარებამ გვაგონა საზოგადოებით ჩივილი, რომელიც ჩვენ მრავალჯერაუც გახლდით ნაჩივარი და საბუთიც გვექონდა... (მაგრამ) ჩვენი საჩივარი მუდამჟამსა დაფარული შეიქმნა და (მას) უმაღლეს მთავრობის წინაშე აღარ მიადწევინეს... ამაზედა საზოგადოებით ვჩიოდით ჩვენ, რომელ ჩვენი ვითარება და მწუხარება გვეცნობებინა თქვენი უგანათლებულესობისათვის... სხვა ჩვენც არც ბუნტი გვეწადია და არც სახელმწიფოს ღალატი... ჩვენ იმპერატორ ხელმწიფისა ერთგული გახლდით მუდამ-ჟამსა და ღლესაც გახლავართ. მხოლოდ ჩვენ ჩვენსა მწუხარებას ვჩივით საბუთითა და ამაზედ ვთხოვთ მოწყალებას თქვენს უგანათლებულესობას, რათა მოიღოთ ღვთიური მოწყალება და ჩვენი გარემოება განიხილოთ და განუკითხავად არა გვყოთ დასჯილი“².

პატიმარ გლეხთა შესახებ საკმაო ხანს მიმდინარეობდა მიწერ-მოწერა. საბოლოოდ, ყველა „დამნაშავის“ ბედის გადაწყვეტა ქუთაისის გენერალ-გუბერნატორს მიანდევს³. სამწუხაროდ, საბუთებიდან არ ჩანს, თუ ვის რა სასჯელი დაადვა გუბერნატორმა და რომელი მათგანი როდის გაანთავისუფლა, მაგრამ საფიქრებელია, რომ მღელვარების მონაწილენი კიდევ კარგა ხანს იყვნენ საპატიმროში⁴.

ერთი წელიც არ იყო გასული გურიის გლეხთა მღელვარებიდან, რომ სამეგრელოში აჯანყდნენ თავად ჩიქოვანების ყმები. მიუხედავად იმისა, რომ ეს მოძრაობა, რომელიც 1863 წლის მაისში მოხდა, მხოლოდ

¹ შ. ჩხეტიია, გლეხთა მოძრაობა გურიაში, გვ. 215.

² იქვე, გვ. 223.

³ მას გაუგზავნეს თბილისის ციხეში მყოფი გლეხებიც (სმ. 7, გვ. 257—258).

⁴ შ. ჩხეტიია, გლეხთა მოძრაობა გურიაში, გვ. 188—189.

ერთ სოფელს — თამაკონს — შეეხო და ამდენად იზოლირებულ ხასიათს ატარებდა, მაინც მნიშვნელოვან როლს წარმოადგენს ბატონყმური ურთიერთობის წინააღმდეგ ბრძოლის ისტორიაში.

ის მოვლენები, რომლებიც წინ უსწრებდნენ ამ სახალხო პროტესტს, შემდეგნაირად წარმოიდგინება¹. 1819 წელს სამეგრელოს მთავარმა ლევან V დადიანმა თავად როსტომ ჩიქოვანს 5 კომლი გლეხი აჩუქა, გვარად ჯანაშიები და ფაცაცეები. ახალმა ბატონმა ისინი მებეგრე გლეხების მდგომარეობაში ჩააყენა და სხვათა შორის საგლეხო გადასახადის გადახდა დააკისრა, რაც 100 კოკა ღვინოსა და 10 ლორს უდრიდა. ეს გადასახადი, რომელიც ისედაც ძალიან მძიმე იყო, კიდევ უფრო გადიოდა როსტომ ჩიქოვანის მემკვიდრეობის დროს. იმასთან დაკავშირებით, რომ ჯანაშიებისა და ფაცაცეების 5 კომლი დროთა განმავლობაში 23 კომლად იქცა, როსტომის შვილებმა ვალდებულების შესაბამისად გადიდება მოისურვეს და წინანდელი 100 კოკა ღვინოსა და 10 ლორის ნაცვლად ხელქვეითებს 460 კოკა ღვინო და 46 ლორი მოსთხოვეს. გლეხებმა ამაზეც უარი თქვეს. სამეგრელოში არსებული ჩვეულების თანახმად, ამბობდნენ გლეხები, გადასახადების გადიდება მხოლოდ იმ შემთხვევაშია დასაშვები, როდესაც ახლად შექმნილ-ჩამოყალიბებულ ოჯახს მებატონე აძლევს დამატებით ნაკვეთს. რაკი ასეთი რამ ჩიქოვანებს არ გაუყვებოდათ, ჩვენ მათი მოთხოვნა უკანონოდ მიგვაჩნია და უარს ვაცხადებთ მის შესრულებაზეო². მემამულეები ამას ყურადღებას არ აქცევდნენ და ისინი თავისას დაეინებით მოითხოვდნენ.

მაშინ გაჭირვებაში ჩავარდნილმა თამაკონის (სენაკის ოლქი) გლეხებმა თვითნებურად შეწყვიტეს გადასახადების ძლევა და ერთდროულად სათანადო თხოვნა-საჩივრით წარდგნენ ხელისუფლების წინაშე. ისინი აყეხებდნენ საკითხს არა მარტო გადასახადების შემცირების, არამედ საერთოდ ჩიქოვანების ბატონობისაგან განთავისუფლების შესახებ³. მაგრამ, როგორც მოსალოდნელიც იყო, არაფერი გამოვიდა; „სენაკის ოლქის უფროსმა, სამეგრელოს მმართველმა და ქუთაისის გენერალ-გუბერნატორმა, — ნათქვამია თავად აბაშიძის მოხსენებით ბარათში (1863 წ.), —

¹ მღელვარების მთელი მსვლელობა გადმოცემულია პროფ. შ. ჩხეტიას გამოკვლევის „გლეხების აჯანყება 1863 წელს სამეგრელოში“ მიხედვით, რომელიც გამოქვეყნდა 1937 წელს „მასალებში საქართველოს და კავკასიის ისტორიისათვის“ (ნაკვეთი 1). ქვემოთ შ. ჩხეტიას სტატიის დასახელებისას გვერდები მითითებული იქნება მასალების მიხედვით.

² შ. ჩხეტია, გლეხების აჯანყება 1863 წელს სამეგრელოში, გვ. 84—85.

³ „ჩვენი თხოვნის სიმართლეში სათანადოდ დარწმუნების შემდეგ, ვთხოვთ გაგვანთავისუფლოთ თავად ჩიქოვანების მიერ უკანონო დაუფლებისაგან“ (იქვე, გვ. 109; შდრ. გვ. 110, 116.)

მიიღეს რა მხედველობაში, რომ გადასახადი საუდიერო, მხარის ჩვეულების მიხედვით, არ ნაწილდება გაყოფილ ოჯახებს შორის, არამედ იგივე რჩება თვითეული კომლისათვის უცვლელად და რომ ამ დროს ანგარიში არ ეწევა გასაყოფ ოჯახის განკარგულებაში არსებულ მიწის რაოდენობას, გლეხების თხოვნა სცნეს უსაფუძვლოდ¹.

საკითხი გლეხების სასარგებლოდ არც მეფისნაცვალ მიხეილ ნიკოლოზის ძეს გადაუწყვეტია, რომელმაც თამაკონელთა საჩივარი 1863 წლის მარტში მიიღო. მაშინ მათ ერთმანეთს შეჰფიცეს გადასახადი არ გადაეხადათ და ჩიქოვანებს არ დამორჩილებოდნენ, ხოლო ძალდატანების შემთხვევაში შეიარაღებული წინააღმდეგობა გაეწიათ. ბრაზმორეულმა მემამულეებმა მუქარა-დაშინების გზით სცადეს ურჩთა მორჩილებაში მოყვანა, მაგრამ უშედეგოდ. მაშინ საქმეში სენაკის ოლქის უფროსი კ. ბოროზდინი ჩაერია. მან 1863 წლის 9 მაისს სოფელ თამაკონს თავისი თანაშემწე ნანეიშვილი მიავლინა. ნანეიშვილმა, რომელსაც ახლდა 10 კაზაკი და თავადაზნაურთა შეიარაღებული რაზმი, წარმომადგენელი მიუგზავნა გლეხებს და მათ გონს მოსვლა ურჩია. ეს წინადადება აჯანყებულებმა არსებითად უყურადღებოდ დატოვეს და ოლქის უფროსის თანაშემწეს შეუთვალეს, რომ ისინი უცდიან მეფისნაცვლის სახელზე გაგზავნილი საჩივრის პასუხს.

ნანეიშვილმა ძალის გამოყენება გადაწყვიტა. იგი კაზაკებითა და თავად-აზნაურთა რაზმით აჯანყებულთა ბანაკისაკენ გაემართა. გლეხების მიერ მოწყობილმა სადარაჯო პუნქტმა შენიშნა მოწინააღმდეგე ძალების მოახლოება. არ სურდათ რა საქმის გართულება, თამაკონელებმა გააფრთხილეს ისინი და წინადადება მისცეს უკან გაბრუნებულიყვნენ. მაგრამ ნანეიშვილი თავისას არ იშლიდა. გლეხებმა საოლქო ზელისუფალის ამ სიჯიუტეს სროლით უპასუხეს. ასევე მოიქცნენ კაზაკებიც. ამ შეტაკების დროს, რომელიც 10 მაისს მოხდა, დამსჯელთა რაზმს სამი კაცი გამოაკლდა. ერთი მათგანი — მამასახლისი ბეჟანა დგებუაძე — მოკლულ იქნა, ხოლო ორი — აზნაური გიორგი დგებუაძე და გლეხი გუთუ კვაშილავა — დაჭრილი².

ყოველივე ამან საგონებელში ჩააგდო ოლქის უფროსი, სამეგრელოს მმართველი და ქუთაისის გუბერნიის მთელი ადმინისტრაცია. მათ ამჟამად აჯანყებულთა წინააღმდეგ, რომელთა რაოდენობა 150—200 კაცს არ აღემატებოდა, დასძრეს 700—800 კაცისაგან შემდგარი სამხედრო ნაწილები და თავად-აზნაურთა რაზმები³. ბოროზდინმა, რომელიც პირადად ხელმძღვანელობდა ოპერაციის ჩატარებას, გლეხებს წარმომადგენლები

¹ შ. ჩხეტია, გლეხების აჯანყება 1863 წელს სამეგრელოში, გვ. 86, 116.

² იქვე, გვ. 91, 116.

³ იქვე, გვ. 95.

მიუგზავნა, დაუყოვნებლივ დაშლა და მღელვარების მეთაურთა გაცემა მოსთხოვა, მაგრამ ამაზე მტკიცე უარი მიიღო. მოთმინებიდან გამოსულმა ოლქის უფროსმა თამაკონელთა მკაცრად დასჯა გადაწყვიტა. 13 მაისს მისი ბრძანებით თამაკონს, რომლის მოსახლეობა კარზე მომდგარი საშიშროების მოლოდინში გაიხიზნა და მთა-გორიან ადგილებში გამაგრდა, შეიარაღებული რაზმები შეესია. სოფელს საშინელი უბედურება დაატყდა. იგი სულერთიანად გადაწვეს და გააპარტახეს. დაზარალებულთა მოწმობით¹, მოწინააღმდეგეს დაუწვავს 29 სახლი „თავისი მოწყობილობებით“, 13 ნალია „სიმინდითა და ფეტვით გავსებული“, 300 საწნახელი, საწოლი და ტანისამოსი. გარდა ამისა, თან წაუსხამთ შინაური საქონლის დიდი რაოდენობა.

ეტყობა, ძალამ თავისი გაიტანა. მღელვარების მონაწილეთა უმრავლესობა, რომელიც კარგად ხედავდა არათანაბარი ბრძოლის გაგრძელების უპერსპექტივობას, წინააღმდეგობის შეწყვეტისა და ხელისუფლებასთან მოლაპარაკების გზას დაადგა. გლეხებმა ამ უკანასკნელს 7 კაცისაგან შემდგარი დელეგაცია მიუგზავნეს და შეუთვალეს, რომ ისინი იარაღს პყრიან და მშვიდობიან შრომას უბრუნდებიან.

დაიწყო რეპრესიები. ადმინისტრაციამ, მკვლევართა ვარაუდით, დააპატიმრა სულ 30—40 კაცი, აქედან ხუთი გასამართლებამდე გარდაცვლილა, ცამეტი პასუხისგებაში მიუციათ, ხოლო დანარჩენები გაუნთავისუფლებიათ². პასუხისგებაში მიცემული გლეხებიდან ზოგს ციმბირში გადასახლება მიესაჯა, ზოგს კი სასჯელის უმაღლესი ზომა — ჩამოხრჩობა³.

ასე ტრაგიკულად დამთავრდა მიწისა და თავისუფლებისათვის ბრძოლის კიდევ ერთი საყურადღებო ეპიზოდი.

აჯანყების ჩაქრობისა და გამოძიების დამთავრების შემდეგ, მატერიალურად სრულიად განადგურებულმა თამაკონელმა გლეხებმა არაერთხელ მიმართეს მთავრობას თხოვნით ზარალის თუნდაც ნაწილობრივი ანაზღაურების შესახებ. გემუდარებით „ჩვენი დამწვარი სახლები აგვინაზღაუროთ ჩიქოვანების საკუთრებიდან კანონიერ ფასებში“⁴, სწერდნენ ისინი მეფისნაცვალს მიხეილ ნიკოლოზის ძეს 1864 წლის 3 ივნისს, მაგრამ, ჩანს კავკასიის უმაღლეს ხელისუფლებას თამაკონელთა ეს თხოვნა არ დაუკმაყოფილებია. ყოველ შემთხვევაში 1864 წლის განმავლობაში საქმე ამ მიმართულებით უბრალო ბიუროკრატიული მიწერ-მოწერის ფარგლებს არ გასცილებია.

¹ შ. ჩხეტიია, გლეხების აჯანყება 1863 წელს სამეგრელოში, გვ. 96, 106.

² იქვე, გვ. 102.

³ იქვე, გვ. 105.

⁴ იქვე, გვ. 109.

მიუხედავად იმისა, რომ არც ერთ ზემოაღწერილ მდელვარებას სასურველი შედეგი არ მოჰყოლია, სოფლის მშრომელი მოსახლეობა იარაღს მაინც არ ყრიდა. 1864 წელს მოხდა გლეხთა გამოსვლა თბილისის მაზრასა და თიანეთის ოკრუგში (სოფ. მატანში)¹, ხოლო ორი წლის შემდეგ — აფხაზეთში. ეს უკანასკნელი დიდი მასშტაბის ანტიფეოდალური და ანტიკოლონიური ხასიათის გლეხთა აჯანყება იყო. მისი აფეთქება დააჩქარეს ხალხში გავრცელებულმა ხმებმა იმ რეფორმის ბატონყმური არსის შესახებ, რომლის გასატარებლად მოსამზადებელი მუშაობა უკვე მიმდინარეობდა აფხაზეთში. გლეხები აღშფოთებული იყვნენ, კერძოდ, მთავრობის განზრახვით, რომ დამოკიდებულ მოსახლეობას თავის ხარჯზე გაპოესყიდა მიწა და გადასახადები². აფხაზეთის სოფლის მშრომელი მოსახლეობა ენერგიულ პროტესტს აცხადებდა ამის წინააღმდეგ და მოითხოვდა რეფორმის სულ სხვა საფუძველზე გატარებას.

1866 წლის ივლისში მუშაობა დაიწყო სოხუმის წოდებრივ-საადგილმამულო კომისიამ, რომელიც რეფორმისთვის საჭირო მასალებს აგროვებდა. მისი წევრი ჩერეპოვი, ბზიფის ოკრუგის უფროსი იზმაილოვი, აზნაური ტიტუ მარლანია და სხვები ხსენებულ ოკრუგს ესტუმრნენ და გლეხებს მათთვის საინტერესო საკითხებზე პასუხის გაცემა მოსთხოვეს. გლეხებმა ამაზე მტკიცე უარი განაცხადეს. ასე მოიქცნენ, კერძოდ, აფცხვას, მუგუძირხვას, ჩაბალურხვას და სხვა სოფლების მცხოვრებნი³. მათ პირდაპირ უთქვამთ, რომ ისინი ერთი წუთითაც არ ფიქრობენ მიიღონ თავისუფლება გამოსყიდვის გზით და ამიტომ უარს ამბობენ ცნობების მიწოდებაზე. «Мы не понимаем такого освобождения крестьян, — განუცხადებია ჩერეპოვისა და მისი თანმხლები პირებისათვის ხალხის წარმომადგენელს შამბას, — как вы нам объясните. У нас нет собственных средств выкупиться от помещиков... Если правительству угодно освободить крестьян, то мы надеемся, что государь будет и к нам милостив, обратить внимание на нашу бедность, выкупит нас, а наших помещиков не оставит без вознаграждения от себя, а не из нашей собственности»⁴.

მიიღო რა ცნობა ჩერეპოვის საქმიანობის წარუმატებლობისა და გლეხების წინააღმდეგობის შესახებ, ბზიფის აფხაზეთში თვით სოხუმის გან-

¹ ნ. ბერძენიშვილი, ვ. დონდუა, მ. დუმბაძე, გ. მელიქიშვილი, შ. მესხია, პრ. რატიანი, საქართველოს ისტორია, I, დამხმარე სახელმძღვანელო, თბ., 1958, 484.

² Г. Дзидзариya, Восстание 1866 года в Абхазии, Сухуми, 1955, გვ. 127—128.

³ იქვე, გვ. 134.

⁴ СХАО, II, გვ. 558; Г. Дзидзариya, Восстание 1866 года в Абхазии, გვ. 135

ყოფილების უფროსი პოლკოვნიკი კონიარი ჩავიდა. იგი სოფ. ლიხნში მოწვეულ სახალხო კრებაზე გამოვიდა და მის მონაწილეებს რეფორმისთვის საჭირო ცნობების დაუყოვნებლივ წარმოდგენა მოსთხოვა, მაგრამ უშედეგოდ. „არა, პოლკოვნიკო, — ერთხმად უპასუხეს გლეხებმა, — ჩვენ ვერ შევასრულებთ თქვენს მოთხოვნას, კმარა, მეტი მოთმენა არ შეგვიძლია“¹.

კონიარის შემდგომმა უტაქტო და უხეშმა მოქმედებამ ხალხი უკიდურესობამდე მიიყვანა. მოთმინებადაკარგული გლეხები ეცნენ სოხუმის განყოფილების უფროსს და მის ამაღას. ისინი გაიქცნენ და თავი ყოფილი მთავრის მიხეილ შარვაშიძის სასახლეს შეაფარეს. ხალხი მათ ფეხდაფეხ მიჰყვა. მოხდა სისხლისმღვრელი შეტაკება, რომლის დროსაც მოკლულ იქნა პოდპორუჩიკი სურინოვიჩი, ჩერეპოვი, კონიარი, იზმაილოვი, ოფიცერი არტიუხოვი და 50-ზე მეტი კაზაკი².

ლიხნელთა გამოსვლით დაიწყო საერთო-სახალხო აჯანყება, რომელმაც თითქმის მთელი აფხაზეთი მოიცვა და იარაღს ქვეშ 20 ათასამდე კაცი დააყენა. 26 ივლისს აჯანყებულთა ერთი ნაწილი (4 ათასი კაცის რაოდენობით), რომელშიც შედიოდნენ სოფლების: აცის, ანუხვის, ფსირცხის (ახლანდელი გუდაუთის რაიონი), იაშთუხისა და გუმის მცხოვრებნი სოხუმისაკენ გაემართნენ. 27 ივლისს ისინი ქალაქს მიუახლოვდნენ და მისი მისადგომები დაიკავეს, მაგრამ მეორე დღეს ფოთიდან მოსულმა სამხედრო ძალებმა უკან დაახევინეს. 30 ივლისს აჯანყებულებმა იერიში მიიტანეს სოხუმის ციხეზე და იქ მდგომ გარნიზონზე, მაგრამ უშედეგოდ.

იმავე 30 ივლისს, დღის მეორე ნახევარში, კონტრშეტევაზე გადავიდნენ ქუთაისის გენერალ-გუბერნატორის სვიატოპოლკ-მირსკის მეთაურობით სოხუმში ჩასული რეგულარული ჯარის ნაწილები. ბრძოლა, რომელიც 4 საათზე მეტ ხანს გაგრძელდა, აჯანყებულთა უკანდახევით დამთავრდა³. გლეხებმა ამის შემდეგაც არაერთხელ სცადეს ხსენებული სიმაგრის აღება, მაგრამ ყველა შემთხვევაში წარუმატებლად. ხალხი იარაღს მაინც არ ყრიდა. ახალი შერკინებისთვის ემზადებოდნენ როგორც სოხუმის მიდამოებში, ისე აფხაზეთის სხვა რაიონებში (წებელდა, ბზიფი) მოქმედი აჯანყებულთა ნაწილები. ამით შეუფოთებული ადმინისტრაცია ძალების მაქსიმალურ მობილიზაციას ახდენდა. ისინი მოდიოდნენ ფოთიდან, ნოვოროსიისკიდან, სევასტოპოლიდან და სხვა ადგილებიდან. აგვისტოს პირველი რიცხვებისათვის სოხუმში უკვე დიდძალმა ჯარმა მოიყარა თავი. სვიატოპოლკ-მირსკი ჯერჯერობით მოერიდა იარაღის გამოყენებას და აზვირთებული მასის სიტყვით დაშოშმინება სცადა. ამ მიზნით მან 3 აგ-

¹ Г. Дз и д з а р и я, Восстание 1866 года в Абхазии, зб. 145.

² იქვე, зб. 149.

³ იქვე, зб. 163.

ვისტოს თავი მოუყარა სოხუმის მახლობელი სოფლების მამასახლისებს და მათი მეშვეობით აჯანყებულებს იარაღის დაყრა მოსთხოვა¹. მეორე დღეს მათ შერთლაც დაიწყეს იარაღის ჩაბარება. მალე იგივე გააკეთეს წებელდისა და ბზიფის გლეხებმაც. სექტემბრის დასაწყისისათვის აჯანყებულთა განიარაღება უკვე დამთავრებული იყო. ხელისუფლება გამარჯვებას ზეიმობდა «Радуюсь лучшими известиями из Абхазии»², სწერდა იმპერატორი ალექსანდრე II თავის ძმას მეფისნაცვალს კავკასიაში მიხეილ ნიკოლოზის ძეს.

გლეხებს „თავგასლობა“, რა თქმა უნდა, არ აპატიეს. მთავრობამ აჯანყების ხელმძღვანელები მკაცრად დასაჯა. სამხედრო-საველე სასამართლოს დადგენილებით სამი კაცი საჯაროდ ჩამოახრჩეს, ხოლო 30 კაცი შორეულ ადგილებში (უმთავრესად ციმბირში) გადაასახლეს. გადასახლებულთა შორის იყვნენ გლეხები: ოთირბა, ქუჯბა და სხვ. სასჯელი დაედოთ აგრეთვე აჯანყების დანარჩენ მონაწილეებს — ოსმან შამბას, პეტრე კობახიას, გუდ დბარს, მეოუსთ ფილიას, ნაურუზ შაყრილს და სხვ.

ასე დასრულდა სახალხო ბრძოლის ეს ეპიზოდიც, რომლის მთავარ მამოძრავებელ ძალას გლეხოზა წარმოადგენდა და რომელშიაც პირველ ეტაპზე ამა თუ იმ მიზეზით უკმაყოფილო თავადაზნაურთა მცირე ნაწილმაც მიიღო მონაწილეობა³.

ექსპლოატატორული რეჟიმის წინააღმდეგ ბრძოლას ეწეოდა არა მარტო გლეხოზა, არამედ ქალაქის მშრომელი მოსახლეობაც. ამის საილუსტრაციოდ შეიძლება დავასახელოთ თბილისის მუშების, ხელოსნებისა და წვრილი ვაჭრების გამოსვლა 1865 წლის ივნისში, რომელიც ჩვეულებრივ წყაროებსა და ლიტერატურაში „ამქართა გამოსვლის“ სახელითაა ცნობილი. მასში ნაწილობრივ შექმნა-ჩამოყალიბების პროცესში მყოფი მსხვილი და საშუალო ბურჟუაზიის წარმომადგენლებიც ლებულობდნენ მონაწილეობას.

სახალხო მოძრაობის ძირითადი მიზეზი ქალაქის დაბალი ფენების მძიმე ეკონომიური მდგომარეობა იყო. ეს ითქმის პირველ რიგში მუშებზე, რომელთა აბსოლუტურ უმრავლესობას ღროებით ან მუდმივად სოფლიდან მოსული — გამოქცეული გლეხოზა შეადგენდა. ოჯახისა და დიდი ვაი-ვაგლახით მოწყობილი საცხოვრებელი ადგილის დატოვება და ქალაქ-

¹ Г. Дзидзария, Восстание 1866 года в Абхазии, გვ. 169.

² იქვე, გვ. 179.

³ თავადაზნაურობის უკმაყოფილების უმთავრესი მიზეზი იყო უმაღლესი ხელისუფლების ცდა უარყო მათი მესაკუთრული უფლებები და მიწების ბატონ-პატრონად ხაზინა გამოეცხადებინა. მცირე მნიშვნელობა არც იმას ჰქონდა, რომ ამ „ბრწყინვალე“ წოდებამ აფხაზეთის სამთავროს ავტონომიის ლიკვიდაციით 1864 წელს დაკარგა მოქმედების ის თავისუფლება, რომელიც მას მანამდე ჰქონდა.

ში გადახვეწა, მართალია, გლენს „მემამულის ბატონობისაგან“ ათავისუფლებდა, მაგრამ, სამაგიეროდ, იგი, თანამედროვეთა მოწმობით, ბურჟუაზიის და მოხელეების ზღაპრით, ლუკმა-პურის მაძიებელი მაწანწალა ხდებოდა¹. ქვისა და ქვიშის, წყლისა და შეშის, ტომრებისა და სხვა ტვირთის ზიდვა, მდიდართა ბაღებში მუშაობა — აი რით ცდილობდა ის საკუთარი თავისა და ცოლ-შვილის შენახვას, მასზე დაკისრებული გადასახადების გადახდას. მაგრამ ამ მძიმე შრომით შექმნილი ფული იმდენად მცირე იყო, რომ ის მის მოთხოვნილებათა მხოლოდ ერთ, უმნიშვნელო ნაწილს აკმაყოფილებდა².

სახარბიელო არც წვრილი ხელოსნებისა და ვაჭარ-მიკიტნების მდგომარეობა ყოფილა. მართალია, მათი ცხოვრების პირობები შედარებით უკეთესი იყო, ვიდრე მუშებისა, მაგრამ არსებული ბიუროკრატიული რეჟიმი, ხელისუფლების უკუღმართი საფინანსო პოლიტიკა, გადასახადების მძიმე ტვირთი, უუფლებობა და სხვ. მათაც უხუთავდა სულს და პროტესტანტულად განწყობილი ფენების ბანაკში აქცევდა.

მთავრობასთან „სამღურავი“ თბილისის მსხვილ ბურჟუაზიასაც ჰქონდა. „პირველხარისხოვანი მოქალაქეები“ და, საერთოდ, ადგილობრივი ვაჭრები სულ უფრო მეტსა და მეტ უკმაყოფილებას გამოთქვამდნენ ახლადმოსული ვაჭრების გავლენის ზრდის გამო, რასაც, მათი აზრით, მთავრობაც უწყობდა ხელს³. ამის საილუსტრაციოდ ისინი 1864 წელს თბილისის ქალაქის თავად სპარსეთიდან ჩამოსულ გალუსტ შერმაზან-ვართანოვის არჩევას ასახელებდნენ⁴.

ისედაც შეწუხებული თბილისის მოსახლეობის, განსაკუთრებით კი ღარიბი ნაწილის, მოთმინებას ბოლო მაშინ მოელო, როდესაც ხელისუფლებამ, ქალაქის ბიუჯეტის საგრძნობი დეფიციტის⁵ დაფარვის მიზნით, არამცთუ გაადიდა არსებული გადასახადების ნორმა, არამედ რიგი ახალი, მანამდე სრულიად უცნობი გადასახადი დააწესა, რომლის მთელი სიმძიმე საზოგადოების დაბალ ფენებს დააწვა კისერზე. ამიერიდან მოსახლეობას ხაზინაში უნდა შეეტანა: 1) ბაჟი ქალაქსა და მის მიდამოებში სასმელებით ვაჭრობის ნებართვისათვის, გადიდებული, წინანდელთან შედარებით, 25% -ით; 2) გადასახადი საჯრომ და საეტლე ცხენებზე 5—10 მანეთის რაოდენობით (შესაბამისად); 3) თიხაზე და გაჯზე 4 ათასი მანეთის რაოდენობით წელიწადში; 4) სამშენებლო მასალაზე, რომელსაც ქუჩებსა და

¹ ნ. ნიკოლაძე, იენისის დღეები თბილისში, თბ., ტ.1, 1962, გვ. 300.

² იქვე, გვ. 300—301.

³ А. Г. Пирцхалаишвили, К истории выступления Тбилисских амкаров в 1865 г., «Исторические записки», т. 8. 1940, гв. 223.

⁴ იქვე.

⁵ იქვე, გვ. 224.

მოედნებზე ალაგებდნენ და, დასასრულ, 5) მოქალაქეთა სათანადო წიგნში ჩაწერაზე¹.

თუ რაოდენ საზიანო იყო ხალხის ფართო მასებისათვის ქალაქის მესვეურთა ინიციატივით გატარებული ეს ღონისძიება ჩანს იქიდან, რომ მისი წყალობით გამოძღვებ წოდებათა ყოველწლიური გადასახადი დაახლოებით 60 ათასი მანეთით გადიდდა².

ახალი გადასახადის შემოღებას თბილისის მუშები, ვაჭრები და ხელოსნები დიდი აღშფოთებით შეხვდნენ და მის ცხოვრებაში გატარებას მედგარი წინააღმდეგობა გაუწიეს. მათ კრებებზე გამოჰქონდათ ერთსულოვანი გადაწყვეტილებანი, არ დამორჩილებოდნენ ხელისუფლების განკარგულებას და მიეღწიათ მისი გაუქმებისათვის. ხალხმა საქმის მოგვარება ჯერ მშვიდობიანი გზით სცადა. მან თხოვნით მიმართა ქალაქის თავს, მეფისნაცვლის მოადგილეს და თვით მეფისნაცვალსაც კი, მაგრამ არაფერი გამოვიდა. მაშინ დაზარალებულებმა საჩივარი პირდაპირ იმპერატორს გაუგზავნეს და მას ახლად დაწესებული გადასახადების გაუქმება თხოვეს. ასე მოიქცნენ, მაგალითად, თბილისელი მიკიტნები. «Производя торговлю напитками, — სწერდნენ ისინი იმპერატორ ალექსანდრე II-ს, — сословие наше в сознании неизбежной обязательности отбывало установленные налоги безропотно; хотя по случаю повышения цен на жизненные потребности, многие из нас, и в особенности те, которые, торговали в кредит, не в состоянии будучи платить налог, закрывали заведения, а имущество отбиралось для аукционной продажи на пополнение недоимок. Ныне по распоряжению начальства... определено: сверх платимых нами в пользу казны и города Тифлиса налога взysкивать с 1-го июля сего (1865) года еще по 25%. Этот новый налог, окончательно убивая нашу торговлю, приведет к неизбежному разорению... При самых (даже) благоприятных условиях из годового оборота двухсот или трехсот рублей никак не может быть выручено прибыли, достаточной на уплату одних только налогов, не говоря о прочих по заведениям расходах.

В такой безвыходной крайности сословие наше дерзает воззвать к милосердию вашего императорского величества и всепод-

¹ „საარქივო მასალები თბილისის ამქართა 1865 წლის გამოსვლის ისტორიისათვის“ (პროფ. ლ. მელიქსეთ-ბეგის პუბლიკაცია, შემდეგში შემოკლებით „მასალები“) „საისტორიო მოამბე“, 3, გვ. 44—45.

² III. Ч е т и я, Тбилиси в XIX столетии, Тб., 1942, გვ. 272.

სცადა, მაგრამ წარუმატებლად — ხალხმა ის აუტანელი ცემით სიცოცხლეს გამოასალმა. ეს მოხდა 27 ივნისს.

საქმის ასეთმა მიმდინარეობამ ხელისუფლება დიდ საგონებელში ჩააგდო. ის, რა თქმა უნდა, აჯანყების ძალით ჩაქრობის გეგმაზე ხელს არ იღებდა, მაგრამ წარმატების მისაღწევად არც სხვა საშუალების გამოყენებაზე ამბობდა უარს. მან სცადა, კერძოდ, თბილისის მსხვილი ბურჟუაზიის, „პირველხარისხოვანი მოქალაქეების“ თავის მხარეზე გადმობრება, რისთვისაც მან ქალაქის თავის მოვალეობისგან გაანთავისუფლა ახლადმოსული, არამკვიდრი თბილისელი შერმაზან-ვართანოვი და მის მაგივრად ადგილობრივი კაცი სოლომონ აბესალომოვი დანიშნა¹.

აბესალომომ და აღნიშნული ღონისძიებით კმაყოფილმა „პირველხარისხოვან მოქალაქეთა“ წარმომადგენლებმა, მთავრობის დავალებით, მოლაპარაკება გამართეს აჯანყებულებთან. ისინი არწმუნებდნენ მათ შეეწყვიტათ მღელვარება, გაეღოთ დუქნები და უმაღლესი ადმინისტრაციისათვის ეთხოვათ ახლად დაწესებული გადასახადების გაუქმება, ან, უკიდურეს შემთხვევაში, მათი აკრეფის ვადის გადადება მეფისნაცვლის პეტერბურგიდან ჩამოსვლამდე². მაგრამ მშვიდობიან მოლაპარაკებას შედეგი არ მოჰყოლია.

მთავრობამ უკვე ძალის გამოყენება სცადა. 28 ივნისს, საღამოს, მოხდა სისხლიანი შეტაკება ჯარის ნაწილებსა და აჯანყებულებს შორის, რომლის დროსაც, ოფიციალური ცნობით, მოკლულ იქნა 4 და დაჭრილი — 7 კაცი. პროფ. პ. მელიქიშვილის მოწმობით კი, მარტო მოკლულთა რიცხვი რამდენიმე ათეულს აღწევდა.

ხელისუფლებამ თბილისის ღარიბი მოსახლეობის (მუშების, ზელოსნების და წვრილი ვაჭრების) აჯანყება ჩააქრო. სენატის განაჩენით, მის მეტ-ნაკლებად აქტიურ მონაწილეებს სხვადასხვა ვადით პატიმრობა და ციმბირში გადასახლება მიესაჯა³.

* * *

რაც ზემოთ ითქვა, მკაფიოდ ლაპარაკობს კლასობრივი ბრძოლის ჩვეულებრივზე მეტად გამწვავებაზე რეფორმის წინარე ხანის საქართველოში. ნიკო ნიკოლაძის მოწმობით, ყირიმის ომის შემდეგ გლეხთა საკითხის სიმწვავე ღრმავდებოდა თურმე „არა დღეობით, არამედ საათობით“ და

¹ А. П и р ц х а л а и ш в и л и, К истории выступления..., გვ. 232.

² იქვე.

³ „მასალები“, სმ. 3, გვ. 140—143.

მას მოუცავს როგორც მოწინავე ქართველი საზოგადოების, ისე კავკასიის ადმინისტრაციის მთელი გულისყური¹. ეს უკანასკნელი, ჩანს, სერიოზულ საგონებელში ჩავარდნილა. «Этот грустный нравственно-религиозный упадок туземного населения, — წერდა 1859 წელს ქუთაისის გენერალ-გუბერნატორი, — принимает такие размеры, что при дальнейшем их развитии невольно заставляет опасаться за будущее спокойствие вверенного мне края»². მეფისნაცვლის მიხეილ ნიკოლოზის ძის მოწმობითაც, განსახილველი ხანის საქართველოში ბატონსა და ყმას შორის დამოკიდებულება ისე გამწვავებულა, რომ მას შეუძლებლად მიაჩნდა აგრარული საკითხის მოგვარების თუნდაც მცირე ხნით გადადება. „მე, როგორც უკვე წინათაც გწერდი, — ნათქვამია მის 1863 წლის ივლისის თვით დათარიღებულ წერილში იმპერატორ ალექსანდრე მეორისადმი, — მივაქცევ ამ საგანს (ე. ი. გლეხთა საკითხს — ავტ.) მთელს ჩემს ყურადღებას და შევეცდები შეძლებისდაგვარად დავაჩქარო ამ მნიშვნელოვანი საკითხის გადაჭრა. მისი მოგვარება აუცილებელია გადაუდებლად, რადგანაც ურთიერთობა გლეხებსა და მემამულეებს შორის მეტად გამწვავებულია მთელს კავკასიის მხარეში, განსაკუთრებით კი აქ (შეიძლება იგულისხმებოდეს ახალციხის მაზრა, სადაც მეფისნაცვალს საზაფხულო რეზიდენცია ჰქონდა — ავტ.) და გორის მაზრაში და ჩვენ იძულებული ვაგხდით ბევრ ადგილას ეგზეკუცია გაგვეგზავნა. ძალიან ხშირად გლეხები უარს აცხადებენ ისეთი გადასახადების გადახდაზე, რასაც ჩვეულების თანახმად ძველი დროიდან მათი მამები და წინაპრები იხდიდნენ. თავისუფლების მოლოდინში გლეხები ნებას აძლევენ თავს ასეთი ურჩობა ჩაიდინონ»³.

ასე შეიქმნა საქართველოში რევოლუციური სიტუაცია, რომელმაც დღის წესრიგში დააყენა ბატონყმობის გაუქმების საკითხი. დრომოქმული სოციალ-ეკონომიური წყობილების შენარჩუნება არ სურდათ არა მარტო საზოგადოების დაბალ ფენებს, არამედ მისი ხელუხლებლად დატოვება შეუძლებლად მიაჩნდათ თვით მემამულეთა კლასის წარმომადგენლებსაც. ასეთი ვითარების შექმნაში დიდი როლი ითამაშა აგრეთვე ამ დროისათვის უკვე გაფორმებულმა ანტიბატონყმურმა იდეოლოგიამ.

§ 2. ანტიბატონყმური იდეოლოგიის ჩამოყალიბება

რეფორმის წინარე ხანის საქართველოს სოციალ-ეკონომიურ ცხოვრებაში მიმდინარე ძვრებმა განაპირობეს ახალი ანტიბატონყმური, რევოლუ-

¹ ნ. ნიკოლაძე, თხზ. (პროფ. დ. გამეზარდაშვილის რედაქციით), ტ. 1, თბ., 1962, გვ. 251—252.

² АКАК, XII, ч. II, გვ. 49.

³ ЦГИАМ, ф. 678, оп. I, д. 607, лл. 26—27; ი. ანთელავა, საგლეხო რეფორმა საქართველოში და მისი მნიშვნელობა, თბ., 1966, გვ. 3—4.

ციურ-დემოკრატიული იდეოლოგიის წარმოქმნა, რომლის წარმოადგენლები თერგდალეულების ან ქართველი სამოციანელების სახელით არიან ცნობილნი. მართალია, ილია ჭავჭავაძის, აკაკი წერეთლის, ნიკო ნიკოლაძის, გიორგი წერეთლის, დანიელ ჭონქაძის, რაფიელ ერისთავის, იაკობ გოგებაშვილის, სერგი მესხის, ბესარიონ ლოლობერიძის და სხვა თერგდალეულთა სოციალურ-პოლიტიკურ შეხედულებათა ფორმირება, როგორც უკვე ვთქვით, ჩვენი ქვეყნის სინამდვილის (ბურჟუაზიული ურთიერთობის განვითარება, ძლიერი გლეხთა მოძრაობა, მოწინავე აზრების მქადაგებელი ქართული ლიტერატურა და სხვ.) უშუალო ზეგავლენით მიმდინარეობდა, მაგრამ მცირე მნიშვნელობის ფაქტორს არც რუსეთისა და ევროპის პროგრესული საზოგადოების კეთილმყოფელი გავლენა წარმოადგენდა. ბელინსკის, დობროლიუბოვის, ჩერნიშევსკის, გერცენისა და სხვათა ნააზრევმა, მოსკოვის, პეტერბურგისა და რუსეთის სხვა ქალაქების სტუდენტთა რევოლუციურმა მოძრაობამ, დიდად შეუწყვეს ხელი ქართველი ახალგაზრდობის იდეურ ფორმირებას, საერთოდ და, კერძოდ კი იმ ნაწილის მსოფლმხედველობის ჩამოყალიბებას, რომელიც რუსეთის უმაღლეს სასწავლებლებში სწავლობდა.

თერგდალეულებმა არა მარტო „შეითვისეს უდიდესი სიძულვილი ბატონყმობისადმი, არამედ გაბედულად აღიმადღეს ხმა ამ ურთიერთობის წინააღმდეგ და მისი მოსპობა-გაუქმების მოთხოვნით გამოვიდნენ საზოგადოებრივ ასპარეზზე. თანამედროვის სიტყვებით რომ ვთქვათ, სწორედ მათ ეკუთვნოდათ „პირველი ხმა ბატონყმობის გადაგდებაზე“¹. „თუმცა დროება გამოეცვალა ქართველ ერს (გასული საუკუნის 50-იანი წლების ბოლოსათვის), — წერდა 1883 წელს ეგნატე იოსელიანი, — მაგრამ ბატონყმობა (მაინც) შეუტყვეველი დარჩა. არავინ არ იდო თავს მოეფიტებინა (საშუალება) ბატონყმობის ბოლოს მოსაღებად, ძველის მამა-პაპურ უსამართლობის გასასწორებლად. საზოგადო აზრი ერისა მოიშალა; საითყენაც უნდა მიბრუნებულიყო კაცი, ყოველის მხრით მონის კენესა ეწვეთებოდა ყურში. ეს გარემოება სუფევდა, როცა ახალი თაობა (ე. ი. თერგდალეულები — ავტ.) დაბრუნდა სწავლიდან, ამოიღო ხმა, ცხადად თუ მალვით, ბატონყმობის უსამართლობაზე... თავიანთ ძალას, ჭკუას დაუყოვნებლივ იმისთვის ხმარობდნენ „შვილები“; რომ მოესპოთ ძველი უსამართლობა, ბატონყმობა, ცდილობდნენ ჩამოერთმიათ მათრახი, პალაჩობა ყმებზედ და გამოეყვანათ ქვეყანა აზზე კაცად“² (ხაზი ჩვენია — ავტ.).

¹ ე. ი. ოსელიანი, ქართული ლიტერატურა, კურ. „ივერია“, 1883, № 4, გვ. 85.

² იქვე, გვ. 87—88.

ძველი დახავსებული წყობილების წინააღმდეგ პროტესტით თერგდა-
 ლეულებიდან პირველი რაფიელ ერისთავი გამოვიდა¹. მან ჯერ კიდევ
 1857 წელს, როდესაც „ბატონყმობის (გადავარდნის შესახებ) ჩუჩუნცი
 არსად იყო“², დაწერა ლექსი „მთხოვნელი მსაჯულისადმი“, რომელიც
 1861 წელს გამოაქვეყნა უშურნალ „ცისკარში“ იოსებ მიქაბერიძის ფსევ-
 დონიმით. ამ, როგორც ჩანს, სამეგრელოს გლეხთა აჯანყების უშუალო
 შთაბეჭდილებით დაწერილ ლექსში მკაცრადაა გაკრიტიკებული და დაგ-
 მობილი ის სოციალურ-პოლიტიკური სისტემა, რომელიც ნებას აძლევდა
 ერთ ადამიანს მონურ მორჩილებაში ჰყოლოდა მეორე ადამიანი და რო-
 ნელიც სავსებით ნორმალურად თვლიდა დედისაგან შვილის სამუდამოდ
 ჩამოშორებას. აი რა სიტყვებს ათქმევინებს პოეტი ბატონის უკუღმართი
 საქციელით გამწარებულ შვილწართმეულ დედას, მისულს მსაჯულთან
 სიმართლის საძიებლად:

მოველ, ბატონო, ღმრთისა მსაჯულო,
 გენაცვალების შენ ჩემი თავი,
 მსურვალედა გთხოვ, ცრემლითა გვედრი,
 გულს მომაშორე მე ცეცხლი მწვავი;
 გთხოვ, დამიბრუნო მე ჩემი შვილი,
 დედა ვარ მისი, განა მომკლავი?
 სხვა რად ჰპატრონობს ჩემსა ნაშობსა
 რისთვისა სტანჯავს მანდ მდგომი სვავი?
 შვილი ჩემია, უარს ხომ ვერ ვყოფ,
 გთხოვ, მომაშორო ეს ცეცხლის ალი,
 მე ბეერს ვერ შევძლებ, სუსტი ბუნების.
 დედა ცოდვილი, ბედკრული ქალი.
 ეს კაცი მებრძვის, შვილი წამართვა,
 ვისი უპყრია, მიბრძანე, ძალი?
 შენ რად არ მომცემ ღმრთის ნაჩუქრებსა,
 რად არ მიბრძანებ, თუ გწამს უფალი?³.

ამ ლექსით აღფრთოვანებული ილია ჭავჭავაძე წერდა: „ეს პირველი
 ხმა იყო ჩვენში სამწედ უსამართლოდ ჩაგრულთათვის. რაფიელ ერისთა-
 ვამდე ეს მწვავი ჩივილი ყმობით გაუპატიურებულ ღმრთის კერძო ადა-
 მიანისა არავის გაუთვალისწინებია, არავის უკითხავს თავის-თავისთვის ეს

¹ შ. ვაშაყმაძე, რაფიელ ერისთავი, თბ., 1962, გვ. 127.

² ი. ჭავჭავაძე, თხზ., ტ. III, 1953, გვ. 223.

³ რ. ერისთავი, რჩეული თხზ., თბ., 1958, გვ. 7.

მართლაც; ჰეინესი არ იყო, „დაწყველილი საკითხი“: ერთის ნაშობს მეორე რად ჰპატრონობს“¹.

ბატონყმური წყობილების და საერთოდ სოციალური უთანასწორობის წინააღმდეგაა მიმართული რაფ. ერისთავის მეორე ლექსიც „მათხოვარა გლახაკი“ (1859 წ.). ლექსის მთავარ გმირს სახლ-კარი დაეწვა. ბატონმა მას არამცთუ დახმარება არ გაუწია, არამედ გაძარცვა და თუ რამე გადაარჩინა უბედურ შემთხვევას — ისიც უცერემონიოდ წაართვა. გლეხი ლუკმაპურის საშოვნელად თბილისს ეწვია, სადაც ის ერთხანს შრომითა და გარჯით ინახავდა თავს. მაგრამ მალე ჯანი დაქარგა და ფიზიკური არსებობის შესანარჩუნებლად მათხოვრობის გზას დაადგა. ამოდ ფიქრობდა გლახაკი მდიდრებისგან მოწყალების მიღებას. ერთმა მათგანმა მას დახმარების მაგივრად ცხენი დაატაკა და ხელი მოსტეხა, ხოლო მეორემ ფულის ნაცვლად ქვა მიაჩეჩა ხელში².

რაფიელ ერისთავი ზემოთ დასახელებული ლექსებით (ისე როგორც სხვა ნაწარმოებებით) დიდად „ამხნევებდა მებრძოლ ახალგაზრდობას“ (აკაკი) ბატონყმურ ურთიერთობასთან შესაბამელად. მისი მოსპობა, პოეტის აზრით, არამცთუ აუცილებელი და გარდაუვალი იყო, არამედ ფრიად საჭირო და სასარგებლოც.

ახალი იდეოლოგიის შექმნაში სრულიად განსაკუთრებული როლი ითამაშა „სურამის ციხის“ ავტორმა დანიელ ჭონქაძემ (1830—1860 წწ.). ის იყო მესაიდუმლე ჩვენი საზოგადოებრივი ცხოვრების უმდაბლესი ფენისა — „ბატონყმობის უღელქვეშ მგმინავი გლეხკაცობისა“, რომელიც ხშირად სოციალური უსამართლობით აღშფოთებული დაუნდობლად უსწორდებოდა თავის მტარვალებს³. მისი შემოქმედების წყაროს სწორედ სოფლის მშრომელი მოსახლეობის ეს რევოლუციური განწყობილება და საქმიანობა წარმოადგენდა⁴. წინააღმდეგ აღექსანდრე ორბელიანისა 1859 წელს ჟურნალ „ცისკარის“ ფურცლებზე რომ გამოვიდა ძველი სისტემის დამცველი სტატიით, რომელშიაც ბატონსა და ყმას შორის არსებული ურთიერთობა მამაშვილურ დამოკიდებულებასთანაა შედარებული, დანიელ ჭონქაძემ ნაქსიმალური დამაჯერებლობით უჩვენა ხსენებული პირის მიერ შექმნილი წყობილების მთელი სისაძაგლე, მისი ანტიხალხური ხასიათი. ავტორმა დახატა ბატონყმური ურთიერთობის ნამდვილი, რეალისტური სურათი და ნათელყო ფეოდალური საზოგადოების ძირითადი კლასების ინტერესთა სრული წინააღმდეგობა. ამის საუკეთესო

¹ რ ა ფ. ერისთავი, რჩეული თხზ., თბ., 1958, გვ. 7.

² იქვე. გვ. 10—12.

³ მ ი ხ . ზ ა ნ დ უ კ ე ლ ი, ახალი ქართული ლიტერატურა, ტ. II, თბ., 1962, გვ. 153.

⁴ იქვე.

ილუსტრაციას წარმოადგენს „სურამის ციხის“ ერთ-ერთი მოქმედი პირის ოსმან-ალას (ნოდარის) თავგადასავალი.

„ერთხელ მამაჩემი, — უამბობდა ოსმან-ალა ღურმიშხანს, — წავიდა ძნის მოსატანად... ჩვეულებისამებრ მოუძლოდა ის ურემს წინ, რო არ დაქანებულიყო. მაგრამ ურემი დაქანდა, ხარ-კამეჩს თავი ვეღარ დაუჭირა, კამეჩებმა წააქციეს და ურემმა გაჭყლიტა. იმის სიკვდილის შემდეგ ჩვენ სახლში ყოველივე გადაბრუნდა გულადმა: ბატონმა ჯერ წავგვართო ვენახი, იმიტომ ვითომც, რო აღარ შეგვეძლო მოვლა, მერე თითო-თითოდ ხარ-კამეჩი და უკანასკნელათ უბრძანა დედაჩემს, რო გადასახლებულიყო იმასთან სახლის მოსამსახურეთ. საწყალი დედაჩემი! უნდა გენახა, რა მწუხარებით ესალმებოდა სახლს! ღმერთო, რაგვარად არ ეხვეწებოდა საწყალი ბატონს, რო დაენებებინა თავი და არ მოეშალა ოჯახი, მაგრამ ბატონს ვითომ არ ესმოდა. — იტირებს, იტირებს და დაჩუმდებაო! — აი აზრი რომელთამე ბატონთა; იმათ ჰგონიათ, რო ჩვენ კაცნი არ ვიყვნეთ, ჩვენ არ შეგვეძლოს სიყვარული და სიძულე, იმათ ჰგონიათ, რო ჩვენ არა გვქონდეს გული, არ გვქონდეს სჯა.

— დედაშვილობას, აგრემც ღმერთი გიცოცხლებს შვილებს, შენი ღვთის გულისათვის დამანებე თავი, — ეხვეწებოდა დედაჩემი; — რა მოსამსახურე უნდა ვიყო, მე თქვენი ბატონური ცხოვრებისა არა ვიცი რა. ჩემი შვილები აქედგან უფრო გემსახურებიან. რასაც მოვიყვანთ, სულ შენ მოგართმევთ, ჩვენ ნაცარს ავფშუქავთ და იმას ვჭამთ, ოღონდ ნუ მოგვიშლი ოჯახს“¹.

მაგრამ გულქვა ბატონმა არ ისმინა უბედური ქალის მუდარა და თავისი გაიტანა — დედა-შვილი საკუთარ სახლში წაასხა. აქ მათ ახალი ტრაგედია ელოდათ — ბატონმა შვილის გაყიდვა და მშობლისგან მისი სამუდამოდ ჩამოშორება გადაწყვიტა. „დედაჩემი, — ამბობს ოსმან-ალა, — დაემხო მიწაზე და დაუწყო ხვეწნა ბატონს ისე, როგორც შეუძლიან ხვეწნა დედას, რომელსაც საუკუნოდ ართმევენ შვილსა. ბატონმა უბრძანა ბიჭებს, რო გაეგდოთ ის კარში“².

განსაცდელში ჩავარდნილმა ადამიანებმა თავს გაქცევით უშველეს და თბილისს შეეხიზნენ, მაგრამ მალე გამოაშკარავდა მათი ვინაობა, შეიპყრეს და ხელებშეკრულნი ბატონს მოჰგვარეს. ამის მომდევნო საზარელ ამბებს კი ასე გადმოგვცემს ოსმან-ალა: „ბატონთან რო მიგვიყვანეს, იმან, შემდგომ სხვათა და სხვათა სასტიკთა ტანჯვათა, უბრძანა ბიჭებს, რო შევებით გუთანში. დიახ, გუთანში!... ხარის უღელი დაგვადგეს კისერ-

¹ დ ა ნ ი ე ლ ჭ ო ნ ქ ა ძ ე, სურამის ციხე, თბ., 1961, გვ. 17—18.

² იქვე, გვ. 18—19.

ზედ. მაგრამ ეს სასჯელი ბატონმა ჰპოვა მსუბუქად იმიტომ, რო გუთანში ხარები დადიოდნენ ძლიერ ნელა და ვერ დავიღლებოდით და ამისთვის მეორე დღეს შეგვაბა კვერში, კვერზე დაჯდა თვითონ და გვერეკებოდა. ცოტაც რომ დავმდგარვიყავით ამოსუნთქვისათვის, მაშინვე გველოდა სახრე. კარგა მოგენსენება, რამტენი სირბილი შეუძლია კაცს, უმეტესად ისე დასუსტებულს, როგორც იყო დედაჩემი. დედაჩემმა თითქმის ათჯერ შემოურბინა კალოს ისე, რო ერთი ჩივილიც არ ამოსვლია პირიდგან. მეთერთმეტედ რომ უნდა დავგვეწყო შემოვლა, დედაჩემი უეცრად წაიქცა და მოკვდა. საწყალს... არც კი დააცადეს მშვიდად მომკვდარიყო. ბატონს ეგონა, რო ატყუებდა... და ამიტომ სახრით დაუწყო ცემა... და ასე სახრის ქვეშ ამოუვიდა სული“¹.

ბატონმა არც ეს აკმარა ნოდარს (ოსმან-აღას). მან მის შეყვარებულს ნამუსი ახადა და ამით იგი თვითმკვლელობამდე მიიყვანა. უკიდურესობამდე მისული და მოთმინებადაკარგული ყმა სასტიკად გაუსწორდა მტარვალს: მან ხანჯლით აკუწა ბატონი და მისი ცოლ-შვილი. თვითონ კი ოსმალეთში გადაიხვეწა და იქ დაიღუპა.

ასე შეეწირნენ სოციალურ უსამართლობას ნოდარი და მისი დედა, ვარდო და ღურმიშხანი და „სურამის ციხის“ ბევრი სხვა გმირი.

აი ასე წარმოუდგინა დანიელ ჭონქაძემ თავის თანამედროვე საზოგადოებას ბატონყმური ურთიერთობა, რომელიც ალექსანდრე ორბელიანს, შამაშვილურ სიყვარულზე დამყარებულ, ჰარმონიულ საზოგადოებად ჰქონდა დახასიათებული. „სურამის ციხის“ ავტორი ღრმად იყო დარწმუნებული, რომ ხალხის კეთილდღეობის უზრუნველყოფა მხოლოდ ბატონყმობის მოსპობა-გაუქმებით იყო შესაძლებელი „სანამ ჩვენ ბატონის ყმანი ვართ, ჩვენში ბედნიერება არ შეიძლება“², ათქმევინა მან ღურმიშხანს. ამ სიტყვებში იგრძნობა არა მარტო დიდი სიძულვილი ბატონყმობისადმი, არამედ მხურვალე მოწოდება მისი ძალით დამხობისაკენ. დანიელ ჭონქაძე დაუინებით არწმუნებდა მშრომელ მოსახლეობას, რომ ხსნა მხოლოდ ძალის გამოყენებაშია და რომ თავისუფლების მოპოვება შეიძლება მხოლოდ მედგარი ბრძოლით³. სწორედ ამით აიხსნე-

¹ დ. ჭონქაძე, სურამის ციხე, თბ., 1961, გვ. 20.

² იქვე, გვ. 6.

³ „დ. ჭონქაძე, — წერს დ. გამეზარდაშვილი, — რადიკალურად მოაზროვნე „რაზნოჩინელია“. მას შეთვისებული ჰქონდა რუს რევოლუციონერ-დემოკრატთა პოლიტიკური მოძღვრება. იგი შორს იყო იმილუზიისაგან, რომ ხალხი „ზუვიდან“ მიიღებდა თავისუფლებას და მთელს იმედებს თვით ხალხზე და მასში მებრძოლი სულისკვეთების ზრდაზე ამყარებდა“ (იხ. მისი ნარკვევები ქართული რევოლუციის ისტორიიდან, II, თბილისი, 1957, გვ. 179).

ზა ის ძლიერი განგაში და პროტესტი, „სურამის ციხის“ გამოქვეყნებამ რომ გამოიწვია რეაქციონერ და ლიბერალ თავადაზნაურთა წრეში¹.

განსაკუთრებით ძლიერი იერიში ბატონყმურ სისტემაზე ილია ჭავჭავაძემ მიიტანა. მის ისეთ ნაწარმოებებში, როგორცაა „გუთნის დედა“, „აჩრდილი“, „კაკო ყაჩაღი“, „გლახის ნაამბობი“, „კაცია ადამიანი?!“ და სხვ., მოცემულია ამ სისტემის დაუნდობელი კრიტიკა და სააშკარაოზე გამოტანილი ყველა მისი უარყოფითი, საზოგადოებრივი პროგრესის შემფერხებელი და, მასასადამე, მთლიანად გასაკიცხი თვისება. ეს აზრია გატარებული, კერძოდ, 1858 წელს დაწერილ „გუთნის დედაში“. ამ ლექსში ავტორი გლეხის ეკონომიურსა და უფლებრივ მდგომარეობას მეტად მძიმე ფორმებში გვიხატავს. ბატონყმური ურთიერთობის პირობებში მისი ზვედრი მუდმივი შრომა და სრული უუფლებობაა. ამ მხრივ ის, ილიას აზრით, არაფრით განსხვავდებოდა ჩვეულებრივი პირუტყვისაგან. აი რა სიტყვებს ათქმევინებს იგი ხართან გასაუბრებაში თავისი არაადამიანური პირობებით დაღონებულ გუთნის დედას:

ერთს ბედს ქვეშა ვართ, ლაბავ, მე და შენ,
წილად გვარგუნეს შავი მიწა ჩვენ.
ერთგულად ეკიმოთ ჰაპანი ჩვენი,
უსიხარულოდ დავლიოთ დღენი...
ნუ დამიღონდი!.. შენი უღელი
ჩემს უღელზედა არ არის ძნელი:
მეც შენებრ მიწას დავყურებ თვალით,
რადგანაც ზეცა წაპართვეს ძალით;
...შენ პირუტყვი ხარ და მე მეტყველი?!
ეგ, ჩემო ლაბავ, ნუ შეგშურდება...
რად მინდა ხმალი, თუნდ იყოს მჭრელი,
თუ სიმართლისთვის დამიჩლუნგდება?...
მე ჩემის ჰირის, ჩემის წუხილის,
ჩემის კაცობის გულის დუღილის
სიტყვანი გულში მებაღებთან,
მაგრამ გულშივე უხმოდ კვდებიან².

ილიამ ძალიან კარგად იცოდა, რომ ბატონყმობა სწორედ ის ბალახი იყო, რომელიც ხელს უშლიდა თესლის „ამოსვლას“ და რომელიც „ძირით“ მოთხრას საჭიროებდა. ამის გარეშე მას შეუძლებლად მიაჩნდა ქვეყნის ეკონომიური და კულტურული წინსვლა. ან რა წინსვლაზე და საზოგადოებრივი აზრის განვითარებაზე შეიძლებოდა ლაპარაკი იქ, სადაც მატერიალური დოვლათის შემქმნელი კლასი „სიტყვასა მართალს გულში იკლავდა“?

¹ ა. კ ა ლ ა ნ დ ა ძ ე, ივანე კერესელიძე, თბ. 1959, გვ. 190—198.

² ი. ჭ ა ვ ჭ ა ვ ა ძ ი. თხზ. (პაულე ინგოროყვას შესავალი წერილით), თბ., 1957, გვ. 11.

სოციალური უსამართლობის პრობლემისადმი მიძღვნილი ილიას მეორე დიდებული ნაწარმოები „აჩრდილიც“. ამ პოემაში, რომლის პირველი ვარიანტი შეიქმნა 1859 წელს, ე. ი. საგლგხო რეფორმის რამდენიმე წლით ადრე, ძალიან დიდი გაბედულებითაა დაგმობილი იმ დროს არსებული საზოგადოებრივი წყობილება, ერთის მოვალეობად შრომას რომ თვლიდა, ხოლო მეორისა — მის მითვისებას. ამით აღშფოთებული მშრომელი კაცი ამბობს:

დღე-ღამე ჩემი უწყვეტი შრომა,
ღარში, ავღარში ცის ქვეშე ღგომა,
ვაი, ვაგლახი, ჭირნახულობა,
თმენა, ცდა, სიმხნე და უძილობა
მარტო ბატონის თვალსა ახარებს
და თქვენ, ცოლ-შვილო, კი არას გარგებს.
ვაიმე, ბედკარულს რაღა დამრჩება,
რომ გაეახარო ცოლ-შვილის თვალი?
ვინა შრომობდა და ვინა ჰძღვება,
ღმერთო, სად არის აქ სამართალი?!¹

მაგრამ ილია ჰკიცხავდა ბატონყმობას არა მარტო იმიტომ, რომ ის სხვისი შრომის მითვისებაზე იყო დაფუძნებული, არამედ იმიტომაც, რომ მას შრავალი სხვა უსამართლობაც ახასიათებდა. ასეთების რიცხვს აკუთვნებდა იგი ცოცხალი ადამიანებით ვაჭრობას და საერთოდ მემამულეთა თვითნებურ, მხეცურ დამოკიდებულებას გლეხებისადმი..

შენში კაცისას გრძნობას არ ხედვენ,
ღედას ძუძუდგან შეილსა აჰგლეჯენ,
ვინ იცის, სიღამე სად გაჰყიდინან...
თუ ღმერთმა მისცა შენსა ასულსა
სილამაზე და მშვენიერება, —
მონავ ჩაგრულო, ვითამ შენს გულსა
სასიხარულოდ ეგე ექნება?!
ქალს წაგართმევენ, ქალს გაჰყიდინან,
ნამუსს მოუკვლენ შეუბრალებლად
და წრფელსა გულში ღვარძლს ჩაასხმიან,
გახდიან ყვავილს ფეხ-ქვეშ სათრეველად.
უმანკო პირზე შენს ტურფას ქალსა
გარყვნა დასევამს საზარო დაღსა...
მას, რაც გიყვარდა, ნახავ დაცემულს,
ნამუსწართმეულს და შეგინებულს!..²

პოეტს სწამდა, რომ ბატონყმობა დიდხანს ვერ იარსებებდა და რომ ის უსათუოდ დაემხოზოდა აზვირთებული ხალხის ენერგიული და თავგანწი-

1 ი. კ ა ე კ ა ვ ა ძ ე, თხზ. (პავლე ინგოროყვას შესავალი წერილით), თბ., 1957, გვ. 94.
2 იქვე.

რული მოქმედების შედეგად. იგი ღრმად იყო დარწმუნებული, რომ „ქვეყანა ძველი“ ვერ გაუძლებდა „განახლებისა გრიგალის ქროლას“ და რომ „ჭეშმარიტებით აღძრული ბრძოლა“ დაამსხვრევდა „კაცთა ცხოვრების“ შემფერხებელ ბორკილებს. ილიას ეჭვი არ ეპარებოდა, რომ ამის შედეგად დამყარდებოდა სამართლიანი საზოგადოებრივი წყობილება, სადაც კაცი მხოლოდ შრომით დათვისდებოდა. იქ გამორიცხული იქნებოდა ერთი ადამიანის მიერ მეორის ექსპლოატაცია, მაშვრალი კაცი სხვის თანაბარ უფლებებს მიიღებდა და ნამდვილი ძმობა, ერთობა და თავისუფლება დამყარდებოდა¹.

ანტიბატონყმური სულით გამსჭვალული საუკეთესო ქმნილებათა რიცხვს ეკუთვნის აგრეთვე ილიას „რამდენიმე სურათი ანუ ეპიზოდი კაკო ყაჩაღის ცხოვრებიდან“ (1860 წ.). ამ პოემაში ავტორმა გამოიყვანა ძველი, დახვესებული წყობილების წინააღმდეგ მებრძოლი გმირები. ესენი არიან საბატონო ყმები კაკო ბლაჭიაშვილი და ზაქრო. კაკომ ვერ აიტანა უსამართლობა და ტყეში გაიჭრა. იქ ის, თუმცა მოკლებული იყო არსებობისათვის აუცილებელ მატერიალურ პირობებს და მუდამ საშიშროების წინაშე იმყოფებოდა, მაინც უკმაყოფილო იყო თავისი ხვედრით, ვითარცა მონური მდგომარეობიდან გამოსული, თავისუფალი ადამიანი. კაკომ ძალიან კარგად იცოდა თუ რაოდენ მძიმე იყო „უსახლკარობა, შიში, შიმშილი“, კურდღელივით ფხიზელი ძილი და „მარტოკა გდება“ ტყეში, მაგრამ მან ისიც შესანიშნავად იცოდა, რომ ადამიანს იქ ყველაფერი უადვილდება, „სადაც ჩვენვე ვართ ჩვენი ბატონი“².

ბევრს ეხარბებოდა კაკოს ბედი, ბევრს მისებრ თავისუფლება ენატრებოდა, ბევრს სურდა მის გზას დასდგომოდა და უკუღმართი ცხოვრების წინააღმდეგ მდგრად ებრძოლა. ასეთი იყო პოემის მეორე მთავარი გმირი ზაქრო. იგი თორმეტი წლისა ბატონმა სახლს მოაშორა და „წამსვე ძროხაში“ უკრა თავი. რვა წელი გაატარა მან მშობლების გარეშე, სხვის სამსახურში. რვა ძნელად მოსაგონარი და შეურაცხყოფით აღსავსე წელი. ამასობაში დაბერდა და „გამუღმებული ციებ-ციხელებით“ დაუძღურდა ზაქროს მამა. უპატრონოდ დარჩენილი ოჯახი განადგურების საშიშროების წინაშე აღმოჩნდა. მოხუცი ბატონთან მივიდა და შვილის განთავისუფლება სთხოვა, მაგრამ უარი მიიღო, სხვა შედეგი არც იყო მოსალოდნელი, რადგანაც, ზაქროს სიტყვით:

მხეცი რამ იყო ბატონი ჩვენი,
ერთი აჯამი, გულქვა, რეგვენი,
იმას კაცებრი გული არ ჰქონდა,
რომ მამა-ჩემი შეჭბრალებოდა³.

¹ ი. ქ ა ვ ქ ა ვ ა ძ ე, თხზ. (პავლე ინგოროვას შესავალი წერილით), თბ., 1957, გვ. 95—96.

² იქვე, გვ. 115.

³ იქვე, გვ. 121.

მან არამცთუ არ შეიწყნარა უკიდურესობამდე მისული მოხუცის თხოვნა, არამედ სულ ვირი, ძალღი და ქოფაკი უძახა მას. მუდარის დაინებებით განმეორებას კი შედეგად მოჰყვა მოხუცის მხეცურად ცემა და სიკვდილი. ყველაფერი ეს ზაქროს თვალწინ ხდებოდა. მან შვილის ვალი პირწმინდად მოიხადა და მამის მკვლეელი იქვე წუთისოფელს გამოასალმა. — აი როგორ უამბო ეს ზაქრომ თავის ახლად გაცნობილ მეგობარს:

მაშინ კი, როცა წამომიქცეის
და მოხუცებულს როზგი დამიკრეს, —
თვალთ დამიბნელდა, ამენთო გული,
მივეარდი თოფსა გამწარებული,
მხრიდამ გაღვიგდე მაშინვე თქვა,
და, რო ყვიროდა: „დაჰკარ, დაჰკარი!“
მაშინ ჩემ თოფმაც გამოიქეჯა
და შეუნგრია გულის-ფიცარი —
იმ ჩემს ბატონსა, ჩემს დამლუპველსა,
თავის-თავის და სხვის წამწყმედელსა¹.

კაკოს, ზაქროს და მათი მსგავსი მებრძოლი გლეხების წინ წამოწევით ილიას სურდა იმ აზრის ნათელყოფა, რომ თავისუფლება მხოლოდ ბრძოლით მოიპოვება და არა უპერსპექტივო ხვეწნა-მუდართით. ამ უკანასკნელს არ შეიძლება წარმატება მოჰყვეს, რადგანაც ქვეყნის სათავეში დგანან გულქვა და რეგენი ბატონები, რომლებიც ძლიერ მაგრად ებლაუჭებიან თავიანთ პრივილეგიურ მდგომარეობას და ფხიზლად იცავენ მას.

რომ ხვეწნა-მუდარის გზა ფუჭი და უპერსპექტივო იყო — ეს ილიამ „გლახის ნაამბობის“ (1859 წ.) მთავარი გმირების დათოს და გაბროს მაგალითზეც უჩვენა. განა ცოტა ეხვეწა პირველი მეორეს, რომ გზიდან ჩამოცლოდა და თამრო დაეთმო? „დათიკო! — უთხრა გაბრიელმა თავის ბატონს, რომელსაც ის წლების მანძილზე უსაზღვრო, ძალღური ერთგულებით ემსახურებოდა — მე გლახაკი კაცი ვარ და შენ ბატონი, გვედრები, გზიდამ ჩამომეტალე. გელიდამ ნუ ამომარეცხინებ შენს სიყვარულს, შენს ერთგულებას და ინაცვალე ჩემი ობოლი თავი. დათიკო! თუ ღმერთი გიყვარს და შენი გამჩენი გწამს, თავიდან მოიშორე იმ გოგოზედ ფიქრი. ნუ ამყარეინებ შენზედ გულსა, შენთანა ვარ შეზრდილი. შენი ჭირიმე, დათიკო, ცოდვას დამხსენ!... მაგისთანა ვაჟკაცი ხარ და შენი გული როგორ ვერ დაგიმორჩილებია! მაღლი ჰქენ და უინი მოიკალ: ყველას დაგიტმობ და იმ გოგოს ნამუსს კი არა. ის გოგო ჩემია... ღმერთთან ცოლ-ქმრობის პირობა მიგვიცია“². მაგრამ ახალგაზრდა ბატონმა, რომელიც „თავის გულის წადილისათვის“ არაფერს თაკილობდა და არავის ზოგავდა, „ყვე-

¹ ი. კ ა ვ ქ ა ვ ა ძ ე, თხზ. (პავლე ინგოროყვას შესავალი წერილით), თბ., 1957, გვ. 126.

² იქვე, გვ. 236.

ლაფერს და ყველას ხიდად გასდებდა და წარბშეურხევლად ზედ გაივლიდა“¹, ახლოსაც არ გაიკარა ერთგული ყმის სამართლიანი თხოვნა და ქალს ნამუსი ახადა. მამამისი პეპია და გაბრო შორეულ ქვეყანას გაისტუმრა. პირველი გზაშივე გარდაიცვალა, ხოლო მეორეს სინდისის ქენჯნით შეწუხებულმა და მიზანმიღწეულმა ბატონმა „წყალობა“ უყო და გზიდან უკან გამოაბრუნა. გაბრომ, როგორც მოსალოდნელიც იყო, არ დაინდო თავისი გამაუბედურებელი. პირისპირ შეხვდა მას, თანაბარ პირობებში შეერკინა და ბოლო მოუღო მის ფუქსავატურ ცხოვრებას.

ილია ამართლებდა ამგვარ მკვლევლობას და ადამიანური უფლებების დაცვისათვის ბრძოლაში დაღვრილ სისხლს ცოდვად არ თვლიდა. „კაცისკვლა, — ამბობდა სიკვდილის წინ ცხოვრების უკუღმართობით გაწამებული გაბრო, — რაც უნდა იყოს, მაინც ცოდვაა, შენი ჭირიმე! ეს მე ვიცოდი და ეს მიკიდებდა ცეცხლს... მაგრამ, როცა მომაგონდა, რომ ჩემმა სასიკვდილომ ერთის წუთის ეინის საკლავად სამი ადამიანის სული არ დაგვინდო, მე ცოცხალი გამომასალმა ამ წუთის-სოფელს, შეილს მამა უზიარებლად მოუკლა და... შეილსაც ნამუსი წაართვა, ჩემი საქციელი გამართლებულად ჩავთვალე“².

არაფერს ვამბობთ ილია ჭავჭავაძის „კაცია-ადამიანზე“ (1859—1863 წწ.), სადაც დიდი ოსტატობით ნაჩვენებია ფეოდალური კლასის დეგრადაციის სწრაფად მიმდინარე პროცესი.

ახალი იდეოლოგიის საფუძვლების შექმნას დიდად შეუწყვეს ხელი ილია ჭავჭავაძის ცნობილმა პუბლიცისტურმა წერილებმა: „ორიოდე სიტყვა თ. რევაზ შალვას ძის ერისთავის მიერ კოზლოვის შეშლის თარგმანის გამო“³ და „პასუხი“⁴, რომლებშიც თერგდალეულთა იდეურმა ბეზარმა გაბედულად გაილაშქრა ძველი თაობის წარმომადგენელთა წინააღმდეგ, ესოდენ თავგამოდებით რომ იცავდნენ ენის უცვლელობა-პუდმივობის პრინციპს. ავტორმა დასახელებულ წერილებში არა მარტო გააკრიტიკა „მამათა“ მცდარი შეხედულება ენაზე, არამედ ხაზი გაუსვა „მამაპაპური“ ძილის დამლუპველობას და იმდროინდელი საზოგადოებრივი ცხოვრების მრუდე მხარეების სასწრაფოდ გამოსწორების აუცილებლობას.

რეფორმის წინარე ხანის ანტიბატონყმური იდეოლოგიის ჩამოყალიბებაში დიდი როლი შეასრულა აკაკის შემოქმედებამაც. პოეტმა გულწრფელად გააკიცხა მაშინდელი უსამართლო სოციალური ურთიერთობა,

¹ ი. ჭავჭავაძე, თხზ. (პავლე ინგოროყვას შესავალი წერილით), თბ., 1957, გვ. 222.

² იქვე, გვ. 245.

³ „ცისკარი“, 1861, № 4.

⁴ „ცისკარი“, 1861, № 6.

დამყარებული ექსპლოატაციის პრინციპზე. მან უშიშრად დაჰგმო ის წესი, რომელიც ერთ აღამიანს ნებას აძლევდა მეორის შრომა მიეთვისებინა. აი რა სიტყვები ათქმევინა მან ამ წესით გაჩანაგებულ გლეხს 1861 წლის 15 აპრილს დაწერილ ლექსში — „მუშური“.

მარტო ჩვენთვის არ ვმუშაობთ,
სხვისიც გემართებს სამსახური:
ბატონი გვყავს, ვართ საწყალი,
უპატრონო, უბედური!

ყველა თავში გვიჩაჩქუნებს,
გარეშე და შინაური;
ცხელსა მიწას უხვად ალბობს
ოფლი, ჩვენგან მონაწერი.

ჩვენი ჯაფით მონაყვანი,
სხვასთან მიდის საზრდო პური,
შინ ცოლ-შვილს შიმშილი გვიკლავს,
მაგრამ ვინ მიუგდოს ყური?

მათსა საზრდოს სხვა იტაცებს,
სტირის ცოლი შეძღუერი,
შიმშილისგან რძე უშრება,
წივის შვილი უსუსური!

მეორე, „გლების აღსარების“² სახელწოდებით ცნობილ, ლექსშიც (1863 წ.) შრომელი კაცის ფიზიკური მოხრილობისა და მისი ღუნჭირი ცხოვრების მთავარ მიზეზად ისევ ბატონყმობაა გამოცხადებული.

1863 წელს თერგდალეულებმა ილია ჭავჭავაძის მეთაურობით რევოლუციურ-დემოკრატიული მიმართულების ყურნალი „საქართველოს მოამბე“ დააარსეს. მიუხედავად იმისა, რომ ყურნალის არსებობა მხოლოდ ერთი წლით განისაზღვრა, მან დიდი როლი ითამაშა ქართული საზოგადოებრივი აზრის განვითარების ისტორიაში. დასახელებულმა ორგანომ, რომელმაც თავის უმთავრეს ამოცანად ხალხის ცხოვრების გაუმჯობესება და „საკეთილო მოძრაობისათვის“ ხელის შეწყობა დაისახა³, ბუნებრივია, ძლიერად შეუტია უბედურების ძირითად წყაროს — ბატონყმურ ურთიერთობას. ამ შეტევის ერთ-ერთი შესანიშნავი ნიმუშია დავით ყიფიანის წერილი „სხვა და სხვა ამბები“, სადაც ნათქვამია: „საზოგადოებაში ერთი ნაწილი რომ სულ არა შრომობდეს და სხვის შრომით ირჩენდეს თავსა და

¹ აკაკი წერეთელი, თხზულებათა სრული კრებული თხუთმეტ ტომად, ტ. 1, 1950, გვ. 89.

² იქვე, გვ. 122—123.

³ „საქართველოს მოამბე“, 1863, № 1, გვ. 122. ქარედაქციო სტატია.

იმ შრომასაც რომ თავისუფლება არა ჰქონდეს, ე. ი. ურთიერთ ნებაყოფლობაზე დამოკიდებული რომ არ იყოს, საზოგადოებისათვის ცუდი (იქნებოდა) თუ არა? ამ კითხვაზე, შენა, მკითხველო, იქნება შეკრთე კიდეცა. პასუხს კი ვერას მოიგებ ჯერა, ვიცი. ეს მდგომარეობა ორივე ნაწილისათვის, მეტადრე მთელი საზოგადოებისათვის — სენია. აი რათა. ჯერა, მე რომ ეხლა თავისუფალი კაცი არ ვიყო, ფეხებში ბორკილი გაყრილი მქონდეს, ხეირიანი შრომა, ცხადია, არ შემეძლებოდა. ამას გარდა სხვა ვინ შეიტყობს. მე ვითარი შრომის ნიჭი მაქვს? რასაკვირველია, არავინა ჩემი გუნებისა და სურვილის მეტი. ჩემი ნებაყოფლობის წინააღმდეგობით ბატონმა პურის გამწვანებელი რომ გამხადოს, ნახევარ ხორბალს ბზეს გავაყოლებ. ჩემი ბატონიც რომ დარწმუნებული არ იყოს, რომ სხვისი შრომა აცხოვრებს, რასაკვირველია, უფრო იმხნევებდა, და თავისუფალ შრომას გასწევდა. რა გამოვიდა აქედამა? ჯერ ისა, რომა თავისუფალი შრომა უფრო ნაყოფიერია, მეორე ისა, რომა მთელ საზოგადოებაში ყოველი კერძობითი კაცი უნდა იყოს მშრომელი თავისუფლად და, მაშასადამე, ნაყოფიერადაც. და თუ საზოგადოებაში ყოველი წევრი შრომობს, საზოგადოებაც კეთილ მდგომარეობაში შეევა¹ (ხაზი ჩვენია — ავტ.).

ასევე მკაცრადაა გაკრიტიკებული და განწირულად გამოცხადებული იძულებით შრომაზე დამყარებული საზოგადოება ფრანგი ეკონომისტის ბასტიას (1801—1850 წწ.) „მძარცველობის ფიზიოლოგიაში“, რომლის ქართული თარგმანი, ილია ჭავჭავაძის მიერ შესრულებული, დაბეჭდა რედაქციამ უფრანლის ერთ-ერთ ნომერში. „რაც უნდა თვალის მოტყუება ძლიერი იყოს, — ვკითხულობთ იქ, — საჭიროთა ვადიაროთ, რომ მძარცველობა ამ ქვეყანაში მეტად გაძლიერებულია; რომ იგი მეტისმეტად ყველგან კაცის ყოველ უდიდეს საქმეებშიც ურევია ხოლმე, ასე რომ არც ერთი საყოველთაო მეცნიერება — მაშასადამე საპოლიტიკო ეკონომიაცა — ვერ შეიძლებს, რომ მაგას ყურადღება არ მიაქციოს... მძარცველობას ყოველთვის თავის გვამშივე აქვს მამაკვდინებელი სენი, რომელიც ბოლოსაც მოუღებს (მას). ძნელად იქნება, რომ ბევრმა ცოტანი სძარცვონ... თითქმის ყოველთვის ცოტანი ბევრსა სჩაგ-

¹ „საქართველოს მოამბე“, 1863, № 4, გვ. 109—110.

რავენ; მაგრამ ამით უფრო მძარცველობა თავის ბედის წერას ვერ წაუვა ხოლმე, იმიტომ რომ თუ იგი ღონითა და ძალით სწარმოებს, როგორც ომიანობაში და მონობაში, აშკარაა, რომ ღონე და ძალა როცა იქნება ბევრის მხარეზე გადავა... (მძარცველები) შრომას ძალით აკისრებენ (კაცს); იმას როდი ეუბნებიან: „თუ შენ ჩემთვის ამ შრომას გასწევ, მეც შენთვის ამ შრომას გავწევო“. იმას პირდაპირ ეუბნებიან: „შენ შრომა — მე შექცევა“. ეს მონობა არის; იგი ყოველთვის ძალის ბოროტად ხმარებასთან არის შეერთებული... საპოლიტიკო ეკონომიამ... დაამტკიცა, რომ ნებაყოფლობითი შრომა თავის ბუნებით პროგრესიული, წარმატებითი არის, ხოლო შრომა მონისა ბუნებით უძრავია. ამის გამომწვევად ნებაყოფლობითი შრომის გამარჯვება მონის შრომაზე დაუცილებელია“¹ (ხაზი ჩვენია — ავტ.).

აქ აღწერილი ვითარება მთლიანად შეეფერებოდა საქართველოს სინამდვილეს.

„საქართველოს მოამბე“ ფართო პროპაგანდას ეწეოდა და იმ აზრისა იყო, რომ ხსნა — მხოლოდ არსებული წყობილების ძალით დამხობაშია. მას მტკიცედ სწამდა, რომ უსამართლობას, ბატონყმურ ურთიერთობას მშვიდობიანი მოქმედების გზით ვერ მოეღებოდა ბოლო. „აბა ერთი მიჩვენონ ქვეყანა, რომელშიაც მებატონის ნებაყოფლობით, თავისუფალის და გულშემატკივარის სურვილით მონობა მოსპობილიყოს“², — ნათქვამი ბასტიას დასახელებულ სტატიაში. იგივე აზრია გატარებული დავით ყიფიანის წერილშიც. იქ საფრანგეთის რევოლუციის მაგალითზე მკაფიოდ ნაჩვენებია თავისუფლებისათვის ბრძოლაში ძალის გამოყენების საჭიროება-სარგებლიანობა³.

ანტიბატონყმური იდეოლოგიის ჩამოყალიბების საკითხის განხილვისას არ შეიძლება გვერდი ავუაროთ ანტონ ფურცელაძის დამსახურებას ამ

¹ „საქართველოს მოამბე“, 1863, № 8, გვ. 62—63, 69—70.

² იქვე, გვ. 69.

³ „და რაკი, როგორც ზემოთა ვთქვით, საზოგადოებაში უსამართლობა, დაწყობილობის ურგობა იქამდინ მივიდა, რომ ხალხსა თავის დამონებაში ლუკმაპურის მოგების ღონისძიება აღარა ჰქონდა, — მაშინ მოხდა ფრანციელების საზოგადო აღრევა, რევოლუცია. საზოგადოების დაწყობილობაში ყოველ წესიერებას იქვი ჩაუგდეს და გარდაადგეს ყოველი ძველებური დაწყებულება, და რასაც მაშინდელსამართლიანობა მოითხოვდა, საზოგადოების რიგი ისე დააწყეს. მაშინ განხორციელდა ხალხში ყოველი ზნეობის სამოქალაქო სარწმუნოება: პატივისცემა კაცისა, როგორც კაცისა და მეტადრე — როგორც საზოგადოების წევრისა“ („საქართველოს მოამბე“, № 4, გვ. 106—107 (ხაზი ჩვენია—ავტ.).

საქმეში. ამ მხრივ განსაკუთრებით საყურადღებოა. მისი წერილი-რეცენზია დანიელ ჯონქაძის „სურამის ციხე“-ზე, რომელიც 1863 წელს ჟურნალ „ცისკრის“ ფურცლებზე დაისტამბა. ავტორი სამართლიანად შენიშნავს, რომ ამ ნაწარმოებმა „დასცა ზარი და აუშალა ტანში ჟრუანტელი სიძველისა და სიცრუის მქადაგებლებსა, აუძღვრია სისხლი და აასია ესენი დაწინაურებული (ე. ი. ახალი — ავტ.) აზრების პატრონებზედ“¹. ა. ფურცელაძე არაორაზროვნად აფრთხილებს გულქვა ბატონებს, ძველი დახავსებული წყობილების ერთგულ დამცველებს, რომ მათ თარეშსა და გაუკითხაობას ბოლოს და ბოლოს საზღვარს დაუდებს მოთმინებიდან გამოსული ქართველი გლეხი და რომ ის მედგარი ბრძოლით საუკუნოდ დაიმკვიდრებს მიწასა და თავისუფლებას. მოთმინებადაკარგული ქართველი გლეხი, წერდა იგი, „ის ქართველი აღარ არის, რომელიც გინახავთ სახრესა და მათრახის ქვეშა, ის მშვიდობიანი და ყურმიგდებული ქართველი... ის არის აღელვებული და გააფთრებული, როგორადაც დაჭრილი ლომი და ველარაკითარი. ღონისძიება ველარ შეიმავრებს იმასა...; მინამ გულის ბუხარს არ იყრის მტერზე“².

ა. ფურცელაძის ამ წერილმა, როგორც მოსალოდნელიც იყო, დიდი მთაბეჭდილება მოახდინა თანამედროვეებზე. ძველის დამცველნი აღშფოთდნენ, ახლის მომხრენი კი, პირიქით, სიხარულით შეხედნენ მას და ავტორს გაბედულობა უქვს. „როცა მე ეს წერილი წავიკითხე, — იგონებდა უფრო გვიან ზ. ჭიჭინაძე, — ერთობ გავკვირდი მასზე, რომ ასეთი მიმართულებით წერილის დაწერა მაშინ გაუბედია ფურცელაძეს და მასთანვე ისეთ ჟურნალშიც დაუბეჭდია, რომლის უმთავრეს თანამშრომლებად ჩვენი ძველი ცხოვრების წესების და ჩვეულებების დამცველი ქურუმ მთავრები ითვლებოდნენ. მე გაკვირვებული ვარ იმაზე, რომ ეს წერილი „ცისკრის“ რედაქციას დაუბეჭდია. შევიტყვე, რომ ამ სტატიის გამო „ცისკრის“ რედაქციას მრავალ უდიდეს მწერალთაგან საყვედურებიც მიუღია“³.

ასეთია მოკლედ საქართველოში ახალი იდეოლოგიის შექმნის ძირითადი მომენტები.

¹ ა. ფურცელაძე, „სურამის ციხე“ დ. ჯონქაძისა, „ცისკარი“, 1863, № 1.

² იქვე: ანტონ ფურცელაძის სოციალურ-პოლიტიკურ შეხედულებათა შესახებ რეფორმის წინაზე ხანაში იხ. ვ. ვახანიძე. ანტონ ფურცელაძის მსოფლმხედველობა, თბ., 1958, თავი III (კერძოდ, გვ. 118—142; 145—147); მისივე, პოლემიკა დ. ჯონქაძის გარშემო, „მაცნე“, 1966, № 2.

³ სანდალა (ზ. ქიქინაძე), წერილები ქართულს მწერლობაზე, 1888, გვ. 23.

რეფორმის წინარე ხანის რუსეთში გრძელდებოდა კაპიტალიზმის ადრე დაწყებული განვითარება¹, მაგრამ მაშინ გაბატონებული ფეოდალურ-ბატონყმური სისტემა საგრძნობლად ანელებდა ამ პროცესს, აბრკოლებდა მრეწველობის, სოფლის მეურნეობის, ვაჭრობის, ქალაქებისა და ქალაქური ცხოვრების პროგრესს. აშკარად იგრძნობოდა წინააღმდეგობა საწარმოო ძალების ხასიათსა და წარმოებით ურთიერთობას შორის, უკანასკნელი უკვე პირველის ბორკილად იქცა². ქვეყნის ეკონომიური ცხოვრების შემდგომი წინსვლის პრობლემა აყენებდა საკითხს ამ დამაბრკოლებელ ფაქტორის მთლიანი ან ნაწილობრივი ლიკვიდაციის შესახებ.

ამის აუცილებლობა-გარდაუვალობაზე მიუთითებდა აგრეთვე კლასობრივი ბრძოლის ჩვეულებრივზე მეტად გამწვავება განსახილველი ხანის რუსეთში. თუკი, მაგალითად, 1801—1825 წლებში ყოველწლიურად საშუალოდ 11 გლეხთა მღელვარება ხდებოდა, 1826—1854 წლებში მან 24-ს მიაღწია, ხოლო 1855—1861 წწ. — 79-ს³. ეს იყო ქვეყანაში შექმნილი რევოლუციური სიტუაციის ერთ-ერთი ყველაზე მკაფიო მაჩვენებელი. სწორედ ამან ათქმევინა იმპერატორ ალექსანდრე II-ს (1855—1881 წწ.), რომ გაცილებით უკეთესია გლეხები განთავისუფლდნენ ზემოდან, მთავრობის მიერ გატარებული რეფორმით, ვიდრე ქვემოდან, სახალხო აჯანყების შედეგად⁴.

¹ Очерки истории СССР, 1861—1904 гг., Под редакцией С. С. Дмитриева, М., 1960, გვ. 3—7.

² იქვე, გვ. 7.

³ Я. И. Линков, Очерки истории крестьянского движения в России в 1825—1861 гг., М., 1952, გვ. 4.

⁴ А. Попельницкий, Речь Александра II, сказанная 30 марта 1956 г. Московским предводителям дворянства „Голос минувшего“, № 5—6, გვ. 393.

დასასრულ, ყირიმის ომმა, რომელმაც ესოდენ მკაფიოდ გამოამჟღავნა რუსეთის ეკონომიური და პოლიტიკური ცხოვრების ჩამორჩენილობა, მისი სიდამპლე და უძლურება, საბოლოოდ დაარწმუნა უმაღლესი ხელისუფლება ბატონყმური ურთიერთობის უცვლელად შენარჩუნების შეუძლებლობაში.

1861 წლის 19 თებერვალს იმპერატორმა ხელი მოაწერა მანიფესტს ბატონყმობის გაუქმების შესახებ და დაამტკიცა ამასთან დაკავშირებული კანონები (დებულებები). გლეხებმა, როგორც ცნობილია, პირადი თავისუფლება მიიღეს. რაც შეეხება მიწას, ის მემამულის საკუთრებად იქნა აღიარებული და უშუალო მწარმოებელს მხოლოდ მუდმივ სარგებლობაში მიეცა. მემამულის თანხმობის შემთხვევაში გლეხს მისი („ნადელის“) შესყიდვა შეეძლო, მაგრამ ეს დიდ სიძნელებთან იყო დაკავშირებული. „ნადელის“ საკუთრებად შექენამდე გლეხი „დროებით ვალდებულ მდგომარეობაში“ რჩებოდა და იხდიდა რეფორმამდელი ხანის თითქმის ყველა, მიწასთან დაკავშირებულ, გადასახადს. „ნადელი“ ყოველ ყმას კანონით დაწესებული ნორმით ეძლეოდა, ნორმაზე ზევით ფართობი კი მას ერთმეოდა. ამის გამო გლეხთა მიწათმფლობელობა რეფორმამდელ ხანასთან შედარებით ზოგან ერთი მეოთხედით შემცირდა, ზოგან კი სულაც განახევრდა.

მიუხედავად ამისა, ბატონყმობის გაუქმებამ მაინც დიდი როლი ითამაშა რუსეთის საზოგადოებრივ ცხოვრებაში. მან ძლიერი ბიძგი მისცა ქვეყნის შემდგომ სოციალ-ეკონომიურ განვითარებას და ხელი შეუწყო კაპიტალიზმის, როგორც გაბატონებული ფორმაციის დამკვიდრებას. იგი, გარდა ამისა, წარმოადგენდა წინ გადადგმულ ნაბიჯს რუსეთის ბურჟუაზიულ მონარქიად გადაქცევის გზაზე¹.

მალე იმავე საფუძვლებზე საგლეხო რეფორმა განაპირა მხარეებში, მათ შორის საქართველოშიც, გატარდა. იგი განაპირობა არა მარტო მთავრობის საერთო პოლიტიკამ ბატონყმობის საკითხში, არამედ ჩვენს ქვეყანაში შექმნილმა კონკრეტულმა მდგომარეობამ — კაპიტალისტურ ურთიერთობათა განვითარებამ და კლასობრივი ბრძოლის საგრძნობლად გამწვავებამ, რაზედაც ზემოთ (I და V თავები) გვქონდა ლაპარაკი.

¹ ვ. ი. ლენინი, თხზ., ტ. 17, გვ. 127.

რეფორმის მომზადება. დიმიტრი ყიფიანის მოხსენება. რეფორმისათვის წინასწარი სამზადისი ჯერ კიდევ 1857 წელს დაიწყო¹, ხოლო 1862 წელს მოწვეულ იქნა თბილისის გუბერნიის თავად-აზნაურთა ყრილობა, რომელმაც შეიმუშავა სახელმძღვანელო აზრები და მის საფუძველზე სათანადო პროექტის შედგენა ცნობილ საზოგადო მოღვაწეს, ბატონ-ყმური ურთიერთობის შესანიშნავ მცოდნეს დიმიტრი ივანეს ძე ყიფიანს დაავალა. ეს პროექტი დიმიტრი ყიფიანმა, მართლაც, შეიმუშავა ფეოდალური ინტერესების მაქსიმალური დაცვით და მას თან ვრცელი მოხსენება დაურთო, რომელშიც მოცემული იყო პროექტის ძირითადი პრინციპების დასაბუთების ცდა.

ამ მოხსენებაში², რომელიც 1863 წ. აპრილში თბილისის გუბერნიის თავადაზნაურობის ყრილობაზე იქნა წაკითხული, პირველ ყოვლისა გადმოცემულია საქმის ისტორია, ის, თუ როგორ შეხვდა ქართველი პრივილეგიური წოდება უმაღლესი ხელისუფლების განზრახვას და როგორ შეუდგა იგი მის ცხოვრებაში გატარებას. დასახელებულ დოკუმენტში აღნიშნულია, რომ ფეოდალური არისტოკრატია მეტად შეაშფოთა ამ განზრახვამ და ყველაფერი გააკეთა იმისათვის, რათა სამუდამოდ ან, უკიდურეს შემთხვევაში, დროებით მაინც აეცილებინა თავიდან კარზე მოძღვარი კატასტროფა, მაგრამ როდესაც ამ დონკიხოტური გეგმიდან არაფერი გამოვიდა და ძველის დარღვევის გარდუვალობა უეჭველი გახდა, თავადაზნაურობა შეეცადა მომავალი რეფორმისათვის, რომელსაც ის „დიდად სამწუხარო საქმეს“ უწოდებდა, მისთვის სასარგებლო გამართლება მიეტა.

¹ მართალია, პირველი ოფიციალური მოწერილობა რეფორმის გატარების შესახებ კავკასიის აღმინისტრაციამ 1861 წლის მარტის თვეში მიიღო, მაგრამ „ციკულარებისა და სხვა მასალების პეტერბურგიდან „ცნობად“ გამოგზავნა იწყება ჯერ კიდევ 1857 წლიდან. „იმავე დროიდან დაიწყო ერთგვარი წინასწარი თადარიგეც საგლეხო რეფორმის მომზადებისათვის“ (შ. ჩხეტიია, საგლეხო რეფორმის ისტორიისათვის საქართველოში, თბ., 1950, გვ. 3). ბარიატინსკის, გრ. ორბელიანისა და დიმიტრი ყიფიანისათვის კიდევაც დაუვალეზიათ ამ საკითხზე სათანადო მოსაზრების წარმოდგენა. მათ დავალება შეუსრულეზიათ და 1858 წლის დამდეგს მეფისნაცვლისათვის წერილობითი მოხსენება მიურთმევიათ. მოხსენებას მოწონება დაუქსახურეზიათ, მაგრამ „შემდეგში უუურადღებოდ“ დაუტოვეზიათ (დ. ყიფიანი, მეშუარეზი, თბ., 1930, გვ. 63; შ. ჩხეტიია, საგლეხო რეფორმის ისტორიისათვის... გვ. 3).

² შ. ჩხეტიია, საგლეხო რეფორმის ისტორიისათვის საქართველოში (გამოკლევე და დოკუმენტეზი), თბ., 1950, გვ. 182—269. ამ გვერდებზე დაბეკდილო დ. ყიფიანის მოხსენების ტექსტი. შემდეგში ეს წყარო მითითებული იქნება ასე: დ. ყიფიანი, მოხსენება. გვერდები კი ნაჩვენებეზი იქნება პროფ. შ. ჩხეტიიას დასახელებული წიგნის მიხედვით.

ამ მხრივ მას დაეხმარა დიმიტრი ყიფიანი. ამ უკანასკნელს, როგორც უკვე აღვნიშნეთ, არც ძალა დაუზოგავს და არც ენერგია, რათა მომავალი რეფორმის დროს რაც შეიძლება ნაკლებად დაზარალებულიყო მიწათმფლობელთა პრივილეგიური წოდება. იგი თავის მოხსენებაში, რომელსაც მებატონეთა უდიდესმა უმრავლესობამ დაუჭირა მხარი, შესაძლებლად სცნობდა გლეხთა მხოლოდ პირად განთავისუფლებას. რაც შეეხება მიწას; ის, ყიფიანის აზრით, მემამულეთა ხელუხლებელ საკუთრებას წარმოადგენდა და მათსავე განკარგულებაში უნდა დარჩენილიყო.

ყმის პირადი განთავისუფლებით, ვკითხულობთ დასახელებულ მოხსენებაში, მისი მფლობელის ყოველწლიური შემოსავალი სულ მცირე 148 მან. და 38 კაპიკით შემცირდება, რადგანაც ის ამიერიდან ვერ მიიღებს ბატონყმური დამოკიდებულებიდან გამომდინარე გადასახადებს. ეს მეტად საგრძნობი დანაკლისი იქნება ისედაც ღარიბ და უიმედოდ ვალში ჩავარდნილ ქართველ თავად-აზნაურებისათვის. საჭიროა ამ დანაკლისის ანაზღაურება, კომპენსაცია, მაგრამ სამართლიანობა მოითხოვს, რომ ეს ტვირთი დააწვეს არა გლეხობას, არამედ სახელმწიფოს, რომელმაც თავის დროზე სასარგებლოდ სცნო ბატონყმობის დამყარება და ამჟამად კი მისი გაუქმება. „დრომ ითხოვა და ყმებს თავისუფლება მოსპობილ ექმნათ, — ნათქვამია მოხსენებაში, — დროვე ითხოვს ახლა და თავისუფლება უნდა აღდგენილ ექნეს ხელმწიფობის (ე. ი. სახელმწიფოს — ავტ.) სარგებლობისათვის; მაშასადამე, ხელმწიფობამ უნდა გასწიოს საჭიროცა ამისათვის ხარჯი. ჩვენი საქმე არ არის, რომ ღონისძიება (ე. ი. ხარჯის დაფარვის წყარო — ავტ.) ვუჩვენოთ; ჩვენ მხოლოდ ეს უნდა ვსთქვათ, რომ ამ ხარჯის ნაყმევებზედ შეწერა ეგოდანვე უსამართლობა იქნება, რაოდენ უსამაგიეროდ ჩამორთმევა იმათი ჩვენგან, მით უმეტესად, რომელ ჩვენი ყმებიც დიდად გაჭირვებულს მდგომარეობაში არიან... ამის გამო უქვეშევრდომილესად ვევედრნეთ ერთ-მთავარსა (ე. ი. იმპერატორს — ავტ.) ჩვენსა და ერთხმად ვიშუამდგომლოთ, რათა ყმათა ჩვენთა თავისუფლება მინიჭებულ ექმნეთ უსასყიდლოთ“¹.

დ: ყიფიანის მოხსენებაში დაწვრილებითაა განხილული მიწის საკითხი და ის თავად-აზნაურების აბსოლუტური უმრავლესობის სურვილის შესაბამისადაა გადაჭრილი. იმ 240 მემამულიდან, რომელმაც თავისი მოსაზრება გამოთქვა რეფორმის ძირითად პრინციპებზე, 226 შეუძლებლად თვლიდა გლეხისთვის მიწის საკუთრების უფლებათ დამტკიცებას. „ყმებს თავისუფლებას მივსცემთ, — წერდნენ ისინი, — იმ ადგილ-მამულს, რაც უჭირავთ, ხელშეუხებლად დაუტოვებთ, მაგრამ საკუთრებით მიცემა კი ჩვენგან მიწისა ყოვლად შეუძლებელი არის“².

¹ დ. ყიფიანი, მოხსენება, გვ. 268.

² იქვე, გვ. 218.

დ. ყიფიანი, უმრავლესობის აზრის შესაბამისად, წინადადებას იძლეოდა, რომ ყმებს მისცემოდათ პირადი თავისუფლება (აქედან გამომდინარე ზარალის სახელმწიფოს მიერ კომპენსირების პირობით), მაგრამ უმიწოდ. ეს უკანასკნელი მემამულეთა საკუთრებად უნდა დარჩენილიყო, ხოლო გლეხებს მით ესარგებლათ გარკვეული გადასახადის გაღებით. სხვანაირად რომ ვთქვათ, საბატონო ყმები ხიზნების მდგომარეობაში უნდა გადასულიყვნენ. „ხიზნობა, — წერდა დ. ყიფიანი, — ძველი დროთაგან არსებობს საქართველოში და არა თუ თავისუფალნი, საბატონო კაცნიც... ეტანებიან ამ მდგომარეობასა, რადგან საქმით სასარგებლო არის ორისავე მხარისათვის. სწორედ ამ გვარსავე, მაგრამ უკეთესს მდგომარეობაში იქნებიან ყმანიცა ჩვენი შემდგომ განთავისუფლებისა; უკეთესში იმით, რომ საუკეთესო ადგილ-მამულები ექმნებათ და ყოვლად უეჭველია, რომ ამითი მოისპობა ჩვენს შორის ყოველი მიზეზი ერთი ერთმანეთზედ დამდურებისადა და ჩვენს საშინაო საქმეებში მმართველობისაგან ყოველდღე გამორევისადა“¹.

უმრავლესობის პროექტი. ასეთია მოკლედ² დ. ყიფიანის მოხსენების ძირითადი მოტივები. სწორედ მის საფუძველზე შეიმუშავა მან გლეხთა განთავისუფლების უ მ რ ა ვ ლ ე ს ო ბ ი ს პ რ ო ე კ ტ ი³ (1863 წ., აპრილი). პროექტის პირველი პარაგრაფი საზეიმოდ იუწყებოდა „ხელმწიფე იმპერატორის ნებითა“ და ქართველ თავად-აზნაურთა სურვილით სოფლის მშრომელი მოსახლეობის განთავისუფლებას „ყოველის ბატონყმობის დამოკიდებულებისაგან“. მაგრამ, რადგანაც, — ნათქვამია ხსენებული მუხლის შენიშვნაში, — ამ ნაბიჯის გადადგმა დაკავშირებულია მემამულეთა მხრივ დიდი მსხვერპლის გაღებასთან, იმედია მზრუნველი იმპერატორი არ დაიშურებს წყალობასა და „განუწყესებს მათ ერთ დროებითსა შესაწევარსა“. ბატონყმობიდან განთავისუფლებული გლეხი შედიოდა მიწის მფლობელთან ისეთსავე „ნებაყოფლობით“ დამოკიდებულებაში, როგორც „ძველის საქართველოს ჩვეულებით ხიზანსა და მამულის პატრონსა აქვსთ“ (პარაგრაფი 3). მეექვსე პარაგრაფი ნებას აძლევდა ყოფილ ყმას ყოველგვარი შეზღუდვის გარეშე შეეძინა ყველა სახის უძრავი ქონება. ბატონყმობიდან გამოსულ გლეხს რჩებოდა არა მარტო საკუთარი მიწები, არამედ ის საბატონო ადგილ-მამულებიც, „რაზედაც ახლა ბინადრობა და სარგებლობა აქვსთ“ (პარაგრაფი 7), მაგრამ ამისთვის მათ მიწის პატრონისათვის უნდა მიეცათ გარკვეული

¹ დ. ყიფიანი, მოხსენება, გვ. 229—230.

² უფრო დაწერილებით იხ. შ. ჩხეტია, საგლეხო რეფორმის ისტორიისათვის..., და აგრეთვე ი. ანთელავა, ბატონყმობის გაუქმება საქართველოში, „მაცნე“, 1965, № 3.

³ პროექტის ტექსტი იხ. შ. ჩხეტია, საგლეხო რეფორმის ისტორიისათვის..., გვ. 270—281. პროფ. პ. გუგუშვილი, CХАО, ტ. 11, გვ. 119—120.

გამოსაღები. „რომელიც თავისუფალი მოსახლე, — ნათქვამია მერვე პარაგრაფში, — საბატონო ადგილმამულზედა სახლობს და ჰსარგებლობს. სახლკარობისა და კალო საბძლის ადგილისათვის არა მოეთხოვება რა, (მაგრამ) სახნავ-სათესისა, სავენახესი, საბალახე მიწებისა, ტყისა და წყლის ხმარებისათვის (კი) პატრონს უნდა აძლიოს ღალა, კულუხი და (გასწიოს) ბეგარა (ე. ი. შრომითი გადასახადი — აეტ.) იმ მიზნით, როგორითაც ერთმანეთში ნებაყოფლობით მორიგდებიან. მანამდის მორიგდებოდნენ, პატრონს უნდა ეძლეოდეს ისევე და იმავე ზომით, რასაც და რა ზომითაც ხიზნები ჩვეულებით აძლევენ და ეწევიან და სადაც ხიზანი არ არის, იქ ისევე და იმავე ზომით, რაც და რა ზომითაც განთავისუფლებულს კაცებს ყმობაში უძლევიათ და უწევიათ“.


ამრიგად, თავადაზნაურობის უმრავლესობის პროექტი მოითხოვდა ყმების უმიწოდ განთავისუფლებას. სხვანაირად რომ ვთქვათ, მთავარი საწარმოო საშუალება, ე. ი. მიწა, რომელიც ფეოდალურ-ბატონყმური ურთიერთობის საფუძველს წარმოადგენს, მემამულეების საკუთრებად რჩებოდა. გლეხს, ხიზნის მდგომარეობაში რომ გადადიოდა, სხვისი მიწით უნდა ესარგებლა და ამისთვის ძველებურად ფულადი, შრომითი თუ პროდუქტადი გადასახადები ეხადა.

უმრავლესობის პროექტი მიზნად ისახავდა არა ბატონყმობის მოსპობას, არამედ მის რამდენადმე სახეშეცვლილი სახით შენარჩუნებას და ამდენად ის კონსერვატიული ხასიათისა იყო.

უმცირესობის პროექტი. რეფორმასთან დაკავშირებით შემუშავებულ იქნა მეორე, ეგრეთ წოდებული უმცირესობის პროექტი¹, რომელიც 14 მემამულის (მათ შორის გრ. ორბელიანის, ჯამბაკურ ორბელიანის, ივანე ორბელიანის, გრ. ერისთავის, დიმ. ვეზიროვისა და სხვ.) ხელმოწერით იმავე 1863 წელს წარედგინა ამიერკავკასიის ცენტრალურ საგლეხო კომიტეტს. ის, როგორც არაერთხელ აღნიშნულია სამეცნიერო ლიტერატურაში², არსებითად არაფრით განსხვავდება უმრავლესობის პროექტისაგან. ამას თვით მისი ავტორებიც არ მალავდნენ. ისინი პირდაპირ

¹ პროექტის ტექსტი დაბეჭდილია შ. ჩხეტიას დასახ. წიგნში, გვ. 406—412, და პროფ. პ. გუგუშვილის СХАО, II, გვ. 137—144.

² შ. ჩხეტია, საგლეხო რეფორმის ისტორიისათვის საქართველოში, გვ. 28; Г. Пурцеладзе, Крестьянская реформа в Восточной Грузии, автореферат докторской диссертации, Тб., 1960, გვ. 47.



თელავი. 1864 წლის მანიფესტის წაკითხვა

აცხადებდნენ, რომ ჩვენ, ვიზიარებთ რა მთლიანად უმრავლესობის მიერ გამოთქმულ ყველა პრინციპულ მოსაზრებას, კერძოდ, აზრს ყმების უმიწოდ განთავისუფლების შესახებ, გვსურს დავსახოთ მეტი ქმედითი ღონისძიებანი დამოკიდებული მდგომარეობიდან გამოსული გლეხების მომავალი ცხოვრების უზრუნველსაყოფად. ასეთ ღონისძიებად უმცირესობას მიაჩნდა გლეხის უფლების აღიარება ყველაფერ იმაზე, რაც მისი ალალი შრომით იყო შექმნილი და გაკეთებული.

უმცირესობის წარმომადგენლები აღიარებდნენ ყმების სრულ უფლებას: 1. შინაურ საქონელზე, სასოფლო-სამეურნეო იარაღებზე და საერთოდ მოძრავ ქონებაზე; 2. სახლზე და სამეურნეო ხასიათის ნაგებობებზე იმ მიწების გამორიცხვით, რომლებზედაც ისინი აშენებული იყვნენ; 3. ვენახებზე და ბაღებზე, ცხადია, მათ მიერ დაკავებული ფართობის გამოკლებით; და 4. იმ უძრავ ქონებაზე, რომელიც შექმნილი იყო გლეხის მიერ სათანადო კანონიერი აქტით რუსული მმართველობის შემოღების შემდეგ.

მაგრამ სოფლის მშრომელი მოსახლეობისათვის ხსენებულ უფლებათა მინიჭებას მხოლოდ ფორმალური მნიშვნელობა ჰქონდა, რადგანაც მათი ცხოვრებაში გატარება ხშირ შემთხვევაში წინააღმდეგობას აწყდებოდა. მაგალითად, გლეხს, რომელმაც თავისი საცხოვრებელი ადგილის შეცვლა და სხვაგან გადასვლა გადაწყვიტა, მართალია, ნება ეძლეოდა თან წაეღო

მთელი მოძრავე ქონება, სამუშაო იარაღები და სახლის მასალები, მაგრამ იმ სავალდებულო პირობის დაცვით, რომ ეს ზიანს არ მიაყენებდა მებატონის მამულს და არ დასცემდა მის ფასსა და ღირებულებას¹. ყმას, იმავე პროექტის თანახმად, უფლება ჰქონდა გაეყიდა, გაესაჩუქრებინა და ანდერძით დაეტოვებინა სხვის მიწაზე გაშენებული ბაღი, მაგრამ იმ პირობით, რომ მის მაგივრად მოსული პირი თავის თავზე მიიღებდა წინამორბედი პირის ვალდებულებას, რაც მიწის პატრონისათვის შემოსავლის მეოთხედი ნაწილის მიცემაში გამოიხატებოდა². თუკი სხვაგან გადასული გლეხი ვერ მოძებნიდა ისეთ ვინმეს, რომელიც ხსენებულ ვალდებულებათა მიღებით თანახმა იქნებოდა მისი სახლის, ბაღისა და სხვათა მფლობელობაში შესულიყო, მაშინ მთელი ეს ქონება მემამულის საკუთრებად რჩებოდა³.

ეს და სხვა შეზღუდვები, როგორც უკვე ვთქვით, თითქმის მნიშვნელობას უკარგავდა უმცირესობის განცხადებას გლეხის შრომითა და ფულით მოპოვებული ქონების გლეხისავე განკარგულებაში დატოვების შესახებ.

სოფლის მშრომელი მოსახლეობის აშკარა საზიანოდ იყო გადაწყვეტილი უმცირესობის პროექტში რეფორმის ძირითადი საკითხი — მიწის საკითხი. ხსენებული დოკუმენტის თანახმად, გლეხი ვალდებული იყო საკარმიდამო ნაკვეთით სარგებლობისათვის მებატონისათვის ეძლია 4%⁴ იმ თანხიდან, რა თანხითაც შეფასებული იქნებოდა საკარმიდამო ფართობი, ხოლო ბალისთვის — ამ ბალის შემოსავლის 1/4 ნაწილი⁴. ასე შორს, როგორც ცნობილია, უმრავლესობის წარმომადგენლებიც კი არ წასულან.

უკუღმართად იყო გადაჭრილი სახნავი მიწების საკითხიც. გლეხებს იგი, პროექტის მიხედვით, საერთოდ არ ეძლეოდა. „ჩვენ, რა თქმა უნდა, — ნათქვამია იქ, — არ უარყყოფთ, რომ გლეხისთვის სახლისა და ბაღის გარდა, სხვა საშუალებაც აუცილებელია. მას სჭირია სახნავ-სათიბი ადგილები და სხვა სავარგულები, მაგრამ ყველაფერ ამას ის ადვილად შეიძენს თავისუფალი დაქირავების საფუძველზე. ყოველ შემთხვევაში ჩვენ თვითონ არა გვაქვს იმდენი მიწა, რომ გლეხებსაც მივსცეთ და ჩვენც გვეყოს. მცირე მამულიანობა მთელი მხარისა ცნობილია მთავრობისათვისაც; მემამულეთა უმეტესი ნაწილის განკარგულებაში ოცი დღიური მიწაც კი არაა. ყველა მიწა ამჟამად გლეხების ხელშია და ისინი, ამუშავებენ რა ამ მიწებს, მემამულეს აძლევენ ჩვეულებით განსაზღვრულ გარკვეულ ღალას. უკეთეს ეს მიწა გლეხებს გადაეცა სამუდამო და სამემკვიდრო მფლობელობაში ან

¹ შ. ჩ ხ ე ტ ი ა, საგლეხო რეფორმის ისტორიისათვის..., გვ. 410; CXAO, II, გვ. 141.

² იქვე, გვ. 410.

³ იქვე, გვ. 411; იქვე, გვ. 141—142.

⁴ იქვე, გვ. 407—408; იქვე, გვ. 138—139. ♁

განკარგულებაში, მაშინ მემამულეს არაფერი დარჩება, გარდა უმნიშვნელო ნაკვეთებისა, რომელთაც არ შეუძლიათ უზრუნველყონ მისი ცხოვრება-არსებობა“¹. ყოველივე ამის გამო, — ცკითხულობთ უმცირესობის პროექტში, — და იმიტომ, რომ „ჩვენ საკმაო უზრუნველყოფას ვაძლევთ გლეხებს, ვფიქრობთ ყველა სახის მიწა და სავარგულები მემამულეებს დაუტოვოთ“². მემამულეებს რჩებოდათ ტყეც, რომლითაც სარგებლობა მეტად შეზღუდული იყო გლეხისთვის. მას იქიდან მხოლოდ იმდენი მასალის გატანა შეეძლო (რა თქმა უნდა, გარკვეული საზღაურის გაღებით), რამდენიც საჭირო იყო ბაღების მოსაწყობად და აუცილებელი ოჯახური მოთხოვნილების დასაკმაყოფილებლად. სხვა საჭიროებებისათვის, — აცხადებენ უმცირესობის წარმომადგენლები, გლეხს „უფლება არა აქვს ისარგებლოს მემამულის ტყით“, ამ უკანასკნელის „ნებაყოფლობით თანხმობის გარეშე“³.

უმცირესობის პროექტის გარჩევა გვიჩვენებს, რომ ის, მიუხედავად მაღალფარდოვანი სიტყვებისა, ბატონყმობიდან გამოსული გლეხის მომავალი ეკონომიური ცხოვრების უზრუნველყოფის შესახებ, ისეთივე კონსერვატიული იყო, როგორც უმრავლესობის პროექტი და მისგან მხოლოდ დეტალებში განსხვავდებოდა.

ივანე მუხრან-ბატონის აზრი. ამიერკავკასიის ცენტრალურმა საგლეხო კომიტეტმა მიიღო არა მარტო უმრავლესობისა და უმცირესობის პროექტები, არამედ თავად ივანე მუხრან-ბატონის მიერ შედგენილი ერთპიროვნული აზრიც, რომელიც, ავტორის ღრმარწმენით, მკვეთრად განსხვავდებოდა ყველა დანარჩენის შეხედულებისაგან. რა მოტივებზე იყო აგებული მუხრან-ბატონის ეს „განსაკუთრებული“ პროექტი? ავტორი, პირველ ყოვლისა, ჰაზს უსვამს ბატონყმობის ისტორიულ როლსა და მნიშვნელობას საქართველოს არსებობის შენარჩუნების საქმეში. მისი აზრით, ჩვენმა ქვეყანამ მხოლოდ ხსენებული საზოგადოებრივი ურთიერთობის წყალობით მოაღწია დღემდე და იმიტომ, ბუნებრივია, ყოველგვარი აჩქარება ამ ურთიერთობის მოსპობა-გაუქმების მიმართულებით მას სახიფათოდ და დამღუპველად მიაჩნდა. იგი საერთოდ წინააღმდეგი იყო ბატონყმობის გაუქმებისა, ყოველ შემთხვევაში მას ამ ნაბიჯის გადადგმა იმ დროს, გასული საუკუნის 60-იან წლებში, ნაადრევად

1 შ. ჩხეტიია, საგლეხო რეფორმის ისტორიისათვის..., გვ. 409, CXAO, II, გვ. 140.

2 იქვე.

3 იქვე, გვ. 412, CXAO, II, გვ. 143.

მიაჩნდა. მაგრამ რაკი რეფორმის გატარების საკითხი პრინციპულად უკვე გადაწყვეტილი იყო უმაღლესი ხელისუფლების მიერ და მისი შეჩერება არ შეიძლებოდა, ქართველი ფეოდალი იძულებული გახდა ბედს შერიგებოდა და მომავალი ცვლილებების მომზადება-გატარებაში უშუალო მონაწილეობა მიეღო. იგი იმ მიზნით ჩაება სურვილის საწინააღმდეგო საქმეში, რათა მისთვის, რამდენადაც ეს შესაძლებელი იქნებოდა, მემამულისთვის სასარგებლო მიმართულება მიეცა.

ყველაზე რთული და ცენტრალური საკითხი — მიწის საკითხი, რომელიც რეფორმას უნდა მოეგვარებინა, მუხრან-ბატონმა პრივილეგიური წოდების სასარგებლოდ გადაჭრა. მან ეს მთავარი საწარმოო საშუალება თავად-აზნაურების ხელუხლებელ საკუთრებად აღიარა და კატეგორიულად უარყო ყმებისთვის მისი გადაცემის შესაძლებლობა სასყიდლის გაღებითაც კი. მშრომელი კაცის უფლების აღიარება თავის შრომის შედეგებზე, წერდა იგი, ოდნავადაც არ ნიშნავს მემამულეს მიწა წავართვათ იმ მოტივით, რომ ის გლეხის ოფლითაა გაპოხიერებული. ასეთი ნაბიჯის გადადგმა არა მარტო სრული უსამართლობა იქნება, არამედ ის უკიდურეს გალატაკებადვე მიიყვანს მებატონეებს, რომელთა მიწების უდიდესი ნაწილი სწორედ გლეხების სარგებლობაშია გადაცემული. შეცდომა იქნება ვაიძულოთ მემამულეები, რომ მათ თავიანთი შემოსავლისა და არსებობის ერთადერთი წყარო — მიწა — გლეხებს მიჰყიდონ და საკუთრებად დაუმტკიცონ¹. ამის შესაბამისად მუხრან-ბატონმა თავის პროექტში შეიტანა სპეციალური მესამე მუხლი, რომელიც ყმური მდგომარეობიდან გამოსული გლეხის მიწის მემკვიდრეობის მოიჯარადრედ გადაქცევას ვარაუდობდა.

საკარმიდამო და საბალე-სავენახე მიწებიც, რომლებიც გლეხების სარგებლობაში ჩნდებოდა, პროექტის ავტორის აზრით, მებატონეთა სრულ საკუთრებას წარმოადგენდა და ამიტომ სამართლიანობა მოითხოვდა, რომ სოფლის მშრომელ მოსახლეობას ამ მიწებისთვის შესაფერისი გადასახადი გადაეხადა².

და მიუხედავად სოფლის მშრომელი მოსახლეობის მიწით მომარაგების საკითხისადმი ასეთი მკაცრი და უპასუხისმგებლო დამოკიდებულებისა, მუხრან-ბატონი ცინიკურად აცხადებდა, რომ მისი პროექტის ცხოვრებაში განხორციელება თავადაზნაურობას დაიცავდა დაღუპვა-განადგურებისაგან და ამავე დროს უზრუნველყოფდა ყმური მდგომარეობიდან გამოსული გლეხის მომავალი ცხოვრების მყარ ნიადაგზე დაყენებას.

¹ შ. ჩხეტია, საგლეხო რეფორმის ისტორიისათვის..., გვ. 309, CXAO, II., გვ. 131—132.

² იქვე, გვ. 309; იქვე, გვ. 132.

ყოველივე ზემოთქმულიდან ცხადია, რომ ივანე მუხრან-ბატონის აზრი სავსებით ემთხვევა უმრავლესობისა და უმცირესობის მოსაზრებებს და ამდენად მათ შორის არ არის არავითარი პრინციპული განსხვავება. მაგრამ ამასთან ერთად ისიც უნდა აღინიშნოს, რომ მუხრან-ბატონის პროექტი, როგორც ვნახეთ, დეტალებში უფრო კონსერვატიულია, ვიდრე ზემოთ დასახელებული ორი სხვა პროექტი.

კონსტანტინე მამაცაშვილის აზრი. თავად-აზნაურების წრეში ყველა როდი იყო ყმების უმიწოდ განთავისუფლების მომხრე. არსებობდა ლიბერალურად მოაზროვნე ფეოდალების მცირერიცხოვანი ჯგუფიც, რომელიც შედარებით უფრო საღად წყვეტდა რეფორმის საკვანძო საკითხებს. ამთრიცხვს ეკუთვნოდა გორელი თავადი გენერალ-მაიორი კონსტანტინე მამაცაშვილი. მან თავისი შეხედულება ბატონყმობის გაუქმების თაობაზე ჩამოაყალიბა დიმიტრი ყიფიანის 14-მუხლიან შეკითხვაზე გაცემულ პასუხში. ეს პასუხი არასრული სახით ჩართულია დოკუმენტში „შეკრება ოცდაერთის. პაზრისა, ორასორმოცთა საქართველოს მემატიონეთა მიერ წარმოთქმულისა, ბატონყმობაზედ“, რომლის ქართული ტექსტი 1941 წელს გამოაქვეყნა პროფ. პ. გუგუშვილმა¹.

განსხვავებით უმრავლესობის, უმცირესობისა და მუხრან-ბატონის პროექტებისაგან, კონსტანტინე მამაცაშვილი ყმის მიწით განთავისუფლებას მოითხოვდა. ამის გარეშე მას თავისუფლება, როგორც მხოლოდ ქალაქებში გაფორმებული კატეგორია, რეალურ მნიშვნელობას მოკლებულად მიაჩნდა. გლეხის მამულებით უზრუნველყოფა, მისი აზრით, მრავალმხრივ იყო საჭირო და პირველ რიგში კი იმიტომ, რომ არ გაჩენილიყო პროლეტარიატი, წესრიგისა და მშვიდობიანობის ეს „დაუძინებელი მტერი“².

ბატონყმობიდან განთავისუფლებული გლეხის მიწით უზრუნველყოფა, მამაცაშვილის აზრით, წმინდა პატრიოტული თვალსაზრისითაც იყო აუცილებელი. ის დარწმუნებული იყო, რომ ადამიანი, რომელსაც თავის ქვეყანაში ადგილ-მამული არ ჰქონდა, ვერ დაინტერესდებოდა ამ ქვეყნის ბედითა და უბედობით, ვერ განიმსჭვალებოდა მისი ინტერესებით³.

ყოველივე აქედან გამომდინარე, მამაცაშვილი თავადაზნაურობას მოუ-

¹ პ. გუგუშვილი, ქართული ეურნალისტიკა, თბ., 1941, გვ. 396—440.

² იქვე, გვ. 428.

³ იქვე, გვ. 430.

წოდებდა გამოეჩინა გონიერება, სულგრძელობა და არ წასულიყო ყმების უმიწოდ განთავისუფლების გზით. უფრო სწორედ, ის გლეხების იმ ნაწილის უზრუნველყოფას მოითხოვდა, რომელიც რეფორმის გატარების პერიოდში ფაქტიურად ფლობდა მამულებს. საქმის წარმატებისათვის პროექტის ავტორს საჭიროდ მიაჩნდა სანადელო ნორმის დაწესება და საბატონო ყმების სამ ჯგუფად დაყოფა¹. პირველში იმ გლეხებს აქცევდა, რომელთაც მიწები ნორმის ფარგლებში ან მის ზევით ჰქონდათ. მათ შესასყიდად მიეცემოდათ მხოლოდ ნორმით დაწესებული ნაკვეთი, ხოლო დანარჩენი მემამულის სასარგებლოდ ჩამოეჭრებოდათ. მეორეში — ნორმაზე ნაკლები ფართობის მიწონენი თავსდებოდნენ. ესენი განთავისუფლებისას დამატებით არაფერს იღებდნენ, ვინაიდან, მამაცაშვილის აზრით, თუკი მათ ამ ნაკვეთით ბატონყმობის დროს შეეძლოთ არსებობა, ეს მით უფრო შეეძლებოდათ ამ ურთიერთობის მოსპობის შემდეგ, როდესაც უშუალო მწარმოებელს საგრძნობლად „გაუადვილდება ხელის გაქნევა“ და საკუთარი შრომით სარგებლობა. მესამე ჯგუფში სრულიად უმიწაწყლო გლეხები იგულისხმებოდნენ. „ამათ, — წერდა მამაცაშვილი, — თავისუფლება მივცეთ უადგილ-მამულოდ, რადგან ჩვენებურს მებატონეებს მიწის მიცემა არ შეუძლიანთ, და თუ შეუძლია ვისმე ფასით შეასყიდინოს ამ გეარს გლეხს ადგილი, ეს მის ნებაზედ... იყოს“.

ამ ღონისძიებათა ცხოვრებაში განხორციელება, მამაცაშვილის განცხადებით, გლეხსაც დააკმაყოფილებდა და მემამულესაც. პირველი მთავრობის დახმარებით მიწის იმ ფართობს შეისყიდოდა, რომელიც რეფორმის გატარების დროს მის ფაქტიურ მფლობელობაში ირიცხებოდა, ხოლო მეორე — ჩამონაკრების სახით — საგრძნობლად გაზრდიდა თავის მიწის ფონდს და ყმებიდან მიღებული ფულით შეძლებდა გაცილებით უფრო სარფიან დაქირავებულ შრომის სისტემაზე გადასვლას.

მიუხედავად იმისა, რომ კონსტანტინე მამაცაშვილის პროექტი მთელ რიგ მახინჯ მხარეებს შეიცავს (ფეოდალური საკუთრების შენარჩუნება. გლეხების მხოლოდ იმ ნაწილისთვის მიწის მიცემა, რომელიც რეფორმის გატარების პერიოდში მას ფაქტიურად ფლობდა, ჩამონაკრების დაშვება და სხვ.), ის უმრავლესობის, უმცირესობის და მუხრან-ბატონის პროექტებთან შედარებით მაინც პროგრესულია და მისი ავტორის ლიბერალურ განწყობილებას მეტყველებს.

¹ პ. გ. უ. შ. ვ. ი. ლი, ქართული ჟურნალისტიკა, თბ., 1941, გვ. 429.

თავად-აზნაურების წრეში მიმდინარე ბრძოლის ხასიათი. ჩვენ მიერ ზემოთ განხილული პროექტები, რომელთა ავტორები კონსერვატიული და ლიბერალური თავად-აზნაურების წარმომადგენლები იყვნენ, ამჟღავნებენ აზრთა სხვადასხვაობას ბატონყმობის გაუქმების ძირითად საკითხებზე. ისინი გვიჩვენებენ იმ ბრძოლას, რომელსაც ადგილი ჰქონდა პრივილეგიური წოდების სხვადასხვა ჯგუფს შორის რეფორმის მომზადებისა და გატარების პერიოდში. მაგრამ ამ ბრძოლას, როგორც ცნობილია, არ ჰქონია პრინციპული მნიშვნელობა, რადგანაც ის მიმდინარეობდა გაბატონებული ფეოდალური კლასის შიგნით დათმობის მასშტაბისა და მოცულობის შესახებ.

„მებატონეთა და ლიბერალთა ბრძოლა, — წერდა ვ. ი. ლენინი, — რომელსაც ესოდენ აზვიადებენ და ალამაზებენ ჩვენი ლიბერალური და ლიბერალურ-ნაროდნიკული ისტორიკოსები, წარმოდგენდა ბრძოლას გაბატონებული კლასების შიგნით, მეტწილად მემამულეების შიგნით, ბრძოლას მხოლოდ და მხოლოდ დათმობათა ოდენობისა და ფორმის გულისათვის. ლიბერალები, ისევე როგორც მებატონეები, იდგნენ მემამულეთა საკუთრებისა და ბატონობის აღიარების ნიადაგზე, ისინი აღშფოთებით ჰგმობდნენ ყოველგვარ რევოლუციურ აზრს ამ საკუთრების მოსპობის შესახებ, ამ ბატონობის სრული დამხობის შესახებ“¹.

რეფორმა და საზოგადოების დემოკრატიული ბანაკი. ი. ჭავჭავაძის „კრიტიკული შენიშვნები“. შეუდარებლად მეტი მნიშვნელობა ჰქონდა გლეხებისა და მათი ინტერესების დამცველ რევოლუციონერ დემოკრატების, თერგდალეულების ბრძოლას მემამულეების წინააღმდეგ აგრარული საკითხის სამართლიანი გადაჭრისათვის. მათი იდეური ბელადი ილია ჭავჭავაძე ენერგიულად მოეკიდა რეფორმის საქმეს და ყველაფერი გააკეთა, რათა მისთვის მშრომელი ხალხის სასარგებლო მიმართულება მიეცა. სასიქადულო პოეტმა სხვისი, კერძოდ, ნიკო ჭავჭავაძის, სახელით 1864 წლის მაისში წარადგინა „კრიტიკული შენიშვნები“² რეფორმის იმ

¹ ვ. ი. ლენინი, თხზ., ტ. 17, გვ. 128.

² ეს დოკუმენტი, რომლის სრული სათაურია «Критические замечания по параграфам предварительного проекта местного положения о поземельном устройстве крестьян, водворенных на землях в Тифлисской губернии», გამოაქვეყნეს სხვადასხვა დროს ა. ი. ოვიძემ (იხ. „საისტორიო მოამბე“, 3, 1947, გვ. 284—313), პ. გუგუშვილმა (СХАО, II, გვ. 173—203.), შ. ჩხეტიამ (Документы по истории Грузии, II, ნაწ. 1, თბ., 1960, გვ. 717—743) და პ. რატიაშვილმა (ილია ჭავჭავაძე და გლეხთა განთავისუფლების პრობლემა, 1963. ქართული თარგმანი). ხელნაწერი (პირი) კი ინახება საქართველოს სახელმწიფო ცენტრალურ საისტორიო არქივის განსაკუთრებული მნიშვნელობის საქმეთა ფონდში (საქმე 123, ფურც. 171—216). ჩვენ ვსარგებლობთ პრ. რატიაშვილის ქართული თარგმანით.

პროექტზე, რომელიც ამიერკავკასიის ცენტრალურმა საგლებმა კომიტეტმა შეიმუშავა. მიუხედავად იმისა, რომ ეს პროექტი გლების მიწით განთავისუფლებას უჭერდა მხარს, მაინც არ სპობდა ბატონყმობას და არსებითად მის აპოლოგიას წარმოადგენდა. სწორედ ხსენებული დოკუმენტის ამ ბატონყმური ხასიათის წინააღმდეგ გაილაშქრა ილიამ, რომელიც ძველი დახვესებული წყობილების ძირფესვიანად მოსპობის თვალსაზრისზე იდგა.

„კრიტიკული შენიშვნების“ ყოველი წინადადება გამსჭვალულია სოფლის მშრომელი მოსახლეობის ინტერესების თანმიმდევრული და პრინციპული დაცვის იდეით. მის თითოეულ სიტყვაში ისმის ხალხის ჭეშმარიტი მეგობრის ხმა, გაბედული ძახილი მისცენ ყმებს სრული და მატერიალურად უზრუნველყოფილი თავისუფლება.

დოკუმენტის ავტორმა კატეგორიულად მოითხოვა დროებით (სინამდვილეში კი მუდმივ) ვალდებულ გლებთან ინსტიტუტის არდაშვება, დებულების პროექტიდან შესაფერისი მუხლების ამოკვეთა და უშუალო მშარობებისათვის მიწის ნაკვეთის სრულ საკუთრებად დამტკიცება. ამის გარეშე, ილიას აზრით, შეუძლებელი იყო გლების ეკონომიური ცხოვრების რამდენადმე მაინც საიმედო ნიადაგზე დაყენება და მისი მეურნეობის წარმატება-განვითარების უზრუნველყოფა.

ილია პირდაპირ აყენებდა აგრეთვე საკითხს იმის შესახებ, რომ გლებს, რომელსაც „ისედაც ყველაფერი ჩამოაჭრეს“¹, ნორმაზე ზევით ფართობი არ წართმეოდა და რომ მას სამშენებლო და საწვავი ხე-ტყის მასალა უსასყიდლოდ მიეღო მებატონისაგან. ამას მოითხოვდა, მისი აზრით, სამართლიანობა და მოვალეობის შეგნება იმ ადამიანების წინაშე, რომლებმაც მემამულეებს დაუზოგეს თავიანთი ქონება, ავლა-დიდება.

დაუნდობლად მოეკიდა კრიტიკული შენიშვნების ავტორი დებულების პროექტის იმ პარაგრაფსაც, სადაც ფიქსირებული იყო მიწის პატრონის უფლება — აეყარა გლები დასახლების ადგილიდან. „ეს ყველაზე საშინელი და ყოვლად გაუმართლებელი უფლებაა, — წერდა ის, — რომელიც მემამულეს ეძლევა. რაკი ასეთი საბაბი ექნება, მემამულე არ მოუსვენებს გლებს, აქაოდა ჩემი მეურნეობისა და კარმიდამოს მოწყობა და გაფართობა მსურსო. იგი დღენიდაგ იმას ეცდება, რომ აპყაროს გლები საცხოვრებელი ადგილიდან ან გაუდიდოს ბეგარა, რასაც გლები ადგილ-მამულის ყოველი პაწაწინა ნაჭრით სარგებლობისათვის იხდის. მიწისა და ადგილ-მამულების სავალდებულო გადაცვლის არც ერთი მიზეზი, რომლებიც 81-ე მუხლშია მითითებული, არ შეიძლება შეწყყნარებულ იქნეს, ვინაიდან არც ერთ მათგანს არ გააჩნია სწორი საფუძველი. განსაკუთრებით არ შეიძლება. ეს წესი დაეუშვათ ვენახების მიმართ, რომლებშიც გლების

¹ პარაგრაფი 6.

უდიდესი ჯაფა და სახსრებია დახარჯული; გლეხებს მეტი უფლებები აქვთ ვენახებზე, ვიდრე მემამულეებს, რომლებსაც ეკუთვნით მარტო მიწა, რასაც არ გააჩნია ის ფასი და ღირებულება, რაც გააჩნია საერთოდ შრომასა და კაპიტალს. დაბოლოს, თუკი რაიმე მიგიციათ გლეხისათვის ნულარ აწუხებთ მას, დაე თავის ნებაზე მოიხმაროს, რაც მიგიციათ. ნუ აიძულებთ აიყაროს და სხვაგან დასახლდეს, ანდა იძულებით გაცვალოს თავისი ნადელი. მიეციეთ გლეხს იმედი, რომ იცხოვროს უშფოთველად, უღრტვინველად, ძალმომრეობის გარეშე. ასეთი იმედი თუ არა აქვს, გლეხი არ იქნება ბედნიერი, მას არ ექნება თავისი ყოფა-ცხოვრების, თავისი მეურნეობის გაუმჯობესების ხალისი, ცხოვრების ილაჯი გაუწყდება; მთელი მისი ცხოვრება იმათ თავნებობაზე და ახირებაზე იქნება დამოკიდებული, ვისთანაც იგი სამუდამოდ გადააბით თქვენ სავალდებულო პირობათა ძალით; ეს პირობები საბოლოოდ არაფერს კარგს არ გვიქადის გარდა იმისა, რომ შეარყევს და სრულიად არაბუნებრივ პირობებში ჩააყენებს ღარიბ გლეხს, რომლის ბედი მონობისგან განთავისუფლების შემდეგაც იმათ ხელში რჩება, ვისაც საუკუნეთა მანძილზე ჰყავდა იგი მიჯაჭვული გლეხური ცხოვრების ვაი-ვაგლახთან. მე არადა არ მესმის, როგორ შეიძლება ასეთი წესების შემოღება მაშინ, როცა ყველა და ყველაფერი იმისკენ მიისწრაფვის, რომ მისცეს ყმა გლეხს ცხოვრების სახსარი და შეუქმნას უშფოთველი ცხოვრება იმ ბედშავი სავალდებულო პირობების მთელ მანძილზე, რომელიც მხოლოდ მემამულეებისათვისაა კარგი (და ისიც ღმერთმა უწყის) და რომელიც ყოველ შემთხვევაში, გლეხთათვის საშინელებაა. თუ პატივსა სცემთ ადამიანის თავისუფლებას, თუ არ გსურთ საშინელი არეულობა გამოიწვიოთ ყმა გლეხების ბედის ასეთი გადაწყვეტის წყალობით და ამასთან იმის გულისათვის, რათა დააიმედოთ ეს ადამიანები რომ მათი ბედი უზრუნველყოფილია და არ არის დამოკიდებული სხვათა თვითნებობაზე, მოსპეთ ყველა ეს სავალდებულო და იძულებითი გადასახლება, აგრეთვე ადგილ-მამულის იძულებითი გაცვლა. ამით თქვენ, ყოველ შემთხვევაში, ერთი ნაბიჯით მიუახლოვდებით ჭეშმარიტებას, თუმცა.

გლახთა საკითხის აგრეირგად გადაწყვეტიტ სრულ სამართლიანობას მაინც ვერ მიაღწევთ“¹.

ყველაზე მკაფიოდ კი ილიას აზრი მაინც იქაა გამოთქმული, სადაც დებულების პროექტის 178—193 პარაგრაფებია გარჩეული. იქ ნათქვამია: „სავსებით უარსკყოფ რა სავალდებულო ურთიერთობას, რომლისგანაც ყველა ეს უსიამოვნება იბადება, მე უნდა დავსძინო, რომ გლახთა საკითხის გადაწყვეტა სულ სხვა საწყისს უნდა დაეფუძნოს — სახელდობრ... გლახისა და მემამულის ინტერესთა საბოლოო გათიშვის საწყისს; მათ შორის უნდა გაწყდეს ყველა ძაფი, რომელიც ნაბატონარსა და ნაყმევს იძულებით ერთმანეთთან აკავშირებს. სხვა გამოსავალი არ არის და გლახთა საკითხის ყოველგვარი გადაწყვეტა, სხვა საწყისებზე დაფუძნებულ, არ იქნება საბოლოო გადაწყვეტა; ეს იქნება მხოლოდ გაგრძელება, ოღონდ სახეშეცვლილი ფორმით, იმავე ბატონყმური მდგომარეობისა, რომლის მოსპობა დროთა ვითარებაში ისევე აუცილებელი გახდება, როგორც აუცილებელი იყო ძველი ბატონყმობის მოსპობა. თავიდან რომ ავიცილოთ გლახთა საკითხის ხელახალი გადაწყვეტა და ხელახალი დაყენება, მე აუცილებლად მიმაჩნია ეხლავე გადაწყდეს იგი საბოლოოდ და, მოისპობა რა ყოველგვარი შეხლა-შემოსლა განთავისუფლებულ და განმათავისუფლებელ წოდებათა შორის, დადგინდეს მემამულის სავალდებულო ურთიერთობისაგან გლახისა და მისთვის ბოძებული ნადელის საბოლოოდ ჩამოშორების პირობები“ (ხაზი ჩვენია — ავტ.).

აქ მოტანილი ადგილები ნათლად ამჟღავნებენ „კრიტიკული შენიშვნების“ რევოლუციურ-დემოკრატიულ და არა თავადაზნაურულ-ლიბერალურ ხასიათს, როგორც ეს ზოგ მკვლევარს მიაჩნია.

• • •

1864 წლის 13 ოქტომბრის დებულებანი. ამიერკავკასიის ცენტრალური საგლახო კომიტეტის პროექტი, შედგენილი, როგორც ვნახეთ, პრივილეგიური წოდების ინტერესების მაქსიმალური დაცვით, განხილულ და მცირე შესწორებით დამტკიცებულ იქნა მთავარ საგლახო კომიტეტისა და კავკასიის კომიტეტის გაერთიანებულ სხდომაზე. ამის შემდეგ კი ის დაამტკიცა უმაღლესმა ხელისუფლებამ, რომელმაც, ამასთან

¹ პარაგრაფები 80—82.

დაკავშირებით, 1864 წლის 13 ოქტომბერს შემდეგი სამი დებულება გამოცა: პირველი, დამატებითი წესები ბატონყმობიდან გამოსულ გლეხთა შესახებ თბილისის გუბერნიაში¹, მეორე, დებულება მემამულეთა მიწაზე მოსახლე გლეხთა მიწათმოწყობის შესახებ² და მესამე, წესები გლეხთა საზოგადოების მოწყობისა და მათ მიერ სახაზინო, საერო და სასოფლო ბეგარა-გადასახადების გაღების შესახებ³. აქედან ყველაზე მნიშვნელოვანია მეორე დებულება.

დებულება თბილისის გუბერნიის საბატონო გლეხთა მიწათმოწყობის შესახებ ორ უმთავრეს საკითხს ეხება — სოფლის მშრომელი მოსახლეობის მიწითა და სხვა სავარგულებით მომარაგებისა და ბეგარა-გადასახადების საკითხს. მართალია, უმაღლესი ხელისუფლება და მისი ადგილობრივი ორგანოები ოდნავადაც არ იჩენდნენ გულგრილობას პრივილეგიური წოდების მოთხოვნებისადმი, მათ მაინც პირველ რიგში ევრეთ წოდებული სახელმწიფოებრივი ინტერესი დააყენეს და გლეხთა მიწით განთავისუფლებას დაუჭირეს მხარი. მთავრობის ეს „რაინდული“ ნაბიჯი ნაკარნახევი იყო, რა თქმა უნდა, არა ნაზი გრძნობებით მწარმოებელი კლასისადმი, არამედ წმინდა ფისკალური და პოლიტიკური მოტივებით. საქმე იმაშია, რომ უმამულო გლეხი ვერ იქნებოდა სახაზინო გადასახადის წესიერი გადამხდელი და თანაც, რაც მთავარია, გააძლიერებდა რა პროლეტარულ ელემენტს, მეტად საშიშ ძალად დაუპირისპირდებოდა სახელმწიფოს.

მაგრამ კანონმდებელი იქვე პრინციპულად შენიშნავდა, რომ გლეხებს მიწა (ნადელი) ეძლეოდათ არა საკუთრებად, არამედ „მუდმივ სარგებლობაში“, რაშიც ისინი „დაწესებულ გადასახადებს“ უხდიდნენ მემამულეებს (პარაგრაფი 1). ნადელი, რომელშიაც საკარმიდამო, სავენახე, საბაღე და სახნავ-სათიბი ადგილები შედიოდა, ყმური მდგომარეობიდან გამოსულს იმ რაოდენობით ეძლეოდა, რა რაოდენობითაც ფლობდა მათ გასარჩევი დებულების დამტკიცებამდე (პარაგრაფი 5). მაგრამ თუკი რომელიმე სოფელში გლეხების მიწით მომარაგების შემდეგ მემამულის განკარგულებაში დარჩენილი ფართობი სანადელოდ გაცემულზე ნაკლები აღმოჩნდებოდა, მას უფლება ჰქონდა საქმე ისე წაეყვანა, რომ ნახევარი თავისთვის დაეტოვებინა (პარაგრაფი 6), რაც, თავისთავად ცხადია, უშუალო მწარმოებლის ხარჯზე უნდა გაკეთებულიყო. მეშვიდე პარაგრაფის ძალით კი მებატონე „არავითარ შემთხვევაში არ იყო ვალდებული“ გლეხისთვის სახნავ-სათესი და სათიბი ადგილები დაწესებულ უმაღლეს ნორმაზე ზევით მიეცა. ასეთ უმაღლეს ნორმად კი მიღებულ იქნა: სარწყავი მიწებისთვის —

¹ ВПСЗРИ, ХХХІХ, № 41349; შ. ჩ ხ ე ტ ი ა, საგლეხო რეფორმის ისტორიისათვის..., გვ. 413—420.

² იქვე, № 41350; იქვე, გვ. 420—455.

³ იქვე, № 41352; იქვე, გვ. 455—458.

10-დღიური (5 დესეტინა), ხოლო ურწყავისათვის — 20-დღიური (10 დესეტინა). ეს, თავისთავად ცხადია, „უფლებას“ აძლევდა მემამულეს ზედმეტი ფართობი ჩამოეჭრა და მწარმოებელი კლასის მიწათმფლობელობა. „კანონიერ“ ფარგლებში ჩაეყენებინა. უფრო მეტიც, მას იმის ნებაც მიეცა, რომ გლეხების სარგებლობიდან ამოეკვეთა მიწის მთელი ის ფართობი, რაც ეგრეთ წოდებულ „ძირითად საველე ნაკვეთს“ აღმატებოდა. ასეთ ნაკვეთად კი ითვლებოდა სარწყავი და ურწყავი მიწების უმაღლესი ნორმის ნახევარი (პარაგრ. 35).

ამრიგად, დებულება სრულიად გამორიცხავდა დადგენილ ნორმაზე მეტი ფართობის მშრომელი კაცის განკარგულებაში დატოვების შესაძლებლობას, მაგრამ ოდნავადაც არ ითვალისწინებდა იმათი მფლობელობის გაფართოებას, რომელთაც ნორმაზე ნაკლები მამულები ჰქონდათ. კანონი მიწას არც იმ გლახს აძლევდა, რომლის სარგებლობაში ის რეფორმამდე არ ყოფილა. ასეთების რაოდენობა კი, როგორც ცნობილია, 1800 კომლი ან საბატონო ყმების 14% აღმოჩნდა. მიწები არც შინაყმებისა და ხიზნებისათვის მიუციათ. ამათი რიცხვი კი საკმაოდ საგრძნობი იყო — 8102 კომლს უდრიდა აღმოსავლეთ საქართველოში. ყოველივე ამას ისიც უნდა დაემატოს, რომ წვრილი მემამულეები, ე. ი. ისეთები, რომელთა სახნავ-სათესი და სათიბ-საძოვარი ადგილების ფართობი 60 დღიურზე (30 დესეტინაზე) ნაკლები იყო, თავისუფლდებოდნენ დებულებით გლეხისთვის მიწის გამოყოფის მოვალეობისგან (პარაგრაფი 130).

მწარმოებელ კლასს თავის მეურნეობის გასამართავად და ცხოვრება-არსებობის შესანარჩუნებლად ესაჭიროებოდა არა მარტო ზემოთ ჩამოთვლილი კატეგორიის მიწები, არამედ ხე-ტყეც, თევზსაჭერი და სანადირო ადგილებიც. ყველა ამით სარგებლობის საკითხი პრივილეგიური წოდების სასარგებლოდ იყო გადაწყვეტილი. დებულების თანახმად მემამულე ვალდებული არ იყო გლეხისთვის სამშენებლო ხე-ტყის მასალა მიეცა (პარაგრ. 30). ის თავისუფალი იყო აგრეთვე შეშის უსასყიდლოდ გაცემის მოვალეობისაგან (პარაგრ. 31). იქ კი, სადაც გლეხები გასარჩევი კანონის გამოქვეყნებამდე უფასო საწვავით სარგებლობდნენ, მისი გამოქვეყნების შემდეგაც, ცხრა წლის განმავლობაში, მიიღებენ შეშას, „ვალეჟინკს“, როკსა და სხვ., მაგრამ განსაკუთრებული საფასურის ან გადასახადის გადახდით (პარაგრ. 32). იგივე ითქმის თევზსაჭერი ადგილების შესახებაც. ისინი პრინციპში მემამულის საკუთრებად გამოაცხადეს. მაგრამ იქ, სადაც მეთევზეობა მწარმოებელი კლასის შემოსავლის ერთ-ერთ უმთავრეს წყაროს წარმოადგენდა, გლეხს ნება ეძლეოდა ხსენებული ადგილებით ესარგებლა, მაგრამ, რა თქმა უნდა, სათანადო გადასახადის გაღებით (პარაგრ. 90). რაც შეეხება ნადირობის უფლებას, ესეც მემამულის პრივილეგიად იქნა აღიარებული, მაგრამ გლეხს არ ეკრძალებოდა მოეკლა თავის მიწაზე

„მტაცებელი ან მეურნეობისათვის მავნებელი“ ნადირი ან ფრინველი (პარაგრ. 91).

დებულებაში შეტანილი იყო მთელი რიგი მუხლებისა, რომლებიც კიდევ უფრო ზღუდავენ გლეხების ისედაც შეზღუდულ მიწით სარგებლობას. 55-ე პარაგრაფი, მაგალითად, ნებას აძლევდა მემამულეს მოეთხოვა, გლეხის თანხმობის გარეშე, მისი კარმიდამოს სხვაგან გადატანა, თუკი ამის გარეშე „შეუძლებელი“ იყო საბატონო და საგლეხო მიწების გამიჯვნა და მიწის პატრონის ნაგებობათა სახანძრო უშიშროების დაცვა. 73—75 პარაგრაფების ძალით კი მას ასეთივე უფლებები ენიჭებოდა გლეხის მუდმივ სარგებლობაში გადაცემული სახნავ-სათესი მიწებისა და სხვა სავარგულების მიმართ. მემამულეებს შეეძლოთ ხსენებული მიწების გაცვლა მოეთხოვათ, თუკი მათ ტერიტორიაზე მადნეული ან მინერალური წყლები აღმოჩნდებოდა და მებატონე წისკვილების, ფაბრიკა-ქარხნების, სარწყავი არხებისა და დრენაჟის გაკეთებას მოისურვებდა.

დებულების მეორე განყოფილება (პარაგრაფები 136—174) გადასახადის საკითხისადმი მიძღვნილი. კანონი, როგორც ზემოთ აღვნიშნეთ, მიწას მწარმოებელ კლასს აძლევდა არა საკუთრებად და უფასოდ, არამედ მუდმივ სარგებლობაში და გარკვეული გადასახადის გადახდით. 136 პარაგრაფის ძალით, მაგალითად, ბატონყმობიდან განთავისუფლებული გლეხი, დროებით ვალდებულ გლენად რომ გამოაცხადეს, მისთვის მიცემულ მიწებში იხდიდა გამოსაღებს, რომლის სიდიდე-რაოდენობა მასსა (გლენსა) და მემამულეს შორის ურთიერთშეთანხმებით უნდა დადგენილიყო. თუკი ასეთი შეთანხმება ვერ იქნებოდა მიღწეული, მაშინ გადასახადის განსაზღვრისას დებულებაში მოცემული მითითებით უნდა ეხელმძღვანელათ. ამ მითითების თანახმად კი გლეხი ვალდებულ იყო ყოველ ერთ დღიურ (0,5 დესეტინა) საკარმიდამო მიწაში მებატონისათვის სამსამი მანეთი ეძლია (პარაგრაფი 143). მაგრამ თუკი ეს კარმიდამო სავაჭრო-სამრეწველო და მჭიდროდ დასახლებულ ადგილებში ან მათ მახლობლად იმყოფებოდა (რაც შრომის პროდუქციის ხელსაყრელ პირობებში გაყიდვას უწყობდა ხელს), მაშინ მისი ფართობის ყოველი დღიური უნდა შეფასებულიყო ჩვეულებრივზე გაცილებით უფრო ძვირად, მაგრამ არა უმეტეს 120 მანეთისა და საგადასახადო თანხაც აქედან უნდა გაანგარიშებულიყო 5% რაოდენობით (პარაგრაფი 144). სავენახე და სახნავ-სათესი ადგილებისათვის გლეხი სპეციალურ გადასახადებს კულუხსა და დალას იხდიდა, რომელთა რაოდენობა შესაფერისად შემოსავლის ერთი მეოთხედი ნაწილით იყო განსაზღვრული (პარაგრაფები 146, 148).

დებულებაში, როგორც ვნახეთ, არაფერია ნათქვამი იმის თაობაზე, შეეძლო თუ არა დროებით ვალდებულ გლენს მის სარგებლობაში მყოფი მიწა საკუთრებად შეეძინა და თუ შეეძლო, სახელდობრ, როგორ და რა

პირობებში. ამ კითხვაზე პასუხობს მეორე, იმავე 1864 წლის 13 ოქტომბერს გამოცემული დებულება „დამატებითი წესები საბატონო გლეხების განთავისუფლების შესახებ“¹, რომელიც ზემოთ გაკვრით უკვე მოვიხსენიეთ. მისი მეცხრე პარაგრაფის თანახმად, გლეხს ნება ეძლეოდა თავისი ნადელი (კარმიდამო, სავენახე, სახნავ-სათესი მიწები და სხვა სავარგულეები), მთლიანად ან ნაწილობრივ, სრულ საკუთრებად შეესყიდა, მაგრამ იმ აუცილებელი პირობით, რომ შემამულე ამის თანახმა იქნებოდა. გამოსასყიდი თანხის სიდიდე-რაოდენობისა და გადახდის ვადების დადგენა დამოკიდებული იყო მხარეების ნებაყოფლობით შეთანხმებაზე, რომელსაც ექვსი გარეშე პირი ესწრებოდა და მომრიგებელი მოსამართლე ადასტურებდა (პარაგრაფი 13). ასეთი შეთანხმების მიუღწევლობის შემთხვევაში გამოსასყიდი თანხა სხვადასხვაგვარად ისაზღვრებოდა. თუკი, მაგალითად, გლეხი ნადელში, საწესდებო სიგელის თანახმად, ფულად ღალას იხდიდა, მაშინ მისი წლიური რაოდენობა იანგარიშებოდა როგორც კაპიტალიდან მიღებული 6-პროცენტიანი სარგებელი. სხვანაირად რომ ვთქვათ, ჰდებოდა წლიური ფულადი გადასახადის 6-პროცენტიანი კაპიტალიზაცია, მისი 16²/3-ზე გამრავლება. ამ გზით მიღებული თანხა იქნებოდა სწორედ ის, რაც უნდა გაეღო გლეხს მიწის საკუთრებად შესაძენად. მაგრამ ეს თანხა, კანონმდებლის შენიშვნის თანახმად, არ უნდა ყოფილიყო კომლზე 350 მანეთზე ზევით საერთოდ, ხოლო გორის მაზრის მთავარიან რაიონებსა და მთიანეთში — 250 მანეთზე მეტი. იმ შემთხვევაში კი, როდესაც გლეხი კარმიდამოში ფულად გადასახადს იხდიდა და საველე მიწებში — ნატურალურს, მაშინ გამოსასყიდი თანხის ის ნაწილი, რომელიც მიწების პირველ ჯგუფზე მოდიოდა, ზემოაღნიშნული წესით გაიანგარიშებოდა, ხოლო დანარჩენი — ურწყავი და სარწყავი მიწების თითოეული დღიურის შესაფერისად 10 და 20 მანეთად შეფასების გზით. ამნაირად მიღებული თანხის საერთო რაოდენობა არ უნდა გასცილებოდა კომლზე 250 მანეთს.

ყოფილი ყმა, რომელიც ნადელს შეისყიდიდა, თავს აღწევდა დროებით ვალდებულ მდგომარეობას და მესაკუთრე გლეხების კატეგორიაში გადადიოდა.

რეფორმასთან დაკავშირებით კიდევ ორი საყურადღებო დოკუმენტი გამოიკა. ესენია წესები: „ბატონყმობიდან გამოსული გლეხების უფლებებისა და საწესდებო სიგელების შემოღებამდე მათი მემამულეებთან დამოკიდებულების შესახებ“² და „ყმების პირადი განთავი-

¹ ВПСЗРИ, XXXIX, 41349, შ. ჩხეტია, საგლეხო რეფორმის ისტორიისათვის..., გვ. 413—420.

² შ. ჩხეტია, საგლეხო რეფორმის ისტორიისათვის..., გვ. 458—462.

სუფლების გამო მემამულეებისათვის ფულადი გასამრჯელოს გაცემის შესახებ¹. ორივე დოკუმენტი დამტკიცებულია მეფისნაცვალ მიხეილის მიერ 1864 წლის 4 ნოემბერსა და 1865 წლის 25 მარტს.

პირველი დოკუმენტის თანახმად ყოფილ საბატონო ყმას ნება ეძლეოდა (პარაგრაფი 2) შესულიყო ქორწინებაში და ესარგებლა ოჯახის ყველა უფლებით, ხელშეკრულება დაედო ხაზინასთან ან კერძო პირთან, ეწარმოებინა ვაჭრობა, გაემართა ფაბრიკა-ქარხნები, აღედრა საჩივარი, გამოსულიყო სასამართლო პროცესზე, დაეცვა თავი და სხვ. ამ თავისთავად სასარგებლო შედეგათებთან ერთად დებულება აღგენდა ისეთ წესებს, რაც მწარმოებელ კლასს არსებითად რეფორმამდელ მდგომარეობაში აყენებდა. მესამე პარაგრაფში, მაგალითად, პირდაპირ იყო მითითებული, რომ ბატონყმური დამოკიდებულებიდან გამოსული გლეხი ვალდებული იყო საწესდებო სიგელების შემოღებამდე (ე. ი. 1866 წლის 1-ლ იანვრამდე) მიწის პატრონისთვის ეხადა ყველა ის გადასახადი, რასაც იგი რეფორმამდე იხდიდა. მეშვიდე და მერვე პარაგრაფების ძალით კი იმავე საწესდებო სიგელების შემოღებამდე ნებადართული იყო ვალდებული გლეხების დამის გუშაგად გამოყვანა, ხოლო მათი ურმების — მემამულის საჭიროებისათვის გამოყენება, ამათზე დახარჯული ღირებულების შრომითი ბეგარის ანგარიშში ჩათვლის პირობით.

წესებში „ყმების პირადი განთავისუფლების გამო მემამულეებისათვის ფულადი გასამრჯელოს გაცემის შესახებ“ ნათქვამი იყო, რომ მებატონეს რეფორმით მიყენებული „ზარალის“ ასანაზღაურებლად ყოველ განთავისუფლებულ მამრობითი სქესის გლეხში გასამრჯელო ეძლევა 25 მანეთის რაოდენობით (პარაგრაფი 3). ეს დახმარება ორკეცდებოდა იმათ მიმართ, ვისაც უკანასკნელი კამერალური აღწერის მიხედვით ოცდაერთ სულზე ნაკლები მამრობითი სქესის გლეხი აღმოაჩნდებოდა (პარაგრაფი 4). მეხუთე პარაგრაფის ძალით კი მეფისნაცვალს უფლება ჰქონდა დამატებითი ფულადი დახმარება მიეცა იმ თავად-აზნაურისთვისაც, რომელსაც ოცდაერთზე მეტი სული გლეხი ჰყავდა, მაგრამ რომელიც, ოჯახის წევრების სიმრავლის ან სხვა ყურადსაღები მიზეზის გამო, მძიმე მატერიალურ მდგომარეობაში იყო ჩავარდნილი.

§ 2. რეფორმა დასავლეთ საქართველოში

აღმოსავლეთ საქართველოს შემდეგ საგლეხო რეფორმა მალე დასავლეთ საქართველოშიც გატარდა. დებულება ბატონყმობის გაუქმების შე-

¹ შ. ჩხეტია, საგლეხო რეფორმის ისტორიისათვის..., გვ. 470—477.

სახებ ქუთაისის გუბერნიაში, რომლის შემადგენლობაში შედიოდა იმერეთი, გურია და რაჭა; მთავრობამ 1865 წლის 13 ოქტომბერს დაამტკიცა, სამეგრელოში — 1866 წლის 1-ლ დეკემბერს, აფხაზეთში — 1870 წლის 8 ნოემბერს და სვანეთში — 1871 წლის 8 ოქტომბერს. ჩვენ საგანგებოდ არ ვჩერდებით საბატონო გლეხების განთავისუფლების ძირითად პრინციპებზე ქუთაისის გუბერნიასა და სამეგრელოში¹, რადგანაც ეს პრინციპები არსებითად იგივე იყო, რაც ქართლ-კახეთში. განსხვავება მხოლოდ დეტალებში იგრძნობოდა. ახასიათებდა რა, კერძოდ, იმერეთისა და გურიის თავადაზნაურობის მიერ შედგენილ და სხვადასხვა ინსტანციებში მოწონებულ პროექტს, მეფისნაცვალ მიხეილ ვერდა: „ეს პროექტი შედგენილია 1864 წლის 13 ოქტომბრის თბილისის გუბერნიის დებულებათა დამატებითი წესების სახით. ეს წესები... იმეორებენ რა იმ მთავარ საწყისებს, რომლებიც საფუძვლად დაედვა გლეხთა ყოფის მოწყობას თბილისის გუბერნიაში, უშვებენ მხოლოდ იმ გამონაკლისებს, რაც ქუთაისის გუბერნიის თავისებურებამ მოითხოვა“².

იგივე ითქმის სამეგრელოს შესახებაც. სამეგრელოში ბატონყმობის გაუქმების თაობაზე გამოცემული დებულების მეორე პარაგრაფში მითითებული იყო; რომ 1864 წლის 13 ოქტომბრის „სჯულებანი ყოველთა იმ ნაწილთა შინა, რომელთაცა ზედა არა დაწესდებიან განსხვავებანი ამა დამატებითა კანონთა შინა“, გავრცელდებიან სამეგრელოს, ე. ი. ზუგდიდის, სენაკისა და ლეჩხუმის მაზრის საბატონო გლეხებზეც.

რეფორმის თავისებურება ქუთაისის გუბერნიაში (იმერეთი, რაჭა, გურია). ის მცირე თავისებურებანი, რომლითაც აღინიშნა, კერძოდ, საგლეხო რეფორმის გატარება ქუთაისის გუბერნიაში (იმერეთსა, რაჭასა და გურიაში), შეიძლება მოკლედ ასე ჩამოვყალიბოთ. 1) თბილისის გუბერნიაში, როგორც უკვე ვნახეთ, სანადელო მიწის ნორმები დაწესებულ იქნა ცალ-ცალკე სარწყავი და ურწყავი მიწებისთვის (10 და 20 დღიური შესაბამისად), ქუთაისის გუბერნიაში კი დებულებით³ მხოლოდ ერთი საერთო უმაღლესი ნორმა (12 ქევა ან 4,5 დესეტინა) დაწესდა⁴. 2) ძირითადი საველე ნაკვეთი თბილისის გუბერნიაში ცალ-ცალკე ისაზღვრებოდა სარწყ-

¹ ბატონყმობის გაუქმების შესახებ სამეგრელოში იხ. ი. ახალაიას ნაშრომი, საგლეხო რეფორმა სამეგრელოში, სოხ., 1958.

² CXAO, 11, გვ. 374.

³ ტექსტი დებულებისა ბატონყმობის გაუქმების შესახებ ქუთაისის გუბერნიაში დაიბეჭდა გვ. „კავკაზის“ 1865 წლის 88 და 89 ნომრებში. ქვემოთ სწორედ ამ დებულების მუხლები იქნება მითითებული.

⁴ დებულება, მუხლი 25; С. Авалиани, т. IV, გვ. 2.

ყავი და ურწყავი მიწებისთვის და უდრიდა აღნიშნული მიწების ნორმის ნახევარს (მაგალითად, სარწყავი მიწების რაიონში, სადაც უმაღლეს ნორმას 10-დღიური წარმოადგენდა, ძირითადი საველე ნაკვეთი ამის ნახევარი ან 5-დღიური იყო). ქუთაისის გუბერნიაში კი მისი ბუნებრივ-გეოგრაფიული და კლიმატური პირობების თავისებურებათა გამო, ძირითადი საველე ნაკვეთის მხოლოდ ერთი ნორმა (4 ქცევა) დადგინდა¹. 3) წვრილ მიწის მფლობელად თბილისის გუბერნიაში დებულებით ის მემამულე იქნა აღიარებული, რომლის განკარგულებაში (გლეხების სარგებლობაში მყოფი მიწების ჩათვლით) იყო არა უმეტეს 60 დესეტინა (120 დღიური) მიწისა, ხოლო ქუთაისის გუბერნიაში — 22,5 დესეტინა². 4) თბილისის გუბერნიაში ის მემამულე თავისუფლდებოდა მიწის გამოყოფის მოვალეობისაგან, რომელსაც 30 დესეტინაზე ნაკლები მიწა ჰქონდა, ხოლო ქუთაისის გუბერნიაში — 11 დესეტინაზე ნაკლები³. 5) სანადელო მიწებში ქუთაისის გუბერნიის გლეხები ისეთსავე გადასახადს იხდიდნენ, როგორსაც თბილისის გუბერნიისა, ე. ი. მოსავლის მეოთხედ ნაწილს. გამონაკლისს მხოლოდ მალღარი ვაზი წარმოადგენდა, რომლიდანაც გლეხს მემამულისთვის შემოსავლის $\frac{1}{3}$ უნდა ეძლია⁴. 6) სარწყავი მიწები თბილისის გუბერნიაში ორჯერ უფრო ძვირად შეფასდა, ვიდრე ურწყავი. ქუთაისის გუბერნიაში კი ეს ასე არ მოხდა. იქ, როგორც ნათქვამია, დამატებითი წესების (დებულების) პროექტის შემმუშავებელი კომისიის თავმჯდომარის გ. მუხრან-ბატონის მოხსენებით ბარათში, «По несуществовании... коренного различия между землями, кои там вовсе не нуждаются в поливке..., для определения размера выкупной ссуды, признано достаточным земли, принадлежащие к плодороднейшим, оценить в полтора раза более противу земель обыкновенных»⁵.

¹ დებულება, მუხ. 37, С. А в а л и а н и, т. IV, გვ. 3.

² დებულება, მუხ. 54; СХАО, II, გვ. 345; С. А в а л и а н и, т. IV, გვ. 2—3.

³ დებულება, მუხ. 58; С. А в а л и а н и, т. IV, გვ. 2. უკეთებდა რა ამ მუხლს კომენტარს, მეფისნაცვალი მიხეილ ნიკოლოზის ძე თავის მიმართებაში ქუთაისის გუბერნიის გლეხებისადმი წერდა: «При установлении правил по наделу крестьян землею, нельзя было не обратить особенного внимания на тех из помещиков, кои, владея слишком ограниченным количеством земли (менее 60 кцев) не могут, без явного разворения для себя, подчиниться вполне сим (принятым для Тифлисской губерний — авт.) правилам. А потому, для крестьян, водворенных в имениях подобных помещиков, постановлено особое мероприятие, и именно — переселение их.. на казенные земли» (газ. «Кавказ», 1865, № 91).

⁴ დებულება, მუხ. 70; СХАО, II, გვ. 345.

⁵ СХАО, II, გვ. 346.

საგლეხო რეფორმის თავისებურებანი აფხაზეთში. აფხაზეთშიც რეფორმა ძირითადად იმავე საფუძველზე გატარდა, რა საფუძველზედაც საქართველოს სხვა რაიონებში. ის ერთგვარი თავისებურება კი, რომელიც თან ახლდა ბატონყმობის გაუქმებას ამ მხარეში, გამოიხატებოდა იმაში, რომ, დებულების თანახმად (მუხ. 3), „პირად დამოკიდებულებიდან გამოსული“ ყველა გლეხი, განურჩევლად კატეგორიისა (ახაშალა, ახოუიუ, ამაწურასქუ და ანხაიუ), „მხოლოდ“ ოთხი წლის განმავლობაში რჩებოდა დროებით ვალდებულ მდგომარეობაში და მემამულეს უხდიდა რეფორმამდელი ხანის ბეგარა-გადასახადებს. ოთხი წლის შემდეგ კი გლეხი მექანიკურად გადადიოდა თავისუფალ მოსახლეთა რიგებში. ასეთი გადასვლა კანონით ადრეც, აღნიშნული ვადის გასვლამდეც, შეიძლებოდა მომხდარიყო, მაგრამ იმ პირობით, რომ განთავისუფლებული პირი განსაკუთრებულ დებულებით გათვალისწინებულ, გამოსასყიდ თანხას გადაუხდიდა მემამულეს. ეს თანხა კი სხვადასხვა იყო სხვადასხვა კატეგორიის გლეხებისთვის და მათი ოთხწლიანი გადასახადების ღირებულებას უდრიდა. სოციალური კიბის ყველაზე დაბალ საფეხურზე მყოფ სრულიად არაფრის მქონე ახაშალას, მაგ., თავის განთავისუფლებაში უნდა გადაეხადა, ასაკისა და სქესის მიხედვით, 50-დან 120 მანეთამდე (მუხლი 6), ახოუიუს — 40-დან 180 მანეთამდე (მუხ. 10) და ამაწურასქუს — 40-დან 80 მანეთამდე (მუხ. 13). წარმოდგენა რომ ვიქონიოთ აქ დასახელებული თანხების სიდიდეზე, საკმარისია აღვნიშნოთ, რომ იმ დროს ძროხა აფხაზეთში 10 მანეთად ფასობდა და იყიდებოდა. სხვანაირად რომ ვთქვათ, ახაშალას თავის ჰატონისთვის უნდა მიერთმია 5—12 ძროხის ღირებული გამოსასყიდი თანხა, ახოუიუს — 4—18 ძროხისა და ამაწურასქუს — 4—8 ძროხისა. ამ მეტისმეტად დიდი გამოსასყიდი თანხის ვალემა, თავისთავად ცხადია. მწარმოებელი კლასის მხოლოდ უმნიშვნელო პროცენტს შეეძლო და ამიტომ დებულების ის მუხლი (21), რომელიც ნებას აძლევდა გლეხს გაცილებით უფრო ადრე გამოესყიდა თავი, ვიდრე გავიდოდა ვალდებულ ურთიერთობათა 4-წლიანი ვადა, არსებითად მოკლებული იყო პრაქტიკულ მნიშვნელობას.

რეფორმის თავისებურებას აფხაზეთში წარმოადგენდა ისიც, რომ დეჰულებით (მუხ. 24) მიწა (საკარმიდამო, სახნავ-სათესი და საბალე ადგილები) სრულსაკუთრებაში ეძლეოდა არა მარტო პრივილეგიურ წოდებას (თავადი, აზნაური), არამედ გლეხობასაც შემდეგი ნორმით: ოჯახს, ერთი სულისაგან შემდგარს — 3 დესეტინა, 2—3 სულისაგან — 5 დესეტინა, 4 ან 5 სულისაგან — 6 დესეტინა და 6 და მეტი სულისაგან —

7 დესეტინა¹. მიწის საკუთრებაში დამტკიცება მართლაც განასხვავებდა აფხაზეთს საქართველოს სხვა რაიონებისაგან, სადაც გლეხს მიწა მხოლოდ მუდმივი სარგებლობის უფლებით მიეცა. ამან და აგრეთვე იმანაც, რომ რეფორმის გამოცხადებიდან 4-წლიანი ვადის დამთავრების შემდეგ გლეხი (დებულებით), როგორც ზემოთაც ვთქვით, მექანიკურად უნდა გამოსულიყო დროებით ვალდებულ მდგომარეობიდან, ზოგ მკვლევარს საფუძველი მისცა საგლეხო რეფორმა აფხაზეთში „თანმიმდევრული ბურჟუაზიული ხასიათის“ რეფორმად გამოცხადებინა², რომელსაც „თითქმის არ დაუტოვებია ბატონყმობის ნაშთები“³.

აფხაზეთში გატარებული რეფორმის ზემოაღნიშნული თავისებურება აიხსნება ფეოდალურ-ბატონყმური ურთიერთობის შედარებით სუსტად განვითარებით და კლასობრივი ბრძოლის გამწვავებით, რომელმაც ასე მკაფიოდ იჩინა თავი 1866 წლის აჯანყებაში. აჯანყებულმა გლეხებმა კატეგორიულად უარი განაცხადეს მიწა გამოესყიდათ, რადგანაც მას ისინი ისედაც თავის საკუთრებად თვლიდნენ. მთავრობა იძულებული იყო ანგარიში გაეწია მწარმოებელი კლასის ამ პროტესტისათვის და სათანადო დათმობაზე წასულიყო.

საგლეხო რეფორმა სვანეთში. 1866 წლის 1-ლი დეკემბრის დებულება საგლეხო რეფორმის შესახებ სამეგრელოში, როგორც ცნობილია, სადალიანო სვანეთზეც გავრცელდა. ამავე დებულების ძალით ბატონყმობა ადმინისტრაციულად სამეგრელოს ფარგლებში შემავალ სვანეთის მეორე ნაწილშიც — სამთავრო ან სადადეშქელიანო სვანეთშიც უნდა გაუქმებულიყო, მაგრამ სინამდვილეში ეს ასე არ მოხდა და ძველი ურთიერთობა იქ ფაქტიურად ხელუხლებლად დარჩა. დამოკიდებული წოდებისათვის „მეფის წყალობის“ საზეიმოდ გამოცხადება, რაც 1867 წლის 19 თებერვლისთვის იყო დანიშნული, არ შემდგარა, გზების უვარგისობა-გაუსვლელობის⁴, თავად დადეშქელიანებს შორის მამულების თაობაზე ატეხილი დავის⁵ და, რაც მთავარია, სამეგრელოში გატარებული რეფორმის შედეგებისადმი სვანი გლეხის უარყოფითი დამოკიდებულების გამო⁶.

¹ იხ. «Инструкция по земельному устройству Абхазии», § 27. გამოქვეყნებულია ი. ანთელავას, ა. ოლონეცკისა და გ. ძიძარიას მიერ. «Исторический архив», ტ. V, გვ. 423—452.

² ალ. ბენდიანიშვილი, აგარული ურთიერთობანი საქართველოში 1890—1917 წწ., თბ., 1965, გვ. 10.

³ იქვე.

⁴ СХАО, II, გვ. 525.

⁵ იქვე, გვ. 534.

⁶ ეს უკმაყოფილება აშკარად იგრძნო ლევაშოვმა სადალიანო სვანეთში, სადაც, როგორც უკვე ვთქვით, ბატონყმური ურთიერთობა გაუქმდა 1866 წლის 1-ლი დეკემბრის სა-

მწარმოებელი კლასი აქ კიდევ რამდენიმე წელი დარჩა წინანდელ მდგომარეობაში და ძველებურად იხდიდა მასზე დაკისრებულ ბევარ-გადასახადებს.

მაგრამ ბატონყმობის დატოვება მარტო სვანეთში, ეტყობა, არც მთავრობას მიაჩნდა შესაძლებლად და არც ადგილობრივ ფეოდალებს. ამ უკანასკნელთ, სამთავრო სვანეთის თავადებს თენგიზ, გელა, ბექირბეი და მასოსტო დადეშქელიანებს, 1868 წელს არზა მიუერთმევიათ ქუთაისის სამხედრო გუბერნატორ ლევაშოვისათვის და მათ სამფლობელოში რეფორმის გატარება და 132 კომლი გლეხის განთავისუფლებისათვის სათანადო გასამრჯელოს მიცემა უთხოვიათ¹. ამას შედეგად მოჰყოლია ქუთაისის სამხედრო გუბერნატორის მოგზაურობა (1869 წ.) სვანეთში იმ მიზნით, რათა გასცნობოდა ამ, აქამდე მისთვის სრულიად უცნობ, მხარეს. ამ მოგზაურობის დროს იმ დასკვნამდე მივიდა, რომ რეფორმა, რომლის გადადება მას შეუძლებლად მიაჩნდა, უნდა გატარებულიყო სვანეთში თავისებურად, საქართველოს სხვა რაიონებთან განსხვავებულ საფუძველზე. იქ, მისი აზრით, არ უნდა დაეშვათ დროებით ვალდებულ ურთიერთობათა არსებობა და გლეხი პირდაპირ მესაკუთრეთა რიგებში გადაყვანათ. «Пройдя всю Сванетию (пешком), — წერდა ლევაშოვი მეფისნაცვალს 1870 წლის 11 აგვისტოს, — я убедился, что при том уровне нравственного и умственного развития, на котором находится тамошнее население, следует по возможности упрощать вообще правила, которыми они должны будут руководствоваться, а в отношении крепостного состояния я пришел к тому заключению, что лучшим исходом для крестьянского дела в княжской Сванетии может быть лишь непосредственный переход крестьян из помещичьей зависимости в раз-

მეგრელოსთვის მიღებული დებულების ძალით. «Во всей Даднановской Сванетии, — წერდა ის მეფისნაცვალს 1869 წლის 18 ივლისს, — настроение жителей спокойное и появившие между ними войск не произвело никаких недоразумений; с своей стороны войска ведут себя в отношении жителей очень осторожно и до сих пор ко мне не поступало ни одной жалобы на них. Но в отношении повинения установленным властям и порядка я, к сожалению, должен доложить, что жители... далеко не ведут себя хорошо; не могут даже и теперь предвидеть положительно результат строгих внушений, сделанных мною. Во всяком случае, по возвращению моем из Вольной Сванетии, если требования мои, в особенности по крестьянской реформе, не будут жителями исполнены, я полагаю нужным принять в моем же присутствии решительные меры взыскания» (СХАО, II, გვ. 520—521. ხაზი ჩვენია—ავტ.).

¹ СХАО, II, გვ. 525.

რად კრესტყან სობსვენნიკოვ. ვრემენი-ობყა-
თელნიე ოთნოენიე ვ დადეშკელიანოვსკიე სვანე-
ტიე, პრი ოთდალენნოსი გვანყნი ცენტროვ ოპრავლენიე ნი პრი ოთსუთს-
თნი ვ თენენიე 5-ტი მესყეცე ვსყკოგო სოობშენიე, პოსთავილი ბყ
კაკ პომეშჩიკოვ, ტაკი კრესტყან ვ სავოე ტრუდნოე
პოლოჟენიე პრი პერვოე ვოზნიკშემ ნედორაზუმე-
ნიე; ვოსთანოვლენნიე სპორ, ნეპოლუჩყა ვსკორე ზაკონნოგო რაზრეშენი-
ენიე, ნემინუემო პოველ ბყ რაზდრეჟენიუ ზაინტერესოვანნყნი (სტო-
პროე) ნი ლეგკო ბყ პოდალ პოვოდ კ სთოლკნოვენნიემ, ოუსთრანიე კოტორყე
ნე ბყლი ბყ ვ სოსთანიე ნი მესთნიე პრისთავ, ნი მიროვიე . პოსრედ-
ნიკ»¹ (ხაზი ჩვენიე. — ავტ).

ეს წინადადება ამ სახით, როგორც ჩანს, პირველად თვით სვან ფეო-
დალებს წამოუყენებიათ. მათ ლევაშოვისთვის განუცხადებიათ, რომ ისინი
მზად არიან მისცენ თავიანთ ყმებს (რომელთა რაოდენობა 132 კომლს ან
614 მამრობითი სქესის სულს უდრიდა) მიწა უსასყიდლოდ და სრულ სა-
კუთრებაში და რომ ისინი უარს ამბობენ დროებით ვალდებულ ურთი-
ერთობათა თუნდაც ცოტა ხნით შენარჩუნებაზე². მიწის რაოდენობა, ამ
წინადადების ავტორები თენგიზ, გელა, ბეჭირბეი და მასოსტო დადემქე-
ლიანები გლეხებისთვის რომ იმეტებდნენ, საკარმიდამო ნაკვეთითა და
კომლზე 4 ქვევა სახნავ-სათესი და სათიბი ადგილებით იფარგლებოდა.
ამაზე მეტი მიწის ფართობი კი გლეხებს უნდა ჩამოსჭროდათ და მემამუ-
ლეთა უშუალო განკარგულებაში გადასულიყო. ასეთი „მსხვერპლის“ გა-
ლებისათვის დასახელებული პირები მამრობითი სქესის ყოველ განთავი-
სუფლებულ გლეხში ორმაგ გასამრჯელოს, ე. ი. 50 მანეთს ითხოვდნენ,
განსხვავებით, ვთქვათ, მეგრული ფეოდალებისაგან, რომლებიც 25 მანე-
თით დაკმაყოფილდნენ³.

ლევაშოვმა, როგორც უკვე ვთქვით, მხარი დაუჭირა არა მარტო წინა-
დადებას რეფორმის გატარების შესახებ, არამედ შესაძლებლად ცნო
დადემქელიანების მიერ წამოყენებულ სხვა მოთხოვნისებათა მთლიანად
დაკმაყოფილება. ის დაბეჯითებით თხოვდა მეფისნაცვალს ეშუამდგომლა
უმალღესი ხელისუფლების წინაშე, რათა მას სამთავრო სვანეთის (ეცერი-
სა და ცხუმარის თემების) თავადებისთვის მათ მიერ ვადებული „დიდი
მსხვერპლის“ საკომპენსაციოდ ორმაგი გასამრჯელო მიეცა⁴. სხვანაირად
რომ ვთქვათ, მთავრობას მამრობითი სქესის ყოველი განთავისუფლებუ-

¹ СХАО, II, გვ. 525—526.

² იქვე, გვ. 526.

³ იქვე,

⁴ იქვე, გვ. 529.

ლი გლეხისთვის უნდა გაეღო 50 მანეთი, რაც საერთო ჯამში ქმნიდა 30 700 მანეთს¹.

მეფისნაცვალმა სამართლიანად ცნო ლევაშოვის წინადადება, მხარი დაუჭირა მას და საკითხი ორმაგი გასამრჯელოს შესახებ კავკასიის კომიტეტის წინაშე დააყენა². ამ უკანასკნელმა ის (სახელმწიფო საბჭოს მეშვეობით) სოფლის მოსახლეთა ყოფა-ცხოვრების მომწყობ მთავარ კომიტეტში გადაიტანა, რომელმაც 1871 წლის 20 სექტემბრის სხდომაზე, განიხილა რა აღძრული შუამდგომლობა, შესაძლებლად ცნო მისი დაკმაყოფილება³. იმავე წლის 8 ოქტომბერს ეს დადგენილება უმაღლესად დამტკიცდა და ძალაში შევიდა⁴. სწორედ ეს დღე ითვლება თარიღად ბატონყმობის გაუქმებისა სვანეთში.

ამ აქტით, როგორც ზემოთაც აღვნიშნეთ, გლეხები დამოკიდებული მდგომარეობიდან გამოვიდნენ და პირდაპირ, დროებით ვალდებულ ურთიერთობათა ეტაპის გამოტოვებით, მესაკუთრეთა კატეგორიაში გადავიდნენ. «გულუხვმა» მემამულეებმა თავიანთ ყმებს სრულ საკუთრებაში დაუმტკიცეს საკარმიდამო ნაკვეთი და 4 ქცევა სახნავ-სათესი და სათიბი ადგილები⁵. ეს იყო სწორედ ის თავისებურება, რაც თან ახლდა საგლეხო რეფორმის გატარებას სამთავრო სვანეთში⁶.

ერთი შეხედვით თითქოს ყველაფერი თავის რიგზეა, რეფორმამ თითქოს სამუდამოდ დააშორა ერთიმეორეს გლეხი და მისი ბატონი, პირველი

¹ ეს თანხა მიღებულია სამთავრო სვანეთში მამრობითი სქესის ყმა გლეხთა საერთო რაოდენობის, ე. ი. 614-ის, 50-ზე გამრავლებით.

² СХАО, II, გვ. 534—536.

³ იქვე, II, გვ. 537.

⁴ იქვე.

⁵ გლეხებმა შეინარჩუნეს დადებულიანების ტყითა და საძოვრებით სარგებლობის უფლება ყოველწლიურად კომლზე 5 მანეთის გადახდის პირობით (СХАО, II, გვ. 527; ალ. ბენდიანიშვილი, დასახელებული ნაშრომი გვ. II; ა. ჩარკვიანი, სვანეთი თბ., 1967, გვ. 105). აგრარული ურთიერთობანი...

⁶ რაც შეეხება თავისუფალ სვანეთს, აქ კავკასიის ადმინისტრაციამ საერთოდ უარყო ბატონყმურ ურთიერთობათა არსებობა. «В вольной Сванетии, — ნათქვამია ლევაშოვის 1869 წლის 9 აგვისტოს მოხსენებით ბარათში, по подробному разбору мною прав некоторых лиц, называвших себя азнаурами и заявляющих крепостные права на некоторых крестьян, я удостоверился, что в тех незначительных приношениях, которые некоторые крестьяне действительно делают этим азнаурам, в размерах, впрочем, весьма ничтожных, а именно: хлеба на 20 или 30 коп. в год, а также в принятом обычае угощать этих азнауров, в случае посещения вышесказанных крестьян, нельзя признать никакого следа крепостной зависимости, ибо никаких иных отношений как службы, так и работы, между ними никогда не существовало». (СХАО, II, გვ. 523.)

ეს აზრი და შეხედულება ლევაშოვმა თავისუფალ სვანეთის აზნაურებს გააცნო და მოსახლეობა მათ ხელი აეღოთ ბატონყმური რიგის ყოველგვარ პრეტენზიებზე. უფრო მეტი-

დამოუკიდებელი მეურნე გახდა. მაგრამ სინამდვილეში სულ სხვა სურათი იყო. რეფორმამ, რომელიც ყოველგვარი წინასწარი სამზადისის გარეშე გატარდა სამხედრო პირთა ერთპიროვნული ხელისუფლებით¹, მწარმოებელი კლასი მძიმე ეკონომიურ მდგომარეობაში ჩააგდო. ის 4 ქცევა მიწა, რომელიც მან, ღმერთმა უწყის რატომ, მიიღო და გლეხის თითო ოჯახის ნორმად იყო აღიარებული, ოდნავადაც არ აკმაყოფილებდა მის მოთხოვნილებას. სახელწიფო ქონებათა სამინისტროს ამიერკავკასიის რწმუნებულის, საქმეში კარგად ჩახედული მედვედევის, გამოანგარიშებით, სვანეთში გლეხის ოჯახის უზრუნველსაყოფად საჭირო იყო სულზე 3-დან 5 დესეტიანამდე მიწა². სწორედ ეს გარემოება ჰქონდა მხედველობაში ს. ავალიანს, როდესაც ის სამთავრო სვანეთის ყოფილ საბატონო ყმათა ნადელს „მათხოვრულს“ უწოდებდა³. რეფორმის წყალობით საგრძნობლად შემცირდა მწარმოებელი კლასის მიწათმფლობელობა. მას მთლიანად ჩამოართვეს დადგენილ ნორმაზე მეტი ფართობი⁴. სამოწყალო ნადელით ძომარაგებული გლეხი ბედის ამარად დარჩა. იგი, ს. ავალიანის სიტყვით, უკიდურეს სიღატაკესა და გაჭირვებაში ჩავარდა⁵. სამაგიეროდ, კარგად წარმართა საქმე თავადზნაურობამ, რომელმაც, იმავე ავტორის მოწმობით, მიწაც შეინარჩუნა და დიდი ფულადი გასამრჩელოც მიიღო⁶. ეს უკანასკ-

ქუთაისის გუბერნატორმა წინადადება მისცა ხსენებულ აზნაურებს, კერძოდ იმათ, ვისაც ეგრეთ წოდებული შინაყმები ჰყავდა, სასწრაფოდ გაენთავისუფლებინა ისინი (იქვე). ისინი ამ წინადადებას, ცხადია, უარყოფითად შეხედნენ, მაგრამ იძულებული იყვნენ მიეღოთ და ცხოვრებაში განეხორციელებინათ. ამ ნაბიჯით დაზარალებულმა მფლობელებმა წერილობითი არზა მიართვეს მეფისნაცვალს და ზარალის ანაზღაურება სთხოვეს. შინაყმების განთავისუფლებით, წერდნენ ისინი, ჩვენ ეკარგავთ მათ შექმენაზე დახარჯულ საკმაოდ დიდ თანხას, ხელიდან გვეცლება სახლისა და მიეურნობის მომველი, რითაც სერიოზული საფრთხე ექმნება ჩვენს მატერიალურ კეთილდღეობას. აქედან გამომდინარე, ისინი თხოვდნენ ხელისუფლებას სათანადო კომპენსაციის ვადებასა და ამით მათი შერყეული მდგომარეობის რამდენადმე მაინც გაუმჯობესებას (იქვე). მაგრამ, ეტყობა, მთავრობას ეს თხოვნა არ შეუწყწინარებია და ის, როგორც ჩანს, უმაღლეს ორგანოებში საერთოდ არ განხილულა. ყოველ შემთხვევაში ამის შესახებ არაფერია ნათქვამი არც მეფისნაცვლის შუამდგომლობაში და არც მთავარი კომიტეტის ზემოხსენებულ, იმპერატორის მიერ მოწონებულ დამდგენილებაში.

¹ ს. ავალიანი, ტ. II, გვ. 58.

² იხ. «Реформа поземельного устройства государственных крестьян Закавказья в конце XIX века», დოკუმენტების კრებული, მოზღაღებული და გამოცემული ი. ანთელავას მიერ, სოხ., 1952, გვ. 44.

³ ს. ავალიანი, ტ. II, გვ. 55, 59.

⁴ СХАО, II, გვ. 526.

⁵ ს. ავალიანი, ტ. II, გვ. 59.

⁶ იქვე.

წელი ფაქტიურად არა მარტო გლეხთა პირადი გადასახადების გაუქმებით გამოწვეული ზარალის ანაზღაურება იყო, არამედ ის მემამულეთა მიერ „უსასყიდლოდ“ დათმობილი მიწების საფასურის კომპენსაციასაც წარმოადგენდა¹.

§ 3. რეფორმის შედეგები და მნიშვნელობა

ამრიგად, 1864 წელს, ბატონყმობის გაუქმების შედეგად, ყმებს პირადი თავისუფლება მიენიჭათ, რაშიც თავადაზნაურობამ, გარდა ერთდროული კომპენსაციისა, დამატებითი დახმარება მიიღო.

დამოკიდებული მდგომარეობიდან გამოსულ გლეხს დებულებით მიწა მიეცა, მაგრამ არა საკუთრებად, არამედ მუდმივ სარგებლობაში, რისთვისაც ის მის პატრონს უხდიდა იმავე გადასახადებს, რასაც რეფორმამდე.

გლეხს მისთვის გამოყოფილი მიწის საკუთრებად შესყიდვა მხოლოდ მებატონის თანხმობით შეეძლო. ნაკვეთის გამოსყიდვამდე იგი დროებით ვალდებულ გლეხად იწოდებოდა. გამოსყიდვის შემდეგ კი ის მესაკუთრეთა კატეგორიაში გადადიოდა. მაგრამ რაკი გამოსყიდვა სავალდებულოდ არ იყო გამოცხადებული, დროებით ვალდებულებამ მუდმივი ხასიათი მიიღო და ის კანონით მხოლოდ 1912 წელს გაუქმდა. იგივე ითქმის აფხაზეთის შესახებაც, სადაც დროებით ვალდებულ გლეხთა ინსტიტუტი დებულებით, როგორც ზემოთაც აღვნიშნეთ, მხოლოდ 4 წლის ვადით უნდა დარჩენილიყო.

დებულებით გლეხს მიწა გარკვეული ნორმით ეძლეოდა, ნორმაზე მეტი ფართობი კი მას მემამულის სასარგებლოდ უნდა ჩამოსჭროდა. ამის წყალობით მწარმოებელი კლასის რეფორმამდელი ხანის მიწის მფლობელობა მარტო აღმოსავლეთ საქართველოში 28 986 დესეტინით შემცირდა.

ამიტომ ამბობდა ვ. ი. ლენინი, რომ ყბადაღებული რეფორმა იყო გლეხების ყოვლად უსინდისო გაძარცვა, რომ იგი წარმოადგენდა მათ მიმართ „მთელ რიგ ძალმომრეობას და პირდაპირ დაცინვას“². „საკმარისია, — წერდა ნ. ნიკოლაძე, — ოდნავ ჩაუფიქრდეს კაცი თქვენს კახონდებულებებს, რომ ცამდე აიყვანოს ძველი ბატონყმობა... ერთი გვითხარით, თუ ღმერთი გწამთ, მოეპოვება თუ არა რაიმე აზრი... თქვენს, ეგრეთწოდებულ რეფორმას, როდესაც მემამულე გლეხების მთელი მიწების მფლობელობაში შეგყავთ, როდესაც გლეხებს წინანდელზე უარესად აბამთ მიწაზე, როდესაც, ბოლოს, მემამულეს დაუსჯელად შეუძლია ჩამო-

¹ ს. ავალიანი, ტ. II, გვ. 55.

² ვ. ი. ლენინი, თხზ., ტ. 17, გვ. 126.

აჭრას გლახს მისი მიწის ნახევარი, როდესაც გლახს ხელიდან ეცლება მიწა, წყალი, საწვავი მასალა და თითქმის ჰაერიც კი?“¹.

მიუხედავად იმისა, რომ რეფორმა მემამულეთა ინტერესებსა- მაქსიმალური დაცვით გატარდა, მას მაინც დიდი მნიშვნელობა ჰქონდა. ამიერიდან ძირითად მწარმოებელ კლასს — გლახობას — შეეძლო შედარებით უკეთეს პირობებში წარემართა თავისი სამეურნეო საქმიანობა. არ იყო რა ძველებურად ხელფეხშეკრული, მას უფლება ჰქონდა ქონება შეეძინა და ის სურვილისამებრ გამოეყენებინა, გაემართა ვაჭრობა-მრეწველობა და სახალხო მეურნეობის სხვა დარგი. გაძლიერდა გლახის პირადი დაინტერესება, გაიზარდა მისი შრომის ნაყოფიერება. ბატონყმობის გაუქმებამ დააჩქარა საწარმოო ძალების განვითარება, ქვეყნის ეკონომიური დაწინაურება და ახალი, კაპიტალისტური ურთიერთობის საბოლოო გამარჯვება.

¹ რეფორმის ასეთი შეფასება, თუმცა რამდენადმე ცალმხრივია, მაგრამ ძირითადად ის მაინც სწორია და სინამდვილეს შეეფერება.

საგლეხო რეფორმის შემდეგ საქართველოში გატარდა სასოფლო-მმართველობის, სასამართლო და საქალაქო რეფორმები, რაც აგრეთვე რევოლუციური მასებისა და სხვა ოპოზიციური ძალების დასაწყენარებლად იყო ნაეარაუდვევი.

ბურჟუაზიული რეფორმების გატარების ისტორია, მათი არსისა და მნიშვნელობის შესწავლა დიდი ხანია დგას საბჭოთა ისტორიული მეცნიერების წინაშე, მაგრამ დღესდღეობით შედარებით კარგად არის გაშუქებული მხოლოდ საგლეხო რეფორმა. საქართველოში გატარებული სხვა ბურჟუაზიული რეფორმები არასაკმარისი სიღრმითა და სისრულითაა შესწავლილი. სამეცნიერო ლიტერატურაში დღემდე, მაგალითად, ისიც კი არაა დადგენილი, თუ საქართველოს რომელ ქალაქებს შეეხო და რომელ წლებში გატარდა 1870 წლის საქალაქო დებულება¹.

§. 1. სოფლის საზოგადოებრივი მმართველობა

ბატონყმობის გაუქმებამდე სოფლის ადგილობრივი მმართველობის ორგანოები ფაქტიურად არ არსებობდა. ყმა გლეხთა საქმეებს მებატონეთა და საეკლესიო უწყების მიერ დანიშნული მოურავები განაგებდნენ სახაზინო გლეხებზე მეთვალყურეობას კი პოლიციის აგენტები ასრულებდნენ.

საგლეხო რეფორმის მომზადების პერიოდში მეფის მთავრობის წინაშე ლოგიკური აუცილებლობით დაისვა ახალი პირობების შესაბამისად სოფლის მმართველობის რეორგანიზაციის საკითხი.

1861 წლის დებულების საფუძველზე რუსეთში დაარსებული სოფლის საზოგადოებრივი მმართველობა ორი, ერთმანეთთან მჭიდროდ დაკავშირებული, მაგრამ ფუნქციებით განსხვავებული ერთეულისაგან შედგებო-

¹ ამ თავის დაწერისას, რა თქმა უნდა, ვიყენებო არსებულ ლიტერატურას, მაგრამ იგი ძირითადად დამყარებულია ახალ მასალაზე და ჩვენი უშუალო კვლევა-ძიების შედეგს წარმოადგენს.

და; თემის სამმართველო განაგებდა სამეურნეო, ხოლო ვოლოსტის სამმართველო (იგი რამდენიმე თემს აერთიანებდა) — ადმინისტრაციულ საქმეებს. სავოლოსტო სამმართველოებთან არსებობდა საგლეხო სასამართლოები.

1864 წ. 13 ოქტომბერს უმაღლესად დამტკიცდა თბილისის გუბერნიის სოფლის საზოგადოებრივი მმართველობის მოწყობის წესები¹, რომლის თანახმად სასოფლო საზოგადოებაში უნდა გაერთიანებულიყო ყველა კატეგორიის გლეხობა. სოფლის საზოგადოებრივი მმართველობის უმაღლეს ორგანოდ ნაყარაუდები იყო გლეხთა ყრილობა. აღმასრულებელი ხელისუფლება ენიჭებოდა მამასახლისს, ხოლო მართლმსაჯულება — სოფლის სასამართლოს.

საქართველოში სოფლის საზოგადოებრივ მმართველობას უნდა დაეკისრებოდა ყველა ის მოვალეობა, რაც რუსეთში ჰქონდა სათემო და სავოლოსტო სამმართველოებს, ე. ი. სოფლის საზოგადოებრივი მმართველობის ფუნქციებში შედიოდა როგორც სამეურნეო, ისე ადმინისტრაციული საქმეების გამგებლობა. ეს იმით იყო განპირობებული, რომ, რუსეთისაგან განსხვავებით, საქართველოში თითქმის აღარ არსებობდა თემი და თემური მიწისმფლობელობა. ჩვენს პირობებში სასოფლო საზოგადოება მხოლოდ ადმინისტრაციული ერთეული უნდა ყოფილიყო. საერთო ტყითა და საძოვრით სარგებლობის წესები უნდა განესაზღვრა არა სოფლის საზოგადოებრივ მმართველობას, არამედ გლეხობის იმ ნაწილს, რომელსაც ეს საერთო, გაუყოფელი სავარგულები ეკუთვნოდა. მამასახლისისა და სოფლის სხვა თანამდებობის პირთა მთავარ მოვალეობას შეადგენდა გლეხობაზე შეწერილი გადასახადების კომლექსზე განაწილება და აკრეფა².

1864 წ. 13 ოქტომბრის „წესების“ პირველი პარაგრაფის თანახმად მეფისნაცვალს ევალებოდა დაწვრილებითი დებულება შეედგინა სასოფლო საზოგადოებათა მოწყობის შესახებ. კავკასიის ადმინისტრაციამ ავად თუ კარგად მოახერხა ამ ამოცანის შესრულება და უკვე 1865 წ. 11 აპრილს მეფისნაცვალმა მიხეილ რომანოვმა დაამტკიცა სათანადო დებულება, რომლის საფუძველზე ჩამოყალიბდა სოფლის საზოგადოებრივი მმართველობანი არა მარტო თბილისის გუბერნიაში, არამედ მთელ საქართველოში.

1865 წ. 11 აპრილის დებულების თანახმად საქართველოში დაარსებული სოფლის საზოგადოებრივი მმართველობა იყო გლეხთა წოდებრივი დაწესებულება. სოფლის მოსახლეობის სხვა ფენები მის საქმიანობაში არ მონაწილეობდნენ.

¹ Правила об устройстве сельских обществ, их общественного управления и повинностей государственных и общественных в Тифлисской губернии.

² О крестьянах Грузии, стр. 241—243.

დებულება სოფლის საზოგადოებრივი მმართველობის უმაღლეს განმკარგულებელ ორგანოდ ასახელებს სოფლის ყრილობას, რომლის მუშაობაში მონაწილეობის უფლება ოჯახის ყველა უფროსს ჰქონდა. ყრილობას იწვევდნენ მამასახლისები. ძალიან ხშირად სოფლის თავკაცები აკრიბებოდნენ მაზრის უფროსისა და მომრიგებელი შუამავლის მოთხოვნა-ბრძანებითაც.

სოფლის ყრილობის ფუნქციებში შედიოდა: სოფლის თანამდებობის პირთა არჩევა; დადგენილების მიღება სოფლიდან მკენე პირთა გადასახლების თაობაზე; ობლად დარჩენილ მცირეწლოვანთათვის მზრუნველების დანიშვნა; ოჯახის გაყოფაზე ნებართვის მიცემა; სოფლის საზოგადოების საერთო მიწების (დაუმუშავებელი ნაკვეთები, საძოვრები და სხვ.) გამგებლობა; თათბირი და შუამდგომლობის აღძვრა საზოგადოებრივ საჭიროებებზე; საზოგადოებრივი საჭიროებისათვის გამოსაღებთა დაწესება; სახაზინო და საერობო გადასახადების კომლთა შორის განაწილება; თანამდებობის პირთა საქმიანობის კონტროლი და მათთვის ჯამაგირების დანიშვნა; სოფლის სათადარიგო პურის მაღაზიებიდან სესხის გაცემა და სხვ.

სოფლის ყრილობის დადგენილება კანონიერად ითვლებოდა, თუ მას ესწრებოდა მამასახლისი და ოჯახის უფროსთა ნახევარი მაინც. მნიშვნელოვანი საკითხების გადასაჭრელად საჭირო იყო ხმების ორი მესამედი, სხვა საკითხები კი წყდებოდა ხმების უბრალო უმრავლესობით.

სოფლის საზოგადოებრივი მმართველობის აღმასრულებელი ხელისუფლება მამასახლისს ეძლეოდა. მას ევალებოდა: თვალყური ედევნებინა გზების, ხიდების, სარწყავი არხების, წყალსადენების და სხვ. მდგომარეობისათვის; ეხელმძღვანელა კამერალური სიების შედგენის, სახელმწიფო, საერობო და საბატონო გადასახადთა აკრეფისათვის; საჭირო ფორმლობის დაცვით გლეხებისათვის მიეცა სასოფლო საზოგადოებიდან გაშვების მოწმობები, საშოვარზე წასვლის სანებართვო ბილეთები და სხვ.

სასოფლო საზოგადოების ყრილობა თავის დადგენილების სისრულეში მოყვანას ანდობდა მამასახლისს, მის მოადგილეს (ნაცვალს) და გადასახადთა ამკრეფს. მაგრამ მამასახლისები და თანამდებობის სხვა პირები არსებითად იყვნენ არა გლეხობის სურვილთა აღმასრულებელნი, არამედ მოქმედებდნენ მთავრობის ადგილობრივი ადმინისტრაციის ბრძანება-კარნახით. მამასახლისები აცხადებდნენ მთავრობის კანონებსა და განკარგულებებს, აკავებდნენ მოხეტიალე პირებსა და სამხედრო დეზერტირებს, აცნობდნენ მაზრის უფროსებს სასოფლო საზოგადოებიდან უნებართვოდ წასულთა ვინაობას, საზოგადოებრივი წესრიგის დარღვევის ფაქტებს და საჭიროების შემთხვევაში მოითხოვდნენ პოლიციის რაზმს წესრიგის აღსადგენად.

დებულება ითვალისწინებდა სასოფლო საზოგადოებაში საგლეხო სასამართლოს ჩამოყალიბებასაც.

სოფლის მოსამართლეებს ირჩევდა სასოფლო საზოგადოების ყრილობა არა ნაკლებ სამი კაცის შემადგენლობით. სასამართლო წყვეტდა გლეხთა დავა-საჩივრებს 100 მანეთამდე ღირებულების ფარგლებში, რომელიც განეკუთვნებოდა სამოქალაქო სამართლის სფეროს. თანაც სოფლის სასამართლოს შეეძლო გაერჩია მხოლოდ ის საქმეები, რომელნიც ასახული არ იყო ფორმალურ აქტებში (დავა მიწაზე, ყიდვა-გაყიდვა, ხელშეკრულებები, ურთიერთზარალის მიყენების ფაქტები და სხვ.). თუ საქმე ეხებოდა ოფიციალური აქტით გაფორმებულ უძრავ ქონებას, ან საქმის ღირებულება აჭარბებდა 100 მანეთს და თუ დავაში მონაწილეობდნენ სხვა წოდების პირები, იგი გასარჩევად გადაეცემოდა საერთო სასამართლო დაწესებულებებს.

სოფლის სასამართლოს უფლება ჰქონდა მცირე დანაშაულისათვის გამოეტანა სასჯელი — გაეგზავნა დამნაშავე საზოგადოებრივ სამუშაოებზე ექვსი დღით, დაეჯარიმებინა 100 მანეთით, ან დაეპატიმრებინა შვიდი დღის ვადით. ამასთან ერთად სოფლის სასამართლოს შეეძლო გადასახადთა ნარჩენების დაფარვის მიზნით გაეყიდა გლეხის ქონება. მამასახლისს, ფორმალურად, უფლება არ ჰქონდა ჩარეულიყო სამართლის წარმოებაში, გავლენა მოეხდინა განაჩენის ხასიათზე. სამაგიეროდ, იგი ვალდებული იყო სისრულეში მოეყვანა სასამართლოს დადგენილებანი.

სოფლის თანამდებობის პირები (მამასახლისი, ნაცვალი, მოსამართლეები) აირჩეოდნენ სამი წლის ვადით. არჩევნების შედეგებს გუბერნატორი ამტკიცებდა. თანამდებობის პირები ფიცს დებდნენ მაზრის უფროსის წინაშე. თუ მამასახლისი ვერ შეასრულებდა თავის მოვალეობას, ან ბოროტად გამოიყენებდა თანამდებობას, გუბერნატორს შეეძლო მისი გადაყენება სასოფლო საზოგადოების ყრილობის დაუკითხავად.

სოფლის მმართველობის რეორგანიზაცია ცვლილებებს არ იწვევდა საგადასახადო სისტემაში. მაგრამ არსებული სახელმწიფო და საერობო გადასახადების დამატებით გლეხობა ვალდებული ხდებოდა გაეღო თანხები საზოგადოებრივი მმართველობის შენახვის, სახალხო განათლების და ჯანმრთელობის დაცვის ზოგი ღონისძიების დაფინანსების, სოფლის გზების, სარწყავი არხებისა და წყაროების მოვლა-შეკეთებისათვის, გაეღო გარკვეული თანხა, ნატურით თუ ფულით, ყარაულის შენახვისა და სოფლის სარეზერვო პურის მალაზიის მოწყობისათვის. წესდებოდა გლეხების ურთიერთთავდებობა გადასახადების დაფარვაში¹.

საქართველოს პროგრესული საზოგადოებრიობა მიესალმა სოფლის

¹ Положение о сельских обществах, их общественном управлении и повинностях государственных и общественных в Тифлисской губернии, гв. 1—83.

საზოგადოებრივი თვითმმართველობის შემოღებას, მაგრამ იმთავითვე შეაჩინა მისი ნაკლოვანებებიც. დებულება, მართალია, ფორმალურად საკმაო უფლებას აძლევდა სოფლის ყრილობას ადგილობრივი საქმეების გადაწყვეტაში, მაგრამ არსებითად ანგარიში არ ეწეოდა გლეხობის ინტერესებს და საქმეები წყდებოდა მთავრობისა და გაბატონებული კლასების სურვილის შესაბამისად. მაზრის უფროსი და პოლიციის მოხელეები, უმეტეს შემთხვევაში, ახერხებდნენ სასოფლო საზოგადოებისათვის თავს მოეხვიათ მათთვის სასურველი მამასახლისი, რომელიც გლეხთა ყრილობის დადგენილების დაცვას და მის ცხოვრებაში გატარებას კი არ ცდილობდა, რაც მას დებულებით პირველ რიგში ევალებოდა, არამედ გამოდიოდა პოლიციის აგენტის როლში და იმას აკეთებდა, რასაც მაზრის უფროსი უბრძანებდა. აშკარად თუ ფარულად ილაშქებოდა საზოგადოების ინტერესები, ირღვეოდა თვითმმართველობის პრინციპი.

„იმ რეფორმებს შორის, რომელნიც ამ უკანასკნელ ათ-თხუთმეტ წელიწადში მოხდნენ ჩვენში, — წერდა „დროების“ კორესპონდენტი, — სოფლის ახალი გამგეობისა და სასამართლოების შემოღებას დიდი მნიშვნელობა აქვს. ...მაგრამ... აღმოჩნდნენ ზოგიერთი გარეუბნისანი, რომლის წყალობით სოფლის გამგეობისა და სასამართლოების რეფორმა ზოგან ვერ მიდის ისე კარგად, როგორც რიგია და როგორც იმედი გვქონდა, ...ხშირად ისმის სოფლებში ჩივილი, რომ ჩვენი მამასახლისი და მოსამართლეები არაფერს აკეთებენ და თუ აკეთებენ — უქრთამოდ ხელს არ ანძრევენო“. „დროების“ რედაქციას მიზნად დაუსახაჟს აზილოს ეს უმსგავსოებანი და ხელი შეუწყოს მდგომარეობის გამოსწორებას. მოსამართლედ უფრო ხშირად გარეთ ნავალ, გაძიდებულ და გაქნილ გლეხებს ირჩევენო. მაგრამ „მდიდარი და გაქნილი გლეხის ამორჩევას ისა სჯობია. ჩვენი აზრით, რომ ღარიბი და პატიოსანი ამოირჩიოს, რადგან ის ყოველთვის უფრო თანაუგრძნობს და უკეთ ვაიგებს თავისი მსგავსი ღარიბი გლეხების გარემოებასა და საჭიროებას, ... რაც უფრო ფრთხილად აირჩევენ გლეხები თავიანთ მოხელეებს და რაც უფრო მომეტებულ ყურადღებას მიაქცევენ ამ საქმეს საზოგადოების ყველა კეთილმსურველი პირები, მით უფრო მალე დაატყობს სიკეთის ნიშანს ეს ახალი რეფორმა ჩვენ გლეხ-კაცსა, რომელსაც ყოველი მხრიდან ეჭირება დახმარება და ხელის მომართვა“¹.

„დროება“ მართებულად მიუთითებს სოფლის საზოგადოებრივი მმართველობისა და საგლეხო სასამართლოს კონკრეტულ შემთხვევებში გამოვლენილ ნაკლოვანებებზე, მაგრამ ამის უმთავრესი მიზეზი თვით კანონმდებლობაში უნდა ეძია მას. დებულების მთავარი ნაკლი კი ის იყო,

¹ „დროება“, 1872, № 10.

რომ იგი სოფლის საზოგადოებრივი მმართველობის ხელისუფლებას მხოლოდ გლეხებზე ავრცელებდა, მოვალეობას გლეხებს აკისრებდა, იცავდა კი მოსახლეობის ზედა ფენების ინტერესებს.

აკრიტიკებდა რა კანონის ამ ცალმხრივობას, ილია ჭავჭავაძე წერდა: „სოფლის სასამართლოც ამ დღეშია, მას, წესდების ძალით, ხელი მიუწვდება მარტო გლეხკაცზე. თუ გლეხკაცმა დააშავა რამე, წაუხდინა რამ ვისმე, ან პირობა არ აუსრულა, ყველას, სოფელში მცხოვრებს: თავადს, აზნაურს, მღვდელს, დიაკვანს, მეღუქნეს ნება აქვს იქავ თვალწინ, უხარჯოდ მოუტდენლად, სოფლის სასამართლოს შემწეობით გადაახდევინოს გლეხს სასჯელი, თუ საზღაური; თუ არა გლეხმა გლეხს დაუშავა რამე, წაუხდინა, პირობა არ აუსრულა, საწყალი გლეხი იძულებულია ათს, ოცს, ოცდაათ ვერსზე გაიქცეს, მომრიგებელ მოსამართლეს მიმართოს, რამდენიმე დღე წასვლა-მოსვლაში დაკარგოს, მერე რამდენიმე თვე საქმის გარჩევას ელოდოს, ... ყველა ეს იმისთანა მძიმე რამ არის გლეხისათვის, რომ მის გამო გლეხი უფრო ხშირად იძულებულია თავისი დაჩაგვრა არა გლეხისაგან გულში გაბოროტებით ჩაიმარხოს, ხელი აიღოს საჩივარზედ, გული აიყაროს კანონზედაც, რომელიც მისთვის ასე მიუწვდომელია, როცა დიდი სჩაგრავს, გული აიყაროს თავის სამმართველოზედაც, რომელიც უღონოა დიდის წინაშე“.

„რა წარმომადგენელია უფლებისა იგი წყობა, — განაგრძობს შემდეგ ილია, — რომელიც დიდის წინ ნაცრად იქცევა ხოლმე და დაბლის წინ ცეცხლად?! რა პატივით უნდა უყურებდეს გლეხი იმ მმართველობას, რომელიც დიდისაგან გაჭირვებულს არ ესარჩლებს, არას შველის, და რომელიც დიდისათვის კი თავს გამოიდებს ხოლმე, როცა პატარისაგან გაუჭირდება რამ!... ჩვენი სოფლის სამმართველო და მისნი მოხელენი პოლიციის ბრმა მსახურებს და დარაჯებს უფრო წარმომადგენენ, ვიდრე სოფლის საზოგადოების ინტერესებს“¹.

დიდი ილიას მიერ აღნიშნული ამ ნაკლოვანებების ნაწილობრივ მაინც აღმოფხვრა შეიძლებოდა ყველა წოდებისათვის საერთო სოფლის საზოგადოებრივი მმართველობის შემოღებით, რომელიც მოვალეობასაც და უფლებასაც თანაბრად გაანაწილებდა მოსახლეობის სხვადასხვა სოციალურ ფენაზე. ასეთი მოთხოვნა კიდევ წამოაყენეს ნ. ნიკოლაძემ² და სხვა პროგრესულმა საზოგადო მოღვაწეებმა, მაგრამ სოფლის საზოგადოებრივი მმართველობის ზემოაღნიშნულ საფუძველზე რეორგანიზაცია მთავრობის გეგმაში არ შედიოდა.

მთავრობას არ შეეძლო მთლიანად უგულებელეყო საზოგადოებრივი აზრი და სასოფლო მმართველობის ნაკლოვანებებით გამოწვეული გლეხ-

¹ ი. ჭავჭავაძე, ნაწერების სრული კრებული, ტ. VIII, თბ., 1928, გვ. 64—70.

² ნ. ნიკოლაძის არქივი, საქმე 15/12, გვ. 1—28, საქ. 15/40, გვ. 10—13.

თა უკმაყოფილება. 1885 წელს ამიერკავკასიის მთავარმმართველ დონდუკოვ-კორსაკოვის განკარგულებით ჩამოყალიბდა სპეციალური კომისია, რომელსაც უნდა შეემუშავებინა სოფლის საზოგადოებრივი მმართველობის გამაუმჯობესებელი ღონისძიებანი. კომისიის შედგენილი კანონპროექტი 1887 წ. მთავარმმართველმა გაუგზავნა შინაგან საქმეთა მინისტრს. პროექტში საქმის მდგომარეობა ისე იყო ნაჩვენები, რომ სოფლის მმართველობის მოუწესრიგებლობაში ბრალი ედებოდა გლეხობას. ამიტომ შინაგან საქმეთა მინისტრმა „ექვი გამოთქვა“ ამიერკავკასიის სოფლის მოსახლეობა თვითმმართველობისათვის მოუშაადებელი ხომ არ არისო. ამ საკითხის გამორკვევა მიენდო გლეხთა საქმის საგუბერნიო საკრებულოებს.

ქუთაისის გლეხთა საქმის საგუბერნიო საკრებულოსა და თვით საგუბერნიო მმართველობის მოხელეებიც კი იძულებული იყვნენ ეღიარებინათ, რომ ადგილობრივი მოსახლეობა ძალიან გონიერად იყენებს ბოძებულ თვითმმართველობას და ნაკლოვანებებია მხოლოდ სოფლის სასამართლოების საქმიანობაში, რადგან მათი მართლმსაჯულების კონტროლისათვის არ არსებობსო ზემდგომი სააპელაციო ინსტანცია¹.

მეფის მთავრობის მოხელეებს სოფლის საზოგადოებრივი თვითმმართველობის ცუდი მუშაობის ერთ-ერთ მთავარ მიზეზად ის შიაჩნდათ, რომ თანამდებობის პირები გასამრჯელოს, ჯამაგირს არ ღებულობდნენ და ამიტომ უპასუხისმგებლად ეკიდებოდნენ საქმეს. საჭიროდ იქნა ცნობილი პატარა სასოფლო საზოგადოებათა შეერთება. გამსხვილებული, მრავალკომლიანი სასოფლო საზოგადოებანი მოახერხებდნენ საკმაო თანხის შეკრებას, რაც აუცილებელი იყო წესიერი კანცელარიის მოწყობისა და სოფლის მოხელეებისათვის ჯამაგირის დანიშვნისათვის.

XIX ს-ის 80-იან წლებში მართლაც მოხდა სასოფლო საზოგადოებათა გამსხვილება მათი შეერთების გზით. მაგალითად, აქამდე გორის მაზრის 633 სოფელი და 28 510 კომლი გლეხი გაერთიანებული იყო 120 სასოფლო საზოგადოებაში. გამსხვილების შემდეგ ჩამოყალიბდა 37 საზოგადოება, თითოეულში საშუალოდ 18 სოფელი და 770 კომლი გლეხი შევიდა. ასეთ დიდ საზოგადოებას შესაძლებლობა ჰქონდა ჯამაგირი მიეცა მამასახლისისათვის, ამ თანამდებობას მიმზიდველობის ძალა მიემატა და მამასახლისობას ზოგჯერ თავადაზნაურობა წრიდან გამოსული პირებიც აღარ უკადრისობდნენ. მთავრობის ერთ-ერთი მოხელის განცხადებით, დებულების ასეთ დარღვევას საქმისათვის თითქოს კარგი შედეგი მოჰყვა.

XIX ს-ის 80—90-იანი წლების მიჯნაზე აღმოსავლეთ საქართველოში არსებული 343 სასოფლო საზოგადოება აერთიანებდა 104 967 კომლს.

¹ По вопросу о переустройстве сельского общественного управления, гл. 3—4.

დასავლეთ საქართველოს (აჭარა-აფხაზეთის გამოკლებით) 208 საზოგადოება კი — 91 791 კომლ გლენს¹.

სასოფლო საზოგადოებათა გამსხვილების შემდეგ, ბუნებრივია, საზოგადოებრივ მმართველობას საქმეები მოემატა, მაგრამ იმის გამო, რომ მრავალ სოფელში გაფანტულ გლენტა ყრილობების მოწვევა გაძნელდა, პეტი გასაქანი მიეცა მამასახლისებისა და თანამდებობის სხვა პირთა თვითნებობას. მრავლად იყო სასოფლო საზოგადოებანი, რომლებშიც, მაგალითად, 1892 წელს სოფლის ყრილობას არც ერთი განაჩენი არ შეუდგენია, ყველაფერი მინდობილი იყო მამასახლისას „კეთილსინდისიერებაზე“.

სასოფლო საზოგადოებათა გამსხვილების შემდეგ მნიშვნელოვნად გაიზარდა საგლეხო სასამართლოში შესული საქმეების რაოდენობა: 1892 წელს თბილისის მაზრის საგლეხო სასამართლოებს მიუღია 1 212 გადაწყვეტილება (ერთ სასამართლოზე წელიწადში საშუალოდ მოდიოდა 26 გადაწყვეტილება), გორის საგლეხო სასამართლოებს — 2 030 (31), თელავის — 2 060 (47), სიღნაღის — 2 145 (40), თიანეთის — 1 052 (65), ახალციხის — 369 (30), ახალქალაქის — 389 (38), დუშეთის — 740 (15), ბორჩალოს — 1 279 (26), ქუთაისის — 4 345 (117), შორაპნის — 3 271 (116), რაჭის — 765 (23), ოზურგეთის — 2 379 (95), ლეჩხუმის — 1 294 (54), სენაკის — 2 551 (88), ზუგდიდის — 1 718 (52).

სოფლის სასამართლოების დადგენილება ძალიან ხშირად არ აკმაყოფილებდა ან ერთ ან მეორე მხარეს. სააპელაციო საჩივრები დიდი რაოდენობით შედიოდა საგუბერნიო მმართველობასა და საგლეხო საკრებულოში, მაგრამ იმის გამო, რომ საჩივართა დიდი უმეტესობა ეხებოდა დადგენილების არსს და არა სასამართლო წარმოების ფორმალური მხარის დარღვევას, მათი დაკმაყოფილება იშვიათად ხდებოდა. 1892 წ. თბილისის გუბერნიის საგლეხო სასამართლოების დადგენილებებზე აღიძრა 1078 სააპელაციო საჩივარი. აქედან 850 საჩივარი (78%) არ იქნა დაკმაყოფილებული, 228 (22%) კი დააკმაყოფილეს, ე. ი. მიიღეს დადგენილება საქმის ხელმეორედ გარჩევის შესახებ. ამავე წელს ქუთაისის გუბერნიაში საგლეხო სასამართლოების გადაწყვეტილებებზე აღძრულა 4 519 სააპელაციო საჩივარი, საიდანაც მხოლოდ 548 (12%) დააკმაყოფილეს, დანარჩენი კი უარყოფილ იქნა².

1892 წელს მთავარმმართველის საბჭოს წევრს იაკიმოვს დაევალა შემოწმებინა მომრიგებელ შუამავალთა საქმის წარმოება და შეესწავლა

¹ По вопросу о переустройстве сельского общественного управления, გვ. 20—22.

² იქვე, გვ. 22—24.

სოფლის საზოგადოებრივ მმართველობათა პრაქტიკული საქმიანობა. რამდენიმე ხნის შემდეგ თავის ანგარიშში იაკიმოვი წერდა, რომ თბილისის და ქუთაისის გუბერნიებში სოფლის საზოგადოებრივი თვითმმართველობის საქმეები სხვა გუბერნიებთან შედარებით კარგად არის დაყენებული, მაგრამ სასურველი სრულყოფა არც მას ახასიათებსო. ჩანს, რომ საქართველოში ყველა საზოგადოებრივ თვითმმართველობას ჰქონდა შენობები, კანცელარიებში ჰყავდათ დაქირავებული მწერლები, აწარმოებდნენ საგლეხო სასამართლოს დადგენილებათა სპეციალურ წიგნებში ჩაწერას და თითქმის ყველა სასოფლო საზოგადოება მამასახლისის აძლედა ჯამაგირს¹.

იაკიმოვის აზრით, სოფლის საზოგადოებრივ თვითმმართველობათა საქმიანობის ნაკლი განპირობებული იყო იმით, რომ სოფლის მოსახლეობას არ მიუღია ხელმძღვანელი, რომელიც გამოიყვანდა მას ახალი ცხოვრების ფართო გზაზე. მუდამ ერთმანეთის ქიშპში მყოფი მომრიგებელი მოსამართლეები და მაზრის უფროსები სოფლის საზოგადოებრივ თვითმმართველობას ვერ უწყევნო სათანადო კონტროლს და „მზრუნველობას“. ამიერკავკასიის სოფლის მოსახლეობას, აღნიშნავს შემდეგ იაკიმოვი, ესაჭიროება ისეთი უფროსი, რომელიც აღჭურვილი იქნება სრული და მრავალმხრივი ხელისუფლებით. ასეთი უნდა იქნეს რუსეთის გუბერნიებში უკვე არსებული საერობო უფროსი, რომელიც თავისთავში აერთიანებს ადმინისტრაციულ, სამოსამართლო და სამეურნეო ფუნქციებს².

ბოლოს იაკიმოვი ასკენიდა, რომ არსებული დებულება სოფლის საზოგადოებრივი მმართველობის შესახებ დამაკმაყოფილებელია. იგი ძალაში უნდა დარჩეს, მხოლოდ დაემატოს ზოგი ახალი მუხლები. იაკიმოვს მიზანშეწონილად მიაჩნდა დებულებით დაკანონებულიყო მამასახლისისა და ზოგი სხვა მოხელისათვის ჯამაგირის დანიშვნა, სოფლის თანამდებობის პირთათვის განსაკუთრებული ფორმისა და გამოსაცნობი ნიშნების ბოძება და სხვ. მომრიგებელ შუამავალთა ინსტიტუტი უნდა გაუქმდეს და მათ ნაცვლად დაინიშნონ საერობო უფროსები, რომლებიც თავის ხელში აიღებენ სოფლის მოსახლეობის ადმინისტრაციულ, სამოსამართლო და სამეურნეო გამგებლობას³.

მთავარმმართველმა მოიწონა იაკიმოვის მოსაზრებანი, მიზანშეწონილად მიიჩნია საერობო უფროსის ინსტიტუტის შემოღება. დაწვრილებითი კანონპროექტების შემუშავება ახალ კომისიას დაავალა, მაგრამ მე-

¹ По вопросу о переустройстве сельского общественного управления, жг. 20—22.

² იქვე, жг. 26—28.

³ იქვე, жг. 32—33.

ფის მთავრობის ბიუროკრატის თვით 1917 წლის რევოლუციამდე არსებითად არაფერი შეუცვლია. გლახთა ხარჯზე მოწყობილი სოფლის საზოგადოებრივი თვითმმართველობანი ბოლომდე იღვწენ მეფის მთავრობისა და მოსახლეობის ზედაფენების ინტერესთა სამსახურში.

§ 2. სასამართლოს რეფორმა

XIX ს-ის 40—50-იან წლებში ნათლად გამომჟღავნდა, რომ ძველი, წოდებრივი სასამართლო ჩამორჩა და აღარ შეესაბამებოდა ახალი დროის მოთხოვნილებებს. 1861 წლის შემოდგომაზე ალექსანდრე მეორის დავალებით სახელმწიფო კანცელარიის მოხელეებმა და ცნობილმა იურისტებმა დაიწყეს „ახალი სასამართლო წყობისა და სამართლის წარმოების ძირითადი დებულებების“ შედგენა. იგი საფუძვლად დაედო ახალი სასამართლო წესდების პროექტს, რომელიც იმპერატორმა დაამტკიცა 1864 წ. 20 ნოემბერს.

1864 წლის სასამართლო წესდებას საფუძვლად ედო ბურჟუაზიული პრინციპები, რომელიც უკვე კარგა ხანია მოქმედებდა ევროპისა და ამერიკის მოწინავე სახელმწიფოებში. გატარებული რეფორმის შედეგად ძველი წოდებრივი სასამართლო დაწესებულებები გაუქმდა. ჩამოყალიბდა კველა წოდების, მოსახლეობის ყველა სოციალური ფენისათვის საერთო სასამართლო დაწესებულებები.

რეფორმამდე სასამართლო მთლიანად მთავრობასა და პოლიციაზე იყო დამოკიდებული. მოსამართლეებს მთავრობა ნიშნავდა და გამოძიებაში გადამწყვეტ როლს პოლიციის მოხელეები ასრულებდნენ. ძველ სასამართლოში საქმის წარმოებას ძალიან აჭიანურებდა ინსტანციების სიმრავლე. ზოგიერთი საქმის გარჩევა და გადაწყვეტა ათი, ოცი და ორმოცდაათი წელიც კი გრძელდებოდა. ძველი მართლმსაჯულების ერთ-ერთი მთავარი ნაკლი ის იყო, რომ საქმის გამოძიება-გარჩევა საიდუმლოდ მხოლოდ დოკუმენტების საფუძველზე წარმოებდა. სასამართლო პროცესი, როგორც ასეთი, უმეტესწილად არც იმართებოდა. მომჩივანი და მოპასუხე საპროცესო სახეობისა თუ საკუთარ სახლში ელოდებოდნენ სასამართლოს დადგენილებას. სისხლის სამართლის საქმეთა გარჩევის დროს გადამწყვეტი მნიშვნელობა ენიჭებოდა ფორმალური მხარის დაცვას. ბრალდებული მხოლოდ მაშინ უნდა დასჯილიყო, როცა გამოტყდებოდა დანაშაულში, ან საქმეში დაცული საბუთები ცხადყოფდნენ მის დანაშაულს. ასეთი წესი საშუალებას აძლევდა აშკარა დამნაშავეებს ხშირად დაუსჯელი დარჩენილიყვნენ, ზოგი უდანაშაულო კი, რომელიმე საბუთის წყალობით, სამუდამოდ ექვექვემ რჩებოდა.

ახალი წესდების საფუძველზე მოწყობილი სასამართლო დაწესებულებანი და თვით საქმის წარმოების ხასიათი არსებითად განსხვავდებოდა ძველისაგან. სასამართლოს თავის მოქმედების სფეროში დამოუკიდებლობა ეძლეოდა. მთავრობის ადმინისტრაციას ზემოქმედება არ უნდა მოეხდინა მართლმსაჯულებაზე და პოლიცია მთლიანად განთავისუფლდა საქმის გამოძიება-გარჩევის მოვალეობისაგან. გუბერნიებში ჩამოყალიბდა საოლქო სასამართლოები. საქმის წარმოების დროს სასამართლოებში იწვევდნენ საზოგადოებრივი სინდისის წარმომადგენლებს — ნაფიც მსაჯულებს. ნაფიც მსაჯულთა მონაწილეობით მიღებული დადგენილების გასაჩივრება არსებითად არ შეიძლებოდა. სხვა შემთხვევაში კი დადგენილების გასაჩივრება ხდებოდა სასამართლო პალატაში, რომლის გადაწყვეტილება საბოლოოდ ითვლებოდა. სასამართლო პალატის დადგენილება შეიძლება გასაჩივრებულ იყოს მხოლოდ საკასაციო წესით, ე. ი. თუ დარღვეული იყო კანონით დადგენილი სამართლის წარმოების წესი. უმაღლეს საკასაციო ინსტანციას კი სენატი წარმოადგენდა.

მთავრობის ადმინისტრაციისაგან სასამართლოს გამოყოფა და მოსამართლეთა დამოუკიდებლობა უზრუნველყოფილი უნდა ყოფილიყო მოსამართლეთა შეუცვლელობის პრინციპით — სასამართლოს თავმჯდომარეები და წევრები, მომრიგებელი მოსამართლეები და გამომძიებელი თანამდებობიდან ვერ მოიხსნებოდნენ ადმინისტრაციული წესით. შემოღებულ იქნა მოსამართლეთა არჩევითობა. სასამართლო პროცესები საჯაროდ იმართებოდა, რომლის დროს ბრალდებას პროკურორი ასაბუთებდა, ხოლო ბრალდებულს ვეჭილი იცავდა.

ახალი სასამართლო ფორმალურად უახლოვდებოდა „კანონის წინაშე ყველას თანასწორობის“ ბურჟუაზიულ პრინციპს, მაგრამ არსებითად მოსახლეობის ზედაფენების ინტერესთა სადარაჯოზე იდგა. მიუხედავად ამისა სასამართლო რეფორმას დიდი მნიშვნელობა ჰქონდა. ახალი სასამართლო პასუხობდა რუსეთის კაპიტალისტური განვითარების ინტერესებს.

განაპირა მხარეებში და მათ შორის საქართველოში სასამართლო რეფორმა შეკვეცილი სახით გატარდა. რეფორმატორები ამის მიზეზად „მოსახლეობის მოუმზადებლობას“ და ადგილობრივ „სპეციფიკურ პირობებს“ ასახელებდნენ. სინამდვილეში კი აქაც იჩენდა თავს მეფის მთავრობის კოლონიური პოლიტიკა: მეფის მთავრობას შეუძლებლად მიაჩნდა კოლონიებში თავის ადმინისტრაციის ყოვლისშემძლეობა შეეზღუდა, სამართლის წარმოების სფერო გადაეცა ადგილობრივი მოსახლეობის (თუნდაც მხოლოდ ზედაფენების) მიერ არჩეული მოსამართლეებისა და ნაფიცი მსაჯულებისათვის.

1868 წ. 1 იანვრიდან საქართველოში გაუქმდა წოდებრივი სასამართლოები და ჩამოყალიბდა მოსახლეობის ყველა სოციალური ფენისათვის საერთო სასამართლო დაწესებულებანი. მაზრებში დაარსდა მომრიგებელი განყოფილებანი მომრიგებელი მოსამართლეებით, რომელნიც სასამართლო ორგანოების ყველაზე დაბალ ინსტანციას წარმოადგენდნენ. გუბერნიებში ჩამოყალიბდა საოლქო სასამართლოები. სასამართლო პალატა თავის კომპეტენციას მთელ ამიერკავკასიაზე ავრცელებდა და იყო მხარის უმაღლესი სასამართლო ინსტანცია, რომლის გადაწყვეტილების გასაჩივრება მხოლოდ იმპერიის სენატში შეიძლებოდა.

საქართველოში არ გატარებულა ახალი, ბურჟუაზიული სასამართლოს მთელი რიგი მნიშვნელოვანი პრინციპები, სახელდობრ აქ არ შემოულიათ მოსამართლეთა არჩევითობა და ნაფიც მსაჯულთა ინსტიტუტი. მოსამართლეებს წინანდებურად მთავრობა ნიშნავდა და ისინი მთლიანად მთავრობაზე იყვნენ დამოკიდებული. როგორც ვხედავთ, საქართველოში არ მომხდარა სასამართლოს გამოყოფა ადმინისტრაციისაგან. მოსახლეობის მიერ არჩეულ დამოუკიდებელი სასამართლოების ნაცვლად აქ შეიქმნა ახალ ყაიდაზე მოწყობილი მთავრობის მოხელეთა სასამართლოები, რომლებსაც უნდა შეესრულებინათ უმაღლესი ნება. ამ სასამართლოს ერთი ყველაზე დიდი და ხალხის განსაკუთრებით შემაწუხებელი ნაკლი ის იყო, რომ საქმეების წარმოება ხდებოდა რუსულ ენაზე, რომელიც მოსახლეობის უმრავლესობას არ ესმოდა. ბუნებრივია, ასეთმა სასამართლომ ვერ გაამართლა ხალხისა და მოწინავე საზოგადო მოღვაწეთა მოლოდინი. მის პრაქტიკულ საქმიანობას მეტად მცირე დადებითი შედეგი მოსდევდა. ხალხს წინანდებურად სძულდა მისთვის გაუგებარი სამართლის წარმოების წესი და ძალიან ხშირად ხმას იმაღლებდა მის წინააღმდეგ.

ახალ სასამართლოს თავიდანვე აკრიტიკებდნენ როგორც რეაქციონერები, ისე პროგრესული საზოგადო მოღვაწეები. რეაქციონერები აქებდნენ ძველ სასამართლოს და ყოველგვარ ცუდს ახალს მიაწერდნენ. განსაკუთრებით მკაცრად ესხმოდნენ ისინი თავს ნაფიც მსაჯულთა ინსტიტუტს, ღვარძლიანად მიუთითებდნენ, რომ ნაფიცები აშკარა დამნაშავეებს ამართლებენ და ამით საფრთხეს უქმნიანო საზოგადოებრივ წესრიგს. რეაქციონერებს არც მოსამართლეების შეუცვლელობის და მათი არჩევითობის პრინციპი ძოსწონდათ. ამის წყალობით მოსამართლეებს თავი ძალიან დამოუკიდებლად ეჭირათ, რაც ხელს უშლიდა მართლმსაჯულების წარმოებას.

ამიერკავკასიაში არც მოსამართლეთა არჩევითობა დაწესებულა და არც ნაფიც მსაჯულთა ინსტიტუტი შემოულიათ, მაგრამ რეაქციონერები აქ დაარსებულ ახალ სასამართლო ორგანობებსაც აკრიტიკებდნენ და სამართლის წარმოების ძველ წესებს მისტიროდნენ.

პროგრესული ინტელიგენცია სასამართლო რეფორმას და ახალ სასამართლო დაწესებულებებს მარცხნიდან აკრიტიკებდა. მოწინავე საზოგადო მოღვაწეები არათანამიმდევრულობას უკიყინებდნენ რეფორმატორებს. არ მოსწონდათ, რომ პრაქტიკაში ძალიან ხშირად ირღვეოდა სასამართლოს ადმინისტრაციისაგან დამოუკიდებლობის პრინციპი და თანდათან ძალიან ფართო ხასიათს ღებულობდა პოლიტიკურ დამნაშავეთა ადმინისტრაციული წესით დასჯა.

მოწინავე ქართველ საზოგადოებრივ მოღვაწეთა განსაკუთრებულ გულისწყრომას ის იწვევდა, რომ ჩვენ მხარეში სასამართლო რეფორმა შეკვეცილი სახით გატარდა. ისინი დაჟინებით მოითხოვდნენ მოსამართლეთა არჩევითობის პრინციპისა და ნაფიც მსაჯულთა ინსტიტუტის შემოღებას, რაშიც ყოველთვის პოულობდნენ რუსეთის პროგრესული ინტელიგენციის მხარდაჭერას.

1880 წ. რუსულ გაზეთ „მოლვას“ დაბეჭდილ სტატია „სიტყვა შორეული განაპირის სასარგებლოდ“, რომელიც „დროების“ რედაქციას სიტყვა-სიტყვით გადმოუთარგმნია. „მოლვას“ რედაქციის აზრით, კავკასია, სადაც ერობა არაა და 1864 წ. სასამართლო წესდებაც შეკვეცილი სახით იქნა გატარებული, აუცილებლად საჭიროებს რეფორმებს. ახალი სასამართლოების 12 წლის პრაქტიკამ ცხადყო, რომ ამიერკავკასიის მდგომარეობა ამ მხრივ არანორმალურიაო. ამ მხარეში მთავრობის მიერ დანიშნული მოსამართლეები, რომელნიც ამორჩეულ მსაჯულთა მაგიერობას ეწვევიან და რომელნიც სრულიად არ იცნობენ მხარეს, ადგილობრივი მოსახლეობის ზნე-ჩვეულებას, ხშირად ისეთ მცდარ დადგენილებებს ღებულობენ, რომ სახელს უტეხენო მთავრობას.

„მოლვას“ რედაქციას მოჰყავს ასეთი მაგალითი: ვთქვათ, ქართველი წაეჩხუბა ვინმეს და ადგილობრივი ჩვეულებისამებრ „ურჯულო“ და „უღვთო“ უწოდა. ეს სიტყვები უმეცარი თარჯიმანის სიტყვა-სიტყვითი თარჯიმანის წყალობით ღვთის გმობა გამოდის და ბრალდებული, რომელიც პირად შეუტრაცხოფისათვის მცირედ უნდა დასჯილიყო, ციმბირში იგზავნებაო.

ამორჩეულ მოსამართლეთა და ნაფიცი მსაჯულების ნაცვლად მართლმსაჯულების გადაცემა ბიუროკრატიული სასამართლო ორგანოებისათვის, რედაქციის აზრით, ძალიან აჭიანურებს სამართლის წარმოებას და ახალ სასამართლოს ხალხისათვის გამოუსადეგრად ხდის. არსებული მდგომარეობის დამცველები, განაგრძობს შემდეგ „მოლვას“ რედაქცია, ადგილობრივი მოსახლეობის მიერ რუსული ენის უცოდინარობას ასახელებენ აქ ნაფიც მსაჯულთა ინსტიტუტის შემოღებლობის მიზეზად, მაგრამ ეს მართებული არ არისო. თბილისსა და მაზრებშიც იმდენი რუსულის მცოდნე

კი არის, რომ მათი წრიდან მოხდეს საკმარისი რაოდენობის ნაფიც მსაჯულთა ამორჩევად.

„მოღვაწე“ რედაქციას მიზანშეწონილად მიაჩნდა აგრეთვე კავკასიის მომრიგებელ სასამართლოებში, რომელსაც საქმე ძირითადად რუსულის არმცოდნე ხალხის მასასთან ჰქონდა, შემოღებული ყოფილიყო სამართლის წარმოება ადგილობრივ ენებზე.

„დროების“ რედაქცია ძირითადად იზიარებდა ზემოაღნიშნულ სტატიაში გატარებულ თვალსაზრისს, მაგრამ შენიშნავდა, რომ ადგილობრივ ენებზე მართლმსაჯულების წარმოება მართო მომრიგებელ სასამართლოებში კი არ უნდა შემოვიღოთ, არამედ მხარის ყველა ინსტანციის სასამართლოებში¹.

რამდენიმე ხნის შემდეგ „დროება“ მკითხველებს აუწყებდა: „მართო ერთჯერ არ გვითქვამს და ორჯერ, ლეთის მადლით, რომ ჩვენ სასამართლოში და ადმინისტრაციულ დაწესებულებებში საჭიროზედ უსაჭიროესია ჩვენებური ენა, რომ ვიდრე ეს ენა არ იქნება სასამართლოში საწარმოებელ ენად აღიარებული, მანამდე რიგიან სასამართლოს ვერ ელიჩება ჩვენში კაცი, და მამასადამე, სარგებლობის მაგიერ ის ვნების მეტს ვერაფერს მოიტანს და სხვ.

მერე ასრულეს ეს ყოვლად სამართლიანი მოთხოვნილება, ეს უგულვითადესი ხალხის სურვილი, ეს დიდებული ბუნების კანონი საუკუნეთაგან ხაკურთხი. თქვენ თვითონ უწყით... იქნებ ზიანი არაფერი მოაქვს იმ ბუნების კანონის გამობას?“.

„დროების“ რედაქცია, ცდილობს რა გარკვეული ზემოქმედება მოახდინოს რეპრესიების მოყვარულ მთავრობაზე, შემდეგ წერს: „გონებადანშულის მეტი ყველა დაგვეთანხმება, რომ ამ რამდენიმე წლის წინათ სიღნაღისა და ზუგდიდის მაზრაში მომხდარი ხალხის არეულობა, რომლის მართო მოგონებაც გულს უხიბლავს ხოლმე კაცს, უმთავრესად ამ გრძობის შედეგი იყო: ასე რომ არ ყოფილიყო, ადმინისტრაცია დროზე შეიტყობდა ხალხის გაჭირვების ნამდვილ მიზეზს და შეიძლებდა მის მეტნაკლებად დაკმაყოფილებას. მაგრამ ხალხის ენის უცოდინარობის გამო მას უნებლიეთ უნდა დაეჯერა მლიქვნელი ენათანიების სიტყვები... და ამიტომაც გასაკვირველი არ არის თუ თავისი შეცდომა ხალხის სისხლით დაბახა... დროა, დიდი ხანია დროა, — მიმართავს რედაქცია მთავრობას, — ამ მდგომარეობას ყურადღება მიექცეს და ისე იქნეს შეცვლილი, როგორც მოითხოვს ერთადერთი ჭეშმარიტი და სამართლიანი კანონი, კანონი ბუნებისა და კაცობრიობის ცხოვრებისა, თორემ „რაც დაითესება იგივე მოიქება“².

¹ „დროება“, 1880, № 191.

² იქვე, 1881, № 175.

ამიერკავკასია-საქართველოს სინამდვილეში მოქმედების განსაკუთრებით დიდი ასპარეზი მიეცა ყველაზე დაბალი ინსტანციის სასამართლოს — მომრიგებელ-მოსამართლეთა ინსტიტუტს. რეფორმატორების აზრით, ეს იმით იყო განპირობებული, რომ ამიერკავკასიის მოსახლეობა განვითარების დაბალ დონეზე იდგა, არ შეეძლო შეგუებოდა სხვადასხვანაირ კანონებს სამართლის წარმოების დარგობრივად დაყოფის თაობაზე და ამიტომ აუცილებელი ხდებოდა თვით ხალხის ახლოს ხელისუფლების ისეთი ორგანოს შექმნა, რომელსაც დროულად უნდა გაერჩია სხვადასხვა ხასიათის საქმეები. მომრიგებელ მოსამართლეს დაეკისრა სისხლის სამართლის საქმეებზე წინასწარი ძიების ჩატარება, მცირე სისხლის სამართლის დანაშაულთა და სამოქალაქო სამართლის საქმეთა გარჩევა 2000 მანეთამდე ღირებულების ფარგლებში. რადგან ერთ კაცს, მომრიგებელ მოსამართლეს, არ შეეძლო ამდენი საქმეების გაძლოლა, მომრიგებელ სასამართლოებში გაჩნდა მოხელეთა მთელი შტატი, მოსამართლის თანაშემწის, კანდიდატის, ბოქაულის და სხვ., რომელნიც მომრიგებელი მოსამართლის ხელმძღვანელობით მუშაობდნენ. გამოძიების წარმოება მთლიანად თანაშემწის ფუნქციებში გადავიდა, სასამართლოს დადგენილების შესრულება კი დაეკისრა ბოქაულს. მომრიგებელი მოსამართლის ფუნქციაში მხოლოდ უშუალოდ სამართლის წარმოება, გადაწყვეტილების მიღება დარჩა¹.

ამიერკავკასიის მომრიგებელი სასამართლოები სამოქალაქო სამართლის ხაზით ოთხჯერ და კიდევ მეტ საქმეებს არჩევდნენ ცენტრალური რუსეთის მომრიგებელ სასამართლოებთან შედარებით. ამ მხარის მომრიგებელ სასამართლოთა გაზრდილი შტატების დაფინანსებას თანდათან ქეტი თანხა სჭირდებოდა. ამიტომ მთავრობამ ამიერკავკასიაში ტარიფი მნიშვნელოვნად გაზარდა. 600 მანეთის საქმის წარმოებაზე თუ მაგალითად რუსეთში მომჩივანი 0,5%-ს — 3 მანეთს იხდიდა, ამიერკავკასიაში ეს გამოსაღები 6 მანეთს შეადგენდა. ამასთან დაკავშირებით „ნოვოე ობოზრენიეს“ რედაქცია შენიშნავდა, — ასეთი არანორმალური მდგომარეობა, იძებია, მალე გამოსწორდებაო. ამიერკავკასიაში მომრიგებელი სასამართლოს ფუნქციები იმიტომ გაიზარდა, რომ მოსახლეობას სამართლის წარმოება გაადვილებოდა. მაგრამ ეს მაღალი გამოსაღები, პირიქით, აფერხებს მართლმსაჯულებასო².

ამიერკავკასიაში ფართო გავრცელება პოვა აღმინისტრაციული წესით დასჯამ. 1883 წ. მთავარმმართველს უფლება მიეცა, სასამართლოს დადგენილების გარეშე, 5 წლამდე ვადით მხარიდან გადაესახლებინა საეჭვო პირები. მთავრობა გადასახლებას თითქოს არ თვლიდა დასჯის ზომად, მაგ-

¹ «Новое обозрение», 1884, № 275.

² იქვე, 1885, № 503.

რამ ადგილობრივი მოსახლეობისათვის სამშობლოდან გადასახლება დიდ-სასჯელი იყო. ამ კანონით კარგად სარგებლობდნენ პოლიციის მოხელეები. მათი მოთხოვნით და ეგზეკუციით შეწუხებული სასოფლო საზოგადოება იძულებული ხდებოდა გადასახლების განაჩენი გამოეტანა იმ პირებზე, რომლებზეც პოლიცია მიუთითებდა. ცოტა უფრო გვიან მთავარმმართველ-მა უფლება მიიღო ყაჩაღები, აჯანყებებში და მთავრობის საწინააღმდეგო სხვა გამოსვლებში მონაწილე პირები გადაეცა სამხედრო სასამართლო-სათვის.

აღმინისტრაციული რეპრესიები, სასამართლო ორგანოების ბიუროკრატიზმი და „უსამართლო მართლმსაჯულება“, ბუნებრივია, ხალხის უკმაყოფილებას იწვევდა. ამ ბოროტების წინააღმდეგ იბრძოდნენ არა მარტო რევოლუციური დემოკრატები, მის რამდენადმე გამოსწორებას ცდილობდნენ ბურჟუაზიული ლიბერალებიც.

გ. თუმანიშვილი წერდა: „60-იანი წლების რეფორმათა ეპოქაში კავკასიის ისტორიას ახასიათებდა ერთი შესანიშნავი თავისებურება, რასაც გადაშფუყვები მნიშვნელობა ჰქონდა ამ მხარის ბედზე... ამა თუ იმ კანონის კავკასიაში გატარების საკითხის განხილვის დროს ყოველთვის მიიღებოდა მხედველობაში ამ მხარის „ადგილობრივი თავისებურებანი“, „ამ თავისებურებებმა“ დაავიანა ჩვენთან საგლეხო რეფორმის გატარება და ხელი შეუშალა მხარეში სასამართლო დაწესებულებების შემოღებას მათი არსებითი ნაწილით — ნაფიც მსაჯულთა ინსტიტუტით, ამორჩეული მომრიგებელი მოსამართლეებითა და საბრალმდებლო კაპერიით“¹.

გ. თუმანიშვილის გადმოცემით, მეფის მთავრობის მოხელეები სასამართლო რეფორმის შეკვეცილი სახით გატარების მიზეზად თურმე ასახელებდნენ ხალხში არსებულ ცრუმოწმობის ჩვეულებას, რაც აძნელებდა მართლმსაჯულების წარმოებას. აბათილებს რა ამ ბრალდებას, გ. თუმანიშვილი აღნიშნავს, რომ გამოძიების დროს პოლიციის მოხელეები მიპართავენ ძალადობას და იძულებენ დამნაშავედ ჩათვლილ პირს გამოტყდეს „დანაშაულში“. შემდეგ ამას იპეორებს სასამართლოს გამოძიებელი, რომელიც წარმოადგენს პროკურორის აგენტს და არა მოსამართლეს. ამიტომ არაა გასაკვირი, რომ სასამართლო პროცესზე დამნაშავე და მოწმეები, რომელნიც თავისუფალი არიან ძალდატანებისაგან, აძლევენ არსებითად განსხვავებულ ჩვენებას და ხშირად სასამართლო იძულებულია გაამართლოს ბრალდებულები. ბუნებრივია, აღნიშნავს, გ. თუმანიშვილი, ასეთ ვითარებაში პოლიციის მოხელეები გაბოროტებით გაჰყვირიან — „ცრუმოწმებმა დამნაშავე გაამართლეს და სასამართლომ მათ დაუჯერაო“.

ამიერკავკასიაში ხალხსა და სასამართლოს შორის ხრამი იყო. ისინი

¹ Г. Туманов, Разбой и реформа суда на Кавказе, С.-Петербург, 1903, стр. 23.

ერთმანეთს ვერ უგებდნენ, მაგრამ მათ შორის ხიდის გადება შესაძლებლად იყო მიჩნეული. ასეთ ხილად, გ. თუმანიშვილის აზრით, უნდა გადაქცეულიყო მოსამართლეთა მიერ ხალხის ენისა და ყოფის შესწავლა, აგრეთვე ნაფიც მსაჯულთა ინსტიტუტის შემოღება, მაგრამ მთავრობის მოხელეები ამის წინააღმდეგ ილაშქრებდნენ.

პირველ ხანებში მეფის მთავრობა გარკვეულ ნდობას უცხადებდა ადგილობრივი მოსახლეობის ზედაფენებიდან გამოსულ კადრებს. ისინი ინიშნებოდნენ საოლქო სასამართლოს წევრებად, მომრიგებელ მოსამართლეებად და გამომძიებლებად. 1883 წლიდან სასამართლო დაწესებულებებში თანამდებობებზე „ტუზემცების“ მიღება ძალიან შეიკვეცა, ე. ი. მთავრობა აღარ ენდობოდა არარუსებს, რომელნიც ადრე თვით მთავრობის მიერ ინიშნებოდნენ სასამართლოებში. მით უმეტეს დიდი უნდობლობით ეკიდებოდნენ ნაფიც მსაჯულებს, რომელნიც მოსახლეობის წრიდან უნდა ყოფილიყვნენ ამორჩეულნი.

იმ პირობებში, როცა სასამართლო პროცესის მონაწილეებს, ერთი მხრივ, მოსამართლეებსა და, მეორე მხრივ, ბრალდებულებსა და მოწვევებს ენისა და ხალხის ზნე-ჩვეულების უცოდინარობის გამო ერთმანეთისა არაფერი ესმოდათ, უდავოდ დადებითი როლი უნდა შეესრულებინათ სამართლის წარმოებაში ადგილობრივი მოსახლეობის წრიდან არჩეულ ნაფიც მსაჯულებს. ადგილობრივი ენისა და ხალხის ზნე-ჩვეულების მცოდნე ნაფიცებს, რომელთა მნიშვნელოვანი ნაწილი კარგად გაუგებდა აგრეთვე პროკურორსა და მოსამართლეებს, მართლაც, ერთგვარი ხიდი უნდა გაედოთ სასამართლოსა და ხალხს შორის და ამით რამდენადმე გამოესწორებინათ მართლმსაჯულების საქმე.

ნაფიც მსაჯულთა ინსტიტუტის შემოღების საჭიროება და სარგებლობა აღიარა თავად-აზნაურთა უმრავლესობამაც. 1898 წელს ქუთაისის გუბერნიის თავადაზნაურობამ შეადგინა „ბარათი ნაფიც მსაჯულთა სასამართლოს შემოღების შესახებ“. მომდევნო წელს ანალოგიური ბარათი მთავრობას წარუდგინა თბილისის გუბერნიის თავადაზნაურობამაც.

ქუთაისელთა ბარათში აღნიშნულია, რომ XIX ს-ის 60-იანი წლების შემდეგ სწავლა-განათლება წინ წავიდა და ახლა არ გაძნელდება შესაფერის ნაფიც მსაჯულთა შერჩევა. განათლებული პირები კიდევ რომ არ იყოს საკმაო რაოდენობით, მაინც უნდა შემოვიღოთ ნაფიც მსაჯულთა სასამართლო, რადგან ადგილობრივი საზოგადოებრიობის წარმომადგენელთათვის უფრო გასაგებია ხალხის მორალური და ყოფითი თავისებურებანი. ზოგიერთ მოხელეთა მიერ წამოყენებული მოტივი ხალხის გაუნათლებლობის, მის მიერ რუსული ენის უცოდინარობის შესახებ, არა თუ ნაფიცთ-სასამართლოს შემოღების საწინააღმდეგო არგუმენტად გამოდგება, არამედ პირიქით, ასეთ ხალხს ყველაზე მეტად ესაჭიროება სასა-

მართლოს ისეთი ფორმა, რომელიც მისთვის გასაგები და ახლო იქნება. ამიტომ ვბედავთ აღვძრათ შუამდგომლობა ჩვენ მხარეში ნაფიც მსაჯულთა სასამართლოს შემოღების თაობაზე¹.

ნაფიც მსაჯულთა ინსტიტუტის შემოღებაზე თითქოს გარკვეული პრაქტიკული ნაბიჯიც გადაიდგა. დაიწყო განათლებულ პირთა სიების შედგენა, რადგან მთავრობა გაუნათლებლებს, განსაკუთრებით რუსული ენის უცოდინარებს, შეუფერებლად თვლიდა ნაფიცი მსაჯულის მოვალეობის შესრულებისათვის. მთავრობის ამ თვალსაზრისს არ იზიარებდნენ ქართველი საზოგადო მოღვაწეები. ნაფიც მსაჯულთა ინსტიტუტი, — აცხადებდა გ. თუმანიშვილი, — იმითაა კარგი, რომ ნაფიცებს კარგად ესმით მოსახლეობის ენა, რელიგია, ზნე-ჩვეულებანი. მაგრამ ეს პირობა დაირღვევა, თუ მსაჯულებად აყვანილ იქნენ მართო განათლების ცენზის მქონე პირები, რომელნიც უმეტეს შემთხვევაში ჩამოცილებული არიან ხალხს².

პროგრესული ინტელიგენციის საქმიანობას სასამართლოსა და მართლმსაჯულების გაუმჯობესების სფეროში თითქმის არაავითარი წარმატება არ მოჰყოლია. მთავრობა ბოლომდე იცავდა აღებულ კურსს. განაპირა მხარეებს, მათ შორის საქართველოს რევოლუციამდე არ ღირსებია ნაფიც მსაჯულთა სასამართლო. არსებული სასამართლო დაწესებულებანი ბოლომდე შორს დარჩა ხალხისაგან, ვერ ახორციელებდნენ მართლმსაჯულებას და, ბუნებრივია, ხალხში მხოლოდ სიძულვილის გრძნობას ბადებდნენ.

§ 3. სამალაქო რეფორმა

XIX საუკუნის რეფორმამდელ ხანაში საქართველოსა და ამიერკავკასიის ქალაქებს განაგებდა პოლიცია, რომელიც ზოგიერთი საქმის შესრულებისათვის იყენებდა მოსახლეობის სხვადასხვა წოდებათა მიერ არჩეულ დეპუტატებს.

გამონაკლისს ამ საერთო წესიდან წარმოადგენდა თბილისი, სადაც ჯერ კიდევ 1841 წელს ჩამოყალიბდა ქალაქის საზოგადოებრივი მმართველობა ქალაქის თავისა და 6 ხმოსნის შემადგენლობით. მაგრამ ექვსხმოსნიან სათათბიროს ევალეზობდა თითქმის მხოლოდ გადასახადების გაწერა-აკრეფა. ქალაქის მეურნეობას ისევ პოლიცია განაგებდა.

XIX ს-ის 60-იანი წლებისათვის თბილისის ბურჟუაზია საკმაოდ მომძლავრდა. მას აღარ აკმაყოფილებდა 1840 წლის დებულების საფუძველზე მოწყობილი ქალაქის საზოგადოებრივი მმართველობის ვიწრო

¹ Г. Туманов, Разбой и реформа суда..., გვ. 52—65.

² იქვე.

ჩარჩოები. მეფისნაცვალ იძულებული გახდა დაესვა ქალაქის წარმომადგენლობის სფეროს გაფართოების საკითხი. 1865 წ. ამქართა აჯანყებამ დააჩქარა ამ მიმართულებით ღონისძიების ჩატარება.

1866 წელს შემუშავდა ახალი დებულება, რომლის საფუძველზე თბილისში ექვსხმოსნიანი სათათბიროს ნაცვლად შეიქმნა ასხმოსნიანი საერთო კრება. რამდენადმე გაფართოვდა საზოგადოებრივი მმართველობის მოქმედების სფერო. ქალაქის თავი, საერთო კრება და საერთოდ 1866 წლის დებულების საფუძველზე ორგანიზებული საზოგადოებრივი მმართველობა გამოსატყავდა და იცავდა, ერთი მხრივ, დეგრადაციის გზაზე დამდგარი ფეოდალური წოდების ინტერესებს, მეორე მხრივ, კი შესაფერის ადგილს აძლევდა ახლად ფეხადგმულ ბურჟუაზიას ქალაქის სამეურნეო საქმეების გადაწყვეტაში. მოსახლეობის დაბალ ფენებს მალაღი საარჩევნო ცენზი არ აძლევდა ქალაქის მმართველობაში მონაწილეობის შესაძლებლობას. 1866—1874 წლებში თბილისის საზოგადოებრივი მმართველობა გაცილებით მეტ თანხას ხარჯავდა სამხედრო ნაწილებსა და პოლიციაზე, ვიდრე უშუალოდ ქალაქის საჭიროებაზე. ადმინისტრაციის მკაცრ კონტროლს დაქვემდებარებული თბილისის საზოგადოებრივი მმართველობა კავკასიის სამეფისნაცვლოს ბიუროკრატიული აპარატის დამატებას წარმოადგენდა და მას იყენებდნენ საერთო სახელმწიფოებრივი ინტერესებისათვის.

ეკონომიურად აღზევებული რუსეთისა და განაპირა მხარეთა ბურჟუაზია, მისი წრიდან გამოსული ინტელიგენცია მეტს მოითხოვდა. მეფის მთავრობა იძულებული გახდა გარკვეულ დათმობაზე წასულიყო, ბურჟუაზიისათვის მისი მოქმედების მთავარ სარბიელზე — ქალაქებში მიენიჭებინა შეზღუდული თვითმმართველობა.

რუსეთის შინაგან საქმეთა სამინისტრომ ახალი საქალაქო დებულების შემუშავება ჯერ კიდევ 1862 წელს დაიწყო. საქმე რამდენიმე წელს გაჭიხურდა და მხოლოდ 1870 წ. 16 ივნისს ალექსანდრე მეორემ ხელი მოაწერა უმაღლეს ბრძანებას ახალი საქალაქო დებულების პრაქტიკულად გატარების შესახებ.

1870 წლის საქალაქო დებულება ბურჟუაზიული ხასიათისა იყო. იგი მხედველობაში არ ღებულობდა ქალაქის მოსახლეობის წოდებრივ დაყოფას და საარჩევნო თანრიგებს საფუძვლად უდებდა არა მოქალაქეთა სოციალურ წარმოშობას, არამედ ეკონომიურ მდგომარეობას. მოქალაქეს უფლება ჰქონდა მონაწილეობა მიეღო არჩევნებში, თუ იგი აკმაყოფილებდა კანონის შემდეგ მოთხოვნებს: 1. იყო რუსეთის ქვეშევრდომი; 2. შესრულებული ჰქონდა 25 წელი; 3. ქალაქში ფლობდა უძრავ ქონებას და იხდიდა შესაფერის გადასახადს, ან ფლობდა სავაჭრო-სამრეწველო დაწესებულებას და იღებდა ფასიან სანებართვო მოწმობას; 4. მასზე არ ითვლებოდა გადასახადთა ნარჩენები.

მოსახლეობის ეკონომიური კატეგორიების შესაბამისად ქალაქებში ყალიბდებოდა სამი თანრიგი, სამი საარჩევნო კრება. პირველ თანრიგში: 'შედიოდნენ მსხვილი მესაკუთრენი (სახლმფლობელები და ვაჭარ-მრეწველები), მეორეში — საშუალო შეძლების მოქალაქენი, მესამეში — ის წვრილი მესაკუთრენი, რომელნიც იხდიდნენ გარკვეულ გადასახადებს. ყოველი თანრიგი და საარჩევნო კრება ირჩევდა ხმოსანთა მესამედს.

საქალაქო თვითმმართველობის განმკარგულებელ ორგანოს წარმოადგებდა სათათბირო. სათათბიროს ხმოსანთა რაოდენობა ქალაქთა სიდიდის შესაბამისად 42-დან 150 კაცამდე მერყეობდა. სათათბიროს კომპეტენციაში შედიოდა: თანამდებობის პირთა არჩევა და მათი ჯამაგირების განსაზღვრა; ქალაქის შემოსავალ-გასავლის ბიუჯეტის დამტკიცება; ქალაქის სახელით სესხების აღება და შემოწირულებათა მიღება. კომუნალურ მეურნეობასთან დაკავშირებული საკითხების განხილვა, სხვადასხვა საკითხზე უმაღლეს მთავრობაში შუამდგომლობის აღძვრა და სხვ.

სათათბირო ირჩევდა თავის წინაშე ანგარიშვალდებულ გამგეობას, რომელსაც ეკისრებოდა აღმასრულებელი ფუნქციები. გამგეობაში სამი წევრი შედიოდა და იგი ქალაქის თავის თავმჯდომარეობით მოქმედებდა.

ცალკეულ მომენტებთან დაკავშირებით და ქალაქის მეურნეობის გარკვეული სფეროს ხელმძღვანელობისათვის სათათბირო გამოჰყოფდა მუდმივ ან დროებით მოქმედ კომისიებს.

სათათბიროს ხმოსნები, ქალაქის თავი და სხვა თანამდებობის პირები აირჩეოდნენ ოთხი წლის ვადით.

ქალაქის საზოგადოებრივი მმართველობის მთავარ ფუნქციას შეადგენდა კომუნალური მეურნეობის ხელმძღვანელობა. მას ხელი უნდა შეეწყო აგრეთვე ვაჭრობა-მრეწველობის განვითარებისათვის, გაეხსნა სკოლები, ბიბლიოთეკა-სამკითხველოები, საავადმყოფოები, საქველმოქმედო დაწესებულებანი და სხვ.

ქალაქის საზოგადოებრივი მმართველობა დებულებით განსაზღვრულ ჩარჩოებში მოქმედებდა დამოუკიდებლად (§ 5), ქალაქებს თვითმმართველობა ეძლეოდა. მაგრამ ამავე დებულების სხვა მუხლები მნიშვნელოვნად ზღუდავდა თვითმმართველობებს და ადმინისტრაციის კონტროლს ამყარებდა მათ საქმიანობაზე. ქალაქის თვითმმართველობებსა და საგუბერნიო ხელისუფლებას შორის ურთიერთობის მოწესრიგებისა და თვითმმართველობათა მუშაობის კონტროლისათვის ყალიბდებოდა საქალაქო საქმეთა საგუბერნიო საკრებულოები (§ 11). ქალაქის თვითმმართველობას უმაღლეს მთავრობასთან მიმორწერა უნდა ეწარმოებინა გუბერნატორის მეშვეობით (§ 13). თვითმმართველობის ყველა დადგენილებათა ასლები დაუყოვნებლივ უნდა გადასცემოდა გუბერნატორს (§ 64)¹.

¹ Городовое положение, С.-Петербург, 1873, гл. 7—138.

ადგილობრივ თვითმმართველობათა ფართო ქსელის შექმნას უდავოდ პროგრესული მნიშვნელობა ჰქონდა. რამდენადმე ილაგებოდა სახელმწიფოს ბიუროკრატიული აპარატის თვითნებობა, იქმნებოდა პროგრესული საზოგადოებრივი ძალების სამოქმედო ასპარეზი. თვითმმართველობა ორგანის აუცილებელი და სასარგებლო იყო რუსეთის იმპერიის განაპირა მხარეებისათვის.

1874 წ. 30 ოქტომბერს უმაღლესი ბრძანების თანახმად მეფისნაცვალს წინადადება მიეცა ამიერკავკასიაში 1870 წ. საქალაქო დებულება გაეტარებინა იმ თანამიმდევრობით, როგორც იგი, ადგილობრივი ვითარების შესაბამისად, უფრო მოსახერხებლად მიიჩნეოდა¹.

ყველაზე ადრე საქალაქო რეფორმა თბილისში გატარდა. 1874 წ. 18 ნოემბრისათვის დაინიშნა სათათბიროს ხმოსანთა არჩევნები. თბილისის საზოგადოებრიობა საქალაქო რეფორმას დიდი იმედით მოელოდა. ს. მესხი „დროებაში“ წერდა: „ახალი წესდების ძალით ქალაქის გამგეობა ბევრ შემთხვევაში თითქმის განუკითხველი გამგებელია ქალაქის შემოსავალგასავლისა და საკუთრებისა. იმას შეუძლია ყოველგვარი წარმატება მისცეს ქალაქს, შეუძლია ისეთი დაწესებანი შემოიღოს, რომელიც ქალაქის საჭიროებას დააკმაყოფილებს, გაამშვენიერებს და თვით მცხოვრებთაც კეთილდღეობას შემატებს.

აი ამისთანა გამგეობის წევრების ამორჩევა მომავლის 18 ნოემბერს არის დანიშნული... აირჩიეთ ისეთი კაცები, რომელთაც საზოგადო სარგებლობისათვის გული შესტკივათ, ისეთი კაცები, რომელთაც გაეგებათ. თუ რით და როგორ შეიძლება საზოგადო საჭიროების დახმარება და ხელის მომართვა“².

ს. მესხი ქალაქის ფართო საზოგადოების ინტერესებს და სურვილებს გამოხატავდა, მაგრამ თბილისის მოსახლეობის ყველა სოციალურ ფენას საქალაქო სათათბიროს შემადგენლობის განსაზღვრასა და თვითმმართველობის მუშაობაზე თანაბარი გავლენის მოხდენა როდი შეეძლო. დებულება ქალაქის თვითმმართველობებში გადამწყვეტ უპირატესობას ანიჭებდა უძრავი ქონების მსხვილ მესაკუთრეებსა და ვაჭარ-მრეწველებს, რომელნიც ადგენდნენ პირველ-მეორე საარჩევნო თანრიგებს.

რეფორმის გატარებისას თბილისში ხმის უფლებით სარგებლობდა 4494 კაცი (მოსახლეობის 4—5%). პირველი თანრიგის ამომრჩეველთა სიაში იყო 45 კაცი, მეორეში — 221, ხოლო მესამე თანრიგში — 4225 ამომრჩეველი³.

¹ სსცია, ფ. 13, ანაწ. 24, საქ. 519, ფურც. 1.

² „დროება“, № 449, 1874.

³ სსცია, ფ. 192, ანაწ. 5, საქ. 308, ფურც. 1—62.

პირველი და მეორე თანრიგის ამომრჩევლები, რომელნიც შეადგენდნენ ხმის უფლების მქონე მოქალაქეთა 6%-ს, სათათბიროში ირჩევდნენ 48 ხმოსანს, მესამე თანრიგის ამომრჩევლები 4228 კაცი (94%) კი 24 ხმოსანს.

1875—1878 წლებში თბილისის სათათბიროში შედიოდნენ გ. აბესლომოვი, ნ. არლუთინსკი, ი. ბაგრატიონ მუხრანსკი, ი. გრუზინსკი, ი. ჯაყელი, ს. ზუბალაშვილი, ნ. ზუბალაშვილი, ა. მატინოვი, იზმაილოვი, მანთაშევი, ჩითახოვი და სხვ.

მართვა-გამგეობას მიუჩვეველმა ბურჟუაზიამ პრივილეგიური წოდების ამომრჩევლებთან ერთად ნდობა გამოუცხადა ქართველ თავად-აზნაურთა ლიდერს, გამოჩენილ სახელმწიფო მოღვაწეს დ. ყიფიანს და იგი ქალაქის თავად აირჩია¹.

სათათბირომ აირჩია კერძო მუდმივმოქმედი აღმასრულებელი ორგანოს გამგეობის წევრები. ჩამოყალიბდა თბილისის მოსახლეობის ცალკეულ სოციალურ ჯგუფთა სამმართველოებიც. ვაჭართა, მეშჩანთა და ხელოსანთა გამგეობების ფუნქციებში შედიოდა ამ სოციალურ ჯგუფთა შინაგანი წყობის საკითხი, მათ მიერ სახელმწიფო, საქალაქო და საზოგადოებრივი ვალდებულებების შესრულება, მცირე მნიშვნელობის სადავო საკითხების სიტყვიერი გარჩევა.

1875—1878 წლები თბილისის საქალაქო თვითმმართველობის ისტორიაში იყო გარდამავალი პერიოდი. მიმდინარეობდა საქალაქო მმართველობის ძველი ფორმების გაუქმება და ახლის შემოღება. ხდებოდა თბილისის თვითმმართველობის თვითორგანიზაცია.

ქ. ქუთაისში ახალი დებულების გატარებისათვის სამზადისი 1874 წელს დაიწყო. გუბერნატორმა ლევაშოვმა წინადადება მისცა მოქალაქეებს აერჩიათ 66 კაცისაგან შემდგარი კომისია, რომელიც იმსჯელებდა ქალაქის საჭიროებაზე და თვითმმართველობის შემოღების გზებსაც. დასახავდა კომისიის მოქმედების ვადა ერთი წლით განისაზღვრა და მას ერთგვარი მოსამზადებელი სკოლის როლი უნდა შეესრულებინა. მეველე (დ. მიქელაძე) ამასთან დაკავშირებით „დროებაში“ აღნიშნავდა: „მამ გაისაღვლირსება ქუთაისის თვითმმართველობა. ესეც კარგია. მანამდის კი ამ თორნეტ თვეს რეპეტციებით შეიქცევენ თავს და იმედია მოქალაქეები ნამეტნავადაც განვითარდებიან თავის მომავალი ასპარეზისათვის“. კორესპონდენტის ავტორს ასეთი მოსამზადებელი პერიოდი ზედმეტად მიაჩნია. ბუნებით ნიჭიერი ჩვენი ხალხი ამის გარეშეც ეხლავე შესძლებდაო თვითმმართველობის ორგანიზაციას. მაგრამ არა უშავს, ეს დროც მალე გავა და

¹ „დროება“, 1875, № 142, 144.

„უფალ ღუბერნატორის“ შეპირებისამებრ ქუთაისის მიეცემა საკუთარი ხმა, ...მაშინ მას ექნება სრული ნება, რომ ისეთი მხარეები ქალაქის გასავლისა, რომელთაც არავეითარი სარგებლობა არ მოაქვთ მცხოვრებთათვის, ღობეს გადაღმა გადაისროლოს. მას ადვილად შეეძლება იქონიოს საქალაქო სკოლა, ბანკი, საავადმყოფო, განათებული და სუფთა ქუჩები და სხვ. ერთი სიტყვით, მაშინ შეეძლება უკეთ მართოს თავის ცხოვრება და იმდენად გაინათლოს სიცოცხლე, რამდენადაც შესაძლებელია კომლიანი სახლის გაჩაღება“¹.

1875 წ. 16 სექტემბრისათვის დაინიშნა ქუთაისის სათათბიროს ხმოსანთა არჩევნები. ს. მესხი ქუთაისის თვითმმართველობის დაბადებასაც სიხარულით მიესალმა და გაზეთის მეშვეობით მკითხველებს აცნობა: „თუმცა სრულიად არა, მაგრამ ქუთაისსაც ეღირსა ბოლოს თავის დიდი ხნის ნატერის შესრულება: ქალაქს მიენიჭა უფლება, რომ თავის შინაგახი... საქმეები თვითონვე განაგოს ამორჩეული... პირების საშუალებით.

„თუმცა სრულიად არაო“ იმიტომ ვამბობთ, რომ ქალაქის თავის არჩევა გამგეობაზე არ არის დამოკიდებული. იმას ჭერჯერობით მთავრობა ნიშნავს. მაგრამ თავის საქმეების გამგებლობაში ქალაქს ახლა უფრო მომეტებული მოეკითხება, ვიდრე დღემდი... როგორც კერძო მამული შემოსავალს იმატებს ...კარგი გამგებლის ხელში, აგრეთვე ქალაქიც შეჩრმატებს და გამდიდრდება კარგი, თავიანი გამგეობის წყალობით“². ს. მესხი მოუწოდებს ქუთაისელებს ხმოსნებად აირჩიონ პატიოსანი, მცოდნე და საზოგადო ინტერესებისათვის თავდადებული პირები.

ქუთაისის სათათბირო შემადგენლობა მთავრობამ 52 ხმოსნით განსაზღვრა. 1875 წ. 12 სექტემბერს ხმოსნებად არჩეულ იქნენ: ა. ფიფინაშვილი, გ. აბაშიძე, კ. ხარაზოვი, ი. დავიდოვი, კ. ნიჟარაძე, ნ. ლოლობერიძე, ი. სტეფანოვი, პ. თუმანიშვილი, ანტ. ლორთქიფანიძე, კ. ქვარიათი, გ. ბაინდუროვი, გ. ლოლობერიძე, ი. ლორთქიფანიძე, ნ. ნიკოლაძე, ლ. ასათიანი, ი. მესხი, ბ. ხელთუფლიშვილი, მ. რიჟინაშვილი, ს. ღულაძე, დ. ალავიძე, დ. ჩხეიძე, ა. ფირალოვი, კ. ერისთავი და სხვ.³

1875 წ. 1 დეკემბერს ლივადიის სასტუმროში ჩატარდა ქუთაისის საქალაქო სათათბიროს პირველი სხდომა. ხმოსანთა მიერ ფიცის დადების შემდეგ თავმჯდომარემ — მთავრობისაგან დანიშნულმა ქალაქის თავმა — ნ. ს. აბაშიძემ გამოაცხადა, რომ დღეიდან ქუთაისის თვითმმართველობა გაიხსნა და ეხლავე უნდა მოვახდინოთ გამგეობის წევრების და მდივნის არჩევნებო.

¹ „დროება“, 1874, № 406.

² იქვე, 1875, № 104.

³ იქვე, № 136.

მაგრამ ხმოსანთა უმრავლესობამ მოითხოვა, ჯერ გამორკვეულიყო რა შემოსავალი გააჩნდა ქალაქს, რადგან უამისოდ არ შეიძლება თანამდებობის პირთა ჯამაგირების განსაზღვრაო. საკითხის შესასწავლად გამოიყო კომისია.

სათათბიროს მეორე სხდომაზე, რომელიც გაიმართა სტეფანე აკოფა-შვილის სახლში 4 დეკემბერს, კომისიამ წარადგინა ცნობები და თავის მოსაზრებანი თანამდებობის პირთა ჯამაგირების ოდენობის თაობაზე.

გამგეობის წევრებად არჩეულ იქნენ ანტ. ლორთქიფანიძე და ივ. ჯაიანი, მათ კანდიდატებად — ბ. ხელთუფლიშვილი და სტ. აკოფოვი, მდივნად — უ. ლულაძე¹.

„ამ ორი კვირის წინათ, — წერდა ს. მესხი, — ქუთაისში პირველათ იყო არჩევანი ახალის წესით: ქალაქის გამგეობის წევრთა, ... ვინც იცის თუ როგორ დახლართულია ქუთაისის საქალაქო საქმეები, ის დამეთანხმება, რომ ახალ გამგეობას წინდახედვითა და განსაკუთრებულის ანგარიშით მართებს ახლა საქმის დაჭერა.

ქუთაისი, მართალია, პატარა ქალაქია და პატარა შემოსავალი აქვს, მაგრამ ამასთანავე არც გასავალი აქვს ბევრი; საუბედუროთ, დღემდე ეს პატარა შემოსავალიც უხეიროთ და უანგარიშოთ იხარჯებოდა. თითქმის სრულეზით არ აქცევდნენ ყურადღებას ქალაქის ნამდვილ საჭიროების დაკმაყოფილებას“. აკრიტიკებდა რა საპოლიციო მმართველობის მანჩიჭ მხარეებს, ს. მესხი რწმენას გამოთქვამდა, რომ ქუთაისის თვითმმართველობის სათათბიროს ხმოსნები და გამგეობის წევრები „ხელიხელ ჩაკიდებული, ძმურად, თანხმობით“ იმუშავებენ და ძველი უხეირო მმართველობის წყალობით ჩამორჩენილი საქალაქო მეურნეობას აღმავლობის გზაზე დააყენებენ².

1876 წელს თვითმმართველობა ქ. გორმაც მიიღო. ჯერ კიდევ მარტში გამოუცხადეს მოქალაქეებს, რომ თვითმმართველობის შემოღებისათვის საჭირო იყო ქალაქის შემოსავლის 2500 მანეთით გაზრდა. საპოლიციო მმართველობასთან არსებულ წოდებათა წარმომადგენლებს — დეპუტატებს გადაუწყვეტიათ აღნიშნული თანხა ქალაქის ყველა მცხოვრებთა შორის გაენაწილებინათ, რასაც თავად-აზნაურთა დიდი უკმაყოფილება გამოუწვევია³.

მართალია, დამატებითი თანხის, 2500 მანეთის აკრეფა დიდხანს ვაჭიანურდა, მაგრამ გორის საქალაქო სათათბიროს ხმოსანთა არჩევნები მაინც ჩატარდა. 1876 წლის ნოემბერში არჩეულ იქნა 42 ხმოსანი.

1876 წ. 4 დეკემბერს გამართულ საქალაქო სათათბიროს სხდომაზე

¹ „ღროება“, 1875, № 143.

² იქვე, № 136.

³ იქვე, 1876, № 66.

განხილულ იქნა ქალაქის შემოსავლის რეგულირების საკითხი. მთავრობი-საგან დანიშნულმა ქალაქის თავმა ი. ელიმირზოვმა უქმაცოფილება გამო-თქვა გადასახადების გამომღებთა მისამართით — საქალაქო თვითმმართვე-ლობა უკვე გაიხსნა, დამატებითი თანხა კი ჯერაც არაა აკრეფილიო. სათათ-ბირომ დაადგინა 2500 მანეთი ქალაქის ყველა ცენზიან მოქალაქეთა შორის გაენაწილებინა, არსებულ გადასახადთა ნარჩენები კი აუცილებლად აეკ-რიფათ 1877 წლის თებერვლამდე¹.

ქ. გორს რეფორმის გატარებისთანავე როდი მიეცა ქალაქის თავის არ-ჩევის უფლება. ქალაქის პირველ თავად თვით მთავრობამ დანიშნა ი. ელიმირზოვი. 1881 წელს გორის სათათბირომ მიიღო ქალაქის თავის არჩევის უფლება, მაგრამ ამ თანამდებობაზე ისევ ი. ელიმირზოვი აირჩიეს².

ფინანსური სიძნელეების გამო გორის თვითმმართველობას უჭირდა ფეხზე მტკიცედ დადგომა. ქალაქის მესამე თანრიგის მოქალაქეები შეშ-ფოთებით აღნიშნავდნენ, რომ გორის გასავალი ყოველთვის აჭარბებს შემოსავალს და თუ ხარჯები არ შემცირდა, ბიუჯეტის დეფიციტის დასაფა-რავად სულ ახალ-ახალ გადასახადებს მოგვთხოვენო. „დიდი იმედი აქვს ქალაქს, — წერდა ა. თუთაევი, — რომ ახალ სამოქალაქო წესდებულების სრულად შემოღების გამო, იმის საქმეები ცოტაც არის მაინც უკეთეს მდგომარეობაში იქნება და ყველა უბრალო საქმისათვის ახალი ხარჯის გაწერა აღარ იქნება საჭირო“³.

ქ. ახალციხეში 1870 წლის დებულების საფუძველზე თვითმმართვე-ლობის ორგანოები ჩამოყალიბდა 1876 წ. ივნისში⁴. ამასთან დაკავშირე-ბით ვინმე ახალციხელი „დროების“ რედაქციას აცნობებდა: „დიდს მზი-არულებაში ვართ ამჟამათ ჩვენ, რადგანაც ქალაქის გამგეობის ახალ წესს მოვესწარით და იმედნეულათ ვართ, რომ ქალაქის თავმა უ. ხითაროვმა ბევრი კეთილი განკარგულება მოახდინოს, თუ ჩვენც შესაფერისი წევრები ამოვეურჩიეთ“⁵.

ქ. ფოთმა თვითმმართველობა უფრო მოგვიანებით, 1882 წელს მიიღო. ქალაქის პირველ თავად არჩეულ იქნა გენ.-მაიორი ივ. ვახრამოვი. 1882 წ. 21 ხოემბერს „დროების“ კორესპონდენტი ფოთიდან იწერებოდა: „დიდი ლოდინის შემდეგ ჩვენც ველირსეთ სამოქალაქო თვითმმართველობას, ...კვირას მღვდელმა გ. მაჭაროვმა პარაკლისი გადაიხადა და ჰმოსნები დაა-ფიცა. ფიცის შემდეგ თავმჯდომარემ (იგივე ქალაქის თავია) კრებას მოკ-ლე... სიტყვით მიმართა“. ივ. ვახრამოვს იმედი გამოუთქვამს, რომ სათათ-

¹ „დროება“, 1876, № 133.

² იქვე, 1881, № 181.

³ იქვე, 1876, № 66, № 138.

⁴ სსცია, ფ. 12, ანაწ. 7, საქ. 663, ფურც. 4—5.

⁵ „დროება“, 1876, № 20.

ბირო და გამგეობა თანხმობით და პატიოსნად იშრომებდა ქალაქის მდგომარეობის გაუმჯობესებისათვის¹.

თურქთა ბატონობისაგან განთავისუფლების შემდეგ ქ. ბათუმი ძალიან სწრაფად იზრდებოდა და მალე გადაიქცა საქართველოსა და ამიერკავკასიის ერთ-ერთ მსხვილ სავაჭრო სამრეწველო ცენტრად, პირველხარისხოვან ნავსადგურად, მაგრამ მეფის მთავრობა კარგა ხანს თავს იკავებდა ამ ახლად შემოერთებული ქალაქისათვის თვითმმართველობის ბოძებისაგან. 1885 წ. ბათუმის მოსახლეობის ზედაფენამ თხოვნით მიმართა შინაგან საქმეთა სამინისტროს მათ ქალაქში საზოგადოებრივი მმართველობის შემოღების თაობაზე. ბათუმელთა ამ თხოვნას თანაგრძნობით შეხვდა საქართველოს მოწინავე საზოგადოებრიობა. როგორც არ უნდა იყოს ქალაქთა საზოგადოებრივი მმართველობის სისტემის ნაკლოვანებანი, — წერდა „ნოვოე ობოზრენიეს“ რედაქცია, — ქალაქთა მართვა-გამგეობის ახალი წესი გაცილებით უკეთესია ძველზე და ქ. ბათუმი სავსებით მომზადებულია ამ სიახლისათვის. ქალაქ ბათუმს ისეთი ბრწყინვალე მომავალი ელოდება, რომ ცოდვა იქნება არ მისცემოდა მას ყოველგვარი საშუალება სწრაფი განვითარებისათვის, რაც, სხვასთან ერთად, მნიშვნელოვანწილად დამოკიდებულია საზოგადოებრივი მმართველობის შემოღებაზე. თუ გორი და ახალციხე პოულობენ თანხას თვითმმართველობის შენახვისათვის, ბათუმს, მით უმეტეს, ეს არ გაუჭირდებაო².

მეფის მთავრობა არ ჩქარობდა. ქ. ბათუმს ამის შემდეგ კიდევ სამ წელიწადს პოლიცია განაგებდა. მხოლოდ 1888 წელს მიიღო ბათუმმა თვითმმართველობა და საკმაო წარმატებასაც მიაღწია ქალაქის მდგომარეობის გაუმჯობესების საქმეში.

ამრიგად, საქართველოში საქალაქო რეფორმა უფრო მოგვიანებით, მაგრამ თითქმის ისეთივე ფორმით და მოცულობით გატარდა, როგორც რუსეთის ცენტრალურ გუბერნიებში. თვითმმართველობა მიიღო საქართველოს ექვსმა ქალაქმა — თბილისმა, ქუთაისმა, ფოთმა, ბათუმმა, გორმა და ახალციხემ. მიუხედავად კომპენტენციის სივიწროვის და ხელისუფლების შეზღუდულობისა, საქალაქო თვითმმართველობებს კოლონიურ საქართველოში უაღრესად დადებითი მნიშვნელობა ჰქონდა. საქალაქო თვითმმართველობაში ორგანიზებული ადგილობრივი საზოგადოებრივი ძალები ახერხებდნენ რამდენადმე შეეზღუდათ მეფის მთავრობის ბიუროკრატიული აპარატის თვითნებობა და გაეუმჯობესებინათ ქალაქების მდგომარეობა. მაგრამ 1870 წლის დებულება საქართველოს ყველა ქალაქში როდი გატარდა. XIX ს-ის 90-იან წლებამდე საპოლიციო მმართველობაში დარჩა თელავი, სიღნაღი, ახალქალაქი, დუშეთი, სოხუმი, ოზურგეთი და ყველა დაბა.

¹ მ. პაკიკორია, ფოთის წარსულიდან, თბ., 1967, გვ. 110.

² «Новое обозрение», 1885, № 530.

§ 1. კაკიტალისტური ურთიერთობის განვითარება სოფელში

სავაჭრო მიწათმოქმედება. საქართველო ბუნებრივი პირობებით მეტად მრავალფეროვანია, რაც საშუალებას იძლევა მრავალდარგოვანი სოფლის მეურნეობის განვითარებისათვის. მაგრამ ეს შესაძლებლობანი მთელი სისრულით როდი იყო გამოყენებული.

საგლეხო რეფორმამ მნიშვნელოვანწილად მოსპო მზარდ საწარმოო ძალებსა და დრომოკმულ წარმოებით ურთიერთობებს შორის არსებული წინააღმდეგობანი და ხელი შეუწყო სოფლის მეურნეობის აღმავლობას. XIX ს-ის 70-იანი წლებიდან, ბაზრების გაფართოების და მიმოსვლა-გადაზიდვის საშუალებათა (გზატყეცილები, რკინიგზები) გაუმჯობესების წყალობით სოფლის მეურნეობის ძველი დარგების პროდუქტთა საქონლიანობა კიდევ უფრო გაიზარდა. განვითარდა ახალი დარგებიც. შრომის საზოგადოებრივი დანაწილების შემდგომი გაღრმავებისა და სასაქონლო წარმოების გაფართოების პარალელურად ინტენსიურად მიმდინარეობდა სოფლის მეურნეობის დარგობრივი სპეციალიზაციის პროცესი.

საქართველოს პირობებში უძველესი დროიდან არსებობდა ურთიერთისაგან მეტ-ნაკლებად განსხვავებული ბუნებრივ-სამეურნეო ზონები, რაც განსაკუთრებით ცხადად გამოიკვეთა რეფორმის მომდევნო ხანაში. 80-იანი წლების დამკვირვებლები მკვეთრად მიჯნავენ საქართველოს მთის, ბარისა და მთა-ბარის შუა (გარდამავალ) ზონებს მათთვის დამახასიათებელი სოფლის მეურნეობის დარგებით.

საქართველოს მთიან ზონაში წამყვანი იყო მეცხოველეობა, მაგრამ მთის სხვადასხვა რაიონში მეტ-ნაკლებ მნიშვნელობას ინარჩუნებდა მარცვლეულის მეურნეობაც.


აღმოსავლეთ საქართველოს შუა ზონაში თითქმის თანაბარი შესაძლებლობანი არსებობდა მარცვლეული მეურნეობის, მეხილეობა-მებოსტ-

ხეობისა და მეცხოველეობის განვითარებისათვის, მაგრამ აქაც გამოიყოფოდა ამა თუ იმ დარგში დასპეციალიზებული სოფლები. ბარის ზონაში წამყვანი იყო მევენახეობა-მეღვინეობა და საკმაოდ დიდ მნიშვნელობას ინარჩუნებდა მარცვლეული კულტურებიც. იქვე თანდათან იზრდებოდა აგრეთვე მეთამბაქოეობის, მებამბეობის, მებაბრეშუმეობისა და სხვ. დარგების მნიშვნელობა.

დასავლეთ საქართველოს სწორ დაბლობზე, ზღვისპირსა და მდინარეთა ქვემო წელში, განსაკუთრებით დიდი ადგილი ეკავა სიმინდს, რომლის გვერდით ხალხის ეკონომიურ ცხოვრებაში თანდათან დიდ როლს ასრულებდა მეთამბაქოეობა. ინერგებოდა რამის, ბამბუკის და სხვ. კულტურებიც. დასავლეთ საქართველოს სწორი დაბლობი შეუმჩნევლად გადადის ბორცვებსა და გორაკებში, სადაც XIX ს-ის 80-იანი წლებიდან დიდ მომავალს უწინასწარმეტყველებდნენ ჩაისა და სხვა სუბტროპიკულ კულტურებს. ზღვიდან მოშორებით აღმოსავლეთისაკენ თანდათან გამოიყოფოდა მევენახეობა-მეღვინეობაში დასპეციალიზებული რაიონები.

ბაზარი, სასაქონლო-ფულადი ურთიერთობა დიდ გავლენას ახდენდა თვით წარმოების პროცესზე. სოფლის მეურნეთა წინაშე თანდათან მეტი სიმწვავეით დგებოდა წარმოების აგროტექნიკური დონის ამაღლების პრობლემა. შედარებით მსხვილი მეურნეობები ორ და სამმინდვრიანი სისტემიდან თანდათან გადადიოდნენ მრავალმინდვრიან სისტემასა და წესიერ თესლბრუნვაზე. უმჯობესდებოდა ვენახის, თამბაქოსა და ბამბის პლანტაციების მოვლა-დამუშავების წესები. მალდებოდა მეურნეობათა ტექნიკური აღჭურვილობის დონე. XIX ს-ის მეორე ნახევარში თანდათან შზარდი რაოდენობით გამოიყენებოდა ქარხნული გუთნები, კულტივატორები, სათესი, სათიბი, სამკელი, ძნასაკონი, სალექწი, სანიავებელი და სხვ. მანქანები, ვენახის შესაწამლი აპარატურა და რძის გადასამუშავებელი უახლესი ინვენტარი. XIX—XX სს-ის მიჯნაზე რამდენიმე მსხვილ მეურნეობაში ელექტროენერგიას იყენებდნენ, 10-იან წლებში გამოჩნდა ტრაქტორიც, მაგრამ ახალი ტექნიკა ზელმისაწვდომი იყო მხოლოდ მემამულეების, ვაჭარ-მრეწველებისა და შეძლებული გლეხებისათვის. წვრილ მეურნეობებში კი პრიმიტიულ ინვენტარს იყენებდნენ.

საქართველოს სოფლის მეურნეობის სხვადასხვა დარგს შორის ყველაზე მეტი იყო მარცვლეული კულტურების ხვედრითი წონა. რეფორმის მომდევნო ხანაში ყანების ფართობი თანდათან იზრდებოდა ტყეებისა და სათიბ-საძოვრების ხარჯზე. აღმოსავლეთ საქართველოში წამყვანი კულტურები იყო პური და ქერი. მეტ-ნაკლები რაოდენობით ითესებოდა აგრეთვე სიმინდი, შვრია, ჭვავი, ლობიო, ფეტვი, ასლი, ბრინჯი და სხვ., დასავლეთ საქართველოში სახნავ-სათესი მიწის უდიდესი ნაწილი ეკავა სიმინდს, რომელიც თითქმის მონოკულტურას წარმოადგენდა გურია-სამეგრელო-



დიდი გუთანი.

აფხაზეთში და ნაწილობრივ ქვემო იმერეთში. სიმინდის ყანებში ჩვეულებრივ ლობიოც ითესებოდა. პურსა და ქერს შედარებით მეტი ფართობი ეკავა რაჭა-ლეჩხუმ-სვანეთსა და ზემო იმერეთში.

XIX ს-ის 70—80-იანი წლების მასალებში მითითებული არ არის მარცვლეულის ნათესთა ფართობზე და სტატისტიკური ცნობები მოსავლიანობის შესახებ არაზუსტია, მაგრამ მაინც ჩანს, რომ მარცვლეული მეურნეობის პროდუქცია თანდათან იზრდებოდა სახნავ-სათესი მიწების გაფართოების შედეგად. რაც შეეხება შრომის ნაყოფიერებას ამ დარგში, მეურნეობათა უმეტესობაში იგი არა თუ იზრდებოდა, არამედ მიწის არაწესიერი ექსპლოატაციის გამო, შემცირების ტენდენციასაც კი ამჟღავნებდა.

1874 წ. აღმოსავლეთ საქართველოში ყველა სახის მარცვლეულის მოსავალი უდრიდა 11 მილიონს, ხოლო დასავლეთ საქართველოში — 14 მილიონ ფუტს¹.

XIX ს-ის 90-იან წლებში ნათესების ფართობი საქართველოში 600—700 ათას დესეტინას უდრიდა. 1892 წ. მარცვლეულის მოსავალმა შეადგინა 40 მლნ ფუთი, საიდანაც პური იყო 14 მილიონი, სიმინდი — 16 მილიონი, ქერი — 5 მილიონი ფუთი და სხვ.²

¹ ЦГИА СССР. ф. 1268, оп. 20, д. 146, лл. 131, 154.

² Сборник статистических сведений по Закавказскому Краю, под ред. Е. К. Ондраченко, ч. I, 1902, гл. 168—169.

მარცვლეულის მეურნეობის საქონლიანობა თანდათან იზრდებოდა. აღმოსავლეთ საქართველო ბაზარს ძირითადად პურსა და ქერს აწოდებდა, დასავლეთ საქართველო — სიმინდს. სასაქონლო ჭროდუქციის ნაწილა უცხოეთშიც იგზავნებოდა.

აღმოსავლეთ საქართველოდან დასავლეთ ევროპაში გატანილ იქნა პური და ქერი: 1885 წ. — 506 526 ფ., 1886 წ. — 1,161 378 ფ., 1887 წ. — 589 859 ფუთი¹. მომდევნო ხანაში პურისა და ქერის ექსპორტი თითქმის მთლიანად შეწყდა, რადგან ქართული წარმოების ამ სახის მარცვლეული უკვე ადგილობრივი ბაზრის მოთხოვნილებასაც კი ვერ აკმაყოფილებდა. სასაქონლო პროდუქციის საკმაო ნაწილი თვით სოფლებშივე იყიდებოდა და ამიტომ სავაჭრო ოპერაციების სტატისტიკაში არ ხვდებოდა. აღირიცხებოდა თითქმის მხოლოდ რკინიგზაზე მოხვედრილი და ქალაქებში გატახილი პური. 1896 წელს, მაგალითად, აღმოსავლეთ საქართველოს მოსახლეობამ ქალაქებსა და დაბებში გაიტანა 2,2 მლნ ფუთი მარცვლეული². სულ კი აღმოსავლეთ საქართველოს საქონელმწარმოებელი მოსახლეობა ბაზრებს ყოველწლიურად აწოდებდა 3—4 მლნ ფუთ მარცვლეულს, რაც შეადგენდა მთელი პროდუქციის 15—20%-ს.

უფრო მკვეთრად გამოხატული სავაჭრო ხასიათი მიიღო მარცვლეულის მეურნეობამ, კერძოდ, მესიმინდობამ დასავლეთ საქართველოში. დაბლობ ზონაში წარმოებულ სიმინდის მნიშვნელოვან ნაწილს მთის მოსახლეობა ყიდულობდა, პროდუქციის უფრო დიდი ნაწილი კი საზღვარგარეთ გადიოდა. 1862 წ. გატანილ იქნა 1 მლნ ფუთი. XIX ს-ის 80-იან წლებში კი დასავლეთ საქართველო დასავლეთ ევროპის ბაზრებს ყოველწლიურად აწოდებდა 5—6 მლნ ფუთ სიმინდს, მთელი პროდუქციის 30—35%-ს. სიმინდის ფასი საკმაოდ მაღალი იყო—70 კაპ. ფუთზე. სიმინდის გაყიდვა წარმოადგენდა დასავლეთ საქართველოს ბარის მოსახლეობის ფულადი შემოსავლის მთავარ წყაროს ამ პერიოდში³.

XIX—XX სს-ის მიჯნაზე აგრარული კრიზისისა და საკონკურენტო ბრძოლის გამწვავების გამო, სიმინდის ფასი 40—50 კაპიკამდე დაეცა. სიმინდის მეურნეობას, მართალია, არ დაუკარგავს სავაჭრო ხასიათი, მაგრამ მისი საქონლიანობა რამდენადმე შემცირდა.

რეფორმის მომდევნო ხანის საქართველოში სასაქონლო მარცვლეულის ძირითად ნაწილს მემამულური და კულაკური მეურნეობები იძლეოდა. ღარიბ გლეხობას კი არა თუ გარდამეტი პროდუქტი გააჩნდა, არამედ თვითონ იყო მარცვლეულის მყიდველ-მოძიებელი.

ბაზრის არახელსაყრელმა კონიუნქტურამ (ამერიკული პროდუქციის კონკურენცია დასავლეთ ევროპაში და რუსული პურის კონკურენცია

¹ СМІЭБГКЗК, т. IV, ч. 2, გვ. 425—427.

² Обзор Тифлисской губернии за 1896, გვ. 9.

³ სსცა, ფ. 12, ან.წ. 6, საქ. 4, ფურც. 14—15.

შინაგან ბაზარზე) უდავოდ შეაფერხა საქართველოში მარცვლეულის საქონლიანობის შემდგომი ზრდისა და ამ დარგში კაპიტალისტური მეურნეობების აღმოცენება-გამრავლების პროცესი. პურის (ნაწილობრივ სიმინდისა) წარმოება ბაზრისათვის აღარ იყო ხელსაყრელი და შედარებით მსხვილი მეურნეობები თანდათან ამცირებდნენ ნათესების ფართობს. ისინი გადადიოდნენ სოფლის მეურნეობის სხვა უფრო რენტაბელურ დარგებზე, რომელთა განვითარებისათვის საქართველოში უკეთესი პირობები არსებობდა და რომელთა პროდუქციაზე მეტ მოთხოვნილებას აყენებდა რუსეთის ბაზარი.

საქართველოს მოსახლეობის მნიშვნელოვანი ნაწილისათვის მევენახეობა-მელვინეობას ძველთაგანვე დიდი მნიშვნელობა ჰქონდა. დაყენებული ღვინის საკმაო ნაწილი შუა საუკუნეებშიც გადიოდა ბაზარზე, მაგრამ სოფლის მეურნეობის ამ დარგმა სავაჭრო ხასიათი მიიღო XIX საუკუნეში.

XIX ს-ის 40—50-იან წლებში საქართველოს მევენახეობის ერთ-ერთი მნიშვნელოვანი რაიონი იყო გურია-სამეგრელო. ეს მხარე წარმოადგენდა მაღლარი ვენახის ერთიან ბაღს, სადაც ვაზები გადახლართული იყო ერთი ზიდან მეორეზე. მაღლარი ვენახის ფართობის დადგენა, საერთოდ, ძალიან ძნელია. მაგრამ მასალებიდან ჩანს, რომ გურია-სამეგრელოში XIX ს-ის შუა წლებისათვის აყენებდნენ 2 მილიონამდე ვედრო ღვინოს და პროდუქციის მნიშვნელოვანი ნაწილი, ჩხავერის და ოჯალეშის მაღალხარისხოვანი ღვინოები სხვა მხარეებშიც გაჰქონდათ გასაყიდად.

მეფის მთავრობა, რომელიც დაინტერესებული იყო საქართველოში მევენახეობა-მელვინეობის განვითარებით, ეჭვქვეშ აყენებდა ადგილობრივი მოსახლეობის სამეურნეო უნარს და იწუნებდა ვაზის ქართულ ჯიშებსაც. მეფისნაცვალ ვორონცოვის მითითებით საქართველოში შემოჰქონდათ ვაზის ევროპული ჯიშები. მაგრამ ამის საჭიროება არ არსებობდა, რადგან ვაზის ადგილობრივი ჯიშები, როგორც რუსეთის იმპერიის მელვინეობის ოფიციალური მკვლევარი მ. ბალასიც აღიარებს, უკეთესი ხარისხისა იყო უცხოურზე.

უცხოურის წინაშე ცარიზმის ბიუროკრატის ამ მონურმა ქედმოხრილობამ კი საქართველოს მევენახეობას დიდი ზარალი მიაყენა. სწორედ ყირიმისა და შემოტანილ ევროპულ ჯიშებს შემოჰყვა XIX ს-ის 50-იან წლებში ვაზის ავადმყოფობა ოიდიუმი (ობი), უფრო გვიან მილდიუ (ნაცარა) და ფილოქსერაც.

გურია-სამეგრელოში, ხელშემწყობი პირობების წყალობით (სინესტე და სითბო ერთდროულად), ოიდიუმი ძალიან სწრაფად გავრცელდა. მაღლარი ვენახის მკურნალობა შეუძლებელი გახდა და მოსავლიანობა დიდად შემცირდა. თითქმის მთლიანად განადგურდა ძველი კარგი ჯიშები ოჯალე-

ში და ჩხავერი, რომელთა ადგილი თანდათან დაიკავა გაცილებით მდარე იზაბელამ. მეღვინეობის მნიშვნელობამ გურია-სამეგრელოს მოსახლეობის ეკონომიურ ცხოვრებაში უკანასკნელ ადგილზე გადაინაცვლა. სოკოვანმა დაავადებებმა გარკვეული ზარალი მიაყენა იმერეთისა და რაჭა-ლეჩხუმის მევენახეობასაც, მაგრამ ამ სენის გავრცელების მომენტში იქ უკვე სჭარბობდა დაბლარი ვაზის კულტურა და მოსახლეობამ მოახერხა მისი გადარჩენა.

XIX ს-ის 70-იან წლებში ვენახების ფართობი დასავლეთ საქართველოში (აჭარა-აფხაზეთის გამოკლებით) უდრიდა 38 144 დესეტინას. აქედან იმერეთში იყო 19 570 დეს. ლეჩხუმში — 1800 დეს. რაჭაში — 1274 დეს. გურია-სამეგრელოში — 15 500 დესეტინა. იმერეთში წლიურად აყენებდნენ საშუალოდ 1 907 000, რაჭა-ლეჩხუმში — 767 800, გურია-სამეგრელოში — 250 100 ვედრო ღვინოს¹. 1878 წელს ქუთაისის გუბერნატორი წერდა, რომ მევენახეობა-მეღვინეობა გურია-სამეგრელოში დაცემულია, ხოლო იმერეთსა და რაჭა-ლეჩხუმში ეს დარგი საკმაოდ სწრაფად ვითარდება².

საქართველოს მევენახეობა-მეღვინეობის ყველაზე მნიშვნელოვანი რაიონი კახეთი იყო. რეფორმის მომდევნო ხანაში ამ დარგის აღმავლობა შეიმჩნეოდა ქართლშიც. 70-იან წლებში ვენახების ფართობი შეადგენდა: შიდა კახეთში 12 ათას დეს., გარე კახეთსა და ქართლში — 6 252 დესეტინას. აღმოსავლეთ საქართველოში წლიურად საშუალოდ აყენებდნენ 2 500 000 ვედრო ღვინოს³.

XIX ს-ის 70—90-იან წლებში მევენახეობა-მეღვინეობის გეოგრაფიულ გაადგილებაში გარკვეული ცვლილებები ხდებოდა. ვაზის ავადმყოფობამ ეს დარგი დასცა გურია-სამეგრელოში. იმერეთსა და ქართლში მევენახეობა-მეღვინეობის აღმავლობას ხელი შეუწყო რკინიგზამ. ღვინის გადაზიდვის ხარჯების შემცირებამ იმერელ და ქართლელ მეღვინეებს საშუალება მისცა გასულიყვნენ ახალ ბაზრებზე და წარმატებით გაეწიათ კონკურენცია კახელებისათვის. კახეთი დიდხანს ამიერკავკასიის რკინიგზის მაგისტრალს მიღმა რჩებოდა და საურმე გზებიც არ ჰქონდა კეთილმოწყობილი. გადაზიდვის ხარჯები მნიშვნელოვნად აღიძვებდა კახური ღვინის თვითღირებულებას და ამცირებდა მის კონკურენტუნარიანობას.

მევენახეობა-მეღვინეობაში მასობრივად იყო ჩაბმული საქართველოს მოსახლეობის ყველა სოციალური ფენა. 1898 წლის ცნობით საქართველოში 120 347 მეურნეობა ფლობდა 46 497 დეს. ვენახს⁴. მეღვინეობის

¹ М. Б а л а с, Виноделие в России, ч. 1—2, С.-П., 1895, გვ. 158.

² ЦГИА СССР, ф. 1268, оп. 24, д. 231. л. 75.

³ М. Б а л а с, Виноделие в России, ч. III, გვ. 31.

⁴ ООП, за 1901 г. გვ. 149—153.

წლიური პროდუქცია 5—6 მლნ ვედროს შეადგენდა. მართალია, XIX — XX სს-ის მიჯნაზე მევენახეობას დიდი ზარალი მიაყენა ფილოქსერამ, მაგრამ კრიზისი ძალე იქნა დაძლეული და მომდევნო პერიოდში მევენახეობა-მეღვინეობამ განვითარების უფრო მაღალ დონეს მიაღწია.

საქართველოს მევენახეობა-მეღვინეობის საქონლიანობა ბურჟუაზიული რეფორმების წინ 30—40%-ს შეადგენდა. XIX ს-ის 80—90-იან წლებში კი 55—60%-ს მიაღწია. 1894 წელს, რამდენადმე გადაჭარბებული მონაცემებით, ბაზარზე გავიდა: დასავლეთ საქართველოდან 2 362 000 ვედრო, შიდა ქართლიდან — 660 000, თბილის-ბორჩალოს ბაზრებიდან — 590 000, კახეთიდან — 1 500 000 ვედრო ღვინო. საქართველოსა და ამიერკავკასიის მეღვინეობის სასაქონლო პროდუქციის ნაწილი რუსეთში იგზავნებოდა. 1883—1893 წწ. საშუალოდ ყოველწლიურად რუსეთში გადიოდა 400—500 ათასი ვედრო ღვინო¹, მომდევნო ათწლეულში კი რუსეთის ბაზრებზე ღვინის საშუალო წლიურმა გატანამ 1 მლნ ვედროს გადააჭარბა.

საქართველოს მთიან ზონაში მეცხოველეობა სოფლის მეურნეობის წამყვანი დარგი იყო. მთის ძირისა და ბარის რაიონებში კი მას დამხმარე მნიშვნელობა ჰქონდა.

იმდროინდელ დამკვირვებელთა გადმოცემით, მეცხოველეობის ყველაზე დიდი ნაკლი, მისი მცირეპროდუქტულობის მიზეზი ის იყო, რომ მოსახლეობის უმეტესი ნაწილი ვერ ახერხებდა შინაური პირუტყვისათვის მტკიცე საკვები ბაზის შექმნას. XIX—XX სს-ის მიჯნაზე სათიბების ფართობი 100 ათას დესეტინას არ აღემატებოდა, საიდანაც წლიურად საშუალოდ ღებულობდნენ 12—13 მლნ ფუთ თივას. პირუტყვის საკვებად იყენებდნენ აგრეთვე მარცვლეული მეურნეობის ნარჩენებს — 60 მილიონამდე ფუთ ჩალა-ბზეს. საფურაჟედ გამოიყენებოდა ქერისა და სიმინდის ნაწილიც. მაგრამ, როგორც ჩანს, საერთოდ შინაური პირუტყვი არასაკმარისად მარჯვდებოდა საზამთრო საკვებით. ამიტომ მეცხოველეობას ფართო მასშტაბით მიმართავდნენ იმ რაიონების მცხოვრებნი, რომელთაც საშუალება ჰქონდათ საზაფხულოსთან ერთად საზამთრო საძოვრებიც გამოეყენებინათ.

XIX — XX სს-ის მიჯნაზე საქართველოს საზაფხულო საძოვრების ფართობი 1 125 000 დეს. უდრიდა, საზამთროსი კი 405 000 დესეტინას. იმის გამო, რომ საძოვრები არათანაბრად იყო განაწილებული სხვადასხვა რაიონებს შორის და ძირითადად მდებარეობდა ნაკლებ დასახლებულ მთებსა და ველებზე, მოსახლეობის მნიშვნელოვანი ნაწილი ამ სავარგულით ვერ სარგებლობდა. მეცხოველეობის განვითარების მაღალი დონით გამოირჩეოდა თიანეთის, დუშეთის, ბორჩალოს, სიღნაღის და ახალქალაქის მაზრები, მთა რაჭა, სვანეთი, აფხაზეთი და აჭარა.

XIX ს-ის 70-იან წლებში საქართველოში ითვლებოდა 2,5—3 მილიონამდე სული საქონელი (ცხენი, კამეჩი, ხარი, ძროხა, უშობელი, ცხვარი, თხა, ღორი და სხვ.). 90-იან წლებში კი ყოველწლიურად საშუალოდ აღირიცხებოდა 3,5—4 მლნ სული. სტატისტიკაზე დაკვირვება გვიჩვენებს, რომ ძირითად სამიწათმოქმედო რაიონებში, სადაც მეცხოველეობას დამხმარე მნიშვნელობა ჰქონდა, საქონლის სულადობა მცირდებოდა, მეცხოველეობის სპეციალიზებულ რაიონებში კი, პირიქით, იზრდებოდა.

მეცხოველეობის სასაქონლო პროდუქცია ძირითადად შინაგან ბაზრებზე საღებოდა. მატყლის მნიშვნელოვანი ნაწილი საზღვარგარეთაც გადიოდა. XIX ს-ის 90-იან წლებში მართო ბორჩალოს მაზრის მოსახლეობას შინაურ თუ საგარეო ბაზრებზე ყოველწლიურად გაჰქონდა: 15 ათასი სული მსხვილფეხა რქოსანი საქონელი, 30 ათასი ცხვარი, 15 ათასი ღორი, 90 ათასი ფ. მატყლი, 100 ათასი ცალი დაუმუშავებელი ტყავი, 10 ათასი ფ. შვეიცარიული ყველი და სხვ.¹ ასევე დიდი რაოდენობით იძლეოდნენ სასაქონლო პროდუქციას თიანეთის, დუშეთის, სიღნაღის, ახალქალაქის და სხვ. მაზრები.

დასავლეთ საქართველოს ბარი გამოირჩეოდა მაღალგანვითარებულ მეფრინველეობით. იგი იძლეოდა ამიერკავკასიის მეფრინველეობის სასაქონლო პროდუქციის 60%-ს. XIX—XX სს-ის მიჯნაზე დასავლეთ საქართველოს მოსახლეობას ყოველწლიურად ბაზარზე გაჰქონდა 2,5 მლნ მანეთის ფრინველი და კვერცხი. აქედან 1,2 მლნ მანეთის კვერცხი იგზავნებოდა დასავლეთ ევროპის დიდ ქალაქებში.

მეაბრეშუმეობა საქართველოს სახალხო მეურნეობის ერთ-ერთი ძველი დარგია და იგი იმთავითვე გამოირჩეოდა შედარებით მაღალი საქონლიანობით. XIX ს-ის 70-იანი წლებიდან აბრეშუმის ქსოვილების შინამრეწველური წარმოება, ფაბრიკული ნაწარმის კონკურენციის გამო, ეცემა, ამის შემდეგ მეაბრეშუმეებს ძაფისა და ქსოვილების ნაცვლად პარკი გაჰქონდათ ბაზარზე. XX ს-ის 80-იან წლებში დასავლეთ საქართველოში მეაბრეშუმეობას ეწეოდა 14 ათასი კომლი გლეხი. შედარებით ნაკლები იყო მეაბრეშუმე კომლთა რიცხვი აღმოსავლეთ საქართველოში. 90-იან წლებში საქართველოს მეაბრეშუმეებს ყოველწლიურად გამოყავდათ 40—60 ათასი ფუთი აბრეშუმის პარკი. მომდევნო ათწლეულში პარკის წარმოება გაასმაგდა. აბრეშუმის მთელი პროდუქცია ბაზარზე გადიოდა.

XIX ს-ის 60-იანი წლებისათვის საქართველოში მეთამბაქოეობა ჩანასახ მდგომარეობაში იყო. დამზადებული პროდუქციის უმნიშვნელო ნაწილი გადიოდა ბაზარზე. აღმავლობა იწყება 1877 წლიდან, მას შემდეგ, რაც ამიერკავკასიაზე გავრცელდა საიმპორტო თამბაქოზე დადებული საიმპე-

¹ РТКЭЖДЭКО, გვ. 112—185.

რიო ბაჟი (ფუთზე 14 მანეთი). საქართველოს მეთამბაქოეობა კონკურენციის გარეშე აღმოჩნდა, რამაც გახაპირობა ამ დარგის სწრაფი განვითარება.

XIX ს-ის 70—80-იან წლებში მეთამბაქოეობის წამყვანი რაიონები იყო კახეთი, იმერეთი და გურია. მომდევნო პერიოდში დაწინაურდა აფხაზეთი, რომელმაც პირველი ადგილი დაიკავა ამიერკავკასიაში. XIX ს-ის 80-იან წლებში თამბაქოს პლანტაციებს საქართველოში საშუალოდ ყოველწლიურად ეკავა 1400 დეს., საიდანაც იღებდნენ 60—100 ათას ფუთ თამბაქოს. 90-იან წლებში პლანტაციების ფართობი 2—3 ათას დესეტინამდე, ხოლო პროდუქცია 200—300 ათას ფუთამდე გაიზარდა. XIX—XX სს-ის მიჯნაზე საქართველოს მეთამბაქოეობის საშუალო წლიური პროდუქციის ღირებულება 4 მლნ მანეთს შეადგენდა. ქართული თამბაქოს 15—20% ადგილობრივ ფაბრიკებში მუშავდებოდა, დანარჩენი კი რუსეთში და საზღვარგარეთ გადიოდა.

ბამბის კულტურას საქართველოში დიდი ხნის ისტორია აქვს, მაგრამ ბამბის პლანტაციების ფართობი მკვეთრად გაიზარდა XIX ს-ის 60-იანი წლების დამდეგს, როცა სამოქალაქო ომმა შეაფერხა ბამბის იმპორტი აშერიკიდან. იმ დროს მებამბეობას თითქმის მხოლოდ იმერეთში მისდევდნენ. 1859 წელს მიღებულ იქნა 3 ათასი, 1863 წ. — 10 ათასი, 1864 წ. კი — 50 ათასი ფუთი ბამბა. შემდეგ, ამერიკული პროდუქციის კონკურენციის წყალობით მებამბეობა იმერეთში დაეცა. XIX ს-ის 80—90-იან წლებში წლიურად ღებულობდნენ მხოლოდ 8—12 ათას ფუთ ბამბას, რაც თითქმის მთლიანად რუსეთში გადიოდა.

XIX ს-ის 70-იანი წლებიდან თანდათან ფართოვდება და უფრო მკვეთრად გამოხატულ სავაჭრო ხასიათს ღებულობს მებოსტნეობა და მეხილეობა. საქართველოს სუბტროპიკულ რაიონებში ინერგება ახალი კულტურები (ჩაი, რამი, ბამბუკი, ციტრუსები და სხვ.). რომელთა მეურნეობები იმთავითვე კაპიტალისტურ ყაიდაზე ეწყობოდა. XIX ს-ის 90-იან წლებში ხილის ბაღებს 11—12 ათასი დესეტინა, ბოსტნებს (კარტოფილთან ერთად) კი 10 ათას დესეტინამდე ფართობი ეკავა. მებოსტნეობა-მეხილეობა საშუალოდ ყოველწლიურად იძლეოდა 5 მლნ მანეთის პროდუქციას, ბაზარზე გადიოდა დაახლოებით 3 მლნ მანეთის ხილ-ბოსტნეული.

ამრიგად, XIX ს-ის ბოლოსათვის საქართველოს სოფლის მეურნეობაში ჯერ კიდევ ყველაზე მეტი იყო მარცვლეული მეურნეობის ხვედრითი წონა. შემდეგ სოფლის მოსახლეობის ეკონომიურ ცხოვრებაში მეტი მნიშვნელობა ჰქონდა თანმიმდევრობით მეცხოველეობას, მევენახეობა-მელვინეობას, მეთამბაქოეობას, მეხილეობა-მებოსტნეობას, მებამბეობას და სხვ. დარგებს. სოფლის მეურნეობის მთელი შემოსავალი 75—80 მლნ

მანეთს უდრიდა. საქართველოს სოფლის ძირითადი მწარმოებელი ძალა გლეხობა იყო. გლეხურ მეურნეობათა წილად მოდიოდა დაახლოებით მარცვლეულის ნათესთა 70%, შინაური პირუტყვის — 80%; ბალ-ვენახე-ბის — 70%, თამბაქოსა და ბამბის პლანტაციების — 50%, გლეხური მეურნეობა (კულაკურის ჩათვლით) იძლეოდა სოფლის მეურნეობის მთელი შემოსავლის დაახლოებით 65%-ს. მაგრამ იმის გამო, რომ ჩვენი გლეხობა მნიშვნელოვანწილად სანადელო და საიჯარო მიწებს ამუშავებდა და მიწის რენტას იხდიდა, მის ხელში რჩებოდა მხოლოდ პროდუქციის 45%. გლეხთა შრომა-ხარჯით შექმნილი ღირებულების მნიშვნელოვანი ნაწილი მიწათმფლობელთა ხელში გადადიოდა.

* * *

რეფორმის მომდევნო ხანის საქართველოში, როგორც ვნახეთ, სოფლის მეურნეობის და შინამრეწველობის უმეტესი დარგების (მევენახეობა, მეღვინეობა, სპირტის წარმოება, მეთამბაქოეობა, მეცხოველეობა, მებოსტნეობა-მეხილეობა და სხვ.) საქონლიანობა აღწევდა კაპიტალიზმისათვის დამახასიათებელ მაღალ დონეს, მარცვლეულის მეურნეობის საქონლიანობა კი უახლოვდებოდა მას.

სავაჭრო მიწათმოქმედების განვითარებისა და დარგობრივი სპეციალიზაციის გაღრმავების პარალელურად ფართოვდებოდა შინაგანი ბაზარი. იზრდებოდა როგორც საშინაო, ისე საგარეო ვაჭრობის ბრუნვა. საქონელწარმოებისა და მიმოქცევის პროცესში მეტ-ნაკლებად საქართველოს ყველა რაიონი მონაწილეობდა, შინაგანი და მსოფლიო ბაზრის ვრცელ ყულაბაში ძირითადად თავისი მეურნეობისათვის სპეციფიკურად დამახასიათებელ საქონელს უშვებდნენ.

საქართველოს შთიანი ზონის რაიონები ბაზრებს აწოდებდა მესაქონლეობის პროდუქტებს, კახეთი — ძირითადად ღვინოს, ქართლი — მარცვლეულსა და ხილბოსტნეულს, იმერეთი — ღვინოსა და აბრეშუმს, გურია-სამეგრელო — სიმინდს, აბრეშუმსა და მეფრინველეობის პროდუქტებს, აფხაზეთი — თამბაქოსა და სიმინდს. დარგობრივი სპეციალიზაციის გაღრმავების პირობებში თანდათან ფართოვდებოდა საქონელმიმოქცევა სხვადასხვა სასოფლო-სამეურნეო რაიონებს შორის, მაგრამ სოფლის მეურნეობის სასაქონლო პროდუქციის მთავარი მომხმარებელი ჩვენი ქალაქები და მრეწველობა იყო. ღვინო, თამბაქო, აბრეშუმი, მატყლი, ხილბოსტნეული და სხვ. თანდათან მზარდი რაოდენობით გადიოდა რუსეთში და საზღვარგარეთაც.



ღვინის წარმოების ეტიკეტები.

XIX ს-ის ბოლოს საქართველოს სოფლის მეურნეობა ყოველწლიურად შინაგან და საგარეო ბაზრებს აწოდებდა 3—4 მლნ მანეთის მარცვლეულს, 8—10 მლნ მანეთის ღვინოს, 1 მლნ მანეთის სპირტს, 9—10 მლნ მანეთის მესაქონლეობისა და მეფრინველეობის პროდუქტებს, 1—1,2 მლნ მანეთის აბრეშუმს, 3 მლნ მანეთის თამბაქოს, 2—3 მლნ მანეთის ხილბოსტნეულს და სხვ.

საქონელწარმოებისა და მიმოქცევის გაფართოების პირობებში თანდათან იზრდებოდა და მნიშვნელოვანწილად სოფლის მოსახლეობიდან ივსებოდა ვაჭართა ფენა, რომელიც თავის სამოქმედო ასპარეზად იხდიდა შინაგანი ვაჭრობის ძველ და ახლად აღმოცენებულ პუნქტებს. იმის გამო, რომ წვრილი საქონლური წარმოება საკმაო მასშტაბისა იყო, საქართველოში არაეკვივალენტური, მნიშვნელოვანწილად მოტყუებაზე დამყარებული ვაჭრობა კაპიტალიზმის გამარჯვების შემდეგაც შემორჩა. საქართველოს გუბერნატორებისა და მაზრის უფროსთა ანგარიშებში, სხვადასხვა გამოკვლევასა და პრესის კორესპონდენტთა წერილებში ლაპარაკია იმის შესახებ, რომ სოფლის მეურნეობის პროდუქტთა რეალიზაციით მდიდრდებოდნენ ვაჭარ-შემსყიდველები და ნაკლებ სარგებლობას პოულობდნენ მწარმოებლები.

სავაჭრო და სავაზშო კაპიტალი ერთმანეთზე იყო გადახლართული. ვაჭართა დიდი ნაწილი მევახშეობასაც ეწეოდა და სავაჭრო მოგებასთან ერთად პროცენტსაც იჯიბავდა. სავაჭრო და სავაზშო კაპიტალის ქსელში

ებმებოდა არა მარტო წერილი გლახობა, არამედ თავად-აზნაურთა უმეტესობაც. ძხოლოდ კულაკები, პრივილეგიური და არაპრივილეგიური წარმოშობის რაციონალიზატორი მემამულეები ახერხებდნენ საკუთარ ფეხზე მტკიცედ დგომას. მათთან მიმართებაში სავაჭრო კაპიტალს დაკარგული ჰქონდა დამოუკიდებელი არსებობა-განვითარების უნარი, გადაქცეული იყო საწარმოო კაპიტალის აგენტად, ასრულებდა მიმოქცევის დამჩქარებლის ფუნქციას. რაციონალიზატორი მემამულეები ზოგჯერ თვით გამოდიოდნენ ვაჭრობის ორგანიზატორებად. XIX ს-ის 80—90-იან წლებში მსხვილი სავაჭრო ფირმები ჰქონდათ ჯორჯაძეს, მუხრან-ბატონს, ვაჩნაძეს, ანდრონიკაშვილს, შერემეტეევს, საუფლისწულო უწყებას, ანანოვს, ფრიდონოვს და სხვ.

წერილი მწარმოებლები უკვე ვეღარ ახერხებდნენ ბაზარზე დამოუკიდებლად გასვლას და თანდათან მწვავედ გრძობდნენ ვაჭარ-მეევანშეთა დამარღვეველი მოქმედების შედეგებს. პროგრესულ საზოგადო მოღვაწეთა დიდი უმრავლესობა უკვე XIX ს-ის 60—70-იან წლებში იმ აზრის იყო, რომ ვაჭარ-მეევანშეთა მოქმედების პარალიზება უნდა მოეხდინა საზოგადოებრივ სასურსათო მალაზიებს ან მის შემცვლელ სასოფლო-სამეურნეო კაპიტალის ფონდებს, სავაჭრო-გამსაღებელ და ფულის შემნახველ-გამსესხებელ ამხანაგობებს.

1882 წ. მარტო აღმოსავლეთ საქართველოში 618 სოფელს ჰქონდა სასურსათო (პურეულის) საწყობი თუ მალაზია, რომლებშიც 345 ათასი ფუთი მარცვლეული ინახებოდა. სასურსათო მალაზია ურთიერთდამხმარე კოოპერაციის დაბალი ფორმა იყო, მაგრამ მან ვერ გაამართლა მოსახლეობის იმედი. მალე გლახობამ უპირატესობა მიანიჭა სასოფლო-სამეურნეო და კაპიტალის ფონდის შექმნას. 1900 წლისათვის ამ ფონდში 1 400 000 მან. ირიცხებოდა¹. გლახთა სასოფლო-სამეურნეო კაპიტალს, რომელიც სახელმწიფო საკრედიტო დაწესებულებებში ინახავოდა, მთავრობა აბრუნებდა, მშრომელი მოსახლეობა კი თავის დანაზოგით თითქმის ვერ სარგებლობდა.

1866 წ. სოფ. ძღუეთში (ღუშეთის მაზრა) გაიხსნა ფულის შემნახველ-გამსესხებელი პირველი ამხანაგობა. 70—80-იან წლებში სამიოდე ათეული ასეთივე ამხანაგობა დაარსდა. მართალია, ამ ამხანაგობათა უმეტესობა, საბრუნავი თანხების სიმცირის გამო, მეტად დღენაკლული აღმოჩნდა, მაგრამ 90-იან წლებში ერთი დახურულის ადგილზე ორი ახალი ამხანაგობა ჩნდებოდა. 1900 წლისათვის მარტო დასავლეთ საქართველოში ითვლებოდა ფულის შემნახველ-გამსესხებელი 24 ამხანაგობა, რომლებშიც გაერთიანებული იყო 3 ათასი კომლი. 20 ამხანაგობის ანგარიშებიდან

¹ Обзор Тифлисской губернии за 1899 г., гл. 9; სსცია, ფ. 12, საქ. 629, ფურც. 6.

ჩანს, რომ მათი საპაიო კაპიტალი უდრიდა 112 722 მან. სესხად გაცემული თანხა — 106 003 მან. სათადარიგო კაპიტალი 11 377 მან., წლიური სუფთა მოგება 15 392 მანეთს¹.

საბრუნავი თანხების სიმცირეს მწვავედ განიცდიდნენ აღმოსავლეთ საქართველოს ამხანაგობები. სოფლის მეურნეობის საჭიროებათა გამოძკვლევი თბილისის საგუბერნიო კომიტეტი 1902 წელს წერდა, რომ XIX ს-ის 70-იან წლებში დაარსებული 15 ამხანაგობიდან ამჟამად არც ერთი არ მოქმედებს, რის მიზეზიც სახსრების სიმცირეაო. კომიტეტი იმასაც აღნიშნავდა, რომ მთავრობის მხრიდან მცირე დახმარება საქმეს ვერ უშველისო. მაგალითად, სოფ. შაშინის 276 გლეხს კომლზე საშუალოდ აქვს 250 მან. ვალი. ამ სოფელში დაარსებულ ამხანაგობას კი შეუძლია კომლს წლიურად მხოლოდ 50 მანეთი ასესხოს, რაც მევენაშური ვალის წლიურ სარგებელსაც ვერ დაფარავს და გლეხს წარმოების გასაუმჯობესებლად არაფერი დარჩებაო. საქმის წარმატების აუცილებელ წინაპირობად კომიტეტს მიაჩნდა სახალხო კრედიტის ისეთი ორგანოს დაარსება, რომელიც უზრუნველყოფილი იქნებოდა საკმაო თანხით და მცოდნე ადამიანებით. სასურველია ეს ორგანო ჩამოყალიბდეს სახელმწიფო შემნახველი სალაროს პროვინციული განყოფილების სახით. დროა ხალხის დანაზოგი ნაწილობრივ მაინც დაეუბრუნოთ იმავე ხალხსო. კომიტეტს გადაუდებელ საქმედ მიაჩნდა აგრეთვე სავაჭრო-გამსაღებელი კოოპერატივების დაარსება და მათთვის ხელის შეწყობა², მაგრამ მთავრობას ხალხის დასახმარებლად არსებითად არაფერი გაუკეთებია.

XIX ს-ის ბოლოს, საკრედიტო ამხანაგობებთან ერთად საკმაოდ წარმატებით საქმიანობდა რამდენიმე სავაჭრო-გამსაღებელი საზოგადოებაც (თუშთა ამხანაგობა, „ქიზიყის დეპო“, „ქუთაისის გუბერნიის მეაბრეშუმეთა პირველი ამხანაგობა“, „კოლხიდა“, „შუამავალი“ და სხვ.), მაგრამ მათ არსებითი ცვლილება არ შეუტანიათ ვაჭრობისა და კრედიტის ორგანიზაციაში. წვრილ მწარმოებელთა უდიდესი უმრავლესობა კვლავ ვაჭარმევაწვეების ქსელში იყო გაბმული.

ქართველ საზოგადო მოღვაწეთა ერთი ნაწილი კოოპერატიულ. გაერთიანებებს სოციალისტური ტიპის დაწესებულებებად თვლიდა, რომელთა საქმიანობა მიმართული უნდა ყოფილიყო კაპიტალისტური განვითარების ტეხდენციის წინააღმდეგ, მაგრამ საქართველოში არსებულ ამხანაგობათა საქმიანობის ანალიზი ცხადყოფს, რომ იმდროინდელ კოოპერატივებში არაფერი იყო სოციალისტური და მათი წარმოშობა მოასწავებდა მხოლოდ

¹ ЦГИА СССР, ф. 1223, оп. 1, д. 159, л. 20. ЦГИА СССР, ф. 1233, оп. 2, д. 159, л. 20.

² ТМКОНСХП, II. зб. 477—479.

ვაჭრობა-კრედიტის ახალი ევროპული, ძირითადად კაპიტალისტური ფორმების დანერგვას, რაც თავისთავად ქვეყნის პროგრესული განვითარების გზაზე წინგადადგმული ნაბიჯი იყო. კოოპერაციულ ორგანიზაციებს სოფლიდან უნდა განედევნათ ძველი ყაიღის ვაჭარ-მეევანშეები და დაენერგათ ვაჭრობისა და კრედიტის კაპიტალისტური ფორმები, რაც კიდევ უფრო დააჩქარებდა გლეხობის კლასობრივ დიფერენციაციას.

მიწის გამოსყიდვა და ყიდვა-გაყიდვა. გლეხობის კლასობრივი დიფერენციაცია. საგლეხო რეფორმამ საგრძნობლად დააჩქარა ფეოდალური ურთიერთობის რღვევა. მართალია, ადგილობრივ დებულებათა დიდი უმეტესობა განთავისუფლებულ გლეხთა სანადელო მიწებს მემამულეთა საკუთრებაში ტოვებდა, მაგრამ იყო გამონაკლისიც; იმპერიის ზოგ მხარეში ზოგიერთი კატეგორიის გლეხებს მიწაზე საკუთრების უფლება გამოსყიდვის გარეშე მიენიჭათ. კერძოდ, მეფის მთავრობამ გარკვეული მოსახრებით მესაკუთრედ აღიარა 1 226 000 სული კაზაკი, 988 ათასი სული ბაშკირი. ძალიან სწრაფად და შედევათიანი პირობით მესაკუთრეთა კატეგორიაში გადაყვანილ იქნა პოლონელი გლეხობაც.

საქართველოში საგლეხო რეფორმა ძირითადად საერთო დებულებების საფუძველზე ჩატარდა. აქ თავისებურ გამონაკლისს შეადგენდა მხოლოდ აფხაზეთი და სვანეთი. 1870 წ. 8 ნოემბრის დებულების თანახმად აფხაზეთის ყველა მწარმოებელს, მათ შორის გლეხებსაც, სრულ საკუთრებაში უმტკიცდებოდა ეზოები, ბაღ-ვენახები და სახნავ-სათესი მიწები. ყმა გლეხთა პირადი განთავისუფლების საზღაურად თავადაზნაურობას ეძლეოდა გარკვეული თანხა, რაც გამოიანგარიშებოდა გლეხთა წლიური ვალდებულებების .10 პროცენტის საფუძველზე კაპიტალიზაციის გზით. ამ თანხის ორი მეხუთედი უნდა გაეღო გლეხობას, სამი მეხუთედი კი სახელმწიფოს. გლეხებს უფლება მიეცა გამოსასყიდის თავის წილი დაეფარა ძველი ვალდებულებების კიდევ ოთხი წლით გაგრძელების გზით, რის შემდეგაც თავად-აზნაურთა დამოკიდებულებისაგან სრულიად თავისუფლდებოდნენ. ამდენად, დროებითვალდებულება აფხაზეთში მხოლოდ 4 წელს გაგრძელდა. აფხაზეთის გლეხთა უმეტესობამ პირად თავისუფლებასთან ერთად მიწის საკუთრების უფლებაც მიიღო. დაახლოებით ასევე გადაწყდა წოდებრივ-საადგილმამულო საკითხი სადადეშქელიანო სვანეთშიც. დადეშქელიანთა ყმა გლეხებმა საკუთრებაში მხოლოდ 4—5 ქცევა მიწა მიიღეს კომლზე¹, მაგრამ მათ რომ დროებითვალდებულების ძმიმე უღელი არ დადებიათ, ეს უდაოდ დადებითი მოვლენა იყო.

ბურჟუაზიულმა რეფორმამ, როგორც ვხედავთ, აფხაზეთსა და სვანეთში იმთავითვე შექმნა მესაკუთრე გლეხთა საკმაოდ მრავალრიცხოვანი

¹ CXAO, II, გვ. 522—537, 585—592.

(10 ათასამდე კომლი)¹ ფენა. საქართველოს სხვა კუთხეებშიც 1870 წლის 8 ნოემბრის ანალოგიური დებულება რომ გატარებულიყო და ქართველ გლეხობას ყოველწლიური დალა-კულუხი გამოსასყიდ თანხაში ჩათვლოდა ვალდებულებათა ღირებულების ექვსი პროცენტის საფუძველზე კაპიტალიზაციის პირობებში, მთავრობის დახმარების გარეშეც კი დროებით ვალდებულ გლეხთა მესაკუთრეთა კატეგორიაში გადასვლის პროცესი 16 წელიწადში დამთავრდებოდა, იმ თანხას კი, რაც ნადელების გამოსყიდვაზე იხარჯებოდა, გლეხობა მიწათმოქმედებაში მწარმოებლურად დააბანდებდა. მაგრამ ეს ასე არ მოხდა. საგლეხო რეფორმას საქართველოს ძირითად რაიონებში არათანმიმდევრულ ბუჩუკუზიული, ნახევრად-ბატონყმური ხასიათი ჰქონდა და დროებითვალდებულებისაგან თავის დაღწევა გლეხობას ათეულ მილიონობით მანეთი უჭდებოდა.

რეფორმამ საერთოდ, მართალია, საფუძველი ჩაუყარა გლეხობისა და თავადაზნაურობის საადგილმამულო გამიჯვნას, გლეხური მეურნეობის დამოუკიდებელ არსებობას, მაგრამ ეს საქმე ბოლომდე არ ყოფილა მიყვანილი. ნადელების გამოსყიდვამდე დროებით ვალდებულ გლეხთა შიწის იურიდიულ მესაკუთრედ მემამულე რჩებოდა, რაც საშუალებას აძლევდა ამ უკანასკნელს ეკონომიურად დაექვემდებარებინა გლეხის მეურნეობა. ცარიზმის კანონმდებლობის საფუძველზე თავადაზნაურობამ გლეხობას დააკისრა მძიმე საადგილმამულო ვალდებულებანი. XIX ს-ის 70-იან წლებში საქართველოს დროებით ვალდებული გლეხები დესეტინა სანადელო მიწით სარგებლობისათვის იხდიდნენ 9 მანეთს, XIX ს-ის ბოლოსათვის ეს გამოსაღები 13 მანეთამდე გაიზარდა².

ამრიგად, რეფორმამ ბოლომდე ვერ მიიყვანა გლეხთა განთავისუფლების საქმე. მიწის ფეოდალური საკუთრების შენარჩუნების საფუძველზე გარკვეულ ფარგლებში კვლავ რჩებოდა წინააღმდეგობა მწარმოებლური ძალების ხასიათსა და წარმოებით ურთიერთობებს შორის. რეფორმის მომდევნო ხანაში მიმდინარეობდა ამ წინააღმდეგობის დაძლევის სტიქიურ-ეკონომიური პროცესი, რაც უმთავრესად გამოიხატებოდა ფეოდალური საკუთრების შემდგომ რღვევასა და თავისუფალ გლეხურ საკუთრებაზე გადასვლაში.

XIX ს-ის საქართველოში სასაქონლო-ფულადი ურთიერთობის განვითარების შედეგად საკმაოდ სწრაფად მიმდინარეობდა ნატურალურიდან

¹ მართალია, 1877 წლის ანტიცარისტულ აჯანყებაში მონაწილეობისათვის აფხაზეთის გლეხობის თითქმის ნახევარს 1880-დან 1906 წლამდე საკუთრების უფლება წართმეული ჰქონდა და ჩარიცხული იყო სახაზინო უწყებაში, მაგრამ სახელმწიფო გლეხების მდგომარეობა მაინც უკეთესი იყო დროებით ვალდებულ გლეხთა მდგომარეობაზე.

² ა. ლ. ბ ე ნ დ ი ა ნ ი შ ვ ი ლ ი, აგარაული ურთიერთობიანი საქართველოში 1890—1917 წწ. თბ., 1965, გვ. 12.

ფულად რენტაზე გადასვლის პროცესი. ჯერ კიდევ 40—50-იან წლებში მოხდა სახელმწიფო გლეხთა ღალა-გადასახადების კომუტაცია (ფულზე გადაყვანა). სახელმწიფო გლეხები კი საქართველოს გლეხური მოსახლეობის ნახევარს შეადგენდნენ. რეფორმის შემდეგ დროებით ვალდებული გლეხები და ხიზნებიც თანდათან გადადიოდნენ ფულად რენტაზე. სწრაფად იზრდებოდა ფულადი და კაპიტალისტური რენტის მასშტაბი საიჯარო ურთიერთობაშიც. საერთოდ საქართველოში XIX ს-ის 70-იანი წლებიდან უკვე რამდენადმე სჭარბობდა ფულადი რენტა და იგი ამჟღავნებდა სრული გაბატონების ტენდენციას. ნატურალური რენტის ფულადით შეცვლა, რაც სასაქონლო-ფულადი ურთიერთობის განვითარების საფუძველზე ხდებოდა, თავისუფალ გლეხურ საკუთრებაზე გადასვლის ერთ-ერთი მთავარი წინაპირობა იყო.

განვითარების ობიექტურ-ეკონომიურ პროცესს რამდენადმე აფერხებდა ცარიზმის აგრარულ-ფისკალური პოლიტიკა. მეფის მთავრობამ უარი თქვა ამიერკავკასიის სახაზინო გლეხებისათვის, მეტროპოლიის სახელმწიფო გლეხების მსგავსად, მიენიჭებინა მიწაზე საკუთრების უფლება, გადაეყვანა ისინი გამოსასყიდ გადასახდელელებზე. ხიზნებიც სამი ათეული წელი იბრძოდნენ მიწების შენარჩუნება-დასაკუთრებისათვის, მაგრამ ამაოდ. სანაღვლო მიწის გამოსყიდვისა და მესაკუთრეთა კატეგორიაში გადასვლის ოფიციალური უფლება (ზოგი შეზღუდვით) მიღებული ჰქონდათ მხოლოდ დროებით ვალდებულ გლეხებს და ისინიც, შეძლებისდაგვარად, სარგებლობდნენ ამ უფლებით.

აღმოსავლეთ საქართველოს დროებით ვალდებული გლეხები ნადელების გამოსასყიდად უმეტეს შემთხვევაში მთავრობის სესხებს იყენებდნენ.

1864-დან 1904 წლამდე აღმოსავლეთ საქართველოში ნადელთა გამოსყიდვის გზით მესაკუთრეთა კატეგორიაში გადავიდა სულ 4595 კომლი გლეხი (აქედან მთავრობის სესხის გამოყენებით 3768 კომლი), დროებით ვალდებულ გლეხთა 31,5%¹. მემამულეების ვეტო (ბევრი მათგანი არახელსაყრელად თვლიდა გლეხების გამოსყიდვაზე გადაყვანას), მეფის მთავრობის აგრარულ-ფისკალური პოლიტიკა და გლეხთა განკარგულებაში არსებული ფულადი სახსრების სიმცირე იყო საგამოსყიდვო ოპერაციების ხელი ტემპის მიზეზი აღმოსავლეთ საქართველოში.

დასავლეთ საქართველოს გლეხოზა უკეთ აჰყვა დროის მოთხოვნილებას. აქაური გლეხები უფრო მეტად მიმართავდნენ დამხმარე სარეწებს და საშოვარზე გასვლას, რის გამო მათი ფულადი შემოსავალი გაცილებით მეტი იყო. დასავლეთ საქართველოს დროებით ვალდებულმა გლეხებმა უარი თქვეს მთავრობის არახელსაყრელ სესხზე. ისინი საკუთარი სახსრე-

¹ СССРТКГ, გვ. 430—431.

ბით ახერხებდნენ სანადელო და ჩამოჭრილი მიწების გამოსყიდვას. 1865—1903 წლებში დასავლეთ საქართველოს (აჭარა-აფხაზეთის გამოკლებით) 34 617 კომლმა დროებით ვალდებულმა გლეხმა 7,5 მლნ მანეთად გამოისყიდა 149 ათასი დესეტინა მიწა¹. მესაკუთრეთა კატეგორიაში გადავიდა დროებით ვალდებულ გლეხთა 60%. ქუთაისის გუბერნია იყო ერთადერთი მთელი რუსეთის იმპერიის მასშტაბით, სადაც გლეხებმა საკუთარი სახსრებით გამოისყიდეს სანადელო და ჩამოჭრილი მიწები. სხვა გუბერნიებში გლეხთა საკუთარი სახსრებით ნადელების გამოსყიდვა იშვიათად ხდებოდა. საგამოსყიდვო ოპერაციები, როგორც წესი, ყველგან მიმდინარეობდა მთავრობის სესხის გამოყენებით.

სავაჭრო ბრუნვაში დიდი როლენობით შევიდა ნადელგარეშე მიწებიც. მიწის ყიდვა-გაყიდვის პროცესში, რამაც რეფორმის მომდევნო ხანაში ფართო ხასიათი მიიღო, ყველა სოციალური ფენა მონაწილეობდა. ცხადად შეიმჩნეოდა თავადაზნაურული მიწათმფლობელობის შემცირების და გლეხობის და სხვა ბურჟუაზიული ფენების გამამულიანების ტენდენცია. XIX ს-ის ბოლოსათვის დასავლეთ საქართველოს გლეხთა მიერ ნაყიდი, ნოტარიალური აქტებით გაფორმებული საკუთარი მიწების ფართობი 100 ათას დესეტინას აჭარბებდა².

მიწის გამოსყიდვის და ყიდვა-გაყიდვის ოპერაციებში აქტიური მონაწილეობის შედეგად გლეხობის საკუთარი მიწის ფოხდი მნიშვნელოვნად გაიზარდა. XIX—XX სს-ის მიჯნაზე ქუთაისის გუბერნიის გლეხობას საკუთრებაში ჰქონდა 270 ათას დესეტინამდე მიწა, ხაზინისა და თავადაზნაურთა საკუთრებად კი რჩებოდა 120 ათასი დეს. გლეხთა სანადელო მიწა. აფხაზეთის გლეხთა საკუთრებაში იყო 112 ათასი დეს. მიწა. უფრო ნელა მიმდინარეობდა გლეხთა გამამულიანების პროცესი აღმოსავლეთ საქართველოში. 1890 წლისათვის ამ მხარის გლეხთა საკუთრებაში იყო დაახლოებით 140 ათასი დესეტინა, ხაზინისა და თავადაზნაურთა საკუთრებაში კი რჩებოდა 900 ათასი დესეტინა გლეხთა სანადელო მიწა³.

ამრიგად, საქართველოში სასაქონლო-ფულადი და კაპიტალისტური ურთიერთობის განვითარების ერთ-ერთ შედეგსა და მის გამომხატულებას წარმოადგენდა მრავალრიცხოვან მესაკუთრე გლეხთა კატეგორიის გაჩენა. მიწის წვრილგლეხურ საკუთრებაზე გადასვლას მოცემულ ხანაში დადებითი მნიშვნელობა ჰქონდა. „საკუთარი მეურნეობის მქონე გლეხების პარცელური საკუთრების ეს ფორმა... შეადგენს, ერთი მხრივ, საზოგადოების ეკონომიურ საფუძველს უძველესი კლასიკური დროის საუკეთესო

¹ Обзор Кутаисской губернии за 1903 г., გვ. 17—18.

² Кавказский календарь, ч. II, 1907, გვ. 24—55.

³ ა. ლ. ბენდიანიშვილი, აგარული ურთიერთობანი საქართველოში 1890 1917 წწ., თბ., 1965, გვ. 105—106.

ხანაში, ხოლო მეორე მხრივ, ამავე ფორმას ვპოულობთ ჩვენ თანამედროვე ხალხებშიც, როგორც ერთ იმ ფორმათაგანს, რომელნიც ფეოდალური მიწის საკუთრების დაშლიდან წარმოდგებიან“¹. კ. მარქსი იმასაც გვასწავლის, რომ წვრილი წარმოების დროს მიწაზე კერძო საკუთრება პროგრესის აუცილებელი წინაპირობაა. „მიწის საკუთრება წარმოების ამ წესის სრული განვითარებისათვის ისევე აუცილებელია, როგორც იარაღების საკუთრება ხელოსნური წარმოების თავისუფალი განვითარებისათვის. მიწის საკუთრება აქ პიროვნული დამოუკიდებლობის განვითარების საფუძველია, იგი თვით მიწათმოქმედების განვითარებისათვის აუცილებელი გარდამავალი საფეხურია“².

გლეხი საკუთარ მიწაზე გაცილებით მუყაითად შრომობდა და ყოველნაირად ცდილობდა მეურნეობის გაუმჯობესებას. იგი დარწმუნებული იყო, რომ მიწა ადრე თუ გვიან აუნაზღაურებდა იმ შრომასა და ხარჯს, მისი ნაყოფიერების გაზრდისათვის რომ გასწია. მემამულეებისა და ხაზინის დამოკიდებულებაში დარჩენილ ღალის გადამხდელ გლეხებს კი ასეთი სტიმული არ ამოძრავებდა.



აღნიშნული იყო, რომ ჯერ კიდევ ფეოდალიზმის დროს მიმდინარეობდა გლეხობის ქონებრივი დიფერენციაცია. გვიანფეოდალური ხანის საქართველოში გლეხთა შორის ბევრი იყო წელმაგარი მეურნე, რომელნიც ფლობდნენ 30—50 დესეტინა და მეტ მიწას. გლეხთა ერთი ნაწილის ეკონომიურ დაწინაურებას უფლებრივი აღზევებაც თან სდევდა, მაგრამ ყველაფერი ეს თავსდებოდა წოდებრიობის ჩარჩოებში. მდიდარი გლეხები ღებულობდნენ თარხნობას, აზატობას, გადადიოდნენ მსახურის კატეგორიაში. მსახურს კი უკვე „აზნაურული თვისებები სჭირდა“. ისინი მეფეებსა და თავადებს ახლდნენ ლაშქრობა-ნადირობაში და მათ შორის უფრო გამოჩენილნი აზნაურობასაც ღებულობდნენ. ამდენად, გლეხობის ქონებრივი დიფერენციაციის ლოგიკურ შედეგს გარკვეულ დრომდე მათი ერთი ნაწილის პრივილეგიურ წოდებაში გადასვლა წარმოადგენდა. ეკონომიურად აღზევებული გლეხობა იყო ძირითადად აზნაურთა წოდების შემავსებელი რეზერვი.

XIX ს-ის პირველ ნახევარში მდგომარეობა შეიცვალა: რუსეთის ცარიზმმა თანდათან გააუქმა თარხანი, აზატი და მსახური გლეხების პრივილეგიები, მოახდინა გლეხთა კატეგორიების ნიველირება და საზღვარი

¹ კ. მარქსი, კაპიტალი, ტ. III, ნაწ. 2, გვ. 431.

² იქვე.

დაუდო თავად-აზნაურთა წოდების „დანაგვიანებას“ დაბალი ფენებიდან გამოსული პირებით. ეკონომიურად აღზევებულთა წოდებრივადაც დაწინაურების პირობები თითქმის მთლიანად მოიშალა. ამის შემდეგ გლეხის მდგომარეობა თითქმის მხოლოდ მისი ეკონომიური შეძლებით განისაზღვრებოდა. ქონებრივ-წოდებრივი დიფერენციაცია თანდათან შეიცვალა ქონებრივ-კლასობრივი დიფერენციაციით.

ბურჟუაზიული რეფორმების მომდევნო ხანაში, როცა გლეხებმა პირადი თავისუფლება მიიღეს და მეტი სამეურნეო დამოუკიდებლობა მოიპოვეს, როცა სასაქონლო-ფულადი ურთიერთობა განვითარების მაღალ დონეზე აღწევს, გლეხობის კლასობრივი დიფერენციაცია განსაკუთრებით გაღრმავდა და იგი კაპიტალისტური ურთიერთობის განვითარების ერთ-ერთ მთავარ მხარედ იქცა.

საქართველოში გლეხობის სოციალურ დიფერენციაციას, სხვასთან ერთად, შევანშეობაც უწყობდა ხელს. მართალია, თბილისსა და ქუთაისში არსებობდა საადგილმამულო ბანკები, თანდათან მრავლდებოდა ფულის შემნახველ-გამსესხებელი ამხანაგობებიც, მაგრამ გლეხური მოსახლეობა ძირითადად სავაზშო კაპიტალით სარგებლობდა. ამ უკანასკნელის პროცენტი კი გაცილებით მაღალი იყო. 1887 წლისათვის, მაგალითად, თელავის მაზრის 11 სასოფლო საზოგადოებაში გლეხების ვალი ვექსილების მიხედვით შეადგენდა 400 ათას მანეთს. ისინი სარგებლის სახით ყოველწლიურად იხდიდნენ თავნის 30—40%—ს¹.

1899 წელს კახელ მევენახეთა ყრილობაზე ნ. გოზალიშვილი აღნიშნავდა: კულაკი არასდროს არ ამბობს უარს სესხის გაცემაზე, მაგრამ ვექსილის გარდა გლეხისაგან გირაოდ იღებს ვენახს, ხოლო თუ ვენახი კრედიტორს უკვე ხელთა აქვს ჩაგდებული, — სახნავ-სათეს მიწას. ამასთან ერთად, ჩვეულებრივ, იღება პირობა, რომლის თანახმად, თუ ვალი დროზე არ იქნა გადახდილი, მიწის ნაკვეთი გადაღის კულაკის ხელში და ეს უკანასკნელი 1 დესეტინა მიწას ეპატრონება 10—12 მანეთად. ნ. გოზალიშვილს იქვე მოჰყავს თბილისის სახაზინო პალატის ცნობა, საიდანაც ჩანს, რომ XIX ს-ის 90-იან წლებში თელავისა და სიღნაღის მაზრებში ყოველწლიურად ფორმდებოდა 1 მლნ მანეთზე მეტი ვექსილები, რომლის დიდი ხაწილი წვრილ კრედიტებზე მოდიოდა. დავალიანება ჩვენთან, დასაკენიდა ნ. გოზალიშვილი, იმდენად დიდია, რომ კახელის მთელი წლის შრომის ხაყოფი მიღის მხოლოდ პროცენტების დაფარვაზე, თავნი კი მუღმივ სიდიდედ რჩებაო².

¹ სსცია, ფ. 17, საქ. 2748, ფურც, 48.

² Труды съезда виноградовладельцев и виноградарей кахетии в 1899 г., 1901, жж. 141—143.

მართალია, მევახშეები ზოგჯერ ამჯობინებდნენ მათთან დაგირავებულ მიწა გლეხთა მეურნეობის სფეროში დაეტოვებინათ და თანდათან ამოეკაჩათ მისგან სარგებლის მაქსიმუმი, მაგრამ რეფორმის შემდეგ, მიწის ხაყიდობის ფასისა და საიჯარო ქირის ზრდის პირობებში, მიწის საკუთრება გარანტირებულ და მაღალი შემოსავლის მეტად საიმედო წყაროდ გადაიქცა. სხვადასხვა ჯურის საქმოსნები მიწას ყიდულობდნენ რენტის მიღების მიზნით, ზოგიც საკუთარ მეურნეობის გამართვისათვის. ბუხებრივია, მევახშეებიც უმჯობესად თვლიდნენ მათთან დაგირავებული მიწა ჩამოერთმიათ მოვალეებისათვის, რადგან საკუთრებაში აღებული მამული შეტ შემოსავალს იძლეოდა, ვიდრე დაცემულ-გალატაკებული გლეხის მეურნეობა, რომლის ექსპლოატაციასაც გირავნობის ხელშეკრულების საფუძველზე ეწეოდნენ. მევახშეთა ასეთი მისწრაფების განხორციელებას აადვილებდა ის გარემოება, რომ საქართველოში თითქმის აღარ არსებობდა თემური მიწათმფლობელობა. ასეთ პირობებში, გარკვეული შეზღუდვების მიუხედავად, ყველა კატეგორიის გლეხთა სანადელო მიწებიც კი, თავი რომ დავანებოთ კერძო ნაკვეთებს, აშკარად თუ ფარულად შედიოდა სავაჭრო ბრუნვაში და ამ მიწების კონცენტრაცია ხდებოდა მდიდარი გლეხებისა და სხვადასხვა ჯურის ვაჭარ-მევახშეთა ხელში. ამდენად, სავაჭრო და სავაზმო კაპიტალი, რომელსაც მნიშვნელოვანწილად დაკარგული ჰქონდა დამოუკიდებელი განვითარების უნარი, რეფორმის მომდევნო ხანის საქართველოში აჩქარებდა გლეხობის დაშლის პროცესს, ხელს უწყობდა ერთ მხარეზე კულაკობისა და კაპიტალისტური მეურნეობის, ხოლო მეორეზე სოფლის პროლეტარიატის გამოყოფას. ჩამოყალიბების პროცესში მყოფი ვაჭრობა — კრედიტის კაპიტალისტური ფორმები — რა თქმა უნდა, კიდევ უფრო აღრმავებდა ამ პროცესს.

ჩვენ ხელთ არსებული სტატისტიკური მასალა ნაკლები და ფრაგმენტულია, მაგრამ მაინც ჩანს, რომ კლასობრივი დიფერენციაცია, მიუხედავად ცარიზმის ცდისა — აღეკვეთა ეს პროცესი (მეფის მთავრობას ძალიან აშიხებდა პროლეტარიატის გაჩენა და მისი ბრძოლა არსებული წყობილების წინააღმდეგ), მეტ-ნაკლებად ყველა კატეგორიის გლეხობაში მიმდინარეობდა.

მეფის მთავრობის ოფიციალური სტატისტიკოსები დაინტერესებულნი არ იყვნენ გლეხთა სოციალური დიფერენციაციის ფაქტის ჩვენებით. აღმოსავლეთ საქართველოში, სადაც თითქოს გაბატონებული იყო თემური მიწათმფლობელობა, ოფიციალური მკვლევარები, მართალია, ზოგადად მიუთითებენ სახაზინო მიწების კულაკთა ხელში თავმოყრის ფაქტზე, მაგრამ კონკრეტულ ცნობებს ნაკლებად იძლევიან, კმაყოფილდებიან საშუალო ციფრებით.

XIX ს-ის 80-იან წლებში აღმოსავლეთ საქართველოს სახელმწიფო გლეხები კომლზე საშუალოდ ფლობდნენ 17 დეს. მიწას, საიდანაც ბაღ-ვენახსა და სახნავ-სათესს ეკავა 6 დესეტინა. მიწის ფონდი არათანაბრად იყო განაწილებული სოფლებს შორის. აღმოსავლეთ საქართველოს 932 სახაზინო სოფლიდან 11 სოფელს (1,18%) სულ არ გააჩნდა სახაზინო სანადელო მიწა, 213 სოფელში (22,8%) კომლზე მოდიოდა 0,1-დან 5 დესეტინამდე მიწა, 193 სოფელში (20,70%) — 5—10 დეს., 123 სოფელში (13,19%) — 10—16 დეს., 120 სოფელში (12,87%) — 16—25 დეს., 152 სოფელში (16,30%) — 25—50 დეს., 120 სოფელში (12,87%) — 50 დესეტინაზე მეტი ვარგისი და უვარგისი მიწა¹.

აღმოსავლეთ საქართველოს სახელმწიფო გლეხთა ეკონომიური ყოფის მკვლევარები კომლთა შორის მიწების არათანაბრად განაწილების საილუსტრაციოდ მეტად მწირ ცნობებს იძლევიან. ს. მაჩაბლის გადმოცემით, მაგალითად, სოფ. მარტყოფში 203 კომლი სახელმწიფო გლეხი სრულიად უნადელო იყო, 106 გლეხი კომლზე ფლობდა — 3—6 დეს., 95 გლეხი — 6—9 დეს., 8 გლეხი — 9—12 დეს., 4 გლეხი — 12—15 დეს., 2 გლეხი — 15—30 დეს., 1 გლეხი 30 დესეტინაზე მეტს². კიდევ უფრო დიდი იყო კონტრასტი გლეხობის სხვადასხვა ფენას შორის მიწით შედარებით უხვად უზრუნველყოფილ სოფლებში. მასალებზე დაკვირვება ცხადყოფს, რომ გლეხობის აბსოლუტურ უმრავლესობას ზემოაღნიშნულ საშუალო ფართობზე (17 დეს.) გაცილებით ნაკლები მიწა ჰქონდა, მცირე ნაწილს — გაცილებით მეტი. ბევრი გლეხი 1—2-დესეტინიან ნადელზე იჯდა, გლეხობის ხუთიოდე პროცენტი 20—50 დეს., ხოლო 1 პროცენტი 50—100 და 100—500 დესეტინა მიწას ფლობდა³.

იმავე ხანებისათვის დასავლეთ საქართველოს სახელმწიფო გლეხებს კომლზე საშუალოდ 4 დეს. მიწა ჰქონდათ. მათგან 398 გლეხი (1,90%) სრულიად უმიწაწყლო იყო, 2142 გლეხი (10,09%) კომლზე ფლობდა 0,1—1 დესეტინამდე მიწას, 4427 გლეხი (21,09%) — 1—2 დეს., — 7383 გლეხი (36,16%) — 2—4 დეს., 3396 გლეხი (16%) — 4—6 დეს., — 1330 გლეხი (10,50%) — 6—10 დეს., 834 გლეხი (3,97%) — 10—20 დეს., 221 გლეხი (1,05%) — 20—154 დესეტინას⁴. გლეხობის ქულაური ზედაფენა განსაკუთრებით ძლიერი იყო ქუთაისის მაზრაში, სადაც 95 გლეხი კომლზე ფლობდა 20—30 დეს., 31 გლეხი — 30—40 დეს., 13 გლეხი — 40—50 დეს., 10 გლეხი — 50—60 დეს., 7 გლეხი — 60—80 დეს.,

¹ И. Антелава, Государственные крестьяне Грузии в XIX веке, т. 2, Тб., 1962, გვ. 78—79.

² МИЭБГКЗК, V, ч. I, გვ. 185. 233.

³ СМИЭБГКЗК, II, გვ. 267—269.

⁴ იქვე, VI, ч. I, გვ. 157—158.

4 გლეხი — 80—90 დეს., 1 გლეხი — 120 დეს., 1 გლეხი — 154 დესეტი-
ნა მიწას¹.

დასავლეთ საქართველოში განსაკუთრებით ძლიერი იყო გლეხობის
მესაკუთრედ გადაქცევის ტენდენცია. აქ თითქმის ყოველ გლეხს ჰქონდა
მეტ-ნაკლები რაოდენობით საკუთარი მიწა. 1888 წლისათვის ქუთაისის
გუბერნიის 7 მაზრაში ითვლებოდა 96 912 კომლი მესაკუთრე გლეხი (აქ
შედიან ის სახელმწიფო და ხიზანი გლეხებიც, რომლებსაც ნადელებთან
ერთად ნაყიდი მიწის ნაკვეთებიც ჰქონდათ), რომელთა საკუთრებაში იყო
244 451 დეს. მიწა².

XX ს-ის დამდეგს ჩატარებული აღწერით დადგინდა, რომ დასავლეთ
საქართველოში მარტო მესაკუთრეთა კატეგორიის გლეხი იყო 51 241
კომლი. ამ გლეხთა მიწათმფლობელობის სიდიდის მიხედვით დიფერენ-
ციაციანზე ნათელ წარმოდგენას იძლევა 1-ლი ცხრილი³:

ც ხ რ ი ლ ი 1

გლეხთა ნაკვეთები სიდიდის მიხედვით	მესაკუთრე გლეხთა რაოდენობა კომლობით							ს უ ლ გუბერნიაში
	ქუთაისის მაზრაში	გორაკის მაზრაში	ჭყვიდღის მაზრაში	ღურგეთის მაზრაში	რაჭის მაზრაში	სენაკის მაზრაში	ლენჩხუბის მაზრაში	
0,1—1 დეს-მდე	4823	5189	1735	3101	3222	4004	525	22599
1—3 დეს.	7716	3365	2086	1823	1329	4006	252	20577
3—5 დეს.	2200	775	635	383	125	938	35	5091
5—10 დეს.	1191	433	341	156	32	282	3	2428
10—15 დეს.	213	84	37	27	12	21	—	394
15—20 დეს.	49	15	8	7	—	4	—	83
20—30 დეს.	22	5	9	3	1	—	—	40
30—40 დეს.	1	1	1	—	—	—	—	3
40 დეს-ზე მეტი	2	1	7	2	4	—	10	26
	16217	9868	4859	5502	4725	9245	825	51241

¹ СМИЭБГКЗК, I, გვ. 221.

² ССДЗТКГ, გვ. 14.

³ ЦГИА СССР, ф. 1290, оп. 6, д. 47, лл. 1—934. იქვე, საქ. 48, ფურც. 1—856.

ამ მონაცემებიდან ჩანს, რომ დასავლეთ საქართველოს 7 მაზრაში მრავალრიცხოვანი ყოფილა მინიატურული საკუთრების მქონე სოფლის პროლეტარიატი (22 599 კომლი — 44%), ნახევრად პროლეტარიატი (20 577 კომლი — 40%) და შედარებით მცირერიცხოვანი გლეხობის კულაკური ზედაფენა. წვრილ მესაკუთრე სოფლის მუშათა მასაში, ბუნებრივია, მკვეთრად გამოირჩეოდნენ 20—80 დეს. მიწისმფლობელები: კიკვაძე ბესარიონი (50 დეს.), რეხვიაშვილი სოფრომი (75 დეს.), ჩალაძე ივანე (54 დეს.), მაისაშვილი ზურაბ (25 დეს.), ტყეებუჩავა კოსტა (37 დეს.), შონია ვასილი (45 დეს.), ვაშაკიძე თეიმურაზ (30 დეს.), ჭიშიაშვილი გრიგოლი (35 დეს.), იობიძე პავლე (50 დეს.), სისონა, ლევან, ივანე, იასონ, დავით და იოსებ ტირკიები, რომელნიც ფლობდნენ 450 დეს. მიწას; ჯანხოთელი ავალიანი და მათი თანამონაწილე რამდენიმე გლეხი, რომელთა საკუთრებაში იყო იწის მთა (ქვემო სვანეთი) 8 ათასი დესეტინა ფართობით¹.

აღმოსავლეთ საქართველოში მესაკუთრეთა კატეგორიაში გადასვლას თითქმის მხოლოდ შეძლებული გლეხები ახერხებდნენ. ერთი ცნობით 1888 წლისათვის აღმოსავლეთ საქართველოში ითვლებოდა 8363 სული მესაკუთრე გლეხი, რომელნიც ფლობდნენ 99 921 დეს. მიწას, სულზე საშუალოდ 12 დესეტინას². 1893 წელს ბორჩალოს მაზრაში აღირიცხა 706 კომლი მესაკუთრე გლეხი 19 247 დეს. მიწით. ისინი კომლზე საშუალოდ ფლობდნენ 27,2 დეს. მიწას. ამ გლეხთა შორის გამოირჩეოდნენ ვოროხცოვის, ნოვომიხაილოვკის და შახნაზარის ცალკეული კომლები, რომელთაც ადგილობრივი მემამულეებისაგან ნაყიდი ჰქონდათ ვეებერთელა ნაკვეთები. ბორჩალოს მაზრის სოფ. ჯალალოღლიში 2 კომლს საკუთრებაში ჰქონდა 712 დეს. ბოლნისხაჩინის 8 კომლს — 300 დეს. შულავერის მცირერიცხოვან ამხანაგობას — 2 200 დეს. მიწა. გლეხ იარდან ყული ოღლის საკუთრებაში ჰქონდა 2 ათასი დესეტინა (400 დეს. სახნავ-სათესი, 100 დეს. სათიბი და 600 დეს. საძოვარი)³.

თიანეთის მაზრის ერწოს უბანი რამდენიმე კულაკის საექსპლოატაციო ობიექტს წარმოადგენდა. „ამ რაიონში, — წერდა მაზრის უფროსი 1905 წელს, — ცხოვრობს რამდენიმე გამდიდრებული გლეხი, რომელთაც საკუთრებაში აქვთ რამდენიმე ათასი დეს. მიწა და თანაც იჯარით იღებენ მემამულეთა დიდ ფართობებს (გუგუღაშვილი, წიკლაური და სხვ.). ისინი ნალა სწევენ მიწის ფასს, ღარიბი გლეხები ყავთ კაბალაში და საერთოდ ძალიან არაუღებენ აგრარულ საკითხს 4—5 სასოფლო საზოგადოებაში. მეორეს მხრით, — განაგრძობს მაზრის უფროსი, — პირადად ვიცნობ და-

¹ ЦГИА СССР, ф. 1290, оп. 6, д. 47, лл. 1—934. იქვე, სკ. 48, ფურც. 1—855.

² ССДЗТКГ, გვ. 12—15.

³ РТКЭЖДЭКО, გვ. 56—58.

ლიან ბევრ გლახთა ოჯახებს, რომლის წევრები ზამთრის განმავლობაში პურს ჰამენ ერთი ორი დღის გამოშვებით, რადგან საკუთარი ნათესი მათ არ აქვთ და საცოდავ არსებობას ახერხებენ ქირაზე მუშაობით“¹.

საქართველოში, სადაც მეტად მწვავედ იგრძნობოდა მცირემიწიანობა, ადგილ-მამულის სიდიდე განსაზღვრავდა. პირველ რიგში, გლახის შეძლებას. თუ გლახს მიწა ბევრი ჰქონდა, მას ხელგაუნძრევლად და მეურნეობის გაუმართავედ, მიწის რენტით შეეძლო ცხოვრება. მაგრამ ეს მსხვილი მესაკუთრე გლახები, როგორც წესი, ფერმერულ, სავაჭრო-კაპიტალისტურ მეურნეობებს ქმნიდნენ. ისინი ბუნებრივი პირობებისა და ბაზრის კოზიუნქტურის შესაბამისად ფართო მასშტაბით ეწეოდნენ მემინდერეობას, ძველხაჯობა-მელვინეობას, მეთამბაქოეობას, მეცხოველეობას და სხვ. დარგებს.


კახეთის სახელმწიფო გლახთაგან მევენახეობა-მელვინეობას ეწეოდა 6271 კომლი. მათგან 1759 გლახს (25%) კომლზე ჰქონდა 0,25 დეს. ვენახი. 3639 კ. (52,1%) — 0,25—1 დეს., 675 კ. (9,6%) — 1—2 დეს., 123 კ. (1,8%) — 2—3 დეს., 43 კ. (0,6%) — 3—5 დეს. 12 კ. (0,1⁹/₁₀) — 5 დესეტიანა და მეტი ვენახი². ქუთაისის გუბერნიის შორაპნის მაზრის სახელმწიფო გლახებიდან 625 გლახს კომლზე ჰქონდა 1—2 დეს. ვენახი. 61 კ. — 2—3 დეს. 19 კ. — 3—5 დეს. 5 კ. 5—8 დესეტიანა³. ერთი დესეტიანა ვენახის შემოსავალი 400—500 მან. აღწევდა. ამდენად 3—5 დეს. და მეტი ვენახის მფლობელები კულაკები იყვნენ. ისინი სოფლის მეურნეობის ამ ფრიად შრომატევად დარგში საკმაო რაოდენობით იყენებდნენ დაქირავებულ მუშახელს.

მდიდარი გლახის ხელში კონცენტრირებული იყო მუშა პირუტყვი და სასოფლო-სამეურნეო ინვენტარიც. XIX ს-ის 80-იან წლებში თელავის მაზრის სახელმწიფო გლახთაგან 976 გლახს ჰყავდა კომლზე თითო უღელი ხარი. 962 კ-ზე — 1—2 უღელი, 578 კ-ზე — 2—3 უღელი, 310 კ-ზე — 3—4 უღელი, 140 კ-ზე — 4—5 უღელი, 245 კომლს — 5 უღელზე მეტი. ამ უკანასკნელებს ჰყავდა სულ 3 818 ხარი — კომლზე საშუალოდ 7 უღელი. კიდევ უფრო უთანაბროდ იყო განაწილებული მუშა პირუტყვი სიღნაღის მაზრის სახელმწიფო გლახთა შორის; 2 722 გლახურ მეურნეობას კომლზე ჰყავდა 1—2 უღელი ხარი, 550 მეურნეობას კი — 10 უღელი. ეს უკანასკნელნი შეადგენდნენ მაზრის სახელმწიფო გლახთა 6%-ს და ფლობდნენ მუშა პირუტყვის 40%-ს. ეს მაშინ, როცა სიღნაღის მაზრის სახელმწიფო გლახთა 48%-ს სულ არ ჰყავდა მუშა პირუტყვი. მათ, ბუნებ-

¹ СХАО. IV, გვ. 789.

² МИЭБГКЗК. V, ч. I, გვ. 115—117.

³ იქვე, ч. 2, გვ. 210.



სასოფლო-სამეურნეო იარაღების გამოფენა თბილისში.

რევია, არც გუთანი გააჩნდათ. კახეთში ქართულ და ქარხნულ გუთნებს ფლობდა მხოლოდ გლეხობის 7 — 10%¹.

კიდევ უფრო მეტი იყო უხარკამეო გლეხობა დასავლეთ საქართველოში. XIX—XX სს-ის მიჯნაზე მუშა პირუტყვი სულ არ გააჩნდა ქუთაისის მაზრაში 7 000 კ., შორაპნის მაზრაში — 11 000 კ., სენაკის მაზრაში — 2 500 კ., ოზურგეთის მაზრაში — 6 700 კომლ გლეხს². ასეთ მეურნეებს ან მეზობელი მდიდარი გლეხების „დახმარება“ უნდა ეთხოვათ ან ბარიით და თოხით ეცოდვილათ თავის პატარა ნაკვეთებზე.

გლეხობის სხვადასხვა ფენას შორის არსებული კონტრასტი ძალიან დიდი იყო. საილუსტრაციოდ მივმართოთ XIX ს-ის 80-იან წლებში ჩაწერილ გლეხთა ბიუჯეტებს.

1884 წ. სიღნაღის მაზრის სოფ. ბოდბეში გიგია კოჭლამაზაშვილის ოჯახის (28 სული) მეურნეობის ფარგლებში ხორბლის ნათესს ეკავა 60 დეს., ქერს — 15 დეს., ფეტვს — 25 დესეტიანა. ოჯახს ჰყავდა 17 ცხენი, 52 ხარ-კამეჩი, 100 ძროხა, 40 უშობელი, 1 300 ცხვარი და 30 ღორი. ოჯახის წევრებთან ერთად მეურნეობაში იყენებდნენ 3 მუდმივ მუშას და შრავლად სეზონურად დაქირავებულთა შრომას. მეურნეობის მთელი შემოსავალი 8 222 მანეთს აღწევდა, სუფთა შემოსავალი კი 3 789 მანეთს

¹ МИЭБГКЗК, V, ч. I, გვ. 98—99, 117—118, 237—238; МИЭБГКЗК, VI, ч. 2, გვ. 282—284.

² Обзор Кутаисской губернии за 1907 г., გვ. 36—37.

შეადგენდა¹. როგორც ვხედავთ, გიგია კოჭლამაზაშვილის შეძლება ბევრ მემამულეს და ვაჭარ-მრეწველს შეშურდებოდა. ასეთი ძლიერი კულაკური კომლები კი იშვიათი გამოჩაყლისი როდი იყო კახეთის სინამდვილეში. პირიქით, გიგიას ოჯახი ტიპიურ კულაკურ ერთეულს წარმოადგენდა და სწორედ ამიტომ მოხვდა „მასალებში“. ამას ცხადყოფს მისი თანასოფელი საშუალო გლეხის ზაქარია ლეკიაშვილის ეკონომიური შეძლების გათვალისწინება.

ზაქარია ლეკიაშვილის ოჯახს (14 სული) დათესილი ჰქონდა 12 დეს. პურის, 5 დეს. ფეტვის და 3 დესეტინა ქერის ყანა, საიდანაც 922 მან. შემოსავალს იღებდა. შემოსავალი მეცხოველეობიდან უდრიდა 457 მან. მევენახეობა-მელვინეობიდან — 45 მანეთს. მეურნეობის მთელი შემოსავალი უდრიდა 1 491 მან. მთელი გასავალი — 1 250 მან. გარდამეტი სუფთა შემოსავლის სახით რჩებოდა 241 მანეთი. ამ ცნობების მიხედვით ზაქარია ლეკიაშვილი საკმაოდ წელმაგარ კულაკად წარმოგვიდგება. აქვს 20 დეს. ნათესი. მრავლად ჰყავს შინაური პირუტყვი და 2 მუდმივ მუშას ქირაობს². მიუხედავად ამისა, იმდროინდელი დამკვირვებელი მას საშუალო გლეხად თვლის. ეს კი, ცხადია იმას მოწმობს, რომ სიღნაღის მაზრაში საკმაოდ იყვნენ ზაქარია ლეკიაშვილზე ეკონომიურად გაცილებით ძლიერი, გიგია კოჭლამაზაშვილის მსგავსი, კულაკები, რომელნიც დიდი რაოდენობით ლებულობდნენ მოგებას და თანდათან აფართოებდნენ მეურნეობას.

სრულიად კონტრასტულ სურათს იძლევა გიგიას თანასოფელელისა და მოგვარის გერმანე კოჭლამაზაშვილის ქონებრივი მდგომარეობის გაცნობა. ამ გლეხის სახლი და ქონება 22 მანეთად იყო შეფასებული. მისი შემოსავალი 136 მანეთს უდრიდა, გასავალი კი 167 მანეთს. დეფიციტი 31 მანეთი გლეხს უნდა დაეფარა ქირაზე მუშაობით³.

იმავე სიღნაღის მაზრაში სოციალური დიფერენციაცია ღრმად იყო წასული რუს კოლონისტთა შორისაც. XIX ს-ის 80-იანი წლების შუახანებისათვის სოფ. ნოვოალექსანდროვკის მდიდარი გლეხის დიმიტრი არეშინის უძრავ-მოძრავი ქონების (მიწის გარდა) ღირებულება 4 302 მან. უდრიდა. ამ გლეხის მეურნეობის ფარგლებში იყო 12 დეს. პურის, 10 დეს. ქერისა და ფეტვის ყანა, 6 დეს. საკუთარი და 40 დეს. იჯარით აღებული სათიბი. ყანა და სათიბი 1 388 მან. შემოსავალს იძლეოდა, მეცხოველეობა, კაპიტალის პროცენტი და სხვა წყაროები კი 660 მანეთს. გლეხის მთელი შემოსავალი 2 048 მან. შეადგენდა, გასავალი 1 388 მან. უდრიდა. მოგების სახით კულაკს რჩებოდა 660 მანეთი. იმავე სოფლის

¹ МИЭБГКЗК, IV, ч. 2, გვ. 331—338.

² იქვე, გვ. 338—347.

³ იქვე, გვ. 344—347.

ჯარიბი გლეხის საფონ ბიკოვის მთელი შემოსავალი კი მხოლოდ 312 მანეთს შეადგენდა¹.

კულაკური მეურნეობები შედარებით მეტი იყო გერმანელ კოლონისტთა სოფლებში. 848 კომლი კოლონისტი ფლობდა 141 დეს. ეზოს, 789 დეს. ვენახს, 1 913 დეს. სარწყავ და 8 415 დეს. ურწყავ სახნავ მიწას, 2 725 დეს. სათიბს, 13 622 დეს. საძოვარს — სულ 27 607 დეს. მიწას. კომლზე საშუალოდ მოდიოდა 1 დესეტინა ეზო და ვენახი, 32 დეს. სხვა მიწა, დაახლოებით 7 სული მსხვილფეხა რქოსანი საქონელი, 2 — 3 ცხენი და სხვ.² მაღალი საშუალო ციფრები თავისთავად იმის მაჩვენებელია, რომ კოლონისტთა მცირე ნაწილს ამ საშუალოზე გაცილებით მეტი მიწა და შინაური პირუტყვი გააჩნდა. მაგრამ სხვადასხვა წყაროდან ისიც კარგად ჩანს, რომ გერმანელ კოლონისტთა შორის თითქმის არ იყვნენ ლატაკები. ისინი ქმნიდნენ საშუალო და კულაკ გლეხთა კონტინენტს.

განსაკუთრებით ძლიერი იყო კულაკობა მეცხოველეობის სპეციალიზებულ რაიონებში — თიანეთისა და დუშეთის მაზრებში.

1885 წლისათვის წოვა თუშეთში სამ უმდიდრეს გლეხს კომლზე ჰყავდა 2 ათას სულზე მეტი ცხვარი, 8 გლეხს — 1 — 2 ათასი, 25 გლეხს — 500 — 1 000, 33 გლეხს — 300 — 500, 137 გლეხს — 100 — 300 სული. 30 კომლს კი სრულიად არ ჰყავდა. ისინი დაქირავებულ მწყემსებად მუშაობდნენ³. დუშეთის მაზრის ზოგიერთ გლეხს 10 ათას სულთან და მეტი ცხვრის ფარები ჰყავდა. მათ შორის განსაკუთრებით გამოირჩეოდნენ სოფ. კაიშაურში შიო კაიშაური, სოფ. დიხჩოში — შიო წიკლაური, სოფ. დუმაცხოში — გერენა აფციაური. მეორე მხრივ, მაზრაში ბლომად იყვნენ გლეხები, რომელთაც სულ არ გააჩნდათ ცხვარი⁴. ღარიბი მთიელები დაქირავებულ მწყემსებად მუშაობდნენ, მდიდართა ფარებს დაატარებდნენ საზაფხულო და საზამთრო საძოვრებზე.

XIX ს-ის 80-იანი წლების ერთი დამკვირვებლის გაანგარიშებით 500 სული ცხვრის მთელი წლიური შემოსავალი (მატყლის, ტყავის, ყველის, ხაშატის და სხვ. სახით) 2300 მანეთს აღწევდა, ხარჯი 1500 მან., ხოლო სუფთა შემოსავალი — მოგება 850 მანეთს შეადგენდა. ამდენად, 10-ათასიანი ფარის მფლობელთა მთელი შემოსავალი 50 ათას მან. უდრიდა, სამეურნეო ხარჯები 31 500 მან., ხოლო სუფთა შემოსავალი, მოგება 17 850 მან. შეადგენდა. 3 — 5 ათასი სული ცხვრის მფლობელთა მთელი შემოსავალი 14 154 მანეთიდან 23 500 მანეთამდე მერყეობდა, სამეურნეო ხარჯები 9 — 15 ათას მან., სუფთა შემოსავალი კი 5 100 — 8 550 მან. უდრი-

¹ МИЭБГКЗК, IV, ч. 2, гл. 247—360.

² იქვე, ч. I, гл. 157—160.

³ იქვე, гл. 452—461.

⁴ იქვე, гл. 56—58.

და. საკმაოდ დიდ მოგებას იღებდნენ აგრეთვე 1—2 ათასი ცხვრის მფლობელები. შეძლებულად ითვლებოდნენ 500—1000 ცხვრის პატრონებიც. ამ მსხვილ ძეურნეობათა ხარჯებში მნიშვნელოვანი იყო დაქირავებული მუშების ხელფასი. ზოგიერთი ბობოლა 50—100 მუშის ექსპლოატაციას ეწეოდა, უფრო მეტს კი 10—20 მუშა ჰყავდა დაქირავებულნი.

დასავლეთ საქართველო პარცელური წვრილი გლეხური მეურნეობის კლასიკურ მხარეს წარმოადგენდა. აქაური გლეხური სამიწათმოქმედო ბურჟუაზია ეკონომიურად აღმოსავლეთ საქართველოს კულაკობაზე უფრო სუსტი იყო. სამაგიეროდ დასავლეთ საქართველოს გლეხობის ზედაფენა ვაცილებით აქტიურად იყო ჩაბმული ვაჭრობა-მრეწველობაში და ამ სახის საქმიანობით ხშირად დიდ შემოსავალს ღებულობდა. ბევრი მათგანი გილიებში ეწერებოდა და ოფიციალური სტატისტიკა მათ ვაჭართა წოდებაში აღრიცხავდა. დასავლეთ საქართველოს სოფელი ვაჭარ-მრეწველთა კონტინენტს დაბა-ქალაქებსაც დიდი რაოდენობით აწოდებდა. სოფლებსა და დაბებში მოქმედ ვაჭარ-ხელოსანთა მნიშვნელოვან ნაწილს, გაწყვეტილი არ ჰქონდა კავშირი სოფლის მეურნეობასთან, ღუქან-სახელოსნო-მალაზიაში საქმიანობას ოსტატურად ათავსებდა სოფლის მეურნეობასთან, ორივე ამ სფეროში იყენებდა დაქირავებულ მუშახელს და თანდათან ზრდიდა თავის ქონება-შემოსავალს.

საქართველოს გლეხობის სხვადასხვა სოციალური ფენის პროცენტული თანაფარდობის დადგენა, მასალების ფრაგმენტულობისა და არასრულფასოვნების გამო ძალიან ძნელია. შეიძლება ითქვას, რომ XIX ს-ის ბოლოსათვის კულაკები შეადგენდნენ დაახლოებით 4 — 5⁰/₀-ს, საშუალო გლეხები — 35 — 40⁰/₀-ს, ღარიბები — 55 — 60⁰/₀-ს. კულაკის ქონება-შემოსავალი ყოველ სულზე 3—4-ჯერ აღემატებოდა საშუალო გლეხის და 10 — 15-ჯერ ღარიბი გლეხის შემოსავალს. ცალკეულ შემთხვევაში ქონებრივი კონტრასტი ვაცილებით მეტი იყო. მაგრამ უფრო არსებითი ხასიათისა ჩანდა სოციალური განსხვავება: კულაკი, როგორც წესი, დამქირავებელი იყო, სხვისი შრომის ექსპლოატაციას ეწეოდა. საშუალო გლეხი შედარებით იშვიათად ქირავდებოდა და კიდევ უფრო იშვიათად ქირაობდა სეზონურ მუშებს. ღარიბი გლეხობა, უმიწაწყლობისა და მუშა პირუტყვის უყოლობის გამო, ისე მცირე მასშტაბის მეურნეობას ეწეოდა, რომ მისი შემოსავალი სანახევროდაც ვერ აკმაყოფილებდა ოჯახის მოთხოვნილებას. სოფლის ეს ნახევრად პროლეტარული და პროლეტარული მასა არსებობის საშუალებებს თავის მინიატურული მეურნეობის ფარგლებს გარეთ ეძებდა და ძირითადად დაქირავებული შრომით პოულობდა.

უმიწაწყლო გლეხები, ბუნებრივია, ცდილობდნენ თავისი ოჯახის, თავის კუთხის ახლოს გაეჩინათ შემოსავლის სხვა წყაროები, ხელს ჰკიდებდნენ შინამრეწველობა-ხელოსნობას, მეურმე-გადამზიდაობას, ებმე-

ბოდნენ ხე-ტყის სარეწებში და სხვ. მაგრამ ხშირ შემთხვევაში გალატაკე-ბული გლეხები ადგილზე სამუშაოს ვერ პოულობდნენ და იძულებული ხდებოდნენ სხვა მხარეებსა და ქალაქებში ეძებნათ არსებობის საშუალებანი.

1867 წელს გარე სამუშაოებზე გავიდა: ქუთაისის მაზრიდან 638, შორაპნის — 810, რაჭის — 389, ზუგდიდის — 460, სენაკის — 475, ლეჩხუმის მაზრიდან — 763 კაცი. მომდევნო პერიოდში, გლეხობის სოციალური დიფერენციაციის გაღრმავებისა და მიმოსვლის საშუალებათა (რკინიგზები) გაუმჯობესების წყალობით, საშოვარზე გასვლის მასშტაბი თანდათან იზრდებოდა. 1892 წელს დასავლეთ საქართველოს 7 მაზრიდან გარე სამუშაოებზე გავიდა 20 880, ხოლო 1897 წელს — 35 ათასი კაცი. საკმაოდ დიდი რაოდენობით გადიოდა საშოვარზე აღმოსავლეთ საქართველოს გალატაკებული გლეხობაც. 1897 წლის აღწერის მომენტში თბილისის გუბერნიის ძირეული მცხოვრებლებიდან ადგილზე არ აღმოჩნდა, სხვაგან იყო წასული 28 846 კაცი¹. უდავოა, მათი უმეტესობა სამუშაოდ იყო გასული, საკუთარ სამუშაო ძალას ყიდიდა სოფლისა თუ ქალაქის ბურჟუა-კაპიტალისტებზე.

მემამულური მეურნეობის კაპიტალისტური ევოლუცია. ჯერ კიდევ რეფორმამდელ ხანაში წარმოებდა საყურადღებო ცდები საბატონო (საბეგრო) მეურნეობის რაციონალურად მოწყობის, კაპიტალისტურ მეურნეობაზე გადასვლისათვის, მემამულური მეურნეობის ბურჟუაზიული ევოლუცია საგრძნობლად დააჩქარა საგლეხო რეფორმამ. „მეურნეობის საბატონო სისტემას, — წერდა ვ. ი. ლენინი, — ძირი გამოუთხარა ბატონყმობის გაუქმებამ. შეირყა ამ სისტემის ყველა მთავარი საფუძველი: ნატურალური მეურნეობა, საბატონო მამულის კარჩაკეტილობა და თვითკმარი ხასიათი... მემამულე უნდა გადასულიყო მეურნეობის კაპიტალისტურ სისტემაზე, რომელიც დამყარებულია... დიამეტრულად საწინააღმდეგო საფუძველებზე. მაგრამ ამგვარი გადასვლა... არ შეიძლებოდა ერთბაშად მომხდარიყო“².

საგლეხო რეფორმის დოკუმენტებიდან კარგად ჩანს, თუ როგორი შიშით მოელოდა თავადაზნაურობა ბატონყმობის გაუქმებას. გლეხთა განთავისუფლება, მუქთი მუშახელის დაკარგვა მათ პრივილეგიური წოდების დაღუპვის დასაწყისად ეჩვენებოდათ. მართალია, მეფის მთავრობამ რეფორმის გატარებისას მაქსიმალურად დაიცვა პრივილეგიური წოდების ინტერესები და ამდენად სინამდვილე არ აღმოჩნდა ისეთი მკაცრი, როგორც თავადაზნაურობა მოელოდა, მაგრამ გარდამავალ პერიოდს ახასია-

¹ ალ. ბენდიანი იშვილი, აგარაული ურთიერთობანი საქართველოში 1890—1917 წწ., თბ., 1965, გვ. 130—131;

² ვ. ი. ლენინი, თხზ., ტ. 3, გვ. 209.

თებდა მთელი რიგი სიძნელები, რომელთა აღმოფხვრას თავად-აზნაურთა ლიდერები იმთავითვე ცდილობდნენ.

1865 წ. აღმოსავლეთ საქართველოს თავადაზნაურობამ თავის წინამძღოლად დიმიტრი ყიფიანი აირჩია. ამ უკანასკნელს კარგად ჰქონდა გათვალისწინებული იაფი კრედიტის მნიშვნელობა და თავადაზნაურობას ურჩია ყმა გლეხთა პირადი განთავისუფლებისათვის მიღებული თანხის ნაწილი გადაედო საადგილმამულო ბანკის დასაარსებლად. დ. ყიფიანმა ბანკის სათანადო პროექტიც შეადგინა, რომლის მიხედვით ახლად დაარსებულ საკრედიტო დაწესებულებას უნდა გაეცა როგორც მოკლევადიანი, ისე გრძელვადიანი სესხები, და, ამდენად, კომერციული და საადგილმამულო ბანკის ფუნქციები ერთდროულად შეესრულებინა. დავა და კამათი ბანკის ხასიათის გარშემო დიდხანს გაჰიანურდა. 1874 წ. 7 მაისს დამტკიცდა თბილისის სათავადაზნაურო-საადგილმამულო ბანკის წესდება. ერთი წლის შემდეგ მოქმედება დაიწყო ქუთაისის ბანკმაც.

ქართველი თავადაზნაურობა ბანკს დიდი იმედითა და სასოებით მოელოდა. იგი დარწმუნებული იყო, რომ საკრედიტო დაწესებულება განკურნავდა შემამულური მეურნეობის ყველა წყლულს. თავად-აზნაურთა დიდ ნაწილს ბანკი წარმოდგენილი ჰქონდა საქველმოქმედო დაწესებულებად, საიდანაც სესხის მიღება ადვილი იქნებოდა, ხოლო თავნისა და პროცენტის დაფარვაზე დიდად არავინ შეაწუხებდათ. თბილისის საადგილმამულო ბანკის გამგეობის თავმჯდომარე ი. ჭავჭავაძე ასეთ პირებს თავიდანვე აფრთხილებდა, რომ კრედიტი ორლესული მახვილია; ბანკიდან გატანილი სესხი მხოლოდ იმას დაეხმარება, ვინც ყაირათიანად, მეურნეობის გაუმჯობესებისათვის მოიხმარს თანხას, მფლანგველ და მოქეიფე დიდკაცებს კი სამარეს გაუთხრისო. მაგრამ ეს გაფრთხილება მემამულეთა დიდი ნაწილისათვის დარჩა ხმად მღალადებლისა უდაბნოსა შინა.

ქართველ მემამულეთა უმეტესობა სესხებს ყოველდღიური საჭიროებისათვის იყენებდა და ზოგჯერ უმიზნოდაც ხარჯავდა. ამიტომ ისინი სესხის დაფარვას ვერ ახერხებდნენ და ბანკში დაგირავებულ მიწებს კარგავდნენ. ამან შეამფოთა თავადაზნაურობა და მათ ვითარცა ბანკის დამფუძნებლებმა, გამგეობას განსაკუთრებული შეღავათები მოსთხოვეს. ი. ჭავჭავაძემ მიუღებლად ჩათვალა თავად-აზნაურთა პრეტენზიები, დასაბუთა, რომ კაპიტალისტურ ყაიდაზე გამართულ საადგილმამულო ბანკს არ შეუძლია უგულვებლყოს კაპიტალისტური საკრედიტო ურთიერთობის კანონები და თავადაზნაურობას შეღავათები მიანიჭოსო. ისიც დიდი მიღწევაა, რომ ამ კაპიტალისტური დაწესებულების მოგების დიდ ნაწილს საზოგადოების საერთო საჭიროებისათვის ვხარჯავთ, ეროვნული საქმის წარმატებისათვის ვიყენებთო¹.

¹ პ. რ ა ტ ი ა ნ ი, ილია ჭავჭავაძე პოლიტიკურ-ეკონომიური შეხედულებანი, ტ. II, თბ., 1957, გვ. 90—91.

მიწის საკუთრების მონოპოლია საშუალებას აძლევდა თავადაზნაურობას ძველი წესით განეგრძო მეურნეობა. უშუალო მწარმოებელი მასის მტირემიწიანობის პირობებში მეტად ხელსაყრელი გახდა ადგილ-მამულის იჯარით გაცემა. მემამულურ მეურნეობაში კი, როგორც ვ. ი. ლენინი გვასწავლის, „მიწის იჯარით გაცემას საწინააღმდეგო მნიშვნელობა აქვს: ხან ეს არის მეურნეობის გადაცემა სხვა პირისათვის და სამაგიეროდ რენტის მიღება, ხან კი არის საკუთარი მეურნეობის წარმართვის წესი, მუშახელით მამულის უზრუნველყოფის საშუალება“¹.

ქართველ მემამულეთა ერთი ნაწილი მიწას იჯარით სცემდა პროდუქტადი თუ ფულადი რენტის მიღებისათვის, მეორე ნაწილი — მუქთი მუშახელით მეურნეობის უზრუნველყოფისათვის. უმრავლესობა კი იჯარას ორივე დანიშნულებას აძლევდა — რენტასაც იღებდა და საწარმოო მოგებასაც.

მთელი ქვეყნის მასშტაბით ყმის და რეფორმის შემდეგ სხვადასხვა კატეგორიის ვალდებულ გლეხთა შრომა, რა თქმა უნდა, არარენტაბელური იყო. ის ვერ უზრუნველყოფდა ნაციონალური შემოსავლის ზრდას. მაგრამ ერთია ნაციონალური შემოსავალი და მეორე ცალკეულ კერძო მეურნეობათა მოგება. თავისუფალი მუშახელის გამოყენებისას შრომის ნაყოფიერება უფრო მეტია, მაგრამ ნაციონალური შემოსავალი გარკვეული პროპორციით იყოფა ხელფასად და კაპიტალისტის მოგებად. არათავისუფალი, მუქთი, შრომის მთელ ნაყოფს კი მემამულე ეპატრონება და ამდენად ეს შრომა მისთვის რენტაბელურია. ამაში პრაქტიკულად დარწმუნდნენ ქართველი მემამულეები და მიუხედავად იმისა, რომ გლეხები თითქმის ყოველთვის მოითხოვდნენ შრომამოგების ფულით შეცვლას, შრომამოგება იმდენად ხელსაყრელი იყო მემამულეებისათვის, რომ ისინი არა თუ ცვლიდნენ, არამედ ცდილობდნენ თანდათან გაეზარდათ მისი მასშტაბი.

XIX ს-ის 80-იან წლებში ი. მუხრან-ბატონის მამულში მცხოვრები 74 კომლი ხიზანი, მაგალითად, მიწით სარგებლობის საზღაურს იხდიდა როგორც პროდუქტებით, ისე შრომით. მიწის რაოდენობის შესაბამისად ისინი იხდიდნენ კომლზე 10—53 მანეთის მარცვლეულს და მემამულის მეურნეობაში მუშაობით ქმნიდნენ 16—77 მანეთის ღირებულებას. იმდროინდელი დამკვირვებლის ქ. ვერმიშევის განცხადებით პროდუქტადი გამოსაღები იყო ნორმალური რენტა, დამატება მუშაობის სახით კი წარმოადგენდა არა მიწით სარგებლობის ეკვივალენტს, არამედ შედეგი იყო გარკვეული სავალდებულო ურთიერთობისა². მუხრან-ბატონის მარცვლეულის

¹ ვ. ი. ლენინი, თხზ., ტ. 3, გვ. 218.

² МИЭБГКЗК, IV, გვ. 443.

მეურნეობაში (200 დეს.) ხიზნებისა და მოიჯარე გლეხების შრომით (შრომამიგებით) სრულდებოდა ხენის სამუშაოთა 42,6%, თესვისა და ყანის მოვლის სამუშაოები მთლიანად, მოსავლის აღების სამუშაოთა. 70%, ნამჯის დადგმის სამუშაოთა 64,3%, გალუწვისა — 66%, დანარჩენ სამუშაოებს ასრულებდნენ დაქირავებული მუშები. მუხრან-ბატონი, როგორც ვხედავთ, მარცვლეულის მეურნეობაში ძირითადად ვალდებულ გლეხთა შრომასა და ინვენტარს ემყარებოდა. მაგრამ თვით მემამულესაც საკმაო რაოდენობით გააჩნდა მუშა-პირუტყვი (61 ცხენი, 68 ხარ-კამეჩი) და ინვენტარი (ინგლისური გუთნები, სალექი, სანიავებელი და სხვა მანქანები). ი. მუხრან-ბატონის მეურნეობაზე დაკვირვებამ ვერძომიშვევი იმ დასკვნამდე მიიყვანა, რომ თუ ქართული გუთნები და სხვა ძველი ინვენტარი ინგლისური გუთნებითა და ახალი მანქანებით შეიცვლებოდა, მოხდებოდა ვალდებულ გლეხთა შრომისა და ახალი ტექნიკის შეერთება, მაშინ მუქთ შრომაზე დამყარებულ ამ მეურნეობას ვერავითარ კონკურენციას ვერ გაუწევდა დაქირავებულ შრომაზე დამყარებული მეურნეობები¹.

ასეთი ხელსაყრელი კომბინაციის შესაძლებლობა მეტ-ნაკლებად სხვა მემამულეებსაც გააჩნდა. ამდენად, მეურნეობის შრომამიგებითი სისტემიდან კაპიტალისტურ სისტემაზე გადასვლას აძნელებდა არა ის, რომ თითქოს ქართველმა მემამულეებმა ალლო ვერ აუღეს დროის მოთხოვნილებას, ვერ გამოიჩინეს მეურნეობის რაციონალურად მოწყობის უნარი, არამედ ამ გადასვლის სიძნელეებს განაპირობებდა ობიექტური ფაქტორები — მიწის საკუთრებაზე თავად-აზნაურთა მონოპოლია, იჯარის ხელსაყრელობა და მეურნეობის შრომამიგებითი სისტემის რენტაბელობა. ამიტომ იყო, რომ ვ. ი. ლენინი სოფლის მეურნეობაში კაპიტალიზმის თავისუფალი და სწრაფი განვითარების წინაპირობად თვლიდა მსხვილი თავადაზნაურული მამულების კონფისკაციას².

მემამულური მეურნეობის რაციონალურად მოწყობას აფერხებდა აგრეთვე საგვარეულო მიწათმფლობელობა და მიწების გაუმიჯნაობა. ბევრ მემამულეს XIX ს-ის ბოლოსაც კი არ გააჩნდა მიწის საკუთრების დოკუმენტი. საკუთრების დაუმტკიცებლობა მემამულეებში კლავდა ხვალისდელი დღის რწმენას, მეურნეობის გაუმჯობესების სტიმულს, აძნელებდა საიპოთეკო კრედიტის მიღებასაც. ასეთ მიწათმფლობელებს ბანკები, როგორც წესი, სესხს არ აძლევდნენ. ისინი სავაჭრო კრედიტით სარგებლობდნენ, რომლის პროცენტი 4—5-ჯერ მეტი იყო საბანკო კრედიტის პროცენტზე.

¹ Х. Вермишев, Очерк хозяйства ген. лейт. кн. Ивана Константиновича Багратион-Мухранского, გვ. 27.

² ვ. ი. ლენინი, თხზ., ტ. 13, გვ. 360—361.

1903 წლისათვის მარტო აღმოსავლეთ საქართველოს თავადაზნაურობას დაგირავებული ჰქონდა თავისი მიწების 65 პროცენტი (350 000 დეს. ბანკებში და 302 000 დეს. მევანშეებთან). თავადაზნაურთა მთელი ვალი 11,3 მლნ მანეთს უდრიდა¹. ისინი თავნისა და სარგებლის დასაფარავად ყოველწლიურად მარტო ბანკებს უხდიდნენ 800 ათას მანეთს. ბევრი თავადაზნაურის შემოსავალი სესხის და მისი სარგებლის დასაფარავადაც კი არ იყო საკმარისი. ისინი ნომინალურად რჩებოდნენ მიწის მესაკუთრეებად. ფაქტიურ მესაკუთრეს წარმოადგენდა კრედიტორი (ბანკი და მევახშე), რომელიც არსებითად ითვისებდა მიწის რენტას პროცენტის სახით. მემამულეთა მნიშვნელოვანი ნაწილი ამ ნომინალურ საკუთრებასაც კარგავდა. მათი მიწა-მამული გლეხობისა და ბურჟუაზიის ხელში გადადიოდა.

XIX ს-ის 80-იან წლებში ქართველი თავადაზნაურობა ფლობდა 2 მლნ დესეტინაზე მეტ მიწას, 1905 წლისათვის კი მის საკუთრებაში რჩებოდა 1 589 548 დესეტინა. თავადაზნაურთა უმეტესობა მცირემიწიანი იყო. საქართველოს (აჭარა-აფხაზეთის გამოკლებით) 6 663 „მემამულე“ ოჯახზე ფლობდა 1-დან 5 დესეტინამდე მიწას, 6370 მემამულე — 5—25 დეს. 2304 მემამულე — 25—100 დეს. 1299 მემამულე 100—500 დეს. 443 მემამულე — 500 დესეტინაზე მეტს. ეს უკანასკნელნი შეადგენდნენ მემამულეთა 2,6%-ს და ფლობდნენ თავადაზნაურთა მთელი მიწის ფონდის 68%-ს².

გარდამავალი პერიოდის სიძნელების მიუხედავად მემამულური მეურნეობა შედარებით ადვილად ეგუებოდა ბაზრის მოთხოვნილებას, ღებულობდა სავაჭრო ხასიათს. XIX ს-ის 80—90-იან წლებში ქართველ მემამულეებს ბაზარზე გაჰქონდათ 3—4 მლნ/ფუთი მარცვლეული — მიღებული პროდუქციის 45—50%. სასაქონლო პროდუქციას ძირითადად მსხვილი მემამულეები იძლეოდნენ. მცირემიწიან თავადაზნაურთა მეურნეობების საქონლიანობა კი სრულიად უმნიშვნელო იყო. მომდევნო ხანაში მარცვლეულის ბაზრისათვის წარმოება აღარ იყო ხელსაყრელი. მემამულეები თანდათან მეტ ყურადღებას აქცევდნენ მევენახეობა-მეღვინეობას, მებაღეობას, მეთამბაქოეობას და სხვ. დარგებს. სწორედ ამ სავაჭრო-სამრეწველო დარგებში იქმნებოდა ძირითადად რაციონალური მეურნეობები.

ვისაც შეძლება ჰქონდა, მიწა საკმარისად გააჩნდა და თანაც ადგილმდებარეობა ხელს უწყობდა; ყოველნაირად ცდილობდა ბალ-ვენახების გაფართოებას. XIX ს-ის 80—90-იან წლებში ქართლ-კახეთში არსებული ვენახების 24—26% თავადაზნაურობას ეკუთვნოდა. ბევრი კახელი და ქართლელი მემამულის ზვრები 40—50 დესეტინაზე იყო გადაჭიმული³.

¹ СССРЗТКГ, გვ. XXX—XXXIX.

² იქვე, გვ. XI—XXXIX

³ Сборник сведений по виноградарству и виноделию на Кавказе, вып. VII, 1896, გვ. 34, вып. VIII, გვ. 26—27.

საკმაოდ დიდ ყურადღებას აქცევდა მევენახეობა-მელვინეობის განვითარებას დასავლეთ საქართველოს თავადაზნაურობაც.

მართალია, მევენახეობაშიც იყო გამოყენებული მოიჯარე და ვალდებული გლეხების შრომა, მაგრამ მსხვილი მევენახე-მელვინეები უფრო დიდი რაოდენობით იყენებდნენ დაქირავებულ მუშახელს. კახელი მემამულეები ყოველ ოთხ დესეტინა ვენახზე ქირაობდნენ ერთ მუდმივ მუშას, მეტწილად დასავლეთ საქართველოდან ჩამოსულ „მეზვრეებს“, რომელნიც კარგ სპეციალისტებად ითვლებოდნენ. მეზვრე წლიურად 60—100 მანეთს იღებდა, ამასთან ერთად, დამქირავებლის ხარჯზე იკვებებოდა და იმოსებოდა. მემამულეები უფრო დიდი რაოდენობით ქირაობდნენ დღიურ, სეზონურ მუშებს. დაქირავებულ შრომაზე დამყარებულ ასეთ მეურნეობებში ერთი დესეტინა ვენახის მოვლა-დამუშავების ხარჯი საშუალოდ 152 მანეთს უდრიდა; მისი მთელი შემოსავალი კი 400—500 მანეთს შეადგენდა¹.

კახეთში განსაკუთრებით კარგი ხარისხის ღვინოს ამზადებდნენ ჰავჭავაძეები (წინანდალში, მუკუხანსა და ყვარელში), ანდრონიკაშვილები (გურჯაანსა და ბაკურციხეში), ამატუნი, აფხაზი და ვაჩნაძე (კარდანახში), ჯანდიერი (ვაჩნაძიანში), ვახვახიშვილები (ყურდღელაურში), ჩოლოყაშვილები (ახმეტაში) და სხვ.²

ზემოჩამოთვლილი მემამულეები ღვინოს კახური წესით აყენებდნენ და პროდუქციას ძირითადად ადგილობრივ ბაზრებზე ასაღებდნენ. გამოხაკლისი იყო ზ. ჭორჯაძე, რომელმაც ჭერ კიდეც XIX ს-ის 70-იან წლებში დაიწყო ღვინის ევროპული წესით დაყენება. სოფ. საბუეში ზ. ჭორჯაძეს ჰქონდა ყველაზე სრულყოფილი ევროპული ტიპის მიხედვით გამართული ღვინის ქარხანა. „როდესაც ამ მეურნეობას ვათვალიერებდით, — წერდა მ. ბალასი, — ჩვენს თვალს ახარებდა სანიმუშოდ და ფართოდ დაყენებული მელვინეობის საქმე. თავადმა ჭორჯაძემ პირველმა დაიწყო კახური ღვინოების დამზადება ევროპული წესით, გააცნო რუსეთს ამ ღვინოების მაღალი ღირსებები, მიიღო მთელი რიგი პირველხარისხოვანი ჯილდოები რუსეთის გამოფენებზე მოსკოვსა და ოდესაში და ბოლოს პარიზის უკანასკნელ გამოფენაზე აიძულა საფრანგეთი სერიოზული ყურადღება მიექცია კახური ღვინოებისათვის და ისინი თავისი მაღალი თვისებებით დაეყენებინა ბურგუნდიული ღვინოების გვერდით“. მ. ბალასი ერთ დონეზე აყენებდა ზ. ჭორჯაძის და უფრო გვიან შექმნილ საუფლისწულო უწყების მეურნეობას, სადაც ღვინოებს აგრეთვე ევროპული წესით აყენებდნენ და აღნიშნავდა, რომ ეს ორი მეურნეობა ტექნიკური აღჭურვილობით არ

¹ Сборник сведений по виноградарству и виноделию на Кавказе, вып. VI. 1896, გვ. 74—75.

² М. Б а л а с, Виноделие в России, ч. III, С.-П. 1897, გვ. 27—28

ჩამოუვარდებო ევროპაში არსებულ ყველაზე მსხვილ და ყველაზე უკეთეს ასეთსავე საწარმოებს¹.

კახეთის ყველაზე მსხვილი მიწათმფლობელი დ. ჭავჭავაძე იყო. მას ეკუთვნოდა 15 ათასი დესეტინა მიწა. დ. ჭავჭავაძის მამულებს (წინანდალი, მუკუზანი, ურიათუბანი, ნაფარეული და სხვ.) მოწვეული მმართველები განაგებდნენ. სათიბ-საძოვრები და სახნავი მიწების დიდი ნაწილი იჯარით იცემოდა. ვენახებს, რომლის ფართობი 300 დესეტინას აჭარბებდა. უფრო ხშირად თვით მემამულე ამუშავებდა შრომავალდებულ გლეხებისა და დაქირავებული მუშების გამოყენებით. დ. ჭავჭავაძის შემოსავლის მთავარი წყარო მევენახეობა-მელვინეობა იყო. მის მეურნეობაში ითვლებოდა 11 მარანი 15 საწნახლითა და 371 ქვევრით. წლიურად ამზადებდნენ 20—30 ათას ვედრო ღვინოს. გარდამავალი პერიოდის სიძნელებმა ეს მსხვილი მეურნეობა დაღუპვის კარამდე მიიყვანა. 1886 წელს დ. ჭავჭავაძის მცირეწლოვან მემკვიდრეთა მამულები საუფლისწულო უწყებამ იყიდა 1 მილიონ მანეთად².

ივანე მუხრანბატონი თბილისის გუბერნიის სხვადასხვა რაიონში ფლობდა 25 794 დეს. მიწას. XIX ს-ის 80-იან წლებში ი. მუხრანბატონი საკუთარი მეურნეობიდან ღებულობდა 7—8 ათას ფუთ მარცვლეულს, 40—50 ათას ფუთ თივას. იგი საკმაოდ ფართო მასშტაბით მისდევდა მეცხოველეობას; ჰყავდა 147 ძროხა, 7 500 ცხვარი, 300 ღორი, 68 ხარ-კამეჩი და 61 ცხენი³. ი. მუხრან-ბატონის მეურნეობის წამყვანი დარგი მაინც მევენახეობა-მელვინეობა იყო. ვენახებს 430 დეს. ეკავა. მემინდვრეობაში, მესაქონლეობასა და მევენახეობაში ი. მუხრან-ბატონი იყენებდა როგორც ვალდებულ გლეხთა (უმეტესად), ისე დაქირავებული მუშების შრომას. მელვინეობა კი წმინდა კაპიტალისტურ ყაიდაზე ჰქონდა გამართული.

თავდაპირველად ი. მუხრან-ბატონი ღვინოებს ქართული წესით აყენებდა. 1876 წ. მან საფრანგეთიდან გამოიწვია და დაიქირავა მელვინეობის სპეციალისტები, სოფ. მუხრანში ააგო. 100 ათასი ვედრო ტევადობის სარდაფი და ღვინის დაყენების ევროპულ წესზე გადავიდა. 1882 წ. მოსკოვის გამოფენაზე ი. მუხრან-ბატონის ღვინომ მიიღო უმაღლესი ჯილდო—სახელმწიფო გერბი. ი. მუხრან-ბატონის მეურნეობაში ყველაზე დიდშემოსავლიანი დარგი მელვინეობა იყო. 1886 წელს, მაგალითად, ი. მუხრან-ბატონმა 30 ათასი ვედრო ღვინისა და 470 ვედრო სპირტის გაყიდვით მიიღო 424 570 მან. შემოსავალი. მეურნეობას ხარჯიც დიდი ჰქონდა. მარ-

¹ М. Балас, Виноделие в России, ч. III, гл. 33, 55, 108.

² ЦГИА СССР, ф. 515, оп. 81, д. 968, лл. 9—42; სტია, ფ. 17, საქ. 4888, ფურც. 34—37.

³ Х. Вермишев, Очерк хозяйства ген. лейт. кн. Ивана Константиновича Багратион-Мухранского, гл. 31.

ტო მუღმივი მუშების ხელფასად გაიცა 44 ათასი მან., მეღვინეობის სპეციალისტებზე — 13 400 მან. ვაჭრობის ადმინისტრაციაზე — 16 446 მან., პროდუქციის გამსაღებელ ბაზრებამდე გადატანა დაჯდა 24 ათასი მანეთი (ი. მუხრან-ბატონს საწყობ-მალაზიები ჰქონდა თბილისში, მოსკოვსა და პეტერბურგში). მეღვინეობის მთელი ხარჯები უდრიდა 123 277 მანეთს, სუფთა შემოსავალი — მოგება კი 121 423 მანეთს¹.

ი. მუხრან-ბატონმა შეადგინა მეურნეობის კიდევ უფრო გაფართოების გეგმა-პროექტი და კომპანიონების ძებნაც დაიწყო. მაგრამ 1893 წ. იგი გარდაიცვალა. ივანეს მემკვიდრე კონსტანტინე მეურნეობის წარმოებაში ვერ იჩენდა საკმაო უნარს. 1899 წელს კ. მუხრან-ბატონმა საუფლისწულო უწყებას 745 ათას მანეთად მიჰყიდა 8456 დეს. მიწა, აგრეთვე ღვინის ქარხანა და სარდაფი იქ დაცული 65 000 ვედრო ღვინით².

მსხვილი რაციონალური მეურნეობა გამართა სოფ. სალხინოში (სამეგრელო) სალომე დადიანი-მიურატმა. იგი განსაკუთრებულ ყურადღებას მუშავებდა-მეღვინეობას აქცევდა. ს. დადიანი-მიურატის მეურნეობაში 1895 წელს ვენახებს ეკავა 40 დეს., 1901 წ. — 60 დესეტინა. მემამულე თანდათან აღიდებდა რამისა და დაფნის პლანტაციების ფართობსაც. მეურნეობა ძირითადად დაქირავებულ მუშახელს ემყარებოდა. ვალდებულ გლეხთა შრომა იქ შედარებით ნაკლებად გამოიყენებოდა³.

ზოგიერთმა მონასტერმა, მართალია, რეფორმის შემდეგაც შეინარჩუნა ადგილ-მამული, მაგრამ დაკარგა ყმა გლეხები, რამაც აიძულა შეეცვალა მეურნეობის წარმართვის წესი. განსაკუთრებით დიდ წარმატებას მიაღწია მეურნეობის რაციონალურად მოწყობის, მის კაპიტალისტურად გარდაქმნის საქმეში ახალი ათონის მონასტერმა, რომლის საკუთრებაშიც იყო 3898 დეს. მიწა. ეს მონასტერი XIX ს-ის 70-იან წლებში დააარსეს თურქეთიდან ჩამოსულმა რუსმა და ქართველმა ბერებმა. მათ ენერგიულად მოჰკიდეს საქმეს ხელი, მოკლე ხანში ბუჩქნარი და საძოვარი მაღალნაყოფიერ კულტურულ ნაკვეთებად გადააქციეს. XIX—XX სს-ის მიჯნაზე ახალი ათონის მონასტრის მეურნეობაში ვენახებს ეკავა 40 დეს., ბაღებს — 107 დეს., ბოსტანს — 15 დეს., სახნავ-სათესს — 143 დეს., სათიბს — 210 დესეტინა. დანარჩენი იყო საძოვარი და ტყე.

ახალი ათონის მონასტრის მეურნეობაში ყოველწლიურად ღებულობდნენ 3—5 ათას ფუთ ყურძენს, 3—4 ათას ფუთ ზეთისხილს, დიდი რაოდენობით მანდარინს, ფორთოხალს, ლიმონს, ვაშლს, ქლიავს და სხვ. ბერებს მაღალ დონეზე ჰქონდათ დაყენებული მესაქონლეობაც. მათ ფერ-

¹ Б. Николадисის არქივი, საბუთი №№ 40 149, 4—150.

² ЦГИА СССР, ф. 515, оп. 44, д. 174, лл. 1—6.

³ Сборник сведений по виноградарству и виноделию на Кавказе, вып. IV, 1896,

მაში 500 სული მსხვილფეხა რქოსანი, პირუტყვი და ცხენი ითვლებოდა. დიდ შემოსავალს აძლევდა მონასტერს აგრეთვე ხე-ტყის მრეწველობა და მრავალრიცხოვანი სახელოსნოები. ახალი ათონის მონასტრის მეურნეობა გამოირჩეოდა მაღალტექნიკური აღჭურვილობით. მის საჭიროებას ემსახურებოდა 165 ცხენისძალიანი ჰიდროელსადგური, ვიწროლიანდაგიანი რკინიგზა ორთქლმავლითა და მრავალი ვაგონით, ელექტროწვევაზე გადაყვანილი დაკიდებული რკინიგზა და საპაერო-საბაგირო გზა.

ახალი ათონის მონასტრის მამული დაფარული იყო საცხოვრებელი და სამეურნეო ნაგებობების ფართო ქსელით. მონასტრის კომპლექსი ქალაქის შთაბეჭდილებას ტოვებდა. ბერებისა და მუშების საცხოვრებელ სახლებს, ფოსტა-ტელეგრაფს, საავადმყოფო-აფთიაქს, სამზარეულო-სასადილოებს, პურსაცხობს, წისქვილს, თავლა-ბოსლებს, მარან-სარდაფს, სახელოსნოებს და სხვა შენობა-ნაგებობებს ერთმანეთთან აკავშირებდა 8—9 ვერსი სიგრძის ცხენის რკინიგზა. ლიანდაგი გრძელდებოდა ზღვისპირამდე, სადაც მონასტერს ჰქონდა საკუთარი ნავსადგური და თევზსაჭერი ფლოტილია. ბერებს თევზის სარეწი ჰქონდათ თურმე კასპიის ზღვაზეც და იქაურ მაღალხარისხოვან თევზსა და ხიზილალას დიდი რაოდენობით გზავნიდნენ გასაყიდად რუსეთის ქალაქებში. მონასტრის მეურნეობაში ყოველდღიურად 300-მდე მლოცველი მუშაობდა, რომელნიც თითქმის უხელფასოდ (ისინი დღეში 10—20 კაპიკს და სასმელ-საჭმელს სჯერდებოდნენ) ემსახურებოდნენ სულიერ მამებს. მონასტერს დიდი რაოდენობით ჰყავდა დაქირავებული, აგრეთვე მუდმივი კვალიფიციური მუშები, რომელნიც დასაქმებული იყვნენ რკინიგზაზე, საბაგირო გზაზე, ელსადგურებში, სახელოსნოებში, თევზსაჭერზე და სხვ. ობიექტებზე¹.

საქართველოში ერთ-ერთი ყველაზე უფრო მსხვილი მიწათმფლობელი და მეურნე რომანოვთა სამეფო საგვარეულო იყო. XIX ს-ის 80—90-იან წლებში საუფლისწულო უწყებამ საქართველოში იყიდა 90 ათასი დეს. მიწა. მის საკუთრებაში გადავიდა ჭავჭავაძის, მუხრან-ბატონის, ორბელიანის, სვიატოპოლკ-მირსკის და სხვ. მამულები.

საუფლისწულო უწყებამ კახეთსა და ქართლში შექმნა მევენახეობა-მეღვინეობის; ბორჩალოს მაზრაში — მებამბეობისა და მეცხოველეობის; აჭარაში კი მეჩაიეობის მსხვილი სპეციალიზებული მეურნეობები, რომლებსაც ცალკე სამმართველოები განაგებდნენ. ყველა სამუშაო სრულდებოდა შტატიანი მოსამსახურეებისა (მმართველები, აგრონომები, მეღვინე ტექნოლოგები, ბუღალტერ-მოლარეები და სხვ.) და დაქირავებული მუშების მიერ. XIX — XX სს-ის მიჯნაზე საუფლისწულო მეურნეობებში 500—600 მუდმივი და 2—3 ათასი სეზონურად დაქირავებული მუშა შრომობდა. ტექნიკური აღჭურვილობის, აგროწესების გაუმჯობესების და

¹ სსცია, ფ. 1215, ანაწ. 1, საქ. 1300, ფურც. 2—4.

შრომის ინტენსივობის გაძლიერების პარალელურად ამ მეურნეობათა შემოსავალი თანდათან იზრდებოდა. XIX ს-ის ბოლოსათვის საუფლისწულო მეურნეობები ბაზრებს ყოველწლიურად აწოდებდა 100 — 150 ათას ვედრო მაღალხარისხოვან ღვინოს, 15—20 ათას ფუთ ბამბას, 10—12 ათას გირვანქა ჩაის მზა პროდუქციას, საკმაო რაოდენობით ციტრუსებსა და მეცხოველეობის პროდუქტებს. საუფლისწულო მეურნეობების ყოველწლიური მთელი შემოსავალი 1 მლნ მანეთს უდრიდა, სუფთა შემოსავალი კი 500 ათას მანეთს აჭარბებდა¹.

მეურნეობის რაციონალურად დაყენების, მისი კაპიტალისტურად გარდაქმნის საქმეში დიდ წარმატებას მიაღწიეს აგრეთვე სულხანიშვილებმა, სუმბათაშვილებმა, ნაკაშიძეებმა, შერვაშიძემ, რატიშვილმა, წულუკიძემ, მიხეილ რომანოვმა და სხვ. მემამულეებმა. ყველა მათგანი მეტ-ნაკლები მასშტაბით იყენებდა დაქირავებულ მუშახელს.

ვაჭარ-მრეწველთა კაპიტალისტური მეურნეობები სოფლად. კაპიტალისტურ ურთიერთობათა განვითარების ერთ-ერთი გამოხატულება და შედეგი მესამე წოდების ზედაფენის ბურჟუაზიულ კლასად ფორმირება იყო. ამ ახალი კლასის სამოქმედო სარბიელს მარტო ვაჭრობა-მრეწველობა და ქალაქი როდი წარმოადგენდა. ბურჟუაზია საკმაო აქტიურობას იჩენდა სოფლადაც. თანდათან ზრდიდა თავის მიწათმფლობელობას და კაპიტალის მნიშვნელოვან ნაწილს სოფლის მეურნეობაში აბანდებდა.

მიწის მობილიზაცია ვაჭარ-მრეწველთა ხელში საკმაოდ სწრაფად მიმდინარეობდა. XIX—XX სს-ის მიჯნაზე საქართველოში არათავაღზნაურული წარმოშობის კერძო მესაკუთრენი ფლობდნენ 500 ათას დესეტინა მიწას, მთელი კერძო მესაკუთრული მიწების (გლეხთა მიწების გამოკლებით 25% უმრავლესობა წვრილი მფლობელი იყო. საშუალო და მსხვილ მესაკუთრეთაგან 821 მფლობელს ჰქონდა ოჯახზე 25—100 დეს. 433 მფლობელს — 100—500 დეს. 116 მფლობელს — 500 დესეტინაზე მეტი მიწა². ამ მიწათმფლობელებმა, აგრეთვე ბურჟუაზია მოიჯარებმა საკმაოდ ბევრი კაპიტალისტური მეურნეობა შექმნეს სოფლად.

დიდვაჭარი კ. პოპოვი, რომელიც აჭარაში 300 დეს. მიწას ფლობდა, ჩაის კულტურის დანერგვის ერთ-ერთი პიონერი იყო. მან თავის ხარჯით რამდენიმე სამეცნიერო ექსპედიცია გაგზავნა აღმოსავლეთის ქვეყნებში. შეისწავლა ჩაის მეურნეობა და პრაქტიკულად იყენებდა მიღებულ ცოდნას. 1892-დან 1902 წლამდე კ. პოპოვმა თავის მამულში დააბანდა 2 მილიონამდე მანეთი; ამოაშრო ქაობები, გაიყვანა გზა-ბილიკები, ააგო

¹ А. С. Бендианишвили, Грузинская деревня в 1864—1917 гг., Автореферат докторской диссертации, 1968, с. 62.

² СССРЗТКГ, с. XIV.

მრავალი საცხოვრებელი და სამეურნეო ნაგებობა, გააშენა 140 დეს. ჩაის პლანტაცია¹. პოპოვის მეურნეობაში ყოველწლიურად 200—400 კაცი შრომობდა. მისი ჩაის ფაბრიკა ყოველწლიურად უშვებდა 50—60 ათას გირვანქა მზა პროდუქციას. საკმაო შემოსავალს აძლევდა პოპოვის სანერგე და ციტრუსოვანთა ბაღი².

საქართველოში ერთ-ერთი უმსხვილესი კაპიტალისტური მეურნეობის ორგანიზატორი ვაჭარი ალექსანდრე ანანოვი იყო. მან ჯერ კიდევ 1860 წ. იმერეთში იყიდა 5 ათასი დეს. მიწა, შეიძინა ქარხნული გუთნები, სათესი მანქანები, ბამბის საწმენდი ჯინები და რაციონალურად გამართა მეურნეობა. მიუხედავად ამისა ანანოვი მიწის უმეტეს ნაწილს იჯარით სცემდა და მიწის რენტა იყო მისი შემოსავლის მთავარი წყარო. ამ მეურნეობის ისტორიაში მკვეთრი გარდატეხა ხდება XIX ს-ის 90-იან წლებში, როცა მას სათავეში ჩაუდგნენ საფრანგეთში უმაღლესგანათლებამიღებული მიხრან და აბგარ ალექსანდრეს ძე ანანოვები. მეღვინე ტექნოლოგმა მიხრანმა თავის გამგებლობაში მევენახეობა-მეღვინეობა აიღო, მეტყევე ინჟინერმა აბგარმა კი ხე-ტყის დამზადებას მოჰკიდა ხელი.

1897 წ. ანანოვების ვარციხის მამულში ვაზის სანერგეს 15 დეს., ხოლო ვენახს 20 დეს. ეკავა. რამდენიმე წლის შემდეგ ვენახის ფართობმა 137 დესეტინას მიაღწია. მ. ანანოვმა ააგო სამსართულიანი ვრცელი სარდაფი ვარციხეში, სარდაფ-საწყობები ქ. ქუთაისსა და დაბა ყვირილაში, მოაწყო შამპანურისა და კონიაკის ქარხნები. მევენახეობა-მეღვინეობაში ანანოვმა დააბანდა 1,5 მლნ მანეთი.

მ. ანანოვი თავის ქარხნებსა და სარდაფებში ამუშავებდა და აძველებდა არა მარტო საკუთარი ზვრების მოსავალს, იგი მეზობელი წვრილი მევენახეებისაგან ყოველწლიურად ყიდულობდა 40—60 ათას ფუთ ყურძენს. ვარციხის მამულში მევენახეობა-მეღვინეობას განაგებდა სპეციალური სამმართველო, რომელიც დაკომპლექტებული იყო 40—45 შტატიანი მოსამსახურით (შამპანურისა და კონიაკის სპეციალისტები საფრანგეთიდან იყვნენ გამოწვეული). მევენახეობა-მეღვინეობაში დასაქმებული იყო 80—86 მუდმივი და 2—3-ჯერ მეტი სეზონური მუშა. მათ ხელფასზე ყოველწლიურად იხარჯებოდა 50—70 ათასი მანეთი. მ. ანანოვს ღვინის გასაღების მთავარი კანტორა ჰქონდა თბილისში, საბითუმო სარდაფ-საწყობები და მაღაზიები — პეტერბურგში, მოსკოვში, ვარშავაში, ბაქოსა და ჰათუმში. ვარციხის მთავარი სარდაფიდან ყოველწლიურად სარეალიზაციოდ იგზავნებოდა 20—30 ათასი ვედრო სუფრის ღვინო, 30—40 ათასი ბოთლი შამპანური და 60 ათასი ბოთლი კონიაკი.

¹ ЦГИА СССР, ф. 398, оп. 78, д. 30763, лл.30—31.

² სსცა, ფ. 370, საქ. 989, ფურც. 123; ЦГИА СССР, ф. 391, оп.75, д.429, лл. 3—5.

მევენახეობა-მელვინეობის შემდეგ ანანოვების შემოსავლის მთავარი წყარო ხე-ტყის დამზადება-გაყიდვა იყო. ა. ანანოვს ტყის ადმინისტრაციის შემადგენლობაში 21 კაცი ჰყავდა, ხე-ტყის დამზადებაზე კი ყოველდღიურად 200 კაცს ამუშავებდა¹.

ბორჩალოს მაზრის მთიან ზონაში მესაქონლეობის პირველი კაპიტალისტური მეურნეობა შექმნა ალექსანდრე კუჩენბახმა ჯერ კიდევ 1862 წელს. თავდაპირველად იგი მეურნეობას ეწეოდა იჯარით აღებულ მიწაზე, 70—80-იან წლებში კი იყიდა 7 ათასი დეს. მიწა და წარმოება მნიშვნელოვნად გააფართოვა. XIX ს-ის 90-იან წლებში ა. კუჩენბახის ფერმაში 250—300 ჯიშიანი ძროხა ითვლებოდა. მისი ქარხანა კი წლიურად 2 000 ფუთ შვეიცარიულ ყველს და 300 ფუთ კარაქს ამზადებდა. ფერმასა და ქარხანაში 150 მუშა იყო დასაქმებული. XX ს-ის დამდეგს ფრანც ალექსანდრეს ძე კუჩენბახის მეურნეობაში 500 ძროხა ითვლებოდა. ფერმის ბაზაზე მუშაობდა ორი შვეიცარიული ყველისა და ერთი კარაქის ქარხანა².

შვეიცარიელმა ამეტერმა იჯარით აღებულ მიწაზე შექმნა მეურნეობა, რომელიც თანდათან ფართოვდებოდა. 1895 წ. მის ფერმაში 320 ძროხა ითვლებოდა, ქარხანა კი წლიურად 1 200 ფუთ შვეიცარიულ ყველს და 200 ფუთ კარაქს ამზადებდა. იმავე ხანებში ქ. ნიდიგერს 200 ძროხა ჰყავდა, ხოლო მისი ქარხანა წლიურად 630 ფუთ ყველს და 100 ფუთ კარაქს უშვებდა. ნ. კეზელის ფერმაში 100 ჯიშიანი ძროხა ითვლებოდა. ქარხანა კი 250 ფუთ ყველს და 70 ფუთ კარაქს ამზადებდა. მოლოკან დოსაევის ქარხნის წლიური მწარმოებლურობა 600 ფუთ ყველს და 355 ფუთ კარაქს უდრიდა. ყველა ეს საწარმო დაქირავებულ შრომას ემყარებოდა. შვეიცარიული წესით დამზადებული ქართული ყველი ძირითადად რუსეთის დიდ ქალაქებში საღებდოდა³.

მეთამბაქოეობა წმინდა სავაჭრო-სამრეწველო ხასიათს ატარებდა. აპიტომ, ბუნებრივია, ამ დარგში ბლომად იქმნებოდა კაპიტალისტური მეურნეობები. თამბაქო ფრიად შრომატევადი კულტურაა. ერთი დესეტინა პლანტაციის მოვლა-დამუშავებას და პროდუქციის საბაზროდ გამზადებას 4—5 კაცის მთელი წლის შრომა სჭირდებოდა. თუ თამბაქოს პლანტაცია 0,5—1 დესეტინას აღმატებოდა, უკვე საკმარისი აღარ იყო ოჯახში არსებული მუშახელი და დამატებით ქირაობდნენ მუშებს. მსხვილი პლანტაციების ფართობი კი თანდათან იზრდებოდა. 1899 წლისათვის აფხაზეთში 625 პლანტაციის ფართობი უდრიდა 1—2 დეს. 432 პლანტაციისა — 2—4 დეს. 77 პლანტაციისა — 4—6 დეს., 15 პლანტაციისა —

¹ ა. ბ ე ნ დ ი ა ნ ი შ ვ ი ლ ი, კაპიტალისტური მეურნეობები საქართველოს სოფელში XIX—XX სს მიჯნაზე, „მაენე“, 1968, №1, გვ. 87—89.

² იქვე, გვ. 93—95.

³ იქვე, გვ. 95—96.

6—8 დეს., 18 პლანტაციისა — 8—10 დეს., 5 პლანტაციისა — 10—18 დესეტიანას¹. საკმაოდ ბევრი იყო მსხვილი პლანტაციების ფართობი აგრეთვე საქართველოს მეთამბაქოეობის მეორე რაიონში — კახეთში.

2—4 დესეტიანა ფართობის თამბაქოს პლანტაციის მფლობელი წვრილი, სავაჭრო-კაპიტალისტური მეურნეობის ორგანიზატორი იყო, 4—20 დეს. და უფრო დიდი პლანტაციის მფლობელები კი უკვე საშუალო და მსხვილი კაპიტალისტები იყვნენ. თითოეული მათგანი ექსპლოატაციას უწევდა 16—100 და მეტ დაქირავებულ მუშას.

საისტორიო მასალიდან ჩანს, რომ აფხაზეთის მეთამბაქოეობაში მუდმივად იყო დასაქმებული მუშათა მრავალათასიანი კოლექტივი. ხშირად არ კმაროდა სტიქიურად მოსული პროლეტარიატი და პლანტატორებს ორგანიზებულად ჩამოჰყავდათ მუშები ჩრდილოეთ კავკასიიდან².

თამბაქოს პლანტაციების მუშათა მიმე მდგომარეობაზე ბევრი იწერებოდა პრესაში. 1897 წელს ამაზე წერდა ვ. ი. ლენინი. მეფის მთავრობის მოხელეები იძულებული გახდნენ ანგარიში გაეწიათ საზოგადოებრივი აზრისათვის და თამბაქოს პლანტაციათა მუშების საკითხი ოფიციალურად დაესვათ დღის წესრიგში. პლანტატორებისა და მუშათა ურთიერთობის რეგლამენტაციის მიზნით 1900 წელს სოხუმში შეიქმნა სპეციალური კომისია, რომელმაც დააპროექტა მეთამბაქოეთათვის სავალდებულო „წესები“, მაგრამ უმაღლეს მთავრობაში მის დამტკიცებას არ ჩქარობდნენ³.

ამრიგად, მართალია, თავადაზნაურთა და ვაჭარ-მრეწველთა მსხვილი მამულების შედარებით მცირე ნაწილზე შეიქმნა რაციონალური, კაპიტალისტური მეურნეობები და მიწის წვრილ პარცელებად იჯარით გაცემა და სამაგიეროდ რენტის მიღება საკმაოდ დიდ მასშტაბს ინარჩუნებდა, მაგრამ ამ მხრივ საქართველო გამონაკლისი როდი იყო. იმ ბუნებრივი გარემოების გამო, რომ კაპიტალის, კერძოდ, ცვალებადი კაპიტალის წრებრუნვა და გადაბრუნება სოფლის მეურნეობაში გაცილებით ნელა ხდება (ზომიერ სარტყელში სოფლის მეურნეობის კულტურები წელიწადში ერთ მოსავალს იძლევა, ხოლო ფეხსაცმლის მეფაბრიკეს შეუძლია წარმოების ციკლი კვირაში რამდენჯერმე გაიმეოროს) და იქ გაცილებით ნელა იზრდება სიმდიდრე, მიწის მესაკუთრენი და მით უმეტეს მოიჭარენი ერიდებოდნენ დიდ ფართობებზე დაებანდებინათ კაპიტალი. არც ერთი ქვეყნის სოფლის მეურნეობაში არ შექმნილა ისეთი გიგანტური კაპიტალისტური საწარმოები, როგორც მრეწველობაში იქმნებოდა. საქართველოს სო-

¹ სტია, ფ. 370, ანაწ. 1, საქ. 1622, ფურც. 47.

² ЦГИА СССР, ф. 515, оп. 91, д. 131, лл. 24—29.

³ სტია, ფ. 12, ანაწ. 8, საქ. 2751, ფურც. 7.

ფელში არსებული მსხვილი, გარდაშვალა ტიპის და წმინდა კაპიტალის-ტური მეურნეობები თავის მოცულობით და ტექნიკური აღჭურვილობით დიდად როლი ჩამოუვარდებოდნენ რუსეთისა და დასავლეთ ევროპის ანა-ლოგიური ხასიათის მეურნეობებს.

სოფლად კაპიტალისტური ურთიერთობის განვითარების ძირითადი ტენდენციები. მოსახლეობის მდგომარეობასა და სოციალურ შედგენილო-ბაში მომხდარი ცვლილებები. 1897 წელს საქართველოში ითვლებოდა 2 109 273 სული მცხოვრები. აქედან 1 786 961 სული (84,7%) ცხოვრობ-და სოფლად, 322 312 სული (15,3%) — ქალაქებში. მთელი მოსახლეობის 70% სოფლის მეურნეობაში და ხე-ტყის სარეწებში იყო ჩაბმული.

რუსეთის იმპერიაში, მართალია, ფორმალურად ბოლომდე იყო დაცუ-ლი მოსახლეობის წოდებრივი დაყოფის პრინციპი, მაგრამ ქვეყნის განვითარების სტიქიურ-ეკონომიურ პროცესს არსებითი ცვლილებები შეჰქონდა სხვადასხვა ფენის მდგომარეობაში.

XIX—XX სს-ის მიჯნაზე საქართველოს 14 694 თავად-აზნაური (78%) ოჯახზე ფლობდა 1-დან 25 დესეტინამდე მიწას და საშუალოდ იღებდა 56 მან. სუფთა შემოსავალს. ამდენად თავად-აზნაურთა უმეტესობა უკვე აღარ ჩაითვლებოდა ეკონომიურად გაბატონებული წოდების წარმომად-გენლად.

ვერც საშუალო და მსხვილი მიწათმფლობელი თავადაზნაურობა თავსდებოდა ტრადიციული წოდებრიობის ჩარჩოებში. ზოგი, როგორც ვნახეთ, თავის მამულში კაპიტალისტურად საქმიანობდა. უმეტესობა, მართალია, საკუთარ მეურნეობას მცირე მასშტაბით ეწეოდა (მიწის იჯა-რით გაცემას არჩევდა), მაგრამ თავის ადგილ-მამულით ჩათრეული იყო ქვეყნის კაპიტალისტური ეკონომიკის სფეროში. მარტო აღმოსავლეთ სა-ქართველოს თავადაზნაურობას 1903 წლისათვის დაგირავებული ჰქონდა მიწის 70% და სესხად აღებული 11,3 მლნ მანეთი, რაშიც ყოველწლიუ-რად უხდიდა ბანკებს 5—6, ხოლო მევახშეებს 20—30 პროცენტ სარგე-ბელს. მეწარმე თავად-აზნაურთა რაოდენობის ზრდის, რენტისა და კრე-დიტის კაპიტალისტური ფორმების დანერგვის პარალელურად მიმდინა-რობდა ფეოდალური საკუთრებისა და მემამულური მეურნეობის ბურ-ჟუაზიული ევოლუცია. მსხვილი და საშუალო თავადაზნაურობა ბურჟუა-ზიულ საზოგადოებაში შედიოდა მისი ერთ-ერთი გაბატონებული კლასის სახით. წოდებრივი პრივილეგიები რამდენადმე განასხვავებდნენ მას პლე-ბეური წარმომობის ბურჟუაზიისაგან, მაგრამ ეს მარტო რუსეთის იმპე-რიაში შემავალ ქვეყნებს კი არ ახასიათებდა, არამედ კაპიტალისტურად უფრო განვითარებულ ინგლისს და გერმანიასაც კი.

კაპიტალისტურ ურთიერთობათა განვითარების ერთ-ერთი გამოხატულება იყო მესამე წოდების ზედაფენის ფორმირება ბურჟუაზიულ კლასად, რომლის ერთი ნაწილი სოფლად ცხოვრობდა და მეურნეობდა. სასაქონლო-ფუულადი და კაპიტალისტური ურთიერთობის განვითარება განსაკუთრებით დიდ ცვლილებებს იწვევდა გლეხობაში. კ. მარქსი გლეხობას ავლიდა კაპიტალისტური საზოგადოების არამყარ სოციალურ ფენად, რომელიც თანდათან ავსებდა ბურჟუაზიისა და პროლეტარიატის რიგებს. ეს დასკვნა ძირითადად ინგლისის მაგალითზეა გამოტანილი, მაგრამ მეტნაკლები ინტენსივობით ყველგან მიმდინარეობდა გლეხობის დაშლა კაპიტალისტური საზოგადოების ახალ კლასებად.

ვ. ი. ლენინმა ცხადყო, რომ რუსეთის გაღატაკებული გლეხობის დაპირისპირება დასავლეთ ევროპის პროლეტარიატისათვის აშკარა შეცდომა იყო, რომ რუსეთის ღარიბი გლეხები, ეს ნაღელიანი სოფლის მუშები, უფრო ცუდ მდგომარეობაში იყვნენ ჩაყენებული, ვინემ სოფლის პროლეტარიატი იმყოფებოდა დასავლეთ ევროპაში. ვ. ი. ლენინმა ოსტატურად გახსნა საერთოდ წვრილი გლეხური მეურნეობის „დამოუკიდებლობის“ ხასიათი და „გამძლეობის“ მიზეზი. „ჩვეულებრივ, — წერდა ვ. ი. ლენინი, — იმოწმებენ სტატისტიკის მონაცემებს, რაც ვერ ადასტურებს მსხვილი მიწათმოქმედების მიერ წვრილის განდევნას, მაგრამ ეს მონაცემები მხოლოდ იმას მეტყველებენ, რომ მიწათმოქმედებაში კაპიტალიზმის განვითარების პროცესი გაცილებით უფრო რთულია, ვიდრე მრეწველობაში... მსხვილი მიწათმფლობელობისათვის არც იქნებოდა ხელსაყრელი წვრილის სავსებით განდევნა: უკანასკნელი მას მუშახელს აწვდის! ამიტომ ხშირად მიწათმფლობელებსა და კაპიტალისტებს ისეთი კანონები გაჰყავთ, რომელნიც ხელოვნურად ამაგრებენ წვრილ გლეხობას. წვრილი მიწათმოქმედება მეტკიცე მდგომარეობას მაშინ იძენს, როდესაც იგი აღარ წარმოადგენს მეტოქეს მსხვილი მიწათმოქმედებისათვის, როდესაც მისთვის მუშახელის მიმწოდებელი ხდება. მსხვილ და წვრილ მიწათმფლობელთა ურთიერთობა სულ უფრო და უფრო უახლოვდება ურთიერთობას კაპიტალისტებსა და პროლეტარებს შორის“¹.

ამდენად, წვრილ გლეხს იმიტომ შეეძლო თავის მცირე ნაკვეთზე ეცოდვილა, რომ მას ჰქონოდა გარეშე შემოსავალი. იმ შემთხვევაში, როცა არ ხერხდებოდა საკუთარი წვრილი მეურნეობის შეთავსება ქირაზე მუშაობასთან, მაშინ გლეხი მეორეს არჩევდა. მაგრამ ყველგან და უმეტესწილად საქართველოშიც შესაძლებელი იყო ასეთი შეთავსება. ამიტომ გასაკვირი არაა, რომ საქართველოში საკუთრების კონცენტრაციის ტენდენციასთან ერთად შესაძინევი იყო საკუთრების პარცელაციის ტენდენციაც. წვრილ

¹ ვ. ი. ლენინი, თხზ., ტ. 4, გვ. 106—107.

მესაკუთრე გლეხების მინიატურულ მეურნეობათა რიცხვი იზრდებოდა, რომელთა პატრონები უმეტეს დროს დამქირავებელთა წარმოებაში მუშაობდნენ. საქართველოს გლეხობის 30—35 პროცენტისათვის დაქირავებული შრომა არსების მთავარი საშუალება იყო, 20—25 პროცენტისათვის კი — შემოსავლის მნიშვნელოვანი წყარო.

ფაქტია, რომ XIX—XX სს-ის მიჯნაზე მოსახლეობის დაყოფა წოდებრივი ნიშნის მიხედვით უკვე ანაქრონიზმი იყო. მოსახლეობის სხვადასხვა ფენას ერთმანეთისაგან განასხვავებდა არა იმდენად ძველიდან შემორჩენილი წოდებრივი ნიშნები, რამდენადაც მათი ეკონომიური მდგომარეობა საზოგადოებაში. მცირემიწიანი თავად-აზნაური თავისი მდგომარეობით უფრო ახლოს იდგა საშუალო გლეხთან, ვინემ მსხვილ მემამულესთან. ასევე გლეხობიდან გამოსულ სოფლის ბურჟუას ძალიან ცოტა ჰქონდა საერთო თანასოფლელ ღარიბ გლეხთან. კულაკი ამაყად უსწორებდა თვალს ქალაქელ ვაჭარს და სოფლის მემამულეს. ამდენად, XIX—XX სს-ის მიჯნაზე წოდებების ადგილი კლასებს ჰქონდა დაკავებული. საქართველოს მოსახლეობა არსებითად გათიშული იყო საკუთრების მქონე და არმქონე ნაწილად, ბურჟუაზიად და პროლეტარიატად. საქართველოს სოფელში გაბატონებულ კლასებს ქმნიდნენ მსხვილი და საშუალო მემამულეები (დაახლოებით 2 500—3 000 ოჯახი), არათავდაზნაურული წარმოშობის 1 500-მდე მიწათმფლობელი, 500-მდე ბურჟუა მოიჯარე და დაახლოებით 10 ათასი კომლი კულაკი. გლეხობის 55—60% დასული იყო პროლეტარიატის და ნახევრად პროლეტარიატის ღონემდე. სოფლის მოსახლეობის საშუალო, თავისი ხასიათით წვრილბურჟუაზიული, ფენები თითქმის მოსახლეობის ნახევარს შეადგენდნენ, მაგრამ აშკარად ჩანდა მათი შემდგომი შემცირების ტენდენცია.

1897 წლის საყოველთაო აღწერის დროს საქართველოს სოფელში აღირიცხა ყველა სოციალური ფენის 316 570 საოჯახო ტიპის მეურნეობა, საიდანაც დაქირავებულ შრომას სისტემატურად იყენებდა 15 614 მეურნეობა (5%). თითო მუშა იყო დაქირავებული 11 885 მეურნეობაში, 2—3 მუშა — 3 109 მეურნეობაში, 4—5 მუშა — 405 მეურნეობაში, 6—10 მუშა — 188 მეურნეობაში, 11 და მეტი მუშა 27 მეურნეობაში.

1897 წელს აღირიცხა სოფლად არსებული არაოჯახურ პრინციპზე მოწყობილი ცალკეულ პირთა მეურნეობებიც. განსხვავებით საოჯახო ტიპის მეურნეობისაგან, რომელნიც თითქმის მთლიანად მიწათმოქმედებას ეწეოდნენ. ცალკეულ პირთა მეურნეობები ძირითადად ვაჭრობასა და ხელოსნობა-მრეწველობაშია საგულვებელი. სულ აღირიცხა ასეთი ტიპის 13 115 მეურნეობა; საიდანაც დაქირავებულ შრომას იყენებდა 3 114 მეურნეობა (23,7%). თითო მუშა იყო დაქირავებული 1 750 მეურნეობაში,

2—3 მუშა — 959 მეურნეობაში, 4—5 მუშა — 247 მეურნეობაში, 6—10 მუშა — 129 მეურნეობაში, 11 და მეტი მუშა — 29 მეურნეობაში¹.

1897 წლის მასალათა სტატისტიკური დამუშავების დროს კარგა ხანს თითქმის სრულიად უყურადღებოდ ტოვებდნენ მონაცემებს დაქირავებული მუშების შესახებ. მხოლოდ მას შემდეგ, რაც გაძლიერდა საგაფიცვო მოძრაობა და პროლეტარიატი რევოლუციის ავანგარდში აღმოჩნდა, მუშათა საკითხი მთელი სიგრძე-სიგანით დაისვა მეფის მთავრობის წინაშე. შინაგან საქმეთა მინისტრის მითითებით დამუშავდა აღწერის მასალა მუშების რაოდენობისა და შედგენილობის შესახებ.

ამ მასალის მიხედვით საქართველოში აღმოჩნდა 33 141 სასოფლო-სამეურნეო მუშა. მათგან, 15 113 დასაქმებული იყო მიწათმოქმედებაში, 11 651—მეცხოველეობაში, 3 969—სოფლის მეურნეობის სხვა დარგებში, 2 208 — ხე-ტყის სარეწებში და 197 — მეთევზეობაში. შედარებისათვის შეიძლება მივუთითოთ, რომ აზერბაიჯანში იყო 26 542, ხოლო სომხეთში — 8 152 სასოფლო-სამეურნეო მუშა². სოფლის მეურნეობაში დაქირავებული შრომის გამოყენების მასშტაბით საქართველო იდგა რუსეთის იმპერიის ისეთი საკმაოდ დაწინაურებული რაიონების დონეზე, როგორც აყო კიევის, მინსკის, ბესარაბიის და სხვ. გუბერნიები.

1897 წლის აღწერის მასალა საერთოდ ძალიან შემცირებულად უჩვენებს სასოფლო-სამეურნეო მუშების რაოდენობას. მასალის გამომცემელთა განცხადებით მუშათა რიცხვში მხოლოდ ის პირები არიან შეტანილნი, ვინც დაქირავებულ შრომას თავის მთავარ საქმიანობად თვლიდა. ისინი აღიარებენ, რომ დამოუკიდებელ გლეხ მეურნეთა შორის ბევრია ისეთი, რომელთათვისაც ქირაზე მუშაობა შემოსავლის მნიშვნელოვანი წყაროა. რედაქცია იმასაც ხაზგასმით აღნიშნავს, რომ აღწერა ჩატარდა ზამთარში, როცა წარმოების ბევრი დარგი შეჩერებულია. ეს შენიშვნა განსაკუთრებით ეხება მიწათმოქმედებას, რომელიც ზამთარში თითქმის არ წარმოებს და ამიტომ ამ დარგის მეურნეობები ზამთრობით მხოლოდ მცირერიცხოვან მუდმივ მუშებს იტოვებდნენ, გაზაფხულს, ზაფხულს, შემოდგომასზე კი 3—4-ჯერ მეტ მუშებს ქირაობდნენ. ამიტომ არ შეეცდებით თუ ვივარაუდებთ, რომ XIX—XX სს-ის მიჯნაზე საქართველოს სოფლის მეურნეობაში დასაქმებული იყო 100 ათასამდე მუდმივი და სეზონური მუშა.

სოფლის მუშების ხელფასი საერთოდ მცირე იყო და განსხვავებული საქართველოს სხვადასხვა რაიონში. საილუსტრაციოდ მოვიყვანთ ცხრილს, რომელიც ასახავს 1899 წლის მდგომარეობას (იხ. ცხრ. 2).

¹ Первая всеобщая перепись населения Российской империи 1897 г. XVI—Кутаисская губерния, гл. 6—9, XIX—Тифлисская губерния, гл. 6—9.

² Численность и состав рабочих в России. I, приложение I, гл. 4—5; Распределение рабочих и прислуг по группам занятий, гл. 4—7.

დამპირავებლის ხარჯზე (სმა-კამა) მყოფი ნუღმივი მუშების წლიური
ხელფასი მანეთებში¹

მანრები	მამაკაცის	ქალის	ბავშვის
ახალქალაქის	33	16	13
ახალციხის	35	18	14
ბორჩალოს	54	38	17
გორის	63	28	18
ღუშეთის	55	25	25
სიღნაღის	78	35	12
თელავის	67	38	21
თბილისის	57	12	14
თიანეთის	51	25	17
საშუალოდ თბილისის გუბერნიაში	55	26	16
ზუგდიდის	52	22	24
ქუთაისის	69	—	37
ლეჩხუმის	75	30	12
ოზურგეთის	66	23	26
რაჭის	77	11	14
სენაკის	58	41	15
შორაპნის	61	35	24
საშუალოდ ქუთაისის გუბერნიაში	65	27	22

მოტანილი ცხრილი ერთი შეხედვით ექვს იწვევს. ჩვეულებრივ, ხელფასი იქ უფრო მაღალია, სადაც მეტია მოთხოვნილება სამუშაო ძალაზე და პირუკუ. საქართველოში ეს კანონი თითქოს რამდენადმე დარღვეულია, მაგრამ ამის მიზეზის დადგენა ძნელი არ არის. დასავლეთ საქართველოს გადატაკებულმა გლეხობამ გამოცდილებით იცოდა, რომ ადგილზე შედარებით ძნელი იყო სამუშაოს შოვნა და ამიტომ საშოვარზე მიდიოდა სხვა მხარეებში. ეს გასვლა დასავლეთ საქართველოს ბევრ რაიონში ჩვეულებად იქცა და ხშირად ისე ბევრი გადიოდა, რომ ადგილზე საგრძნობი ხდებოდა მუშახელის ნაკლებობა, რაც იწვევდა სამუშაო ქირის აწევას. ზემომოტანილი მასალის მიხედვით შედარებით მაღალი ხელფასი ყოფილა თანმიმდევრობით — რაჭის, ქუთაისის, სიღნაღის, ოზურგეთის, სენაკის, ლეჩხუმის, გორის, ბორჩალოსა და სხვ. მანრებში. აღმოსავლეთ საქართველოს ზოგ რაიონში ხელფასს დაბლა სწევდნენ სპარსეთიდან შემო-

¹ Сельскохозяйственный обзор по Закавказью за 1909 год, გვ. 154—155.

სული მუშები, რომელთა განვითარების დონე და მოთხოვნილება გაცილებით დაბალი იყო საქართველოს მუშათა კლასთან შედარებით.

სოფლის პროლეტარები და ნახევრადპროლეტარები, რომელნიც ძირითადად დაქირავებული შრომით ცხოვრობდნენ, თითქმის არაფრით არ განსხვავდებოდნენ სამრეწველო მუშებისაგან. ის გარემოება, რომ სოფლის პროლეტარებს მიწის მცირე ნაკვეთები ჰქონდათ, არაფერს არ ცვლიდა მათს სოციალურ ბუნებაში. „სოფლას ამ წვრილ მეურნეთ, როგორც საქონლის — სამუშაო ძალის გამყიდველთ, — წერდა ვ. ი. ლენინი, — ყველა არსებითი ინტერესი საერთო აქვთ სამრეწველო პროლეტარიატის ინტერესებთან“¹. სოფლის პროლეტარები, რომელნიც სისტემატურად დადიოდნენ სამუშაოდ სამრეწველო ცენტრებში, პრაქტიკულად ახორციელებდნენ კავშირს მუშათა კლასსა და გლეხობას შორის, აქტიურად მონაწილეობდნენ განმათავისუფლებელ ბრძოლაში.

§ 2. მრეწველობის განვითარება²

საქართველოს სამრეწველო განვითარება 70—80-იან წლებში განპირობებული იყო ბურჟუაზიული რეფორმების გატარებითა (1864—1875 წწ.) და ფართო სარკინიგზო მშენებლობით.

საგლეხო რეფორმამ და XIX ს-ის მეორე ნახევარში სოფლად მიმდინარე სოციალ-ეკონომიურმა ძვრებმა (გლეხთა კლასობრივი დიფერენციაციის და, ამდენად, უშუალო მწარმოებლის წარმოების საშუალებათაგან გამოცალკევების პროცესის გაღრმავებამ) რამდენადმე შეასუსტა წინააღმდეგობა წარმოებით ურთიერთობებსა და საწარმოო ძალთა განვითარებას შორის, მრეწველობა უზრუნველყოფილ იქნა თავისუფალი მუშახელით.

¹ ვ. ი. ლენინი. თხზ., ტ. 4, გვ. 169.

² რეფორმის მომდევნო ხანის საქართველოში დამმუშავებელი მრეწველობის განვითარების შესახებ ვრცელი ლიტერატურა არსებობს: კერძოდ, აღსანიშნავია შემდეგი შრომები: პ. გუგუშვილი, კაპიტალიზმის წარმოშობა და განვითარება საქართველოსა და ამიერკავკასიაში, თბ. 1941; III. K. Ч х е т и а, Тбилиси в XIX столетии, 1865-ые годы. Тб. 1942; ა. კიკვიძე, მუშათა მოძრაობის ისტორიისათვის საქართველოში, თბ., 1945, მისივე, საქართველოს ისტორია (XIX საუკუნე). თბ., 1954; ნ. ტყეშელაშვილი ნარკვევები საქართველოს მრეწველობის ისტორიიდან 1864—1920 წწ, თბ., 1958, Г. К. Ба кра д з е Возникновение и развитие капиталистической промышленности в Грузии в XIX в., Тб. 1958, ნ. როლონაია, თბილისის მრეწველობა მე-19 ს. მეორე ნახევარში (რეფორმის შემდგომი ხანა), თბ., 1961; ე. ხოშტარია, მრეწველობის განვითარება და მუშათა კლასის ჩამოყალიბება XIX საუკუნის საქართველოში (დამმუშავებელი მრეწველობის განვითარება), თბ., 1966 და სხვ.

ქვემოთ, დამმუშავებელი მრეწველობის განვითარების გაშუქებისას, ძირითადად ვემყარებით ჩვენს დასახელებულ ნაშრომს, სადაც გათვალისწინებულია ჩამოთვლილ ავტორთა შრომებიც.

სარკინიგზო მშენებლობა თავისთავად იწვევდა მრეწველობის მთელი რიგი დარგების აღმოცენებას, ხელს უწყობდა ზოგიერთი მათგანის შემდგომ გაფართოებას (ხე-ტყის დამუშავება, ლითონის დამუშავება), მეორე მხრივ, რკინიგზა თავისი დამხმარე წარმოებით (რკინიგზის სახელოსნოები, დეპო და სხვ.) თვით იქცა მსხვილ სამრეწველო ობიექტად; რკინიგზის გაყვანამ ხელი შეუწყო ტექნიკურ პროგრესს მრეწველობაში. შედარებით გაადვილდა უცხოეთიდან და რუსეთიდან მანქანების შემოტანა, გადაიჭრა მანქანური წარმოების ენერგეტიკული ბაზის საკითხიც (ბაქოს ნავთობის შემოზიდვა, რუსეთის და ადგილობრივი — ტყიბულის ქვანახშირის დანიშნულების ადგილზე მიზიდვა). არსებითად რკინიგზის გაყვანის შედეგს წარმოადგენს ბათუმის სამრეწველო ქალაქად გადაქცევა, სადაც ეწყობა ბაქოს ნავთობის ექსპორტთან დაკავშირებული მსხვილი წარმოება.

მაგრამ, მიუხედავად მნიშვნელოვანი ტექნიკური პროგრესისა, საქართველოში ფაბრიკა-ქარხნების პარალელურად კვლავ განაგრძობს არსებობას მრეწველობის მარტივი ფორმები, რომელნიც ეგუება ახალ პირობებს.

დამმუშავებელი მრეწველობა

წვრილი საქონლური წარმოების ევოლუცია. გლეხის ოჯახში პირადი მოხმარების საგნების დამზადებას საქართველოში მთელი XIX ს-ის მეორე ნახევრის მანძილზე ეხვდებოდა. ადგილი ჰქონდა ასეთი ნაწარმის, განსაკუთრებით შალისა და აბრეშუმის ქსოვილების, გასაყიდად გამოტანასაც, მაგრამ, ქვეყანაში შექმნილი პირობების გამო, კერძოდ, უცხოეთიდან და რუსეთიდან დიდი რაოდენობით მზა პროდუქციის შემოტანასა და აგრეთვე ადგილობრივი მსხვილი წარმოების განვითარებასთან დაკავშირებით (მაგ., ტექსტილური წარმოება) ოჯახური მრეწველობის შესაბამისი დარგები განიცდის შემდგომ დაცემას. თანამედროვეთა დაკვირვებით, სოფლური ნაწარმის დამზადება ძირითადად ხდებოდა „საკუთარ საქირობათა დასაკმაყოფილებლად“. მართალია, ასეთი ნაწარმის გარკვეული ნაწილი (განსაკუთრებით კი შალის ქსოვილები) მზადდებოდა გასაყიდადაც და ხშირად საქართველოს ფარგლებს გარეთაც გადიოდა, მაგრამ მათი დამზადების წესი მეტად პრიმიტიული იყო. სოფლური ნაწარმის დამზადება ძირითადად ქალის ხელში იყო და სრულდებოდა სასოფლო-სამეურნეო საქმიანობისაგან თავისუფალ დროს. ამ წარმოებას „არ ჰქონდა არც გარკვეული სახე და არც გარკვეული ორგანიზაცია“ და, ამდენად, პროფესიას არ წარმოად-

გენდა სიტყვის ნამდვილი გაგებით¹. მაშინაც კი, როცა პროდუქცია მზადდებოდა გასაყიდად, შექმნილი ნედლეულისაგან, როგორც წესი, წარმოების მიზანი იყო არა მოგების მიღება, არამედ გლეხის ოჯახის საარსებო წყაროს შევსება, ე. ი. არა საცვლელი, არამედ სახმარი ღირებულების შექმნა.

საქონლური წარმოების განვითარება საქართველოს სოფელში წარიმართა არა საოჯახო მრეწველობის კაპიტალისტურად გარდაქმნის, არამედ ხელოსნობის განვითარებისა და წვრილ საქონლურ წარმოებაში გადაზრდის გზით. XIX ს-ის მეორე ნახევარში ხელოსნობის წვრილ საქონლურ წარმოებად გადაქცევის პროცესი ინტენსიურად მიმდინარეობს. ხელოსანი, როგორც წესი, ბაზრისათვის მწარმოებლად იქცევა. ეს განსაკუთრებით თბილისის და სხვა ქალაქების ხელოსნებზე ითქმის, მაგრამ ანალოგიური მოვლენა სოფლადაც შეიმჩნევა.

80-იანი წლების შუა ხანების მონაცემებით, საქართველოს ქალაქებში სულ 4000-ზე მეტი სახელოსნო იყო, აქედან ნახევარზე მეტი (2175) თბილისზე მოდიოდა. ამ სახელოსნოებიდან ისეთები, სადაც ოსტატი მართო, ან 1 მუშის დახმარებით მუშაობდა, შეადგენდნენ აბსოლუტურ უმრავლესობას (3150-მდე), 78%-ს. 2—4-მუშიანი სახელოსნოების რაოდენობა 850-მდე აღწევდა და საერთო რაოდენობის 21%-ს უდრიდა, ხოლო 5—8 მუშიანისა (32) — 1%-ზე ნაკლებს.

რაც შეეხება სოფელს, იქ იყო სულ 1710 სახელოსნო. აქედან უწვრილესი (ე. ი. უმუშოდ ან 1 მუშით) — 1570, ანუ 92%².

მართალია, წვრილი საწარმოები დიდ უმრავლესობას შეადგენდნენ, მაგრამ „ხელოსნურ“ წარმოებაში XIX ს-ის მეორე ნახევარში შეიქმნევა მნიშვნელოვანი ძვრები — ხელოსნები სულ უფრო და უფრო მჭიდროდ უკავშირდებოდნენ ბაზარს, ე. ი. ხდებოდნენ საქონელმწარმოებლებად. 80-იანი წლების შუახანების აღწერილობაში წვრილ მეწარმეთა უმრავლესობის შესახებ პირდაპირ არის მითითებული: „მისდევს ხელოსნობას და ვაჭრობს საკუთარი ნაწარმით თავისივე დუქანში“. ამის საფუძველზე აღნიშნული საწარმოები შეიძლება მივაკუთვნოთ დაქსაქსულ წვრილ საქონლურ წარმოებას, ხოლო მათი პატრონები წვრილბურჟუაზიულ ფენას.

ამ დროისათვის საკმაოდ დიდ როლს ასრულებდნენ ვაჭარ-შემსყიდველებიც, რაზედაც მიუთითებს ქალაქებში ხელოსნური ნაწარმით ვაჭრობისათვის განკუთვნილი სპეციალიზებული მაღაზიების არსებობაც. მაგალითად, ქუთაისში არსებობდა მე-2 გილდიის ვაჭრის არტემ ავიანო-

¹ იხ. С. Гулишамбаров, Обзор фабрик и заводов Тифлисской губернии, Тифл., 1888, გვ. 66—71.

² ე. ხ. შტარია, მრეწველობის განვითარება..., გვ. 85—89.

ვის მალაზია, სადაც იყიდებოდა თბილისის, ახალციხის და ქუთაისის ხელოსნების მიერ დამზადებული მამაკაცისა და ქალის ფეხსაცმელი. ასეთივე მალაზიები იყო განკუთვნილი ტანისამოსით, თიხის კურკლით, ავეჯითა და სხვა ნაწარმით ვაჭრობისათვის.

მეორე მხრივ, XIX ს-ის მეორე ნახევარში სოფლად შეიმჩნევა სახელოსნოების კონცენტრაცია ცოტად თუ ბევრად მსხვილ სავაჭრო-სახელოსნო სოფლებსა და დაბებში. ასე მაგ., 80-იანი წლების შუახანების მონაცემებით სოფლად არსებული 1 710 სახელოსნოდან 325 თავმოყრილი იყო 59 სოფელში. თითოეულში სახელოსნოთა რიცხვი 10-ს არ აღემატებოდა, 215 სახელოსნო — 15 სოფელში (11-დან 20-მდე სახელოსნოთი), 360—11 სოფელში (21—40 სახელოსნოთი), 510—10 სოფელში (41—80 სახელოსნოთი) და ბოლოს 300 სახელოსნო 3 დაბაში. უკანასკნელნი წვრილი საქონლური წარმოების მასშტაბებით აღემატებოდნენ ზოგიერთ ქალაქსაც კი¹.

ხელოსნური წარმოების კონცენტრაცია შედარებით მსხვილ სავაჭრო-სახელოსნო სოფლებსა და დაბებში სოფლის ხელოსნობაში მომხდარი ცვლილებების მაჩვენებელი იყო. თუკი აქამდე ხელოსნობა წარმოადგენდა მიწათმოქმედების დამატებას, ამიერიდან ხელოსანი იქცეოდა საქონელმწარმოებლად. იგი მომსახურებას უწევდა არა მარტო ერთ სოფელს, არამედ მთელ მაზრას, მთელ რაიონს.

1893 წლის მონაცემებით თბილისის გუბერნიაში 3 750-მდე წვრილი სახელოსნო იყო. ყურადღებას იქცევს ის გარემოება, რომ 40-იანი წლებიდან თანდათან მატულობს ახლად დაარსებულ სახელოსნოთა რიცხვი. ასე მაგ., 40-იან წლებში დაარსდა 60-მდე სახელოსნო, 50-იანი წლების განმავლობაში — 170, 60-იან წლებში — 340, 70-იან წლებში — 840, 80-იან წლებში 1450 და 1890—1893 წლებში — 890 სახელოსნო². ამავე დროს აღსანიშნავია, რომ სახელოსნოთა რაოდენობა საერთოდ ასეთი სწრაფი ტემპით არ იზრდება. ეს იმის მაჩვენებელია, რომ ძველი ტრადიციული ხელოსნობის ადგილს იჭერდა წვრილი საქონლური წარმოება, რომელიც მეტად იყო შეგუებული ცხოვრების ახალ პირობებთან როგორც შრომის ორგანიზაციის ფორმებით, ასევე ადგილობრივი ბაზრის მოთხოვნილებათა და გემოვნებისაღმი შესაბამისობის თვალსაზრისით.

შუასაუკუნეობრივი წვრილი საქონლური წარმოებისაგან განსხვავებით (ბაზრისთვის მომუშავე ხელოსნები), რომელიც დაქვემდებარებული იყო ფეოდალური წესებისა და, კერძოდ, ამქრულ რეგლამენტაციისაღმი, ახალ პირობებში საქმე გვაქვს თვისობრივად სულ სხვა ხასიათის წვრილი საქონლური წარმოების შემდგომ განვითარებასთან, რომელსაც კაპიტა-

ე. ხ. ო. ტ. ა. რ. ა., მრეწველობის განვითარება..., გვ. 89—90.

¹ იქვე, გვ. 98—103.

ლისტურში გადაზრდის ტენდენცია ჰქონდა. სწორედ ასეთი სახელოსნოებიდან იქმნება ჩვენში კაპიტალისტური მარტივი კოოპერაციის ტიპის საწარმოები.

ამქრული ხელოსნობის დაშლის ბაზაზე წვრილი საქონლური წარმოების გაფართოება, წვრილ საქონელმწარმოებელთა გამრავლება მოასწავებდა ქალაქის წვრილბურჟუაზიული ფენის ზრდას, რასაც ჯერ კიდევ რეფორმამდელ ხანაში ჰქონდა ადგილი.

თბილისის სახელოსნოთა შესახებ 80-იანი წლების (1886—88 წწ.) და 1893 წლის მონაცემების შედარება გვიჩვენებს, რომ საერთოდ მათ რიცხვში უმნიშვნელო ცვლილებების მიუხედავად (1888 წელს — 2 175, 1893—2000-მდე), რამდენადმე შემცირდა უწვრილეს სახელოსნოთა რიცხვი (1888 წელს — 1 700, 1893 წელს — 1 420). ამავე დროს 2,5-ჯერ იზრდება 2-მუშიანი სახელოსნოების რიცხვი (1888 წ. — 130, 1893 წელს—345). თუმცა 3—4-მუშიან საწარმოთა რიცხვი მცირდება (1888 წ.— 320, 1893 წ.—180), მაგრამ 2-ჯერ და მეტად იზრდება 5 და მეტი მუშიანი სახელოსნოების რიცხვი (1888 წ. — 23, 1893 წ. — 54)¹.

ამრიგად, უწვრილესი სახელოსნოები ან ქრებიან ან გადადიან უფრო მსხვილ (მაგ., 2-მუშიან) სახელოსნოთა რიგში, რომელნიც, ჩანს, მეტ სიცოცხლისუნარიანობას ამჟღავნებენ. მართალია, არა მარტო 2 მუშის, არამედ 3—4 მუშის ექსპლოატაცია, სახელოსნოს პატრონს იმდენ შემოსავალს არ აძლევდა, რომ იგი პირადად განთავისუფლებულიყო შრომისაგან, მაგრამ აქაც ზოგ შემთხვევაში იქმნებოდა ერთგვარი ზედმეტი ღირებულება, რომელიც ხელსაყრელ ვითარებაში წარმოადგენდა წარმოების გაფართოების საწინდარს.

აღსანიშნავია, რომ შედარებით მსხვილ (3—4-მუშიან) სახელოსნოთა გაფართოების ხარჯზე იზრდება 5 და მეტი მუშიანი საწარმოების რიცხვი. მაგრამ არც ეს კატეგორია იყო მყარი. გაფართოების შემდეგ, რიგ დარგებში, სტატისტიკა მათ უკვე აღარ განიხილავდა, როგორც ხელოსნურ საწარმოებს, არამედ მიაკუთვნებდა „ფაბრიკულ-ქარხნულ“ წარმოებას, თუმცა უმეტესწილად, არსებითად, ისინი ეკუთვნოდნენ კაპიტალისტურ მარტივ კოოპერაციას, ანდა ზოგჯერ, შრომის დანაწილების შემოღების შემთხვევაში, მანუფაქტურას².

ყოველივე ზემოაღნიშნული მოწმობს, რომ XIX ს-ში „წვრილი სასაქონლო წარმოების ტენდენცია იხრება დაქირავებული შრომის სულ უფ-

¹ ე. ს. შტარია, მრეწველობის განვითარება..., გვ. 99—100 (მოცემულ ციფრებში შეტანილია ზოგიერთი დაზუსტება).

² იხ. პ. გ უ შ ვ ი ლ ი, საქართვ. და ამიერკავკ. ეკონომიკური განვითარება XIX—XX სს, ტ. V, თბ., 1962, გვ. 331—332.

რო და უფრო მეტად გამოყენებისავენ, კაპიტალისტური სახელოსნოების შექმნისაკენ“¹.

წვრილი კაპიტალისტური წარმოების ზრდა. კაპიტალისტური მარტივი კოოპერაცია და მანუფაქტურა. რეფორმის მომდევნო ხანაში, მიუხედავად უცხოური და რუსული საქონლის შემოზიდვის ზრდისა და აგრეთვე ადგილობრივ მსხვილ საწარმოთა აღმოცენებისა (ტყავის, საპნისა და ზეთსახდელი წარმოება, ლითონის დამუშავება, სახერხი წარმოება, არყის დამზადება და სხვ.), წვრილი საწარმოები კი არ წყვეტენ არსებობას, არამედ რიცხობრივად იზრდებიან კიდევ. ეს გამოწვეული იყო იმით, რომ შინაური ბაზრის გაფართოებისა და სამრეწველო პროდუქციასზე მოთხოვნილების ზრდის პირობებში, წვრილი მწარმოებლები მაინც პოულობდნენ მომხმარებელს, ცდილობდნენ რა შეეფარდებინათ წარმოება ადგილობრივი მყიდველის გემოვნებისა და მოთხოვნილებისათვის.

80-იანი წლების უახანებისათვის საქართველოში იყო 360-მდე წვრილი კაპიტალისტური საწარმო. ეს ციფრი შემცირებულია, რადგან ჩვენ არა გვაქვს ამ დროის ცნობები მთელი რიგი ისეთი დარგების შესახებ (მაგ., ფეხსაცმლის, ტანსაცმლის დამზადება), სადაც მსგავსი საწარმოების არსებობა აუცილებლად სავარაუდებელია. იმ საწარმოებში კი, რომლებზეც გვაქვს ცნობები, სულ 1560-მდე მუშა მუშაობდა, ხოლო პროდუქციის ღირებულება შეადგენდა 1200 ათას მანეთზე მეტს². ეს იყო ათობით ლითონდამუშავებელი (საზეინკლო, სამჭედლო), სახერხი, სადურგლო, აგურისა და კრამიტის, ტყავის, არყისსახდელი, საპნის, სანთლის, ზეთსახდელი, საამკინძაო, მინერალური წყლების, საკონდიტრო თუ სხვა სახის საწარმოები.

აღნიშნულ საწარმოთა ხასიათის გარკვევისათვის საყურადღებოა, რომ სახელოსნოებში ხშირად შეიმჩნევა ძირითად საწარმოო ინვენტარისა და დანადგარების (მაგ., ქურებისა — აგურის წარმოებაში, კასრებისა — ტყავის წარმოებაში, ქვაბებისა — საპნის წარმოებაში და სხვ.) რაოდენობის დამთხვევა მუშათა რიცხვთან. დაბალი ტექნოლოგიური დონის და წარმოების პრიმიტიული წესების არსებობის პირობებში, ვფიქრობთ, ამგვარი დამთხვევა უნდა მიუთითებდეს აღნიშნულ საწარმოებში შრომის ფართო განაწილების არარსებობაზე. ჩანს, როგორც წესი, ყველა საწარმოო ოპერაცია აქ ჯერ კიდევ სრულდებოდა თანამიმდევრულად ერთი და იმავე პირის მიერ.

საყურადღებოა, რომ ზოგ შემთხვევაში საწარმოს მებატრონეები, მიუხედავად იმისა, რომ ჰქონდათ კიდევ სათანადო კაპიტალი, არ ახდენ-

¹ ვ. ი. ლენინი, თხზ., ტ. 3, გვ. 404.

² ვ. ხოშტარია, მრეწველობის განვითარება..., გვ. 213 (ცხრილი).

დნენ წარმოების კონცენტრაციას, კვლავ ინარჩუნებდნენ წვრილ საწარმოებს პრიმიტიული ტექნიკითა და წარმოების ჩამორჩენილი საშუალებებით. ამის მაჩვენებელი უნდა იყოს, მაგალითად, ის ფაქტი, რომ ზოგიერთ მეპატრონეს ერთდროულად და, შესაძლოა, ერთმანეთის გვერდით, ჰქონდა აგურის ან სახერხი რამდენიმე წვრილი საწარმო, თუ პურის საცხობი.

მაგრამ, წვრილ საწარმოთა მასაში, მთელ რიგ დარგებში, გამოირჩეოდნენ ისეთებიც, სადაც ვხვდებით სხვადასხვა ტექნიკურ გაუმჯობესებას (მაგ., სხვადასხვა ხელის დაზგები ლითონისა და ხე-ტყის დამმუშავებელ წარმოებაში, სხვადასხვა სახის მარტივი აპარატურა ლუდის და არყის სახდელ წარმოებაში, ხელოვნური მინერალური წყლების დამზადებაში და სხვ.). გვხვდება წვრილი საწარმოები, სადაც გამოყენებული იყო ძრავა, რომელიც მოძრაობაში მოდიოდა წყლის ან ცხოველის ძალით. ასეთ საწარმოებში ხშირად სხვადასხვა სპეციალიზებული ხელსაწყო-იარაღების გამოყენებასთან დაკავშირებით და შრომის ტექნიკური პირობების ერთგვარი სირთულის გამო, მუშახელის მინიმალური რაოდენობის არსებობისას, ივლისსმება შრომის განაწილების დანერგვაც, ანუ მანუფაქტურულ წარმოებაზე გადასვლა, ხოლო მექანიკურ და ორთქლის ძრავის გამოყენების პირობებში, ფაბრიკული წარმოების დანერგვაც.

XIX ს-ის მეორე ნახევრის საქართველოში საკმაოდ იყო ისეთი წვრილი საწარმოები, სადაც მიუხედავად მუშათა მცირე რაოდენობისა, არსებობდა სხვადასხვა მექანიკური დანადგარები და ხშირად ორთქლის ძრავაც კი (მაგ., წვრილი სახერხი „ქარხნები“). ასეთი საწარმოების მიკუთვნება მრეწველობის ამა თუ იმ ფორმისადმი ძნელდება.

ტექნიკურ გაუმჯობესებათა გამოყენება წვრილ საწარმოებში, მუშათა მცირე რაოდენობის (3—4 კაცი) მიუხედავად, მეპატრონეს საშუალებას აძლევდა განთავისუფლებულიყო წარმოებაში მონაწილეობისაგან (მაგ., სახერხი „ქარხნები“, ხელოვნური მინერალური წყლების თუ ლუდის დამზადება და სხვ.), მეორე მხრივ, ზოგიერთ დარგში (მაგ., პურის საცხობებში, ფეხსაცმლის და ტანსაცმლის სახელოსნოებში), სადაც ხელით შრომა ბატონობდა, მუშათა მეტი რაოდენობა (8 კაცამდე) ხშირად არ იძლეოდა ასეთ შესაძლებლობას.

როგორც აღნიშნული იყო, წვრილ კაპიტალისტურ საწარმოთა ნაწილი წარმოიქმნებოდა სახელოსნოების გაფართოების გზით. სავაჭრო კაპიტალის წარმომადგენლების თუ თავადაზნაურობის წრიდან გამოსულ პირთა მიერ დაარსებულ წვრილ საწარმოთა პროცენტი დიდი არ იყო. წვრილი კაპიტალისტური წარმოების გადაზრდა მსხვილში, საწარმოთა შემდგომი გაფართოების გზით, შრომის დანაწილების შემოღებითა და შემდეგში მანქანური ტექნიკის დანერგვით, საქართველოსათვის საერთოდ არ იყო დამახასიათებელი (ერთგვარ გამონაკლისს წარმოადგენდა

ლითონდამმუშავებელი საწარმოები, ლუდის ზოგიერთი საწარმო და სხვ.). მსხვილი კაპიტალისტური წარმოება ვითარდებოდა უპირატესად საეაქრო კაპიტალის წარმომადგენელთა მიერ შედარებით მსხვილ საწარმოთა და არსების გზით. გარკვეული წილი ამ საქმეში ჰქონდათ მსხვილ მოხელეებსა თუ თავადაზნაურობის წარმომადგენლებსაც, რაშიც მათ არცთუ იშვიათად ხაზინა უწყევდა დახმარებას.

რეფორმის მომდევნო ხანაში ხელით შრომაზე დამყარებული შედარებით მსხვილი საწარმოები, მიუხედავად მანქანური ტექნიკის განვითარებისა, არამცთუ წყვეტენ არსებობას, არამედ ამ დროს არსდება არაერთი ახალი ასეთი საწარმო. ასეთები იყო, მაგალითად, თბილისში მთელი რიგი ლითონდამმუშავებელი საწარმოებისა, სადაც 80-იანი წლების შუახანებში ჯერ კიდევ ფართოდ გამოიყენებოდა ხელის დაზგები და იარაღები. არსებითად მანუფაქტურული საწარმო იყო თავდაპირველად რკინიგზის მთავარი სახელოსნოები თბილისში, სადაც აღნიშნული დროისათვის 1 000-მდე მუშა იყო დასაქმებული. მსგავს საწარმოთა რიგს ეკუთვნოდა ბათუმის ზოგიერთი „ქარხანა“, სადაც ნავთის გადასაზიდად მზადდებოდა თუნუქის ბიდონები და ხის ყუთები ბიდონებისათვის, თამბაქოს „ფაბრიკები“, რამდენიმე პოლიგრაფიული საწარმო და სხვ. 80-იანი წლების შუახანებში საქართველოში ითვლებოდა სულ 30-მდე მანუფაქტურული საწარმო. სამწუხაროდ, ჩვენ არა გვაქვს ცნობა აქ არსებულ ისეთ ლითონდამმუშავებელ, ფეხსაცმლებისა თუ სამკერვალო საწარმოებზე, რომელთა მიკუთვნება შეიძლებოდა მანუფაქტურული წარმოებისადმი. ამდენად ეს ციფრი არაზუსტია, მაგრამ, მიუხედავად ამისა, თუ გავითვალისწინებთ მანუფაქტურული ტიპის საწარმოებში დასაქმებულ მუშათა რაოდენობას (2187) და პროდუქციის ღირებულებას (2475 ათასი მან.), დავრწმუნდებით, რომ მანუფაქტურული წარმოება ამ დროისათვის აღწევს თავის განვითარების უმაღლეს საფეხურს¹. XIX ს-ის მიწურულს მხოლოდ რამდენიმე ასეთი საწარმო შემორჩა.

ფაბრიკულ-ქარხნული წარმოება. შინაური ბაზრის ზრდისა და საქართველოს საერთო რუსულ და მსოფლიო ბაზარში ჩართვის შედეგად, რეფორმის შემდგომ ხანაში, განსაკუთრებით კი 80—90-იან წლებში, მანქანური წარმოება თანდათან მოიცავს საქართველოს მრეწველობის თითქმის ყველა წამყვან დარგს, რის შედეგადაც ხდება მანუფაქტურისა და წვრილი კაპიტალისტური წარმოების ხვედრითი წონის დაცემა.

ფაბრიკულ-ქარხნული წარმოება საქართველოში ვითარდება ნაწილობრივ რეფორმამდე არსებულ საწარმოთა შემდგომი გამსხვილების, ამ

¹ ე. ხ. შ ტ ა რ ი ა, მრეწველობის განვითარება..., გვ. 213.

საწარმოებში მანქანური ტექნიკის დანერგვის გზით, ხოლო უმეტეს შემთხვევაში ახალი ფაბრიკული საწარმოების დაარსებით. ლითონდამმუშავებელ მრეწველობაში აღრე არსებული ზოგიერთი სახელოსნოს გაფართოებასთან ერთად (ასეთი იყო მაგ., რუქის სახელოსნო, რომელიც წარმოადგენს მაგალითს წვრილი წარმოებიდან ფაბრიკაზე გადასვლისა), საფუძველი ეყრება მთელ რიგ ახალ საწარმოებს. 80-იანი წლების დასაწყისში დაარსდა მაგ., რენკისტის თუჯსასხმელი საწარმო, ხოლო 80-იანი წლების მიწურულიდან, ერთ-ერთი წვრილი მექანიკური სახელოსნოს ბაზაზე, იქმნება პოპოვიჩის მსხვილი ლითონდამმუშავებელი ქარხანა!

ლითონდამმუშავებელი ქარხნების დიდი ნაწილი თავმოყრილი იყო თბილისში. აქ 90-იანი წლების მიწურულსა და 900-იანი წლების დასაწყისში გამოირჩეოდნენ იარალოვის, კარაპეტოვის, ბერეჟანოვის, ანანოვის, პოპოვიჩის და რუქის მექანიკური და თუჯსასხმელი ქარხნები. მუშათა რაოდენობა ამ საწარმოებში 300-ს აღემატებოდა, პროდუქციის ღირებულება კი 316 ათას მანეთს შეადგენდა.

მექანიკური საწარმოები იყო ამ დროს ბათუმშიც. 1900 წლისათვის აქ არსებულ 2 თუჯსასხმელ და მექანიკურ ქარხანაში 125 მუშა მუშაობდა, პროდუქციის ღირებულება კი 140 ათას მანეთს შეადგენდა. აქვე იყო ლურსმნების და მავთულების დამამზადებელი უფრო მომცრო საწარმოც. აღნიშნული ქარხნები ემსახურებოდა ნავთის ტარის დამამზადებელ წარმოებს, თუმცა, ზოგიერთ თუნუქის ბიღონისა და ხის ყუთების მსხვილ ქარხანაში, დამოუკიდებლად არსებობდა მექანიკური საამქროებიც.

90-იან წლებში თბილისის ლითონდამმუშავებელ საწარმოთა მასშტაბების ზრდასთან ერთად, ხდება თვისობრივი ხასიათის ცვლილებებიც თვით წარმოებაში. გარდა იმისა, რომ გაბატონებულ მდგომარეობას აღწევს მანქანური წარმოება, აქ თანდათან იწერება თვით მანქანების ან მანქანის ნაწილების დამზადებაც. თუ 80-იანი წლების შუახანებში ს. გულიშამბაროვს საფუძველი ჰქონდა ეთქვა, რომ ამ დროს თბილისში არსებითად არ იყო მექანიკური ქარხნები (რადგან ჯერ არ მზადდებოდა არც ორთქლის ქვაბები და არც რამდენადმე რთული კონსტრუქციის მანქანები¹), 90-იან წლებში ამ მხრივ გარკვეული ნაბიჯი იქნა გადადგმული. ნაწილი ორთქლის ქვაბებისა, 90-იანი წლების შუახანებიდან თბილისის ზოგიერთ საწარმოში რომ დაიდგა, დამზადებული იყო პოპოვიჩის ან სხვა თბილისელ კაპიტალისტების ქარხნებში².

900-იანი წლების დასაწყისისათვის თბილისის ლითონდამმუშავებელი ქარხნები ფართო ასორტიმენტის პროდუქციას იძლეოდა. აქ უკვე ხდებოდა სხვადასხვა მანქანის, ლითონისა და ხის დამმუშავებელი დაზგე-

¹ С. Гулишамбаров, Обзор фабрик и заводов... გვ. 184.

² ნ. როდონაია, თბილისის მრეწველობა... გვ. 86—87.



ბათუმის როტმილდის ქარხანა.

ბის, ორთქლის ქვაბების, ტურბინების და წყლის ძრავების დამზადება, აგრეთვე სასოფლო-სამეურნეო ინვენტარის — ზეთსახდელი თუ სხვა მანქანების წარმოება¹.

მიუხედავად ამისა, მანქანათმშენებლობის დარგი საქართველოში ჯერ კიდევ საგრძნობლად ჩამორჩებოდა. საფაბრიკო-საქარხნო მოწყობილობის დიდი ნაწილი გარეუდან (უცხეთიდან, რუსეთიდან და ნაწილობრივ ბაქოდან) შემოდისოდა².

თბილისის უმსხვილესი საწარმო იყო 1883 წელს დაარსებული ამიერკავკასიის რკინიგზის მთავარი სახელოსნოები, სადაც 90-იან წლებში ხდება წარმოების ძირითადი პროცესების მექანიზაცია. 1900 წლისათვის აქ წარმოების ძირითადი პროცესების რამდენიმე მსხვილი საამქრო შეიქმნა: ამწყობი, საქვაბე, სახარატო, ჩამომსხმელი, სამჭედლო, სამღებრო, რონოდებისა და სადურგლო. სხვადასხვა დაზვისა და დანადგარის რაოდენობა მარტო სახარატო საამქროში 1901 წლისათვის 270-მდე აღწევდა. წარმოებდა ახალი დეტალებისა და ნაწილების დამზადებაც. 1900 წლისათვის სახელოსნოებში ირიცხებოდა სულ 2 265 მუშა, დეპოში 180 მემანქანე, მემანქანის თანაშემწე და სხვა მომსახურე პერსონალი³.

¹ ЦГИА СССР, ф. 22, оп. 2, д. 2927.

² Г. Б а к р а д з е, Возникновение и развитие..., გვ. 188.

³ სსცია, ფ. 17, საქ. 4403, ფურტ. 67; Г. Б а к р а д з ე, Возникновение и развитие..., გვ. 191—195.

ფაბრიკულ-ქარხნული წარმოების განვითარების მასშტაბებით ყურადღებას იქცევს ბათუმის მრეწველობა, რომელსაც საფუძველი ეყრება 80-იანი წლებიდან ბაქოს ნავთის ექსპორტის ორგანიზაციასთან დაკავშირებით. ჯერ კიდევ 1883 წ. ინეინრებმა ბუნგემ და პალაშკოვსკიმ დააარსეს „კასპია-შავიზღვის ნავთის დამამუშავებელი და სავაჭრო საზოგადოება“, რომელიც 1886 წლიდან გადავიდა როტშილდის პარიზის ფირმის ხელში. ამ დროისათვის ნავთობის ექსპორტისათვის გათვალისწინებული თუნუქის ბიღონებისა და მათი ჩასაწყობი ხის ყუთების დამამზადებელ ქარხანაში, რომელიც ამ ფირმას ეკუთვნოდა, მუშაობდა 469 მუშა. წელიწადში ქარხანა აწარმოებდა 2 800 ათას ცალ ნავთის ტარას. 1885 წ. გაიხსნა კიდევ ორი ქარხანა — სიდერიდისისა და რიხნერის. ამ უკანასკნელშიც 1885 წლის მონაცემებით ორთქლის ძრავა მოქმედებდა. მუშათა რაოდენობა აქ 30-ს აღწევდა. 1887 წ. დაარსდა ხაჩატურიანცის, მანთაშევის, ძმების ცოვიანოვების ქარხნები და რამდენიმე წვრილი სხვა საწარმო. 1889 წლიდან რიხნერის ქარხანა გადავიდა მანთაშევის ხელში.

90-იან წლებში ბათუმის ყველა მნიშვნელოვანი საწარმო მექანიზებული იყო. 1900 წლისათვის აქ მოქმედებდა ნავთის ტარის 5 მსხვილი ფირმის ქარხნები: კასპია-შავიზღვის საზოგადოების (როტშილდის), მანთაშევის, ხაჩატურიანცის (რომელიც ნობელის ფირმისათვის ამზადებდა ნავთის ტარას), ცოვიანოვების და სიდერიდისის. გარდა თუნუქის და ხის ყუთების დამამზადებელი საამქროებისა, ამ ფირმებს ჰქონდათ მექანიკური სახელოსნოები, სახერხი საწარმოები, სამანქანო და საქვაბე განყოფილებანი და სხვ.

XIX ს-ის მიწურულს მუშათა რიცხვი ამ საწარმოებში 2 ათასს აღემატებოდა. პროდუქციის ღირებულება დაახლოებით 7,4 მილიონ მანეთამდე აღწევდა. 1898 წლის ცნობებით ბათუმში დამზადდა სულ 22 მილიონზე მეტი თუნუქის ყუთი და მათ ჩასაწყობად 11 მილიონზე მეტი ხის ყუთი. ბიღონების საშუალებით ამ დროისათვის წლიურად გაჰქონდათ 20 მილიონამდე ფუთი ნავთი.

1900 წლისათვის ბათუმის საწარმოებში, სადაც არა მარტო ნავთის ტარა მზადდებოდა, არამედ წარმოებდა ნავთის გადასხმა გემებზე საქაჩავეების მეშვეობით, 17 ორთქლის მანქანა მოქმედებდა 653 ცხენის ძალის სიმძლავრისა, ორთქლის ქვაბი იყო 48 (1736 ცხენის ძალისა). აქვე მოქმედებდა 13 დინამომანქანა. სხვადასხვა დაზგისა და აპარატის რაოდენობა ათასს აჭარბებდა, ხოლო ორთქლის საქაჩავეების რიცხვი 73-ს შეადგენდა. რამდენიმე საწარმოში შემორჩენილი იყო მხოლოდ თხუთმეტი-ოდე ხელის საქაჩავი. 172 რეზერვუარი და კასრი 17 მილიონ ფუთზე მეტ ნავთობს იტევდა. ყველა მსხვილ ფირმას ჰქონდა საკუთარი სარკინიგზო ხაზი, რომლითაც ქარხნები რკინიგზის მაგისტრალს უკავშირდებოდა. ზო-

გიერთ ფირმას, რომელიც მარტო ნავთის გადასხმას აწარმოებდა, ჰქონდა ხის კასრების საამქროები.

საყურადღებოა, რომ 90-იან წლებში არსებობდა წვრილი ფირმებიც. რომელთაც თანდათან შეწყვიტეს მოქმედება (1898 წლიდან — მესროპოვისა და სამხრეთ რუსეთის ბანკის, ხოლო 1900 წლიდან — გრამატიკოპულოსი და რიხნერისა). აღნიშნული ფაქტი მოწმობს წარმოების კონცენტრაციას შედარებით მსხვილი ფირმების ხელში.

1900-იანი წლებიდან, განსაკუთრებით რევოლუციური აზვირთების პერიოდში, ბათუმის ნავთის ტარის წარმოება თანდათან იკვეცებოდა. ამაში მნიშვნელოვანი როლი შეასრულა ამერიკული და სხვა ქვეყნების ნავთის კონკურენციამ¹.

70-იანი წლებიდან იწყება ორთქლის ძრავას ფართო გამოყენება ხე-ტყის სახერხ წარმოებაში. 70-იანი წლების მეორე ნახევარში დაარსდა თბილისის 5 უმსხვილესი სახერხი ქარხანა, ხოლო 80-იანი წლების შუახანებში კიდევ 2 ქარხანა. ამ ქარხნებში ამ დროისათვის სულ 96 მუშა ითვლებოდა, პროდუქციის ღირებულება 200 ათას მანეთს აღემატებოდა. 80-იანი წლების შუახანებშივეა დაარსებული დიდი მთავრის ბორჯომის მამულის ანუ საუფლისწულო უწყების ქარხანა სოფ. გომში, ზეზემანის და ქართველიშვილისა სოფ. ხანდისსა და ატენში. სამივე ქარხანაში 75 მუშა ითვლებოდა, ხოლო პროდუქციის ღირებულება 70 ათას მანეთს შეადგენდა (ხე-ტყის დამზადებაში ამავე დროს გაცილებით მეტი მუშა იყო დასაქმებული).

90-იან წლებში როგორც თბილისში, ასევე აღმოსავლეთ და დასავლეთ საქართველოს შიდა რაიონებსა და ზღვისპირა პუნქტებში არსებობდა არაერთი სახერხი საწარმო, სადაც ორთქლის ძრავას იყენებდნენ, მაგრამ ამ საწარმოთა დიდი ნაწილი, წარმოების უმნიშვნელო მასშტაბებისა და მუშათა სიმცირის გამო, წვირალ წარმოებას განეკუთვნებოდა. მათი არსებობა მსხვილი სახერხი ქარხნების გვერდით, აიხსნებოდა ხე-ტყის მასალაზე დიდი მოთხოვნილებით. 1900 წლისათვის თბილისში მოქმედებდა შედარებით მსხვილი 7 სახერხი ქარხანა. ამათგან ორი 90-იან წლებში იყო დაარსებული, ხოლო ერთი — 1900 წელს. მუშათა რაოდენობა ამ ქარხნებში 134-ს უდრიდა, პროდუქციის ღირებულება კი 434 ათას მანეთს.

თბილისის გუბერნიის საწარმოებიდან ამ დროისათვის აღსანიშნავია საუფლისწულო უწყების ქარხანა ბორჯომის მამულში და ზეზემანის ქარხანა ატენში. ორივე საწარმოში 70-მდე მუშა მუშაობდა, ხოლო პროდუქციის ღირებულება 210 ათას მანეთს შეადგენდა. ქუთაისის გუბერნიაში 1900 წლისათვის არსებული სახერხი ქარხნებიდან გამოირჩეოდა სერებ-

¹ ЦГИА СССР, ф. 23, оп. 17, д. 533, лл. 314 — 1319; ф. 1263, оп. 2, д. 5453, лл. 216—362.

რიაკოვის ქარხანა სოფ. მარანში (სენაკის მაზრა) და მაქსიმოვის მემკვიდრეებისა სოფ. აძიუბუაში (სოხუმის ოლქი). მუშათა რაოდენობა ამ საწარმოებში 160-ს უდრიდა (აქ არ იგულისხმება ხე-ტყის დამზადებაში ჩაბმული მუშები), ხოლო პროდუქციის ღირებულება 600 ათას მანეთს აღემატებოდა.

90-იანი წლების განმავლობაში წარმოების ფაბრიკული ფორმა ფეხს იკიდებს აგურის წარმოებაშიც. 90-იანი წლებისათვის თბილისში იყო აგურის 4 მსხვილი ქარხანა, სადაც არსებობდა გოფმანის სისტემის უწყვეტადმოქმედი ღუმელი. ზოგიერთ მათგანში ვხვდებით აგურისმკეთებელ მანქანებსაც კი. აღნიშნულ ქარხნებში სულ 100-ზე მეტი მუდმივი მუშა მუშაობდა, პროდუქცია 100 ათას მანეთამდე აღწევდა. აგურის საწარმოთა უმრავლესობა წვირილ ხასიათს ატარებდა, თუმცა თითქმის ყველგან ვხვდებით ორთქლის ქვაბების გამოყენებას მფრქვევანებისათვის, რაც წარმოების თხიერ საწვავზე გადასვლასთან იყო დაკავშირებული.

90-იან წლებში ამოქმედდა ბერგმანების მინის ქარხანა ბორჯომში. თავდაპირველად (1897—1898 წწ.) იგი ინჟინერ ლიხაჩოვს ეკუთვნოდა. ქარხანა აგებული იყო მინის ნაწარმზე მზარდი მოთხოვნილების გამო და განსაკუთრებით ბორჯომის მინერალური წყლების ექსპლოატაციის მიზნით. ბერგმანებმა 90-იანი წლების დასასრულს სცადეს წარმოების გაფართოება და აქციონერული საზოგადოების შექმნა, მაგრამ ამ დროისათვის დაწყებული კრიზისის გამო ეს ვერ მოხერხდა. 1900 წლისათვის ქარხანაში 75 მუშა ითვლებოდა, პროდუქციის ღირებულება 112 ათას მანეთს შეადგენდა.

მინის მეორე ქარხანა, რომელიც მოქმედებდა ბორჩალოს მაზრაში 80-იანი წლების დასაწყისიდან ეკუთვნოდა კუჩინბახს. 1900 წლისათვის აქ 70-მდე მუშა ირიცხებოდა. პროდუქციის (ღვინის ბოთლები, წყლის ჭურჭელი, სააფთიაქო ჭურჭელი, ლამფის შუშები და სხვ.) ღირებულება 60 ათასამდე მან: აღწევდა.

70-იანი წლების დასაწყისში ამოქმედდა ერთ-ერთი მსხვილი საწარმოო საქართველოში — გ. მირზოევის საფეიქრო ფაბრიკა თბილისში. 1880 — 1886 წლებში ეს საწარმო იჯარით ჰქონდა აღებული ფრანგ მეწარმეს რიშარს, ხოლო 1888 წლიდან გადავიდა კაპიტალისტ ჩითახოვის ხელში. 80-იანი წლების შუახანებში ფაბრიკაში 350 მუშა მუშაობდა, პროდუქციის ღირებულება 500 ათას მანეთამდე აღწევდა. 900-იანი წლების მიწურულს აქ 400-მდე მუშაა ნაჩვენები, პროდუქციის ღირებულება კვლავ 500 ათას მანეთს შეადგენდა.

ტყავის ფაბრიკული დამუშავება ფართო მასშტაბით იწყება 1875 წლიდან თბილისში გრ. ადელხანოვის მიერ დაარსებულ ქარხანაში, სადაც ძირითადი საწარმოო პროცესები თავიდანვე მექანიზებული იყო. 1885 წლის



თბილისის ადელხანოვის ტყავის ქარხანა.

მონაცემებით მუშათა რაოდენობა აქ 170-ს უდრიდა, ხოლო პროდუქციის ღირებულება 650 ათას მანეთს შეადგენდა. 90-იანი წლების შუახანებში ადელხანოვის მიერ დაარსებული აქციონერული საზოგადოება აერთიანებდა ტყავის ქარხანას, ქეჩის წარმოებას და ფეხსაცმლის ფაბრიკას. ტყავის დამმუშავებელ ქარხანაში 1900 წლისათვის 215 მუშა მუშაობდა.

ქარხნის პროდუქციის ღირებულება 750 ათას მანეთს აღემატებოდა. ქარხანა 1879 წელს დადებული კონტრაქტით ტყავის ნაწარმით ამარაგებდა კავკასიის ჯარებს. კონტრაქტი ითვალისწინებდა წლიურად 500 ათასი მანეთის პროდუქციის დაწვავას საინტენდანტო უწყებისათვის. პროდუქციის ნაწილი მოიხმარებოდა საკუთრივ ადელხანოვის ფეხსაცმლის ფაბრიკაში, ან საღებოდა მთელ ამიერკავკასიასა და კასპიის იმიერ მხარეში. მოთხოვნილება ადელხანოვის ტყავის ნაწარმზე სულ უფრო და უფრო იზრდებოდა. ტყავის ქარხანა ძირითადად ადგილობრივ ნედლეულზე მუშაობდა. ქარხანასთან არსებობდა ჩემოდნების და უნაგირების საწარმო, სადაც სულ 10 მუშა იყო დასაქმებული, ქარხანაში ორთქლის მანქანებთან ერთად ელექტროენერგიასაც იყენებდნენ ტყავის დასათორიშლავად.

ტყავის მეორე მსხვილი საწარმო თბილისში იყო 1892 წელს ზარგარიანცის და ვარტაზარიანცის მიერ დაარსებული ქარხანა. აქ 1900 წლი-

სათვის 84 მუშა მუშაობდა, პროდუქციის ღირებულება 130 ათას მანეთს აღემატებოდა.

1889 წელს ადელხანოვმა ჯერ ტყავის ქარხანასთან გახსნა ტყავის დამუშავების შედეგად მონარჩენი ბეწვის დამმუშავებელი საამქრო, ხოლო 1892 წლიდან იგი ქეჩის დამმუშავებელ დამოუკიდებელ საწარმოდ აქცია. 1900 წლისათვის ქეჩის ფაბრიკაში 170 მუშა მუშაობდა, პროდუქციის ღირებულება 325 ათას მანეთს შეადგენდა. იგი მთლიანად მექანიზებული იყო. ადელხანოვის ქეჩის ფაბრიკა ფართო ასორტიმენტის ნაწარმს აწარმოებდა, დაწყებული უხეში ქეჩით (საამშენებლო საჭიროებისათვის), ნაბდის თუ მაუდის თხელ ქსოვილებამდე (ქალებისა და ოფიცრების ზედა ტანსაცმლისათვის). აქვე მზადდებოდა თბილი ფესსაცმელი. ფაბრიკის ნაწარმი თითქმის მთლიანად რუსეთში სaldებოდა.

თამბაქოს გადამმუშავებელი წარმოება ეს ისეთი დარგია, სადაც შედარებით გვიან იწარმოება ფართო მასშტაბით მანქანური ტექნიკა. თავდაპირველად აქ შემოდის თამბაქოს საჭრელი მექანიკური დაზგები, ხოლო უფრო გვიან, 90-იანი წლების მიწურულისათვის, პაპიროსის მკეთებელი მანქანებიც, თუმცა ამ დროისათვის ჯერ კიდევ არ ხერხდება მთელი პროცესების მექანიზაცია და ხელით შრომა კვლავ ფართო გამოყენებას პოულობდა. 1900 წლისათვის საქართველოში 7 შედარებით მსხვილი თამბაქოს ფაბრიკა იყო. აქედან ოთხი თბილისში (ა. ენფიანჯიანცის, ნ. ბოზარჯიანცის, აქციონერულ საზოგადოება „მირ“-ის და მ. საფაროვის მემკვიდრეებისა). ქუთაისში არსებული თამბაქოს მსხვილი ფაბრიკა ძმებს ფირალოვებს ეკუთვნოდათ, ხოლო ბათუმში ერთ-ერთი ფაბრიკა ბინიატოლის საკუთრებას წარმოადგენდა, მეორე კი ა. ლევებერგისა („ტამარა“). აღნიშნულ საწარმოებში სულ 1 200-ზე მეტი მუშა მუშაობდა; პროდუქციის ღირებულება კი 2 მილიონ მანეთს აღემატებოდა. თბილისის და საქართველოს სხვა ქალაქების თამბაქოს ფაბრიკების პროდუქცია, რომელიც უცხოურ (თურქულ) და ადგილობრივ (ამიერკავკასიის) ნედლეულისაგან მზადდებოდა, ფართოდ ვრცელდებოდა არა მარტო ამიერკავკასიაში, არამედ რუსეთშიც.

სპირტიანი სასმელების წარმოებას ფართო მასშტაბით რეფორმის შემდგომ ხანაში საფუძველი ეყრება ბორჯომთან ბახის მიერ 1877 წელს დაარსებული საწარმოთი, სადაც 29 მუშა მუშაობდა, პროდუქციის ღირებულება კი 161 ათას მანეთს აღემატებოდა. მაგრამ ამ საწარმომ დიდხანს ვერ იარსება. სპირტის და სპირტიანი სასმელების ფაბრიკული წარმოება მყარ საფუძველზე დგება 1884—1885 წლებში თბილისში დ. სარაჯიშვილის მიერ არყისაზღელი ქარხნის დაარსებით. 80-იანი წლების შუახანების მონაცემებით აქ 15 მუშა ითვლებოდა, ხოლო პროდუქციის ღირებულება 200 ათას მანეთს აღემატებოდა.

90-იან წლებში სარაჯიშვილის წარმოების გვერდით თბილისში ჩნდება სოგომონოვისა და ხუბლაროვის სპირტიანი სასმელების ქარხნები. 1900 წლისათვის სამივე ამ საწარმოში 100-ზე მეტი მუშა მუშაობდა, ხოლო პროდუქციის ღირებულება ოფიციალური მონაცემებით 1174 ათას მანეთს აღემატებოდა. აქედან 600 ათასი მანეთის პროდუქცია სარაჯიშვილის წარმოებაზე მოდიოდა. გარდა თბილისისა, სარაჯიშვილს ქარხნები ჰქონდა ერევანში, ჩრდილოეთ კავკასიაში და მოლდავეთშიც კი. მისი წარმოება დიდი მასშტაბისა იყო. სარაჯიშვილის წარმოების პროდუქცია, განსაკუთრებით კონიაკი, ვადიოდა არა მარტო რუსეთში, არამედ უცხოეთშიც, სადაც მას საკუთარი მაღაზიები ჰქონდა.

მრეწველობის კონცენტრაციის მაგალითს წარმოადგენს საპნის, სანთლისა და ზეთსახდელი წარმოება. თბილისში ადრევე (1872 წლიდან) არსებული ტოლეს საპნის და სანთლის საწარმო 1900 წელს ერთიანდება ტაიროვის და ალიხანოვის ასეთსავე საწარმოსთან. მათ ბაზაზე იქმნება ერთი აქციონერული საზოგადოება. წარმოებაში 1900 წლისათვის 57 მუშა იყო ჩაბმული. პროდუქციის ღირებულება 230 ათას მანეთამდე აღწევდა. შემდგომში ეს წარმოება კიდევ უფრო ფართოვდება. გარდა ამისა თბილისში იყო აგრეთვე საეკლესიო უწყებების სანთლის ქარხანაც. 1900 წლისათვის აქ 23 მუშა მუშაობდა, პროდუქციის ღირებულება კი 100 ათას მანეთს აღემატებოდა.

ფაბრიკული წარმოების დანერგვა ხდება ლუდის დამზადებაშიც. ლუდის მსხვილი ქარხნები ადრიდანვე ეკუთვნოდა ვეტცელსა და მადერს. 1900 წლისათვის პირველში 50 მუშა ირიცხებოდა. პროდუქციის ღირებულება კი 150 ათას მანეთს შეადგენდა; მადერის საწარმო უფრო მომცრო იყო. აქ 33 მუშა იყო დასაქმებული, პროდუქციის ღირებულება კი 50—60 ათას მანეთს უდრიდა.

ფეხსაცმლის და ტანსაცმლის ფაბრიკული დამზადება წარმოებდა ადელხანოვის ფეხსაცმლის ფაბრიკასა და მის მიერ იჯარით აღებულ სამხედრო ტანსაცმლის სამკერვალო საწარმოში. 1900 წლისათვის ფეხსაცმლის ფაბრიკაში 424 მუშა იყო, პროდუქციის ღირებულება კი 553 ათას მანეთს შეადგენდა. სამკერვალო საწარმოში 140 მუშა ითვლებოდა, პროდუქციის ღირებულება კი 63 ათას მანეთს აღწევდა.

90-იან წლებში ხდება პოლიგრაფიული წარმოების სრული მექანიზაცია. 1900 წლისათვის თბილისში 6 მსხვილი სტამბა არსებობდა. მუშათა რაოდენობა აქ 450-ს აღწევდა, პროდუქციის ღირებულება კი 380 ათას მანეთს.

გარდა ამისა საქართველოში იყო ცალკე სხვა მსხვილი საწარმოებიც. მაგ., ასანთის ქარხანა, ცხენის რკინიგზა, თავისი სახელოსნოებით და სხვ., სადაც მუშათა მნიშვნელოვანი რაოდენობა იყო დასაქმებული.

ზემოთ ჩვენ განვიხილეთ საქართველოში დამმუშავებელი მრეწველობის თითქმის ყველა წამყვანი დარგი.

საწარმოთა რაოდენობის ზრდისა და დამმუშავებელი მრეწველობის სხვადასხვა ფორმის (წვრილი კაპიტალისტური წარმოება, მანუფაქტურა, ფაბრიკა) შეფარდებაზე დროის სხვადასხვა მონაკვეთში წარმოდგენას გვიქმნის ქვემოთნაჩვენებული ცხრილი¹.

ც ხ რ ი ლ ი 3

მრეწველობის ფორმები	1885—88 წ.			1900 წ.		
	საწარმოთა რიცხვი	მუშათა რაოდენობა	პროდუქც. (ათას მანეთ.)	საწარმოთა რიცხვი	მუშათა რაოდენობა	პროდუქც. (ათას მანეთ.)
წვრილი-კაპიტალისტური წარმოება	359	1554	1237,2	1482	7046	3386,0
მანუფაქტურა	29	2187	2475,8	41	984	1200,0
ფაბრიკულ-ქარსნული წარმოება	28	1712	4567,2	64	9004	16513,0
	416	5553	8280,2	1587	17034	21099,0

როგორც ცხრილიდან ჩანს, 80-იანი წლების შუახანებისათვის 60-იანი წლების შუახანებთან შედარებით არსებითად შეიცვალა წვრილი და შედარებით მსხვილი წარმოების თანაფარდობის სურათი. წვრილი წარმოების ხვედრითი წონა, საწარმოთა სიჭარბის მიუხედავად, მნიშვნელოვნად შემცირდა². აღსანიშნავია, რომ მუშათა რაოდენობის მხრივ უპირატესობა მანუფაქტურულ წარმოებას აქვს³, თუმცა პროდუქციის მოცულობის თვალსაზრისით უკვე მანქანური წარმოებაა წასული წინ. ორივე ერთად (ე. ი. მანუფაქტურული და მანქანური) მუშათა რაოდენობის მხრივ 2-ჯერ, ხოლო პროდუქციის მოცულობით 6-ჯერ აღემატებოდა წვრილ წარმოებას, მართო მანქანური წარმოება კი, მართალია, მუშათა რიცხვით ბევრად

¹ იხ. ე. ხოშტარია, მრეწველობის განვითარება და მუშათა კლასის ჩამოყალიბება XIX ს-ის საქართველოში (დამმუშავებელი მრეწველობის განვითარება), თბ., 1966, გვ. 213—215.

² 60-იანი წლების შუახანებში წვრილ საწარმოთა რაოდენობა შეადგენდა 462-ს, 1921 მუშით და 722, 2 ათას მან. პროდუქციით; მანუფაქტურული საწარმო იყო 29 483 მუშით და 244 ათას მან. პროდუქციით, ხოლო ფაბრიკული საწარმო იყო 4, 32 მუშით და 80 ათას მან. პროდუქციით.

³ ამაში გადამწყვეტი როლი ითამაშა რკინიგზის სახელოსნოების მანუფაქტურისადმი მიკუთვნებამ.

ვერ ქარბობდა, მაგრამ პროდუქციის მოცულობით თითქმის 4-ჯერ აღემატებოდა წვრილ წარმოებას. როგორც ჩანს, 80-იანი წლების შუახანები წარმოადგენდა ტეხილს ფაბრიკულ-ქარხნულ წარმოებაზე გადასვლის, ანუ სამრეწველო გადატრიალების თვალსაზრისით. ფაბრიკული ნაწარმი ამ დროისთვის შეადგენდა მთელი სამრეწველო პროდუქციის 55%-ს.

ამავე დროისათვის მნიშვნელოვნად გაიზარდა ერთ სულ მოსახლეზე, საერთოდ, სამრეწველო პროდუქციის და, კერძოდ, ფაბრიკული პროდუქციის ოდენობა. 80-იანი წლების შუახანებისათვის საქართველოში ითვლებოდა 1700 ათასამდე მცხოვრები¹. ამავე დროს სამრეწველო საწარმოთა პროდუქციის ღირებულება შეადგენდა 8,3 მილიონ მანეთს, ე. ი. თითო სულზე მოდიოდა 5 მანეთის პროდუქცია. 1886 წლისათვის მარტო ფაბრიკული წარმოების პროდუქციის ღირებულება საქართველოში შეადგენდა 4,5 მილიონ მანეთს, ე. ი. თითო სულზე მოდიოდა 2,6 მანეთის ფაბრიკული ნაწარმი.

80-იანი წლებიდან წარმოებაში ტექნიკური გადატრიალების გაღრმავების მაჩვენებელია ამ დროისათვის ორთქლის ძრავების გამოყენების გახშირება. განსაკუთრებით ეს პროცესი თავს იჩენს თბილისისა და ბათუმის ქარხნებში. თბილისში 1885—1886 წლების მონაცემებით ორთქლის ქვაბი იდგა 30-მდე მსხვილ საწარმოში, რომელიც განეკუთვნებოდა აქ არსებულ წამყვან დარგებს (ტყავის დამუშავება, საპნის და სანთლის წარმოება, ლითონის დამუშავება, ხე-ტყის დამუშავება, ტექსტილური წარმოება, ლუდის წარმოება, სპირტისა და არყის წარმოება და სხვ.)².

ყოველივე აღნიშნულის საფუძველზე სავსებით სწორად უნდა ჩაითვალოს დებულება იმის შესახებ, რომ 80-იანი წლების შუახანებში მრეწველობის მთავარ დარგებში მანქანურ წარმოებაზე გადასვლა ამა თუ იმ ზომით უკვე მომხდარი ფაქტია³. 1898 წლისათვის, თუ არ ჩავთვლით 41 სახერხი ქარხნის ორთქლის ქვაბებს, თბილისში არსებულ 37 უმსხვილეს სამრეწველო საწარმოში უკვე 60-მდე ორთქლის ქვაბი მოქმედებდა⁴:

იმავე ცხრილის ანალიზი გვიჩვენებს, რომ 1900 წლისათვის, მიუხედავად წვრილი საწარმოების დიდი რაოდენობისა, მსხვილმა წარმოებამ მნიშვნელოვნად გაუსწრო მას წინ. წვრილი კაპიტალისტური საწარმოების თვალსაჩინო ზრდა წინა წლებთან შედარებით უნდა აიხსნას იმით, რომ საქალაქო ცხოვრების აღმავლობის და საერთოდ შინაური ბაზრის ზრდის პირობებში, ადგილი ჰქონდა წვრილი საქონლური წარმოების კაპიტალისტურ წარმოებად გადაქცევას. დამახასიათებელია აგრეთვე ის, რომ მანუ-

¹ Свод статистич. данных о населении Закавказского края, извлеченных из посемейных списков 1886 г., Тиф., 1893.

² ნ. რ. დონაია, თბილისის მრეწველობა..., გვ. 81—83.

³ იხ. პ. გუგუშვილი, კაპიტალიზმის წარმოება, გვ. 418.

⁴ ЦГИА СССР, ф. 20, оп. 15, д. 104, лл.186—188.

ფაქტურული წარმოების ხვედრითი წონა 80-იანი წლების შუახანებთან შედარებით მცირდება, თუმცა მანუფაქტურულ საწარმოთა რიცხვი მატულობს. ეს აიხსნება ზოგიერთი ახალი დარგის საწარმოთა (მაგ. ხის კასრების წარმოება ბათუმში და სხვ.) დაარსებით და აგრეთვე წვრალ საწარმოთა გამსხვილებით (ზოგიერთი ლითონდამმუშავებელი საწარმო, ფეხსაცმლის, მინერალური წყლების, საკონდიტრო და სხვა ამგვარი საწარმოები), თუმცა თავისთავად ამ საწარმოების მასშტაბი დიდი არ იყო.

1900 წლისათვის ფაბრიკულ-ქარხნული წარმოების პროდუქციის მოცულობა უკვე 5-ჯერ აღემატებოდა წვრილი წარმოების პროდუქციას.

მნიშვნელოვნად გაიზარდა ერთ სულ მოსახლეზე სამრეწველო პროდუქციის ოდენობაც. ის 90-იანი წლების მიწურულისათვის დაახლოებით 10 მანეთს უდრიდა და 80-იან წლებთან შედარებით 2-ჯერ და მეტად გაიზარდა. მარტო ფაბრიკული წარმოების პროდუქციისა კი სამჯერ და მეტად.

მოტანილი მაჩვენებლები კარგად გვიხატავენ 90-იან წლებში ქვეყნის საერთო სამრეწველო განვითარებას და, კერძოდ, ფაბრიკულ-ქარხნული წარმოების სწრაფ ზრდას.

მრეწველობის განვითარების ძირითადი ხაზი 70—90-იან წწ. საქართველოში წვრილსაქონლური წარმოების შემდგომ განვითარებასა და მრეწველობის შედარებით მაღალი ფორმების (მანუფაქტურა და ფაბრიკა) ხვედრითი წონის განუზრეგ ზრდაში გამოიხატებოდა. ამდენად მრეწველობის სხვადასხვა ფორმის თანაარსებობა მთელი XIX ს-ის მანძილზე საქართველოსათვის დამახასიათებელი მოვლენა იყო. თუმცა ეს სრულიადაც არ გამორიცხავს კაპიტალისა და წარმოების კონცენტრაციას მრეწველობის წამყვან დარგებში, რის მაჩვენებელიც პირველ რიგში 90-იან წლებში მსხვილი სამრეწველო ფირმების და აქციონერული საზოგადოებების ჩამოყალიბება იყო.

მსხვილ სამრეწველო ფირმებს წარმოადგენდნენ დ. სარაჯიშვილის სპირტიანი სასმელების და მირზოევი-ჩითახოვის საფეიქრო წარმოება, მთელი რიგი თამბაქოს ფაბრიკები, ლითონდამმუშავებელი და სახერხი ქარხნები, ზოგიერთი მსხვილი სტამბა და სხვ.

ერთ-ერთი პირველი მსხვილი აქციონერული საზოგადოება შეიქმნა 1895—1897 წლებში ადელხანოვის ტყავის წარმოების ბაზაზე. საზოგადოების ძირითადი კაპიტალი 1,5 მილიონ მანეთს შეადგენდა. 1900—1901 წლებში გაფორმდა შემდეგი აქციონერული საზოგადოებები: 1. ტაიროვალხანოვისა და ტოლეს საპნის, სანთლის და ზეთსახდელი წარმოებისა (0,5 მილიონი მანეთის ძირითადი კაპიტალით), 2. თამბაქოს წარმოებისა — „მირ“ (0,5 მილიონი მანეთის ძირითადი კაპიტალით), 3. იარაღოვის ლითონდამმუშავებელი წარმოებისა (350 ათასი მანეთის ძირითადი კაპიტალით). გარდა აღნიშნულისა, დაარსდა მთელი რიგი აქციონერული საზო-

გადოებებისა, რომელთაც ვერ განახორციელეს თავიანთი საქმიანობა 900-იანი წლებისათვის დაწყებული კრიზისისა თუ სხვა მიზეზების გამო. ასეთები იყო: ალექსანდრე მანთაშევისა და სხვათა „ამიერკავკასიის მანუფაქტურის საზოგადოება“ თბილისში, „კრამიტისა და კერამიკული წარმოებისა“ ქუთაისის მახლობლად, „შავიზღვისსპირეთის ხე-ტყის წარმოებისა“ და სხვ.¹

აღნიშნული აქციონერული საზოგადოებების ამოცანა იყო, წარმოების შემდგომი გაფართოების მიზნით, მრეწველობის უკვე არსებულ დარგებში კაპიტალის კონცენტრაცია, ან ახალი დარგების განვითარება. ამასთანავე, აღსანიშნავია, რომ თანდათან იშლება ზღვარი სავაჭრო და სამრეწველო კაპიტალს შორის, წარმოების მასშტაბები ვეღარ ეტევა ვიწრო ჩარჩოში და მთელი ამიერკავკასიის ფარგლებს მოიცავს. დამახასიათებელია, მაგალითად, ის ფაქტი, რომ ადელხანოვის მიერ დაარსებული საზოგადოებების აქციონერები იყვნენ სხვა სამრეწველო საწარმოთა მესვეურები. აქვე შედიოდნენ მსხვილი საქმოსნები და ბანკირები, თბილისელი და ბაქოელი ვაჭრები.

მეწარმეთა ფართო სამოქმედო ასპარეზზე მიუთითებს „კავკასია-შავიზღვისსპირეთის ხე-ტყის დამამუშავებელი საზოგადოების“ დამაარსებელთა საქმიანობა. ერთ-ერთი მათგანი, ბაქოელი ვაჭრის ქვრივი ნ. პატკანოვა, ბაქოში ფლობდა სახლებსა და ნავთობიანი მიწის ნაკვეთებს. მასვე ეკუთვნოდა ხილის ბაღები კახეთში. მეორე აქციონერი ი. ვერმიშევი დროებით ცხოვრობდა ბაქოში. მისი მუდმივი საცხოვრებელი იყო ქ. ფოთი. აქ და ანაკლიაში მას ჰქონდა ხე-ტყის სარეწები და საწყობები. მესამე აქციონერი ა. იუზბაშევი ერთდროულად იყო ნავთის მრეწველიც ბაქოში და სახერხის სარეწებისა და საწყობების მფლობელი ფოთში. ანაკლიასა და ჭვარში.

სავაჭრო კაპიტალის მრეწველობაში დაბანდების ტენდენციის თვალსაზრისით საინტერესოა „ამიერკავკასიის მანუფაქტურის საზოგადოების“ დამაარსებლების ვინაობა. ესენი იყვნენ თბილისელი და ბაქოელი მსხვილი ვაჭრები მანთაშევი, ავეტისოვები, თუმანოვები და სხვ.

ამრიგად, კაპიტალის წყარო, რომელიც მრეწველობაში მოედინებოდა, ერთი მხრივ, იყო სავაჭრო ოპერაციები, ხოლო, მეორე მხრივ, თვით წარმოების სფერო, სადაც ხდებოდა კაპიტალის ერთი დარგიდან მეორეში გადანაცვლება. თუკი კაპიტალის აღნიშნული წყაროები ნაწილობრივ თვით საქართველოსა და ამიერკავკასიის ფარგლებში იქმნებოდა, მეორე მხრივ კაპიტალი მოედინებოდა რუსეთიდან (მაგ., მინის წარმოება ბორჯომში ეკუთვნოდა ბერგმანების მოსკოვის სავაჭრო სახლს) და საზღვარგარეთიდან (მაგ., კრამიტის და კერამიკული ნაწარმის კავკასიის საზოგადოე-

¹ ე. ხო შ ტ ა რ ი ა, მრეწველობის განვითარება..., გვ. 221—223.

ბის დამაარსებელნი იყვნენ ფრანგები — მარსელის კერამიკული ქარხნების დირექტორი ალფონს გოდო, ვაჭარი ემილ მალარი და ფაბრიკანტი დიოგენ მორისი). მრეწველობაში უცხოური კაპიტალის დაბანდების და აგრეთვე ადვილობრივი მეწარმეების საქმიანობის მაგალითს წარმოადგენს ბათუმის წარმოება. მაგრამ 900-იანი წლებისათვის დაწყებულმა კრიზისმა მნიშვნელოვნად შეაფერხა კაპიტალის დაბანდებანი მრეწველობაში და მისი კონცენტრაცია.

სამთამადნო და სამთო-საქარხნო წარმოება¹

სპილენძის მადნის მოპოვება და გამოდნობა. 70-იანი წლებიდან სპილენძის დამუშავების საქმეში გარკვეული ცვლილებები ხდება. ხაზინამ შეისყიდა ალავერდისა და შამბლულის მიდამოები, ხოლო ადგილობრივ მემამულეებს — ლორის-მელიქოვებს — სამაგიეროდ სხვაგან მიეცათ სახაზინო მიწები. ამიერიდან ბერძნები მადნის დამუშავებას ეწეოდნენ პოსესიური უფლებით. მაგრამ სპილენძის მოპოვებისა და გამოდნობის მასშტაბები ამის შემდეგაც მნიშვნელოვნად არ გაზარდილა. ალავერდსა და შამბლულში გამოდნობილი სპილენძის რაოდენობა წელიწადში საშუალოდ 2—5 ათას ფუნტს შეადგენდა. მუშათა რაოდენობა აქ 200—300 კაცს აღწევდა (დამხმარე სამუშაოებში ჩაბმული მუშების ჩათვლით).

მწარმოებლები გაერთიანებული იყვნენ სამთო-საქარხნო ამხანაგობებში. თითოეული მწარმოებლის წილი განისაზღვრებოდა მათი „პაიების“ რაოდენობით. ასეთი იყო სულ 7 560 „პაი“, თითოეული ღირდა 30 მა-

¹ საქართველოს სამთამადნო და სამთო-საქარხნო მრეწველობის შესახებ ვრცელი ლიტერატურა არსებობს. გარდა საერთოდ საქართველოს სამრეწველო განვითარებისადმი მიძღვნილი შრომებისა (პ. გუგუშვილის, გ. ბაქრაძის, ა. კიკვიძის, ნ. ტყეშელაშვილის), არსებობს სპეციალური ხასიათის ნაშრომებიც, სადაც რეფორმის შემდეგდროინდელი ხანის სამთამადნო წარმოებას ფართო ადგილი აქვს დათმობილი: ვ. ჭანიშვილი, ტყიბულის ქვანახშირის საბადოების დამუშავების ისტორიისათვის საქართველოში, თბ., 1956; მისივე, მანგანუმის მადნის მრეწველობის განვითარება საქართველოში, თბ., 1960; გ. მარგიანი, ტყიბულის ქვანახშირის მრეწველობა საქართველოში, (1977 წლამდე), იე. ჭავჭავაძის სახ. ისტორიის ინსტ. შრ. VI, ნაკვ. 1, 1961, გვ. 113—128. ა. კოჭავაძევილი, საქართველოს სამთამადნომეტალურგიული მრეწველობის განვითარება XIX საუკუნეში, თბ., 1962; ა. ბენდიანიშვილი, ქართული ვრონელა ბურჯეთშია და უცხოური კაპიტალი ქიათურის სამრეწველო რაიონში (1879 — 1921 წწ), საზოგ. მეცნ. განყოფ. „მომავლ“, 1963, № 2; გოგოლაძე, სამთამადნო, სამთო-საქარხნო მრეწველობა საქართველოში და კაპიტალიზმის გენეზისის ზოგიერთი საკითხი, თბ., 1966; ნარკვევი სამთამადნო მრეწველობის განვითარებაზე, იხ.: И. Г. Антелава, Э. А. Орджоникидзе Э. В. Хоштариа, К вопросу о генезисе и развитии капитализма в сельском хозяйстве и промышленности Грузии, Тб., 1967, გვ. 100—122; გ. მარგიანი, სამთამადნო მრეწველობა და სამრეწველო პროდუქტების რეკონსტრუქციამდელ საქართველოში, თბ., 1968.

ნეთი. ამხანაგობის საქმეებს განაგებდა გამგეობა და საერთო კრება. საქმეები წყდებოდა ხმის უმრავლესობით. გადაწყვეტი ხმით სარგებლობდა მრეწველი, რომელსაც ჰქონდა არა ნაკლებ 10 „პაისა“. ხმების რაოდენობა იზრდებოდა „პაიების“ რაოდენობის ზრდის შესაბამისად.

1888 წლიდან ალავერდისა და შამბლულის სპილენძის წარმოება გადავიდა „ახტალის მღაროების ფრანგული კომპანიის“ ხელში. მან დიდი ნაბიჯი გადადგა წარმოების უკეთ მოსაწყობად და გასაფართოებლად. 80-იანი წლების შუახანებიდან აქ ტექნიკური სიახლენიც შემოდის (ტურბინა, ორთქლის მანქანა და სხვ.), თუმცა პროლუქციის შესაჩინევი ზრდა ხდება მხოლოდ XIX ს-ის მიწურულისათვის.

კერძოდ, თუ 90-იანი წლების შუახანებში მადნის მოპოვება უდრიდა 150 ათასამდე ფუთს, საიდანაც აღნობდნენ 4—8 ათას ფუთ სპილენძს, 1899 წლისათვის მოპოვებულ იქნა 700 ათას ფუთზე მეტი მადანი, ხოლო გამოდნობილი — 12 700 ფუთამდე სპილენძი. მუშათა რიცხვი 90-იანი წლების შუახანებში 50—100 უდრიდა, 1899 წლისათვის კი 500 კაცამდე აღწევდა.

1900 წელს აღნიშნული წარმოება გადადის „კავკასიის სამრეწველო და მეტალურგიული საზოგადოების“ ხელში. ამ დროისათვის ალავერდისა და შამბლულის წარმოება უკვე მსხვილ ფაბრიკულ საწარმოს ხასიათს იღებს¹.

ქვანახშირის ამოღება. ტყიბულის ქვანახშირის საბადოების დამუშავება 70—80-იან წლებში ძირითადად ორი ფირმის — ნოვოსელსკის და საზოგადოება „ნახშირას“ ხელში ექცევა. პირველი დაარსებული იყო 70-იანი წლების დასაწყისში, ხოლო მეორე—80-იანი წლების მიწურულში. მაგრამ წარმოება ამ დროს არ იყო ფართო მასშტაბის. ძირითადი დაბრკოლება იყო ამოღებული ქვანახშირის დანიშნულების ადგილამდე მიტანის სიძნელე. წარმოების მოცულობა მნიშვნელოვნად არ გაფართოებულა არც უშუალოდ 1886 წლის შემდეგ, როდესაც გაყვანილ იქნა ტყიბულ-ქუთაისის რკინიგზის ხაზი. დაბრკოლებას ამ შემთხვევაში წარმოადგენდა კაპიტალის ნაკლებობა და აგრეთვე ის, რომ ამიერკავკასიაში მოიპოვებოდა შედარებით იაფი საწვავი (ხე-ტყე და ბაქოს ნავთობი).

70—80-იან წლებში ქვანახშირის მოპოვება ცვალებადი წარმატებით მიმდინარეობდა. 1890 წელს ნოვოსელსკის ფირმამ 297 ათასი ფუთი ქვანახშირი მოიპოვა, ხოლო საზოგადოება „ნახშირამ“ — 160 ათასი ფუთი. ორივე ფირმაში დასაქმებულ მუშათა რაოდენობა 236-ს უდრიდა. 90-იანი წლების შუახანებისათვის ნოვოსელსკის ფირმამ, მიუხედავად იმისა, რომ

¹ დ. გ. გ. ო. ლ. ა. ძ. ე., სამთამადნო და სამთო-საქარხნო მრეწველობა..., გვ., 60—64, 67—71.



სურამის რკინიგზის გვირაბის მშენებლობა.

წარმოების გასამართავად დახარჯა დიდი თანხა (მათ შორის სახაზინო სახსრებით), შეწყვიტა არსებობა. მთელი მისი ქონება გადაეცა „ტყიბულის ქვანახშირის მალაროთა და საბრიკეტო წარმოების საზოგადოებას“, რომელმაც 1897 წელს მოიპოვა 585 ათასი ფუთი ნახშირი, დაამზადა 208 ათასი ფუთი ბრიკეტი. მაგრამ საბრიკეტო ფაბრიკაში მომხდარი ხანძრის შედეგად ეს ფირმაც დაიხურა.

სამაგიეროდ, მნიშვნელოვნად გაზარდა საქმიანობა საზოგადოება „ნახშირამ“. 1899 წელს მის მიერ მოპოვებულ იქნა 2 182 ათასი ფუთი ქვანახშირი. მუშათა რაოდენობა ამ დროს 310 კაცს უდრიდა.

მართალია, ქვანახშირის მოპოვება წარმოებდა პრიმიტიული საშუალებებით — წერაქვითა და ნიჩბით, მაგრამ შემდგომი ოპერაციები საკმაოდ მექანიზებული იყო. განსაკუთრებით იმსახურებს ყურადღებას ნოვოსელსკის მიერ მოწყობილი ბრემსბერგი, რომლის სიგრძე 600 საყენს უდრიდა, სიმაღლე კი 60 საყენს. უკვე 1890 წელს ნოვოსელსკის კუთვნილი მალაროებიდან ქვანახშირი გამოჰქონდათ რონოდების საშუალებით ვიწროლიანდაგიანი გზით, რომლის სიგრძე 450 საყენი იყო. რონოდები უშუალოდ ბრემსბერგით ჩამოდიოდა რკინიგზის ტოტის სატვირთო სადგურზე. იქიდან ქვანახშირის „დახრილი საცრებით“ უშვებდნენ ვაგონებში.

საზოგადოება „ნახშირას“ მალაროებიდან ქვანახშირი ვიწროლიანდა-

ვიანი გზით მიჰქონდათ დამხარისხებელ მოედანზე. აქ მას ათავსებდნენ საცრებზე, რომელნიც ახარისხებდნენ ქვანახშირს 5 კატეგორიად. ქვები-სა და სხვა მინარევის გამოცალკეება ხდებოდა „მბრუნავ მაგიდებზე“. შემდგომ რონოდებში დატვირთული ქვანახშირი ბრემსბერგის საშუალებით ჩამოდიოდა რკინიგზის ლიანდაგამდე, სადაც სპეციალური მოწყობილობით ხდებოდა რონოდების დაპირქვაება რკინიგზის ვაგონებში.

მალარობის მისადგომები ტყიბულის სადგურთან დაკავშირებული იყო ფართოლიანდაგიანი რკინიგზის შტოებით. თითოეულის სიგრძე 3 კერსს უდრიდა.

მანგანუმის მოპოვება¹. ჭიათურაში მანგანუმის ამოღება წარმოადგენდა საქართველოს სამთო მრეწველობის ყველაზე უმსხვილეს ობიექტს. წარმოება აქ იწყება 1879 წლიდან. ინტერესის გაცხოველება ჭიათურის მანგანუმისადმი განპირობებული იყო მსოფლიო მეტალურგიის, კერძოდ, ფოლადის დამზადების სწრაფი ზრდით.

ჭიათურის მანგანუმის ამოღების დაწყების ინიციატორი იყო დიდი ქართველი მწერალი და საზოგადო მოღვაწე აკაკი წერეთელი. ის თავდაპირველად ცდილობდა წარმოების დასაწყებად დაერაზმა ადგილობრივი ძალები, მაგრამ შემდგომ იძულებული გახდა უცხოელი და რუსი მწარმოებლებისათვის მიემართა. 80-იანი წლების დასაწყისიდან ჭიათურაში გამოჩნდა არაერთი საქმოსანი, რომელიც იჯარის წესით ან შესყიდვის გზით ცდილობდა ხელში ჩაეგდო მადნიანი მიწის ნაკვეთები. მაგრამ მოსული მრეწველები თავიდანვე წააწყდნენ ადგილობრივ, უპირატესად წვრილ, მწარმოებელთა წინააღმდეგობას. იმის გამო, რომ მადნის მოპოვება, მისი ხელსაყრელი ბუნებრივი განლაგების გამო, შესაძლებელი იყო რთული ტექნიკის გარეშე, ადგილობრივი წვრილი მრეწველები თავდაპირველად ახერხებდნენ წარმოების სფეროდან მსხვილი ფირმების გამოღვევასაც კი. უკანასკნელნი ამჯობინებენ ადგილობრივ მწარმოებელთაგან შექმნილ მანგანუმის გატანას. მაგრამ თანდათან წარმოებაში სულ უფრო და უფრო მეტად ხდება მსხვილი კაპიტალის შეჭრა, რუსული და უცხოური ფირმების, თუ აქციონერული საზოგადოებების და ადგილობრივ მსხვილ მწარმოებელთა სახით.

მოსული მწარმოებლები ან იჯარით იღებდნენ მიწას ან ყიდულობდნენ მათ. წარმოებაში ჩაბმულნი იყვნენ ადგილობრივი ქემამულენი და წვრილი მიწისმფლობელნი.

¹ მონაცემები მანგანუმის მოპოვების შესახებ აღებული გვაქვს ზემოთ დასახ. ლიტერატურიდან, კერძოდ: Статистика марганцевого дела, Кутаиси, 1902 და ზოგიერთ საარქივო დოკუმენტიდან.

არსებული მონაცემების თანახმად, მადნის მოპოვება 80-იანი წლების დასაწყისში ნახევარ მილიონ ფუთამდე აღწევდა. 1880 წელს დაზვერვებსა და მადნის ამოღებას აწარმოებდა პეტერბურგის სავაჭრო სახლის ვახტერისა და კომპანიის ფირმა, რომლის მიერ ამ წელს 97 მუშის საშუალებით მოპოვებულ იქნა 170 ათასი ფუთი მადანი. ამავე დროს მადნის დამუშავებას აწარმოებდა მანგანუმის მოპოვებელი საზოგადოება; „იმერეთი“, რომელშიც შედიოდნენ მრეწველები: ჩუბინიძე, მოსეშვილი, გამყრელიძე და სხვები. ამ საზოგადოების მიერ 120 მუშის საშუალებით მოპოვებულ იქნა 350 ათასი ფუთი მადანი.

მსოფლიო ბაზარზე მანგანუმის მოთხოვნილების ზრდის გამო მადნის მოპოვება ჭიათურაში სწრაფად ფართოვდება. 1887 წელს მოპოვებულ იქნა 4 მილიონ ფუთზე მეტი, ხოლო გატანილი — 3 700 ათასი ფუთი. ამ დროს აქ 1 156 მუშა მუშაობდა. 1890 წლისათვის მოპოვება უკვე აღემატება 10 მილიონ ფუთს, გატანა კი 8,5 მილიონს აღწევს. მუშათა რაოდენობა 2 600 კაცს შეადგენდა.

მიუხედავად მოპოვების ასეთი ზრდისა, წარმოების ტექნიკა დიდხანს მეტად პრიმიტიული იყო. მალაროებში ძირითადად ხმარობდნენ წერაქვსა და ნიჩაბს. მადნის გამოტანა ხდებოდა ხელის ურიკებით, ანდა რონოდებით, რომელნიც ან მუშებს მოჰყავდათ მოძრაობაში ან ცხენს. რკინის ლიანდაგები მალაროში ჯერ კიდევ იშვიათობას წარმოადგენდა. ჭიათურის რკინიგზის შტოს გაყვანამდე (1895 წ.) მადნის გადაზიდვა რკინიგზის უახლოეს სადგურამდე (შორაპანი) ხდებოდა საჭაპანო თუ სასაპალნე ტრანსპორტით (ურმები, ცხენები), რაც ცუდი გზების გამო დიდ სიძნელეებთან იყო დაკავშირებული და მეტად აძვირებდა მადნის თვითღირებულებას.

მადნის მოპოვებაში ჩაბმული მუშების კონტინგენტი შედგებოდა მალაროებში მომუშავე მნგრეველებისაგან, მადნის გამომტანებისა და დამხარისხებლებისაგან. ეს უკანასკნელნი მადანს აცლიდნენ მინარევებს. ამ საქმეში ფართოდ იყო გამოყენებული ქალებისა და ბავშვების შრომა. გარდა ამისა, მუშათა დიდი რაოდენობა აწარმოებდა მადნის გადაზიდვას რკინიგზის ხაზამდე, ვაგონების დატვირთვას და სხვ.

90-იან წლებში მანგანუმის მოპოვების ზრდის შესახებ წარმოდგენას გვიქმნის ქვემოთაღნილი მონაცემები (იხ. ცხრ. 4).

ცხრილი 4

წლები	სამთო მუშების რიცხვი	წლიური მოპოვება ათას ფუთობით	გატანა ათას ფუთობით
1890	2 605	10 468,1	8 400,4
1894	2 186	11 012,0	9 599,5
1899	3 150	34 131,0	25 073,4
1900	3 701	40 363,4	28 698,3

როგორც ცხრილიდან ჩანს, 1900 წლისათვის 1890 წელთან შედარებით მოპოვება გაზარდილა თითქმის 4-ჯერ, გატანა — 3-ჯერ, ხოლო მუშათა რიცხვი დაახლოებით 42%-ით. 90-იანი წლების მიწურულსა და 900-იანი წლების დასაწყისში გადაზიდვების და მტვირთავი მუშების ჩათვლით, რომელთა რიცხვი დაახლოებით უშუალოდ მადნის მოპოვებაში ჩამოშლულ მუშათა რაოდენობას უდრიდა, ჭიათურაში სულ 6 ათასამდე კაცი მუშაობდა.

მანგანუმი ძირითადად გადიოდა ინგლისში, ჰოლანდიაში, აშშ-ში, ბელგიაში, გერმანიაში, საფრანგეთში და სხვ. მცირე რაოდენობით იგი გაჰქონდათ რუსეთშიც. 90-იან წლებში ჭიათურის მანგანუმის ხვედრი წილი მსოფლიო ექსპორტში 50%-ის აღწევდა.


მანგანუმის წარმოების სოციალ-ეკონომიური ბუნებისა და არსის გასარკვევად დიდი მნიშვნელობა აქვს მრეწველთა შემადგენლობის შესწავლას. ჩვენ ხელთ არსებული სათანადო მონაცემების საფუძველზე მანგანუმის მრეწველებს ვყოფთ სამ ძირითად ჯგუფად: წვრილ, საშუალო და მსხვილ მრეწველებად¹. წვრილ მრეწველებში ვგულისხმობთ იმთ, ვი-

ც ხ რ ი ლ ი 5

მრეწველთა კატეგორიები	1894 წელი						1899 წელი			
	მრეწველთა რაოდენობა	%	მშენებლობის (აქტიური) ფული	%	მუშათა რაოდენობა	%	მრეწველთა რაოდენობა	%	მშენებლობის (აქტიური) ფული	%
წვრილი მრეწველები	162	69,8	2783,6	25,3	708	32,4	119	35,9	2150,7	6,3
საშუალო მრეწველები	64	27,6	5005,9	45,4	925	42,3	174	52,6	16050,9	47,0
მსხვილი მრეწველები	6	2,6	3222,5	29,3	553	25,3	38	11,5	15929,4	46,7
სულ	232		110120		2185		331		34131,0	

¹ ოფიციალური სტატისტიკის თანახმად 900-იანი წლების დასაწყისისათვის მანგანუმის მრეწველები იყოფოდნენ სამ კატეგორიად: წვრილები მოიპოვებდნენ 100 ათასამდე ფუთ მადანს, საშუალონი—100—500 ათას ფუთს და მსხვილები—500 ათას ფუთზე მეტ მადანს.

მრეწველთა ასეთი პრინციპით დაყოფისას არ არის გათვალისწინებული მუშათა რიცხვი, რომელთა ექსპლუატაციას ეწეოდნენ მრეწველები. ამასთანავე, შემცირებულად გვეჩვენება მსხვილ და საშუალო მრეწველთა კატეგორიები. ამ უკანასკნელთა ინტერესებიდან გამომდინარე ყველა, ვინც 100 ათას ფუთზე ნაკლებს მოიპოვებდა, წვრილ მრეწველად იყო გამოცხადებული და ამდენად მოკლებული ხმის უფლებას მრეწველთა ყრილობაზე, ანუ ფაქტიურად ჩამოშორებული იყო მანგანუმის მრეწველობის საქმეების გადაწყვეტაში მონაწილეობას.



ქიათურის რკინიგზა.

საც ჰყავდა 10 მუშამდე და აწარმოებდა 50 ათას ფუთამდე მადანს, საშუალო მრეწველებში — ვისაც ჰყავდა 11—50 მუშა და აწარმოებდა 50—250 ათას ფუთამდე მადანს, სოლო მსხვილ მრეწველებში, ვისაც ჰყავდა 50-ზე მეტი მუშა და აწარმოებდა 250 ათას ფუთზე მეტ მადანს.

მანგანუმის მრეწველთა დაყოფა ამ პრინციპით წარმოგვიდგება შემდეგნაირად! (იხ. ცხრ. 5).

ცხრილიდან ირკვევა, რომ 5 წლის განმავლობაში (1894-დან 1899 წ.-მდე) მანგანუმის მრეწველთა საერთო რიცხვი 30%-ით გაიზარდა. ეს ზრდა ხდებოდა ძირითადად საშუალო და მსხვილ მრეწველთა რაოდენობის გადიდების შედეგად. რაც შეეხება წვირლ მრეწველებს, მათი რიცხვი შემცირდა თითქმის 27%-ით. შეინიშნება აგრეთვე წარმოებაში წვირლ მრეწველთა ხვედრითი წონის დაცემა. თუ 1894 წელს ისინი შეადგენდნენ მრეწველთა საერთო რაოდენობის დაახლოებით 70%-ს, 1899 წელს მხოლოდ 36%-ს. შესაბამისად მცირდება მათი წილი მანგანუმის წლიურ მოპოვებაში (25,3% — 1894 წ. 6,3% — 1899 წელს). აღნიშნული ფაქტები მოწმობენ სარეწების გამსხვილებას მათი რიცხვის საერთო ზრდასთან ერთად. მაგრამ მთლიანობაში ქიათურის მანგანუმის მრეწველობა თავისი ხასიათით მეტად რთულ სურათს წარმოადგენდა. აქ წვირლი წარმოება

¹ 1894 წლის მონაცემები იხილეთ: ЦГИА СССР, ф. 37, оп. 67, д. 954, лл. 12—25, ხოლო 1899 წლის მონაცემები აღებულია გ. ნიკოლაძის არქივში (საქარო ბიბლიოთეკაში) დატულ მრეწველთა სიიდან.

დიდხანს ინარჩუნებს გარკვეულ მნიშვნელობას მანუფაქტურულ და ფაბრიკულ ფორმებთან ერთად.

მანგანუმის მსხვილი ადგილობრივი მრეწველები 90-იან წლებში იყვნენ: გედევან ჩუბინიძე, ნიკოლოზ ლოლობერიძე, საჰსონ აბესაძე, სოლომონ წერეთელი, ნესტორ კაკაბაძე, პავლე მოსეშვილი, დავით ბაქრაძე, პეტრე წულუკიძე, კონსტანტინე გურული და სხვები. მოსულ მრეწველთაგან უმსხვილესნი იყვნენ: ძმები ოგანეზოვები, ივანე ველევი, გუსტავ ემერიკი და სხვ. 1900 წლიდან წარმოება ფართოდ გაშალა დარკვეთის ფრანგულმა ანონიმურმა საზოგადოებამ.

ზოგიერთი მრეწველი მადანს აგზავნიდა მხოლოდ ფოთამდე ან ბათუმამდე, სადაც ყიდდა მას, ან აძლევდა სხვა ფირმებს საკომისიოდ.

XIX ს-ის მიწურულისთვის დიდი მასშტაბით გაჰქონდათ მადანი (1 მილიონ ფუთზე მეტი) სამრეწველო ფირმებს: შუტც და ციმერმანის, პანასიეს, ძმებს ოგანეზოვებს, გ. ემერიკს; ადგილობრივ მრეწველთაგან — პ. წულუკიძეს.

მსხვილი საექსპორტო ფირმები იყო: მალარიის, ვასტგაფისა და ბლეის, პილიდის, ძმების ფორვუდების, სამანჯის, კარპოზილოსის და მანოლოპულოსი, ავგერინოსი და სხვ.¹

მადანზე მოთხოვნილების ზრდის კვალად XIX ს-ის მიწურულისათვის წარმოებაში თანდათან იწერება ტექნიკური გაუმჯობესებანი. ჯერ კიდევ 1886 წელს ნ. ლოლობერიძემ პირველმა სოფ. რგანის მალაროებში მოაწყო 120 მ სიგრძის რკინის ლიანდაგი მადნის გამოსატანად რონოდების საშუალებით. თანდათან შემოდის რკინიგზის ბაქანზე მადნის ჩამოსატანად ბრემსბერგების და ღარების გამოყენება. სადგ. შორაპანში ვაგონების გადასატვირთავად მოწყობილი იყო ბუნკერები. ფრანგულმა ანონიმურმა საზოგადოებამ დარკვეთში დაიწყო გამამდიდრებელი ფაბრიკის აგება.

90-იანი წლების მიწურულამდე სხვადასხვა დროს არსებობდა ადგილობრივ მრეწველთა რამდენიმე გაერთიანება: საზოგადოება „იმერეთი“, „კავკასიის მანგანუმის მრეწველთა ამხანაგობა“, „კავკასიის მანგანუმის ამხანაგობა“. მაგრამ ჩამოთვლილი ამხანაგობები არსებითად წარმოადგენდნენ კერძო ხასიათის გაერთიანებებს, რომელთა ფუნქციები ძირითადად გასაღების სფეროთი იყო შემოფარგლული. ისინი არ იყვნენ სანქციონირებული მთავრობის მიერ და ამდენად წარმოების მასშტაბების სულ უფრო და უფრო ზრდის პირობებში ვერ უზრუნველყოფდნენ მრეწველთა ინტერესების დაცვას.

¹ Статистика марганц. дела, Кутаиси, 1902, გვ. 58.

აღნიშნულის გამო, მრეწველები ხელისუფლების წინაშე სვამდნენ საკითხს მრეწველთა საბჭოს ჩამოყალიბების შესახებ, რაზედაც თანხმობა მიიღეს. საბჭოს დებულების შედგენა დაევალა ცნობილ საზოგადო მოღვაწეს გ. ზდანოვიჩს. სათანადო მოსამზადებელი მუშაობის ჩატარების შემდეგ, 1896 წლის 15 აპრილს ქუთაისში მოწვეულ იქნა შორაპნის მაზრის მანგანუმის მრეწველთა I ყრილობა, რომელმაც მიიღო დებულება და განიხილა ორგანიზაციული საკითხები. ყრილობამ აირჩია აღმასრულებელი კომიტეტი — საბჭო 4 წევრისაგან და 3 კანდიდატი; საბჭოს თავმჯდომარედ არჩეულ იქნა გ. ზდანოვიჩი. ყრილობაზე ხმის უფლებით სარგებლობდნენ მრეწველები, რომელთა წლიური მოპოვება აღემატებოდა 100 ათას ფუტ მადანს და ექსპორტიორები, რომელთაც წლიურად გაჰქონდათ 300 ათას ფუტზე მეტი მადანი. ხმების რაოდენობა იზრდებოდა მოპოვებული ან გატანილი მადნის რაოდენობის ზრდის კვალად გეომეტრიული პროგრესიით.

„მანგანუმის მრეწველთა ყრილობის“ და მისი საბჭოს ჩამოყალიბების შემდეგ ყველა საკითხი წარმოების განვითარებასთან დაკავშირებით მათი საზრუნავი გახდა. ასეთი იყო, მაგ., საკითხი რკინიგზის ტარიფის შემცირების შესახებ. დიდი ბრძოლის შემდეგ ფუთი მადნის გადატანის ტარიფი 1899 წლიდან 10 კაპიკიდან შემცირებულ იქნა 7 კაპიკამდე.

ყრილობის და საბჭოს განხილვის საგანი იყო აგრეთვე საკითხი მადარობთან მისასვლელი გზების გაუმჯობესების შესახებ, რკინიგზის ვაგონების და მადნის დასაწყობი პლატფორმების რაციონალური განაწილებისა, თუ წარმოებაში ტექნიკურ გაუმჯობესებათა დანერგვის, ტექნიკური ზედამხედველობისა და ადმინისტრაციული აპარატის გაუმჯობესების, სტატისტიკურ, სანიტარიულ და სასწავლო საქმის მოგვარების შესახებ და სხვ. აღნიშნულ ღონისძიებათა განსახორციელებლად ყრილობის სასარგებლოდ იკრიბებოდა $1/2$ -კაპიკიანი გამოსაღები თითო ფუტ მოპოვებულ მადანზე.

ყრილობა ყველა ღონისძიების გატარებისას ხელმძღვანელობდა მსხვილი მრეწველების ინტერესებით, რაც იწვევდა მძაფრ წინააღმდეგობას წვრილ და ნაწილობრივ საშუალო მრეწველთა ოპოზიციის მხრივ.

სამთამადნო წარმოების სხვა დარგებიდან XIX ს-ის მეორე ნახევარში აღსანიშნავია ნავთის მოპოვება და გადამუშავება კახეთში — შირაქის ველზე, ქვის დამუშავება საქართველოს სხვადასხვა კუთხეში და განსაკუთრებით სოფ. კურსებში, მაგრამ აღნიშნული საწარმოები დიდი მასშტაბის არ იყო და ამიტომ მათ დაწვრილებით არ ვეხებით.

სამთამადნო წარმოების წამყვანი დარგები იყო მანგანუმის და ქვანახშირის მოპოვება ჭიათურასა და ტყიბულში და ალავერდის სპილენძის

დამუშავება. ყველა ამ საწარმოში XIX ს-ის მიწურულიდან შეიმჩნევა მანქანური ტექნიკის დანერგვა.

ამრიგად, წერილი კაპიტალისტური წარმოების გაფართოება, მსხვილი წარმოების ხვედრითი წონის უპირატესად ზრდის პირობებში, სამთამადნო მრეწველობის ძირითადი დარგების — ქვანახშირისა და მანგანუმის—წარმოების აღმავლობა, მანქანური ტექნიკის დანერგვა, კაპიტალის კონცენტრაცია მრეწველობაში და სხვ., მოწმობს, რომ 70—90-იან წლებში საქართველომ მიიღწია მნიშვნელოვან წარმატებებს კაპიტალისტური განვითარების გზაზე. საგრძნობლად გაიზარდა კაპიტალისტური სექტორის როლი ქვეყნის ეკონომიურ ცხოვრებაში. ფაბრიკულ-ქარხნული წარმოების განვითარების შედეგად ყალიბდება საქართველოს მუშათა კლასი.

§ 3. მუშათა კლასის ჩამოყალიბება

საქართველოს სამრეწველო განვითარების განხილვისას დავინახეთ, რომ დაქირავებული შრომის გამოყენებას მრეწველობის სხვადასხვა დარგში ჯერ კიდევ ფეოდალურ-ბატონყმური წყობილების წიაღში ჰქონდა ადგილი. საგლეხო რეფორმის გატარების დროისათვის საქართველოში კაპიტალისტური ხასიათის მრეწველობაში დასაქმებულ მუშათა რიცხვი დაახლოებით 3 ათასამდე აღწევდა (ამათგან 500-მდე კაცი სამთამადნო წარმოებაზე მოდიოდა). მაგრამ ეს იყო ჯერ კიდევ მუშათა კლასის ჩასახვისა და ემბრიონალური განვითარების ხანა. მუშების ძირითად მასას ქმნიდა სოფლიდან ახლად წამოსული გლეხობა, რომელსაც მიწასთან კავშირი ჯერ არ გაეწყვიტა (ვარესამუშაოებზე გასვლა). მუშათა კონტინგენტს ნაწილობრივ ავსებდნენ ქალაქურ-ხელოსნური ფენის გაჩანაგებული წარმომადგენლები. ამასთან, დაქირავებული მუშების დიდი ნაწილი წვრილ წარმოებაში იყო დასაქმებული. დამმუშავებელ მრეწველობაში აღრიცხული დაახლოებით 2 500 მუშიდან შედარებით მსხვილ საწარმოებში (მანუფაქტურა, ფაბრიკა) ჩაბმული იყო სულ 600-მდე მუშა, ე. ი. 24%. რეფორმამდელი ხანის მრეწველობაში აღრიცხულ მუშებზე გაცილებით მეტი იყო მშენებლობასა და სავაჭრო დაწესებულებებში დასაქმებული მუშახელის რიცხვი. მათი რაოდენობა რამდენიმე ათეულ ათასს აღწევდა.

საგლეხო რეფორმამ დიდი გარდატეხა მოახდინა არა მარტო მშრომელთა სოციალ-ეკონომიურ მდგომარეობაში, არამედ მათ ფსიქოლოგიაშიც. გაწყდა ის ბორკილები, რომელნიც საუკუნეების მანძილზე უშუალო მწარმოებელს მიწის მფლობელისაგან პირადად დამოკიდებულს ხდიდა. ამიერიდან ურთიერთობა მიწის მუშაკსა და მიწის მფლობელს შორის, პირადი დამოკიდებულების გადმონაშთების დაძლევის გზით, თან-

დათან თავისუფალი გარიგების სახეს იღებდა¹. ეკონომიური პირობებით შექმნილი კაბალური მდგომარეობიდან ერთ-ერთი გამოსავალი ხელმოკლე გლეხისათვის იყო საკუთარი სამუშაო ძალის ბაზარზე გამოტანა.

მეორე მხრივ, ქვეყნის კაპიტალისტური გზით განვითარება რეფორმის მომდევნო ხანაში (კერძოდ, სარკინიგზო მშენებლობა და კაპიტალისტური მრეწველობის ზრდა), ფართო მოთხოვნილებას წარმოშობდა თავისუფალ სამუშაო ძალაზე. ღრმავდებოდა მოსახლეობის სოფლიდან ქალაქად ვადანაცვლების პროცესი. სამრეწველო გადატრიალების პერიოდში (რომელიც საქართველოში 70-იანი წლებიდან იწყება, ხოლო 80-იანი წლების შუახანებიდან უკვე აღინიშნება მანქანური წარმოების ხვედრითი წონის განუხრელი ზრდით) ყალიბდება საქართველოს სამრეწველო მუშათა კლასი. ეს უკანასკნელი გარკვეულ ადგილს იჭერს ბურჟუაზიულ საზოგადოებაში, უკვე გვევლინება „კლასად თავისთავად“ (მარქსი).

საქართველოს მუშათა კლასის ჩამოყალიბება გამოიხატება არა მარტო მუშათა რაოდენობის ზრდაში, არამედ იმ ცვლილებებშიც, რომელიც ხდება წვრილ და მსხვილ მრეწველობაში ჩაბმულ მუშათა რაოდენობრივ შეფარდებაში. დამამუშავებელ მრეწველობაში ასეთი შეფარდების შესახებ წარმოდგენას გვიქმნის ქვემოთმოტანილი ცხრილი, რომელიც ემყარება ჩვენ მიერ საქართველოს მრეწველობის განვითარების შესწავლისას მიღებულ შედეგებს².

ც ხ რ ი ლ ი 6

წლები	მუშათა რაოდენობა			
	წვრილ წარმოებაში	მანუფაქტურაში	ფაბრიკულ-ქარხნულ წარმოებაში	სულ მუშა
1865—66	1921	483	132	2576
1885—86	1554	2187	1712	5453
1900	7046	984	9004	17034

როგორც ვხედავთ, 60-იანი წლების შუახანებში ფაბრიკულ-ქარხნულ წარმოებაში ჩაბმული იყო მუშათა 5,3%, 80-იანი წლების შუახანებში — 32%, ხოლო 1900 წლისათვის — 53%.

ამავე დროს, საქართველოს სამთამადნო წარმოების განვითარებასთან დაკავშირებით, ამ დარგშიც ხდება მუშათა მუდმივი კონტინენტის შექ-

¹ შეადარე: ვ. ი. ლენინი, თხზ., ტ. 3, გვ. 364—365.

² იხ. ე. ხოშტარია, მრეწველობის განვითარება და მუშათა კლასის ჩამოყალიბება XIX ს. საქართველოში (დამამუშავებელი მრეწველობის განვითარება), თბ., 1966, გვ. 208—216.

მნა. უკანასკნელთა რიცხვი 60-იანი წლების შუახანებში 500-მდე აღწევდა, 80-იანი წლების შუახანებისათვის — 2 400-ს, ხოლო 1900 წლისათვის — 7—8 ათასს.

მართალია, საქართველოს სამთამადნო წარმოებაში მექანიკური ტექნიკა ინერგება შედარებით უფრო გვიან, კერძოდ, XIX ს-ის მიწურულიდან, მაგრამ აქ მანამდეც ხდება მსხვილ მრეწველთა ხვედრითი წონის ზრდა წარმოებაში, რომელნიც ერთდროულად ეწეოდნენ მუშათა მნიშვნელოვანი რაოდენობის ექსპლოატაციას.

ამრიგად, 70—90-იანი წლები არის საქართველოს მუშათა კლასის ძირითადი კონტინგენტის შექმნის ხანა. XIX ს-ის მიწურულს და XX ს-ის დასაწყისისათვის სამრეწველო მუშათა რაოდენობა, ჩვენი ვარაუდით, აქ 24 ათასს აღწევს¹.

გარდა ამისა, სხვა სახის სამუშაოებში (მშენებლობა, ტვირთის ზიდვა, სხვადასხვა სახის ტრანსპორტის მომსახურება, სავაჭრო დაწესებულებები და სხვ.) დასაქმებული იყო მუშათა მნიშვნელოვანი რაოდენობა. აღნიშნულ დარგებში დაქირავებული შრომის გამოყენების მასშტაბებზე წარმოდგენა შეგვიძლია ვიქონიოთ 1897 წლის აღწერის მასალების მიხედვით² (იხ. ცხრ. 7).

¹ XIX ს-ის მიწურულისა და XX ს-ის დასაწყისისათვის საქართველოში მუშათა რაოდენობა სხვადასხვა ავტორის სხვადასხვანაირად აქვს ნაანგარიშევი, კერძოდ, ი. ხუციშვილის აზრით, ამ დროს საქართველოში იყო 35200 სამრეწველო მუშა (იხ. მისი „1905—1907წწ. რევოლუცია საქართველოში“, თბ., 1954, გვ. 52), გ. ბაქრაძის თანახმად, მუშათა საერთო რაოდენობა ამ დროისათვის უდრიდა 37, 341 კაცს, წყლის წისკვილეებში დაკავებული მუშების გამოკლებით კი 25165 კაცს, აქედან დამმუშაებელ მრეწველობაში იყო დასაქმებული 18 ათასი კაცი, მომპოვებელ მრეწველობაში—2900 კაცი..., ხოლო ამიერკავკასიის რკინიგზის მთავარ სახელოსნოებში — 2265 კაცი (იხ. მისი «Возникновение и развитие...», გვ. 92 — 95); ნ. ჩახვაშვილის გაანგარიშებით საქართველოში საქარხნო-საფაბრიკო წარმოებაში ჩაბმული იყო 17396 მუშა, ხოლო სამთო-საქარხნო წარმოებაში 8 ათასამდე მუშა, ე. ი. სულ იყო 25 ათასამდე მუშა (იხ. მისი «Рабочее движение в Грузии 1870—1904 гг.», Тб. 1958, გვ. 50—51). საქართველოს კომპარტიის ისტორიის ნარკვევებში მითითებულია 27—28 ათასამდე სამრეწველო მუშა (იხ. «Очерки истории коммунистической партии Грузии, Тб. 1957, გვ. 14). 1897 აღწერის მონაცემებით საქართველოს დამმუშაებელ მრეწველობაში ჩაბმული იყო 17 ათასამდე მუშა (იხ. «Численность и состав рабочих в России на основании данных первой всеобщей переписи населения Российской империи 1897 г. II. СПб, 1906, ტაბ. III).

ეს ციფრი თითქოს უახლოვდება დამმუშაებელ მრეწველობაში ჩვენ მიერ მიღებულ ციფრს, მაგრამ მსგავსება ამ შემთხვევაში მხოლოდ გარეგნულია. ჩვენი გაანგარიშება მრეწველობის ცალკეული დარგების მიხედვით განსხვავდება აღწერის მონაცემებისაგან. რაც შეეხება სამთამადნო წარმოებას, აქ ჩვენი და აღწერის მონაცემები საეცებით განსხვავებულია. სამრეწველო მუშათა ნაწილი აღწერის მასალებში, ჩანს, სძიებელია, დღიურ და სხვა მუშათა შორის.

² იხილეთ 1897 წლის აღწერის ზემოდასახელებული გამოცემა «Численность и состав рабочих»..., II, ტაბულა III.

საქშაოთა სახეები	თბილისის გუბერნია	ქუთაისის გუბერნია	ს უ ლ
სამშენებლო საქმე	5534	2197	7731
რკინიგზის მომსახურება	1567	1324	2891
საჭაპანო ტრანსპორტი	1277	400	1677
ტვირთის ზიდვა	634	474	1108
საეპრო დაწესებულებების მომსახურება	1280	795	2075
დუქნების, სასტუმროების მომსახურება	1378	590	1968
სხვა სახის საქმიანობა	966	983	1949
ს უ ლ	12636	6763	19399

იმავე აღწერის მასალების თანახმად საქართველოში აღრიცხული იყო აგრეთვე 19 400 დღიური და შავი მუშა. ვინაიდან აღწერა მოხდა იანვრის თვეში, როდესაც სოფლის მეურნეობაში ამგვარ მუშახელზე ნაკლები მოთხოვნილება არსებობს, ვფიქრობთ, დღიურ და შავ მუშათა დიდი ნაწილი ვაჭრობა-მრეწველობაში ან საქალაქო მეურნეობაში გამოიყენებოდა. გარდა ამისა, იმავე მონაცემებით, საქართველოში სხვადასხვა კატეგორიის მსახურნი შეადგენდნენ 28 900 სულს¹.

საქართველოს მრეწველობაში დასაქმებულ მუშათა ჩვენ მიერ მიღებულ რიცხვს (24 ათასი კაცი) თუ მივუმატებთ ზემოჩამოთვლილი კატეგორიების მუშახელს, გამოვა, რომ შრომის გაყიდვით ცხოვრობდა (გარდა სოფლის მეურნეობის მუშებისა) სულ დაახლოებით 90 ათასამდე სული (სეზონურ მუშებს გარდა).

მუშათა კლასის შევსების სხვადასხვა წყაროს არსებობა მნიშვნელოვან გავლენას ახდენდა მის შემადგენლობაზე. იმის გამო, რომ მანუფაქტურული წარმოება საქართველოში შედარებით გვიან განვითარდა, აქ ვერ მოესწრო საფაბრიკო-საქარხნო მრეწველობისათვის კვალიფიცირებული კადრის მომზადება. ასეთ მუშათა კონტინგენტი ძირითადად იქმნებოდა 70—90-იან წლებში აღმოცენებულ შედარებით მსხვილ წარმოებაში. XIX საუკუნის საქართველოს ფაბრიკულ-ქარხნულ წარმოებაში ჯერ კიდევ არ მოგვეპოვება მუშათა ოჯახებიდან გამოსული მემკვიდრეობითი მუშები.

¹ აღნიშნული კატეგორიის მუშები ცალკეა აღრიცხული 1897 წ. აღწერის მასალებში. იხ. Численность и состав рабочих..., I, С 1 Б, 1906, Приложение I, Распределение рабочих, поденщиков, чернорабочих и прислуги по видам занятий.

მუშათა კლასის შევსების ერთ-ერთ ძირითად წყაროს რეფორმის შემდგომი ხანის საქართველოში სოფლიდან გამოსული ექსპროპრირებული მოსახლეობა შეადგენდა. იგი უპირველეს ყოვლისა ავსებდა ქალაქის მცხოვრებთა რიგებს და ამ გზით ებმებოდა მრეწველობაშიც. მუშათა კონტინენტის შექმნის მეორე წყაროა თვით ქალაქების მკვიდრი მოსახლეობის უმთავრესად წვირლ მწარმოებელთა და ვაჭრების, გალატაკებული ნაწილი. მუშათა მნიშვნელოვან პროცენტს შეადგენდნენ აგრეთვე რუსეთის შიდა გუბერნიებიდან, კავკასიის სხვა მხარეებიდან, თუ უცხოეთიდან (უმთავრესად თურქეთიდან და სპარსეთიდან) მოსულნიც. იმ გარემოებამ, რომ საქართველოს მრეწველობა, და, კერძოდ, ისეთი სამრეწველო ცენტრები, როგორც იყო თბილისი, ბათუმი, ჭიათურის სამთამადნო რაიონი და სხვა, იზიდავდნენ მუშებს საქართველოს გარედანაც, განაპირობა აქ მუშათა კლასის მრავალეროვნული შედგენილობა.

სამრეწველო მუშების მულმივი კონტინგენტი იქმნებოდა უმთავრესად საქართველოს სოფლებიდან გადმოსული ისეთი მუშახელისაგან, რომელმაც გაწყვიტა კავშირი სოფელთან. ამავე კატეგორიის მუშათა რიგებს ქმნიდნენ უღარიბესი ფენები ქალაქების მკვიდრთაგან, და ნაწილობრივ, საქართველოს გარედან მოსული და აქ დამკვიდრებული მშრომელინი. ესენი ფაქტიურად მოკლებული იყვნენ საწარმოო საშუალებებს და თავის სარჩენად საკუთარი სამუშაო ძალის გაყიდვის გარდა, სხვა სახის არ გააჩნდათ. მათ შორის საქართველოს სოფლებიდან მოსულნი თავდაპირველად შედარებით მცირე პროცენტს შეადგენდნენ. საქართველოსათვის უფრო დამახასიათებელი იყო სოფლიდან დროებით წამოსული ე. წ. „ნადელიან მუშათა“ არსებობა. როგორც ცნობილია, მუშათა კლასის ჩამოყალიბების ერთ-ერთი არსებითი მაჩვენებელი იყო წარმოების საშუალებებისაგან — მიწისაგან — მოწყვეტა, სოფელთან კავშირის გაწყვეტა. მაგრამ ამ პროცესს ყველა კონკრეტულ შემთხვევაში თავისებურებანიც ახლავს. იქ, სადაც გადასვლა ფეოდალიზმიდან კაპიტალიზმზე რევოლუციური გზით ხდებოდა, ადგილი ჰქონდა უშუალო მწარმოებლის ერთბაშად მოწყვეტას წარმოების საშუალებათაგან, ხოლო სადაც ეს გადასვლა ხორციელდებოდა ნახევრული რეფორმების გზით (მაგ., რუსეთში), უშუალო მწარმოებელი ჯერ კიდევ მკვიდროდ იყო დაკავშირებული მიწასთან. მით უმეტეს ეს ითქმის საქართველოზე, სადაც საგლეხო რეფორმა გატარდა უფრო შეკვეცილი სახით, ვიდრე რუსეთის გუბერნიებში. მცირე ნადელის მქონე მუშა, რომელიც საარსებო საშუალებებს ივსებს სამუშაო ძალის გაყიდვით, ჩვეულებრივი მოვლენა იყო საქართველოშიც. უპირატესად კი დასავლეთ საქართველოს რაიონებში, სადაც ნადელის ზომა უკიდურესად მცირე იყო. დასავლეთ საქართველოს სოფლის მოსახლეობის უღარიბესი ფენების კავშირი მრეწველობასთან (ბათუმი, ჭიათურა,

თბილისი) იმდენად მჭიდრო იყო, რომ შეგვიძლია პირობითად ვილაპარაკოთ არა აქედან წამოსული მუშების მხრივ კავშირის გაწყვეტაზე სოფელთან, არამედ ზღვარის წაშლაზე სოფლის უღარიბეს მოსახლეობასა და მრეწველობაში ჩაბმულ მუშებს შორის. დროთა ვითარებაში, ცხადია, მრავლდება ისეთი მუშების რიცხვიც, რომელნიც სავსებით წყდებათ სოფელს. მრეწველობაში ჩაბმული გლეხობის ყოველი ახალი ნაკადი უკვე წარმოადგენდა არა მუშათა კლასის წყაროს, არამედ რეზერვს.

90-იანი წლების მასალებში იშვიათობას არ წარმოადგენენ მრეწველობაში ჩაბმული ისეთი მუშები, რომელნიც ათეული წლების მანძილზე იმყოფებოდნენ ამა თუ იმ საწარმოში, დაუფლებულნი იყვნენ გარკვეულ პროფესიას. მაგალითად, 1900 წლისათვის, ჩითახოვის საფეიქრო ფაბრიკის 29 გაფიცული მუშიდან, საწარმოში 20 წელზე მეტ ხანს მუშაობდა 3, ხოლო 15—20 წელი — 6 მუშა, დანარჩენები კი უფრო ნაკლებ ხანს¹. როგორც ირკვევა, გაფიცვის ერთ-ერთი მიზეზი იყო ის, რომ მუშები აქ მუშაობდნენ პატარაობიდანვე და ვერ მიაღწიეს ჯამაგირის მომატებას². იგივე ვითარებაა სხვა საწარმოებშიც. მაგ., ადელხანოვის სამხედრო ტანსაცმლის ფაბრიკაში 1900 წელს გაფიცული 30 მუშიდან 25 წელზე მეტი ხანი მუშაობდა 11 კაცი, 15-დან 25 წლამდე — 7 კაცი, 5-დან 15-მდე — 5³. ბოზარჯიანცის თამბაქოს ფაბრიკის მუშების კოლექტიურ განცხადებაში თბილისის პოლიცემისტერისადმი აღნიშნულია, რომ მუშათა უმრავლესობა საწარმოში იმყოფებოდა 10 წელზე მეტ ხანს⁴, ზოგიერთი კი — 20 წელზე მეტს⁵. ადელხანოვის ტყავის ქარხანაში 1899 წლისათვის 355 მუშიდან 5-წლიანი სტაჟით იყო 239 მუშა⁶. მნიშვნელოვანი იყო 10 და მეტი წლის სტაჟის მქონე მუშათა პროცენტი რკინიგზის მთავარ სახელოსნოებშიც⁷.

საქართველოს მრეწველობაში მუშათა პროლეტარული კადრების შექმნა, რომელთაც სამუშაო ძალის გაყიდვის გარდა სხვა რამ საარსებო საშუალება არ გააჩნდათ, ჩანს ჩითახოვის ფაბრიკის მუშების კოლექტიური თხოვნიდან, სადაც მუშები წერენ: „ჩვენ ვარსებობთ ჩვენივე შრომით. არავითარი სხვა საკუთრება, ან ცხოვრების სხვა რამ სახსარი არა გვაქვს. ამიტომ, ბუნებრივია, მუშაობის შეჩერება, თუნდაც დროებით, ფაბრიკაში, სადაც პატარაობიდანვე დავიწყეთ და ვამთავრებთ ჩვენს უბადრუკ შრო-

¹ სსცია, ფ. 17, საქ. 4411, ფურც. 7.

² სმ, 9, 1956, გვ. 233.

³ სსცია, ფ. 17, საქ. 4412, ფურც. 4.

⁴ იქვე, საქ. 4415, ფურც. 27.

⁵ იქვე, ფურც. 75.

⁶ ა. მ. ს. ტ. ვ. ი. შ. ვ. ი. ლ. ი., ქალაქ თბილისის მუშათა კლასის ფორმირება და მისი რევოლუციური მოძრაობის პირველი ნაბიჯები (1880—1900 წწ.), თბ., 1965, გვ. 21.

⁷ იქვე, გვ. 10.

მით ცხოვრებას, ნიშნავს ჩვენი და ჩვენი ოჯახების არსებობის შეწყვეტას“¹.

იმავე ფაბრიკის დახურვასთან დაკავშირებით 1901 წელს ადგილობრივი ხელისუფლება შიშობდა, რათა საწარმოს დახურვას არ გამოეწვია მუშათა მღელვარება. კერძოდ, ხელისუფლება მხედველობაში იღებდა, რომ ფაბრიკის მუშათა დიდი ნაწილი წლების მანძილზე დაეუფლა თავის საქმეს და შეეჩვია მას. ხოლო რადგან საფეიქრო ფაბრიკა თბილისში მხოლოდ ერთი იყო, მუშებს გაუჭირდებოდათ მსგავსი სამუშაოს სხვაგან მოძებნა, რაც გამოიწვევდა მათ უკმაყოფილებას².

ამრიგად, მოტანილი მაგალითების მიხედვით, საფუძველი გვაქვს ვამტკიცოთ, რომ საქართველოს მრეწველობაში XIX ს-ის მიწურული-სათვის იქმნება კვალიფიცირებული მუშათა კადრი, რომელიც შეადგენდა საქართველოს მუშათა კლასის ბირთვს. ამასთან ერთად, აღსანიშნავია, რომ საქართველოს მრეწველობაში, როგორც ყველგან კაპიტალისტურ წარმოებაში, ჩაბმული იყვნენ ქალები და მცირეწლოვანი ბავშვები, რომელნიც მუშაობდნენ უკიდურესად მძიმე პირობებში.

მუშათა კლასის ჩამოყალიბების ერთ-ერთი მაჩვენებელი არის კოლექტივიზმის, პროლეტარული თვითშეგნების გამოჩენა. ამ მხრივ საყურადღებოა გაზეთ „ცნობის ფურცელში“ დასაბეჭდად გათვალისწინებული, ცენზურის მიერ შეჩერებული, ერთ-ერთი წერილის შინაარსი, სადაც ენფინჯიანცის თამბაქოს ფაბრიკის მუშების შესახებ ნათქვამია, რომ თავდაპირველად მათ არ ჰქონდათ „ერთი პირი“, რის გამოც არ შესწევდათ „ისეთი ძალა, რომ თავიანთ მეტოქეს (ე. ი. ფაბრიკის მეპატრონეს — ავტ.) გამკლავებოდნენ. თუ ერთი წილი თავგამოდებით იბრძოდა თავის უფლების დასაცავად, ე. ი. სამუშაოს შენარჩუნებისათვის და მეტოქეობას უწევდა თავიანთი ქარხნის პატრონს, ორი წილი, პირიქით, ემუდარებოდა: „შენი ჭირიმე, გვამუშავე, სიმშლით ნუ დაგვხოცევო“. „ამისათვის, — ვკითხვლობთ წერილში, — მათ მოძრაობას შესამჩნევი შედეგი არ მოჰყოლია აქამომდე“. წერილის ავტორი ასეთ ვითარებას უპირისპირებს 1897 წელს ფაბრიკის მუშათა ერთსულოვან გამოსვლას თავიანთი ინტერესების დასაცავად, ფაბრიკაში მანქანების შემოღებასთან დაკავშირებით³.

შესამჩნევი გარდატეხა მუშათა შეგნებაში 80-იანი წლებიდან ხდება, როდესაც ინტენსიურად შემოდის მანქანური წარმოება და ამასთანავე მუშათა წრეებში ფეხს იკიდებს სოციალისტური იდეები. თუკი 80-იანი წლების შუახანებში ს. გულიშამბაროვს ჯერ კიდევ ჰქონდა საფუძველი

¹ სსცია, ფ. 17, საქ. 4411, ფურც. 3.

იქვე, ფურც. 22.

სმ 9, გვ. 168.

ემტკიცებინა, რომ თბილისის მუშებს არა აქვთ ერთობლიობის არავითარი შეგნება და ისინი წარმოადგენენ „ჭრელ ბრბოს“, 90-იანი წლების მუშათა მოძრაობა იყო დადასტურება სრულიად საწინააღმდეგო მოვლენისა, რის უარყოფა არ შეეძლოთ თვით ხელისუფლების წარმომადგენლებსაც კი. 90-იანი წლების მიწურულიდან მუშათა მოძრაობასთან სოციალიზმის შეერთების და XX ს-ის დასაწყისიდან კაპიტალისტებისა და თვითმპყრობელობის წინააღმდეგ მუშათა პოლიტიკურ ბრძოლაზე გადასვლის შემდეგ, საქართველოს პროლეტარიატი ყალიბდება „კლასად თავისთვის“, რომელმაც, როგორც რუსეთის პროლეტარიატის ერთ-ერთმა მოწინავე რაზმმა, კლასობრივი შეგნებულობის და დარაზმულობის მაგალითი აჩვენა რუსეთს პირველი რევოლუციის პერიოდში.

§ 4. მახრობა და კრედიტი

XIX ს-ის 70 — 90-იანი წლები საქართველოს როგორც საგარეო. ისე საშინაო ვაჭრობის განვითარებისათვის განსაკუთრებით მნიშვნელოვანი პერიოდია. რკინიგზების გაყვანის, სამთამადნო მრეწველობის აღმავლობის, სავაჭრო მიწათმოქმედების განვითარებისა და სახელმწიფო და კერძო საკრედიტო ორგანიზაციების დაარსების შედეგად საქართველო მტკიცედ ებმება მსოფლიო საქონელბრუნვაში. თუ მთელი XIX ს-ის პირველი ნახევრის განმავლობაში საქართველოს საგარეო ვაჭრობის ბალანსი პასიური იყო და მთელი ამ ხნის განმავლობაში ამიერკავკასიას და საქართველოს უხდებოდა მნიშვნელოვანი თანხის გადახდა შემოტანილი საქონლის ღირებულების ასანაზღაურებლად, უკვე 70-იანი წლებიდან საქართველოს ექსპორტის ღირებულება სწრაფად იზრდება, ხოლო 80-იანი წლებისათვის, როცა იწყება მარგანეცისა და სიმიდის გაცხოველებული გატანა, საქართველოს საგარეო ვაჭრობის ბალანსი აქტიურ ხასიათს ღებულობს და ექსპორტი ბევრად აღემატება იმპორტს. სასაქონლო მეურნეობაზე დამყარებული დარგობრივი სპეციალიზაცია, შრომის საზოგადოებრივი დანაწილების გაღრმავება და უკვე 70-იანი წლებისათვის გლახობაში შორს წასული სოციალური დიფერენციაცია საშინაო ბაზრის მნიშვნელოვან გაფართოებას იწვევდა. იზრდებოდა გლახობის მოთხოვნილება სამრეწველო პროდუქციაზე — პირადი მოხმარების საგნებსა და საწარმოო საშუალებებზე, მაგრამ ეს გარემოება ფართო მასების მატერიალური დონის ამაღლებას კი არ მოასწავებდა, არამედ სასაქონლო-ფულადი ურთიერთობის განვითარების შედეგად, ნატურალური მომხმარებლობის ხარჯზე სასაქონლო მომხმარებლობის გაზრდით იყო გამოწვეული. პირველი მოხმარების საგნებზე გაზრდილი მოთხოვნილების დაკმაყოფილება ძი-

რითადად რუსეთიდან და ევროპის ქვეყნებიდან შემოტანილი საქონლით ხდებოდა.

70-იან წლებში ევროპის ქვეყნებიდან თბილისის საბაჟოში შემოტანილი საქონლის საშუალო წლიური ღირებულება 2 596 000 მანეთს შეადგენდა¹. იმავე ხანებისათვის დასავლეთ საქართველოს საბაჟოებში (გუდაუთის, ოჩამჩირის, სოხუმის, რედუტ-კალეს, ფოთის, შეკვეთილისა და ახალციხის) წლიურად შემოჰქონდათ 1 843 032 მანეთის საქონელი.

ევროპიდან საქართველოში შემოდის ამერიკული ნარმა, ბამბის, შალის, აბრეშუმის, ტილოსა და სელის ქსოვილები, ფოლადი და ფოლადის ნაკეთობანი, მაგარი სასმელები, შაქარი, ჩაი, მინა და მინის ნაწარმი, ასანთი, ზეთი და სხვ.

80-იან წლებში ევროპის ქვეყნებიდან საქართველოში შემოტანილი საქონლის საშუალო წლიური ღირებულება დაახლოებით 1—2 მილიონი მანეთის ფარგლებში მერყეობდა და გაზრდის ნაცვლად შემცირების ტენდენციას იჩენდა. 90-იანი წლებისათვის კი ეს ციფრი 6 464 088 მანეთამდე გაიზარდა. სავაჭრო ოპერაციების ასეთი მკვეთრი ზრდა, ერთი მხრივ, საქართველოს სამთამადნო და დამამუშავებელი მრეწველობის განვითარებისა და, მეორე მხრივ, რუსეთის მძიმე მრეწველობის შედარებით სუსტი განვითარებით იყო გამოწვეული. ევროპიდან შემოტანილი საქონლის ღირებულების თითქმის 45% მოდიოდა თუნუქის ფურცლებზე, რომლებიც ბათუმიდან გასატანი ნავთობის ტარის გასაკეთებლად იყო გაშიზნული. კერძოდ, 1896 წ. ევროპიდან შემოტანილი საქონლის საერთო ღირებულების 9 043 492 მანეთიდან 4 167 960 მანეთი მარტო თუნუქის ფურცლებზე მოდიოდა². ამავე მიზნებისათვის, კოლოფებისა და ყუთების გასაკეთებლად მოიხმარებოდა საზღვარგარეთიდან შემოტანილი 290 073 მანეთის კალა, 96 643 მანეთის ტყვია, 2 907 მანეთის თუთია, 139 656 მანეთის მავთული და სხვ³. ამავე წელს სასოფლო-სამეურნეო იარაღი, ორთქლის ძრავები, საერთოდ ყოველგვარი მანქანა-იარაღები შემოიტანეს 670 605 მანეთისა. საფეიქრო ნაწარმი და შაქარი კი ევროპიდან თითქმის აღარ შემოდის. ამ საქონელზე გაზრდილი მოთხოვნილება რუსული ფაბრიკა-ქარხნების ნაწარმით კმაყოფილდებოდა.

70-იანი წლების დასაწყისში დასავლეთ საქართველოს ნავსადგურებში საკაბოტაჟო გზებით რუსეთის შიდა გუბერნიებიდან შემოიტანეს 4 393 526 მანეთის ღირებულების საქონელი. აქედან 1 101 121 მანეთისა იყო საფეიქრო ნაწარმი, დანარჩენი კი — შაქარი, ხორბალი, საგალანტერიო საქონელი, სპირტი, თუჯისა და რკინის ნაკეთობანი, ჭურჭლეული, სა-


¹ სსცია. ფ. 378, ანაწ. 1, საქ. 11544.

² იქვე, ფ. 17, ანაწ. 1, საქ. 9625.
იქვე.

პონი, მედიკამენტები, ხე-ტყე, ავეჯი და სხვ. 70-იანი წლების ბოლოსათვის რუსეთიდან სამდინარო-სანაოსნო გზებით შემოტანილი საქონლის ღირებულება ოთხჯერ გაიზარდა და 16 666 447 მანეთი შეადგინა, 80-იანი წლების ბოლოსათვის კი 22 425 950 მანეთი. შემოტანილი რუსული საქონლის ნაწილი სპარსეთში გასატანად იყო განკუთვნილი. სპარსეთში გადიოდა 1 800 000 მანეთის ფქვილი, 2 300 000 მანეთის რკინა, რკინის ნაწარმი და სხვ.

საქართველოს ბაზრებზე რუსული საქონლის შემოტანის სწრაფი ზრდა მთავრობის ხელის შეწყობით იყო გამოწვეული. ის ყოველმხრივ ცდილობდა მეტროპოლიის სამრეწველო პროდუქციისათვის ამიერკავკასიის ბაზრების დამორჩილებას. ასეთ შემთხვევაში იგი არ გაურბოდა მფარველობითი ტარიფის დაწესებასაც. იმის გამო, რომ საქართველოს ვაჭრობის მთავარ საგანს საფეიქრო ნაწარმი (ძირითადად ბამბის ქსოვილები) წარმოადგენდა, ხოლო რუსეთი, თავის მხრივ, საფეიქრო მრეწველობის სწრაფი განვითარების გამო სწორედ ამ საქონლის გააღებით იყო დაინტერესებული, რუსეთის სახელმწიფო საბჭომ მიზანშეწონილად ცნო ევროპიდან საქართველოში შემოტანილ ნარმასა და საერთოდ ბამბის ქსოვილებზე დადებული ბაჟი გაეზარდა. ხელისუფლება ამ ღონისძიებების გატარებით ვითომ საქართველოსა და ამიერკავკასიაში აღვილობრივი საფეიქრო მრეწველობის განვითარებისათვის იღწვოდა, სინამდვილეში კი იგი მიზნად ისახავდა დაეცვა რუსეთის მეტროპოლიის მრეწველობა კონკურენციისაგან. 1868 წლიდან გირვანქა ევროპულ უბრალო ბამბის ქსოვილებზე ათკაპიკიანი ტარიფის ნაცვლად დაწესდა 15 კაპიკი, რაც ამ ქსოვილების ღირებულების 18%-ს შეადგენდა და სერიოზული შემათერხებელი გარემოება იყო ევროპის ქვეყნებიდან მათი შემოტანისათვის. გარდა ამისა, რუსეთის შიდა გუბერნიებთან ვაჭრობის სწრაფ ზრდას ისიც უწყობდა ხელს, რომ თბილისელი და საერთოდ ამიერკავკასიელი ვაჭრები რუს მრეწველ-ვაჭრებს შორის ფართო კრედიტით სარგებლობდნენ, მაშინ როცა ევროპის ქვეყნებთან ვაჭრობა მხოლოდ ნაღდ ანგარიშზე წარმოებდა.

თავის მხრივ, საქართველო სავაჭრო მიწათმოქმედების განვითარების და დარგობრივი სპეციალიზაციის გაღრმავების შედეგად როგორც საგარეო, ისე საშინაო ბაზარს, სულ უფრო და უფრო მეტი ღირებულების პროდუქციას აწვდიდა. საგარეო და საშინაო ბაზარზე საქართველოს ყველა რაიონი თავისი მეურნეობისათვის დამახასიათებელი საქონლით იღებდა მონაწილეობას. კახეთი ბაზარს უმთავრესად ღვინოს აწვდიდა, ქართლი — მარცვლეულს, ხილბოსტნეულსა და ღვინოსაც, იმერეთი — ღვინოს, აბრეშუმის პარკსა და მეფრინველეობის პროდუქტებს, გურია-სამეგრელო — სიმინდსა და აბრეშუმის პარკს, აფხაზეთი — თამბაქოსა და სიმინდს, საქართველოს მთიანეთი კი მეცხოველეობის პროდუქტებს.



თბილისი. ქარავანი მტკვართან.

XIX ს-ის ბოლოსათვის მარტო ქუთაისის გუბერნიას ბაზარზე გამოქ-
მონდა 11 მილიონი მანეთის მარცვლეულის, მეღვინეობის, მეაბრეშუმეო-
ბისა და მეთამბაქოეობის პროდუქტები. აღმოსავლეთ საქართველო კი და-
ახლოებით ამდენსავე თანხას იღებდა მარტო მევენახეობა-მეღვინეობის
პროდუქციის რეალიზაციით.

საქართველოს როგორც საგარეო, ისე საშინაო ვაჭრობაში, განსაკუთ-
რებული მნიშვნელობა ენიჭებოდა ღვინით ვაჭრობას. მეღვინეობა, რომე-
ლსაც თითქმის მთელი XIX საუკუნის განმავლობაში სასაქონლო ხასიათი
ქმონდა, 70-იანი წლებიდან რკინიგზებისა და მოსახერხებელი სამომოს-
ვლო გზების გაყვანის შემდეგ, ერთ-ერთ ყველაზე შემოსავლიან დარგად
იქცა.

70—90-იანი წლებსათვის რუსეთის იმპერიაში — მოსკოვში, პეტერ-
ბურგში, სტავროპოლში, ვლადიკავკაზში, ოდესასა და სხვა ქალაქებში —
უკვე კარგად იცნობდნენ არა მარტო კახურ ღვინოებს, არამედ საქარ-
თველოს სხვა მაზრებში დაყენებულ ღვინოებსაც. 1876—1880 წლებში
ამიერკავკასიიდან რკინიგზით რუსეთში გაუტანიათ 195 932 ფუთი ღვინო,
1891—1894 წლებში კი — 1 036 574 ფუთი. აქედან მოსკოვში გაიგზავნა

32 697 ფუთი, პეტერბურგში — 62 554, ვარშავაში — 33 222, ოდესაში — 23 042, ხარკოვში — 25 160, ნოვოროსიისკში — 10 387, კიევში — 9 094, რიგაში — 7 760, სევასტოპოლში — 2 019, ქერჩში — 3 382, ტულაში — 2 162, როსტოვში — 596, კურსკში — 3 218, მარიუპოლში — 1 333, ორიოლში — 1 005, ლოძში — 1 308, ვილნოში — 1 592 ფუთი და სხვ. სახელდობრ რა რაოდენობის ღვინო იყო მხოლოდ საქართველოდან რუსეთის ზემოჩამოთვლილ ქალაქებში გატანილი, ამის შესახებ ზუსტი ცნობები არ მოგვეპოვება, მაგრამ თუ გავითვალისწინებთ იმ გარემოებას, რომ საქართველოს მეღვინეობის როგორც საერთო, ისე სასაქონლო პროდუქციას ამიერკავკასიაში წამყვანი ადგილი ეკავა, შეიძლება დავასკვნათ, რომ გატანილი პროდუქციის დიდი ნაწილი სწორედ საქართველოზე მოდიოდა. ამ დროისათვის მოსკოვში, პეტერბურგში, ოდესასა და სხვა ქალაქებში ღვინის საწყობები ჰქონდათ „ივ. მუხრანბატონისა და კომპანიის“ სავაჭრო სახლს, „ზაქარია ჯორჯაძესა და კომპანიას“ და სხვ. ამავე დროს საუფლისწულო მამულებში ყოველწლიურად 1½ მილიონი ბოთლი ღვინო მზადდებოდა გასაყიდად. საუფლისწულო მეურნეობა ღვინოს უმთავრესად რუსეთის ქალაქებში გასატანად ამზადებდა. მაგრამ აქვე უნდა აღინიშნოს, რომ საქართველოში წარმოებული ღვინის სასაქონლო პროდუქცია უმთავრესად საშინაო ბაზარზე სალდებოდა. 90-იანი წლების შუახანებისათვის (1894 წ.) დასავლეთ საქართველოში (ძირითადად ქუთაისისა და შორაპნის მაზრებში) 4 800 000 ვედრო ღვინო დაუყენებიათ. აქედან 2 362 000 ვედრო ბაზარზე გაუტანიათ. ქუთაისისა და შორაპნის მაზრების ღვინოები გაჰქონდათ სამეგრელოში, ბათუმში, ფოთში, თბილისში, სურამსა და ხაშურში. თავის მხრივ, ქუთაისის გუბერნია აღმოსავლეთ საქართველოს ღვინოებსაც მოიხმარდა. ამავე 1894 წელს აღმოსავლეთ საქართველოში დაყენებული იყო 5 837 445 ვედრო ღვინო, ბაზარზე გამოვიდა 3 253 797 ვედრო, ღვინის გაყიდვით მიღებული შემოსავალი 5 331 053 მანეთს უდრიდა¹. ამ დროისათვის საქართველოს ყველა ქალაქსა და დაბებში მრავლად იყო ღვინით სავაჭრო სარდაფები. მაგალითად, თბილისში 215 ღვინის სარდაფი ყოფილა 1 350 600 მანეთამდე. წლიური საქონელბრუნვით, ბათუმში — 58 სარდაფი 260 000 მან. საქონელბრუნვით, ფოთში — 19 სარდაფი 52 900 მან., სოხუმში — 15 სარდაფი 43 600 მან. საქონელბრუნვით, დაბა ყვირილაში — 3 სარდაფი 20 000 მან; აბაშაში — 6 სარდაფი 6 000 მან., ახალსენაკში — 13 სარდაფი 25 800 მან. ზუგდიდში — 6 სარდაფი 4 800 მან., გორის მაზრაში 38 სარდაფი 77 400 მანეთის წლიური საქონელბრუნვით და სხვ.

¹ სსცია, ფ. 17, ანაწ. 1, საქ. 1460.

80—90-იანი წლების საქართველოს მარცვლეულის მეურნეობაში სიმინდით ვაჭრობას განსაკუთრებული ადგილი ეკავა. დასავლეთ საქართველოს რაიონები, სახელდობრ სამეგრელო და აფხაზეთი, დიდი რაოდენობით აწვდიდნენ სიმინდს საგარეო ბაზარს. 1881 წელს დასავლეთ საქართველოდან ევროპის ქვეყნებში გაიტანეს 858 008 ფუთი სიმინდი, 1882 წ. — 1 806 000 ფუთი, 1883 წ. — 1 651 000 ფ., 1884 წელს კი — 5 113 000 ფუთი. ამ დროიდან ქუთაისის გუბერნიიდან სიმინდის საშუალო წლიური გატანა 5—6 მილიონ ფუთს აღწევდა. სიმინდის გაყიდვით მიღებული საშუალო წლიური შემოსავალი 3—4 მილიონ მანეთს უდრიდა.

90-იანი წლების ბოლოდან კი სიმინდის ექსპორტი საგრძნობლად მცირდება. ეს შეპყირება გამოწვეული იყო მსოფლიო ბაზარზე ამერიკული სიმინდის მოზღვავეებით, რომლის თვითღირებულება, ამერიკის სასოფლო-სამეურნეო ტექნიკის მაღალი დონის გამო, გაცილებით უფრო ნაკლები იყო, ვიდრე ქუთაისის გუბერნიაში. ადგილობრივი მეურნეები, რომელთაც ამ დროისათვის სიმინდით ნათესების ფართობები საგრძნობლად ჰქონდათ გაზრდილი და საკმაოდ იყვნენ ჩათრეული მსოფლიო ბაზრის საქონელბრუნვაში, იძულებული იყვნენ თავიანთი ნაწარმის კონკურენტუნარიანობის ამაღლებისათვის ეზრუნათ.

სიმინდის ექსპორტის შემცირებასთან ერთად შეინიშნება ამ პროდუქტის სულ უფრო მზარდი მოთხოვნილება საშინაო ბაზარზე. სწრაფად განვითარებული მეფრინველეობა თანდათანობით მეტი რაოდენობით მოიხმარდა მარცვლეულს.

სიმინდი უმთავრესად ფოთის ნავსადგურიდან გაჰქონდათ, სადაც საზღვარგარეთული ფირმის რამდენიმე კანტორა არსებობდა. დასავლეთ საქართველოს დაბა-სოფლებში ადგილობრივ ვაჭრებს — კულაკ შემსყიდველებს სიმინდის საწყობები ჰქონდათ გახსნილი. ისინი უშუალო მწარმოებლისაგან შესყიდულ სიმინდს რკინიგზით ან მდინარე რიონით აწოდებდნენ ფოთში მოკალათებულ ექსპორტიორებს.

XIX ს-ის 90-იან წლებში სიმინდის საწყობები იყო: დაბა ყვირილაში 13, ახალსენაკში — 9, ძველ სენაკში — 3, აბაშაში — 16, ანაკლიაში — 14 და სხვ.¹ ზოგი საწყობის წლიური ბრუნვა 30—40 ათას მანეთს აღემატებოდა. შემსყიდველები უმთავრესად ადგილობრივი გლეხები იყვნენ, რომელთაც, სიმინდის საწყობებს გარდა, იმავე სოფლებში წვრილმანი საქონლის სავაჭრო დუქნები ჰქონდათ.

აღმოსავლეთ საქართველოს მთიანეთში განვითარებული მეცხოველეობის პროდუქტები იყიდებოდა როგორც საშინაო, ისე საგარეო ბაზრებზე. რკინიგზების გაყვანის შემდეგ დაიწყეს ამიერკავკასიიდან მატყლის

¹ სსცია, ფ. 254, ანაწ. 1, საქ. 5217.

მნიშვნელოვანი რაოდენობით გატანა საზღვარგარეთ. 1870 წელს ფოთის ნავსადგურიდან გაიტანეს 58 586 ფუთი მატყლი 413 307 მანეთისა¹, 1871 წელს — 111 948 ფუთი 977 208 მანეთისა, 1872 წ. — 114 762 ფუთი 807 742² მანეთისა. 70-იანი წლების ბოლოსათვის მატყლის გაყიდვით მიღებული ყოველწლიური შემოსავალი 1 300 000 მანეთს უდრიდა³. 80—90-იან წლებში ამიერკავკასიიდან მატყლის საშუალო წლიური გატანა 170—200 ათას ფუთს აღწევდა. ამიერკავკასიიდან გატანილი მატყლის $\frac{1}{3}$ -ზე მეტი თბილისის გუბერნიაზე მოდიოდა.

90-იანი წლების ბოლოსათვის მატყლი მნიშვნელოვანი რაოდენობით იყიდებოდა სამინაო ბაზრებზეც. კერძოდ, ადელხანოვის ქეჩისა და ტყავის ქარხნებში სულ უფრო და უფრო მეტი რაოდენობით მოიხმარებოდა ადგილობრივი ნედლეული (მატყლი და ცხვრისა და თხის ტყავები)⁴. XIX ს-ის ბოლოსა და XX საუკუნის დასაწყისისათვის ადელხანოვი საჭიროდაც კი ცნობდა მატყლითა და ტყავებით ვაჭრობის რეგულირებას იმ მიზნით, რომ თბილისში დაკლული საქონლის ტყავი და მატყლი მთლიანად მის მიერ დაარსებულ აქციონერულ საზოგადოებას ჩაბარებოდა.

ამიერკავკასიის მატყლით ვაჭრობის ცენტრს თბილისი წარმოადგენდა. თბილისელი მეორე გილდიის ვაჭარი იაგორ გუმუზოვი წლიურად ყიდულობდა და ყიდდა 60 000 მანეთის მატყლს, ასატურ ტერ-აკოფოვი — 100 000 მან., გევორქ მალდადანოვი — 80 000 მან., ზაქარია ოგანეზოვი — 20 000 მან., ალექსი ჭანჭუგაზოვი — 50 000 მან., ამბარცუმ სარაჯევი — 70 000 მანეთის მატყლს და სხვ.

სიღნაღის, თიანეთის, ღუშეთის, ბორჩალოსა და ახალქალაქის მაზრები საქართველოს საშინაო ბაზრებს, უმთავრესად თბილისის ბაზარს, უხვად აწოდებდა მეცხოველეობის სხვა პროდუქტებსაც. ბორჩალოს მაზრებიდან ყოველწლიურად გასაყიდად გამოჰქონდათ 6 220 ფუთი შვეიცარიული ყველი, 935 ფუთი კარაქი, 10 000 ფუთი ცხვრის ყველი, 15 000 ფუთი ერბო, 15 000 სული მსხვილფეხა რქოსანი საქონელი და 30 000 სული ცხვარი⁵. ახალქალაქის მაზრიდან ბაზარზე გამოჰყავდათ სახორცე პირუტყვი — 62 000 მანეთის, ყველი და კარაქი — 13 500 მანეთისა⁶; თიანეთის მაზრი-

¹ სტია, ფ. 378, ანაწ. 1, საქ. 11154. ფურც. 146.

² იქვე, საქ. 11541, ფურც. 19.

³ იქვე, საქ. 12108, ფურც. 3.

⁴ უკვე 900-იანი წლებისათვის ადელხანოვის ტყავისა და ქეჩის მწარმოებელი აქციონერული საზოგადოება 1027632 მანეთის ადგილობრივ ნედლეულს მოიხმარდა.

⁵ РТКѢЖДѢКО, გვ. 112—185.

⁶ სტია, ფ. 17, ანაწ. 1, საქ. 669.

დან ყველი და კარაქი — 100 000 მანეთისა¹ და სხვ. მარტო თბილისი ყოველწლიურად მოიხმარდა 300—350 ათას სულ შინაურ პირუტყვს².

XIX ს-ის 90-იანი წლების ბოლოსათვის საქართველო მსოფლიო ბაზარზე მონაწილეობას იწყებს მეფრინველეობის პროდუქტებით, კერძოდ, კვერცხით. კვერცხის დიდი რაოდენობით გატანა დასავლეთ ევროპისა და შავი ზღვის რუსეთის სანავსადგურო ქალაქებში იწყება 1891 წლიდან³. პირველ ხანებში კვერცხის გაყიდვით მიღებული შემოსავალი 10 000 მანეთს არ აღემატებოდა, მაგრამ სულ მალე, 90-იანი წლების ბოლოსათვის, ქუთაისის გუბერნიაში ამ პროდუქტის რეალიზაციით მიღებულმა საშუალო წლიურმა შემოსავალმა 1,2 მილიონ მანეთს მიაღწია⁴. 1898 წლიდან ბათუმსა და ფოთში დაარსდა კვერცხის შემსყიდველი უცხოური ფირმები. ისინი ვაჭარ-შემსყიდველებისაგან ყიდულობდნენ კვერცხს და ბითუმად აგზავნიდნენ საზღვარგარეთ — ლონდონის, ჰამბურგის, ბერლინის და პარიზის ბაზრებზე. ფრინველი კი საქართველოსა და ამიერკავკასიის ქალაქების ბაზრებზე სალდებოდა.

70-იანი წლებიდან უცხოურ თამბაქოზე მაღალი საბაჟო ტარიფის დაწესების შემდეგ, დასავლეთ საქართველოში, განსაკუთრებით აფხაზეთში, სწრაფი ტემპით ვითარდება მეთამბაქოეობა, რომლის პროდუქცია თითქმის მთლიანად ბაზარზე გამოდიოდა. დასავლეთ საქართველოში მოყვანილი თამბაქოს $\frac{1}{3}$ ადგილობრივ ფაბრიკა-ქარხნებში მოიხმარებოდა, დანარჩენი კი რუსეთის ქალაქებში იგზავნებოდა. მაგალითად, 1898 წ. აფხაზეთში მიღებული 179 647 ფუთი თამბაქოდან 102 908 ფუთი, თითქმის მთელი მოსავლის $\frac{2}{3}$, რუსეთის გუბერნიების ბაზრებზე გაიტანეს.

სოხუმში პეტერბურგის თამბაქოს ფაბრიკას „ზოგდანოვსა და კომპანიას“ და სხვა კერძო პირებს ასმოლოვს, ფუონტოპულოს, ბურახსა და სხვ. ჰქონდათ თამბაქოს საწყობები, ჰყავდათ მუღმივი აგენტები, რომლებიც შეისყიდინდნენ თამბაქოს მოსავლის უდიდეს ნაწილს და აგზავნიდნენ რუსეთში⁵.

ამიერკავკასიის ერთ-ერთ საექსპორტო საქონელს აბრეშუმის ნედლეულიც წარმოადგენდა. იგი გაჰქონდათ საზღვარგარეთ და რუსეთში. ამ ექსპორტში საქართველოს მონაწილეობა აბრეშუმის ჭიის ავადმყოფობის გამო 70—80-იან წლებში საკმაოდ უმნიშვნელო იყო. კერძოდ, 80-იან

¹ სსცია, ფ. 17, ანაწ. 1, საქ. 3734.

² იქვე, საქ. 1712.

³ პ. გ უ ჯ უ ვ ი ლ ი, საქართველოსა და ამიერკავკასიის ეკონომიკური განვითარება XIX—XX სს., ტ. III, თბ., 1959, გვ., 634:

⁴ იქვე, გვ. 636—637.

⁵ იქვე, ტ. IV,

წლებში, ამიერკავკასიიდან გატანილ 39 113 ფუთ აბრეშუმის ნედლეულში საქართველოს წილი მხოლოდ 216 ფუთს შეადგენდა. 90-იან წლებში ჭანმრთელი აბრეშუმის ჭიის თესლის გავრცელებასთან დაკავშირებით საქართველოში (ზუგდიდის, სენაკის, ოზურგეთისა და ქუთაისის მაზრებში) სწრაფად იზრდება აბრეშუმის ნედლეულის სასაქონლო წარმოება. უკვე 1895 წელს ქუთაისის გუბერნიაში დამზადებული 8 200 ფუთი აბრეშუმის პარკიდან გაიყიდა 5 210 ფუთი პარკი და 1 200 ფუთი აბრეშუმის ნართი. 1896 წელს ქუთაისის გუბერნიიდან გაიტანეს 10 100 ფუთი აბრეშუმის პარკი, 1897 წ. 15 900 ფუთი, 1898 წ. — 22 400 ფუთი, 1899 წ. — 13 300 ფუთი; 900-იანი წლების დასაწყისისათვის კი ქუთაისის გუბერნიას ბაზარზე ყოველწლიურად საშუალოდ გამოჰქონდა 50 000 ფუთი აბრეშუმის პარკი (1½ მილიონი მანეთის ღირებულებისა).

მეხილეობა-მებოსტნეობის პროდუქტები თითქმის მთლიანად საშინაო ბაზარზე სადღებოდა. საქართველოს ქალაქები თანდათანობით მზარდი რაოდენობით მოიხმარდა ხილბოსტნეულს. პირველ ხანებში სავაჭრო მეხილეობა-მებოსტნეობა დიდი ქალაქების — თბილისის, ქუთაისის, ბათუმის და სხვ. — გარეუბნებში იყო განვითარებული. რკინიგზების გაყვანის შემდეგ სავაჭრო მეხილეობა-მებოსტნეობა ქალაქებიდან დაშორებულ რაიონებშიც განვითარდა.

1894 წელს აღმოსავლეთ საქართველოში ხეხილის ბაღებს ეკავა 5 202 დესეტინა; ხილის შემოსავალი შეადგენდა 248 898 ფუთს, საიდანაც გაიყიდა 167 835 ფუთი 120 987 მანეთისა¹. ხილის ბაზარზე მიმწოდებელი ძირითადად გორის, ახალციხის და ახალქალაქის მაზრები იყო. ბაზარზე გასატანი ხილი მნიშვნელოვანი რაოდენობით მოჰყავდათ თბილისშიც.

დასავლეთ საქართველოში სავაჭრო მეხილეობას უმთავრესად ქუთაისის მაზრასა და ახლადშემოერთებულ ართვინისა და ბათუმის ოლქებში მისდევდნენ. 1894 წ. ქუთაისის მაზრაში ხილის გაყიდვით მიღებული შემოსავალი 93 765 მანეთს უდრიდა, ართვინის ოლქში — 58 600 მანეთს, ბათუმის ოლქში — 19 400 მან.²

ბოსტნეულის — კომბოსტოს, კარტოფილის, ხახვის, კიტრის, ლობიოს და სხვ.— მიმწოდებელი ბაზარზე ბორჩალოს, გორის და თბილისის მაზრები იყო. ამ მაზრებიდან ბოსტნეული გაჰქონდათ დასავლეთ საქართველოს ქალაქებშიც.

1894 წ. აღმოსავლეთ საქართველოში მოყვანილ იქნა 987 661 ფუთი ბოსტნეული, აქედან გაიყიდა 339 645 მანეთის ღირებულებისა³.

XIX საუკუნის დასასრულისათვის საქართველოს სავაჭრო ვაჭრობაში

¹ სსცია, ფ. 17, ანაწ. 1, საქ. 1460, ფურც. 24.

² იქვე, ფ. 12, ანაწ. 1, საქ. 1461.

³ იქვე, ფ. 17, ანაწ. 1, საქ. 1460, ფურც. 26.

მნიშვნელოვანი ადგილი ეკავა ჭიათურის მარგანეცის გატანას. ჭიათურის მარგანეცის ამოღება 1889 წლიდან იწყება. ამ წელს საზღვარგარეთ და სამხრეთ რუსეთის ქალაქებში გაიტანეს 51 000 ფუთი მარგანეცი. 80-იანი წლების ბოლოსათვის მარგანეცის გატანამ თითქმის 9 მილიონამდე ფუთს მიაღწია. 1895 წლიდან, ჭიათურა-შორაპნის ვიწროლიანდაგიანი რკინიგზის გაყვანის შემდეგ, მარგანეცის ამოღება-გატანა კიდევ უფრო სწრაფად მატულობს. 1897 წელს ამოიღეს და საზღვარგარეთ გაიტანეს 12 131 807 ფუთი მარგანეცი, 1898 წ. — 16 259 204 ფუთი, 1899 წ. — 34 054 320 ფუთი, 1900 წელს — 40 363 492 ფუთი. ჭიათურის მარგანეცს მსოფლიო ბაზარზე დომინირებული მდგომარეობა ეკავა.

80-იანი წლების მანძილზე ჭიათურის მარგანეცის ამოღება ქართველი მრეწველების ხელთ იყო, გატანა კი უცხოელი ექსპორტიორების საშუალებით წარმოებდა.

საქართველოს საშინაო ვაჭრობაში მნიშვნელოვანი ადგილი ეკავა ადგილობრივი საფაბრიკო-საქარხნო და ხელოსნობის პროდუქციასაც. 80-იანი წლების ბოლოსათვის ადგილობრივ ფაბრიკა-ქარხნებსა და სახელოსნოებში 5 938 000 მანეთის პროდუქციას ამზადებდნენ. ეს საქონელი ძირითადად თვით საქართველოს ფარგლებშივე სალდებოდა. 90-იანი წლების ბოლოსათვის კი ადგილობრივ ფაბრიკა-ქარხნებში დამზადებული საქონელი მნიშვნელოვანი რაოდენობით გაჰქონდათ ამიერკავკასიისა და რუსეთის ქალაქებში. კერძოდ, ადელხანოვის ტყავისა და ქეჩის საწარმოების პროდუქციას რუსეთის იმპერიის მასშტაბით ჰქონდა მოპოვებული ბაზრები. როგორც ადელხანოვი წერდა, ამ საქონელზე დიდი მოთხოვნილება იყო მთელ რუსეთის იმპერიაში, დაწყებული ფინეთიდან დამთავრებული შუა აზიით!

საქართველოს საშინაო ვაჭრობას სრულიად არ შეესატყვისებოდა ის საქონელბრუნვა, რომელიც აღმოსავლეთ და დასავლეთ საქართველოს იარმარკებზე წარმოებდა. აღმოსავლეთ საქართველოში ბაზრობები იმართებოდა გორისა (სურამი, ცხინვალი, არბო, ახალქალაქი, მეჭვრისხევი, რუისი, ერთაწმინდა) და თელავის მაზრებში (ალავერდი და შუამთა). ქუთაისის გუბერნიაში იარმარკები იყო სენაკის, ზუგდიდის და ოზურგეთის მაზრებში. ამ ბაზრობებზე იყიდებოდა როგორც შემოტანილი, ისე ადგილობრივი საქონელი. 80-იანი წლების ბოლოსათვის აღმოსავლეთ საქართველოს იარმარკების წლიური საქონელბრუნვა 75 000 მანეთს არ აღემატებოდა, დასავლეთ საქართველოს კი დაახლოებით 200 000 მანეთს შეადგენდა. საიარმარკო ვაჭრობის ასეთი უმნიშვნელო როლი უკვე მძლავრად განვითარებული ვაჭრობით იყო განპირობებული. ამ ხანებში საქარ-


¹ ЦГИА СССР, ф. 22, оп. 4, 1895, д. 89.

თველოში რკინიგზების გაყვანისა და სხვადასხვა რაიონებს შორის მჭიდრო სააღებმიცემო ურთიერთობის დამყარების შემდეგ ხდება ქალაქის სოფელთან დაახლოება. სოფლის პრიმიტიული ბაზრობა კარგავს მნიშვნელობას. მის ადგილს კაპიტალისტურად გამართული მუდმივი ვაჭრობა იჭერს. XIX საუკუნის დამლევისათვის საქართველოს ყველა ქალაქში, ცოტად თუ ბევრად მსხვილ დაბა-სოფლებში, მრავლად იყო საფეიქრო და საერთოდ სამრეწველო და სასურსათო ნაწარმის მაღაზია-დუქნები, რომელნიც მუდმივ ვაჭრობას აწარმოებდნენ. ქ. თბილისის მარტო საფეიქრო ნაწარმის მაღაზიების საქონელბრუნვა წელიწადში 3 162 800 მანეთს აღწევდა, ბათუმის სასურსათო და სამრეწველო საქონლით მოვაჭრე მაღაზია-საწყობების საქონელბრუნვა 5 985 600 მანეთს უღრიდა, ფოთის — 668 400 მან. სოხუმის — 279 700 მან., სიღნაღის — 468 000 მანეთს, თელავის—433 300 მანეთს, ახალციხის—366 000 მანეთს, გორის — 198 100 მანეთს¹ და სხვ. ძველი ქალაქების გარდა რეფორმის მომდევნო ხანაში მრავლად წარმოიშვნენ ახალი დაბა-ქალაქები, რომელთა სავაჭრო ოპერაციები საკმაოდ მნიშვნელოვნად გამოიყურებოდა. ასეთი დაბა-ქალაქები იყო: ყვირილა — 1 007 500 მანეთი საქონელბრუნვით, ჭიათურა — 397 600 მან. საქონელბრუნვით, ზუგდიდი — 129 400 მან., საჩხერე — 126 000 მან., აბაშა — 155 900 მან; ახალი სენაკი — 145 000 მან., ჩხარბი — 74 500 მან., ცხინვალი — 53 500 მან., ხაშური — 68 100 მანეთი საქონელბრუნვით და სხვ.

ქუთაისისა და თბილისის გუბერნიების სავაჭრო დაწესებულებების გენერალური აღწერის დავთრებიდან ჩანს, რომ საქართველოში თითქმის არც ერთი სოფელი არ იყო დარჩენილი საფეიქრო ნაწარმითა და საწვრილმანო საქონლით მოვაჭრე მუდმივი მაღაზიის გარეშე. ასეთ პირობებში ფეოდალიზმის ხანისათვის დამახასიათებელი ვაჭრობის ფორმა — საიარმარკო ვაჭრობა მხოლოდ რკინიგზისა და სავაჭრო სამომოსვლო გზებისაგან დაშორებულ სოფლებში არსებობდა და ამ იარმარკებზე წარმოებულ საქონელბრუნვას საქართველოს საშინაო ვაჭრობაში თითქმის არავითარი მნიშვნელობა არ ჰქონდა. სავაჭრო ცენტრებში, ქალაქებსა და დაბა-სოფლებში მოკალათებული იყვნენ ვაჭარ-შემსყიდველები, რომელთა საშუალებითაც ძირითადად წარმოებდა მეღვინეობის, მეაბრეშუმეობის, მეცხოველეობის, მარცვლეული მეურნეობისა თუ სხვა დარგების პროდუქციით ვაჭრობა.

70—80-იან წლებში ღვინით ვაჭრობა თითქმის მთლიანად ვაჭარ-შემსყიდველების — სირაჯების ხელთ იყო. სირაჯები ღვინის წვრილ მწარმოებლებს, გლეხებს წინააწარ აძლევდნენ ფულს სესხად, აწოდებდნენ

¹ სხვადასხვა ქალაქის საქონელბრუნვა გამოანგარიშებულია გენერალური აღწერის დავთრების მონაცემების მიხედვით, სსცია, ფ. 254, ანაწ. 1, საქ. 20009 და 5217.



ბაზარი თბილისში.

სხვადასხვა საქონელს, თვით ვაზის შესაწამლავ პრეპარატებსაც და მერე მოსავალზე გლეხი იძულებული იყო სირაჯის მიერ დაწესებულ დაბალ ფასებში ან სარგებელში მიეცა ღვინის მოსავლის უდიდესი ნაწილი. ასევე აბრეშუმის ნედლეულის რეალიზაციისაგან ძირითად მოგებას ვაჭარ-შემსყიდველები ითვისებდნენ. ისინი განზრახ აჭიანურებდნენ წვრილი მწარმოებლებისაგან აბრეშუმის ნედლეულის შესყიდვას. გადამწყვეტ მომენტში, როცა აბრეშუმის პარკის შენახვა აღარ შეიძლებოდა, გლეხები იძულებული იყვნენ შემსყიდველების მიერ დაწესებულ დაბალ ფასებში გაეყიდათ თავისი საქონელი. დაახლოებით ასეთივე მდგომარეობა იყო სოფლის მეურნეობის თუ შინა მრეწველობის სხვა დარგების პროდუქციით ვაჭრობაშიც.

80-იანი წლებიდან საქართველოს საშინაო ვაჭრობაში ვაჭარ-შემსყიდველის საშუამავლო როლის შემცირების ტენდენციები ჩნდება. ამ დროიდან თვით მწარმოებლები ცდილობენ ხელი მოჰკიდონ თავის საქონლის რეალიზაციას. სასაქონლო-ფულადი ურთიერთობის განვითარების, გლეხობის დაშლის და საშინაო ბაზრის გაფართოების შედეგად მწარმოებელთა გაერთიანებებს საშუალება მიეცათ თვით ეწარმოებინათ ალებ-მიცემობა.

80-იანი წლებისათვის მსხვილი მემამულეები თვითონ ახერხებდნენ საკუთარი ღვინის რეალიზაციას. თბილისში არსებობდა კახური ღვინობით სავაჭრო სახლები მემამულე ზ. ჯორჯაძის, ნიკოლოზ აბა-მელიქოვისა

და მამულოვის, ივ. მუხრან-ბატონის და სხვათა ამხანაგობა. ეს მემამულე-ები ყიდდნენ როგორც საკუთარი ვენახებიდან დაყენებულ ღვინოებს, ისე სხვა მწარმოებლებისაგან შესყიდულსაც. 90-იანი წლებისათვის, გარდა იმისა, რომ ზემოჩამოთვლილი მემამულეები საგრძნობლად აფართოებ-დნენ სავაჭრო ოპერაციებს, ნიკოლოზ ჩოლოყაშვილისა და ვახეახიშვი-ლის თაოსნობით არსდება ღვინით მოვაჭრე მსხვილი ფირმა — „კახეთი“. ამხანაგობა მოწყობილი იყო აქციონერული საპაიო კაპიტალის საფუძ-ველზე. საზოგადოების მიზანი იყო თავისი წევრების ღვინის გასაღები-სათვის ეზრუნა, გამოენახა ყოველგვარი საშუალება ღვინის ბაზრის გა-ფართოებისათვის. 900-იან წლებში საზოგადოება 164 წევრს ითვლიდა, განყოფილებები ჰქონდა მოსკოვში, პეტერბურგში, ბაქოში, ამხაბადსა და ტაშკენტში.

90-იანი წლების შუახანებიდან აბრეშუმის ნედლეულით ვაჭრობის ორ-განიზაციაშიც გარკვეულ ცვლილებებს ჰქონდა ადგილი. 1895 წელს ქუ-თაისის მაზრის ხონის უბანში აბრეშუმის მწარმოებლების მიერ შეიქმნა „ქუთაისის გუბერნიის მეაბრაშუმეთა პირველი ამხანაგობა“. ეს ამხანაგო-ბაც აქციონერული საზოგადოების საფუძვლებზე იყო აგებული. იგი მიზ-ნად ისახავდა წვრილი მწარმოებლებისაგან აბრეშუმის პარკის შესყიდვას და მის რეალიზაციას. პირველსავე წელს ამხანაგობამ შეისყიდა და რეა-ლიზაცია უყო 9 000 მანეთის აბრეშუმის პარკს. შემდეგ წლებში ამხანა-გობამ გააფართოვა თავისი ოპერაციები. 1897 წელს გურიაშიც დაარსდა ასეთივე ტიპის სავაჭრო-სამრეწველო ამხანაგობა „შუამავლის“ სახელწო-დებით. იმავე წელს ქუთაისსა და სენაკში ყალიბდება მეაბრაშუმეთა ამ-ხანაგობები. ეს გაერთიანებები აბრეშუმის პარკის რეალიზაციის საქმეში თანდათანობით უფრო მნიშვნელოვან როლს ასრულებდნენ. ისინი კონ-კურენციას უწევდნენ პარკის შემსყიდველებს და ამ საქონელზე მინი-მალური ფასების დაწესების საშუალებას არ აძლევდნენ.

XIX—XX საუკუნეების მიჯნაზე თბილისში არსებობდა სამრეწველო აქციონერული ამხანაგობები, რომელნიც, პროდუქციის წარმოების გარ-და, მათი გასაღებითაც იყვნენ დაინტერესებულნი. „ტყავისა და ქეჩის მწარმოებელი აქციონერული საზოგადოება“, რომელიც ადელხანოვის სა-წარმოთა ბაზაზე იყო შექმნილი, წლიურად 2 083 760 მანეთის პროდუქ-ციას უშვებდა! საზოგადოებას საბითუმო და საცალო ვაჭრობისათვის თბილისში ჰქონდა სავაჭრო დაწესებულებები, დიდი საწყობი და სამი სარდაფი. თბილისშივე არსებობდა ზეთსახდელი, საპნისა და სანთლის მწარმოებელი აქციონერული საზოგადოება 500 000 მანეთი ძირითადი კაპიტალით. საზოგადოება წლიურად 570 549 მანეთის მზა პროდუქციას ყიდდა. თამბაქოს ქარხნის ე. წ. „მირის“ აქციონერული საზოგადოება

წლიურად ყიდდა 520 740 მანეთის მზა პროდუქციას. მეღვინეთა, მეაბრეშუმეთა და სხვა მრეწველთა მიერ დაარსებული აქციონერული საზოგადოებანი იმაზე მიუთითებდნენ, რომ სავაჭრო კაპიტალი, კარგავდა რა დამოუკიდებელ მდგომარეობას, საწარმოო კაპიტალის აგენტად იქცეოდა. კაპიტალისტური წარმოების წესის გამარჯვება მწარმოებელი კაპიტალისტის ხელთ წარმოებისა და ვაჭრობის ფუნქციების გაერთიანებასთან იყო დაკავშირებული.

* * *

კაპიტალისტური წარმოებისა და ვაჭრობის განვითარების პირობებში თანდათან იზრდებოდა კრედიტის როლი და მნიშვნელობა. საქართველოს მრეწველი და ვაჭარი კაპიტალისტები საწარმოო ბრუნვისა და პროდუქციის რეალიზაციის დაჩქარების მიზნით ხშირად მიმართავდნენ უნაღლო ანგარიშსწორებას. ვექსილები ბრუნვაში შედიოდა ფულის მსგავსად, მაგრამ კომერციული კრედიტი საკმარისი არ იყო გაფართოებული კაპიტალისტური წარმოებისათვის. თანდათან უფრო მწვავედ იგრძნობოდა საბანკო კრედიტის საჭიროება.

რეფორმის წინ საქართველოსა და ამიერკავკასიაში მოქმედი საზოგადოებრივი მზარუნველობის პრიკაზი ნახევრად საქველმოქმედო და ნახევრად საკრედიტო დაწესებულება იყო. იგი იაფი კრედიტით ხელს უმართავდა თითქმის მხოლოდ თავადაზნაურობას. რეფორმის შემდეგ პრიკაზი ადგილს უთმობს წმინდა კაპიტალისტურ საკრედიტო დაწესებულებებს.

1866 წ. თბილისში გაიხსნა სახელმწიფო ბანკის განყოფილება. 1871 წელს დაარსდა თბილისის კომერციული ბანკი, 1873 წ. — ურთიერთდამკრედიტებელი საზოგადოება, 1874 წ. — თბილისის სათავადაზნაურო-საადგილმამულო ბანკი. 1875 წ. ოპერაციები დაიწყო ქუთაისის სათავადაზნაურო-საადგილმამულო ბანკმაც.

XIX ს-ის 80—90-იან წლებში საკრედიტო დაწესებულებანი თანდათან მრავლდებოდა. სახელმწიფო ბანკის განყოფილებები გაიხსნა ბათუმსა და ქუთაისში. ურთიერთდამკრედიტებელი საზოგადოებანი დაარსდა ფოთში, ქუთაისში, ჭიათურასა და ზოგ სხვა დაბა-ქალაქში. სოფლებში ჩნდებოდა ფულის შემნახველ-გამსესხებელი ამხანაგობანი. სავაზმო კაპიტალის მოქმედების სარბიელი თანდათან ვიწროვდებოდა. მსხვილი ვაჭარი-მევაზშეები იძულებული იყვნენ შეგუებოდნენ ახალ პირობებს, თავიანთი საქმიანობა კაპიტალისტურ ყაიდაზე გარდაექმნათ. XIX ს-ის

80-იანი წლებისათვის მარტო თბილისში მოქმედებდა კაპიტალისტურად გამართული 7 სავაჭრო სახლი და 5 სავექსილო ბიურო, რომელთა ბრუნვა 17 მლნ მანეთს შეადგენდა.


განსაკუთრებით ფართოდ და აქტიურად გაშალეს საქმიანობა თბილისის საკრედიტო დაწესებულებებმა. მათ შორის გამოირჩეოდა თბილისის კომერციული ბანკი, რომელიც დააარსეს მთელ ამიერკავკასიაში ცნობილმა თბილისელმა მსხვილმა ვაჭრებმა, მრეწველებმა და მოიჯარადრეებმა (ე. დავითაშვილი, ა. ევანგულაშვილი, მ. ალიხანოვი, ი. ამირალოვი, ი. ანანოვი, ნ. ბეგთაბეგოვი, ე. ეჭუბოვი, ი. ზუბალაშვილი, პ. ნალირაძე, ა. ონიკაშვილი, პ. ნაკაშიძე, ნ. ფრიდონოვი, იზმიროვები, ყორღანოვები, მირიმანოვები და სხვ.). მათ ბანკის ძირითადი კაპიტალისათვის გაიღეს 500 ათასი მანეთი. მომდევნო ხანებში ბანკის გამგეობამ გამოუშვა დამატებითი აქციები და ძირითადი კაპიტალი ერთ მლნ მანეთამდე აიყვანა. 1872-დან 1896 წლამდე თბილისის კომერციული ბანკის ოპერაციები დებეტსა და კრედიტში 15 მლნ მანეთიდან 157 მლნ მანეთამდე გაიზარდა. ბანკი აწარმოებდა თამასუქების დისკონტს, ანაბარების მიღებას, სესხების გაცემას და სხვ. 1874 წელს ბანკმა სესხად გასცა 1,4 მლნ, 1896 წელს კი 16 მლნ მანეთი. 1886 წ. თბილისის კომერციულმა ბანკმა თავისი განყოფილება გახსნა ბაქოში, 1890 წ. კი — ბათუმში¹.

საქართველოს საადგილმამულო ბანკების თავდაპირველ მიზანს სასოფლო-სამეურნეო კრედიტის გაცემა შეადგენდა, მაგრამ ვაჭრობა-მრეწველობის აღმავლობისა და ქალაქების ზრდის პირობებში მათ იკისრეს კომუნალური და კომერციული ბანკების ზოგი ფუნქციებიც. 1875—1900 წლებში თბილისის საადგილმამულო ბანკმა გასცა 45 მლნ მანეთის გრძელვადიანი და 5 მლნ მანეთის მოკლევადიანი სესხი, რომელთა 80% ქალაქის მცხოვრებლებზე მოდიოდა. ამავე პერიოდში ქუთაისის საადგილმამულო ბანკმა სოფლის მამულების გირაოს ქვეშ სესხად გასცა 2,5 მლნ მანეთი, ქალაქელთა ქონების გირაოს ქვეშ კი — 7,2 მლნ მანეთი².

საქართველოს საკრედიტო დაწესებულებანი მნიშვნელოვან როლს ასრულებდნენ ქვეყნის კაპიტალისტური მეურნეობის სისტემებში. ისინი აწარმოებდნენ საშუამავლო ოპერაციებს, ანგარიშსწორებას კაპიტალისტთა სხვადასხვა ჯგუფებს შორის. მრეწველ, ვაჭარ და საბანკო კაპიტალისტთა ინტერესები ერთმანეთს ემთხვეოდა. ყველა ერთად ეწეოდა მშრომელი მასების ექსპლოატაციას და ერთმანეთს შორის იყოფდნენ მუშების აუნაზღაურებელი შრომით შექმნილ ზედმეტ ღირებულებას.

¹ პ. გუგუშვილი, საქართველოს და ამიერკავკასიის ეკონომიკური განვითარება, ტ. II, თბ., 1956, გვ. 366—375.

² ნ. შველიძე, საქართველოს სოციალ-ეკონომიური განვითარების ისტორიიდან, თბ., 1967, გვ. 83—84.



თბილისი. გოლოგინის (ახდანდელი რუსთაველის) პროსპექტის დასაწყისი.

ბურჟუაზიული რეფორმების შემდეგ საქალაქო ცხოვრების განვითარება მიმდინარეობდა ახალ ეკონომიურ საფუძველზე. კაპიტალისტური ხანის ქალაქების ძირითადი დამახასიათებელი ნიშნებია: მსხვილი მრეწველობის განვითარება, მსხვილი მასშტაბის სავაჭრო-კომერციული საქმიანობის კონცენტრაცია და ყოველივე ამის ნიადაგზე კაპიტალისტური ეპოქის ძირითადი კლასების — ბურჟუაზიისა და პროლეტარიატის — ჩამოყალიბება. ამავე პერიოდში ხდება მსხვილი სავაჭრო-სამრეწველო დაბების აღმოცენება, რომელნიც უპირატესად სამუშაო ვაჭრობის და წვრილი საქონლური წარმოების ცენტრებად იქცევიან.

სანამ დეტალურად განვიხილავდეთ რეფორმის მომდევნო ხანის საქართველოს ქალაქებში მიმდინარე ზემოაღნიშნულ პროცესებს, საჭიროდ მიგვაჩნია სათანადო სტატისტიკური მონაცემები მოვიტანოთ მათი მოსახლეობის ზრდის შესახებ¹ (იხ. ცხრ. 8).

მოტანილი ცხრილის ანალიზი გვიჩვენებს, რომ 1865 წელთან შედარებით 1888 წლისათვის, აღმოსავლეთ საქართველოში ხდება ზოგიერთი ქალაქის (გორი, თელავი, ახალციხე, ახალქალაქი) მოსახლეობის შედარებით სწრაფი ტემპით ზრდა, მაგრამ, რადგანაც ეს ქალაქები არ იყო ხალხ-

¹ როგორც ამ შემთხვევაში, ასევე შემდგომშიაც, 1886 წლის მონაცემები აღებულია წიგნიდან: Свод статистических данных о населении Закавказского края, извлеченных из посемейных списков 1888 г., Тифл., 1893, ხოლო 1897 წლის მონაცემები წიგნიდან: Первая всеобщая перепись, населения Российской империи, 1897 г.—Тифлисская губерния. СПб, 1905, Кутаисская губерния, СПб, 1905.

ქალაქების მოსახლეობის ზრდას რეფორმის შემდგომდროინდელ საქართველოში ნ. ტყეშელაშვილმა საგანგებო თავი მიუძღვნა წიგნი „ნარკვევები საქართველოს მრეწველობის ისტორიიდან“, თბ., 1958, გვ. 48—58. აქ ავტორი ძირითადად ამავე წყაროების მონაცემებს ეყრდნობა.

საქართველოს ქალაქების მოსახლეობა 1880—1887 წლებში და მისი ზრდა
აბსოლუტურ ციფრებსა და პროცენტებში¹

ქალაქების დასახელება	ქალაქის მცხოვრებთა რაოდენობა 1886 წ.	ზრდა 1865 წელთან შედარებით %-ობით	ქალაქის მცხოვრებთა რაოდენობა 1897 წ.	ზრდა 1886 წელთან შედარებით %-ობით
თბილისი	78 445	15,7	1 59 590	103
გორი	7 243	43,8	10 269	42
თელავი	11 214	53,6	13 929	24,6
სიღნაღი	10 604	9,4	8 994	—
ღუშეთი	2 027	—	2 566	27
ახალციხე	16 116	38,8	15 357	—
ახალქალაქი	4 303	89	5 440	25,5
ს უ ლ	129 952	22,4	216 145	66,3
ქუთაისი	22 643	91,8	32 476	43,5
ბათუმი	14 803	—	28 508	92,5
ზუგდიდი	1 078	—	3 407	232,9
ოზურგეთი	1 472	—	4 710	215,8
ფოთი	4 709	261,5	7 346	56,1
სოხუმი	412	—	7 998	1839
ს უ ლ	45 117	206,7	84 445	87,4
სულ საქართველოში	175 069	44,7	300 590	71,7

მრავალი, ამიტომ ეს მატება საერთოდ არცთუ ისე საგრძნობია. რაც შეე-
ხება თბილისს, რეფორმის მომდევნო ორი ათეული წლის მანძილზე მისი
მოსახლეობის ზრდის ტემპი, პირიქით, შედარებით უმნიშვნელო ჩანს,
თუმცა მოსახლეობა გაიზარდა ცოტათი უფრო ნაკლებად, ვიდრე აღმო-
სავლეთ საქართველოს ყველა სხვა ქალაქისა ერთად. ზრდის ტემპით არც
ქ. სიღნაღი გამოირჩეოდა, რომელიც მნიშვნელოვნად დაწინაურდა რე-
ფორმამდელ ხანაში.

უშუალოდ რეფორმის მომდევნო პერიოდში საქართველოს ქალაქების
ზრდა ჯერ კიდევ განპირობებული იყო არა იმდენად მსხვილი მრეწველო-
ბის განვითარებით, რამდენადაც უპირატესად წვრილი საქონლური წარ-

¹ ზრდას პროცენტებში ჩვენ არ ვუჩვენებთ იმ შემთხვევაში, როდესაც არა გვაქვს
წინა ხანის ზუსტი მონაცემები, ან ადგილი ჰქონდა მოსახლეობის რაოდენობის შემცირებას.



კონკა გოლოვინის (ახლანდელი რუსთაველის) პროსპექტზე.

მოების შემდგომი გაფართოებით. ამით უნდა აიხსნას, რომ ჯერჯერობით მოსახლეობის ზრდის ტემპი მაღალი არ იყო თვით თბილისშიაც.

დასავლეთ საქართველოში შექმნილი განსაკუთრებული ვითარების გამო (ბათუმის შემოერთება და მისი სწრაფი ზრდა, სამაზრო ცენტრების — ზუგდიდის, ოზურგეთის და ზღვისპირა ქალაქის ფოთის — დაწინაურება) ქალაქების მოსახლეობა საგრძნობლად მატულობს როგორც ზრდის ტემპის, ასევე რაოდენობრივი თვალსაზრისით. განსაკუთრებით უნდა აღინიშნოს ქუთაისის დაწინაურება, როგორც საგუბერნიო ქალაქისა და მნიშვნელოვანი სავაჭრო-სამრეწველო ცენტრისა. ერთგვარ გამონაკლისს წარმოადგენდა რუსეთ-თურქეთის ომის დროს, 1878 წელს, დაზარალებულა ქ. სოხუმი, რომელმაც, ჩანს, დიდი ხნის განმავლობაში ვერ აღიდგინა თავისი მნიშვნელობა.

თვალსაზრისით იცვლება საქართველოს ქალაქების განვითარების სურათი მომდევნო (1886—1897 წწ.) პერიოდში. მიუხედავად იმისა, რომ ეს ხანა თითქმის ორჯერ ნაკლებია წინა პერიოდთან შედარებით, ამ დროს შეიმჩნევა მსხვილი სამრეწველო ცენტრების — თბილისისა და ბათუმის მოსახლეობის განსაკუთრებით სწრაფი ზრდა. კერძოდ, განვლილი 10—11 წლის მანძილზე, თბილისის მოსახლეობა ერთიორად გადიდდა. ზრდის თითქმის ასეთივე ტემპი შეიმჩნევა ბათუმშიც (უკანასკნელში მოსახლეობამ 92,5%-ით იმატა).

რაც შეეხება აღმოსავლეთ საქართველოს სხვა ქალაქებსა და აგრეთვე ქუთაისს და ფოთს, მათი მოსახლეობის ზრდის ტემპი წინა პერიოდთან შე-

დარებით კლებულობს. ეს გამოწვეული იყო იმით, რომ დასახლებული ქალაქები ძირითადად შერჩნენ წვრილ საქონლურ წარმოებას. მათი როლი ვაჭრობის განვითარების თვალსაზრისითაც არ ვასცილებია ადგილობრივ საკომერციო ცენტრების მნიშვნელობას. მოსახლეობის ზრდაზე, ჩანს, დიდი გავლენა არ მოუხდენია ზოგიერთ ამ ქალაქში წვრილი კაპიტალისტური საწარმოების აღმოცენებისა და საექსპორტო თუ სხვა სახის კანტორების თავმოყრას (განსაკუთრებით ფოთსა და ქუთაისში).

ამათგან განსხვავებით, დასავლეთ საქართველოს სამაზრო ცენტრების — ზუგდიდის, ოზურგეთის და სხვ. — მოსახლეობა იზრდებოდა სწრაფი ტემპით, თუმცა რაოდენობრივად ეს ზრდა შედარებით უმნიშვნელო იყო და ქვეყნის სამეურნეო განვითარებაზე რაიმე არსებით გავლენას არ ახდენდა. განვლილ პერიოდში ხდება ქ. სოხუმის სწრაფი დაწინაურება, რომელიც თითქმის ერთბაშად კვლავ მნიშვნელოვანი სავაჭრო და წვრილი საქონლური წარმოების ცენტრი გახდა.

საჭიროა აღინიშნოს, რომ აღებულ პერიოდში საქართველოს ქალაქების მოსახლეობა საერთოდ იზრდება გაცილებით უფრო სწრაფად, ვიდრე სოფლისა, რაც კარგად ჩანს ქვემოთმოტანილი ცხრილიდან.

ც ხ რ ი ჲ

წელი	აღმოსავლეთ საქართველო			დასავლეთ საქართ.			სულ მოსახლეობა		
	სულ მოსახლეობა	ქალაქ. მოსახლეობა	%	სულ მოსახლეობა	ქალაქ. მოსახლეობა	%	სულ მოსახლეობა	ქალაქ. მოსახლეობა	%
1886	808 143	129 952	16	870 872	45 117	5,2	1 679 015	175 069	10,4
1897	966 808	216 145	22,3	1 002 101	84 445	8,4	1 968 909	300 590	15,3

ამრიგად, 1886 წლიდან 1897 წლამდე საქართველოს მთელი მოსახლეობა გაიზარდა 17,1%-ით, მარტო ქალაქებისა კი — 71,7%¹-ით, ე. ი. ოთხჯერ უფრო სწრაფად¹. საკმაოდ მაღალი იყო მთელ მოსახლეობასთან ქალაქის მცხოვრებთა პროცენტული შეფარდებაც (10,4% — 1885 წელს და 15,3%¹ — 1897 წელს)².

¹ აღსანიშნავია, რომ წინა პერიოდში, ე. ი. უშუალოდ რეფორმის მომდევნო ხანაში, ქალაქების მოსახლეობის ასეთი სწრაფი ტემპით ზრდას ადგილი არ ჰქონია. ასე, მაგალითად. 1886 წლისათვის 1865 წელთან შედარებით საქართველოს მთელი მოსახლეობა გაიზარდა 1190 ათასიდან 1680 ათასამდე, ე. ი. 41,2%-ით, ხოლო ქალაქების მოსახლეობა 121 ათასიდან 175 ათასამდე, ე. ი. 44,6%-ით.

² იგივე პერიოდში, კერძოდ, 1885 წ., რუსეთის ევროპული ნაწილის ქალაქების მოსახლეობის შეფარდება მთელ მოსახლეობასთან 12,9%-ს შეადგენდა, ხოლო 1897 წ.- 12,76%-ს (იხ. ე. ი. ლენინი, თხზ., ტ. 3, გვ. 660).



ქუთაისი. ჯაქვის ხილი.

ადრე ნაჩვენები გვექონდა, რომ რეფორმამდელ პერიოდში საქართველოს ქალაქების მოსახლეობის ზრდა მნიშვნელოვანწილად სოფლის მოსახლეობის ხარჯზე ხდებოდა. ბუნებრივია, რომ რეფორმის მომდევნო ხანაში, სოფლად კაპიტალისტური ურთიერთობის გავრცელებისა და გლეხობის სოციალური დიფერენციაციის გაძლიერების პირობებში, მოსახლეობის ქალაქად ლტოლვის პროცესი კიდევ უფრო ინტენსიურად მიმდინარეობდა.

ამ მხრივ საინტერესო სურათს წარმოადგენს 1897 წლის აღწერის მონაცემები (იხ. ცხრ. 10).

ქალაქებში მცხოვრები სოფლად დაბადებული მოსახლეობა ანუ იგივე სოფლიდან მოსულნი (80 794 სული) შეადგენდნენ ქალაქების მთელი მოსახლეობის 27%-ს, ე. ი. მკვიდრი მოსახლეობის (44%) ნახევარზე მეტს და თითქმის იმდენსავე, რამდენსაც სხვა ადგილებიდან ჩამოსახლებულნი (29%). განსაკუთრებით დიდი იყო დასავლეთ საქართველოს ქალაქებში იქაური მახრებიდან მოსულთა ხვედრითი წონა. ისინი აქ 41%-ს შეადგენდნენ და ქალაქის მკვიდრ მოსახლეობას (22,6%) თითქმის ორჯერ ჭარბობდნენ.

ამრიგად, XIX ს-ის მეორე ნახევარში საქართველოს ქალაქების მოსახ-



თბილისის ძველი უბანი.

ლეობის ზრდა სოფლის მოსახლეობის ხარჯზე თვალსაჩინო იყო¹. ამავე დროს მსხვილი სამრეწველო და სავაჭრო ცენტრების თუ ნავსადგურების (თბილისი, ბათუმი, ფოთი) მოსახლეობა იზრდება რუსეთის გუბერნიებიდან და უცხოეთიდან (განსაკუთრებით თურქეთიდან და ირანიდან) მოსულთა ხარჯზე.

როგორც ზემოთ აღვნიშნეთ, ქალაქების მოსახლეობის ზრდის ტემპი განპირობებული იყო ძირითადად მათი სამრეწველო და სავაჭრო მნიშვნელობით ქვეყნის სამეურნეო ცხოვრებაში. თუ თბილისი, ბათუმი და ნაწილობრივ ქუთაისი მსხვილ სამრეწველო ცენტრებად გადაიქცნენ, სხვა

¹ ნ. ტყეშელაშვილი საგანგებოდ განიხილავს ქალაქების მოსახლეობის ზრდას რეფორმის შემდგომი პერიოდის საქართველოში და თავის წიგნში ათავსებს ფ. გოგიჩაიშვილის გაანგარიშებას, რომლის თანახმადაც, 1886 წლიდან 1897 წლამდე საქართველოს სხვადასხვა სოფლიდან ქალაქებში მოსულა დაახლოებით 89890 კაცი, ე. ი. წელიწადში საშუალოდ 8170 კაცი (იხ. ნ. ტყეშელაშვილი, ნარკვევები საქართველოს მრეწველობის ისტორიიდან, თბ., 1958, გვ. 51). ეს ციფრი საკმაოდ დიდია. თუ დავუშვებთ, რომ მოსულთა მთელი ეს მასა ქალაქებში რჩებოდა, მაშინ გამოვა, რომ იმ 125 500 სულიდან, რაც შეადგენდა 1886—1897 წლებში ქალაქების მოსახლეობის მთელ ნამატს, 71, 6% სოფლიდან მოსულელებზე მოდიოდა. მაგრამ, 1897 აღწერიდან ჩვენ მიერ ზემოთ მოტანილი მონაცემები გვიჩვენებენ, რომ აღებულ წლებში სოფლებიდან მოსულთა ხარჯზე ქალაქების მოსახლეობის ასეთ მატებას არ ჰქონდა ადგილი, რადგან სოფლად დაბადებული ქალაქის მცხოვრებთა რიცხვი ნაკლებია ფ. გოგიჩაიშვილის მიერ მოცემულ რიცხვზე. ამდენად 1886—1897 წლებში მოსული მოსახლეობა, რომელსაც უჩვენებს ფ. გოგიჩაიშვილი, მთლიანად არ უნდა დარჩენილიყო ქალაქში საცხოვრებლად.

საქართველოს ქალაქების მოსახლეობის დანაწილება დაბადების ადგილის მიხედვით (1897 წ. აღწერის მასალების მიხედვით)

გუბერნიები და ქალაქები	ქალაქში დაბადებულნი	იმვე გუბერნიის სოფლებში დაბადებულნი	სხვა გუბერნიებში დაბადებულნი				უცხოეთში დაბადებულნი		სულ მოსახლეობა
			საქართველნი	კავკასიის სხვა გუბერნიებში	რუსეთის გუბერნიებში	დაბ.	სპარსეთში	თურქეთში	
თბილისის გუბერნია			ქუთ. გუბერ- ნიაში						
თბილისი	69 686	27 539	9 840	14 717	29 527	7 215	1 066	159 590	
გორი	7 143	726	1 026	607	713	45	9	10 269	
თელავი	11 686	1 571	197	159	291	24	1	13 929	
სიღნაღი	8 510	208	65	104	86	19	2	8 994	
დუშეთი	1 643	235	338	160	173	16	1	2 566	
ახალციხე	11 955	448	163	596	1 687	504	4	15 357	
ახალქალაქი	3 804	354	8	475	540	259	—	5 440	
ს უ ლ	114 427	31 081	11 637	16 818	33 017	8 082	1 083	216 145	
% მთელ მოსახლ.	53	14,4	5,3	7,8	15,3	3,7	0,5	100	
ქუთაისის გუბერნია			თბილისის გუბ. დაბ.						
ქუთაისი	6 880	19 650	1 195	1 270	3 056	335	89	32 476	
ბათუმი	2 810	6 316	1 463	2 263	7 149	7 987	520	28 508	
ზუგდიდი	2 116	1 197	8	43	32	10	1	3 407	
ოზურგეთი	3 403	881	70	143	184	27	2	4 710	
ფოთი	2 053	3 883	162	75	350	688	135	7 346	
სოხუმი	1 831	3 063	188	195	1340	1280	94	7 998	
ს უ ლ	19 093	34 990	3086	3989	12111	10335	841	84 445	
% მთელ მოსახლ.	22,6	41,2	3,7	4,8	14,4	12,3	1	100	
სულ საქართ.	133 520	66 071	14 723	20 807	45 128	18 417	1 924	300 590	
%	44,4	22	4,7	7	15	6,2	0,7	100	




ქ. გორი.

ქალაქებში ძირითადად ისევ წვრილი საქონლური წარმოება და წვრილი ვაჭრობა იყო გაბატონებული, თუმცა წარმოების და ვაჭრობის ასეთი ფორმების არსებობა მსხვილი სამრეწველო ქალაქებისათვისაც არ იყო უცხო.

საყურადღებო ცნობებს საქართველოს ქალაქებში ვაჭრობისა და წვრილი საქონლური წარმოების განვითარების შესახებ შეიცავს „სავაჭრო და სამრეწველო დაწესებულებათა გენერალური შემოწმების ურნალები“. კერძოდ, 1888 წ. შედგენილი ასეთი აღწერილობის თანახმად¹, როგორც სავაჭრო დაწესებულებათა ოდენობის, ისე მათი წლიური სავაჭრო ბრუნვის და აგრეთვე წვრილი სახელოსნოების გავრცელების თვალსაზრისით, საქართველოს ქალაქებს შორის, პირველ ადგილზე თბილისი იდგა. აქ მარტო სამრეწველო საქონლით (მანუფაქტურა, გალანტერეა, ტანსაცმელი, ფეხსაცმელი, ხალიჩები, ავეჯი, რკინა-კავეული, საიუველირო ნაწარმი და სხვ.) 370-მდე დაწესებულება ვაჭრობდა, რომელთა წლიური ბრუნვა 7 მილიონ მანეთს აღემატებოდა. მათ შორის იყო ისეთებიც, რომელთა ბრუნვა 100 ათასიდან ნახევარ მილიონამდე მანეთს აღწევდა, ხოლო თუ დავუმატებთ მსხვილ სასურსათო მალაზიებსაც, თბილისის წლიური სავაჭრო ბრუნვა 10 მილიონ მანეთს გადააჭარბებს. აქვე არსებობდა 700-მდე საწვრილმანო, რომელთა ბრუნვა ჩვეულებრივ არ არის ნაჩვენები, თუმცა ზოგიერთ შემთხვევაში 5 ათას მანეთამდეც კი აღწევდა. ვფიქრობთ, მონაცემები

¹ სსცია, ფ. 254, საქ. 3932, 3978, 3983.




კ. ახალციხე.

თბილისის სავაჭრო დაწესებულებათა ბრუნვის შესახებ, რამდენადმე შემცირებულია, მაგრამ მაინც მნიშვნელოვანია.

ამასთანავე, თბილისში 1888 წელს აღრიცხული იყო 2 175 წვრილი სახელოსნო, ესენი ძირითადად მოსახლეობის ფართო მასების მოთხოვნილებას აკმაყოფილებდნენ ისეთ პროდუქციაზე, რომელიც არც გარედან შემოდიოდა და არც ადგილობრივ მზადდებოდა ფაბრიკული წესით, ან თუკი მზადდებოდა მიუწვდომელი იყო „დაბალი“ ფენებისათვის.

სავაჭრო დაწესებულებათა და წვრილ საწარმოთა რაოდენობით თბილისის მოსდევდა ბათუმი, თუმცა ვაჭრობისა და წვრილი წარმოების მასშტაბით განსხვავება მათ შორის საგრძნობი იყო. ბათუმის 104 შედარებით მსხვილი სავაჭრო დაწესებულების წლიური ბრუნვა 2 მილიონ მანეთს აღემატებოდა, წვრილ სახელოსნოთა რაოდენობა კი 300-მდე აღწევდა. შემდეგ მოდის ქუთაისი, სადაც 147 სავაჭრო დაწესებულების ბრუნვა მილიონნახევარ მანეთს აღემატებოდა, ხოლო სახელოსნოთა რაოდენობა 300-ს უდრიდა. ცალკე უნდა გამოვყოთ ფოთი, რომელიც, მართალია, არც სამრეწველო და არც ადგილობრივი ვაჭრობის თვალსაზრისით განსაკუთრებით არ გამოირჩეოდა, მაგრამ აქ თავმოყრილი იყო საექსპორტო ფირმები და სხვა სავაჭრო კანტორები, რომელთა ოპერაციები მილიონი მანეთით გამოიხატებოდა. ასეთი კანტორები და მსხვილი კომპანიების თუ ბანკების განყოფილებები იყო თბილისში, ბათუმსა და ქუთაისშიც, მაგრამ ფოთისათვის იანინი სპეციფიკური იყო.

საქართველოს დანარჩენ ქალაქებში (გორი, თელავი, სიღნაღი, ახალციხე, ზუგდიდი, სოხუმი, ოზურგეთი) სავაჭრო დაწესებულებათა რიცხვი




ქ. ქუთაისი.

საშუალოდ 30—50-ს შეადგენდა, 200—300 ათასი მანეთის წლიური ბრუნვით¹. სახელოსნოთა რაოდენობა კი აქ საშუალოდ 100-დან 200-მდე იყო.

რეფორმის მომდევნო ხანის საქართველოს სამეურნეო განვითარებისთვის დამახასიათებელი იყო სავაჭრო-სამრეწველო დაბა-სოფლების აღმოცენება და დაწინაურება. ეს განპირობებული იყო მათი ხელსაყრელი მდებარეობით სასოფლო-სამეურნეო რაიონების შუაგულში, სავაჭრო გზაჯვარედინებსა თუ რკინიგზის მაგისტრალზე და სხვ. ზოგიერთი ასეთი დაბა თავისი სავაჭრო ბრუნვით და წვრილი საქონლური წარმოების განვითარებით უთანასწორდებოდა სამაზრო ცენტრებსაც კი. მაგალითად 1888 წლის მონაცემებით, ყვირილაში ითვლებოდა 45 სავაჭრო დაწესებულება 222 ათასი მანეთის ბრუნვით, ხონში — 42—154 ათასი მან. ბრუნვით, ოჩამჩირეში — 33 — 143 ათასი მან. ბრუნვით, გულაუთში — 17—166 ათასი მან. ბრუნვით, სამტრედიიაში — 15—171 ათასი მან. ბრუნვით, ახალსენაკში — 19 — 160 ათასი მან. ბრუნვით, აბაშაში — 15 — 121 ათასი მან. ბრუნვით, სურამში — 22 — 142 ათასი მან. ბრუნვით, ცხინვალში — 36 — 157 ათასი მან. ბრუნვით და სხვ. ამ დაბების სახელოსნოების რაოდენობა მერყეობდა 40-დან 100-მდე.

¹ დასახელებული ქალაქებიდან ზოგიერთში ადგილი ჰქონდა მნიშვნელოვან გადახრას მოტანილ საშუალო ციფრებიდან. მაგალითად, ზუგდიდში 80 სავაჭრო დაწესებულების ბრუნვა 430 ათას მანეთს შეადგენდა, ხოლო ოზურგეთში 44 დაწესებულებისა მხოლოდ 120 ათას მანეთს. მაგრამ ეს არ ცელის საერთო სურათს. აღსანიშნავია ისიც, რომ ამ ქალაქებში, განსხვავებით თბილისის, ბათუმის და ქუთაისისაგან, უმსხვილეს სავაჭრო დაწესებულების ბრუნვა იშვიათად თუ აღემატებოდა 20 ათას მანეთს.



ქ. ბათუმი.

კულტურული დონითაც ზოგიერთი მსხვილი დაბა არ ჩამოუვარდება სამაზრო ქალაქებს. იქაც არსებობდა სასწავლებლები, ბიბლიოთეკები, იმართებოდა თეატრალური წარმოდგენები საკუთარი დასების თუ მოწვეული მსახიობების ძალებით და სხვ. იქმნებოდა ადგილობრივი ინტელიგენცია.

რეფორმის მომდევნო ხანაში სულ უფრო და უფრო ძლიერდებოდა ქალაქებისა და მსხვილი დაბების როლი ქვეყნის სამეურნეო ცხოვრებაში. იქ ხდებოდა მთელი სამრეწველო და სავაჭრო საქმიანობის კონცენტრაცია. 80-იანი წლების საქართველოში სულ 100-მდე ასეთი დაბა-სოფელი ითვლებოდა. ისინი, როგორც საშუაშავლო ვაჭრობის პუნქტები, ძირითადად დაკავშირებულნი იყვნენ მსხვილ ქალაქებთან, უპირატესად თბილისსა, ქუთაისსა და ბათუმთან. ქალაქის გარეშე მეურნეობრივადაც უკვე წარმოდგენილი იყო სოფლის მოსახლეობის ცხოვრება. აქვე პოულობდა სოფლის მოსახლეობის დიდი ნაწილი საარსებო საშუალებას.

რეფორმის მომდევნო ხანაში, ქვეყნის ბურჟუაზიული განვითარების შედეგად, იცვლება ქალაქების მოსახლეობის სოციალური სახეც. საქალაქო ცხოვრების განვითარების ხასიათმა, ერთი მხრივ, მსხვილი სამრეწველო და სავაჭრო ქალაქების (თბილისი, ბათუმი, ქუთაისი) დაწინაურებამ, ხოლო, მეორე მხრივ, უპირატესად წვრილი საქონლური წარმოების და საშუაშავლო სავაჭრო ცენტრების, სამაზრო ქალაქების და მსხვილი დაბა-სოფლების არსებობამ, განსაზღვრა მათი მოსახლეობის სოცია-


ლური შემადგენლობა. თუ თბილისის, ბათუმის, ქუთაისისა და ქიათურის სამრეწველო რაიონში ხდებოდა მსხვილი ბურჟუაზიისა და სამრეწველო პროლეტარიატის კონცენტრაცია, დანარჩენ ქალაქებსა და დაბა-სოფლებში, სადაც წვრილი საქონლური წარმოება და ვაჭრობა იყო გაბატონებული, წვრილბურჟუაზიული ელემენტები თავაშობდნენ წამყვან როლს. წვრილი ბურჟუაზია არც სამრეწველო ცენტრებისთვის იყო უცხო, მაგალითად, წვრილბურჟუაზიულ ფენას ქმნიდნენ თბილისის წვრილი საქონელმწარმოებელნი — „ხელოსნები“ და წვრილი ვაჭრები. ისინი „მეზიანთა“ და სხვა ქალაქელთა წოდებას მიეკუთვნებოდნენ. რაც შეეხება ქალაქად მცხოვრებ „გლეხებს“, რეფორმის მომდევნო ხანაში ფეოდალური საზოგადოების ეს წოდება აქ ფაქტიურად ქრება. გლეხთა წოდებიდან გამოსული ვაჭარ-ხელოსნები ავსებდნენ ქალაქის წვრილბურჟუაზიულ ფენებს, ხოლო ღარიბი მასები ქმნიდნენ ქალაქის ნახევრადპროლეტარულ ფენებს, თუ პროლეტარულ მოსახლეობას. როგორც ირკვევა, რეფორმის მომდევნო ხანის ქალაქის „გლეხობაში“ ძირითადად იგულისხმება სოფლიდან მოსული მშრომელი მოსახლეობა, რომელიც იქ მხოლოდ ნაწილობრივ მკვიდრდებოდა. მაგალითად, თბილისის 1876 წლის ერთდღიანი აღწერის მასალებში აღნიშნულია: «Собственно Закавказье дает главный элемент всякого крестьянского населения Тифлиса»¹.

იმავე მასალების მიხედვით თბილისში მცხოვრები „გლეხობა“ თავდაპირველი საცხოვრებელი ადგილის მიხედვით შემდეგნაირად ნაწილდებოდა: ქუთაისის გუბერნიიდან მოსული იყო 2 754 სული (მათ შორის ქალი იყო მხოლოდ 329), თბილისის გუბერნიიდან — 11 715 სული (მათ შორის 5 286 ქალი), რუსეთისა და ამიერკავკასიის სხვა გუბერნიებიდან — 11 614 სული; აღწერის მიხედვით გლეხობა შეადგენდა სულ 26 083 სულს, რომელთა უმრავლესობა მუშები იყვნენ².

ამრიგად, დასტურდება, რომ რეფორმის მომდევნო ხანის საქართველოს ქალაქებში, კერძოდ, თბილისში ინტენსიურად მიმდინარეობდა კაპიტალისტური ხანის კლასების — ბურჟუაზიისა და პროლეტარიატის — ჩამოყალიბების ადრე დაწყებული პროცესი. ვაჭარ მრეწველებთან ანუ მსხვილ და საშუალო ბურჟუაზიასთან ერთად (მემკვიდრეობით თუ პირადი საპატიო მოქალაქენი, ვაჭრები) ბურჟუაზიულ კლასს ქმნიდნენ წვრილბურჟუაზიული ელემენტებიც (დუქნების თუ წვრილი სახელოსნოების მეპატრონენი — წარმოების საშუალებების მფლობელი „ხელოსნები“) — მთლიანად ქალაქის ბეგარავალდებული მოსახლეობა. პროლეტარულ

¹ Тифлис по однодневной переписи 25-го марта 1876 г., Тиф., 1880, გვ. 119.

² «Большинство крестьян-рабочих» პირდაპირ არის აღნიშნული აღწერის კომენტარებში, იქვე, გვ. 118.



ქ. ფოთი.

კლასს ავსებდნენ ფაბრიკა-ქარხნების და სხვა სამრეწველო საწარმოთა მუშეები, რომელთა არსებობას ოფიციალური სტატისტიკა უკვე საგანგებოდ აღნიშნავს¹, აგრეთვე წარმოების საშუალებებს მოკლებული ხელოსნები, ქარგლები, შეგირდები სავაჭრო დაწესებულებებში, დუქნებსა თუ ღვინის სარდაფებში ქირით მომუშავენი და სხვა ღარიბ-ღატაკნი, რომელნიც თავს სამუშაო ძალის გაყიდვით ირჩენდნენ.

ქვეყნის კაპიტალისტური გზით განვითარება თავის დაღს ასვამს თავადაზნაურობასაც, რომლის გაღარიბებული ნაწილი ქალაქს ეტანება. აქ იგი კომერციულ საქმიანობაში ებმება ან თავს სახელმწიფო სამსახურით ირჩენს. არც ამ კლასის წარმომადგენლებისათვის იყო უცხო შავი სამუშაოს შესრულება. სულ უფრო და უფრო ძლიერდება ქალაქის რაზნოჩინული ფენა, ქალაქის ინტელიგენცია.

¹ იხ. თბილისის 1876 წლის ერთდღიანი აღწერის კომენტარები: Тифлис по однодневной переписи 25-го марта 1876 г., Тиф., 1880. აღსანიშნავია, რომ 1865 წ. გ. ნიკოლაძეს თბილისის „პროლეტარიატში“ ფაბრიკა-ქარხნების მუშეები არა აქვს ნაგულისხმევი.

XIX ს-ის 70-იან წლებში აღმოსავლეთის საკითხი კვლავ მოექცა საერთაშორისო ურთიერთობის ცენტრში. გაძლიერდა ევროპის დიდ სახელმწიფოთა ბრძოლა თურქეთის მემკვიდრეობის გაყოფისათვის. ავსტრია-უნგრეთს, რომელსაც სურდა ბოსნიისა და ჰერცეგოვინის ხელში ჩაგდება, აშინებდა რუსეთის გავლენის ზრდა ბალკანეთზე. ინგლისი გაბატონებული იყო თურქეთის ბაზრებზე და მთელი ძალით ეწინააღმდეგებოდა რუსეთის მიერ ბოსფორ-დარდანელის სრუტეების ხელში ჩაგდების ცდებს. გერმანია ხელს უწყობდა აღმოსავლეთის საკითხის გამწვავებას, რადგან ეს აძლევდა მას მოქმედების თავისუფლებას ცენტრალურ ევროპაში.

1875 წელს ბოსნიასა და ჰერცეგოვინაში იფეთქა ანტითურქულმა აჯანყებამ. მალე აჯანყებას შეუერთდნენ ბულგარეთი, სერბია და ჩერნოგორია, რის შემდეგ მან მიიღო სლავი ხალხების ეროვნულ-განმათავისუფლებელი ომის ხასიათი.

ბალკანეთის სლავების ეროვნულ-განმათავისუფლებელ ომს მტრულად შეხვდნენ ინგლისი და ავსტრია-უნგრეთი. მათ არ უნდოდათ ბალკანეთში დამოუკიდებელი სლავური სახელმწიფოების ჩამოყალიბება, რადგან სლავებს რუსეთის ორიენტაცია ჰქონდათ აღებულთ. ინგლისი და ავსტრია-უნგრეთი ეხმარებოდნენ თურქეთს სლავთა ეროვნულ-განმათავისუფლებელი მოძრაობის დათრგუნვის საქმეში.

სლავთა ეროვნულ-განმათავისუფლებელი მოძრაობის მიმართ სრულიად განსხვავებული პოზიცია დაიკავა რუსეთმა. სლავებისათვის დახმარების იდეამ მოიკვა რუსეთის საზოგადოების ფართო წრეები. მოსკოვში დაარსებული სლავური კომიტეტის მეშვეობით ბალკანეთში იგზავნებოდა კერძო შეწირულებანი და მოხალისეთა რაზმები. მეფის მთავრობას აშინებდა სლავებისათვის დახმარების ხალხის ფართო მასებიდან მომდინარე ინიციატივა, მაგრამ მას არ შეეძლო გარკვეული ანგარიში არ გაეწია

საზოგადოებრივი აზრისათვის. მით უმეტეს, რომ თურქეთის განდევნა ბალკანეთიდან და შავი ზღვის სრუტეების ხელში ჩაგდება ცარიზმის საოცნებო საგანს შეადგენდა. რუსეთის მთავრობამ თავის ხელში აიღო ინიციატივა და მას შემდეგ, რაც ევროპის დიდი სახელმწიფოების მოლაპარაკება უშედეგოდ დამთავრდა, 1877 წ. 24 აპრილს*, ომი გამოუცხადა თურქეთს. რუსეთის ჯარებმა გადალახეს თურქეთის საზღვრები როგორც ბალკანეთში, ისე კავკასია-მცირეაზიაში.

ქართველი ხალხი თანაგრძნობით შეხვდა თურქეთის წინააღმდეგ ომის დაწყებას, რადგან იმედოვნებდა, რომ მას შედეგად მოჰყვებოდა სამხრეთ-დასავლეთ საქართველოს თურქთა ბატონობისაგან განთავისუფლება. საქართველოს ისტორიული საზღვრების აღდგენის იდეა, რაც რუსეთის განწათვისუფლებელ (ობიექტურად) როლს ჯერ კიდევ ერეკლე მეორემ დაუკავშირა, XIX ს-ის 60—70-იან წლებში ფართოდ გავრცელდა ქართველ საზოგადოებრობაში.

ქართველი პატრიოტები ცდილობდნენ კვლავ აღედგინათ კავშირი ოსმალეთის საქართველოსთან. ომის წინ სამხრეთ-დასავლეთ საქართველოში იმოგზაურეს დ. ბაქრაძემ, გ. ყაზბეგმა, მ. გურიელმა, ა. მეფისაშვილმა, ივ. კერესელიძემ, გ. წერეთელმა და სხვ. ივ. კერესელიძე შეხვდა აჭარელთა ყველაზე თვალსაჩინო თავკაცს შერიფ ბეგ ხიმშიაშვილს, რომელიც თურმე ოცნებობდა სამხრეთ-დასავლეთ საქართველოს დედამამშობლოსთან შეერთებაზე და ხელსაყრელ მომენტს ელოდებოდა, რომ მთელი ხალხი აემხედრებინა თურქების წინააღმდეგ¹.

1875 წ. თურქეთის მთავრობამ აჭარლებს ჯარში წასვლა და აჯანყებულ ჰერცოგოვინელთა წინააღმდეგ გალაშქრება მოსთხოვა. მძიმე გადასახადებით უკმაყოფილო აჭარლებმა არ შეასრულეს სულთანის ბრძანება და აჯანყდნენ². „ღროების“ კორესპონდენტი იწერებოდა, რომ აჭარელთა აჯანყების მიზეზის გამოსარკვევად ოსმალეთის უმაღლესმა მთავრობამ მოსამართლე იბრეიმ ალა გამოგზავნა, მაგრამ ხალხმა უარი თქვა მასთან გამოცხადებაზე და შეუთვალა — „ჩვენ მაგისტანა სასამართლოში, სადაც უსამართლობისა და ქრთამის მეტი არა სწარმოებს რა, არ გეახლებითო, საიდანაც მობრძანებულხართ იქვე წაბრძანდითო“³. ცნობას აჭარელთა ანტითურქული აჯანყების შესახებ ქართველი საზოგადოებრობა დიდი თანაგრძნობით შეხვდა. ს. მესხი ე. მელიქიშვილს სწერდა: „ქობულეთში ოსმალოს ქართველების აჯანყება როგორ მოგწონს?... იქნებ რამე გამო-

* თვე და რიცხვი ყველგან ნაჩვენებია ახალი სტილით.

¹ ხ. ახვლედიანი, სახალხო-განმათავისუფლებელი ბრძოლის ისტორიიდან სამხრეთ საქართველოში, 1957, გვ. 116, 123.

² იქვე, გვ. 110.

³ „ღროება“, 1875, № 120.

ვიდეს. ძალიან სანატრელია, რომ ოსმალთა დააწიოკონ, იქნებ ეს ჩვენი ქართველები, რომელნიც იქ იმდენია, რამდენიც რუსეთის საქართველოში (ერთ მილიონზე მეტი), ჩვენ შემოგვიერთონ“¹.

ილია ჭავჭავაძე, რომელიც დაძაბული ადევნებდა თვალს მოვლენათა განვითარებას, კარგად ითვალისწინებდა სამხრეთ-დასავლეთ საქართველოს ღუდასამშობლოსთან შემოერთების შესაძლებლობას და წერდა: „არ გვაშინებს... ჩვენ ის გარემოება, რომ ჩვენს ძმებს, ოსმალთს საქართველოში მცხოვრებთა დღეს მაჰმადიანის სარწმუნოება უჭირავთ. ოღონდ მოვიდეს კვლავ ის ბედნიერი დღე, რომ ჩვენ ერთმანეთს კიდევ შევეუერთდეთ და ქართველი... დიდის ხნის განშორებულს ძმას ძმურადვე შეითვისებს, თვის პატიოსანს და ლმობიერს გულზედ ძმას ძმურადვე მიიყრდენს... და თუ საჭიროა, რომ სიყვარულის ცრემლის უწინარეს ჯერ ჩვენი სისხლი დაიღვაროს, ნუ-თუ ქართველი უკუ-დრკება და თავს არ შესწირავს მას, რისთვისაც ორი ათასი წელიწადი თავი უწირავთ ჩვენთა დიდებულთა მამაპაპათა“².

საქართველოს ისტორიული საზღვრების აღსადგენად, მართლაც, საჭირო გახდა ქართველთა სისხლის დაღვრა. თურქეთის წინააღმდეგ ომისათვის ემზადებოდნენ არა მარტო რუსეთის რეგულარული ჯარის ნაწილები, არამედ ქართველი მოლაშქრეებიც.

რუსეთის მთავრობა დიდ იმედს ამყარებდა ადგილობრივ მოსახლეობაზე. როცა სარდლობა შეუდგა ქართული ლაშქრის (მილიციის) ნაწილების შედგენას, გლეხობის საგრძნობი ნაწილი თავის სურვილით ეწერებოდა მოხალისეთა რაზმებში. გაზეთი „დროება“ იტყობინებოდა, რომ შორაპნის მაზრაში მთავრობის მოთხოვნისგან უფრო მეტი აღმოჩნდა. განსაკუთრებით ხალისით მიდიოდნენ ლაშქარში გურულები. ომის მონაწილე ი. მაყაშვილი, რომელმაც სპეციალური ნაშრომი მიუძღვნა გურიის ლაშქრის საბრძოლო დამსახურებას, გადმოგვცემს, რომ ახალგაზრდები ცრემლმორეული ითხოვდნენ, რომ დაუყოვნებლივ ჩაერიცხათ ისინი ჯარში და გაეგზავნათ ბრძოლის ველზე.

მოსახლეობის ასეთი განწყობილების პირობებში მილიციონერთა ნაწილების ჩამოყალიბება დაუბრკოლებლივ ხდებოდა. ომის დაწყებისას ამიერკავკასიაში უკვე შექმნილი იყო მილიციონერთა 8 ქვეითი და 3 ცხენოსანი პოლკი, 6 ქვეითი რაზმი, 4 ცხენოსანი დივიზიონი და 3 ქვეითი ასეული. აქედან ქართველი მოლაშქრეებით დაკომპლექტდა 6 ქვეითი რაზმი, 1 ცხენოსანი პოლკი, 2 დივიზიონი და 2 ასეული. ომის მსვლელობაში

¹ ს. მესხი, წერილები, სოხუმი, 1950, გვ. 196.

² ი. ჭავჭავაძე, თხზ., ტ. 2, 1941, გვ. 312.

მილიციონერთა ნაწილები თანდათან მრავლდებოდა. ბრძოლის ველზე გავიდა დაახლოებით 30 ათასი ქართველი მოლაშქრე¹.

ომის დაწყებისას რუსეთის იმ არმიაში, რომელიც კავკასიაში იმყოფებოდა 180 ათასი კაცი და 400 ქვემეხი ითვლებოდა. კავკასია-მცირეაზიის ფრონტზე გაიგზავნა 43 ქვეითი ბატალიონი, რეგულარული კავალერიის 16 ესკადრონი, კაზაკთა 65 ასეული, 15 საარტილერიო ბატარეა (120 ქვემეხით) და სხვ. სულ 60 ათასამდე კაცი. ომის მსვლელობაში მოქმედ კორპუსს ახალ-ახალი რეგულარული ნაწილები ემატებოდა. საომარ ოპერაციებში აქტიურად მონაწილეობდნენ ქართველი, სომეხი და აზერბაიჯანელი მილიციონერებიც².

კავკასიის არმიის მოქმედი კორპუსი შეტევის გეგმით დასახული ოთხი მიმართულების შესაბამისად (ოზურგეთიდან ბათუმისაკენ, ახალციხიდან არტაანისაკენ, ალექსანდრეპოლიდან ყარსისაკენ და ერევნიდან ბაიაზეთისაკენ) ოთხ ნაწილად გაიყო. ოზურგეთის რაზმს სათავეში ჩაუყენეს გენ. ოკლობეიო, ახალციხისას — გენ. დეველი, ალექსანდრეპოლისას — გენ. გეიშანი და ერევნისას — გენ. ტერ-გუკასოვი. მოქმედი კორპუსის სარდლად დაინიშნა გენერალი ლორის-მელიქოვი³.

თურქეთი საკმაოდ კარგად იყო მომზადებული ომისათვის. თურქთა ჯარის მეოთხე კორპუსში, რომელიც ანატოლიის ძლიერ ციხე-სიმაგრეებში იდგა, 70 ათასი კაცი და მრავალი ასეული ქვემეხი ითვლებოდა. არმია აღჭურვილი იყო კრუბის ფირმების ქვემეხებით და უახლესი სისტემის თოფებით.

ომის დაწყებისთანავე რუსეთის ჯარმა და ამიერკავკასიის მილიციონერებმა გადალახეს საზღვარი და საომარი ოპერაციები თურქეთის ტერიტორიაზე გააჩაღეს. რუსთა ჯარის სარდლობა ყოველნაირად ცდილობდა თურქეთის საზღვრებში მცხოვრებ ქართველებისა და სომხების კეთილგანწყობილების მოპოვებას, მათ ამხედრებას საერთო მტრის წინააღმდეგ. სიძნელე თუ სიადვილე ჩვენი ოპერაციებისა, სწერდა კომაროვი სვიატოპოლკ-მირსკის, დიდადაა დამოკიდებული ჩვენს მიმართ აჭარის მოსახლეობის მიერ დაკავებულ პოზიციაზე. შეიძლება დარწმუნებული ვიყოთ, რომ, თუ რუსთა ჯარი ბათუმს დაიკავებს და სათანადო ღონისძიებებს ჩაატარებს, აჭარლები ჩვენს წინააღმდეგ არ იმოქმედებენო. აჭარაში შესულ მებრძოლებს გენ. ოკლობეიო მოუწოდებდა, რომ მათ არ დაერღვიათ მოსახლეობის ტრადიციული ზნე-ჩვეულებანი და პატივისცემით მოა-

¹ Ш. Мегрелидзе, Грузия в русско-турецкой войне 1877—1878 гг., Тб., 1955, зб. 47.

² Война 1877 и 1878 гг., т. III — Война в Азиатской Турции, под ред. Зикова, С.-П., 1882, зб. 9—10.

³ იქვე, зб. 10—15.

ყრობოდნენ ხალხს. „დაე გახსოვდეთ, რომ თქვენ წინ გადაშლილია მინდვრები და მთები ძველი ქრისტიანული საქართველოსი, რომლის ათასობით მილიციელი და მოლაშქრე ამჟამად ჩვენს რიგებში დგას და საერთო მტერს ებრძვისო“¹.

რუსთა ჯარის შეტევა მარცხენა ფრთაზე საკმაოდ წარმატებით დაიწყო. ომის გამოცხადებიდან 6 დღის შემდეგ 1877 წ. 30 აპრილს გენ. ტერ-გუკასოვის ნაწილებმა დაიკავეს ქ. ბაიაზეთი და მისი მთელი დაბლობი. 10 მაისს რუსთა ჯარის ორმა კოლონამ გენერლების გეიმანისა და დეველის მეთაურობით ალყა შემოარტყა ქ. არტაანს. მტკვრის ზემო წელში მდებარე ამ ციხე-ქალაქის გამაგრებას თურქებმა განსაკუთრებული ყურადღება მიაქციეს ყირიმის ომის შემდეგ. ევროპელ ინჟინერთა ხელმძღვანელობით აიგო ახალი სიმაგრეები, სადაც დაიდგა უახლესი სისტემის მსხვილკალიბრიანი 95 ქვემეხი. არტაანს 8-ათასიანი გარნიზონი იცავდა. 16 მაისს პოდპოლკოვნიკ მუსხელიშვილის საარტილერიო დივიზიონის ზალპით რუსთა ჯარმა დაიწყო საერთო შეტევა. ელიზავეტპოლის პოლკმა, რომელსაც ამირეჯიბი მეთაურობდა, გმირული ბრძოლით გაანადგურა მტრის ბანაკი ჰელიავერდის მთაზე და გზა გაუხსნა შემტევ ჯარებს ქალაქისაკენ. 17 მაისს 2-საათიანი გააფლრებული იერიშის შემდეგ რუსთა ჯარმა აიღო არტაანი. თურქებმა ბრძოლის ველზე 2 000 გვამი დატოვეს. მტრის 1 000 ჯარისკაცი მდინარეში დაიხრჩო, 300 კი ტყვედ იქნა წამოყვანილი. არტაანის აღება იყო რუსთა ჯარის პირველი დიდი გამარჯვება რუსეთ-თურქეთის 1877 — 1878 წწ. ომში².

არტაანის აღების შემდეგ არტანუჯისა და ართვინის გავლით გზა გაიხსნა ბათუმისაკენ, მაგრამ რუსთა სარდლობამ სათანადოდ ვერ შეაფასა ამ მიმართულების ხელსაყრელობა და ბათუმის წინააღმდეგ შეტევა დაიწყო ოზურგეთიდან. არტაანის იერიშში მონაწილე რუსთა ჯარები კი ყარსისაკენ გაემართნენ.

ყარსის ციხე-სიმაგრე მიუვალად ითვლებოდა. იგი აგებული იყო შემალღებაზე და ბუნებრივი თუ ხელოვნური სიმაგრეების კომპლექსს წარმოადგენდა. მოალყე ჯარი მოკლებული იყო ციხე-სიმაგრის მიდამოებში საარტილერიო ბატარეების დადგმის შესაძლებლობას და თვით იერიშიც უნდა ჩატარებულიყო ღია პოზიციაზე, რაც გარნიზონს თავდაცვას უადვილებდა. 13—14 ივნისს ღამით გენ. დეველის ნაწილები შეეცადნენ ჩუმად მიახლოებოდნენ ყარსის ციხეს და განელაგებინათ იქ საარტილერიო ბატარეები. მეორე მხრივ, დაიძრნენ გენ. გეიმანის ნაწილებიც. იმის გამო, რომ ყარსს — თავისთავად ძლიერ ციხე-სიმაგრეს — თურქთა მრავალრი-

¹ შ. მ ე გ რ ე ლ ი ძ ე, სამხრეთ-დასავლეთ საქართველოს ისტორიიდან, თბ., 1963, 33. 116. -125.

² Война 1877 и 1878 гг..., т. III, под ред. Зикова, гл. 54—57.

ცხოვანი გარნიზონი იცავდა, რუსთა ჯარის შეტევას წარმატება არ მოჰყოლია¹.

ბოლოს და ბოლოს რუსთა სარდლობა მიხვდა, რომ მიუვალ ყარსის ციხესთან დიდი ჯარების დაბანდება შეეძლო იყო, რადგან თვით მისი აღებაც კი არ წყვეტდა სტრატეგიულ ამოცანას. მიზანშეწონილად იქნა ცნობილი ერზერუმის მიმართულებით გალაშქრება, მაგრამ რუსთა სარდლობამ დაიგვიანა.

იმ დროს, როცა რუსთა ჯარის ძირითადი ნაწილები ყარსის ალყით იყვნენ დაკავებული, ანატოლიის კორპუსის სარდალი მუსთარ ფაშა თანდათან იკრებდა ძალებს, ჯარის უმეტეს ნაწილს თავს უყრიდა ზივინის მდამოებში, რომელიც სტრატეგიული პუნქტი იყო ყარსის, ოლთისის და ალაშქერტის დამაკავშირებელ გზაჯვარედინზე.

10 ივნისისათვის მუსთარ ფაშა დარწმუნდა თავისი არმიის ბრძოლისუნარიანობაში და კონტრშეტევა წამოიწყო. მარჯვენა ფლანგზე, ბაიზეთის მიმართულებით გაგზავნა არმიის ერთი ნაწილი. ბრძოლა მოხდა დარიარის ხეობაში და იგი რუსთა ჯარის გამარჯვებით დამთავრდა. თურქებმა უწყსრიგოდ დაიხიეს ერზერუმისაკენ. მაგრამ ამ მარცხს მუსთარ ფაშას ენერჯია არ მოუღუწებია. ანატოლიის კორპუსის სარდალი თვით დაიძრა რუსების წინააღმდეგ. გენ. ტერ-გუქასოვი კარგად გრძობდა დარიარის ხეობის დიდ მნიშვნელობას და ამიტომ 21 ივნისს სამკედრო-სასი-ცოცხლო ბრძოლა გაუმართა თურქებს და დიდი ზიანიც მიაყენა მათ. მიუხედავად ამისა ერევენის რაზმის მღვთმარეობა კრიტიკული გახდა. მის წინააღმდეგ სამკერ მეტი მტერი იყო განლაგებული.

ერევენის რაზმზე თურქთა დაწოლის შენელების მიზნით გენ. ლორის-მელიქოვი თვით ზივინის პოზიციების მიმართულებით დაიძრა. მუსთარ ფაშამ მართლაც მიანება თავი ტერ-გუქასოვის ნაწილებთან ბრძოლას და ზივინის მდამოებში დაიბანაკა. მართალია, ერევენის რაზმმა თავი დააღწია გასაჰირს, მაგრამ სამაგიეროდ კრიტიკულ მდგომარეობაში ჩავარდნენ ზურგს მოწყვეტილი და მტრის ტერიტორიის სიღრმეში შეჭრილი რუსთა ჯარის ძირითადი ნაწილები.

ზივინთან ბრძოლა 25 ივნისს მოხდა. რიცხოვრივი უპირატესობის წყალობით თურქებმა წარმატებას მიაღწიეს. რუსთა ჯარის ცენტრი და მარცხენა ფრთა იძულებული გახდა უკან დაეხია. ამით გამხნეებული თურქები შეტევაზე გადავიდნენ და თანდათან დაიბრუნეს რუსთა ჯარის მიერ ომის დაწყების პირველ თვეს დაკავებული ტერიტორიები.

1877 წლის ივნისიდან სექტემბრის ბოლომდე რუსთა ჯარის მღვთმარეობა მცირეაზიის ფრონტზე კრიტიკული იყო. წინაპერიოდის წარმატებები შეიცვალა მარცხითა და უკან დახევით. ამის მიზეზად მიჩნეულ იქნა

¹ Война 1877 и 1878 гг., т. III, под. ред. Зикова, гл. 81—91.

ის, რომ რუსეთის ჯარი მოქმედებდა დანაწევრებულად — სამ კოლონად, რაც ასუსტებდა მას, მტერს კი მანევრირების საშუალებას აძლევდა. რუსთა მოქმედი კორპუსი იძულებული გახდა დაეტოვებინა მტრის მთელი ტერიტორია და ერევნის გუბერნიის ნაწილიც კი¹:

რუსეთის ჯარმა მარცხი განიცადა კავკასიის ფრონტის შავი ზღვისპირა უბანზეც. მართალია, რუსთა ჯარის ნაწილებმა ქართველ მოლაშქრეთა დახმარებით ბათუმისაკენ შეტევის გზაზე დაიკავეს სოფლები მუხანესტატე და ხუცუბანი, მაგრამ საერთოდ აჭარაში შეტევას წარმატება არ მოჰყოლია. ეს განპირობებული იყო იმით, რომ რუსეთს შავ ზღვაში სამხედრო ფლოტი არ ჰყავდა. იქ ბატონობდნენ თურქეთის სამხედრო გემები, რომელნიც ბომბავდნენ რუსეთის სანაპირო სიმაგრეებს, ახალ-ახალი ნაწილები გადმოჰყავდათ ბრძოლის ველზე და შეუფერხებლად ამარაგებდნენ არმიას იარაღით და სურსათ-სანოვავით. ასეთ პირობებში შავი ზღვის სანაპირო ხაზით შეტევის წარმოება აშკარა შეცდომა იყო, მაგრამ რუსთა ჯარის სარდლობა შეუპოვრად ცდილობდა ბათუმისაკენ გაჭრას.

1877 წ. ივნისში დიდი ბრძოლა გაიმართა ციხისძირთან. ეს სიმაგრე შეუვალად ითვლებოდა და მისი დაცვა მცირე ძალებით შეიძლებოდა. მაგრამ ოსმალეთის მთავრობამ ციხის ძირის დასაცავად 35 ათასი ჯარისკაცი გამოყო, რუსთა შემტევე ჯარში კი მხოლოდ 25 ათასი კაცი ითვლებოდა. ძალთა ასეთი თანაშეფარდების პირობებში, ბუნებრივია, რუსეთის ჯარმა ვერ შეძლო ციხის ძირის აღება და უკან დაიხია.

1877 წ. 11 მაისს თურქებმა დესანტი გადმოსხეს გუდაუთის ახლოს და სოხუმისაკენ დასძრეს იგი. სოხუმის გარნიზონის უფროსი გენ. კრავჩენკო გაუბედავად მოქმედებდა. მან ვერ გაბედა შედარებით ძლიერ მტერთან შებმა და ქალაქი დათმო. თურქებმა თითქმის აფხაზეთის ნახევარი დაიკავეს და აფხაზები აიძულეს რუსეთის წინააღმდეგ აჯანყებულიყვნენ.

გენ. კრავჩენკოს ნაწილების დასახმარებლად და აფხაზეთის გასათავისუფლებლად გაიგზავნა გენ. ალხაზიშვილი რუს-ქართველთა ჯარით. გადამწყვეტი ბრძოლა ოქუმის მიდამოებში მოხდა. მტერი დამარცხდა და უკან დახევა დაიწყო. 1 აგვისტოს თურქებმა დატოვეს ოჩამჩირე, 2 სექტემბერს კი რუსთა ჯარი სოხუმში შევიდა. მალე აფხაზეთის მთელი ტერიტორია გაწმენდილ იქნა ოკუპანტებისაგან².

ამავე დროს რუსეთის სარდლობა კონტრშეტევისათვის ემზადებოდა მცირე აზიის ფრონტზე. 1877 წლის სექტემბრის ბოლოსათვის კავკასიის მოქმედ კორპუსს შეემატა ორი ახალი დივიზია და მილიციონერთა რაზმები. მაგრამ არც თურქები ისხდნენ გულხელდაკრეფილი. მუხთარ ფაშას

¹ Война 1877—1878 гг., под ред. Зикова, гл. 220—228.

² იქვე, გვ. 189—227.

არმიაც შეივსო ახალი ნაწილებით. გადამწყვეტი ბრძოლის დაწყების წინ კავკასია-მცირე აზიის ფრონტის მთავარ უბანზე (პატარა იანგი — ალაჯის სიმაღლეები — ყიზილ თათას ნაზი) რუსთა სარდლობას განლაგებულნი ჰყავდა 50 ათასი კაცი, თურქებს — 37 ათასი.

გენერალური ბრძოლა 2 ოქტომბერს დაიწყო. მოწინააღმდეგეები თავდაპირველად ავლიარის მიდამოებში შეეტაკნენ ერთმანეთს. ბრძოლა ცვალებადი წარმატებით მიმდინარეობდა. პოზიციები ხელიდან ხელში გადადიოდა. ბრძოლის მესამე დღეს რუსთა ჯარმა თავის საწყის პოზიციებზეც კი დაიხია, მაგრამ სისხლი ამაოდ არ დაღვრილა. მტერმა გამანადგურებელი ზარალი განიცადა — ბრძოლის ველზე დატოვა 8 500 კაცი. რუსთა ჯარის გაათრებული შეტევებითა და დიდი დანაკარგით დემორალიზებული თურქები აქტიურ მოქმედებას ვეღარ ბედავდნენ და ინიციატივას თანდათან რუსებს უთმობდნენ. 14 ოქტომბრის ბრძოლაში რუსთა ჯარმა ახალი წარმატება იხიემა. მაგრამ გადამწყვეტი გამარჯვება მოპოვებულ იქნა 15 ოქტომბერს, როცა რუსეთის რეგულარული ჯარის ნაწილებმა და კავკასიელმა მილიციონერებმა ალაჯის სიმაგრეებზე გაანადგურეს თურქთა ძირითადი ძალები. ამ ბრძოლაში თურქებმა დახოცილ-დაჭრილთა სახით 13 ათასი ჯარისკაცი დაკარგეს. 7 ფაშა, 250 ოფიცერი და 7 000 ჯარისკაცი ტყვედ იქნა წამოყვანილი. რუსთა ნაწილების დანაკარგი შედარებით უმნიშვნელო იყო, დაჭრილ-დახოცილთა სახით მათ რიგებს გამოაკლდა 1 400 კაცი. სამხედრო თვალსაზრისით 2—4 ოქტომბრისა და 14—15 ოქტომბრის ბრძოლები იყო ერთი ოპერაციის ორი ეტაპი, რომელიც დამთავრდა თურქთა ანატოლიის კორპუსის განადგურებით. რუსეთის ჯარებმა კვლავ დაიკავეს ვრცელი ტერიტორია სოღანლულის მთებამდე¹.

ავლიარ-ალაჯის ბრძოლის შემდეგ თურქთა განადგურებული კორპუსის სარდალი მუხთარ ფაშა თავის ჯარის ნაშთებთან ერთად თავდაპირველად ყარსის ციხეს შეეფარა, რამდენიმე დღის შემდეგ ქალაქის გარნიზონი ჰუსენინ ხამი ფაშას ჩააბარა, თვითონ კი 3 ათასი კაცით უკან დაიხია ქვეყნის სიღრმეში, თავი მოუყარა მცირეაზიაში გაფანტულ თურქეთის ჯარებს და შეეცადა ბრძოლის მსვლელობა თავის სასარგებლოდ შემოებრუნებინა. მაგრამ გამარჯვებით გამხნეებული რუსი ჯარისკაცები, ქართველი, სომეხი, აზერბაიჯანელი და სხვ. მოლაშქრეები დამარცხებულ მტერს სულის მოთქმას არ აცდიდნენ და სწრაფად მიიწვევდნენ ერზერუმისაკენ. მუხთარ ფაშამ მაინც შეძლო თავისი ჯარის კონცენტრაცია და 20 ათასი კაცით 5 ნოემბერს დევე ბოინის მთასთან დიდი ბრძოლა გაუმართა რუსებს, მაგრამ ამჟერადაც გამანადგურებელი მარცხი განიცადა — ბრძოლის ველზე დატოვა 3 ათასი გვამი და 42 ქვემეხი.

¹ Война 1877—1878 гг., под ред. Зикова, гл. 325—360.

დევე ბოინი უკანასკნელი დაბრკოლება იყო ერზერუმისაკენ შეტევის გზაზე. 10 ნოემბერს რუსთა ჯარის ნაწილები ანატოლიის ამ მთავარ ქალაქს მიაღწენ და მოულოდნელი შეტევით სცადეს მისი აღება. მაგრამ მოუშზადებელ იერიშს წარმატება არ მოჰყოლია.

იმ დროს, როცა რუსთა ჯარის ერთი ნაწილი დამარცხებულ მტერს მისდევდა და ერზერუმს უახლოვდებოდა, მეორე ნაწილი თანდათან ავიწროებდა რკალს ყარსის გარშემო. მართალია, ყარსის სიმაგრეებზე მდგარი 300 ქვემეხის განუწყვეტელი ზალბით შემტევ ჯარებს საგრძნობი ზარალი მოსდევდა, მაგრამ რუსი და ქართველი მებრძოლები უშიშრად მიიწვედნენ წინ. 17—18 ნოემბერს ღამით რუსთა ჯარებმა გენ. ლორის-მელიქოვის სარდლობით გადამწყვეტი იერიში მიიტანეს ყარსზე და გათენებისას შეძლეს მისი აღება. თურქებმა ამ ბრძოლაში დაკარგეს 2 500 კაცი მოკლულთა და 17 000 ტყვეთა სახით. მათ შორის ტყვედ იქნა წამოყვანილი 5 ფაშა და 800 ოფიცერი. რუსთა დანაკლისი მოკლულ-დაჭრილთა სახით 2 ათას კაცს არ აღემატებოდა¹.

ყარსის აღებას თავისთავად უდიდესი მნიშვნელობა ჰქონდა. მაგრამ ამ სიკეთეს ემატებოდა ისიც, რომ აქამდე ამ ციხე-ქალაქის ალყით დაკავებული ნაწილები სხვა უბნებზე მოქმედ ჯარებს შეუერთდნენ და კიდევ უფრო გაზარდეს მათი შეტევისუნარიანობა.

ომი დასასრულს უახლოვდებოდა, მაგრამ სხვა ფრონტებზე რუსთა ჯარის გამარჯვებებს აჭარის მიმართულებით მოქმედი დივიზიის წარმატება არ ემატებოდა. რუსთა სარდლობა ცდილობდა ამ ვითარების გამოსწორებას და ბათუმის აღების გეგმას ადგენდა. 1877 წ. 24 ნოემბერს სვიატოპოლკ-მირსკი მეფისნაცვალს სწერდა, რომ რუსეთთან ბათუმის შეერთება ამ ომის ყველაზე სასურველი შედეგი იქნება და თუ გვინდა, რომ საზავო მოლაპარაკების დროს ბათუმი ჩვენ დაგვრჩეს, იგი ბრძოლით უნდა დავიკავოთო. სვიატოპოლკ-მირსკი კარგად ითვალისწინებდა მოსალოდნელს იმ ნეღებებს და სარდლობას ურჩევდა ბათუმისაკენ ლაშქრობა ერთდროულად არტაანის, ახალციხისა და ქობულეთის მხრიდან დაეწყო.

1877 წ. 14 დეკემბერს არტაანის რაზმი შავშეთში შეიჭრა და სოფ. ხევი და ხერთვისი დაიკავა. 16 დეკემბერს რუსთა ჯარმა ადგილობრივი მოსახლეობის დახმარებით აიღო ქ. არტანუჯი, სოფ. ბაცა და ბათუმისაკენ მიმავალ გზაზე გავიდა. 1878 წლის იანვრისათვის მთელი შავშეთი უკვე რუსეთის ჯარების ხელთ იყო.

ბათუმისათვის ბრძოლაში დიდი მნიშვნელობა ენიჭებოდა აჭარის ბეგების მიერ დაკავებულ პოზიციას. მათ შორის ყველაზე ძლიერი შერიფ ბეგ ხიმშიაშვილი მტკიცედ ადგა რუსეთის ორიენტაციას და აჭარის საქართველოსთან შეერთების გზას. სხვების პოზიცია კი გაურკვეველი ჩანდა.

¹ Война 1877 и 1878 гг., под ред. Зикова, гл. 410—416.

ამიტომ რუსთა სარღლობა დიდხანს აჭარაში აქტიურ მოქმედებას ვერ ბედავდა. ბოლოს და ბოლოს შერიფ ბეგის მოთხოვნის თანახმად რუსები ახალციხის მხრიდან შეიჭრნენ აჭარაშიც. დემორალიზებულმა თურქეთის არმიამ ბრძოლის ამ უბანზეც დამარცხება იწვნია.

ციხე-ქალაქი ერზერუმი მუხთარ ფაშას ერთადერთ იმედად რჩებოდა. მან მოახერხა გარნიზონის რამდენადმე გაძლიერება. მაგრამ რუსთა მოალყე ჩარი გაცილებით მრავალრიცხოვანი და უკეთ შეიარაღებული იყო. რუსეთის სამმა ქვეითმა დივიზიამ და კავალერიის ნაწილებმა ერზერუმის 30 ათასიანი გარნიზონი და 60 ათასი მოქალაქე სრულიად მოსწყვიტა გარე სამყაროს. მიუხედავად იმისა, რომ რუს ჯარისკაცებს აკლდა სურსათი, თბილი ტანსაცმელი და მის რიგებს ტიფის ეპიდემია ანადგურებდა რუსთა სარღლობა გადამწყვეტი იერიშისათვის ემზადებოდა.

როგორც ვხედავთ, რუსეთის არმიამ დიდი წარმატებები მოიპოვა ამიერკავკასია-მცირე აზიის ფრონტზე, მაგრამ გადამწყვეტი ოპერაციები ბალკანეთში გაიშალა. 1877 წ. 10 დეკემბერს რუსთა ჯარმა აიღო ძლიერი ციხე-ქალაქი ბულგარეთში პლეენა, გაანადგურა და დაატყვევა მისი 50-ათასიანი გარნიზონი. ამის შემდეგ გენ. გურკოს ნაწილებმა გადალახეს ბალკანეთის მთები და ბულგარულ მოლაშქრეთა დახმარებით დიდი ზარალი მიაყენეს თურქებს სოფიის დაბლობზე გამართულ ბრძოლებში. 1878 წ. 9 იანვარს გენ. რადეცკის ჯარმა დაატყვევა 21 ათასი თურქი. მალე გენ. გურკოს ჯარის ნაწილებმა გაანადგურეს სულეიმან ფაშას 50-ათასიანი არმია. თურქთა წინააღმდეგობა დაძლეულ იქნა. 20 იანვარს რუსთა ჯარმა უომრად აიღო ანდრიანოპოლი და გეზი უშუალოდ კონსტანტინოპოლისაკენ აიღო. თურქეთის სულტანი იძულებული გახდა ზავი ეთხოვა. 1878 წ. 31 იანვარს დადებულ იქნა დროებითი ზავი, 3 მარტს კი გაფორმდა სან-სტეფანოს საზავო ხელშეკრულება.

სან-სტეფანოს საზავო ხელშეკრულების თანახმად დამოუკიდებლობას ღებულობდნენ ბულგარეთი, ჩერნოგორია, რუმინეთი. რუსეთს უნდა გადასცემოდა ევროპაში ბესარაბია, აზიაში კი — სამხრეთ-დასავლეთ საქართველოსა და დასავლეთ სომხეთის ტერიტორიების დიდი ნაწილი სოღანლულის მთებამდე.

* * *

რუსეთის გამარჯვებაში მნიშვნელოვანი როლი შეასრულა საქართველოს მოსახლეობამ. იგი აქტიურად მონაწილეობდა ამ სახალხო-განმათავისუფლებელ ომში, ეხმარებოდა რუსეთის არმიას როგორც ზურგში, ისე

ფრონტზე. ომის მსვლელობაში მრავალმა ქართველმა ჯარისკაცმა და ოფიცერმა გვიჩვენა გმირობისა და თავდადების ნიმუშები. „ქართული ლაშქრის (მილიციის) ნაწილები ფრონტზე მამაცურად იბრძოდნენ რუსეთის არმიის რეგულარული ნაწილების მხარდამხარ. ბათუმის მიმართულებით წარმოებულ ხანგრძლივ და მძიმე ბრძოლებში თავი ისახელეს პირველი და მეორე ქვეითი ქართული რაზმის ნაწილებმა, რომლებშიც ქართლ-კახეთის წარგზავნილები იბრძოდნენ, აგრეთვე გურიის სახელოვანმა პირველმა ქვეითმა რაზმმა. აფხაზეთის მხრიდან თურქეთის დესანტის შემოტევის დროს გმირულად იბრძოდა ქუთაისის პირველი და მეორე ქვეითი რაზმი და არარეგულარული ცხენოსანი პოლკი. არტაანისა და ყარსისათვის ბრძოლებში თავი გამოიჩინეს ახალციხისა და თიანეთის (თუშების) რაზმებმა.

ქართული ნაწილების სიმამაცესა და მაღალ სამხედრო ოსტატობას ქებით იხსენიებდა რუსეთის არმიის სარდლობა. ქობულეთის მიდამოებში გამართული ერთ-ერთი ბრძოლის მონაწილე გენერალი კოლუბიაკინი იტყობინებოდა: „გავიდნენ რა საკმაოდ ჩქარ მდინარე კინტრიშზე და სძლიეს რა მრავალრიცხოვან წინააღმდეგობებს, გაბედული ქართველები სისტემატურად აწარმოებდნენ გააფთრებულ ბრძოლას, იერიში იერიშზე მიჰქონდათ და მიუხედავად იმისა, რომ საგრძნობ ზარალს განიცდიდნენ, მაინც ფრიად წარმატებით მიიწვედნენ წინ“. იგივე გენერალი გურიის პირველი ქვეითი რაზმის შესახებ, რომელსაც შტაბს-კაპიტანი იასე გურიელი მეთაურობდა, წერდა: „ყველანი ხარკს უხდიან გურიის რაზმის დაუვიწყარ გმირობას, ლაშქრისა, რომელიც ამ დღეებში, როგორც ჩვენი მსუბუქი ქვეითი ნაწილი და ადგილმდებარეობასთან უფრო გაცნობილი, მუდამ წინ იყო და თავის მხრებზე გადაიტანა ომის მთელი სიმძიმე“¹. დაუვიწყარია გმირობა 16 ქართველი გლეხისა, რომლებიც ომის დაწყების პირველსავე დღეს მოხალისეებად ჩაირიცხნენ ჯარში. ეს გლეხები სოფ. ლიხაურიდან მოვიდნენ და ხუთი თვის განმავლობაში მამაცურად იბრძოდნენ. 1877 წლის 23 ოქტომბერს ბათუმის მიმართულებით შეტევის გზაზე, უძნელესი საბრძოლო დავალების შესრულების დროს თექვსმეტივე ლიხაურელი ვაჟკაცი გმირულად დაიღუპა.

თურქეთის წინააღმდეგ ომში სახელი გაითქვეს რუსეთის რეგულარული არმიის ქართველმა გენერლებმა და ოფიცრებმა: ზაქარია ჭავჭავაძემ, რომელიც ღირსეულად უფროსობდა მოქმედი კორპუსის ცხენოსან ჯარს და გააფთრებულ ბრძოლებში ექვსჯერ იქნა დაჭრილი; ალექსი ჭავთარაძემ, რომელიც მთელი ომის განმავლობაში დარუბანდის 154-ე ქვეითი პოლკის მეთაური იყო და იშვიათი გაბედულებით მიჰყავდა იერიშზე

¹ საქართველოს ისტორია, ტ. II, დამხმარე სახელმძღვანელო ნ. ბ ე რ ძ ე ნ ი ვ ი - ლ ის რელაქციით, თბ., 1962, გვ. 87—88.

თავისი მებრძოლები; მიხეილ ამირეჯიბმა, რომელიც ელიზავეტოლის პოლკს მეთაურობდა და ქალაქ არტანისათვის ბრძოლაში, აგრეთვე ალაჯის სიმაგრეების იერიშის დროს სიმაძაცისა და მხედართმთავრული ოსტატობის მაგალითები გვიჩვენა. თავი ისახელეს აგრეთვე ამილახვარმა, მიქელაძემ, კვინიტაძემ, იოსელიანმა, ჭავჭავაძემ, ორბელიანმა, ფანჩულიძემ და სხვ. ქართველმა გენერლებმა, ოფიცრებმა და რიგითმა მოლაშქრეებმა მნიშვნელოვანი წვლილი შეიტანეს მტერზე გამარჯვებაში.

მაგრამ ქართველი ხალხის წვლილი რუსეთ-თურქეთის ომში მართო სამხედრო ოპერაციებში აქტიური მონაწილეობით როდი ამოიწურებოდა. იმის გამო, რომ ომის ასპარეზი მეტისმეტად ახლოს იყო, ზოგჯერ კი საომარი ოპერაციები თვით საქართველოს ტერიტორიაზე მიმდინარეობდა, ჩვენი სამშობლო გადაქცეული იყო სამხედრო ბანაკად და ომში ამა თუ იმ სახით თითქმის მთელი ქართველი ხალხი მონაწილეობდა. მოქმედ არმიას ხალხი დახმარებას უწევდა სურსათით, ფურაჟით, ტვირთების გადაზიდვით, ბინებითა და სხვა მატერიალური საშუალებებით. არმიის შეუფერხებელი მომარაგება საომარი მასალებით და სურსათით უდიდეს ძალღონეს მოითხოვდა. ამ ამოცანის შესასრულებლად ათასობით ქართველი გლეხი მუშაობდა ურმებით, ცხენებითა და აქლემებით.

ამრიგად, ქართველმა ხალხმა, მიუხედავად იმისა, რომ ცარიზმი მისი მოსისხლე მტერი იყო, ომში ერთსულოვნად დაუჭირა მხარი რუსეთს, რადგან მას ესმოდა, რომ ომში რუსეთის გამარჯვება ხელს შეუწყობდა მისი საკუთარი სასიცოცხლო ეროვნული ინტერესების დაკმაყოფილებას, უზრუნველყოფდა თურქებისაგან მიტაცებული ქართული ტერიტორიების განთავისუფლებას¹.



რუსეთის წარმატებამ, სან-სტეფანოს საზავო ხელშეკრულების პირობებმა შეაშფოთა ევროპის დიდი სახელმწიფოები, განსაკუთრებით კი ინგლისი. მათ რუსეთის მიმართ მტრული პოზიცია დაიკავეს და „დაჩაგრული“ თურქეთის ქომაგობა იკისრეს. ამან გაამხნევა ოსმალეთი და სულტანმა კვლავ დაიწყო იარაღის ყდარუნის, ინგლისის ფლოტი კი, რუსეთზე ზემოქმედების მიზნით, შავ ზღვაში შევიდა. ინგლის-თურქეთის აგენტები მოედნენ ამიერკავკასია-მცირე აზიასა და მოსახლეობას რუსეთის წინააღმდეგ ბრძოლისაკენ მოუწოდებდნენ.

¹ საქართველოს ისტორია, ტ. II, 1962, გვ. 89—90.

სულტანის ემისრები განსაკუთრებულ აქტიურობას მოითხოვდნენ მაჰმადიანი ქართველებისაგან. დერვიშ-ფაშამ აჰარლებს იარაღი დაურეგა და მათ რუსეთის წინააღმდეგ ამხედრება მოსთხოვა. ასეთივე ბრძანება მიიღო შერიფ-ბეგ ხიმშიაშვილმაც. იმის გამო, რომ შერიფმა არ შეასრულა ეს მოთხოვნა, აჰარაში თურქთა დამსჯელი რაზმი გაიგზავნა, რომელმაც სოფ. სხალთაში არსებული მისი სასახლე მიწასთან გაასწორა. შერიფ-ბეგ ხიმშიაშვილი ახალციხეში გადავიდა და რუსეთის მთავრობის სამსახურში აშკარად ჩაღდა.

ევროპის დიდი სახელმწიფოების მიერ დაკავებული ანტირუსული პოზიციის და ინგლის-თურქეთის ახალი ომისათვის მზადების პირობებში სან-სტეფანოს ზავი დროებითი გამოდგა. რუსეთის მთავრობა იძულებული გახდა დათანხმებოდა ბერლინში ევროპის სახელმწიფოთა კონგრესის მოწვევას და სან-სტეფანოს საზავო ხელშეკრულების გადასინჯვას.

ბერლინის კონგრესმა, რომლის მუშაობაშიც მონაწილეობდნენ ევროპის დიდ სახელმწიფოთა პრემიერ-მინისტრები და სხვა წარმომადგენლები, სხდომები დაიწყო 1878 წ. 13 ივნისს. კონგრესის მუშაობის პროცესში განმტკიცდა ავსტრია-გერმანიის კავშირი და გამომჟღავნდა ინგლის-საფრანგეთის დაახლოების ტენდენცია. მეფის რუსეთი კი იზოლირებული აღმოჩნდა. კონგრესზე მწვავედ იდგა როგორც ბალკანეთის პოლიტიკური მოწყობის, ისე რუსეთ-თურქეთის აზიური საზღვრების საკითხი. განსაკუთრებით დიდი კამათი წარმოებდა ბათუმის გარშემო. მართალია, რუსეთის დიპლომატიამ ზოგი რამ დათმო, მაგრამ ძლევამოსილი ომის ძირითადი მონაპოვარი შეინარჩუნა.

1878 წ. 13 ივლისს ხელმოწერილ ბერლინის ტრაქტატის ძალით რუსეთის მფლობელობაში გადმოვიდა აჰარა, შავშეთი, კლარჯეთი, იმერხევი, კოლა-არტანანი და ოლთისი. თურქთა ხანგრძლივი ბატონობისაგან განთავისუფლდა აგრეთვე დასავლეთ სომხეთის მნიშვნელოვანი ნაწილი.

აღნიშნული ტერიტორიების უმეტესობა ბერლინის ტრაქტატის ხელმოწერის მომენტში რუსთა ჯარის ხელთ იყო. მხოლოდ აჰარაში (ბათუმი-თურთ) რჩებოდა თურქეთის ჯარი. ოსმალეთის მთავრობა აჰიანურებდა რუსეთისათვის აჰარის გადაცემას. თურქეთის აგენტები ყოველნაირად ცდილობდნენ გამოეწვიათ კონფლიქტი აჰარლებსა და რუსეთის ჯარს შორის. ერთმორწმუნეებს მოუწოდებდნენ გადასახლებულიყვნენ თურქეთის შიგა პროვინციებში. რუსეთის მთავრობამ კატეგორიულად მოითხოვა ბათუმიდან და აჰარიდან თურქეთის ჯარების გაყვანა. ბოლოს და ბოლოს დაიდო შეთანხმება, რომლის თანახმად აჰარის ქალაქები და სოფლები რუსთა ჯარს უნდა გადასცემოდა თანდათანობით 16-დან 25 აგვისტომდე. თურქთა აგენტების ვარაუდი არ გამართლდა. აჰარის მოსახლეობის დიდი უმრავლესობა თანაგრძნობით ხვდებოდა რუსთა ჯარს. 1878

წლის 25 აგვისტოს რუსთა ნაწილები ბათუმში შევიდნენ. ქალაქის მოსახლეობა გამათავისუფლებელ ჯარს ბარცხანასთან შეხვდა და მის უფროსს პურჩაირილი მიართვა. იმ დღესვე შევიდა ბათუმის ნავსადგურში რუსეთის ფლოტიც. ბათუმის ციტადელზე აღმართულმა რუსეთის ნაციონალურმა დროშამ და ქვემეხთა ასერთმა სალუტმა მოსახლეობას ამცნო, რომ დამთავრდა თურქთა ხანგრძლივი ბატონობა აჭარაში, რომ ეს მხარე დედასამშობლოს — საქართველოს დაუბრუნდა.

ქართველი ხალხი, მოწინავე საზოგადოებრიობა სიხარულით შეეგება სამხრეთ-დასავლეთ საქართველოს თურქთა ბატონობისაგან განთავისუფლებას. ი. გოგებაშვილი წერდა: „ბერლინის ხელშეკრულებამ ჩვენ ერთი დიდი სიკეთე შეგვიძინა... ჩვენი ძმები, ჩვენი სისხლხორცი, ჩვენთან ერთად „მებრძოლი შავი ბედისა“, ჩვენი გამირების ბუდე, ჩვენის უწინდელის განათლების და სწავლის აკვანი, ჩვენი ძველი საქართველო დღეს ჩვენ შემოგვიერთდა“¹.

მთავრობისაგან წაქეზებული თურქი ემისრები მაინც არ ცხრებოდნენ; შექმნეს ტერორისტული ორგანიზაციები, თავს ესხმოდნენ რუსთა და ქართველთა რაზმებს, წვავდნენ სახლებსა და მალაზიებს, მოსახლეობას მოუწოდებდნენ რუსეთის წინააღმდეგ ბრძოლისაკენ, ეპატიჟებოდნენ მათ „დედა თურქეთისაკენ“. თურქეთის ემისრებმა აჭარის რამდენიმე სოფლის აჯანყებაც კი შეძლეს. რუსეთის ადმინისტრაციის ზოგი წარმომადგენელი აჯანყებულთა მკაცრად დასჯას მოითხოვდა, სხვებს კი მიზანშეწონილად მიაჩნდათ აჭარლების კეთილგანწყობილება პოლაპარაკებით ყოფილიყო მოპოვებული. „ჩვენი აზრი ეს არის, — წერდა „დროების“ კორესპონდენტი, — რომ ჯარებითა და საზოგადოდ ძალდატანებით მხოლოდ ერთი შედეგის მიღწევა შეიძლება: მთელი აჭარის ხალხი გადასახლდება ოსმალეთში, და არა მგონია, რომ ამისთანა შედეგი ვისმესთვის სანატრელი და სასიამოვნო შეიქმნეს. ერთი ხეირიანი უფროსი, ხალხის ზნე-ჩვეულების მცოდნე ჭკვიანი კაცი უფრო მომეტებულ სარგებლობას მოიტანს ამგვარ შემთხვევაში და უფრო უკეთ მოუვლის და დააწყნარებს ხალხს, ვიდრე რამდენიმე ბატალიონი ჯარი“². მართლაც, აჯანყებულებთან მოსალაპარაკებლად აჭარაში გაიგზავნა პოლკოვნიკი იოსელიანი მცირე რაზმით. იგი ჩავიდა სოფ. დანდალოში, სადაც რამდენიმე ათასი კაცი იყო შეკრებილი და დაარწმუნა აჭარლები აჯანყების უნაყოფობასა და რუსეთთან ნორმალური ურთიერთობის დამყარების მიზანშეწონილებად³. მართალია, აჭარაში და ქართველებით დასახლებულ სხვა ახლად-

¹ ი. გოგებაშვილი, რჩეული ნაწერები, ტ. II, 1940, გვ. 52.

² „დროება“, 1878, № 164.

³ შ. მეგრელიძე, სამხრეთ-დასავლეთ საქართველოს ისტორიიდან, თბ., 1963,

შემოერთებულ რაიონებში სეროიზულ ანტიცარისტულ გამოსვლას ადგილი არ ჰქონია, მაგრამ სულტანის აგენტებმა, რომელთა საქმიანობას გარკვეული მოსაზრებით ხელს არ უშლიდნენ რუსეთის ადგილობრივი ადმინისტრაციის მოხელეები, შეძლეს მაჰმადიან ქართველთა ნაწილის გაბრიყვება და მათი ოსმალეთში გადასახლება.

უნდობლობის გასათანტავად, აჭარის მოსახლეობასთან მჭიდრო კონტაქტის დამყარების მიზნით მოწინავე ქართველ მოღვაწეთა ჯგუფმა აჭარელთა დეპუტაცია მოიპატიჟა თბილისში. ბანკეტზე ბევრი გულთბილი სიტყვა წარმოითქვა. ცხადი გახდა, რომ დიდი ხნის წინ დაშორებულ და კვლავ შეყრილ ძმებს კარგად ესმოდათ ერთმანეთისა, კარგად ითვისებდნენ არსებული სიძნელების დასაძლევად ერთობლივი მუშაობის საჭიროებას. ილია ჭავჭავაძემ ქართველ ხალხს მოუწოდა დახმარების ხელი გაეწოდებინა ახლად განთავისუფლებული და ომით დაზარალებული მაჰმადიანი ქართველებისათვის. „აბა ქართველობავ, — წერდა დიდი მოღვაწე, — ეხლა შენ იცი როგორ დაანახვებ თავს შენს ახლად შემოერთებულ ძმებსა! ეხლა შენ იცი როგორ დაუმტკიცებ ქვეყანას მაჰაპაათ ანდერძს: ძმა ძმისთვისა და შავი ღლისთვისაო!“¹.

ილიას ეს მოწოდება როდი დარჩა ხმად მლაღადებლოსა უღაბნოსა შინა. მთელი ქართველი ხალხის დახმარებით სამხრეთ-დასავლეთ საქართველოს მოსახლეობამ მალე მოიშუშა თურქთა ხანგრძლივი ბატონობისა და ომისაგან მიყენებული ჭრილობები და პროგრესული განვითარების გზაზე გამოვიდა.

¹ „ივერია“, 1879, № 9.

§ 1. ქართველი ერი

ქართველი ერის ჩამოყალიბების პროცესი. ქართველი ხალხის ერთად ჩამოყალიბება ხანგრძლივი ისტორიული პროცესი იყო¹. ეს პროცესი არსებითად კაპიტალიზმის ხანაში დამთავრდა, მაგრამ ერის და მისი დამახასიათებელი მთავარი ნიშნების — ენის, ტერიტორიის, ეკონომიური ცხოვრების და კულტურის ერთობის — თანდათანობითი წარმოქმნა ჯერ კიდევ დიდი ხნის წინათ დაიწყო და ძველის წიაღში ახალ საზოგადოებრივ ურთიერთობათა ჩასახვა-განვითარების პროცესის ინტენსივობის შესაბამისად მიემართებოდა.

ქართული ენა უკვე მერვე საუკუნიდან მთელი საქართველოს ერთადერთ სამწერლო და სახელმწიფო ენად ითვლებოდა. ქართული ენის ერთობა ყველა ქართული ეთნიკური ელემენტისათვის კიდევ უფრო თვალსაჩინოა XII საუკუნიდან, როცა ახალი ქართული სალიტერატურო ენა ჩაისახა², თუმცა საერთო-სახალხო ეროვნული ენა საბოლოოდ საქართველოში დიდი ხნის დაგვიანებით დამკვიდრდა.

მრავალსაუკუნოვანი ისტორია აქვს ქართველი ხალხის ტერიტორიულ ერთობასაც. განსაკუთრებით მაღალ საფეხურს ეს ერთობა და მისი შეგნება საქართველოს სახელმწიფოებრივი ერთიანობის და ძლიერების ხა-

¹ ნ. ბერძენიშვილი, ვ. დონდუა, მ. დუმბაძე, გ. მელიქიშვილი, შ. მესხია, ვ. რატიანი, საქართველოს ისტორია, დამხმარე სახელმძღვანელო, ტ. 1, 1958, გვ. 94—100, 523—526.

² ა. ჩიქობავა, ილია ჭავჭავაძე ენის შესახებ, 1938, გვ. 3,7. ქართული ენის ზოგადი დახასიათება, იხ. „ქართული ენის განმარტებითი ლექსიკონი“, 1, 1950, გვ.018—019, აგრეთვე 008.

ნაში აღწევდა ხოლმე. ასე იყო, მაგალითად, XII საუკუნეში, როცა ჩვენი სამშობლოს მთელ ტერიტორიას „საქართველო“ ეწოდა. საქართველოს ტერიტორიული ერთობის შეგნება არც მისი დასუსტების, ცალკე სამეფო-სამთავროებად დაშლის დროს გამჭარალა მთლიანად. ამ დროსაც საქართველოს განცალკევებული ნაწილები „საქართველოდ“ იწოდებოდა.

ქართველი ხალხის ეკონომიური ცხოვრების ერთობაც არ შექმნილა ერთბაშად. ჯერ კიდევ XII საუკუნის საქართველოში შრომის საზოგადოებრივი დანაწილების შედეგად სწრაფად ვითარდებოდა ეკონომიური ცხოვრება, კერძოდ, ხელოსნობა, საშინაო და საგარეო ვაჭრობა, ჩნდებოდა ახალი ქალაქები, ისახებოდა საშინაო ბაზარი და ასე იქმნებოდა პირობები ძველის წიაღში ახალ წარმოებით ურთიერთობათა ჩასახვა განვითარებისა და ეკონომიური ცხოვრების ერთობის შემდგომი გაძლიერებისათვის, რაც უმნიშვნელოვანესი ფაქტორი უნდა გამხდარიყო ერის ჩამოყალიბების დაწყებისათვის. მრავალრიცხოვან გარეშე მტერთა თავდასხმებმა ხელი შეუშალა ამ შესაძლებლობის სინამდვილედ გადაქცევას, დააბრკოლა ეკონომიური ცხოვრების ახლებური ერთობის შექმნა, მაგრამ ქართველი ხალხის ეკონომიური ცხოვრების ერთობა, მისი გამოცოცხლების ტენდენციები მთლიანად არასოდეს არ შეწყვეტილა.

ქართველი ხალხის ფსიქიკურ წყობასაც — ხასიათის ნიშნებს, ზნე-ჩვეულებებს, წარმოდგენებს, კულტურას — აგრეთვე ხანგრძლივი ისტორიული გზა აქვს გავლილი. მრავალმხრივი და მრავალფეროვანი იყო ყოველთვის ქართველი ხალხის კულტურა, მაგრამ მისი ძირითადი შინაარსი უკვე შუა საუკუნეთა ხანაში საერთო იყო ყველა ქართველისათვის, თუმცა ამ ერთიანობაში, ცხადია, ყოველთვის იგრძნობოდა სხვადასხვა კლასთა ანტაგონისტური ურთიერთდაპირისპირებულობაც. გამბედაობა და ვაჟაკობა, სიბრძნე და მოხერხებულობა, სიმკვირცხლე და სიხალისე, თავისუფლებისა და თავისიანთა სიყვარული, მტრის სიძულვილი და მოყვრის გამტანობა, გულუხვობა და სტუმართმოყვარეობა, გონებამახვილობა და ხატოვნება, — ხალხის ხასიათის ეს საუკეთესო ნიშნები ძველი დროიდანვე ცოტად თუ ბევრად ერთნაირად ფასდებოდა საქართველოს ყველა მხარეში, მიუხედავად გეოგრაფიული და ეთნოგრაფიული თავისებურებებისა, რომლებიც გარკვეულ გავლენას ახდენდნენ საქართველოს სხვადასხვა კუთხის მცხოვრებლებზე. ერთი ხალხის ორიგინალური სულისკვეთებითაა გამსჭვალული მრავალსაუკუნოვანი ქართული ლიტერატურა, ხელოვნება, საზოგადოებრივი აზროვნება, რომელსაც ასაზრდოებდა არა მარტო მშობლიური ნიადაგი, არამედ დაწინაურებულ ხალხთა საზოგადოებრივ-ეკონომიური და იდეურ-კულტურული მონაპოვრებიც.

ნათქვამიდან ცხადია, რომ ერის ნიშანდობლივ ელემენტებს კაპიტალიზმის ეპოქამდე დიდი ხნით ადრე თანდათანობით ქმნიდა ქართველი

ხალხის მრავალსაუკუნოვანი საზოგადოებრივი ცხოვრება, ადრევე დაიწყო ქართველთა ეროვნების ერთად ჩამოყალიბების პროცესი, მაგრამ გარეშე მტერთა გამანადგურებელ შემოსევათა გამო და ქვეყნის შიგნით ფეოდალური პარტიკულარიზმის გაბატონების შედეგად ვერ განვითარდნენ საზოგადოებრივი ძალები, რომლებიც შეძლებდნენ ამ პროცესის ბოლომდე მიყვანას დრომოქმულ წარმოებით ურთიერთობათა ლიკვიდაციისა და ახალ წარმოებით ურთიერთობათა დამკვიდრების გზით. ქართველთა ეროვნება წინაკაპიტალისტურ ხანაში ერთად ვერ გადაიქცა.

მაგრამ ისტორიული აუცილებლობის განხორციელება გარდაუვალი იყო: შუა საუკუნეთა ძნელბედობიდან გამოსულ საქართველოში ახალ დროში, არა უგვიანეს XVIII საუკუნის შუა ხანებისა, კვლავ თავი იჩინა ხუთასი წლის წინათ წარმოშობილმა საზოგადოებრივმა მოთხოვნილებამ — ფეოდალიზმის წიაღში ჩასახული ახალი წარმოებითი ურთიერთობის განვითარების და მისი შესაბამისი ეროვნული კონსოლიდაციის პროცესმა. იმ დროის საქართველოში ჯერ კიდევ სუსტად იგრძნობა ახალი საზოგადოებრივი წყობილების — კაპიტალიზმის — მაჯისცემა, მაგრამ მშინდელი ევროპის რიგ ქვეყნებში გამარჯვებული, ან არადა, გამარჯვების გზით მიმავალი ახალი საზოგადოებრივი ცხოვრება ნიშანსვეტი ხდება იმ არავეროპელი ხალხებისათვისაც, რომლებიც საუკუნეების განმავლობაში ცდილობდნენ საგარეო მტრებისა და საშინაო ფეოდალიზმის ხუნდებიდან განთავისუფლებას. ამ გარემოებამ განაპირობა ის, რომ ქართველი ხალხის ერთად ჩამოყალიბების ადრევე ჩასახული, მაგრამ შეფერხებული პროცესი XVIII საუკუნის მეორე ნახევრიდან კვლავ ახალი ძალით დაიწყო, რუსეთთან საქართველოს შეერთების შემდეგ, განსაკუთრებით XIX საუკუნის 30—40-იანი წლებიდან კიდევ უფრო გაძლიერდა, ხოლო 60—90-იან წლებში ქართველი ბურჟუაზიული ერის წარმოქმნით დაგვირგვინდა.

ქართველი ბურჟუაზიული ერი. ბატონყმობის მოსპობას და კაპიტალიზმის განვითარებას XIX საუკუნეში შედეგად მოჰყვა ქართველთა ეროვნების გადაქცევა ქართველ ბურჟუაზიულ ერთად. იმ დროისათვის ქართველები უკვე წარმოადგენდნენ ადამიანთა ისტორიულად ჩამოყალიბებულ მყარ ერთობას, წარმოქმნილს ენის, ტერიტორიის, ეკონომიური ცხოვრების და ფსიქიკური წყობის (კულტურის) ერთობის. ნიადაგზე¹. ქართველი ბურჟუაზიული ერის ეკონომიურ საფუძველს წარმოადგენდა ფეოდალიზმის რღვევის შედეგად წარმოშობილი კაპიტალისტური წარმოებითი ურთი-

1 ი. ბ. სტალინი, მარქსიზმი და ნაციონალური საკითხი, თბზ., ტ. 2, გვ. 318.

ერთობა, საბოლოო ანგარიშით მეურნეობის ძირითადად კაპიტალისტური სისტემა, ხოლო მის წამყვან ძალას — ჯერ ბურჟუაზიული დემოკრატია, შემდეგ კი დემოკრატიული ბურჟუაზია, რომელიც თანდათანობით, მაგრამ სულ უფრო და უფრო მძლავრად ეუფლებოდა ქვეყნის ეკონომიური ცხოვრების უმთავრეს ბერკეტებს, ადრე თავადაზნაურობას რომ ეპყრა ხელთ. შრომის საზოგადოებრივი დანაწილების შემდგომმა განვითარებამ, ახალი სამიმოსვლო გზების გაყვანამ, აღებმიცემობის გაფართოებამ და სავაჭრო ცენტრების ზრდამ განსაკუთრებით ბატონყმობის გაუქმების შემდეგ დიდად შეუწყო ხელი კაპიტალიზმის შედარებით სწრაფ განვითარებას, რამაც ბოლო მოუღო საქართველოს ცალკეული რაიონების ფეოდალურ კარჩაკეტილობას, ეკონომიურად დააკავშირა ისინი ერთმანეთთან, რუსეთთან და დასავლეთ ევროპასთან. ამ გარემოებამ გადაწყვეტი როლი შეასრულა მრავალსაუკუნოვანი ისტორიის მქონე ქართველთა ეროვნების ბურჟუაზიულ ერად კონსოლიდაციის საქმეში.

საქართველოს ეკონომიური ცხოვრების ერთობის საფუძველზე შეიქმნა მისი ნამდვილი ტერიტორიული ერთობა. გაადვილდა მიმოსვლა, მოისპო ცალკეულ კუთხეთა კარჩაკეტილობა, გაფართოვდა საქართველოს ტერიტორია ირან-თურქეთის წინააღმდეგ წარმოებულ ომებში რუსეთის არმიის გამარჯვებათა შედეგად ქართველთა ძველთაძველი მიწა-წყლის შემოერთების გზით, გაიზარდა მოსახლეობა. მშობლიური მიწა-წყალი, მისი ერთობა ერთ-ერთი ძირითადი საყრდენი იყო არსებითად ბურჟუაზიული, მაგრამ XIX საუკუნის მეორე ნახევარშიც ჯერ კიდევ უმთავრესად მიწისმუშა, მაღალგანვითარებული ვაჭრობა-მრეწველობის არმქონე ქართველი ერისათვის.

კაპიტალიზმის განვითარების საფუძველზე წარმოშობილმა ახალმა საზოგადოებრივ-ეკონომიურმა მოთხოვნილებებმა ახალი იერი მისცა მრავალსაუკუნოვანი ისტორიული ცხოვრებით განპირობებული ქართველი ხალხის სულიერ სახეს, მის ფსიქიკურ წყობას, ეროვნულ ხასიათს, კულტურას, ყოფა-ცხოვრებას. ადამიანის ღირსება საკუთრების მფლობელობის, მისი მოპოვებისათვის შრომისა და ბრძოლის წარმატების შედეგით იზომებოდა. მასობრივი ხდებოდა ხალხის ოცნება უკეთეს ცხოვრებაზე, საყოველთაო კეთილდღეობაზე, რომლის მიღწევის საშუალებად იმ დროს საქართველოს მოწინავე ადამიანებს მთელი ხალხის ეროვნული ერთობა ესახებოდათ. ეს მოვლენები მკაფიოდ აისახა XIX საუკუნის მეორე ნახევრის ქართულ კულტურაში — ლიტერატურაში, ხელოვნებაში, აზროვნებაში, — რომელიც თავისი ხანგრძლივი ისტორიის მანძილზე პირველად იქცა ქართველი ხალხის ეროვნული ერთობის ნამდვილ გამომხატველად.

და მაინც ქართველი ბურჟუაზიული ერის წარმოქმნას ყველაზე ნათ-

ლად გამოხატავდა ახალი ქართული საერთო-სახალხო ენის საბოლოო დამკვიდრება XIX საუკუნის მეორე ნახევარში. როგორც მაშინ ამბობდნენ, ენაა პირველი ნიშანი ერის ვინაობისა¹ და შემთხვევითი როდია, რომ ქართველი ხალხის ერად ჩამოყალიბების პროცესში ძველი ცხოვრების წინააღმდეგ ბრძოლა განახლებული ქართული ენის მთელი ხალხის საერთო ენად გადაქცევისათვის გადამწყვეტი ბრძოლით დაიწყო. შოთა რუსთაველის, სულხან-საბა ორბელიანის, დავით გურამიშვილის და ნიკოლოზ ბარათაშვილის ღირსეული მემკვიდრეების ილია ჭავჭავაძის, აკაკი წერეთლის და იაკობ გოგებაშვილის მეთაურობით აღდგენილ და დამკვიდრებულ იქნა ქართული სალიტერატურო ენის ბუნებრივი განვითარების ხაზი, რომელიც კინალამ გაწყდა XVIII—XIX საუკუნეთა მიჯნაზე.

ქართველი ერის შემადგენლობა. ქართველი ბურჟუაზიული ერი წარმოიქმნა როგორც ქართველური, ისე ნაწილობრივ არაქართველური წარმოშობის ეთნიკური ელემენტებისაგან, საუკუნეთა გრძელ მანძილზე, მათი ურთიერთკავშირის, საერთო ისტორიული ცხოვრების, შრომისა და ბრძოლის შედეგად. ქართველი ერის ძირითადი ბირთვი იყო ქართველთა ეროვნება ქართების (ქართლები, კახელები, იმერლები, მესხები, გურულები, აჭარლები, რაჭველები, ლეჩხუმელები, ფშავ-ხევსურები, მთიულ-მოხევეები, ინგილოები), მეგრელების და სვანების სახით, — რომელიც ოდითგანვე საქართველოს მოსახლეობის უდიდეს უმრავლესობას წარმოადგენდა. მაგრამ ქართველ ერში შევიდნენ აგრეთვე არაქართველური მოდემის ხალხთა მეტ-ნაკლებად მნიშვნელოვანი, თუმცა ცალკეული ჯგუფები, რომლებიც დიდი ხნის წინათ გადმოსახლდნენ საქართველოში, დაუკავშირდნენ ქართველი ეროვნების ისტორიულ-კულტურულ ცხოვრებას და ბევრი მათგანი კიდევაც გაქართველდა. ამის ერთ-ერთი მიზეზი ისიც იყო, რომ არაქართველური წარმოშობის ზოგი ეთნიკური ჯგუფის წარმომადგენლებს არ სჭერიათ ცოტად თუ ბევრად ვრცელი ნაწილი საქართველოს ტერიტორიისა და მთელ საქართველოში იყვნენ გაბნეულნი. მაგრამ საქართველოში ცხოვრობდნენ უმთავრესად არაქართველური წარმოშობის ადამიანთა ისეთი მნიშვნელოვანი ჯგუფებიც, რომლებიც მოსახლეობის კომპაქტურ უმრავლესობას წარმოადგენდნენ, ცოტად თუ ბევრად ვრცელ ტერიტორიაზე და დამოუკიდებელ ეროვნებებად ყა-

¹ ი. ჭავჭავაძე, წერილები ქართულ ლიტერატურაზე (პ. ინგოროყვას რედაქტორობით, თხზ., ტ. III, 1953, გვ. 206).

ლიბდებოდნენ (აფხაზები, ოსები) საქართველოში ერის წარმოქმნისა და კონსოლიდაციის პროცესში.

§ 2. ეროვნულ-განმათავისუფლებელი მოძრაობა

მეფის რუსეთის კოლონიური პოლიტიკა საქართველოში და ეროვნულ-განმათავისუფლებელი მოძრაობის დასაწყისი. საქართველოს ეკონომიური და საზოგადოებრივი აღორძინების, ქართველი ეროვნების ბურჟუაზიულ ერად გადაქცევის პროგრესულ-ისტორიული პროცესი განსაკუთრებით გაძლიერდა მაშინ, როცა საქართველო მეფის რუსეთის იმპერიის შემადგენელი ნაწილი გახდა. ამდენად რუსეთთან საქართველოს შეერთებას პროგრესული მნიშვნელობა ჰქონდა ქართველი ერის მაშინდელი და მომავალი განვითარებისათვის. მაგრამ მეფის რუსეთი, აღმოსავლეთ ევროპის ტიპური მრავალეროვანი სახელმწიფო, რომელსაც სათავეში ედგა ძლიერი და დარაზმული თავადაზნაურული სამხედრო ბიუროკრატია, წარმოადგენდა ხალხთა საპყრობილეს, სადაც გამეფებული იყო არარუს ხალხთა ჩაგვრის, შევიწროების და ძალდატანებითი ასიმილაციის კოლონიური პოლიტიკა. ასეთი იყო ცარიზმის ეროვნული პოლიტიკა საქართველოშიც.

მეფის თვითმპყრობელობამ XIX საუკუნის პირველ ნახევარში პოლიტიკურად დაიპყრო საქართველო, მოსპო მისი სახელმწიფოებრივი დამოუკიდებლობის ყველა ნიშანი და გადააქცია იგი რუსეთის იმპერიის ორ ჩვეულებრივ გუბერნიად. მაგრამ იმ დროს რუსეთის პოზიციები კავკასიაში ჯერ კიდევ არ იყო საბოლოოდ განმტკიცებული და ცარიზმი იძულებული ხდებოდა შედარებით ფრთხილად განეხორციელებინა კოლონიური პოლიტიკა¹. XIX საუკუნის მეორე ნახევრისათვის მეფის რუსეთმა დაამთავრა საქართველოს და კავკასიის პოლიტიკური დაპყრობა და შეუდგა მის ეკონომიურ დაპყრობას², რუსეთის კოლონიად მთელი კავკასიის მხარის და, კერძოდ, საქართველოს საბოლოოდ გადაქცევის მორიგი ამოცანის პრაქტიკულად განხორციელებას.

ეკონომიურ დარგში ცარიზმის კოლონიური პოლიტიკის მიზანი იყო საქართველოს გადაქცევა რუსეთის მრეწველობის უბრალო დანამატად,

¹ საქართველოს ისტორია, ტ. 11, 1962, გვ. 100—102.

² გ. ი. ლენინი, თხზ., ტ. 3, გვ. 703.

საქონლის გასაღების ბაზრად და ნედლეულის წყაროდ¹. ევროპის გან-
ვითარებულ კაპიტალისტურ ქვეყნებთან ტექნიკურ-ეკონომიურად შედარებით ჩამორჩენილი მეფის რუსეთი ამ მიზნის მიღწევას ცდილობდა უცხოელი კაპიტალისტების დახმარებითაც, რომლებიც ეპატრონებოდნენ საქართველოს ბუნებრივ სიმდიდრეებს და, ქართველი ხალხის ყაჩაღურ ძარცვას და ექსპლოატაციას ეწეოდნენ, ცარიზმი მასობრივად ასახლებდა საქართველოს მიწა-წყალზე უცხოურ კოლონიზატორულ ელემენტებს, რომლებსაც ეძლეოდათ საუკეთესო მიწები და რიგი პრივილეგიები ადგილობრივ მკვიდრთა შევიწროების ხარჯზე.

პოლიტიკურად დამორჩილებული საქართველო რომ ეკონომიურადაც მტკიცედ მიეჯაჭვა რუსეთის კაპიტალიზმთან და მისი ბუნებრივი სიმდიდრის ერთადერთ ბატონ-პატრონად უცხოური კაპიტალი გაეხადნა, მეფის მთავრობა ახორციელებდა არა მარტო ეკონომიურ, არამედ პოლიტიკურ ღონისძიებებსაც. ცარიზმი შეგნებულად აღვივებდა შუღლს ეროვნებათა შორის. პოლიტიკურ დარგში თვითმპყრობელობის კოლონიური პოლიტიკა ითვალისწინებდა ქართველი ხალხის უფლებების ყოველმხრივ შეზღუდვას როგორც მართვა-გამგეობის, ისე განათლების საქმეში. ცარიზმმა კულმოკვეცილი ერობაც არ აღირსა საქართველოს, სადაც ადგილობრივი მმართველობა და ადმინისტრაცია ბოლომდე დარჩა პოლიციური აპარატის ხელში. ქართველი ხალხი მოკლებული იყო მშობლიურ ენაზე საქმის წარმოებას სახელმწიფო დაწესებულებებში. ჯერ კიდევ 60-იანი წლებიდან მეფის მთავრობა ყოველმხრივ ავიწროებდა ქართულ ენას სკოლებში, 90-იან წლებში კი ქართულ ენაზე სწავლებასთან ერთად ქართულად ლაპარაკიც იკრძალებოდა. დევნას განიცდიდა ქართული პრესა, ქართული წიგნი, ქართული თეატრი, რომლებსაც ცარიზმის მოხელენი ბრალად დებდნენ „ეროვნული გრძნობების“ ვალვივებას. 1882 წელს ოფიციალურად აკრძალეს ქართველთა სამშობლოს სახელის „საქართველოს“ საჯაროდ ხსენება. ქართველი ხალხის იმთავითვე ძლიერმა ეროვნულ-კოლონიურმა ჩაგვრამ 80—90-იან წლებში უკიდურეს საზღვარს მიაღწია. დიდმპყრობელური ნაციონალიზმისა და შოვინიზმის ტალღა სრულ წალეკვას უქადდა „ინოროდცებს“. აღექსანდრე მესამის რეაქციული მთავრობა სრულიად აღარ ცნობდა საქართველოს და კავკასიის რაიმე თავისებურებას. იგი ამქარად დაადგა ქართველი ხალხის სრული ძალდატანებითი რუსიფიკაციისა და ქართული კულტურის საბოლოო მოსპობის გზას².

1 ა. კ. ვ. ი. ძ. ე., საქართველოს ისტორია (XIX საუკუნე), 1954, გვ. 214—216.

2 საქართველოს ისტორია, ტ. 11, დამხმარე სახელმძღვანელო ნ. ბ. ე. რ. ი. შ. ვ. ი. ლ. ის რედაქციით, 1962, გვ. 102—106.

თავისუფლების მოყვარე ქართველი ხალხი, რომელიც ნუღამ მადლიერი იყო „საკუთარი“ თვითმპყრობელების წინააღმდეგ მებრძოლი რუსი ხალხის უანგარო დახმარებისა, არასოდეს არ შერიგებია ეროვნულ-კოლონიური ჩაგვრისა და ძალადობის თვითმპყრობელურ პოლიტიკას. მართალია, ქართველი ხალხის ეროვნულ-განმათავისუფლებელი ბრძოლა ცარიზმის წინააღმდეგ მთელი ძლიერებით მხოლოდ მაშინ გაჩაღდა, როცა იგი რუსეთის მრავალეროვანი პროლეტარიატის კლასობრივი ბრძოლის ერთ-ერთ ნაკადად იქცა, მაგრამ ქართველმა ხალხმა ჯერ კიდევ XIX საუკუნის დასაწყისში აღიმალა ხმა თვითმპყრობელობის ეროვნულ-კოლონიური პოლიტიკის წინააღმდეგ.

საქართველოს ეროვნულ-განმათავისუფლებელ მოძრაობაში, ისევე როგორც რუსეთის, დასავლეთ ევროპის და საერთოდ ყველა მრავალეროვანი ქვეყნის ჩაგრულ ხალხთა მოძრაობაში, მეტ-ნაკლებად საზოგადოების ყველა კლასი, ყველა სოციალური ფენა მონაწილეობდა: გლეხობდა კონსერვატიული ქართველი თავადაზნაურობა, რომელმაც „ძველი დიდება“ დაკარგა, პროტესტს აცხადებდნენ თავადაზნაურობის ლიბერალური ფენები, რომლებსაც თავიანთ ჯერ კიდევ სუსტ ხმას უერთებდნენ ჩასახვის პროცესში მყოფი ლიბერალურ-ბურჟუაზიული ელემენტები, იბრძოდნენ სოციალური და ეროვნული ჩაგვრის ორმაგ უღელში მყოფი გლეხობის ფართო მასები. რა თქმა უნდა, ყველა ამ კლასს თუ ფენას, არსებითად, საკუთარი კლასობრივი ინტერესები ამოძრავებდა, მაგრამ ყოველ მათგანს ცარიზმის უხეში კოლონიური პოლიტიკის წინააღმდეგ ბრძოლაში საერთო-ეროვნული დროშა მიუჭლოდა.

კონსერვატორ მსხვილ ქართველ ფეოდალებსაც კი თავდაპირველად როდი ეამათ „მათი უდიდებულესობის“ — რუსეთის მეფისა და მემამულური ბიუროკრატის კონკურენცია ქართველი გლეხობის ექსპლოატაციის საქმეში და ცარიზმის წინააღმდეგ აჯანყებათა მოწყობა იწყეს, მაგრამ როგორც კი დარწმუნდნენ, რომ რუსეთის თვითმპყრობელობა ხელს უწყობდა მათ მშრომელთა უფრო „რაციონალურ“ ექსპლოატაციაში, ქართველმა კონსერვატორმა არისტოკრატებმა აჯანყებებს თავი დაანებეს, ცარიზმს თავდადებული სამსახურით დაუმტკიცეს ერთგულება და აღუთქვეს — დასავლეთ ევროპის ხალხთა რევოლუციური ბრძოლის ჩახშობაში დაგეხმარებითო. სწორედ ასე სწერდა რუსეთის იმპერატორს ნიკოლოზ პირველს კონსერვატიული ქართველი თავადაზნაურობა 1848 წელს: „ყოველი ჩვენგანი გრძნობს წმინდა სიყვარულს და თავდადებას ჩვენი რუსეთის თვითმპყრობელი მონარქიისადმი... გვსურს, რომ მოთხოვნილ იქნეს ჩვენი სამსახური გინდ ჩვენი ქვეყნის საზღვრებში, გინდ სახელმწიფო საზღვრებს გარეთაც, თუკი იმ უწყესობათ, რომელნიც აღელვებს დასავლეთ ევროპას, შეუძლია რაიმე საფრთხე მიაყენოს

იმ სახელმწიფოს კეთილდღეობას, რომელსაც პატივი აქვს საქართველოს ამჟამად ეკუთვნოდესო“¹.

ეს იყო ფეოდალურ-მონარქიული ქართული ნაციონალიზმი, რომლის მიმდევარი რეაქციონერი ფეოდალები რუსეთთან საქართველოს შეერთების შემდეგაც პრეტენზიას აცხადებდნენ ქართველი ხალხის მეურვეობა-მეთაურობაზე და ყოველგვარი საშუალებით, ჯერ ცარიზმთან ბრძოლის, მერე კი მასთან შეთანხმების და მის წინაშე მლიქვნელობის გზით ცდილობდნენ შეენარჩუნებინათ ქართველ გლეხობაზე განუყოფელი ბატონობის, მისი აღვირახსნილი ექსპლოატაციის უფლება. რუსეთის თვითმპყრობელობას არ გაუუქმებია, მხოლოდ შეზღუდა ქართველი ფეოდალების ეს უფლება, რა თქმა უნდა, იმ მიზნით, რომ ქართველი ხალხის ძარცვით უწინარეს ყოვლისა თვითონ ესარგებლა. ამან ერთგვარად შელახა ქართველ ფეოდალთა „ეროვნული“ ინტერესები. წინათ, საქართველოს ფეოდალური დაქსაქსულობის ხანაში, ქართველი ფეოდალი თვითონვე იყო თვითმპყრობელი თავის საბატონოში: დალა არ აკლდა და ბეგარა. ქვეყანას რომ მტერი შემოესეოდა და მეფე ქულზე კაცს მოითხოვდა, თავნება ქართველი ფეოდალი სამეფოს დასაცავად ან გამოვიდოდა ან არა, იმის მიხედვით, თუ როგორი ურთიერთობა ჰქონდა მას მეფესთან.

რუსეთის ძლიერი და ორგანიზებული თავადაზნაურული ბიუროკრატია, რომელსაც თვითმპყრობელი მეფე ედგა სათავეში, ვერ ითმენდა ასეთ თვითნებობას. თავის მხრივ, ცენტრალისტურ ხელისუფლებას მიუჩვეველი, თავნება ქართველი ფეოდალებიც უცებ ვერ შეურიგდნენ თავისი ძველი პრივილეგიების დაკარგვას და ჯერ მეფის რუსეთისაგან საქართველოს „განთავისუფლება“ მოინდომეს, რათა წინათ მათ მიერვე დარღვეული საქართველოს „დამოუკიდებლობა“ აღედგინათ და კვლავ თავთავის ციხე-სიმაგრეებში ჩამსხდარიყვნენ, მერე კი, როცა ეს შეუძლებელი აღმოჩნდა, ცარიზმს შეურიგდნენ და აქტიურად დაუჭირეს მხარი მის რუსიფიკატორულ პოლიტიკას საქართველოში. უფრო გვიან ფეოდალურ-მონარქიული ნაციონალიზმის დამცველმა ზოგმა რეაქციონერმა ქართველმა თავადმა ხალხის ეროვნული ინტერესების „დასაცავად“ მისი ძალდატანებითი ასიმილაციის თეორიულ დასაბუთებას მიჰყო ხელი: რაღა დროს პატარა ერების არსებობაა, ისინი დიდ ერებში უნდა გაითქვიფონ².

კონსერვატიული მსხვილი ფეოდალების გარდა, საქართველოს ეროვნულ-განმათავისუფლებელ მოძრაობაში თავიდანვე მონაწილეობდნენ

¹ პ. გ უ გ უ შ ვ ი ლ ი, ქართული ჟურნალისტიკა, 1941, იხ. დამატება. გვ. 10.

² Г. М у х р а н с к и й, О существе национальных единиц и об образовательном значении крупных народных единиц, 1872.

თავადაზნაურული წოდების სამუალო და წვრილი ფენები, რომელთა განათლებული წარმომადგენლები ლიბერალურად იყვნენ განწყობილნი. ისინი გრძნობდნენ რუსეთიდან და ევროპიდან მონაბერ ახალ სიოს, პროტესტს აცხადებდნენ ცარიზმის მიერ ქართველი ხალხის ეროვნული ჩაგვრის წინააღმდეგ, დასტიროდნენ დაკარგულ თავისუფლებას, მაგრამ არ ესმოდათ ხალხის რეალური სოციალური და ეროვნული ინტერესები და ხალხს მოწყვეტილნი, აჯანყებების მოწყობით რომ ვერას გახდნენ, ეროვნულ-კულტურული მოღვაწეობითა კმაყოფილდებოდნენ. ლიბერალური თავადაზნაურობის ცალკეულ განათლებულ წარმომადგენელთა პატრიოტული ოპოზიცია ცარიზმის წინააღმდეგ ყოველთვის იმდენად სუსტი და გაუბედავი იყო, რომ ვერ მალდებოდა ბატონყმობისა და მისი დამცველი მეფის თვითმპყრობელობის წინააღმდეგ საერთო-ეროვნული ბრძოლის ამოცანების გაგებაამდე. მიუხედავად ამისა, პირველ რიგში სწორედ თავად-აზნაურთა ამ წრეებიდან გამოვიდა XIX საუკუნის ახალი ქართული ინტელიგენციის ის ნაწილი, რომლის ეროვნულ-კულტურულმა მოღვაწეობამ ხელი შეუწყო ქართული ენის, ლიტერატურისა და აზროვნების აღორძინებას და განვითარებას.

ქართველი თავადაზნაურობის უმრავლესობა რომ საკუთარი „ძველი დიდების“ აღდგენაზე ოცნებობდა, კლასობრივი და ეროვნული ჩაგვრის ორმაგი ულლის სიმძიმით წელში გატეხილი ქართველი გლეხობა დიდი ვაივაგლახით ახერხებდა ელემენტარული საარსებო პირობების შენარჩუნებას. გლეხთა აჯანყებები ეროვნული და სოციალური თავისუფლებისათვის XIX საუკუნის მთელი პირველი ნახევრის განმავლობაში არ შეწყვეტილა, მაგრამ იმ დროს გლეხობის კლასობრივი შეგნების დონე მეტად დაბალი იყო, მათი გამოსვლებიც მოთმინებადაკარგულ ადამიანთა სტიქიური ჭანყის ფარგლებს არ გასცილებია.

ეროვნული და კლასობრივი ჩაგვრისა და ძალადობის პირობებში სიცოცხლეს ქართველი გლეხი მოძალადეთა წინააღმდეგ ბრძოლაში სიკვდილს ამჯობინებდა, მაგრამ მას ჯერ კიდევ ღრმად სწამდა ღვთაებრივი ჯვრის სიწმინდე, ხელმწიფის გულკეთილობა და ბატონყმობის მარადისობა. გლეხთა ფართო მასებს სჯეროდათ, რომ რუსეთის მეფის თვითმპყრობელობა გააუძეობესებდა მათს მღვდმარეობას, თუ გლეხობის თხოვნას „ხელმწიფის ყურამდე მიუშვებდნენ“. სტიქიური ხასიათისა იყო გლეხთა აჯანყებები XIX საუკუნის საქართველოს ეროვნულ-განმათავისუფლებელი მოძრაობის პირველ პერიოდში. და მაინც, სტიქიურობის მიუხედავად, მთელი XIX საუკუნის განმავლობაში უმთავრესად გლეხთა მოძრაობა იყო ძირითადი რეალური მასობრივი ძალა, ცარიზმის კოლონიურ პოლიტიკას რომ ეწინააღმდეგებოდა საქართველოში.

კოლონიური ჩაგვრის წინააღმდეგ თავიდანვე გამოდიოდა ქართველი

ინტელიგენციაც. თუ ქართველი გლეხობა ხელში პირველმობედერილი იარაღით ცდილობდა ექსპლოატაციის ორმაგი უღლის მოშორებას, ინტელიგენცია ბრძოლის იდეურ საშუალებებს აძლევდა უპირატესობას და უმთავრესად საგანმანათლებლო მოღვაწეობით კმაყოფილდებოდა. გლეხები მეფის „ცუდი“ ჩინოვნიკების გაუღეტით აპირებდნენ უსამართლობის მოსპობას, ინტელიგენტები უმთავრესად განათლების გავრცელებით ფიქრობდნენ სამართლიანობის აღდგენას. გლეხურ მოძრაობას მხოლოდ პროლეტარული მოძრაობის შემდეგ ჩამოშორდა სტიქიური ხასიათი, ინტელიგენციის ეროვნულ ბრძოლას ბოლომდე შერჩა ინტელიგენტური სულისკვეთება. ცხადია, მოწინავე ქართველი ინტელიგენციის იდეური მოძრაობა ქართველი ხალხის უმრავლესობის — გლეხობის სოციალური და ეროვნული (ანტიბატონყპური და პატრიოტული) ბრძოლის ანარეკლი და იდეოლოგიური გამოხატულება იყო. მაგრამ XIX საუკუნის საქართველოს ეროვნულ-განმათავისუფლებელი მოძრაობის თეორიულ-ინტელიგენტური და სტიქიურ-გლეხური ნაკადი არსებითად ერთმანეთისაგან მოწყვეტილი დარჩა და ინტელიგენტთა ეროვნული პროგრამა არ გადაქცეულა გლეხთა მასების ბრძოლის კონკრეტულ გეგმად¹.

XIX საუკუნის საქართველოს ეროვნულ-განმათავისუფლებელი მოძრაობის ზემოთ დახასიათებულმა საზოგადოებრივმა ძალებმა მეტ-ნაკლებად იჩინეს თავი ჯერ კიდევ იმ ეროვნულ მოძრაობაში, რომელიც 1832 წლის შეთქმულების სახელითაა ცნობილი.

ეს შეთქმულება ძირითადად ქართველი თავადაზნაურობის კონსერვატიული და ლიბერალური ფენების კლასობრივ მისწრაფებებს გამოხატავდა, მაგრამ იგი ეხმაურებოდა აგრეთვე ქართველი ხალხის, კერძოდ, გლეხობის სამართლიან ბრძოლასაც ძარცვა-გლეჯისა და ძალადობის თვითმპყრობელურ რეჟიმთან, რომელიც იმ ხანებში რუსეთისა და ევროპის ბალხთა ეანდარმის როლს ასრულებდა. ამიტომ იყო, რომ დამარცხების მიუხედავად შეთქმულების ძირითადმა მიზანმა — ცარიზმის წინააღმდეგ ბრძოლის გზით საქართველოს დამოუკიდებელი სახელმწიფოებრიობის აღორძინების პატრიოტულმა იდეამ ფართო გავრცელება პოვა ჯერ კიდევ საქართველოს ეროვნულ-განმათავისუფლებელი მოძრაობის პირველ, თავადაზნაურულ პერიოდში (1832—1860 წწ.). პროგრესული თავადაზნაურულ-ლიბერალური პატრიოტიზმის სულისკვეთებით იყო გამსჭვალული იოანე ბაგრატიონისა და ალექსანდრე ჭავჭავაძის, სოლომონ დოდაშვილისა და გრიგოლ ორბელიანის, გიორგი ერისთავისა და ნიკოლოზ ბარათაშვილის შემოქმედება და მსოფლმხედველობა.

ეროვნული თავისუფლების აბსტრაქტული მოთხოვნა თითქოს საკმა-

¹ მ. გაფრინდაშვილი, ნარკვევები ქართული საზოგადოებრივი აზროვნების ისტორიიდან, 1959, გვ. 41—46.

რისიც ჩანდა იმ დროს, როცა საზოგადოების მშრომელი უმრავლესობა — გლეხობა — ხან თავადაზნაურობას ეკედლებოდა და ცარიზმის მძიმე უღლის გადაგდებას მისი დახმარებით ლაშობდა, ხანაც მეფის კანონების იმედით ბატონყმური უღლის გადაგდებაზე ოცნებობდა¹.

საქმე არსებითად შეიცვალა მაშინ, როცა ამ ოცნების განუხორციელებლობა გამოძევდებოდა საქართველოს ეკონომიური და სოციალური განვითარების დაჩქარების და ცარიზმის კოლონიური პოლიტიკის გაძლიერების გამო. ეს მოხდა საქართველოს ეროვნულ-განმათავისუფლებელი მოძრაობის მეორე, ბურჟუაზიულ-დემოკრატიულ პერიოდში (1861—1898 წწ.), განსაკუთრებით ბურჟუაზიული რეფორმების მომზადებისა და გატარების წლებში, როცა ასპარეზზე ახალი საზოგადოებრივი ძალები გამოვიდნენ.

ეროვნულ-განმათავისუფლებელი მოძრაობის გაძლიერება. გასული საუკუნის 60-იანი წლები საქართველოში ახალ და ძველ თაობათა, არსებითად ლიბერალ-კონსერვატორთა და დემოკრატთა შეტაკებით დაიწყო. გარეგნულად კამათი ქართული ენისა და ლიტერატურის საკითხებზე მიმდინარეობდა, მაგრამ არსებითად ბრძოლის შინაარსი არა მარტო ლიტერატურულ-ეროვნული, არამედ სოციალურ-კლასობრივი ხასიათისაც იყო. თაობათა ბრძოლა ბატონყმობის მომხრე და მოწინააღმდეგე კლასობრივ ძალთა ურთიერთდაპირისპირებულობას გამოხატავდა. ბატონყმობის ვაჟქმების აუცილებლობა თვით მეფის მთავრობამ აღიარა და ქართველ თავადაზნაურობას არც უფლება ჰქონდა და არც საშუალება აშკარად გამოსულიყო ხელმწიფე-იმპერატორის „ნება-სურვილის“ წინააღმდეგ. ძველი თაობა, რომელიც ქართველი თავადაზნაურობის კონსერვატიული და ლიბერალური ფენების ინტერესებს იცავდა, უამისოდაც ადრიდანვე გრძნობდა ბატონყმობის გარდაქმნის თუ ვაჟქმების აუცილებლობას. 60-იან წლებში გააფთრებული კამათი ამის გამო ატყდა, თუ ვის სასარგებლოდ უნდა განხორციელებულიყო ეს ცვლილება — მიწისმფლობელი და უფლებამოსილი თავადაზნაურობის. თუ უმიწაწყლო და უუფლებო ხალხის სასარგებლოდ. კონსერვატორები და ლიბერალები თავადაზნაურობის მხარეზე დადგნენ, დემოკრატები — მთელი ხალხის, უწინარეს ყოვლისა, გლეხობის მხარეზე.

მაგრამ, თუ ეროვნულად, ჩაგრულ, კოლონიურ საქართველოში ძველსა წყობილების ახლით შეცვლისათვის მიმდინარე კლასობრივ-პოლიტიკური ბრძოლა ეროვნულ საბურჟუაზიო მოგვევლინა, — ეს ეროვნულ-განმათავისუფლებელი მოძრაობის გაძლიერებით და მეტბრძოლ ძალთა ორი ძირითადი თავისებურებით აიხსნება: ჯერ ერთი, დემოკრატებს, რომლებმაც

¹ საქართველოს ისტორია, ტ. 11, ნ. ბ ე რ ტ ე ნ ი შ ვ ი ლ ის რედაქციით, გვ. 112

ეს ბრძოლა წამოიწიეს, ქართველი ხალხის სოციალური განთავისუფლების წინაპირობად მისი ეროვნული განთავისუფლება მიაჩნდათ. მათი აზრით, ხალხის ჩაგვრის უმძიმესი და უმთავრესი ფორმა თვითმპყრობელურ-კოლონიური ეროვნული ჩაგვრა იყო და მისი მოსპობა გააადვილებდა ქართველი ხალხის ეკონომიური ცხოვრების დაფუძნებას სამართლიანობის პრინციპებზე. თითქოს ამას მოწმობდა ის, რომ XIX საუკუნის საქართველოში ყოველგვარი პროტესტი სოციალური უსამართლობის წინააღმდეგ, დაწყებული გლეხთა სტიქიური ამბოხებებით, გათავებული ინტელიგენციის კულტურული მოღვაწეობით, რუსეთის მეფის თვითმპყრობელობასთან ეროვნული ბრძოლის ფორმას ღებულობდა. მაგრამ რუსეთის თვითმპყრობელობა საქართველოში, ისევე როგორც მეფის რუსეთის მთელ იმპერიაში, არა მარტო რუსი კაპიტალისტის და მემამულის ინტერესებს იცავდა, არამედ ადგილობრივ ბატონყმურ ცხოვრებასაც მფარველობდა. ამიტომ, ვინც რუსეთის თვითმპყრობელობის წინააღმდეგ ხელს აღმართავდა, მას შოლტი უნდა მოექნია კოლონიურ ქვეყანაში ცარიზმის ბატონობის დასაყრდენის — ბატონყმობისა და კონსერვატიული თავადაზნაურობისთვისაც. ეროვნულ დემოკრატთა ცდა, გამოეყნოთ ქართველი ხალხის ეროვნული ინტერესები მისი სოციალური ინტერესებისაგან თითქმის ყოველთვის მარცხით მთავრდებოდა, მათი „წმინდა“ პატრიოტიზმი ობიექტურად კლასობრივი შინაარსით ივსებოდა და ბრძოლა ქართველი ერის თავისუფლებისათვის უერთდებოდა რუსეთის რევოლუციურ-განმათავისუფლებელ მოძრაობას ყმაგლეხობის განთავისუფლებისათვის¹.

მეორე მხრივ, ის, ვინც თავს ქართველი ხალხის ეროვნული ინტერესების, მისი თავისუფლებისა და დამოუკიდებლობის დამცველად აცხადებდა, ბუნებრივია, უწინარეს ყოვლისა ქართული ენის პატრიოტი უნდა გამხდარიყო, მით უმეტეს რომ იმ ისტორიული ეროვნული შინაარსიდან, რასაც წინათ ქართველობა ეწოდებოდა, XIX საუკუნისათვის დროთა ქართველს ყველაზე მეტად ქართული ენა გადაურჩა. ცარიზმის დროს აღრინდელი ქართული ეროვნული სახელმწიფოებრიობიდან მოგონებადა დარჩა და ქართველი ერის მოსარჩლე აღამიანთა უკანასკნელ თავშესაფარად ქართული ენა გადაიქცა. „პირველი... ნიშანი ერის ვინაობისა ენაა, — წერდა ილაა ჰავკავაძე, — და აი სწორედ პირველმა ამან აიდგა ფეხი ჩვენში, შემდეგ კარგახნის დუმილისა. ამასთან ჩვენს ცხოვრებას, ჩვენს აზრთა სვლას, ჩვენს ზრუნვას და ფიქრსა მთელის ბუნებითად რთულის ცხოვრების მოედნიდამ მცირე კუნჭულიდა ჰქონდა დათმობილი ჟამთა ვითარებისაგან. მარტო ამ კუნჭულში-ღა გახდა შესაძლებელი ჩვენი ცხოვრებისათვის მოღ-

¹ მ. გაფრინდაშვილი, გიორგი წერეთლის მსოფლმხედველობა, 1955, გვ. 26—31.

ვაწე კაცს თავი ეჩინა... ჩვენმა აზრთა სვლამ, მიმართულებამ, საქმიანობამ აქ შეაფარა თავი“¹.

ენა და მწერლობა ქართველ ლიბერალ-კონსერვატორთათვისაც ძირითადი სამოღვაწეო ასპარეზი და „დროთა უწყალო ხელით დანთქმული“ ძველი დიდების ნაშთი იყო, რამდენადაც ისინი, რუსეთის იმპერატორის სამსახურში დაღლილნი, ქართველი ხალხის ეროვნული გათვითცნობიერების საქმესაც ემსახურებოდნენ. მაგრამ ეროვნულ დემოკრატიათვის ენა იყო არა მარტო პირველი ნიშანი ერის ვინაობისა და გადარჩენილი ისტორიული ნაშთი ზოგჯერ ძლიერ დაწინაურებული ქართული სახელმწიფოებრიობისა, არამედ ხალხის განათლების და სოციალური ბრძოლის იარაღიც. რამდენიმე გულმოსული თავადის „შეთქმა“ მათ საკმარისად არ მიაჩნდათ ქართველი ხალხის ეროვნული განთავისუფლებისათვის. ხალხის ფართო მასებს თვითონვე უნდა ებრძოლათ და მოეპოვებინათ ეროვნული თავისუფლება. მაგრამ თვითმპყრობელებისა და ბატონყმობის როზგვეშ დაბეჩავებული, გაუნათლებელი ხალხი, გლეხობა ამას მხოლოდ ეროვნულ ენაზე განათლების მიღების საშუალებით თუ შეძლებდა. მაგრამ ხალხისათვის ძველი ქართული სამწერლო ენა, იოანე პეტრიწისა და ანტონ კათალიკოსის ენა, მიუწევდომელი და გაუგებარი იყო. საჭირო ხდებოდა ენის რეფორმა, სამწერლო ენის სასაუბრო ენასთან დაახლოების გზით ახალი ქართული სალიტერატურო ენის მრავალსაუკუნოვანი განვითარების მაგისტრალური ხაზის აღდგენა და დასრულება, ახალი ქართული ენის, ლიტერატურის და აზროვნების საბოლოო დამკვიდრება. ამ ისტორიული ამოცანის განხორციელება XIX საუკუნის მეორე ნახევარში საქართველოს ეროვნულ-განმათავისუფლებელი მოძრაობის უმთავრესი შედეგი იყო.

ეროვნული მოძრაობის გაფართოების მაჩვენებელი იყო ისიც, რომ ეროვნული საკითხი აგრარულ საკითხს დაუკავშირდა, თუმცა დემოკრატიულ მოძრაობას აგრარული საკითხის გლეხობის სასარგებლოდ გადაჭრისათვის ისე დიდი შედეგი როდი მოჰყვა, როგორც ახალი ენისა და აზროვნებისათვის გამართულ ბრძოლას. ეროვნულ საკითხში დამარცხებულ ლიბერალ-კონსერვატორებს შეეძლოთ გამარჯვება ეზეიმათ აგრარულ საკითხში: საგლეხო რეფორმა მეფის მემამულურმა მთავრობამ მისი კოლონიური პოლიტიკის დასაყრდენის კონსერვატიული და ლიბერალური ქართველი თავადაზნაურობის სასარგებლოდ, ხალხის უმრავლესობის, გლეხობის ინტერესების გაუთვალისწინებლად განახორციელა. მიწა მიწისმფლობელ მემამულეებს ან ფულისმქონე ვაჭრებს დარჩათ, იურიდიულად განთავისუფლებულ, მაგრამ უმიწაწყლო, უფულო, თუ მცირემიწიან სოციალურ ფენებს — მშრომელ გლეხებს, ხელოსნებს, წვრილ ვაჭრებს

და წერილ აზნაურებს—რეფორმის შემდეგ ეკონომიურ და პოლიტიკური ჩაგვრის წინანდელთან შედარებით ნაკლებად მძიმე პირობებში როდი უხდებოდათ ცხოვრება. ამიტომ იყო, რომ აგრარული მოძრაობა, რაც კოლონიურ საქართველოში ეროვნულ მოძრაობას უერთდებოდა, საგლებო რეფორმის შემდეგაც არ შეწყვეტილა.

თვითმპყრობელურ-მემამულური ფორმის მიუხედავად, ცარიზმის მიერ XIX საუკუნის მეორე ნახევარში განხორციელებული რეფორმები ბურჟუაზიული შინაარსისა იყო, რამდენადაც საბოლოო ანგარიშით ისინი ხელს უწყობდნენ ფეოდალიზმის თანდათანობითი ლიკვიდაციის საფუძველზე ახალი, კაპიტალისტური ურთიერთობის განვითარებას და გამარჯვებას. კონსერვატიული, მაგრამ ძალაუვნებურად გაბურჟუების გზაზე დამდგარი თავადაზნაურობა მხარს ვერ უსწორებდა ახალ მოთხოვნილებებს, თუმცა ცარიზმის დანმარებით გლეხობის გაძლიერებული ექსპლოატაციის გზით მაინც ახერხებდა ცოტად თუ ბევრად შეეგუებინა მეურნეობა ახალი ვითარებისათვის და ერთხანს შეენარჩუნებინა ეკონომიური ბატონობა. XIX საუკუნის მეორე ნახევარში განათლებული, ლიბერალური თავადაზნაურობის და ვაჭართა ფენებისაგან კლასად ყალიბდებოდა ეროვნული ბურჟუაზია¹, რომელიც თანდათანობით უპირისპირდებოდა არა მარტო ღარიბ ხალხს, არამედ მდიდარ თავადაზნაურობასა და უცხოურ ბურჟუაზიასაც. გაძლიერდა თვით მდაბიო ხალხის, პირველ რიგში, გლეხობის დაშლის პროცესი, რასაც შედეგად მოჰყვა სოფლისა და ქალაქის პროლეტარიატის წარმოშობა. გაღონიერდა და განმტკიცდა ქართული ლიბერალური და დემოკრატიული ინტელიგენცია. ყველა ისინი ყოველგვარი საშუალებით ცდილობდნენ თავიანთი კლასობრივი ეკონომიური და პოლიტიკური მდგომარეობის გაუმჯობესებას და ფეოდალიზმიდან კაპიტალიზმში გარდამავალი საქართველოს საზოგადოებრივი ცხოვრების მეთაურობისათვის იბრძოდნენ. კონსერვატიული თავადაზნაურობა კვლავაც ზემოდან მეფის მთავრობის და ქვემოდან გლეხობის იმედით აპირებდა ამის მიღწევას, პროგრესული თავადაზნაურულ-ბურჟუაზიული ფენები, ამასთან ერთად, სასოფლო-სამეურნეო და სამრეწველო ბანკების დაარსებით და საქალაქო თვითმმართველობათა დაპყრობით ფიქრობდნენ გაბატონებული მდგომარეობის განმტკიცებას, გლეხობის ნაწილი ვაჭრობით თუ კოოპერაციულ ამხანაგობათა შექმნით ოცნებობდა გაღონიერებას და, ოცნება რომ არ უსრულდებოდა, მოთმინებადაკარგული სტიქიურ აჯანყებებს აწყობდა. ინტელიგენცია ეროვნულ პრესას, სკოლას, თეატრს, წერა-კითხვის გამავრცელებელ საზოგადოებას ქმნიდა და ამით ცდილობდა საყოველთაო კეთილდღეობის მოახლოებას.

¹ საქართველოს ისტორია, ტ. II, ნ. ბ ე რ ძ ე ნ ი შ ვ ი ლ ი ს რედაქციით, გვ. 146—147.

არსებობისა და საზოგადოების მეთაურობისათვის ამ გააფთრებულ კლასობრივ ბრძოლაში, რომელიც ეროვნულ ფორმას ღებულობდა, ნათლად ჩანდა აღმავალი ბურჟუაზიული დემოკრატიის, მესამე წოდების (გლეხობის, ხელოსნების, წვრილი ვაჭრების, წვრილი აზნაურების, ეროვნული ბურჟუაზიის)¹ დაპირისპირებულობა ბატონყმობისა და მისი გადამონაშთებისადმი (მსხვილი მემამულური მიწათმფლობელობის, თვითმპყრობელური ხელისუფლების, კონსერვატიული თავადაზნაურობისადმი). მესამე წოდება ერთიანი და სოლიდარული იყო, რამდენადაც ბატონყმობა მეტ-ნაკლებად ერთნაირად ავიწროებდა ყველა მის წარმომადგენელს — ყმასაც, რომელსაც ფული დაეგროვებინა და სააპური ცხოვრება სურდა, ყაირათიან გლეხსაც, რომელსაც მემამულე სძულდა ღალისა და ბეგარისათვის, პროლეტარ-შინაყმას და გალატაკებულ გლეხსაც, რომელნიც მემამულის თუ ვაჭრის მონები იყვნენ. ბატონყმობისაგან იტანჯებოდა ვაჭარი მეწარმეც, მუშაც, შინაპრეწველიც, ხელოსანიც, ინტელიგენტიც. როგორც ლენინი ამბობდა, „ყველა ამ ადამიანთა შორის მხოლოდ ის კავშირი იყო, რომ ყველა ისინი მტრულად უყურებდნენ ბატონყმობას: ამ სოლიდარობის საზღვრებს იქით უმძაფრესი სამეურნეო ანტაგონიზმი იწყებოდა“².

კოლონიური საქართველოს მესამე წოდების სოლიდარობას ამას გარდა ის გარემოებაც ედო საფუძვლად, რომ რუსეთის მემამულურ-ბურჟუაზიული მონარქია მეტ-ნაკლებად საქართველოს ყველა კლასს, ყველა სოციალურ ფენას ავიწროებდა: პროგრესულ თავადაზნაურობასაც და ბურჟუაზიასაც, გლეხობასაც და ინტელიგენციასაც. ერთ ბანაკში ერთიანდებოდა ყველა, ვინც ვერ ურიგდებოდა ცარიზმის კოლონიურ პოლიტიკას და ჰოითხოვდა რუსი ხალხის დანმარებით საქართველოს ტერიტორიული მთლიანობის აღდგენას და დაცვას, მის ეკონომიურ აღორძინებას და პოლიტიკურ დემოკრატიზაციას, სხვა ხალხებთან ქართველი ხალხის ეროვნული თანასწორუფლებიანობის აღიარებას, ადგილობრივი საოლქო თვითმმართველობის მინიჭებას ქართველი ხალხისათვის, სახელმწიფო დაწესებულებებსა და სკოლებში ქართული ენის შემოღებას, ქართული კულტურის დაცვას და დაუბრკოლებელ განვითარებას. ეს იყო საქართველოს ეროვნულ-განმათავისუფლებელი მოძრაობის ძირითადი საპროგრამო მოთხოვნები XIX საუკუნის მეორე ნახევარში.

ამ პროგრამას უკვე აშკარად აღარ იზიარებდა კონსერვატიული ქართველი თავადაზნაურობა, რომელიც საბოლოოდ გადავიდა რუსეთის თვითმპყრობელობის მხარეზე. პროგრესული თავადაზნაურობა ჯერ კიდევ ასე თუ ისე მონაწილეობდა ეროვნულ-განმათავისუფლებელ მოძრაობაში,

¹ საქართველოს ისტორია, ტ. II, ნ. ბერძენიშვილის რედაქციით, გვ. 145.

² ვ. ი. ლენინი, თხზ., ტ. I, გვ. 349.

ოპოზიციურად იყო განწყობილი თვითმპყრობელობის სამოქალაქო და სასულიერო ბიუროკრატისადმი, მაგრამ მისი ოპოზიციურობა თვით 80-იანი წლების რეაქციის პერიოდში ინტელიგენტურ ლიბერალიზმს არ გაცდილებია. ფეოდალიზმის ნელი, თანდათანობითი ლიკვიდაციის გზით კაპიტალიზმის შედარებით მშვიდობიანი განვითარების პირობებში ლიბერალიზმი უცხო არ იყო თვით ჩაგრული მესამე წოდებისათვისაც კი, რომლის გლეხური დემოკრატიზმი რევოლუციური ბურჟუაზიის არარსებობის და პროლეტარული ფენების კლასობრივი ჩამოუყალიბებლობის გამო XX საუკუნის დამდეგამდე იდეურ-ლიტერატურულა ოცნების და სტიქიურ-ბუნებრივი ჯანყის ფარგლებში დარჩა. ოცნება და სინამდვილე, თეორია და პრაქტიკა სულ უფრო უახლოვდებოდნენ ერთმანეთს საზოგადოებრივი ცხოვრების განვითარების და ეროვნულ-კლასობრივი ბრძოლის გამწვავების შესაბამისად, განსაკუთრებით რუსეთის პირველი და მეორე რევოლუციური სიტუაციის პერიოდში, 1859 — 1861 და 1879 — 1881 წლებში, მაგრამ საქართველოს ეროვნულ და სოციალურ მოძრაობას XIX საუკუნის მეორე ნახევარშიც შერჩა უმთავრესად განმანათლებლური ხასიათი. განმანათლებლობამ კი საქართველოში, ისევე როგორც ყველგან, მხოლოდ ის შეძლო, რომ იდეურად მოამზადა ნიადაგი ფეოდალიზმის და მისი ნაშთების რევოლუციურ-დემოკრატიული გზით მოსპობისათვის.

§ 3. პროვულ-განმათავისუფლებელი მოძრაობის იდეური მიმდინარეობანი¹

XIX საუკუნის საქართველოს ეროვნულ-განმათავისუფლებელი მოძრაობა რუსეთის რევოლუციურ-დემოკრატიული მოძრაობის და მისი მეშვეობით იმდროინდელი მსოფლიო რევოლუციური პროცესის შემადგენელი ნაწილი იყო². ამ პროცესის ისეთი მნიშვნელოვანი მოვლენები, როგორიც იყო, მაგალითად, ბურჟუაზიული რევოლუცია საფრანგეთში, დეკაბრისტული და ნაროდნიკული მოძრაობა რუსეთში, ეროვნული აჯანყებანი პოლონეთში, უნგრეთში; იტალიაში, ევროპის, აზიის, აფრიკის და ამერიკის რიგ ქვეყნებში თავიდანვე პოულობდა გამოძახილს³, ხოლო მეცხრამეტე საუკუნის მეორე ნახევარში მნიშვნელოვან ზემოქმედებას ახდენდა საქართველოს ეროვნულ მოძრაობაზე, მიუხედავად იმისა რომ მის საფუძ-

¹ ამ პარაგრაფში ავტორმა სცადა განეზოგადებინა, მისი აზრით, ყველაზე სწორი და საბუთიანი მოსაზრებანი, რომელნიც გვხვდება საქართველოს ეროვნულ-განმათავისუფლებელი მოძრაობის იდეოლოგიის მდიდარ ისტორიოგრაფიაში XIX საუკუნიდან ჩვენს დრომდე, თუმცა პრობლემაზე არსებული მრავალი ნაშრომი ტერმინოლოგიით თუ შინაარსით ხშირად მნიშვნელოვნადაც განსხვავდება ერთმანეთისაგან.

² ნ. ნიკოლაძე, თხზ., ტ. 1, დ. გამეზარდაშვილის რედაქციით, 1962 წ. 259, 265.

³ ვ. დონაძე, ნიკო ნიკოლაძის ისტორიული შეხედულებანი, 1962.

ველს, უწინარეს ყოვლისა, ქართველი ხალხის საზოგადოებრივი ცხოვრების თავისებურებანი წარმოადგენდა.

მსოფლიო რევოლუციური მოძრაობის ძირითადი შინაარსი XVIII — XIX საუკუნეებში ფეოდალიზმიდან კაპიტალიზმზე გადასვლა იყო. მეტნაკლებად ამ შინაარსს გამოხატავდა იმდროინდელი იდეურ-პოლიტიკური მოძრაობაც მსოფლიოს ყველა ნაკლებად თუ მეტად განვითარებულ ქვეყანაში, რომელთა წინაშე ბურჟუაზიულ-დემოკრატიული გადატრიალების, უწინარეს ყოვლისა, იდეოლოგიური მომზადების ამოცანა ისახებოდა. ამ ამოცანის განხორციელება თითქმის ყველგან წილად ხვდა განმანათლებლობას, რომელიც, როგორც ცნობილია, მარქსიზმამდელ იდეურ მოძრაობათაგან წინამორბედ ჰუმანიზმთან და მომდევნო უტოპიურ სოციალიზმთან ერთად ახალი დროის ერთ-ერთი უდიდესი იდეური მოძრაობა იყო. ფეოდალიზმის წინააღმდეგ მიმართული ადრინდელი ბურჟუაზიული რევოლუციების ეპოქაში წარმოშობილმა განმანათლებლურმა მოძრაობამ XVIII—XIX საუკუნეებში ფართოდ იჩინა თავი ევროპის და ამერიკის ბევრ ქვეყანაში გერმანიიდან იტალიამდე და სკანდინავიამდე, ბურჟუაზიული ამერიკის შეერთებული შტატებიდან მეფის რუსეთის მემამულურ იმპერიამდე თუ იაპონიამდე. მაგრამ განმანათლებლობის კლასიკური ქვეყანა საფრანგეთი გახდა. XVIII საუკუნის მეორე ნახევრიდან XIX საუკუნის თითქმის უკანასკნელ მეოთხედამდე დიდი ფრანგი განმანათლებლები იყვნენ ფიქრთამპყრობელნი იმ ადამიანთა, რომელნიც გაბედულად გამოდიოდნენ ფეოდალიზმისა და მისი ნაშთების წინააღმდეგ საზოგადოებრივი ცხოვრების ყველა დარგში¹.

განმანათლებლობა მრავალფეროვანი და მრავალმხრივი, ენციკლოპედიური იდეური მოძრაობა იყო. მასში ყოველთვის შეიმჩნეოდა ზომიერლიბერალური, რადიკალურ-დემოკრატიული და თვით უტოპიურ-სოციალისტური მიმდინარეობანი, თუმცა მისი ზოგადი შინაარსი მეტნაკლებად ფეოდალიზმის წინააღმდეგ მებრძოლი მესამე წოდების, ბურჟუაზიული დემოკრატიის ინტერესებს გამოხატავდა. განმანათლებლობას ჰქონდა თავისი ფილოსოფიური და ეკონომიური მოძღვრება, პოლიტიკური და ესთეტიკური თეორია. განმანათლებლობის მხრებზე ამოიზარდა კლასიკური გერმანული ფილოსოფია, ინგლისური პოლიტიკური ეკონომია და ფრანგული სოციალიზმი, რომელთა კრიტიკული გადაამუშავებისა და შემოქმედებითი განვითარების საფუძველზე XIX საუკუნის 40-იანი წლების კაპიტალისტური დასავლეთ ევროპის შუაგულში—გერმანიაში—მეცნიერული სოციალიზმი წარმოიშვა. პროლეტარიატის მეცნიერულ-სოციალის-

¹ Всемирная история, в 10-ти томах, т. V, под. ред. Я. Зутиса (ответ. редактор), О. Вайнштейна, Н. Павленко, В. Семенова, 1958, зв. 420—421, 498, 514—515, 555—570, 582, 599, 632, 665.

ტური იდეოლოგია თავისი შინაარსით დასავლეთ ევროპის მოწინავე კაპიტალისტური ქვეყნების ეკონომიურ ცხოვრებაზე დაკვირვების და მის კლასობრივ წინააღმდეგობათა ანალიზის შედეგს წარმოადგენდა, მაგრამ „თავისი თეორიული ფორმის მიხედვით იგი თავდაპირველად გვეკვლინება როგორც XVIII საუკუნის დიდი ფრანგი განმანათლებლების მიერ წამოყენებული პრინციპების შემდგომი, თითქოს უფრო თანმიმდევარი განვითარება“¹.

იდეებს დიდ ადამიანებისას, რომლებსაც ყველაფრის საზომ ერთეულად მოაზროვნე გონება მიაჩნდათ და რომლებიც საფრანგეთში ადამიანთა შეგნებას ამზადებდნენ მოახლოებული რევოლუციისათვის. კიდევ უფრო დიდი როლი უნდა შეესრულებინა ეკონომიურად შედარებით ჩამორჩენილ იმ ქვეყნების იდეურ-პოლიტიკურ მოძრაობაში, სადაც ფეოდალიზმის წიაღში ჩასახულ კაპიტალისტურ ურთიერთობათა შინაგანი წინააღმდეგობანი XIX საუკუნეშიც ისევე მოუმწიფებელი და გამოუმუჯავნებული იყო, როგორც XVIII საუკუნის დასავლეთ ევროპის ქვეყნებში. მსგავს მატერიალურ პირობებს მსგავსი იდეურ-პოლიტიკური ამოცანები უნდა წარმოეშვა და, ბუნებრივია, რომ მთელი XIX საუკუნე საფრანგეთის დიდი ბურჟუაზიული რევოლუციისა და ფრანგული განმანათლებლური იდეების კვალდაკვალ მიდიოდა განსაკუთრებით ეკონომიურად სუსტად განვითარებულ ქვეყნებში.

განმანათლებლების, ლიბერალების და უტოპისტების იდეები დიდხანს ბატონობდა XIX საუკუნის იდეურ-პოლიტიკურ აზროვნებაში, განსაკუთრებით იმ ქვეყნებში, „სადაც ყველა საზოგადოებრივი საკითხი ბატონყმობისა და მისი ნაშთების წინააღმდეგ ბრძოლით განისაზღვრებოდა“².

ერთ-ერთი ასეთი ქვეყანა იყო რუსეთი, სადაც განმანათლებლობის ეპოქა დასავლეთ-ევროპის ქვეყნებთან შედარებით უფრო ხანგრძლივი, მაგრამ ამავე დროს უფრო ნაყოფიერი, დასავლეთის აზროვნების პრაქტიკულად შემოწმების შედეგად მიღებული გამოცდილებით გამდიდრებული, განვითარებული და წინწასული აღმოჩნდა, რაც იმით გამოიხატა, რომ ერთსა და იმავე დროს დემოკრატიზმისა და სოციალიზმისათვის მებრძოლი რუსული განმანათლებლური იდეურ-პოლიტიკური მოძრაობა განვითარების მაღალ საფეხურზე, XIX საუკუნის შუა წლებში უფრო ნათლად ამუჯავნებდა რეალიზმის, მატერიალიზმის, რევოლუციური დემოკრატიზმისა და უტოპიური სოციალიზმის განუყრელ კავშირს, თუმცა იგი იდეალიზმის და ლიბერალიზმისაგანაც სავსებით ვერ განთავისუფლდა და საერთოდ მაინც მარქსიზმამდელი იდეურ-პოლიტიკური მოძრაობის ჩარჩოებში დარჩა.

¹ კ. მარქსი და ფ. ენგელსი, რჩეული ნაწერები, ტ. II, 1964, გვ. 135.

² ვ. ი. ლენინი, თხზ., ტ. 2, გვ. 628.

XVIII საუკუნის დასავლეთ-ევროპელ განმანათლებელთა მსგავსად XIX საუკუნის რუსული რევოლუციური განმანათლებლობა „გამსჭვალულია მხურვალე მტრობით ბატონყმობისადმი და ყველა მისი გამოვლინებისადმი ეკონომიურ, სოციალურ და იურიდიულ დარგში. ეს „განმანათლებლის“ პირველი დამახასიათებელი თვისებაა. მეორე დამახასიათებელი თვისება, რაც საერთოა ყველა რუსი განმანათლებლისათვის — ეს არის მხურვალე დაცვა განათლებისა, თვითმმართველობისა, თავისუფლებისა, ცხოვრების ევროპული ფორმებისა და საერთოდ რუსეთის ყოველმხრივი ევროპეიზაციისა. ბოლოს, „განმანათლებლის“ მესამე დამახასიათებელი თვისებაა ხალხის მასების, უმთავრესად გლეხთა (რომელნიც ჯერ სავსებით განთავისუფლებულნი არ იყვნენ ანდა ის იყო თავისუფლებოდნენ განმანათლებლების ეპოქაში) ინტერესების დაცვა, იმის გულწრფელი რწმენა, რომ ბატონყმობის გაუქმებას და მისი ნაშთების მოსპობას საყოველთაო კეთილდღეობა მოჰყვებოდა, და გულწრფელი სურვილი ამისთვის ხელშეწყობისა... განმანათლებლები მოსახლეობის არც ერთ კლასს არ გამოჰყოფდნენ, როგორც თავიანთი განსაკუთრებული ყურადღების საგანს, ლაპარაკობდნენ არა მარტო ხალხზე საერთოდ, არამედ ერზეც კი საერთოდ“¹.

რუსმა რევოლუციონერმა ნაროდნიკებმა, რომლებიც განმანათლებლების მეშვეობით იყვნენ, სცადეს მთელი ერისაგან გლეხობის გამოყოფა და მისი განთავისუფლების გზით საყოველთაო კეთილდღეობის დამყარება უპირველეს ამოცანად გამოაცხადეს, მაგრამ მათ ვერ მიიმხრეს, ვერ აამხედრეს ჩამორჩენილი გლეხობა და დამარცხდნენ, ბოლოს, ნაროდნიკები იძულებული გახდნენ რადიკალური ბურჟუაზიული დემოკრატიის წარმომადგენლობა ეკისრათ და მთელი ხალხის განათლების და გაძლიერების საშუალებით საყოველთაო კეთილდღეობის დამყარების განმანათლებლურ-უტოპისტურ იდეალს დაბრუნებოდნენ.

რუსულ განმანათლებლურ, რევოლუციურ-დემოკრატიულ და უტოპიურ-სოციალისტურ იდეურ მოძრაობასთან და უმთავრესად მისი მეშვეობით დასავლეთ ევროპულ განმანათლებლობასთან, ლიბერალიზმთან და უტოპიურ სოციალიზმთან მჭიდრო კავშირში ვითარდებოდა რუსეთის იმპერიაში შემავალ ხალხთა, კერძოდ, ქართველი ხალხის ეროვნულ-განმათავისუფლებელი მოძრაობის განმანათლებლური იდეოლოგია.

ჩვენი ქვეყნის მატერიალური ცხოვრების პირობების ჩამორჩენილობა თავდაპირველად ვერ ქმნიდა სათანადო საფუძველს განმანათლებლური იდეების ფართოდ გავრცელებისათვის, თუმცა მსოფლიო ისტორიაში ცო-

¹ ვ. ი. ლენინი, თხზ., ტ. 2, გვ. 526—627, 656.



ნიკოლოზ ბარათაშვილი

მოკრატული იდეოლოგია იყო. საბოლოო ანგარიშით ასეთივე შინაარსს გამოხატავდა განმანათლებლობის ცალკეული იდეები, რომლებიც საქართველოში გავრცელებას იწყებს უკვე XVIII საუკუნის შუა წლებიდან. ასე რომ ქართული განმანათლებლობა, როგორც დრომოქმული ფეოდალური ცხოვრებიდან ახალზე გარდამავალი საქართველოს ეკონომიური და პოლიტიკური მდგომარეობის, ბატონყმობის კრიზისისა და კაპიტალიზმის ჩასახვის, ეროვნული და გლეხური მოძრაობის გაძლიერების, აგრეთვე მრავალსაუკუნოვანი ქართული ჰუმანიზმისა და ევროპა-რუსეთის განმათლებლური აზროვნების ქართულ ნიადაგზე ათვისების შედეგი, — ჯერ კიდევ XVIII საუკუნის მეორე ნახევარსა და XIX საუკუნის პირველ ნახევარში ჩაისახა. ეს იყო ადრინდელი ქართული განმანათლებლობა, რომელიც შეიცავდა რეაქციული თავადაზნაურობის ფეოდალურ-მონარქიული ნაციონალიზმის საწინააღმდეგო, თავადაზნაურობის პროგრესული ფენის ლიბერალური და მდაბიო ხალხის დემოკრატიული პატრიოტიზმის ცალკეულ ელემენტებს (არაიშვიათად კონსერვატიულ იდეებთან ერთად). ადრინდელი ქართული განმანათლებლობის საწყისი ეტაპის ყველაზე გამოჩენილი წარმომადგენლები იყვნენ: ვახუშტი ბაგრატიონი, ანტონ ბაგრატიონი, ალექსანდრე ამილახვარი და დავით გურამიშვილი, შუა ეტაპისა — იოანე ბაგრატიონი, დავით ბაგ-

ტა როდია მაგალითი, რომ ქვეყნის იდეოლოგიური განვითარება ავტომატურად არ მიჰყვება მის ეკონომიურ მდგომარეობას. სწორედ ეკონომიური და პოლიტიკური ძნელბედობა აიძულებდა ჯერ კიდევ XVIII საუკუნის მეორე ნახევრის ქართველ განმანათლებლებს თეორიულადაც ეძებნათ ქვეყნის აღდგომისა და გამოსხნის გზები, მით უფრო რომ ამგვარი ძიება მიმდინარეობდა მეზობელ რუსეთში, რომლის მაშინდელი საზოგადოებრივი აზროვნება, ეროვნულ თავისებურებათა მიუხედავად, განმანათლებლობის ფრანგული ნიმუშის მიხედვით ვითარდებოდა. ფრანგული განმანათლებლობა ანტი-ფეოდალური, ბურჟუაზიულ-დე-

რაციონი, და ალექსანდრე ჭავჭავაძე, ბოლო ეტაპისა — სოლომონ დოდაშვილი, ნიკოლოზ ბარათაშვილი, გრიგოლ ორბელიანი და დიმიტრი ყიფიანი. თავის მხრივ, ადრინდელი ქართული განმანათლებლობა მემკვიდრე იყო უწინარეს ყოვლისა მანამდელი ქართული ჰუმანისტური აზროვნებისა შოთა რუსთაველიდან და იოანე პეტრიწიდან არჩილ ბაგრატიონამდე და სულხან-საბა ორბელიანამდე. ადრინდელ ქართულ განმანათლებლობას აწმყოში სოციალ-ეკონომიური საფუძვლის უკმარისობას თითქოს წარსულის ჰუმანისტური ტრადიციების სიუხვე უნაზღაურებდა.



გიორგი ერისთავი

XIX საუკუნის 50—70-იან წლებში საქართველოს ეკონომიური, პოლიტიკური და სოციალური ცხოვრების გაშლის, კლასობრივი ბრძოლის გამწვავების და ეროვნულ-განმათავისუფლებელი მოძრაობის გაფართოების შედეგად დიდად განვითარდა განმანათლებლური იდეოლოგიის რევოლუციურ-დემოკრატიული ტენდენციები, რომლებიც უკვე აშკარად დაუპირისპირდნენ რეაქციული ცარიზმისა და ფეოდალური თუ გაბურჯუებული თავადაზნაურობის არა მარტო კონსერვატიულ, არამედ ლიბერალურ იდეოლოგიასაც. 60—70-იანი წლების საქართველოს ეროვნულ-რევოლუციური მოძრაობის განმანათლებლურ იდეოლოგიაში თანდათანობით ყალიბდება ჰუმანისტურ-დემოკრატიული, რადიკალურ-დემოკრატიული, ხალხოსნურ-დემოკრატიული იდეური მიმდინარეობანი (დასები). ეს იყო ქართული განმანათლებლობის კლასიკური პერიოდი, როცა საქართველოს ეროვნულ-განმათავისუფლებელი მოძრაობის იდეოლოგია ჯერ კიდევ არ იყო საბოლოოდ გათიშული და განმანათლებლობაში ჩასახული სამივე იდეური მიმდინარეობა ცოტად თუ ბევრად ერთიანი მესამე წოდების (გლეხობის, ხელოსნების, საშოვარზე გასული მუშების, წვრილი ვაჭრების, წვრილი ბურჟუაზიის და გადატაკებული აზნაურების) ინტერესებს გამოხატავდა. იმ დროს განმანათლებელთა არსებითად რევოლუციურ-დემოკრატიულ ეროვნულ და სოციალურ პროგრამაში, რომელიც დრომოჭმული ბატონყმობის მაგივრად მთელი ერის საყოველთაო კეთილდღეობაზე და-



ალექსანდრე კახკავიაძე.

ფუძნებული საზოგადოების და-
საარსებლად იყო ნავარაუდევო,
დემოკრატიზმისაგან გაუთიშავ
სოციალიზმთან ერთად არაიშვი-
ათად ლიბერალიზმიც იჩენდა
თავს და თვით ლიბერალებიც
დემოკრატებთან კავშირში ებრ-
ძოდნენ ცარიზმის რეაქციულ კო-
ლონიურ პოლიტიკას.

80—90-იან წლებში დგება ქარ-
თული განმანათლებლური იდე-
ურ-პოლიტიკური მოძრაობის ბო-
ლო, გვიანდელი პერიოდი, როცა
კაპიტალიზმის შედარებით სწრა-
ფი განვითარების და ახალ საზო-
გადოებრივ კლასთა წარმოშობის
პროცესის შემდგომი გაძლიერე-
ბის გამო ხდება იდეურ ძალთა
ხელახალი გადანაწილება. ლიბე-
რალები და ყოფილი ხალხოსნე-

ბი ჰუმანისტ და რადიკალ დემოკრატებს ეკედლებიან, მათ საპირისპიროდ
კი მესამედსაველი სოციალ-დემოკრატები გამოდიან ასპარეზზე. 90-იან
წლებში საქართველოს ეროვნულ-განმათავისუფლებელი მოძრაობის იდე-
ურ მიმდინარეობათა დაშლისა და კონსოლიდაციის ეს პროცესი ქართვე-
ლი ეროვნული ბურჟუაზიის და პროლეტარიატის პოლიტიკური პარტიე-
ბის შექმნით დამთავრდა XX საუკუნის დამდეგს, როცა ორგანიზაციულად
გაფორმდნენ სოციალ-ფედერალისტთა და სოციალ-დემოკრატთა პარტი-
ები. ეს მოვლენა იმის მაჩვენებელი იყო, რომ საქართველოში დაიწყო
ეროვნული და კლასობრივი ბრძოლის ახალი, პროლეტარული პერიოდი,
როცა საზოგადოების ბურჟუაზიულ-დემოკრატიული გარდაქმნა, ცარიზ-
მის დამხობა და ბატონყმობის ნაშთების სრული აღმოფხვრა სახალხო რე-
ვოლუციის გზით ინტელიგენტთა განყენებული ოცნებიდან მასების ცო-
ცხალი მოძრაობის უშუალო პრაქტიკული საკითხი გახდა.

განვითარებული კლასობრივი ბრძოლის ახალ პირობებში, როცა მე-
სამე წოდების ადრინდელი ერთიანობა საბოლოოდ დაირღვა და დემო-
კრატიზმი და სოციალიზმი გაათიშა, როცა ადრინდელი განმანათლებლუ-
რი რევოლუციური დემოკრატიზმი და გლეხური რადიკალიზმი უპირველეს
ყოვლისა რევოლუციური სოციალ-დემოკრატიზმით შეიცვალა, ქართული

განმანათლებლობის, ჰუმანისტურ და რადიკალურ მიმდინარეობათა პროგრამა ზომიერ, ლიბერალურ თვალსაზრისად გამოიყურებოდა, თუმცა კვლავაც ინარჩუნებდა დემოკრატიულ შინაარსს, რამდენადაც ცარიზმის წინააღმდეგ გამწვანებული ეროვნულ-განმათავისუფლებელი მოძრაობის იდეოლოგიას წარმოადგენდა.



გიორგი ორბელიანი.

ლიბერალურ-დემოკრატიული ეროვნული ბურჟუაზიის სოციალ-ფედერალისტურმა იდეოლოგიამ ქართული განმანათლებლობის ზომიერ-პროგრესული პრინციპები გააგრძელა. ქართული რეფორმისტული სოციალ-დემოკრატია (მენშევიზმი) არსებითად ამით დაკმაყოფილდა. რევოლუციური მუშათა კლასის და მისი მომხრე ყველა მშრომელის ინტერესების გამომხატველმა მარქსისტულ-სოციალისტურმა იდეოლოგიამ (ბოლშევიზმმა) განაწილდა, გააღრმავა.

მეცნიერულად დასაბუთა განმანათლებელთა მემკვიდრეობის საუკეთესო ტრადიციები და გადატრიალება მოახდინა საქართველოს იდეურ-პოლიტიკური მოძრაობის ისტორიაში. ამ მომენტამდე განმანათლებლურ იდეათა ევოლუცია დემოკრატიზმის რადიკალიზაციის, თანდათანობითი ზრდით გამოიხატებოდა. ჰუმანისტი დემოკრატები. რადიკალური დემოკრატები და ხალხოსანი დემოკრატები ერთმანეთისაგან მეტ-ნაკლები რადიკალიზაციით განიარჩეოდნენ და არა კლასობრივ სხვადასხვაობით. ყველაფერი, რაც რევოლუციური და დემოკრატიული გააჩნდათ XIX საუკუნის მეორე ნახევრის საქართველოს ეროვნულ-განმათავისუფლებელი მოძრაობის სამივე იდეური მიმდინარეობის (დასის) განმანათლებლებს, ობიექტურად მესამე წოდების, ბურჟუაზიული დემოკრატიის, ქალაქისა და სოფლის მშრომელ მესაკუთრეთა ინტერესებს გამოხატავდა თვითმპყრობელობის, ბატონყმობის და კაპიტალიზმის წინააღმდეგ ბრძოლაში.

ჰუმანისტურ-დემოკრატიული მიმდინარეობა. XIX საუკუნის მეორე ნახევრის საქართველოს ეროვნულ-განმათავისუფლებელი მოძრაობის პირველი იდეური მიმდინარეობა (პირველი დასი) საზოგადოებრივ ასპა-



დანიელ კონჯაძე.

რეზზე გამოჩნდა 1861 წელს; ქართული ენისა და ლიტერატურის საკითხებზე ძველ და ახალ თაობათა წარმომადგენლების შეტაკების დროს ეურნალ „ცისკრის“ ფურცლებზე. ეს იყო ქართველ განმანათლებელთა, ე. წ. თერგდალეულთა, ე. ი. რუსეთში განათლებამიღებული მოწინავე ქართველი ახალგაზრდობის ის ნაწილი, რომელმაც ფართოდ გააჩაღა იდეური ბრძოლა ბატონყმური და კოლონიური ჩაგვრის წინააღმდეგ. განაგრძო და განავითარა აღრინდელი ქართველი განმანათლებლებისა და ჰუმანისტების პატრიოტული და დემოკრატიული ტრადიციები. ამ მიმდინარეობის ლიტერატურული ორგანო იყო ეურნალი „საქართველოს მოამბე“

(1863 წ.), რომელმაც უშუალოდ გააგრძელა და განავითარა პატრიოტული და განმანათლებლური იდეები, რომლებიც ჯერ სოლომონ დოდაშვილის „სალიტერატურონი ნაწილნი ტფილისის უწყებათანში“ ჩაისახნენ და მერმე გიორგი ერისთავისა და ივანე კერესელიძის „ცისკარში“ უფრო ფართოდ იჩინეს თავი. 60-იანი წლების მეორე ნახევრიდან 70-იანი წლების მეორე ნახევრამდე პირველდასელები „დროება“, „კრებულსა“ და „ტიფლისსკი ვესტნიკში“ თანამშრომლობდნენ. 1877 წლიდან 1906 წლამდე ჰუმანისტურ-დემოკრატიული მიმდინარეობის ორგანო იყო გაზეთი „ივერია“, რომელიც საზოგადოებრივ გარდაქმნათა უფრო ზომიერ, მაგრამ არსებითად პატრიოტულ-დემოკრატიულ და ჰუმანისტურ-განმანათლებლურ პროგრამას იცავდა.

პირველდასელები ერისა და კაცობრიობის პატრიოტულ-ჰუმანისტური თვალსაზრისით უდგებოდნენ ყველა საზოგადოებრივ მოვლენას, ეწეოდნენ იდეურ-ლიტერატურულ ბრძოლას ეროვნული და სოციალური ჩაგვრის როგორც თვითმპყრობელურ-ფეოდალური, ისე კაპიტალისტური ფორმების წინააღმდეგ ქართველი ხალხის ეროვნული აღორძინებისა და გაერთიანებისათვის საქართველოს დამოუკიდებელი სახელმწიფოებრიობას აღდგენის და ძველი ქართული კულტურის ჯანსაღი ტრადიციების დემოკრატიულ საფუძველზე განვითარების გზით, მოითხოვდნენ საქართველოს

ეკონომიური ცხოვრების ყოველმხრივ განვითარებას, უწინარეს ყოვლისა სასოფლო-სამეურნეო წარმოების განვითარების საშუალებით. იღვწოდნენ ქართული კულტურის — ქართული ენის, ლიტერატურისა და აზროვნების — განახლებისა და აყვავებისათვის უმთავრესად კრიტიკული რეალიზმისა და მატერიალიზმის დამკვიდრების გზით.

პირველი დასის სოციალურ საფუძველს წარმოადგენდა ქართული სოფლის მოსახლეობა საერთოდ, წოდებათა განურჩევლად. უმთავრესად სოფლური წარმოშობის მესამე წოდება, მშრომელთა უმრავლესობის სახით რომ უპირისპირდებოდა ცარიზმს, კონსერვატიულ თავადაზნაურობას და უცხოურ ბურჟუაზიას. პირველდასელები აღიარებდნენ მრეწველობის განვითარების აუცილებლობას, მაგრამ მიიჩნდათ, რომ მეთაურობა სამრეწველო განვითარებაშიც მიწისმფლობელ ქართველ თავადაზნაურობას შეეძლო შეესრულებინა. ისინი საზიანოდ თვლიდნენ კლასთა ბრძოლას ქართველი ერისათვის და საქართველოს დამოუკიდებელი სახელმწიფოებრიობის აღდგენის იმედს რუსეთის სახელმწიფოს დემოკრატიზაციასა და რუს სალხთან ქართველი ხალხის სამარადისო თანასწორუფლებიან კავშირზე ამყარებდნენ. მათი იდეალი იყო ეროვნული და სოციალური ჩაგვრისაგან თავისუფალი, სამართლიანი საზოგადოება, სადაც ყველა იშრომებდა და თავის ნაშრომს პირად და საზოგადოებრივ კეთილდღეობას მოახმარდა. ისინი არ მოითხოვდნენ კერძო საკუთრებისა და კლასების დაუყოვნებლივ მოსპობას, თუმცა საყოველთაო ეროვნული სოციალიზმის მომხრედ გამოდიოდნენ და მთელი ერის სასარგებლოდ თვით თავადაზნაურულ დაწესებულებათა გამოყენების იმედიც ჰქონდათ. ასე ერწყმოდა ერთმანეთს ქართველ ჰუმანისტ დემოკრატთა პატრიოტულ-განმანათლებლურ მსოფლმხედველობაში აბსტრაქტული ჰუმანიზმი და რევოლუციური დემოკრატიზმი, კრიტიკულ-მატერიალისტური რეალიზმი და იდეალიზმი, უტოპიზმი და ლიბერალიზმი. პირველდასელთა ჰუმანისტური პროგრამა საქართველოს ეროვნულ-განმათავისუფლებელი მოძრაობის ბურჟუაზიულ-დემოკრატიულ ეტაპზე ობიექტურად ქვეყნის ბურჟუაზიულ-დემოკრატიული განვითარების მოთხოვნილებებს გამოხატავდა.

ჰუმანისტურ-დემოკრატიული პირველი დასის იდეურ მიმდინარეობას მეთაურობდა ილია ჭავჭავაძე, რომელთანაც მსოფლმხედველობრივად სხვა განმანათლებლებიდან ყველაზე ახლო იდგნენ აკაკი წერეთელი და აკობ გოგებაშვილი, უფრო გვიან ალექსანდრე ყაზბეგი და ვაჟა-ფშაველა.

ილია ჭავჭავაძე (1837—1907 წწ.). რეალისტ მწერალთა და განმანათლებელ მოაზროვნეთა შორის, რომელიც XIX საუკუნის მეორე ნახევრის საქართველომ წარმოშვა, უდიდესი იყო ილია ჭავჭავაძე, ეროვნულ-განმათავისუფლებელი მოძრაობის ყველაზე გამოჩენილი იდეური ხელმძღვანელი, ბატონყმობის წინააღმდეგ მგზნებარე მებრძოლი, საყოველთაო შრო-



ილია ჭავჭავაძე.

მასა, თავისუფლებასა და თანასწორობაზე მეოცნებე, რუსთაველისა და სულხან-საბას, გურამიშვილისა და ბარათაშვილის უპირველესი მემკვიდრე, ლესინგისა და გოეთეს, დიდროსა და რუსოს, ბელინსკისა და ჩერნიშევსკის უაღრესად თავისებური მოწაფე.

ილია ჭავჭავაძე კახეთში, სოფელ ყვარელში დაიბადა, თავადის ოჯახში. პირველდაწყებითი განათლება ყვარელშივე მიიღო, გლეხის ბავშვებთან ერთად. 1848 წელს იგი ჩამოიყვანეს თბილისში, სადაც ერთხანს კერძო პანსიონში, ხოლო 1852 წლიდან გიმნაზიაში სწავლობდა. 1857 წლიდან 1861 წლამდე ილია ჭავჭავაძე პეტერბურგის უნივერსიტეტის

იურიდიული ფაკულტეტის სტუდენტი იყო. მომავალი დიდი ქართველი პატრიოტის გულში ჭერ კიდევ სამშობლოში ყოფნის დროს ანთებული ცეცხლი რუსეთისა და დასავლეთის მოწინავე აზროვნების გაღრმავებულმა შესწავლამ ხანძრად გადააქცია. იქ დამთავრდა მისი ჰუმანისტურ-დემოკრატიული მსოფლმხედველობის ჩამოყალიბება, იქვე გარს შემოიკრიბა ილია ჭავჭავაძემ მოწინავე ქართველ სტუდენტთა ის ნაწილი, რომელმაც 1861—1863 წლებში იდეურ-ლიტერატურული ბრძოლა გააჩაღა კონსერვატიულ-ლიბერალური მიმდინარეობის წინააღმდეგ „ცისკარსა“ და „საქართველოს მოამბეში“.

1864—1873 წლებში ილია ჭავჭავაძე მომრიგებელ შუამავლად და მოსამართლედ მუშაობდა ქუთაისსა და დუშეთში. ამავე დროს იგი ღრმად ეცნობა ხალხის ცხოვრებას, კრებს ხალხური ზეპირსიტყვიერების მრავალრიცხოვან ნიმუშებს, ამთავრებს და აქვეყნებს ადრე დაწყებულ დიდ მხატვრულ ნაწარმოებებს „კრებულის“ ფურცლებზე, კვლავ თავს ესხმის კონსერვატორებს.

1873 წელს ილია ჭავჭავაძე თავს ანებებს სახელმწიფო სამსახურს და თბილისში ბრუნდება. 1875 წელს თავადაზნაურობა მას ირჩევს თბილისის საადგილმამულო ბანკის თავმჯდომარედ. 1877 წლიდან ილია ჭავჭავაძე აარსებს ჰუმანისტურ-დემოკრატიულ გაზეთს, „ივერიას“, აქტიურად

მონაწილეობს ეროვნულ-კულტურულ და ეკონომიურ დაწესებულებათა შექმნასა და საქმიანობაში (წერა-კითხვის გამავრცელებელი საზოგადოება, თეატრი, სახალხო სკოლები, ბანკი და სხვ.). ამ დროიდან ჰუმანისტ დემოკრატს მძაფრი კამათი აქვს საქართველოს ეროვნულ-განმათავისუფლებელი მოძრაობის საზოგადოებრივ-პოლიტიკური პროგრამის საკითხებზე ჯერ ლიბერალებთან და რადიკალ-დემოკრატებთან, მერე ხალხოსნებთან, თუმცა ამავე დროს მათთან ერთად იბრძვის თვითმპყრობელობის კოლონიური პოლიტიკის დამცველთა წინააღმდეგ (კატკოვი, იანოვსკი).

80-იან წლებში ილია ჭავჭავაძე ქმნის და აქვეყნებს შესანიშნავ მხატვრულ და პუბლიცისტურ ნაწარმოებებს, რომლებიც ცხოველმყოფელი ჰუმანიზმის, მხურვალე პატრიოტიზმის და ზომიერი დემოკრატიზმის სულითაა გამსჭვალული. ჰუმანისტურ-პატრიოტულ პროგრამას იცავდა იგი 90-იან წლებშიც, როცა გააფთრებულ პოლემიკას აწარმოებდა ხანდაზმულ რადიკალ-დემოკრატებთანაც და ახალგაზრდა სოციალ-დემოკრატებთანაც. ამავე პროგრამის დაცვას განაგრძობდა იგი პირველი რევოლუციის ქარიშხლიან წლებშიც, კერძოდ, რუსეთის სახელმწიფო სათათბირის წევრობის დროს, სანამ თვითმპყრობელობის აგენტები სიცოცხლეს გამოასალმებდნენ ერისა და კაცობრიობის თავისუფლებისათვის მებრძოლ დიდ ქართველ ჰუმანისტსა და განმანათლებელს¹.

ძველი და ახალი დროის ქართველ, რუს და დასავლეთ-ევროპელ მწერალთა და მოაზროვნეთა მოწინავე შეხედულებებზე აღზრდილი ილია ჭავჭავაძე მთელი ნახევარი საუკუნის მანძილზე ოცნებობდა მშობლიური ხალხის თავისუფლებაზე, ადამიანთა საყოველთაო კეთილდღეობაზე. იგი იყო და ბოლომდე დარჩა ხალხის ფართო მასების, მშრომელების ინტერესების გამომხატველ მებრძოლ განმანათლებლად, თავისი დროის დიდ დემოკრატად. უწინარეს ყოვლისა ილია ჭავჭავაძის სახელთანაა დაკავშირებული იდეური გადატრიალება, რომელიც XIX საუკუნის მეორე ნახევრის საქართველოს ეროვნულ-განმათავისუფლებელი მოძრაობის იდეოლოგიაში მოხდა. ილია ჭავჭავაძე იყო დიდი რევოლუციონერი, რომელმაც სხვა განმანათლებლებთან ერთად გაანათლა, იდეურად მოამზადა ხალხი მოახლოებული დემოკრატიული რევოლუციისათვის². მაგრამ ილია ჭავჭავაძე იყო მწერალი-განმანათლებელი, რომელიც პროგრესული, ეროვნულ-რევოლუციური და ჰუმანისტურ-დემოკრატიული იდეების პროპაგანდას ეწეოდა და არა ორგანიზაციულად და პოლიტიკურად უკვე ჩამოყალიბებული რევოლუციური პარტიის ხელმძღვანელი, რომელიც აჯანყე-

¹ პ. ი. ნ. გ. ო. რ. ო. ყ. ვ. ა., ილია ჭავჭავაძე, 1957, გვ. 5, 69, 82—83, .113, 171; იხ. აგრეთვე, გ. ყ. ი. ფ. შ. ი. ძ. ე., ილია ჭავჭავაძე, 1914.

² პ. რ. ა. ტ. ი. ა. ნ. ი., ილია ჭავჭავაძე, 1965, გვ. 436; ა. თ. ა. ვ. ა. ძ. ე., ილია ჭავჭავაძის ფილოსოფიური და ესთეტიკური შეხედულებანი, 1954, გვ. 21—105.

ბისაკენ მოუწოდებდა და პრაქტიკულად უხელმძღვანელებდა აჯანყებულ ხალხს. განმანათლებელთა მთავარი საბრძოლო იარაღი სიტყვა და აზრი იყო და არა ნაჯახი და ხმალი, თუმცა, როგორც ლენინი ამბობდა, სიტყვა აგრეთვე საქმეა იმ ეპოქაში, როდესაც არ არის მასების აშკარა პოლიტიკური გამოსვლა. ამითაც აიხსნება, რომ ილია ჭავჭავაძის მსოფლმხედველობას ახასიათებს მერყეობა ლიბერალიზმსა და დემოკრატიზმს შორის, თუმცა მისი შემოქმედებიდან კლასობრივი ბრძოლის სიო ქრის და მასში საბოლოოდ დემოკრატი იმარჯვებს ლიბერალზე, მატერიალისტი იდეალისტზე.

ილია ჭავჭავაძის შემოქმედებაში მოცემულია ბატონყმობისა და ზოგადად ყოველგვარი უსამართლო წყობილების რევოლუციურ-დემოკრატიული კრიტიკა, ნაჩვენებია მისი გაუქმებისა თუ დამხობის გარდუვალობა. ამით ილია ჭავჭავაძე ობიექტურად წინამძღოლობდა და ზრდიდა რევოლუციურ ხალხს, რევოლუციურ „კლასს“, რომელმაც პირველად მთელი ძალით თავი იჩინა 1905 წლის რევოლუციის ეპოქაში. სუბიექტურადაც იგი წინააღმდეგი როდი იყო რევოლუციისა, როგორც სამართლიანობის აღდგენის, თავისუფლების მოპოვების უკიდურესი საშუალებისა, ხოლო მჩავერდელთა და ჩაგრულთა ბრძოლის ფაქტები თვითონვე ასახა თავის ნაწარმოებებში¹. მაგრამ ეკონომიურად ჩამორჩენილი და პოლიტიკურად კოლონიურ მდგომარეობაში მყოფი საქართველოს პირობებში დიდ განმანათლებელს თეორიულად არც თუ სასურველად, მაგრამ პრაქტიკულად გარდუვალად ეჩვენებოდა საზოგადოებრივი ცხოვრების ნელი, თანდათანობითი გარდაქმნის მშვიდობიანი გზა².

პრაქტიკულ-პოლიტიკურად ზომიერი თვალსაზრისი დიდად როდი უშლიდა ხელს ქართველ ჰუმანისტსა და განმანათლებელს ეოცნება მთელი ერის, მთელი კაცობრიობის კეთილდღეობაზე, იმ სამართლიან საზოგადოებაზე, რომელშიც განხორციელდებოდა მშრომელთა „ძმობის, ერთობის, თავისუფლების და თანასწორობის“ დიადი ლოზუნგი. ამაზე ოცნებობდა ჭაბუკი ილია ჭავჭავაძე ჯერ კიდევ 60-იან წლებში, როცა იგი ბატონყმობის მოსპობას, „ტყვედპყრობილი შრომის ახსნას“ და „შრომის სუფევას“³ თვლიდა ყველას შრომასა და საკუთრებაზე დამყარებული სამართლიანი საზოგადოების საფუძვლად და ამით გამოხატავდა ქართველი ხალხის მოწინავე ძალების, მშრომელი ხალხის რევოლუციურ-დემოკრა-

¹ ი. ჭავჭავაძე, აჩრდილი, კაკო ყაჩაღი (თხზ. სრ. კრებული, -პ. ი ნ გ ო რ ო ყ-ვ ა ს რედაქციით, ტ. 1, გვ. 9); მგზავრის წერილები (ტ. II, 1950, გვ. 11).

² იქვე, ცხოვრება და კანონი (ტ. VI, გვ. 9—10); ოთარანთ ქვრივი (ტ. II., გვ. 258, 319—320).

³ იქვე, აჩრდილი (ტ. I, გვ. 25); იხ. აგრეთვე, პ. რ ა ტ ი ა ნ ი, ილია ჭავჭავაძე-1965, გვ. 153—160.

ტიულ, არსებითად ბურჟუაზიულ-დემოკრატიულ მისწრაფებებს და სოციალისტურ ოცნებებს. ამაზე ოცნებობდა XX საუკუნის კარიბჭესთან მდგარი მოხუცი ილია ჭავჭავაძე, რომელიც თითქოს რწმუნდებოდა, რომ მომავლის იდეალური საზოგადოება იქნებოდა სოციალიზმი, ე. ი. „გაუქმება ქონებისა და შემოსავლის მეტნაკლებად განაწილებისა ადამიანთა შორის, გაუქმება ყოვლის კლასობრივის ბატონობისა და, შეძლებისამებრ, ყოვლის კლასობრივის სხვადასხვაობისა, ფეხზე წამოყენება და ხელშეწყობა გამრჩელ და მშრომელ კლასებისა წარსამატებლად“¹.

ასე ერწყმოდა ერთმანეთს ილია ჭავჭავაძის მსოფლმხედველობაში ბურჟუაზიული ერის ფართო მასების, სოფლის მესამე წოდების ინტერესთა გამომხატველი რევოლუციურ-დემოკრატიული მისწრაფებანი და ლიბერალურ-უტოპიურ-სოციალისტური ოცნებანი. მაგრამ მისი შემოქმედების და მსოფლმხედველობის მთავარი საკითხი მაინც ეროვნული საკითხია. რა პრობლემასაც არ უნდა შეხებოდა ილია ჭავჭავაძის მძლავრი გონება, მას მუდამ თვალწინ ედგა ცარიზმის კოლონიური ჩაგვრის უღელქვეშ მყოფი ქართველი ხალხი და მისი კეთილდღეობისათვის ბრძოლას ყველაფერზე შალა აყენებდა. დიდი ჰუმანისტი და დემოკრატი უწინარეს ყოვლისა თავისი დროის საქართველოს ეროვნულ-განმათავისუფლებელი მოძრაობის იდეოლოგი იყო. იგი, როგორც თვითონ ამბობს, „სიყრმიდანვე აიყოლია ქართლის ბედმა“ და მის ძიებას შეაღია მთელი ცხოვრება. ქართლის ბედს ეძებდა ილია ჭავჭავაძე პეტერბურგის უნივერსიტეტში სწავლის დროს და ამბობდა: „მარად და ყველგან, საქართველოვ, მე ვარ შენთანა, მე ვარო შენი თანამდები, უკვდავი სული, შენთა შვილთ სისხლით გული სრულად გარდამებანა, ამ გულში მე მაქვს შენი აწმყო, შენი წარსული“². ქართლის ბედს ეძებდა ილია ჭავჭავაძე ქართულ ენაში და ჯერ კიდევ 60-იანი წლების გარიჟრაჟზე გააჩალა ბრძოლა ენისა და ერისათვის ქართველი ხალხის სახელით. მთელი ერის სახელით გამოაცხადა მან ეპოქალური ლოზუნგი—„ჩვენი თავი ჩვენადვე გვეყუდნესო“, რომელიც აგრეთვე მესამე წოდების, ერის მშრომელი უმრავლესობის, ეროვნული დემოკრატიის ინტერესებს გამოხატავდა³.

ილია ჭავჭავაძე უწინარეს ყოვლისა მწერალ-შემოქმედი იყო, მისი „ქართველის დედა“ და „გუთნის დედა“, „კომუნის დაცემის დღე“ და

¹ ი. ჭავჭავაძე, ტ. I, გვ. 8.

² იქვე, აჩრდილი (ტ. I, გვ. 12), იხ. აგრეთვე, ვაჟა-ფშაველა, ყვავ-ყორნები ილიას აჩრდილის გარშემო (თბზ. სრ. კრებული, 5, გვ. 241; გ. ჭიბლაძე, ილია ჭავჭავაძე, 1966, გვ. 700, 712—713, 720, 727.

³ იქვე, მგზავრის წერილები (ტ. II, გვ. 28—30). იხ. აგრეთვე პ. რატიანი, ილია ჭავჭავაძე, 1965, გვ. 98—99, 476; ცარიზმის კოლონიური პოლიტიკის გაძლიერება (საქართველოს ისტორია, ტ. II, გვ. 112).

„ბაზალეთის ტბა“, „აჩრდილი“ და „მგზავრის წერილები“, „კაკო ყაჩაღი“ და „კაცია-ადამიანი“, „გლახის ნაამბობი“, „ოთარაანთ ქვრივი“ და „განდეგილი“, „საქართველოს მოამბეზუდ“ და „ზოგიერთი რამ“, „შინაური მიმოხილვანი“ და „ბ-ნ იანოვსკის წერილის გამო“, „კერძო და სათემო მიწათმფლობელობა“, „ცხოვრება და კანონი“, „აი ისტორია“, „რა გითხრათ, რით გაგახაროთ“, „მეცხრამეტე საუკუნე“ — დემოკრატიზმის, პატრიოტიზმის, ჰუმანიზმის სულსკვეთებით ზრდიდა ქართველი ხალხის მრავალთაობას, უნერგავდა ხალხს თავისუფლების, თანასწორუფლებიანობისა და სამართლიანობის იდეალებს. მისი შემოქმედების ძირითადი მოტივებია ხალხის ეროვნული ბრძოლა ცარიზმის წინააღმდეგ და მშრომელთა ბრძოლა ბატონყმური მონობის წინააღმდეგ. მის სახელთანაა დაკავშირებული ლიტერატურისა და ხელოვნების რეალისტური თეორიის მწყობრ სისტემად ჩამოყალიბება, დაცვა, განვითარება და დამკვიდრება საქართველოში.

ილია ჭავჭავაძე XIX საუკუნის საქართველოს უდიდესი მოაზროვნე იყო. მისი ესთეტიკური, ეთიკური და საზოგადოებრივ-პოლიტიკური შეხედულებანი ღრმა-ფილოსოფიურ იდეებს ემყარება, თუმცა მისი მრავალმხრივი შემოქმედება არ შემოიფარგლებოდა საკუთრივ ფილოსოფიის წმინდა თეორიული სფეროთი. ილია ჭავჭავაძის ფილოსოფია არის ძველი და ახალი დროის მოწინავე ესთეტიკურ-ფილოსოფიური, პოლიტიკურ-ეკონომიკური და საბუნებისმეტყველო-მეცნიერული აზროვნების მიღწევათა განზოგადება და გამოყენება XIX საუკუნის მეორე ნახევრის საქართველოს ეროვნულ-განმათავისუფლებელი მოძრაობის ამოცანების შესაბამისად. მის პუბლიცისტურ და მხატვრულ შემოქმედებაში მოცემულია ბუნებისა და საზოგადოების არაერთი მოვლენის მეცნიერულ-მატერიალისტური ახსნა და დასაბუთებულია განვითარების დიალექტიკური გაგების ბევრი მნიშვნელოვანი მომენტი. მაგრამ მისი ფილოსოფიურ-სოციოლოგიური მსოფლმხედველობისათვის უცხო არ იყო იდეალიზმიც, რაც განსაკუთრებით ნათლად იჩენდა ხოლმე თავს ილია ჭავჭავაძის ეთიკისა და რელიგიის ფილოსოფიაში, კლასობრივი ბრძოლის გაგებასა და შეფასებაში. ეროვნულ-განმათავისუფლებელი მოძრაობის ძალთა გაერთიანების, ადამიანთა საყოველთაო სიყვარულისა და ერთობის, თავისუფალ მიწაზე თავისუფალი შრომის დამკვიდრების, განათლების საშუალებით ბოროტების დაძლევის და სიკეთის გამარჯვების, ადამიანის ღმერთამდე ამაღლების და ღმერთის მიწაზე ჩამოყვანის გზით ღვთაებრივად სრულქმნილი ადამიანის, კაცური კაცის ჩამოყალიბების იდეალთა ფილოსოფიური დასაბუთების აუცილებლობა არაიშვიათად აბსტრაქტული, ზე-

კლასობრივი, უტოპისტური ჰუმანიზმის ბურჟუაზიაში ხვევდა ქართველი ხალხის ამ დიდი განმანათლებლის დემოკრატიულ მსოფლმხედველობას¹.

აკაკი წერეთელი (1840—1915 წწ.). დიდი ჰუმანისტი და დემოკრატი იყო საქართველოს ეროვნულ-განმათავისუფლებელი მოძრაობის მეორე იდეური წინამძღოლი, უნიჭიერესი პოეტი და განმანათლებელი მოაზროვნე აკაკი როსტომის ძე წერეთელი.

აკაკი წერეთელი იმერეთში, სოფელ სხვიტორში დაიბადა, თავადის ოჯახში. მომავალი დიდი პოეტი ექვს წლამდე გლეხის შვილებთან ერთად იზრდებოდა. შემდეგში იგი ამაყად ივონებდა, „თუ კი რამ დარჩა ჩემში კარგი და კეთილი, უფრო იმის წყალობით, რომ მე სოფელში ვიყავი გაბარებული და გლეხების შვილებთან ერთად ვიზრდებოდი“.

1850 წელს აკაკი ქუთაისის გიმნაზიაში მიაბარეს. ატესტატის მაგივრად ამ დესპოტური სასწავლებლიდან პოეტს ცარიზმის სიძულვილი და ჩაგრულთა სიყვარული გამოჰყვა. 1859—1862 წლებში აკაკი წერეთელი პეტერბურგის უნივერსიტეტის აღმოსავლური ენების ფაკულტეტზე სწავლობდა. არც აქედან მიუღია მას დიპლომი, სამაგიეროდ ყრმობიდანვე შესისხლხორცებული პატრიოტული იდეები მწყობრ ჰუმანისტურ-დემოკრატიულ მსოფლმხედველობად აქცია და ჯერ კიდევ სტუდენტობის წლებში შეებრძოლა კონსერვატიულ და ლიბერალურ ცრუპატრიოტიზმს, ცარიზმს და ფეოდალიზმს. „აღსდევ, სამშობლოვ!“ — მოუწოდებდა აკაკი წერეთელი ჯერ კიდევ 1859 წელს, ხოლო 1862 წელს კონსერვატორებთან დემოკრატების შეტაკების დროს, მან განმარტა, რომ სამშობლოს ცნებაში იგულისხმებოდა არა ძველი და ახალი ქართველი თავადაზნაურობა, „საქართველოს ეს ფუჭნი ძენი“, არამედ გლეხკაცობა, „სულითა და გულით ქართველი გლეხი-კაცი“. სრულქმნილი ადამიანი, „კაცად-კაცი“ განურჩევლად წოდებისა იყო მისი სანუკვარი იდეალი თითქმის მთელი სამოცი წლის მოღვაწეობის მანძილზე².

1862 წელს რუსეთიდან სამშობლოში დაბრუნებული აკაკი წერეთელი ფორმალურად არც ერთ იდეურ დაჯგუფებას არ მიჰკედლებია, მწერლობა პროფესიად გაიხადა და ბოლომდე ქართველი ერის „დაბალი წოდების“ დამცველად გამოდიოდა ცარიზმის; ფეოდალიზმის და კაპიტალიზმის წინააღმდეგ გაჩაღებულ იდეურ ბრძოლაში. 60-იანი წლების ბოლომდე იგი „ცისკარში“ განაგრძობდა თავისებური, მაგრამ არსებითად ჰუმანისტურ-

¹ ვ. გაგოძე, ილია ჭავჭავაძის მსოფლმხედველობა, 1962, გვ. 17, 33, 305, 340.
² კ. ე. ს. ე. ლ. ა. ვ. ა, ფაუსტური პარადიგმები, 1, 1961, გვ. 487—490, 462—467.

³ ა. წერეთელი, ჩემი თავადასავალი (თხზულებათა სრული კრებული, გ. ა. ბ. ზიანის რედაქტორობით, 1958, გვ. 10); ა. წერეთელი, ქართლის სალამი (თხზ. სრ. კრებული, ტ. 1, 1950, გვ. 70); ახირებული ფურცელი (იქვე, ტ. XI, 1960, გვ. 15—16).



აკაკი წერეთელი.

დემოკრატიული ეროვნული პროგრამის დაცვას, 70-იანი წლების დამდეგიდან „დროებასა“ და „ტიფლისკი ვესტნიკში“ თანამშრომლობდა, თუმცა უთანხმოებაც ჰქონდა ამ ორგანოთა მეთაურ რადიკალ-დემოკრატებთან. 80-იან წლებში ხალხოსნურ „შრომასა“ და „იმედში“ და ჰუმანისტურ „ივერიაში“ განაგრძობდა იგი ბრძოლას განათლების საშუალებით „დაბალი წოდების“ ეროვნული და სოციალური განთავისუფლებისათვის. 90-იან წლებში აკაკი წერეთელი რადიკალურ-დემოკრატიული „კვალის“ და საკუთარი „კრებულის“ ფურცლებიდან გამობდა ინტელიგენტ-მეთაურთა მოწყვეტას დაბალი ხალხისაგან, ხოლო 900-იან

წლებში სოციალ-დემოკრატების რევოლუციურ მოღვაწეობაზე ამყარებდა ცარიზმის დამხობის გზით მთელი ერის და, კერძოდ, „დაბალი წოდების“ განთავისუფლების იმედს. მთელი 50 წლის მანძილზე იგი დაუღალავად იღვწოდა ქართული პრესის, თეატრის, საერთოდ ქართული კულტურის აღორძინებისათვის!

აკაკი წერეთელი ცარიზმისა და ბატონყმობის წინააღმდეგ შეურიგებლად მებრძოლი განმანათლებელი იყო თავიდან ბოლომდე. იგი აღტაცებით შეხვდა გლეხთა განთავისუფლებას 1864 წელს, მაგრამ უქნარა თავდაზნაურობის მოწინააღმდეგე და „დაბალი წოდების“ დამცველი დემოკრატი ვერ დააკმაყოფილა საგლეხო რეფორმამ, რომელიც „სახელით კარგი იყო, სახრავად კი არ ვარგოდა“. „ბატონყმური დამოკიდებულება დაირღვა,—წერდა იგი,—მაგრამ რომ უნდოდა, ისე კი ვერა. ბატონები კაცის სულებს ვეღარ ფლობდნენ პირუტყვებით, როგორც ადრე, მაგრამ მაგიერში მიწები ჩამოერთოთ“.

აკაკი წერეთელი ბატონყმობის ნაშთების სრული მოსპობის, გლეხთა სრული განთავისუფლების მომხრე იყო და, თუმცა ეს ერთბაშად არ მოხერხდა, მაინც სასიამოვნოდ მიიჩნევდა იმ გარემოებას, რომ „ნელ-ნელა

1 ლ. ასათიანი, ცხოვრება აკაკი წერეთლისა, 1940.

მაღალი წოდების მიწა-წყალი გადადიოდა მუშებრს (მშრომელების) ხელში¹.

აკაკი წერეთელი იმასაც კარგად ხედავდა, რომ რეფორმის შემდეგ მიწა არამშრომელი, ხალხის მჩაგვრელი ვაჭრების ხელში გადადიოდა. იგი არ ეთანხმებოდა რადიკალ-დემოკრატებს, რომლებიც ზოგჯერ ყოველგვარა შრომით და, კერძოდ, „ვაჭრული მოხერხებით“ ერის გაძლიერება-შეც პროგრესს ხედავდნენ, თუმცა ვაჭრობის უარყოფით მხარეებსაც აკრიტიკებდნენ. აკაკი მხოლოდ ხალხის მოტყუებისა და ძარცვის ერთ-ერთ ფორმად თვლიდა მაშინდელ ვაჭრობას და თავადაზნაურობასთან ერთად ვაჭრებიც „საწყალი ხალხის“ მჩაგვრელებად მიაჩნდა. ხალხის სასარგებლო შრომა, მისი აზრით, მიწის მუშაობა, თავისუფალ მიწაზე თავისუფალი გლეხური შრომაა. უმთავრესად ამგვარ მშრომელთა პოზიციებიდან კიცხავს იგი გაბიუროკრატებულ თავადაზნაურობასაც და გაბურჯუებულ ვაჭრებსაც. „ყველა ესენი რომ გამოვრიცხოთ, — ამბობს იგი, — დაგვრჩება ხელში ჩვენი მშრომელი, მიწის მუშა ხალხი და აი, ვის უნდა ეკუთვნოდეს ჩვენი სრული თანაგრძობა. ამათ კეთილდღეობას უნდა ვუმზადებდეთ და შევხაროდეთ, ხელს ვუწყობდეთ და რჩევას ვაძლევდეთ, მაგრამ ისე წინდახედვითა და მოფიქრებით, რომ ფეხი არ წავაკვრევიოთ“². ამ მხრივ აკაკი წერეთლის მსოფლმხედველობა ეხმატკბილებოდა ყველა განმანათლებელ-დემოკრატის, კერძოდ, ხალხოსანთა თვალსაზრისს. მაგრამ აკაკი წერეთელი ყველაფერში არ ეთანხმებოდა ხალხოსნებსაც, ამ „ახალ პატრიოტებს“, „ტეტიათა მოტრფიალებს“, „დიაკვნის შვილებს“, რომლებიც თავიდან ნიჰილისტურად იყვნენ განწყობილი წინამორბედი დემოკრატიული თაობისადმი, სავსებით უარყოფდნენ თავადაზნაურობის ეროვნულ როლს და მხოლოდ გაუნათლებელი გლეხობა მიაჩნდათ ერად და ეროვნულ-განმათავისუფლებელი მოძრაობის ერთადერთ ძალად. აკაკის აზრით, უქნარა მაღალი წოდების წინააღმდეგ მშრომელი დაბალი წოდების ინტერესთა დაპირისპირება დადასტურებული ფაქტია, ამ საფუძველზე ერის და მისი მოწინავე ძალების დანაწილებაც აუცილებელია, მაგრამ მათი უპირველესი ამოცანა მაინც საერთო მტრის — ცარიზმის წინააღმდეგ გაერთიანებული ბრძოლა უნდა იყოს. „მაღალი წოდების ხალხი, — წერდა იგი, — რომელსაც ოდესმე ჰქონდა მნიშვნელობა, დღეს თუმცა ურგებია და უმჯობესი იქნებოდა ეს უქმად მყლაპელები სულ არ ყოფილიყვნენ ჩვენს ქვეყანაში, მაგრამ, რადგანაც ჯერ გარეშე მტერი არ მოგვიშორებია და... მუდამ ჩაყლაპვას გვექაძნებიან, ამისათვის საჭირო არის — ეს ორივე წოდება, როგორც მაღალი, ისე დაბალი, გაძლიერდეს...

¹ ა. წერეთელი, ჩემი თავგადასავალი (თხზ., სრ. კრებული, ტ. VII, გვ. 100). ხარლამპიოს მოგონაჲს წერილებიდან (იქვე, ტ. XI, 1960, გვ. 354).

² ა. წერეთელი, როგორ უნდა ხალხის დაახლოება (თხზ., ტ. XI, გვ. 403).

და შეერთებულის ძალით წინაღუდგებოდნენ გარეშე მტერსო, მით უფრო, რომ ოსმალთს სიძულვილი მაღალ-წოდებას უფრო აქვს და რადგანაც მისგან დაჩაგრულადა გრძნობს თავს, არ შეურიგდებოა¹. ამ სახით ერთდებოდა აკაკი წერეთლის შემოქმედებასა და მსოფლმხედველობაში დემოკრატიზმი და პატრიოტიზმი.

აკაკი წერეთლის მხატვრული შემოქმედება იდეურობისა და ხალხურობის კლასიკური ნიმუშია. მისი „მუშური“ და „ნიმერული ნანინა“, „ხანჯალი“ და „ნატვრა“, „ციცინათელა“ და „სულიკო“, „განთიადი და „ჩონგური“, „თორნიკე ერისთავი“ და „ნათელა“, „ბაგრატი დიდი“ და „გამზრდელი“, „პატარა კახი“, „ბაში-აჩუკი“ და „ჩემი თავგადასავალი“ ზრდიდა და განამტკიცებდა ქართველი ხალხის ჰუმანისტურ და პატრიოტულ-დემოკრატიულ იდეალებს. აკაკი წერეთლის პატრიოტული ჰუმანიზმის თავიდანვე ნათელი რევოლუციურ-დემოკრატიული შინაარსი ყოველმხრივ გაიშალა პირველი რევოლუციის ქარიშხლიან წლებში, როცა იგი გაბედულად ამოუდგა მხარში ცარიზმის დასამხოზად აჯანყებულ „მუშათ ერს“, რევოლუციურ სოციალ-დემოკრატიას. პოეტი საქვეყნოდ აცხადებდა, რომ მისი თაობა ნახევარი საუკუნე ელოდა რევოლუციას, რომ მისი დროის ქართველი განმანათლებლნი წინამორბედნი და მომზადებლნი იყვნენ სახალხო რევოლუციისა, რომელსაც უნდა გაეთავისუფლებინა ქართველი ხალხი ეროვნული და ბატონყმური ჩაგვრისაგან². რევოლუციას ნატვრობდა და გმირებს ეძახდა პოეტის ნაღარა რეფორმის დროს და მის შემდეგ. „ცოცხალ მონაზე უმჯობესია თავისუფლების ძებნაში მკვდარი“, — ქადაგებდა იგი 1875 წელს³. „კმარა მონება! კმარა მოთმენა“, დრო არის ადგეს ერთპირად ერი, ან ბრძოლის ველზე სული დალიოს, ან მოიგერიოს მოსული მტერი!.. მონას რად უნდა კრული სიცოცხლე? ვისთვის აანთოს წმინდა ლამპარი? სჯობს მონებაში გადიდკაცებულს თავისუფლების ძებნაში მკვდარი“⁴, — წერდა იგი 1890 წელს. დიდი ქართველი განმანათლებლის მსოფლმხედველობის და საერთოდ საქართველოს ეროვნულ-განმათავისუფლებელი მოძრაობის განმანათლებლური იდეოლოგიის ლოგიკური დასკვნა იყო აკაკი წერეთლის იდეური მონაწილეობა აჯანყებული ქართველი გლეხობის მხარეზე თვითმპყრობელობის, რეაქციული თავადაზნაურობის და ბურჟუაზიის წინააღმდეგ 1905 წლის რევოლუციაში. სოციალიზმის „მცნებას“ ახლაც უტოპიურ ოცნებად თვლიდა დიდი განმა-

1 ა. წ ე რ თ ე ლ ი, ხარლამპიოს მოგონაჲის წერილებიდან (თხზ., ტ. XI, გვ. 354).

2 იქვე, თქვენი ჰირიძე, ნატვრა, (თხზ. სრ. კრებ., ტ. III, 1954, გვ. 146, 158).

3 იქვე, ბაგრატი დიდი (თხზ., ტ. V, 1956, გვ. 10).

4 იქვე, ჰაღარა (თხზ., ტ. II, 1950, გვ. 175). პატარა კახი (თხზ., ტ. VI.

ი. გრიშაშვილის რედ., 1956, გვ. 100).

ნათლებელი, „ჩვენი ქვეყნის რჩეული, უკეთესი მეომარი, ჩვენი ქვეყნის ბედნიერებისათვის თავგანწირული“, რომელიც ნახევარი საუკუნე „ატკობდა ქართველის ყურს, აფხიზლებდა გონებას, ჰმართავდა ქართველის გულს ქართველისა და საქართველოს სიყვარულისათვის“¹. მაგრამ აკაკი წერეთლის ეროვნულ-დემოკრატიული მსოფლმხედველობა იდეურად ამზადებდა და ხელს უწყობდა სოციალიზმისათვის მებრძოლებსაც. ამას თვით ცარიზმის მოხელენიც ხედავდნენ და მუდმივად სდევნიდნენ დიდ პოეტს, რომლის დაპატიმრებასაც არ ერიდებოდნენ ზოგჯერ².

აკაკი წერეთელი არა მარტო დიდი პოეტი იყო, არამედ დიდი მოაზროვნეც. მისი ჰუმანისტური ფილოსოფია, რეალისტური ესთეტიკა და დემოკრატიული სოციოლოგია მძლავრ და ორიგინალურ ნაკადად ერთვის საქართველოს ეროვნულ-განმათავისუფლებელი მოძრაობის განმანათლებლურ აზროვნებას. მისთვისაც საღმრთოსა და საეროს, მიწიერისა და ზეციერის ერთიანობის, ერისა და ადამიანობის უპირველესობის ჰუმანისტური თვალსაზრისია საზოგადოებრივ მოვლენათა საზომი. მისი ჰუმანიზმი მატერიალისტურ საფუძვლებს შეიცავს, მაგრამ არც იდეალიზმს უცხოობს ყოველთვის. მისი აზრით, ზეციერისა და მიწიერის ერთობაა, კერძოდ მწერლობა, ქვეყნის სამსახურისათვის ადამიანისათვის ბოძებული „ციური ნიჭი“, გარემოების საყვირი, ზნეობრივი და გონებრივი მესარკეობა, „უძლიერესი და უპირველესი იარაღი, რომელიც სიმართლით უნდა ილესებოდეს და უსუსტრად იხმარებოდეს სამშობლოს საკეთილდღეოდ“³, ჩაგრულს ემსახურებოდეს მჩაგვრელთა წინააღმდეგ ბრძოლაში. ჩაგრული ხალხის, ჩაგრული ერის, ჩაგრული წოდების მშრომელი და მებრძოლი ნაწილის პოეტი და განმანათლებელი იყო აკაკი წერეთელი, რომლის სახელთან განუყრელადაა დაკავშირებული საქართველოს ეროვნულ-განმათავისუფლებელი მოძრაობის ნახევარსაუკუნოვანი ისტორია⁴.

იაკობ გოგებაშვილი (1840—1912 წწ.). საქართველოს ეროვნულ-განმათავისუფლებელი მოძრაობის ჰუმანისტურ-დემოკრატიული მიმდინარეობის ერთ-ერთი მეთაური იყო იაკობ სიმონის ძე გოგებაშვილი, დიდი ქართველი პედაგოგი და განმანათლებელი მოაზროვნე.

იაკობ გოგებაშვილი დაიბადა ქართლში, სოფელ ვარიანში, მღვდლის ოჯახში. ცხრა წლამდე შინ იზრდებოდა მამის ხელმძღვანელობით. 1849 წელს თბილისში ჩამოიყვანეს სასწავლებლად. 1855 წელს იაკობმა თბილი-

¹ ი. კ ა ვ კ ა ვ ა ძ ე, წერილი აკაკი წერეთლისადმი (თბზ. სრ. კრებული, პ. ინგოროყვას რედ., ტ. X, 1961, გვ. 114). შინაური მიმოხილვა, (იქვე, ტ. V, 1955, გვ. 186).

² ლ. ა ს ა თ ი ა ნ ი, ცხოვრება აკაკი წერეთლისა, 1940, გვ. 344, 433—434.

³ ა. წ ე რ ე თ ე ლ ი, თბზ. სრ. კრებული, ტ. XII, 1960, გვ. 234.

⁴ ლ. ა ს ა თ ი ა ნ ი, ცხოვრება აკაკი წერეთლისა, გვ. 436.



იაკობ გოგებაშვილი.

სის სასულიერო სასწავლებელი დაამთავრა, 1861 წელს — სასულიერო სემინარია. უკვე ამ დროს მომავალი დიდი პედაგოგი ეცნობა რუსეთისა და დასავლეთ ევროპის მოწინავე აზროვნებას, განსაკუთრებული გატაცებით სწავლობს ქართულ ლიტერატურასა და საქართველოს ისტორიას.

1861 წლიდან 1863 წლამდე იაკობ გოგებაშვილი კიევის სასულიერო აკადემიაში სწავლობდა. ამ პერიოდში დამთავრდა მისი პატრიოტული, დემოკრატიული და ჰუმანისტური მსოფლმხედველობის ჩამოყალიბება. 1863 წელს მან ავადმყოფობის გამო თავი დაანება კიევის სასულიერო აკადემიას და დაბრუნდა თბილისს, სადაც ჯერ მასწავლებლად, ხო-

ლო 1868 წლიდან ინსპექტორად მუშაობდა სასულიერო სასწავლებელში. ჩინებულმა პედაგოგმა და დიდმა პატრიოტმა დემოკრატმა მალე დაიმსახურა მოწინავე ქართველი საზოგადოებრიობის გულწრფელი სიყვარული, თუმცა ამავე დროს თავის წინააღმდეგ აიხედრა ცარიზმის სატრაპები, რომლებიც ყველა საშუალებით ცდილობდნენ ძალდატანებითი გარუსების თვითმპყრობელური პოლიტიკის განხორციელებას საქართველოში. 1874 წელს იაკობ გოგებაშვილს პოლიტიკური ორგულობა, სეპარატიზმი, მოსწავლეთა შორის ათეიზმის, ლიბერალიზმის და რადიკალიზმის ქადაგება დააბრალეს და ინსპექტორობიდან მოხსნეს. ამ დროიდან იაკობ გოგებაშვილი კიდევ უფრო აქტიურად მონაწილეობს ეროვნულ-განმათავისუფლებელ მოძრაობაში. იგი იყო ქართველთა შორის წერა-კითხვის გამავრცელებელი საზოგადოების ერთ-ერთი შემქმნელი და ხელმძღვანელი.

იაკობ გოგებაშვილი თავისი დროის გამოჩენილი პუბლიცისტი და საბავშვო მწერალი იყო. მისი პირველი პუბლიცისტური წერილი 1866 წელს დაიბეჭდა „დროებაში“. ამის შემდეგ იგი თანამშრომლობდა „ტიფლისკი ვესტნიკში“, „კავკაზში“, „ჯეჯილში“ და განსაკუთრებით „ივერიასში“. მისი უკანასკნელი წერილი უფროსად „განათლებაში“ დაიბეჭდა 1912 წელს. იაკობ გოგებაშვილის შესანიშნავი პუბლიცისტური წერილები და საბავშვო მოთხრობები („რანი ვიყავით გუშინ?“, „შინაური მიმოხილვა 1882

წლისა“, „ირლანდიას უთენდება“, „ბურჯი ეროვნებისა“, „საქართველოს დღევანდელი მდგომარეობა“, „დღევანდელი კვერცხი და ხვალინდელი ქათამი“, „ქართული მიმართულება“, „ივანანამ რა ჰქმნა“, „მეფე ერეკლე და ინგილო ქალი“ და სხვ.) გამსჭვალულია პატრიოტული, ჰუმანიტური, დემოკრატიული სულისკვეთებით.

იაკობ გოგებაშვილი ახალი ქართული პედაგოგიკის ფუძემდებელია. მოწინავე თეორიისა და მეთოდის პრინციპებზე შედგენილი მისი კლასიკური სახელმძღვანელოები ზრდიდა ქართველი ახალგაზრდობის მრავალ თაობას. ჯერ კიდევ 1865 წელს გამოსცა იაკობ გოგებაშვილმა „ქართული ანბანი და პირველი საკითხავი წიგნი“. 1868 წელს გამოვიდა მისი „ბუნების კარი“, 1876 წელს — „დედა ენა“, 1887 წელს — „რუსსკოე სლოვო“.

თავისი ეპოქის აქტუალური საზოგადოებრივი პრობლემებიდან იაკობ გოგებაშვილი უპირველესი მნიშვნელობის საკითხად ეროვნულ საკითხს თვლიდა. როგორც თვითონვე ამბობდა, „ეს აიხსნება იმ გარემოებით, რომ ჩვენი ეროვნული მდგომარეობა უფრო საშიში იყო, ვიდრე ეკონომიური. ეროვნული მხარე ჩვენი არსებობისა უფრო ძლიერ გვტყიოდა, გვადონებდა. ვიდრე სოციალური“¹. მისი აზრით, საქართველოს ეროვნული მოძრაობის უპირველესი მიზანი იყო ქართველი ხალხის ეროვნული თანასწორუფლებიანობის აღდგენა რუს ხალხთან, „მემარცხენე რუსეთთან“ მეგობრობის განმტკიცების გზით. „პოლიტიკური ერთობა, შეურყეველი კავშირი რუსეთთან, — ამბობდა იგი, — ჩვენთვის იყო და იქნება ძვირფასი საუნჯე“, რადგან ქართველ ხალხს „დიდ რუს ხალხთან მჭიდრო დაახლოება აზიარებს... სხვა, უკეთეს, უფრო ფართო და უფრო ნათელ ცხოვრებას და გადაუშლის დიდ მომავალს“. იაკობ გოგებაშვილი ქართველი პედაგოგების უწმინდეს მოვალეობად თვლიდა განმტკიცებინათ რუსი და ქართველი ხალხების მეგობრობა, დაენერგათ მოსწავლეთა შორის „სიყვარული საქართველოსი და რუსეთისა, ქართული ენისა და სახელმწიფოსისა, ქართული ლიტერატურისა და ისტორიისა, აგრეთვე რუსულის ლიტერატურისა და ისტორიისა“². დიდი პედაგოგის იდეალი იყო მძლავრი მრავალეროვანი სახელმწიფო, რომელშიც დემოკრატიული თანასწორუფლებიანობის საფუძველზე გაერთიანდებოდა მაშინდელი რუსეთის ყველა ერი, დიდი თუ პატარა. ამ იდეალის განხორციელების ძირითად ძალად იაკობ გოგებაშვილი თვლიდა ხალხს, რომელიც იდეოლოგიურად უნდა მოემზადებინა ინტელიგენციას განმათავისუფლებელი ბრძოლისათვის.

¹ ი. გოგებაშვილი, შინაური მიმოხილვა (თხზ., ტ. I, გ. თავიშვილის, დ. ლორთქიფანიძის, ზ. კიკნაძის, ვ. ქაჯაიას, რედ., 1952, გვ. 391).

² იქვე, რანი ვიყავით გუშინ? (თხზ., ტ. I, გვ. 364). პოლიტიკანობა თუ პედაგოგობა, (თხზ., ტ. IV, 1955, გვ. 472).

ილია ჭავჭავაძისა და აკაკი წერეთლის შეხედულებებზე დაყრდნობით იაკობ გოგებაშვილმა სცადა ქართველი ერის და ეროვნული მოძრაობის თავისებურებათა დახასიათება. ერს იგი უწოდებდა ადამიანთა ისტორიულ ერთობას, რომელსაც გააჩნია საკუთარი ენა, ტერიტორია, კულტურა და სარწმუნოება. ქართველი ინტელიგენციის პატრიოტული მოძრაობის ნიშნებად იგი თვლიდა ბრძოლას ერის თავისუფლებისათვის და მისი მშრომელი უმრავლესობის კეთილდღეობისათვის. ამ მხრივ ჩვენც იგივე გვსურს, რაც რუს განმანათლებლებს¹, — დასძენდა იაკობი.

ეროვნულ საკითხს იაკობ გოგებაშვილი წინა პლანზე აყენებდა, მაგრამ მის გადაწყვეტას მშრომელთა ეკონომიური განთავისუფლების საკითხს უკავშირებდა. „ქარგი რამ გახლავთ ეროვნული პრინციპის დამყარება ყოველს სფეროში, — წერდა იგი, — მაგრამ მარტო ეს არ არის საკმარისი ქვეყნის დაყენებისათვის წარმატებისა და ბედნიერების გზაზედ. თუ მომეტებული არა, იმდენადვე მაინც საჭიროა ზრუნვა სოციალურს ცვლილებაზედ, ხალხის ეკონომიური მდგომარეობის გაუკეთესობაზედ... ეკონომიურად აყვავება ქვეყნისა ხდება შეურყეველს ბურჟად ეროვნული აღორძინებისა“². სოციალურ ცვლილებად იაკობ გოგებაშვილი ბატონყმობის ნაშთების სრულ აღმოფხვრას და ერის კეთილდღეობის საფუძვლად მიწაზე მშრომელთა საკუთრების დაკანონებას გულისხმობდა. ამისათვის ყველაზე უკეთეს საშუალებად იგი თვლიდა მიწის გამოსყიდვას სახელმწიფოს მიერ, ანდა, უარეს შემთხვევაში თვით გლეხთა მიერ. იაკობის აზრით, თუ ყველა ადამიანი მშრომელი და მესაკუთრე იქნებოდა, მოისპობოდა „უდიდესი ნივთიერი უთანასწორობა“, ძირეულად შეიცვლებოდა მაშინდელი წყობილება და კაცობრიობის საყოველთაო კეთილდღეობა დამყარდებოდა. ილია ჭავჭავაძის და საკუთარ თვალსაზრისს რომ გადმოსცემდა, იაკობ გოგებაშვილი ამბობდა: „პირადად მთელ ჩვენს სიცოცხლეში გულწრფელი მომხრენი ვიყავით თანასწორობისა და ყოველგვარი ბატონობა გვძულდა და ვეწინააღმდეგებოდით მას: გვძულდა ბატონობა თავადაზნაურობისა, ბიუროკრატიისა, ბურჟუაზიისა... მშრომელი ხალხის სრულ განთავისუფლებას კი ჩვენ ყოველთვის წრფელი გულით ვნატრობდით და რაც კი შეგვეძლო ვენმარებოდით. ჯერ კიდევ ოცდახუთი წლის წინათ... გაზეთ „დროებაში“ ჩვენ დავსტამბეთ ორი მოწინავე წერილი, სადაც გავატარეთ ის აზრი, რომ ვიდრე მიწა სავესებით არ გადავა მხენელ-მთესველთა ხელში, ზაოდები და ფაბრიკები მუშათა ხელში. კაცობრიობაში ვერ დამყარდება ვერც საყოველთაო კეთილდღეობა, ვერც თანასწორობა და ვერც თავისუფლება“³.

¹ ი. გ. გ. ბ. შ. ვ. ი. ლ. ი, შინაური მიმოხილვა (თბზ., ტ. 1, 1952, გვ. 370—375.)

² იქვე, გვ. 391.

³ იქვე, მცირე განმარტება (თბზ., ტ. IV, გვ. 185—186)1.

იაკობ გოგებაშვილი „მეოთხე წოდებას“ უწოდებდა ყველა მშრომელს, „მთელს ჩვენს ერს, უმთავრესად კი გლეხებსა და მუშებს“ და რწმენით შეჰყურებდა მომავალს არაქართველი არისტოკრატიისას, რომელიც, — მისი თქმით, — „ჰენებით მიისწრაფება უკან, უფსკრულისაჲკენ, არა ქართველი ბურჟუაზიისას, რომელიც უდღეური ბავშვივით წყალდება დედის მუცელში, არამედ მშრომელი ქართველი ხალხისას“¹. ეს იაკობ გოგებაშვილს სოციალიზმის მხარეზე დადგომიდანაც კი მიაჩნდა, თუმცა მისი სოციალიზმი უდრიდა მხოლოდ პროტესტსა და ბრძოლას ხალხის ეროვნული ჩავკრისა და მესამე წოდების სოციალური უთანასწორობის წინააღმდეგ, აბსტრაქტულ მოწოდებას ერის საყოველთაო ძმობის, ერთობის, თანასწორობისა და კეთილდღეობის იდეალისაჲკენ, რომელიც კლასობრივი ბრძოლის და ნახტომების გარეშე, დაჩქარებული ევოლუციის გზით უნდა განხორციელებულიყო.

და მაინც იაკობ გოგებაშვილის და საერთოდ კი ჰუმანისტ-განმანათლებელთა ეს ევოლუციური თვალსაზრისიც რევოლუციის წინა ხანაში ობიექტურად რევოლუციურ როლს ასრულებდა, რამდენადაც ხელს უწყობდა საზოგადოების განვითარების რევოლუციური პერიოდის მოახლოებას. იგივე უნდა ითქვას გვიანდელ ქართულ ჰუმანისტურ განმანათლებლობაზეც, რომლის უდიდესი წარმომადგენლები ალექსანდრე ყაზბეგი და ვაჟა-ფშაველა იყვნენ.

ალექსანდრე ყაზბეგი (1848—1894 წწ.). ალექსანდრე მიხეილის ძე ყაზბეგი 1848 წელს დაიბადა დარიალის ხეობაში მდებარე სოფელ სტეფანწმინდაში, თავადის ოჯახში. თორმეტ წლამდე იგი ნებიერად იზრდებოდა შეძლებული მშობლების ოჯახში, ჯერ ძიძებისა და გადიების, მერმე საგანგებოდ მიჩენილი მასწავლებლების ხელმძღვანელობით. მის აღმზრდელთა შორის ყოფილან გლეხის ქალებიც, რომელთა ამაგს მომავალი დიდი მწერალი ყველაზე მეტად აფასებდა: იმ დროს, როდესაც მეფის შეილივით მანებიერებდნენ,—წერდა ალექსანდრე ერთ-ერთ აღმზრდელ გლეხის ქალს,— შურს, ამპარტაუნობას და სიძულვილს მინერგავდნენ, შენ მონაწილეობას იღებდი ჩემი გრძნობის და სულის მოძრაობაში... შენმა სიტყვებმა ყმების და მოსამსახურეების მდგომარეობაზე ბევრჯერ მდულარე ცრემლები დამაღვრევინა და ჩემში თანაგრძნობა გამოიწვია უსამართლოდ დატანჯული ხალხის მიმართ; შემიძლია ამაყად გითხრა, თუ შენს გაზრდილში რაიმე რიგიანი მოიპოვება, ამის მიზეზი შენ ხარო².

1860 წელს თორმეტი წლის ალექსანდრე თბილისში ჩამოიყვანეს და კერძო პანსიონში მიაბარეს. შემდეგ გიმნაზიაში სწავლობდა მეოთხე კლას-

¹ ი. გოგებაშვილი, ილას ფონდის შესახებ. ორი ნიმუში უკულმართობისა ხალხის განათლებაში (თბზ., ტ. IV, გვ. 218, 521).


² გ. კ. ი. ძე, რჩეული თხზულებანი, ტ. 111, 1965, გვ. 335.

სამდე. 1866 წელს მამა გარდაეცვალა და ალექსანდრე ყაზბეგის ოდესღაც მდიდრული ოჯახი მძიმე მატერიალურ გაჭირვებაში ჩავარდა. ზვიადი ფეოდალი, მიხეილ ყაზბეგი იმ დროისათვის ისე გადატაცებული ყოფილა, რომ შვილს ვალში აღებული ფულით დაუმარხავს იგი. მზრუნველი დედის დახმარებით ალექსანდრემ მაინც შეძლო მოსკოვს წასვლა სწავლის გასაგრძელებლად. იქ იგი თავისუფალ მსმენელად შევიდა სამეურნეო აკადემიაში და ერთხანს ძლიერ ბეჯითად სწავლობდა, გატაცებით კითხულობდა მხატვრულ და სამეცნიერო ლიტერატურას რუსულ და ფრანგულ ენებზე. ჭაბუკი ოცნებობდა იმ დროზე, როცა დიდ განათლებას შეიძენდა და დიდებით შემოვიდოდა „საქართველოს კარებში“. ამ ოცნების განხორციელებას იმხანად დაბრკოლებად გადაეღობა სტუდენტისათვის შეუფერებელი მფლანგველობა და დროსტარება მოსკოვის მაღალი წრის სალონებში. შეიძლება ამის მიზეზი ისიც იყო, რომ განებივრებული, მაგრამ მგრძნობიარე ახალგაზრდა სულიერი ჩაგვრის გრძნობას განიცდიდა შურიანობის გესლით სავსე მშობლიურ წრეში და ამ გრძნობისაგან განთავისუფლების მიზნით უნაგარიშოდ დაეწათა უცხო ქალაქში უზრუნველი გართობის სიამეს. მიზანი მიუღწეველი დარჩა. იგი მალე დარწმუნდა, რომ გართობა კიდევ არ არის სრული თავისუფლება და ბედნიერება. 1870 წელს ალექსანდრე ყაზბეგი სტუდენტობიდან დაბრუნდა უწესრიგო ცხოვრებით დაღლილი და დაავადებული¹.

70-იანი წლების პირველ ნახევარში ალექსანდრე ყაზბეგმა მწყემსობას მიჰყო ხელი და უბრალო ხალხის მძიმე ცხოვრების დიდი სკოლა გაიარა. შერე, რუსეთ-თურქეთის ომის დროს რუსის ჯარს იჯარით აწვდიდა საჭირო საქონელს. მაგრამ იგი კიდევ უფრო ცუდი მოიჯარადრე გამოდგა, ვიდრე შეცხვარე, ავანსად აღებული ფული შემოეხარჯა და ვალის დასაფარავად თითქმის მთლად გაყიდა მამაპაპეული მამული. ვერც თბილისში სტამბის გახსნის განზრახვა შეისრულა. 70-იანი წლების ბოლოს მსახიობად შევიდა ქართულ დრამატულ დასში და ორიოდე წლის განმავლობაში 25-მდე პიესა დაწერა თუ გადმოაკეთა. მაგრამ ვერც მსახიობობამ და დრამატურგიამ მოუტანა მას დიდება. „დიდების“ პერიოდი ალექსანდრე ყაზბეგის ცხოვრებაში იწყება 1880 წლიდან და გრძელდება 1885 წლამდე, როცა მან გაზეთ „დროებაში“ ზედიზედ გამოაქვეყნა თავისი უკვდავი მოთხრობები და რომანები: „ელგუჯა“ და „ხევისბერი გოჩა“, „მოდღვარი“ და „ციცია“, „ელისო“ და „ციკო“, „ნამწყემსარის მოგონებანი“ და „განკიცხული“. შემდეგ მას მნიშვნელოვანი აღარაფერი შეუქმნია. მატერიალურმა გაჭირვებამ, შემოქმედებითმა წვამ და ბოჰემურმა ცხოვრებამ ნაადრევად დააბერა და დაღუპა იგი.

¹ გ. ქიქოძე, რჩეული თხზულებანი, ტ. III. 1965, გვ. 336.

ალექსანდრე ყაზბეგის რეალისტურ-რომანტიკულ¹ შემოქმედებაში მძლავრად იჩინა თავი საქართველოს ეროვნულ-განმათავისუფლებელი მოძრაობის პატრიოტიზმმა და ჰუმანისტურმა იდეოლოგიამ. სიყვარულს უმღერის ეს გენიალური მხატვარი თუ მეგობრობას, ბუნებას ხატავს თუ საზოგადოებას, მისი ნაწარმოებები მოგვაგონებენ სოციოლოგიურ-ფსიქოლოგიურ ეტიუდებს, რომლებშიც ეროვნული დამოუკიდებლობა და ადამიანური ღირსება, პატრიოტიზმი და ჰუმანიზმი უპირველეს და უმაღლეს საწყისებად არის გამოცხადებული. განთავისუფლებული სამშობლო და გაბედნიერებული საზოგადოება მისი იდეალი. ამ იდეალს უპირის-



ალექსანდრე ყაზბეგი

პირებს ალექსანდრე ყაზბეგი არსებულ სინამდვილეს, რომელშიც ჩაგვრისა და უბედურების სამეფოს ხედავს. მისი წარმოდგენით; წარსულში ხალხი თემის სახით პიროვნებად იყო ქცეული, ბუნებასთან დაახლოებული, ბუნებასავით წმინდა და მძლავრი. მაშინ ხალხს ბევრი რამ აკლდა, მაგრამ ადამიანური ღირსება უხვად ჰქონდა, ამაღლებული სიყვარულიც იცოდა და უანგარო მეგობრობაც, მტრის სიძულვილიც და მოყვრისადმი ვაჟკაცური თავდადებაც. ყოველივე ეს ახალ დროში ცივილიზაციის სახელით ნადგურდება, თემი იშლება, საზოგადოება ორ მტრულ ბანაკად ითიშება, „განათლებულნი, ევროპიელნი“ ბრჭყვიალა ოქროთი და ალესილი ფოლადით ცდილობენ „აზიურის, გაუნათლებლობის“ აღმოფხვრას, არა-ადამიანური და უსამართლო ქვეყანა ებრძვის ადამიანობისა და სიმართლის ქვეყანას, გაბატონებული უმცირესობა იმონებს და ჩაგრავს დამორჩილებულ უმრავლესობას².

ალექსანდრე ყაზბეგი უყოყმანოდ დადგა ჩაგრულთა მხარეზე შინაურ თუ გარეშე მჩაგვრელთა წინააღმდეგ ბრძოლაში, რომელიც მის შემოქმედებასა და მსოფლმხედველობაში ბოროტისა და კეთილის დაპირისპირე-

¹ კ. აბაშიძე, ეტიუდები, 1962, გვ. 357.

² ვ. კოტეტიშვილი, ქართული ლიტერატურის ისტორია, გვ. 554—555.

ბის სახით არის წარმოდგენილი. ყველა მჩაგვრელი მისთვის ბოროტი ძალაა, ყველა ჩაგრული — კეთილი. ყოველგვარი ფორმა ჩაგვრისა ბოროტებაა, ყოველგვარი ბრძოლა მჩაგვრელთა წინააღმდეგ — სიკეთე. იგი ხალხის სახელით ილაშქრებდა ბატონყმობის წინააღმდეგ და ამაყად ამბობდა: „მე ვარ მთიელი..., აღზრდილი ხალხში, შობილი იქ, სადაც ყმა და მონობა ძველადგანვე სამარცხვინოდ ყოფილა ხალხში, სადაც სიტყვას „ბატონ-ყმობა“ ადგილი არასოდეს არ ჰქონია და სადაც კაცს პატივისცემა მხოლოდ პირადის ღირსებით შესძლებიაო“¹. იგი იბრძოდა ცარიზმის კოლონიური პოლიტიკის წინააღმდეგ და ქართველ ხალხს არიგებდა: „არ დაივიწყო, რომ სადაც შენი მამა-პაპა გაჩენილა და დამარხულა, სადაც მათი ძვლებია ჩაფლული, იმას გედავებიან და არ დაანებოო“². იგი გაბედულად აკრიტიკებდა „გლეხკაცობის განთავისუფლების“ მემამულურ ხასიათს და ძმობასა და თანასწორობაზე ოცნებობდა: „მოვა დრო და ღრუბელი ჩვენშიაც გაიმქრევის, მზე გამოიხედავს, დრო შეიცვლების და ავადმყოფი მოკეთდების, ძმა ძმას დაინახავსო“³. იგი გმობდა ბურჟუაზიული ცივილიზაციის ინდივიდუალიზმს, „თემი და მისი საქმე შენზეც დიდია და ჩემზედაცო“, და ოცნებობდა იმ საზოგადოებაზე, სადაც განხორციელდებოდა პრინციპი — „ყველა ერთისათვის და ერთი ყველასათვის“⁴ ამ ძალადი ეროვნული, პიროვნული და ადამიანური იდეალებისათვის ბრძოლას ეწირებთან ალექსანდრე ყაზბეგის გაუცინარი, შუბლშეკრული, მაგრამ გონებანათელი, ამაღლებული, თუმცა ბუნებრივი სიყვარულის, თავდადებული მეგობრობის, სწორუპოვარი მამაცობის და შეუბღალავი მორალური სიწმინდის ჰუმანური გრძნობებით გაკეთილშობილებული გმირები. ამ იდეალებზე იზრდებოდა ქართველი ხალხის მრავალი თაობა, იწრთობოდა მისი ეროვნული ხასიათი და რევოლუციურ-დემოკრატიული სულისკვეთება. ამავე იდეალებს უპირისპირდება დიდი მწერალი-განმანათლებელი თვითმპყრობელურ-მემამულურ-ბურჟუაზიული სინამდვილის მახინჯ ნაშეერთ, რომელნიც ცეცხლითა და მახვილით, მოსყიდვითა და ძალადობით ცდილობდნენ ხალხის პატრიოტული და ჰუმანური გრძნობების დათრგუნვას. მისთვის არ არსებობდა შუა გზა ბოროტსა და კეთილს შორის გაჩაღებულ ბრძოლაში. იგი იყო თავისი დროის ყველაზე ტენდენციური მხატვარი, რომლის ნაწარმოებებში კარგი მთლიანად კარგი და მისაბამია, ცუდი მთლიანად ცუდი და დასაგმობი. იგი წინააღმდეგია სინამდვილის პასიური, ჰერეტიკითი ასახვისა და შეგნებულად იყენებს ხელოვნების ტენდენციურობის მეცნიერულ თვალსაზრისს. „ამ მოთხრო-

1 ა. ყ ა ზ ბ ე გ ი, თხზ. ოთხ ტომად, ტ. 4, 1948, გვ. 89.

2 იქვე, რჩ., ნაწერები, 1939, გვ. 737.

3 იქვე. თხზ. ტ. 1, 1962, გვ. 44—45.

4 იქვე, რჩ. ნაწერები, გვ. 735.

ბაში, — წერდა იგი ერთი თავისი ნაწარმოების გამო, — ვხატავ იდეალურ მოძღვარს, ისეთს მოძღვარს, რომელიც წირვა-ლოცვის დროს მლოცველს ხელში არ შეჰკუთრებს და უმაღლესი მოვალეობის შესრულების დროს დახლზე არ ფიქრობს. ჩემი მოძღვარი ხალხის და ქვეყნისათვის თავგანწირულია, ის აღზრდილია უმაღლეს კანონთა... გავლენის ქვეშ და ეს სწავლა იქამდის ტენდენციოზური არის, რომ თვით ჩემი მოძღვარიც თუ არ იდეალურს, ტენდენციურს ქმნილებად, სხვაგვარად ვერ გამოიხატებოდაო“.

ალექსანდრე ყაზბეგმა, რა თქმა უნდა, იცის, რომ ადამიანი გარემოს პროდუქტია, ბუნების შვილია. მაგრამ მას არ სწამს უცვლელ აბსოლუტად ქცეული გარემო, რომელიც უბრალოდ, ფოტოგრაფიულად გადაიღება ადამიანის შეგნებაში თუ ხელოვნებაში. თვით ყოვლისშემძლე ბუნება მის ნაწარმოებებში მსახურის როლს ასრულებს, იგი იცვლება ადამიანის გონებრივი და სულიერი მოძრაობის შესაბამისად. ნამდვილი ხელოვნება ადამიანის სულიერი მოძრაობის ამაღლებულ აზრთა და განცდათა შემოქმედებითი ხატვაა და არა „ბუნების ყოველწამური ცვლილების“ ბარომეტრული აღწერა. ალექსანდრე ყაზბეგს არ სწამს „აზრის გაუტარებლად უსულო სურათების“ ხატვა, მოვლენათა ობიექტივისტური ჩვენება, თუმცა აზრებითა და ტენდენციებით უსაფუძვლოდ გადატვირთული ნაწარმოებიც ხელოვნების ქმნილებად არ მიაჩნია. „აზრი უექველად უნდა იყვეს ყოველ უბრალო აღწერაშიც“, — ამბობს იგი, — ნამდვილი ხელოვნების ნაწარმოები მაშინ გვეძლევა, „როდესაც აზროვნება და სურათოვნება ერთმანეთს წესიერად შესზავდებიან“¹. ალექსანდრე ყაზბეგის ეს თვალსაზრისი, მისი მთელი შემოქმედება და მსოფლმხედველობა საქართველოს ეროვნულ-განმათავისუფლებელი მოძრაობის იდეოლოგიის შემდგომ განვითარებას წარმოადგენდა ქართული განმანათლებლური აზროვნების გვიანდელ პერიოდში.

ვაჟა-ფშაველა (1861—1915 წწ.). ვაჟა-ფშაველა ფშავში, სოფელ ჩარგალში დაიბადა, მღვდლის ოჯახში. წერა-კითხვა მამამ ასწავლა. რვა წლის ვაჟა თელავის სასულიერო სასწავლებელში მიაბარეს. აქ იგი ექვს წელიწადს სწავლობდა. შემდეგ ორი წელი თბილისის საოსტატო ინსტიტუტთან არსებულ ორკლასიან სასწავლებელში დაჰყო, ხოლო 1879 წლიდან 1882 წლამდე გორის საოსტატო სემინარიაში განაგრძობდა სწავლას. სხვა სასწავლებლებთან შედარებით ამ სემინარიას ის უპირატესობა ჰქონდა, რომ იქ ძოსწავლეებს უშინკის და გოგებაშვილის მიმდევარი პედაგოგები ზრდიდნენ და ქართული ლიტერატურის შესწავლასაც დიდი ყურადღება ექცეოდა. გორის სემინარიის დემოკრატიულად და რევოლუციურად მოაზროვნე მასწავლებლები (სემიონოვი, მ. ყიფიანი) ხელს უწყობდნენ მო-

¹ ა. ყაზბეგი, რჩ. ნაწერები, გვ. 735.



ვაჟა-ფშაველა

წაფეებს თვითგანვითარების გზითაც შეეძინათ ცოდნა. ამ პერიოდში ღრმად გაეცნო ვაჟა ქართულ, რუსულ და ევროპულ ლიტერატურას.

გორში ყოფნის დროს ვაჟა-ფშაველა დაკავშირებია ხალხოსანთა საიდუმლო წრეს, მაგრამ მისი გონებრივი ინტერესი მოწაფეობიდანვე უფრო მხატვრული ლიტერატურისაკენ ყოფილა მიმართული, ვიდრე პოლიტიკისაკენ, ხალხოსნობა კი მას იმდენად სწამდა, რამდენადაც იგი მთელი ერის და არა მხოლოდ გლეხობის განთავისუფლების საქმეს ემსახურებოდა. ამ დროს დაიწყო ვაჟამ ლექსებისა და კორესპონდენციების წერა.

გორის საოსტატო სემინარიის დამთავრების შემდეგ ვაჟა-ფშაველა მასწავლებლად მსახურობდა ერწოში, სოფელ ამტნისხევში. აქ მას შეტაკება მოუხდა ადგილობრივ მიწისმფლობელებთან და ცარიზმის მოხელეებთან, ამის გამო იძულებული გახდა თავი დაენებებინა სამსახურისათვის.

1883 წელს ვაჟა-ფშაველა პეტერბურგს გაემგზავრა და ლექციებს ისმენდა უნივერსიტეტის იურიდიულ ფაკულტეტზე. სიღარიბის და ოფიციალური მეცნიერებისადმი გულგრილობის გამო ვაჟამ უნივერსიტეტს თავი დაანება და სამშობლოში დაბრუნებულმა კვლავ მასწავლებლობას მოჰკიდა ხელი ჯერ თავად ამილახვრის ოჯახში, ბოლოს სოფელ დიდ თონეთში. საიდანაც კვლავ დათხოვნილ იქნა ადგილობრივ ადმინისტრაციასთან შეტაკების გამო.

1888 წელს ვაჟა-ფშაველა მუდმივად დამკვიდრდა სოფელ ჩარგალში. სადაც სოფლის მეურნეობასაც მისდევდა და თავის გენიალურ მხატვრულ ნაწარმოებებსაც ქმნიდა. მძიმე ფიზიკურმა და გონებრივმა შრომამ და გაჭირვებამ ნაადრევად მოტეხა დიდი პოეტი, რომელმაც ფართო პოპულარობას მხოლოდ სიცოცხლის ბოლო წლებში მიაღწია¹.

ვაჟა-ფშაველას შემოქმედებისა და მსოფლმხედველობის ქვაკუთხედი პატრიოტიზმი და ჰუმანიზმია. ერისა და კაცობრიობის სიყვარულითაა

¹ გ. ქიქოძე, თხზ. ტ. III, 1965, გვ. 349—351.

გამსჭვალული მისი ლირიკა, პროზა, ეპოსი. ვაჟკაცობისა და გმირობის, კაცთმოყვარეობისა და სოლიდარობის, თანასწორობისა და თავისუფლების იდეალებს ნერგავდნენ მის თანამედროვე და მომავალ თაობათა შეგნებაში „სტუმარ-მასპინძელი“ და „ბახტრიონი“, „შელის ნუკრის ხაამბობი“ და „გოგოთურ და აფშინა“, „ალუდა ქეთელაური“ და „გველისმჭამელი“, „კოსმოპოლიტიზმი და პატრიოტიზმი“, „ნიჭიერი მწერალი“, „სად არის პოეზია“, „რა არის თავისუფლება?“, „რას ჰქვიან თავისუფლება?“

ვაჟა-ფშაველას ჰუმანისტური მსოფლმხედველობის საგანი მთელი ბუნების და მისი თავისებური ნაწილის—კაცობრიობის ისტორიის—რაობაა, მაგრამ რაკი, მისი აზრით, „ცალ-ცალკე ეროვნებათა განვითარება აუცილებელი პირობაა მთელის კაცობრიობის განვითარებისა“, მისი ჰუმანიზმი პატრიოტიზმის საფუძველზე შენდება. „მეცნიერება და გენიოსები გვიხსნიან გზას კოსმოპოლიტიზმისაკენ, — წერდა იგი, — მაგრამ მხოლოდ პატრიოტიზმის, ნაციონალიზმის მეოხებით. განავითარეთ ყოველი ერი იქამდის, რომ კარგად ესმოდეს თავისი ეკონომიური, პოლიტიკური მდგომარეობა, თავისი სოციალური ყოფნის ავკარგი, მოსპეთ დღევანდელი ეკონომიური უკუღმართობა და, უეჭველია, მაშინ მოისპობა ერთისაგან მეორის ჩასანთქმელად მისწრაფება, ერთმანეთის რბევა, ომები, რომელიც დღეს გამეფებულია დედამიწის ზურგზე... პატრიოტიზმი უფრო გრძნობის საქმეა, ვიდრე ჰკუთვნებისა... კოსმოპოლიტიზმი მხოლოდ ჰკუთნის ნაყოფია..., იგი საღსარია იმ უბედურების ასაცილებლად, რომელიც დღემდის მთელს კაცობრიობას თავს დასტრიალებს. ამიტომ კოსმოპოლიტიზმი ასე უნდა გვესმოდეს: გიყვარდეს შენი ერი, შენი ქვეყანა, ნუ გაძულს სხვა ერები და ნუ გშურს იმათთვის ბედნიერება, ნუ შეუშლი იმათ მისწრაფებას ხელს და ეცადე, რომ შენი სამშობლო არავინ დაჩაგროს და გაუთანასწოროდეს მოწინავე ერებს“¹. ასეთია ვაჟა-ფშაველას მსოფლმხედველობის საფუძველი. ამ თვალსაზრისით უდგებოდა დიდი ჰუმანისტ-საზოგადოებრივი ცხოვრების ყველა მოვლენას, სოციალ-ეკონომიურს თუ იდეურ-ლიტერატურულს, და ეს მიდგომა უწინარეს ყოვლისა ქართველი ერის უმრავლესობის ინტერესების გამომხატველად მიაჩნდა. მისი თქმით. ერი თხოულობდა „ერთს გარკვეულს მოძღვრებას საეროს, საქვეყნოს. საზოგადოს“, რომელიც ერის უმრავლესობისათვის უნდა ყოფილიყო ხელსაყრელი². ვაჟა-ფშაველას იდეალად ესახებოდა ეროვნულად და სოციალურად განთავისუფლებული საქართველო, თავისებური ნაწილი მოწინავე კაცობრიობისა, ხოლო ამ იდეალის განხორციელების უპირველეს საშუალებად ხალხის მეცნიერული, რეალისტურ-მატერიალისტური

¹ ვ ა ჯ ა - ფ შ ა ვ ე ლ ა , თხზულებათა სრული კრებული ხუთ ტომად, ტ. V, 1961, გვ. 213—215.

² იქვე, გვ. 226.

განათლება მიაჩნდა. გენიალური ქართველი პოეტი დიდი განმანათლებელი მოაზროვნე იყო. „გაუნათლებელი, გაუზრდელი ხალხი, როგორც უნდა დემოკრატიული მმართველობა დაარსდეს, მაინც მმართველთა სათამაშო ბურთი და სათლელი ღუმა იქნებაო“, — ამბობდა იგი და თვით 1905 წლის რევოლუციის სასიკეთო შედეგად იმას თვლიდა, რომ მან გამოამყვანა ხალხის მოუმზადებლობა და სიბნელე და წარმოშვა კულტურული მუშაობის გზით ამ მოუმზადებლობის მოსპობის შესაძლებლობა¹.

როგორც პიროვნება და შემოქმედი, ვაჟა-ფშაველა ამაყი და ქედუხრელი ადამიანი იყო და არ ემორჩილებოდა ცარიზმის მემამულურ-ბიუროკრატიულ რეჟიმს, უარყოფდა მის თანამედროვე საზოგადოებაში გამეფებულ თავადაზნაურულ ბედოვლათობასაც და მედუქნურ, ეგოისტურ სულსაც, რომელიც ადამიანს კაცობას აკარგვინებდა, ხმალს არშინზე აცვლევინებდა, სინდისს — ფულზე. იგი „მიწისმუშა ერის“ დამცველად გამოდიოდა, მაგრამ მხოლოდ „მხვნელ-მთესველი ხალხის“ პატრიარქალურ-თემური ცხოვრებაც არ მიაჩნდა იდეალად და ფულზე დამყარებული ბურჟუაზიული პროგრესიც ერისა და ადამიანობის თვალსაზრისით მთლად დასაგმობად როდი ეჩვენებოდა. „ქართველი ერი იმ თავიდან მხვნელ-მთესველი ერია, — წერდა იგი, — მისი ძალ-ღონე დამოკიდებული იყო პურ-ღვინოზე და მათს მასაზრდოებელს დედამიწაზე. მართლაც, დედამიწა დიდი საუნჯეა ერისათვის. უტერიტორიოდ ერი ვერაფერი ერია... მაგრამ... ამ ბოლო დროს ფულმა ყელი მოიღერა, გათამამდა, ფულის პატრონთ თვითონ დაგვიდგინეს ნიხრი მიწის ნაწარმოებისა. ამ ამბავს ჩვენმა ხალხმა კარგა ხანი ყური უგდო... ფული ძალა ყოფილაო იფიქრა, მერე ისეთი ძალა, რომელიც თავის ქეიფზე ათამაშებს მიწის მუშას და იმის ნაწარმოებს. მაშასადამე, ჩვენც უნდა ვეცადნეთ ეს ძალა შევიძინოთ, რომ სხვას არ ვავეთელინოთ... უნდა გავმდიდრდეთ... უამისოდ... ხსნა არ არის!.. პროგრესი სიმდიდრემ დაბადა და პროგრესმა ხომ წინ წამოაყენა იდეა სათნოებისა, ძმობისა, ერთობისა, ერთხმობისა და სიყვარულისა, რაიც არ ძალუძს სიღარიბეს“². ვაჟა-ფშაველა წინააღმდეგია „ეროვნული იდეალის წაწყმედისა“, მისი „ჩოთქამდე“ დაყვანისა. იგი არც იმის მომხრეა, რომ თავადაზნაურობა გაღარიბდეს გლეხობის გამდიდრების მიზნით, რადგან „თავადაზნაურობა ჩვენს ბურჟუაზიას“ (ე. ი. საზოგადოების მოწინავე ნაწილს) წარმოადგენს და „გაღარიბება გლეხკაცობის გულისათვის ამ ჩვენი ერის კულტურული ნაწილისა მავნებლად უნდა მივიჩნიოთ დღესდღეობით“. გარდა ამისა, „ან რაღა გაღარიბებულა უნდა ისედაც გაღარიბებულსა და გაძვალტყავებულ თავადაზნაურობას? ვისთვისღა საშიში ეს წოდებო?“ გაუნათლებელ, „კულტურის გარეშე დარჩენილ სოფლის

¹ ვაჟა-ფშაველა, თხ. სრ. კრებ., ტ. V, გვ. 255.

² იქვე, გვ. 424 — 425.

გლენჯაცობას არავითარი წვლილი არ შეაქვს“ ეროვნული თავისუფლები-სათვის ბრძოლის საქმეში. „დიდი დროა საჭირო, ვიდრე იგი ჩაებმება იმ საერთო ფერხულში, რომელშიაც არიან ჩაბმულნი: წვრილი ქალაქის ბურჟუაზია, სამღვდლოება და (გაღარბებული) თავადაზნაურობა“. მა-ხამდე კი აგრარული საკითხის შეტანა ეროვნულ-განმათავისუფლებელი მოძრაობის პროგრამაში არღვევს „ერთობას და სოლიდარობას ქართვე-ლების სხვადასხვა წოდებათა შორის“ და ზიანი მოაქვს ხალხის ეროვნული განთავისუფლებისათვისო¹.

ვაჟა-ფშაველა ხედავს, რომ კლასთა ბრძოლა მისი დროის საზოგადოე-ბის ძირითადი ნიშანია, ჩაგრული, „ბედნიერებაწარმეული ნაწილი საზო-გადოებისა (კლასი) ებრძვის მეორეს, რომელმაც მისი ბედნიერება მი-ითვისა, მისი თავისუფლება და ქონება მიითვისა“. ეს ბრძოლა აუცი-ლებელიცაა და სამართლიანიც, რადგან „თავისუფლება უნდა იყოს საერთო, საყოველთაო და არა საკუთრება რამდენიმე ადამიანისა, როგორც დღეს არი“, — ამბობს იგი. ერთის თავისუფლებამ არ უნდა შეზღუდოს მეორე პიროვნების ან მთელი საზოგადოების თავისუფალი მოქმედება, მიმართული ხალხის „საზოგადო ბედნიერებისა-კენ“. „თავისუფლებამ უნდა მისცეს მუშას მთელი ნაყოფი შრომისა“². ამის მისაღწევად „თავისუფალი უნდა იყოს არა რომელიმე ერთი წოდება, არამედ მთელი ერი. ქვეყანაც მხოლოდ მაშინ იქნება ბედნიერი, როცა მოისპობა წოდებრივი უპირატესობანი, ყველა წოდება იქნება თავისუფა-ლი, ე. ი. ბედნიერი... ნუ ეძებთ იქ თავისუფლებას, სადაც ცხოვრებას ისევ საფუძვლად წოდებრივი განსხვავება აქვს დადებული, საცა ყველას გა-ნურჩევლად წოდებისა და გვარიშვილობისა, არ ეძლევა საშუალება პატიოსანი შრომით მოიპოვოს პური არსებისა, საცა შრომა ღირსეულად არ ფასდება, სადაც არ არის თანასწორად განაწილებული ცოდნა, ქონე-ბა“³. ვაჟა-ფშაველა არ ეთანხმებოდა არც ხალხოსნებს და არც რადიკალ-დემოკრატებს, როცა ისინი მთელი ერის საკეთილდღეოდ უპირატეს როლს ანიჭებდნენ მხოლოდ რომელიმე წოდებას. საქართველოს ეროვ-ნულ-განმათავისუფლებელ მოძრაობაში სხვადასხვა მიმდინარეობათა წარმოშობას იგი დადებითად ეკიდებოდა⁴, მაგრამ ყველაზე სწორად ილია ჭავჭავაძის, აკაკი წერეთლის და იაკობ გოგებაშვილის პატრიოტული, პუშანისტური და დემოკრატიული თვალსაზრისი მიაჩნდა. ილია ჭავჭავაძეს თვლიდა „მთელი საქართველოს ერის იდეოლოგად“, რომელმაც „მკვიდრ ნიდაგზე დააყენა ეროვნული საკითხი“. და როცა ილია მოკლეს, ვაჟა-ფშაველა ასე ეფიცებოდა მას: კიდევ უფრო მალლა ავწევთ შენს მიერ აფრიალებულ დროშას და მტკიცედ ვემსახურებით შენს მიერ ნაანდერძევ

¹ ვ ა ჯ ა - ფ შ ა ვ ე ლ ა, თხზ. სრ. კრებ., ტ. V, გვ. 241—243.

² იქვე, გვ. 416—419.

³ იქვე, გვ. 413—415.

⁴ იქვე, გვ. 427—429.

იდეალებს — „ძმობის, ერთობის, თავისუფლების და სიყვარულისასო“¹. ვაჟა-ფშაველას მთელი შემოქმედება და მსოფლმხედველობა ამ ფიციის აღსრულებაა. ილიასავით ზომიერი პოლიტიკის მომხრე იყო ვაჟა. ილიასე-ბურად ლაპარაკობდა იგი „ღმერთთან“ ადამიანის, ერის, კაცობრიობის საკეთილდღეოდ, რადგან ნამდვილი მწერალი, მისი გაგებით, არის ღვთა-ებრივი ნიჭის, დიდი გრძნობის და ცოდნის მქონე გენიოსი, „ვისაც დიდად უყვარს ადამიანი..., ვისშიაც ძლიერად სჩქეფს ეროვნული სისხლი..., უკვდავი ჭეშმარიტება, სამარადისო მშვენიერება, ცხოვრების მიერ წარმოქმნილი და გენიალური გონების მიერ ცხოვრების გასაუმჯო-ბესებლად გარდაქმნილი“².

ვაჟა-ფშაველა, უწინარეს ყოვლისა, პოეტი იყო და არა ფილოსოფო-სი, მაგრამ მისი შემოქმედება გამსჭვალულია ბუნების ყოველი საგნის სულისჩადგმულობის ანიმისტური რწმენით და ბუნების ღვთაებრიობის პანთეისტური გაგებით ნასაზრდოები³ რეალისტურ-მატერიალისტური მსოფლმხედველობით. თავისთავად ვაჟა-ფშაველას არც ღვთაება აინტე-რესებს და არც განყენებული ბუნება. მისი ფილოსოფიური თვალსაზრი-სის ძირითადი საკითხი ბუნებისა და ადამიანის ურთიერთობაა, მისი მთავარი საზრუნავი ადამიანია. საერთოდ ან კერძოდ ღმერთში თუ ადა-მიანში, იგი სამყაროს კი არ ეძებს, არამედ ადამიანის ადგილს ეძებს სამყაროში. ამ ძიების მთავარი შედეგი ისაა, რომ ვაჟა ბუნებისა და ადა-მიანის პარმონიულ ერთიანობას სწვდება, ბუნებაში ადამიანურს ხედავს, ხოლო ადამიანში ბუნებრივს. მოაზროვნე და მეტყველი ადამიანი განსხ-ვავდება „უენპირო ბუნებისაგან“, მაგრამ იგი მაინც მისი ნაწილია და „ცხოვრება ბუნების თანახმად“⁴ ადამიანის უპირველესი მოწოდებაა. ბუნება ყოვლისშემძლეა, თუმცა მისი ყოვლისშემძლეობა გარეშე ძალთა შედეგი კი არ არის, არამედ შინაგანი „წესრიგისა“⁵. ბუნების წესრიგი გონივრულია და მისი უმაღლესი ქმნილების — ადამიანის — ცხოვრება-საც გონივრულობა უნდა ედოს საფუძვლად. ბუნების არსებობის აზრი სი-ცოცხლისადმი სწრაფვია და ადამიანიც სიცოცხლისაკენ მიისწრაფის. თვითრჩული და ტურფა ბუნება მრავალფეროვანი და მთლიანია. იგი სიკეთის შემოქმედიცაა და ბოროტების მქნელიც, პაწაწინა იას „და-ჩაგრულ სიმართლესაც“ შეიცავს და ქედმაღალი მთების გულზვიადობა-საც. ადამიანი და ადამიანთა საზოგადოებაც ბუნების მსგავსია, სიკეთისა და ბოროტების დაპირისპირება აქაც თვალსაჩინოა, თუმცა ბუნების

¹ ვ ა ჟ ა - ფ შ ა ვ ე ლ ა , თხზ. სრ კრებ., ტ. V, გვ. 231—232.

² იქვე, გვ. 262. იხ. აგრეთვე, გ. ქ ი ქ ო ძ ე , რჩ. თხზულებანი, ტ. 111, გვ. 352.

³ გ. ქ ი ქ ო ძ ე , რჩ. თხზულებანი, ტ. 111, გვ. 352.

⁴ იხ. ა ლ . ს ა ლ ა რ ი ძ ი ს მოგონება ს. ყუბანეიშვილი, ვაჟა-ფშაველა, 1937, გვ. 20.

⁵ ა . ქ უ თ ე ლ ი ა , ვაჟა-ფშაველა, 1947, გვ. 30.

შვილს, მისი ღირსებისა და ნაკლის მქონე დიდებულ ადამიანს, „კაი ყმას“ ძალაც შესწევს სიკეთეს ბოროტებაზე გაამარჯვებინოს და დედამიწაზე დაამკვიდროს ჭეშმარიტების, მშვენიერების, თანხმობის, სიყვარულის, თავისუფლების, შრომის, თანასწორობისა და ბედნიერების აქამდე ზეცაში ნაძებნი სამეფო¹. ამაში ხედავს დიდი ქართველი ჰუმანისტი და დემოკრატი ადამიანის, ერის და კაცობრიობის უმაღლეს დანიშნულებას. ვაჟაფშაველას მსოფლმხედველობა საქართველოს ეროვნულ-განმათავისუფლებელი მოძრაობის განმანათლებლური აზროვნების ჰუმანისტურ-დემოკრატიული მიმდინარეობის გვირგვინი იყო.

რადიკალურ-დემოკრატიული მიმდინარეობა. ერისა და კაცობრიობის ჰუმანისტური გაგება საქართველოს ეროვნულ-განმათავისუფლებელი მოძრაობის მეორე მიმდინარეობის (მეორე დასის) წარმომადგენლები-სათვისაც არ ყოფილა უცხო. ამ მიმდინარეობის სოციალური საფუძველი და თეორიული წყაროები ძირითადად იგივე იყო, რაც პირველდასელები-სა, მაგრამ იგი მესამე წოდების კლასობრივ და ეროვნულ მოთხოვნათა უფრო რადიკალურ გამომხატველად და განმანათლებლურ-უტოპიურ-სოციალისტური იდეების შედარებით თანმიმდევრულ დამკველად გამოდიოდა. ყველა დროს მუდმივად არსებული ერის აბსტრაქტულ თვალსაზრისთან ერთად მეორედასელები თანადროული, ფეოდალიზმიდან კაპიტალიზმში გარდამავალი ეპოქის, გათიშვა-გაერთიანების პროცესში მყოფი ერის შედარებით კონკრეტულ გაგებას ემზრობოდნენ. ჰუმანისტურ მატერიალიზმთან და კრიტიკულ რეალიზმთან ერთად ისინი პოზიტივიზმის, საბუნებისმეტყველო მატერიალიზმის და შეუფერავი რეალიზმის პრინციპებსაც იცავდნენ. ისინიც აღიარებდნენ თავადაზნაურობის ქონების და თავადაზნაურულ დაწესებულებათა გამოყენების შესაძლებლობას ერის ინტერესებისათვის, მაგრამ გადაჭრით უარყოფდნენ თავადაზნაურობის კლასობრივ მეთაურობას ახალ საქართველოში. ეროვნული და სოციალური ჩაგვრისაგან თავისუფალი, დამოუკიდებელი საქართველოს მშენებლად და ბატონ-პატრონად მათ მიაჩნდათ მშრომელი, განათლებული, აღორძინებული, ასოციაციაში გაერთიანებული წვრილი მესაკუთრენი. რადიკალ-დემოკრატიები მეტი გაბედულებით გამოდიოდნენ ფეოდალიზმის ნაშთების წინააღმდეგ, ქადაგებდნენ ქვეყნის დაჩქარებულ წინსვლას, უწინარეს ყოვლისა, ვაჭრობისა და მრეწველობის ფართოდ განვითარების საფუძველზე, აკრიტიკებდნენ კაპიტალიზმის უარყოფით მხარეებს, იბრძოდნენ ქვეყნის სრული დემოკრატიზაციისათვის, იცავდნენ მესამე წოდებას, განსაკუთრებით იმ მშრომელ მესაკუთრეთა ინტერესებს, რომლებმაც უმიწაწყლობის გამო სოფელი მიატოვეს, ქალაქს მიაშურეს და პურისა და შიწის სასყიდლის საშოვნად სავაჭრო-სამრეწველო საქმიანობაში წვალება

¹ მ. კ ე ე ს ე ლ ა ვ ა, ფაუსტური პარადიგმები, II, 1961, გვ. 109— 1.

არჩიეს რუს მოხელეთა და ქართველ მემამულეთა წინააღმდეგ უთანასწორო ბრძოლაში დაღუპვას.

მეორედასელთა რადიკალური პროგრამის, მათი უტოპიურ-სოციალისტური იდეალების რევოლუციურ-დემოკრატიული შინაარსი ობიექტურად საქართველოს ბურჟუაზიულ-დემოკრატიული ეროვნული განვითარების პროგრესულ მოთხოვნილებებს გამოხატავდა.

რადიკალურ-დემოკრატიული მიმდინარეობის ორგანოები იყო „დროება“ (1866—1885 წწ.), „სასოფლო გაზეთი“ (1868—1874 წწ.), „კრებული“ (1871—1873 წწ.), „ტიფლისკი ვესტნიკი“ (1871—1880 წწ.), „ობზორი“ (1878—1880 წწ.), „ნოვოე ობოზრენიე“ (1886—1899 წწ.), „მოამბე“ (1894—1897 წწ.), „კვალი“ (1893—1903 წწ.). ამ რადიკალურ-დემოკრატიულმა ყურნალ-გაზეთებმა ჰუმანისტურ-დემოკრატიულ „საქართველოს მოამბესთან“ და „ივერიასთან“ ერთად დიდი როლი შეასრულეს ეროვნულ-რევოლუციური, უტოპიურ-სოციალისტური და მატერიალისტური იდეების გავრცელებაში, რეალისტური ლიტერატურისა და დემოკრატიული აზროვნების დამკვიდრებაში.

რადიკალურ-დემოკრატიული მეორე დასის იდეურ მიმდინარეობას მეთაურობდნენ გიორგი წერეთელი, ნიკო ნიკოლაძე და სერგი მესხი.

გიორგი წერეთელი (1842—1900 წწ.). თავისი დროის დიდი განმანათლებელ-დემოკრატი, პატრიოტი და რეალისტი გიორგი ექვთიმეს ძე წერეთელი საქართველოს ეროვნულ-განმათავისუფლებელი მოძრაობის ერთ-ერთი გამოჩენილი ხელმძღვანელი იყო. იგი დაიბადა იმერეთში, სოფელ გორისაში, აზნაურის ოჯახში. დაწყებითი განათლება ოჯახში მიიღო მამის ხელმძღვანელობით. 1851 წლიდან ქუთაისის გიმნაზიაში სწავლობდა. ბატონყმური სინამდვილე, ცარიზმის კოლონიური პოლიტიკა და ცემატყეპაზე დამყარებული აღზრდა ყრმობიდანვე პროტესტანტულ სულისკვეთებას უნერგავდა მომავალ რადიკალ-დემოკრატს. მრავალსაუკუნოვანი მშობლიური ლიტერატურისა და ისტორიის შესწავლა აძლიერებდა მის პატრიოტულ მისწრაფებებს.

1861—1863 წლებში გიორგი წერეთელი პეტერბურგის უნივერსიტეტის საბუნებისმეტყველო ფაკულტეტზე სწავლობდა. ამ დროს მოხდა მისი იდეური და რევოლუციური ნათლობა: პეტერბურგში ჩასვლისთანავე გ. წერეთელი ნ. ჩერნიშევსკის მიმდევარ რუს, ქართველ და პოლონელ სტუდენტთა წრეში მოხვდა და აქტიური მონაწილეობა მიიღო ცარიზმის წინააღმდეგ მიმართულ დემონსტრაციაში, რისთვისაც რამდენიმე თვე პეტრე-პავლეს ციხეში ჩასვეს. სტუდენტობის წლებში გ. წერეთელმა ღრმად შეისწავლა რუსეთის, დასავლეთ ევროპის და ამერიკის რევოლუციურ-დემოკრატიული, ეროვნულ-განმანათლებლური და უტოპიურ-სო-

ციალისტური ლიტერატურა. 1863 წელს მან „საქართველოს მოამბეში“ გამოაქვეყნა სტატია „ცისკარს“ რა აკაკანებდა?“, რომელშიც მშვენივრად შეერთებული იმ დროის მატერიალისტური აზროვნების კარგი ცოდნა რევოლუციურ-დემოკრატიული პოლიტიკური პროგრამის მოხერხებულ გადმოცემასთან.



გიორგი წერეთელი.

1864 წელს გიორგი წერეთელი პეტერბურგიდან მშობლიურ სოფელში დაბრუნდა და გლეხთა ბავშვებისათვის შინაური სკოლა გახსნა, თვითონ გლეხთაშიც ანტიბატონყმურ აგიტაციას ეწეოდა.

1866 წელს გიორგი წერეთლის რედაქტორობით იწყო გამოსვლა საქართველოს ეროვნულ-განმათავისუფლებელი მოძრაობის რადიკალურ-დემოკრატიული მიმდინარეობის ორგანომ გაზეთმა „დროებამ“. 1863 წლიდან იგი ქართველი გლეხობისათვის სცემდა „სასოფლო გაზეთს“. 1871—1873 წლებში რედაქტორობდა ჟურნალ „კრებულს“. იგი აქტიური თანამშრომელი იყო თბილისის თითქმის ყველა ქართული და რუსული გაზეთისა. მისი რედაქციით დაიბეჭდა არაერთი ძველი ძველი ქართული მწერლობისა.

1873—1877 წლებში გიორგი წერეთელი დასავლეთ ევროპაში ცხოვრობდა სწავლის გადრმავეების მიზნით. 1874 წელს შვეიცარიაში მისი თავმჯდომარეობით ჩატარდა ქართველ, სომეხ, აზერბაიჯანელ და დაღესტნელ მოღვაწეთა კონგრესი, რომელმაც წამოაყენა ამიერკავკასიის ფედერაციული რესპუბლიკის შექმნის იდეა. 1877—1878 წლებში გიორგი წერეთელი პეტერბურგის გაზეთ „გოლოსის“ კორესპონდენტი გახდა, რუსეთის არმიას შეჰყვა სამხრეთ საქართველოს განთავისუფლებულ რაიონებში, ერთხანს ფრონტის ხაზიც გადალახა არალეგალურად და დიდ სახელმწიფოთა შორის წარმოშობილ წინააღმდეგობათა გამოყენების გზით თავისი ეროვნული იდეალის განხორციელების შესაძლებლობა მოსინჯა. იგი აღფრთოვანებული შეხვდა რუსეთის არმიის გამარჯვებას თურქეთთან ომში და სამხრეთ საქართველოს შემოერთებას, თუმცა კვლავაც ყოველგვარი საშუალებით ეწინააღმდეგებოდა ცარიზმის კოლონიურ პოლიტიკას.

80-იან წლებში გიორგი წერეთელი სამრეწველო საქმიანობამ გაიტაცა და ერის ეკონომიური აღორძინების გზით ცდილობდა საქართველოს ეროვნული განთავისუფლებისათვის ხელის შეწყობას. 90-იან წლებში იგი მარქსისტულ ახალგაზრდობას დაუკავშირდა და ახალ საზოგადოებრივ ძალებზე დაამყარა ეკონომიურად ჭლიერი და პოლიტიკურად დამოუკიდებელი საქართველოს აღდგენის იმედი. 1893 წელს მან მისი მეუღლის ახასტასია თუმანიშვილ-წერეთლის საყმაწვილო ჟურნალ „ჭეჭილის“ დამატებად რადიკალურ-დემოკრატიული მიმართულების გაზეთ „კვალის“ გამოცემა იწყო და მის ფურცლებზე ადგილი დაუთმო მარქსისტულ ახალგაზრდობას, რომელსაც საქართველოს ეროვნულ-განმათავისუფლებელი მოძრაობის მესამე დასი უწოდა და იგი მეორედ ასეღათა რადიკალურ-დემოკრატიული მიმდინარეობის უშუალო გამგრძელებლად და მემკვიდრედ გამოაცხადა.

მრავალმხრივია გიორგი წერეთლის შემოქმედება და მოღვაწეობა. იგი იყო თავისი დროის ერთ-ერთი პოპულარული ბელეტრისტი და პუბლიცისტი, რედაქტორი და კორესპონდენტი, დრამატურგი და არქეოლოგი, მრეწველი და პოეტი, ისტორიკოსი და ბუნებისმეტყველი. მის პუბლიცისტურ სტატიებსა, მოთხრობებსა და სოციალურ რომანებში („ციკარს“ რა აკაკანებდა?, „რამდენიმე აზრი ჩვენს ცხოვრებაზე“, „ამ დროის მოძრაობა“, „შრომის მოყვარეობა დიდი ძალაა“, „რა უნდა გამოეტანა მსმენელს უფ. ი. თარხნიშვილის ლექციებიდან?“, „ჩვენ და ჩვენი „დროება“, „საუკეთესო ცოდნა“, „საქართველოს პოლიტიკური ცხოვრება ძველისძველად“, „გიგო გაბაშვილის მხატვრობა“, „კიბა აბაშიძე და ჩვენი ახალგაზრდობა“, „მგზავრის წიგნები“, „მამიდა ასმათი“, „ჩვენი ცხოვრების ყვავილი“, „პირველი ნაბიჯი“, „გულქანი“) მართლად აისახა XIX საუკუნის საქართველოს ეროვნულ-განმათავისუფლებელი მოძრაობის, ფეოდალიზმიდან კაპიტალიზმში გარდამავალი ქართული საზოგადოების თავისებურებანი.

მსოფლმხედველობრივად გიორგი წერეთელი ქართული განმანათლებლობის რადიკალურ-დემოკრატიული მიმდინარეობის თვალსაჩინო წარმომადგენელი და მეთაურია¹. პატრიოტიზმი, ხალხის ეროვნული თავისუფლებისა და თანასწორუფლებიანობისათვის ბრძოლა მისი განმანათლებლური მსოფლმხედველობის უპირველესი შემადგენელი ნაწილია. მისი აზრით, ჩაგრული ერის რევოლუციურ-დემოკრატიული და თვით სოციალისტური მოძრაობის უმთავრესი მიზანი ჯერ ეროვნული თავისუფლების მოპოვება და შემდეგ სოციალური უთანასწორობის დაძლევა უნდა ყოფილიყო². იგი არ უარყოფდა რუსეთთან საქართველოს შეერთე-

¹ მ. გ ა ფ რ ი ნ დ ა შ ვ ი ლ ი, გიორგი წერეთლის მსოფლმხედველობა, 1955, გვ. 7.

² გ. წ ე რ ე თ ე ლ ი, წერილი ევნატე ნინოშვილისადმი (ე. ნინოშვილი, თხზ., ტ. 111, 1930, გვ. 156—157).

ბის პროგრესულობას, მაგრამ ვერ ურიგდებოდა ქართველი ხალხის ეროვნულ-კოლონიური ჩაგვრის თვითმპყრობელურ პოლიტიკას. „ერთი ხელით მოგცე შენ სინათლე და მეორე ხელით განვაქარვო იგი სიბნელის უკუხით“, — ასე ახასიათებდა გიორგი წერეთელი რუსეთის თვითმპყრობელობის პოლიტიკას საქართველოში. ქართველი ხალხის ეროვნული თანასწორუფლებიანობისათვის ერის ყველა პროგრესული ფენის შეკავშირება და რუსეთის ყველა ჩაგრული ერის ერთიანი ფრონტის შექმნა თვითმპყრობელობის წინააღმდეგ საბრძოლველად, — ასეთია გ. წერეთლის ეროვნული პროგრამის ძირითადი შინაარსი. იგი ემხრობოდა რუსეთთან საქართველოს შეთანხმებას „ორი პრინციპით: შინ ყოველი განკერძოებული საკუთარი თავისუფლებისა და საკუთარი შინაგანი გამგეობის მინიჭება; ხოლო გარეთ მთელი სახელმწიფოსათვის შეერთებული შრომა და ერთმანეთის შეწვევით სახელმწიფოს დაცვა და განმტკიცება“¹.

გიორგი წერეთელი თავისი დროის დიდი დემოკრატი იყო. ბრძოლა საქართველოს დამოუკიდებლობისათვის, „ნამდვილი ეროვნული პრინციპის მომხრეობა“ მისთვის ნიშნავდა ყოველგვარი კავშირის გაწყვეტას ფეოდალურ-ბატონყმურ ჩამორჩენილობასთან, „ათასის წლის მომკილს ცხოვრების წესთან“, რომელიც განაპირობებდა ძველთაგანვე საქართველოს სახელმწიფოებრივი ცხოვრების დამღუპველი „ბოროტი წოდების“, თავადაზნაურობის მიერ „საწყალი მშრომელი გლეხების“ აღვირახსნილ ჩაგვრას და მასთან დაკავშირებულ ყველა ეროვნულ-საზოგადოებრივ უბედურებას. „რა ბედნიერი და ძლიერი ვიქნებოდით... რა ერთსულობა გვექნებოდა, რომ ჩვენში ერთ კაცს მეორის დაჩაგვრა არ შეძლებოდაო!“² — ოცნებობდა იგი. გიორგი წერეთელმა რეფორმამდელი და რეფორმის შემდეგ დროინდელი საქართველოს საზოგადოებრივი ცხოვრების საკმაოდ ნათელი ანალიზი მოგვცა, სწორად განსაზღვრა რეფორმების დროის სოციალური ჯგუფები, შეიწინააღმდეგა რეფორმების მემამულური კლასობრივი შინაარსი, რევოლუციურ-დემოკრატიული პოზიციებიდან გააკრიტიკა ლიბერალური შემთანხმებლობა და ქართველი განმანათლებლებიდან ერთ-ერთმა პირველმა ჩამოაყალიბა ბატონყმობის წინააღმდეგ ბრძოლის რევოლუციური განაწესი. მაგრამ რევოლუციურ ძალთა სისუსტის გამო ძველი საზოგადოების ერთბაშად გარდაქმნა არ მოხერხდა და რეფორმის შემდეგ კვლავ დარჩენილი მძლავრი ბატონყმური ნაშთების აღმოფხვრის იმედი რადიკალურმა განმანათლებელმა წვრილ მწარმოებელთა თანდათანობით განათლებასა და გაძლიერებაზე დაამყარა. რის მოპოვებაც „მუშა-ხალხმა“, „დაბალმა წოდებამ“ ბრძოლით ვერ შეძლო,

¹ გ. წერეთელი, ავსტრიის იმპერიის კანცლერი ბადენი („კვალი“, 1895, №49).

² იქვე, თხზ., სრ. კრებული, ტ.1, ს. ხუნდაძის რედ., 1931, გვ. 31.

ის შრომითა და მოხერხებით უნდა მოეპოვებინა. „გაფუჭებული და ღონე-გამოლეული ჩვენი თავადაზნაურობა“ მხარს ველარ უსწორებდა იმ დროს, როცა „მიწაზე დამოკიდებული ბატონყმობა ფულზე დამოკიდებული ბატონყმობით შეიცვალა“. ახალ საზოგადოებრივ ურთიერთობათა დასაყრდენ და წამყვან ძალად გიორგი წერეთელს მიაჩნდა „ხალხის უმთავრესი ნაწილი“, „ძველითგანვე გაჭირვებაში და შრომაში გაწაფული, გონიერი, სამართლიანი, მაგრამ უსამართლობით დაჩაგრული მუშა ხალხი“, რომელსაც, მისი აზრით, ნახევრად დამოკიდებულ მდგომარეობაშიც შეეძლო სათავეში ჩადგომოდა ახალ ცხოვრებას, ეშრომა, ვაჭრობის საშუალებით ფული და მიწა შეეძინა, რაციონალური წარმოების განვითარების გზით თავისუფალ, დამოუკიდებელ, კულტურულ მეურნედ გადაქცეულიყო და, ამრიგად, ჩამორჩენილი ბატონყმური საქართველო სამრეწველო და სასოფლო-სამეურნეო წარმოების განვითარების ფართო გზაზე გამოეყვანა¹. გიორგი წერეთელი არ აიდეალებდა რეფორმის შემდეგ განვითარებულ სავაჭრო-კაპიტალისტურ ურთიერთობას. იგი კარგად ხედავდა და გმობდა „ახალი ბატონყმობის“ მძარცველურ ხასიათს, ამჩნევდა, რომ საქართველოს უმთავრესად უცხოური წარმოშობის სავაჭრო და სავაზმო კაპიტალი ერის მშრომელი უმრავლესობის ექსპლოატაციის გზით ვითარდებოდა და „ახალი დროის მამლის ყვილი საქართველოშიც“ უმცირესობის გამდიდრებას და მშრომელი უმრავლესობის გაღარიბებას, „პროლეტარიატში ჩაცვენას“ იწვევდა². მაგრამ რადიკალური განმანათლებლისათვის უცხო იყო წვრილბუთჩუაზიული წუწუნი და კაპიტალისტურ ურთიერთობათა ცარიელი ლანძღვა. იგი აღიარებდა ახალ საზოგადოებრივ ურთიერთობათა პროგრესულობას ბატონყმობასთან შედარებით, მოუწოდებდა „მშრომელ ერს“ მრეწველობისა და სოფლის მეურნეობის ყოველმხრივ განვითარებისაკენ და იმავე დროს მკაცრად აკრიტიკებდა ევროპულ და ადგილობრივ კაპიტალიზმს, რომელიც „ერს ტვინს სწოვდა“ სიმდიდრის მოპოვებისათვის გააფთრებულ ბრძოლაში და საყოველთაო ეროვნული კეთილდღეობის ნაცვლად საყოველთაო ჩაგვრასა და ზნედაცემულობას ამკვიდრებდა.

გიორგი წერეთლის იდეალი იყო მშრომელთა საზოგადოება, რომლის ეკონომიური საფუძველი, მისი აზრით, იქნებოდა ერთსა და იმავე დროს მწარმოებელ, მომხმარებელ და გამსაღებელ ამხანაგობებში გაერთიანებულ მშრომელთა წვრილი საკუთრება და საერთო შრომა, ხოლო პოლიტიკური ფორმა — მთელი ხალხის მიერ არჩეული ეროვნული ხელისუფლე-

¹ გ. წერეთელი, ამ დროის ვითარება („კრებული“, 1872, №10); ამ საუკუნის ვითარება („კვალი“, 1897, №1).

² გ. წერეთელი, თხზ. სრ. კრებული, ტ. 1, გვ. 61; ჩვენ და ჩვენი „დროება“ („დროება“, 1879, №16).

ბა. ამ საზოგადოებაში პიროვნების გონივრული თავისუფლება და მთელი ერის კეთილდღეობა უნდა გამხდარიყო მშრომელთა თანასწორობის, თავისუფლებისა და ბედნიერების საფუძველი. ასე ერთდებოდა რადიკალური განმანათლებლის საზოგადოებრივ-პოლიტიკურ პროგრამაში ეროვნული, ბურჟუაზიულ-დემოკრატიული და სოციალისტური იდეალები¹.

საზოგადოების გარდაქმნის რადიკალურ პროგრამას გიორგი წერეთელი რეალისტურ-მატერიალისტური ფილოსოფიით ასაბუთებდა. მუდმივი მოძრაობისა და განვითარების პროცესში მყოფი „მრავალგვარი ბუნება“ ანუ „მატერია და მასთან თანდაყოლილი ძალა“ მიაჩნდა მას ყველა მატერიალური და სულიერი მოვლენის საწყისად². ბუნების ნაწილის, ადამიანის არსებობის უმთავრეს ბუნებრივ მოთხოვნილებებად იგი თვლიდა „თავმოყვარეობის და თავდაცვის“ გრძნობას, თავისუფლებისა და ბედნიერებისაკენ მისწრაფებას, ხოლო ბუნების მეცნიერებას ისეთ საშუალებად, რომელიც საზოგადოებას მიაღწევინებს „იმ ნათელს და მაღალ თავის-ცნობამდის, საიდგანაც დაინახავს პირველს მზის სხივებს, რომელიც მომავალში აღმოუბრწყინდება ახალს ქვეყნიერებას, სადაც გონებას, სიმართლეს და სიკეთეს დაუსუფევებიაო“³. რადიკალური განმანათლებელი მტრულად იყო განწყობილი სამყაროს საწყისთა განყენებული, განსაკუთრებით იდეალისტური გაგებისადმი. მისთვის ბუნებისა და საზოგადოების ფილოსოფია არის მისი დროის საბუნებისმეტყველო-მეცნიერული ცოდნა, განზოგადებული საქართველოს ეროვნულ-განმათავისუფლებელი მოძრაობის პრაქტიკული ამოცანების შესაბამისად. ეს ცოდნა შეიცავს არა მარტო ბუნებისა და ადამიანის მატერიალისტურ გაგებას, არამედ დიალექტიკური აზროვნების ჩანასახებსაც, მაგრამ მის პოზიტივისტური ელფერის მატერიალიზმს და განსაკუთრებით დიალექტიკას დასრულებული მეცნიერული სახე არა აქვს. მას საზოგადოებრივ მოვლენათა მიზეზად ბუნებისა და საზოგადოების გარემოებანი და მოთხოვნილებანი მიაჩნია, პიროვნების როლს ამ მოთხოვნილებათა შეცნობაში ხედავს, აღიარებს კლასთა ბრძოლას და რევოლუციის აუცილებლობასაც კი, მაგრამ განათლების საშუალებით საზოგადოების მშვიდობიანი ევოლუცია მიაჩნია საყოველთაო ეროვნული და სოციალური კეთილდღეობის დამყარების მთავარ საშუალებად. მარქსიზმს იგი „უკანასკნელ მეცნიერულ დასკვნად“ თვლიდა სოციოლოგიაში, მაგრამ პროლეტარული სოციალიზმის მაგივრად ეროვნულ-დემოკრატიული სოციალიზმის განმანათლებლურ-უტოპისტური თვალსაზრისით ხელმძღვანელობდა.

¹ მ. გაფრინდაშვილი, ქართული განმანათლებლობა, 1966, გვ. 82—93.

² გ. წერეთელი, მოღვაწეობი („კვალი“, 1893, № 25).

³ იქვე, თხზ., სრ. კრებული, ტ. 1, გვ. 130.

საბუნებისმეტყველო მატერიალიზმი და პოლიტიკური რადიკალიზმი. ედო საფუძვლად გიორგი წერეთლის ესთეტიკურ თეორიასაც, მის „შეუფერავ რეალიზმს“, რომლის მიხედვით ხელოვნება ხალხური უნდა იყოს და ხალხს უნდა ემსახურებოდეს, მაგრამ რეალური ცხოვრების მხოლოდ შეუფერავი, ბუნებრივი, ზედმიწევნით სწორი ასახვის საშუალებით, არა იმდენად მხატვრული ფანტაზიის, რამდენადაც რეალურ ცხოვრებაზე მეცნიერული დაკვირვების გზით. ხელოვნება ტენდენციური არ უნდა იყოს, ცხოვრება და აზრი ერთი და იგივეა და ამიტომ რეალური ცხოვრების მეცნიერული სიზუსტით ასახვა თავისთავად ხელოვნების ნაწარმოების იდეურობასაც ნიშნავსო.

მესამე წოდების რადიკალურ-დემოკრატიულ მისწრაფებათა გამომხატველი მსოფლმხედველობა გიორგი წერეთლისა, თეორიული და კლასობრივი შეზღუდულობის მიუხედავად, მნიშვნელოვან როლს ასრულებდა ეროვნულ-რევოლუციური სულისკვეთების გაღვივებასა და გაძლიერებაში, ხელს უწყობდა ხალხის „მომზადებას ბრძოლისათვის ცხოვრების ყოველი უწესობების წინააღმდეგ“¹.

სერგი მესხი (1845—1883 წწ.). საქართველოს ეროვნულ განმათავისუფლებელი მოძრაობის რადიკალურ-დემოკრატიული მიმდინარეობის ერთ-ერთი მეთაური სერგი სიმონის ძე მესხი დაიბადა ქუთაისში, აზნაურის ოჯახში. მან 1863 წელს დაამთავრა ქუთაისის გიმნაზია, 1867 წელს პეტერბურგის უნივერსიტეტის საბუნებისმეტყველო ფაკულტეტი. მშობლიურ ლიტერატურასა და ისტორიაზე აღზრდილი მომავალი ჟურნალისტის პატრიოტული და დემოკრატიული მსოფლმხედველობის ჩამოყალიბება ჯერ კიდევ მოწაფეობის წლებში დაიწყო, სტუდენტობის დროს დასავლეთ ევროპის და რუსეთის განმანათლებლების, რევოლუციონერ-დემოკრატების და უტოპისტების შესწავლამ გააფართოვა და გააღრმავა მისი აზროვნება.

1867 წელს სერგი მესხი რუსეთიდან საქართველოში დაბრუნდა და მცირე ხნით სახელმწიფო სამსახურში შევიდა, მაგრამ მალე შიატოვა. მისი თქმით, ცარიზმის ბიუროკრატიულ კანცელარებში მუშაობას „თხუთმეტი იმდენი ვნება მოჰქონდა“, რაც სარგებლობა, „ჩინოვნიკობა სამშობლო ქვეყანას კეთილს არას ჰმატებსო“. სერგი მესხს კი თავიდანვე „ყოველი კაცის იდეალად და ცხოვრების დანიშნულებად საწყალი, დაჩაგრული და უბედური მამულის სამსახური“ მიაჩნდა².

1869 წელს რადიკალურ-დემოკრატიული „ახალი ახალგაზრდობის“ ჯგუფმა ქურნალ „კრებულის“ გამოცემა განიზარაზა. ახალი ქურნალის

¹ გ. წერეთელი, რჩ. ნაწერები, ტ.1, 1947, გვ. 178.

² ს. მესხი, წერილები, ბოცეაძის რედ., გვ. 1—2.

რედაქტორობა უნდა ეკისრა გიორგი წერეთელს, რომელსაც ამის გამო „დროების“ რედაქტორობა სხვისთვის უნდა გადაეცა. ნიკო ნიკოლაძის წინადადებით, „დროების“ რედაქტორად სერგი მესხი მიიწვიეს და 1869 წლიდან 1883 წლამდე „თოთხმეტი წლის განმავლობაში ამ ქველმოქმედმა კაცმა, „სიმართლისა და ჭეშმარიტების უანგარო მსახურმა“, აუტანელის ჯაფით ატარა მალლა ქართულის ლიტერატურის დროს“¹. სერგი მესხის რედაქტორობის დროსაც „დროება“ ეროვნულ-განმათავისუფლებელი მოძრაობის რადიკალურ-დემოკრატიული მიმდინარეობის ორგანო იყო და მის რედაქციაში



სერგი მესხი.

დროდადრო არა მარტო რადიკალ-დემოკრატები (გ. წერეთელი, ნ. ნიკოლაძე, კ. ლორთქიფანიძე, პ. უმიკაშვილი), არამედ ჰუმანისტი დემოკრატებიც (ი. ჭავჭავაძე, ა. წერეთელი, ი. გოგებაშვილი, ი. მაჩაბელი) მონაწილეობდნენ, მაგრამ გაზეთის მთავარი ხელმძღვანელი და მიმართულების განმსაზღვრელი დიდი ხნის განმავლობაში სერგი მესხი იყო.

1873—1874 წლებში სერგი მესხი დასავლეთ ევროპის ქვეყნებში ცხოვრობდა და სწავლას იღრმავებდა. იგი მკაცრად აკრიტიკებდა დასავლურ კაპიტალიზმს, მაგრამ ქება-დიდებათ იხსენიებდა ეროვნულ-რევოლუციურ და უტოპისტურ-სოციალისტურ აზროვნებას და საქართველოსთვის აუცილებლად თვლიდა „დასავლეთ-ევროპის გზის“ გავლას². ევროპაში მყოფ სერგი მესხს არ შეუწყვეტია „დროების“ ხელმძღვანელობა, ხოლო საქართველოში დაბრუნების შემდეგ, განსაკუთრებით რუსეთ-თურქეთის 1877—1878 წლების ომის დროს იგი გაზეთის ფურცლებიდან აშკარა პოლიტიკურ აგიტაციას ეწეოდა ცარიზმის წინააღმდეგ და ეროვნულ-რევოლუციური ომისათვის ქართველი ხალხის მომზადების.

¹ გ. წერეთელი, სიტყვა ს. მესხის დასაფლავებაზე („დროება“, 1883, №145).

² ს. მესხი, თხზულებანი, ი. ბოცვაძის რედ., გვ. 271.

იდეას ქადაგებდა. ამგვარი ომის მიზანი, სერგი მესხის აზრით, თავისუფალ და დემოკრატიულ რუსეთთან განუყრელად დაკავშირებული, მაგრამ თანასწორუფლებიანი და დამოუკიდებელი საქართველოს შექმნა უნდა ყოფილიყო. ამ მიზნისათვის ბრძოლას იგი „მთელი ქართველი ერის“ უპირველეს მოვალეობად თვლიდა და მოითხოვდა თვითმპყრობელობის წინააღმდეგ თავადაზნაურობის, სამღვდლოების, ვაჭრების და მუშახალხის გაერთიანებული ეროვნული ფრონტის შექმნას. იგი აკრიტიკებდა კონსერვატიულ ქართველ თავადაზნაურობას და სამღვდლოებას, ებრძოდა გაძლიერებულ ჩარჩ-ვაჭრებს და ეროვნულ-განმათავისუფლებელი მოძრაობის ძირითად ძალად „მშრომელი წოდება“, უწინარეს ყოვლისა განათლებული და გაძლიერებული გლეხობა მიაჩნდა, მაგრამ გაერთიანებული „ახალგაზრდობის პარტიის“ იდეური ხელმძღვანელობით მას შესაძლებლად ეჩვენებოდა მთელი ერის დარაზმვა რადიკალურ-დემოკრატიული ეროვნული პროგრამის განსახორციელებლად.

ამ პროგრამის განხორციელებისათვის ხალხის მომზადების მთავარ იდეურ საშუალებად სერგი მესხი ბეჭდვით პროპაგანდას, კერძოდ, გაზეთს მიიჩნევდა. იგი ცდილობდა გადაექცია „დროება“ ყველა ეროვნული საქმის ინიციატორად და მეთაურად. სერგი მესხი მთელი ხალხის სახელით, არსებითად კი ბურჟუაზიული დემოკრატიის, მესამე წოდების დამცველად გამოდიოდა და „დროებასაც“ მთელი ერის დემოკრატიულ ორგანოდ თვლიდა: ჩვენს გაზეთსო „არც თავადი ჰყავს მხედველობაში, არც გლეხი და არც ჩინოვნიკი, არც ვაჭარი და არც ოჯახის კაცი, — იმას ჰყავს მხედველობაში... საშუალო მკითხველი — ქართველი... ისეთი საშუალო ქართველი, რომლისთვისაც ყოველი ახალი აზრი, ყოველი ახალი ცნობა მის სამშობლო საქართველოზე საინტერესო და სასარგებლო უნდა იყოსო“¹.

თეორიულად სერგი მესხი ეროვნულს კლასობრივზე წინ აყენებდა, მაგრამ პრაქტიკულად მისი პატრიოტული იდეები ყოველთვის დემოკრატიული სოციალური შინაარსით ივსებოდა. ბატონყმობის სრული მოსპობის გზით თავისუფალ შრომასა და თანასწორობაზე დაფუძნებული საზოგადოება იყო მისი იდეალი. ბატონყმობა, სერგი მესხის აზრით, „მთელი ქვეყნის უმთავრეს სენს და წარმატების დამაბრკოლებელ მიზეზს“, საერთო-სახალხო უბედურებას წარმოადგენდა, თუმცა „უმეტესად გლეხებს“ ლუპავდა. რეფორმების შემდეგაც „ბატონყმობის კვალი“ არ მოსპობილა, ფორმალურად თავისუფალი გლეხობა ფაქტიურად სოციალურად და პოლიტიკურად ჩაგრული წოდებაა. გლეხებს ჩაგრავენ არა მარტო ნაბატონარნი, არამედ ვაჭარნიც, რომელნიც აამოძრავა ფულის გადაქცე-

¹ ს. მესხი, თხზ., ტ. II, გვ. 50.

ვამ წარმოების მთავარ ელემენტად და „აყალო მიწაში ოქროების ძებნა“ დააწყებინა¹. ს. მესხი აღიარებდა ახალ საზოგადოებრივ ურთიერთობათა პროგრესულობას, რამდენადაც ისინი ხელს უწყობდნენ ქვეყნის ტექნიკურ-ეკონომიურ განვითარებას, მაგრამ იგი გმობდა ახალ ურთიერთობათა ექსპლოატატორულ ხასიათს. მისი დროის საქართველოში იგი ვერ ხედავს მსხვილ კაპიტალისტურ წარმოებას, მსხვილ ბურჟუაზიას და სრულიად უმიწაწყლო პროლეტარიატიც ძლიერ იშვიათ მოვლენად მიაჩნია: „ჩვენი უკმაყოფილება უფრო ქალაქის ხალხსა და სოფლის ხალხს შუა არის, უფრო წვრილ ვაჭრებსა და სოფლის წვრილ მწარმოებელს შუა“, — ამბობს იგი. მაგრამ მან იცის, რომ ვაჭრები ხალხის ჩაგვრის გზით შდიდრდებიან, და აუცილებლად მიაჩნია „ჩვენი ხალხის განთავისუფლება... იმ სოფლის წურბელებისაგან, რომელთაც ჩარჩ-ვაჭარს ეძახიან, და რომელნიც უკანასკნელ სისხლსა სწოვენ, ტყავს აძრობენ ხალხსა“².

რევოლუციის შემდეგ წარმოშობილ ახალ ვითარებაში მთელი ხალხის დამცველ რადიკალურ დემოკრატს საყოველთაო ეროვნული კეთილდღეობის დამყარების გზად მიაჩნია გლეხობის მიერ მიწის, ფულის და განთლების შექმნა, მშრომელ მესაკუთრეთა გადაქცევა ერთსა და იმავე დროს მწარმოებელ, მომხმარებელ და გამსაღებელ კულტურულ მეურნეებად³, ფეოდალური ჩამორჩენილობიდან ახალ გამოსული საზოგადოების არაკაპიტალისტური განვითარება და საბოლოო ანგარიშით მშრომელთა ისეთი საზოგადოების შექმნა, სადაც „ქონება და ცოდნა თანასწორად“ იქნება განაწილებული, კაცობრიობა ორ მტრულ ბანაკად აღარ დაიყოფა. მდიდარნი და ღარიბნი აღარ იქნებიან, დემოკრატიული ხელისუფლება ეროვნული პროგრესის მეთაური გახდება, საზოგადოების ერთობა და თავისუფლება პიროვნებათა თავისუფლების, თანასწორობის და ბედნიერების საფუძვლად გადაიქცევა და „შრომა, გონება, სიყვარული და ერთობა“ გამეფდება. სერგი მესხი გულწრფელად ოცნებობდა საყოველთაო კეთილდღეობის მომავალ სამეფოზე და გმობდა უსამართლო საზოგადოებას, რომელშიც „საუცხოო პრინციპები და საძაგელი საქმეები ერთად, ერთს დროს, ერთს კაცში თავსდებოდნენ“⁴.

სერგი მესხი საყოველთაო კეთილდღეობის სამეფოს შექმნას შორეული მომავლის საქმედ თვლიდა. მან ისიც იცოდა, რომ ასეთი სამეფო მხოლოდ ქადაგებით, რევოლუციური ძალადობის გამოყენების გარეშე ვერ

¹ ს. მესხი, ნაწერები, ს. ფირცხალავას რედ., 1903., გვ. 434—435, 404 — 405, 211—212.

² იქვე, გვ. 149, 520, 229—230.

³ იქვე, გვ. 279—280.

⁴ იქვე, წერილები, გვ. 62.

დამყარდებოდა. ცარიზმის დამხობა, მისი აზრით, მსხვერპლს მოითხოვდა. იგი ამართლებდა და იცავდა ცარიზმისა და მემამულეების წინააღმდეგ აჯანყებულ ქართველ გლეხებს, პარიზის კომუნარებს და ბულგარულ პატრიოტებს. მისი აზრით, ჩაგრული მშრომელი ხალხი მხოლოდ „რევოლუციის დროს იჩენს თავის ნამდვილ ძალას და გულის მიდრეკილებას“. თუშცა ყველა მანამდელი ბურჟუაზიული რევოლუციების შემდეგ „ხალხის ბედი კვლავ ხალხის მტრებს, რეაქციონერებს უვარდებოდათ ხელში“¹. სერგი მესხს „აუცილებელ საჭიროებად“ მიაჩნდა საფრანგეთის რევოლუციის იდეების პროპაგანდა საქართველოში. იგი წერდა, „კაცობრიობის ცხოვრების ეს უდიდესი და ყველაზე შესანიშნავი ეპიზოდი... არის წყარო, რომლიდანაც ჩვენი უძვირფასესი პრინციპები, რწმუნებები და აზრები მომდინარეობენო“². იგი არა მარტო თეორიულად აღიარებდა რევოლუციას საზოგადოების გარდაქმნის საშუალებად, არამედ კიდევაც ნატრობდა სახალხო რევოლუციას, რომელიც აამოძრავებდა ქართველ ხალხს ეროვნულ-განმათავისუფლებელი. ომისათვის ცარიზმის წინააღმდეგ. მაგრამ თავისი დროის საქართველოს კონკრეტულ-ისტორიულ პირობებში იგი არ მოუწოდებდა მცირერიცხოვან, ეკონომიურად განუვითარებელ და პოლიტიკურად მოუმზადებელ ქართველ ხალხს აჯანყებისაკენ. იმ დროს, მისი აზრით, აუცილებელი იყო ერის გადარჩენა, მომზადება, „პროგრამის შედგენა“, „განთავისუფლების აზრის“ გავრცელება, გაერთიანება³. იგი ვერ ხედავდა რევოლუციურ ძალას საქართველოში და ცარიზმის წინააღმდეგ გლეხთა ცალკეული აჯანყებანიც მომავალი რევოლუციისათვის ხალხის მომზადების საშუალებად მიაჩნდა.

სერგი მესხი ხელმძღვანელობდა ცნობილი მატერიალისტური დებულებით, ყველაფერი დროსა, ადგილსა და პირობებზეა დამოკიდებული, ერისა და კაცობრიობის ცხოვრება „მუდამ და ყოველმხრივ იცვლება“, გამოჩენილ პიროვნებათა ვალია საზოგადოებრივი ცხოვრების მოთხოვნილებათა შეცნობა და მათს განსახორციელებლად ხალხის მომზადებაო. საზოგადოების დაუსრულებელი ისტორიული განვითარება მას ზოგადად წარმოუდგება ბოროტსა და კეთილს შორის ბრძოლის სახით, რომლის კონკრეტულ გამოვლინებად მიაჩნია ეროვნული ბრძოლა ჩაგრული ხალხებისა მჩაგვრელთა წინააღმდეგ და ღარიბთა ბრძოლა მდიდართა წინააღმდეგ⁴. ამ ბრძოლის საფუძველს იგი ადამიანთა სხვადასხვაგვარ საზოგადოებრივ ინტერესთა, კერძოდ, ქონებრივ ინტერესთა დაპირისპირებუ-

¹ ს. მესხი, წერილები, გვ. 73, ნაწერები, გვ. 197.

² იქვე, წერილები, გვ. 112.

³ იქვე, გვ. 103. იხ. აგრეთვე, მ. გაფრინდაშვილი, ნარკვევები ქართულ საზოგადოებრივი აზროვნების ისტორიიდან, I, 1959, გვ. 196—202.

⁴ იქვე, გვ. 208—216.

ლობაში ხედავს, მაგრამ ეს დაპირისპირებულობა კაცობრიობის პროგრესის დამაბრკოლებელ მიზეზად მიაჩნია და უპირველეს ყოვლისა, განათლების საშუალებით ფიქრობს ინტერესთა გათანასწორებას და საყოველთაო ბედნიერების სამეფოს შექმნას. „ჩვენი ხალხისათვის, როგორც საზოგადოდ ყველასათვის, უპირველესი საშუალება ცხოვრების გაუქმობისა არის განათლება“¹, — ამბობს სერგი მესხი. მისი დროის „მდაბიო ხალხის“ განათლებისათვის მას ზედმეტად მიაჩნდა განყენებული ფილოსოფიაც და წმინდა მეცნიერებაც. ისტორიას, პოლიტიკურ ეკონომიას, ლიტერატურას და ჟურნალისტიკას თვლიდა იგი ხალხისათვის ადვილმისაწვდომ ცოდნად, ხალხის კულტურული და ეროვნულ-პოლიტიკური აღზრდის მთავარ საშუალებებად. მშობლიური და მსოფლიო ისტორიის ცოდნას ბრწყინვალე მომავლის იმედით უნდა შთაეგონებინა ქართველი ხალხი. პოლიტიკურ ეკონომიას ისეთი წყობილება უნდა აღმოეჩინა, სადაც „ერთი კაცი მეორის შრომას არ ითვისებდეს, რომ თეთული სარგებლობდეს თავისი შრომით“². ამასვე უნდა მომსახურებოდა ეროვნული ლიტერატურა და ჟურნალისტიკა, რომელსაც როგორც სარკეს, უნდა აესახა ქართველი „კაცის ნამდვილი ცხოვრება“, ეჩვენებინა „მომავალი საუკეთესო ცხოვრების გზა“, ყოფილიყო „ხალხის დამრიგებელი, სწორი გზის მაჩვენებელი, აღმზრდელი“³.


ნიკო ნიკოლაძე (1843—1928 წწ.). საქართველოს ეროვნულ-განმათავისუფლებელი მოძრაობის რადიკალურ-დემოკრატიული მიმდინარეობის ერთ-ერთი ფუძემდებელი და მეთაური ნიკო იაკობის ძე ნიკოლაძე დაიბადა ქუთაისში, ვაჭრის ოჯახში. დედის ხელმძღვანელობით ნიკო პატარაობიდანვე გაცნობია ძველ და ახალ ქართულ მწერლობას. კერძო მასწავლებლების დახმარებით ნიკო ადრევე დაუფლება რუსულ ენასაც. 1860 წელს „ცისკარში“ დაბეჭდილი მისი პირველი წერილების თემაც ქართული ენისა და მაშინდელი ერთადერთი ქართული ჟურნალის დაცვაა, მაგრამ ნიკო ნიკოლაძის პირველი დიდი წარმატებანი მწერლობაში დაკავშირებულია რუსულ ჟურნალისტიკასთან.

1861 წელს ნიკო ნიკოლაძე პეტერბურგში ჩავიდა და სექტემბერში უნივერსიტეტის იურიდიული ფაკულტეტის ადმინისტრაციულ განყოფილებაზე დაიწყო სწავლა. 18 წლის პირველკურსელი სტუდენტი, რომელიც ჯერ კიდევ ქუთაისში ეწაფებოდა „სოვრემენიკის“ იდეებს, ორიოდ ლექციის მოსმენის შემდეგ რევოლუციური ახალგაზრდობის შუაგულში აღმოჩნდა და აქტიური მონაწილეობა მიიღო სტუდენტთა დემონსტრა-

¹ ს. მესხი, თხზ., ტ. I, გვ. 113.

² იქვე, წერილები, გვ. 62.

³ იქვე, „კრებულის“ მეორე წიგნი („დროება“, 1871, №10). გაზეთის „ობზორის“ შეჩერება („დროება“, 1880, № 154).



ნიკო ნიკოლაძე.

ციაში, რისთვისაც სხვა 282 სტუდენტთან ერთად რამდენიმე თვე პეტრე-პავლეს ციხეში გაატარა. განთავისუფლების შემდეგ ნიკო ჯერ ფარულად, მერე ლეგალურად ცხოვრობდა პეტერბურგში. ამ დროს გასცნობია მას ოლგა ვასილევსკაია-ჩერნიშევსკაია, რომლის მეშვეობით ნიკოლაძე სხვა ქართველ სტუდენტებთან ერთად ნიკოლოზ ჩერნიშევსკის დაუახლოვდა, მისი ოჯახის ხშირი სტუმარი და „სოვრემენიკის“ თანამშრომელი გახდა. რევოლუციურ-დემოკრატიულ იდეებზე აღზრდილი და რევოლუციურ ნათლობა მიღებული ოცი წლის პუბლიცისტი გაბედულად აკრიტიკებდა მაშინდელ ევროპელ პატენტიან მეცნიერებს და თვით რუსული განმანათლებლობისა და რევოლუციური დემოკრატიზმის ორიგინალურ გაგებას იძლეოდა.

1862 წლის ზაფხულში ნ. ჩერნიშევსკის დაპატიმრებისა და ო. ჩერნიშევსკაიას სარატოვში გადასვლის შემდეგ ნიკოს „შეჯავრდა პეტერბურგი“, სადაც იგი „არავითარ რევოლუციას“ აღარ ელოდა, და სამშობლოში გამოემგზავრა „ნათელი იდეებით“ აღჭურვილი¹. ჯერ ყაზანის უნივერსიტეტში სწავლის გაგრძელება სცადა, მერე საზღვარგარეთ „სამკურნალოდ“ წასვლისათვის მზადებას შეუდგა, მაგრამ კვლავ პეტერბურგს დაბრუნდა და 1862—1864 წლებში „ისკრაში“, „ნაროდნოე ბოგატსტვოსა“ და „სოვრემენიკში“ თანამშრომლობდა. 1864 წლის ზაფხულში იგი პარიზს ჩავიდა სწავლის გასაგრძელებლად და მექანიკასა და ტექნოლოგიასთან ერთად დაუდალავად სწავლობდა ფრანგ სოციალისტთა და ინგლისელ ეკონომისტთა თეორიებს, აკრიტიკებდა კაპიტალიზმს და იდეალურ წყობილებად სოციალიზმს აცხადებდა.

1865 წელს ნიკო ნიკოლაძე ა. გერცენს გაეცნო და მის „კოლოკოლში“ თანამშრომლობდა. ბატონყმობისა და საგლეხო რეფორმის რადიკალურ-დემოკრატიულ კრიტიკას იგი რუსული განმანათლებლურ-ნაროდ-

¹ ნ. ნიკოლაძე, რჩ. ნაწერები, ტ. 1, 1931, გვ. 144.

ნიკული სოციალიზმის ძირითადი იდეის — ბურჟუაზიულ ინდივიდუალიზმთან შედარებით „სოციალისტური“ თემის უპირატესობის აღიარებას უკავშირებდა. „რადგან ბატონყმობის კვლავ ხელუხლებლად დატოვება შეუძლებელი იყო, რუსეთის მთავრობამ... გლახთა საკითხის გადაჭრა საქართველოში იმით დაამთავრა, რომ ყმა გლეხებს სახელი შეუცვალა და უწოდა მემამულეთა მიწებზე დასახლებული გლეხები... რაც შეეხება ხალხისათვის საჭირო მიწას, ის მემამულეს მისცეს ან მის ხელში რჩება... სტამბის მელანმა აიტანა და არ გაწითლდა, როცა დღის სინათლეზე გამოჰქონდა მძარცველობისა და ყაჩაღობის, სიყალბისა და დანაშაულობის დაკანონება!“¹ ნიკო ნიკოლაძე ქართველი ხალხის ეროვნულ მოძრაობას სოციალური მოძრაობისადმი დაქვემდებარებულად თვლიდა, თუმცა მკაცრად აკრიტიკებდა ეროვნული ჩაგვრისა და ძალდატანებითი გარუსების თვითმპყრობელურ პოლიტიკასაც. „რაზე უნდა ზრუნავდეს მთავრობა, იმაზე, რომ გაანათლოს, თუ იმაზე, რომ დააბნელოს რუსეთთან შემოერთებული ერები... თუ ამიერკავკასიის მხარეში რუსეთმა შეიტანა ახლანდელი ცივილიზაცია, ეს კიდევ იმას არ ნიშნავს, რომ იქ რუსები უნდა იყვნენ ბატონებად და ადგილობრივი მკვიდრნი მათ მონებად“², — წერდა იგი.

გერცენთან იდეური უთანხმოების გამო ნიკო ნიკოლაძემ „კოლოკოლში“ თანამშრომლობას თავი დაანება და პარიზიდან ქენევაში გადავიდა სწავლის გასაგრძელებლად. 1866 წელს კარაკოზოვის მარცხიანი გასროლიდან ორთვენახევრის შემდეგ მან ქენევაში რუსულ ენაზე გამოცა ბროშურა „მთავრობა და ახალი თაობა“, რომელშიც ამხილა ცარიზმის რეაქციული პოლიტიკა, დაგმო ტერორისტული ტაქტიკა, დაასაბუთა სახალხო მოძრაობის უპირატესობა და ჩამოაყალიბა ახალთაობის რადიკალურ-დემოკრატიული და უტოპიურ-სოციალისტური პროგრამა. მან იდეალად გამოაცხადა შრომასა და თავისუფალ მშრომელ მესაკუთრეთა თანასწორობაზე დაფუძნებული საყოველთაო კეთილდღეობა, რომელიც ხალხის, გლეხობის ეკონომიური გაძლიერებისა და გონებრივი განვითარების გზით უნდა დამყარებულიყო³. ეს განმანათლებლურ-დემოკრატიული დებულებანი ნიკოლაძემ შემდგომ განავითარა 1868 წელს ლ. შეჩნიკოვთან ერთად მის მიერ გამოცემული რადიკალურ-სოციალისტური ჟურნალის „სოვრემენოსტის“ სტატიებში. აქ იგი აკრიტიკებდა „ეკონომიურ საქმეებში სახელმწიფოს ჩაურევლობისა და საზოგადოების ცალკე წევრების უსაზღვრო პირადი თავისუფლების“ ლიბერალურ-ანარ-

¹ ნ. ნიკოლაძე, თხზ., ტ. 1, დ. გამეზარდაშვილის რედ., 1962, გვ. 251, 168, 271.

² იქვე, გვ. 267, 268, 312.

³ იქვე, გვ. 317—364.

ქისტულ იდეას, მაგრამ არც არსებული წყობილების უეცარი დამხობის შესაძლებლობის ნაროდნიკულ თეორიას იზიარებდა. ანარქისტთა და ნაროდნიკთა შეხედულებებს იგი ჩერნიშევსკის და დობროლიუბოვის განმანათლებლურ-დემოკრატიულ თვალსაზრისს უპირისპირებდა, მაგრამ მატერიალისტური პოზიტივიზმით განმანათლებლობის გამდიდრებას მოითხოვდა¹.

ასეთი იყო ნიკო ნიკოლაძის განმანათლებლურ-დემოკრატიული პროგრამა 1870 წლის დამდეგს, როცა იგი საქართველოში დაბრუნდა და „დროებაში“ განაგრძო რადიკალურ-სოციალისტური იდეების პროპაგანდა. „დროებას“ მან ჯერ კიდევ ევროპიდან გამოუგზავნა რამდენიმე წერილი, ევროპიდან დაბრუნების შემდეგ კი რუსული გაზეთის გამოცემა ითხოვა, მაგრამ საცენზურო კომიტეტმა უარი უთხრა პოლიციური მეთვალყურეობის ქვეშ მყოფ პუბლიცისტს. მაშინ გ. წერეთელმა „დროების“ დამატებად „კრებულის“ გამოცემა იწყო და „ახალი ახალგაზრდობის“ ჯგუფის ამ ორი ორგანოს ხელმძღვანელობაში ნიკოლაძეც აქტიურად მონაწილეობდა, „ზოგჯერ კი იგი მარტოდ-მარტოც უძღვებოდა მათ“².

რეფორმის შემდეგდროინდელი საქართველოს მთავარ ამოცანად ნიკო ნიკოლაძეს ამხანაგობა — ასოციაციების ფორმით და სახალხო-საკრედიტო დაწესებულებათა დახმარებით ვაჭრობა-მრეწველობის და სოფლის მეურნეობის განვითარება ესახებოდა. იგი ოცნებობდა ისეთ საზოგადოებაზე, რომელიც „სავსეა ძმობით, ერთობით, თავისუფლებით, სადაც ადამიანი ადამიანის ოფლით და შრომით როდი ძღება, სადაც ყველა ცდილობს ერთი-მეორეს დაეხმაროს, ხელი გაუწყოს, სიცოცხლე გაუადვილოს“³. საფრანგეთის 1870 წლის რევოლუციის შემდეგ ნიკო ნიკოლაძის მსოფლმხედველობაში უფრო მეტად იჩენს თავს მისწრაფება „ეკონომიური რესპუბლიკელობისაკენ“⁴: მისი აზრით, „ხალხის გაღვიძება ისეთი ცვლილებებით უნდა დაიწყოს, რომ ხალხს მამული დედინაცვლად კი აღარ, საყვარელ მზრუნველ დედად მიაჩნდეს, რომ თითოეული კერძო პირი თავის მოძმეში წინააღმდეგსა და მტერს კი არა, ერთგულ მომხრეს, თანამშრომელს ხედავდეს“. იგი ფარული აღტაცებით შეხვდა პარიზის კომუნართა გამირობას, მაგრამ „უაღრეს უბედურებად“ ეჩვენებოდა შინაური ომი, რომელმაც ძველად საქართველო დააუძღურა, ახლა კი საფრანგეთს ღუპავსო⁴.

1 მ. გაფრინდაშვილი, ქართული განმანათლებლობა, 1966, გვ. 272—274.

2 დ. გამეზარდაშვილი, ნიკო ნიკოლაძე, ტ. 1, გვ. 32.

3 ნ. ნიკოლაძე, თხზ., ტ. 1, გვ. 495.

4 იქვე, თხზ., ტ. 2, გვ. 192, 300—301

1873 წელს ნიკო ნიკოლაძე კვლავ საყრანგეთშია. აქ მან დ. მიქელაძესა და პ. იზმაილოვთან ერთად გამოსცა ჰექტოგრაფიულად ნაბეჭდი ქართული სოციალისტური გაზეთი „დროში“, რომლის ფურცლებზე რეფორმისტ-სოციალისტ ლუი ბლანს რევოლუციური ძალადობის მნიშვნელობას უხსნიდა და კაპიტალთან შრომის გამწვავებულ ბრძოლაში ერთიანი პარტიული დისციპლინის საფუძველზე დემოკრატთა გაერთიანების აუცილებლობას ქადაგებდა. არა მარტო ევროპაში, „ჩვენშიც ძლიერ განსხვავებით და მტკიცედ იხატება პარტიების მოქმედება, პარტიული ცხოვრება“¹, — ამბობდა ევროპიდან საქართველოში ჩამოსული ნიკო ნიკოლაძე. კონსერვატიულ პარტიად მას ძველი თაობა მიაჩნდა და მისი სახით ხაზს უსვამდა მთელ ძველ საქართველოს კათალიკოს ანტონ ბაგრატიონიდან თითქმის თვით დიმიტრი ყიფიანამდე. პროგრესულ პარტიად ნ. ნიკოლაძეს ახალი თაობა მიაჩნდა და საქართველოს უკეთესი მომავლის მედროშედ თვლიდა. მაგრამ იგი ახალ თაობაშიც ორ თაობას ხედავდა, უწინდელს, ანუ 60-იანი წლების თაობას და „ახალ ახალგაზრდობას“, ანუ 70-იანი წლების თაობას. ახალი ახალგაზრდობის მიზანი უნდა იყოს ძველი თაობის სრული განადგურება, ძველი ცხოვრების რადიკალური პრაქტიკული გარდაქმნა, საქართველოს საზოგადოების ყოველმხრივი განვითარება მეცნიერულ საფუძველზე და ამ მიზნით ყველა პროგრესულ ძალთა გაერთიანება.

ასე ჩამოაყალიბა ნიკო ნიკოლაძემ XIX საუკუნის მეორე ნახევრის ეროვნულ-განმათავისუფლებელი მოძრაობის მეორე დასის რადიკალურ-დემოკრატიული მიმდინარეობის პროგრამა. რადიკალიზმის სულისკვეთებითაა გამსჭვალული მისი ესთეტიკური თვალსაზრისიც, რომლის თანახმად „მწერლობაში შეუფარავათ და სწორეთ უნდა გამოიხატებოდეს თანამედროვე ცხოვრება“ და „უკეთესი ცხოვრების და განწყობილების იდეალი“².

რადიკალურ-დემოკრატიული პროგრამის დასაბუთებისას ნიკო ნიკოლაძეს მხარში ედგნენ გ. წერეთელი და სერგი მესხი, მაგრამ ამ იდეური მიმდინარეობის ორგანიზაციული შეკავშირება და მის გარშემო ყველა დემოკრატის დარაზმვა მან ვერ შეძლო, უმთავრესად იმის გამო რომ ჰუმანისტ და რადიკალ დემოკრატთა უმრავლესობა ქართული ენისა და კულტურის დაცვის გზით ეროვნული თავისუფლებისათვის ბრძოლას თვლიდა უპირველეს ამოცანად, ნიკოლაძის აზრით კი, ხალხის ეროვნული თავისუფლება შეუძლებელია მისი სოციალ-ეკონომიური განთავისუფლების გარეშე. „ხალხში ნამდვილი ერთობა მხოლოდ მაშინ დამყარდება, როცა იმისი ეკონომიური ცხოვრება გათანასწორდება, როცა ხალხი ეკონომიუ-

¹ ნ. ნიკოლაძე, თხზ., ტ. 3, გვ. 219.

² იქვე, გვ. 56, 64, 42, 378—382.

რად გათავისუფლდება და შეერთებულ შრომას შეეჩვევა“¹, — ამბობდა იგი.

1873 წელს ნიკო ნიკოლაძემ „დროება“ მიატოვა და თანამშრომლობა დაიწყო „ტიფლისკი ვესტნიკში“, რომლის ფურცლებიდან იგი ბანკის საკითხზე ეკამათებოდა ილია ჭავჭავაძეს, როგორც, მისი აზრით, „ბურჟუაზიული მიმართულების“ და „ვიწრო პატრიოტიზმის“ წარმომადგენელს. მაგრამ 1876 წელს იგი კვლავ დაუბრუნდა „დროებას“ და მგზნებარე პატრიოტული აღსარებით მიმართა ქართველობას: მიზანი მთელი ჩემი მოღვაწეობისა საქართველოში, რუსეთში თუ ევროპაში „შენთვის დამზადება. შენთვის სამსახური, შენი სარგებლობა“ იყო.²

1878 წელს ნიკო ნიკოლაძემ საბოლოოდ დატოვა „დროება“ და გაზეთი „ობზორი“ დააარსა. ამ რადიკალური მიმართულების ორგანოში იგი უშიშრად აკრიტიკებდა რუსეთის თვითმპყრობელურ წყობილებას და კვლავ ეკონომიურ აღორძინებაზე ამყარებდა საქართველოს ეროვნული განთავისუფლების იმედს. 1880 წელს მეფის მთავრობამ ურჩ რედაქტორს გაზეთი დაუხურა და სტავროპოლში გადაასახლა. სტავროპოლიდან ნიკოლაძე კრავესკის ლიბერალურ გაზეთ „გოლოსში“ თანამშრომლობდა, ხოლო 1881 წელს პეტერბურგში ცხოვრების ნება მიიღო და ჯერ ს. ვენგეროვის ჟურნალ „უსტოიში“ მონაწილეობდა, მერე კი მ. სალტიკოვ-შჩედრინის „ოტჩეისტვენნიე ზაპისკის“ კრიტიკის განყოფილებას განაგებდა. ამ ჟურნალის დახურვის ერთ-ერთი მიზეზი გახდა ნიკოლაძის მიერ მასში რადიკალურ-დემოკრატიული იდეების პროპაგანდა. და მაინც განმანათლებლურმა გულუბრყვილობამ რადიკალ-დემოკრატს 1882 წელს მთავრობასა და რევოლუციონერებს შორის მომრიგებელი შუამავლის „უცნაური და უნაყოფო“ როლი აკისრებინა. „ნაროდნაია ვოლიამ“ უარი თქვა ტერორზე, მეფემ ნ. ჩერნიშევსკის ვილუისკიდან ასტრახანში გადასვლის ნება დართო, შუამავალ ნიკოლაძეს კი პოლიციის უმკაცრესი მეთვალყურეობა ხვდა წილად.³

1887—1891 წლებში ნიკო ნიკოლაძე რედაქტორობდა თბილისურ ლიბერალურ გაზეთ „ნოვოე ობოზრენიეს“, 1894—1897 წლებში კი ჯერ „კავკაზში“, მერე ჟურნალ „მომბეში“ განაგრძობდა რადიკალურ-დემოკრატიული პატრიოტიზმის დაცვას. 1894 წელს იგი ფოთის ქალაქისთავად აირჩიეს და პრაქტიკულად ცდილობდა თავისი გრანდიოზული ეკონომიუ-

¹ ნ. ნიკოლაძე, ნაწერი, II, 1914, გვ. 118—119.

² იქვე, რჩ. ნაწერები, II, 1931, გვ. 365—368, 189—191, 127—128.

³ იქვე, Переговоры священной дружины с партией «Народной воли» в 1882 году, 1917, გვ. 4—5, 9—13.

რი პროგრამის განხორციელებას, სანამ მეფის მთავრობა აქედანაც დაითხოვდა 1912 წელს.

1905 წლის რევოლუციის პერიოდში ნიკო ნიკოლაძე კვლავ და კვლავ იმეორებდა ერთობის, თავისუფლების, თანასწორობის და ძმობის ძველ, განმანათლებლურ ლოზუნგს, ცდილობდა დაეცვა რადიკალური ეროვნული დემოკრატიის ინტერესები საქართველოს ავტონომიური თვითმმართველობის მოპოვების, საერობო და საქალაქო თვითმმართველობის განმტკიცების, ეკონომიკისა და კულტურის ყოველმხრივ განვითარების გზით. მისი აზრით, „მარტო ეს... დაუმკვიდრებდა ჩვენს ქვეყანას და ყველა მის ერებს თავისუფლებას, თანასწორობასა და ძმობას“¹. პირველი რევოლუციის წინაღობიანი დელი განმანათლებლური ეროვნული მოძრაობაც და 1905 წლის რევოლუციურ-კლასობრივი ბრძოლაც მას „ძლიერ განყენებულად“ ეჩვენებოდა და კვლავ ცდილობდა „ცხოვრებისეულ შინაარსზე“ და „ახალ მეცნიერულ ფილოსოფიაზე“ დაეფუძნებინა როგორც XVIII—XIX საუკუნეების განმანათლებელთა და სოციალისტთა, ისე XX საუკუნის რევოლუციონერთა „ზოგადი ფორმულები და თეორიული პრინციპები“.

ნიკო ნიკოლაძე ყოველთვის მთელი ერის სახელით გამოდიოდა და იდეალად მიიჩნევდა ისეთ საზოგადოებას, სადაც გააფუძვლებული იქნებოდა საყოველთაო შრომა, თანასწორობა, თავისუფლება და ბედნიერება. მისი აზრით, ამ იდეალს არ შეესაბამებოდა არა მარტო მის დროს ჩამორჩენილი საქართველოს და რუსეთის თვითმპყრობელურ-ბატონყმური საზოგადოება, არამედ დასავლეთ-ევროპის განვითარებული კაპიტალისტური წყობილებაც, რომელიც, ფეოდალიზმთან შედარებით მისი პროგრესულობის მიუხედავად, გაბატონებულ უმცირესობასთან ჩაგრული უმრავლესობის შეუწყვეტელი ბრძოლის სარბიელს წარმოადგენდა. მას სჯეროდა, რომ მდიდართა მიერ ღარიბთა ჩაგვრაზე დამყარებული საზოგადოება ბოლოს და ბოლოს აუცილებლად გარდაიქმნებოდა თანასწორობასა და თავისუფლებაზე დაფუძნებულ საზოგადოებად. მაგრამ პარმონიული საზოგადოება ვერ შეიქმნება ვერც ეკონომიური რეფორმის და ვერც პოლიტიკური რევოლუციის გზით, თუ არსებული საზოგადოება ჯერ ეკონომიურად, გონებრივად და ზნეობრივად არ გარდაიქმნა, თუ წარმოების საშუალებათა მფლობელნი განათლებული მშრომელები არ იქნებიან და ყველა არამშრომელი კლასი, კერძოდ, თავადაზნაურობა და ბურჟუაზია მშრომელ ხალხს არ შეუდუღდებო. ამისათვის ჯერჯერობით საჭიროა არა ხალხის აჯანყება, არამედ მისი აღზრდა და მთელი საზოგადოების თანდათანობითი გადასვლა სოციალიზმში, სადაც არც სოციალური ჩაგვრა იქნე-

¹ ნ. ნიკოლაძე, მამაშვილური რჩევა („კლე“, 1906, № 38).

ბა და არც მის საფუძველზე წარმოშობილი ეროვნული ჩაგვრაო, — ასე-
აია ნიკო ნიკოლაძის რადიკალურ-განმანათლებლური თვალსაზრისი, რო-
პელიც, უტოპიურობის მიუხედავად. რევოლუციურ-დემოკრატიული სუ-
ლისკვეთებით ზრდიდა ახალგაზრდობას, რომლის ერთმა ნაწილმა საქარ-
თველოს ეროვნულ-განმათავისუფლებელი მოძრაობის ხალხოსნური მიმ-
დინარეობის სახით დაიწყო მოღვაწეობა.

ხალხოსნურ-დემოკრატიული მიმდინარეობა. საქართველოს ეროვნულ-
განმათავისუფლებელ მოძრაობაში თავიდანვე იჩინა თავი სოციალური
თავისუფლების იდეებმა, რომლებიც ჰუმანისტმა და რადიკალმა განმანათ-
ლებლებმა საგლებო რეფორმის მომზადებისა და გატარების პერიოდში
მთელი ერის, მთელი მესამე წოდების ანტიბატონყმურ მისწრაფებათა
მთლიან პროგრამად ჩამოაყალიბეს. იმ დროს ქართველი მესამე წოდების
ძირითად ნაწილს გლეხობა წარმოადგენდა. განმანათლებელთა ანტიბა-
ტონყმური პროგრამაც უწინარეს ყოვლისა გლეხობის განთავისუფლები-
სათვის იყო ნავარაუდები, მაგრამ ჰუმანისტთა და რადიკალთა უმრავლეს-
ობა გლეხთა სოციალური განთავისუფლების მოთხოვნას მთელი ხალხის
ეროვნული განთავისუფლების მოთხოვნას უქვემდებარებდა. ამავე დროს
უკვე 50—60-იან წლებში საქართველოს ეროვნულ-განმათავისუფლებელ
მოძრაობაში ისახება ისეთი იდეები, რომლებიც აგრეთვე მთელი ხალხის
განთავისუფლების მოთხოვნას გამოხატავენ, მაგრამ არა უწინარეს ყოვ-
ლისა მთელი ჩაგრული ერის, არამედ მხოლოდ ჩაგრული გლეხობის სო-
ციალური განთავისუფლების გზით. ეს იყო მიმდინარეობა, რომელიც სა-
ბოლოოდ 70-იანი წლების დამდეგს ჩამოყალიბდა და თავს სოციალურ-
რევოლუციურ ანუ ხალხოსნურ პარტიას უწოდებდა, უარყოფდა თავად-
აზნაურობის და ნაწილობრივ აგრეთვე ბურჟუაზიის პროგრესულ როლს
საზოგადოებრივ განვითარებაში და ჯერ გლეხთა აჯანყებაზე, მერე კი გა-
ნათლებასა და ეკონომიურ გაძლიერებაზე ამყარებდა საყოველთაო კე-
თილდღეობის, სოციალიზმის დამყარების იმედს. არსებითად ეს მიმდინა-
რეობა ბატონყმობის ნაშთებით უკმაყოფილო უმიწაწყლო გლეხთა ბუნ-
ტარულ სულისკვეთებას გამოხატავდა მიწისმფლობელი თავადაზნაურო-
ბისა და ცარიზმის წინააღმდეგ ბრძოლაში. იგი მოითხოვდა მსხვილი მი-
წათმფლობელობის სრულ გაუქმებას ან მოსპობას, მიწის უფასოდ გადა-
ცემას გლეხობისათვის და პოლიტიკური ხელისუფლების დემოკრატიზა-
ციას იმგვარად, რომ ახალი საზოგადოების ერთადერთი ბატონპატრონი
ამხანაგობაში გაერთიანებული სოფლის მშრომელი, თანასწორი წვრილი
მესაკუთრენი ყოფილიყვნენ.

ჯერ კიდევ 50-იანი წლების ბოლოს თბილისში შეიქმნა ახალგაზრდო-
ბის ანტიბატონყმური წრე, რომელსაც დანიელ ჭონჭაძე მეთაურობდა.

:60-იან წლებში ასეთივე წრე შეუქმნია ანტონ ფურცელაძეს. 70-იანი წლების დასაწყისში თბილისის, გორის, ქუთაისის, ოზურგეთის ხალხოსნური წრეები ერთიან ორგანიზაციად გაერთიანებას ცდილობენ და საქართველოს სოფლებში არალეგალურ რევოლუციურ მუშაობას ეწევიან რუსეთის გლეხობის საყოველთაო აჯანყებაში მონაწილეობისათვის ქართველი გლეხობის მოსამზადებლად. ამ მიზნით ხალხოსანი ინტელიგენტები და მათი წინამორბედნი არალეგალურ ლიტერატურასთან ერთად მაშინდელ ლეგალურ პრესასაც იყენებდნენ („ცისკარი“, „საქართველოს მოამბე“, „ლიტერატურნი ლისტოკ“, „დროება“, „გუთნის დედა“, „ივერია“). მათ თვითონაც დააარსეს თავიანთი ორგანოები „მნათობი“ (1869—1872 წწ.), „შრომა“ (1881—1883 წწ.), და „იმედი“ (1881—1883 წწ.). ხალხოსნურ იდეებს ქადაგებდა ქართველ მწერალთა ერთი ჯგუფი (ნ. ლომოური, ს. მგალობლიშვილი, შ. გულისაშვილი).

თავდაპირველად ხალხოსნები მხოლოდ გლეხობის სახელით გამოდიოდნენ, მის სოციალურ განთავისუფლებას თვლიდნენ საქართველოს რევოლუციური მოძრაობის მთავარ ამოცანად. საკითხის ამგვარი დაყენება უკვე იგრძნობა ქართველ ხალხოსანთა უშუალო წინამორბედის დ. ჭონქაძის ანტიბატონყმურ შეხედულებებში. ეს იდეა უფრო ნათლად გამოთქვა ზოგიერთმა ქართველმა განმანათლებელმა (მაგალითად, ნ. ნიკოლაძემ), ხოლო ხალხოსნებმა სამოქმედო პროგრამად აქციეს 70-იან წლებში. ცარიზმის მიერ ნაროდნიკული ორგანიზაციების განადგურების შემდეგ, დაახლოებით 80-იანი წლების მეორე ნახევრიდან ქართველ ხალხოსანთა უმრავლესობა ეროვნულ-განმათავისუფლებელი მოძრაობის ჰუმანისტურ მიმდინარეობას შეუერთდა და საქართველოს ეროვნული განთავისუფლება მთელი ერის, პირველ რიგში მისი მშრომელი უმრავლესობის, მაგრამ აგრეთვე განათლებული თავადაზნაურობის გაძლიერების გზით თავისი პროგრამის მთავარ პუნქტად გაიხადა. ობიექტურად ქართული ხალხოსნობა მანამდეც საქართველოს ეროვნულ-განმათავისუფლებელი მოძრაობის ერთ-ერთ მიმდინარეობას წარმოადგენდა, მიუხედავად იმისა, რომ თვითონ ისინი საერთო-რუსული ნაროდნიკული, სოციალურ-რევოლუციური ორგანიზაციის უშუალო შემადგენელ ნაწილად თვლიდნენ თავს. ქართველი გლეხობის სოციალურ განთავისუფლებას რუსეთის გლეხური რევოლუციისაგან მოელოდნენ, საქართველოს დამოუკიდებელი ეროვნული მოძრაობის სპეციფიკურ მიზნებს თავდაპირველად დიდ ანგარიშს არ უწევდნენ და დამოუკიდებელი საქართველოს შექმნის იდეალსაც უარყოფითად ეკიდებოდნენ.

მართალია, რუსი ნაროდნიკები, რომელთა ორგანიზაციაში არაერთი ქართველი ინტელიგენტი აქტიურად მუშაობდა, იდეურ ხელმძღვანელობას და პრაქტიკულ დახმარებას უწევდნენ ქართველ თანამოაზრეებს, მაგ-

რამ ქართველი ხალხოსნები აღზრდილნი იყვნენ არა მარტო ჩერნიშევ-სკის და ლავროვის გლეხურ რევოლუციურ დემოკრატიზმზე, არამედ ილია ჭავჭავაძის, იაკობ გოგებაშვილის და ნიკო ნიკოლაძის ეროვნულ-რევოლუციურ პატრიოტიზმზეც. ისინი პირველ რაგში გლეხობის სოციალური თანასწორობისათვის იბრძოდნენ, მაგრამ ეროვნული თანასწორუფლებიანობის იდეასაც არ უარყოფდნენ, სოციალიზმი იდეალად მიაჩნდათ, მაგრამ კაპიტალიზმშიც პროგრესულ მხარეებს ხედავდნენ, გლეხთა აჯანყებას თვლიდნენ სოციალისტური საზოგადოების დამყარების საშუალებად, მაგრამ წინააღმდეგნი იყვნენ რუსეთის გლეხობისაგან დამოუკიდებლად მხოლოდ ქართველი გლეხობის აჯანყებისა, ხედავდნენ რუსული თემის ხაკლოვანებებს და თითქმის არ იზიარებდნენ ცალკეული გმირების როლის გაზვიადებულ შეფასებას და ინდივიდუალური ტერორის ტაქტიკას. მათთვის არც განათლების ყოვლისშემძლეობის და ჩაგრული ერის კლასთა ერთობის უტოპური იდეა ყოფილა უცხო. ერთი სიტყვით, ქართული ხალხოსნობა არა მარტო რუსეთის სოციალური მოძრაობის ორგანიზაცია. არამედ საქართველოს ეროვნულ-განმათავისუფლებელი მოძრაობის ერთ-ერთი მიმდინარეობაც იყო ჰუმანისტურ და რადიკალურ განმანათლებლობასთან ერთად, რომელიც თავის მხრივ „ხალხოსნურიც“ იყო, რამდენადაც მესამე წოდების ძირითადი ნაწილის — გლეხობის — ინტერესებს გამოხატავდა. ჰუმანისტები და რადიკალები ერის გადარჩენით ცდილობდნენ გლეხობის დაცვას, ხალხოსნები გლეხობის დაცვით ცდილობდნენ ერის გადარჩენას. სოციალური საკითხის წინა პლანზე წამოწევით და გლეხობის განთავისუფლებისათვის პრაქტიკულ-რევოლუციური მუშაობის დაწყების თუნდაც წარუმატებელი ცდით ხალხოსნურ-დემოკრატიულმა მიმდინარეობამ წინ წასწია საქართველოს ეროვნულ-განმათავისუფლებელი მოძრაობა, მისი განმანათლებლურ-დემოკრატიული იდეოლოგია და დიდი როლი შეასრულა ხალხის გამომღვიძებასა და რევოლუციურ აღზრდაში¹.

ქართველ განმანათლებელთა და ხალხოსანთა მემკვიდრებმა, მესამედასელებმა უკუაგდეს მათი ეროვნული და სოციალური პროგრამის კონსერვატიული მხარე, მაგრამ მიიღეს მისი რევოლუციურ-დემოკრატიული იდეალები, რათა დაესაბუთებინათ და განეხორციელებინათ ისინი „უფრო ზუსტად, ღრმად და გაფართოებულად“². XIX საუკუნის მეორე ნახევრის საქართველოს ეროვნულ-განმათავისუფლებელი მოძრაობის მოღვაწენი, განმანათლებლებიც და ხალხოსნებიც, მარქსიზმის იდეური წინამორბედები იყვნენ საქართველოში.

¹ ხალხოსნური მოძრაობის თეორიისა და პრაქტიკის ვრცელი დახასიათება იხილეთ ამ წიგნის XII თავში.

² ვ. ი. ლენინი, თხზ., ტ. 1, გვ. 613.

§ 1. მიწათმფლობელობის ფეოდალური ხასიათი. მემამულეთა
კლასის სოციალ-ეკონომიური მდგომარეობა

1864—1871 წლების საგლეხო რეფორმამ, რომელიც, როგორც უკვე ითქვა, მემამულეთა კლასის ინტერესების მაქსიმალური დაცვით გატარდა, მიწის ფონდის დიდი ნაწილი [1 776 823¹ დესეტინა ან დასავლეთისა და აღმოსავლეთ საქართველოს ყველა სახის მიწების² (აჭარა-აფხაზეთ-სვანეთის გამოკლებით) საერთო რაოდენობის 30%-ზე მეტი] ისევ თავადაზნაურობის ხელში დატოვა. ამ აქტის შედეგად, მაგალითად, თბილისის გუბერნიის თავადაზნაურობამ (1751 კომლი), რომელიც მოსახლეობის 2,89%-ს შეადგენდა³, 7-ჯერ მეტი ფართობი შეინარჩუნა, ვიდრე ხიზნების, დროებით ვალდებულ და კერძო მფლობელთა მიწებით მოსარგებლე სახელმწიფო გლეხთა მრავალრიცხოვანმა მასამ ერთად⁴. რაც შეეხება ქუთაისის გუბერნიას, იქ, თუმცა, დასახელებულ კლასთა მიწათმფლობელობას შორის ასეთი დიდი განსხვავება არ ყოფილა, მაგრამ პირველს, თავის რიგებში 8561 კომლსა⁵ და გუბერნიის მოსახლეობის 678%-ს⁶, რომ ითვლიდა, 4-ჯერ მეტი მიწა შეხვდა, ვიდრე დროებით ვალდებულ გლეხთა 57 ათას ოჯახს.

XX საუკუნის დასაწყისში თბილისის გუბერნიის თავადაზნაურობას ეკუთვნოდა სულ 992 216,11 დესეტინა მიწა ან კერძო მფლობელობაში

¹ გრ. გ ი ო რ გ ა ძ ე, საზოგადოებრივი ურთიერთობა საქართველოში, თბ., 1928, გვ. 81.

² მათი რაოდენობა დაახლოებით 5, 605 600 დესეტინას უდრიდა, И. Г. Антелава государственные крестьяне грузии в XIX веке, т.11, 1962, გვ. 501.

³ გრ. გ ი ო რ გ ა ძ ე, საზ. ურთიერთობა..., გვ. 18—80.

⁴ С. А в а л и а н и, Крестьянский вопрос в Закавказье, т. IV, Тифлис, 1920, გვ. 501; СХАО, IV, 122.

⁵ იქვე, Крестьянский вопрос..., т. I, Одесса, 1912, გვ. 501.

⁶ გრ. გ ი ო რ გ ა ძ ე, საზოგადოებრივი ურთიერთობა..., გვ. 18—80.

მყოფი მიწების (1 285 747,77 დესეტინა) 77,17%¹. ასეთივე მდგომარეობა იყო ქუთაისის გუბერნიაშიც. აქაც თავადაზნაურობას თავის განკარგულებაში ჰქონდა 495 125 დესეტინა მიწა ან კერძო მფლობელობაში მყოფი მიწების (638,19 დეს.) 77,55%².

ჩვენთვის საინტერესო ხანის აღმოსავლეთ საქართველოში ითვლებოდა თავადაზნაურთა სულ 5 384 მამული, რომლებიც ფართობის მიხედვით 4 ჯგუფად იყოფოდა — წვრილი (25 დესეტინამდე), საშუალო (25-დან 100 დესეტინამდე), მსხვილი (100-დან 500 დესეტინამდე) და ძალიან მსხვილი (500 დესეტინაზე ზევით). მამულების რაოდენობის 53,55% (ან 3 151) წვრილი იყო, 23,3% (ან 1 373) — საშუალო, 16,98% (ან 999) — მსხვილი და 6,14% (ან 361) — ძალიან მსხვილი³.

როგორც ამ ცნობებიდან ჩანს, წვრილი და საშუალო მამულები, რომლებიც საერთო რაოდენობის თითქმის 77%-ს შეადგენდნენ, აერთიანებდა 97 047 დესეტინა მიწას ან თავადაზნაურული მიწების მხოლოდ 9,8%⁴-ს. რაც შეეხება მსხვილსა და ძალიან მსხვილ მამულებს, რომელთა ხვედრითი წონა 23,12%-ს უდრიდა, მათი ფართობი 859 168 დესეტინას ან თავადაზნაურთა მიწების 90,2%-ს შეადგენდა. მარტო 361 ძალიან მსხვილი მამული (ან მამულების 6,14%) 675 771 დესეტინას ან თავადაზნაურული მიწების საერთო რაოდენობის 68,11% -ს მოიცავდა.

¹ СССРТКГ. I, გვ. XI. ს. ა ვ ა ლ ი ა ნ ი, მიწისმფლობელობა საქართველოში, ქუთაისი, 1920, გვ. 12.

² იქვე, I, გვ. XXX; ს. ა ვ ა ლ ი ა ნ ი, მიწისმფლობელობა საქართველოში, გვ. 12.

³ დამახასიათებელია მონაცემები გორის მაზრის შესახებ. იქ 1890 წელს თავადაზნაურთა სულ 722 მამული ყოფილა. აქედან სამოცდაჩვიდმეტი—380 დესეტინაზე მეტი ფართობის მქონე. უფრო კონკრეტულად კი მიწის მფლობელობა ასე წარმოიდგინება.

380 დესეტინიდან 1000 დესეტინამდე ფართობის მამული იყო 36,

1000	"	2000	"	"	"	"	29,
2000	"	3000	"	"	"	"	2,
3000	"	4000	"	"	"	"	1,
4000	"	5000	"	"	"	"	2,
5000	"	6000	"	"	"	"	1,
10000	დესეტინაზე მეტი	"	"	"	"	"	6,

ამ 10000 დესეტინაზე მეტი ფართობის 6 მამულიდან ერთი (11,768 დესეტინა) ზ. ერისთავს ეკუთვნოდა, მეორე (13133 დეს.)—ი. მუხრანბატონს, მესამე (13214 დესეტ.) —თავად მანაბლებს. მეოთხე (1900 დესეტ.)—თავად ფალავანდიშვილებს, მეხუთე (41740 დესეტ.)—თავად ციციშვილებსა და მეექვსე (68661 დესეტ.)—მიხეილ რომანოვს.

სხენებული 77 მემამულის საკუთრებაში ითვლებოდა სულ 215 996 დესეტინა მიწა. გორის მაზრის მოსახლეობის დანარჩენ ნაწილს (თავადაზნაურთა გამოკლებით) ეკუთვნოდა მხოლოდ 45,595 დესეტინა მიწა, აქედან 34,921 დესეტინა გლეხების განკარგულებაში იყო, ხოლო 10 674 დესეტინა—თბილისისა და გორის ვაჭრების (ი. უთურაშვილი, გლეხობის კლასობრივი დეფერენციაცია საქართველოში XIX საუკუნის მეორე ნახევარში. თბილისი, 1957, გვ. 149—150).

ქუთაისის გუბერნიაში თავადაზნაურთა სულ 12 857 მამული იყო. აქედან: 11 543 (89,78%) — წვრილი, 931 (27,24%) — საშუალო, 301 (2,34%) — მსხვილი და 82 (0,64%) — ძალიან მსხვილი. იქაც, ისე როგორც თბილისის გუბერნიაში, მიწების დიდი ნაწილი ორ უკანასკნელ ჯგუფზე მოდიოდა. ძალიან მსხვილი მამულები, მაგალითად, რომელთა ხვედრითი წონა მხოლოდ 0,64%-ს უდრიდა, 317 548 დესეტინა მიწას ან თავადაზნაურთა მიწების 64,12%-ს აერთიანებდნენ. ამავე დროს კი წვრილ მამულებს, რომლებიც აბსოლუტურ უმრავლესობას წარმოადგენდნენ (11 543 ან 98,7%), ეკავათ სულ 70 875 დესეტინა მიწა ან თავადაზნაურთა მიწების მხოლოდ 14,33%.

აქ შოტანილი სტატისტიკური მასალა, როგორც ზემოთ აღვნიშნეთ, ნათლად გვიჩვენებს, რომ 1854—1871 წლების საგლეხო რეფორმას არ მოუხსნია თავადაზნაურული მიწათმფლობელობა. ფეოდალურმა კლასმა ბატონყმობის გაუქმების შემდეგაც შეინარჩუნა მიწის ფონდის საგრძნობი ხაწილი. ეს განსაკუთრებით ითქმის მსხვილ და ძალიან მსხვილ მემამულეებზე. რაც შეეხება წვრილ და საშუალო მფლობელებს, ისინი თუმცა რიცხობრივად ბევრად სჭარბობდნენ სხვა ჯგუფებს, მაგრამ მათ ხელში მყოფი მიწის ფართობი შედარებით მცირე და უმნიშვნელო იყო. უმნიშვნელო იყო მათი როლიც ქვეყნის საერთო ეკონომიურ ცხოვრებაში.

კიდევ უფრო დიდი მიწისმფლობელი იყო ხაზინა. მას 1883 წელს თბილისის გუბერნიაში ეკუთვნოდა 1 787 500 დესეტინა ყველა სახის მიწა¹, ან მთელი საგუბერნიო მიწის ფონდის (3 699 350 დეს.²) 48,3%. ქუთაისის გუბერნიაში კი მის განკარგულებაში იყო 850 568 დესეტინა მიწის ფართობი³, ან საერთო ფონდის (1 905 764 დეს.⁴) 43,2%. ამ ცნობებს თუ შევაჯამებთ, გამოვა, რომ სახელმწიფო ქონებათა უწყებას ორივე გუბერნიაში 2 638 068 დესეტინა მიწა, ან ქვეყნის მიწის ფონდის⁵ (5 605 814 დეს.) თითქმის ნახევარი (უფრო ზუსტად 47%) დაუსაკუთრებია.

სულ კი საქართველოში (აჭარა-აფხაზეთის გამოკლებით) ხაზინისა და თავადაზნაურობის ხელში ყოფილა 4 414 891 (2 638 068 + 1 776 823) დესეტინა მიწა, ან მიწის საერთო ფონდის 78%. და ეს მაშინ, როდესაც თბილისისა და ქუთაისის გუბერნიის ყოფილ საბატონო ყმებსა და აღმო-

¹ სსცია, ფ. 244, ანაწ. 1, საქ. 55, ფურტ. 3; И. Г. Антелава, Государственные крестьяне Грузии в XIX веке, II, Тбилиси, 1962, გვ. 70.

² სსცია, გვ. 244, ანაწ. 1, საქ. 55, ფურტ. 2. И. Г. Антелава, Государственные крестьяне..., II, გვ. 69.

³ «Кавказский календарь» на 1885 г., отд. III, გვ. 236.

⁴ იქვე, გვ. 237.

⁵ აჭარა-აფხაზეთის გამოკლებით.

სავლეთ საქართველოს ხიზნებსა და მემამულეთა მიწებით მოსარგებლე სახელმწიფო გლეხებს ჰქონდათ სულ 345 561 დესეტინა მიწა, ან მიწის მთელი ფონდის მხოლოდ 6%.

ამრიგად, რეფორმამ, რომელმაც ბატონყმობა გაუქმებულად გამოაცხადა, ვერ მოშალა ფეოდალური მიწათმფლობელობა და მიწა — ძირითადი საწარმოო საშუალება — ისევ ხაზინისა და თავადაზნაურობის ხელში დატოვა.

მაგრამ რეფორმამ, მიუხედავად ამისა, მაინც წყალი შეუყენა პრივილეგიური წოდების ეკონომიურ ძლიერებას. თავადაზნაურობამ დაკარგა შემოსავლის მნიშვნელოვანი წყარო — ყმების პირადი გადასახადები; მას მოაკლდა მუქტი მუშა და ამან მეტად მძიმე მდგომარეობაში ჩააგდო. მას არც ცოდნა-გამოცდილება გააჩნდა და არც იმის საშუალება ჰქონდა, რომ სამეურნეო საქმიანობა გაეშალა და საიმედო ნიადაგზე დაეყენებინა. უფრო მეტიც, ქართველი ფეოდალები (ყოველ შემთხვევაში მათი საგრძნობი ნაწილი) სამარცხენოდ თვლიდნენ სეპატრო-სამრეწველო და თვით სასოფლო-სამეურნეო მოღვაწეობასაც და თავს არიდებდნენ მას. ყოველივე ეს კი მათ განადგურებით ემუქრებოდა, რასაც ისინიც კარგად გრძნობდნენ და მთავრობას აღნიშნული გარემოების მხედველობაში მიღებას თხოვდნენ¹.

თუმცა მთავრობამ, როგორც ვთქვით, ყველაფერი გააკეთა თავადაზნაურობის მომავლის უზრუნველსაყოფად, ცხოვრებამ მაინც თავისი გაიტანა და პრივილეგიური წოდება გალატაკება-გადაგვარების გზაზე დააყენა. ახალმა ვითარებამ ის ვალში ჩააგდო და ეკონომიურად სრულიად უძლური გახადა. „ბატონყმობამდი, — სწერდნენ ქართველი თავადები

¹ „შეიძლება, — წერდნენ ქართველი თავადები, — ვაჭრობასა და აღებმიცემობას გავრთოს კაცი. მაგრამ ჩვენი შთამომავლობითი და საისტორიო მიზეზებით შეკეთებულ ხასიათი შეუპოვრად ეწინააღმდეგება აქამომდე აღებ-მიცემობასა და უნდა აღვიართ, რომ ჩვენში ჯერ არც ნიჭიერება სჩანს ამ გვარის მოსაქმეობისათვის. შეიძლება ქარხნები და ქურახანები (фабрики) გაიშართოს, პატრონისათვის სასარგებლო და ქვეყნისათვის გამოსადეგი, მაგრამ... (ამას) სჭირდება შეძლება, სწავლა და გამოცდილება. ამ სამში ჯერ არც ერთი არა გვაქვს. შეიძლება სახლკარობას (ე.ი. სოფლის მეურნეობას — ავტ.) მოეკიდოს კაცი, სასოფლო-მომჭირნეობის განვითარებას დაადგეს და ამითი თავისი ყოფა-ცხოვრებაც უზრუნველჰყოს. მაგრამ მანამდის ვის რა უღაფო საკუთრება შეგვკრება ამას არ შევიტყობთ... ცოტა ოდენს სასოფლო-ეკონომიის განსავითარებელს სწავლასა და გამოცდილებას არ შევიძენთ, ვალდებულის მუშაობის მაგივრად ქირით მუშაობას არ შევეჩვევით, მანამდისინ გზები არ გაგვეხსენება და... ვალდებისაგან ცოტაც არის სულს არ მოვიბრუნებთ, — ვინ ვაბუდავს ჩვენგანი, რომ მარტო ხვნა და თესვაზე დაამყაროს თავისი უჭირველის ცხოვრების იმედი? ერთის სიტყვით, საითაც უნდა მივიხედოთ არსად რა იმედია ჩვენთვის და სახლუღლთა ჩვენთათვის იმ ორ გვარს შემოსავალს გარდა, რომელიც ძველთა საუწყუნთაგან აქომამდე ჩვენის ყმებისა და მამულისაგან შემოგვლიოდა“ (СХАО, 11, 59 — 60—62; შ. ჩხეტია, საგლეხო რეფორმის ისტორიისათვის, გვ. 213, 214, 215).

მეფისნაცვალს 1876 წელს, — ჩვენ მუქთი მშრომელნი გვყავდნენ ჩვენდა სარჩენად და იოლად გამოვდიოდით, გაჭირვებაში არ ვიყავით. მაგრამ ბატონყმობის მოსპობის შემდეგ, ჩვენი მდგომარეობა სრულიად შეიცვალა. ჩამოგვართვეს ყმები, მოგვესპო მუქთი მშრომელი, მუშები გაძვირდნენ, დაგვეღვა ვალები და რადგან იმდენი ღონისძიება აღარა გვაქვს, რომ თავის დროზე გადახდა შეგვძლებოდა, ამ ვალში გვეყიდება მამულები, ჩვენ კი ვიღუპებით, ვლატაკდებით, უმიწაწყლოთ ვრჩებით¹.

თუ როგორ ეცლებოდა თავადაზნაურობას ხელიდან მამულები, კარგად ჩანს ქვემოთ მოტანილი ცხრილიდან², რომელიც თბილისის გუბერნიას შეეხება.

ც ხ რ ი ლ ი 1

წლები	ბანკებში დაგირავებული მამულების რიცხვი	დაგირავებული მამულების ფართობი (დესეტინებში)
1875—1879	24	4 727,16
1880—1884	20	7 564,60
1885—1889	35	11 942,43
1890—1894	228	71 268,67
1895—1899	498	164 944,50
1900—1902	198	89 827,64
ს უ ლ	1003	350 275 დესეტინა

ცხრილი არასრულად აღრიცხავს დაგირავებული მამულების რაოდენობას, რადგანაც მასში არ არის შესული კერძო პირებისათვის დაგირავებული მიწები. ასეთების რაოდენობა კი საკმაოდ დიდი იყო და 1904 წლისთვის 302 623 დესეტინას უდრიდა³. ამრიგად, მიმდინარე საუკუნის დასაწყისისათვის თბილისის გუბერნიის თავადაზნაურობას დაგირავებული ჰქონია სულ 652 298 დესეტინა მიწა ან კერძო მფლობელობაში მყოფი მიწების 50%-ზე მეტი⁴.

მაგრამ მთავარია არა მამულების დაგირავების ფაქტის აღნიშვნა, არამედ ის, რომ მათი მფლობელები ვერ ახერხებდნენ დაგირავებულის უკან გამოსყიდვას. ამ მხრივ საინტერესოა გაზეთ „ივერიის“ ფურცლებზე გამოქვეყნებული ზოგი მასალა⁵. ამ მასალებიდან ჩანს, რომ იმ 314 მამუ-

¹ „ღრობა“, 1876, № 48.

² СССРТКГ, I, გვ. XXX, 503.

³ იქვე, გვ. XXVIII, 652.

⁴ ს. ავალიანის ცნობით, თბილისის გუბერნიის თავადაზნაურობის მიერ დაგირავებული მიწების ხვედრითი წონა (კერძო მფლობელობაში მყოფი მიწების საერთო მასაში) უდრიდა: 1896 წელს—45.6%-ს, 1899 წელს 50%-ს, 1901 წელს—53% და 1902 წელს—54%-ს. იხ. მისი „მიწისმფლობელობა საქართველოში“, გვ. 13).

⁵ „ივერია“, 1877, № 42.

ლიდან, რომელთაც 1847—1874 წწ. მიწების დაგირავებით სესხი აუღიათ პრიკაზნიდან, ვალის „წესიერად გადამხდელი“ მხოლოდ 35 ყოფილა, „გაჭირვებით გადამხდელი“ — 75 და „გადახდის უნარსმოკლებული“ — 204. სხვანაირად რომ ვთქვათ, დამგირავებელთა 68%-ს, რომელსაც ვალის გადახდის საშუალება არ ჰქონდა, მამულების სამუდამოდ დაკარგვის რეალური საშიშროება ემუქრებოდა.

უფრო ნაკლები წარმატებით ახერხებდა თავადაზნაურობა ანგარიშის გასწორებას კერძო პირებთან. ყოველივე ეს კი, როგორც აღვნიშნეთ, ეკონომიურად სცემდა წარსულში ძლიერებს, არღვევდა ფეოდალურ საკუთრებას და ამტკიცებდა ახალ, ბურჟუაზიულ საკუთრებას. თავადაზნაურთა მიწების მასობრივი გადასვლა (გაყიდვა-დაგირავების გზით) მეფავშეების, კულაკებისა და ქალაქის ვაჭარ-მრეწველთა ხელში წარმოადგენს მიწის მფლობელობის წოდებრივი პრინციპის თანდათანობით მოსპობის მკაფიო მაჩვენებელს.

თავადაზნაურების მხოლოდ მცირე პროცენტმა შეძლო ახალ ვითარებასთან შეგუება, პროგრესული სამეურნეო საქმიანობის გაშლა და აშკარა დაღუპვისაგან თავის დასხნა, მაგრამ არა ეს ნაწილი განსაზღვრავდა ჩვენთვის საინტერესო წოდების სოციალ-ეკონომიურ მდგომარეობას, არამედ მეორე, დასაღუპავად განწირული აბსოლუტური უმრავლესობა, რომელთა შესახებაც ვაზუთ „დროების“ ქართლელი კორესპონდენტი წერდა: „მე და ჩემი ნაცნობი ვღგვეართ სწორედ შუა სოფელში იმნაირ მალალ ადგილზე, საიღამაც... ყველა კუნჭული ნათლად სჩანს. ჩვენ თვალწინ გვიდგება თავადისშვილების სახლები, რომლებსაც საცოდავათ ჩამოსტირით პირისახე; ყველაფერი დასძველებიათ: ბალკონები, მოაჭირები, ყავარი სრულებით დახეთქიათ; ზოგიერთ ადგილას ფიცრები ამოცვინულან: ერთი სიტყვით, ეს სახლები მაცქერალს თითქმის ასე ეუბნებიან: „რამდენიმე წლის წინეთ ჩვენს პატრონებს ბევრი მუქთი მუშა ჰყავდა და ჩვენი გამშვენიერებისათვის არაფერს ზოგავდნენ, ახლა კი ისეთი დრო დადგა, რომ თავიანთ თავის გამოკვებაც უჭირდებათ, არა თუ ჩვენი გაახლება“¹.

§ 2. გლეხობის სოციალ-ეკონომიური მდგომარეობა

ა) დროებით ვალდებული გლეხები

თავდახსნითი საქმის მიმდინარეობა რეფორმის მომდევნო ხანაში. 1864—1871 წლების რეფორმით ქართველი გლეხი, როგორც ვთქვით, სანადელოდ გამოყოფილი მიწის ნაკვეთის საკუთრებად შესყიდვამდე დროებით ვალდებულ მდგომარეობაში რჩებოდა. დებულება მას უფლებას აძლევდა თავი დაეხსნა, ე. ი. ნადელი შეესყიდა და მესაკუთრე გლეხთა

¹ „დროება“, 1876, № 62.

კატეგორიაში გადასულიყო. მხოლოდ მაშინ თავისუფლებოდა იგი საბატონო გადასახადებისაგან და დამოუკიდებელი მეურნე ხდებოდა. თუ როგორ მიმდინარეობდა თავდახსნის პროცესი განსახილველი ხანის საქართველოში; ამომწურავ პასუხს ქვემოთ მოტანილი ცხრილი იძლევა.

ც ხ რ ი ლ ი 2

ცნობები თავდახსნის საქმის მიმდინარეობის შესახებ საქართველოში 1805—1904 წწ.¹

გუბერნიების დასახელება	ყოფილ საბატონო გლეხთა რაოდენობა (კომლობით)	მათი სანადელო მიწების ფართობი (დესეტინებით)	მთავრობის დახმარებით ნადელ შესყიდულ გლეხთა რიცხვი (კომლ.)	მათ მიერ შესყიდულ მიწების ფართობი (დესეტინ.)	მთავრობის სესხის რაოდენობა (მანეთობით)	მთავრობის დაუმარებლად ნადელ შესყიდულ გლეხთა რაოდენობა (კომლ.)	მათ მიერ შესყიდულ მიწების ფართობი (დესეტინ.)	ამაზე დახარჯულ თანხის რაოდენობა (მან.)	მიწა შესყიდვილ გლეხთა რაოდენობა (კომლ.)	შესყიდვილ მიწების ფართობი (დესეტინ.)
თბილისის	14235 ²	55263	3768	16416	355906	—	—	—	10467	38847
ქუთაისის	57070	207523	=	—	—	33597	144041	7178285	23473	63482

როგორც ცხრილიდან ჩანს, თბილისის გუბერნიაში 1865—1904 წლებში, ე. ი. 40 წლის განმავლობაში, დროებით ვალდებულ გლეხთა ურთიერთობისათვის თავი დაუღწევია 3 768 კომლს ან ამ კატეგორიის გლეხთა საერთო რაოდენობის (14 235 კომლი) მხოლოდ 26,4 %-ს. მათ მთავრობის დახმარებით შეუსყიდიათ 16 416 დესეტინა ან მთელი სანადელო ფონდის (55 263 დესეტინა) მხოლოდ 29,6%. შედარებით უკეთესი მდგომარეობა ყოფილა ქუთაისის გუბერნიაში. აღნიშნულ წლებში იქ სახელმწიფო სესხის გამოუყენებლად მესაკუთრეთა რიცგებში 33 597 კომლი ან ყოფილ საბატონო ყმათა საერთო რაოდენობის (57 070 კომლი) 58,8% გადასულა და მათ საკუთარი სახსრებით მთელი სანადელო ფონდის (207 523 დესეტინა) 69,4% შეუსყიდიათ. თუ ორივე გუბერნიის მონაცემებს შევჯამებთ, ძივილებთ, რომ საქართველოში ბატონყმობის გაუქმების ორმოცი წლისთავზე დარჩენილი იყო 33 940 კომლი დროებით ვალდებული გლეხი ან ამ კატეგორიის გლეხთა საერთო რაოდენობის (71 305 კომლი) თითქმის ნახევარი (ზუსტად 47,6%). მათ შესასყიდი ჰქონდათ 102 329 დესეტინა

¹ ЦГИА СССР, Ф. 391, д. 592, л. 54; შეადარე ს. ავ ა ლ ი ა ნ ი., Крестьянский вопрос в закавказье, IV, Тифлис, 1920 გვ. 11—12.

² აქ ნაჩვენებია ყოფილ საბატონო ყმათა მხოლოდ ის რაოდენობა, რომელსაც დებულებით მიწა ერგო. ამრიგად, 14.235 კომ. არ შედიან შინაყმები, ხიზნები და სხვები, რომლებიც უმიწოდ განთავისუფლდნენ რეფორმის შედეგად («Кавказский вестник», 1901, № 9, გვ. 105).

მიწა ან სანადელოდ გამოყოფილი მთელი მიწის ფართობის (262 786 დესეტინა) 39%.

მოტანილი მასალიდან მკაფიოდ ჩანს, თუ როგორი ნელი ტემპით მიმდინარეობდა დამოკიდებული მდგომარეობიდან გლეხების გამოსვლის პროცესი. ამის ძირითადი მიზეზი, რა თქმა უნდა, ყოფილი საბატონო ყმების მძიმე სოციალ-ეკონომიური მდგომარეობა იყო. მათი დიდი ნაწილი, ვითარცა მატერიალურად უძლური, მოკლებული იყო თავდახსნის ყოველგვარ საშუალებას. ასეთ ვითარებაში საფიქრებელი იყო, რომ მწარმოებელი კლასი უხვად ისარგებლებდა მთავრობის „წყალობით“ და გამოიყენებდა სახელმწიფო სესხს, მაგრამ სინამდვილეში ეს ასე არ მოხდა. სოფლის მშრომელი მოსახლეობა, როგორც წესი, თავს არიდებდა სესხის აღებას მისი უმნიშვნელო მოცულობისა¹ და გადახდის მძიმე პირობების გამო. მთავრობის დახმარებით შექმნილი მამულის პატრონმა, წერდა 1892 წელს ალ. ფრონელი, „ორმოცდაცხრა წლის განმავლობაში... ყოველ წლივ 21 მანეთი უნდა ჰზიდოს ხაზინაში. ოცდაერთი მანეთის საღირაოს (კი) არას იძლევა ნადელი და გადასახადის შეტანა ძნელდება. მოგეხსენებათ, ჩვენში ჯერ ფული ცოტაა, გზები არა გვაქვს რიგიანი, რომ საქონელი შორეულს ბაზარში გავიტანოთ, ფული ვიშოვოთ და... ჩაუთვალოთ მოვალეს (ე. ი. ხაზინას — ავტ.) ...სოფლის ნაწარმოების (გასაღების სირთულე), უფულობა და გადასახადის სიმძიმე იმ გვარად უცარავს ხელს ნადელების შესყიდვის საქმეს, რომ მისი წინსვლა, მისი წარმატება თითქმის ყოველად შეუძლებელია, ვიდრე ასეთი მიზეზი არ მოისპობა. ასეთ გარემოებაში გლეხისათვის სასარგებლო და სახეირო არ არის ნადელის დახსნა (მთავრობის სესხით) და ფულად ძლევა (ხაზინისათვის) წლიურის გადასახადისა“².

ამის საილუსტრაციოდ ავტორი სოფ. ნაფარეულის მაგალითს ასახელებს, რომლის 100 კომლ მოსახლეს მთავრობის დახმარებით შეუსყიდია სანადელო მიწები. მათ ისე გაჭირვებით სახელმწიფოსთან ანგარიშის გასწორება, რომ მამულეზე ხელის აღება გადაუწყვეტიათ. ამ გადაწყვეტილების სირთულეში მოყვანის მიზნით, გლეხებს საუფლისწულო უწყებისთვის მოუმართავეთ და შემდეგი უთხოვიათ: „წაიღეთ ჩვენი სავანახე მამულები. ოღონდ კი მთავრობის ვალი თავიდან მოგვაშორეთ: ოცა წელიწადია მამულები ტვირთად გვაწევს ევ ვალი და მის თავნ-სარეგების გასასტუმრებლად ყოველწლიური შესატანია ხაზინაშიო; „ნედლიკამ“

¹ „მთავრობის სესხი, — წერს ს. ავალიანი, — იმდენად უმნიშვნელო იყო იმ თანხასთან შედარებით, რომელიც ნადელს შემსყიდველ გლეხებს დამატებით უნდა გავლთ, რომ ისინი საერთოდ უარს ამბობდნენ მთავრობის დახმარებაზე“ (იხ. მისი, Крестьянский вопрос, т. IV, გვ. 11).

² „იერია“, 1892, № 237.

სულ თავგზა დაგვიკარგა და ამაზედ მეტი აღარ შეგვიძლიაო¹. მოჰყავს რა ეს სიტყვები, ალ. ფრონელი მას ასეთ კომენტარს უკეთებს: „არ იფიქროთ, ვითომც სოფელ ნაფარეულში უვარგისი მამულები იყოს. არა. სულ სავენახე ადგილებია, მერე ისიც კახური სავენახე ადგილები... მაშ როგორ მოხდა, რომ ნაფარეულელი გლეხი ასე ადვილად სხვას უთმობს ოცი წლის ნაამაგდარ მამულს და თვითონ რიყეზედ რჩება? როგორ მოხდა და ისე მოხდა, რომ ყოველწლიური გადასახადი მეტად დიდია და შამულმა ვერ გაუძლო... სოფელმა წინდაწინვე ვერ გამოიანგარიშა, ვერ ივარაუდა წლიურის შესატანის სიმძიმე და მოუძღურდა, დაიხაგრა“².

თავდახსნის პროცესის წარმატებით მიმდინარეობას სერიოზულად აფერხებდა აგრეთვე 1864 წლის 8 ნოემბრის დებულების ის მუხლი, რომელიც მემამულის თანხმობის გარეშე შეუძლებლად თვლიდა სანადელო მიწების საკუთრებად შექენას³. მემამულისთვის კი ასეთი თანხმობის მიცემა ხშირ შემთხვევაში ხელსაყრელი არ იყო და ამიტომ ის თავდახსნის მსურველს არაიშვიათად ცივი უარით ისტუმრებდა⁴.

დიდი მნიშვნელობა ჰქონდა თვით მთავრობის პოზიციას ამ საქმეში. ის, როგორც ქვემოთ ვნახავთ, ერთი მხრივ, კარგად გრძნობდა ვალდებულ ურთიერთობათა მოსპობის აუცილებლობას (ამას მოითხოვდა ქვეყნის სოციალ-ეკონომიური და პოლიტიკური ვითარება), ხოლო, მეორე მხრივ, ამ ნაბიჯის გადადგმა მეტად სახიფათოდ ეჩვენებოდა. საქმე იმაშია, რომ, მისი აზრით, დროებით ვალდებულ და სახელმწიფო გლეხთა სანადელო მიწების შესაკუთრედ აღიარება ამ მიწების გაყიდვის ნებას მისცემდა მათ და დააჩქარებდა პროლეტარიატის გაჩენის პროცესს, პროლეტარიატისა, რომლის არსებობა «На окраинах империи, и на Кавказе по преимуществу, представляется более опасным, нежели во внутренних губерниях России. Поэтому, в видах устранения этой опасности... на Кавказе, более чем где-нибудь, не следует надельные земли отдавать... крестьянам в полную собственность»⁵.

აქედან გამომდინარე ხელისუფლება თავს იკავებდა და აჭიანურებდა დროებით ვალდებულ გლეხთა ინსტიტუტის კანონმდებლობრივ გაუქმებას.

წყაროები ჩვენთვის საინტერესო მოვლენის განმსაზღვრელ ფაქტორებს შორის საგლეხო საკრებულოთა ზედმეტ სიმკაცრესაც ასახელებენ.

¹ „ივერია“, 1892, № 237.

² იქვე.

³ ილია ქავჭავაძე, თხზულებანი ათ ტომად, ტ. 6, 1956, გვ. 31, С. А. В. а. л. и а. н. и, Крестьянский вопрос, IV, გვ. 10.

⁴ ი. ქავჭავაძე, თხზ. ტ. 6, გვ. 31—32.

⁵ «Всеподданнейший доклад министра государственных имуществ по поездке на Кавказ в 1889 г.» Петербург, 1890, გვ. 10—11.

ისინი თავდახსნის აქტის გაფორმებისას ისეთ მოთხოვნებს აყენებდნენ, რომ მათი დაკმაყოფილება, ალ. ფრონელის სიტყვით, თითქმის სრულიად შეუძლებელი იყო¹.

საქმეს აფერხებდა ქართველი თავად-აზნაურების მიერ თავიანთი მიწა-წყლის მასიურად დაგირავების ფაქტიც. ეს გარემოება იმ მხრივ იყო თავდახსნის პროცესის შემფერხებელი, რომ საგლენო საკრებულო არ ამტკიცებდა საკრედიტო დაწესებულებებში (თუ კერძო პირებისთვის) დაგირავებული მამულების ყიდვა-გაყიდვის აქტებს². დასასრულ, იმავე მიმართულებით მოქმედებდა სათანადო პირთა და დაწესებულებათა უზომო ბიუროკრატიზმი³. გლენს აუარებელი დრო და ფული უნდა დაეხარჯა, რომ მის მიერ ნადელის საკუთრებად შექმნის ოპერაციას კანონით გათვალისწინებული ფორმა და ჩასიათი მიეღო.

როგორც ვხედავთ, დროებით ვალდებულ გლენთა საბოლოოდ განთავისუფლებას და მათ მესაკუთრეთა კატეგორიაში გადასვლას მრავალი ფაქტორი აფერხებდა. მაგრამ ყველაზე მთავარი მაინც სოფლის მშრომელი მოსახლეობის სოციალ-ეკონომიური მდგომარეობა იყო.

მიწათმფლობელობა. საგლენო რეფორმამ სოფლის მშრომელი მოსახლეობა მძიმე ეკონომიურ მდგომარეობაში ჩააგდო. აღნიშნული მოვლენის შემდეგ საგრძნობლად შემცირდა მისი მიწის მფლობელობა. თუკი, მაგალითად, რეფორმამდე თბილისის გუბერნიის საბატონო გლეხების განკარგულებაში 84 665 დესეტინა მიწა იყო, რეფორმის შემდეგ მას მხოლოდ 55 679 დესეტინა დარჩა⁴. სხვანაირად რომ ვთქვათ, ხსენებული აქტის განხორციელების პროცესში მწარმოებელ კლასს ჩამოაჭრეს 28 986 დესეტინა მიწა, რაც სარგებლობაში მყოფი მიწის საერთო ფართობის 34,2%-ს უდრიდა. რეალური მნიშვნელობა დაკარგეს ადგილობრივი დებულებებით გათვალისწინებულმა ნორმებმა, სინამდვილემ მათ უცერემონიოდ აუარა გვერდი. აღსანიშნავია, რომ თბილისის და ქუთაისის გუბერნიის გლეხებმა კანონით გათვალისწინებულ 10 და 4,5 დესეტინის ნაცვლად კომლზე მიიღეს საშუალოდ 3,7 და 2,5 დესეტინა⁵.

1: „ივერია“, 1892, № 33.

2: იქვე, № 48.

3: ი. ჭ ა ე ჭ ა ე ა ძ ე, თბ., ტ. 6.

4: С. А в а л и а н и, Крестьянский вопрос в Закавказье, т. IV, Тиф., 1920, № 421.

5: С. А в а л и а н и, Крестьянский вопрос в Закавказье, т. IV, Тифлис, 1920, № 4; СХАО, т. IV, გვ. 121. გ. გ ი ო რ გ ა ძ ე, საზოგადოებრივი ურთიერთობა საქართველოში, თბ., 1928, გვ. 17; ა. კ ი ე ვ ი ძ ე, საქართველოს ისტორია XIX — XX სს., 11, გვ. 24.

მაგრამ მთავარია მაინც არა იმის აღნიშვნა, რომ რეფორმამ გლეხი მძიმე მატერიალურ მდგომარეობაში ჩააგდო, არამედ ის, რომ მისი მდგომარეობა დროთა განმავლობაში სისტემატურად უარესდებოდა. მართალია, მწარმოებელი კლასის მცირე ნაწილი ეკონომიურად ძლიერდებოდა და სოფლის ბურჟუაზიის რიგებში გადადიოდა, მაგრამ აბსოლუტური უმრავლესობა უძლურდებოდა და უკიდურესი სიღატაკისკენ მიექანებოდა. ამას მკაფიოდ ადასტურებს გლეხის საშუალო საკომლო ნაღელის შეუენელებელი შემცირების ფაქტი რეფორმის შემდეგდროინდელ საქართველოში. თუკი ის, მაგალითად, 1865 წელს თბილისის გუბერნიაში 3,7 დესეტინას უდრიდა¹, 80-იანი წლების ბოლოსათვის 3,2 დესეტინამდე დაეცა², ხოლო 1903 წელს — 1,7 დესეტინამდე³. მეტ-ნაკლებად იგივე ითქმის ქუთაისის გუბერნიის შესახებაც.

თუმცა ზემოთ მოტანილი საშუალო ციფრები თავისთავად ბევრის მთქმელია, მაგრამ ისინი მხოლოდ მიახლოებით გამოხატავენ იმ დიდ ეკონომიურ გაჭირვებას, რომელსაც ადგილი ჰქონდა ჩვენთვის საინტერესო ხანის საქართველოს სოფელში. ამ მხრივ გაცილებით უფრო საინტერესოა და საყურადღებო მაშინდელი პერიოდული პრესის მასალები და სხვა წერილობითი ხასიათის წყაროები, რომლებიც მწარმოებელი კლასის შრომისა და ცხოვრების პირობების მეტად მკაფიო და დამაჯერებელ აღწერილობას შეიცავს. ისინი ნათლად ადასტურებენ არა მარტო უკიდურესი მცირე-მიწიანობის, არამედ მიწის უსამართლოდ განაწილების ფაქტს რეფორმის შემდეგდროინდელ საქართველოში.

ეხებოდა რა აღმოსავლეთ საქართველოს გლეხის მიწით უზრუნველყოფის საკითხს, გაზეთი „გუთნის დედა“ 1875 წელს წერდა: „ჩვენში ბევრ მუშაკთ არა აქვთ მამული და იძულებული არიან სხვის მამულზედ მოიყვანონ იმოდენა საზრდო, რომელიც რის ვაი-ვაგლახით ჰყოფნით დასაკმაყოფილებლად უპირველესთა თვისთა საჭიროებათა... რა მოელის მოუსავლიანობის დროს უმამულო გლეხს? შიმშილი და სიკვდილი... რა არის უმამულო გლეხ-კაცი? ის არის უბედური ქმნილება; იმის მდგომარეობა ისეთივეა, როგორც ფრთა შეკვეცილი ჩიტისა და წყალ-მოკლებული თევზისა... სხვასთან მოჯამაგირეთ დგომით გლეხი იშოვის ნახევარ საზრდოს, თუ ნაკლებსაც არა; მეორე ნახევარი საზრდოსი საიდგანდა იშოვოს, თუ რომ იმას არ ექნება მამული? სიღარიბე და სიღატაკე მალე

¹ С. А в а л и а н и, Крестьянский вопрос, т. IV, гл. 4.

² ССДЗТКГ, Тиф., 1893, гл. 141.

ზოგი წყაროს ცნობით კი, დროებით ვალდებულ გლეხთა საშუალო საკომლო ნაღელი ამ დროს 2,4 დესეტინას არ აღემატებოდა (სსტია, ფონდი 17, საქმე 8747, ფურტ. 1—86).

³ Ф. Г о г и ч а й ш в и л и, Малоземелье среди крестьян закавказья, Тиф., 1903, гл. 16—17.

ეწევა უმამულო გლეხს და ეს დღითი დღე უფრო და უფრო გაძლიერდება. სიღარიბეს მოაქვს თავისი ჩვეულებრივი მწარე ნაყოფი: გადაგვარება ხალხისა ზნეობით, გონებით და ფიზიკურად¹.

1892 წელს გაზეთ „ივერიის“ ფურცლებზე დაბეჭდილ ერთ-ერთ კორესპონდენციაში ლაპარაკია თბილისის მაზრის სოფელ მარიამ-ჯვრის დროებით ვალდებულ გლეხთა მძიმე ეკონომიურ მდგომარეობაზე, რაც, როგორც სხვა შემთხვევაში, მათი უკიდურესი მცირემიწიანობით იყო გამოწვეული. კორესპონდენციაში, რომელიც თვით გლეხების სახელითა შედგენილი, ნათქვამია შემდეგი: „დუხობორებსა და გერმანელებს აუარებელი მამული (ტექსტში წერია „მამულები“. — ავტ.) დაუთმო მთავრობამ დასასახლებლად, ჩვენ მარიამ-ჯვარელებს კი ლამის სული ამოგვხდეს უმამულოდ. ჩვენი გაჭირვებული მდგომარეობა რომ შეიტყოთ, სწორედ შეგეცოდებით. ამ პატარა სოფელში სულ ცამეტი კომლია, ნადელად მიეცა კომლს ათი დღიური (5 დესეტინა. — ავტ.), სულ, მაშასადამე, 130 დღიური. მაშინ წყალმა მოგვტაცა 30 დღიური სახნავი მიწა, დაგვრჩა ცამეტ კომლს ასი დღიური, სულ ეგ არის სახნავადაც და საძოვრადაც. მამულის პატრონთ ტყე შეგვიკრეს და ლამის ჩვენი პირუტყვით სულ მთლად ამოვისრჩოთ. ეს ჩვენი გაჭირვებული მდგომარეობა, უმამულობა, ბატონ ტფილისის გუბერნატორს მოვასხენეთ და ვემუდარებით დაგვიხსენ გაჭირვებისაგანა, თორემ ცოლშვილით ამოვწყდებით. თუ ბატონმა გუბერნატორმაც არ გვიშველა, არ ვიცით მერე რა ვქნათ. თითო სულზე დღე-ნახევრის მიწა არ მოდის და აბა როგორ ვიცხოვროთ, ან ხელმწიფეს რითი გავცეთ პასუხი“².

ალექსანდრე ფრონელი, რომელიც ზემოთ ციტირებულ კორესპონდენციას გამოეხმაურა და დაადასტურა მასში დასახელებული ფაქტები, აღნიშნავდა: ჩვენი ქვეყანა სტატისტიკური თვალსაზრისით უკეთ რომ იყოს შესწავლილი, სხვაგან ამაზე უარესი მდგომარეობა აღმოჩნდებოდაო. „ჩვენ ხელთა გვაქვს, — წერდა იგი, — ორიოდ-სამიოდ საქმე: საიდამაც სჩანს, რომ ქართველს მხენელ-მთესველს იმდენი მამულიც არა აქვს, რაც შერჩენიათ მარიამ-ჯვარელებს. მაგალითებრ, სოფელ ხეითში ორ კომლს გლეხს ნადელში მისცემია სულ ათი დღიური (5 დესეტინა. — ავტ.). ეხლა ორი კომლი შვიდად გადაქცეულა (და) თითო სულს დღიურის ერთ მესამედზე ნაკლები მოსდის. ხეითელები, რასაკვირველია, სრულიად უმამულოდ უნდა ჩაითვალოს და თუ არავინ იზრუნა იმათთვის, ოჯახი დაედუპებათ და მოჯამაგირეობით თუ დაირჩენენ თავს, თორემ სხვა სახსარი და ღონისძიება აღარ მოეპოვებათ ლუკმა პურის საშოვნელად“³.

¹ „გუთნის დედა“, 1875, № 21.

² „ივერია“, 1892, № 247.

³ იქვე, № 258.

ფრონელის მოწმობით, „ასეთი მწარე ბედი“ წილად ხვდომია არა მარტო მარიამ-ჯვარისა და ხეთის მოსახლეობას, არამედ მთელი საქართველოს გლეხობას. ამის მიზეზი, ავტორის აზრით, ის იყო, რომ რევოლუციის გატარებისას მიწა დებულებით გათვალისწინებული ნორმით მწარმოებელი კლასის მხოლოდ უმნიშვნელო ნაწილს მიეცა. შემდეგში კი ეს ფართობი, დასახელებული თანამედროვის დასტურით, ისე საგრძნობლად შემცირებულა, რომ გასული საუკუნის 90-იანი წლებისათვის ქართველი გლეხის უმამულობა უკვე „თითით საჩვენებელი“ გამხდარა. დროებით ვალდებულნი, — წერდა ალ. ფრონელი, — უფრო დიდ გაჭირვებაში ჩაცვივდნენ ეხლა, ვიდრე 1864 წლის 13 ოქტომბრამდე იყვნენ.

უშუალო მწარმოებელს, რომელსაც მამულის საკუთრებად შეძენის სახსარი არ ჰქონდა, ისლა რჩებოდა, რომ მიწა იჯარით აეღო, რაშიც იგი ზოგ შემთხვევაში შემოსავლის $\frac{2}{3}$ იხდიდა¹. არამცთუ დროებით ვალდებული, არამედ თვით სახელმწიფო გლეხებიც კი იძულებული იყვნენ იჯარისთვის მიემართათ. ასე მაგალითად, გასული საუკუნის 80-იან წლებში თბილისის გუბერნიის 941 სახაზინო სოფლიდან 389 (ან 41,6%) მიწის იჯარით ირჩენდა თავს². განსაკუთრებით დიდი იყო მოიჯარე სოფლების ხვედრითი წონა თელავის (68%), გორის (80,5%), ახალციხისა (84%) და ახალქალაქის (88,6%) მაზრებში.

იჯარით იღებენ გლეხები როგორც კერძო მემამულეთა, ისე სახაზინო, საუფლისწულო და სამონასტრო მიწებს. უშუალო მწარმოებელს ყველგან შეტად შიძიმე პირობებს უქმნიდნენ და მის უცერემონიო ექსპლოატაციას ეწეოდნენ. აი რას სწერდნენ, მაგალითად, 1902 წელს ქართლის (მუხრანის) საუფლისწულო მამულის მოიჯარადრე გლეხები უმაღლეს ხელისუფლებას: «За прогон скота по дороге и за водопой удельные чиновники взыскивают с нас по 50 копеек с головы, а за пастьбу сотни овец — по 16 рублей в год. При таких драконовских условиях не выгодно держать баранту и мы почти совсем уничтожили эту важную отрасль хозяйства. Еще более тягостными условиями обставлено пользование пахотными землями. Правление уделным именем Мухрани галу перевело на деньги и с каждой десятины взыскивает в год по 3 рубля, тогда как десятина распа-

¹ „...გლეხს ნადელი არა ჰყოფნის,—წერდა „ივერია“ 1890 წელს,—მიდის მემამულესთან და ეღრიჯება: რამდენიმე დღიური მომეცი მოსახნავდაო. ამ დროს ბატონის ყინი და ეკონომიური მოსაზრება სრულს თავის სასტიკს ძალას იჩენს. მე ვარ და არ გაძლევ მამულსაო და თუ მისცემს..., ისეთს ღალას მოსთხოვს, რომ იმისი გადახდა ყოვლად შეუძლებელია... ზოგიერთ ალავას მემამულე თითქმის ორ მესამედს (2/3) მოსავლისას სთხოვს მიწის მომუშავეს“ (გაზ. „ივერია“, 1890, № 186).

² СМ ИЭБГКЗК, V, ч. II, გვ. 76.

ხივათა და ახვანთა ზედა მხარეზეა დასახლებული გლეხები. მათი მამულები დასახლებული გლეხების მიერ იქნა დატოვებული. მათი მამულები დასახლებული გლეხების მიერ იქნა დატოვებული. მათი მამულები დასახლებული გლეხების მიერ იქნა დატოვებული.

აღარებდნენ რა რეფორმის შემდეგდროინდელ ეკონომიურ მდგომარეობას რეფორმამდელი ხანის ცხოვრების პირობებს, ხსენებული გლეხები წერდნენ: „ბატონყმური ურთიერთობის საშინელება, ჯერ კიდევ რომ ცოცხლობს ხალხის მეხსიერებაში, არააობაა იმ ექსპლოატაციისა და შევიწროებასთან შედარებით, რომელსაც განვიცდით ჩვენ დღეს საუფლისწულო მიწებზე დასახლებული გლეხები. მართალია, უწყების მოხელეებს უფლება არა აქვთ თვითნებურად მოექცნენ ჩვენს პიროვნებას, მაგრამ რა ფასი აქვს პირად თავისუფლებას კაცისთვის, რომელსაც ეუბნებიან: „ან შენი შრომის მთელი ნაყოფი დაგვითმე, ან არადა სამუდამოდ აიბარგე ჩვენი ადგილ-მამულიდანო“².

ზემომოტანილი მასალა, რომელიც მთლიანად აღმოსავლეთ საქართველოს ეხება, მკაფიოდ ადასტურებს აღნიშნული მხარის დროებით ვალდებულ გლეხთა მკვეთრად გამოხატულ მცირემიწიანობას. დასავლეთ საქართველოში ამ მხრივ გაცილებით უფრო უარესი მდგომარეობა იყო. მის ყველა მხარეში, განსაკუთრებით კი რაჭის, ლეჩხუმისა და ოზურგეთის მხარეებში, მწარმოებელი კლასის მიწით მოუმარაგებლობას საგანგაშო ხასიათი ჰქონდა. ოფიციალურ პირთა მოხსენებები, გლეხთა საჩივრები, მოწინავე საზოგადოებრივ მოღვაწეთა წერილები და სხვა მასალები ერთხმად ლაპარაკობს ყოფილ საბატონო ყმათა მძიმე ეკონომიურ მდგომარეობაზე, რაც მათი უმიწობა-მცირემიწიანობით იყო გამოწვეული.

ახასიათებდა რა ლეჩხუმის სოფლის მშრომელი მოსახლეობის ცხოვრების პირობებს, გაზეთი „შრომა“ წერდა: „მთელს იმერეთში ვერსად ვერ ნახავთ ამათანა უკიდურეს მდგომარეობაში მყოფ გლეხ-კაცობას. უმთავრესი მიზეზი ამგვარის მდგომარეობისა არის უმიწა-წყლობა... საკუთარი მიწები რომ არა აქვთ, იღებენ დასამუშავებლად საბატონო და საეკლესიო (ეხლა სახაზინო) მიწებს, სამძიმო პირობებით. უნდა ვიქონიოთ მხედველობაში, რომ აქაური მიწები ისე ადვილი დასამუშავებელი არ არის, როგორც სხვა ქვეყანაში... მათი დამუშავება ოთხკეც შრომას შოიბოვს. ამგვარ მიწებზედ გლეხი უზომო ღალას იხდის და უამისოდაც იმდენი ვერ მოყავს, რომ წლიურ სარჩოდ ეყოს და გასასყიდადაც გადაირჩინოს. მაშ რით გადაიხადოს მან ის ათასნაირი სახელმწიფო ან საზო-

1 ЦГИА СССР ф. 515, оп. 44, д. 437, л. 2.

2 იქვე, ფურც. 1.

ვადო გადასახადები, რომელიც მას კისერზედ აწევს? რა საშუალებით დააკმაყოფილოს მან ოჯახის უსაჭიროესი მოთხოვნილება?“¹.

გაზ. „შრომის“ ერთი კორესპონდენტის სიტყვით, გურიში იმის გამო, რომ მიწის მთელი ფონდი, „მცირე ნაწილს გარდა“, მეზატონეთა და ხაზინის საკუთრებას წარმოადგენდა, გლეხებს უმიწოდ სული ძვრებოდათ. ბევრი მათგანის საკუთარი მამულის რაოდენობა თურმე 900 კვადრატულ საექენს (ან ერთ ქცევას) არ აღემატებოდა. „იშვიათია ისეთი გლეხი, — წერდა კორესპონდენტი, — რომელსაც საკუთარი მიწა ჰყოფნიდეს წლის სამუშაოდ და ოჯახის სარჩოდ. გლეხობის უდიდესი უმეტესობა სხვის მიწაზედ მუშაობს საზიაროდ, ე. ი. იმ პირობით, რომ მოწეული ნამუშევრის ნახევარი მზა-მზარეულად თავის ხელით მიწის პატრონს მიუტანოს“².

თანამედროვის მოწმობით, ჩოხატაურის რაიონში გასული საუკუნის ბოლოს შეუძლებელი იყო ორი ისეთი ოჯახის მოძებნა, რომელიც სიმინდ-სა და ღომს გირვანქობით არ ყიდულობდა³. იქაური გლეხის მცირემიწიანობა თურმე იქამდე იყო მისული, რომ ის ძალიან ხშირად იძულებული ზდებოდა ღორი ბაწრით დაება ეზოში⁴.

ჩვენ მოგვეპოვება ერთი თანამედროვე ოფიციალური პირის მოწმობა, რომელშიც მოცემულია XIX საუკუნის დასაწყისის დასავლეთ საქართველოს მწარმოებელი კლასის მიწით მოპარაგების შემდეგი სურათი: „გლეხთა მოსახლეობის კომლთა უმრავლესობა, — ნათქვამია დასახელებულ დოკუმენტში, — ფლობს საშუალოდ 3,5 დესეტინა სანადელო (ყველა სახის — ავტ.) მიწას, მაშინ როცა მიწათმფლობელის მიწის მინიმალური ოდენობა, რომელსაც შეუძლია დარბი გლეხის ოჯახის გამოკვება ქუთაისის გუბერნიისაში, 4 დესეტინაა მეღვინეობის რაიონში და 5 დესეტინა მის დანარჩენ ნაწილში. თავის საშეურნეო დამოუკიდებლობის შენარჩუნებისათვის მიწის ასე მცირე ნაკვეთის მფლობელმა უნდა მიმართოს დამატებით საშოვნარს და სავსებით მოკლებულია მეურნეობის გაუმჯობესებაზე, იარაღებსა და მიწის გაპოხიერებაზე ხარჯების გაწევის საშუალებას, რის გარეშე შეუძლებელია სოფლის მეურნეობის პროგრესი. ჩვეულებრივ გლეხები მიმართავენ მემამულეთა მიწების იჯარით აღებას“ (ხაზი ჩვენია, — ავტ)⁵.

¹ „შრომა“, 1881, № 10.

² იქვე, 1882, № 45.

³ „კვალი“, 1896, № 34.

⁴ იქვე.

⁵ სსცია, ფ. 59, საქ. 561, ფურც. 21.

მწარმოებელი კლასის ეკონომიური მდგომარეობის ეს დახასიათება თუმცა თავისთავად ძალიან საინტერესოა, მაგრამ მხოლოდ მიახლოებით გამოხატავს სინამდვილეს. ციტირებული სიტყვების ავტორი ცოდავს, როდესაც ქუთაისის გუბერნიის გლეხთა დიდ უმრავლესობას თვლის 3,5 დესეტინა მიწისმფლობელად. ქუთაისის გუბერნიის სოფლის მშრომელ მოსახლეობაში მართლაც იყვნენ ასეთი და მეტი ფართობის მქონენი, მაგრამ აბსოლუტურ უმრავლესობას მიწა ამაზე გაცილებით ნაკლები რაოდენობით ჰქონდა. 3,5 დესეტინა სახნავ-სათესი და საბალე-სავენახე მიწა არამცთუ დროებით ვალდებულ, არამედ თვით ეკონომიურად უფრო უზრუნველყოფილ სახელმწიფო გლეხებსაც კი არ ჰქონიათ. საკმარისია აღვნიშნოთ, რომ უკანასკნელი კატეგორიის თითო კომლ გლეხზე მოდიოდა საშუალოდ: 1884 წელს 2,27 დესეტინა¹, ხოლო 1902 წელს — 1,92 დესეტინა². ზოგს კი, როგორც ცნობილია, ამდენიც არ გააჩნდა და ასეთები თავიანთ თავს, სავსებით სამართლიანად, ყველაზე ღარიბ ადამიანებად თვლიდნენ მთელ მსოფლიოში³.

მიწით ესოდენ ცუდად მომარაგებული გლეხი იძულებული იყო იჯარისათვის მიემართა. ასეთ გზას დასდგომია, მაგალითად, შორაპნის მაზრის დროებით ვალდებულ გლეხთა 64%⁴; მესაკუთრე გლეხთა 60%⁵ და სახელმწიფო გლეხთა 63%⁶. პირველი და მეორე ჯგუფის თითო ოჯახი საშუალოდ იღებდა თურმე 1,5 დესეტინა ფართობს, ხოლო მესამის — 1,3 დესეტინას⁷. მეტ-ნაკლებად იგივე მდგომარეობა იყო ქუთაისის გუბერნიის სხვა მაზრებშიც. თბილისის გუბერნიაში კი გასული საუკუნის 80-იან წლებში დროებით ვალდებულ გლეხთა 42%⁸ იჯარის გარეშე ვერ ახერხებდა ცხოვრებას⁹.

ყოველივე ის, რაც ზემოთ ითქვა, ნათლად გვიჩვენებს დროებით ვალდებულ გლეხთა უკიდურეს მცირემიწიანობას. ეს უკანასკნელი იყო ძირითადი, მაგრამ არა ერთადერთი მიზეზი მათი მეტად არასახარბიელო ეკონომიური მდგომარეობისა. მწარმოებელი კლასის შრომისა და ცხოვრების პირობებზე დიდ გავლენას ახდენდა აგრეთვე საგადასახადო სისტემაც.

¹ Ф. Марков, Земельное довольствие государственных крестьян Закавказского края, СМИБГКЗК, II, гл. 261—262; შდრ. И. Г. Антелава, Государственные крестьяне Грузии в XIX веке, II, 1962, гл. 95.

² Ф. Гогичайшвили, Малоземелье среди крестьян Закавказья, гл. 16; И. Г. Антелава, Государственные крестьяне..., т. II, гл. 95.

³ «Мы, люди беднейшие на свете» — წერდნენ 1883 წელს ქუთაისის მაზრის გლეხები-კაკალაიშვილი და სულაშვილები (ЦГИА СССР, ф. 381, оп. 27, л. 2).

⁴ ЦГИА ССР, ф. 1233, оп. 1, л. 15.

⁵ იქვე.

⁶ С. Авалиани, Крестьянский вопрос..., гл. 8.

გადასახადები. ყოფილი საბატონო ყმები მემამულეებს გადასახადებს უხდიდნენ სანადელო მიწებით სარგებლობისათვის. ეს გადასახადები, მაგალითად, 1890 წელს საშუალოდ კომლზე უდრიდა: ღუშეთის მაზრაში — 14 მან. და 29 კაპ.; ბორჩალოს — 16 მან. და 97 კაპ.; გორის — 21 მან. და 33 კაპ.; სიღნაღის — 27 მან. და 42 კაპ.; თბილისის — 39 მან. და 11 კაპ.; თიანეთის — 54 მან. და 24 კაპ. და თელავის მაზრაში — 66 მან. და 30 კაპ.¹.

მთელ გუბერნიაში კი საშუალო დროებით ვალდებული გლეხის თითო ოჯახი მემამულეს უხდიდა 28 მანეთსა და 84 კაპიკს².

გლეხებს ანგარიში ჰქონდათ გასასწორებელი ხაზინასთანაც. ხაზინას აძლევდნენ საკომლო და საერობო გადასახადებს, მისი მოთხოვნით ასრულებდნენ შრომით და სატრანსპორტო ბეგარას. ამას გარდა გლეხები ინახავდნენ სასულიერო წოდებას (დრამის ფული) და მონაწილეობას ღებულობდნენ სოფლისათვის საჭირო მრავალ ღონისძიებათა გატარებაში. ყველაფერი ეს ბევრი დროისა და მატერიალური რესურსების ხარჯვასთან იყო დაკავშირებული. გაზეთ „კვალის“ კორესპონდენტის დასტურით, გასული საუკუნის 90-იან წლებში ბორჩალოს მაზრის სოფ. დიდი გომარეთის თითო გლეხის ოჯახზე მოდიოდა საშუალოდ 70—80 მანეთი სახელმწიფო და სასოფლო გადასახადი³. ეს თანხა, ჩვენი აზრით, გადაჭარბებულია, მაგრამ რეალური სინამდვილის გამომხატველად იმის ნახევარიც რომ მივიღოთ, საკმარისი იქნება ხაზინის ექსპლოატატორული როლის მკაფიოდ წარმოსადგენად.

გლეხებისათვის განსაკუთრებით გამანადგურებელი იყო ნატურალური გადასახადები არა მარტო მათი მოცულობა-მასშტაბის გამო, არამედ იმიტომაც, რომ მათ შესასრულებლად ხალხი, როგორც წესი, გაჰყავდათ სწორედ სასოფლო-სამეურნეო საქმიანობის მთელი სისრულით მიმდინარეობის დროს.

მდგომარეობას ართულებდა ის არაჩვეულებრივი თვითნებობა, რომელსაც ადგილი ჰქონდა სოფლისა და მაზრის ადმინისტრაციის მხრივ ნატურალური გადასახადების შესრულების დროს. მუშახელისა და სატრანსპორტო საშუალებათა შესაძლებელზე მეტი მასშტაბით მოთხოვნა, ხშირ შემთხვევაში მათი მოხელეთა პირადი საჭიროებისთვის გამოყენება, ქრთამის გაშვები გლეხების გადასახადისაგან განთავისუფლება და სხვა ჩვეულებრივ მოვლენად იყო ქცეული.

¹ ССДЗТКГ, Тб., 1893, გვ. 19, 37, 97, 126, 133, 139, 145.

² იქვე, გვ. 145.

³ „კვალი“, 1898, № 34,

დროებით ვალდებული გლეხის საერთო მდგომარეობა. მძიმე, მეტად-არასახარბიელო იყო მცირემიწიან და სრულიად უმიწო, გადასახადებით-დატვირთულ და მოხელეთა თვითნებობით აწიოკებულ გლეხთა ცხოვრება-მათ ლუკმა-პურის შოვნა უჭირდათ, შიმშილობდნენ — ამ სიტყვის-სრული მნიშვნელობით. ახასიათებდა რა მიწით უაღრესად ცუდად მომარაგებული ერთი ქართლელი გლეხის მატერიალურ მდგომარეობას, გაზე-თი „ივერია“ წერდა (1877 წ.): „ამას არაფრისაგან არაფერი არ აბადია; ბატონისაგან ჰარგებია მხოლოდ... სახლის ადგილი და ერთი კვალი ვენახი... ამას ნუ უკითხავთ ნურც საბძელს და ნურც ბოსელს. რაც შეეხება სახლს, ეს ხომ საკვირველი რამ არის. აი მიწის სახლი, რომელიც ძალზეა ჩამჯდარი დედამიწაში, კარები დასავლეთის მხრისაკენ აქვს და დიდი წვიმის-დროს ნიაღვარი თავისუფლად შეუვარდება ხოლმე შინ, ერთი ბანი აქვს ფანჯარაც ეს არის და ბუხარიც. ამ სახლის პატრონს ოთხი ბავშვი ყავს; ორი ვაჟი და ორი ქალი. სულ ექვსი სულნი სცხოვრობენ... აღწერილ-მიწის სახლში, აქვე ჰყავთ პატრონებს ქათმებიც და ინდაურებიც. ამათ-ცხოვრება... რაღაც საცოდაობაა. ცარიელი მჭადიც კი სანატრელია... ლობიოსაც ათასში ერთხელ ეღირსებიან... რაც შეეხება ჩაცმა-დახურვას, ეს ხომ სათქმელი არ არის — ერთი დაგლეჯილი ჩოხა თავისის შესაფერისის პერანგით და მისი ამხანაგით — აი ეს არის ტანსაცმელი სახლის-უფროსისა. ბავშვები ხომ სრულიად თავ-შიშველები და ფეხშიშველები არიან, მხოლოდ დაძინების პერანგები აცვიათ. არც ბავშვების დედა-უკეთეს მდგომარეობაში. ამასაც დაკონკილებში და დაძინების დროს ამოს-დის სული. ამათთვის არც ძილია ხეირიანი. კერის ახლოს უგიათ ძველი ფარდავი და ბავშვები ამ ფარდავზე გოჭებივით მისწოლიან დედას ერთ ტურტლიან და დაგლეჯილ საბნის ქვეშ. ამათ მამას კიდევ კუნჭულში წაუვია რაღაც ჩული და ზედ თავისი ჩოხა წაუხურავს. ეს არის ამ საწყლების ცხოვრება“¹.

უფრო მძიმე იყო სრულიად უმიწო გლეხის ხვედრი. აი როგორაა აღწერილი მისი ყოფა იმავე გაზეთში. „ეს ხომ საცოდავია და საცოდავი. ამას სახლის ადგილიც კი არსად აქვს. ერთ წელიწადს ერთის... ბოსელში-დგას, მეორე წელიწადს — მეორის... ხან ერთი გამოავადებს ბოსლიდან, ხან მეორე და არის ერთ ცეცხლში. რაღა ლაპარაკი უნდა, რომ ამისი ჩაც-მა-დახურვა, სმა-ჭამა, უფრო უკანასკნელია (ე. ი. უარესია — ავტ.); მინამ ზემოდ მოყვანილი გლეხისა, თუმცა კი ესეც არავის ჩამორჩება მუშაობაში“².

¹ „ივერია“, 1877, № 34, შეადარე ს. ბავრელის წერილი „ზამთარი“ („ივერია“ № 1878, № 8).

² იქვე.

მწერალ ი. ბაქრაძეს ერთ თავის სტატიაში, რომელიც 1875 წელს გაზ. „დროებაში“ დაიბეჭდა, აღწერილი აქვს საშუალო შეძლების დროებით ვალდებული გლეხის მეურნეობა, რომელიც სანახევროდ ამუშაებდა მემამულის ხუთ დესეტინა მიწას. როგორც დასახელებული ავტორის გაანგარიშებიდან ჩანს, ეს მეურნეობა დეფიციტური ყოფილა, მისი წლიური გასავალი, მხოლოდ საწარმოო ხარჯების სახით, 46 მანეთით სჭარბობდა თურმე შემოსავალს¹.

მართალია, ყოფილ საბატონო ყმათა აბსოლუტურ უმრავლესობას ცხოვრება უჭირდა და მატერიალურად დაბეჩავებული იყო, მაგრამ მათ შორის საკმაოდ დიდი შეძლების კომლებიც მოიპოვებოდნენ. რიცხობრივად ისინი ბევრნი არ იყვნენ, მაგრამ ეკონომიურად ეს ჯგუფი წამყვან ძალას წარმოადგენდა. ამ ჯგუფს ეკუთვნოდნენ, მაგალითად, გორის მაზრის გლეხები თეიმურაზ მედოშვილი, პეტრე სამუქაშვილი, სოლომონ გოგიჩაიშვილი, იოსებ თანდილაშვილი, დათო წრიალაშვილი, გედევან გაგლოშვილი, ალექსი ზაზიკაშვილი, ზაქარია გუგიტაშვილი, აბრამ ბეგიაშვილი და სხვ. ამათგან ყველაზე „მცირემიწიანი“ 50 დესეტინის მფლობელი დათო წრიალაშვილი იყო, ხოლო ყველაზე მდიდარი — 200 დესეტინიანი მარტო სახნავ-სათესი ფართობის პატრონი აბრამ ბეგიაშვილი².

სტატიაში „დროებით ვალდებულ გლეხთა მდგომარეობა კახეთში“, რომელიც 1888 წელს გაზეთ „მეურნეში“ დაიბეჭდა, აღწერილია შეძლებული გლეხის მეურნეობა. იგი რენტაბელურია, წმინდა მოგების მომცემი. მისი წლიური შემოსავალი სჭარბობს გასავალს 224 მანეთითა და 90 კაპიკით³.

სწორედ ეს რიცხობრივად მცირე შეძლებული გლეხების ჯგუფი იქნა და პირველ რიგში დებულებით გათვალისწინებულ (თუ სხვა) მიწებს, გამოდიოდა დროებით ვალდებული მდგომარეობიდან და ეწერებოდა შესაკუთრე გლეხთა კატეგორიაში. უმრავლესობა კი, როგორც ქვემოთაღ აღვნიშნეთ, ამის საშუალებას მოკლებული იყო, თავის დახსნას ვერ ახერხებდა და თუ ახერხებდა — დიდი გაჭირვებით; მას უხდებოდა სესხის აღება, რომლის მძიმე პირობები მეტად არასახარბიელო პერსპექტივებთან იყო დაკავშირებული.

¹ საშუალო შეძლებისად ავტორი თვლის აღწერილი მეურნეობის პატრონს, მაგრამ ის სტატიის მიხედვით, უფრო ღარიბ გლეხად ჩაითვლება, ვიდრე საშუალოდ.

² „დროება“, 1875, № 113, 114, 117, განსაკუთრებით უკანასკნელი.

³ ი. უთურაშვილი, გლეხობის კლასობრივი დიფერენციაცია საქართველოში XIX საუკუნის მეორე ნახევარში, თბ., 1958, გვ. 179.

⁴ გლეხების მასიური დავალიანების შესახებ იხ. „სასოფლო გაზეთი“, 1870, № 4, 1872, № 17; KCX, 1899, № 273, 276; სსცია, ფ. 244, ანაწ. 1, საქმე 55, ფურც. 9—10.

ბ) სახელმწიფო გლეხები

მიწათმფლობელობა. თბილისისა და ქუთაისის გუბერნიების სახელმწიფო გლეხთა მოსამარაგებლად (გერმანელი კოლონისტების ჩათვლით) სულ 946 237 დესეტინა მიწა ან სახაზინო მიწების საერთო რაოდენობის 35,9% იყო გამოყენებული.

XIX საუკუნის 80-იან წლებში შეგროვილი ცნობების თანახმად ჩვენთვის საინტერესო კატეგორიის გლეხის თითო კომლზე და სულზე მოდიოდა საშუალოდ შემდეგი რაოდენობის სანადელო მიწა¹ (იხ. ცხრილი 3).

ცხრილი 3

გუბერნიების დასახელება	მიწა (დესეტინობით) გერმანელი კოლონისტების გამოკლებით მოდიოდა ²			
	საშუალოდ თითო კომლზე		საშუალოდ ორივე სქესის თითო სულზე	
	ყველა სახის (კარმიდამო, ტყე, ბალი, სახნავი, საძოვარი, უვარგისი) მიწები	მათ შორის სახნავ-სათესი საბაღე-სავენახე	ყველა სახის (კარმიდამო, სახნავი, საძოვარი, ბალი, ტყე, უვარგისი). მიწები	მათ შორის სახნავ-სათესი საბაღე-სავენახე
თბილისის	17,67	5,89	2,76	0,92
ქუთაისის	4,23	2,70	0,64	0,41

¹ ცხრილი შედგენილია ფ. მარკოვის სტატიის «Земельное довольствие государственных крестьян Закавказского края», -ს მიხედვით, СМИБГКЗК, II, გვ. 261—262, 263—264.

² თბილისის გუბერნიის სახელმწიფო გლეხების მიწის ფართობში იგულისხმება მხოლოდ სანადელო მიწები, რომელიც ხაზინას ეკუთვნოდა. მათ საკუთარი მიწებიც გააჩნდათ, მაგრამ შედარებით უმნიშვნელო რაოდენობით. ხსენებული გუბერნიის სახელმწიფო გლეხების განკარგულებაში სულ (კერძო პირთაგან იჭართი აღებული ნაკვეთების გარეშე) 867276 დესეტინა მიწა ყოფილა, აქედან 875,518 დესეტინა ან საერთო ფონდის 98,86%-ხაზინის და 9758 დესეტინა ან საერთო რაოდენობის 1,14% საკუთრივ გლეხების (იხ. ი. მეღველეს «Справочная записка», მისი მოხსენების დანართი). ხოლო ქუთაისის გუბერნიის გლეხების მიწის ფართობში შეტანილია ორივე კატეგორიის მიწა როგორც საკუთარი, ისე ხაზინის. მათი საერთო რაოდენობა 88,719 დესეტინას უდრიდა. აქედან გლეხები თავიანთ საკუთრებად თვლიდნენ 43,912 დესეტინას ან მთელი ფონდის 48% (ი. მეღველეს «Справочная записка», შეადარე Ф. Марков, Земельное довольствие государственных крестьян Закавказского края, СМИБГКЗК, II, გვ. 236.)

სხვა ცნობით კი გლეხების სარეგებლობაში მყოფი მიწების 47,8% სახაზინო ყოფილა, 28,33%—საკუთარი და 23,87% — ხაზინასთან თუ კერძო პირებთან სადავო. ССДЗТКГ, Тифлис, 1893, გვ. 11; პ. გუგუშვილი, საქართველოსა და ამიერკავკასიის ეკონომიკური განვითარება XIX—XX სს., ტ. II, თბ., 1956, გვ., 658.

როგორც ცხრილიდან ჩანს, თბილისის გუბერნიაში თითო კომლზე საშუალოდ მოდიოდა 17,67 დესეტინა ყველა სახის მიწა, ხოლო სახნავ-სათესი და საბაღე-სავენახე — 5,89 დესეტინა. ქუთაისის გუბერნიაში კი მდგომარეობა გაცილებით უარესი იყო. სახაზინო გლეხის თითო ოჯახს იქ საშუალოდ 2-ჯერ და მეტად ნაკლები სახნავ-სათესი და 4-ჯერ ნაკლები ყველა სახის მიწა გააჩნდა.

იმის გამოსარკვევად, თუ რამდენად აკმაყოფილებდა მიწის ეს რაოდენობა შრომელი კაცის მოთხოვნილებას, უნდა ვიცოდეთ, რა ფართობი იყო საერთოდ საჭირო (ქვეყნის კლიმატურ-გეოგრაფიული პირობებისა და სასოფლო-სამეურნეო ტექნიკის იმდროინდელი დონის გათვალისწინებით) იმისათვის, რათა ქართველ გლეხს ერჩინა თავისი ოჯახი და მოეხდა მრავალგვარი ვალდებულება სახელმწიფოსა და საზოგადოების წინაშე. ამასთან დაკავშირებით ფრიალ საყურადღებოა სახელმწიფო ქონებათა სამინისტროს ამიერკავკასიის რწმუნებულის „დეისტვიტელნი სტატსკი სოვეტნიკის“ ი. მეღვედევის ორი მოხსენება — «Записка по вопросу об основаниях поземельного устройства государственных крестьян пяти губерний Закавказского края»¹ და «Пояснительные примечания к спискам селений казенных крестьян Закавказского края»², შედგენილი და წარდგენილი მის მიერ მთავრობისათვის XIX საუკუნის 90-იან წლებში. პირველ დოკუმენტში მოცემულია ავტორის შეხედულებანი სახაზინო გლეხების მიწათმოწყობის საერთო პრინციპების შესახებ, ხოლო მეორეში — თბილისისა და ქუთაისის გუბერნიების სახელმწიფო გლეხებით დასახლებული სოფლების ჯგუფებად დაყოფა მათი მდებარეობის, კლიმატურ-გეოგრაფიული პირობებისა და მოსახლეობის საქმიანობის მიხედვით. თითოეული ამ ჯგუფისათვის მეღვედევეს დასახლებული აქვს ნორმა სახნავ-სათესი, საკარმიდამო, საბაღე-სავენახე და სათიბ-საძოვარი მიწებისა, რომელიც, მისი აზრით, აუცილებელი იყო გლეხის ოჯახის მინიმალური მოთხოვნილების დასაკმაყოფილებლად. საშუალო სამაზრო და საგუბერნიო ნორმები ხსენებულ დოკუმენტებში მოცემული არ არის, მაგრამ მათი გაანგარიშება, ცხადია, სიძნელეს არ წარმოადგენს. ი. მეღვედევის აზრით, როგორც ამ გაანგარიშებიდან ჩანს, თბილისის გუბერნიაში სახაზინო გლეხის თითო ოჯახს უნდა ჰქონოდა ნადელი არა ნაკლებ 18 (19) დესეტინისა, ხოლო ქუთაისის გუბერნიაში

¹ გამოქვეყნებულია ჩვენ მიერ წიგნში «Реформа поземельного устройства государственных крестьян... в конце XIX века», Сухуми, 1952, გვ. 27—74.

² სსცია, ფ. 12, ანაწ. 11, საქ. 311. გამოქვეყნებულია ჩვენ მიერ წიგნში «Государственные крестьяне Грузии в XIX веке», т. II.

— 11 (12) დესეტიინის¹. ამაში იგულისხმებოდა ვარგისი მიწების ყველა სახე — საკარმიდამო სახნავი, საბაღე, სავენახე, საბოსტნე, სათიბი და საძოვარი ადგილები, ე. ი. ყველაფერი ტყის მასივის გამოკლებით. აქედან მარტო სახნავ-სათესი და საბაღე-სავენახე მიწებს მოხსენებითი ბარათის ავტორი უთმობდა: თბილისის გუბერნიაში — 8 დესეტიინას, ქუთაისის გუბერნიაში — 10 დესეტიინას².

ამ ნორმების სახელმწიფო გლეხთა ფაქტიურ მიწათმფლობელობასთან შედარება გვიჩვენებს, რომ მწარმოებელი კლასის ჩვენთვის საინტერესო კატეგორიას მიწა საკმაო რაოდენობით არ ჰქონია არც აღმოსავლეთ, არც დასავლეთ საქართველოში. ეს ითქმის როგორც ვარგისი მიწების ყველა სახის, ისე, კერძოდ, სახნავ-სათესი და საბაღე-სავენახე ნაკვეთების შესახებაც. ქუთაისის გუბერნიაში, მაგალითად, ცხრილის თანახმად, სახაზრო გლეხის თითო კომლზე მოდიოდა საშუალოდ 4,23 დესეტიინა ყველა სახის მიწა, მაშინ როდესაც მას, ი. მეღვედევის მოხსენების მიხედვით, მარტო ვარგისი მიწა უნდა ჰქონოდა ტყის მასივის გამოკლებით არანაკლებ 11—12 დესეტიინისა. მეტ-ნაკლები ზომით იგივე ითქმის სახნავ-სათესი და საბაღე-სავენახე მიწების შესახებაც, რომლის ფაქტიური საშუალო საკომლო სიდიდე 2,7 დესეტიინას ან საჭირო ნორმის მხოლოდ 27%-ს უდრიდა. თბილისის გუბერნიაში გლეხი შედარებით უკეთ იყო მომარაგებული, მაგრამ სახარბიელო მდგომარეობა, რა თქმა უნდა, არც საქართველოს ამ ნაწილში ყოფილა. საკმარისია აღვნიშნოთ, რომ ჩვენი ქვეყნის ამ მხარეში სახაზინო გლეხის თითო ოჯახზე მოდიოდა 17,67 დესეტიინა ყველა სახის მიწა, ე. ი. უფრო ნაკლები, ვიდრე მარტო ვარგისი მიწების იმ საშუალო საკომლო ნორმა, რომელსაც როგორც აუცილებელ მინიმუმს, ითვალისწინებდა ი. მეღვედევი. სახნავ-

¹ ამ ნორმების მიხედვით, ორივე სქესის თითო სულს (საშუალოდ) ყველა სახის ვარგისი მიწა უნდა ჰქონოდა: თბილისის გუბერნიაში 2,7 დესეტიინა, ქუთაისის—1,55 დესეტიინა.

ნორმის შედარებით სიდიდე პირველ შემთხვევაში აიხსნება იმ განსაკუთრებული რაოდენობით, რომელსაც თამაშობდა მეცხოველეობა თბილისის გუბერნიის ეკონომიურ ცხოვრებაში. ი. მეღვედევის გამოანგარიშებით, აღმოსავლეთ საქართველოს მაღალმთიან რაიონებში სახაზინო გლეხთა ნადელის 2,3 სათბ-საძოვრებს უნდა სჭეროდა. საშუალო ზონის რაიონებში—50% და თბილი ზონის რაიონებში—40%; И. Г. Антелава, Реформа поземельного устройства государственных крестьян Закавказья в конце XIX века» (შემდეგ შემოკლებით «Реформа»), გვ. 46.

² სულზე გაანგარიშებით კი მივიღებთ 1,25 დესეტიინასა და 1,52 დესეტიინას.

სახნავ-სათესი და საბაღე-სავენახე მიწის უფრო მაღალი ნორმა ქუთაისის გუბერნიაში აიხსნება იმით, რომ სიმინდს, რომელიც დასავლეთ საქართველოში სოფლის მეურნეობის წამყვან და მასიურად გავრცელებულ კულტურას წარმოადგენდა, გაცილებით მეტი ფართობი სჭირდებოდა, ვიდრე ვენახს—კახელი გლეხის შემოსავლის ძირითად წყაროს.

სათესი და საბაღე-სავენახე მიწები კი ქართლ-კახეთის სახაზინო გლეხის თითო ოჯახს გააჩნდა დაახლოებით საჭირო რაოდენობის (8 დეს.) მხოლოდ 75%.

ასევე არასახარბიელო სურათს იძლევა მედვედევის ნორმების შედარება გლეხთა მიწით მომარაგების ფაქტიურ მდგომარეობასთან ცალკეულ მაზრებში.

მიწის ფონდის განაწილებაში ცალკეულ სოფლებსა და კომლებს შორის, თანამედროვეთა მოწმობით, მკვეთრი უთანაბრობა შეიმჩნეოდა. «Распределение земли между казенными крестьянами, — ккитხულობთ თბილისის გუბერნიის სახელმწიფო ქონებათა მმართველის 1885 — 1886 წლების ანგარიშში, — вообще крайне неравномерно; оно не только не согласуется с местными сельскохозяйственными условиями в различных районах губернии, но оно неравномерно даже в местностях с совершенно одинаковыми земледельческими условиями. Размеры подымных наделов измеряются от 40 и даже более десяти до нескольких квадратных сажений, не говоря уже о 2000 почти душ мужского пола, совершенно безземельных»¹. ამასვე ადასტურებს თავის მოხსენებაში სახელმწიფო ქონებათა სამინისტროს ამიერკავკასიის რწმუნებული. «Между тем, — წერს ის, — размеры пользования казенною землею отличается крайнею неравномерностью: подымные наделы видоизменяются в несо-розмерно больших пределах, начиная от нескольких сот квадрат-ных сажений и кончая количеством десятин, доходящим до 70»².

თანამედროვეთა ამ რამდენადმე ზოგად განცხადებას აკონკრეტებს XIX საუკუნის 80-იან წლებში შეგროვილი ცნობები. ამ ცნობების თანახმად თბილისის გუბერნიის სახელმწიფო გლეხებით დასახლებული სოფლები საკომლო ნადელების სიდიდის მიხედვით შემდეგნაირად ნაწილდებოდნენ³ (იხ. ცხრილი 4).

ც ხ რ ი ლ ი : 4

თბილისის გუბერნია	სახ. გლეხებით დასახლებული სოფლები	საერთო რაოდენობა გერმანულ-კოლ. გამოკლებ.	არ ქონდა საწადლო მიწა	ნადელი ქონდა				
				5-დესე-ტინამდე	10-დან 16 დესე-ტინამდე	16-დან 25 დესე-ტინამდე	25-დან 50 დესე-ტინამდე	50 დესე-ტინაზე მეტი
	932	11	213	193	123	120	152	120
	100,0	1,18	22,8	20,70	13,19	12,87	16,30	12,87

¹ სსცია, ფ. 244, ანაწ. 1, საქ. 44, ფურც. 8.

² ЦГИАЛ, ф. 243, оп. 1, д. 14, л. 279 об.

³ СМИБГКЗК, т. II, გვ. 267.

განსაკუთრებით მძიმე მდგომარეობა, როგორც აღვნიშნეთ, ქუთაისის გუბერნიაში იგრძნობოდა. სახელმწიფო გლეხების განკარგულებაში მყოფი სახაზინო, საკუთარი და ხაზინასთან თუ კერძო პირებთან სადავო მიწის ფონდი საკომლო ნაღვლების სიდიდის მიხედვით შემდეგნაირად ნაწილდებოდა (იხ. ცხრილი 5).

ც ხ რ ი ლ ი 5¹

	უმიწაწყო- თა რიცხვი	საკომლო ნაღვლების სიდიდე											
		ღესეტიანადე	1—2 ღესეტ.	2—3 ღეს.	3—4 ღეს.	4—5 ღეს.	5—6 ღეს.	6—7 ღეს.	7—8 ღეს.	9—9 ღეს.	9—10 ღეს.	10—20 ღეს.	20—514,50 ღესეტ.
ამა თუ იმ ზომის ნაღვლის მქონე კომლთა რიცხვი	398	2142	4427	4016	3368	1955	1441	865	602	445	283	834	221
% კომლთა საერთო რაოდენობასთან შეფარდებით	1,90	10,20	20,09	19,21	16,04	9,31	6,86	4,12	2,87	2,12	1,35	3,97	1,05

ამრიგად, 398 კომლს ან გლეხთა საერთო რაოდენობის (20 997 კომლი) 1,90%-ს არ ჰქონდა არც ერთი საექანი არც საკუთარი და არც სახელმწიფო მიწა. დანარჩენი კომლები კი, ი. მედვედევის ნორმების მიხედვით, ასე ჯგუფდებოდნენ: უკიდურესად მცირემიწიანები (1-დან 5 ღესეტიანადე), მიწის არასაკმაო (5-დან 10 ღესეტიანადე), საკმაო (10-დან 20 ღესეტიანადე) და, დასასრულ, ჭარბი რაოდენობით მქონენი. მათი ხვედრითი წონა შესაბამისად უდრიდა: 75,76%-ს (15 908 კომლი), 17,32%-ს (3 636 კომლი), 3,97%-ს (834) და 1,05%-ს (221 კომლი)².

უკიდურესად მცირემიწიანი და მიწის არასაკმაო რაოდენობით უზრუნველყოფილი მშრომელების გვერდით განსახილველი გუბერნიის ზუთ მაზრაში — ქუთაისის, ზუგდიდის, ოზურგეთის, სენაკისა და შორაპნის — არსებობდა რიცხობრივად შედარებით უმნიშვნელო, მაგრამ თავისი ეკონომიური მდგომარეობით არსებითი მნიშვნელობის

¹ СМИЭБГКЗК, т. II, გვ. 270.

² აქაც, სხვა შემთხვევის მსგავსად, იძულებული ვართ გლეხთა მიწით უზრუნველყოფის დონის გასარკვევად ვისარგებლოთ მარტო ვარგისი მიწებისათვის გაანგარიშებული მედვედევის ნორმებით და მიუყენოთ ის ცხრილს, რომელიც შეიცავს სტატისტიკურ მასალას მწარმოებელი კლასის ჩვენთვის საინტერესო კატეგორიის განკარგულებაში მყოფი უკლებლოვ ყველა სახის მიწის შესახებ. ასეთი გზით, რა თქმა უნდა, გლეხთა ეკონომიური მდგომარეობის მხოლოდ მიახლოებითი სურათის წარმოდგენა შესაძლებელია.

მქონე კიდევ ორი ჯგუფი, აქედან ერთი ნორმალურად, ხოლო მეორე ჭარბად იყო მიწით უზრუნველყოფილი. პირველის საერთო რაოდენობა 1 767 კომლს ან 8,42%-ს უდრიდა და მაზრების მიხედვით ასე ნაწილდებოდა: ქუთაისის მაზრაში — 1 062 კომლი, სენაკის — 304, ზუგდიდის — 214, ოზურგეთის — 101 და შორაპნის მაზრაში — 80 კომლი. პროცენტული შეფარდებით კი უზრუნველყოფილი გლეხები ყველაზე მეტად ზუგდიდის მაზრაში ყოფილან (25,98%). მას მოსდევდნენ სენაკის, ქუთაისის, ოზურგეთისა და შორაპნის მაზრები, სადაც ხსენებული ჯგუფის ხვედრითი წონა შესაბამისად 13,72, 12,53, 4,72% და 1,79%-ს უდრიდა. არათანაბრად იყო განაწილებული მაზრებს შორის ის 221 მიწით უხვად უზრუნველყოფილი გლეხიც, რომელიც შესასწავლ გუბერნიაში ირიცხებოდა. ამ რაოდენობის 88,69% (196 კომლი) მართო ქუთაისის მაზრაზე მოდიოდა, 5,88% (13 კომლი) — შორაპნის, 3,17% (7 კომლი) — ოზურგეთის, 1,35% (3 კომლი) — ზუგდიდის და 0,90% (2 კომლი) — სენაკის მაზრაზე.

ამრიგად, ჩვენ მიერ მოტანილი ფაქტიური მასალა, რომელიც გასული საუკუნის 80-იანი (ნაწილობრივ კი 70-იანი) წლების სინამდვილეს ასახავს, სახელმწიფო გლეხთა მიწით უზრუნველყოფის მეტად უნუგეშო სურათს იძლევა. მათი აბსოლუტური უმრავლესობა, მკვეთრად განიცდიდა რა მიწის სიმცირე-ნაკლებობას, მეურნეობის გაშლა-გამართვას ვერ ახერხებდა და მძიმე ეკონომიურ-მდგომარეობაში იმყოფებოდა.

მომდევნო ხანაში მდგომარეობა კიდევ უფრო გაუარესებულა. 90-იანი წლების მიწურულისა და 900-იანი წლების დასაწყისისათვის სახელმწიფო გლეხთა მიწათმფლობელობა საგრძნობლად შემცირებულა, რაც მკაფიოდ ჩანს ქვემოთ მოტანილი ცხრილიდან.

ც ხ რ ი ლ ი 6

გუბერნიების დასახელება	საშუალოდ თითო კომლზე მოდიოდა სახნავი მიწა (დეკეტინობით)		საშუალო საკომლო ნადელის შემცირების პროცენტი
	1884 წ. ¹	1902 წ. ²	
თბილისის	5,66	4,92	13,00
ქუთაისის	2,27	1,92	15,42
სულ საქართველოში	3,97	3,42	13,84

¹ პროცენტი შესაფერი მაზრის სახაზინო გლეხების კომლთა საერთო რიცხვიდანაა განაგარიშებული.

² Ф. М а р к о в. Земельное довольствие государственных крестьян Закавказского края; СМИБГКЗК, т. II, 261—262.

³ Ф. Г о г н ч а и ш в и л и, Малоземелье среди крестьян Закавказья, Тиф., 1903, გვ. 16.

ცხრილიდან ირკვევა, რომ 1902 წლისთვის 1884 წელთან შედარებით სახნავი მიწების საშუალო საკომლო ნაღელი შემცირებულა: თბილისის გუბერნიაში — 13%-ით, ქუთაისის — 15,42%-ით, ხოლო მთლიანად საქართველოში — 13,84%-ით.

გადასახადები. როგორც დროებით ვალდებული გლეხების, ისე სახაზინო გლეხთა მძიმე ეკონომიური მდგომარეობის განმსაზღვრელ ერთ-ერთ მნიშვნელოვან ფაქტორს საგადასახადო სისტემა წარმოადგენდა. ნათელი წარმოდგენა რომ ვიქონიოთ გადასახადების სიმძიმეზე, მოვიტანთ XIX საუკუნის 80-იან წლებში მედვედევის მიერ შედგენილ სათანადო ცხრილს (იხ. ცხრილი 7).

როგორც ცხრილიდან ჩანს, თბილისის გუბერნიის სახაზინო გლეხები უფრო მეტად იყვნენ დატვირთულნი გადასახადებით, ვიდრე ქუთაისის გუბერნიისა. პირველ მათგანში საშუალოდ თითო კომლზე მოდიოდა 13 მანეთი და 75 კაპიკი ყველა სახის გადასახადი, ხოლო მეორეში — 10 მანეთი და 36 კაპიკი. გადასახადების სიდიდის მხრივ განსაკუთრებით გამოირჩეოდნენ სიღნაღის (17 მან. და 17 კაპ. კომლზე), თბილისის (16 მან. და 20 კაპ.), თელავის (15 მან. და 17 კაპ.), გორის (15 მან. და 03 კაპ.), ახალქალაქის (14 მან და 28 კაპ.), ახალციხისა (14 მან. და 27 კაპ.) და ბორჩალოს (13 მან. 83 კაპ.) მაზრები. ყველაზე დაბალი ნორმები კი ყოფილა დუშეთისა (6 მან. და 27 კაპ.) და თიანეთის (6 მან. და 34 კაპ.) მაზრებში. მაგრამ მართო ამ მონაცემების მიხედვით ძნელია მსჯელობა საგადასახადო ტვირთის სიმძიმის შესახებ საერთოდ საქართველოს სხვადასხვა კუთხეში. ამაზე შედარებით სრულ წარმოდგენას გვაძლევს ცხრილის ბოლო გრაფები, რომლებიც გამოხატავენ გადასახადების შეფარდებას მწარმოებელი კლასის მიწის ფართობთან. ამ რიგის ცნობებიდან ირკვევა, რომ ქუთაისის გუბერნიაში კულტურული მიწის თითო დესეტინაზე მოდიოდა 66%-ით მეტი გადასახადი, ვიდრე თბილისის გუბერნიაში. რაც შეეხება გადასახადის იმ ნაწილს, რომელიც ყველა სახის მიწის თითო დესეტინაზე მოდიოდა, ის დასავლეთ საქართველოში თითქმის სამნახევარჯერ მეტი იყო, ვიდრე აღმოსავლეთში.

აქვე შევნიშნავთ, რომ იმ თანხიდან, რომელიც თბილისის გუბერნიის სახელმწიფო გლეხის თითო ოჯახს ეხარჯებოდა საშუალოდ გადასახადების გასასტუმრებლად (13 მან. და 75 კაპ.), 28,58% (3 მან. და 83 კაპ.) საკომლო გამოსაღებზე მოდიოდა, 35,42% (4 მან. და 82 კაპ.) — საერობოზე და 36% (5 მან. და 09 კაპ.) — ნატურალურ და სასოფლო ფულად გადასახადებზე. ქუთაისის გუბერნიაში კი მათი ხვედრითი წონა შესაბამისად უდრიდა: 36,00, 33,59 და 30,41%-ს.

საერთოდ, საქართველოს სახელმწიფო გლეხებს აწვავთ სხვადასხვა გა-

გზარებისა და გუბერნიების დასახელება	საკომლო გადასახადი (მანეთობით)			საეროზო გომოსალები (მანეთობით)			ნაჭურ. გადასახადები და სასოფ. გომოსალები (ან.)			სულ (მანეთობით)				
	ნაჭურ. გადასახადი	საეროზო გომოსალები	ნაჭურ. გადასახადები და სასოფ. გომოსალები	ნაჭურ. გადასახადი	საეროზო გომოსალები	ნაჭურ. გადასახადები და სასოფ. გომოსალები	სულ	ნაჭურ. გადასახადი	საეროზო გომოსალები	ნაჭურ. გადასახადები და სასოფ. გომოსალები	სულ			
												ნაჭურ. გადასახადი	საეროზო გომოსალები	ნაჭურ. გადასახადები და სასოფ. გომოსალები
თბილისი	3,93	0,79	0,57	4,67	0,84	0,67	7,60	1,27	1,09	0,54	16,20	2,93	2,34	1,15
ახალქოქის	4,37	0,8	0,42	6,10	0,63	0,59	4,41	0,19	0,43	0,21	11,8	1,65	2,44	0,71
ახალკობის	4,91	0,55	0,72	6,03	0,68	0,88	3,33	0,38	0,49	0,24	14,27	1,16	2,09	1,04
ბორჩალოს	3,70	0,44	0,0	5,31	0,63	0,71	4,82	0,58	0,65	0,21	13,83	1,68	1,86	0,69
გორის	4,73	0,75	1,31	5,99	0,85	1,9	1,91	0,77	1,5	0,01	15,03	2,37	4,15	3,09
დუშეთის	1,63	0,25	0,67	2,97	0,5	1,22	1,67	0,2	,68	0,12	6,27	5,95	2,57	0,46
სიღნაღის	4,91	0,90	0,57	6,11	1,11	0,71	6,15	1,12	0,7	0,32	17,7	3,13	1,99	0,89
თულავის	3,31	0,60	0,88	5,41	0,99	1,43	1,05	1,9	1,87	1,6	15,77	2,88	4,18	3,26
თიანეთის	2,88	0,55	1,72	1,07	0,21	0,64	2,34	0,4c	1,42	0,05	6,34	1,22	3,78	0,14
სამშულოდ თბილისის გუბერ.	3,83	0,60	0,64	4,82	0,75	0,81	5,09	0,79	0,85	0,28	13,75	2,14	2,31	0,77
ქუთაისის	3,65	0,59	1,14	3,65	0,58	1,14	2,62	2,42	0,82	0,49	9,92	1,59	3,10	1,87
ზუგდიდის	5,18	0,97	1,47	2,67	0,49	0,76	3,43	0,64	0,97	0,56	11,8	2,10	3,20	1,83
ლენინოპოლისის	3,98	0,0	1,55	2,44	0,31	0,95	3,35	0,43	1,31	0,81	9,97	1,24	3,81	2,44
ოპურეთის	3,73	0,55	1,54	2,79	0,11	1,15	3,67	0,54	1,52	2,94	10,19	1,50	4,21	2,60
რაჭის	4,03	0,49	2,21	3,47	0,43	1,90	4,42	0,54	2,43	1,57	11,92	1,46	6,54	4,24
სენაკის	5,01	0,65	1,93	2,87	0,38	1,0	3,06	0,40	1,18	1,01	10,94	1,44	4,21	3,61
შორაპის	3,10	0,47	1,46	3,99	0,57	1,77	2,83	0,31	1,26	0,08	10,12	1,35	4,49	3,15
სამშულოდ ქუთაისის გუბერ.	3,83	0,58	1,42	3,48	0,53	1,29	3,05	0,46	1,13	0,72	10,36	1,57	3,81	2,45

დასახადების მიძიე ტვირთი, რომელიც მათ აუარებელ დროსა და მატე-რიალურ დოვლათს ართმევდა. აღსანიშნავია, რომ ჩვენთვის საინტერესო კატეგორიის გლეხი კულტურული მიწის თითო დესეტინაზე ქუთაისის გუბერნიაში — 10 ფუთი სიმინდის ღირებულ თანხას (3 მან. და 84 კაპ.) იხ-დიდა, ხოლო თბილისის გუბერნიაში დაახლოებით 4,5 ფუთისა.

‘**მთავრობის ღონისძიებანი სახელმწიფო გლეხთა მიწათმოწყობისათვის. 1900 წლის 1 მაისის კანონი.** რას აკეთებდა მთავრობა იმისათვის, რომ ნაწილობრივ მაინც მოედგა სული მცირემიწიანობა-უმიწობით უკიდურესობამდე მისულ სახაზინო გლეხს? სათანადო მასალის შესწავლა გვიჩვენებს, რომ XIX საუკუნის მთელ მანძილზე მას არ გაუტარებია არც ერთი ს ა ე რ თ ო ხ ა ს ი ა თ ის ღონისძიება მწარმოებელი კლასის ჩვენთვის საინტერესო კატეგორიის მიწით უზრუნველყოფა-მომარაგების მიმართულებით. უფრო მეტიც. ეს საკითხი გასული საუკუნის 80—90-იან წლებამდე საერთოდ არ ყოფილა რამდენადმე მაინც სერიოზული განხილვის საგანი. «За небольшим исключением, — წერდა ი. მედვედევი, — касающимися водворения в Закавказье немецких колонистов и русских переселенцев, земельное положение казенных крестьян этого края никогда не было предметом каких-либо регулирующих его законодательных актов. Равным образом в Закавказском крае не было предпринимаемо систематических мер по обеспечению этих крестьян землями и нормированию их наделов, подобных тем, какие так широко принимались во внутренних губерниях империи в период попечительства над казенными крестьянами Министерства государственных имуществ»¹. (ხაზი ჩვენია — ავტ.).

ამის უმთავრეს მიზეზად მთავრობა ამიერკავკასიის მოსახლეობის დიდი ნაწილის შომთაბარულ ცხოვრებას, მიწების ბოლომდე გაუმიჯნელობასა და ხელოვნური მორწყვის საკითხის მოუგვარებლობას ასახელებდა².

ყოველივე ზემოთქმული, რა თქმა უნდა, იმას როდი ნიშნავს, რომ ხელისუფლება სრულიად არაფერს აკეთებდა ამ მიმართულებით და გულ-ხელდაკრფილი უყურებდა სოფლის მშრომელი მოსახლეობის მცირემიწიანობით გამოწვეულ უკიდურეს სიღარიბეს. ჩვენ განკარგულებაში მყო-

¹ И. Г. Антелава, Реформа поземельного устройства государственных крестьян Закавказья в конце XIX века, 1952, გვ. 27.

² Всеподда нейший доклад министра государственных имуществ по поездке на Кавказ в 1889 г., СПб, 1890, გვ.11—12.

ფი მასალებიდან ჩანს, რომ ზოგჯერ მთავრობა, ფისკალური ინტერესებიდან გამომდინარე და გლეხების კატეგორიული მოთხოვნით შემფოთებულნი, გამოუყოფდა ხოლმე მათ მიწის ნაკვეთებს. ასე მაგალითად, 1872 წელს ქუთაისის გუბერნიის სახელმწიფო ქონებათა უწყებამ მიწით მოამარაგა (თუმცა სრულიად არასაკმარისი რაოდენობით) სახაზინო გლეხის 74 ოჯახი¹, 1873 წელს — 22 ოჯახი² და 1874 წელს — 13 ოჯახი³. თბილისის გუბერნატორის ანგარიშის თანახმად კი, 1876 წელს სახელმწიფო გლეხებს, გერმანელ კოლონისტებსა და სამსახურიდან გადამდგარ სამხედრო ჩინებს მიუღიათ სულ 2 053 დესეტინა მიწა⁴.

მაგრამ მთავრობის ასეთ საქმიანობას, რომელსაც სისტემატური ხასიათი არ ჰქონდა და თანაც ეხებოდა მწარმოებელი კლასის მხოლოდ უმნიშვნელო ნაწილს, არ შეეძლო სახაზინო გლეხთა ეკონომიური მდგომარეობის რამდენადმე მაინც საგრძნობი გაუმჯობესება. უფრო სერიოზული ღონისძიებების გატარებას კი მეფის ხელისუფლება ერიდებოდა. და მაინც ის სახელმწიფოს შემოსავლის გადიდების სურვილმა და კლასობრივი ბრძოლის გამწვავებამ იძულებული გახადა საფუძვლიანად განეხილა გლეხთა საკითხი. გასული საუკუნის 80-იანი წლებიდან მან დაიწყო რიგი საერთო ხასიათის ღონისძიებათა გატარება სახაზინო გლეხთა მიწათმოწყობის მიმართულებით.

ასე მაგალითად, 1881 წლის 22 მაისს დამტკიცებულ იქნა დებულება სახაზინო მიწების იჯარით აღებისას გლეხთა კოლექტივებისათვის შეღავათების შიცემის შესახებ. ამ კანონის თანახმად, გლეხთა საზოგადოებას უფლება ეძლეოდა იჯარით აეღო ხაზინის მიწა იმ შემთხვევაშიც კი, როდესაც ის მათი საცხოვრებელი ადგილიდან საკმაოდ მოშორებით იმყოფებოდა. ამას გარდა, გლეხებს ფულადი გარანტიის გაღების მაგივრად ნება დაერთოთ სასოფლო კრების განაჩენი წარედგინათ⁵. 1883 წლის 5 იანვარს გამოქვეყნდა შინაგან საქმეთა მინისტრის ცირკულიარი, რომელიც უმიწო და მცირემიწიან გლეხთა გადასახადებს ეხებოდა. ცირკულიარში მითითებული იყო, რომ თავისთავად მიწის ნაკლებობა კიდევ არ არის საკმარის საფუძველი უშუალო მწარმოებლის გადასახადებისაგან განთავისუფლებისა და მისი მიწით მომარაგებისა. ასეთი ღონისძიების გამოყენება მხოლოდ იმ შემთხვევაში იყო მიზანშეწონილად მიჩნეული, თუკი დამტკიცდებოდა, რომ იქ, სადაც გლეხი ცხოვრობდა, ნამდვილად არ იყო იჯა-

¹ სსცია, ფ. 246, ანაწ. 1, საქ. 595, ფურც. 101—113.

² იქვე.

³ იქვე.

⁴ იქვე. ფ. 512, საქ. 3975, ფურც. 5—35.

⁵ Сборник правительственных распоряжений и решений по устройству быта крестьян и поселян Кавказского края, 1880—1883 гг., составил М. Н. Кучаев, Тиф., 1883, გვ. 81.

რით გასაცემი მიწა და თანაც შეუძლებელი იყო კუსტარული მრეწველობის გაშლა-გამართვა. დასახლებული ცირკულიარი კრძალავდა გლეხისთვის მიწა მიეცათ იმ შემთხვევაში, თუკი მას ის წინათ გააჩნდა, მაგრამ მერე გაყიდა და ამით დაკარგა თავისი არსებობის ძირითადი წყარო¹. დასასრულ, 1884 წლის ბოლოს მიღებულ იქნა კანონი სახელმწიფო გლეხთა საზოგადოებისათვის საჯარო ვაჭრობის გარეშე მიწის იჯარით გაცემის შესახებ.

ეს ღონისძიებები, ცხადია, ღღის წესრიგიდან არ ხსნიდა ჩვენთვის საინტერესო კატეგორიის სოფლის მშრომელი მოსახლეობის მიწით მომარაგების საკითხს. ამ უკანასკნელის მეტ-ნაკლებად მოგვარება მხოლოდ ძირეულ რეფორმას შეეძლო, რომლის აუცილებლობას თვით მთავრობის წრეებშიც კარგად გრძნობდნენ ბოლო დროს.

დაიწყო რეფორმის მომზადება, რომელიც არსებითად 16 წელი (1884—1900 წწ.) გაგრძელდა. დასასრულ, 1900 წლის 1 მაისს, სხვადასხვა ინსტანციაში ხანგრძლივი დებატების შემდეგ, მიღებულ იქნა კანონი სახელმწიფო გლეხების მიწათმოწყობის შესახებ². კანონი, რომლის მთელი აზრი საბოლოოდ არსებული მდგომარეობის ფიქსირებასა და ამ მდგომარეობის ამსახველი დოკუმენტაციის შედგენაში გამოიხატა, არ ითვალისწინებდა უმიწო და მცირემიწიანი გლეხებისა და გლეხთა საზოგადოებისათვის მიწის ნაღელის გამოყოფასა და ამ ნაღელის გარკვეულ ნორმამდე აყვანას (ასეთი ნორმები საერთოდ არ დაწესებულა). მხოლოდ გამონაკლისს, განსაკუთრებით „საპატიო შემთხვევებში“, მიწათმოქმედებისა და სახელმწიფო ქონებათა მინისტრს უფლება ჰქონდა, კავკასიის მთავარმართებელთან შეთანხმებით, გაედიდებინა გლეხთა ნაღელები ან გამოეყო ახალი სახაზინო მიწების ხარჯზე, რომელიც პრინციპში ხელუხლებლად ითვლებოდა, როგორც კოლონისტებისათვის განკუთვნილი ფონდი.

განსახილველი კანონის საფუძველს წარმოადგენდა სახაზინო გლეხისათვის მის ფაქტიურ განკარგულებაში მყოფი მიწის არა საკუთრებად, არამედ მუდმივ მფლობელობის უფლებით მიცემის იდეა. მართალია, ცენტრალური კომისიის რეკომენდაციით, ამის შესახებ კანონში პირდაპირ არაფერი იყო ნათქვამი, მაგრამ სხვადასხვა მუხლში შეტანილი შეზღუდვები სავსებით ნათლად საზღვრავდნენ გლეხების დამოკიდებულების ხასიათს მათთვის გამოყოფილ (უფრო სწორად, მათ სარგებლობაში მყოფი)

¹ Сборник правительственных распоряжений и решений по устройству быта крестьян и поселян Кавказского края 1880—1883 гг., составил М. Н. Кучаев, Тиф., 1883, გვ. 93.

² კანონის ტექსტი იხ. ი. ანთელავას წიგნში «Реформа поземельного устройства...», გვ. 266—269.

მიწებისადმი. მე-5 მუხლის თანახმად, მაგალითად, გლეხი, რომელიც სახაზინო მიწით სარგებლობდა, იხდიდა ყოველწლიურ სახელმწიფო საღალღო გადასახადს. მე-12 მუხლი კატეგორიულად უკრძალავდა სოფლის მშრომელ მოსახლეობას სანადელო მიწის გაყიდვასა და დაგირავენებას. მე-13 მუხლი კი სახელმწიფოს აცხადებდა იმ წიაღისეულის ბატონ-პატრონად, რომელიც სანადელო მიწების ტერიტორიაზე აღმოჩნდებოდა.

ერთი სიტყვით, 1900 წლის „რეფორმას“ არ გადაუჭრია აგრარული საკითხი და სახაზინო გლეხთა დიდი ნაწილი ისევ დარჩა მიწით მოუმარაგებელი. აგრარული პრობლემის ასეთი გადაწყვეტა ხელს უწყობდა ბატონყმურ ურთიერთობათა გადმონაშთების კონსერვაციას და აფერხებდა კაპიტალიზმის გამარჯვებას. ამიერკავკასიის ქვეყნების ბურჟუაზიული განვითარება შესაძლებელი იყო მაშინ ბატონყმურ ურთიერთობათა ნაშთების სრული ლიკვიდაციით, სახელმწიფო და მემამულეთა მიწების გლეხებისათვის გადაცემით და ისეთი უაზრო და მავნე ინსტიტუტების გაუქმებით, როგორცაა „გლეხთა ნადელების გაუსხვისებლობა, ურთიერთთავე დადება, თემიდან გლეხთა თავისუფლად გასვლის... აკრძალვა“¹.

ყოველივე ზემოთქმულის საფუძველზე 1900 წლის 1 მაისის „რეფორმა“ შეიძლება დასასიათებულ იქნეს როგორც ღონისძიება, რომელიც მიზნად ისახავდა არა ეკონომიური მდგომარეობის ნამდვილად გაუმჯობესებას, არამედ ძველი, დრომოქმული წესების კონსერვაციით კლასობრივი ბრძოლის საშიში შედეგების თავიდან აცილებასა და ხაზინის შემოსავლის გადიდებას.

გ) ხ ი ზ ნ ე ბ ი

მიწათმფლობელობა, გადასახადები. სტატისტიკის ნაკლებობის გამო მეტად ძნელია და თითქმის შეუძლებელიც ამ კატეგორიის გლეხთა საერთო რაოდენობის ზუსტად დადგენა, მაგრამ მიახლოებით განსაზღვრა მაინც ხერხდება. მ. კუჭავეის ცნობით², მაგალითად, რომელსაც მხარს უჭერენ ილია ჭავჭავაძე³ და სიმონ ავალიანი⁴, თბილისის გუბერნიაში ბატონყმობის გაუქმების პერიოდში სულ 5 977 კომლი ხიზანი ყოფილა. რეფორმის მომდევნო ხანაში, დაახლოებით 20—25 წლის განმავლობაში, გარკვეული

¹ ვ. ი. ლენინი, თხზ., ტ. 4, გვ. 520.

² МИЭБГКЗК, т. I, გვ. 426.

³ იხ. მისი „ხიზნების საქმე“. თხზულებათა სრული კრებული ათ ტომად, ტ. 6, თბ., 1956 გვ. 172.

⁴ С. А в а л и а н и, Крестьянский вопрос..., т. IV, გვ. 148.

მიზეზების ზეგავლენით ხიზანთა ინსტიტუტს რიცხობრივი ზრდა განუც-
დია¹ და გასული საუკუნის 80-იანი წლების პირველი ნახევრისათვის ხი-
ზანთა კომლების რაოდენობას საქართველოში 9 306-მდე მიულწევია. აქე-
დან თბილისის გუბერნიაზე 6 774 კომლი მოდიოდა², ხოლო ქუთაისის —
2 532³.

საგლეხო რეფორმა, როგორც ცნობილია, ხიზნებზე არ გავრცელებუ-
ლა; უკეთ რომ ვთქვათ, ის ხიზანთა მხოლოდ ერთ ნაწილს, ყმური წარმო-
შობის კომლებს შეეხო, დანარჩენი მასა კი იურიდიულად ისევ ძველებურ
მდგომარეობაში დარჩა. ეს ძველი მდგომარეობა კი არ იყო ისე სახარ-
ბიელო, როგორც ამას თავადაზნაურთა უმრავლესობა ხატავდა რეფორ-
მის მომზადება-გატარების წლებში. მაგრამ მთავარია არა ამის აღნიშვნა,
არამედ ჩვენთვის საინტერესო კატეგორიის გლეხთა ცხოვრებისა და
შრომის პირობების საგრძნობი გაუარესების ფაქტისა რეფორმის მომდევ-
ნო ხანაში. ბატონყმობის გაუქმებამ, რომელმაც მწარმოებელი კლასის
ერთი ნაწილი საერთოდ უმამულოდ დატოვა, ხოლო მეორე — არასაკმაო
რაოდენობით მომარაგებული, საგრძნობლად გაზარდა მიწაზე მოთხოვნი-
ლება და სწრაფად ასწია მისი ფასი. ასეთ ვითარებაში მემამულეებს არ
აწყობდათ ხიზნური ურთიერთობის ისეთი ნიშნები, როგორიც იყო გადა-
სახადების უცვლელობა და მიწით სარგებლობის უვადობა. ისინი თავგა-
მოღებით იბრძოდნენ ამ არახელსაყრელი ნიშნების მოსპობისათვის და
უნდა ითქვას, არც თუ ისე წარუმატებლად.

ხიზნების, ისე როგორც ყველა სხვა კატეგორიის გლეხთა, ეკონომიუ-
რი მდგომარეობის განმსაზღვრელი ფაქტორი მიწა იყო. 1882—1884 წლე-

¹ ამ ზრდას ხელს უწყობდნენ თვითონ მემამულეებიც. ისინი, ვითარცა მუდმივი მუ-
შახელის შექმნა-შენარჩუნებით დანტერესებულნი, დიდი სიამოვნებით უთმობდნენ გლე-
ხებს ეგრეთ წოდებულ სადავო მიწებს ხიზნურ საფუძვლებზე დასამუშაველად (В. Г. Гу-
ч у а, Хизанство и хизанский вопрос в Грузии. Автореферат кандидатской диссер-
тации, Тбилиси, 1955, გვ. 14). იმავე მიმართულებით მოქმედებდა ის გარემოებაც, რომ
1864 წლის 13 ოქტომბრის დებულების მეორე მუხლი, რომლის ძალითაც ყმური წარმო-
შობის ხიზნები თავისუფლდებოდნენ ძველი მებატონის ხელქვეითობიდან და რჩებოდნენ
ახალ მემამულესთან ხიზნის მდგომარეობაში საადგილმამულო ურთიერთობათა ნორ-
მების ყოველგვარი შეცვლის გარეშე, ისე გაიგეს გლეხებმა, რომ თითქოს მათ „საკანონმ-
დებლო წესით მიემავრათ მათ სარგებლობაში მყოფი მიწები“ (ალ. ბ ე ნ დ ი ა ნ ი შ ვ ი-
ლ ი, აგარაული ურთიერთობანი საქართველოში 1890—1917 წლებში, თბილისი, 1965,
გვ. 21). ეს კი უნაღდოდ გათავისუფლებულ გლეხთა თვალში მიმზიდველობის ძალას მა-
ტებდა ხიზნობის ინსტიტუტს და იწვევდა მის რიცხობრივ ზრდას (იქვე).

² ССДЗТКГ, Тифлис, 1893, გვ. 15; С. А в а л и а н и, Крестьянский вопрос,
т. IV, გვ. 148; И. Г. А н т е л а в а, Государственные крестьяне..., т. II, გვ. 51.

³ МИЭБГКЗК, т. I, გვ. 429; СХАО, IV, გვ. 716; С. А в а л и а н и, Крестьянский
вопрос..., т. IV, გვ. 49; ი. კ ა ვ ქ ა ვ ა ძ ე, თხზ., ტ. 6, გვ. 176; გრ. გ ი ო რ ვ ა ძ ე,
საზოგადოებრივი ურთიერთობა საქართველოში, გვ. 37.

ბის ცნობების თანახმად, ხიზანთა მიწით მომარაგების საქმე შემდეგნაირად წარმოიდგინება. თბილისის გუბერნიაში, მაგალითად, ხსენებული კატეგორიის გლეხთა საერთო რაოდენობის 11,54%-ს სულ არ ჰქონია სახნავ-სათესი მიწა, 22,41%-ს ჰქონია საშუალოდ 2,5 დესეტინამდე, 43,80%-ს — 2,5-დან 5 დესეტინამდე და 20,21%-ს — 5 და ხუთ დესეტინაზე მეტი¹. მთელ გუბერნიაში კი თითო კომლზე მოდიოდა საშუალოდ 4,3 დესეტინა მიწა². რაც შეეხება ქუთაისის გუბერნიას, იქ ეს საშუალო საკომლო ნაღელი არ აღემატებოდა 2,29 დესეტინას³. მიმდინარე საუკუნის დასაწყისისათვის კი ხიზანთა საკომლო მიწისმფლობელობა კიდევ უფრო შემცირებულა და ის აღმოსავლეთ საქართველოში 3,60 დესეტინამდე, ხოლო დასავლეთ საქართველოში 1,93 დესეტინამდე ჩამოქვეითებულა⁴.

მიწის ეს ფართობი, რომელიც ოდნავ მეტი იყო, ვიდრე დროებით ვალდებულ გლეხთა ნაღელი და მნიშვნელოვნად ნაკლები, ვიდრე სახანზინო გლეხებისა, ცხადია, სრულებით არ იყო საკმარისი იმისათვის, რომ ხიზანს ოჯახი ერჩინა და მოეხადა თავისი მოვალეობა მიწის პატრონისა და სახელმწიფოს წინაშე.

ხიზნის ეკონომიურ მდგომარეობას საგრძნობლად აუარესებდა გადასახადები, რომელთა დიდ ნაწილს ის შემამულეს აძლევდა. ამათში ძირითადი იყო: 1) დალა — პურის გადასახადი, რომლის რაოდენობა შემოსავლის 1/6-დან 1/2-მდე მერყეობდა; 2) კ უ ლ უ ხ ი — ყურძნის გადასახადი შემოსავლის 1/7—1/4 ნაწილის რაოდენობით და 3) ბ ე გ ა რ ა — შრომითი გადასახადი 50 სამუშაო დღის რაოდენობით წელიწადში⁵. გადასახადებს პროდუქტადი, ფულადი და შერეული რენტის სახით იხდიდნენ. წამყვანს პირველი წარმოადგენდა. მისი ხვედრითი წონა თბილისის გუბერნიაში 1894 წელს 78,8%-ს უდრიდა, ხოლო მეორისა და მესამისა — 10,1 და 11,1%-ს შესაბამისად⁶. ამ გადასახადების საერთო ჯამი ძალზე დიდი იყო და მძიმე ტვირთად აწვა გლეხობას. დუშეთის მაზრაში, მაგა-

¹ С. А в а л и а н и, Крестьянский вопрос..., т. IV, გვ. 150.¹

² იქვე, გვ. 151; ფ. Г. Г о г и ч а й ш в и л и, Малоземелье среди крестьян Закавказья, Тиф., 1903, გვ. 17; ზოგი წყარო 4,5 დესეტინას ასახელებს (СХАО, т. IV, გვ. 674).

³ Г. Г о г и ч а й ш в и л и, Малоземелье... გვ. 17; ვ. გ უ ჩ უ ა, დასახ. ნაშრომი გვ. 15, ზოგი წყაროს ცნობით კი, ხიზნის საშუალო საკომლო ნაღელი 80-იანი წლების ქუთაისის გუბერნიაში 2,40 დესეტინას უდრიდა (СХАО, т. IV, გვ. 674).

⁴ იქვე.

⁵ В. Г у ч у а, Хизанство и хизанский вопрос..., გვ. 8—10.

⁶ იქვე, გვ. 15, პროცენტები გამოთვლილია ჩვენ მიერ.

ლითად, 1884 წელს პირველი კატეგორიის¹ ხიზნის თითო კომლი მემამულეს უხდიდა (ფულზე გადატანით) 123 მან. და 75 კაპიკს, მეორე კატეგორიისა — 97 მან. და 55 კაპ., მესამე კატეგორიისა — 66 მან. და 45 კაპ., მეოთხე კატეგორიისა — 28 მან. და 20 კაპ. და მეხუთე კატეგორიისა — 16 მან. და 20 კაპიკს². მთელ მაზრაში კი თითო კომლზე (განურჩევლად კატეგორიებისა) მოდიოდა საშუალოდ 66 მან. და 49 კაპ., ხოლო თითო დესეტინა ყველა სახის მიწაზე — 12 მან და 65 კაპ. მარტო მემამულის სასარგებლო გადასახადი³.

მოწინავე საზოგადოებრივი აზრი ხიზნობის შესახებ. ხიზნობის ძირითად ნიშანს, როგორც აღენიშნეთ, გადასახადების უცვლელობა და მფლობელობის მუდმივობა წარმოადგენდა. სხვანაირად რომ ვთქვათ, მემამულეს უფლება არ ჰქონდა ხიზანი აეყარა, მის სარგებლობაში მყოფი მიწა სხვისთვის გადაეცა ან ერთხელ დადგენილი გადასახადები გაედიდებინა. ეს პრინციპები ხალხის ადათ-ჩვეულებებით იყო გამაგრებული და თეორიულად ურყევლად ითვლებოდა. მაგრამ რეალური ცხოვრება მას ანგარიშს არ უწევდა. ამ პრინციპების დარღვევას მეტ-ნაკლებად ყოველთვის ჰქონდა ადგილი, მაგრამ განსაკუთრებით საგრძნობი 1864 წლის რეფორმის შემდეგ გახდა. ბატონყმობის გაუქმებით გამოწვეული დანაკლისის ანაზღაურება მემამულეებმა ხიზნებზე იერიშის მიტანით სცადეს. ისინი, გათამამებულნი მიწის ფასის შეუწელებელი ზრდით განსახილველი ხანის საქართველოში, თავგამოდებით იბრძოდნენ ხიზნობის ზემოთ დასახელებული ნიშნების წინააღმდეგ. პრივილეგიური წოდება ყველაფერს აკეთებდა იმისათვის, რომ ჩვენთვის საინტერესო კატეგორიის გლეხები ეცნოთ ჩვეულებრივ მოიჯარეებად, რომ დაემტკიცებინა მათი სრული იგივეობა. ხიზანი,—წერდა 1880 წელს გორელი მემამულე ვეზიროვი,—მიწის თავისუფალი ექსპლოატატორია, მიწისა, რომელშიც ის ფულს იხდის, მაშასადამე, ის სხვისი საკუთრების მოიჯარადრეა⁴.

მემამულე არა მარტო ცდილობდა ამის დამტკიცებას, არამედ პრაქტიკულადაც ატარებდა ამ თვალსაზრისს. იგი ძალით ერკებოდა ხიზანს, ვითარცა ჩვეულებრივ მოიჯარადრეს ათეული წლების მანძილზე

¹ პირველი კატეგორიის ან ლიტრის ხიზნად ითვლებოდა 10 დესეტინა მიწის მქონე, მეორე კატეგორიის ან სამჩარეჟიანად 7,5 დესეტინისა, მესამე კატეგორიის ან ნახევარლოტიანად — 5 დესეტინისა, მეოთხე კატეგორიის ან ჩარეჟიანად — 2,5 დესეტინისა და მეხუთე კატეგორიისად — უმიწაწელო ხიზნები.

² А. Х. Вермишев, Хизаны и хизанство, Тиф., 1884, გვ. 17.

³ იქვე, გვ. 18, ამ გადასახადებს ძალიან მძიმედ თვლიდა ვერმიშევი (იქვე, გვ. 18, 25).

⁴ „დროება“, 1880 № 75, „ხიზანი არის ნამდვილი მოიჯარადრე სხვისადმი კუთვნილ მამულისა“.

მის მემკვიდრეობით სარგებლობაში მყოფი მამულიდან, ან იძულებულს ხდიდა მას მოკლევადიანი ხელშეკრულება დაედო და ეხალა ახალი გადასახადები. «Поставленные в затруднительное положение освобождением крестьян помещики, — წერდა ნ. ნიკოლაძის გაზეთი „ობზორი“, — всей своей тяжестью начали налегать на хизанов и в этот короткий промежуток времени (მხედველობაშია რეფორმის მომდევნო 15—16 წელი — ავტ.) рента увеличилась почти в 40 раз»¹.

თუმცა ცნობა ხიზანთა გადასახადების ესოდენ საგრძნობლად გადიდების შესახებ არ მიგვაჩნია საეცებით სარწმუნოდ, მაგრამ მაინც მეტად საყურადღებოა და ლაპარაკობს მწარმოებელი კლასის ჩვენთვის საინტერესო რაზმის ეკონომიური მდგომარეობის მკვეთრად გაუარესების შესახებ გასული საუკუნის 60—70-იან წლებში.

მემამულეთა ამ შეტევა-იერიშს ენერგიულ წინააღმდეგობას უწევდნენ თვით ხიზნები. ისინი ბრძოლის სხვადასხვა ფორმის გამოყენებით მედგრად იცავდნენ თავს და მხოლოდ უკიდურეს შემთხვევაში იხევდნენ უკან. მათ საჩივრებით აავსეს მთავრობის დაწესებულებები, ატეხეს დიდი განგაში, შოითხოვეს საქმეში ჩარევა და საკითხის სამართლიანად და სწრაფად გადაჭრა. ასე წარმოიშვა რეფორმის მომდევნო ხანაში ეგრეთ წოდებული ხიზანთა საკითხი, რომელსაც მხურვალედ გამოეხმაურა მთელი მოწინავე ქართველი საზოგადოება. ეს უკანასკნელი უყოყმანოდ დადგა გლეხის, ამ შემთხვევაში ხიზნის, მხარეზე და გაბედულად დაიცვა მისი ინტერესები. ის აგრარული ურთიერთობის სამართლიან საფუძველზე დამყარებას მოწის პრობლემას უკავშირებდა და ამ ძირითადი საწარმოო საშუალების სოფლის მშრომელი მოსახლეობის საკუთრებაში გადაცემას მოითხოვდა. ამას მოითხოვდა ქართველი ინტელიგენცია, კერძოდ, ხიზნების მიმართაც, მაგრამ საკითხის ასეთნაირად და თანაც სწრაფად გადაჭრის შეუძლებლობის ვითარებაში, ის გამოდიოდა ხიზანთა ინსტიტუტის ადამით გამაგრებული და გლეხებისათვის შეღარებით ხელსაყრელი ნიშნების დაცვა-შენარჩუნების წინადადებით და კატეგორიულად ილაშქრებდა ხიზნების ჩვეულებრივ მოიჯარადრეებად გამოცხადების ყოველგვარი ცდის წინააღმდეგ.

ამ ცდის წინააღმდეგ ხმა აღიმალა, კერძოდ, ნიკო ნიკოლაძემ. მას გორელი თავადის ვეზიროვის ზემოდასახელებულ „ტრაქტატს“ მიუძღვნა სპეციალური სტატია, რომელიც მოწინავე წერილის სახით დაიბეჭდა გაზეთ „ობზორში“ 1880 წელს. აკრიტიკებდა რა „ტრაქტატის“ ძირითად დებულებას, ავტორი წერდა: «Насколько убедительны доказатель-

¹ «Обзор», 1884, № 93.

ства кн. Везирова..., что хизаны ни больше, ни меньше, как простые арендаторы, — пусть судит всякий, как ему угодно, но нам сдается, что эта точка зрения ошибочная. Арендатор — человек свободный, могущий удалиться и быть удаленным из взятого им в наймы имения; хизаны же, если не все, то в большинстве испокон веков владеют тою землею, на которой мы их застаем сегодня... (Поэтому) называть хизанов арендаторами и подводить их под общие законоположения — значит отдавать целый класс народа произволу помещиков»¹ (ხაზი ჩვენია — ავტ.).

ბ. ნიკოლაძე არწმუნებდა მთავრობას, რომ ხიზნის ჩვეულებრივ მოიჯარადრედ გამოცხადება დიდ ზიანს მიაყენებდა ქვეყნის საერთო კეთილდღეობას. გლეხი, რომელიც არაა დრწმუნებული, რომ მიწა მისია და რომ მას ხვალ-ზეგ არავინ წაართმევს, ვერ იქნება კარგი მეურნე. ის, როგორცობობა, ეცდება ამოწუწუნოს ამ მიწას უკანასკნელი წვეთი და მიიყვანოს იგი სრულ გამოფიტვამდე². ამიტომ, ნათქვამია წერილის ბოლოს, „დაფიქრდით, რამდენად ჭუმანიური, კანონიერი და ხელსაყრელი იქნება „სახელმწიფოსათვის ხიზნების ასე ბედის ამარად დატოვება და მათი თავისუფალ მოიჯარადრეებად აღიარება“³.

ბ. ნიკოლაძე უფრო მოგვიანებითაც მიუბრუნდა ამ საკითხს და იგივე თვალსაზრისი განავითარა. მან 1884 წლის 7 (19) აპრილს გაზეთ „ნოვოეობოზრენიეს“ ფურცლებზე გამოაქვეყნა კიდეც ერთი მოწინავე წერილი, რომელშიც ვკითხულობთ⁴: „ხიზანთა საკითხი ეკუთვნის სრულიად მომწიფებული საკითხების რიცხვს, იგი დაუყოვნებლივ გადაჭრას მოითხოვს

¹ «Обзор», 1880, № 470.

² იქვე.

³ იქვე.

⁴ «Новое обозрение», 1884, № 93, მოწინავე.

აღსანიშნავია სხვათა შორის ის გარემოება, რომ გაზ. „ნოვოეობოზრენიემ“ აღძრულ საკითხზე სხვა ხასიათისა და შინაარსის წერილებიც გამოაქვეყნა. ასეთია, მაგალითად, 1886 წლის 972-ე ნომრის მოწინავე, დაწერილი, როგორც დასტურდება, ხ. ვერმიშევის მიერ. ავტორმა, რომელიც, განსხვავებით მოწინავე ქართული ინტელიგენციისაგან, საერთოდ თვით შორეულ მომავალშიც კი წინააღმდეგი იყო გლეხებისათვის მიწის საკუთრებად გადაცემისა, წამოაყენა წინადადება ხიზნების სახაზინო გლეხთა კატეგორიაში გადაყვანის შესახებ. ხაზინას, მისი აზრით, უნდა შეესყიდა მემამულეთა მიწები და მერე დაერიგებინა ხიზნებისათვის, მაგრამ არა ინდივიდუალურად, კომლობრივად, არამედ თემურად. ეს უკანასკნელი უნდა ყოფილიყო პასუხისმგებელი სახელმწიფოს წინაშე იმ გადასახადების დროზე აკრეფისა და შეტანისათვის, რომელიც ხაზინას, როგორც მიწის პატრონს, უნდა მიეღო ხიზნებისაგან (Газ. «Новое обозрение», 1886, №972. შეადარე მისივე «Хизаны и хизанство», 1884, გვ. 25—26).

და იმედი უნდა ვიქონიოთ, რომ ის მართლაც მალე და სამართლიანად გადაიჭრება... (ამისთვის კი) აუცილებელია..., რომ ხიზნები მოიჭარებოდ არ აქციონ“.

ხიზნების საკითხს ქართველი ხალხოსნების ორგანო „შრომა“ გამოეხმაურა და ხიზნების მესაკუთრეთა რიგებში გადაყვანა მოითხოვა. „ბატონყმობის მოსპობისათვის დადგენილმა კანონმა, — წერდა იგი 1882 წელს, — კარგად იყო თუ ავად, მაინც განსაზღვრა ბატონისა და ყმის ურთიერთშორისი დამოკიდებულება ადგილ-მამულის თაობაზედ... მაგრამ ეს კანონი სრულებითაც არ შეხებია იმ გლეხებს, რომელთაც მიწის მეპატრონეებთან ხიზნური დამოკიდებულება აქვთ... თუ ამ ოცი წლის განმავლობაში ჩვენ ამ საგანზე არავითარი მზრუნველობა არ მიგვიღია, ჩვენი შოვალეობა მოითხოვს... შევიწინაოთ შეცოდება და ხიზნების საქმე მსწრაფლად წავიყვანოთ და იმნაირადც დავაბოლაყოთ, როგორც ამას მოითხოვს თვით სახელმწიფოს ინტერესი... ჩვენ სრული დარწმუნებული ვართ, რომ თუ მართებლობამ რიგიანად შეკრიბა მასალები ხიზნების შესახებ, გულ-მოდგინედ და დაკვირვებით შეიმუშავა ეს მასალები, იმ დასკვნამდე მივა, რომ ქვეყნის სარგებლობისათვის საჭირო არის ხიზნებიც სრული მესაკუთრე შეიქმნენ იმ ადგილ-მამულისა, რომელთაც ისინი ფლობენ“ (ხაზი ჩვენია — ავტ.)¹.

ასეთივე იყო გაზეთ „დროების“ წამყვანი ჯგუფის თვალსაზრისიც. „ხსენებული (1861 წლის) რეფორმის წყალობით, — ნათქვამია მის ერთ-ერთ წერილში, — დღეს რუსეთში დიდძალი რიცხვი გლეხ-კაცობისა, როგორც სახელმწიფონი, ისე დროებით ვალდებულნი, მესაკუთრენი შეიქმნენ მიწისა და ამგვარად ბევრად თუ ცოტად სამუდამოდ დაემყარენ ამ თავიანთ თითქმის ერთად ერთ ღონეს და საღსარს ცხოვრებისას... ჩვენში კი ისე ადვილი არ აღმოჩნდა გლეხ-კაცის რიგიანი სამიწაწყლო მოწყობილობის დამყარება. ჩვენში არა თუ ძალიან მცირე რიცხვი გლეხ-კაცობისა გამოვიდა დროებით ვალდებულ მდგომარეობიდან და არა თუ სახელმწიფო გლეხნი ჯერ ისევე მესაკუთრენი არ შეიქმნილან, არამედ ისინიც კი, ვის მდგომარეობასაც ერთს საუკეთესოდ და სახარბიელოდ სთვლიდნენ — ისინიც რეფორმის შემდეგ უფრო უხეირო მდგომარეობაში ჩავარდნენ. ჩვენ ვამბობთ ხიზნებზე“ (ხაზი ჩვენია — ავტ.)².

¹ „შრომა“, 1882, № 29, მოწინავე.

² „დროება“, 1884, № 273.

ყველაზე მეტი ყურადღებით ხიზნების საკითხს მინც ილია ჭავჭავაძე მოეკიდა. მან 1880 და 1886 წლებში „დროებასა“ და „ივერიის“ ფურცლებზე გამოაქვეყნა წერილების მთელი სერია „ხიზნების საქმე“-ს საერთო სათაურით¹. იგი არა მარტო ისტორიულ-თეორიული ხასიათის ნარკვევებს ბეჭდავდა აღძრულ საკითხზე, არამედ პრაქტიკულადაც მონაწილეობდა მის გადაჭრა-მოგვარებაში. საკმარისია აღვნიშნოთ, რომ ილიამ 1884 წელს საქმოდ ვრცელი მოხსენებითი ბარათი მიართვა თბილისის გუბერნიის საგლეხო საკრებულოს², ხოლო მომდევნო 1885 წელს სათანადო პროექტიც კი წარადგინა ხიზნობის ინსტიტუტის შესახებ³.

ყველა ამ დოკუმენტში ავტორი განუხრელად ავითარებდა თვალსაზრისს სოფლის მშრომელი მოსახლეობის, მათ შორის ხიზნების, მიწის მესაკუთრედ გადაქცევის აუცილებლობა-საჭიროების შესახებ. მისი ღრმა რწმენით ცხოვრება დაბეჯითებით მოითხოვდა იმას, რომ გლეხი „დღეს თუ არა ხვალე“ მამულის პატრონად ქცეულიყო⁴. იგი გულისტკივილით ლაპარაკობდა შრომისა და მიწის ვათიშულობაზე მის თანამედროვე საქართველოში⁵. მას მეტად სავალალოდ მიაჩნდა ის, რომ მაშინ შრომა ერთის ხელში იყო, ხოლო მიწა — მეორის. აქ, მისი სიტყვით, უსამართლობა თვით სათავეშივე იყო მოცემული⁶.

ილიას ნორმალური მდგომარეობის აღდგენა მხოლოდ ამ ორი ერთიმეორისაგან ვათიშულ-განცალკევებული ელემენტის შეერთების გზით ჰქონდა წარმოდგენილი. მაგრამ, ვინაიდან ამის მიღწევა მაშინ არარეალურად გამოიყურებოდა, იგი, თუ შეიძლება ასე ითქვას, აყენებდა პროგრამა-მინიმუმს და მოითხოვდა ხიზნობის ისეთი კარგი (მისი აზრით, ადათით განმტკიცებული და მემამულეების მიერ ზოლოდროს აბუჩად აგებული) ნიშნების დაცვას, როგორც იყო მიწის საკრებულობის უვადობა და გადასახადების უცვლელობა⁷. პირველი მათგანის დასაკანონებლად კი საჭირო

¹ ი. ჭავჭავაძე, თხზ., ტ. 6, გვ. 113—117.

² ტექსტი ამ მოხსენებითი ბარათისა გამოაქვეყნა მკლევარმა ა. იოვიძემ 1947 წელს „სისტორიო მოაზრებ“, ტ. 3, გვ. 203—212.

³ პროექტის ტექსტი იხ. იქვე, გვ. 221—228.

⁴ ი. ჭავჭავაძე, თხზ., ტ. 6, გვ. 25.

⁵ იქვე, გვ. 137.

⁶ იქვე.

⁷ ხაზს უსვამდა რა ორი ნიშნის განსაკუთრებულ მნიშვნელობას, ილია 1886 წელს წერდა: „მოდრეკილება ხიზნობისა, რომ ხმარება მიწისა საშვილიშვილო იყოს, და ღალა თუ გადასახადი ერთსა და იმავე ჰქონდეს იდგეს უცვალებლად — ეს ისეთი იერიშია საუთრების პირადს და კერძო ელემენტზედ მიტანილი, ეს ისეთი ნაღმია, რომ საუთრების ხელშეუხებლობის მოძღვრებას ძირეულად არყევს, მთელს რეულიერებას საუთრების ფერს უცვლის და ზოგად ელემენტს მისას გზას უხსნის სამერმისოდ ცხოვრებაში დგლის დასაჭერად“, (იხ. თხზ., ტ. 6, გვ. 168).

იყო მემამულეთა თვალსაზრისის უარყოფა და ხიზნების განსაკუთრებული სოციალ-ეკონომიური კატეგორიის მშრომელებად აღიარება. სწორედ ამიტომ «მეიტანა მან თავის პროექტში მუხლი, რომელშიც ნათქვამი იყო: «Хизанами признаются те крестьяне-земледельцы, всех без различия состояний, которые приписаны к сельским обществам, живут на владельческих землях, имеют постоянную оседлость в имении владельцев и по предмету пользования ими усадебною землею и другими угодьями не состоят с владельцами в срочных договорных отношениях, выраженных актом, законным порядком совершенным, или же домашним актом, не оспариваемым сторонами»¹. ამის დაკანონებას უნდა აეკრძალა ხიზნების უცვლემლო აყრა-გაგდების პრაქტიკა მომავალში.

პროექტი ითვალისწინებდა აგრეთვე გადასახადების უცვლელობის დაკანონებასაც. მე-18 მუხლი, მაგალითად, ზუსტად საზღვრავდა იმ გადასახადების რაოდენობას, რომელიც უნდა ეძლია ხიზანს მემამულისათვის სახნავ-სათესი და საბაღე-სავენახე მიწებით სარგებლობისათვის. და კიდევ მიწათმფლობელი, რომელიც სათანადო თანხმობის გარეშე გადასახლებდა ხიზანს თავისი მამულიდან, ვალდებული იყო აენახლაურებინა მისთვის როგორც ნაგებობათა, ისე ბაღ-ვენახებისა და საერთოდ მეურნეობის გაშლასთან დაკავშირებული ხარჯები (მუხ. 1).

ამ ღონისძიებათა ცხოვრებაში გატარება, ცხადია, ვერ გამოიწვევდა არსებითი ხასიათის ცვლილებებს და ეს თვითონ ილიამაც ძალიან კარგად იცოდა. მაგრამ, მიუხედავად ამისა, ისინი მაინც მხარდაჭერას იმსახურებდნენ, როგორც მემამულეთა თვითნებობის გარკვეულ ჩარჩოებში ჩაყენების ერთგვარი ფორმა და საშუალება².

მთავრობის პოლიტიკა ხიზნების მიმართ. მთავრობა მაინცდამაინც არ ჩქარობდა ხიზანთა საკითხის გადაჭრას. მაგრამ საქართველოს სოფელში მიმდინარე კლასობრივმა ბრძოლამ აიძულა ის დაფიქრებულყო და გარკვეული ღონისძიებები გაეტარებინა. 1876 წლის 13 ივნისს ამიერკავკასიის ცენტრალურმა საგლეხო კომიტეტმა განკარგულება გასცა დაწყებულყო სათანადო მოსამზადებელი მუშაობა საკითხის საბოლოოდ მოსაგვარებლად, რაც ხიზანთა რაოდენობის, მათი მიწათმფლობელობისა და გადასა-

¹ მიწათმფლობელობის მუდმივობასა და გადასახადების უცვლელობას, მართლაც ჰქონდა დიდი ეკონომიური მნიშვნელობა, მაგრამ, ცხადია, არა იმდენი, რამდენიც ილიას წარმოდგენით. იხ. სმ, ტ. 3, 1947, გვ. 221—222.

² ილიას შეხედულებათა შესახებ ხიზნების საკითხზე დაწერილებით: იხ. პრ. რატონი, ილია ჭავჭავაძე, სოციალ-ეკონომიური შეხედულებანი, II, თბ., 1957, გვ. 54—58 და ა. ი. ს. ე. ლ. ი. ა. ნ. ი, ილია ჭავჭავაძე და საქართველოს ისტორიის საკითხები, თბ., 1951, გვ. 366—394.

ხადების შესახებ ცნობების შეგროვებაში უნდა გამოხატულიყო¹. მუშაობა მართლაც დაიწყო, მაგრამ ის ისე ნელა მიმდინარეობდა, რომ საჭირო მასალების თავმოყრა მხოლოდ 1884 წელს დასრულდა. ამ მასალების „კამერალურ“ დაჭუშავებას ხელისუფლებამ კიდევ 7 წელი მოანდომა და მხოლოდ 1891 წლის 3 ივნისს გამოსცა დებულება ტფილისისა და ქუთაისის გუბერნიის ხიზანთა შესახებ². კანონმდებელმა, კლასობრივი ბრძოლისა და მოწინავე საზოგადოებრივი აზრის ზეგავლენით³, ხიზნები ცალკე სოციალ-ეკონომიურ კატეგორიად გამოაცხადა და მკვეთრად გამიჯნა ისინი ჩვეულებრივ მოიჯარადრეებისგან. ამ დებულების ძალით, — ნათქვამია განსახილველ დოკუმენტში, — ხიზნებად ირიცხებიან გლეხები, რომლებიც დასახლებულნი არიან თბილისისა და ქუთაისის გუბერნიის მებატონეთა მამულებში და რომელთაც მიწისმფლობელობისა და სხვაგვარი სარგებლობის შესახებ არა აქვთ ვადიანი პირობა შეკრული (მუხ. 1).

მეორე მუხლით ხიზანთა მფლობელობაში მყოფი „ყოველი სამოსახლო, სახნავი, სათიბი და საბაღო ადგილები“, ისე როგორც წყლები, საძოვრები და ტყეები მემამულეთა სრულ საკუთრებად გამოცხადდა. ჩვენთვის საინტერესო კატეგორიის გლეხებს მომავალშიც შეეძლოთ ამ სავარგულებით სარგებლობა, მაგრამ არა უფასოდ, არამედ სათანადო გადასახადების გაღებით, რომელთა რაოდენობა კანონმდებელმა არ განსაზღვრა და ამით დიდი ზიანი მიაყენა უშუალო მწარმოებელთა მატერიალურ კეთილდღეობას. ახალი კანონით ხიზანი არსებითად მიჯაჭვული აღმოჩნდა მემამულის მიწა-წყალზე. თუკი იგი უკანასკნელის თანხმობის გარეშე უარს იტყოდა მის სარგებლობაში მყოფი მამულის მომავალში დამუშავებაზე, „მაშინ ის მიწა და ყოველივე შიგ აშენებული და დახერგილი“ მებატონის ხელში გადადროდა ყოველგვარი (თუნდაც მინიმალური) ანაზღაურების გარეშე (მუხ. 6). მართალია, ხიზანს მემამულესთან შეთანხმებით უფლება ჰქონდა სხვისთვის გადაეცა მის მფლობელობაში მყოფი მიწა-წყალი, მაგრამ იმ პირობით, რომ ის „სხვა“ იკისრებდა ხიზნის ყველა მოვალეობის პირნათლად შესრულებას. ამასთან ერთად, მე-5 მუხლი, პრივილეგირებული წოდების შემზღუდველი მუხლიც იყო. ასეთი იყო, მაგალითად, მე-5 მუხლი, რომელიც ხიზნის გაქვების მსურველ მემამულეს ავალდებულებდა ერთი წლით ადრე გაეფრთხილებინა იგი ამის შესახებ და თანაც

¹ С. А в а л и а н и, Крестьянский вопрос..., IV, გვ. 167.

² ВПСЗРИ, XI, № 7791; ქართული ტექსტი იხ. „ივერია“. 1891, № 170;

³ დებულების გამოცემას, როგორც უკვე აღვნიშნეთ, წინ უსწრებდა ქართველი ინტელიგენციის გაბედული გამოსვლა ხიზანთა საკითხზე და თვით ხიზნების დაუცხრომელი ბრძოლა მიწისა და თვისუფლებისათვის (ЦГИА СССР, ფ. 48, დ. 1679; ფ. 12, оп. 5, д. 286; ფ. 12, оп. 10, д. 143, 283 და სხვ.).

ორმაგად აენაზღაურებინა მისთვის ნაგებობა-ნარგავებისა და მიწის გაუმჯობესების ხარჯები¹.

ეს ერთი, ხიზნებისთვის არსებითად არც თუ ისე დიდი პრაქტიკული მნიშვნელობის მქონე, მუხლიც კი საკმარისი აღმოჩნდა იმისათვის, რომ თავადაზნაურობა პროტესტით შეხვედროდა 1891 წლის 3 ივნისის კანონს, რომელმაც უყოყმანოდ აღიარა პრივილეგირებული წოდების საადგილმამულო უფლებები. 1893 წელს თბილისის გუბერნიის მარშალმა თხოვნით მიმართა გუბერნატორს ეშუამდგომლა ხელმწიფე-იმპერატორის წინაშე, რათა მას ამ ორი წლის წინათ უმაღლესად დამტკიცებული ხიზნთა დებულება გადაესინჯა და ძალადაკარგულად გამოეცხადებინა. თხოვნაში ხაზგასმით იყო აღნიშნული, რომ თავადაზნაურობა, ვითარცა ღარიბი და მცირემამულიანი წოდება, ვერ შეძლებდა ხიზნების „ნაღელებით“ მომარაგებას და ხელისუფლებას ურჩევდა გადაესახლებინა ისინი თავისუფალ სახაზინო მიწებზე². მთავრობამ, როგორც მოსალოდნელიც იყო, შეიწყნარა თავადაზნაურობის თხოვნა-საჩივარი და 1900 წლის 5 ივნისის გამოსცა ახალი კანონი ხიზნების შესახებ. ამ უკანასკნელმა მშრომელი კლასის ჩვენთვის საინტერესო კატეგორიას თავდაცვის ის მცირე საშუალებაც კი წაართვა, რომელიც მას 1891 წლის 3 ივნისის დებულებამ მიანიჭა. ხელისუფლება ამჟამად უფრო აშკარად დადგა პრივილეგიური წოდების მხარეზე. მისმა ასეთმა პოზიციამ თვით ხიზნების განმარტება-განსაზღვრაშიც იჩინა თავი. ახალი კანონით ხიზნად მხოლოდ ის გლეხი ჩაითვლებოდა, რომელიც ადათობრივი სამართლის საფუძველზე მემამულის თანხმობით მის მიწაზე იყო დასახლებული³. ამ განსაზღვრის შედეგი ის იყო, რომ ამიერიდან ბევრი გლეხი (პირველ რიგში კი თვითნებურად ჩამოსახლებულნი) ვერ ახერხებდა თავისი ხიზნობის დამტკიცებას და იძულებული ხდებოდა „ჩვეულებრივი მოიჯარის უფლებას დასჯერებოდა“⁴. ახალმა კანონმა ძალადაკარგულად გამოაცხადა მისი წინამორბედი დებულების ის მუხლი,

¹ ეს მუხლი, რომელიც, როგორც აღვნიშნეთ, თითქოს რამდენადმე ზღუდავდა მემამულეთა თვითნებობას, არსებითად აბათილებდა დებულების მიერ აღიარებულ პრინციპს ხიზნური მიწათმფლობელობის უვადობა-მუდმიეობის შესახებ. «Это право сгона.— самартиანიად წერდა ს. ავალიანი, — представленное законом владельцам земли, как показатель прав собственности, противоречило бессрочности и незаблемости права пользования; эта была уступка владельцам; в Положении, которое в некоторой части исходило из признания основ обычного права, находим и статьи, которые оказались в логическом противоречии с этою частью положения; такое противоречие и несогласованность подрывали принципиальную обоснованность его и ту правовую устойчивость, которую создавало положение для хизан» (С. А в а л и а н и, Крестьянский вопрос, т. IV, გვ. 173).

² „ივერია“, 1893, № 197.

³ С. А в а л и а н и, Крестьянский вопрос..., т. IV, გვ. 176.

⁴ აღ. ბ ე ნ დ ი ა ნ ი შ ვ ი ლ ი, აგარაული ურთიერთობანი..., გვ. 29.

რომელიც ხიზნის გაუფრთხილებლად აყრის შემთხვევაში ითვალისწინებდა შენობის აგებისა და მიწის გაუმჯობესების ხარჯების ორმაგად ანაზღაურებას. ამიერიდან მემამულეს მარტო ნაგებობათა ხარჯების გაღება ევალებოდა და ისიც მხოლოდ ერთმაგი რაოდენობით¹. კიდევ უფრო ზარალდებოდა გლეხი, რომელიც უარს იტყოდა მის მფლობელობაში მყოფი მიწით სარგებლობაზე; ასეთ შემთხვევაში მემამულის სრულ საკუთრებაში გადადიოდა, ცხადია, ყოველგვარი ანაზღაურების გარეშე, ხიზნის შრომითა და ფულით გამართული მთელი მეურნეობა — ბალ-ვენახებითა და ნაგებობებით².

1891 და 1900 წლების კანონების შესწავლა ცხადყოფს, რომ მწარმოებელი კლასის ინტერესების დაცვის თვალსაზრისით უკანასკნელი პირველთან შედარებით აშკარად უკან გადადგმული ნაბიჯი იყო.

საკითხის ასეთი გადაწყვეტით უკმაყოფილო ხიზნებს, ბუნებრივია, ბრძოლა მომავალშიაც არ შეუწყვეტიათ. ისინი სხვა კატეგორიის გლეხებთან ერთად ენერგიულად ჩაებნენ აგრარულ მოძრაობაში, რომელიც დიდი მასშტაბით გაიშალა 1905—1907 წლების რევოლუციის პერიოდში.

* * *

როგორც ვნახეთ, არც ერთი კატეგორიის გლეხის სოციალ-ეკონომიური მდგომარეობა არ ყოფილა საერთოდ სახარბიელო, მაგრამ მატერიალური უზრუნველყოფის თვალსაზრისით ისინი მაინც განსხვავდებოდნენ ერთიმეორისაგან. მიწით მომარაგების მიხედვით, მაგალითად, პირველ ადგილზე სახაზინო გლეხები იყვნენ, მეორეზე — ხიზნები, მესამეზე — ღროებით ვალდებული და მეოთხეზე — მესაკუთრე გლეხები. გასული საუკუნის 80-იან წლებში მათი საშუალო საკომლო ნაღელი შესაბამისად უდრიდა: თბილისის გუბერნიაში — 17,67³, 4,30⁴, 3,20⁵ და 2,52⁶ დესეტინას, ხოლო ქუთაისის გუბერნიაში (იმავე თანმიმდევრობით, მესაკუთრე გლეხების გამოკლებით) 4,23⁷, 2,29⁸ და 2,10 დესეტინას⁹.

¹ С. А в а л и а н и, Крестьянский вопрос..., т. IV, გვ. 177; ალ. ბ ე ნ დ ი ა ნ ი - შ ე ი ლ ი, აგრარული ურთიერთობანი..., გვ. 29.

² ალ. ბ ე ნ დ ი ა ნ ი შ ე ი ლ ი, აგრარული ურთიერთობანი..., გვ. 29.

³ СМІЭБТКЗК, II, გვ. 261—264.

⁴ Ф. Г о г и ч а и ш в и л и, Малоземелье..., გვ. 17.

⁵ ССДЗТКГ, 1893, Приложение II, გვ. 141.

⁶ Ф. Г о г и ч а и ш в и л и, Малоземелье..., გვ. 18.

⁷ СМІЭБТКЗК, II, გვ. 261—264.

⁸ Ф. Г о г и ч а и ш в и л и, Малоземелье..., გვ. 17.

⁹ ССДЗСХПГЗК, Тифлис, 1899, Приложение II, გვ. 163, 167, 171, 177 (საშუალო საკომლო ნაღელის სიდიდე გამოყვანილია ქუთაისის გუბერნიის მხოლოდ ოთხი მაზრის — შორაპნის, ლეჩხუმის, რაჭისა და ოზურგეთის 1875 წლის მონაცემების მიხედვით).

გადასახადების გადახდის მხრივაც ყველაზე უკეთესი პირობები ისევ სახაზინო გლეხებს ჰქონიათ, მეორე ადგილზე დროებით ვალდებული გლეხები ყოფილან, ხოლო მესამეზე — ხიზნები. 80-იანი წლების მონაცემებით, მაგალითად, თბილისის გუბერნიაში სახელმწიფო გლეხის თითო კომლი იხდიდა საშუალოდ (ფულზე გადატანით) 13 მან. და 75 კაპ., დროებით ვალდებული გლეხისა — 28 მან. და 84 კაპიკს¹ და ხიზნისა — 66 მან. და 49 კაპიკს².

თუ გავითვალისწინებთ იმ გარემოებას, რომ ხიზნის მიწის ფართობი მხოლოდ მცირე რაოდენობით სჭარბობდა დროებით ვალდებული გლეხის ნაღვლს, ხოლო გადასახადები პირველის თითქმის სამჯერ მეტი იყო, ვიდრე მეორისა, შეიძლება დავასკვნათ, რომ რეფორმის მომდევნო ხანაში ყველაზე მძიმე იყო ხიზნის ეკონომიური მდგომარეობა, ხოლო ყველაზე უკეთესი — სახაზინო გლეხისა.

§ 3. კლასობრივი ბრძოლა

ბატონყმობის გაუქმებას ქართველი გლეხი, როგორც მოსალოდნელი იყო, წარმოუდგენელი ალტაცებით შეხვდა. მთავრობის მანიფესტის საზეიმო ვითარებაში წაკითხვამ უდიდესი შთაბეჭდილება მოახდინა მასზე და საუკუნეობრივი მონობის „მოსპობით“ გაბედნიერებული, სიხარულით ცას წვდებოდა, „მზრუნველ“ მეფეს მადლობას სწირავდა. „კარგად ჩამეჭრა მეხსიერებაში ის სიხარული, — იგონებს ი. მანსვეტაშვილი, — რომელსაც ხალხი განიცდიდა განთავისუფლების ამბის გამო. ეს მოხდა ჩვენში 1864 წელს. მე მაშინ 9 წლისა ვიყავი... ხმა გავარდა, რომ ამა და ამ დღეს საჯაროდ გამოცხადდება ბატონყმობის გადავარდნა... დანიშნულ დღეს (გუნბის) მოედანზე მართლაც ხალხის ტევა არ იყო. ყველა ღელავდა დიდი ამბის მოლოდინში... ზეიმით წაკითხულ იქმნა მანიფესტი. გათავდა. ხალხი გრგვინავდა, სიხარულის ცრემლებით ერთმანეთს ეხვეოდნენ და ჰკოცნიდნენ. საზღვარი არა ჰქონდა სიხარულს, ბედნიერებას, მეტადრე მათ შორის, ვინც მართლა თავს აცლიდა იმ მძიმე და ადამიანის დამამცირებელ უღელს, რომელსაც სახელად ბატონყმობა ეწოდება“³.

მაგრამ გლეხის ეს საზეიმო განწყობილება დროებითი აღმოჩნდა. მომდევნო ხანის სინამდვილემ ის მტკიცედ დაარწმუნა, რომ მთავრობა მხოლოდ მოვლენის ზედაპირულ მხარეს შეეხბო და არა მის საფუძვლებს,

¹ ССДЗТКГ. Приложение. II, гв, 19, 37, 97, 126, 133, 139, 145; დროებით ვალდებულ გლეხთა და ხიზნების აქ ნაჩვენებ თანხაში შედის მხოლოდ ის, რასაც ისინი შემამულეთა სასარგებლოდ იხდიდნენ.

² ეს საშუალო სიდიდე დადგენილია ჩვენ მიერ და ეხება არა მთელ საქართველოს, არამედ მხოლოდ ივ. მუხრან-ბატონის ხიზნებს, მცხოვრებთ დუშეთის მაზრაში.

³ ი. მანსვეტაშვილი, მოგონებანი, თბ., 1936, გვ. 2.

რომ მან უშუალო მწარმოებელს მხოლოდ პირადი თავისუფლება მისცა და არა ეკონომიური დამოუკიდებლობა.

ამან, ბუნებრივია, სოფლის მშრომელი მოსახლეობა აქტიური კლასობრივი ბრძოლის გზაზე დააყენა, რომლის მიზანი საოცნებო მიწისა და სრული თავისუფლების მოპოვება იყო. გლეხების წრეში ტრიალებდნენ აგიტატორები, რომლებიც ამხელდნენ რა რეფორმის ბატონყმურ ხასიათს, მოუწოდებდნენ ჩაეშალათ საწესდებო სიგელების დადება-გაფორმების კამპანია და ენერგიული ბრძოლა ეწარმოებინათ მჩაგვრელთა წინააღმდეგ¹.

ბატონყმობის გაუქმების შემდეგ კლასობრივ ბრძოლას უფრო მძაფრი, სისტემატური და მიზანდასახული ხასიათი მიეცა. მართალია, განსახილველ პერიოდში ჩვენს ქვეყანაში არ მომხდარა არც ერთი ისეთი მღელვარება, რომელიც მონაწილეთა სიმრავლისა და გავრცელების ტერიტორიის მხრივ შეიძლება შევადაროთ, მაგალითად, 1856—1857 წლების სამეგრელოს გლეხთა აჯანყებას, მაგრამ ეს მაინც არ არღვევს ჩვენ მოსაზრებას კლასობრივი ბრძოლის გაღრმავების შესახებ რეფორმის შემდეგდროინდელ საქართველოს სოფელში. XIX საუკუნის მეორე ნახევარში, უფრო ზუსტად 1866—1905 წლებში, ისე გახშირდა გლეხთა გამოსვლები, რომ მან მოიცვა არა მარტო ყველა სოფელი, არამედ თითქმის ყველა მამული.

უკეთესი — სოციალ-ეკონომიური პირობების მოპოვებისათვის ბრძოლაში სოფლის მშრომელი მოსახლეობის მასიური მონაწილეობა წარმოადგენს სწორედ შესწავლილი ხანის კლასობრივი ბრძოლის ერთ-ერთ თავისებურებას.

იმ მიზეზებს შორის, რომლებმაც განსაზღვრეს ზემოაღნიშნული მოვლენა, მნიშვნელოვანი ადგილი, როგორც ზემოთაც აღვნიშნეთ, საგლეხო რეფორმის ფეოდალურ-ბატონყმურ ხასიათს უჭირავს. რეფორმის შედეგად, ვიძეორებთ, მიწის ფონდი, რომელიც უშუალო მწარმოებლის განკარგულებაში იმყოფებოდა, საგრძნობლად შემცირდა და მემამულეთა ხელში გადავიდა, ხოლო მშრომელი მოსახლეობის გარკვეულმა ნაწილმა (ხიზნები, შინაყმები) მიწა საერთოდ ვერ მიიღო.

ამ მცირემიწიან და სრულიად უმიწო, მრავალგვარი გადასახადებით შევიწროებულ ადამიანთა (დროებით ვალდებული გლეხები, ხიზნები, შინაყმები) ვეებერთელა არმიის არსებობა წარმოადგენდა სოციალური ანტაგონიზმის გაძლიერების ერთ-ერთ მნიშვნელოვან ფაქტორს². ყოფილ

¹ სსცია, ფ. 5, საქ. 227, ფურც. 1; შეადარე «Документы по истории Грузии» შედგენილი და რედაქტირებული პროფ. შ. ჩხეტიას მიერ, ტ. 1, ნაწ. 1, თბ., 1954, გვ. 54.

² ს. ხუნდაძე, მასალები XIX საუკუნის ქართული ლიტერატურისა და საზოგადოებრივი აზროვნების ისტორიიდან, თბ., 1949, გვ. 242.

საბატონო ყმათა ენერგიულ პროტესტს მხარს უჭერდნენ ხიზნებიც და სახაზინო გლეხებიც, რომლებიც ძველებურად თვითმპყრობელურ სახელმწიფოსგან დამოკიდებულ მდგომარეობაში იმყოფებოდნენ. მართალია, რეფორმა უშუალოდ მათ არ შეხებია, მაგრამ აღნიშნულ მოვლენას უკვალოდ არც ამ კატეგორიის გლეხებისათვის ჩაუვლია. კერძო მემამულეთა გლეხებისათვის პირადი თავისუფლებისა და სანადელო მიწის საკუთრებად შესყიდვის უფლების დამტკიცებას არ შეეძლო არ გაემწვავებინა ხიზნებისა და სახაზინო გლეხების ბრძოლა არსებულ სოციალ-ეკონომიური და პოლიტიკური წყობილების წინააღმდეგ.

მეორე მომენტი, რომელიც იმავე მიმართულებით მოქმედებდა, იყო კულაკობის, როგორც კლასის წარმოშობა. იტაცებდნენ რა ღარიბი და საშუალო გლეხების კუთვნილ მიწასა და წარმოების სხვა საშუალებებს, კულაკები აყენებდნენ მათ მძიმე ეკონომიურ მდგომარეობაში. სოფლის ბურჟუაზიის სახიფათო იერიში მშრომელი ხალხის მოძრავი და უძრავი ქონების წინააღმდეგ აძლიერებდა ამ ხალხის საპროტესტო მოძრაობას, ამწვავებდა მის კლასობრივ ბრძოლას.

სრულიად განსაკუთრებული მნიშვნელობა ჰქონდა მუშათა კლასის ფორმირებას. საქართველოს პროლეტარიატის რევოლუციური მოძრაობა უადრესად დიდ და დადებით გავლენას ახდენდა სოფლად მიმდინარე კლასობრივ ბრძოლაზე¹. ამასთან დაკავშირებით საჭიროა აღინიშნოს, რომ ქალაქებში დასაქმებულ მუშებს შორის ბევრი იყო ისეთი გლეხი, რომელმაც მხოლოდ დროებით, დამატებითი შემოსავლის მიღების მიზნით, დატოვა თავისი საცხოვრებელი და სავაჭრო-სამრეწველო პუნქტებს მიაშურა. ასეთი ბევრი იყო, მაგალითად, თბილისში, ბათუმში, ფოთში, ჭიათურაში, ნოვოროსიისკში, ოდესაში, საქართველოსა და რუსეთის სხვა ქალაქებში². გარკვეული დროის შემდეგ ეს სეზონური, უკვე უფრო გონებაგახსნილი მუშები უკან ბრუნდებოდნენ და ქალაქებში საბოლოოდ დამკვიდრებულ, მაგრამ სოფელთან ჭერ კიდევ კავშირგაუწყებელ მუშებთან ერთად ეწეოდნენ ბატონყმურ ურთიერთობათა ნაშთების სრული ლიკვიდაციისა და არსებული უსამართლო წყობილების დამხობის იდეის პროპაგანდას.

დასასრულ, არ შეიძლება ხაზი არ გაესვას ქართველი ხალხოსნების დადებით გავლენას რეფორმის შემდეგდროინდელი ხანის გლეხთა მოძრაობაზე. ისინი არწმუნებდნენ გლეხებს, რომ მიწა, რომელსაც ისინი

¹ ს. ხუნდაძე, მასალები XIX საუკუნის ქართული ლიტერატურისა და საზოგადოებრივი აზროვნების ისტორიიდან, თბ., 1949, გვ. 242.

² თ. სახოკია, მოგზაურობანი, თბილისი, 1952. შეადარე სსცია, ფ. 12, ანაწ. 11, საქ. 311, ფურც. 5—6; И. Г. Антелава, Государственные крестьяне Грузии в первой половине XIX века, Сухуми, 1954, гв. 165—167.

ამუშავებენ, მათი სრული საკუთრებაა და არავის არა აქვს უფლება მათ ამისთვის გადასახადები მოსთხოვოს. „ერთხელ, — წერს სოფრომ მაგალობლიშვილი, — სოფელ დირბში, რომლის მოსახლეობას საკუთარი ხუთი თითივით ვიცნობდი, კრება მოვაწყვე და ხალხს მასთვის საჭირობო-ტო საკითხებზე ველაპარაკე. ვუთხარი, რომ მიწა მშრომელი კაცისაა, რომ მეფემ უმიწოდ გაათავისუფლა გლეხი და ამით იგი უფრო უარეს ღღეში ჩააგდო, ვიდრე ბატონყმობის დროს იყო, რომ ამის მოქმედი მთავრობა დამნობა-განადგურების ღირსია და სხვა“¹.

ს. მაგალობლიშვილის ამ მოწმობას ქუთაისის გენერალ-გუბერნატორიც ადასტურებს.

მართალია, გლეხები საბოლოოდ მაინც არ გაჰყვნენ ხალხოსნების მიერ რეკომენდებულ გზას; მაგრამ მათ პროპაგანდას უკვალოდ მაინც არ ჩაუვლია: მან, როგორც ვნახეთ, ხელი შეუწყო რეფორმის შემდეგდროინდელი ხანის საქართველოს სოფელში მიმდინარე კლასობრივი ბრძოლის შემდგომ გამწვავებას.

სოფლის მშრომელი მოსახლეობა (მათ შორის დროებით ვალდებული გლეხები) იბრძოდა უსასყიდლო მიწებისა და ტყისათვის, საგადასახადო ტვირთის შემსუბუქებისათვის, სასოფლო, სამაზრო და საგუბერნიო ადმინისტრაციის უმსგავსო საქციელის გარკვეულ ჩარჩოებში ჩაყენებისათვის.

მიწისა და ტყისთვის ბრძოლა, როგორც მოსალოდნელიც იყო, მეტად ძლიერ ფორმებში მიმდინარეობდა. მწარმოებელი კლასი წინააღმდეგობის გარეშე არ თმობდა არც ერთი მტკაველი მიწის ფართობს. 1865 წელს, მაგალითად, კარდანახელმა გლეხებმა ენერგიულად შეუტიეს მემამულეებს, რომლებმაც მათ მიწით სარგებლობა აუკრძალეს. „ტყეც ჩვენია და მინდორიც“ — ყვიროდნენ თურმე ისინი და კატეგორიულად უარყოფდნენ თავადიშვილების პრეტენზიებს². თბილისის გუბერნიის საგლეხო „პრისუსტვის“ წარმომადგენელმა რამაზ ანდრონიკაშვილმა, შეშინებულმა იმით, რომ უბრალო პროტესტი მასიურ მღელვარებაში არ გადაზრდილიყო, დათმობა არჩია და, დოკუმენტის სიტყვით, ხალხს გამოუცხადა, რომ მას სრული უფლება აქვს ტყითა და მინდვრით სარგებლობისა³. კარდანახელებსაც არ დაუყოვნებიათ და, თანამედროვეთა მოწმობით, გადაუწყვეტიათ 1865 წლის 14 მარტის მომდევნო პირველ კვირას გასულიყვნენ

¹ ს. მაგალობლიშვილი, მოგონებანი, თბ., 1938, გვ. 83.

² საქართველოს მეცნიერებათა აკადემიის აკად. კორ. კეკელიძის სახელობის ხელნაწერთა ინსტიტუტი, დ. ყიფიანის ფონდი, საქ. 228, ფურც. 2.

³ იქვე.

ალაზანს გაღმა და მემამულეების დაუკითხავად დაემუშავებინათ იქაური მიწები¹.

ასევე ენერგიულად წარუმართავთ ბრძოლა სოფ. სვირის სახელმწიფო და დროებით ვალდებულ გლეხებს აღვილობრივი ფეოდალების წინააღმდეგ 1882 წელს. ამ უკანასკნელთ, როგორც ვაზ. „შრომის“ კორესპონდენციიდან ჩანს, მიუტაცებიათ გლეხების კუთვნილი, მათ საერთო სარგებლობაში მყოფი, 24 დესეტინა (60 ქეცვა) მიწა. საქმის მშვიდობიანი გზით მოგვარების მიზნით დაზარალებულებს მოძალადეებთან მოლაპარაკების გამართვა გადაუწყვეტიათ, კერძოდ, მემამულე ა-ძესთან შეხვედრა მოუნდომებით. მაგრამ დაცვას, რომელიც თავადიშვილს ხლებია, ისინი არამცთუ ახლოს არ მიუშვია, არამედ თოფის სროლაც კი აუტეხია. გლეხები იძულებული გამხდარან დაშლილიყვნენ და ხელწერილი დაედოთ, რომ ისინი შომავალში არავითარ პრეტენზიას არ განაცხადებდნენ ა-ძეს მიერ მიტაცებულ მიწებზე².

რამდენიმე დღის შემდეგ, სახელდობრ 1882 წლის 29 ნოემბერს, 500 სვირელ გლეხს თავი მოუყრია მეორე ფეოდალის, ვინმე ნ-ძეს მიერ მიტაცებული მიწის ნაკვეთზე. მათ მოძალადის მიერ გაყვანილი სასაზღვრო ორმო ამოუვსიათ და სადავოდ ქეცულ ფართობს დაუფლებიან. ნ-ძეს მოურავს სროლა გაუმართავს, მაგრამ დაზარალებულებს, მიუხედავად აშკარა საშიშროებისა, დაშლაზე უარი უთქვამთ. სვირის მამასახლისის ცნობა მაზრის უფროსისათვის გაუგზავნია და მისთვის დახმარების აღმოჩენა უთხოვია. მეორე დღეს სოფელს სათანადო პირი ჰხლებია, რომელსაც გლეხებისთვის უსიტყვო კაპიტულაციის წინადადება მიუცია, მაგრამ უშედეგოდ. მაშინ ადმინისტრაციას „უწესრიგობის“ ექვსი ხელმძღვანელი დაუქერია და ქუთაისში გაუსტუმრებია. იქ მათთვის „მტკიცე“ სიტყვა ჩამოურთმევიათ, რომ ისინი ამიერიდან სადავო მიწებზე საერთოდ არ გამოჩნდებოდნენ³.

1884 წელს გაზეთ „დროების“ ფურცლებზე გამოქვეყნებულ ერთ კორესპონდენციისაში ლაპარაკია კლასობრივი ბრძოლის არაჩვეულებრივ გამწვავებაზე თელავის მაზრაში. მთელ მაზრაში,—ნათქვამია იქ,— არ არის თითქმის არც ერთი სოფელი, მემამულეებსა და გლეხებს შორის ადგილი რომ არ ჰქონდეს გაუთავებელ დავასა და შეხლა-შემოხლას. მიზეზი ყველგან და ყველა შემთხვევაში ერთი და იგივეა — მიწა⁴. ამის საილუსტრა-

¹ „ამ მომავლის კვირაში,—წერს დასახელებული საბუთის (წერილის) ავტორი რევან ვაჩნაძე, — ალაზან გაღმა მთელი კარდანახის გლეხნი ვუთნებით მიდიან ჩვენს დაუკითხავად, თუშტა ჩვენ (მემამულეებს) ვეჭონდა ის ადგილები სათიბად და საქონლის საძოვებლად“ (საქართველოს მეცნიერებათა აკადემიის აკად. კორ. კეკელიძის სახ. ხელნაწერთა ინსტიტუტი, დ. ყიფიანის ფონდი, საქმე 228, ფურც. 4).

² „შრომა“, 1883, № 1.

³ იქვე.

⁴ „დროება“, 1884, № 178.

ციოდ ავტორი ასახელებს კახეთის სოფლების კალაუტრისა და ვაჩნაძიანის სახელმწიფო და დროებით ვალდებული გლეხების შერკინებას მემამულე ჯ-შვილთან. ეს ოც წელზე მეტ ხანს გაგრძელებული ბრძოლა მიმდინარეობდა თურმე საძოვარი ადგილებისთვის. ხსენებული გვარის ფეოდალებს შიწა თავის საკუთრებად გამოუცხადებიან და გლეხებისათვის საძოვრებით სარგებლობა აუკრძალიათ. იმათ კი მოძალადეებისათვის ანგარიში არ გაუწევიათ და საბალახოები თავისთვის დაუჩემებიათ. საქმე, ბოლოს და ბოლოს, შეიარაღებულ შეტაკებამდე მისულა, რომლის დროს მემამულეებს ერთი გლეხი დაუჭრიათ¹.

მიწით სარგებლობის პირობების გაუარესებას, ხიზნების ჩვეულებრივ მოიჯარადრებად გამოცხადების მემამულურ ცდას, რასაც ადგილი ჰქონდა რეფორმის შომღვენო ხანაში, გლეხობის მეღვარი წინააღმდეგობა გამოუწვევია. ასეთი წინააღმდეგობა გაუწევიათ, მაგალითად, 90-იან წლებში ჭეფისნაცვლის მიხეილ ნიკოლოზის ძის ბორჯომის მამულის ხიზნებს (203 კომლი). მაგრამ ჯახებითა და კეტებით შეიარაღებულმა გლეხებმა შიზნანს ვერ მიადწიეს და იძულებული გახდნენ კაპიტულაციასზე წასულიყვნენ, დიდმა ნაწილმა თავი მოიჯარადრედ აღიარა და მოკლევადიან იჯარას შოაწერა ხელი, ხოლო მცირე ნაწილმა ამაზე უარი თქვა და ამით მამულიდან გაქვევა დაიმსახურა².

სოფლის მშრომელი მოსახლეობის ეკონომიური მდგომარეობის ერთ-ერთ განმსაზღვრელ ფაქტორს გადასახადები წარმოადგენდა. ამიტომ ის, ბუნებრივია, იბრძოდა საგადასახადო ტვირთის შემსუბუქებისათვის. უშუალოდ მწარმოებელი ყველაფერს აკეთებდა იმისათვის, რომ დაესაბუთებინა ამა თუ იმ გადასახადის უსამართლობა და უარი ეთქვა მის გადახდაზე. მაგალითად, 1866 წლის მაისის თვეში თბილისის გუბერნატორის კანცელარიამ გორელი თავადის ნიკოლოზ ივანეს ძე ერისთავის საჩივარი მიიღო, რომელშიც ნათქვამი იყო შემდეგი: „1864 წლის 8 ნოემბერს გამოცხადებული უმაღლესი მანიფესტით თბილისის გუბერნიის გლეხები ყმობიდან განთავისუფლდნენ, მაგრამ იმ პირობით, რომ ისინი ორი წლის განმავლობაში დარჩენილიყვნენ წინანდელ მდგომარეობაში და ეხადათ მემამულეებისათვის ყველა ის გადასახადი, რასაც აქამდე უხდიდნენ. ამის საფუძველზე ჩემს დროებით ვალდებულ გლეხებს არაერთხელ მოვთხოვე, რომ მათ შეესრულებინათ თავიანთი მოვალეობა, მაგრამ უარი გამომიცხადეს. ამის გამო მე არაერთგზის მივმართე თხოვნით ქსნისა და ოსეთის განყოფილებათა მომრიგებელ შუამავლებს, რათა მათ აეძულებინათ გლეხ-

¹ „დროეზა“, 1884, № 178.

² ЦГИА СССР, ф. 547, оп. 3, д. 3113. მასალა ხიზნათა ამ მღელვარების შესახებ მოგვაწოდა ისტორიულ მეცნიერებათა კანდიტატმა ნ. ნაცელიშვილმა, რისთვისაც მას მადლობას მოვახსენებთ.

ბი გადაეხადათ ჩემთვის როგორც მიმდინარე, ისე წინა წლის გადასახადები, მაგრამ თხოვნა დაკმაყოფილებულ არ იქნა. (ამით გათამამებული) გლეხები კატეგორიულად უარს ამბობენ მათზე გაწერილ გადასახადის გაღებაზე“ (ხაზი ჩვენია — ავტ.)¹.

იმავე წლის 8 აგვისტოს მსგავსი საჩივარი შეუტანია მთავრობაში გენერალ-ლეიტენანტ თავად გიორგი ერისთავს და გლეხების მორჩილებაში მოყვანა უთხოვია². იგივე გაუკეთებიათ თბილისის მაზრის დუშეთის უბნის მემამულეებს ანდრია, დავით და ელიზბარ რატიშვილებს (1866 წ.). „ჩვენ, — სწერდნენ ისინი ხელისუფლებას, — პურის აღების დროს სოფ. ყანჩავეტში გავგზავნეთ ჩვენი მოგვარე დავით რატიშვილი... მეოთხედი ნაწილის ასაღებად, მაგრამ ის ხელცარიელი გამობრუნდა და მოგვახსენა, რომ გლეხებმა გადაჭრით უარი განაცხადესო“³. ჩანს, არც ეკატერინე ერისთავის ყოფილ ყმას, ქსნის უბნის სოფ. ზაღებხის მცხოვრებ გაბრიელ ოდიშვილს გამოუჩენია დიდი სიბეჭითე მასზე დაკისრებულ ვალდებულებათა შესრულებაში. ოდიშვილს, რომელიც მემამულის მოწმობით, დიდი ქონების პატრონი ყოფილა, მტკიცე უარი უთქვამს გადაეხადა 1862—1865 წლების გადასახადი მახთა 180 მანეთის რაოდენობით⁴.

ასეთივე ურჩობა გამოუჩენიათ ქართველი მემამულეების ილია ციციშვილისა და რევაზ ერისთავის გლეხებს. დასახლებული თავადები 1864—1867 წლებში დაბეჭითებით მოითხოვდნენ რეფორმით გათამამებული გლეხების მორჩილებაში მოყვანასა და დაწესებული გადასახადების ძალით გადახდევინებას.

მწარმოებელ კლასს აწუხებდნენ არა მარტო საერო, არამედ სასულიერო ფეოდალებიც. ამიტომ, ცხადია, ის ბრძოლას ხსენებული კორპორაციის წინააღმდეგაც აწარმოებდა. ამ ბრძოლის ერთი ეპიზოდი, რომელსაც, როგორც ჩანს, XIX საუკუნის 90-იანი წლების ბოლოს ჰქონია ადგილი, აღწერილია გოლიციანის „უქვეშევრდომილეს მოხსენებაში“⁵, კავკასიის მმართველობის შესახებ 1897—1902 წლებში. იქ ლაპარაკია დრამის ფულის შეგროვებასთან დაკავშირებით გორისა და ოზურგეთის მაზრებში მომხდარ სახალხო მღელვარებაზე.

ჩვენ გავვაჩნია ზოგი შეჭამებული ხასიათის მასალაც, რომელიც მეტ-ნაკლები სისრულით ახასიათებს რეფორმის შემდეგდროინდელ საქართველოს სოფელში მიმდინარე კლასობრივ ბრძოლას. ამ მასალიდან ჩანს⁶, მაგალითად, რომ 1873 წელს მარტო გორის მაზრის პირველსა და

¹ სსცია, ფ. 31, საქ., 28, ფურც. 29.

² იქვე, ფურც. 45—46.

³ იქვე, ფურც. 70.

⁴ იქვე, ფურც. 30.

⁵ იქვე, გმსფ, საქ. 18.

⁶ იქვე, ფ. 31, საქ. 788, ფურც. 6—7, 15—16.

მეორე განყოფილებაში შესულა სულ 2 316 წერილობითი, თუ ზეპირი საჩივარი. აქედან 1262 საჩივარი გლეხებსა და მემამულეებს შეუტანიათ, მათ შორას მიწის თაობაზე წარმოშობილი დავის შესახებ. 480 — მემამულეებს გლეხების მიერ გადასახადის თავის დროზე გადაუხდელობის თაობაზე და 572 — გლეხებს მემამულეების თავგასულობისა და მათ შემავიწროებელ მოქმედებათა შესახებ.

დაახლოებით ასეთივე მდგომარეობა ჩანს საქართველოს სხვა მაზრებშიც¹.

კლასობრივი ბრძოლის გამწვავებას რეფორმის შემდეგდროინდელ საქართველოში პატიმართა დიდი რაოდენობაც აღასტურებს. 1886 წლის მონაცემებით, მაგალითად, თბილისის გუბერნიაში 13 948 კაცი ყოფილა პაპუხისგებაში მიცემული, რომელთაგან 8 ათასი მსხვილ დამნაშავედ უცენიათ და სანიმუშოდ დაუსჯიათ². დანაშაულის უდიდესი ნაწილი პიროვნების და ქონების ხელშეუხებლობის წინააღმდეგ ყოფილა მიმართული³.

კიდევ უფრო საინტერესოა ცნობები ცეცხლის წაკიდებისა და შინაური საქონლის დამახინჯება-დასახიჩრების შესახებ. 143 ხანძრიდან, რომელსაც 1886 წელს თბილისისავე გუბერნიაში ჰქონია აღგილი, 64 (ან საერთო რაოდენობის 43,3%) ცეცხლის საგანგებო წაკიდებით გაუჩენიათ. «Этот страшный процент, — წერდა გუბერნატორი, — яснее всего иллюстрирует дурные склонности населения, так как такого рода преступления совершают, очевидно, не ради личной выгоды..., как это бывает при воровстве, грабеже и разбое, а лишь ради мести врагу. Мало того, месть эта направляется и на домашних животных, с целью причинить врагу имущественный вред. Нередки случаи, когда враги подрезывают рабочим волам и буйволам своего противника жилы, лошадям гривы и хвосты, чтобы обезобразить и лишить их ценности»⁴.

დანაშაულს, რა თქმა უნდა, ყველა წოდების კაცი ჩადიოდა, მაგრამ ყველაზე მეტ აქტიურობას ამ საქმეში მაინც გლეხობა იჩენდა. საკმარისია აღვნიშნოთ, რომ 1888 წელს თბილისის გუბერნიაში მსჯავრდადებულ პირთა 67,9% სოციალურად სწორედ გლეხობის სხვადასხვა კატეგორიაზე მოდიოდა⁵.

¹ სსცა, ფ. 31, საქ. 788, ფურც. 10—12, აქ არის 1874 წლის ცნობები სიღნაღის მაზრის შესახებ.

² იქვე, ფ. 17, საქ. 8747, ფურც. 1—25; И. Г. Антелава, Государственные крестьяне Грузии в XIX веке, т. II, გვ. 162.

³ იქვე.

⁴ იქვე.

⁵ И. Г. Антелава, Государст. крестьяне..., т. II, გვ. 162.

მაგრამ ქართველი გლეხი მარტო ბრძოლის ზემოაღნიშნული ფორმებით არ კმაყოფილდებოდა. იგი ზოგჯერ ისეთ რადიკალურ საშუალებასაც მიმართავდა, როგორცაა მასობრივი შეიარაღებული გამოსვლა. ასეთი გამოსვლა მოხდა, მაგალითად, 1875—1876 წლებში სვანეთში. 1875 წლის ივნისის შუა რიცხვებში თავისუფალი სვანეთის ბოქაულმა თავადმა ჯორჯაძემ თავის საბოქაულოს გამოუცხადა, რომ მას მთავრობისგან დავალე-ბული აქვს ზუსტად დაადგინოს მცხოვრებთა მიწის ფართობის რაოდენობა და რომ ის ამ მიზნით მალე დაიწყებს სათანადო გაზომვით სამუშაოებს. ამით შეშფოთებულმა ხალხმა დასახელებულ მოხელეს ჰკითხა ხელისუფლების ამ განკარგულების მიზეზი, რაზედაც მან მშრალი, მეტად ძოკლე და არაპირდაპირი პასუხი გასცა: რაკი მთავრობა ასეთ ცნობას ითხოვს, ცხადია, ის მას სჭირია და მეც ვალდებული ვარ წარვუდგინო. ჯორჯაძის ამგვარმა „პასუხმა, — წერს თანამედროვე ბესარიონ ნიჟარაძე, — ვერ დააკმაყოფილა ხალხის ცნობისმოყვარეობა; პირიქით, უფრო მეტი ეჭვიანობა გამოიწვია და შემდეგ მრავალ მითქმა-მოთქმისა დასაკენ-ნა, რომ უთუოდ მთავრობას უნდა ჩვენს მიწებს ღალა დაადვას, მაგრამ ბოქაული ამას ვერ გვიმხელსო“¹.

სვანები ღელავდნენ, ნერვიულობდნენ. მიწას თუ ბეგარა დაედვა, ჩვენი ცხოვრება შეუძლებელიაო², — ამბობდნენ ისინი და ენერგიული წინააღმდეგობის გაწევა გადაწყვიტეს. ყველაზე ადრე ყრილობაზე მულახის საზოგადოება შეიკრიბა, რომელმაც, ბ. ნიჟარაძის სიტყვით, შემდეგი შინაარსის დადგენილება გამოიტანა: „შევატყობინოთ ჩვენი აზრი თავისუფალი სვანეთის დანარჩენ სოფლებს, ვაცნობოთ, რომ, თუ მთავრობას ნამდვილი განზრახვა აქვს მიწები დაბეგროს, არზა მივართვათ, არ ინებოს ამისი სისრულეში მოყვანა და თუ თხოვნით არაფერი გაგვივაღეს, მაშინ ძალადობა გაეწიოთ“³.

მულახელთა ეს გადაწყვეტილება მართლაც ეცნობა მეორე დღეს მესტიის, ლენჯერის, ლატალის, იფარის, კალისა და უშგულის საზოგადოებებს, რომლებმაც ერთსულოვნად დაუჭირეს მას მხარი. მალე მთელმა თავისუფალმა სვანებმა თავი მოიყარეს სოფ. კალაში, რათა აქ, წმინდა კვირიკეს ეკლესიაში, ფიცის მიღებით დაედასტურებინათ თავიანთი ერთგულება ზემოაღნიშნული დადგენილებისადმი. აბობოქრებული ხალხის წინაშე ლატალელი ჭაღარა მოხუცი გინადრუყ გირგვლიანი გამოვიდა. „ხათრი დასდევით, — განაცხადა მან, — ჩემს მოხუცებულობას, ჩემს

¹ ბესარიონ ნიჟარაძე (თავისუფალი სვანი), ისტორიულ-ეთნოგრაფიულა წერილები (რედაქტორი პროფ. აღ. რობაქიძე), ტ. II, თბ., 1964, გვ. 173; ეგ. ვაბლიანი, ძველი და ახალი სვანეთი, ტფ., 1925, გვ. 94.

² ბ. ნიჟარაძე, ისტორიულ-ეთნოგრაფიული წერილები, გვ. 173.

³ იქვე, გვ. 174.

ჰალარას და გამიგონეთ. დაწყნარდით, დამშვიდდით, აგრე ალელეებით საქმე არ გაკეთდება. მოლაპარაკე ავირჩიოთ, კარგად გავიგოთ საქმე, შევიტყოთ, რა გზას უნდა დავადგეთ. ჭერ ისეთი გაჭირვება არა მოგვდგომია—რა, რომ მაინც და მაინც თავი გავიმეტოთ; და თუ შემდეგში რაიმე განსაცდელი მოგველის, მაშინ თავს ნურავინ დავზოგავთ, პირველი მე გავიძვებით, სადაც საჭირო იქნება, და დიაცის ლეჩაქი დაეხუროს მას, ვინც გაჭირვების დროს თავი დაზოგოს“¹.

ხალხმა ისმინა მოხუცის სიტყვები, დამშვიდდა და მოლაპარაკეთ მულახის მამასახლისი ყასბულათ შარვაშიძე აირჩია. „მრავალი შემთხვევა ვიცი ძველებისაგან ნაამბობ-ნაარაკევი, — თქვა მან, — როდესაც ჩვენზე ბატონობის მომდომე სირცხვილელული დაგვიტოვებია. ჩემზედ უფრო მოხუცნი ურევთან ამ ყრილობაში და ისინი ჩემზედ უკეთ გეტყვიან, რომ ვისაც კი ჩვენი დამონავება, ხელში ჩაგდება მოუნდომებია, ყველანი ჩვენი წერა გაშხდარან; თოფი და ხანჯალი ყოფილა ჩვენი დამცველი! სვანეთის სალოცავემა გვაშოროს, რომ თოფი და ხანჯალი დაგვჭირდეს ეხლაც. ამგვარის საქმის მოსურნე არავინა ვართ, რადგან სიცოცხლე გვინდა და არა სიკვდილი... მე თითონ მთავარ-მართებლის ვორონცოვის მონათლული ვარ და იმისაგან მოკიდებული პატარა მოხელემდე ყველანი იმას გვიმტკიცებდნენ, რომ რუსის მთავრობა გაგაკეთებთო; ჩვენ ეს დავიჯერეთ; მართალი გვეგონა, რასაც გვეუბნებოდნენ და ამიტომაც ძალა დაუტანებლივ, ჩვენის ნებით, დაუკართ, თავი რუსებს. არავის წინააღმდეგობა არ გავიწევია, თუმცა შეგვეძლო... იმ იმედით, რომ მთავრობა ბევრს რამეს შეგვძენდა, მისი ყოველი მოთხოვნილება აეასრულებთ; გამოგზავნა მღვდლები — დავიყენეთ, დანიშნა ბოქაულები — მივიღეთ, სოფლის მოხელეები აირჩიეთო — დაუჯერეთ და ბოლოს ექვს აბაზ უზალთუნიც ბეგრად დავიღვეით იმ ბევრ შემწეობის დაპირების შემდეგ, რაც მე ჩემის ყურით გამიგონია მთავრობის წარმომადგენელთაგან. ეს ბეგარა კი ძლიერ გამიკვირდა... მაგრამ ეხლა კიდევ გვეუბნებიან: მიწები უნდა გავიზომოთო. რისთვის? რად უნდათ ჩვენის მიწების გაზომვა? ამაზედ ბოქაული გვეუბნება: ასეა მთავრობის განკარგულებაო. ჩვენში კი ხმა დადის, რომ მათი დაბეგვრა უნდათო. თუ ეს ხმა მართალი გამოდგა, მაშინ კი სწორედ სიცოცხლის პირი არა გვაქვს და მუდამ წვალეებას ის გვირჩევენია, ერთ დღეს გავთავდეთ. ეხლა რადგან ეს ნამდვილად არ ვიცით, ამისათვის ჭერ უნდა შევიტყოთ რაშია საქმე; მოვახსენოთ მთავრობას ისე, როგორც დღეს ვამბობ და მის პასუხს მოუცადოთ“².

ხალხმა ეს რჩევა მიიღო და გადაწყვიტა საქმის ვითარების ზუსტად

¹ ბ. ნიქაძე, ისტორიულ-ეთნოგრაფიული წერილები, გვ. 176—177.

² იქვე.

გაგება. ყრილობის მონაწილეებმა ერთიმეორეს შექტიცეს საჭიროების შემთხვევაში მედგრად ებრძოლათ და აედულებინათ მთავრობა ხელი აეღო თავის განზრახვაზე.

ყოველივე ეს ბოქაულმა ჯორჯაძემ ლეჩხუმის მაზრის უფროსს გრინევსკის აცნობა, რომელმაც თავის ძვირე კავკასიის ადმინისტრაცია საქმის კურსში ჩააყენა და მას სამხედრო ნაწილების გამოგზავნა სთხოვა. ივლისის პირველ რიცხვებში ურჩი სევანების მორჩილებაში მოსაყვანად მართლაც გაიგზავნა ჯარი, რომელსაც თვით ქუთაისის გუბერნატორი მალაფეევი და გენერალი ციტოვიჩი მეთაურობდნენ. 13 ივლისს აჯანყებულთა დელეგაცია ყასბულათ შარვაშიძის ხელმძღვანელობით ეახლა გუბერნატორს, რომელიც დამსჯელი რაზმებითურთ ცაგერში იყო დაბანაკებული. მხარეებს შორის გაიმართა მოლაპარაკება, რომელსაც, როგორც მოსალოდნელიც იყო, შედეგი არ მოჰყოლია.

მალაფეევმა ჯარით მიმართულება სევანეთისკენ აიღო. მან თან დელეგაციის წევრებიც გაიყოლა. გუბერნატორმა აბობოქრებულ ხალხს წინდაწინ გრინევსკი და 20 ლეჩხუმელი თავად-აზნაური მიუგზავნა, მაგრამ ისინი ხალხმა ახლოს არ გაიკარა, დაუყოვნებლივ უკან გაბრუნება და მათ სევანი დელეგატების სასწრაფოდ განთავისუფლება მოსთხოვა¹.

გრინევსკის მისიის უშედეგოდ დამთავრების შემდეგ², 20 ივლისს მღელვარების მონაწილეებს თვითონ მალაფეევი შეხვდა (სოფ. კალაში) და შეძლო დაერწმუნებინა ისინი მიწების დაბეგვრის შესახებ გავრცელებული ხმების უსაფუძვლობაში. ხალხი დაცხრა, დაშოშმინდა და მშვიდობიან შრომას მიაბრუნდა. კავკასიის ადმინისტრაციამ მღელვარების 13 მონაწილე დააპატიმრა და ისინი სხვადასხვა ვადით ქუთაისის ციხის კედლებში გამოაძწყვდია. „თავისუფლებაში აღზრდილმა მთის შვილებმა“ ვერ აიტანეს ციხის მძიმე პირობები და თითქმის ყველა დაიხოცა. დახოცილებს შორის იყვნენ ყასბულათ შარვაშიძე და გინადრუყ გირგვლიანიც³.

საქმე საბოლოოდ, როგორც ცნობილია, ამით არ დამთავრებულა. ხელისუფლებამ ხალხის საწინააღმდეგო დამსჯელი მიქმედება მოჰდევნო 1876 წელსაც განაგრძო და საბაბად მან მღელვარების სამი დაუსჯელი მონაწილის, მათ შორის გურმაჩ გასვიანისა და ჩარგას ჯოხაძის (სოფ. ხალდე) დაქვერა გამოიყენა. „დამნაშავეთა“ ხელში ჩაგდება გრინევსკის ღვევალა. იგი სამხედრო რაზმით მაიორ ლეუსთან ერთად თავდაპირველად მულახს ეწვია, სადაც მას ერთი მემამბოხე უნდა დაეჭირა. მაგრამ, ვინაიდან ეს ვერ მოახერხა, ლეჩხუმის მაზრის უფროსმა მისი ორი შვილი დაატუსაღა. 31

¹ ბ. ნიკაძე, ისტორიულ-ეთნოგრაფიული წერილები, გვ. 185—186.

² იქვე, გვ. 187.

³ იქვე, გვ. 192.

ივლისს მან ხალდელებს მოციქულები მიუგზავნა და ხსენებული ორი დამნაშავეს გაცემა მოსთხოვა, მაგრამ მტკიცე უარი მიიღო. მაშინ გრინევსკიმ მთელ სოფელს მოსთხოვა მასთან გამოცხადება, მაგრამ ხალხი არც ამაზე დათანხმდა. „ასეთ ყოფაში იყო საქმე, — წერს ბესარიონ ნიჟარაძე, — როდესაც მეც მივედი კამანდის ბანაკში. მე კერძო საქმე მქონდა კამანდის ექიმთან. გრინევსკის ერთის მხრით ეამა ჩემი ნახვა და მთხოვა, ხალდეში მოციქულად წაღო. ხალდეში მე მკვიდრი ნათესავეები მყავდა და ესეც რომ არ ყოფილიყო, რაკი ვხედავდი საქმე ცუდად მიდიოდა, უარი არ მითქვამს. სოფელს ან ორი დამნაშავე უნდა მიეყვანა მასთან, ან არა-და თვითონ გამოცხადებულყო. წავიყვანე ერთი კაცი და მივედი ხალდეს. სოფელი ნახევრად თავმოყრილი დამხვდა. ყველანი აღელვებულნი იყვნენ. ბევრ მოსახლეს ცოლშვილი კიდევ გაეხიზნა მთაში, რადგან კამანდის მოსვლას ელოდებოდა. შევკრიბე მთელი სოფელი და ბევრი ვურჩიე, მთავრობას ურჩობას ნუ გაუწევთ, თორემ ცუდად წავამეთქი თქვენი საქმე. სოფელმა მომიგო, რომ ჩვენ არაფერ შუაში არ ვართო. ორი კაცია დამნაშავე, აგერ არიან და დაიჭიროსო“¹.

ბესარიონ ნიჟარაძე ეახლა გურჩიანსა და ჯოხაძეს და მათ გრინევსკისთან მისვლა სთხოვა, რათა ამით სოფელი გადარჩენილიყო კარზე მომდგარ უბედურებას, მაგრამ თხოვნამ შედეგი არ გამოიღო. რომ არაფერი ვაგონო ჩვენს ძმებს, ჩვენ სოფლიდან გავალთ, მაგრამ მთავრობას მაინც არ დავნებდებითო, — უთქვამთ ხსენებულ პირებს.

ბოლოს მოციქულმა, როგორც იქნა ხალხი დაიყოლია და გრინევსკისთან შესახვედრად წაიყვანა. მაგრამ გრინევსკიმ, განრისხებულმა იმით, რომ სვანებმა არ გასცეს და „დამნაშავენი“ არ მიჰგვარეს, ხალხთან საუბარი არ ისურვა და მათი მკაცრად დასჯა გადაწყვიტა. მან მოინდომა ხალდეში შექრა, გურჩიანისა და ჯოხაძის დაჭერა და მთელი სოფლის აწიოკება. ნიჟარაძემ და ბოქაულმა მიქელაძემ ლეჩხუმის მაზრის უფროსს ურჩიეს თავი შეეკავებინა ასეთი განზრახვისაგან, მაგრამ მან თავისი არ მოიშალა და ჯარით ხალდეს მიაშურა.

ხალდელები, როგორც კი შენიშნეს მათკენ მიმავალი ჯარის ნაწილი, სასწრაფოდ შეიარაღდნენ. ახალგაზრდები კოშკებში შევიდნენ, ხოლო ქალები და ხნიერი მამაკაცები ჯარს შუაგულ სოფელში დახვდნენ იმ მიზნით, რათა ვახშმით გამასპინძლებოდნენ თუ ცუდს არაფერს მოიმოქმედებდა. გრინევსკი ამან, ცოტა არ იყოს, დაამშვიდა, მაგრამ ამას მალე დიდი უბედურება მოჰყვა. ერთ-ერთი კოშკიდან ჩამოვარდნილი (თუ სავანებოდ ჩამოგდებული) ქვა თავში მოხვდა მაიორ ლეუსს და მას უმნაშენელო ჭრილობა მიაყენა. ბრახმორეულმა ოფიცერმა ჯარისკაცებს

¹ ბ. ნიჟარაძე, ისტორიულ-ეთნოგრაფიული წერილები, გვ. 194.

იმ ორი სვანის ხიშტებით აუწყვა უბრძანა, რომლებიც ეახლნენ მას საღმის მისაცემად და ცხენების ჩამოსართმევად. ერთი მათგანი მართლაც უტბად წამოაგეს ხიშტზე, ხოლო მეორესთან შეერკინება უფრო რთული აღმოჩნდა. მან სამი ჭარისკაცი იქვე გამოასალმა სიცოცხლეს და ბოლოს თვითონაც დაიღუპა¹.

ამას მნახველმა სვანებმა კოშკებიდან ატეხეს სროლა და მოკლეს ლეუსი, ბოქაული მიქელაძე, ექიმი ბელსკი და სხვ. აბობოქრებული ხალხი მთავარ დამნაშავეს, ერთი სვანის სახლში მიმალულ გრინეესკის მიუვარდა და მოკლეს იგი. იგივე ბედი ეწია მის ამაღასაძე².

ხელისუფლება დიდ საგონებელში ჩავარდა. მან სასწრაფო წომები მიიღო აჯანყებულთა მორჩილებაში მოსაყვანად. სვანეთში გააძლიერა მოქმედი სამხედრო ნაწილები. 21 აგვისტოს ხალდელებზე იერიში მიიტანეს. ექვსი დღის შემდეგ კი ჭარმა მთელი სოფელი ააფეთქა და ერთი დღის წინათ „ლამაზი ხალდე ნანგრევების გროვად“ აქცია³. ხალდელების ქონებას პოლიცია დაეპატრონა, ერთი ცხვარიც კი არ დაუტოვა მათ. ხალხი მთებში გაიხიზნა და თოვლის მოსვლამდე იქ დარჩა. გვიან შემოდგომაზე კი მიმალული სვანები მთებიდან ჩამოვიდნენ და ხელისუფლებას ჩაბარდნენ. მათი საქმე ქუთაისის სამხედრო საველე სასამართლომ გაარჩია: პროცესზე პასუხისგებაში მიცემულთა დამცველად აკაკი წერეთელი გამოვიდა, რომელმაც აჯანყება ხალხის მძიმე მდგომარეობითა და აღმინისტრაციის უხეში საქციელით ახსნა⁴. სამ ბრალდებულს სიკვდილით დასჯის განაჩენი გამოუტანეს, ხოლო 33 — რუსეთის შორეულ გუბერნიებში გადაასახლეს. მეფისნაცვალმა სიკვდილმისჯილებს „წყალობა“ უყო და მათ დახვრეტა სამუდამო კატორღით შეუტკვალა⁵.

ფეოდალურ-ბატონყმურ ურთიერთობათა გადმონაშთების წინააღმდეგ ენერგიულად გაილაშქრეს მეგრელმა გლეხებმაც. მღელვარება დაიწყო 1876 წლის ივნისის თვეში გენერალ-ლეიტენანტ გრიგოლ დადიანის კუთვნილ სოფლებში — ლიასა და ფახულანში. მოვლენები, რომლებიც წინ უსწრებდნენ სახალხო აზვირთებას, ერთ ოფიციალურ დოკუმენტში შემდეგნაირადაა აღწერილი. «Для того, чтоб не расстраивать окончательно взаимных отношений, владельцы, по собственному усмотрению, признали нужным делать... уступки против того размера требований, на который, в силу положения, имели право. Так,

¹ ბ. ნ ი ქ ა რ ა ძ ე, ისტორიულ-ეთნოგრაფიული წერილები, გვ. 196—197.

² იქვე, გვ. 197.

³ იქვე, გვ. 198

⁴ აკაკი წერეთელი, თხზულებათა სრული კრებული თხუთმეტ ტომად, ტ. XV, თბ., 1963, გვ. 347—357.

⁵ ბ. ნ ი ქ ა რ ა ძ ე, ისტორიულ-ეთნოგრაფიული წერილები, გვ. 199.

между прочим, поступил генерал-лейтенант князь Даднани в отношении временнообязанных крестьян своих в селениях Лиа и Пахулани, которым предоставил, по особому условию, взамен отбывания, установленных повинностей натурою, производить ему известный, уменьшенный платени деньгами. Весною нынешнего (1876 года) окончился срок действия означенного условия и это окончание срока совпало с окончанием же девятилетнего периода со времени введения в Мингрелии крестьянского положения. Подобно тому, как это было и во внутренних губерниях империи, временно-обязанные крестьяне упомянутых имений князя Даднани, поняв превратно значение этого девятилетнего периода, составили себе убеждение, что с окончанием его должны прекратиться все обязательные отношения их к владельцам¹. В силу этого крестьяне отвечали положительным отказом на требование уплаты владельцу части следующих ему, на основании положения, повинностей².

საქმეში ჩაერვივნენ ამ ამბებით შემოფოთებული მომრიგებელი მოსამართლე, ქუთაისის გუბერნიის საგლეხო საქმეთა „პრისუტსტიეს“ წევრები და თვით გუბერნატორი, მაგრამ ამას სასურველი შედეგი არ მოჰყოლია. მაშინ გლეხებს გადასახადის შესატანად ორი ღლის ვადა მისცეს და გააფრთხილეს, რომ ურჩობის შემთხვევაში მათ წინააღმდეგ რადიკალური ზომები იქნებოდა მიღებული. ხალხმა ულტიმატუმი არ შეასრულა. ხელისუფლებამ ძალის გამოყენება გადაწყვიტა და მლეღვარების აღვილას ფეხოსანთა ასეული და 15 მხედარი გაგზავნა. მაგრამ, როგორც ჩანს, ამას დიდი ეფექტი არ გამოუწვევია და აღმინისტრაცია იძულებული გამხდარა აჯანყების ჩასაქრობად ფეხოსანთა ნაწილების კიდეც ერთი როტა გამოეყო. «Но жители, — натекаямиза намесценикис танаשמемის მოხსენებაში,—вместо принесения повинования, удалились вовсе из селения и отправились толпами, из коих главная, со значком, в окрестные деревни подговаривать их к совместному сопротивлению неправильным, по их понятиям, требованиям начальства»³.

აჯანყებამ მოკლე დროში ზუგდიდის მაზრის სამი მეოთხედი ნაწილი მოიცილა და, დოკუმენტის ცოტა გადაჭარბებული ცნობით, იარაღის ქვეშ

¹ სინამდვილეში დებულება გლეხს მხოლოდ იმის უფლებას აძლევდა, რომ მას 9 წლის შემდეგ, დღიდან კანონის გამოცხადებისა, უარი ეთქვა ნადელზე (თუ იქ ეს მისთვის ხელსაყრელი იქნებოდა) და შეეწყვიტა გადასახადების გაღება მიწის პატრონის სასარგებლოდ (იხ. ი. ახალაია, საგლეხო რეფორმა სამეგრელოში, სოხუმი, 1958, გვ. 85, 151). დადიანის გლეხებმა კი, პირიქით, გადასახადებისაგან თავის დახსნა სანადელო ნაკვეთების შენარჩუნებით მოინდომეს.

² ЦГИА СССР, ф. 1368, оп. 21, д. 141, лл. 13—14 об.

³ იქვე, ფურც. 14.

20 ათასამდე კაცი დააყენა¹. გლეხებმა სენაკის მაზრის სოფლის მშრომელი მოსახლეობის ამხედრებაც სცადეს და ამ მიზნით ხსენებული ადგილისკენ აჯანყებულთა „ერთი დიდი პარტია“ გაიგზავნა. მოვლენები სწრაფად და სახიფათოდ ვითარდებოდა. საგონებელში ჩაეარდნილმა კავკასიის ადმინისტრაციამ ისევ გამოყო დამატებითი ძალები და ისინი თავად ჯორჯაძის მეთაურობით სამეგრელოსკენ გაისტუმრა. ჯორჯაძეს, ინსტრუქციის თანახმად, წესრიგი მშვიდობიანი გზით უნდა აღედგინა, მაგრამ თუკი ეს პრაქტიკულად შეუძლებელი იქნებოდა, მას უფლება ჰქონდა იარაღი გამოეყენებინა².

ქართველმა თავადმა თავისი რაზმის ერთი ნაწილი პოდპოლკოვნიკ პრინციხელმძღვანელობით აჯანყებულთა იმ პარტიას გამოადევნა, რომელიც სენაკის მაზრის მიმართულებით მიდიოდა. ის მას სოფ. ლეწურწუშეში წამოეწია. გლეხებმა თავი აარიდეს არათანაბარ შერკინებას და ღროებით მიმალვა არჩიეს, მაგრამ დამსჯელმა ექსპედიციამ მაინც შეძლო 100 მათგანის ხელში ჩაგდება. დღის მეორე ნახევარში გაფანტული ხალხი ისევ შეგროვდა, სამხედრო ნაწილების მიერ დაკავებულ სოფლის კანცელარიაში მივიდა და დაპატიმრებული ამხანაგების განთავისუფლება მოითხოვა. რაზმის უფროსმა პოდპოლკოვნიკმა პრინციხამაზე კატეგორიული უარი თქვა და აჯანყებულებს მორჩილებისკენ მოუწოდა, მაგრამ უშედეგოდ. 1876 წლის 17 ივნისს საქმე სისხლისმღვრელი შეტაკებით დასრულდა, რომლის დროსაც თავისუფლებისთვის მებრძოლთა რიგებს 48 კაცი გამოაკლდა — 18 მოკლულის და 30 დაჭრილის სახით³.

ამის შემდეგ აჯანყება დაღმავალი გზით წაიდა. გლეხებს ძალა არ ეყოთ ბრძოლის გასაგრძელებლად, მთავრობის ჯარებთან შემდგომი შებმა უპერსპექტივოდ გამოიყურებოდა. ამხედრებულმა სოფლებმა ფარხმალი დაყარეს. გრიგოლ დადიანის გლეხებმაც გადასახადი გადაიხადეს და მოღვაწეობის სრული მორჩილების პირობა დადვეს⁴. მალე „წესრიგი“ ზუგდიდის მთელ მაზრაში აღდგა.

ორი წლის შემდეგ, სახელდობრ 1878 წელს, აჯანყებამ იფეთქა კახეთში. მან მოიცვა, კერძოდ, ქიზიყის სოფლები, რომლებიც მთლიანად სახელმწიფო გლეხებით იყვნენ დასახლებულნი. გამოძიებისა და კავკასიის ადმინისტრაციის მიერ მოწყობილი სასამართლო პროცესის მანალებმა მაქსიმალური სიცხადით დაადგინა ხალხის აზვირთების ნამდვილი მიზეზები და საბაბი. სახელმწიფო გადასახადების სიმძიმე, აღპიანებისა და სატრანსპორტო საშუალებათა გაუთავებელი განრიგი, სასოფლო,

¹ ЦГИА СССР. ф. 1389, оп. 21, д. 141, ფურც. 16.

² იქვე, ფურც. 18.

³ იქვე, ფურც. 20—21.

⁴ იქვე, ფურც. 21—22.

სამაზრო და საგუბერნიო ხელისუფლების შეუზღუდველი თვითნებობა — აი რამ აიძულა ქიზიყის, ისედაც არასახარბიელო მატერიალურ მდგომარეობაში მყოფი მოსახლეობა იარაღი აეღო ხელში. ამასთან, უნდა აღინიშნოს ისიც, რომ ზემოთ ჩამოთვლილ ვალდებულებათა მთელი სიმძიმე კისერზე აწვა სწორედ უღარბეს გლეხებს, რომლებიც ისედაც ძლივს ახერხებდნენ ცხოვრება-არსებობას. რაც შეეხება კულაკებს, ისინი ქრთამითა და სხვადასხვა საჩუქრით თავს აღწევდნენ ფულადსა და ნატურალურ გადასახადებს, სახალხო რაზმებში სამსახურს, სატრანსპორტო საშუალებათა განრიგსა და სხვ. ყველა ეს უსამართლობა, რომელსაც ყოველთვის ჰქონდა ადგილი, განსაკუთრებით საგრძნობი გახდა 1877—1878 წლების რუსეთ-თურქეთის ომის დროს და მის მომდევნო ხანაში, როდესაც საერთაშორისო მდგომარეობის გართულებასთან დაკავშირებით სახალხო რაზმეულის ფორმირება იქნა გამოცხადებული. ამას ხმაამდლა ამბობდნენ კახეთის აჯანყების მონაწილე, პასუხისგებაში მიცემული გლეხები.

მოდრობის დასაწყისი და მსეღელობა შემდეგნაირად წარმოგვიდგება. 1878 წლის დასაწყისში სიღნაღის მაზრის სოფლებში გავრცელდა ხმები, რომ მთავრობა აპირებს სახალხო რაზმის შექმნას და რომ მამასახლისებმა მაზრის ადმინისტრაციის მითითებით ამ მიზნით უკვე შეადგინეს გასაწვევ პირთა სიებიო. ამ სიებიდან, ხმების თანახმად, კენჭის ყრით უნდა შეერჩიათ საჭირო რაოდენობა და რაზმში ჩაერიცხათ.

გლეხებმა, რომლებმაც ამას წინათ ღიძი ფიზიკური და მატერიალური მსხვერპლი გაიღეს, კატეგორიული უარი განაცხადეს ამაზე და ურმების გამოყვანაზეც. აღნიშნული ღონისძიების ბოიკოტირება აიხსნება, რა თქმა უნდა, არა იმით, რომ სიღნაღის მაზრის სოფლის მშრომელ მოსახლეობას არ სურდა მონაწილეობა მიეღო საქართველოს ისტორიული მტრის, სულთანის თურქეთის წინააღმდეგ ბრძოლაში, არამედ მრავალი სხვა გარემოებით, რომელთა შორის ერთ-ერთი მთავარი იყო ხალხისთვის სრულიად უცხო მილიციაში ჩარიცხვის კენჭისყრის წესი. გვითხარით რამდენ კაცს ითხოვთ ჩვენგან და მზად ვართ მოგცეთ ორჯერ და სამჯერ მეტიც, თანაც სულ დარჩეული ბიჭები, მაგრამ არა კენჭის ყრითო — გაიძახოდნენ თურმე აჯანყებული გლეხები¹. ისინი კატეგორიულად შოთხობდნენ სოფლის მამასახლისების მიერ თვითნებურად შედგენილ გასაწვევ პირთა სიების დაუყოვნებლივ მოსპობას.

მთავრობია განკარგულების საწინააღმდეგო პროტესტი იმითაც იყო გამოწვეული, რომ ამ უკუღმართაღ შედგენილი სიების წყალობით ბევრ ოჯახს უკანასკნელი მუშახელი ეცლებოდა და ამით საშუალება ესპობოდა

¹ „დროება“, 1878, № 114.

სრულად აედო 1878 წლის მოსავალი, რომელსაც ძალიან კარგი პირი უჩანდა. ეს შით უფრო იყო საყურადღებო და ანგარიშგასაწვევი, რომ თხუთმეტი ცუდმოსავლიანი წლების შედეგად კახეთის გლეხები უკიდურეს სიღარიბეში იყვნენ ჩავარდნილი. ისინი სამაზრო ხელისუფლებას თხოვდნენ მიეცათ მათთვის მოსავლის აღების საშუალება¹.

4 ივნისს დილით სოფ. ზემო მაჩხაანის გლეხებმა, რომლებმაც საკმაო რაოდენობით მოიყარეს თავი, ალყა შემოარტყეს მამასახლის დავით ბოსტოლანაშვილს და მას გასაწვევ პირთა სია მოსთხოვეს. ვერ მიიღეს რა დამაკმაყოფილებელი პასუხი², ისინი თავს დაესხნენ მას და ძლიერ სცემეს. ამ ამბების მსვლელობა-მიმდინარეობის დროს ხალხის მასა განუწყვეტლივ ყვიროდა, რომ ის მილიციონერებს კენჭის ყრით არამც და არამც არ მისცემდა. იმავე დღეს შემთხვევის აღვილზე ქალაქ სიღნაღის პრისტაჟის თანაშემწე პრაპორშჩიკი ჭანიევი გამოცხადდა და წესრიგის აღდგენა სცადა, მაგრამ უშედეგოდ. ამით გაბრაზებულმა ჭანიევმა თავის მხლებელს გზირ სოლომონ ბეჟაშვილს უბრძანა შეეპყრო ერთი, სხვაზე უფრო აქტიურად მოქმედი, ახალგაზრდა გლეხი, მაგრამ აზვირთებულმა მასამ ბრძანების სისრულეში მოყვანა ჩაშალა — ის თავს დაესხა გზირს, სცემა იგი და დაჭერილი ამხანაგი გაანთავისუფლა.

ზემო მაჩხაანში მომხდარმა მღელვარებამ საგონებელში ჩააგდო მაზრის აღმინისტრაცია. მან გადაწყვიტა 5 ივნისისათვის დანიშნული კენჭისყრა დროებით გადაედო იმ მიზნით, რომ ალაზნის მიდამოებში განლაგებული ჭარების უფროს გენერალ-მაიორ იოსებ ორბელიანისათვის კაზაკთა ერთი ასეული ეთხოვა და ამ ძალის დახმარებით შეედგინა სახალხო რაზმეულთა ლაშქარი. სიღნაღის მაზრის უფროსი გრაფი ტიზენჰაუზენი მართლაც ეწვია ხსენებულ გენერალს, რომელიც იმ დღეს (5 ივნისს) სტუმრად იმყოფებოდა თავად რევაზ ვაჩნაძესთან, სოფელ ბაკურციხეში, ის და მისი თანმხლები პირები — თარჯიშანი ლევან ანდრონიკაშვილი, დამცველი ბასიკო ბოსტოლანაშვილი — ბაკურციხის გზაზე მდებარე ანაგის ხეობაში შეხვდნენ ვაჭირიდან, მაშნაარიდან, საქობოდან და სხვა სოფლებიდან მომავალ გლეხთა დიდ ჯგუფს. აჩანებულებმა ალყა შემოარტყეს ტიზენჰაუზენს და გამოუცხადეს, რომ კახეთის მოსახლეობა მზადაა ქუღზე კაცი მისცეს ხელისუფლებას, მაგრამ კატეგორიულად წინააღმდეგია „სალდათობისა“ და სახალხო ლაშქრის კენჭის ყრის წესით შედგენისა. გრაფმა სცადა აბოზოქრებული მასის დაშოშმინება, მაგრამ უკანასკნელნი არამცთუ არ დაცხრნენ, არამედ, პირიქით, კიდევ უფრო განარისხდნენ; ისინი თავს დაესხნენ მამასახლის მკედლიშვილს, ჩამოგლიჯეს

¹ «იზიუ». 1878, № 309.

² მამასახლისმა მათ მისცა გასაწვევ პირთა შავად დაწერილი სია. გლეხებმა კი მოითხოვეს თეთრი, გადათეთრებული, რომელიც ამ დროისთვის უკვე სამაზრო სამმართველოში იყო გაგზავნილი.

განსხვავების ნიშნები და სცემეს. იგივე ბედი ელოდა მაზრის უფროსსაც, მაგრამ მან, ისარგებლა რა აჯანყებულთა მთელი ყურადღების მქედლი-შვილზე გადატანით, გაქცევა მოასწრო და ბაკურციხეში ამოყო თავი. აქ, თავად რევაზ ვაჩნაძის სახლში, გრაფი ზემოხსენებულ იოსებ ორბელიანს, ინჟინერ ლუკინციკის, მომრიგებელი მოსამართლის თანაშემწეს ხოსროევსა და დრაგომიროვს, თბილისის საოლქო სასამართლოს პროკურორის თანაშემწეს გუდიმა ლევკოვიჩსა და პორუჩიკ კურილოს შეხვდა.

მაზრის უფროსს ჯერ სანახევროდაც არ დაემთავრებინა თხრობა მომხდარ ამბებზე, რომ ვაჩნაძის სახლს მიუახლოვდა არაჩვეულებრივი სისწრაფით მზარდი, მალე 5 ათას კაცამდე გამრავლებული, აჯანყებულთა მასა. გენერალმა ორბელიანმა, რომელმაც მღელვარების მონაწილეთა გაფანტვა სამხედრო ძალის გამოყენებით გადაწყვიტა, ტელეგრამის ტექსტი შეადგანა ბაკურციხეში კაზაკთა ასეულის გამოგზავნის შესახებ. მაგრამ გლეხებმა ჩაშალეს ამ გეგმის სისრულეში მოყვანა. მათ ხელთ იგდეს ტელეგრამა და ნაკუწ-ნაკუწად აქციეს ის¹. ხალხი შეიარაღებული ჯობებით, კომბლებითა და ხანჭლებით გარს შემოერტყა ვაჩნაძის სახლს. ისინი მოითხოვდნენ ტიუნენჰაუზენის, ჯანიევის, მაზრის თავად-აზნაურთა წინამძღოლის ზაქარია ანდრონიკაშვილისა და სხვათა გაცემას. ქალი და კაცი, დიდი და პატარა, მოხუცი და ახალგაზრდა — ყველა ერთხმად ყვიროდა, რომ მათ ძარცვავენ და ანადგურებენ და რომ ისინი კატეგორიული წინააღმდეგი არიან მილიციის კენჭის ყრით შედგენისა.

გენერალ ორბელიანის, რევაზ ვაჩნაძისა და სხვათა ყოველგვარი ცდა — დაეშალათ მოზღვაებული ხალხი — უშედეგო აღმოჩნდა. აჯანყებულებმა, რომლებმაც არაგაბელული მოქმედებისათვის ქალების საყვედური დაიშასხურეს, დაკარგეს მოთმინების უნარი — ისინი შეიჭრნენ ვაჩნაძის სახლში იმ შიზნით, რომ ანგარიში გაესწორებინათ ყველასათვის, ვინც მათ ავიწროებდა და სულს ხდიდა. «Наконец, — ნათქვამია მომდევნო ამბების შესახებ საბრალმდებლო დასკვნაში, — толпа хлынула в комнату, где находился уездный начальник, граф Тизенгаузен, и потребовала от него призывные списки. Когда же он объявил, что у него призывных списков при себе нет, его стали жестоко бить палками. Удары переносились и на лиц, которые защищали его, именно переводчика князя Андроникашвили, всадника Бостоганашвили, князя Сосо Вачнадзе (რევაზ ვაჩნაძის შვილი — ავტ.) и рядового Мирошникова (დენშიკა კნ. ორბელიანი). Наступило (не-

¹ ჩვენ, — ყვიროდნენ აჯანყებულები, — მზად ვართ ვემსახუროთ მეფეს, ყველა თანახმაა გაყვეს თქვენს მიერ ნაჩვენებ გზას, მაგრამ კენჭის ყრით მილიციონერებს ვერ მოგვემთ — ვემსახურებთ ისე, როგორც მსახურობდნენ ჩვენი მამები და პაპები («Обзор», 1878, № 309).

которое) затишье. Граф Тизенгаузен объявил, что если они успокоятся по получении призывных списков, то он даст им бумагу в Сигнах, к своему помощнику, который, по предъявлении её выдаст им подлинные призывные списки. Толпа успокоилась. Тизенгаузену дали кусок бумаги и чернила. Но когда он стал писать записку, её вырвали у него, крича, что это им не нужно, а нужны самые списки. При этом осмотрели лежащий там портфель кн. Орбеллиани и, не найдя в нем никаких списков, снова стали наносить побои графу Тизенгаузену, вытащили его на балкон, а оттуда на улицу, в массу народа, продолжая наносить побои. Здесь, подняв его на ноги, стали требовать призывные списки. Тогда он предложил отправиться с ним в Сигнах, обещая дать там списки. Толпа на это согласилась. Графа посадили на почтовую тройку и значительная часть пошла с ним по направлению в Сигнах. Но в Анаге большинство толпы отстало, а передовые требовали, чтобы он дальше не ехал, причем один . . . громко кричал и угрожал палкой. Наконец, в толпе произошла ссора, которой граф Тизенгаузен воспользовался и уехал в Сигнах»¹.

სიღნაღის მახრის უფროსის ბედი გაინაწილა გენერალ-მაიორ ორბელიანმაც. აჯანყებულებმა ის აიგანზე გამოათრიეს, იქიდან ეზოში ჩაიყვანეს და საშინლად სცემეს, მას ხის ფეხი გაუტეხეს. საგრძნობლად დაზარალდნენ აგრეთვე პროკურორის ამხანაგი ლევკოვიჩი, პორუჩიკი კურილო და სხვები.

აბოზოქრებული ხალხი გაუსწორდა არა მარტო მისთვის საძულველ ადამიანებს, არამედ ერთიანად დალეწა რევან ვაჩნაძის ოჯახის ძვირფასი ავეჯი და ჭურჭლეულობა, დაამტერია ბროლის ლუსტრა, თან წაიღო ხმლები, დამბაჩები, რევოლვერი და თოფები, დაამსხვრია მინები, ჩაამტერია კარები და ფანჯრები, გააფუჭა განჯინები, სკივრები და სხვა ნივთები. ერთი სიტყვით, რევან ვაჩნაძის ოჯახი გაძარცვეს, მას დიდი მატერიალური ზარალი მიაყენეს, რომელიც სპეციალურმა კომისიამ სამი ათას მანეთად შეაფასა².

თავადის სახლთან დილაადრიანად შეკრებილმა გლეხებმა³, დღის პირველი საათისათვის ნელ-ნელა პირი სახლისკენ იბრუნეს. გზაში ისინი თავს დაესხნენ კარდანახელ მამასახლის სამადაშვილის სახლს და დაამტვრიეს ყველაფერი, რაც კი ხელთ მოხვდათ. ასევე მოექცნენ აჯანყე-

¹ «Обзор», 1878, № 309.

² იქვე.

³ მოვაგონებთ შკითხველებს, რომ ყოველივე ეს ერთი დღის, სახელდობრ 5 ივნისის, განმელობაში ხდებოდა.

ბულნი ანაგის, ვაჭირისა და საქობოს სტაროსტებს მკედლიშვილს, ათაბე-გოვსა და ფხოველიშვილს¹. ნაკლებად არც მედუქნე სანდრო ჭრელაშვი-ლი (სოფ. ანაგა) დაზარალებულა. მასზე შური იძიეს იმის გამო, რომ ის, ადგილობრივი ხელისუფლების თხოვნით, მონაწილეობდა, თურმე, გასა-წყევ პირთა სიების შედგენაში².

ამრიგად, გაუსწორდა რა ყველა მტარვალს და ჩაშალა რა ფაქტიურად სახალხო ლაშქრის შექმნის საქმე. აზვირთებული ხალხი დაიშალა. დაიწყეს აჯანყების მონაწილეთა დაჭერა, ამოქმედდნენ საგამომძიებლო ორგა-ნოები. 1878 წლის 15 ნოემბერს ქალაქ სიღნაღში დაიწყო სასამართლო პროცესი, რომელმაც, როგორც ზემოთაც აღვნიშნეთ, გამოავლინა სახალ-ხო მოძრაობის ნამდვილი მიზეზები. პასუხისგებაში მიცემული გლეხები ეჭვიმუტანელი ფაქტებით ლაპარაკობდნენ თავიანთ მძიმე სოციალ-ეკო-ნომიურ მდგომარეობაზე და გაბედულად ამხელდნენ სასოფლო, სამაზრო და საგუბერნიო ადმინისტრაციის თვითნებობასა და თავგასულობას. თვით სახელმწიფოებრივი ბრალმდებელიც კი იძულებული იყო აღენიშნა, რომ აჯანყება მოხდა იმ არაჩვეულებრივი ბოროტმოქმედების გამო, რომელსაც მიმართავენ ხელისუფლების წარმომადგენლები გადასახადების აკრეფის, სახალხო რაზმების შედგენისა და მოსახლეობიდან სატრანსპორტო სა-შუალებათა გამოყენის დროს.

სამხედრო-საველე სასამართლოს გადაწყვეტილებით პასუხისგებაში მიცემული 20 გლეხიდან³ თერთმეტს⁴ 15 წლის კატორღა მიესაჯან⁵.

კახეთისა და საერთოდ საქართველოს სხვა კუთხის სახელმწიფო გლე-ხებს, როგორც მოსალოდნელიც იყო, არც მერე შეუწყვეტიათ ბრძოლა მიწისა და თავისუფლებისათვის, მაგრამ ამაზე არ შეეჭვრდებით, რადგა-ნაც დაინტერესებულ შკითხველს სათანადო მასალა შეუძლია ნახოს სახა-ზინო გლეხებისადმი მიძღვნილ ჩვენ მიერ ადრე გამოცემულ მონოგრა-ფიაში⁶.

¹ ფხოველიშვილი გლეხების მიერ მიყენებულ მატერიალურ ზარალს 450 მანეთად ფასებდა («Обзор», 1878, № 309).

² სანდრო ჭრელაშვილს დუქანში აჯანყებულებს, მისივე მოწმობით, დაუმტკრევიათ ჭურჭილი, დაუღვრიათ ღვინო და არაყი, გაუფუჭებიათ ტყეები და სხვ. («Обзор», 1878, № 319).

³ ესენი იყვნენ: დიმიტრი კუდაშვილი, თომა მირიანაშვილი, გეგენა დარჩიაშვილი, გეგენა ალხანაშვილი, ილია მირიანაშვილი, ილია მკედლოშვილი, ილია ნალბანდიშვილი, სესია მეყუდიშვილი, იასე ნარეკლიშვილი, გეგენა სვიმონიშვილი, გაბრო კობახიძე, ნოდარ ხიშიაშვილი, ილია კვირიკაშვილი, მელანია ხელაშვილი, პეპე დავითაშვილი, საბედა გულ-ხადარაშვილი, გიორგი შიოშვილი, დარიკო მართაშვილი, ჯანდიერ სიფერაშვილი და ივანე ზაყაშვილი.

⁴ მათ შორის ორ ქალს — საბედა გულხადარაშვილს და მელანია ხელაშვილს. «Обзор», 1878, № 311.

И. Г. Антелава, Государственные крестьяне Грузии в XIX веке, т. II.

**§ 1. ნაროდნიკობის (ხალხოსნობის) სოციალურ-პოლიტიკური არსი
და ისტორიული მნიშვნელობა**

ნაროდნიკობა, ლენინის აზრით, არის შეხედულებათა სისტემა. რომელსაც შემდეგი სამი ძირითადი ნიშანი ახასიათებს¹: 1. კაპიტალიზმის გამოცხადება რუსეთის სინამდვილისათვის დაცემულობად, სოციალურ-პოლიტიკურ რეგრესად, 2. რუსეთის ეკონომიური წყობილებისა და მისი განვითარების გზების სპეციფიკურობის აღიარება, და 3. ინტელიგენციისა და ქვეყნის იურიდიულ-პოლიტიკურ დაწესებულებათა კავშირის უარყოფა საზოგადოებრივი კლასების მატერიალურ ინტერესებთან. ჩამოთვლის რა ამ ნიშნებს, ვ. ი. ლენინი ამასთანავე ხაზს უსვამს სხვადასხვა მიმდინარეობას შორის არსებულ განსხვავებას, მაგრამ თანაც მიუთითებს, რომ შის შიერ დასახელებული ნიშნები მეტ-ნაკლებად საერთოა ხალხოსნური მსოფლმხედველობის ყველა სახისა და განშტოებისათვის.

ჩერდება რა თითოეულ მათგანზე ცალ-ცალკე, ვ. ი. ლენინი, კერძოდ, პირველ ნიშანთან დაკავშირებით აღნიშნავს, რომ ნაროდნიკებმა განსხვავებით 60-იანი წლების განმანათლებლებისა და რევოლუციონერ-დემოკრატებისაგან, რეფორმის შემდეგდროინდელი რუსეთის სოციალ-ეკონომიური ცხოვრების კაპიტალისტური გზით განვითარება უბედურებად, დიდ შეცდომად და ქვეყნისათვის განკუთვნილი გზიდან სამწუხარო გადახვევად აღიარეს. „როგორც კი დაისვა საკითხი რუსეთში კაპიტალიზმის შესახებ, — წერს ვ. ი. ლენინი, — სულ მალე გამოიჩვენა, რომ ჩვენი ეკონომიური განვითარება კაპიტალისტურია, და ნაროდნიკებმა ეს განვითარება გამოაცხადეს რეგრესად, შეცდომად, იმ გზიდან გადახვევად, რომელსაც თითქოს ერის მთელი ისტორიული ცხოვრება გვიკარნახებდა, იმ გზიდან გადახვევად, რომელიც თითქოს ნაკურთხი იყო საუკუნეობრივი ტრადიციებით და სხვ. და ა. შ. არსებული საზოგადოებრივი განვითარები-

¹ ვ. ი. ლენინი, თხზ., ტ. 2, გვ. 481.

სადმი განმანათლებელთა მხურვალე რწმენის ნაცვლად გაჩნდა მისდამი უნდობლობა, ისტორიული ოპტიმიზმისა და სულიერი სიმბნევის ნაცვლად—პესიმიზმი და სასოწარკვეთილება; ეს პესიმიზმი და სასოწარკვეთილება დამყარებულია იმაზე, რომ, რაც უფრო შორს წავა საქმე ისე, როგორც ახლა მიდის, მით უარესი, მით უფრო ძნელი იქნება ახალი განვითარებით წამოყენებული ამოცანების გადაწყვეტაო; ჩნდება მოწოდებანი «შევაფერხოთ» და «შევაჩეროთ» ეს განვითარებაო. ჩნდება თეორია, რომ ჩამორჩენილობა რუსეთის ბედნიერებააო და სხვ. ნაროდნიკული მსოფლმხედველობის ყველა ამ თვისებას «მემკვიდრეობასთან» (ე. ი. 60-იანი წლების რევოლუციონერ-დემოკრატებთან — ავტ.) არათუ საერთო არაფერი აქვს, არამედ პირდაპირ ეწინააღმდეგება მას¹.

ნაროდნიკობის მეორე დამახასიათებელი ნიშანი, როგორც ზემოთაც აღვნიშნეთ, არის რწმენა რუსეთის თვითმყოფობისადმი, გლეხისა და თემის იდეალიზაცია, ამ უკანასკნელის ქვეყნის ბედნიერებად და მხსნელ ძალად გამოცხადება. ხალხოსნების აზრით, რუსეთს თუმცა აკლდა ცივილიზებული კაცობრიობის ესა თუ ის მხარე, მაგრამ სამაგიეროდ ის მოწოდებული იყო მსოფლიოსათვის ეჩვენებინა მეურნეობის გაძლიერის ახალი (თემური) წესები. კაპიტალიზმისა და მისი გამოვლინების ის ანალიზი, რომელიც დასავლეთ ევროპის მოწინავე საზოგადოებრივ აზრს ჰქონდა გაკეთებული, „კუთხეული“ რუსეთისათვის სრულიად მიუღებლად იქნა აღიარებული. კიდევ მეტი — ნაროდნიკები, ლენინის თქმით. ყოველ ღონეს ხმარობდნენ იმისათვის, რათა თვალი დაეხუჭათ და რეფორმის შემდეგდროინდელი ხანის ქვეყნის ეკონომიური განვითარებიდან არ გაეკეთებინათ ის დასკვნები, რაც იქიდან სავსებით ბუნებრივად გამომდინარეობდა².

დასასრულ, ნაროდნიკული მიმდინარეობის მესამე დამახასიათებელი თვისებაა ინტელიგენციის და ქვეყნის იურიდიულ-პოლიტიკურ დაწესებულებათა კავშირის უგულვებელყოფა საზოგადოებრივი კლასების მატერიალურ ინტერესებთან³. სხვაგვარად რომ ვთქვათ, ხალხოსნებისთვის უცხო იყო სოციალური მოვლენების მატერიალისტური ახსნა, რაც მათ საფუძველს აძლევდა ინტელიგენცია ისეთ ძალად მიეჩნიათ, რომელსაც შეეძლო ისტორიული განვითარების სხვა გზით წარმართვა⁴. ამ იდეალისტურმა თვალსაზრისმა წარმოშვა „აზროვნებისა და მსჯელობის ის განსა-

¹ ე. ი. ლენინი, თხზ., ტ. 2, გვ. 643—644.

² იქვე, გვ. 645.

³ შ. ლევინის მოწმობით, ლენინი იურიდიულ-პოლიტიკურ დაწესებულებაში გულსხმობდა თვითმპყრობელობასა და მის ინსტიტუტებს (Ш. Л е в и н, «Общественное движение в России...» გვ. 299, სქოლიო).

⁴ ე. ი. ლენინი, თხზ., ტ. 2, გვ. 639.

კუთრებული მანერა“, რომელიც ესოდენ გაზვიადებით ახასიათებდა ინტელიგენციის როლსა და ადგილს საზოგადოებრივ ცხოვრებაში. სწორედ აქედან გამომდინარეობდა ნაროდნიკების თეორია „ბრბოსა და გმირების“, „კრიტიკულად მოაზროვნე პირების“ შესახებ. ამ თეორიის ფუძემდებელი პეტრე ლავროვი წერდა: «Как ни мал прогресс человечества, но и то, что есть, лежит исключительно на критически-мыслящих личностях: без них он безусловно невозможен»¹. და კიდევ: «Поговорим об этих личностях, единственных орудиях человеческого прогресса. Каков бы он ни был, он зависит от них»².

ამრიგად, უარყოფილია საზოგადოებრივი განვითარების ყოველგვარი ობიექტური კანონზომიერება.

ასეთსავე იდეალისტურ თვალსაზრისზე იყო დაფუძნებული მეორე ცნობილი ნაროდნიკების მიხეილ ბაკუნინის ანარქისტული შეხედულებანიც. ბაკუნინის აზრით, სახელმწიფო, რომელსაც ის უდიდეს ბოროტებად თვლიდა, სოციალური რევოლუციის წარმატებით დამთავრების უმალ უნდა მოსპობილიყო. მას, როგორც მცდარ მეთოდოლოგიურ პოზიციებზე მდგარ მოაზროვნეს, არ ესმოდა, რომ სახელმწიფოს მოსაბოძა მთავრობის დეკრეტით არ შეიძლებოდა და რომ ამისთვის პირველ რიგში მისი წარმომშობი საზოგადოებრივ-ეკონომიური პირობების შეცვლა-ლიკვიდაცია იყო საჭირო³.

ნაროდნიკები ამ მხრივ განსხვავდებოდნენ 60-იანი წლების რევოლუციონერ-დემოკრატებისაგან, რომელნიც ისტორიის მამოძრავებელ ძალად „კრიტიკულად მოაზროვნე პირებს“ კი არ თვლიდნენ, არამედ ხალხს, მის ფართო მასებს.

ასეთია ნაროდნიკების, როგორც შეხედულებათა გარკვეული სისტემის ძირითადი ნიშნები.

ყველა აქ ჩამოთვლილ ნიშანს მეტ-ნაკლებად ქართველ ხალხოსნებთანაც ვპოულობთ, თუმცა არა იმ უკიდურესობამდე მისული სახით, რაც რუსი მოღვაწეებისათვის იყო ღამახასიათებელი. კაპიტალიზმის თავყანისმცემლები არც ქართველი ხალხოსნები ყოფილან, მაგრამ ეს საზოგადოებრივ-ეკონომიური ფორმაცია მათ ზელადებით არასოდეს არ უარყვიათ. თემს შათი წარმოდგენითაც დიდი მნიშვნელობა ჰქონდა მომავალი სამართლიანი წყობილების დამყარების საქმეში, მაგრამ მისი გაზვიადებული შეფასება მათთვის უტეხო იყო. ქართველი ხალხოსნების თავისებურებას წარმოადგენდა აგრეთვე ეროვნული საკითხისათვის შეღარებით

¹ П. Л а в р о в, Исторические письма, С.-Петербург, 1905, გვ. 95.

² იქვე, გვ. 94—95.

³ М. Б а к у н и н, Избранные сочинения, т. I, «Государственность и анархия», 1919, გვ. 237—238.

დიდი ადგილის დათმობა, მოქმედების ტერორისტული ტაქტიკის თუ სრული უარყოფა არა, ყოველ შემთხვევაში მისი შესამჩნევად უკანა პლანზე გადაწევა, მათი პროპაგანდის გაცილებით მეტი წარმატება გლახთა წრეში, ვიდრე რუსი ნაროდნიკების საქმიანობისა და სხვ.¹

გასარკვევია საკითხი, თუ როგორი იყო ამ მიმდინარეობის კლასობრივი არსი. ნაროდნიკების ერთი თვალსაჩინო წარმომადგენელი ნ. ზლატოვრატსკი ამასთან დაკავშირებით წერდა: ნაროდნიკი რუსეთის მშრომელი მასების, პირველ რიგში კი გლეხობის, ინტერესების დამცველი და გამომხატველი იყო². მარქსიზმის კლასიკოსებიც ძირითადად მხარს უჭერენ ჩვენთვის საინტერესო მიმდინარეობის კლასობრივი არსის ზემომოტანილ განსაზღვრას. ვ. ი. ლენინი, მაგალითად, პირდაპირ მიუთითებდა, რომ „ნაროდნიკობა არის გლეხური დემოკრატიის იდეოლოგია (შეხედულებათა სისტემა) რუსეთში“³. გლეხური დემოკრატია — აი, ლენინის აზრით, ნაროდნიკული დოქტრინის „ერთადერთი რეალური შინაარსი და საზოგადოებრივი მნიშვნელობა“⁴.

სწორედ ის გარემოება, რომ ნაროდნიკები გლეხური დემოკრატიის მებრძოლ ბირთვის წარმოადგენდნენ, საფუძველს აძლევდა ლენინს შედარებით მაღალი შეფასება მიეცა მათი საქმიანობისათვის. კარგად ხედავდა რა ნაროდნიკული თეორიების აშკარა რეაქციულ მხარეებს⁵, ის ამასთანავე მკაცრად უსაყვედურებდა ყველა იმათ, ვინც ლალატობდა ისტორიულ ჭეშმარიტებას და ვერ ხედავდა ნაროდნიკების დამსახურებას რუსეთის რევოლუციური მოძრაობის ისტორიაში.

თუ როგორ მაღალ შეფასებას აძლევდა ვ. ი. ლენინი 70-იანი წლების ნაროდნიკებს; იქიდანაც ჩანს, რომ ის რუსეთის სოციალ-დემოკრატიის წინამორბედად თვლიდა არა მარტო გერცენს, ბელინსკის და ჩერნიშევსკის, არამედ „70-იანი წლების რევოლუციონერთა ბრწყინვალე პლეადასაც“⁶.

§ 2. ნაროდნიკობის წარმოშობის ძირითადი მიზეზები

მარქსიზმ-ლენინიზმის კლასიკოსებს არაერთხელ აღუნიშნავთ, რომ ნაროდნიკობის, როგორც იდეური მიმდინარეობის, წარმოშობა რუსეთის

¹ ქართველი ხალხოსნების თავისებურებათა შესახებ იხ. ზ. შველიძის „რევოლუციური ხალხოსნური მოძრაობის ისტორიიდან ამიერკავკასიაში (XIX საუკუნის 60-იანი წლები და 70-იანი წლების დამდეგი)“, 1964, გვ. 43—48.

² Н. З л о т о в р а т с к и й, Открытое письмо А. Н. Пыпину, «Русские ведомости», № 48, 1884, გვ. 3.

³ ვ. ი. ლენინი, თხზ., ტ. 18, გვ. 430.

⁴ იქვე.

⁵ იქვე, გვ. 269.

⁶ იქვე, ტ. 5, გვ. 342.

სოციალ-ეკონომიური ცხოვრების შედარებით ჩამორჩენილობით იყო განპირობებული. „ისეთ ქვეყანაში, როგორც თქვენი ქვეყანაა, — სწორდა ენგელსი პლენაროვს 1895 წლის 26 თებერვალს, — სადაც თანამედროვე მსხვილი მრეწველობა დამყარებულია პირველყოფილ გლეხურ თემზე და სადაც ერთდროულად წარმოდგენილია ცივილიზაციის ყველა შუალედი სტადიები, ისეთ ქვეყანაში, რომელიც გარშემორტყმულია დესპოტიზმის მიერ აღმართული მეტ-ნაკლებად მყარი ინტელექტუალური ჩიხური კედლით, გასაკვირი არაა იდეათა ყოვლად უცნაური და გაუგონარი კომპანაციების წარმოშობა... თანდათანობით, ქალაქების ზრდასთან ერთად, ნიჭიერ ადამიანთა იზოლირება გაქრება და მასთან ერთად გაქრება აგრეთვე ის იდეური ცდომილებანიც, რომლებიც გამოწვეულია მართლობით, შემთხვევითი ცოდნის უსისტემობით“¹.

იგივე აზრია განვითარებული ლენინის მთელ რიგ შრომებში. ასე მაგალითად, ნაშრომში „ნაროდნიკობის ეკონომიური შინაარსი“ პირდაპირაა მითითებული, რომ ნაროდნიკული მიმდინარეობის აღმოცენება გამოწვეული იყო წვრილ მწარმოებელთა კლასის დომინირებით რეფორმის შემდეგი ხანის რუსეთში². ამასვე იმეორებს ლენინი თავის მეორე ნაწარმოებში „წვრალბურჟუაზიული და პროლეტარული სოციალიზმი“. „რუსეთის ჩამორჩენილობა, — წერს ის, — ბუნებრივად ხსნის სოციალიზმის სხვადასხვა ჩამორჩენილ მოძღვრებათა დიდ სიმყარეს ჩვენს ქვეყანაში“³.

აქ გააოთქმული სახელმძღვანელო მოსაზრებები სავსებით უდგება საქართველოს სინამდვილესაც. მართალია, ბატონყმობის გაუქმების შემდეგ, ჩვენში, ისე როგორც რუსეთის შიდა გუბერნიებში, კაპიტალისტური ურთიერთობა შედარებით ინტენსიურად იკავავდა გზას, მაგრამ მაინც ძლიერ იგრძნობოდა საფაბრიკო-საქარხნო მრეწველობის, ვაჭრობის, ქალაქების და ქალაქური ცხოვრების განვითარების დაბალი ღონე. რეფორმის შემდეგდროინდელ პერიოდში საქართველოს სოციალ-ეკონომიური ცხოვრებისათვის დამახასიათებელი იყო ფეოდალურ-ბატონყმური ფორმაციის ნაშთების უხვად არსებობა (რომელთა შორის მთავარი იყო მიწის უდიდესი ფონდის მემამულეთა ხელში დარჩენა). გლეხური მეურნეობის არაინტენსიური ხასიათი, უშუალო მწარმოებელი კლასების უკიდურესი სიღატაკე, მათი მკაცრი ექსპლოატაცია პრივილეგირებულ წოდებათა და სახელმწიფოს მხრივ და სხვ.

საქმეში კარგად ჩახედული ნიკო ნიკოლაძე რეფორმის შედეგად შექმნილ ურთიერთობას ახალ ბატონყმობას უწოდებდა და მას ძველ ბა-

¹ კ. მარქსის და ფ. ენგელსის მწერ-მოწერა რუს პოლიტიკურ მოღვაწეებთან, თბ., 1955, გვ. 425—426.

² ვ. ი. ლენინი, თხზ., ტ. 1 გვ. 375.

³ იქვე, ტ. 9, გვ. 408.

ტონეობასთან შედარებით უფრო მკაცრად მიიჩნედა¹. და, მართლაც, ფაქტიური მასალა, რომელიც ჩვენ გავაჩინია, ადასტურებს აქ გამოთქმული აზრის სისწორეს, სახელდობრ იმას, რომ რეფორმის შემდეგდროინდელი იურიდიულად თავისუფალი ქართველი გლეხის ეკონომიური მდგომარეობა მეტად მძიმე და სავალალო იყო. მას უმიწობა და ძველი ურთიერთობის ნაშთების სიუხვე ტანჯავდა.

ძირითადი მწარმოებელი კლასის—გლეხობის—შრომისა და ცხოვრების ესოდენ მძიმე პირობები, რაც, როგორც უკვე აღვნიშნეთ, ბატონყმური ურთიერთობის ნაშთების ჭარბად შემორჩენით იყო გამოწვეული და რაც საგრძნობლად აფერხებდა ქვეყნის სოციალ-ეკონომიურ განვითარებას, საგონებელში აგუებდა იმდროინდელ ქართველ ახალგაზრდობას. ის გულწრფელად თანაუგრძნობდა სოფლის მშრომელ მოსახლეობას და ეძებდა გზებსა და საშუალებებს მისი მდგომარეობის შესამსუბუქებლად. სწორედ ამ ძიებამ მოწინავე ინტელიგენციის ერთი ნაწილი ხალხოსნობამდე მიიყვანა და მისი ღროშის ქვეშ დააყენა.

ქართული ხალხოსნური მოძრაობის განმსაზღვრელი ფაქტორების შესწავლისას მკვლევარები სამართლიანად მიუთითებდნენ გასული საუკუნის 60—70-იანი წლების რუსული საზოგადოებრივი აზრის გავლენაზე. გერცენის, ღობროლიუბოვის, ჩერნიშევსკის, ლავროვის, ბაკუნინის და სხვათა შოლვაწობა და ნააზრევი ჩვენში ხალხოსნური იდეოლოგიის გაფორმების ერთ-ერთ მნიშვნელოვან წყაროს წარმოადგენდა. შესასწავლი შიშღინარეობის მიმდევარი ქართველი ახალგაზრდობა დიდი პატივისცემითა და სიყვარულით ეკიდებოდა მათ. ამის საილუსტრაციოდ შეიძლება დავიმოწმოთ ალექსანდრეს სამასწავლებლო ინსტიტუტის ყოფილი აღზრდილის გ. უთურგაულის 1873 წლის 23 ოქტომბრის წერილი პეტერბურგის სასულიერო აკადემიის სტუდენტ შიო შიუკაშვილისადმი, რომლის შინაარსი აქ ქანდარმერიის თარჯიმნის სიტყვებითაა გადმოცემული. «В заключение, — წერს ქანდარმერიის მოხელე, — автор письма просит Шно Шнукова сообщить подробности об академической жизни учащихся, образе мыслей их, понятий и идей и о том, старые ли эти идеи или новые. Далее говорится в этом письме, что он слышал, что будто бы в Петербург приехал Чернышевский и просит уведомить правда это или нет. Ужели ни разу не встретился с этим святым человеком и не опишешь? что ты узнаешь об литераторах и об эмигрантах — обо всем в подробности напиши ко мне»².

¹ ნ ი კ ო ნ ი კ ო ლ ა ძ ე, გლეხთა განთავისუფლება საქართველოში, რჩეული ნაწერები, ტ. 1, თბ., 1930, გვ. 182—183.

² ЦГИА СССР, ф. 7, д. 10, л. 105. მომყავს გ. მეგრელიშვილის ნაშრომიდან «Грузинская общественно-экономическая мысль...», т. 1, გვ. 430.

ცნობილი ქართველი რევოლუციონერი და საზოგადო მოღვაწე დავით კეზელი მწუხარებას გამოთქვამდა იმის გამო, რომ მასწავლებელთა ერთი ნაწილი ცდილობდა აღეზარდა მომავალი მოლჩალინები და არა ჩერნიშევსკები, ნეჩაევები და მათი მსგავსი ადამიანები¹. პოლკოვნიკ ესაძეს კეზელის დაკითხვის ოქმში აღნიშნული აქვს, რომ პატიმარი საერთოდ მოხიბლული იყო ჩერნიშევსკის ნაწერებით და განსაკუთრებით კი მისი რომანით „რა ვაკეთოთ?“². მისივე მოწმობით, დავით კეზელს ხელთ ჰქონია „აღმაშფოთებელი“ ხასიათის პროკლამაცია „ახალგაზრდა რუსეთი“³. სოფრომ მგალობლიშვილის დასტურით კი რუსეთის მთელ იმპერიაში, მათ შორის, ცხადია, საქართველოშიც, ფართოდ ყოფილა გავრცელებული და დიდი პოპულარობა ჰქონია პეტრე ლავროვის ყურნალ „ვპერიოდს“, და მის „ისტორიულ წერილებს“, ბაკუნინის საპროგრამო ხასიათის ნაშრომებს და სხვა განთქმულ მოღვაწეთა შემოქმედების ნიმუშებს⁴. უფრო მეტიც, ყველა მოწინავე ქართველ ახალგაზრდას დასახელებული რევოლუციონერ-დემოკრატებისა და ნაროდნიკების სახელი ჰქერებია ენაზე⁵.

რევოლუციური მოძრაობის გაშლა-განვითარებას ჩვენში პარიზის კომუნამაც შეუწყო ხელი, რომელსაც ალტაცებით შეხვდა რუსეთისა და საქართველოს ინტელიგენცია. საყოველთაოდ ცნობილია, მაგალითად, ილია ჭავჭავაძის ლექსი, მიძღვნილი ამ მსოფლიო-ისტორიული მნიშვნელობის მოვლენისადმი. მასში მკაფიოდ ჩანს ავტორის გულწრფელი თანაგრძნობა და სიმპათიები საფრანგეთის მშრომელების თავგანწირული ბრძოლისადმი. იგივე ითქმის ნ. ნიკოლაძის, ს. მესხისა და გაზეთ „დროების“ ფურცლებზე დაბეჭდილ მრავალ სხვა კომუნის თემაზე დაწერილ სტატიებზედაც⁶. მოვლენის ძლიერ გავლენაზე ქართული საზოგადოებრივი აზრის შემდგომ განვითარებაზე⁷.

დასასრულ, შეუძლებელია საგანგებოდ არ აღინიშნოს ჩვენი რევოლუციონერ-დემოკრატების ილია ჭავჭავაძის, აკაკი წერეთლის, ნიკო

¹ ЦГИА СССР, ф. 7, д. 10, л. 105. მომყავს გ. მეგრელიშვილის ნაშრომიდან «Грузинская общественно-экономическая мысль...», გვ. 430.

² იქვე, ფურც. 31, იქვე.

³ იქვე, ფურც. 48—49, იქვე, გვ. 430—431.

⁴ ს. მგალობლიშვილი, მოგონებანი, თბ., 1938, გვ. 68. შდრ. შ. დავითაშვილი, ხალხოსნური მოძრაობა საქართველოში, თბ., 1933, გვ. 37.

⁵ იქვე, გვ. 69.

⁶ ამაზე დაწერილებით იხ. ს. ხუნდაძე, სოციალიზმის ისტორიისათვის..., ტ. I, გვ. 115—126.

⁷ И. С. Джабадарн, Процесс 50-ти. მომყავს გ. მეგრელიშვილის პუბლიკაციით (იხ. მისი Грузинская общественно-политическая мысль второй половины XIX века, т. I, часть вторая, გვ. 353.).

ნიკოლაძისა და სხვათა საგრძნობი გავლენა ქართველი ხალხოსნების იდეოლოგიის ფორმირებაზე. სამოციანელებისა და, კერძოდ, მათი ბელადის ილიას მხატვრულ-პუბლიცისტურ შემოქმედებასა და პრაქტიკულ მოღვაწეობას, ბუნებრივია, უკვალოდ არ ჩაუვლია და, მიუხედავად მათა და ხალხოსნებს შორის არსებული ზოგი პრინციპული ხასიათის განსხვავებისა, უკანასკნელთა წარმომადგენლებმა ბევრი რამ შეითვისეს თერგდალეულების იდეური კრედოდან. „კაცია-ადამიანი?!“, „კაკო ყაჩაღი“, „გლახის ნაამბობი“ და სხვა შესანიშნავი ნიმუშები უეჭველ კეთილმყოფელ გავლენას ახდენდა ქართული რევოლუციური აზრის შემდგომ წინსვლა-განვითარებაზე. როგორ შეეძლო გავლენა არ მოეხდინა, გლეხისაღმი უდიდესი სიყვარული არ აღეძრა და მისი ბედნიერებისათვის საბრძოლველად არ დაერაზმა მაშინდელი მოწინავე ახალგაზრდობა ილია ჭავჭავაძის დიდებულ აზრებს ხსენებული კლასის ადგილისა და მნიშვნელობის თაობაზე საზოგადოებრივ ცხოვრებაში.

ამრიგად, როგორც ზემოთქმულიდან ჩანს, ხალხოსნური მოძრაობის წარმოშობა პირველ რიგში ქვეყნის შინაგანი მდგომარეობით ყოფილა განპირობებული. შინაგან მდგომარეობაში ვგულისხმობთ ბატონყმური გადმონაშთების სიჭარბეს რეფორმის შემდეგდროინდელ ხანაში, რაც ვიმეორებთ, თავის მხრივ, საზღვრავდა ვაჭრობისა და მრეწველობის განვითარების შედარებით ნელ ტემპს, სოფლისა და ქალაქის მშრომელი მოსახლეობის ცხოვრების ერთობ მძიმე პირობებს და, აქედან გამომდინარე, კლასობრივი ბრძოლის შემდგომ გამწვავებას. ამ ხელსაყრელ ვითარებაში ხალხოსნური იდეოლოგიის ფორმირებაზე კეთილმყოფელი გავლენა ჰქონდა რუსეთის რევოლუციურ-დემოკრატიულ აზროვნებას, ცნობილი ნაროდნიკების: ლავროვის, ბაკუნინისა და სხვების პირველი ინტერნაციონალისა და პარიზის კომუნის გაბედულ საქმიანობასა და თერგდალეულების ლიტერატურულ-პუბლიცისტურ და პრაქტიკულ საქმიანობას.

§ 3. ხალხოსნური მოძრაობა 70-იან წლებში

საიდუმლო ორგანიზაციის შექმნა. მისი წევრები. საარქივო მასალებისა და მემუარული ლიტერატურის მიხედვით, საიდუმლო ხალხოსნური ორგანიზაცია საქართველოში 1873—1874 წლებშია შექმნილი. ეხება რა ამ საკითხს, სოფრომ მგალობლიშვილი წერს: „1872 წლიდან თბილისში, აქა-იქ იმართება კრებები, რომლებსაც ესწრება მოსწავლე ახალგაზრდობა, კითხულობენ არა მარტო ნებადართულ, არამედ აკრძალულ წიგნებსაც. სასწავლებლებში ფუძნდება საიდუმლო ბიბლიოთეკები, სადაც ინახება „სოვრემენიკი“, „ველიკორუსი“, დობროლიუბოვის, პისარევის, ჩერნიშევსკის, პრუდონის, ლასალისა და სხვათა ნაწერები. მიზნად დავისა-

ხეთ, — ამბობს იგი, — თვითგანვითარება და შემდეგ ხალხში გასვლა საქადაგებლად მონარქიული წყობილების საწინააღმდეგო აზრებისა¹.

ამ სიტყვებიდანაც გამოდის, თითქოს მისი ავტორი ხალხოსნურ-ორგანიზაციის ჩასახვა-აღმოცენების თარიღად 1872 წელს მიიჩნევს. სინამდვილეში კი ეს ასე არ არის. ეტყობა, კრებებს, რომლებსაც თბილისის ახალგაზრდობა იწვევდა, სოფრომ მაგალობლიშვილი არ თვლიდა ახალი მიმდინარეობის ორგანიზაციული საფუძვლების ჩაყრად. ასეთი მოსაზრების სასარგებლოდ ლაპარაკობს მისი მოგონების თუნდაც ის ადგილი, სადაც ნათქვამია, რომ საქართველოში აქტიური ხალხოსნური მოძრაობა „კანტი-კუნტად 1873 წლიდან დაიწყო“².

საკითხთან დაკავშირებული სხვადასხვა ხასიათის მასალები ხაზგასმით აღნიშნავენ იმ განსაკუთრებულ როლს, რომელიც ხალხოსნური მიმდინარეობის გაშლა-გაფართოების საქმეში რუსეთის უმაღლეს სასწავლებლებში სწავლამიღებულ და სამშობლოში დაბრუნებულ ქართველ ახალგაზრდობას უთამაშია.

კაპიტან ხრისტოფოროვის მოხსენებაში მითითებულია, რომ ხალხოსნების ორგანიზაცია შეიქმნა 1874 წელს, როდესაც პეტერბურგიდან სამშობლოში სამედიცინო-ქირურგიული აკადემიის სტუდენტი ისიდორე ქიქოძე დაბრუნდა³. ყოველივე ამას მხარს უჭერს იაკობ მანსვეტაშვილიც. მისი მოწმობითაც, ხალხოსნური იდეების ინტენსიური პროპაგანდა და მისთვის სათანადო ორგანიზაციული ფორმის მიცემა რუსეთში განსწავლული მოწინავე ქართველი ახალგაზრდობის სახელთან ყოფილა დაკავშირებული⁴. ამათგან კი, მისი აზრით, ყველაზე დიდი დამსახურება ივანე ჯაბაძარს, რომანოზ ფაველენიშვილსა და ეგნატე იოსელიანს ჰქონიათ⁵.

ხალხოსნების მოქმედების მთავარ ცენტრებად მასალები თბილისს, გორს, ქუთაისს, თელავსა და ოზურგეთს ასახელებენ. წევრების ყველაზე დიდი რაოდენობა (200 კაცი) საქართველოს დედაქალაქში ირიცხებოდა. უანდარმერიის მიერ შეგროვილი ზოგი სხვა ცნობის თანახმად თბილისის წრეში გაერთიანებული ყოფილან⁶: ეგნატე იოსელიანი, დათიკო თარხნიშვილი, იოსებ ბაქრაძე, არსენ კალანდაძე, სიმონ კარბელაშვილი, ანდროერისთავი, ოლგა ყიფიანი, ღიმიტრი კეზელი, სტეფანე ჭრელაშვილი. სემინარიელი კვიცარიძე და სხვ. გორის წრეში⁷: ვასო დეკანოზიშვილი.

¹ ს ო ფ რ ო მ მ გ ა ლ ო ბ ლ ი შ ვ ი ლ ი, მოგონებანი, გვ. 71.

² იქვე.

³ ЦГИА СССР, ф. 153, л. 35, л. 29.

⁴ ი. მ ა ნ ს ვ ე ტ ა შ ვ ი ლ ი, მოგონებანი, 1936, გვ. 1.

⁵ იქვე.

⁶ ЦГИА СССР, ф. 153, л. 35, л. 36.

⁷ ს. მ გ ა ლ ო ბ ლ ი შ ვ ი ლ ი, მოგონებანი, გვ. 73.



ანტონ ფურცელაძე.

მათე კერესელიძე, პავლე ბურჯანაძე (მასწავლებელი), ვანო ხიმშიაშვილი (შემდეგ მომრიგებელი მოსამართლე), ქაიხოსრო ფურცელაძე (სამხედრო ექიმი), ანტონ ფურცელაძე (მწერალი და პუბლიცისტი, ვეჟილი), ვასილ სამაღაშვილი (მღვდელი ს. ტყვიავში), გიგო ავალიშვილი, კოლა ფავლენიშვილი, რომანოზ ფავლენიშვილი (სტუდენტი), მოსე ნათაძე (მეჯვრისხეველი მასწავლებელი), სოფრომ მგალობლიშვილი, კოტე ერისთავი, ილიკო მაჭავარიანი, შიო დავითაშვილი და სხვ. კახეთის წრეში: ილიკო ჭიჭინაძე, დარიკო ჯორჯაძე, მასწავლებელი როსტომიშვილი, იოსებ გულისაშვილი, ალექსანდრე ცხვედაძე, სოფიო ჯორჯაძე, კონსტანტინე ნაცვლიშვილი, იოსებ მაყაშვილი, ალექსანდრე მაყაშვილი და სხვ. რაც შეეხება დასავლეთ საქართველოს, იქ

ხალხოსნური ორგანიზაციის წევრები და თვალსაჩინო მოღვაწენი ყოფილან: იმერეთში — მიხეილ ყიფიანი, პლატონ გაბიჩვაძე, ვარლამ გაბიჩვაძე, ილია ბახტაძე და ნესტორ თავდგერიძე. გურიაში — ისიდორე ქიქოძე, მელიტონ ნაკაშიძე, ივანე ნაკაშიძე, სანდრო საფაროვი, გიორგი გურიელი, ათანასე ქიქოძე და სამეგრელოში — ბათუ აფაქიძე, ანტონ იოსელიანი, ნესტორ კანდელაკი და სხვ.

ორგანიზაციის მიზნები და ამოცანები. როგორი იყო საიღუმლო ორგანიზაციის მიზნები და ამოცანები ამომწურავი პასუხის გაცემა ჩვეულებრივ სამოქმედო პროგრამის ანალიზის შედეგად ხერხდება და ეს ყველაზე სწორი და საიმედო გზაა. მაგრამ ამჟამად იძულებული ვართ გვერღი ავუაროთ ამ გზას, რადგანაც ქართველ ხალხოსნებს, როგორც ცნობილია, საერთოდ არ ჰქონიათ დამტკიცებული პროგრამა¹, ხოლო მისი შავი, რომელიც ვარლამ გაბიჩვაძეს შეუდგენია², დღემდე არაა აღმოჩენილი. ასეთ ვითარებაში მკვლევარის მთელი ყურადღება, ბუნებრივია, გადადის სხვა ხასიათის მასალებზე, როგორიცაა დასმენის ტექსტები, დაკითხვის ოქმები, პოლიციის მოხელეთა მოხსენებები, ბრალდებულთა პირადი წერილები, მათ მიერ დაწერილი პროკლამაციები, თანამედროვეთა მოგონებები და სხვ.

¹ პროგრამა უნდა განეხილა და დამტკიცებინა ყრილობას, მაგრამ მისი მოწვევა ვერ მოესწრო საიღუმლო ორგანიზაციის ჩაუარდნის გამო.

² ЦГИА СССР, ф. 153, д. 33, л. 24, ჯაშუშ იავორ იოსელიანის ერთ-ერთი დასმენის ტექსტი.

აქ დასახელებული წყაროების გულდასმით შესწავლა ცხადყოფს, რომ საიდუმლო ორგანიზაციას მიზნად ჰქონია დასახული არსებული უსამართლო სოციალურ-პოლიტიკური წყობილების დამხობა და მის მაგივრად ისეთის დამყარება, რომელიც უზრუნველყოფდა ადამიანის სრულსა და ყოველმხრივ თავისუფლებას. კაპიტან ხრისტოფოროვის პირველ მოხსენებაში¹, მაგალითად, პირდაპირაა მითითებული, რომ საზოგადოების მიზანს საყოველთაო აჯანყების მოწყობა და მის შედეგად „თანამდებობის პირთა, სამღვდელთა და მემამულე თავად-აზნაურთა“ მოსპობა-განადგურება წარმოადგენდაო². იგივე აზრია განმეორებული მის მეორე მოხსენებაშიც³. იქაც ნათქვამია, რომ ხალხოსნები საერთო-სახალხო აჯანყების მოწყობასა და ამ გზით მეფის ხელისუფლების დამხობას ფიქრობდნენო⁴. შიო დავითაშვილის მოწმობითაც, ხალხოსნების მთელი საქმიანობა სწორედ იქითკენ ყოფილა მიმართული, რომ დაემხოთ დესპოტური რეჟიმი და შეექმნათ ახალი, სოციალისტურ პრინციპებზე აშენებული საზოგადოება⁵.

საიდუმლო ორგანიზაციას რომ ნამდვილად ასეთი მიზანდასახულობა ჰქონდა, ამას პასუხისმგებაში მიცემულ პირთა ჩვენებებიც ადასტურებს. ერთ მათგანს, მაგალითად, პირდაპირ განუცხადებია, რომ ქართველი ხალხოსნები და მათი მესვეურები მიხეილ ყიფიანი, ისიდორე ქიქოძე და სხვები ხშირად ლაპარაკობდნენ „კავკასიაში კომუნის მოწყობის აუცილებლობაზე“⁶. კონსტანტინე ბაქრაძის 1876 წლის 26 აგვისტოს წერილში კი, რომელიც მას ეგნატე იოსელიანისათვის გაუგზავნია, დოკუმენტის სიტყვით, გამოთქმული ყოფილა სურვილი, რომ „ხალხი ამდგარიყო არსებული წყობილების წინააღმდეგ და მოეწყო თავისი ცხოვრება სულ სხვა სოციალურ საფუძველზე“⁷. ყოველივე ამან საშუალება მისცა თბილისის

¹ სრული სახელწოდება ამ მოხსენებისა, რომელსაც ჩვენ „პირველს“ ან „ერველს“ ვუწოდებთ, ასეთია: «Записка, составленная из собранных сведений о социально-революционном обществе, образовавшемся в пределах Закавказского края» (სსცია, ფ. 153, საქ. 35, ფურც. 29—41).

² სსცია, ფ. 153, საქ. 35, ფურც. 29.

³ სრული სახელწოდება ამ მოხსენებისა, რომელსაც ჩვენ „მეორეს“ ან „მოკლეს“ ვუწოდებთ, ასეთია: «Краткая записка, составленная из собранных сведений о социально-революционном обществе, образовавшемся в пределах Закавказского края» (სსცია, ფ. 153, საქ. 35, ფურც. 42—44).

⁴ სსცია, ფ. 153, საქ. 33, ფურც. 42.

⁵ შიო დავითაშვილი, მოგონებანი, რევოლუციური მოძრაობის დასაწყისის საქართველოში, „რევოლუციის მატანი“, 1923, № 3.

⁶ სსცია, ფ. 7, ან. 3, საქ. 2506, ფურც. 86; Представление прокурора Тифлисской судебной палаты В. Андреева от 7 июня 1877 года его императорскому высочеству князю наместнику кавказскому (на 92 листах).

⁷ სსცია, ფ. 7, ანაწ. 3, საქ. 2506, ფურც. 86, 87.

სასამართლო პალატის პროკურორის დაესკვნა, რომ «Сообщество, к устройству которого оии (ე. ი. ხალხოსნები—ავტ.) стремились, имело целью ниспровержение всего существующего государственного и общественного строя»¹.

თუ რა აზრები და შეხედულებები შეჰქონდათ კონკრეტულად ქართველ რევოლუციონერებს ხალხის მასებში (გლეხები, მუშები, სამხედრო პირები, მოსწავლე ახალგაზრდობა), ამაზე ამომწურავ პასუხს ხრისტოფოროვის პირველი მოხსენება იძლევა. „საზოგადოების წევრნი, — ვკითხულობთ იქ, — იზიდავენ მოზარდ თაობას... და ცდილობენ² შთაუწერონ მას სიძულვილი მთავრობისა და არსებული წყობილებისადმი. ისინი არწმუნებენ მას, რომ თვითმპყრობელი მონარქიული მთავრობის მოსპობის შემდეგ ყველა თანასწორი იქნება და ყოველგვარი ქონება თანაბრად განაწილდება. სახელმწიფო გადასახადი როგორც ფულადი, ისე ნატურალური, მოსპობილი იქნება. ამასთან ხალხს აჯერებენ, რომ რუსეთის გლეხობა თითქმის 37 გუბერნიაში მზად არის პირველი დაძახებისთანავე საბრძოლველად გამოვიდეს მთავრობის წინააღმდეგ და რომ ჯარი მხარს უჭერს მას... საზოგადოება მიზნად ისახავს სათანადო ნიშნის მიღებისთანავე მოაწყოს ერთდროული საყოველთაო აჯანყება თანამდებობის პირთა, სამღვდელთა და მემამულე თავად-აზნაურთა მოსასპობად“³.

კიდევ უფრო მკაფიოდაა გადმოცემული ხალხოსნური პროპაგანდის შინაარსი იმავე მოხსენების მეორე ადგილას. „პროპაგანდისტები, ხალხში ავრცელებენ შემდეგ იდეას: ხელმწიფის კანონით ხალხს ახდევინებენ დიდძალ არაპირდაპირ გადასახადს მოწმობისათვის, პატენტისათვის და სხვ. ეს გადასახადი ყოველ წლობით იზრდება. მთავრობა იგონებს ახალ-ახალ გამოსაღებებს, რომლის მთელი სიმძიმე მუშა ხალხს აწევბა კისერზე... მშრომელი ხალხის ოფლით მონაგარს, რასაც კი მოიყვანს იგი... თესვით, მკით, გალეწვით, ან ისეთი მძიმე საქმიანობით, როგორც არის ტყის მასალის დამზადება და სხვა..., ითვისებენ ხაზინა და მემამულეები, ხალხი კი რჩება მშვიერ-მწყურვალე და სიღატაკე სულს უხუთავს მას. რატომ უნდა არჩინოს ამ მშვიერმა ხალხმა მეფე... და თვითონ კი ვაებასა და წვალებაში დალიოს სული? როდესაც არ იქნება ხელმწიფე, არ იქნება მთავრობა და კანონები, მაშინ ყველა უფლებრივად გათანაბრდება, გადასახადს ძალით არავინ გადაახდევინებს, ხალხის საჭიროებისთვის შეიქმნება საერთო თანხა, საიდანაც ის დაიკმაყოფილებს თავის მოთხოვნილებას.

¹ სსცია, ფ. 7, ანაწ. 3, საქ. 2506, ფურც. 87.

² ხრისტოფოროვის ორივე მოხსენება დაწერილია საიდუმლო ორგანიზაციის წევრების დაპატიმრებამდე.

³ სსცია, ფ. 153, საქ. 35, ფურც. 29. „რევოლუციის მატთანე“, 1925, № 1 (11) გვ. 60—61.

აპიტომ... ხალხის საბედნიეროდ აუცილებელია მონდომება და იმისთანა წყობილების განხორციელება, რომლის დროსაც მშრომელი თვითონ იქნება ბატონ-პატრონი თავის ნაოფლარისა. მღვდლები სცრუობენ, როცა გვეუბნებიან, თითქოს მეფე ღვთისგან იყოს დაღვნილი, თითქოს ხალხის ბედილბალი მისთვის განგებას ჩაებარებინოს, რათა იგი უსიტყვო მორჩილებას და მუდმივ ტანჯვა-წამებაში იყოლიოს“¹.

ხრისტოფოროვის მოხსენებიდან ციტირებული ადგილები, რომელთა წყაროს ჯაშუშ იაგორ იოსელიანის მიერ შეგროვილი და ჟანდარმერიისთვის მიწოდებული ცნობები წარმოადგენს², მკაფიოდ ადასტურებს, რომ ხალხოსნებს ხალხში პრიმიტიული სოციალისტური იდეები შეჰქონდათ. თვითმპყრობელური მონარქიის დამხობა, ექსპლოატატორული კლასების მოსპობა და ისეთი წყობილების დამყარება, რომელიც უზრუნველყოფდა ხალხის განუსაზღვრელ თვითმმართველობას, ყველას თანასწორუფლებიანობასა და საზოგადოებრივი დოვლათის სამართლიან განაწილებას — აი ის აზრები, რომლებსაც განსახილველი ხანის ქართველი ხალხოსნები ნერგავდნენ მშრომელ მასებში.

პროპაგანდისტები რომ ნამდვილად ასეთი სიტყვით მილიოდნენ სოფლისა და ქალაქის მშრომელ მოსახლეობასთან, ამას თვით მათ მიერ შექმნილი საბუთებიც ადასტურებს. ამათ რიცხვს ეკუთვნის, მაგალითად, მიხეილ ყიფიანის წერილი აფაქიძისადმი³, სადაც ნათქვამია: შთააგონე ყველა მშრომელს, რომ მიწა, რომელზედაც ისინი ცხოვრობენ, მათი სრული საკუთრებაა და რომ მემამულეებს არა აქვთ მათზე არავითარი უფლება⁴. იგივე ითქმის ვარლამ გაბიჩვაძის პროკლამაციაზედაც — «Божественная история для крестьян и рабочих»⁴, რომლის ეპიგრაფად ავტორს შეურჩევია სიტყვები: ოფლითა შენითა მოიპოვე საზრდო შენი, ამოღებული „სახარებიდან“. სამწუხაროდ, პროკლამაციის ტექსტს ვერ შივავენით, მაგრამ იქ, როგორც ეს გაბიჩვაძის 1876 წლის 3 ივნისის თარიღით ისიღორე ქიქოძესთან გაგზავნილი წერილიდან ჩანს, შექმნილი ყოფილა ისეთი საზოგადოებრივი ურთიერთობა, სადაც ყველა ადამიანი ცხოვრობს პატიოსანი შრომით და გამორიცხულია ერთის მიერ მეორის ექსპლოატაცია. ამის საწინააღმდეგო პრინციპებზე აშენებული წყობილება კი ავტორს უსამართლო, სრულიად უეარგის და ქრისტეს მოძღვრების უარმყოფელ წყობილებად ჰქონია გამოცხადებული⁵.

¹ სსცია, ფ. 153, საქ. 35, ფურც. 40, „რევოლუციის მატინე“. 1925. № 1 (11), გვ. 74—75.

² იქვე, საქ. 33, ფურც. 74—75.

³ იქვე, საქ. 35, ფურც. 34.

⁴ იქვე, ფურც. 22—23. ვარლამ გაბიჩვაძის 1876 წლის 3 ივნისის წერილი ისიღორე ქიქოძისადმი, რუსული თარგმანი შესრულებული ჟანდარმერიის მოხელის მიერ.

⁵ იქვე, ფურც. 22.

პროპაგანდის მიზნით ვ. გაბიჩვაძე, ეტყობა, საგანგებო ბროშურის წერასაც შესდგომია და თემად პანეტის საკითხი აუღია. ამ ბროშურაში, — სწერდა იგი ისიღორე ქიქოძეს, — მე უნდა დავამტკიცო, რომ საწყალი გლეხი (მთავრობისა და მემამულეთა აზრით) გაჩენილია (მხოლოდ) იმისათვის, რომ იხადოს სახელმწიფო გადასახადები, არჩინოს მონელები, მღვდლები და სხვ. ისეთ რამეს დავწერ, რომ მოგეწონებაო¹.

დაახლოებით ასეთივე შინაარსისა ყოფილა სტეფანე ჭრელაშვილის პროკლამაციაც სათაურით „გლეხების გამოღვიბება“ («Пробуждение мужиков»). მასში, თბილისის სასამართლო პალატის პროკურორის მოწმობით, დაშვებული ყოფილა „თავხედური გამოთქმები ხელმწიფე იმპერატორისა“ და მისი „ოჯახის წევრების მიმართ“².

იმ პროპაგანდის შესახებ კი, რომელსაც ხალხსა და სამხედრო ნაწილებში თბილისის სასულიერო სემინარიის ყოფილი მოწაფე, ალექსანდროპოლის სამაზრო სამმართველოს შტატგარეშე მოხელე ალექსანდრე იოაკიმოვი ეწეოდა, მოწმედ გამოძახებულმა ვინმე ნიკოლოზ ალექსეევმა აჩვენა: «Александр Иоакимов, встретившись со мною и Феодором Заманопуло..., в греческой слободке, при разговоре продекламировал стихи, в которых говорилось: «возьмите топоры. и пойдем на (врага), всех попов, всех чиновных подлецов, все законы, все судейские дела мы сожжем до тла». При этом Иоакимов говорил о свободе, равенстве и братстве и рассказал, что во франции революция и все восстали против правительства и объяснил способ, каким образом парижане сражаются в этом случае. Кроме этого он . . . во время парада у греческой церкви говорил солдатам, что зачем идти сражаться за царя, на что те учреждения, которые существуют в России, должно быть равенство и т. д.»³.

აღსანიშნავია, რომ ალექსანდრე იოაკიმოვს ერთ დროს სოხუმის სამთო სკოლაში, ხოლო შემდეგ თელავის სამაზრო სასწავლებელში უმუშავია, მაგრამ 1874 წელს კავკასიის სასწავლო ოლქის მზრუნველის განკარგულებით იქიდან გაუძევებიათ და საერთოდ ყოველგვარი პედაგოგიური მოღვაწეობა აუკრძალიათ. მიზეზად მისი არაკეთილსაიმედოობა დაუსახელებიათ, რაც, თურმე, დოკუმენტის სიტყვით, მოწაფეებთან მეცადინეობის მიუღებელი შინაარსით წარმართვაში გამოხატულა⁴. იოაკიმოვი, რომელიც მეფისნაცვლის მიხეილ ნიკოლოზის ძის ბრძანებით პოლიციის მკაცრი მეთვალყურეობის ქვეშ დაუყენებიათ, მხოლოდ 1877 წლის 23

¹ სსცა, ფ. 153, საქ. 35, ფურც. 23.

² იქვე, ფ. 7, ანაწ. 3, საქ. 2506, ფურც. 78.

³ იქვე, საქ. 2504, ფურც. 13—14.

⁴ იქვე, ფურც. 18—19.

თებერვალს მიუღიათ სამსახურში, ალექსანდროპოლის სამაზრო სამმართველოში¹, სადაც მას, როგორც ვნახეთ, ისევ გაუგრძელებია რევოლუციური საქმიანობა.

რევოლუციური ხასიათის ლიტერატურის გავრცელება ხალხში. პროპაგანდის სხვა ფორმები. სოფლის მშრომელი მოსახლეობის გამოღვიძებისა და მისი გათვითცნობიერების მიზნით ხალხოსნები, როგორც აღენიშნეთ, ფართოდ იყენებდნენ რევოლუციური ხასიათის ლიტერატურას, კერძოდ, ისეთ ნაწარმოებებს, როგორცაა „ოთხი ძმის ზღაპარი“, „ცბიერი მექანიკა“, „გლეხ-კაცის ისტორია“, „რა უნდა ხალხს“, «Вот-то бог, да сам не будь плох», «Что-то братцы» და სხვ. სოფრომ მაგლობლიშვილისა და საგამომძიებლო მასალების მოწმობით, აქ დასახელებული ზოგი ნაწერებიდან ქართველ ხალხოსნებს უთარგმნიათ კიდევ მშობლიურ ენაზე და მოსახლეობაში საპროპაგანდოდ გამოუყენებიათ².

რა აზრი იყო კონკრეტულად გატარებული ზემოჩამოთვლილ, ხელისუფლების მიერ აკრძალულ პოლიტიკურ თუ მხატვრულ ნაწარმოებებში? რაზეა, მაგალითად, ლაპარაკი ლევ ტინომიროვის „ოთხი ძმის ზღაპარში“? იქ ლაპარაკია³ ძმების — ივანეს, სტეფანეს, ლუკასა და გიორგის შესახებ, რომელთაც, როგორც საზოგადოებიდან წასულებს და უღრან ტყეში მობინადრეებს, არავითარი წამოღგენა არ ჰქონიათ სოციალურ უკუღმართობასა და კლასობრივ ბრძოლაზე. ისინი მალე ხალხის ცხოვრების გაცნობის მიზნით მსოფლიოს სხვადასხვა მხარეს სწევვიან. მოთხრობის გმირებს მთელი ქვეყნიერება შემოუვლიათ, მრავალი ქალაქი და სოფელი დაუთვალაიერებიათ, საკუთარი თვალთ უნახავთ მშრომელი კაცის ტანჯვა-წამება, მისი აუტანელი ეკონომიური მდგომარეობა, გამოწვეული ექსპლოატატორული კლასების გაუკითხაობა-აღვირახსნილობით. ამით აღშფოთებულ ძმებს მტკიცედ გადაუწყვეტიათ არსებული უსამართლო წყობილების დამხობა და საუკუნობრივი მონობის მოსპობა.

მაშ, ძმავ! მრისხანედ მონობის ჯაჭვი
დავლეწოთ, მტერსა წინა აღვუდგეთ.
მრისხანეთ სისხლი სისხლით შევუღებოთ,
მით განჩინებას მკაცრსა შევუდგეთ.

¹ სსცია, ფ. 7, ანაწ. 3, საქ. 2504, ფურც. 18—19.

² ქართულ ენაზე თარგმნილი ყოფილა, მაგალითად, „ოთხი ძმის ზღაპარი“, „ცბიერი მექანიკა“, „სამარის შიმშილი“, „ზღაპარი კაპეკზე“ და სხვ. (იხ. ს. მგალობლიშვილი, მოგონებანი, გვ. 102).

³ გადმოცემულია შ. გოზალიშვილისა (ქართული რევოლუციური მხატვრული ლიტერატურის ისტორიისათვის) და გ. შეგრილიშვილის («Грузинская общественно-экономическая мысль во второй половине XIX века», т. I) წიგნების მიხედვით.

...გულის სიღრმეში გადავიწყვიტოთ
ქვეყნად მონობის სრულად მოსპობა,
დაცემულ ძმასა თავი დაეკლათ,
მით მოვიპოვოთ თავისუფლება!

აპის გამო მთავრობას ძმები ციხიბრს გაუგზავნია. მაგრამ მათ პატიმრობისათვის თავი დაუღწევიათ და ხელისუფლების წინააღმდეგ ენერჯული ბრძოლა გაუგრძელებიათ¹.

ავტორი დარწმუნებული ყოფილა მშრომელი ხალხის გამარჯვების აუცილებლობაში, არსებული წყობილების დაღუპვა-მოსპობის გარდაუვალობაში. «И ударит грозный час, — აღტაცებით წერს იგი, — пробудится народ, он почувст в себе силу могучую, силу непоборимую, и раздавит он тогда всех грабителей, всех мучителей безжалостных, реки крови прольет он в гнеше своем и жестоко отомстит притеснителям. Царь с министрами и боярами, фабриканты и помещики, все монахи лицемерные, все мучители народные — все получают воздаяние за грехи свои тяжелые. Всех их сотрет народ с лица земли и потом зажмвет припеваючи»².

მეორე ნაწარმოები „ცბიერი მექანიკა“ მკითხველებს მოუთხრობდა რუსეთის სახელმწიფოს „ორ ბანაკად“ დაყოფის შესახებ, რომელთაგან ერთს მემამულეები და კაპიტალისტები შეადგენდნენ, ხოლო მეორეს უნუგეშო მდგომარეობაში მყოფი მშრომელი მასა, უშუალო მწარმოებელი კლასი. მეფე, — ნათქვამი იყო იქ, — თავგამოდებით იცავს ექსპლოატირებული კლასების ინტერესებს და ამიტომ მუშებსა და გლეხებს თანამედროვე დუხჭირი პირობებიდან გამოსვლა მხოლოდ ძალის გამოყენებით და არსებული წყობილების წინააღმდეგ მედგარი ბრძოლით შეუძლიათ³.

როგორც მოტანილი მასალებიდან ჩანს, ლიტერატურა, რომლის პროპაგანდასაც ხალხოსნები ეწეოდნენ, ხაზგასმით ლაპარაკობდა ხალხის მძიმე ეკონომიურ და პოლიტიკურ მდგომარეობაზე. მოუწოდებდა მას არსებული დესპოტიკური რეჟიმის დამხობისა და ისეთი წყობილების დამყარებას, რომელიც მიწასა და თავისუფლებას მშრომელ მასებს დაუმკვიდრებდა და საბოლოოდ მოსპობდა ადამიანებს შორის ქონებრივ და უფლებრივ უთანასწორობას.

როგორც უკვე ვთქვით, ნაწილი პოლიტიკური და მხატვრული ლიტერატურისა, რომელსაც ხალხოსნები ავრცელებდნენ, ქართულად ითარგმ-

¹ ლექსი მომყავს შ. გოზალიშვილის წიგნიდან „ქართული რევოლუციური მხატვრული ლიტერატურის ისტორიისათვის“, თბ., 1963, გვ. 182—183.

² იქვე, გვ. 183.

³ Г. Мегрелишвили, Грузинская общественно..., т. I, გვ. 507.

⁴ იქვე, გვ. 506.



ქართველი ხალხსნების ჯგუფი.

ნებოდა, რათა გასაგები ყოფილიყო გაუნათლებელი და წერა-კითხვის უცოდინარი სოფლის მშრომელი მოსახლეობისათვის. ქართულადვე იწერებოდა არაერთი რევოლუციური შინაარსის პროკლამაცია. მაგრამ მთავარი იყო არა საპროპაგანდო ტექსტის შედგენა, არამედ მისი გამრავლება. სწორედ ამ მიზანს ემსახურებოდა გორის მაზრის სოფელ ტყვიავში მოწყობილი საიდუმლო სტამბა, რომელიც, მიუხედავად მრავალი ხელშემშლელი მიზეზებისა, წარმატებით მუშაობდა მღვდელ ვ. სამაღაშვილის ხელმძღვანელობით.

მთავრობის საწინააღმდეგო აზრების გავრცელებაში საყურადღებო ადგილი ჰქონია დათმობილი პროპაგანდის ისეთ ფორმებსაც, როგორცაა ცოცხალი საუბარი და წარმოდგენა-სალამოების გამართვა. ეხება რა ამ საკითხს სოფრომ მგალობლიშვილი წერს: „ხალხური სცენების კითხვა პირველად მე შევიტანე სცენაზე. ვკითხულობდი ჩემს საკუთარ სცენებს. სცენებში გამოხატული იყო ცხადათ თუ თვალსაჩინოთ მუშა-გლეხის ჭირ-ვარამი, ნაბატონარისაგან, სხვადასხვა მოხელეთაგან მიყენებული უჩიათობა, უსამართლობა, შეწუხება. სცენების საკითხავად საგანგებოდ მქონდა გლეხური ტანისამოსი, ვკითხულობდი ნამდვილი გლეხური კილოთი, ჩამი უცნობი კაცი... გლეხში ვერ მარჩევდა. ამ სცენებს დიდი გავლენა ჰქონდა სოფლად“¹.

გლეხობის დამოკიდებულება ხალხოსნების საქმიანობისადმი. როგორ შეხვდა ქართველი გლეხობა ხალხოსნურ პროპაგანდას, როგორ მიიღო და შეითვისა მან ის სიტყვა, რომლითაც მასთან რეეოლუციონერები მივიდნენ? სოფრომ მგალობლიშვილის მოწმობით, სოფლის მშრომელი მოსახლეობა გულგრილად შეხვედრია ხალხოსნების საქმიანობას და არ გაჰყოლია მათ მიერ ნაჩვენებ გზას. „ხალხოსნური მოძრაობა, — წერს იგი, — თავდაპირველად ინტელიგენციამ და სტუდენტობამ გაიზიარა. ხალხი ჩვენ არ გვიკარებდა, განსაკუთრებით გლეხობა. ხალხში გავდიოდით ვასო დეკანოზიშვილი, შიო დავითაშვილი და ზაფხულობით მეც. ქართლ-კახეთში გლეხი ერთობ გულჩათხრობილია. ბატონყმობის უღელმა მთლად დაუკარგა ხალხს ყველაფრის იმედი, სასოება აღარავის-ზედ არ ჰქონდა, როგორც კედელს ცერცვი, ისე ხვდებოდა ხალხს ჩვენი სიტყვა“².

ანვითარებს რა ამ აზრს, იგივე ავტორი მოგვითხრობს: „ერთხელ ჩემს სოფელში, რომლის მცხოვრებლებს ხუთი თითივით ვიცნობდი..., მიტინგი გავმართე, გავუბიძგე ლაპარაკი, რომ მიწა მშრომელი გლეხისაა..., რომ მეფემ გლეხი უმიწოთ გაანთავისუფლა და ამიტომ ისინი ისევე ბატონყმობას განიცდიან, უფრო უარეს ყოფაში ჩაცვივდნენ, რომ მეფემ მხოლოდ ძვალი გადუგდო მათ, როგორც მაჩხუბარ ძაღლებსა, რომ ამისთანა მთავრობა დასაგმობია, მას ძალა-უფლება უნდა წაერთვას და ხალხს გადაეცეს.

გლეხებმა ამაზე ასე მიპასუხეს: ეჰეი, ხელმწიფის ორგულობა როგორ შეიძლება, შენი ჭირიშე, ღვთისგან დაყენებული კაცია. ბატონყმობა გუშინ იმან არ გადააგდო, მაშ ვინა? მართალია მიწა არა გვაქვს, მაგრამ რა

¹ ს. მგალობლიშვილი, მოგონებანი, გვ. 84.

² იქვე, გვ. 83.

ვქნათ, როგორც იქნება შევისყიდით... არა, ძმაო. ხელმწიფეს ვერ ვუღალატებთ... ეიბე, როგორ იქნება“¹.

შოი დავითაშვილის მოწმობითაც, ხალხოსნურ პროპაგანდას დიდი წარმატება არ ჰქონია. მართალია, რევოლუციურ იდეებს ხალხზე გარკვეული შთაბეჭდილება მოუხდენია, მაგრამ საბოლოო მიზანი მაინც მიუღწეველი დარჩენილა. „როგორც ტყვიავის, ისე სხვა სოფლების გლეხობაში, — ვკითხულობთ შ. დავითაშვილის მოგონებაში, — ჩვენი აზრები, მეტადრე მიწის ჩამორთმევა ბატონებისაგან და გლეხებისათვის გადაცემა ცოცხალ ინტერესს იწვევდა, მაგრამ მჭიდრო კავშირი გლეხობასთან... მაინც ვერ შევკარით. გლეხობა მეტისმეტად დატვირთული იყო მუშაობით, ჩვენთვის ყურის დასაგდებად მას არ ეცალა, მით უმეტეს, ზაფხულის თვეებში, როცა შინ და გარეთ გამოუღლეველი სამუშაო აქვს თვითეულს“².

სოფრომ მგალობლიშვილისა და შოი დავითაშვილის მოწმობა იმის შესახებ, რომ გლეხები საბოლოოდ არ გაჰყვნენ ხალხოსნების მიერ რეკომენდებულ გზას, სწორია, მაგრამ ისინი, ჩვენი აზრით, ცუდებიან, როდესაც სოფლის მშრომელი მოსახლეობის ხალხოსნური პროპაგანდისადმი სრულ ინდიფერენტულ დამოკიდებულებაზე ლაპარაკობენ. ის ფაქტი, რომ საუკუნეობრივ მონობაში მყოფი გლეხი ერთბაშად არ აღსდგა მეფის წინააღმდეგ, ოდნავადაც არ ნიშნავს იმას, რომ იგი თანაგრძნობით არ შეხვდა იდეას მიწისა და თავისუფლების მოპოვების აუცილებლობა-საჭიროების შესახებ. ამას თითქოს დასახელებული თანამედროვენიც არ უარყოფენ. „როდესაც ჩვენ, — წერს სოფრომ მგალობლიშვილი, — ვუამბობდით „ოთხი ძმის ზღაპრის“, „ცბიერი მექანიკის“ შინაარსს, ან... ბატონების უდიერობას; ეგრედწოდებულს, „პირველ დამის“ ჩვეულებას..., დიამბეგების დროის შეწუხებაზე, დღევანდელ ბოქაულებზე, რომ მეფიდან დაწყებული უკანასკნელ ჩაფრამდე მუშა გლეხის კისერზე სხედან, მაშინ ჩაფიქრდებოდნენ. მართალს ამბობენ, ხალხო, მართალს. მართალია, მართალია — გაისმოდა ყოველი მხრიდან“³.

მწარმოებელი კლასის ფართო მასები რომ გულგრილად არ შეხვედრიან ხალხოსნური აზრების პროპაგანდას, ამას იაკობ მანსვეტაშვილიც ადასტურებს. „ყოველი ჩვენი სიტყვა, — წერს იგი, — წრფელის გულით, ახალგაზრდული გატაცებით ნათქვამი, გზას ადვილად იკვლევდა მსმენლის გულსა და სულში და ისიც ნდობით გვეპყრობოდა ჩვენ... მღაბიოდ და ადვილი ენით ვაწოდებდით გლეხებს ცოდნას იმის შესახებ, თუ

¹ ს. მგალობლიშვილი, მოგონებანი, გვ. 83.

² შ. დავითაშვილი, ხალხოსნური მოძრაობა საქართველოში, გვ. 30.

³ ს. მგალობლიშვილი, მოგონებანი, გვ. 84.

როგორ და რისთვის არის მოწყობილი თვითმპყრობელობის სახელმწიფოებრივი დაწესებულებანი, თუ რაში და რისთვის იხარჯება ხალხისაგან შეკრებილი ფული, მსმენელს ჭკუაში უჯდებოდა და წყლულზე მალამოდ ედებოდა“¹.

ამ მოწმობის სისწორეს სხვა ცნობებიც ადასტურებს, ჯამუშ იაგორ იოსელიანის მოხსენებაში, მაგალითად, ხაზგასმითაა აღნიშნული ის დიდი წარმატება, რომლისთვისაც რაჭაში პლატონ გაბიჩვაძეს მიუღწევია. მას, დოკუმენტის სიტყვით, თავის მხარეზე გადმოუბირებია და აჯანყებაში მონაწილეობისათვის მოუშაადებია სოფლების ჩორჯოს, სადმელისა და ხვანჭკარას გლეხები². იგივე ითქმის გურული გლეხების შესახებაც. ისინიც ყურადღებით მოჰკიდებიან ხალხოსნების საქმიანობას და სრული თანხმობა განუცხადებიათ აქტიურად ჩაბმულიყვნენ „მთავრობის საწინააღმდეგო მოქმედებაში“³. სხვებს არც კახეთის მშრომელი მოსახლეობა ჩამორჩენია. ისინიც, მასწავლებლების როსტომაშვილისა და ნაცვლიშვილის მოწმობით, თანაგრძნობით შეხვედრიან ახალი იდეების პროპაგანდას და თანახმა ყოფილან ჩამდგარიყვნენ სიმართლისათვის მებრძოლთა რიგებში⁴.

დასასრულ, რომ გლეხები ხალხოსნურ პროპაგანდას გულგრილად არ შეხვედრიან და რომ ამ პროპაგანდას გარკვეული როლი უთამაშია რეფორმის შემდეგდროინდელი ხანის საქართველოს სოფელში მიმდინარე კლასობრივი ბრძოლის გამწვავებაში, ამას ქუთაისის გუბერნატორის 1876 წლის ანგარიშიც ადასტურებს. «Нельзя не обратить внимания на то, — ნათქვამია იქ, — что в течение последних 10-ти лет неоднократно возникали в Зугдидском уезде уклонения крестьян от исполнения обязательств к помещикам... Из разговоров с крестьянами я пришел к полному убеждению, что они действовали под влиянием теории о праве поземельной собственности, проникшей к ним из чужой среды. Многие крестьяне высказывались по этому предмету не только в одинаковом смысле, но и в тождественных выражениях с распространителями социально-революционной пропаганды, обнаруженными в Кутаисской и Тифлисской губерниях в апреле-мае прошлого (1876) года. Я осмелился столь

¹ ი. მანსვეტაშვილი, მოგონებანი, გვ. 3—4.

² სსცია, ფ. 153, საქ. 34, ფურც. 218.

³ იქვე, საქ. 35, ფურც. 38—39.

⁴ იქვე.

долго останавливать внимание вашего императорского величества на этом деле не только ввиду связи, обнаружившейся между волнением крестьян и попыткой распространения в населении губернии социалистических теорий, сколько ввиду связи того и другого с вопросом народного образования . . . Крестьянское население легко увлекается теми выводами этого учения, которое совпадает с его настоящими интересами. Они сейчас усваивают мысль об исключительном праве собственности на землю того, кто её обрабатывает. Естественным последствием этого движения является отказ в платеже помещику или казне за пользование землями»¹.

ქუთაისის საგუბერნიო ხელისუფლების წარმომადგენელთა აზრით, ხალხოსნების საქმიანობას დასავლეთ საქართველოში, კერძოდ კი სამეგრელოს სოფლებში, არა მარტო კვალი დაუტოვებია, არამედ ზედიზედ (1874 და 1876 წლების) გლეხთა ორი აჯანყება გამოუწვევია².

ამრიგად, როგორც მოტანილი მასალებიდან ჩანს, ხალხოსნური იდეების პროპაგანდას უშედეგოდ არ ჩაუვლია და არც შეეძლო ჩაეელო. უკიდურესად მძიმე ეკონომიურ და პოლიტიკურ მდგომარეობაში მყოფი ქართველი გლეხი, ცხადია, გულგრილად არ მოეკიდებოდა აზრს მიწისა და თავისუფლების მოპოვების საქართვება-აუცილებლობის შესახებ. და თუ ხალხოსნებმა მიზანს საბოლოოდ მაინც ვერ მიაღწიეს, ეს მოხდა უმთავრესად იმიტომ, რომ მაშინდელ საქართველოში ჯერ კიდევ სუსტი იყო მომავალი სამართლიანი წყობილებისათვის მებრძოლი ძირითადი ძალა — მუშათა კლასი და თანაც ხალხოსნებმა გამომდინარე, მცდარი თეორიული პრინციპებიდან, უარყვეს ინდუსტრიული პროლეტარიატის გადამწყვეტი როლი და სათანადო ყურადღება არ მიაქციეს ამ კლასის დარაზმვა-გამოყენების საქმეს.

ლავრისტები და ბაკუნისტები ქართველ ხალხოსნებში. ხალხოსნებია, როგორც ზემოთაც აღვნიშნეთ, ხალხის აჯანყებისთვის მომზადებას ცდილობდნენ. ამ აჯანყებას, მათი აზრით, საერთო საიმპერიო ხასიათი უნდა ჰქონოდა. „ჩვენ, ადგილობრივი რევოლუციონერები, — წერს. შ. დავითაშვილი, — მიზნად ვისახავდით მოგვემზადებია მთელი კავკასიის მოსახლეობა, განურჩევლად ეროვნებისა, საერთო აჯანყებისათვის და როდესაც შიდა რუსეთში ბრძოლის საათი დაჰკრავდა, აქაც მზად უნდა ვყოფილიყავით“³.

¹ სსია, ფ. 5/12, საქ. 3974, ფურც. 1—8.

² ЦГИАМ, ф. III, отделения 3 эксп., д. 336, л. 6.

³ შ. დავითაშვილი, ხალხოსნური მოძრაობა საქართველოში, გვ. 40.

ეტყობა, ქართველი ხალხოსნები ბაკუნინისა და ბაკუნისტების მსგავსად არ ფიქრობდნენ, რომ სოფლის მშრომელი მოსახლეობა უკვე მზადაა ამ საერთო-საყოველთაო აჯანყებისათვის და რომ ამიტომ სრულიად ზედმეტია მის წრეში პროპაგანდის გზით მოწინავე აზრებისა და იდეების შეტანა. ხალხს, ბაკუნინის აზრით, ამ იდეების მოსასმენად არც დრო ჰქონდა და არც ხალისი. ჩვენი ხალხოსნები, ვიმეორებთ, არ იზიარებდნენ რუსი ანარქისტების ამ შეხედულებას და მათ მწარმოებელი კლასის მოძრაობაში მოყვანა ესოდენ იოლ და უცაბედ საქმედ არ მიაჩნდათ. მათი რწმენით, გლეხების გამოღვიძება და საუკუნეობრივი მონობის საწინააღმდეგოდ დარაზმვა შესაძლებელი იყო მხოლოდ სისტემატური და საკმაოდ ხანგრძლივი ახსნა-განმარტების შედეგად. სწორედ ამით იყო განპირობებული ის განსაკუთრებული ყურადღება, რომელსაც ისინი რევოლუციური აზრების ხალხის მასებში პროპაგანდას უთმობდნენ. „საექვო“ შინაარსის ლიტერატურის და პროკლამაციების გავრცელება ქართლის, კახეთის, იმერეთისა და გურია-სამეგრელოს სოფლებში, საბუქდი მანქანის გამართვა ტყვიავეში, სრულქმნილი სტამბის გამოწერა საზღვარგარეთიდან და სხვა ამგვარი ფაქტები მკაფიოდ მოწმობენ, რომ ქართველი ხალხოსნები რუსი ლავრისტების მსგავსად, საკმაოდ ხანგრძლივი პერიოდისათვის გეგმავდნენ თავიანთ საქმიანობას. ისინი ბაკუნინით არ ფიქრობდნენ, რომ ყოველი ჯანყი, თუნდაც სრულიად უშედეგოდ დამთავრებულიყო, სასარგებლოა და მისასალმებელი. სწორედ ამიტომ არ დაუჭირეს მათ მხარი 1876 წლის სამეგრელოს გლეხთა აჯანყებას, რომლის წარმოშობაშიც, შეიძლება ითქვას, დიდი როლი ჰქონდა ხალხოსნურ პროპაგანდას. „ის დღესდღეობით ნაადრევია“ და შეაჩერეო, — სწერდა მიხეილ ყიფიანი მეგრულ რევოლუციონერ აფაქიძეს¹.

აღსანიშნავია ისიც, რომ ჩვენი ხალხოსნები, იზიარებდნენ რა საყოველთაო სახალხო აჯანყების სისტემატური პროპაგანდის გზით მომზადების ლავრისტულ თეორიას, გ. მეგრელიშვილის სამართლიანი შენიშვნით², მაინც არ იყვნენ წმინდა წყლის ლავრისტები. მართალია, ისინი ერთდროული აფეთქების მოწყობას ბაკუნინით დღევანდელი დღის საქმედ არ თვლიდნენ, მაგრამ არც იმას ფიქრობდნენ (ლავროვის მსგავსად), რომ მისი განხორციელება მხოლოდ შორეულ მომავალში შეიძლებოდა მომზადარიყო და ისიც წლების განმავლობაში წარმოებულ იქნა ახსნა-განმარტებისა და საგანმანათლებლო მუშაობის შედეგად.

¹ სცია, ფ. 153, საქ. 35, ფურტ. 34.

² Г. Мегрелишвили, Грузинская общественно-экономическая мысль во второй половине XIX века, т. II, гл. 504.

როგორც მასალებიდან ჩანს, საქართველოსა და ამიერკავკასიაში მოქმედ ხალხოსნებს შორის თვით ხანმოკლე პროპაგანდის მოწინააღმდეგენიც ყოფილან. მათი აზრით, ხალხი რევოლუციისთვის სავსებით მზად იყო და ამიტომ ისინი საჩქაროდ სიტყვიდან საქმეზე გადასვლას მოითხოვდნენ. ასეთების რიცხვს ეკუთვნოდა, მაგალითად, უნტერ-ოფიცერი ალექსანდრე იოაკიმოვი, რომელიც, როგორც აღვნიშნეთ, ხალხს ნაჯახისკენ და მონარქიული წყობილების დაუყოვნებლივ დათრგუნვისაკენ მოუწოდებდა. იგივე ითქმის ელიზავეტპოლის (თანამედროვე განჯის) რეალური სასწავლებლის მასწავლებელ პეტრე პავლეს ძე დოლინსკიზე, რომლის წერილში მიხეილ ყიფიანისადმი, თბილისის სასამართლო პალატის პროკურორის სიტყვით, ნათქვამი ყოფილა: «Подготовка народа к восстанию посредством раздачи книг и пропаганды идет трудно и что следует сосредоточить деятельность на постоянной поддержке народных вспышек, пользоваться случаем для возбуждения... страстей и раздуть их по мере сил»¹.

ქართველი ხალხოსნების კავშირი რუსეთის რევოლუციურ წრეებთან. ჩვენს ხალხოსნებს, როგორც მასალებიდან ჩანს, მკიდრო კავშირი ჰქონიათ რუს და რუსეთში მყოფ ქართველ რევოლუციონერებთან. ეს კავშირი, პირველ ყოვლისა, კავკასიის მოწინავე ახალგაზრდობის პროპაგანდისტული ლიტერატურით მომარაგებაში გამოხატულა. იაგორ იოსელიანის ცნობით, მაგალითად, ვლადიკავკაზის (დღევანდელი ორჯონიძის) ბიბლიოთეკის შექმნა-დაარსება, რასაც ვფიქრობთ, ადგილი ჰქონია არა უადრეს 1874 წლისა, მომხდარა რუსეთის რევოლუციური წრეების უშუალო დახმარებით. ეს დახმარება, როგორც მოსალოდნელიც იყო, არც მომდევნო ხანაში შეწყვეტილა. „მოსკოველთა“ ორგანიზაციის თვალსაჩინო წარმომადგენელი გიორგი ზდანოვიჩი (მაიაშვილი) ერთ თავის ქართველ მეგობარს სწერდა: გიგზავნით წიგნებსა და რევოლუციურებს, გაშალეთ მუშაობა, დაერიეთ მტერს და დაუნდობლად ხოცეთ იგიო². ზრისტოფოროვის მოხსენების თანახმად კი, 1876 წლის 20 აგვისტოს ქუთაისის ჩასულა პეტერბურგის უნივერსიტეტის სტუდენტი ვინმე გლუზოვსკი, რომელსაც პროპაგანდისტული წრის დავალებით ისეთი „აქრძალული ლიტერატურა“ ჩაუტანია, როგორიცაა: „ინტერნაციონალის განვითარების ისტორია“, „რევოლუციური პროპაგანდის ამოცანები რუსეთში“, „სახელმწიფოებრიობა და ანარქია“, „რა უნდა ხალხს“, „რუსეთის არმიის ოფიცრებს“ და სხვ.

რუსეთის რევოლუციური ცენტრი პერიფერიაში მომუშავე ხალხოს-

¹ ს.ცია, ფ. 7, ანაწ. 3, საქ. 2506, ფურც. 16.

² Г. Мегрелишвили, Грузинская общественно-экономическая мысль во второй половине XIX века, т. I, გვ. 465.

ნებს მატერიალურ შემწეობასაც აძლევდა. ერთი საბუთის თანახმად, მაგალითად, ვილაც სტუდენტ რატიევს მოსკოვიდან ჩამოუტანია 40 მანეთი და არსენა კალანდამის მეშვეობით ეგნატე იოსელიანისათვის გადაუცია. მეორე საბუთის მიხედვით კი მოსკოვის წრეს სხვა დროს უფრო დიდი თანხა — 700 მანეთი გამოუგზავნია. დასასრულ, ჟანდარმერიის მიერ შეკრებილი მასალების მოწმობით, ქართველ ხალხოსნებს გადაწყვეტილი ჰქონიათ «Избрать из своей среды одно лицо, которое отправится в Москву с поручением занять от тамошнего кружка 2 тыс. рублей и на эти деньги перевести станок».

რუსი ან რუსეთში მყოფი ქართველი ხალხოსნები, რომელთაც კონსპირატიული საქმიანობის მეტი გამოცდილება ჰქონდათ, ამ გამოცდილებას უზიარებდნენ პერიფერიაში მომუშავეებს, აძლევდნენ მათ სათანადო რჩევა-დარიგებას. ასეთი რჩევა-დარიგების შესანიშნავ ნიმუშს წარმოადგენს გიორგი ზდანოვიჩის წერილი საქართველოს ხალხოსნური ორგანიზაციის წევრებისადმი, რომელშიც ლაპარაკია პროპაგანდისტულ მუშაობის გაშლა-გაფართოების ფორმებისა და გზების შესახებ¹.

მთავრობის საწინააღმდეგო მოძრაობის გადრმავებას ხელს უწყობდნენ გარემოების გამო „მცირედი ზნით“ რუსეთიდან საქართველოში ჩამოსული რევოლუციონერები. ერთი მათგანი, იაგორ იოსელიანის მოწმობით, პეტერბურგის სატყეო ინსტიტუტის სტუდენტი ვიქტორ ალექსანდრეს ძე დანილოვი ყოფილა. 1874 წელს ის თბილისს სწვევია და მოწაფეებას მომზადების საფარქვეშ პროპაგანდისტულ მუშაობას შესდგომია.

მალე დანილოვი თბილისიდან დუხობორებით დასახლებულ სოფ. ვორონცოვკაში გადასულა და იქ რევოლუციური იდეების პროპაგანდა დაუწყო. ის, თურმე, მშრომელ მოსახლეობას „უმალლესი მთავრობის, რელიგიისა და მიწაზე საკუთრების საწინააღმდეგო აზრებს უნერგავდა“² და სამართლიანი საზოგადოებრივი წყობილების დამყარებისკენ მოუწოდებდა. მაგრამ რუსი ნაროდნიკის ეს საქმიანობა დიდხანს არ გაგრძელბულა — 1874 წლის სექტემბრის თვეში იგი ჟანდარმერიას დაუპატიმრებია და ციხის კედლებში გამოუმწყვდევია³.

წელიწადნახევრის პატიმრობის შემდეგ ის რუსეთში გადაუყვანიათ და მის თბილისელ თანამოაზრე მარიამ ნადეჟდინა-შავერდაშვილთან ერთად გაუსამართლებიათ 1877 წელს „193-ის პროცესზე“. მათ ბრალად ედებოდათ კანონის საწინააღმდეგო საზოგადოების შედგენა, რომლის

¹ «Красный архив», т. I, (XX), 1927, გვ. 195.

² მომყავს ზ. შ ე ე ლ ი ძ ი ს წიგნიდან რევოლუციურ-ხალხოსნური მოძრაობა საქართველოში, გვ. 74.

³ ი. იოსელიანი, წარსულიდან, ლიტერატურული მუზეუმი, ი. იოსელიანის ფონდი, ს.ქ. 2855/31.

„მიზანი იყო არსებული წყობილების ძალდატანებით შეცვლა ცოტად თუ ბევრად ახლო მომავალში“¹. სასამართლომ 1878 წლის 23 იანვრის განაჩენით დანილოვს ციმბირში გადასახლება, ხოლო ნადეჟდინა-შავერდაშვილს პოლიციის ზედამხედველობის ქვეშ დატოვება მიუსაჯა².

იაგ. იოსელიანი თავის მოგონებაში ლაპარაკობს აგრეთვე ვინმე იური ბოგდანოვიჩის შესახებ, რომელიც ჩამოსულა თბილისში ერთი უცნობი, წყაროში დაუსახელებელი, ობიექტის ასაფეთქებლად³.

საარქივო მასალები საქართველოში მოქმედ რუს ნაროდნიკებს შორის სერგეი შვეცოვსაც ასახელებენ. მას როგორც პეტერბურგის ეანდარმთა სამმართველოს ცნობიდან ჩანს, ჯერ კიდევ კავკასიაში ჩამოსვლამდე უწარმოებია მთავრობის საწინააღმდეგო მუშაობა ნოვგოროდის გუბერნიის ჩერეპოვეცკის მაზრის გლეხებში, რაც სიტყვიერ პროპაგანდასა და აკრძალული ლიტერატურის გავრცელებაში გამოხატულა⁴. ხელისუფლების მიერ შემჩნეული შვეცოვი 1875 წელს პეტერბურგში გადასულა, სადაც იგი ბიკოვის გვარით თავის დის ბინაზე მოწყობილა საცხოვრებლად⁵. მომდევნო 1876 წელს ის სტუდენტ ბოიარსკის სახელზე გაცემული მოწმობით თბილისში ჩამოსულა და ბინით ეგნატე იოსელიანთან მოწყობილა. აქ შვეცოვი, ქართველი მეგობრების დახმარებით, მელიქიშვილის ტიპოგრაფიაში დასაქმებულა და მუშებს შორის რევოლუციურ-პროპაგანდისტული საქმიანობა გაუშლია⁶. მაგრამ საქართველოს დედაქალაქში მისი ცხოვრება ხანგრძლივი არ ყოფილა — 1876 წლის ოქტომბერში ეგნატე იოსელიანის ბინის გაჩხრეკისას ეანდარმერიას მასპინძელთან ერთად ისიც დაუპატიმრებია⁷.

საიდუმლო ორგანიზაციის ჩავარდნა, მისი წევრების დაპატიმრება და დასჯა. ხალხოსნების საქმიანობას ეანდარმერია კარგა ხნის განმავლობაში ადევნებდა თვალყურს და ჯაშუშების იაგორ იოსელიანის, გაბრიელ ბაქრაძისა და სიმონ გოგოლაძის დახმარებით აგროვებდა მასალებს მათი

¹ ЦГИА СССР, ф. 1282, оп. 2, д. 5, лл. 10—17. მომყავს ზ. შველიძის წიგნიდან, რევოლუციურ-ხალხოსნური მოძრაობა საქართველოში.

² ზ. შველიძე, რევოლუციურ-ხალხოსნური მოძრაობა საქართველოში, გვ. 78.

³ ი. იოსელიანი, წარსულიდან, ლიტერატურული მუზეუმი, ი. იოსელიანის ფონდი, საქმე 2855/31.

⁴ სსცა, ფ. 7, ანაწ. 3, საქ. 2506, ფურც. 34.

⁵ იქვე, ფურც. 32.

⁶ იქვე, ფურც. 36.

⁷ იქვე, ფურც. 29.

„დანაშაულებრივი“ მოქმედების შესახებ. ამ მასალების საფუძველზე, როგორც ზემოთაც აღვნიშნეთ, თბილისის გუბერნიის ჟანდარმთა სამმართველოს უფროსის თანაშემწემ შტაბსკაპიტანმა ხრისტოფოროვმა 1876 წლის სექტემბრის დასაწყისს ხელისუფლებას წარუდგინა ვრცელი მოხსენება მთავრობის საწინააღმდეგო საიდუმლო ორგანიზაციის პრაქტიკული საქმიანობის შესახებ. იმავე წლის 4 ოქტომბრის განკარგულებით გადაწედა ჩატარებულყო ერთდროული დაკვირვები არა მარტო საქართველოში, არამედ სხვა ადგილებშიც, სადაც კი ქართველ ხალხოსნებთან დაკავშირებული რევოლუციონერები ეგულებოდათ. 6 ოქტომბერს კი დილაადრიან ჟანდარმერია თავს დაესხა თბილისისა და ქუთაისის გუბერნიებში მცხოვრებ ხალხოსნებს და მასობრივად დააპატიმრა ისინი.

დააპატიმრეს პირველ რიგში ე. იოსელიანი. მისი დაპატიმრების დღესვე დაკავებულ იქნა აგრეთვე მეორე ხალხოსანი არსენ კალანდაძე, რომელსაც კუთხის რაიონში ქართული წიგნების სამკითხველო ჰქონდა მოწყობილი. გაჩხრეკა-დაპატიმრების რამდენიმე საათის შემდეგ კალანდაძის ბინას წერილების დამტარებელი ეწვია და იქ დამხდურს დახურული კონვერტი გადასცა, რომელშიაც საზღვარგარეთიდან ჩამოსული წიგნების „ნაკლანდი“ აღმოჩნდა. ამანათი მიიღეს და გადამაღეს, ისე რომ ჟანდარმერიას არაფერი გაუგია, მიუხედავად იმისა, რომ მას, როგორც ვნახეთ, უცხოეთიდან საიდუმლო ლიტერატურის გამოგზავნის შესახებ სათანადო ცნობა ჰქონდა მიღებული!

ეგნატე იოსელიანისა და არსენ კალანდაძის გარდა ჟანდარმერიამ დააპატიმრა აგრეთვე ხალხოსნური მოძრაობის ისეთი თვალსაჩინო წარმომადგენლები, როგორიც იყვნენ მიხეილ ყიფიანი, ვასილ სამაღაშვილი, ვასილ დეკანოზიშვილი, რომან ფავლენიშვილი, ლევან ჩერქეზიშვილი, ვარლამ გაბიჩვაძე, ალექსანდრე მაყაშვილი, სოფრომ მგალობლიშვილი, დავით ფურცელაძე და სხვ. საიდუმლო ორგანიზაციის გახსნასთან დაკავშირებით ჟანდარმერიამ პასუხისგებაში მისცა სულ 80-ზე მეტი კაცი¹. აქედან რამდენიმე, სახელდობრ — ქრისტიანე რაროკი, არდასიანოვი, სოხიევი, ფილაოვი, პისარევი, პროხოროვი და პოპოვი ვლადიკავკაზიდან იყვნენ და დააპატიმრეს იმ წერილების საფუძველზე, რომლებიც ეგნატე იოსელიანს უპოვეს გაჩხრეკის დროს. ისინი, დოკუმენტის სიტყვით,

¹ ი. იოსელიანი, წარსულიდან, ლიტერატურული მუზეუმი, ი. იოსელიანის ფონდი, საქმე 2855/31.

² იხ. «Ведомость обвиняемым по делу преступной пропаганды в губерниях Тифлисской и Кутаисской» — სსცია, ფ. 7, ანაწ. 3, საქ. 2506, ფურც. 114—119.

ამელავენდნენ ქართველი ხალხოსნების ხელმძღვანელის „ურთიერთობას ვლადიკავკაზის წრესთან“¹.

აღსანიშნავია, რომ უანდარმერიას, რომელიც ესოდენ გაშმაგებით ეძებდა თითოეულ რევოლუციონერს, ზოგი მაინც გადაურჩა და პასუხისგებაში არ მოხვდა. ეს ითქმის პირველ რიგში შიო დავითაშვილზე, რომელიც, მართალია, პოლიციამ დაიბარა და დაკითხა კიდევ, მაგრამ „მკვნე დამნაშავედ“ არ სცნო და გაანთავისუფლა. ასევე იღბლიანი აღმოჩნდნენ აგრეთვე მათე კერესელიძე, ილიკო ჭავჭავაძე, თეოფილე კანდელაკი და სხვ. ხოლო ისიდორე ქიქოძე, პლატონ გაბიჩვაძე, კონსტანტინე ბაქრაძე და ვიქტორ მელენჩუკი, ვითარცა გადამალულები, დამსჯელმა ორგანოებმა საერთოდ ვერ ჩაიგდეს ხელში. ამიტომ, ბუნებრივია, უმაღლესმა ხელისუფლებამ ჩამოთვლილ პირებს ვერ გამოუტანა კონკრეტული სასჯელი და მათი გასამართლება მომავლის საქმედ გამოაცხადა².

პასუხისგებაში მყოფმა პირებმა ყველაფერი გააკეთეს იმისათვის, რათა საგამომძიებლო ორგანოებისთვის გზა-კვალი აებნიათ. გარდა რამდენიმე კაცისა, მათ შორის იაგორ იოსელიანის, რომელიც ფორმალურად მაინც გადიოდა საქმეში, და მელიტონ ნაკაშიძისა, თითქმის ყველამ უარყო წაყენებული ბრალდება. ფარული საზოგადოების საიდუმლოება არავის გაუცია.

მათი ასეთი სიმტკიცე, ხშირ შემთხვევაში, მძიმე მდგომარეობაში აყენებდა უანდარმერიას. ასეთ მდგომარეობაში ჩავარდნილა, მაგალითად, კაპიტანი ხრისტოფოროვი, რომელსაც, მიუხედავად დიდი მონდომებისა, ვერ დაუმტკიცებია ეგნატე იოსელიანისათვის სოციალისტური იდეების პროპაგანდა ხალხში. ამის გამო ის იძულებული გახდა სახელდახელოდ შეეთხზა ახალი ბრალდება — საიდუმლო „საზოგადოების შექმნა-აღსადგენად საქართველოს სამეფოსი“³. ეს იყო კაცის მასხარად აგდება⁴, წერს ქართველი ხალხოსნების მეთაური, რომელიც ხელისუფლებამ ყველაზე მკაცრად დასაჯა.

მიხეილ ყიფიანის საწინაამდგომლად ძიებას გააჩნდა: 1) გაჩხრეკა-დაპატიმრების დროს ხელში ჩაგდებული საექვო ხასიათის პოლიტიკური

¹ სსცა, ფ. 7, ანაწ. 3, საქ. 2506, ფურც. 23; Представление прокурора Тифлисской судебной палаты: „შ. დ ა ვ ი თ ა შ ვ ი ლ ი, ხალხოსნური მოძრაობა საქართველოში, გვ. 55—56.

² მათ შესახებ გამოტანილ დადგენილებაში ნათქვამია: «Привлечь к ответственности по обнаружению их местожительства» (სსცა, ფ. 7, ანაწ. 3, საქ. 2506, ფურც. 114—119).

³ ი. იოსელიანი, წარსულიდან, ლიტერატურული მუხვები, ი. იოსელიანის ფონდი, საქმე 2855/31.

⁴ იქვე.

ლიტერატურა, 2) ბრალდებულის მიერ შედგენილი სალაროს (ჯამის) წესდების ტექსტი და 3) პეტრე დოლინსკის და გიორგი ზდანოვიჩის („რიჟის“) წერილები მისდამი. პირველ წერილში ლაპარაკი იყო ელიზავეტპოლში პროპაგანდისტული საქმიანობის მიმდინარეობის თაობაზე, ხოლო მეორეში იმის შესახებ, თუ რანაირი ჩვენება უნდა მისცეს მან ორგანიზაციის ჩავარდნის შემთხვევაში ჟანდარმერიას პასუხისმგებლობის თავიდან ასაცილებლად¹. ყიფიანს, როგორც ჩანს, კატეგორიულად უარყვია მისთვის წაყენებული ბრალდება და უცდია მთელი სიმძიმე ჯაშუშ იოსელიანზე გადაეტანა. «Бывший студент С.-Петербургского технологического института Михаил Кипиани, — не сознавая ни в замысле устроить тайное общество, ни в участии в этом деле, показал, что найденные у него книги он получил от Егора Иоселиани, который подговаривал его переводить их на грузинский язык; письмо от П. П. Долинского (к нему попало) не помнит каким образом и на содержание его не обратил внимания. Письмо (же)... от Рыжего было дано его брату, Луарсабу, для передачи ему (ყიფიანი — ავტ.) каким то проезжим с рыжей бородой... (Наконец) устав кассы «Джами» составлен им для оказания пособия бедным студентам»².

ვასილ სამადაშვილს ბრალდების დასამტკიცებლად საგამომძიებლო ორგანოები გაჩხრეკის დროს ნახულ შემდეგ ნივთიერ საბუთებს უყენებდნენ: აკრძალულ ლიტერატურას (გაზეთი „ვერიოლი“, ჟურნალი „რაბოტნიკი“, ბროშურა „ოთხი ძმის ზღაპრისა“ და ზოგი სხვა ბროშურის ქართული თარგმანი და სხვ.), რუსულ-ქართული ასოების გროვასა და გიორგი უთურგაულის წერილს რომელიც საგნის სწავლებისა და მისი პროგრამის შესახებ³. ამის საპასუხოდ სამადაშვილს, პროკურორის სიტყვებით რომ ვთქვათ, განუცხადებია, რომ მან წიგნები და ბროშურები იყიდა თბილისის ერთ-ერთ ქუჩაზე სრულიად უცნობი პირისგან, რომ თარგმანი ქართულ ენაზე შესრულებულია თარგმანობის საქმეში დახელოვნებულ შიშნით, რომ ასოები შექმნილია საამკინძაო სახელოსნოს გასამართავად და რომ ის არასოდეს არ ირიცხებოდა საიდუმლო ორგანიზაციაში და საერთოდ არაფერი იცის მისი არსებობა-მოქმედების შესახებ⁴.

¹ სსცია, ფ. 7, ანაწ. 3, საქ. 2506, ფურც. 16—17.

² იქვე, ფურც. 18—19.

³ იქვე, ფურც. 42—43.

⁴ იქვე, ფურც. 43—44.

სამადაშვილის ჩვენებასთან დაკავშირებით დაკითხულ გიორგი უთურ-გაულს ძიებისთვის მოუხსენებია, რომ ის სასულიერო სემინარიის ამხანაგებთან, მათ შორის სამადაშვილთან ერთად, ცდილობდა აღედგინა ქართული ენის უფლებები ღვთისმსახურებაში და გაეხსნა სახალხო სკოლები. მაგრამ, რადგანაც სემინარიის ხელმძღვანელობა არ ითმენდა მსგავს საქმიანობას, ისინი იძულებული იყვნენ კონსპირაციულად ემოქმედათ და ამით თავიდან აეცილებინათ ადგილობრივი ადათ-წესების დევნით აღშფოთებული ხალხის საყოველთაო აჯანყება. ჩემს წერილში სამადაშვილისადმი სწორედ ამის თაობაზე იყო ლაპარაკიო — დაუსრულებია თავისი ჩვენება უთურგაულს¹.

საიღუმლო ორგანიზაციის არსებობისა და მასში თავიანთი მონაწილეობის ფაქტი უარუყვიათ აგრეთვე: დავით ფურცელაძეს, ვასო დეკანოზიშვილს, მელქისედექ მახარაძეს, ალექსანდრე მაყაშვილს, ნესტორ კანდელაკს, გრიგოლ ავალიშვილს, ანტონ ლორთქიფანიძეს, ლევან ჩერქეზიშვილს, გრიგოლ გაბაშვილს, ილიკო ჭიჭინაძეს, იოსებ მაყაშვილს, სოფიო ჯორჯაძეს, ალექსანდრე მაყაშვილს, სტეფანე ჭრელაშვილს, რომან ფავლენიშვილს, ვარლამ გაბიჩვაძესა და სხვებს.

საბოლოოდ, საქმეში ჩართული და პასუხისგებაში გადაცემული 82 კაცის ბედი შემდეგნაირად გადაწყდა. ოცდათვრამეტს ბრალდება ვერ დაუმტკიცეს და გაანთავისუფლეს. იგივე გააკეთეს მელიტონ ნაკაშიძისა და იაგორ იოსელიანის მიმართ მთავრობის წინაშე განსაკუთრებული დამსახურებისათვის. რომან ფავლენიშვილისა და ვასილ დეკანოზიშვილის გარდაცვალების გამო საქმე მათ მიმართ წარმოებით შეწყვეტილ იქნა. სერგეი შვეცოვისა და ალექსი არდასიანოვის საქმე პეტერბურგისა და მოსკოვის უანდარბთა სამმართველოებს დაუბრუნეს, სადაც მათ შესახებ მიმდინარეობდა ძიება წინათ ჩაღენილი „დანაშაულისათვის“. მიმალული ისიდორე ქიქოძის, კონსტანტინე ბაქრაძისა და პლატონ გაბიჩვაძის საკითხი გადაიდო. დასახელებულ პირთა გასამართლება უნდა მომხდარიყო მომავალში მათი ადგილსამყოფელის დადგენისა და დაპატიმრების შემდეგ. დასასრულ, მღვდელ გიორგი ქიქოძის (ისიდორეს მამის) შესახებ ამპერატორის მიერ მოწონებულ მეფისნაცვლის დასკვნაში ნათქვამი იყო: «Оставить свободным от дальнейшей ответственности, но сообщить епархиальному начальству о сделании ему строгого внушения о том, что в его Звании ему следовало обращать большего внимания на поведение сына»².

დანარჩენ 34 კაცს კი ხელისუფლებამ მიუსაჯა³: ეგნატე იოსელიანსა

¹ სსცა, ფ. 7. ანაწ. 3, საქ. 2506, ფურც. 44.

² იქვე, ფურც. 114—119.

³ იქვე.

და მიხეილ ყიფიანს — სამუდამო გადასახლება აღმოსავლეთ ციმბირში¹,
ვასილ სამაღაშვილს — ორი წლის პატიმრობა, ვარლამ გაბიჩვაძეს —
ერთი წლის, დავით ფურცელაძეს — 8 თვის, მელქისედექ მახარაძესა და
სტეფანე ჭრელაშვილს — სამ-სამი თვის, ალექსანდრე მაყაშვილს, ანტონ
იოსელიანს, ანთიმოზ ჯულელსა და ნესტორ კანდელაკს — ორ-ორი თვის,
დემიტრი ოსტრევისა და იოსებ ბაქრაძეს — ექვს-ექვსი თვის, არშაკ საფა-
როვს, არსენ კალანდაძეს, აპოლონ კორძაიას, ანტონ შავიშვილს, ბესარიონ
ლოსაბერიძეს, პავლე იახნეცს, სოფრომ მგალობლიშვილს, გრიგოლ ავა-
ლიშვილს, ნიკოლოზ ხუდადოვსა და კონსტანტინე ყიფიანს — თითო-
თითო თვის, ანტონ ლორთქიფანიძეს, რაროკს, გრიგოლ გაბაშვილს,
გიორგი უთურგაულს, ლევან ჩერქეზიშვილსა და ილია ჭიჭინაძეს — სამ-
სამი კვირის, ალექსანდრე ნანეიშვილსა და იოსებ მაყაშვილს — ორ-ორი
კვირის. რაც შეეხება ელენე ყიფიანს, სოფიო ჯორჯაძესა და ოლღა საფა-
როვას — ისინი ხელისუფლებამ დააჯარიმა, პირველი — 100 მანეთით,
ხოლო მეორე და მესამე — ორმოცდაათ-ორმოცდაათი მანეთით.

ასეთი, შედარებით რბილი, განაჩენის გამოტანა აიხსნება იმით, რომ
ძიებამ, როგორც ზემოთაც აღვნიშნეთ, პასუხისგებაში გადაცემულ პი-
რებს, თვით საიდუმლო საზოგადოების თვალსაჩინო წევრებსაც კი, მათი
სიმტკიცისა და ერთსულოვნობის გამო საფუძვლიანად ვერ დაუმტკიცა
წაყენებული ბრალდების სისწორე. გარდა ამისა, ეტყობა, ანგარიში (ნა-
წილობრივ) იმასაც გაეწია, რომ ორგანიზაცია ჩავარდნის მომენტისათვის
არსებითად შექმნა-ჩამოყალიბების პროცესში იმყოფებოდა და ვერ მო-
ასწრო ბევრის გაკეთება².

§ 4. ხალხოსნური მოძრაობა 80-იან წლებში

საზოგადოებრივი მოძრაობისა და საზოგადოებრივი აზრის ზოგი
მკვლევარის შეხედულებით, ხალხოსნურ მოძრაობას საქართველოში მხო-
ლოდ ეპიზოდური ხასიათი ჰქონდა. ის, მათი სიტყვით, ვითარცა ზედაპი-
რული და არა მტკიცე საფუძვლებზე დამყარებული მოვლენა, უკვალოდ
გაქრა 1876 წელს, როდესაც ქანდარმერამ გაანადგურა ქართველი ხალ-

¹ უფრო მოგვიანებით ხელისუფლებამ აღმოსავლეთი ციმბირი ორენბურგის გუბერ-
ნიით შეცვალა და გადასახლებული პირებიც იქ გაიგზავნენ სასჯელის მოსახდელად (სსცია,
ფ. 7, ანაწ. 3, საქ. 2506, ფურც. 170).

² ამ მომენტს ხაზს უსვამს სხვათა შორის თბილისის სასამართლო პალატის პროკურორი.
გ. ანდრეევი თავის 1877 წლის 7 ივნისის წარდგინებაში (სსცია, ფ. 7, ანაწ. 3, საქ. 2506,
ფურც. 84).

ზოსნების პირველი არალეგალური ორგანიზაცია და დააპატიმრა მისი თითქმის ყველა თვალსაჩინო წევრი¹.

ასეთი დებულება, როგორც ქვემოთ ვნახავთ, სწორი არ არის, რაც ჯერ კიდევ 1928 წელს აღნიშნა პროფ. სიმონ ხუნდაძემ. „1876 წლის დამარცხების შემდეგ, — წერდა იგი, — არ გაუვლია რამდენსამე ხანს, რომ ჩვენში კვლავ გააჩაღა მუშაობა ნაროდნიკულმა ინტელიგენციამ. 70-იანი წლების მიწურულში და 80-იანი წლების დასაწყისის საქართველოში წარმოიშვა ნაროდნიკულად მოაზროვნე ინტელიგენციის ახალი თაობა. 80-იანი წლების ნაროდნიკებს განსაკუთრებული მნიშვნელობა ენიჭებოდათ ჩვენი საზოგადოებრივი აზროვნების ისტორიაში... 80-იან წლებში ნაროდნიკულმა ინტელიგენციამ, ერთის მხრივ, ხელი მოჰკიდა ლიტერატურულ შრომას, შეუდგა თავისი იდეოლოგიისა და სამოღვაწეო პროგრამის ლიტერატურულად დამუშავებას... (ხოლო) მეორეს მხრივ, — ...მკვეთრი პრაქტიკულ-რევოლუციური მოღვაწეობის განგრძობა მოინდომა და უმთავრესი ყურადღება მოსწავლე ახალგაზრდობას და მუშა ხელოსნებს მიაპყრო“² (ხაზი ჩვენია — ავტ.).

ამ მოსაზრების სისწორეს ადასტურებს როგორც ჟანდარმთა სამმართველოს მასალები, ისე მემუარული ლიტერატურა. დასახელებული წყაროებიდან ნათლად ჩანს, რომ 1876 წლის კატასტროფას ხალხოსნების რევოლუციურ-პროპაგანდისტული საქმიანობის შეწყვეტა კი არ გამოუწვევია, არამედ მხოლოდ რამდენადმე შეასუსტა. შიო დავითაშვილის მოწმობის თანახმად, სწორედ საიდუმლო ორგანიზაციის ჩავარდნის შემდეგ უტყდიათ ქართველ ხალხოსნებს პროპაგანდის წარმოება თბილისის ბუშებისა და ხელოსნების წრეში³. ჩანს, მსგავსი საქმიანობა მათ არც

¹ Ф. Махарадзе, Очерки революционного движения в Закавказии, Тифлис, 1927, გვ. 57; В. Бахтадзе, Очерки по истории грузинской общественно-политической мысли 60—90 годы XIX столетия, Тбилиси, 1960, გვ. 191.

² ს. ხუნდაძე, სოციალიზმის ისტორიისათვის საქართველოში, ტ. II, გვ. 47.

³ აზრი სხენებული პერიოდის ხალხოსნების გადაგვარების შესახებ. მკვეთრად და საფუძვლიანად გააკრიტიკა გ. მეგრელიძემ (იხ. მისი «Грузинская общественно-экономическая мысль второй половины XIX века и начала XX века» т. II, Тб., 1959, გვ. 5). აზრი იმის შესახებ, რომ ხალხოსნური ორგანიზაციის ჩავარდნა 1876 წელს ოდნავდაც არ ნიშნავდა საერთოდ ხალხოსნური მოძრაობის შეწყვეტას ჩვენში, გაზიარა აგრეთვე დოც. შ. გოზალიშვილმა (იხ. მისი «რევოლუციურ-ხალხოსნური მოძრაობა საქართველოში» თბ., 1960, გვ. 169—176 და აგრეთვე მთელი მეექვსე თავი).

ჩკინიგზის მუშებში შეუწყვეტიათ¹. მიუხედავად ერთგვარი წარუმატებლობისა, დაპატიმრებას გადარჩენილ ხალხოსნებს სოფელი არ დავიწყებათ და იქ მოწინავე აზრების გავრცელება გაუგრძელებით. ამ საქმეში სოფლის მასწავლებლობა ჩაბმულა. „გორის მაზრაში, — წერს შ. დავითაშვილი, — 1878 წლიდან რამდენიმე ახალი სკოლა დაარსდა. მასწავლებლებად სულ სემინარიაში ნამყოფი და იქიდან თავდანებებული თუ გამოირიცხული ახალგაზრდები იყვნენ. ყველას კარგად ვიცნობდი. როდესაც გორში ან ჭამაგირის მიღება ან სხვა საქმე გამოუჩნდებოდათ, სულ ჩემთან მოდიოდნენ. კარგად მახსოვს: მოსე ნათაძე, თეოფილე კანდელაკი, გრიგოლ ყიფშიძე, იოსებ ცხვედაძე, ალექსანდრე გაგლოშვილი, ლალო გულისაშვილი, ზაქარია გულისაშვილი, იოსებ კოშორიძე, დავით კაპანაძე. ზაქარია ოქუაშვილი, ნიკო ხუციშვილი.

თავის პირდაპირი დანიშნულების გარდა, ეს მასწავლებლები ხალხში რევოლუციურ აზრებს ავრცელებდნენ. მეტად მხნე და გულმხურვალე მუშაკი იყო ზაქარია გულისაშვილი, რომელიც გლეხებს ყოველ გაჭირვებაში ხელმძღვანელობდა და ამიტომ გლეხებსაც ის ძალიან უყვარდათ“² (ხაზი ჩვენია — ავტ.).

საერთო დაძაბული მდგომარეობა. 70-იანი წლების მეორე ნახევარში შედარებით სუსტად მიმდინარე რევოლუციურ-პროპაგანდისტული მუშაობა საგრძნობლად გაფართოვდა 80-იანი წლების დასაწყისიდან და იმდენად სერიოზული ხასიათი მიიღო, რომ მთავრობას მის წინააღმდეგ საბრძოლველად ძალების მაქსიმალური მობილიზაცია დასჭირდა. ბატონყმურ ურთიერთობათა ნაშთების დიდი მასშტაბით შემონახვა ჩვენთვის საინტერესო ხანის საქართველოში, დროებით ვალდებულ გლეხთა და საერთოდ სოფლის მშრომელი მოსახლეობის მძიმე სოციალ-ეკონომიური და პოლიტიკური მდგომარეობა, რუსი ნაროდნიკების გმირული საქმიანობა, იმპერატორ ალექსანდრე II-ის მკვლელობა 1881 წლის 1-ლ მარტს, რეაქციისა და ეროვნული ჩაგვრის ჩვეულებრივზე მეტად გაძლიერება და სხვ. — აი დაახლოებით ის მოვლენები, რომლებიც კვებავდა იმდროინდელი მოწინავე ქართველი საზოგადოების რევოლუციურ განწყობილებას, აღრმავებდა მის ოპოზიციურ სულისკვეთებას. სულ უფრო ხშირად და გაბედულად ისმოდა უკმაყოფილების ხმა ხალხის ფართო მასებში. არსებულის წინააღმდეგ პროტესტს სხვადასხვა ფორმა ჰქონდა, მაგრამ ყველაზე ხშირად ის მთავრობის საწინააღმდეგო სიტყვიერ თუ წერილობით გამოსვლებში ვლინდებოდა.

¹ შ. დავითაშვილი, ხალხოსური მოძრაობა საქართველოში, გვ. 60—65.

² იქვე, გვ. 79.

კავკასიის ადმინისტრაციის აზრი „ბოროტმოქმედთა წინააღმდეგ“ ბრძოლის გასაძლიერებელ ღონისძიებათა შესახებ. ხელისუფლებამ კარგად იცოდა, რომ საზოგადოებრივი ძალების აღზნებაში დიდი წვლილი მიუძღოდნოდა ხალხოსნებს, რომლებმაც, როგორც ქვემოთ ვნახავთ, ისევ გაშალეს თავიანთი საქმიანობა 80-იანი წლების დასაწყისიდან. უნდა აღმერიხა ენერგიულად იბრძოდა გაზრდილი პოლიტიკური საშიშროების წინააღმდეგ, მაგრამ ეს ბრძოლა მას არასაკმარისად ეჩვენებოდა და მის გაძლიერებას მოითხოვდა. ის აყენებდა, კერძოდ, საკითხს ოხრანკის შტატისა და ჯამუშთა დასაქირავებელი თანხის გადიდების შესახებ¹.

მეორე დოკუმენტში, რომელიც წარმოადგენს თბილისის გუბერნიის უნდა აღმერიხა სამმართველოს უფროსის თანაშემწის თავის უფროსისადმი მირთმეულ პატაკს (1884 წ.), ლაპარაკია აღგილობრივი ენების მცოდნე პირის ოხრანკის აპარატში მიღებისა და ამისათვის სათანადო საშტატო ერთეულების გამოყოფის აუცილებლობის შესახებ. ასეთი ნაბიჯის გადადგმას, დასახელებული მოხელის აზრით, მოითხოვდა საზოგადოებრივი წესრიგის „დამრღვევთა“ საქმიანობის განსაკუთრებული გამოცოცხლება და მათ წინააღმდეგ უფრო ეფექტური ბრძოლის წარმოების საჭიროება².

80-იანი წლების დასაწყისის კონკრეტული ვითარება აყენებდა საკითხს არა მარტო „ბოროტმოქმედთა“ წინააღმდეგ მებრძოლ დაწესებულებათა შტატების გადიდებისა, არამედ თვით ამ ბრძოლის ფორმებისა და მეთოდების შეცვლა-განახლების შესახებ. თბილისის გუბერნიის 1882 წლის პოლიტიკური მდგომარეობის მიმოხილვის ავტორი, მაგალითად, პირდაპირ ლაპარაკობს რევოლუციონერთა საქმიანობისადმი თვალყურის დევნების მანამდე არსებული წესების თითქმის სრული მოძველებისა და უვარგისობის შესახებ. მასი აზრით, ოხრანკას ამიერიდან წინა პერიოდისაგან განსხვავებით, განსაკუთრებული ყურადღება უნდა მიექცია არა იმდენად საზოგადოებრივი ცხოვრებისა და კანონის აშკარად დარღვევის ფაქტებისათვის, რამდენადაც „დანაშაულებრივი მოქმედების“ საიდუმლო გზით მომზადების შემთხვევებისათვის³.

ხალხოსნური წრეები თბილისში. ამრიგად, მთავრობა ყველაფერს აკეთებდა იმისათვის, რათა ხელი შეეშალა რევოლუციონერთა საქმიანობისათვის, არ დაეშვა საშიში აზრების გავრცელება, მიეგნო საიდუმლო წრეებისათვის, ამოეძირკვა ისინი და უზრუნველყო სრული „წესრიგისა“ და „მყუდროების“ დამყარება. მაგრამ ხელისუფლებამ მიზანს მაინც ვერ

¹ სსცია, ფ. 39 საქ. 16, ფურც. 1—2.

² იქვე, ფ. 153, საქ. 76, ფურც. 32—33.

³ იქვე, საქ. 55, ფურც. 47—58.

მიადწია. 80-იანი წლების დასაწყისიდან, როგორც ზემოთაც აღვნიშნეთ, ქართველმა ხალხოსნებმა მიუხედავად დიდი რეპრესიებისა, მაინც გაშალეს თავიანთი მუშაობა და შეუპოვარი ბრძოლა განაგრძეს არსებული სოციალურ-პოლიტიკური წყობილების წინააღმდეგ. ჩვენი ქვეყნის სხვადასხვა კუთხეში შეიქმნა საიღუმლო წრეები, რომელთა წევრები ნაროდოვოლცური მიმართულებისა იყვნენ და მის პროგრამას იზიარებდნენ. ეტყობა, ამ მიმართულებას დიდი სახელი და პატივისცემა ჰქონია მაშინ ქართველ ხალხოსნებში. „თუმცა ამ პარტიის ცენტრი, — წერს შ. დავითაშვილი — დაბოლოს მეტისმეტად მისუსტდა და სიცოცხლის ნიშან-წყალიც თითქო აღარა ჰქონდა, ჩვენ მაინც გვახსოვდა მისი ერთი დროის გმირული მოქმედება, მასიური პროცესები, მაღალი თანამდებობის პირთა განადგურება და მეფის მოკვლა. არ შეგვეძლო დაგვეჩერებია, რომ ეს პარტია დაიშალა და მისი უნარი მოქმედებისა სამუდამოდ ჩაჰკლა მთავრობის სასტიკმა ზომებმა. პირიქით, ჩვენ ვფიქრობდით, რომ პარტიამ ხელი მოჰკიდა უფრო ფრთხილ მუშაობას და რომ დროებით მიუყრება ნიშანია მომავალ ქარიშხლის მოახლოვებისა, ამ რწმენას თითქოს კიდევ ადასტურებდა ის ცნობები, რომელიც ჩვენ მოგვდიოდა. ამიტომ ჩვენ გვინდოდა ჩვენი მუშაობა უფრო გაგვეჩაღებია, რომ რუსეთის საერთო მუშაობას არ ჩამოვრჩენოდით“¹.

ერთი ასეთი ნაროდოვოლცური წრე ჩამოყალიბებულა თბილისში. მე-16 მეგრულ პოლკში 1881 წლის აგვისტო-სექტემბერში. მომდევნო წლის „შეზოდგომაზე ის გასცა მისმა ერთ-ერთმა წევრმა, პორუჩიკმა ანისიმოვმა, რომელიც, თურმე, ამ გზით ვარაუდობდა პოლკის ფულის გაფლანგვა-მითვისებაში გამოხატულ სახელმწიფოებრივი დანაშაულის გამოსყიდვას. როგორც ანისიმოვის ჩვენებიდან² და თბილისის გუბერნიის ჟანდარმთა სამმართველოს უფროსის პოლკოვნიკ პეკარსკის პოლიციის დეპარტამენტის სახელზე დაწერილი პატაკიდან³ ჩანს, დასახელებული საიღუმლო წრის წევრები ყოფილან ოფიცრები: მანუხინი, იოსებ ლიპომანი, ალექსანდრე ანტონოვი, ნიკოლოზ ალიხანოვი, არჩილ ციციშვილი. ვლადიმერ დერჟანოვსკი, ვახანძე, მიტინიკი და სამოქალაქო პირები — აგრონომი ალექსანდრე ელიოზიშვილი, რკინიგზის მაღალი რანგის მსახური პავლე იაკიმოვი, მეტყვევე ვიქტორ მელენჩუკი, ალექსანდრე ნანეიშვი-

¹ შ. დავითაშვილი, ხალხოსნური მოძრაობა..., გვ. 86—87.

² სსცია, ფ. 153, საქ. 64, ფურც. 13—23. ანისიმოვის ჩვენების ტექსტი დაბეჭდილია აგრეთვე კრებულში «История классовых борб в Закавказье», თბ., 1930, დამატება მეორე, გვ. 67—77.

³ სსცია, ფ. 153, საქ. 64, ფურც. 1—4.

ლი, მარიამ შერვაშიძე¹, თბილისის რეალური გიმნაზიის ყოფილი მოსწავლე ტერ-გრიგორიანი², სტეფანე ჭრელაშვილი³ და სხვ.

ორგანიზაციის შექმნა-ჩამოყალიბებაში აქტიური მონაწილეობა მიუღია ცნობილ რევოლუციონერ ქალს ანნა პრიბილევა-კორბას, რომელიც „ნაროდნაია ვოლიას“ აღმასრულებელი კომიტეტის დავალებით 1881 წლის ზაფხულში საქართველოს სწვევია. იგი თბილისში, სტეფანე ჭრელაშვილის მეშვეობით, პორუჩიკ ალექსანდრე ანტონოვს გასცნობია და მისთვის საიდუმლო წრის შექმნა შეუთავაზებია. ანტონოვს ეს წინადადება სიამოვნებით მიუღია, ახლო ამხანაგებისთვის გაუნდვია და მალე, შედარებით ვიწრო, ფარული საზოგადოება შეუქმნია. საზოგადოების წევრები შეძლებისდაგვარად იკრიბებოდნენ და პრაქტიკულ საქმიანობასთან დაკავშირებულ მრავალ მნიშვნელოვან საკითხს არჩევდნენ. ერთ-ერთ კრებაზე, რომელსაც გამცემი ანისიმოვიც დასწრებია, ლაპარაკი ყოფილა ორგანიზაციის წესდების შემუშავებასა და ახალი წევრების მიღების თაობაზე. შეკრებაზე სიტყვით გამოსულ ალექსანდრე ანტონოვს სხვათა შორის განუცხადებია, რომ იგი დაკავშირებულია რუსეთიდან ჩამოსულ ერთ ქალბატონთან და რომ ის მისგან ღებულობს აკრძალულ ლიტერატურას, „ნაროდნაია ვოლიას“ მგზნებარე ფურცლებს. დასასრულ კრებას დაუღვენია, რომ მისი მონაწილენი მომავალში უფრო დაახლოებოდნენ პოლკის ოფიცრებსა და ჯარისკაცებს, გაეგოთ მათი გუნებ-განწყობილება, გაეღვიძებინათ მათში უკმაყოფილების გრძნობა, შთაენერგათ ზიზლი არსებული რეჟიმისადმი და აღეზარდათ ისინი „სოციალისტური სულისკვეთებით“⁴.

საზოგადოების მეორე კრებას, რომელსაც, ავადმყოფობის გამო ანისიმოვი ვერ დასწრებია, ალექსანდრე ანტონოვის ნაცნობი „ქალბატონი“ ანნა პრიბილევა-კორბა სწვევია. იქ მას მოკლე ინფორმაცია გაუკეთებია და, ხაზი გაუსვამს რა რევოლუციური საქმიანობის წარმატებით მიმდინარეობისათვის, სინანული გამოუთქვამს ორგანიზაციის განკარგულებაში არსებული სახსრების აშკარა სიმცირის გამო⁵. პრიბილევა-კორბას თხოვნით მიუმართავეს დამსწრე საზოგადოებისათვის მატერიალური დახმარება აღმოეჩინა ნაროდოვოლცური ცენტრისთვის, რათა ამ უკანასკნელს განეხორციელებინა ყველა საჭირო, ძირითად ამოცანასთან დაკავში-

¹ იხ. პოლოციის დეპარტამენტის 1883 წლის 3 მარტის დეპეშა თბილისის გუბერნიის ეანდარმთა სამმართველოს სახელზე კრებულში «История классово́й борьбы в Закавказии», Тб., 1930, გვ. 78—79.

² იქვე.

³ იქვე.

⁴ სსცია, ფ. 153, საქ. 64, ფურტ. 13—14.

⁵ იქვე, ფურტ. 14—15.

რებული ღონისძიება¹. კრების მონაწილენი მხურვალედ შეხვედრიან ამ წინადადებას და ოთხ მათგანს (ლიპომანს, ანტონოვს, ალიხანოვსა და ციციშვილს) იქვე ასი მანეთი გაუღია².

ეს თანხა, ისე როგორც მერე შეკრებილიც, ორგანიზაციას, ანისიმოვის ჩვენებით, ტიპოგრაფიის გასამართავად გამოუყენებია³, ტიპოგრაფიისა, რომლის ხელმძღვანელობა საიდუმლო წრის ერთ-ერთ თვალსაჩინო წარმომადგენელს, „უკიდურესი მიმართულების“⁴ ვიქტორ მელენჩუკს დაკისრებია. სტამბისათვის საჭირო მოწყობილობა ორგანიზაციას მართლაც შეუძენია, მაგრამ ბეჭდურა საქმიანობა მაინც არ გაუშლია. ამის მიზეზად მელენჩუკს ანისიმოვისათვის შემდეგი ორი გარემოება დაუსახელებია: პირველი — ხმების გავრცელება (კონსპირაციულ მუშაობას შეუჩვეველი ახალგაზრდობის მიერ) ახლო მომავალში ტიპოგრაფიის გახსნის შესახებ და მეორე — სათანადო დასაბეჭდი მასალების უქონლობა⁵.

ორგანიზაცია, რომლის ხელმძღვანელად წყაროები ანნა პრიბილევა-კორბასთან ერთად ცნობილ რევოლუციონერს „ნაროდნაია ვოლიას“ ცენტრალური კომიტეტის წევრს, მერე კი ამხანაგების გამცემსა და დამბეზლებელს, საქართველოში პეტროვის გვარით ჩამოსულ სერგი პეტრეს ძე დეგავესაც ასახელებენ, მიზნად ისახავდა არსებული სოციალურ-პოლიტიკური სისტემის მოსპობა-განადგურებას და სამართლიან საფუძვლებზე დამყარებულ საზოგადოებრივი ცხოვრების დამყარებას. „პეტროვთან და საერთოდ... წრის შემქმნელ პირებთან საუბრის დროს, — ნათქვამია ანისიმოვის ჩვენებაში, — მე გავიგე, რომ რუსეთში არსებობს რევოლუციური გაერთიანება, რომლის მიზანია გაბატონებული სახელმწიფოებრივი წყობილების დამხობა. ეს გაერთიანება მზადაა ჩაიღინოს ყოველგვარი დანაშაული და მკვლელობაც კი. თბილისში ამ საზოგადოებას წრის შედგენა და პროკლამაციების გავრცელების გზით (ხალხის) გამრყენელი მოძღვრების გავრცელება სურდა. წრის მონაწილე სამხედრო წოდების პირნი ცდილობდნენ ოფიცრებისა და ჯარისკაცების ისე მომზადებას, რომ მათ ხელი შეეწყოთ (ნაროდოვოლცების) საბოლოო მიზნის მიღწევისათვის“⁶.

ორგანიზაციამ, როგორც ირკვევა, პრაქტიკულად ბევრის გაკეთება ვერ მოასწრო, პორუჩიკ ანისიმოვა საიდუმლო წრე სწორედ მაშინ გასცა, რო-

¹ სსცია, ფ. 153, საქ. 64, ფურც. 15..

² იქვე.

³ იქვე.

⁴ იქვე, ფურც. 17—18.

⁵ იქვე.

⁶ იქვე, ფურც. 22—23.

დესაც იგი არსებითად შექმნა-ჩამოყალიბების პროცესში იმყოფებოდა¹.

ოფიციალური მასალებისა² და შ. დავითაშვილის ცნობით³, ჟანდარმერიამ 1883 წლის დასაწყისში დააპატიმრა და ციხის კედლებში გამოკეტა ბევრი რევოლუციონერი, მათ შორის ოფიცრები მანუხინი, იოსებ ლიპოზანი, ალექსანდრე ანტონოვი, ნიკოლოზ ალიხანოვი, არჩილ ციციშვილი, ვანნაძე, მიტნიკი, ვლადიმერ დერჟანოვსკი და სამოქალაქო პირები ალექსანდრე ელიოზიშვილი, ვიქტორ მელენჩუკი, ეგნატე იოსელიანი, სტეფანე ჭრელაშვილი, ალექსანდრე ნანეიშვილი, მარიამ შერვაშიძე⁴ და სხვ. მთავრობა ზოგის მიმართ შედარებით მცირე სასჯელით დაკმაყოფილდა, ზოგს კი მან შორეულ მხარეში გადასახლება მიუსაჯა. ასეთი ბედა ეწიათ, კერძოდ, მარიამ შერვაშიძეს, ეგნატე იოსელიანს. სტეფანე ჭრელაშვილსა და ალექსანდრე ნანეიშვილს.

* * *

1882 წლის 7 მარტს თბილისის პოლიცემისტერის მოვალეობის დროებით შემსრულებელს მეოთხე მსროლელთა ბატალიონის მსახური, ნებოა დაქირავებული ვინმე ნიკოლოზ ტრუხაჩოვი ეწვია და მას თბილისის მოსწავლე ახალგაზრდობის რევოლუციური საქმიანობის დამადასტურებელი საყურადღებო ცნობები და ნივთიერი საბუთები მიაწოდა. მან დაასმინა, კერძოდ, ალექსანდრეს სახელობის თბილისის სამასწავლებლო ინსტიტუტის მეორე კლასის მოსწავლე, 20 წლის დავით ნიკოლოზის ძე ქადაგიძე და მისი ამხანაგები. ტრუხაჩოვმა, რომელიც ქადაგიძის მეზობლად ცხოვრობდა, მისი სახლში არ ყოფნის დროს, გაიტაცა და პოლიციას წარუდგინა „ნაროდნაია ვოლიას“ ფურცლები და წერილი ალექსანდრე გიორგის ძე ბერიძისადმი, ხელმოწერილი საიდუმლო ორგანიზაციის „კამჩატკის“ წევრების ფ. სულტანოვის, დ. ქადაგიძის, ნ. ჯაყელის, ე. თაყაიშვილის, ე. გორგასლიძისა და ტერ-პოლოსოვის მიერ⁵.

ძიებამ, მიუხედავად ბრალდებულთა სიმტკიცისა მაინც მრავალი საყურადღებო დეტალი გამოავლინა. თვითონ ტრუხაჩოვმა, გარდა ნივთიერი საბუთებისა, როგორც უკვე აღვნიშნეთ, ოხრანკას ბევრი საყურადღებო

¹ ორგანიზაციის გაცემაში ანისიმოვთან ერთად დიდი „ღვაწლი“ მიუძღვის სერგი დეგავესაც (იხ. გორის ხალხოსნების საქმიანობისადმი მიძღვნილი ნაწილი).

² იხ. კრებული «История классовой борьбы в Закавказии», Тб., 1930, გვ. 77—80

³ შ. დავითაშვილი, ხალხოსნური მოძრაობა..., გვ. 94, 95, 97.

⁴ მარიამ შერვაშიძე დაპატიმრებულ იქნა ბათუმში, სადაც ის იმ დროს სამკურნალოდ იმყოფებოდა (შ. დავითაშვილი, ხალხოსნური მოძრაობა..., გვ. 97—98).

⁵ სსცა, ფ. 39, საქ. 137, ფურც. 6. Представление прокурора Тифлисской судебной палаты Андреева от 10 апреля 1882 г.

სიტყვიერი და წერილობითი ცნობა მიაწოდა. მან დასახელებულ ორგანოს აცნობა, მაგალითად, რომ ქადაგიძესთან ხშირად იკრიბებიან ამხანაგები და მართავენ გაცხოველებულ კამათს, რომელიც წყდება მხოლოდ მის გამოჩენასთან დაკავშირებით¹. ქადაგიძე, დამსმენის მოწმობით, ალტაცებით შეხვედრია იმპერატორ ალექსანდრე II-ის მკვლელობას და ქება-დიდებათ შეუმკია ხსენებული აქტის მთავარი მონაწილენი—პეროვსკაია, ყელიაბოვი და კიბალჩიჩი. მათი ჩამოხრჩობით აღშფოთებულ ქართველ ნაროდოვოლცელს, დავიწყებია რა კონსპირაციის დაცვის აუცილებლობა, ტრუხაჩოვთან საუბრის დროს განუცხადებია: «Подлость и мерзость поступать таким образом с этими людьми. Не их, а тех, которые их судили, следовало бы повесить»². ქადაგიძის აზრით, როგორც ძიების მასალებიდან ჩანს, „აწინდელი ჩვენი ყოვლად უვარგისი სახელმწიფოებრივი მმართველობა უნდა შეცვლილიყო სოციალისტების სურვილისა და მოთხოვნების შესაბამისად“³.

მოწმედ გამოძახებულმა პოდპოლკოვნიკმა ნიკიფოროვმა, რომელთანაც ქადაგიძე ცხოვრობდა, ძიებას დაუდასტურა, რომ მისი მოზინადრე მართლაც გამოთქვამდა ზოგჯერ „მავნებლურ აზრებს“, რისთვისაც მან საგანგებოდ გააფრთხილა იგი ტრუხაჩოვის მეშვეობით და მეტი სიფრთხილისკენ მოუწოდა⁴.

1882 წლის 8 მარტს ქადაგიძე დააპატიმრეს და ბრალდებად აკრძალული ლიტერატურის შეძენა-გავრცელება, საეჭვო კრებების მოწვევა, მთავრობის საწინააღმდეგო აზრების პროპაგანდა და მეფის მკვლელობის აქტის სიხარულით მიღება წაუყენეს. ძიება ფიქრობდა (და არც თუ ისე უსაფუძვლოდ), რომ „კამჩატკა“, რომელიც ზემოთ მოვიხსენიეთ, ალექსანდრეს სახელობის თბილისის სამასწავლებლო ინსტიტუტში არსებული საიდუმლო ორგანიზაციის სახელწოდება იყო და ამიტომ პატიმარს ამასთან დაკავშირებული ახსნა-განმარტებაც მოსთხოვა. ქადაგიძემ თითქმის მთლიანად უარყო წაყენებული ბრალდება. «Давид Николаевич Кадагидзе, — ნათქვამია თბილისის სასამართლო პალატის პროკურორის 1882 წლის 10 აპრილის მოხსენებაში, — при предъявлении ему представленных Трухачевым изданий и письма, не признал первых своею собственностью и объяснил, что он никогда их не видел и не читал: что же касается до письма на имя товарища его Беридзе, то оно написано Султановым, подписано им, Кадагидзе, и другими и должно было быть отнесено им (სულთანოვის—ავტ.) больному Бе-

¹ სსიკ, ფ. 39, საქ. 137, ფურც. 6.

² იქვე, ფურც. 7.

³ იქვე.

⁴ იქვე, ფურც. 17.

რიდზე, ლეჯავშემუ ვ გოსპიტალე, ნო პოჩემუ თო ონ ოტოგო ნე ისპოლნილ ი პიშემო ოსტალეს ვ ყაშკე ოგო სთლას. ვყრეხენი «კამჩატკა» ზნაჩიტ ოსლედნიუ სკამიუ ვ კლასე ი «კამჩადალამი» ზაზვალისე სიდევსინე ნა ნეი, თ. ე. ონ, კადაგიდზე, ბერიდზე ი ვსე ოპდისავსინე პიშემო. ნაპისანო ონო ვ შუტკუ ი ვსტრეაჩაიშინესე ვ ნემ ვყრეხენი ო პრავილას «კამჩატკი» ი «ოსნოვას» ეე, ნე იმეიოთ ნიკაკოგო ზნაჩენი. ნიკაკიხ რავგოვოვო პოლიტეხსიკი კადაგიდზე ს ტრუხაჩევიმ ნე ველ, ა თაკჟე ნე ველი ი (ეგო) თოვარიში, იზრედკა კ ნემუ პრიხოდნივსინე... პერეპლეთნე სთანიკი დეივსთენილნი უ ნეგო ბილი, ნო კაკ თო ვდრუგ იზ კვარტირე პროპალი»¹.

აქედან, ჩვენი აზრით, ნათლად ჩანს, რომ ალექსანდრეს სახელობის თბილისის სამასწავლებლო ინსტიტუტში ნამდვილად შექმნილია ნაროდოვოლცური საიდუმლო წრე „კამჩატკა“, რომელსაც, ეტყობა, თავისი წესდება, საამკინძაო მანქანა და აკრძალული პოლიტიკური ლიტერატურა ჰქონია. შართალია, ქადაგიდემ ყოველივე ეს უარყო, მაგრამ არა ქეშმარიტების აღდგენის, არამედ თავდაცვისა და მოსალოდნელი სასჯელის მოხსნა-შემსუბუქების მიზნით.

ასევე ყველაფერი უარყო აზერბაიჯანელმა სულტანოვმაც, რომელიც იმავე 1882 წლის 9 მარტს იქნა დაპატიმრებული. გაჩხრეკის დროს პოლიციამ მას აღმოუჩინა მეფის მკვლელთა გასამართლების ფოტოსურათი და „დანაშაულებრივი“ შინაარსის წიგნაკი „წერილები პეტერბურგიდან“. «Фарадж бек Султанов, — მოახსენებდა პროკურორი ანდრეევი კავკასიის შხარის სამოქალაქო საქმეთა ნაწილის უფროსს, — ученик 2-го класса Александровского учительского института, относительно письма к Беридзе показал согласно с Кадагидзе. Что же касается до найденной у него брошюры «Письма из Петербурга», то он решительно не знает, как она к нему попала и о нахождении её у него и не подозревал. Фотографию, изображавшую суд над царевубийцами, приобрел из любопытства покупкой у разносчика на Солдатском базаре. У Кадагидзе бывал очень редко, сколько помнит раза три, из которых два раза не застал его дома»².

არც ინსტიტუტის დანარჩენმა მოსწავლეებმა: ნ. ჯაყელმა, ე. თაყაი-შვილმა, ე. გორგასლიძემ და ე. ტერ-პოლოსოვმა მისცეს ძიებას ხელსაყრელი ჩვენება. დადასტურეს რა ქადაგიდეს-სულტანოვის ჩვენების ძირითადი მომენტები, მათ ერთხმად განაცხადეს, რომ არც ერთ მათგანს

¹ სსცია, ფ. 39, საქ. 137, ფურც. 8—9.

² იქვე, ფურც. 10—11.

აზრადაც არ მოსვლია, რომ სიტყვით ან საქმით, მთავრობის საწინააღმდეგოდ ემოქმედა¹.

ამრიგად, ძიებამ დასახელებულ პირებს არსებითად ვერ დაუმტკიცა ბრალდება და ამიტომ იძულებული გახდა შედარებით მსუბუქი სასჯელით დაკმაყოფილებულიყო. ყოველ შემთხვევაში ასეთი იყო პროკურორ ანდრეევის აზრი. «Я полагаю бы полезным, — წერდა ის, — не давая этому делу хода в судебном порядке, воспитанников Александровского учительского института Давида Николаева Кадагидзе и Фараджа бек Султанова, выдержав под арестом две недели, отдать затем под надзор полиции на один год»².

სამწუხაროდ, ჩვენს ხელთ არსებული მასალებიდან არ ჩანს, თუ რით დამთავრდა ეს საქმე, მაგრამ საფიქრებელია, რომ ის თბილისის სასამართლო პალატის პროკურორის წარდგინების შესაბამისად გადაწყდა.



1883 წლის მარტის თვეში უანდარმერიამ, როგორც უკვე აღვნიშნეთ, განახორციელა მეორე მასობრივი დაპატიმრებანი და ბევრი სიმართლისათვის მებრძოლი ადამიანი რუსეთის იმპერიის შორეულ გუბერნიებში გაისტუმრა. ეტყობა, ხელისუფლების ასეთ სიმკაცრეს სასურველი შედეგი არ მოჰყოლია და საზოგადოების მოწინავე ნაწილში „წესრიგი“ ვერ აღდგენილა. არ იქნა და ვერ ეღიროსნენ მყუდროებას ოხრანკა და საგამომძიებლო ორგანოები, მათ თითქოს მოსვენება არ ეწერათ. ისინი დღე და ღამეს ასწორებდნენ, დაუზარებლად მუშაობდნენ, ჯაშუშების დიდ არმიას ამოქმედებდნენ, მაგრამ წარმატებას მაინც ვერ აღწევდნენ და მთავრობის საწინააღმდეგო საქმიანობას ბოლოს ვერ უღებდნენ.

„წყლის ამღვრევთა“ შორის ისევ აღექსანდრეს სახელობის თბილისის სამასწავლებლო ინსტიტუტი აღმოჩნდა. მისმა მოსწავლეებმა, მოწინავე პედაგოგების დახმარებით, შეადგინეს და 1883 წლის 29 ნოემბრიდან 14 დეკემბრამდე გაავრცელეს ქალაქში პროკლამაცია სათაურით «От учащих к обществу». ამ პროკლამაციაში, რომელიც სხვათა შორის საქართველოს ეგზარქოსსა და კავკასიის სასწავლო ოლქის მზრუნველსაც გაეგზავნა³, ნათქვამი იყო შემდეგი: „მთავრობამ ჩვენს აღმზრდელებს მისცა ახალი ინსტრუქცია, რომელიც მიზნად ისახავს ჩვენს მორალურ და გო-

¹ სსცია, ფ. 39, საქ. 137, ფურც. 11.

² იქვე, ფურც. 14.

³ იქვე, ფ. 153, საქ. 71, ფურც. 40.

ნებრივ გახრწნას. ის ჩვენ გვხდის კანტონისტებად, საიდანაც უნდა გამოვიდნენ უვიცი და მესამე განყოფილებების ბრმა მსახურნი... ჯაშუშობა სკოლის კედლებში. ამხანაგებში, ქუჩაში, საზოგადოებაში და თვით მშობლების წრეშიც კი — ასეთია ის იდეალი, რომელსაც გვინერგავენ ჩვენ. უფროსის სურვილის უსიტყვოდ შესრულება — აი რას მოითხოვენ ჩვენგან გაწკეპლვის მუქარით, განურჩევლად იმისა ვინაა ეს უფროსი — მუნღირში გამოწყობილი საზიზღროება თუ მარყუქით შეიარაღებული ფლოროვი. გვცემენ ცელქობისათვის. ცუდი ფორმისათვის მაშინაც კი, როდესაც მშობლებს უკეთესის შეყვრვის საშუალება არა აქვთ. რომ მუდმივ სიბნელეში გვამყოფონ, გვიკრძალავენ წიგნის კითხვას, თეატრებში სიარულს და ყოველგვარ შეკრებას, რომლის მიზანს თვითგანათლება და გათვითცნობიერება შეადგენს... მაშეზო და დედებო! ჩვენო უფროსო ძმებო და დებო! დაგვიცავით, ნუ მისცემთ ჩვენს აღმზრდელებს ნებას ჩაჰკლან ჩვენში გრძნობა პატიოსანი და მოაზროვნე მოქალაქისა. დაგვიცავით სანამ ახალგაზრდები ვართ. ვაი იმ ხალხსა და საზოგადოებას, რომლის ახალგაზრდობაში არ ღვივის სიყვარული განათლებისადმი, სიყვარული ახლობელისადმი, სიყვარული სამშობლოსადმი და სიყვარული კაცობრიობისადმი.

გააგებინეთ მასწავლებლებს და რუსეთის მთავრობას, რომ ჩვენ ვეკუთვნივთ არა იმათ, არამედ თქვენ, ჩვენს მშობლებს, ჩვენს ხალხს. უთხარით მათ, რომ თქვენ არ მოითმენთ, რომ თქვენი შვილები აღზარდონ უსამართლობის უეც მსახურებად. დაუყოვნებლივ აღიმაღლეთ ხმა ჩვენს დასაცავად, მერე გვიან იქნება.

მაგრამ, თუ კი საზოგადოება არ გამოვა ჩვენს დასაცავად და დაგვტოვებს ჩვენ დესპოტი აღმზრდელების ხელში, მაშინ ყველა ჩვენგანი, ის, ვისაც კი გული უცემს და ადამიანობის ნიშანწყალი შერჩენია, გაბედულად მოეკიდება საკუთარი განთავისუფლების დიად საქმეს. დაე ჩვენ თავისუფლებისათვის მებრძოლებს, უუქურა ვარსკვლავივით გზას გვინათებდნენ პეროვსკაიასა და ზასულჩის, რისაკოვისა და ეელიაბოვის ბრწყინვალე მსახურები¹ (ხაზი ჩვენია — ავტ.).

¹ სსცო, ფ. 153, საქ. 72, ფურც. 5.

პროკლამაციაში, როგორც ვხედავთ, დახასიათებულია არა მარტო ინსტიტუტში არსებული მძიმე რეჟიმი, არამედ მასში მეტად მკაფიოდაა დადასტურებული მოსწავლე ახალგაზრდობის რევოლუციური განწყობილება და მისი უდიდესი პატივისცემა იმ პრინციპისადმი, რომელსაც პიროვნების სრული თავისუფლება ჰქვია. გასარჩევი დოკუმენტი, რომელიც დემოკრატიული აზრის შესანიშნავ ნიმუშს წარმოადგენს, ჰკიცხავს იმდროინდელ უსამართლო, თავისუფალი აზრის ჩამხშობ და საზოგადოების წინსვლა-განვითარების შემფერხებელ სოციალურ-პოლიტიკურ სისტემას. პროკლამაციის ავტორები, ეტყობა, განსაკუთრებულ სიმპათიებს ამჟღავნებდნენ იმპერატორ ალექსანდრე II-ის მკვლელებისადმი და შთაგონებულნი იმათი სახეებით ფიქრობდნენ ხელი მოეციდათ ხალხთა „განთავისუფლების დიადი საქმისათვის“.

დაიწყო საქმის საფუძვლიანი გამოძიება. პოლიციამ დააპატიმრა ინსტიტუტის ორი მოსწავლე — მიხეილ ბუსლაევი და ვასილ პლოხოტნიკოვი, გაჩხრიკა თბილისის ქალთა გიმნაზიის მერვე კლასის მსმენელი ავღოთია კარპუხოვა და საიდუმლო მეთვალყურეობა დაუნიშნა წმინდა ნინოს სახელობის სასწავლებლის აღმზრდელს (классной dame) პოლიტაევას. პირველს დაპატიმრების დროს სხვადასხვა ჩანაწერით სავსე რეგულები აღმოუჩინეს, რომლებიც, პოლკოვნიკ პეკარსკის სამართლიანი დასკვნით¹, ნამდვილად ადასტურებდა ავტორის „მავნებლურ მიმართულებას“. აი ერთი ადგილი ამ ჩანაწერებიდან: „ეკატერინე II-ის დროს პირველი მოღვაწე რადიშჩევი იყო, ხოლო მეორე — ნოვიკოვი, თავმჯდომარე რუსეთის მასონების წრისა, დამაარსებელი კერძო ტიპოგრაფიისა, პატიმარი პეტრე-პავლეს ციხისა. ალექსანდრე პირველის აღმზრდელი ლაგარპი — რესპუბლიკანელი იყო. 1818 წელს შექმნილი კეთილდღეობის კავშირი, მერე, 20-იან წლებში, დეკაბრიზმში გადაიზარდა. 1861 წელს მ. მიხაილოვს კატორღა მიესაჯა და გარდაიცვალა იქ 1867 წელს... 1863 წელს პოლონეთში პიასკის კლდესთან, მოკლულ იქნა ა. პატეზნია, რომლის სახითაც „მიწა და თავისუფლების“ (პარტიამ) დიდი დანაკლისი განიცადა. კარაკოზოვის ამხანაგები სტრანდენი, იურასოვი, ნიკოლაევი და ხუდიაკოვი ციმბირს გაისტუმრეს. კარაკოზოვის შემდეგ, 1869 წელს, სამრევლო სკოლის მასწავლებელი სერგეი ნეჩაევი გამოჩნდა, ხოლო მის მერე — დოლგუშინი და ზეინკალი მალინოვსკი. 1861 წელს გაზეთ „ველიკორუსის“ ბეჭდვა დაიწყეს²... ა. გერცენი და ნ. ოგარიოვი ინგლისში „კოლოკოლსა“ და

¹ სსცა, ფ. 153, საქ. 71, ფურც. 40.

² „ველიკორუსი“, რომლის სამი ნომერი 1861 წელს გამოვიდა, გაზეთი კი არ იყო, არამედ ფურცელ-პროკლამაცია. მისი გამომცემლები იყვნენ რევოლუციური ცენტრის თვალსაჩინო მოღვაწეები ნიკოლოზ და ვლადიმერ ობრუჩევეები, ლუგინინი და სხვ. „ველიკორუსმა“ მკაჟრად გააკრიტიკა საგლეხო რეფორმის ბატონყმური ხასიათი და მოთხოვა გლეხებისათვის იმ მიწების გადაცემა, რომლითაც ისინი რეფორმამდე სარგებლობდნენ.

„პალიარნაია ზევზდას“ სცემდნენ. ისინი ამბობდნენ: ხალხს უნდა სიტყვის, სინდისისა და მოქმედების თავისუფლებაო... ჩერნიშევსკის 1864 წელს მამხილებელი საბუთების გარეშე 14 წლის კატორღა მიესაჯა“¹.

ბუსლაევის ჩანაწერებში, პოლკოვნიკ პეკარსკის მოწმობით, საკმაო ადგილი ჰქონდა დათმობილი მსჯელობას მართლმადიდებელი ქრისტიანული სარწმუნოების შესახებ, რომელიც, ბრალდებულის სიტყვით, თავადებით ემსახურებოდა მთავრობას „წესრიგის დაცვის“ საქმეში². აქ ლაპარაკი ყოფილა აგრეთვე სოციალისტური მოძღვრების ჩასახვა-განვითარების თაობაზე მოყოლებული XVI საუკუნიდან³.

გაჩხრეკის დროს აღმოჩენილი ეს მასალა, რა თქმა უნდა, ნათელ წარმოდგენას აძლევდა ხელისუფლებას მიხეილ ბუსლაევის პოლიტიკურ კრედოზე, მაგრამ ამჯერად მის წინაშე უფრო კონკრეტული ამოცანა იყო დასახული — მას ხსენებული პროკლამაციის შემდგენელი წრისა და მისი წევრების ვინაობა უნდა დაედგინა. ბუსლაევის დაკითხვამ ძიებას ამ მიმართულებით არაფერი მისცა — მან კატეგორიულად უარყო ამ საქმეში თავისი მონაწილეობა. ასევე უარყო მან პოლიტიკურად საექვო კავშირის არსებობა პოლეტაევსა და კარპუხოვასთან და ამით ერთხელ კიდევ შეეცადა საგამომძიებლო ორგანოებისათვის გაეფანტა აზრი თბილისში მთავრობის საწინააღმდეგო ახალგაზრდული ორგანიზაციის მოქმედების შესახებ.

სახარბიელო შედეგი არც ვასილ პლოხოტნიკოვის დაკითხვას მოჰყოლია. გაჩხრეკის დროს ბრალდებულს რაიმე ხელმოსაკიდებელი, მისი საქმიანობის მამხილებელი საბუთი ვერ უპოვეს, თუმცა, პოლიციის მიერ შეგროვილი ცნობების თანახმად, მას უნდა ჰქონოდა, მაგალითად, ჰექტოგრაფიული წესით გამრავლებული «Программа для чтения», რომელიც პეკარსკის მოწმობით, სოციალ-რევოლუციონერთა ბანაკისთვის ყოფილა განკუთვნილი და მის თანამგრძნობ პირებს ამზადებდა, თურმე, მომავალ ექტიური მოღვაწეობისათვის⁴. მაგრამ პოლიციამ, როგორც ვთქვით, ამ მნიშვნელოვან დოკუმენტს ვერ მიაგნო, რადგანაც პლოხოტნიკოვმა. ეტყობა, მოასწრო იმის გადამალვა, „რასაც მისთვის სახელის გატეხვა შეეძლო“⁵.

ამრიგად, ოხრანკამ პატიმრებს წაყენებული ბრალდება საბუთებით ვერ დაუმტკიცა. მაგრამ, მიუხედავად ამისა, ის მაინც დარწმუნებული იყო, რომ ბუსლაევი, პლოხოტნიკოვი და სამასწავლებლო ინსტიტუტის სხვა

¹ სსცია, ფ. 153, საქ. 71, ფურც. 40—41.

² იქვე, ფურც. 41.

³ იქვე.

⁴ იქვე, ფურც. 43.

⁵ იქვე, ფურც. 41.

მსმენელები ნამდვილად ეწეოდნენ მთავრობის საწინააღმდეგო საქმიანობას და რომ ისინი „თავიანთი მიმართულებით“ გამრყენელ გავლენას ახდენდნენ მოსწავლე ახალგაზრდობაზე¹. ამას, პეკარსკის აზრით, ისეთი ფაქტიც ადასტურებდა, როგორც იყო ხსენებულ პირთა იზოლირების შემდეგ პროკლამაციებისა და საერთოდ საეკვო ლიტერატურის გავრცელების შეწყვეტა დედაქალაქში². აქედან გამომდინარე, თბილისის გუბერნიის უანდარძთა სამმართველო შუამდგომლობდა იმის შესახებ, რომ მხეილ ბუსლავეი და ვასილ პლოხოტნიკოვი გაესახლებინათ საქართველოდან აღმინისტრაციული წესით იმდენი ხნით, რამდენსაც საჭიროდ მიიჩნევდა კავკასიის სამოქალაქო საქმეთა მთავარმართებელი³.

მაგრამ ამ წინადადებას მხარდაჭერა ვერ პოვა. მას არ დაეთანხმა, კერძოდ, თბილისის გუბერნატორი, რომლის აზრითაც ბუსლავეისა და პლოხოტნიკოვის ასეთი დასჯა, ბრალდების ექვემიუტანელი არგუმენტებით დამტკიცების გარეშე, დიდ უკმაყოფილებას გამოიწვევდა ახალგაზრდობის წრეში და სარგებლის მაგივრად საერთო საქმეს მხოლოდ ზიანს მოუტანდა⁴.

თუმცა მასალებიდან ამ საქმის დასასრული არ ჩანს, მაგრამ საფიქრებელია, რომ ყველაფერი თბილისის გუბერნატორის დასკვნის შესაბამისად გაკეთდა.

ნაროდოვოლცური წრეები გორში. ხალხოსნური მოძრაობის მეორე ცენტრი ამჟამადაც, ისე როგორც 70-იან წლებში, იყო გორი. ახალგაზრდობის რევოლუციური საქმიანობა განსაკუთრებით 1881 წლიდან გაშლილა, როდესაც გადასახლებიდან სამშობლოში დაბრუნებულა ჩვენთვის უკვე ცნობილი მხეილ ყიფიანი⁵. ეს უკანასკნელი ცოლ-შვილით გორში დასახლებულა და იქაურ სემინარიაში ქართული ენის მასწავლებლად ჰოწყობილა. გორსა და მის მაზრაში მცხოვრებ ხალხოსნების ერთ ჯგუფს, რომლის შემადგენლობაში შედიოდნენ სოფრომ მგალობლიშვილი, ნინო მგალობლიშვილი, ალალო თულაშვილი, შაქრო გულისაშვილი, ლევან ჯულაშვილი (ნოქარი), სავლე ბურჯანაძე, შიო დავითაშვილი, ქეთევან დავითაშვილი, სოფიო მალალაშვილი, მაშო ივანიშვილი (დემურია) და სხვ.⁶

¹ «Они,—წერდა პეკარსკი,— по своему направлению способны только развращать учащуюся молодежь, не говоря уже о том вреде, какой могут внести в школы эти будущие педагоги» (სსკია, ფ. 153, საქ. 71, ფურც. 44).

² იქვე, ფურც. 42.

³ იქვე, ფურც. 44.

⁴ იქვე, საქ. 72, ფურც. 48—49.

⁵ შ. დ ა ვ ი თ ა შ ვ ი ლ ი, ხალხოსნური მოძრაობა საქართველოში, გვ. 82.

⁶ იქვე, გვ. 75.

უპირატესად ლეგალური, მაგრამ თავისთავად ხალხის სასარგებლო საქმიანობა უწარმოებია. ეს ჯგუფი, შ. დავითაშვილის მოწმობით, მართავდა წარმოდგენებს¹, აწყობდა ლიტერატურულ საღამოებს, გამოდიოდა ადგილობრივი ხელისუფლების უკუღმართ ღონისძიებათა წინააღმდეგ, იცავდა მშრომელი ხალხის ინტერესებს, შუამდგომლობდა (პირდაპირი თუ აპირდაპირი გზით) ამა თუ იმ საჭირო დაწესებულებისა და საზოგადოებრივი ინსტიტუტის გახსნა-დაარსების შესახებ და სხვ. ხსენებული ჯგუფის ზეგავლენით, მაგალითად, გორის მაზრის თავადაზნაურთა კრებას დაუდგენია დაესვა საკითხი მთავრობის წინაშე ნაფიც მსაჯულთა სასამართლოსა და ერობის შემოღების შესახებ². მეორე კრებაზე იმავე თავადაზნაურობას მიუღია დადგენილება პრივილეგიური წოდების შექმნის ნაწილის დაბეგვრისა და ამ გზით შემოსული თანხის სახალხო განათლების საქმეზე გამოყენების შესახებ³. დასასრულ, დასმულა ხიზნების „მთლიანად ან ნაწილობრივ“ განთავისუფლების საკითხი, მაგრამ უშედეგოდ⁴.

ამ ლეგალურად მომუშავე ჯგუფთან ერთად გორში შექმნილა კონსპირატიულად მოქმედ რევოლუციურ ხალხოსანთა ჯგუფი, რომელსაც თავისი ხელმძღვანელი ბირთვი აურჩევია მიშო ყიფიანის, ელისაბედ შერვაშიძის (მიშოს მეუღლე) კოტე გვარამიძის (მასწავლებელი), ლევან გრიგოლაშვილის (მასწავლებელი), ილიკო მაჭავარიანის (სამაზრო სამმართველოს თანამშრომელი), შიო დავითაშვილისა და მისი მეუღლის ქეთევანის შემადგენლობით⁵.

ხსენებულ ჯგუფს კავშირი ჰქონია რუს ნაროდნიკებთან, კერძოდ, ნაროდოვოლებს პარტიასთან, რომელიც, როგორც აღვნიშნეთ, დიდი სახელითა და პატივით სარგებლობდა ქართველ ხალხოსანებში საერთოდ. შ. დავითაშვილის მოწმობით, მაგალითად, 1881 წელს გორს რამდენჯერმე სწევდნენ იმ ღროს თბილისში მყოფი „ნაროდნაია ვოლიას“ აღმასრულებელი კომიტეტის წევრი ანნა პრიბილევა-კორბა. მისი მონაწილეობით არაერთი თათბირი ჩატარებულა „რევოლუციური პარტიის გაფართოების“, „მუშაობის უფრო ნაყოფიერად წარმართვისა და რუსეთის ხელმძღვანელ ცენტრთან „შეუწყვეტელი კავშირის“ დამყარების თაობაზე“⁶. კორბას პეტერბურგში გაბრუნების შემდეგ 1881 წლის შემოდგომა-

¹ მსახიობებად გამოდიოდნენ სოფრომ მგალობლიშვილი, შაქრო გულისაშვილი, სავლე ბურჯანაძე, მამო კერესელიძე, თვითონ შიო დავითაშვილი, მისი მეუღლე ქეთევანი და სხვ.

² შ. დავითაშვილი, ხალხოსნური მოძრაობა..., გვ. 82.

³ იქვე, გვ. 82—83.

⁴ იქვე, გვ. 83, შედეგი, როგორც ცნობილია, არც სხვა, ზემოდასახელებულ შუამდგომლობას მოჰყოლია.

⁵ იქვე, გვ. 86.

⁶ იქვე.

ზე¹ საქართველოში, როგორც ვიცით, სერგი პეტრეს ძე პეტროვი ან იგივე დეგაევი ჩამოვიდა². იგი რევოლუციური ცენტრის სახელით ხელმძღვანელობდა არა მარტო თბილისის, არამედ გორის ხალხოსანთა საქმიანობასაც. მისი წინააღმდეგობით ამ უკანასკნელთ საქართველოს სოციალ-რევოლუციონერთა პარტიის წესდების შემუშავება გადაუწყვეტიათ და ამის სისრულეში მოსაყვანად სათანადო კომისიაც გამოუყვიათ მიშო ყიფიანის, კოტე გვარამაძისა და შიო დავითაშვილის შემადგენლობით. კომისიას წესდების პროექტი მართლაც შეუდგენია, მაგრამ მისი წაითხვაც კი ვერ მოუხსრიათ საიდუმლო ორგანიზაციის გაცემისა და ჩაყარვის გამო³.

კონსპირატიულ წრეს კავშირი დაუმყარებია გორის მახლობლად, სოფელ ხიდისთავში მდგარ ნაწილთან, რომლის ოფიცრობა (კაპიტანი ნეზლობინი, პორუჩიკი ლიუბიმოვი და სხვ.), ს. მგალობლიშვილის მოწმობით, თანაუგრძნობდა რევოლუციურ მოძრაობას⁴.

შ. დავითაშვილის მოწმობით, საიდუმლო ორგანიზაციის სახსრების გაძლიერების მიზნით კონსპირატიულ კომიტეტს, ნაროდოვოლკური ცენტრის დასტურიითა და დავალებით, გადაუწყვეტია გორის ხაზინიდან ფულის გატაცება, მაგრამ უანდარმერიას, რომელსაც წინასწარ მიუღია ამის შესახებ ცნობა, ეს საქმე ჩაუშლია. გამცემი და დამსმენი, როგორც მერე დადგინდა, სწორედ „სერგეი პეტროვიჩი“ (იგივე დეგაევი) აღმოჩნდა.

გორის ხალხოსანთა საიდუმლო ორგანიზაციას მიაგნეს. დაიწყო დაპატიმრებანი. დააპატიმრეს მიშო ყიფიანი, შიო დავითაშვილი, ილიკო მაჭავარიანი და სხვ. ამათგან პირველი სამი წლით სემიპალატინსკში გადაასახლეს, ხოლო ორი უკანასკნელი, ბრალდების დაუმტკიცებლობის გამო, გაანთავისუფლეს.

* * *

1883 წლის კატასტროფის შემდეგ, როგორც მოსალოდნელიც იყო, შეფერხდა გორელი ხალხოსნების რევოლუციური საქმიანობა. და ეს მოხდა არა მარტო იმიტომ, რომ ხელისუფლებამ დააპატიმრა და გადაასახლა

¹ Жур. «Былое», 1906, №8, გვ. 162; А. П р и н ы л е в а -К о р б а, «Народная Воля», М., 1926, გვ. 196.

² დეგაევი საქართველოში 1882 წლის გაზაფხულზე ჩამოვიდა (იხ. «Былое», 1906, № 8, გვ. 162).

³ შ. დ ა ვ ი თ ა შ ვ ი ლ ი, ხალხოსნური მოძრაობა..., გვ. 89.

⁴ ს. მ გ ა ლ ო ბ ლ ი შ ვ ი ლ ი, მოგონებანი, გვ. 93,

ხალხოსნური მოძრაობის მრავალი გამოჩენილი მოღვაწე, არამედ იმიტომაც, რომ მთელ იმპერიაში და, კერძოდ, საქართველოში იმ დროს გაბატონებულმა საშინელმა პოლიტიკურმა რეაქციამ მეტად გაართულა ახალგაზრდობის აშკარა (კულტ-საგანმანათლებლო), თუ არალეგალური მუშაობა. გორსა და მის მაზრაში ჟანდარმერიას ისეთი მეთვალყურეობა დაუწესებია, რომ ნაცნობებთან უბრალო შეხვედრა და საუბარიც კი თურმე დიდი რისკი ყოფილა. ასეთ ვითარებას, ბუნებრივია, რამდენადმე მოუღუწებია საზოგადოებრივი ცხოვრება და შეუწელებია ბრძოლა არსებული წყობილების წინააღმდეგ, მაგრამ ის, რა თქმა უნდა, საერთოდ არ შეწყვეტილა და მეტ-ნაკლებად მომავალშიც გაგრძელებულა¹.

ჩვენ ხელთ არსებული საარქივო მასალები ეჭვმიუტანლად ადასტურებს, რომ დაპატიმრებას გადაარჩენილ გორელ ხალხოსნებს შეუდგენიათ მთავრობის საწინააღმდეგო წრე, რომლის შემადგენლობაში, ჟანდარმთა სამმართველოს 1884 წლის 28 ივნისის მოხსენებით ბარათის თანახმად, ყოფილან: სოფრომ მგალობლიშვილი, ანტონ კერესელიძე, გორის სასულიერო სემინარიის მასწავლებელთა მთელი შტატი (ორი რუსი პედაგოგის გამოკლებით) შიო შიუკაშვილის მეთაურობით, ლევან გრიგოლაშვილი, კონსტანტინე გვარამაძე, ნიკოლოზ ბერიაშვილი, ნიკოლოზ ლომოური, ძისი ძეულღე ხუდადოვას ქალი, ანტონ ფურცელაძე, ზაქარია დავითაშვილი, რუისპირელი მასწავლებელი გულზოვი, ტყვიაველი კოლა ხრისტოვი და სხვ.

როგორც ჩანს, წრეში გაერთიანებულან არსებითად სხვადასხვა მიმართულებისა და შეხედულების მქონე ხალხოსნები, იქ, მაგალითად, სოფრომ მგალობლიშვილის გვერდით, რომელიც ორიოდე წლის წინათ აშკარად შომუშავე საზოგადო მოღვაწეთა ჯგუფში ითვლებოდა, ვხვდებით ნაროდოვოლცებისა და მათი კონსპირატიული კომიტეტის ისეთ თვალსაჩინო წარმომადგენლებს, როგორიც იყვნენ ლევან გრიგოლაშვილი და კონსტანტინე გვარამაძე². სამწუხაროდ, მასალებიდან არ ჩანს, რა

¹ ამიტომ, ჩვენი აზრით, სწორი არ არის შიო დავითაშვილის შემდეგი მოწმობა: „ჩაველი თუ არა (1883 წლის მცირე ხნით პატიმრობის შემდეგ—აეტ.) გორში,—წერს იგი,—მანინათვე შევაშინე ჩვენი ფართო წრისა და მთელი საზოგადოებრივი ცხოვრების მოღუწება. ზოგი ამხანაგი სულ მოშორებოდა გორს, დანარჩენებს სრულად გაეწყვიტათ კავშირი ერთმანეთთან. ყველას რაღაც შიში, ეჭვიანობა ემჩნეოდა. ყველა თითქოს სამუდამოდ გამორებოდა ყოველგვარ საზოგადო მოღვაწეობას“ (შ. დავითაშვილი, ხალხოსნური მოძრაობა..., გვ. 119).

² ძნელია იმის დადგენა, თუ რატომ არ მოიწვიეს წრის წევრებმა თავიანთ რიგებში პატიმრობიდან გამოსული შიო დავითაშვილი. საფიქრებელია იმიტომ, რომ იგი პოლიციის განსაკუთრებული მეთვალყურეობის ქვეშ იყო დაყენებული და ამის გამო მასთან რაიმე ურთიერთობის დამყარება მხარეების, კეთილდღეობის თვალსაზრისით, მიზანშეწონილად არ იყო ცნობილი.

პირობით და რის საფუძველზე მოხდა ეს გაერთიანება, მაგრამ ერთი რამ მაინც დანამდვილებით შეიძლება ითქვას, სახელდობრ ის, რომ წრე ლიბერალური ილუზიებით არ იკვებებოდა და რომ იგი იდგა არა შემთანხმებლურ, არამედ არსებულ სოციალურ-პოლიტიკურ სისტემასთან შეუწყობელი ბრძოლის პოზიციაზე. ამას ადასტურებს თბილისის გუბერნიის ჟანდარმთა სამმართველოს ზემოდასახელებული მოხსენება. იქ, წრის ერთ-ერთი ხელმძღვანელის ანტონ კერესელიძის პოლიტიკური მრწამსის შესახებ ხათქვამია, რომ იგი მხურვალე რესპუბლიკანელია და თვითმპყრობელობის მტერი. „გორის სამაზრო სამმართველოს მდივანმა, — ვკითხულობთ იქ, — ანტონ კერესელიძის ახლო ამხანაგმა ბიჩკოვმა. საუბარში განაცხადა, რომ ის (ე. ი. კერესელიძე — ავტ.) ყოველი შეხვედრისას უსათუოდ იწყებდა ლაპარაკს რუსეთის მონარქიულ წყობილებაზე და შეტად შავ საღებავებში ხატავდა მას. ამავე დროს კი ქებადიდებდას ასხამდა რესპუბლიკურ მმართველობას. იმავე ბიჩკოვმა დაასახელა შემთხვევა, როდესაც კერესელიძემ უპატივცემლობა გამოამჟღავნა ხელმწიფე-იმპერატორის პიროვნებისადმი. მისი სიტყვებით ეს შემდეგ ვითარებაში მომხდარა. ამ რამდენიმე თვის წინათ თურმე ბიჩკოვი ამხანაგებთან ერთად სადილობდა გორის სასტუმრო „ვარშავაში“, რომლის დროსაც მას მეფის სადღეგრძელო შეუსვამს. მისი მაგალითისათვის მიუბაძავს ყველას, გარდა კერესელიძისა, რომელსაც ბიჩკოვის შენიშვნაზე მისთვის ყურში ხელმწიფის შეურაცხმყოფელი სიტყვები უთქვამს“¹.

ოზრანკას ცნობების თანახმად, ანტონ კერესელიძის ბინაზე, გარდა ზემოაჩვენებული პირებისა, თავს იყრიდა მოსწავლე ახალგაზრდობის ერთი ნაწილი და იმართებოდა აკრძალული ლიტერატურის კითხვა². იგივე ითქმის სოფრამ მგალობლიშვილის სახლზედაც, სადაც, თურმე, დოკუმენტის სიტყვით: «Собирались целые группы... после полуночи асти-вались до утра, без всяких естественных поводов»³.

ყოველივე ეს და აგრეთვე ის გარემოება, რომ მოხსენებით ბარათში დასახელებული პირები ქმნიდნენ „კარჩაკეტილ წრეს და პოლიტიკური თვალსაზრისით ცუდი რეპუტაციით სარგებლობდნენ“⁴, საფუძველს აძლევდა თბილისის გუბერნიის ჟანდარმთა სამმართველოს ზოგი მათგანის, კერძოდ, კერესელიძისა და მგალობლიშვილის, გორიდან გაძევება ეთხოვა⁵. მაგრამ, ჩანს, ეს წინადადება ცხოვრებაში არ გატარებულა, ყო-

¹ სტოა, ფ. 153, საქ. 76, ფურც. 4—5. Рапорт помощника начальника тифлисского губернского жандармского управления своему начальнику от 28 июня 1884 года (лл. 3—7).

² იქვე, ფურც. 4.

³ იქვე, ფურც. 6.

⁴ იქვე, ფურც. 7.

⁵ იქვე.

ველ შემთხვევაში არც ერთი ჩვენს განკარგულებაში მყოფი წყარო საწინააღმდეგოს არ ადასტურებს¹.

ნაროდოვოლცები კახეთში. ძნელია გადაჭრით ითქვას არსებობდა თუ არა კახეთში მტკიცედ ჩამოყალიბებული და ორგანიზაციულად გაფორმებული წრე, რადგანაც საამისო მასალები დღემდე მიკვლეული არ არის. ის კი, რაც ამჟამად ხელთა გვაქვს, მხოლოდ ერთ რამეს ადასტურებს — ნაროდოვოლცური იდეების პოპულარობისა და ამ იდეების პროპაგანდის ფაქტს განსახილველი ხანის კახეთის სინამდვილეში. პროპაგანდისტად წყაროები პროვიზორ სიმონ იოსების ძე მანსურაძეს ასახელებს, რომელიც 1879 წლისთვის მცხეთის საზოგადოებიდან სიღნაღის მაზრის სოფელ ვეჯინს გადასახლებულა და იქ ქეთევან აბაშიძის მცირეწლოვანი შვილების მამულების მოურავად მოწყობილა.

1881 წლის მაისის ბოლოს თბილისის ქანდარმთა სამმართველოს მიერ მიღებული ანონიმური წერილის თანახმად, სიმონ მანსურაძეს, რომელიც მოსახლეობას უფასო მომსახურებას უწევდა, სოციალისტური იდეები შეჰქონდა ხალხში და ამხედრებდა მას მემამულეების წინააღმდეგ.

იგი გლეხების ყურადღებას ამახვილებდა მიწათმფლობელობის უსამართლო ხასიათზე და არწმუნებდა მათ, რომ მალე დადგება სხვა დრო, როდესაც გადასახადებს გააუქმებენ და მიწას თანაბრად გაანაწილებენო².

ძიების მიერ შეგროვილმა მასალებმა კიდევ უფრო მკაფიოდ გამოავლინა მანსურაძის პოლიტიკური მრწამსი და ცხადყო მისი მოქმედების ხასიათი. საქმით დაინტერესებულმა ორგანოებმა მიიღეს, მაგალითად, ცნობა, რომ 1880 წლის თებერვლისთვის რომელიღაც დღეს ერთ ოჯახში გამართულ სადილზე ბრალდებულმა უარი თქვა იმპერატორის სადღეგრძელო მიეღო და მის მაგივრად „კონსტიტუციის სადღეგრძელო“ შესვაო³. ამავე დროს მას, იმავე ცნობით, დამსწრე საზოგადოებისათვის უთქვამს, რომ იგი „წერილობით კავშირშია სოციალისტებთან, უგზავნის მათ ფულს და რომ ისინი 1880 წლის 3 ან 5 მარტს აფეთქებას მოაწყობენ (ზამთრის) სასახლეში“⁴.

მოწმედ გამოძახებულმა ალექსანდრე ანდრონიკაშვილმა ძიებას დაუდასტურა, რომ მართლაც მანსურაძე წინასწარ ასახელებდა აფეთქების დღეს და რომ მან 1880 წლის რომელიღაც თვეს, თბილისში მოკლე

¹ არაფერს ამბობს მათი გორიდან გაძევების შესახებ პირველ ყოვლისა თვით სოფრომ მგალობლიშვილი (იხ. მისი „მოგონებანი“).

² სსცია, ფ. 7, ინაწ. 3, საქ. 2745, ფურც. 6.

³ იქვე, ფურც. 7.

⁴ იქვე.

ხნით ყოფნის შემდეგ; მოსახლეობას ახარა, რომ „აფეთქება ნამდვილად უკვე მოხდა“¹.

მაისურაძისათვის წაყენებული ბრალდების სისწორე დაუდასტურებია აგრეთვე თავად სიმონ აბაშიძესაც². რაც შეეხება კოპაძესა და მასწავლებელ პოლიევქტ კარბელაშვილს, მათ ბრალდებულისათვის დაუჭერიათ მხარი და დაბეჯითებით განუცხადებიათ, რომ მას დასახელებულ სადილზე არაფერი მაგის მსგავსი არ უთქვამს³. ასეთივე პოზიცია დაუჭერია ვეჯინის მამასახლის გიგო გოდერძიშვილს. მას საერთოდ კარგად დაუხასიათებია სიმონ მაისურაძე და მისი საქმიანობა სოფელში⁴.

როგორც მასალებიდან ჩანს, სიმონ მაისურაძეს კატეგორიულად უარყვია წაყენებული ბრალდება და განუცხადებია, რომ ეს საქმე მის წინააღმდეგ აღძრულია თავადების ანდრონიკაშვილისა და აბაშიძის მიერ იმის გამო, რომ მათ ბრალდებულის ენერგიული მოქმედების წყალობით, ვერ მოახერხეს მისთვის მინდობილი მამულუკების მითვისება.

მართალია, ძიებამ მაისურაძეს ბრალდება მთლიანად ვერ დაუმტკიცა და სწორედ ამიტომ მოითხოვა პროკურორმა მისი მხოლოდ ექვსი კვირით დაპატიმრება, მაგრამ მიუხედავად ამისა, შეიძლება ითქვას, რომ პროვიზორი ხელისუფლების წინაშე უეჭველად დამნაშავე იყო. ჩვენი აზრით, უსაფუძვლოდ არ გამოიყურება ანონიმური წერილის ავტორთა მტკიცება, რომ მაისურაძეს კავშირი აქვს რუსეთთან, ანარქისტების პარტიასთან⁵. ეტყობა, იგი მართლაც ახლო ურთიერთობაში ყოფილა საქართველოსა და რუსეთის ნაროდოვოლცურ წრეებთან, სხვანაირად მას არ ეცოდინებოდა ზამთრის სასახლის აფეთქების თითქმის ზუსტი თარიღი⁶.

შეუძლებელია სერიოზულად ვიფიქროთ, რომ მაისურაძე ერთადერთი ნაროდოვოლცელი იყო კახეთში. მას, ალბათ, თანამოაზრენიც ჰყავდა, რომლებიც მასთან ერთად და მისი ხელმძღვანელობით ეწეოდნენ პროპაგანდისტულ მუშაობას. გამორიცხული არ არის, რომ პედაგოგი კონსტანტინე ბაღაშვილი, რომელსაც 1880 წლის 10 თებერვალს პოლიციის აგენტების მიერ ქალაქ სიღნაღში ნახული მთავრობის საწინააღმდეგო პროკლამაცია-ფურცლის შედგენა დაბრალდა, სწორედ სიმონ მაისურაძის მეთაურობით არსებული წრის წევრი იყო.

¹ სსცია, ფ. 7, ანაწ. 3, საქ. 2745, ფურც. 7, 10.

² იქვე, ფურც. 8.

³ იქვე, ფურც. 8—9.

⁴ იქვე, ფურც. 10.

⁵ იქვე, ფურც. 11.

⁶ ეს აფეთქება, დაკავშირებული ს. ხალტურინის სახელთან, მოხდა, როგორც ცნობილია, 1880 წლის 5 აპრილს, ე.ი. სიმონ მაისურაძის მიერ დასახელებული რიცხვის (5 მარტის) ზუსტად ერთი თვის შემდეგ.

§ 1. პოლიტიკური რეაქციის გაძლიერება

რევოლუციური სიტუაცია, რომელიც 1879—1881 წლებში წარმოიშვა რუსეთში, განპირობებული იყო ბატონყმობის გადმონაშთების არსებობითა და ახალ, კაპიტალისტურ ურთიერთობათა განვითარებით.

კლასობრივი ბრძოლის გამწვავება და „ინოროდცების“ კოლონიური ჩაგვრის გაძლიერება განსაზღვრავდა მემამულურ-ბურჟუაზიული მთავრობის წინააღმდეგ მიმართულ იმ საერთო-სახალხო მოძრაობას, რომელიც ნაროდნიკ-რევოლუციონერთა და სხვა პოლიტიკური პარტიების მოქმედების გააქტიურებით გამოიხატებოდა. მართვა-გამგეობის თვითმპყრობელური ფორმების სისუსტე, მისი კრიზისი, რაც ასე აშკარა გახდა 70—80-იანი წლების მიჯნაზე და რასაც თვით მმართველი ფენებიც კარკად გრძნობდნენ, მეფის მთავრობას რეაქციული ძალების განმტკიცებისაკენ უბიძგებდნენ. შექმნილი ისტორიული პირობების გამო რევოლუციური სიტუაცია ახლაც ვერ გადაიზარდა რევოლუციაში; ცარიზმი მდგომარეობიდან გამოსვლისათვის ნაცად ხერხს — რეფორმებს — მიმართავდა, ვინაიდან „მთავრობის წევრნიც, მათ შორის მინისტრებიც და მეფეც კი... ეძებენ ყოველგვარ საშუალებას გაიუმჯობესონ მდგომარეობა, რომელიც მათ სრულებითაც ვერ აკმაყოფილებთ“¹.

საერთო მდგომარეობის შენელებისაკენ იყო მიმართული მთავრობის გადაწყვეტილება „სახელმწიფოებრივი წესრიგისა და საზოგადოებრივი მშვიდობიანობის დაცვის უმაღლესი (განმკარგულებელი) კომისიის“ შექმნის შესახებ, გრაფ ლორის-მელიქოვის ხელმძღვანელობით.

იმავე მიზანს ემსახურებოდა ლორის-მელიქოვის მიერ შემუშავებული ლიბერალური პროექტი დროებითი სათათბირო კომისიების შექმნის შესახებ, რომელიც მან 1881 წელს იმპერატორ ალექსანდრე II-ს წარუდგინა. ცარიზმის ერთგულ მოხელე-ლიბერალთა ერთი ჯგუფი ხოტბას ასხამდა

¹ ვ. ი. ლენინი, თხზ., ტ. 5, გვ. 48.

ლორის-მელიქოვის ამ პროექტს და მას კონსტიტუციას უწოდებდა. რასაკვირველია, ისინი აჭარბებდნენ, თუმცა, ვ. ი. ლენინის სიტყვებით რომ ვთქვათ, ლორის-მელიქოვის პროექტის განხორციელება გარკვეულ პირობებში შეიძლებოდა ყოფილიყო ნაბიჯი კონსტიტუციისაკენ. მაგრამ ეს ასე არ მოხდა; ახალი რეფორმების გატარების მიჯნასთან მდგომ მეფის რუსეთში 1881 წ. 1 მარტს ნაროდოვოლცების მიერ მოწყობილი ტერორისტული აქტის შემდეგ, შავზნელი რეაქცია გამეფდა. იმპერატორ ალექსანდრე II-თან ერთად დასამარდა ლორის-მელიქოვის ლიბერალური პროექტიც.

ლორის-მელიქოვი და მისი უახლოესი თანამებრძოლნი გადადგნენ. ტახტზე ახლად ასული თვითმპყრობელი ალექსანდრე III სახელმწიფოს მაღალ პოსტებს უკიდურეს რეაქციონერებს უნაწილებს. ალექსანდრე III-ის ერთ-ერთი აღმზრდელი, სინოდის ობერ-პროკურორი, რეაქციონერი პობედონოსცევი იმპერიაში მეფის უახლოეს და უპირველეს კაცად იქნა აღიარებული. იგი გრაფ დ. ტოლსტოისთან, ნ. იგნატიევთან, ა. პაზუხინთან, მ. კატკოვთან და სხვებთან ერთად ახორციელებდა ახალ კურსს, ცდილობდა განემტკიცებინა თვითმპყრობელობა და ჩაეხშო ყოველგვარი ცოცხალი აზრი.

ამგვარ ისტორიულ პირობებში, 1881 წლიდან, ალექსანდრე III-ის ტახტზე ასვლით, რუსეთში დაიწყო ხანა პოლიტიკური რეაქციისა, რომელიც არ შენელებულა მისი მეფობის მთელ პერიოდში (1881—1894 წწ.). რეაქცია თავის გამოხატულებას პოულობდა რევოლუციური და ეროვნულ-განმათავისუფლებელი მოძრაობის დარბევაში, კოლონიური ჩაგვრის გაძლიერებასა და საგლეხო რეფორმის გატარებით შელახული ფეოდალური წოდებრიობის აღდგენის ცდაში. პოლიტიკური რეაქციის სათავეში თვით იმპერატორი იდგა.

1881 წლის აპრილში ოფიციალურად ქვეყნდება პობედონოსცევის მიერ შედგენილი მანიფესტი, რომელშიც დაგმობილია ბურჟუაზიული რეფორმები და შექებულია თვითმპყრობელური სახელმწიფოს მართვის დრომოჭმული ფორმები.

რევოლუციური და ლიბერალურ-პროგრესული ელემენტების შესამუსრავად და რეპრესიების გასატარებლად გადახალისდა სახელმწიფო დამსჯელი და სამძებრო ორგანოები, მათი შემადგენლობა.

1881 წლის მაისში დ. ტოლსტოის შინაგან საქმეთა მინისტრად დანიშნით, რუსეთში ბოლო მოეღო კონსტიტუციური მერყეობის ხანას და ამიერიდან, ვ. ი. ლენინის სიტყვებით რომ ვთქვათ, იწყება „აღვირახსნილი, დაუჭერებლად უაზრო და მხეცურ რეაქციაზე გადასვლა“. კატკოვი, რეაქციის ეს იდეოლოგი, მიესალმა ტოლსტოის დანიშვნას და ამ აქტს

უძღვნა სპეციალური სტატია სათაურით — „ადექით, ბატონებო, მთავრობა მოდის!“.

იმპერატორის კანცელარიის მე-3 განყოფილება გაუქმდა და მის ნაცვლად შინაგან საქმეთა სამინისტროს სისტემაში ჩამოყალიბდა პოლიციის დეპარტამენტი და ქანდარბთა სამმართველოები. ხელისუფლების ადგილობრივ ორგანოებს შეეძლოთ დაეპატიმრებინათ, ქონება ჩამოერთმიათ, ან დიდი თანხით დაეჯარიმებიათ საექვო მოქალაქენი. პოლიცია და ქანდარმერია სდევნიდა, აპატიმრებდა, ციხეებსა და კატორღაში გზავნიდა ხალხის საუკეთესო შვილებს. პოლიციური სამძებრო ორგანოს მეთაურმა სუდეიკინმა, ცნობილი ჯაშუშის დეგავეის საშუალებით შეძლო „ნაროდნაია ვოლიას“ აღმასრულებელი კომიტეტის ხელში ჩაგდება.

სდევნიდნენ პროგრესულ-დემოკრატიულ პრესას და ბეჭდურ გამოცემებს, გაძლიერდა ცენზურა. 1882 წელს შემოდებულ იქნა „დროებითი წესები“, „სადამსჯელო ცენზურა“, რომელთა მიხედვით შეუძლებელი იყო ცარიზმის რეჟიმისა და თავადაზნაურობის ბოროტებათა რაიმე მხილება პრესაში. დაიხურა ლიბერალური და რადიკალური გაზეთები „გოლოსი“ და „დელო“, პროგრესული ჟურნალი „ოტჩინესტვენნიე ზაპისკი“ და სხვ.

რეაქციის ძალების დასაყრდენად და მის ერთ-ერთ იდეოლოგად ხდება გაზეთი „მოსკოვსკიე ვედომოსტი“. მისი რედაქტორია გ. ნ. კატკოვი, რომელიც, ლენინის სიტყვით, „რეაქციის საყვირი იყო“. რეაქციის ძალებს განამტკიცებდა 1881 წელსვე ჩამოყალიბებული ე. წ. „საღმრთო ლიგა“, რომელსაც ავანტიურისტი ვორონცოვ-დაშკოვი და შუვალოვი მესვეურობდნენ. ისინი შანტაჟისა და პროვოკაციების გზით ახშობდნენ ყოველგვარ განმათავისუფლებელ მოძრაობას. რეაქციის ბნელ ძალებს აქეთკენ მოუხმობდა შამის ბეღით დამფრთხალი „გატჩინოს პატიმარი“ ალექსანდრე III, რომელიც დევნის მანიით იყო შეპყრობილი.

ცარიზმი ამგვარი მეთოდებით ახერხებს 1879—1881 წლების რევოლუციური სიტუაციის შენელებას; 80-იანი წლების რეფორმებს „საბედისწერო შეცდომად“ აცხადებს და 1881 წლის 1 მარტის გასროლას ამ „დემოკრატიული დათმობის“ შედეგად მიიჩნევს. მთავრობა ცდილობდა ახალი საკანონმდებლო აქტებით ერთგვარად მაინც გამოესწორებინა „შეცდომები“, რომელთა შედეგად შესუსტდა მემამულეთა ძლიერება. დაიწყო კონტრრეფორმების გატარება. მაგალითად, სოფლად შემოდებულ იქნა საერობო უფროსის თანამდებობა, რომელმაც მთლიანად გააუპიროვნა გლეხთა ადგილობრივი თვითმმართველობანი, რადგან ამ თანამდებობაზე თავადაზნაურული წარმოშობის პირები ინიშნებოდნენ. ეს ღონისძიება რამდენადმე რეფორმამდელ ძალმომრეობას აღადგენდა. ძლიერდება მთავრობის ორგანოების მკაცრი ზედამხედველობა ერობასა

და ნაფიც მსაჯულთა ინსტიტუტზე. რეაქციულმა პრესამ ნაფიც მსაჯულთა სასამართლო „ქუჩის სასამართლოდ გამოაცხადა და დაუწყო მას დევნა“¹.

განათლების დარგში იქმნება ახალი წესდებანი, რომლებიც მიზნად ისახავდა მის წოდებრივ საფუძველზე გაძლიერებას. გამრავლდა სინოდის უწყებაში მოქცეული სკოლების რიცხვი. 1884 წლიდან უქმდება უნივერსიტეტების ავტონომია. 1885 წელს მთავრობამ დაამტკიცა ეკატერინე III-ის მიერ თავადაზნაურობისადმი ბოძებული წყალობის სიგელი და აღნიშნა ამ დოკუმენტის ასი წლისთავი. ალექსანდრე III წერდა: „სახელმწიფოს კეთილდღეობისათვის საჭიროდ ვცანით, რომ რუსეთის თავადაზნაურობას როგორც წინათ, ისე ეხლაც... შერჩეს პირველობა სარდლობაში, ადგილობრივ მმართველობაში და სასამართლოში“.

1885 წელს დაარსდა „თავადაზნაურთა საადგილმამულო სახელმწიფო ბანკი“. იგი მიზნად ისახავდა თავადაზნაურული მფლობელობის შენარჩუნებას და მოშლილი მეურნეობის ფუნზე დაყენებას. ამ ბანკმა პირველსავე წელს თავადაზნაურობას ასესხა 69 მილიონი მანეთი, ხოლო სამი წლის შემდეგ 10,5 მილიონი მანეთის ვალი სავსებით ჩამოაწერა მას.

1884 წელს ვალებში ჩავარდნილი ქართველი თავადაზნაურობა თხოვნით მიმართავს იმპერატორს „პრიკაზის“ ვალების ჩამოწერისა და მთლიანად პატიების შესახებ. ქართველ თავადაზნაურობას მთავრობამ „პრიკაზის“ ვალების ნახევარი ჩამოაწერა, ხოლო დანარჩენის გადახდა 37 წლით გადაუვდა².

ალექსანდრე III-ის ზრუნვა თავადაზნაურობაზე, მისი ცდები ისტორიის ჩარხის უკულმა დასატრიალებლად, განწირული თავადაზნაურობის გადასარჩენად, ძართალია, ამო აღმოჩნდა, მაგრამ ყველაფერი გაკეთდა მისი ბატონობის განხგრძლივებისათვის. თავადაზნაურობის დეგრადაცია და გალარიბება საქართველოს სინამდვილეში დღითიდღე ღრმავდებოდა. თავადაზნაურობა საზოგადოების მეტხორცად იქცა, მისი შენახვა მძიმე ტვირთად აწვა მწარმოებელ კლასს. ფეოდალური საკუთრება მიწაზე ბოჭავდა საწარმოო ძალების განვითარებას, ამუხრუჭებდა პროგრესის ძალებს და განამტკიცებდა ძირმომპალი ცარიზმის ბატონობას.

70—80-იანი წლების მიჯნა საქართველოში გლეხთა აჯანყებების, ეროვნულ-განმათავისუფლებელ, რევოლუციურ-ხალხოსნურ მოძრაობათა გაქტიურებით ხასიათდებოდა. ცარიზმის მძიმე კოლონიური ჩაგვრის პირობებში საზოგადოებრივ-პოლიტიკურ მოძრაობას საქართველოში ტონს აძლევდა გლეხთა ისეთი აჯანყებანი, როგორიც იყო, მაგალითად, 1875—76 წლებისა სვანეთში, 1876 წლის — სამეგრელოში, 1878 წლის —

¹ ვ. ი. ლენინი, თხზ., ტ. 4, გვ. 482.

² „ივერია“, 1884, № 3.

სიღნაღის მაზრაში და 1881—82 წლებისა — გურიაში. სოციალური და ეროვნული თავისუფლების მოსაპოვებლად დაწყებული გლეხთა მოძრაობა საზოგადოდ სტიქიური და არაორგანიზებული იყო და ამიტომ ცარიზმთან ბრძოლაში მარცხდებოდა.

ნაროდოვოლცებისა და საერთოდ რევოლუციურად განწყობილი ელემენტების გავლენით საქართველოში ძლიერდება მთავრობის საწინააღმდეგო გამოსვლები და განწყობილებანი.

ხალხში უკმაყოფილება დღითიდღე ძლიერდება. მაგალითად, 1879 წლის 10 ოქტომბერს სიღნაღის მაზრის მომრიგებელმა მოსამართლემ გიგო გარსიაშვილმა და გიგო ზურაბიშვილმა საჯაროდ შეურაცხვეს იმპერატორი¹, ხოლო სოფელ ანაშენის მამასახლისმა აბრამ მებალიშვილმა საჯაროდ მოიგლიჯა სამამასახლისო ჯაჭვი კისრიდან და ლანძღვა-გინებით მოიხსენია ამ ჯაჭვის მიმცემი იმპერატორი². 1880 წლის ივნისში არტემ ნუბაევს დილის ათ საათზე ქალაქ სიღნაღში უნახავს ღობეზე გაკრული და ქუჩებში გაბნეული პროკლამაციები³.

თბილისის უანდარმთა სამმართველოს ცნობაში ვკითხულობთ, რომ 1881 წლის 5 ნოემბერს ღამით, ქალაქის ქუჩებში დიდი რაოდენობით გაავრცელეს მთავრობის საწინააღმდეგო პროკლამაციები. პროკლამაციები გაავრცელეს აგრეთვე ქუთაისსა და საქართველოს სხვა ქალაქებშიც⁴.

იმ დროს, როცა მუშათა კლასი, როგორც რევოლუციური ძალა, საბოლოოდ ჩამოყალიბებული არ იყო კოლონიური საქართველოს სინამდვილეში, გლეხობის ინტერესებს გამოხატავდნენ თერგდალეულები — საქართველოს ეროვნულ-განმათავისუფლებელი მოძრაობის გამოჩენილი ხელმძღვანელები და ხალხოსნები. ხშირად, ისინი ტრიბუნად იყენებდნენ აჯანყების მონაწილე ბრალდებულ გლეხთა სასამართლო პროცესებს, იცავდნენ მშრომელ გლეხობას, მათ სამართლიან განმათავისუფლებელ ბრძოლას, ამხელდნენ ცარიზმის კოლონიურ პოლიტიკას, ქადაგებდნენ პროგრესულ-დემოკრატიულ იდეებს და სხვ.

§ 2. ცვლილებანი კავკასიის უმაღლეს მმართველობაში.

კოლონიური ჩაბვრის გაძლიერება საქართველოში

მეფისნაცვლობის გაუქმება. 80-იანი წლების რეაქცია მიმართული იყო მთელი რუსეთის რევოლუციურ-პროგრესული ძალების, კერძოდ, რუსეთის იმპერიაში შემავალი ჩაგრული ხალხების წინააღმდეგ. ცარიზმი სეპარატიზმს აბრალებდა არარუს ხალხებს და ძალდატანებითი გარუსების,

¹ სსცია, ფ. 7, საქ. 2601.

² იქვე, საქ. 2698.

³ იქვე, საქ. 2646.

⁴ იქვე, ფ. 153, საქ. 63.

კოლონიზატორების ჩასახლების, მშობლიური ენის წართმევის გზით მათ მოსპობას ესწრაფოდა. რეაქციული რუსიფიკატორული ელემენტები ცდილობდნენ სავსებით მოესპოთ ფინეთისა და პოლონეთის უმნიშვნელო ავტონომიური უფლებანი, კავკასიაში კი ისინი ადმინისტრაციული ავტონომიის ნასახსაც კი ვერ ურიგდებოდნენ. ცარიზმი შულს თესავდა ჩაგრულ ერთა შორის, ერთმანეთს უსევდა მუსულმანებს და ქრისტიანებს, აწყობდა ებრაელთა რბევა-აწიოკებას. ცარიზმი ველიკორუსებს, რჩეულ რასად, სლავური სამყაროს გაერთიანების მესვეურად მიიჩნევდა. ხოლო იმპერიაში შემავალ პატარა ერებს უყურებდა, როგორც დაბალ და არასრულფასოვან რასას, უსპობდა მათ მშობლიურ ენას; ახდენდა ქვეყნის ახალ ადმინისტრაციულ დაყოფას, იმ მიზნით, რომ ხსენებაც მოესპო რუსეთის იმპერიის მთელი რიგი ერებისა, რომელთაც თავიანთი სახელმწიფოებრივი არსებობის მრავალსაუკუნოვანი ისტორია ჰქონდათ. ამ მიზნით. 1884 წლიდან პოლონეთის სამეფოს „ვისლისპირეთის მხარე“ უწოდეს. უკრაინისა და ბელორუსიის ეროვნული სახელწოდებანი მოსპეს, მათი ტერიტორია გუბერნიებად დაყვეს და მმართველობის სრული ცენტრალიზებული სისტემა დაუმკვიდრეს. 1882 წლის იანვარში საქართველოსა და ამიერკავკასიის მმართველობის სისტემა შეცვალეს. გაუქმდა კავკასიის მეფისნაცვლის თანამდებობა და დაწესდა მთავარმართველის თანამდებობა, რაც იმას ნიშნავდა, რომ კავკასია კარგავდა იმ შეკვეცილ ადმინისტრაციულ ავტონომიასაც კი, რომელიც მას ვორონცოვის დროიდან ჰქონდა მინიჭებული და აღდგენილ იქნა გენერალ-გუბერნატორთა თანამდებობანი. გუბერნატორებს ნება ეძლეოდათ საკუთარი შეხედულებისამებრ სამხედრო წესების გამოცხადებისა და შეიარაღებული ჯარის ნაწილების გამოყვანისა „საზოგადოებრივი წესრიგის დასაცავად“. საქართველოსა და ამიერკავკასიის გუბერნიები უშუალოდ პეტერბურგს დაუქვემდებარდა. კავკასიის მთავარმართველი მხოლოდ ზედამხედველობას ახორციელებდა. რაკი კავკასიის უმაღლეს მმართველობაში მომხდარი ეს ცვლილებანი მიზნად ისახავდა ცარიზმის კოლონიური და რუსიფიკატორული პოლიტიკის გაძლიერებას, ახლადშექმნილ და რეორგანიზებულ ხელისუფლებას სათავეში უკიდურესი რეაქციონერები ჩაუყენეს. მეფისნაცვალი მიხეილ ნიკოლოზის ძე რომანოვი კავკასიაში თავისი თვრამეტწლიანი საქმიანობის მანძილზე ფაქტიურად აგრძელებდა მიხეილ ვორონცოვის მიერ შემუშავებულ კურსს და ერთგვარ ანგარიშს უწევდა მხარის ეროვნულ-კულტურულ და ეკონომიურ თავისებურებებს. ეს კურსი უარყოფილ და დაწუნებულ იქნა მეფისნაცვლის თანამდებობის გაუქმებასთან ერთად. მიხეილ პეტერბურგში გაიწვიეს. კავკასიაში მთავარმართველის თანამდებობაზე დანიშნეს ცარიზმისადმი ერთგულებით სახელმძღვანელო გენერალი დონდუკოვ-კორსაკოვი, რომელიც ამ თანამდებობაზე 1890 წლამდე იმყოფე-

ბოდა. იგი შერემეტიევმა შეცვალა. 1896 წელს მას მოჰყვა გოლიცინი. ცარიზმის ეს ერთგული სატრაპები, პირწავარდნილი რეაქციონერები, თავგამოდებული კოლონიზატორები და რუსიფიკატორები იყვნენ. ქართული ეკლესიის მესაქედ, ეგზარქოსად ნიშნავენ არქიეპისკოპოს პავლეს, ხოლო კავკასიის სასწავლო ოლქის მზრუნველად — იანოვსკის, რომლებიც აგრეთვე რუსიფიკატორები და რეაქციონერები იყვნენ. კულტურის, რელიგიისა და პრესის დარგში, საერო და სასულიერო სასწავლებელთა, საერთოდ განათლებისა და ეკლესიის სფეროში დამკვიდრდა მკაცრი ზედამხედველობა და ცენზურა. ბრძოლა გამოუტყხადეს ქართულ წიგნებსა და ჟურნალ-გაზეთებს, რომელთა მეშვეობით ხალხში ვრცელდებოდა ეროვნულ-განმათავისუფლებელი, ჰუმანისტურ-პროგრესული და დემოკრატიული შეხედულებანი. ჟანდარმერიისა და ოხრანკის მიერ ქართველი ხალხის, მისი მოწინავე შვილების დევნა ყოველდღიურ მოვლენად იქცა. საქართველოს ეროვნულ-განმათავისუფლებელი მოძრაობის გამოჩენილ წარმომადგენლებზე, რომლებიც იცავდნენ ქართულ ენასა და მრავალსაუკუნოვან კულტურას, საგანგებო მეთვალყურეობას აწესებენ, დევნიან. ავიწროებენ, ზოგჯერ კიდევაც აპატიმრებენ.

სახელოვანი ქართველი მწერლისა და საზოგადო მოღვაწის დიმიტრი ყიფიანის ვერაგული მკვლელობა ვადასახლებაში ცარიზმის სისხლიანი რეაქციის ტიპიური გამოვლენა იყო. ბიუროკრატი მოხელენი კვლავ ენერგიულად იცავდნენ უსაფუძვლო მონაჭორს, თითქოს ქართველობა და ამიერკავკასიის სხვა ხალხები მოქალაქეობრივად დაბალ დონეზე იდგნენ და მოუშზადებლნი იყვნენ მმართველობისა და სასამართლოს სფეროში იმ რეფორმების განხორციელებისათვის, რომლებიც რუსეთის შიდა გუბერნიებში გატარდა. საქართველოსა და ამიერკავკასიის მოსახლეობა კვლავ მოკლებული რჩებოდა როგორც საერთო თვითმმართველობას, ისე ახალ სასამართლოს და ხალხის ბედს გუბერნატორები, მაზრის უფროსები და ბოქაულები განაგებდნენ.

§ 3. რეაქციული ძალების შემოტევა ქართული ეროვნული კულტურის წინააღმდეგ

ქართველი ხალხის ეროვნული ჩაგვრა, რა თქმა უნდა, არ იყო მხოლოდ 80-იანი წლებისათვის დამახასიათებელი მოვლენა. იგი ცარიზმის ბატონობის მთელი პერიოდის, მისი კოლონიური პოლიტიკის შემადგენელი ელემენტი იყო და მეფის რუსეთის მმართველობის დამკვიდრებას მოჰყვა თან. მაგრამ ისეთი გააფთრებული დევნა-შევიწროება, აშკარა დარბევა, რაც ქართველმა ხალხმა რეაქციის ძალების თარეშით განიცადა ამ პერიოდში, არ ახსოვს ცარიზმის ბატონობის 80-წლიან ისტორიას.

რეაქციის ძალები საქართველოში არა მხოლოდ ილაშქრებდნენ რევოლუციურ-პროგრესულ დემოკრატიული ძალების წინააღმდეგ, არამედ საგანგებო ღონისძიებასაც ატარებდნენ ქართველი ხალხის ეროვნული არსებობის, მისი კულტურისა და ისტორიის, ქართული ენის მოსასპობად, ქართველი ერის დანაწილებისა და მისი სხვადასხვა კუთხის დასაპარისპირებლად, დედასამშობლოსაგან აჭარის, სვანეთის, სამეგრელოს და აფხაზეთის ჩამოსაშორებლად.

რეაქციის გაძლიერებამ, ცარიზმის დიდმპყრობელურ-შოვინისტურმა იდეოლოგიამ და რუსიფიკატორულმა პოლიტიკამ მკაფიო გამოხატულება კულტურულ-საგანმანათლებლო დაწესებულებებისა და განსაკუთრებით სკოლების წინააღმდეგ გატარებულ ღონისძიებებში იჩინა თავი.

კავკასიის სასწავლო ოლქის მზრუნველი იანოვსკი 1881 წელს ადგენს ახალ სასწავლო გეგმას და ამასთანავე აქვეყნებს ცირკულარს, რომელთა მიხედვით ყველა ტიპის სკოლებში დაწყებითი კლასებიდანვე უნდა შემოღებულიყო რუსული ენის სწავლება. დედაენის სწავლება ქართულ სკოლებში აღიარებულ იქნა არასავალდებულოდ. ბოლო ელბა ქართულ ენაზე სწავლებას საზოგადოდ. სკოლებში, ყველგან და ყველაფერში რუსული ენა უნდა გაბატონებულიყო. რუსული ენის შესწავლას საფუძვლად დედაენა არ უნდა სდებოდა. ქართულ ენას, როგორც არასავალდებულო საგანს, სკოლაში პირველ და ნაწილობრივ მეორე კლასებში ეთმობოდა სავსებით უმნიშვნელო რაოდენობის საათები და ისიც მხოლოდ ყველა გაკვეთილის ბოლოს, როცა ბავშვი გონებრივად და ფიზიკურად მოქანცული იყო. სავსებით გაქრა და ერთიანად აღმოიფხვრა სკოლების ცხოვრებიდან ის „ზრუნვა“ ქართული ენისათვის, რასაც ცარიზმი საქართველოში მისი დამკვიდრების დღიდან ერთგვარად მაინც იჩენდა. იანოვსკის მიერ 1885 წელს გამოქვეყნებული მორიგი ცირკულარით ქართული ენა სავსებით განიღვენა სკოლიდან. დედაენის სწავლება ოფიციალურად საოჯახო საქმედ გამოცხადდა და ისიც მხოლოდ იმდენად და იმ მიზნით, რომ ქართულის ცოდნას გაეადვილებინა რუსული ენის შესწავლა. სინამდვილეში იანოვსკი სავსებით უგულვებელყოფდა მშობლიური ენის როლს რუსული ენის შეგნებულად შესწავლის საქმეში. თუმცა გაქნილი რუსიფიკატორი ამასაც ერთგვარ წყალობად უთვლიდა ქართველ ხალხს და თავი ქართული ენის მზრუნველად გამოჰყავდა. იანოვსკის ცირკულარი ოსტატურად გამოიყენებოდა იმისათვის, რომ ქართველი ბავშვები სკოლის გარეთ დარჩენილიყვნენ. ეს კარგად გაიგეს მაშინდელმა ქართველმა საზოგადო მოღვაწეებმა და ბრძოლა გამოუცხადეს იანოვსკისეულ საგანმანათლებლო სისტემას. იანოვსკის ანტიპედაგოგიური სისტემა სავალალო მდგომარეობაში აყენებდა არა მარტო რუსული ენის არმცოდნე ქართველ ბავშვებს, არამედ ქართული ენის არმცოდნე რუს პედაგოგებსაც, რომელ-

ბიც გამოსავალს სწავლების ე. წ. „მუნჯური მეთოდის“ შემოღებასა და დანერგვაში ეძებდნენ. „მუნჯური მეთოდი“ დიდ გასაჭირში აგდებდა მასწავლებლებს, ასახიჩრებდა მოსწავლეთა გონებასა და სულს, აჩლუნგებდა აზრსა და ენას. როგორც მხატვარი შმერლინგი აჩვენებდა, ვაზ. „ცნობის ფურცლისათვის“ დასასტამბად გადაცემულ და ცენზურის მიერ აკრძალულ კარიკატურაში, მასწავლებელს უენოდ, ხელების, ფეხებისა და მთელი სხეულის მოძრაობით უნდა აეხსნა ბავშვებისათვის ისეთი მოვლენები, როგორიცაა ძაღლის ყეფა, ყირამალა გადასვლა, ტანისამოსის გახდა, დაწოლა, წყლის გადასხმა, თავის ჩამოხრჩობა და სხვ.¹ ყველაფერი ეს მასწავლებელს სასაცილო მდგომარეობაში აყენებდა, ასუსტებდა ბავშვების პატივისცემას მისდამი.

„მუნჯური მეთოდის“ დანერგვას თან ახლდა სკოლებიდან ქართველ მასწავლებელთა გამოდევნისა და მათ მაგივრად უწიგნურ რუსიფიკატორულ ელემენტთა გაბატონების შეუწელებელი პროცესი. ჭერ კიდევ 1883 წლიდან სახელმძღვანელოდ იქნა დაშვებული განათლების მინისტრის დელიანოვის ინსტრუქცია, რომლის მიხედვით ვითომდა სეპარატიზმში შენიშნული ქართველები და სომხები დაშვებული არ უნდა ყოფილიყვნენ სახელმწიფო სამსახურში.

იანოვსკი მთავრობის ამ საინსტრუქციო მითითებას ერთგულად ატარებდა. საუკეთესო ქართველი და სომეხი პედაგოგების დიდი ნაწილი სკოლებს ჩამოაშორეს, ბურთი და მოედანი უპირატესად ქართულის არმცოდნე რეაქციონერებს რჩებოდათ.

საქართველოს სახალხო სკოლებიდან ქართული ენის განდევნის შემდეგ რეაქციის ერთგული მსახურნი წინადადებას იძლეოდნენ სამეგრელოს, სვანეთის და აჭარის სკოლებში ქართულის ნაცვლად სწავლება მეგრულად, სვანურად და თურქულად შემოეღოთ და მათ საფუძველზე ესწავლებინათ რუსული ენა ყველა ეროვნების (მათ შორის ქართველი) ბავშვებისათვის. მეგრელებს და სვანებს ცარიზმი ცალკე ეროვნებად აცხადებდა. მუსულმან ქართველებს, რომლებიც დაუბრუნდნენ დედასამშობლოს და თავი დააღწიეს ოსმალ დამპყრობთა ბატონობას, ცარიზმის კავკასიელი აგენტები თურქებად აცხადებდნენ, ადგილობრივი მოლაბეგების დახმარებით ხელს უწყობდნენ მუხაჯირული მოძრაობის გაღრმავებას, მუსულმან ქართველთა სამშობლოდან აყრასა და თურქეთში გადახვეწას. ახლად შემოერთებულ აჭარა-არტაანის ადმინისტრაციულ მართვა-გამგეობას ცარიზმი ამიერკავკასიის თურქებით დასახლებულ ადგილთა მსგავსად აწყობდა, ებრძოდა ქართულ დაწესებულებებს, ხელს

¹ კარიკატურა გამოაქვეყნა ა. იოვიქმ „საისტორიო მოამბეში“, ტ. 5 (იხ. მისი, ო. გოგებაშვილი (დოკუმენტური მასალები), გვ. 7.

უშლიდა ამ მხარის მოსახლეობის ქართველ ხალხთან დაახლოებას, ამავე დროს თითქმის ხელუხლებლად ტოვებდა თურქულ ეროვნულ დაწესებულებებს. თვითმპყრობელობის მოხელენი დავიწყებას აძლევდნენ რუსეთ-თურქეთის 1877—1878 წლების ომის დროს კავკასიის მეფისნაცვლის მიხეილის მოწოდებას ქართველი ლაშქრისადმი: „თქვენს წინ — მინდორნი და სიმაგრენია, სადაც თქვენს მამებს და ძმებს თავისი სისხლე დაუღვრიათ“¹.

ცარიზმის მთელი ეს ღონისძიებანი უპირისპირდებოდა ქართველ ხალხის ეროვნულ ძალთა აღმავლობისა და კონსოლიდაციის იმ ღრმა სოციალ-ეკონომიურ პროცესს, რომელიც თავის უშუალო გამოხატულებას ეროვნულ-განმათავისუფლებელ მოძრაობაში პოულობდა. თუ საქართველოს სოციალ-ეკონომიური განვითარება XIX საუკუნის 60-იანი წლებიდან ხელს უწყობდა ქართველი ხალხის შემადგენელ ტომთა და ცალკე კუთხეთა ერთმანეთთან მჭიდროდ დაკავშირებას, მათი კულტურის ერთობის განმტკიცებას, კონსოლიდაციას და ბურჟუაზიულ ერად მის ჩამოყალიბებას, ცარიზმი უპირისპირდებოდა ამ ბუნებრივ-ისტორიულ პროცესს და ხელოვნური საშუალებებით ცდილობდა მის შეჩერებას. თვითმპყრობელობა ესწრაფოდა ქართველი ერის შემადგენელი ტომების ერთმანეთისათვის დაპირისპირებას, რათა გაეადვილებინა ქართველი ერის დაშლა-დანაწევრება და ცალ-ცალკე თითოეული ნაწილის სრული ასიმილაცია.

ილია ჭავჭავაძე აღმფოთებით ლაპარაკობდა იმ ხერხებსა და მეთოდებზე, რომელთა გამოყენებითაც შუაგულ ქართლში მდებარე გორის საოსტატო სემინარიის რუსოფილურ გამგეობას „დაუბტკიცებია“, რომ „ქართველები ქართველები არ არიანო“ და ამის საფუძველზე „ქართულის სახსენებელიც“ გაუქრია. რაკი სკოლაში მიღებულ მოსწავლეთა დიდ უმრავლესობას ქართველობა შეადგენდა, ღირექციას იმ მიზნით, რომ ქართული ენა არ გაეჭაჭანებია და სწავლება მხოლოდ რუსულ ენაზე ეწარმოებია, დაუდგენია, სემინარიაში თორმეტი სხვადასხვა ეროვნების მოსწავლეა გაერთიანებული და თითოეულისათვის მშობლიურ ენაზე სწავლება, რასაკვირველია, შეუძლებელიაო. „ამათ შორის — წერს ილია ჭავჭავაძე — რუსები არიანო ექვსნი, ქართველები ცამეტნი, იმერლები თორმეტნი, სომხები ექვსნი, პოლიაკები ორნი, ინგილონი ორნი, გურულნი ორნი, ფშავნი ორნი, აფხაზნი ორნი, უდინი ერთი... და ამ-გვარად, ქართველი, გურული, იმერელი, ფშაველი, — ქართველად არ უცენია გორის სემინარიის მეცნიერებას... რომ ქართველი ქართველი არ არისო, ბალიან კარგადაც მოუგონია, სახელი და დიდება მომგონებელს... მაგრამ

¹ „ივერია“, 1877, № 4.

ჩვენ ამაზედ უნდა ვიცინოთ თუ ვიტიროთ?“¹ — კითხულობს ილია ჭავჭავაძე.

ბნელეთის ამ მოციქულებს ქართული ენის მტრობით სემინარიის წესდებაც კი დაუმახინჯებიათ და სემინარიასთან არსებულ მოსამზადებელ კლასში, ე. წ. პროსემინარიაში ახლად ჩარიცხულ ქართველ ბავშვთათვისაც არ ბიუციათ საშუალება ქართულად ესწავლათ. ქართული ენის სწავლების მაგიერ ამ პროსემინარიაში მასწავლებელ ნათიევს შემოუღია ქართული სიტყვების რუსული ასოებით წერა. „აღლია და თავის ანბანში შიგა და შიგ ქართული სიტყვები ჩაურთავს რუსული ასოებითა, რადგანაც რუსულ ანბანს აკლია ხუთმეტამდე ნიშნები ჩვენი ხმების გამოსახატავად. ამიტომ უფ. ნათიევს თავისით მოუგონია ახალი ასოები... საწყალო ბავშვებო, — შენიშნავს ილია, — არ გეყოფათ განა ამდენი ანბანების, რომ „ნათიური“ ანბანიც თქვენდა საუბედუროდ არ გამოჩენილიყო?“².

ქართველი ერის შემადგენელი ნაწილების ერთმანეთთან დაპირისპირება და მათი არაქართველებად გამოცხადება იმ პერიოდში, როცა სინამდვილეში მიმდინარეობდა ქართველი ხალხის ეროვნული კონსოლიდაციის პროცესი, ისტორიის ჩარხის უკუღმა შემოტრიალებას და ქარის წისქვილებთან ბრძოლას ნიშნავდა. მაგრამ რეაქცია არ ცხრებოდა, იგი ებრძოდა ქართველთა ეროვნებას და მის საფუძველს — ენას, ისტორიას. ქართულ დამწერლობას. „ნათიური“ ანბანის შემოღების ცდა ქართული დამწერლობის მოსპობისაკენ იყო მიმართული. 1888—1889 წლებში პრაქტიკულად გადადგეს ნაბიჯები მეგრულ-სვანური უმწერლობო ენებისათვის ერთბაშად ანბანის შემუშავებისა და ამავე ენებზე დაწყებითი სკოლებისათვის სახელმძღვანელოს შედგენა-გამოცემისათვის. ამით ცარიზმი ცდილობდა ქართველი ერის დაშლა-დანაწილებას, ქვეყნის სრულ რუსიფიკაციას³.

¹ ი. ჭავჭავაძე, თხზ., ტ. II, პ. ინგოროყვას რედაქციით, 1941, გვ. 578—579.

² იქვე, გვ. 580.

³ 1885 წელს გამოიცა ბრძანება სამეგრელოს სკოლებში ქართული ენის აკრძალვის შესახებ. ამიერიდან აქ რუსული ენის სწავლება, თუ მუნჯური მეთოდით არა, მეგრული ენისა საშუალებით უნდა წარმართულიყო. მეგრული ენისათვის ასევე რუსულ ანბანზე დაყრდნობილი დამწერლობა იქმნებოდა. ამის ავტორად ყალბი საბუთის შედგენაში დახელოვნებული ცნობილი ამორღია გვევლინება. მან 1889 წელს შეთხზა რუსული ანბანის მიხედვით მეგრული ანბანი. დაიწყეს საღვთო წიგნების მეგრულ ენაზე გადმოთარგმნა, მაგრამ ეს თარგმანები იმდენად უცხო და ხალხისათვის სავსებით გამოუსადეგი გამოდგა, რომ იგი სოციალის იწვევდა მსმენელებშია. ეს თარგმანები უარყო სამეგრელოს სამღვდელთაების შეკრებულებამაც და მეგრულ ენაზე წირვა-ლოცვის შემოღება ჩაიფუშა. ამორღია ამაოდ დამერა და იმედებიც გაუცრუვდა, მაგრამ ბრძოლა ამით არ დამთავრებულა. 1892 წელს დევიკი მეგრული სკოლებისათვის რუსული ენის სახელმძღვანელოს იდგენს ხელახლა გამოგონილი მეგრული ანბანის საფუძველზე, რომელიც არაფრით განსხვავდებოდა რუსულისაგან და დამუშავებული იყო მეცნიერებათა აკადემიის მიერ. ასეთივე იყო შავრთობის ლონისძიებანი სვანების მიმართ.

რეაქციონერები ბრძოლას აჩაღებდნენ ქართული საისტორიო წყაროების წინააღმდეგ. ამ წყაროთა უგულვებელყოფისა და გაყალბების ქართველი ხალხის მრავალსაუკუნოვანი ისტორიის საფუძვლის მოშლის მიზნით აბუჩად იგდებდნენ ქართულ ეროვნულ დროშას, აქეზებდნენ სომხურ ბუჩუკაზიულ-ნაციონალისტურ ელემენტებს საქართველოს ისტორიული წარსულის გასაყალბებლად და მოძმე ერებს შორის მტრობას აღვივებდნენ. საქართველოს სახელოვან მეფეებს და ქვეყნის სახელოვან შვილებს აუგად იხსენიებდნენ, მიწასთან ასწორებდნენ, შოთა რუსთაველის გენიალურ ქმნილებასაც არ ინდობდნენ. თხზავდნენ და ავრცელებდნენ ქართველი ერის დაბერების, მისი განვითარების უპერსპექტივობის რეაქციულ თეორიას, რომელსაც თან ახლდა მამა-პაპათა სისხლით მორწყული ქართული მიწებიდან მოსახლეობის აყრა-შევიწროების შეუწყველებელი პროცესი.

რუსიფიკატორთა მიზნები ქართული ენისა და თვით ერის მოსპობისაკოლონიზაციით შედარებით ადვილად განსახორციელებელი ჩანდა. ამიტომ ეს მეთოდი — ქვეყნის გარუსებისა — სხვა ღონისძიებებთან ერთად. რომლებსაც 80-იანი წლებიდან რეაქცია საქართველოსა და ამიერკავკასიაში ახორციელებდა, საერთო აღიარებას პოულობდა და მისი პრაქტიკულად განხორციელებისათვის ყველაფერი კეთდებოდა.

ქართველი ხალხი, მისი მოწინავე შვილები, ნათლად ხედავდნენ რეაქციის თარეშით შექმნილ დიდ ეროვნულ საშიშროებას, რომელიც წალეკვით ემუქრებოდა ქართველობას, მის ენას, ისტორიას, იტაცებდა მის მიწა-წყალს და სხვ. ამიტომ რა გასაკვირია, რომ ერის საუკეთესო ძალები წინ აღდგომოდნენ რეაქციის ამ ტალღას და ცარიზმის ამგვარი პოლიტიკისათვის სამკედრო-სასიცოცხლო ბრძოლა გამოეცხადებინათ. რეაქციის წინააღმდეგ მათი ბრძოლის მთავარი იარაღი იყო ცენზურის მიერ უკიდურესობამდე შევიწროებული პრესა და ქართველ მოღვაწეთა მიერ დაარსებული ზოგი ქართული საზოგადოება, რომელთა საშუალებით რამდენადმე ხერხდებოდა ქართველი ხალხის ეროვნული ინტერესების დაცვა.

§ 4. ბრძოლა ცარიზმის რუსიფიკატორული პოლიტიკის წინააღმდეგ ბანააულები და ეპალსის დარგში

80-იანი წლების რეაქცია ქართველი ხალხის მდგარ წინააღმდეგობას წააწყდა და გამოიწვია მთელი მისი პროგრესულ-განმათავისუფლებელი ძალების და საზოგადოებრივი აზრის დარაზმვა.

მთავრობის რეაქციული პოლიტიკის საწინააღმდეგო საზოგადოებრივი აზრს საათვეში ედგნენ ქართული პროგრესული პრესა და მისი სულის-

ჩამდგმელნი, ეროვნულ-განმათავისუფლებელი მოძრაობის მედროშენი. გაზეთების „დროების“, „ივერიის“, „ობზორის“, „შრომის“. ეურნალ „იმედის“ ფურცლებზე იბეჭდებოდა რევოლუციური, ეროვნულ-განმათავისუფლებელი შინაარსის სტატიები, რომლებშიც მხილებული იყო რეაქციონერთა ბნელი საქმეები და რუსიფიკატორული პოლიტიკა. ეროვნული კულტურის დაცვისათვის ბრძოლაში ქართველი მოღვაწენი შეხედულებათა სხვადასხვაობის მიუხედავად ერთობლივი განმათავისუფლებელი მოძრაობის დროშის ქვეშ ირაზმებია. „იმედში“ მოღვაწენი ეურნალის დახურვის შემდეგ მთლიანად „ივერიაში“ გადავიდნენ. ასევე მოიქცნენ წვრილბურჟუაზიული მიმართულების ზოგი სხვა წარმომადგენელნი, რომელნიც თავიანთ თავს „მუშა ხალხის ინტერესების დამცველთ“ უწოდებდნენ.

ცარიზმის რეაქციას წინ აღუდგნენ ქართული ეროვნული ძალები, მისი ისეთი კულტურულ-საგანმანათლებლო დაწესებულებანი და ორგანიზაციები, როგორც იყო ქართველთა შორის წერა-კითხვის გამავრცელებელი საზოგადოება, ქართული თეატრი, ქართული დრამატული საზოგადოება. საადგილმამულო ბანკი და სხვ. რეაქციის ძალებს სამკვდრო-სასიცოცხლო ბრძოლას უმართავენ ქართველი ხალხის საუკეთესო შვილები, ეროვნულ-განმათავისუფლებელი მოძრაობის მედროშენი, — ი. ჭავჭავაძე, ა. წერეთელი, ი. გოგებაშვილი, ს. მესხი, ნ. ნიკოლაძე, დ. ყიფიანი და სხვები.

მკაცრი საცენზურო პირობების მიუხედავად, რეაქციის წინააღმდეგ ხმას იმადლებს ქართული პრესა. პირველი ყუმბარა მტრის ბანაკში ს. მესხმა გადაისროლა. გაზეთმა „დროებამ“, რომელსაც იგი რედაქტორობდა, 1880 წელს „ღია წერილი“ მოათავსა კავკასიის სამოსწავლო ოლქის მზრუნველის იანოვსკისადმი, სადაც ვკითხულობთ: „პირველი ნაბიჯები თქვენი მოქმედებისა ჩვენში, თითქოს გვაიმედებდნენ, რომ ყველამ თავისი სამშობლო ენა უნდა ისწავლოს, ყველა კაცი თავისი ქვეყნისა და მოქმედებისათვის უნდა იყოს მომზადებული. მაგრამ ჩვენდა სამწუხაროდ უკანასკნელ დროს რატომღაც სხვა ხმები გვესმის და სხვა ნაყოფს ვხედავთ თქვენი მოქმედებისას. მაგალითები ბევრია. მოვიყვანთ მხოლოდ ორს. როდესაც ამ ენკენისთვეში ქუთაისის გუბერნიის სასოფლო სკოლების მასწავლებელთა კრება იყო, ამ სკოლების დირექტორებს ოფიციალურად ქალაქი მისწერეთ, რომელშიც ეუბნებოდით იმათ, — ეცადეთ, მასწავლებელთა კრებამ გადაწყვიტოს, რომ რუსული ენის შესწავლა სასოფლო სკოლებში პირველს წლიდანვე დაიწყონ შეგირდებმაო... მეორე ფაქტი კიდევ უფრო ცხადად გვიმტკიცებს საუბედუროდ ამას; „დროების“ წინანდელ (253) ნომერში მოყვანილი იყო თქვენი სიტყვა ახალენაკის სკოლის მასწავლებლებისადმი... თუ როგორ გაუჩავრდით ამ სკოლის მასწავლებლებს იმისათვის, რომ რატომ წელს ენკენისთვეში შემოსულ

ბავშვებს რუსულად არ ასწავლითო, არამედ ქართულადაო. მე შევნიშნეო, — ბრძანებთ თქვენ, — რომ თქვენ ქართველები, რაღაც სხვა მიზანს მისდევთ და არა პედაგოგიურსაო! თქვენ წინააღმდეგი ხართ რუსულსაო!¹ შემდეგ სერგი მესხი იანოვსკის უხსნის, რომ „ორი ათასი წელიწადია, რაც ჩვენი ხალხი ისტორიული ცხოვრებით ცხოვრობს... თითო მტკაველი თავისი სამშობლოს მიწისა... ყოველი ლექსი თავისი სამშობლო ენისა ათას და ათი ათას საუკეთესო შვილად უღირს... მთავრობა არასოდეს არ ცდილა, რომ თავის ქვეშევრდომ ხალხისათვის მოესპო სამშობლო ენა, სარწმუნოება, ერობა:.. და თქვენ კი გნებავთ ახლა, რომ... უეცრად მოსპოთ ხალხის ენა... არავის არ აქვს უფლება ამისთანა სიტყვებით მიმართოს ქართველ ხალხს... ქართველების სურვილი იგივეა, რაც ყველა ხალხისა: დაიცვან თავისი სამშობლო ენა, მამული, რჯული და სარწმუნოება... თქვენი სურვილია კი, რომ ქართველებს ქართული დაავიწყეთ. ეს გვინდოდა გვეთქვა თქვენთვის ბ-ნო იანოვსკი. ვათავებ სურვილით, რომ შემდეგში უსაფუძვლო ცილისწამება ქართველ ხალხზე აღარ გაგვეგონოს“².

სერგი მესხის წერილმა კიდევ უფრო გააშმაგა ცარიზმის მოხელენი. ბრძოლაში თერგდალეულებთან ერთად ებმება დიმიტრი ყიფიანი. „ღია“ წერილს დიმიტრი ყიფიანი უწოდებს „მგზნებარე წარმოთქმას უსამართლოდ განგმირული გრძნობისა“. იგი აღელვებული მიმართავს იანოვსკის და დასძენს: „ახლა მიხვდით თუ ვერა, რასაც თქვენი ქადაგება მოასწავებს. ჩინგისხანმა, ლანგ-თემურმა, შაჰ-აბაზმა, ნადირ-შაჰმა ვერ შემეუსრეს ჩვენი ხალხის ნება და ახლა თქვენ გინდათ შემეუსროთ? ჩვენ, ჩვენის კეთილი ნებით, სიყვარულით და სასიკეთით მივენდეთ რუსეთს, რომლის გარს შეუწერელი ერთგულება შეურყევლად გვაქვს გულში ჩანერგილი. არა, ბატონებო: თუ ღია წერილის აზრი არ დაირღვა: ბატონი იანოვსკი შემცდარი კი არა, შემცოდავი იქნება ორგვარად. ჯერ რუსეთის წინაშე, რომ ერთი უერთგულესი თაყვანისმცემელი ხალხის გაორგულება განუზრახავს, და მეორე მეცნიერების წინაშე..., რომელიც ბრძანებს — პირველ წელსა ყრმასა ჯერ საშინაო ენას ასწავლიან და მერე სხვა ქვეყნისასო“³.

დ. ყიფიანმა აიძულა იანოვსკი გაზეთ „კავკაზში“ გამოსულიყო ვრცელი სტატიით და პირადად ემართლებინა თავი ფართო საზოგადოების წინაშე⁴. იგი შეეცადა ჩრდილი მიეყენებინა დ. ყიფიანის მიერ მოტანილი საბუთებისა და ფაქტებისათვის და მისი ხელქვეითი ინსპექტორ-დირექტორების „თვითმოქმედებად“ გაესაღებია სკოლებიდან ქართული ენის

¹ „ღროება“, 1880, № 254.

² იქვე.

³ იქვე, № 262.

⁴ «Кавказ», 1880, № 248.

გასადევნად გატარებული ღონისძიებანი. მაგრამ იანოვსკი ამ წერილშიაც იძულებულია გაიმეოროს, რომ მას პედაგოგიურად გამართლებულად მიაჩნია სკოლებში ქართველ ბავშვთათვის რუსული ენის სწავლება პირველი წლიდანვე და რომ მან კიდევაც გადადგა საამისო ნაბიჯები.

ქართული კულტურის მოღვაწენი, რა თქმა უნდა, ვერ დააკმაყოფილა თავდაცვაზე გადასულ იანოვსკის ამ წერილმა და კამათში ი. ჭავჭავაძე ჩაება. მან „დროებაში“ გამოაქვეყნა ვრცელი წერილი „ბატონ იანოვსკის წერილის გამო“, რომელშიც ვკითხულობთ: „ჩვენ დიდად მოხარულნი ვართ, რომ ბატონი იანოვსკი ეგრე ბეჯითად უარყოფს ყოველს იმას, რაც მართლაც საკადრისი არ არის განათლებულის კაცისათვის. მას შემდეგ რაც ეგრე საჯაროდ გამოაცხადა ეგ უარყოფა... რომ იგი თავილობს იმისთანა მოქმედებას და სიტყვას, რომელიც ჩვენდა სამწუხაროდ აქამდე საკვებურად ქონდათ ზოგიერთს აქაურს პედაგოგებს და პედაგოგის გარეთ მდგომ მოხელეებსაც, ესეც ერთი წარმატებაა, ერთი სიკეთეა“¹.

ილია ჭავჭავაძე, რა თქმა უნდა, ამაზე არ ჩერდება და ასაბუთებს ანტიპედაგოგიურობას და უსაფუძვლობას იანოვსკის იმ დებულებისა, რომლის მიხედვით ქართველ ბავშვებს რუსული ენის შესწავლა პირველ-სავე კლასებში უნდა დაეწყოთ.

ილია ჭავჭავაძე იანოვსკის კონცეფციას უპირისპირებს მსოფლიოს გამოჩენილი პედაგოგების მოძღვრებას მშობლიურ ენაზე სწავლების თაობაზე. ენება რა რუსი პედაგოგის უშინსკის მეცნიერულ შეხედულებებს მშობლიურ ენაზე სწავლების მნიშვნელობის შესახებ, დასძენს: თუ გავითვალისწინებთ აზრს უშინსკისთანა „გამოჩენილი პედაგოგისა, რომლის ტოლი რუსებს ჯერ აქობამდე არ ჰყავთ, საკმარისია, რომ დავინახოთ, რაში მდგომარეობს ბ-ნ იანოვსკის შეცდომა საზოგადოდ“². ილია განიხილავს იანოვსკის შეხედულებებს დედა ენის უგულბელყოფის შესახებ და წერს: „ჩვენ რომ ეგრე დაჟინებით უკანდაუხეველად ვთხოულობთ დედენისათვის სრულს და დაუბრკოლებელს გზას სასწავლებელში, — ეგ მარტო დედაენის სიყვარულით არ მოგვდის, ვთხოულობთ და ვნატრობთ იმიტომაც, რომ უდედაენოდ გონების გახსნა ბავშვისა ყოველად შეუძლებელია. მაშინ სკოლა გონების გახსნის სახსარი კი არ არის, გონების დაჩაგვრისა, გონების დახშვისა, დათრგუნვისა და განა ეს სასურველია ვისიმე?“ რაც შეეხება კეთილშობილურ სურვილს რუსული ენის, როგორც სახელმწიფო ენის შესწავლის მნიშვნელობისა და საჭიროების შესახებ, ილია ყოველმხრივ მიესალმება და მხარს უჭერს ხალხის მისწრაფებას შეისწავლოს რუსული ენა. რუსული ენის შესწავლა, — წერს

¹ ი. ჭავჭავაძე, თხზ., ტ. II, პ. ინგოროყვას რედაქციით, თბ., 1941, გვ. 551; „დროება“, 1881, № 33.

² ი. ჭავჭავაძე, თხზ., ტ. II, გვ. 554.

ილია — „ჩვენც გვსურს და ძალიანაც, განა მართო იმისათვის, რომ საჭიროა ვითარცა სახელმწიფო ენა, არამედ იმისათვისაც, რომ მისი ლიტერატურა ეხლა იმდენად ძლიერია, რომ შეუძლიან გონება გახსნილ კაცს სულის საზრდო მისცეს. იგი ფარ-ხმალია დღეს ჩვენთვის ყველაფერში და ყველგან, რაკი შინიდან ფეხს გარეთ გავდგამთ, მაგრამ ისე მოგვიწყობს სკოლა, რომ რუსული ენის ცოდნა ნამდვილი და მართალი ცოდნა იყოს იმდენად მაინც, რომ კაცმა ცხოვრებაში და ცხოვრებისათვის გამოიყენოს“¹. ილიას აზრით, საზოგადოდ, უცხო ენის შესწავლა მშობლიური ენის შესწავლის საფუძველზე უნდა ხდებოდეს.

ბრძოლაში ებმება ი. გოგებაშვილიც. იგი იანოვსკის წინააღმდეგ იყენებს იმპერატორის 1864 წლის რესკრიპტს მშობლიურ ენაზე სწავლების ნებართვის შესახებ, სადაც აღიარებულია, რომ ზოგად, განსაკუთრებით დაწყებით, სასწავლებლებში სწავლება უნდა წარმოებდეს მოსახლეობის უმრავლესობის ენაზე. ეს ფაქტიურად უარყოფილ იქნა 80-იანი წლების რეაქციის პერიოდში. ი. გოგებაშვილი ცარიზმის კავკასიელ მოხელეებს კანონის დამრღვევთ უწოდებს და კითხულობს: „როგორ შესძლეს უმაღლესი ნების შეცვლა ეგრე დაუსჯელად“. მისი აზრით, საჭიროა მეფის კანონების დამრღვევთა მხილება იმ მიზნით, რომ ქართული ენა აღდგენილი იქნეს საქართველოს სკოლებში².

ი. გოგებაშვილი ბრძოლას განაგრძობს ოფიციალური ვაზეთის „კავკაზის“ ფურცლებზე გამოთქმული მოსაზრების წინააღმდეგ და აკრიტიკებს რუსიფიკატორების მანერ კონცეფციის ანტიბედაგოგიურ საფუძველებს. „კავკაზის“ პუბლიცისტი სკოლებში ქართული ენის, ისე როგორც სომხური და აზერბაიჯანული ენების, აკრძალვას იმ მოტივითაც ასაბუთებდა, რომ ქართველებს, ისე როგორც სომხებს და აზერბაიჯანელებს. საკუთარი ლიტერატურა არა აქვთო, რომ ქართლში ცხოვრობს თორმეტ ენაზე მოლაპარაკე სხვადასხვა ხალხი, ცალკეული სოფლის სკოლებში ვხვდებით სხვადასხვა ეროვნების ბავშვებს, რომელთაც ერთმანეთის არა გაეგებათ რა, და ასეთ პირობებში „ველურობა იქნებოდა მოგვეთხოვა სახალხო მასწავლებლისაგან, რომ ის იყოს მეტყველი თავის მოსწავლეთათვისო“. ი. გოგებაშვილმა მთელი ამ მსჯელობის უსაფუძვლოება ნათელიყო და დააყენა კითხვა: „როგორ იბადება ჩვენში აზრი სახალხო სკოლების მუწე მასწავლებელთა“ შესახებ, ისეთი მასწავლებლებისა, რომელთაც შესაძლებლობა არ ექნებათ ერთი გასაგები სიტყვა მაინც უთხრან თავიანთ მოსწავლეებს?“³.

სახალხო სკოლის სწორ პედაგოგიურ ეროვნულ საფუძველებზე დაყე-

¹ ი. კ ა ვ ქ ა ვ ა ძ ე , თხზ., ტ. II, გვ. 554.

² ი. გოგებაშვილი, თხზ., ტ. I, გვ. 200.

³ იქვე, გვ. 73.

ნებასა და ახალი თაობის გონებრივ და სულიერ აღზრდას ემსახურებოდა იაკობ გოგებაშვილის მიერ შედგენილი უკვედავი სახელმძღვანელოები --- „დედა-ენა“, „ბუნების კარი“ და „რუსსკოე სლოვო“. მისმა წიგნებმა შექმნეს მიუვალი სიმაგრე ეროვნული კულტურის დასაცავად XIX საუკუნის შუორე ნახევარში, დაიცვეს და შეინახეს ქართული ენის ფესვები გადაგვარებისაგან.

ქართული სკოლებიდან მშობლიური ენის განდევნის, მუნჯური მეთოდით სწავლების დანერგვასა და მსგავს ანტიპედაგოგიურ ღონისძიებებს პროგრესულად მოაზროვნე რუსი პედაგოგები არ იზიარებდნენ. ისინი იმასაც მოითხოვდნენ, რომ რუს პედაგოგებს შეესწავლათ ქართული ენა, ლიტერატურა, ზნე-ჩვეულება ხალხისა და სხვ., თუმცა ასეთები ძალიან ცოტანი იყვნენ. ერთხანს მათ რიცხვს ეკუთვნოდა ქუთაისის გიმნაზიის დირექტორი ალ. სტოიანოვი, რომელიც 1880 წელს სამოსწავლო ოლქის მზრუნველისადმი წარგენილ ანგარიშში გაბედულად წერდა: „ჩემი აზრით, ქართული ენის სწავლება დაყენებული უნდა იქნეს სათანადო სიმაღლეზე... ამ საგნის შესახებ მე მაქვს განსაკუთრებული აზრი, რომელიც მზათ ვარ დავიცვა ყველგან. ქართული ენა მშობლიური ენაა. პირველდაწყებითი განათლება უნდა წარმოებდეს მშობლიურ ენაზე, შემდეგი განათლებაც დედა ენის საშუალებით უნდა მიმდინარეობდეს. ამიტომ, მოსამზადებელ კლასებში მასწავლებლებად ქართველები უნდა იყვნენ, ან ისეთი რუსები, რომლებმაც ქართული იციან... საქართველოში მცხოვრები რუსების შვილები ამთავრებენ გიმნაზიას, უმაღლეს სასწავლებლებს, მსახურობენ საქართველოში და არ იციან ქართველების არც ენა და არც ზნე-ჩვეულება. ინგლისელმა მოხელეებმა, რომლებიც ფოთი-თბილისის რკინიგზას აშენებდნენ, 5—6 თვეში ქართული ენა შეისწავლეს. რუსებმა კი, მიუხედავად იმისა, რომ ნახევარ საუკუნეზე მეტია საქართველოში არიან, არც ერთი ქართული სიტყვა არ იციან. აუცილებელია, რომ შემოღებულ იქნას ქართული ენის სავალდებულო სწავლება... უფროს კლასებში კი ქართული ლიტერატურის სწავლება“¹.

ალ. სტოიანოვის ამგვარი შეხედულება ოფიციალურად დაგმობილ იქნა. სულ მალე იგი გაანთავისუფლეს თანამდებობიდან და გადაიყვანეს ბათუმში, სადაც მან უარყო თავისი პროგრესული შეხედულებანი, გვერდში ამოუდგა რეაქციონერებს და აქტიურად მონაწილეობდა სომხური და ქართული ენების სკოლებიდან განდევნის მთავრობისეული კურსის განხორციელებაში.

80-იანი წლებიდან ქართულ სკოლასთან ერთად დევნას განიცდის ქართული ეკლესიაც. ამ საქმეს საქართველოში მეთაურობდა ეგზარქოსი

¹ სსცთა, ფ. 416, საქ. 2197.

პავლე, რომელიც 1881 წელს დანიშნეს. იგი რუსული შოვინიზმის და ცარიზმის კოლონიზატორული პოლიტიკის ერთგული გამტარებელი გამოდგა. ამის შესახებ 1883 წელს იაკობ გოგებაშვილი წერდა: „ახალმა ეგზარქოსმა ისე ცხადად გამოავლინა თავისი ტომობრივი განკერძოება... და მოგვცა ქართველთა ელემენტარული უფლებების მიმართ უპატივცემლობის იმდენი აშკარა საბუთი, რომ გამოიწვია ქართველ საზოგადოებაში საყოველთაო განცვიფრება და გულისწყრომა“¹.

პავლემ ქართული ეკლესიის გარუსების მიზნით თბილისის სასულიერო სემინარიაში აკრძალა ქართული სასულიერო და საერო ლიტერატურის სწავლება. სასულიერო სასწავლებლებიდან დაითხოვა ქართველი მასწავლებლები და რუსებით შეცვალა ისინი. თბილისის, თელავისა და სამეგრელოს სასულიერო სასწავლებლების ზედამხედველებიც დათხოვნილ და შეცვლილ იქნენ რუსებით. „სხვა ზედამხედველების მდგომარეობაც შერყეულია და ყველაფერი მზადდება მათ დასათხოვნად“, წერდა იაკობი. თბილისის სემინარიაში 16 დამრიგებელიდან მხოლოდ ორი დარჩა ქართველი და „მათაც ითმენდნენ გამონაკლისის სახით და პირობით იყვნენ წყალზე ჩუმი, ბალახზე დაბალი, უტყვი მოწამენი ყოველივე ქართულის უგულვებელყოფისა“².

ქართულ ეკლესიას რეაქციონერთა თავდასხმისაგან იცავდნენ საქართველოს ეროვნულ-განმათავისუფლებელი მოძრაობის მესვეურნიც, მაგრამ არა ქრისტიანული რელიგიის დოგმების განმტკიცებისა და ხალხში რელიგიური გრძნობის გაღვივების, არამედ არსებითად ქართული ენისა და კულტურის გადარჩენის მიზნით. მაგალითად, ი. გოგებაშვილი მოითხოვდა ეკლესიასა და საეკლესიო სკოლებში ქართული ენის აღდგენას. ქართული ენის კათედრის დაარსებას, რომელიც უზრუნველყოფდა ქართული გრამატიკის, სასულიერო და საერო ლიტერატურის, საქართველოს გეოგრაფიის, საეკლესიო და სამოქალაქო ისტორიის შესწავლის კარგად დაყენებას.

თერგდალეულები რეაქციის წლებში კიდევ უფრო მეტად აღვივებენ მამულიშვილურ გრძნობებს, სამშობლოს სიყვარულს. მათი აზრით, სამშობლოს სიყვარული მეტად სათუთი გრძნობაა და „მამულიშვილობას აღზრდა ესაჭიროება. ცდებიან ისინი, ვინც ფიქრობს, რომ თითქოს სამშობლოს სიყვარული ადამიანს ბუნებითვე თან დაყვება და ამიტომ ამ გრძნობის აღზრდაზე ზრუნვა რა საჭიროა“³.

¹ ი. გოგებაშვილი, თხზ., ტ. I, გვ. 455.

² იქვე.

³ იქვე, გვ. 370.

§ 5. ძართული ეროვნულ-კულტურული და სამეურნეო
საზოგადოება-დაწესებულებანი რეპატიის წლებში

ცარიზმის რეაქციულ რუსიფიკატორულ პოლიტიკას ეროვნულ-განმა-
თავისუფლებელი მოძრაობის ხელმძღვანელები ხალხის გათვითცნობიერე-
ბას და მოქმედებას უპირისპირებდნენ. ისინი აფართოებენ ბრძოლის
ასპარეზს და ქმნიან ეროვნული ხასიათის კულტურულ-საგანმანათლებლო
და სამეურნეო დაწესებულება-საზოგადოებებს, რომლებიც ორგანიზა-
ციულად გააერთიანებდა გამოფხიზლებულ ხალხს და ერის სასიცოცხლო
ძალების კონსოლიდაციისა და თვითმოქმედების ნამდვილ ორგანოებად
გადაიქცეოდა. ასეთ ორგანოებად მათ მიაჩნდათ ქართველთა შორის
წერა-კითხვის გამავრცელებელი საზოგადოება, ქართული დრამატული
საზოგადოება, ღარიბ მოწაფეთა შემწეობის საზოგადოება და სხვ.

ეროვნული კულტურის აღორძინებისა და ხალხის თვითმოქმედების
გაფუძრქვენის საქმეს ექვემდებარებოდა საადგილმამულო ბანკის საქმიან-
ობაც. ამ მიზნისაკენ უნდა წარმართულიყო ქორ-ვაკრებისა და მევახშეთა
ასალაგმად გამართული სხვადასხვა სახის კოოპერაციული გაერთიანება.
რომლებიც იმ პერიოდში პროგრესულ-დემოკრატიული ქართველი ინტე-
ლიგენციის აქტიური მონაწილეობით იქმნებოდა.

ეროვნულ-განმათავისუფლებელი მოძრაობის მეთაურები იდეურ-
საგანმანათლებლო და სამეურნეო-ორგანიზაციული ფორმების გამოყენე-
ბით ეროვნული კულტურის დაცვას და უსამართლო ძარცვა-ყვლეფისა-
გან მშრომელი გლეხკაცობის ხსნას ესწრაფოდნენ. „თუმცა ჩვენი
საზოგადოება იწოდება წერა-კითხვის საზოგადოებად, მაგრამ დიდი შეც-
დომა იქნებოდა გვეფიქრა, ვითომ მის დამაარსებლებს სახეში ჰქონდეს
პხოლოდ წერა-კითხვის სწავლება; დამფუძნებელთა გულითადი სურვილი
იყო უპირველესად შექმნა სკოლისა, როგორც კულტურის კერისა, ე. ი.
კრება იმ ძალთა, რომლებიც ქმნიან ხალხის დამოუკიდებელს შესაძლებ-
ლობას“. — ნათქვამია ქართველთა შორის წერა-კითხვის გამავრცელებელი
საზოგადოების წესდებაში.

ქართველთა შორის წერა-კითხვის გამავრცელებელი საზოგადოება.
რეაქციისა და რუსიფიკაციის წინააღმდეგ ბრძოლაში ხალხის გაღვიძე-
ბულ თვითმოქმედების ერთ-ერთ წარმმართველ და ქართველი ინტელი-
გენციის დამრავლებელ ორგანიზაციად გვევლინება ქართველთა შორის
წერა-კითხვის გამავრცელებელი საზოგადოება, რომელიც 1879 წელს
დააარსდა¹. საზოგადოების პირველი თავმჯდომარე და მისი დაარსების
ერთ-ერთი ინიციატორი დ. ყიფიანი იყო.

¹ ტრ. ხ უ ნ დ ა ძ ე, ქართველთა შორის წერა-კითხვის გამავრცელებელი საზოგადო-
ება, თბ., 1960.

საზოგადოების შექმნის ინიციატორებმა დიმ. ყიფიანმა, ილია ჭავჭავაძემ, ი. გოგებაშვილმა, ბეს. ლოღობერიძემ, ვახ. თულაშვილმა და ნ. ცხვედაძემ ჭერ კიდე 1878 წ. 20 ივნისს შეადგინეს წესდება 126 დამფუძნებელი წევრის ხელმოწერით, რომელიც 1879 წ. 31 მარტს ზოგიერთი ცვლილების შეტანით დაუმტკიცებიათ.

1879 წ. 15 მაისს შედგა საზოგადოების და დამფუძნებელ წევრთა პირველი საერთო კრება, სადაც საზოგადოების გამგეობის თავმჯდომარედ დ. ყიფიანი აირჩიეს, ხოლო გამგეობის წევრებად — ი. ჭავჭავაძე, ნ. ცხვედაძე, ი. გოგებაშვილი, ივ. მაჩაბელი, ალ. სარაჯიშვილი და რაფ. ერისთავი. კანდიდატებად — ლ. ქანანავი, დ. ავალიშვილი და გ. უთურგაული. თავმჯდომარის ამხანაგად აირჩიეს ილია ჭავჭავაძე, მდივნად — ალ. სარაჯიშვილი, მოლარედ რ. ერისთავი.

საზოგადოების წესდებით დიდი მიზნები იყო დასახული. მას ევალებოდა წერა-კითხვის გავრცელება ყველგან კავკასიაში, სადაც კი ქართველობა მოსახლეობდა. ამ მიზნით საზოგადოება ხსნიდა სკოლებს, ყოველ მხრივ ხელს უწყობდა უკვე დაარსებულ სასწავლებლებს უფლებამოსილიყო დაეარსებია სამკითხველოები, გაემართა სახალხო კითხვა-საღამოები, ეზრუნა ქართულ ხელნაწერთა ფოლკლორული და ნუმისმატიკური მასალების შეკრებისათვის, დაეხმობა სახელმძღვანელოები, პოპულარული წიგნები, გამოეცა ისტორიული და ლიტერატურული ძეგლები. საზოგადოებას ამასთანავე ევალებოდა სკოლებისათვის მოეწვია შესაფერი პედაგოგები, მოეწყო მასწავლებელთა შესაკრები კურსები და ეზრუნა პედაგოგიური კადრების მომზადებისათვის, გამოეცა ყურნალი ან ვაზეთი საზოგადოების საჭიროებისათვის, მოეწყო სასწავლო ნივთთა საწყობები და სხვ. ამ მიზნების განსახორციელებლად საზოგადოების გამგეობა იმედს ამყარებდა 1879—1880 წწ. სხვადასხვა გზით მიღებულ თუ მისაღებ ფულად სახსრებსა და საშუალებებზე. კერძოდ, დამფუძნებელ წევრთაგან საზოგადოებას უნდა მიეღო 2520 მანეთი, ნამდვილ წევრთაგან — 600 მანეთი, სხვადასხვა გზით — 1000 მანეთი, თბილისის და ქუთაისის სათავადაზნაურო ბანკებიდან — 22000 მანეთი (11000 მანეთი თითოეულისაგან). თავადაზნაურობის რეაქციული ელემენტები ეწინააღმდეგებოდნენ ბანკის მიერ ამ თანხის საზოგადოებისათვის გადაცემას, მაგრამ ისინი დამარცხდნენ¹.

1884 წლიდან საზოგადოებამ მაზრებში გაიჩინა საკუთარი აგენტები, რომელთაც დაეკისრა ახალი წევრების შეძენა, სკოლების დაარსებისათვის ხელის შეწყობა, საწევრო გადასახადების აკრეფა. მატერიალური ბაზის განმტკიცების მიზნით საზოგადოება ხშირად მართავდა სალიტერატურო

¹ ი. ჭავჭავაძე, თხზ., ტ. II, 1928, გვ. 293 — 294.

საღამოებს, სიმღერისა და ცეკვის კონცერტებს, ლატარია-ალეგრებს, კრეფდა შეწირულებებს, განაგებდა ანდერძით მისთვის დატოვებულ ფულად თანხასა და უძრავ-მოძრავ ქონებას.

წერა-კითხვის გამავრცელებელი საზოგადოების მრავალმხრივი მოღვაწეობიდან უმთავრესს და ყველაზე უმნიშვნელოვანესს სკოლების ქსელის ზრდა და გახსნილი სკოლებისადმი დახმარების გაწევა, მათი ეროვნულ ნიადაგზე დაყენება წარმოადგენდა.

საზოგადოება დაბა სოფლებში, მაზრებში გზავნიდა თავისსავე რწმუნებულებს, რომლებსაც მაზრის უფროსთან შეთანხმებით უნდა წაეხალისებინა სოფლის მოსახლეობა, დაეინტერესებინა იგი სასწავლებელთა გახსნით.

ცარიზმის ხელისუფალთა წინააღმდეგობის მიუხედავად, საზოგადოებამ 80 — 90-იან წლებში მოახერხა რამდენიმე სკოლის დაარსება. მაგალითად, მისი მზრუნველობით 1880 წლის 14 ოქტომბერს თბილისში საზეიმო ვითარებაში გაიხსნა პირველი დაწყებითი სკოლა, რომელმაც ერთ წელიწადს იარსება. მალე ბანკის სახსრებით გაიხსნა ქუთაისის ქართული სკოლა. 1884 წელს საზოგადოების ინიციატივით ძველ სენაკში ქუთაისის ქართული სკოლის პარალელური განყოფილების გადატანა განხორციელდა. იმ დროს, როცა სამეგრელოში სამინისტრო სკოლებიდან იანოვსკის ძალადობით ქართული ენა გამოიღვენა და მეგრულად სწავლება შემოიღეს, როცა საეკლესიო წიგნებიც მეგრულ ენაზე ითარგმნებოდა და ეკლესიიდანაც ქართული ენა იღვენებოდა, ეს იყო დიდი მნიშვნელობის საზოგადოებრივი ღონისძიება. 1885 წელს ოქტომბერში სენაკის სკოლის ახალ შენობაში გადატანამ მასობრივი ზეიმისა და ცარიზმის რეაქციის საწინააღმდეგო მანიფესტაციის ხასიათი მიიღო.

წერა-კითხვის გამავრცელებელი საზოგადოების განსაკუთრებული ზრუნვის საგნად იქცა თურქეთის მონობიდან ახლად გამოხსნილი აჭარლებისათვის სკოლის გახსნა, რასაც იმ დროს მრავალი დაბრკოლება ეღობებოდა. ამ საქმეს პირადად ილია ჭავჭავაძე ჩაუდგა სათავეში. გამგეობის დავალებით დიმიტრი ბაქრაძემ 1880 წლის ნოემბერში ბათუმში სახლი დაიქირავა და სკოლა გახსნა, რომლის მასწავლებლად მოწვეულ იქნა ალ. ნანეიშვილი. 1881 წლის მარტში სკოლა საზეიმოდ გაიხსნა.

1882—1884 წლებში საზოგადოება სკოლებს აარსებს წინარეხში, ხელთუბანში, თიანეთში. 1888 წელს — გომარეთში. საზოგადოება ცდილობდა სკოლები გაეხსნა აგრეთვე მცხეთაში, დილომში და სხვ., მაგრამ ცარიზმის ადგილობრივი მოხელეები წინააღმდეგობას უწევდნენ საზოგადოებას სკოლების ქსელის გაფართოების საქმეში. მხოლოდ 1888 წლის 10 ოქტომბერს მოხერხდა ჩრდილო კავკასიაში მცხოვრები ქართველების და საზოგადოების მზრუნველობით კავკავის ქართული სკოლის

დაარსება, რომელმაც პედაგოგ მიხეილ ყიფიანისა და იოსებ ბოცვაძის ხელმძღვანელობით დიდ წარმატებას მიაღწია.

წერა-კითხვის გამავრცელებელი საზოგადოების მიერ გახსნილ სკოლებში ქართულთან ერთად დიდი ადგილი ეჭირა რუსული ენის სწავლებას. ყურადღება ექცეოდა რუსული ენის სახელმძღვანელოების შედგენის საქმესაც. იაკობ გოგებაშვილის მიერ შედგენილი რუსული ენის სახელმძღვანელო „რუსსკოე სლოვომ“ საყოველთაო აღიარება მოიპოვა. იგი მოწონებულ იქნა რუსეთის განათლების სამინისტროს. მიერ, როგორც სანიმუშო სახელმძღვანელო არარუს ბავშვთათვის. რუსიფიკატორებს თითქოს აღარაფერი ჩჩებოდათ იმის საბაზად, რომ ქართველთა შორის წერა-კითხვის გამავრცელებელი საზოგადოების მოღვაწეობა შოვინისტურ და ნაციონალისტურ საქმედ გამოეცხადებინათ, მაგრამ ისინი საზოგადოების თავკაცთა დევნას კვლავაც განაგრძობდნენ.

საზოგადოება განსაკუთრებულ ყურადღებას აქცევდა სახელმძღვანელოების გამოცემას. ი. გოგებაშვილის „დედა ენაში“, „ბუნების კარში“, „რუსსკოე სლოვომი“ დიდი ადგილი ეჭირა საქართველოს ისტორიის, ეთნოგრაფიისა და მხარეთმცოდნეობითი გეოგრაფიის უმნიშვნელოვანეს საკითხებს. ამ სახელმძღვანელოებით სწავლობდა ქართველი ახალგაზრდობის მრავალი თაობა სიყვარულს მშობლიური ქვეყნისადმი.

საზოგადოებამ დიდი როლი შეასრულა ოჯახებში ეკლესია-მონასტრებსა და სხვა ადგილებში გაბნეულ ქართულ ხელნაწერთა და ბეჭდური უნიკუმების შეკრების, დაცვისა და შთამომავლობისათვის გადაცემის საქმეში. ამ ხელნაწერი და ნაბეჭდი წიგნების დასაცავად საზოგადოებასთან ჩამოყალიბდა ბიბლიოთეკა. გამოჩნდნენ კერძო პირები, რომელთაც გააჩნდათ ხელნაწერთა და ბეჭდურ წიგნთა მდიდარი კოლექციები და სურვილს გამოთქვამდნენ საზოგადოებისათვის უფასოდ გადაეცათ ისინი. საზოგადოებამ ნიკო დადიანისაგან მიიღო 169 ხელნაწერი და 10 დაბეჭდილი წიგნი. ივანე მესხისაგან — 55 ხელნაწერი წიგნი და სხვ. მარტო 1883 წელს ოთხასამდე ხელნაწერი დაუგროვებია. 1885 წელს შეიძინა ზ. ჭიჭინაძის ბევრი ძველი და ახალი ხელნაწერი წიგნები. საზოგადოებას მნიშვნელოვანი რაოდენობით შესწირეს ხელნაწერი წიგნები მიხეილ სარაჯიშვილმა, ლუკა ისარლიშვილმა, კ. ბაგრატიონმა, ასლან წულუკიძემ, კ. ლორთქიფანიძემ და სხვ., რის შედეგადაც წერა-კითხვის საზოგადოების წიგნთსაცავი იქცა უძვირფასეს საგანძურად ქართული კულტურისა. ხელნაწერ და ძველი წიგნების აღწერის, შესწავლისა და მათი კატალოგთა შედგენის საქმეს დიდი ამაგი დასდეს თედო ჟორდანიამ, ექვთ. თაყაიშვილმა, დავით კარიჭაშვილმა, ნ. მთვარელიშვილმა. საზოგადოება ქართულ ხელნაწერ ძეგლებთან ერთად აგროვებდა სამუზეუმო ხასიათის

ეროვნულ ნივთებს და განძებს. დ. ბაქრაძემ, რ. ერისთავმა და პოლ. კარბელაშვილმა ამ მხრივაც დიდი ამაგი დასდეს საზოგადოებას. ი. გოგებაშვილისა და პ. უმიკაშვილის მიერ შედგენილი პროგრამის საფუძველზე საზოგადოებამ დიდი მუშაობა გასწია ფოლკლორული მასალის, „ერის გონების ნაწარმოების“ შესაგროვებლად. ფოლკლორული მასალის შეგროვების დიდი ენთუზიასტი იყო აკაკი წერეთელი. მან 1884 წლის 27 მაისს საზოგადოების საანგარიშო წლიურ კრებაზე დააყენა საკითხი, რომ „საზოგადოებას დაენიშნა მცირე გასამრჯელო იმათთვის, ვინც იკისრებდა ამ საქმეს სოფელ-სოფელ სიარულით“.

საზოგადოება და მისი წევრები თავგამოდებით იცავდნენ ეროვნული კულტურის ძეგლებს და განძს. ცნობილა, რომ ქართველ მოღვაწეთა გაბედული გამოსვლით დატაცებას გადაურჩა საუკუნეების მანძილზე ჩვენს ეკლესია-მონასტრებში შემონახული ქართული ეროვნული კულტურის განძეულობანი. ს. მესხი, ნ. ნიკოლაძე, ა. წერეთელი გაბედულად შეებრძოლნენ ქუთაისის სამხედრო გუბერნატორს ლევაშოვს, ამხილეს იგი ეკლესია-მონასტრების ძარცვაში¹ და მთავრობა აიძულეს ლევაშოვი კავკასიიდან გაეძევებინა.

ქართული დრამატული საზოგადოება. 1880 წელს ჩამოყალიბდა კიდევ ერთი ახალი ეროვნული დაწესებულება — ქართული დრამატული საზოგადოება, რომელიც ქართული ხალხური თვითმოქმედების, თეატრალური ხელოვნების, დრამატული მწერლობის აღორძინებისა და ეროვნული თვითშეგნების გაღვივების მნიშვნელოვან საშუალებად იქცა.

დრამატული საზოგადოების წესდების პირველი მონახაზი ნიკო ნიკოლაძემ შეადგინა. საზოგადოება სათავეში ჩაუდგა 1879 წელს ქართველ სცენისმოყვარულთა მიერ დაარსებულ „მუდმივ დასს“, რომელშიც შედიოდნენ ქართული სცენის გამოჩენილი ოსტატები მ. საფაროვა, ვ. აბაშიძე, ლ. მესხიშვილი, ნ. გაბუნია, კ. ყიფიანი, კ. მესხი და სხვ. საზოგადოებამ შეძლო ქართული თეატრალური კულტურის სამსახურში ჩაეყენებინა მწერლობისა და ხელოვნების მოყვარულნი, მათი საუკეთესო წარმომადგენლები, თეატრის ირგვლივ შემოეკრიბა ნიჭიერი ახალგაზრდები, გამემღიდრებინა ქართული დრამატული მწერლობა ახალი ორიგინალური პიესებით, თეატრის რეპერტუარში დაემკვიდრებინა ევროპული და რუსული დრამატურგიის შედეგები მათი ქართულ ენაზე გადმოთარგმნადმოკეთების გზით.

ივ. მაჩაბელმა, დ. ყიფიანმა, პ. მირიანაშვილმა და სხვებმა, რომლებიც საუკეთესო მოქართულენი იყვნენ და ამასთანავე შესანიშნავად ფლობ-

¹ იხ. ლ. ჩიქოვანის წერილი, «Литературная Грузия», 1966, № 6.

დნენ რუსულთან ერთად ინგლისურ, ფრანგულ, გერმანულ და კლასიკურ ენებსაც, ქართულ ენაზე თარგმნეს შექსპირის, მოლიერის, ჰიუგოს, ვალდეს, გოეთეს, ესქილეს, ევრიპიდეს ნაწარმოებები, აგრეთვე რუსული დრამატურგიის საუკეთესო ნიმუშები.

გიორგი ერისთავის მიერ აღდგენილი ქართული თეატრის დახურვიდან ოციოდე წლის გასვლის შემდეგ ეროვნულ-განმათავისუფლებელი მოძრაობის გამოჩენილმა ხელმძღვანელებმა ხელახლა შექმნეს პროგრესულ-დემოკრატიული ახალი ქართული თეატრი, რომელსაც ისინი თვლიდნენ ქართველი ხალხის სასიცოცხლო ინტერესების დამცველად რუსიფიკატორთა წინააღმდეგ ბრძოლაში. დრამატული საზოგადოების ერთ-ერთი დამფუძნებელთაგანი, მისი გამგეობის წევრი და თავმჯდომარე ილია ჭავჭავაძე შაიჩნევდა, რომ „სცენა იგივე სკოლაა, რომელიც ცხოველი სურათებით ელაპარაკება კაცის გულსა და ჭკუასა, იგი კაცის გუნებაზე უფრო მეტად მოქმედებს, ვიდრე სხვა რაიმე; ამ მხრივ არის სანატრელი, ამ მხრივ არის იგი კაცის გრძნობისა და ჭკუის გამფაქიზებელი, გამწმენდი, სცენა ხალხის მწვრთნელი, ხალხის აღმზრდელი უნდა იყოს... „მგ ადგილია, სადაც ჩვენი ენა საჯაროდ ისმის და საჯაროდ მოქმედებს. ესეც საკმაოა, რომ კაცმა თავი გამოიღოს, თორემ თეატრს ხომ სხვა ბევრი სიკეთე მოსდევს“.

რეაქციის მიერ დევნილი ქართული ენა ამ დროს გლეხის ქოხში, თითო-ოროლა ქართულ სკოლასა და ქართულ თეატრში აფარებდა თავს. რუსიფიკატორები ცდილობდნენ მის ერთიანად აღმოფხვრას და გამოდევნას ამ დევნილ და შევიწროებულ კერებიდანაც.

დრამატული საზოგადოების ხელშეწყობით ფეხადგმული ქართული თეატრი თანდათან განმტკიცდა, ჭეშმარიტად მნიშვნელოვანი ფაქტორი გახდა ქართველი ხალხის ცხოვრებაში. მის აღმავლობაში დიდი დამსახურება მიუძღვის გიორგი ერისთავის ვაჟს, დავითს, რომელიც იყო მსახიობი, რეჟისორი და უბაღლო დეკლამატორი. თუ გიორგი ერისთავმა ქართული თეატრი აღადგინა, დავითი განმაახლებელი და სულისჩამდგმელი იყო ახალი თეატრისა. დავით ერისთავმა ფრანგი დრამატურგის სარლუს „სამშობლო“ გადმოთარგმნა. პიესის შინაარსი ქართულ ისტორიულ სინამდვილეს ისე შეუხამა, რომ ქართველმა მაყურებელმა მიიღო როგორც ორიგინალური და მის შინაარსში საკუთარი სამშობლოს წარსული ტრაგედია დაინახა. აი როგორ გადმოგვცემს ეკ. გაბაშვილი შთაბეჭდილებას, რომელიც მას მიუღია „სამშობლოს“ ქართულ სცენაზე წარმოდგენისას: „დღესაც თვალწინ მიდგას ის სცენა, როდესაც ხიმშიაშვილი ზეციური ხმით, რაინდული გრაციათ და შეუღარებელის გმირობით ეუბნება შაჰს სამსახურზე უარს, როდესაც ის თავისი ქალის თხოვნით უბრუნებს წართმეულ ხმალს: „არა, ვერ მივიღებ... მე კარგად ვიცნობ ჩემს ხმალს,

ის ამკობინებს ჩემს გულში გადატრიალდეს, ვიდრე თავის მტერს ემსახუროს... მე და ჩემი ხმალი ქართველები გახლავართ, დიდებულ შაჰო..“ რა გამბედაობა იყო ამ საქციელში. რა გვარად იმოქმედა დროთა ბრუნვით დამუწვებულ და ყოველგვარი საკუთარი აზრის უქონელ მაშინდელ ქართველობაზე... როდესაც მესამე მოქმედებაში მეტეხის დარბაზში საბრძოლველად გამზადებული გმირები დროშაზე სამშობლოსათვის თავის განწირვის ფიცს სდებენ. საკვირველი იყო ეს წამი და სწორედ სასწაულმოქმედებად აღიბეჭდა მსმენელებზე. მთელი საზოგადოება... ფეხზე ადგა და სასოებით გამსჭვალული მზად იყო მუხლი მოედრიკა ეროვნული დროშის წინ“¹.

„სამშობლოს“ ასეთი ძალა და გავლენა ხალხზე გახდა საბაზი რეაქციული წრეების და მათი პრესის გამოლაშქრებისა, რომლებმაც უხეშად დაგმეს ქართული თეატრი და შეადგინეს ქართული დროშა. „ეგ დროშა გირჩევთ აღარ გამოაჩინოთ, გირჩევთ გოდფრუას ცირკს მიყიდოთ თეატრის მიერ გაწეული ხარჯების დასაფარავად“, — წერდა შავრაზმელ კატკოვის „მოსკოვსკოე ვედომოსტი“. ქართულ თეატრში დადგმულ „სამშობლოს“ მნიშვნელობას გაზ. „დროება“ კი ასეთ შეფასებას აძლევდა: „ითქვა სიტყვა, რომელიც მოხვდა ყველა ქართველის გულს. ეხლა მოგვეცა შემთხვევა, რომ რამოდენიმე ხანი ერთად ვყოფილიყავით, ერთად გვეფიქრა. ჩვენ გვტანჯავდა და გვაფიქრებდა არა რომელიმე კერძო საკითხები, არამედ საზოგადო, საყოველთაო საგანი. მოგვეცა შემთხვევა, რომ განცალკევებული ხალხი... მივენდეთ ერთმანეთს და გული გავიმაგრეთ იმ იმედით, რომ ერთსა და ორს კი არ შეგვტკივებია სამშობლოსათვის გული, არამედ მთელს ხალხს“².

არსებითად ეს იყო პასუხი რეაქციონერებისადმი. იგი საზოგადოებრივ აზრსაც გამოხატავდა, მაგრამ, ჩანს, საკმარისად მაინც არ მიიჩნიეს და კატკოვის საპასუხოდ ილია ჭავჭავაძემ აიმაღლა ხმა. „ქართული დროშა. ორი ათასი წლის განმავლობაში ქართველებს სახელით და დიდებით ხელში სჭერია, — წერდა ილია, — თავის სისხლში ამოუვლია, და რუსეთისათვის შეუღმწიკვლელად, უჩირქოდ გადაუცია... დღეს ეს დროშა საციროდ გაგვიხანდა ერთმა ვილაცა კორესპონდენტმა და კატკოვმა ბანი მისცა... თვით ბარბაროსიც კი არ იკადრებდა გაუპატიურებას მთელი ერისას. მაშ ბარაქალა კატკოვს და მის მომხრეებსა, რომ იკადრეს ის, რასაც თვით ბარბაროსიც კი ითაკილებდა“³.

კატკოვისა და ცარიზმის რეაქციული პრესის წინააღმდეგ და ქართული დროშის დასაცავად გამოდის ა. წერეთელიც. „არა გვგონია, — წერდა

¹ ეკ. გაბაშვილი, „კლდე“, 1913, № 7.

² „დროება“, 1882, № 20.

³ „დროება“, 1882, № 40.

იგი — რომ პატიოსან და რიგიან რუსს მოეწონოს ის კორესპონდენცია, სადაც ყოვლის უმიზეზოდ ლანძღავენ ქართველებს და აწმყოს გაიციხვას რომ აღარ აკმარებენ, მამა-პაპის საფლავსაც კი უბრუნებენ“¹. აკაკი განმარტავდა ქართული ღრმის ისტორიულ როლს და მისიას, ქართველო ხალხის გმირულ ბრძოლას არა მარტო ქართული, არამედ რუსული სახელმწიფოებრიობის დასაცავადაც და დაასკვნოდა: „ეჰ, ასე თამამად მისთვის გვწამებენ ცილს, რომ იციან როგორც უნდა და როგორც ვე-მართლებით, მისთანა პასუხს არავინ გვათქმევინებს, თორემ მაშინ დაუმტკიცებლით, რა შვილებიცა ბრძანდებიან და რადგანაც აქაურობა არ მოსწონთ, უჩვენებლით სად შეპფერისთ ბინა“..

1890 წლის 21 ნოემბერს ქართულმა თეატრმა პირველად განახორციელა აკაკი წერეთლის დრამატული პოემის „პატარა კახის“ დადგმა. რომლის პრემიერასაც დიდძალი საზოგადოება დაესწრო. ხალხი აღფრთოვანებული შეხვდა „პატარა კახის“ პატრიოტულ სულისკვეთებას, მისი გმირების ვაჟკაცობას, რაინდულ შემართებას და თავდადებას. აკაკი პატარა კახის სიტყვებით მგზნებარე მოწოდებით მიმართავდა ხალხს: „კმარა მონება! კმარა მოთმენა! დრო არის ადგეს ერთბირად ერი, ან ბრძოლის ველზე სული დალიოს, ან მოიგერიოს მოსული მტერი!.. მონას რად უნდა კრული სიცოცხლე? ვისთვის აანთოს წმინდა ლამპარი? სჯობს მონობაში გადიდკაცებულს თავისუფლების ძებნაში მკვდარი“.

თეატრალურ საზოგადოებასა და ქართულ თეატრს მალე მხარი დაუმშვენა პერიოდულმა ორგანომ გაზ. „თეატრმა“ (1885 — 1890 წწ.), რომელიც ქართული ხელოვნების და პირველ ყოვლისა თეატრალური ხელოვნების ორგანოდ და მისი განვითარების საშუალებად იქცა.

1880 წელს დაიწყო და 1896 წელს დამთავრდა აშენება დიდი ქართული თეატრალური ნაგებობისა, ე. წ. სახაზინო, ეხლანდელი ოპერის თეატრისა. ქართული თეატრი დღითი დღე აძლიერებდა თავის გავლენას ხალხზე, მასიური და პოპულარული ხდებოდა არა მარტო საქართველოს დიდ ქალაქებში, არამედ დაბა-სოფლებშიც კი, სადაც ხშირად მართავდა წარმოდგენებს.

სათავადაზნაურო ბანკები და ეროვნული კულტურის დაცვა. 1875 — 1876 წლებში დაარსებულ თბილისისა და ქუთაისის სათავადაზნაურო-საადგილმამულო ბანკებს ეროვნულ-განმათავისუფლებელი მოძრაობის მესვეურნი ხალხის თვითმოქმედების ორგანოდ, ეროვნული კულტურის აღორძინების საშუალებად მიიჩნევდნენ. ბანკების მიერ მიღებული მოგების ნაწილი სკოლისა და სხვა კულტურულ-საგანმანათლებლო დაწესებულებათა განვითარებას ხმარდებოდა. თბილისის საადგილმამულო ბანკმა

¹ აკაკი წერეთელი, თხზ., ტ. XV, გვ. 446—447.

იმგვარ საზოგადოებრივ-საქველმოქმედო დაწესებულებათა გაძლიერებისათვის, როგორც იყო ქართული დრამატული საზოგადოება, 206 000 მანეთი გაიღო, წერა-კითხვის გამავრცელებელი საზოგადოებისათვის — 11 000 მან., უმაღლეს სასწავლებელთა ღარიბი სტუდენტების დასახმარებლად — 77 225 მანეთი. ამავე მიზნით მნიშვნელოვან თანხას ხარჯავდა ქუთაისის ბანკიც. თბილისის სათავადაზნაურო გიმნაზიისათვის თბილისის ბანკმა გაიღო 1 304 883 მან., ხოლო გიმნაზიის შენობის ასაგებად დამატებით 100 980 მან. თბილისის ბანკმა ასევე დიდძალი თანხები გაიღო თბილისის და თელავის წმინდა ნინოს სახელობის ქალთა სასწავლებლის და ამიერკავკასიის ქალთა გიმნაზიის, სოფლის მეურნეობის საზოგადოების. ყურნალ „მეურნის“, ფილოქსერასთან ბრძოლის, წინამძღვრიანთკარის სამეურნეო სკოლის, სტიქიური უბედურებით და შიმშილობისაგან დაზარალებულთა დასახმარებლად ისტორიული ძეგლების სარესტავრაციო ხარჯების დასაფარავად და სხვ. თბილისის ბანკმა აქ დასახელებულ და სხვა ანალოგიურ საქველმოქმედო საქმეებზე 30 წლის მანძილზე სულ 1 944 136 მან. დახარჯა, ქუთაისის საადგილმამულო ბანკმა კი — 1 058 000 მანეთი¹.

§ 6. 80-იანი წლების ქართული პრესა ცენზურის ბრძალაში

ქართველი ხალხის ეროვნული თვითშეგნებისა და თვითმოქმედების გამაძლიერებელ, გარკვეული აზრით მის მაორგანიზებელ საზოგადოებრივ ძალად და ყველაზე უფრო მახვილ იარაღად რეფორმის შემდგომ პერიოდში გვევლინება ქართული პროგრესულ-დემოკრატიული პრესა.

80-იან წლებშიც დემოკრატიული ქართული პრესა განაგრძობდა მძაფრ ბრძოლას რეაქციის წინააღმდეგ, კვლავინდებურად მტკიცედ იღვა ეროვნულ-განმათავისუფლებელი დროშის სადარაჯოზე და რევოლუციურ-დემოკრატიული პოზიციებიდან ამხელდა ცარიზმის რეაქციულ პოლიტიკას. თავის მხრივ, ცარიზმის დამსჯელ ორგანოებს, პოლიციას და ჟანდარმერიას გვერდში ედგა ცენზურაც. საცენზურო დაწესებულებანი სდევნიდნენ ცოცხალ სიტყვას, პროგრესულ აზრს. მეფის ცენზურის განუწყვეტელი დევნა ქართველ მოღვაწეებს სიცოცხლეს უმწარებდა, საშუალებას ართმევდა ეთქვათ სრული სიმართლე ხალხის მჩაგვრელთა შესახებ. „ჩემს სიცოცხლეში ცხადად თუ სიზმრად, — წერდა აკაკი წერეთელი, — ერთი რამ უფრო მაფრთხობდა ყველაზე და საფლავშიაც ქარცეცხლად მიმყვება. მე ვამბობ ცენზურაზე“.

¹ იხ. გაზ. «Закавказье», 1910, 15 ოქტომბერი.

გაზ. „ივერია“ იმდროინდელ საცენზურო პირობებს ასე ახასიათებს: „გულში რომ ჩაიხედო, თითქოს ზღვააო, ისე დულს და გადმოღის ბალღამი ყოველდღიური ბოროტებისა, მაგრამ რას იზამ? ამისთანა პაპანაქებაში, როცა მზე უწყალოთა გვწავს, ჰსდაგავს ქვეყნიერებასა, რა საკვირველია, რომ გამხმარი ენა მშრალ სასას მიეკრას, სიტყვას ფრთა მოეკვეთოს, ძალღონე წაერთვას, კბილი მოეჭრას. ჩვენი ლიტერატურის სარბიელი ლამის გადახმეს, ამ ახირებულის გოღვისაგან“¹. ამგვარი სულისშემუსუთავი ვითარების მიუხედავად, ქართული პრესა და მწერლობა რეაქციის წინააღმდეგ გასაოცარი მოქნილობით და პრინციპული თანმიმდევრობით მოქმედებდა, ეზოპეს ენით, მაგრამ საკმაოდ გაბედულად აკრიტიკებდა ცარიზმის კოლონიურ პოლიტიკას.

80-იან წლებში აიკრძალა სიტყვა „საქართველოს“ ხმარება. 1885 წელს 5 ივნისს კავკასიის საცენზურო კომიტეტს ი. გოგებაშვილის „ბუნების კარში“ შეტანილი „საქართველოს მოკლე გეოგრაფიული და ეთნოგრაფიული აღწერა“ ცენზორს შეუსწორებია და სიტყვა საქართველო ყველგან ამოუშლია, მის ნაცვლად „ტფილისის და ქუთაისის გუბერნია“ ან „იმერეთი და ქართლ-კახეთი“ ჩაუწერია. ი. გოგებაშვილს ამის შესახებ იმავე წლის 29 მაისს და 5 ივნისს ორგზის შეუტანია საპროტესტო განცხადება საცენზურო კომიტეტში².

ცენზურის მიერ დევნილი ქართული პრესა და მწერლობა ალევგორიებითა და გადაკრული სიტყვებით მაინც ახერხებდა სიმართლის თქმას. ატყუებდა, გზა-კვალს უბნევდა ცენზორებს და სიმართლეს ეუბნებოდა ხალხს. ამის საუკეთესო ნიმუშს წარმოადგენს აკაკის „გაზაფხულის“ დაბეჭდვა. 1881 წლის 6 მარტს ქუთაისის გუბერნიის უანდარძთა სამმართველოს უფროსი მოხსენებას ურდგენს პოლიციის სახელმწიფო დეპარტამენტს გაზ. „დროების“ 45-ე ნომერში აკაკის ლექსის „გაზაფხულის“ დაბეჭდვის გამო. „ამ ლექსს, — ნათქვამია მიმართვაში, — დიდი გატაცებით კითხულობს ადგილობრივი მოსახლეობის ყველა წოდება, ისინი ბაღში სეირნობის მაგიერ ჭგუფ-ჭგუფად იკრიბებიან და მსჯელობენ ამ ლექსის შესახებ, რომელიც არ აგრძნობინებს გაზაფხულს არც იმ ცივი და თოვლიანი ამინდის გამო, რაც ეხლაა, და არც იმ სამწუხარო მოვლენის გამო, რაც მოხდა“³ (იგულისხმება იმპერატორ ალექსანდრე მეორის მკვლელობა — ავტ.).

ცხადია, აკაკიმ მოატყუა ცენზურა და ხალხს მიულოცა იმპერატორის მკვლელობა. ასეთი მაგალითები, რომლებიც შემდეგში სანანებლად გახდომია ცენზურას, სხვაც ბევრი იყო.

¹ „ივერია“, 1885, № 1, „შინაური მიმოხილვა“.

² სმ, V, 1950, გვ. 69—71.

³ ЦГИАМ, ф. III, д. 164, л. 9.

მეფის ცენზურა დაუნდობლად სდევნიდა პროგრესულ-დემოკრატიულ ქართულ და რუსულ პრესას. რეაქციის წლებში დაიხურა გაზ. „დროება“ და „შრომა“. გაუქმდა ჟურნალი „იმედი“. ასეთივე ბედი ეწია ნ. ნიკოლაძის „ობზორს“, როგორც მთავრობის საწინააღმდეგო ორგანოს. თვითონ ნიკოლაძე საქართველოდან გადასახლეს.

1885 წელს სამოსწავლო უწყება მთავარმმართველს აძლევს წინადადებას ივ. მაჩაბლის „დროების“ რედაქტორობიდან გადაყენების შესახებ.

იმავე წელს გაზ. „დროება“ დახურეს „მთავრობის საწინააღმდეგო მიმართულების გამო“ შინაგან საქმეთა სამინისტროს დეპარტამენტის განკარგულებით. რამდენიმე თვის განმავლობაში, ვიდრე გაზეთი „ივერია“ დაიწყებდა გამოსვლას, საქართველო უგაზეთოდ დარჩა, რადგან „დროებაზე“ აღრე, 1883 წელს გაზ. „შრომა“ და ჟურნ. „იმედი“ დაიხურა. გაუქმებული ჟურნალ-გაზეთების მაგიერ ახალთა დაარსებისათვის ქართველ მოღვაწეთა ყოველგვარ ცდებს მთავრობა უარით პასუხობდა. მაგალითად, 1882 წელს აკაკი წერეთელი ბევრს ეცადა ყოველკვირეული გაზეთი „გზა“ დაეარსებინა, მაგრამ უშედეგოდ. მთავრობამ გაზეთის გამოცემის ნებართვა არ მისცა, იმ მოტივით, რომ ა. წერეთელმა გაზ. „შრომაში“ თანამშრომლობის პერიოდში თავისი ლიტერატურული ნაწარმოებებით ხელისუფლების საწინააღმდეგო მიმართულება გამოამჟღავნა¹.

უფრო აღრე, გაზ. „ობზორის“ გაუქმების შემდეგ, 1880 წელს, ნ. ნიკოლაძემ საცენზურო კომიტეტს კვირეული ჟურნალის „კანდელის“ ქართულ ენაზე გამოცემის ნებართვა სთხოვა, მაგრამ მისი თხოვნაც არ დააკმაყოფილეს: ნიკოლაძე „ობზორის“ რედაქტორობის დროს არ ემორჩილებოდა ცენზურას, იგი ხშირად ბეჭდავდა წერილებს არა მხოლოდ ცენზურის ნებართვის გარეშე, არამედ ისეთებსაც, რომელთა დაბეჭდვა ცენზურის მიერ აკრძალული იყო. ასე უბოჰავდა ხელ-ფეხს მეფის ცენზურა ქართველ მოღვაწეებს და სდევნიდა პროგრესულ პრესას. უთანასწორო ბრძოლაში ბურთი და მოედანი რჩებოდა მთავრობის შავრანულ სატახტო პრესას, რომლის ყურმოჭრილი ყმა იყო ადგილობრივი მთავრობის ოფიციალური ორგანო „კავკაზიცი“. ისინი ერთხმად „ასაბუთებდნენ“, რომ „ყჩაღი“ და „ველური“ ქართველები არ არიან რეფორმების ღირსნიო. ამგვარი შინაარსის იყო 1888 წ. ჟურნ. „ვესტნიკ ევროპიში“ გამოქვეყნებული სტატია.

1889 წელს ქართველი ზალხის წინააღმდეგ ცილისმწამებლურ წერილებს ბეჭდავდა „სოვრემენნი ვესტნიკი“, რომელიც „ასაბუთებდა“, რომ ქართველმა ერმა ყოველგვარი კავშირი გაწყვიტა საკაცობრიო მოწინავე აზროვნებასთან, ერი დაკნინდა, გადაგვარდა, ზნეობრივად გაირყვნა, გა-

¹ სსცია, ფ. 480, საქ. 71, ფურც. 4.

მოიფიტა და თანამედროვე ცივილიზაციის დიდ შარავზას საცხებით მოწყდა, XII საუკუნეც საქართველოს სახელმწიფოს დაცემის და მორალური გახრწნის ეპოქა იყო.

საქართველოს ისტორიის ფალსიფიკატორებს, ქართველი ხალხის გარეშე და შინაურ ცილისმწამებლებს „ივერიის“ ფურცლებიდან საკადრის პასუხს აძლევდნენ ეროვნულ-განმათავისუფლებელი მოძრაობის მოღვაწენი ილია ჭავჭავაძის მეთაურობით. რეაქციონერთა შემოტყვისაგან ქართველობის დაცვას ემსახურებოდა „ქვათა ლაღადი“ და „აი ისტორია“, „სანდალას წერილების გამო“ და სხვა მრავალი ისტორიულ-პოლემიკური ნაშრომი ილია ჭავჭავაძისა, რომელიც ერთი შავრაზმული გაზეთის მორიგი გამონდომის გამო გაბედულად შენიშნავდა: „სხვა ქვეყანაში ასეთი რამ რომ გაბედოს გაზეთმა, მკითხველი შეუთვლის — შენმა სუნმა ამაყყარა და აწი ჩემსას არ გაიქაჟანო“.

§ 7. რეაქციის ძალების ახალი შემოტევა. დიმიტრი ყიფიანის მკვლელობა. ეროვნულ-განმათავისუფლებელი მოძრაობის ისტორიული მნიშვნელობა

ლიბერალური თავადაზნაურობის წარმომადგენლები 80-იან წლებში ოპოზიციაში ჩაუდგნენ რეაქციის ძალებს და ეროვნულ-განმათავისუფლებელი მოძრაობის მესვეურთა დროშის ქვეშ დადგნენ. დემოკრატიზმის და თავადაზნაურული ლიბერალიზმის ასეთ კოალიციას 80-იან წლებში თავისი ღრმა სოციალ-ეკონომიური და პოლიტიკური მიზეზები ჰქონდა. იგი, კერძოდ, გამოწვეული იყო კაპიტალიზმის განვითარების საფუძველზე მემამულური მეურნეობის კრიზისის შემდგომი გაღრმავებით და მეფის რუსეთის მიერ კავკასიის საბოლოო დაპყრობით. ქართველ თავადაზნაურთა როლი მივიწყებულ იქნა. მათ მთავრობა არ აძლევდა უბრალო ერობასაც კი, რომლითაც რუსეთის თავადაზნაურობა სარგებლობდა. ეს ქართველმა პრივილეგიურმა წოდებამ ეროვნული გრძნობების შელახვად მიიჩნია და მისი ერთი ნაწილი ეროვნულ-განმათავისუფლებელი მოძრაობის მხარეზე გადავიდა. დიმიტრი ყიფიანის მოღვაწეობა, მისი გაბედული ბრძოლა 80-იანი წლების რეაქციის წინააღმდეგ არსებითად ქართული ლიბერალური თავადაზნაურობის პოზიციის გამომხატველი იყო. თავადაზნაურული ლიბერალიზმის ამ სახელოვანმა წარმომადგენელმა, სახელმწიფო და საზოგადო მოღვაწემ შეგნებული ცხოვრება 1832 წლის შეთქმულებაში მონაწილეობით დაიწყო და ცარიზმის კოლონიური პოლიტიკის წინააღმდეგ გაბედული გალაშქრებისათვის გადასახლებით და ტრაგიკული დაღუპვით დაამთავრა. შეუძლებელი აღმოჩნდა ერთსა და იმავე დროს რუსეთის სამეფო ტახტისა და ქართული ეროვნული კულტურის დაცვა, რადგან, ილია ჭავჭავაძის დახასიათებით, დიმიტრი ყიფიანი იყო ღიდაღ

პრინციპული პიროვნება, რომელიც არასოდეს „პოს“ არ იტყოდა, როდესაც „არას“ ფიქრობდა და არც „არას“ იტყოდა, როდესაც „პოს“ ფიქრობდა.

80-იანი წლების რეაქციის დროს დ. ყიფიანი მტკიცედ ამოუდგა გვერდში თერგდალეულებს და გაბედულად გაილაშქრა რეაქციონერთა წინააღმდეგ. იგი მგზნებარე პროპაგანდას ეწეოდა ქართული ენის დასაცავად, მკაცრად აკრიტიკებდა რუსიფიკატორთა სასწავლო პროექტებს, კატეგორიულად მოითხოვდა იანოვსკის 1881 წლის ცირკულარის გაუქმებას, ყოვლად დაუშვებლად მიაჩნდა მეგრული და სვანური ანბანისა და სახელმძღვანელოების შეთხზვა, სამეგრელოსა და სვანეთის სკოლებში ქართული ენის აღმოფხვრა¹.

კავკასიის სასწავლო ოლქის მზრუნველი იანოვსკი და მთლიანად დონდუკოვ-კორსაკოვის რეაქციული ადმინისტრაცია თავისას მაინც არ იშლიდა. ქართული ენისა და ერის დევნა გრძელდებოდა.

ქართველი მოღვაწენი და პირველ რიგში დ. ყიფიანი რეაქციის ძალების ამ თარეშს ხელისუფლების ადგილობრივ წარმომადგენელთა თვითნებობად, მათ დანაშაულებრივ კანონსაწინააღმდეგო მოქმედებად მიიჩნევდა და „მეფის კანონის დამრღვევ“ კავკასიელ რუსიფიკატორებს სამკვდრო-სასიცოცხლო ბრძოლას უცხადებდა.

1885 წელს დასავლეთ საქართველოს (ჯერ ბათუმს, ხოლო შემდეგ ქუთაისს) ესტუმრა კავკასიის ყოფილი მეფისნაცვალი, დიდი მთავარი მიხეილ ნიკოლოზის ძე, რომელიც 18 წლის განმავლობაში მართავდა ქვეყანას და ქართველი თავადაზნაურული წრეების დიდი პატივისცემით სარგებლობდა. დიდ მთავარს ზემოთ შეხვდა თავადაზნაურობა, რომელსაც სანატრელად გადაქცეოდა მისი მეფისნაცვლობის ასე თუ ისე ასატანი ხანა. 5 ოქტომბერს ქუთაისში დიდ მთავარს გაუმართეს ბანკეტი, რომელსაც თავადაზნაურების მარშალი დ. ყიფიანიც ესწრებოდა. ქუთაისის თავკაცები შეეცადნენ ეგრძნობინებინათ მიხეილისათვის ის დევნა-შევიწროება, რომელსაც ქართველი ხალხი დონდუკოვ-კორსაკოვის მმართველობის დროს განიცდიდა. ქალაქის თავმა ასათიანმა ბანკეტზე წარმოთქმულ საზეიმო სიტყვაში ის აზრიც შეაპარა, რომ კავკასიის ეხლანდელი ადმინისტრაცია ყოვლად უმიზეზოდ იჩენს უნდობლობას ქართველობისადმი, დევნის, ყოველმხრივ ავიწროებს მასო. ამავე დროს მან ქებით მოიხსენია მიხეილის დრო. ბანკეტზე სიტყვით გამოსულმა დ. ყიფიანმა კიდევ უფრო გაბედულად და მკვეთრად განავითარა იგივე აზრი, ხოლო შემდეგ წერილობით ჩამოაყალიბა ქართული საზოგადოებ-

¹ იხ. „დროება“, 1880, № 254, 262; 1882, № 33, 50, 51, 52, 53, 54, 55, 56, 57. „კავკაზი“, 1880, № 348.

რიობის თვალსაზრისი დონდუკოვ-კორსაკოვის სულისშემხუთავი პოლიტიკის შესახებ და წერილი 1885 წლის 11 ოქტომბერს ბორჯომში გამართული აუდენციის დროს დიდ მთავარს გადასცა. დ. ყიფიანი გულუბრყვილოდ ფიქრობდა, მ. რომანოვი ქართული საზოგადოებრიობის თვალსაზრისის იმპერატორს მოახსენებს, ეს უკანასკნელი კი დონდუკოვ-კორსაკოვს აიძულებს ქართველთა დევნაზე ხელი აიღოსო.

დიდმა მთავარმა, როგორც ეს მოსალოდნელი იყო, დაარწმუნა დ. ყიფიანი, რომ ალექსანდრე III თავისი წინამორბედის მსგავსად, კვლავაც დიდი ხდობით უყურებს ქართველობას და ამის შესახებ ყველას შეგიძლიათ აცნობოთო. მიხეილის ამგვარმა განცხადებამ დ. ყიფიანს კიდევ უფრო განუმტკიცა გულუბრყვილო ვარაუდი — ქართველებისადმი უნდობლობა და დევნა დონდუკოვ-კორსაკოვის თვითნებობის შედეგია და თუ ამას უმაღლესი მთავრობა შეიტყობს კანონის დამრღვევთ კანონიერების დაცვისაკენ მოუწოდებსო. ბორჯომიდან ქუთაისში დაბრუნებული დ. ყიფიანი სარგებლობს დიდი მთავრის ნებართვით, იწვევს თავდაზნაურობას და ამხელს ადგილობრივი ხელისუფლების პოლიტიკის ვითომდა შეუსაბამობას უმაღლესი მთავრობის მითითებებთან და განქარვულებებთან.

დონდუკოვ-კორსაკოვის პოლიტიკით უკმაყოფილო ადგილობრივი ელემენტების დაკავშირებამ დიდ მთავართან და ამ უკანასკნელის თბილისში რამდენჯერმე ისე გავლამ, რომ ერთხელაც არ ინება მთავარმმართველთან შეხვედრა, იმდენად გაუტეხა სახელი ადგილობრივ ხელისუფლებას, რომ ხმებიც კი დარჩეულა დონდუკოვ-კორსაკოვის გადაყენების შესახებ. ფრიად საიღუმლო მოხსენებაში შინაგან საქმეთა მინისტრის დ. ტოლსტოისადმი მთავარმმართველი აღნიშნავდა, რომ „მისი იმპერატორობითი უმაღლესობის მობრძანებას გასულს შემოდგომაზე ადგილობრივი ხელისუფლების პრესტიჟისათვის სამწუხაროდ არასასიამოვნო შედეგი მოჰყვა. ყველა ელემენტი, რომელიც არ თანაუგრძნობდა აქ დამკვიდრებულ მმართველობის წესს, ცდილობდა მისი უდიდებულესობისადმი დაენახებია არარსებული შევიწროება, რომელსაც თითქმის განიცდის ადგილობრივი მკვიდრი მოსახლეობა. იმ უმაღლეს ყურადღებას, რომელიც დიდმა მთავარმა გამოიჩინა ამგვარი განცხადებებისადმი და აგრეთვე ვითომც წვერილმან, მაგრამ მაინც საყურადღებო გარემოებას, რომ მისმა უმაღლესობამ გაიარა რა რამდენიმეჯერ თბილისში, არ ისურვა ენახა მთავარმმართველი, რამაც დაბადა მცხოვრებლებში დიდი ჭორები, უახლოეს დროში მთავარმმართველის მოხსნის შესახებ, რასაკვირველია, არ შეიძლება გავლენა არ მოეხდინა უკანასკნელის ავტორიტეტის დაცემაზე. ამას შედეგად მოჰყვა სწორედ ისეთი გამოხდომები, როგორიცაა ქუთაისის ქალაქის თავის სიტყვა და მთავარმმართველის დაუკითხავად თბილისის

საბჭოს მიერ დიდი მთავრის მოწვევა. დასასრულ, მისი უმაღლესობისადმი უშუალო მიმართვა ქუთაისის გუბერნიის თავადაზნაურობის წინამძღოლისა, რომელიც არ დამაყოფილდა თავისი ბორჯომში გაკეთებული უადგილო განცხადებით და დიდ მთავართან წარმოებულ საუბრის ასლი გაავრცელა ქუთაისის გუბერნიაში¹.

დონდუკოვ-კორსაკოვმა ქუთაისის სამხედრო გუბერნატორის გ. სმეკალოვის მეშვეობით მოსთხოვა დ. ყიფიანს დაეწერა ახსნა-განმარტება იმის შესახებ, თუ რა საფუძველზე შეადგინა მან უკანონო საჩივარი მთავარმმართველის წინააღმდეგ, ვისი დავალებით შეხვდა და ელაპარაკა დიდ მთავარს. „გთხოვთ მაცნობოთ, — წერდა სმეკალოვი 31 ოქტომბერს დ. ყიფიანს, — გქონდათ თუ არა თქვენ ქუთაისის გუბერნიის თავადაზნაურობისაგან რწმუნება გაგეკეთებინათ მისი სახელით ასეთი განცხადება და რომელმა ფაქტებმა გაიძულათ თქვენ განგეცხადებინათ, თითქოს ქუთაისის თავადაზნაურობას ამიერიდან არ მიეცემა წინსვლის საშუალება სახელმწიფო სამსახურშიო“². დ. ყიფიანმა უპასუხა სმეკალოვს, რომ „ჩემი განცხადება, როგორც თავადაზნაურობის წინამძღოლისა, მიმართული იყო უშუალოდ საიმპერატორო სახლის უავგუსტესის წევრისადმი და ამ განცხადებას მიზნად ჰქონდა გამორკვეულიყო, მეფის ნება-სურვილია თუ არა ის, რომ ადგილობრივი თანამდებობის ზოგიერთი პირი თუ დაწესებულება გვიცქერს ჩვენ არა ისე, როგორც ამას მიჩვეული ვიყავით 80 წლის მანძილზე ჩვენდამი მონარქიის კეთილგანწყობილებით. მე ვეძებდი მხოლოდ უმაღლეს სამართალს და რაკი ვიპოვე იგი, სავსებით დავკმაყოფილდი“³.

1886 წლის 8 იანვარს დ. ყიფიანმა დონდუკოვ-კორსაკოვს წარუდგინა ვრცელი დასაბუთებული მოხსენებითი ბარათი, სადაც ნიღაბი ჰქონდა ახდილი მთელ იმ რეაქციულ ანტიქართულ პოლიტიკას, რომელსაც მთავრობა ახორციელებდა. „შემიძლია მოგახსენოთ, — სწერს დ. ყიფიანი მთავარმმართველს, — ერთი შეურყეველი და ახალი ფაქტი, რომელიც იმას გვეუბნება, რომ არსებობს მიდრეკილება ქართული ენის დევნისა. მოციქულთა დროიდან ქართული ენა იყო საეკლესიო და საკულტო ენა სამეგრელოში და იქ ეს ენა ყველას ესმის. ამჟამად კი ახალ კულტურას ნერგავენ, მეგრულ ენას ასწავლიან სხვა ენის საშუალებით. ასე რომ გავყვეთ, შეიძლება შეიქმნას ახალი კულტურები აჭარლებისა, ფშავ-ხევსურებისა, ინგილოებისა, მთიულებისა და სხვათათვის. სასარგებლო კი იქნება ყოველივე ეს იმ მთავრობისათვის, რომელმაც თავის მფარველობის

¹ სსცია, ფ. 12/001, საქ. 457, იხ. სმ, № 3, შ. ჩ ხ ე ტ ი ა ს პუბლიკაცია.

² სსცია, ფონდი ქუთაისის სამხ. გუბერნატორისა, საქ. 11, ფურც. 1—2.

³ იქვე.

ქვეშ მიიღო მრავალტანჯული საქართველო, რისთვისაც უსაზღვრო მადლობა დაიმსახურა?“¹.

არც ღონდუკოვ-კორსაკოვი, არც უმაღლესი მთავრობა არ დაელოდა დ. ყიფიანს ამ განცხადებას და კავკასიელ სატრაპთა დასმენის საფუძველზე შინაგან საქმეთა მინისტრმა დ. ტოლსტოიმ ღონდუკოვ-კორსაკოვს 1885 წლის 13 დეკემბერს აცნობა: „ხელმწიფე იმპერატორი გაეცნო რა თქვენი ბრწყინვალეების მოხსენებას... კეთილინება ეცნო, რომ მისმა უმაღლესობამ სრულიად საფუძვლიანად განუცხადა ქუთაისის გუბერნიის თავადაზნაურობის წინამძღოლს, რომ მისი უდიდებულესობა მთლიანად დარწმუნებულია ქართველების ტახტისადმი ერთგულებაში და ვინაიდან ეს საეჭვო არაა, მას; ღიჯ მთავარს, სრული უფლება ჰქონდა დაევალებინა ბატონ ყიფიანისათვის ეთქვა ამის შესახებ ყველასათვის. მაგრამ ღიჯი მთავრის ეს სიტყვები სრულიად არ აძლევს ბატონ ყიფიანს უფლებას ბორჯომში შემდგარი კერძო საუბრის წერილობით დოკუმენტად გარდაქმნისათვის, მისი გავრცელებისა და თავადაზნაურობის საღებუტატო საკრებულოს კანცელარიაში ოფიციალურად გადაცემისათვის. მიაჩნია რა ბატონ ყიფიანს ასეთი მოქმედება უადგილოდ, ხელმწიფე იმპერატორი გავალებთ თქვენ გამოუცხადოთ მას სათანადო გაკიცხვა“².

დ. ყიფიანს გამოეცხადა გაკიცხვა, რომლის ფორმალურ საფუძველად ღიჯი მთავრისადმი თითქოსდა უსაფუძვლო საჩივრის წარდგენა იქნა მიჩნეული და არა მთავრობის პოლიტიკის წინააღმდეგ გაბედული გალაშქრება. ამიტომ დ. ყიფიანი ამჯერად „ადვილად გადაარჩა“. მაგრამ ეს მხოლოდ საქმის დასაწყისი აღმოჩნდა. ღონდუკოვ-კორსაკოვს გადაწყვეტილი ჰქონდა დ. ყიფიანის თავიდან მოშორება და ხელსაყრელ მომენტს უცდიდა ეროვნულ-განმათავისუფლებელი მოძრაობის ერთ-ერთი გამოჩენილი მოღვაწის წინააღმდეგ რეპრესიულ ღონისძიებათა მიღებისათვის. მალე ეს მომენტიც დადგა. 1886 წლის 24 მაისს სასულიერო სემინარიიდან გარიცხულმა იოსებ ლალიაშვილმა მოჰკლა მისი რექტორი რეაქციონერი ჩუღუცი. ლალიაშვილი შეიპყრეს და 20 წლის კატორღა მიუსაჯეს, ჩუღუციის მკვლელობა კი გამოყენებულ იქნა ქართველი ხალხის წინააღმდეგ ახალი შეტევისათვის. ცარიზმის მოხელენი ლალიაშვილის მოქმედებას მიიჩნევდნენ რუსეთის წინააღმდეგ ქართველი ხალხის დაპირისპირების, მისი სეპარატიზმის გამოხატულებად, რომელიც საფრთხეს უქმნიდა რუსეთის მფლობელობას საქართველოში. დიდმპყრობელი შოვინისტები აღარავის ინდობდნენ. ისინი სეპარატიზტებად და რუსეთის მტრებად აცხადებდნენ იმათაც კი, ვისაც თვითმპყრობელობის და თავადაზნაურობის სამსახურში

1 სსცია, ფონდი ქუთაისის სამხ. გუბერნატორისა, საქ. 11, ფურც. 4—5.

2 სსცია, ფ. 1239, საქ. 457, ფურც. 2.

თმა გაქაღარავებოდა, თუმცა ამავე დროს თავისი სამშობლოს პატრიოტად და მისი ინტერესების დამცველად გამოდიოდა, ასეთი იყო დიმიტრი ყიფიანი, რომელიც რეაქციის ამ ახალი შემოტევის მსხვერპლი გახდა. როცა ეგზარქოსმა პავლემ ჩუღეცკის დასაფლავების დღეს დასწყევლა საქართველო და ქართველი ხალხი, რომელმაც, მისი აზრით, დაბადა „ავაზაკი“ ლალიაშვილი, — ამ ფაქტით უკიდურესობამდე შეურაცხყოფილი და უსაზღვროდ აღშფოთებული ქართველი საზოგადოებრიობის აზრი გამოესატა დიმიტრი ყიფიანმა საპროტესტო ბარათში, რომელიც მისწერა ეგზარქოს პავლეს 1886 წ. 8 ივნისს, „თქვენო აღმატებულებავ! — სწერდა ყიფიანი, — მიიღეთ მწყემსმთავრული მოწყალება და შემინდეთ ჩემი დიდი შეცოდება, თუ გატაცებული დაუჯერებელი ხმებით ვსცოდავ თქვენს წინაშე. მაგრამ ამბობენ, რომ თქვენ დასწყევლეთ ის ქვეყანა, რომელშიც თქვენ მოწოდებული ხართ სამწყსოდ, და, რომელიც ამის გამო მოელოდა თქვენგან მარტოოდენ სიყვარულსა და სათნოებას... თუ ყოველივე ეს, უფალო, მართალია, თქვენი ღირსების გადარჩენა მხოლოდ შეიძლება იმით, რომ შემჩვენებელი დაუყოვნებლივ განიდევნოს შეჩვენებული ქვეყნიდან“.

დიმიტრი ყიფიანის ამ წერილმა დიდი შეშფოთება გამოიწვია. ეგზარქოსი შეეცადა თავის მართლებას, ცარიზმის გავლენიანი მოხელეები კი დ. ყიფიანს მთავრობისათვის მეტად საშიშ პიროვნებად მიიჩნევდნენ.

იმპერატორის ბრძანებით 1886 წლის 6 აგვისტოს დ. ყიფიანი გადააყენეს ქუთაისის თავადაზნაურობის წინამძღოლობიდან და გადაასახლეს სტავროპოლში¹. აქ იგი ვერაგულად მოჰკლეს ცარიზმის აგენტებმა 1887 წლის 26 ოქტომბერს. იგი დიდი პატივით ჩამოასვენეს საქართველოში და მთაწმინდაზე დაკრძალეს. მისი დასაფლავება გადაიქცა მრისხანე ეროვნულ-საპროტესტო დემონსტრაციად ცარიზმის წინააღმდეგ. თანამედროვეებმა მას დიმიტრი თავდადებული უწოდეს.

80-იანი წლების პოლიტიკურმა რეაქციამ ვერ შეძლო საქართველოს ეროვნულ-განმათავისუფლებელი მოძრაობის ჩახშობა. ცარიზმის სატრაპებთან უთანასწორო ბრძოლაში კიდევ უფრო გაფართოვდა ეროვნულ-საზოგადოებრივი ძალები, რომლებიც, მსოფლმხვევლობრივი მერყეობისა და სისუსტის მიუხედავად, ბეჯითად იცავდნენ ქართულ ენასა და კულტურას, ქართველი ხალხის საარსებო ინტერესებს.

¹ სმ, 3, გვ. 433.

§ 1. მუშათა კლასის მღვრომარობა

გაპროლეტარებული გლეხებისა და ექსპროპრირებული ხელოსნებისაგან 60—70-იანი წლებიდან ყალიბდება მუშათა კლასი. მისი წინამორბედი იყო მეზატონეების ნებართვით ქალაქად წასული თუ გაქცეული ყმა გლეხი, რომელიც თავის სამუშაო ძალას აქირავებდა. ხშირად დღიური მუშაობით მიღებული ფულით ასეთი მუშა საბატონო ბეგარას იხდიდა, უფრო ხშირად იგი მეზატონეს ემალებოდა და მასთან ურთიერთობას სავსებით სწყვეტდა. იგი, რა თქმა უნდა, თავისუფალი მოქალაქე არ იყო, მაგრამ მაინც ხელს უწყობდა მუშათა პირველი კადრების შექმნას. XIX საუკუნის 40-იან წლებში მარტო თბილისში რამდენიმე ათასი ასეთი თავშეფარებული მუშა ითვლებოდა. საგლეხო რეფორმამ, იმის გამო, რომ არსებითად უმიწაწყლოდ დატოვა ყმობიდან განთავისუფლებული გლეხობა, ერთბაშად შეცვალა ვითარება შრომის ბაზარზე, რომელიც ახლა დაუბრკოლებლად ღებულობდა მუშახელს.

ვრცელდებოდა რა შრომის მექანიზაცია წარმოებაში, იქმნებოდა სამრეწველო მუშათა კადრები. XIX საუკუნის 70-იან წლებში გაპროლეტარებულ გლეხებს, რომლებიც სამრეწველო მუშებად იქცეოდნენ, გზადაგზა ემატებოდნენ ექსპროპრირებული ხელოსნები, რომლებიც ფაბრიკანტის კონკურენციის გამო იძულებული იყვნენ მიეტოვებინათ თავიანთი დაცემული წარმოება.

არც ასეთ მუშებს და არც სოფლიდან მოსულ პროლეტარებს წარმოდგენილი არ ჰქონდათ, რომ ისინი უკვე მოექცნენ დიდ სამრეწველო ქვაბში, რომელსაც თავს ვერ დააღწევდნენ. ადრე თუ გვიან სავსებით უნდა შეცვლილიყო მათი ყოფა-ცხოვრება, მესაკუთრე წვრილი მწარმოებლებიდან ისინი უნდა გადაქცეულიყვნენ სამრეწველო პროლეტარებად, ქალაქის მუშებად.

შრომის პირობები. ახლად ფეხადგმული საფაბრიკო წარმოება თბილისში და საერთოდ საქართველოში, მოკლებული იყო ელემენტარულ პირობებს, აუცილებელს იმისათვის, რომ მუშას ფიზიკური გამძლეობა შეენარჩუნებინა. „არავისთვის სადაო არ არის,—წერდა 1874 წელს მირზოევის ფაბრიკის მუშათა მდგომარეობის შესახებ ერთი მოხელე,—რომ 14-საათიანი სამუშაო დღე, თუნდაც საათნახევრიანი დასვენებით, რამდენადმე დიდია მუშებისათვის, განსაკუთრებით მცირეწლოვანთათვის, რომლებიც ფეხზე მდგარი, შეუსვენებლივ ყურადღების განუწყვეტელი დაძაბულობით მუშაობენ. ამგვარი შრომა თავისთავადაც მავნეა ხანგრძლივობის გამო. ამ მავნეობის ხარისხი კიდევ უფრო ძლიერდება ფაბრიკის სამუშაო პირობებით: გამაყრუებელი ჭანჭახი საქსოვი მექანიკური დაზგებისა, უამრავი ბორბლებისა, მბრუნავი ცილინდრებისა და ლილვების ხმაური და სხვა... წვრილი, ძაფისებრი მტვერი ჰაერში, რომელიც გაჟღენთილია რაღაც ზეთისებური უსიამოვნო ანაორთქლით და მისი მაღალი ტემპერატურა (თებერვლის თვეში ფაბრიკის ზედა განყოფილებაში მუშები მუშაობდნენ ფეხშიშველი, პერანგის ამარა და, მიუხედავად ამისა, ძლიერ ოფლიანდებოდნენ), — ყველაფერი ეს ისეთი პირობებია, რომლებისგანაც ღმერთმა დაიფაროს მიუჩვეველი ადამიანი, მაგრამ მუშები ხომ მიჩვეულნი არიან ყოველგვარ უბედურებას...“¹.

წერილის ავტორს, რასაკვირველია, მიზნად არ ჰქონდა აემალლებინა ხმა საფაბრიკო-საქარხნო წესების წინააღმდეგ, მაგრამ ეს მას ხელს არ უშლიდა წარმოედგინა და განეცადა სინამდვილე მაშინდელი ფაბრიკაქარხნების ცხოვრებისა, კერძოდ, ისეთი ფაბრიკისაც, როგორიც იყო მირზოევის. წარმოუდგენელ სიბინძურესა და სიცხეში მუშებს უხდებოდათ ყოფნა ყოველდღიურად თითქმის 14 საათი. წერილის ავტორი აღნიშნავს, რომ მას ფაბრიკაში მხოლოდ 45 წუთი გაუტარებია, და თავბრუ დასხმია, საფეთქლები ასტიკვებია².

ამგვარსავე მდგომარეობას ჰქონდა ადგილი თბილისის თამბაქოს ფაბრიკებში: „თამბაქოს ფაბრიკებში მომუშავე მუშათა რიცხვი 900 კაცს აღწევს, რომელთაგან თითქმის ნახევარი — დაახლოებით 400 კაცი — მცირეწლოვანია. თუ მუშაობა დილის 8 საათიდან საღამოს 8/2, 9 და 10 საათამდე არც ისე მომქანცველია დიდებისათვის (!), არავითარ შემთხვევაში არ შეიძლება არ იყოს იგი მომქანცველი ბავშვებისათვის. ის მათთვის მძიმეა, რასაკვირველია, არა ფიზიკური ძალების დახარჯვის თვალსაზრისით, არამედ ხანგრძლივი თავაუღებელი მუშაობით. ახალგაზრდა ორგა-

¹ П. Ж у к о в , Несколько слов о рабочем вопросе по отношению к нашему краю, «Кавказ», 1874, № 49.

² იქვე.

ნიზმი 11, 12, 13—15 წლის მუშაკისა, რომელიც იძულებულია დარჩეს ერთ ადგილას ჯერ 5—6 საათი და ხანმოკლე შესვენების შემდეგ კიდევ ამდენივე დრო იმუშაოს, ჰკარგავს ნორმალური განვითარების შესაძლებლობას და უდროოდ ჩიავდება, იმიტომ რომ ჯანმრთელი ასაკის ბავშვის ფიზიოლოგიური ფაქტორების პარალიზება ხდება ამ უმოძრაობით, რომელიც შეესაბამება მხოლოდ ხანდაზმულთა ორგანიზმებს. ამას თან ერთვის თამბაქოს ქარხნების ატმოსფეროს გავლენა. ეს ატმოსფერო ქმნის რიგ უსიამოვნო ავადმყოფობას (ორგანოების ძიგძიგი, ჭვალეზი, ხუთვა და სხვ.), რომლებიც იმ ექიმების დასკვნით, რომელთაც ჩატარებული აქვთ დაკვირვება ასეთსავე ქარხნებზე რუსეთში, შეაღვენენ მეთამბაქოეთა სპეციფიკურ დაავადებებს. ყველა ჩვენი თამბაქოს ქარხნიდან მხოლოდ ენფინჯიანცის და სხვა 3—4 ქარხანას თუ აქვს ცოტად თუ ბევრად შესაფერი შენობა. უმეტესობა ან სარდაფებშია, ან ქალაქის ბინძურ უბნებში. სავენტილაციო მოწყობილობა, გარდა სარკმლებისა, არსად არაა¹.

აუტანელი ძღვომარეობა იყო ტყავის ქარხნებში თავბრულდამხვევი ორთქლისა და ცუდი ჰაერის გამო. ვერც ევროპულად მოწყობილმა ადელხანოვის ქარხანამ მოუღო ბოლო ამ ანტიჰიგიენურ მდგომარეობას.

1898 წელს ადელხანოვის ფეხსაცმლის ფაბრიკაში 700 მუშა მუშაობდა. ფაბრიკა შედგებოდა 6 საამქროსაგან (გამომჭრელი, დამამზადებელი, წლის, ტყავის ჩექმის, ქეჩის ჩექმის და ქეჩის ფეხსაცმელების), მუშაობა წარმოებდა როგორც ხელით, ისე საყვარავი მანქანებით. საამქროებში შტვერი, სიბინძურე, საშინელი სივიწროვე იყო. ვენტილაცია არ არსებობდა².

ძღვომარეობა არ შეცვლილა ამ მხრივ არც ცხრაასიან წლებში, რასაც მოწმობს თვით მთავრობის ოფიციალური ანგარიშის ცნობები — „ფაბრიკა-ქარხნების შენობები არადამაკმაყოფილებელია და რამდენიმე ადგილას პირდაპირ საზარელი — ბნელი, ბინძური, ვიწრო, შეხუთული შენობები, სადაც ჰაერი მოწამლულია“³.

ამ საზიანო მოვლენას — ქარხნების ტექნიკურ მოუწყობლობას და უსუფთაობას — თან ერთვოდა შრომის პროცესის ხანგრძლივობა, რომელიც არა მარტო ქანცს აცლიდა მომუშავეს, არამედ ფიზიკურადაც სტეზდა. ქარხანაში მუშაობის დამთავრების შემდეგ, მუშებს სახლში მიჰქონდათ პაპიროსის ქაღალდი ჰილზების დასამზადებლად, რაზედაც მთელი ღამე უნდა ემუშავნათ, რათა მეორე დღეს არ გაცუენილიყვნენ. ეს მაშინ, როცა სამუშაო დღე თამბაქოს ფაბრიკაში, იმავე პირის ცნობით, 15—16

¹ П. Ж у к о в, Несколько слов о рабочем вопросе по отношению к нашему краю.

² მლისფა, ფ. 34, საქ. 420, ფურც. 2—3.

³ იქვე, ფ. 37, საქ. 27.

საათს გრძელდებოდა. „ჩვენი ფაბრიკა წარმოადგენდა ერთგვარს საპატიმროს, ე. ი. ღილით რომ შედიოდნენ შიგ მუშები, საღამომდის გამოსვლის ნება არ ჰქონდათ“¹.

წარმოების ტექნიკური ჩამორჩენალობის გამო არსებულ აუტანელ ფიზიკურ შრომაზე მეტყველებს „კვალის“ კორესპონდენცია ბათუმის ქარხნების შესახებ (1898 წ.).

სრულიად მოუწყობელი იყო ჭიათურის მარგანეცის წარმოებაც. შავი ქვის მრეწველები გვირახებებს არ ამაგრებდნენ და, თუ სადმე იყო გამაგრებული, ისიც არასაიმედოდ. „საზოგადოდ შავი ქვის მუშა ჩალვადრები ცუდ მდგომარეობაში არიან ჩაცვენილნი, — წერს „კვალის“ ჭიათურელი კორესპონდენტი, — ვერსტის მესამედი სიმაღლე მთა, ციკაბო, კისერსატეხი გზით, ღღეში 5—6-ჯერ უნდა აიარ-ჩაიაროს, ამღენჯერვე ცხენები შარგანეცით დასაპალნოს და დასცალოს, იცხოვროს თვითონ ცხენებთან ერთად აყროლებულ თავლაში, ისაზრდოოს მარტო პურით და წყლით (თუ ესეც არ აქვს, ცივი მჭადით). რაც შეეხება მადნის მუშების მდგომარეობას, ჩალვადრებზე უარეს თუ არა, უკეთეს მდგომარეობაში არც ესენი არიან ჩაყენებულნი, რადგან კარგი მარგანეცის ადგილებს, უშეტეს ნაწილად, წინ მისასვლელი გზა, აქამდე უთავბოლო მუშაობის გამო, დანგრეული აქვს: მადანი დაშორდა, ქვა ცუდი გამოსატანი შეიქმნა 100—150 საყენი მანძილიდან დაბალი და ვიწრო გვირაბით. ამიტომაც მუშა იძულებულია უფრო შორს წავიდეს და იქიდან რის ჰაპანწყვეტით გამოათრიოს გარეთ მოტეხილი ქვა. გვირაბს უნათებს ნავთიანი ჭრაქი...“².

ჭიათურის რკინიგზას ჩალვადრების მდგომარეობა არ შეუცვლია. მადნისმთხრელ მუშათა მდგომარეობაზე რამდენადმე გავლენა იქონია მაღაროთა ელექტროგანათებამ. დიდი მნიშვნელობა ჰქონდა აგრეთვე მადნის ზიდვის მექანიზაციას მაღაროებში, მაგრამ ყველაფერი ეს გვიანდელი მოვლენაა.

ადვილი წარმოსადგენია, თუ რამდენად სახიფათო იყო მუშებისათვის ესოდენ გაუმართავი და მოუწყობელი წარმოება, რამდენად ხშირი უნდა ყოფილიყო უბედური შემთხვევები. „ჭიათურის მარგანეცის მაღაროების გაუმაგრებელ გვირაბებში, — აღნიშნავს მუშა-კორესპონდენტი, — ზემოდან ერთი ბელტის ჩამოვარდნაა საჭირო, რომ იქ მყოფ მუშას სული გააფრთხობინოს. ის კი, ვინც ჯერ არს, ადგენს ოქმს, რომელსაც აქამდე არავისთვის არაფერი ნაყოფი არ მოუტანია, გარდა იმისა, რომ მისი ყოფილი ამხანაგები სასამართლოში „კარგად ჩვენებისათვის“ კარგად ჩაიჭი-

¹ მლისფა, ფ. 34, საქ. 27.

² „კვალი“, 1898, № 33.

ბავენ ორიოდ გროშს, რასაც ნიადაგ მოსდევს მადანში მოკლულის გამტყუნება ვითომც და მართლა უწესრიგო მუშაობისათვის“¹.

ხშირი იყო უბედური შემთხვევები თბილისის რკინიგზის სახელოსნოებში, შეღარებით კარგად მოწყობილ ფაბრიკა-ქარხნებშიც, სადაც ადამიანის ფიზიკურ ძალას უმეტესად უახლესი ტიპის მანქანა-იარაღები ცვლიდა. „დღე არ გავა, — წერს „ივერია“ ბათუმის ფაბრიკა-ქარხნების ცხოვრების შესახებ, — რომ ერთი ან ორი მუშა არ დაშავდეს, არ მოეკვეთოს ან ხელი, ან ფეხი ან სხვა რომელიმე ასო სხეულისა. დაშავებულს ხომ პანდურის ცემით გამოაგდებენ უმოწყალოთ, ვითარცა უვარგისსა და ძველ ნივთსა“².

სამუშაო დრო, ხელფასი. წარმოების მოუწყობლობა, მისი ტექნიკური ნაკლი და სხვ., რაც საერთოდ მავნედ მოქმედებდა მუშის ჯანმრთელობაზე და მის სიცოცხლეზე, განსაკუთრებით საგრძნობი იყო მეტად ხანგრძლივი სამუშაო დროისა და დაბალი ხელფასის გამო. მუშა ვერ ახერხებდა დასარჩული ენერჯიის აღდგენას. მირზოევის ფაბრიკის მუშებს 14 საათი (მცირე შესვენებით, რაც სადილობისათვის იყო განკუთვნილი) უხდებოდათ მუშაობა. დღის ორ მესამედს ეს მუშები ფაბრიკაში ატარებდნენ. თავდაპირველად ისინი თვიურად ღებულობდნენ ხელფასს, მაგრამ ერთი წლის შემდეგ მეფაბრიკემ სანარდო სისტემა შემოიღო და თვიური ხელფასი გააუქმა. მეფაბრიკე მუშებს ანგარიშს უსწორებდა ყოველკვირეულად. მემანქანე მუშებს, ფეიქრებს და სხვებს დღიურად უწევდათ ექვსი შაურიდან სამ აბაზამდე. თითო თოფი (30 არშინი) ნარმის მოქსოვაში ფეიქრები ღებულობდნენ ექვს შაურს³.

70-იან წლებში თბილისში ენფინჯიანცის თამბაქოს ფაბრიკა ითვლებოდა საუკეთესოდ⁴. ზამთრის პერიოდში ენფინჯიანცის ფაბრიკაში, როგორც ბევრ სხვა საწარმოშიც, მუშაობა იწყებოდა დილის 8 საათიდან და გრძელდებოდა საღამოს 8,5 საათამდე (დასვენება — ერთი საათი); ზოგ ფაბრიკაში მუშაობა საღამოს 10 საათამდე გრძელდებოდა. ერთი სიტყვით, 12 საათზე ნაკლები სამუშაო დღე არც ერთ ფაბრიკაში არ იყო. მაგრამ ზანარდო მუშაობის გავრცელებამ გამოიწვია ის, რომ მუშები, მეტადრე მუშა შამაკაცები, ღამის პირველ საათამდე რჩებოდნენ ფაბრიკაში, რომ როგორმე გამოემუშავებინათ პაპიროსების მეტი რაოდენობა⁵.

¹ „კვალი“, 1898, № 33.

² „ივერია“, 1890, № 179.

³ П. Ж у к о в, Несколько слов о рабочем вопросе..., «Кавказ», 1874, № 46.

⁴ იქვე.

⁵ იქვე.

ენფინჯიანცის ფაბრიკაში მუშები დანაწილებული იყვნენ 5 სხვადასხვა სახის სამუშაოს მიხედვით. გამოყოფილი იყვნენ თამბაქოს შემრჩევენი, დამხარისხებელნი, დამკრეღნი, შემხვევენი და პაპიროსის მკეთებელნი. მათი რაოდენობისა და შრომის ანაზღაურების შესახებ აქვე მოვიყვანთ თანამედროვის მიერ ჩაწერილ ცნობებს:

1. თამბაქოს ფურც. შემრჩ. — 5 კაცი — ხელფ. თვ. 16 მანეთიდან 33 მან.-მდე.
2. დამკრეღნი 11 „ „ 25 მანეთიდან 30 მან.-მდე.
3. დამხარისხებელნი 7 „ „ „ 18 მანეთიდან 30 მან.-მდე.
4. შემხვევენი 7 „ „ „ 8 მანეთიდან 30 მან.-მდე.

5. პაპიროსის მკეთებელნი 12 მანეთიდან 20 მანეთამდე¹ ამრიგად, სანარდო მუშაობით მხოლოდ თამბაქოს ფოთლის მრჩეველ მუშებს შეეძლოთ გამოემუშაებინათ დღიურად მანეთი და ორი შაური. თამბაქოს მკრეღები კი ერთ მანეთზე მეტს ვერ გამოიმუშაებდნენ; მაგრამ აქ აღებულია სამუშაო დღის ხანგრძლივობის მაქსიმუმი და ამასთანავე ამ სახის სამუშაოს შემსრულებლის უპირატესობა. ჩვეულებრივ, 12-საათიანი სამუშაო დღის მიხედვით, მრჩეველნი თვეში ღებულობდნენ 16 მანეთს, დამკრეღნი — 25 მანეთს. შემხვევენი — 8 მანეთს, პაპიროსის მკეთებელნი კი — 12 მანეთს. საშუალოდ აქედან თვიურად მუშაზე მოღის 15 მანეთი და 20 კაპ., დღეში — ათი შაური. ენფინჯიანცის ფაბრიკაში ამავე დროს მუშაობდა 60 ბავშვი, რომლებიც აკეთებდნენ პაპიროსის კოლოფებს და აკრავდნენ მას იარლიყს. თითოეულ მუშა ბავშვს კვირაში უხდიდნენ 80 კაპ.-დან 1 მანეთსა და ხუთ შაურამდე, დღიურად კი უწევდა 13 კაპ., იშვიათად მეტი². მეპაპიროსე მუშა მამაკაცი ამ ფაბრიკაში დღიურად ათას ცალ პაპიროსზე მეტს იშვიათად აკეთებდა.

„საერთოდ ამ წარმოებაში (ენფინჯიანცის ფაბრიკაში) საშუალოდ დღეში 32—33 ათას პაპიროსზე მეტი არ მზადდება (60—70 მუშა)“, — ვკითხულობთ „კავკაზში“³. თითოეულ მუშაზე, ამრიგად, მოდიოდა 500—600 ცალი პაპიროსი. ათას ცალ პაპიროსზე მუშას უხდიდნენ ექვს შაურს (ის, ვინც შეძლებდა ორი ათასი პაპიროსის დამზადებას, იღებდა სამ აბაზს). საშუალოდ თითოეულ მეპაპიროსე მუშას დღიურად უწევდა სამი შაურიდან ერთ აბაზამდე.

¹ П. Ж у к о в, Несколько слов о рабочем вопросе..., «Кавказ», 1874, № 46.

² იქვე.

³ იქვე.

არც სხვა თამბაქოს ფაბრიკაში ყოფილა უკეთესი მდგომარეობა. მუშათა ხელფასი ამ ფაბრიკებში 70-იან წლებში არ აღემატებოდა ენფინჯიანცის ფაბრიკის მუშათა ხელფასს¹. 80 — 90-იან წლებში ბოზარჯიანცის ფაბრიკის თითოეული მუშა სანარღო მუშაობით დღიურად 1 მანეთსა და 25 კაპიკზე მეტს ვერ იღებდა. ეს მაშინ, როცა მათ სახლიდან მოჰქონდათ დამზადებული ჰილზები. ათას ცალ პაპიროსზე მუშას ეძლეოდა ათი შაური. მაგრამ მუშას, რომელიც ფაბრიკაში 15—16 საათს მუშაობდა, წინა ღამეს სახლში უნდა დაემზადებინა საპაპიროსე ჰილზები.

ამრიგად, სანარღო მუშაობის სისტემის გამო მუშები მაქსიმალურად ამცირებდნენ დასვენებას და უძილოდ ატარებდნენ ღამეებს თავაუღებელ შრომაში.

ალანინშნავია ისიც, რომ მუშა საპაპიროსე ჰილზების დამზადებაში იშველიებდა თავისი ოჯახის წევრებს — ცოლსა და ბავშვებს. ასე რომ მის დღიურ ხელფასში, რაც არ აღემატებოდა 1 მანეთსა და 25 კაპიკს, თავისი წილი ედო თითქმის მთელ ოჯახს. მაგრამ მარტო მუშაზე და მის ოჯახზე არ ნაწილდებოდა ეს გამომუშავებული ფული. კვალიფიციურ მეპაპიროსე მუშას, რომელიც ნარდად მუშაობდა ფაბრიკაში, ხშირად თავის თანაშემწედ ჰყავდა მცირეწლოვანი. იგი შველოდა მას მთელი მუშაობის მანძილზე. ამ დამხმარე ძალის ფასი ანაზღაურებული უნდა ყოფილიყო იმ 1 მანეთსა და 25 კაპიკიდან, რასაც ნარდად მომუშავე ღებულობდა დღიურად.

თუ რა მძიმე მდგომარეობაში იმყოფებოდნენ მუშების ოჯახები სანარღო მუშაობის პირობების გამო, ამას კარგად მოწმობს მოგონებები ძველი მუშებისა, რომლებმაც გადაიტანეს მაშინდელი საფაბრიკო-საქარხნო შრომის მთელი საშინელება. „მაშინ (80-იან წლებში), — ამბობს ერთი ძველი მუშა, — სანარღო სისტემა იყო და ძმას სახლშიც მოჰქონდა სამუშაო. მთელი ოჯახის წევრებს გვამუშავებდა — ჰილზებს ვახვევდით. შუალამისას, როცა ძილი შეგვეპარებოდა, ძმა ჯოხით ხელში თავზე გვაღვა და არ გვაძინებდა. ხშირად ჩემ დას ძილი მოერეოდა, ძმა ჯოხის ცემით აღვიძებდა საწყალ გოგოს და ტახტიდანაც გადმოაგდებდა — როგორ გაბეღე დანძინებო. არც ის იყო გასამტყუნარი. თუ ღამით არ დაამზადებდა მასალას, დღისით ვერაფერს გამოიმუშავებდა“². დამხმარე მცირეწლოვან მუშათა მდგომარეობა არც ერთ ქარხანაში არ იყო უკეთესი. „9 წლის ვიყავი, როცა ჯიმშეროვის თამბაქოს ფაბრიკაში მიმბარეს, — ამბობს იგივე მუშა, — ზანდეროლებს ვკრავდი, დღეში შეიდ კაპიკს მაძლევდნენ. მუშაობას ვიწყებდით დღის 7 საათზე და საღამოს 9—10 საათამდე იქ ვიყავით“³.

¹ П. Жуков, Несколько слов о рабочем вопросе...

² მლისუბა, ფ. 34, საქ. 97, ფურც. 2.

³ იქვე.

70-იან წლებში თბილისის სტამბებში ასოთამწყოები და მბეჭდავები საშუალოდ თვიურად 27 მანეთს ღებულობდნენ, ხოლო სტამბის დანარჩენი მუშები — 9 მანეთს¹. ჩვეულებრივი მუშა, ამრიგად, 12-საათიან სამუშაო დღეში ექვს შაურს ღებულობდა. მაგრამ ეს ხელფასი აღებულისა როგორც საშუალო 7 მანეთიდან 12 მანეთამდე. გამოდის, რომ დღიურად მუშის ჩვეულებრივი ხელფასი შეადგენდა 23 კაპიკს. კიდევ მეტი: ბავშვები, რომლებიც იმდენივე ხანს მუშაობდნენ სტამბაში, რამდენსაც ღიდები, თვიურად ღებულობდნენ 2 მანეთიდან 4 მანეთამდე², საშუალოდ — 3 მანეთს, დღეში კი ორ შაურს; მაგრამ მცირეწლოვანი მუშებისათვის ჩვეულებრივი ხელფასი დღეში 7 კაპიკი ყოფილა.

ხელფასის მიხედვით სტამბაში მომუშავე ასოთამწყოები და მბეჭდავები იყვნენ პირველ ადგილზე. მექანიკურ სახელოსნოებში კი—ზეინკლები, ხარატები და მჭედლები. ხელფასს ეს მუშები იღებდნენ არა შრომის პროდუქტულობისა და კვალიფიციურობის შესაბამისად, არამედ იმის მიხედვით, თუ ქარხნის პატრონი რას მოისურვებდა. რას გაიმეტებდა მათთვის.

რუქის მქანიკურ სახელოსნოში ხელოსანი ოსტატები თვიურად არაიშვიათად მხოლოდ 15 მანეთს იღებდნენ. ამიტომ ხელოსანი ოსტატები ამჟობინებდნენ ემუშავათ არა თვიურად, არამედ ნარდად³.

ჭიათურის მალაროს მუშები იყოფოდნენ მადნის მნგრეველ, მგორებელ და მადნის გადამრჩეველ მუშებად. პირველი მადანს წერაქვით ანგრევდნენ, მეორენი მონგრეულ მადანს გოდრებით ეზიღებოდნენ მალაროდან ბაქნამდე, მესამენი მადანს ახარისხებდნენ და წმენდდნენ. მარგანეცის მრეწველობის მუშებად ითვლებოდნენ აგრეთვე მტვირთავები და ჩალვადრები. ჭიათურის შავი ქვის წარმოებაში თავიდანვე სანარდო სისტემა გაბატონდა. ყველა დარგის მუშები აქ ნარდად მუშაობდნენ. მუშაობა გრძელდებოდა 16—18 საათს დღეში. ხელფასის მიხედვით პირველ ადგილზე მნგრეველები იყვნენ. მათი დღიური გამომუშავება აღიოდა ერთი მანეთიდან 1 მანეთსა და 25 კაპიკამდე. მადნის მზიდავ-მგორებელთა ხელფასი თოთხმეტი შაურიდან ერთ მანეთამდე აღწევდა, მადნის დამხარისხებელთა — ათი შაურიდან ოთხ აბაზამდე. დამხარისხებელთა საგრძნობ ნაწილს შეადგენდნენ ქალები და ბავშვები. ქალების ხელფასი ორ აბაზს არ აღემატებოდა, ხოლო ბავშვები (12 წლიდან 15 წლამდე) ღებულობდნენ ორი შაურიდან ორ აბაზამდე⁴.

მოიჯარადრეები მარგანეცით ვაგონების დატვირთვის სამუშაოს მტვი-

¹ «Кавказ», 1874, № 49.

² იქვე.

³ იქვე.

⁴ ქს. კ ვ ა ნ ტ რ ე, ჭიათურის სამთამადლო მუშათა მოძრაობის ისტორია, გვ. 35.

რთავ მუშებს ასრულებინებდნენ. ერთი ვაგონის დატვირთვა (765 ფუთი) ღირდა სამი აბაზიდან თვრამეტ შაურამდე. მტვირთავი მუშებიც ამის მიხედვით ღებულობდნენ ხელფასს¹.

უფრო სავალალო იყო ჩალვადარი მუშების მდგომარეობა. ვიწრო და ციცაბო გზებზე უხდებოდათ მათ ტვირთის ზიდვა. ამ პირობებშიც ხუთი ვერსის მანძილზე ფუთი მადნის გადაზიდვაში ისინი იღებდნენ ორ კაპიკს. ცხენს შეეძლო ერთ გზაზე წაეღო ათ ფუთამდე და ჩალვადარს დღეში გაეკეთებინა 4—5 გზა. ამრიგად, ის დღეში მიიღებდა ოთხ აბაზს ან ერთ მანეთს, რომლითაც ცხენიც უნდა გამოეკეცება და ოჯახიც ეკრინა.

90-იან წლებში ჭიათურის შავი ქვის წარმოებაში გავრცელდა მუშათა დაქირავების განსაკუთრებული სანარდო წესი: მრეწველები უთანხმდებოდნენ მუშათა ჯგუფს, რომ რკინიგზის ბაქანამდე მიეტანათ გაწმენდილი მადანი. ბაქანზე მიტანილ და გაწმენდილ მადანში ფუთზე მრეწველი იხდიდა 3 — 3,5 კაპიკს. ასე გავრცელდა ეგრეთ წოდებული საფუთო წესი და აქედანვე წარმოსდგნენ „მეფუთე“ მუშები. ეს წესი კიდევ უფრო აუარესებდა მუშათა მდგომარეობას. „მეფუთე“ მუშები ფულს ღებულობდნენ მხოლოდ მას შემდეგ, როცა ისინი წონით ჩააბარებდნენ მადანს რკინიგზის ბაქანზე. მაღაროდან ამოღებული მადნის დაბნევა-დაკარგვისათვის პასუხს აგებდა „მეფუთე“ მუშა. მრეწველი არ ფიქრობდა იმაზე, რომ ცუდი ამინდის დროს შეიძლებოდა მოგროვებული მადანი ნიაღვარს წაეღეკა, ან საპალნიანი ცხენი წაქეუულიყო და კლდეში გადაჩეხილიყო, ან ურემი გადაბრუნებულიყო, და, ამრიგად, მადანი დაკარგულიყო. არც იმაზე ფიქრობდა მრეწველი, რამდენ ენერგიას ხარჯავდა „მეფუთე“ მუშა მადნის გაწმენდაზე. იგი წონით იღებდა გაწმენდილ მადანს და რას დაეძებდა, თუ კანტორის ქურდი მწონავი წონაში ატყუებდა მუშას, პარავდა მას მოტანილი მადნის თითქმის მესამედს.

1897 წელს გაზეთი „ივერია“ ჭიათურის შავი ქვის მუშების შესახებ წერდა: „მუშა, რომელიც დილიდან საღამომდის შავი ქვით გასვრილი თავაუღებლად მუშაობს, რომელიც ხან სამოცის საყენის და მომეტებულ წილად კი ასის საყენის სიგრძეზე მიძვრება მიწაში, დღეში ათ შაურსაც ვერ იღებს“².

ტყობულის ქვანახშირის მაღაროებში 90-იანი წლების ბოლოსაც სამუშაო დღე არ იყო განსაზღვრული. „ჩვენი მთავარი იარაღი, — იგონებდნენ მაღაროს ყოფილი მუშები, — წერაქვი და ბარჩი იყო; ჩვენთვის არ არსებობდა მუშაობის განსაზღვრული დრო. სამუშევრად ადრე დილას გამოვიდოდით და მზის ჩასვლამდის ვმუშაობდით“³. ეს მუშები მაღაროს ახ-

¹ ქს. კვანტრე, ჭიათურის სამთამადნო მუშათა მოძრაობის ისტორია, გვ. 35.

² „ივერია“, 1897, № 98.

³ ქს. კვანტრე, დასახელებული წიგნი, გვ. 25.

ლომანლო სოფლებში ცხოვრობდნენ და მუშაობის დამთავრების შემდეგ ღამ-ღამობით თავიანთ სახლებში მიდიოდნენ. ცუდი ამინდის დროს კი თავს აფარებდნენ სახელდახელოდ დადგმულ ფაცხებს. ისინი მოწყვეტილი არ იყვნენ თავიანთ მეურნეობას და უსახსრობის გამო იძულებული ხდებოდნენ მეტად დაბალ ხელფასზე ემუშავნათ. 1897 წელს ასეთი მუშები მთელი დღის განმავლობაში თოთხმეტ შაურს ღებულობდნენ¹.

პრიმიტიული იარაღებით შავი ქვის მოპოვება, რასაკვირველია, არ იყო პროდუქტიული. ამიტომ მრეწველები შეჯიბრებას აწყობდნენ. შეჯიბრებაში გამარჯვებული, ილაგაწყვეტილი შავი მუშები, რომლებიც თვითრად მუშაობდნენ, სააღდგომოდ „პრემიის“ სახით საჩუქარს ღებულობდნენ. ამ ჯილდოსათვის მალაროს მუშას მთელი წლის განმავლობაში თავაუღებლად უნდა ერთყა წერაქვი ქვანახშირის ქანებისათვის.

ტყიბულის ქვანახშირის მალაროებიდან ნახშირის გამოზიდვისა და გაცხრილვა-გაწმენდის საქმეში მონაწილეობდნენ ბავშვებიც, რომელნიც დღიურად იღებდნენ ექვსი შაურიდან ორ აბაზამდე².

რკინიგზის მშენებლობამ ამიერკავკასიაში და საქართველოში დიდძალი მუშახელი მიიზიდა სოფლებიდან. ამ მუშების უმეტესობა, განსაკუთრებით დასავლეთ საქართველოში, იყვნენ გლეხები, რომლებიც, რკინიგზის მშენებლობაზე მძიმე შრომას ეწეოდნენ, მაგრამ თავიანთ საკუთარ მეურნეობასთან კავშირს არ წყვეტდნენ. განსაკუთრებით მძიმე იყო მათი მდგომარეობა. სიღატაკე და უსახსრობა აიძულებდა მათ მეტად დაბალ ფასად ემუშავნათ.

„თითქმის ყოველ დღე შეხვდებით აქ (ფოთსა და რიონს შუა) 10 — 15-ამდის გროვით მომავალ ხალხს, — წერდა ჭალადიდელი გაზეთ „კვალში“, — საგზლით ზურგზე, რომლებიც თხოვენ „პოდრიაღჩიკს“ სამუშაოს. ისიც სარგებლობს ამათი სიმრავლით და ეუბნება: „მე საკმაო მყავს მუშები, მარა მაინც მიგიღებთ, ამ ფასად თუ იმუშავენ“ (თუ ამ დროს მუშას აძლევს დღეში მანეთს, იმათ შეაძლევს სამ აბაზს). ამათი და კიდევ სხვა ახალმოსულების მიზეზით დღიური ფასი კიდევ ძირს იწევს და ასე ამგვარად დღეში ისინი 40 — 50 კაპიკს ძლივს იღებენ. ამ ფასათ ისინი მუშაობენ დილის ზუთის ნახევრიდან, საღამოს შვიდ საათამდე (სადილისათვის და საუზმისათვის ერთი საათი თავისუფლება აქვთ). ამას ისიც უნდა დავუმატოთ, რომ მუშები თავის ბინაზე მხოლოდ ცხრის ნახევარზე თუ ცხრაზე იქნებიან (მუშა-მატარებელს სხვა და სხვა მიზეზების გამო ხშირად აგვიანდება); მისვლის შემდეგ იმათ უნდა მოიშადონ ვახშამი და აგრეთვე მეორე დღისათვის საგზალი; ასე, რომ ღამის 12—1 საათამდის უნდა იცოდვილონ და დილით კი ოთხ საათამდე მზათ უნდა იყვნენ გზაში

¹ ქს. კვანტრე, კიათურის სამთამდნო მუშათა მოქრაობის ისტორია, გვ. 25.

² იქვე.

წასასვლელად, რადგანაც ამ დროს მუშა-მატარებელი გადის. ამგვარად დილის ოთხი საათიდან დამის თორმეტ საათამდის, ე. ი. 20 საათს (თუ მივიღებთ მხედველობაში თავის თავზე მუშაობასაც) დაუსვენებლათ არიან“¹.

80-იან წლებში საერთოდ მთელ ამიერკავკასიაში მუშათა ხელფასი ეცემოდა. ამას ოფიციალური წრეებიც ამჩნევდნენ. ოპოზიციურად განწყობილი მათი ლიბერალური წარმომადგენლები კი საჭაროდ იწყებდნენ მსჯელობას მუშათა საკითხზე. „თავისთავად ცხადია, — ვკითხულობთ გაზეთ „კავკაზში“ ბათუმის მტვირთავი მუშების შესახებ, — რომ სამუშაოს მძებნელთა ასე დიდი მოზღვავება მათი ეროვნული შემადგენლობას სიჭრელესთან ერთად დამჭირავებლებს უწყობს ხელს. საჭიროზე ნაკლები მოთხოვნილება მუშახელზე წარმოშობს გაძლიერებულ კონკურენციას მუშახელის ბაზარზე, რასაც თან მოაქვს ხელფასის შემცირება და სამუშაო დღის გახანგრძლივება. მაგრამ ეს კიდევ ცოტაა. სხვადასხვა ენაზე მოლაპარაკე დაჭირავებულთა სოლიდარობას ხელს უშლის ის გარემოებაც, რომ მათ ერთმანეთის არ ესმით, და ამით სუსტდება მათი წინაღობდევგობა სამუშაოს მიმცემთადმი. ესაა იმის მიზეზი, რომ ზაფხულში სამუშაო დღე 10,5 საათს შეადგენს, ზამთარში კი უფრო ხანგრძლივი ხდება: მუშაობენ, სანამ ხელავენ. ასევეა ხელფასის საქმეც. მაგალითად, ერთი მრეწველი, რომელსაც აქვს დიდი კანტორა და ქირაობს არაიშვიათად 100—150 მუშას, თვითეულ მათგანს ხელფასს აძლევს საშუალოდ 80 კაპიკს ზაფხულობით და 70 კაპიკს — ზამთრობით. ამრიგად, უკანასკნელ შემთხვევაში, ხელფასის შემცირება მიმდინარეობს სამუშაო დღის გაგრძელების პარალელურად, ხოლო როგორც ერთი, ისე მეორე თავის ახსნას პოულობს მუშათა არაჩვეულებრივ მოზღვავებაში და მათ გაძლიერებულ კონკურენციაში განსაკუთრებით ზამთრის პერიოდში... თუ მხედველობაში არ მივადებთ სხვა დანარჩენ პირობათა სიმძიმეს, რომელიც კისრად აწევს ბათუმელ მუშას, 70—80 კაპიკი ხელფასი „ნორმალურადაც“ მოჩანს. მაგრამ ბათუმში ცხოვრების სიძვირის, განსაკუთრებით ბინების სიძვირის პირობებში, როცა 12 კვ არშინიანი უბრალო პატარა ოთახი სადმე ბარცხანას უკან ღირს თვეში 4 მანეთი, — 70 კაპიკით ძლივსძლივობით თუ მოითქვამ სულს, ე. ი. გასძლებ თვითონ და გაუგზავნი რამდენიმე გროსს ნახევრად მშვიერ ოჯახს. ხოლო თუ გავითვალისწინებთ, რომ წელიწადში სამუშაო დღეები იშვიათად აღემატება 120 დღეს, ეს ხელფასი უაღრესად უაბალი აღმოჩნდება“².

90-იან წლებში როტმილდის ქარხნის მბურღავი მუშები, 12-საათიან

¹ „კვალ“, 1898, № 35.

² «К вопросу о положении на грузчиков», из батумских обследований, «Кавказ», 1988, № 38.

სამუშაო დღეში (1,5-საათიანი დასვენებით სადილისათვის) ღებულობდნენ ერთ მანეთს, მაგრამ ეს ხელფასი მთლიანად როდი ეძლეოდა მუშას. ქარხნებში ფართოდ იყო გავრცელებული დაქვითვები და ჯარიმები. როტშილდის ქარხანაში მუშებს უქვითავდნენ ხელფასიდან 7—10%-ს წუნდებული პროდუქციის საზღაურად, აჯარიმებდნენ გაცდენებისათვის წესრიგის დარღვევისათვის, დაზგების დაზიანებისა და მასალების წახდენისათვის¹. ქარხნის მმართველს ანგარიშსწორების წიგნაკში მუშების მიერ შესრულებული სამუშაო შემცირებული რაოდენობით შეჭქონდა. ყოფილა შემთხვევები, რომ მუშებს ყოველდღიურად ასეთი ანგარიშსწორების შედეგად დაკლებიან სამუშაო ხელფასის 7%².

მეფორნე მუშები მუშაობდნენ დილის ექვსი საათიდან საღამოს ექვს საათამდე. ცუდი ამინდის დროს ნავსადგურში მუშაობა წყდებოდა, ქარხნებში კი — გრძელდებოდა ყოველგვარ ამინდში. თუ ქარხნის მუშები დღიურად ღებულობდნენ 14 შაურთან 1 მანეთამდე, მეფორნე მუშებს, თავიანთი ცხენებით და მთელი ტვირთსაზიდი გამართულობით, ერთ გზაზე 5-დან 6 შაურამდე უწევდათ.

საქართველოს სამრეწველო ცენტრების ფაბრიკა-ქარხნებში ფართოდ იყო გამოყენებული ბავშვებისა და ქალების შრომა. ჯერ კიდევ 1874 წელს ოფიციალურად „კავკაზში“ კი აღნიშნავდა საფაბრიკო-საქარხნო შრომის უარყოფით გავლენას მოზარდ თაობაზე. მანქანური წარმოების ზრდამ კიდევ უფრო გააფართოვა ბავშვთა შრომის გამოყენება ფაბრიკა-ქარხნებში. „ქარხანაში მომუშავე ბავშვის წლოვანება, 8 წლიდან იწყება. უმეტესობა 9—11 წლისაა, შეხედვით ისეთსაც, 4—5 წელიწადია აქ ვმუშაობო, რომ გეტყვით; ტანით 8 წლის ბავშვის ოდენაა, წლოვანებით კი 13—14 წლისაა. უმეტესობას სიცოცხლის ელფერი აღარა აქვს. პირი ჩამოყვითლებული ჩამომჰქნარი აქვთ, თვალები ჩაღრმავებულ-ჩაშავებული, ყურები გათხელებული, ბაგე ჩატეტკილი და ხელფეხი დამწვარივით გატრუსული. ნახავთ იმისთანებსაც, — ორი-სამი თითიც აკლიათ ხელზე მანქანის შემწეობით“³.

არ არსებობდა არავითარი დაზღვევა უბედური შემთხვევის დროს. ქარხანაში მუშაობისას დაზარალებულ მუშას მხოლოდ სასამართლოს წესით შეეძლო მოეთხოვა ფული შრომის უნარის დაკარგვის საკომპენსაციოდ, თუკი შეძლებდა დაემტკიცებინა, რომ მას უბედურება შეემთხვა მანქანისაგან.

მუშები ავადმყოფობის დროს ხელფასს არ ღებულობდნენ. მოკლე-

¹ მლისფა, ფ. 37, საქ. 121.

² იქვე.

³ „კვალი“, 1898, № 41.

ბულნი იყვნენ საეკიმო დახმარებას. „მუშათა ოჯახები (ცოლები, ბავშვები, ნათესავეები) ფაბრიკანტებისათვის არ არსებობენ, ისინი ან თავის ხარჯზე მკურნალობენ, ან სულ არ მკურნალობენ“¹. საეკიმო დახმარება სრულიად არ იყო თვით ქარხნებშიც. ეკიმი იშვიათად გამოჩნდებოდა საწარმოში და მაშინაც, ჩანს, უხეშად ეპყრობოდა ავადმყოფ მუშას².

1902 წლამდე არც კავკასიის და არც საქართველოს სამრეწველო ცენტრებში არ არსებობდა საფაბრიკო-საქარხნო ინსპექცია. ქარხნის ადმინისტრაცია თვითნებურად სჯიდა მუშებს. მუშტიკრივი, ფიზიკური დასჯა ძალზე გავრცელებული იყო. „ოსტატი უდიერად გვექცეოდა ქარგლებს, — ამბობს ადელახანოვის ფეხსაცმლის ფაბრიკის ყოფილი მუშა ალექსი ბეღიაშვილი, — ჩვენი ოსტატი თავის პირად საქმეებზე მუშაობდა. მთელი კვირის განმავლობაში ფაბრიკაში არ მოდიოდა. ერთხელ მე მივეუტანე ჩვენ ოსტატს მისი ქარგლების მიერ გამომუშავებული ხელფასი ასი პანეთი და ვთხოვე — მომეცი ჩემ ჯამაგირში სამი მანეთი, როგორც ცოლშვილის პატრონს, ძალიან მჭირდება-თქო. ოსტატმა პასუხის მაგივრად ასეთი ძლიერი სილა გამაწნა, რომ სისხლი წამსკდა, თანაც მომამაზა — სად არის ფული, აქ კალატოზებს ვერ უსწორდები და შენ ფულს მთხოვო, როგორ გაბედე ფულის მოთხოვაო. ჩემი ოსტატი გამონაკლისი არ იყო. ასევე იქცეოდა მნიშვნელოვანი ნაწილი ოსტატებისა“³.

1900 წლის აგვისტოში თბილისის რკინიგზის სახელოსნოების გაფიცული მუშები ადმინისტრაციისადმი წარდგენილ პეტიციაში ერთ მთავარ მოთხოვნად მუშების ფიზიკური დასჯის მოსპობას აყენებდნენ. მუშები აღნიშნავდნენ: „იმ ხალხს, რომელსაც არაქათი ელევა სახელოსნოებში მძიმე, ჯოჯოხეთური მუშაობით და ღლიურად სამ აბაზზე მეტს ვერ ღებულობს, სცემენ ხშირად ბრიგადირები, ქარხნის ადმინისტრაციის ეს ლაქიები“⁴.

შეგირდების ყოფა-ცხოვრების წარმოსადგენად საყურადღებოა ოფიციალური მოხსენების ცნობები: „ხელფასს შეგირდებს არ აძლევენ. ოსტატები ვალდებული არიან კვებონ შეგირდები, მისცენ მათ ბინა და ტანსაცმელი. როგორც წესი, მოწაფეები ცხოვრობენ ცივსა და ნესტიან სახელოსნოებში, რომელსაც არასდროს არ ათბობენ, წვებიან ცარიელ ატაკზე, იკვებებიან ხმელი პურიით და ისიც არასაკმარისად, ნახევრად მშიერი რჩებიან. ოსტატი ცოტა პურს აძლევს მათ. ამას თუ დავუმატებო ოსტატების და ქარგლების შეგირდებისადმი საძულველ და შეურაცხმყოფელ დამოკიდებულებას, რაც ჩვეულებრივია ამ წრეში, მუშტიკრივსა

¹ მლისფა, ფ. 37, საქ. 121, ფურც. 24.

² იქვე, ფ. 37, საქ. 61.

³ იქვე, ფ. 34, საქ. 450.

⁴ იქვე, ფ. 37, საქ. 61.

და პანდურს უმიზეზოდ, მაშინ გასაგები იქნება ის აუტანელი და მძიმე მდგომარეობა სახელოსნოს შევირდებისა, რომელიც აიძულებს ამ უკანასკნელთ იარონ ერთი ხელოსნიდან მეორე ხელოსანთან ადამიანური მოპყრობის საძიებლად. შევირდებს შინამოსამსახურებლად აქცევენ, რის შედეგად მათ ავიწყდებათ ხელობა“¹.

მუშათა ბინები. კვება. აუტანელი იყო მუშათა საბინაო პირობებიც. საქართველოს სამრეწველო ცენტრების მუშათა მოსახლეობა შეადგენდა მიუსათფარ მასას, რომელიც მოკლებული იყო არა მარტო ჩვეულებრივ ბინებს, არამედ უბრალო თავშესაფარ ადგილებსაც კი. ტყიბულის ქვანახშირის მალაროებში მუშები ცხოვრობდნენ სახელდახელოდ გამართულ კარვებში, სადაც ისინი, რასაკვირველია, მოკლებული იყვნენ ელემენტარულ ჰიგიენურ პირობებს, გარდა იმისა, რომ ზამთრობით აქ სიცივისაგან ითოშებოდნენ.

არც ჭიათურის სამთამადნო მრეწველობის მუშებს ჰქონდათ ბინები და ისინი ცის ქვეშ ათენებდნენ. ჭიათურის სამთამადნო მუშათა საბინაო პირობების შესახებ 1904 წელს „ისკრა“ წერდა: „ჭიათურის შავი ქვის საწარმოებში არავის არ მოეპოვება მუშებისათვის საცხოვრებელი სახლები, რომლებიც მინიმალურად მაინც დაიცავენ ჰიგიენის მოთხოვნებს. მრეწველთა უმეტესობას მუშებისათვის სახლები სულ არა აქვს. ის, რაც არის, ნაჩქარევად გაშენებული ხის ნოტიო, ბნელი და ტალახიანი ფარღალა ბარაკებია, სადაც ზამთარში იმდენად ცივა, რომ არც ერთი მუშა არ დათანხმდება ღამე გაათიოს იქ“².

მეტ-ნაკლებად ასეთივე მდგომარეობა იყო 80—90-იან წლებშიც.

ბათუმის სამრეწველო მუშებიდან თითქმის ვერც ერთი ვერ ახერხებდა ეშოვა ბინა. მუშების ოჯახის უმეტესობა ცხოვრობდა პატარა და ბნელ ოთახებში. უსახსრობის გამო მუშები ბათუმის გარეუბნებში ქირაობდნენ ბინებს, სადაც უკიდურეს ანტიჰიგიენურ პირობებში ცხოვრობდნენ. პატარა ბნელ და იატაკდამპალ ოთახში, რომლის ფართობი არ აღემატებოდა 12 კვ არშინს, თვიურად იხდიდნენ 4—6 მანეთამდე. ასეთ ოთახში თავსლებოდა შვიდ სულამდე³.

ეკონომიის გაწევის მიზნით ერთ ოთახში ხშირად ორი ოჯახი ცხოვრობდა, რომ არაფერი ვთქვათ მარტოხელა მუშებზე, რომლებიც დიდი რაოდენობით იყრიდნენ თავს ერთ ოთახში. მუშების ერთი ნაწილი დაეხეტებოდა დუქნებში, სამიკიტნოებში და ყავახანებში, სადაც ღამის გასათევად თითოეული მათგანი იხდიდა შაურს. ისინი ცარიელ სკამ-ლოჯინზე

¹ „კვალი“, 1898, № 41, მლისფა, ფ. 37, საქ. 27, ფურც. 29.

² «Искра», 1904, № 65.

³ მლისფა, ფ. 37, საქ. 121; «Кавказ», 1898, № 38.

ან იატაკზე წვებოდნენ, აუტანელ მტვერსა და სიბინძურეში ატარებდნენ ღამეებს¹.

„მუშების ბინები (არა საკუთარი, არამედ ნაქირავეები), — წერდა მ. სეგალი ბათუმის მუშების საცხოვრებელი პირობების შესახებ, — ერთ ყაიდაზეა აგებული გრძლად, თხელი ფიცრებისაგან, დაბალჭერიანია და ჩამწყკრივებულია ერთ ან ორ მოპირდაპირე რიგად; ისინი დაყოფილია გალიებივით პატარა ოთახებად. იატაკი, ცალფა თხელი ფიცრებისაგანაა შეკოწიწებული, უმეტეს შემთხვევებში პირდაპირ მიწაზეა დაგებული, რაიმე სავენტილაციო არეს დაუტოვებლად. ვიწრო, პატარა პარმალი, პატარა ფანჯრები, ამოყვანილი ყოველ კართან, ერთადერთი ნიშანია, რომელიც ასეთ ნაგებობას ადამიანის საცხოვრებელს ამსგავსებს და გარეგნულად განასხვავებს თავლისაგან. უმრავლეს შემთხვევაში იატაკი დამპალი აღმოჩნდა, დახვრეტილი და ფარღალაა. სიდამპლისა და მისგან გამოწვეული ნგრევის ნიშნები ემჩნეოდა კედლებსა და ჭერს. ვნახეთ ისეთი საღვომიც, სადაც მიწური იატაკი იყო, მრავალ ადგილს ჩაღრმავებული. ხშირად იატაკი 1/4 არწინზე იყო მიწაში ჩაღრმავებული, რაც, რა თქმა უნდა, შესაძლებელს ხდის ასეთ ბინებში წვიმის წყლის ჩადგომისას. პატარა ფანჯრები, ჩვეულებრივ თითო-თითო თითოეულ ოთახზე, გაქუჩიყიანებული, გაქონილია; ჩამტვრეული მინების მაგივრად აკრულია თხელი ფიცარი, თუნუქი, მუყაო, ანდა ჩვრებიტაა გამოტენილი. ასეთია ხის სახლები, მაგრამ უკეთეს მდგომარეობაში არც ბეტონის ან ხე-აგურის სახლები აღმოჩნდა. აქაც ისეთივეა განლაგება ოთახებისა, რომლებიც უფრო ქვის ყუთებს გვანან; ოთახს ერთი პატარა ფანჯარა აქვს, მაგრამ გვხვდება სულ უფანჯრო ოთახებიც. აი ასეთი სახლებით, ან, უფრო სწორად რაღ ვთქვათ, ქონმახების ქსელით არის მოფენილი მთელი ქალაქი...“².

არანაკლებ მძიმე იყო თბილისის ფაბრიკა-ქარხნების მუშათა საბინაო პირობები: „მუშები ცხოვრობდნენ სარდაფებში, დარაბებში, ქალაქის განაპირა ქუჩყიან და ტალახიან ადგილებში — რკინიგზის გაღალმა მხარეს, ნაძალადევში, ხარფუხში და ავლაბრის განაპირა მხარეს...“³. ტრამვაის მუშები თავლებში ცხენებთან ათევდნენ ღამეს. აგურის ქარხნის მუშები იძულებულნი ხდებოდნენ მეტად დაბალი ხელფასის პირობებში გაეწიათ მძიმე შრომა. ზამთარში ისინი ქარხანაში ცხოვრობდნენ და ამრიგად „უფასო ბინით“ სარგებლობდნენ, ზოლო ზაფხულობით ღია ცის ქვეშ ათენებდნენ ღამეებს. ცუდ ამინდში თავს აფარებდნენ მერცხლის ბუდეებივით ვიწრო და შეხუთულ კარავებს, რომლებსაც არ ჰქონდა იატა-

¹ მლისტვა, ფ. 37, საქ. 121.

² М. Сегаль, Жилища рабочих в г. Батуми и меры оздоровлению их, «Черноморский Вестник», 1902, №119, 120, 121, 122, 123, 125.

³ მლისტვა, ფ. 37, საქ. 27, ფურც. 35.

კი. ზამთრობით წვებოდნენ აგურის ქურებზე ხის ფარდულებში, მტვერში და ყოველგვარი ანაორთქლით გაჟღენთილ ნესტში.

80—90-იან წლებში ჭიათურის სამთამაღნო მრეწველობის და ბათუმის ქარხნის მუშები მთელი დღე წყალზე და პურზე გადადიოდნენ, ხშირად მარტო ცივ მჭაღზე და წყალზე¹.

ზოგიერთ ქარხანასთან მოწყობილი იყო სასადილო მუშებისათვის. ჩვეულებრივად ამ სასადილოებს ქარხნის ადმინისტრაციის ნოქრები განაგებდნენ. მუშას შეეძლო ნისიად ესაღილა, მაგრამ კვირის ან თვის ბოლოს ხოქარი ანგარიშს გაუსწორებდა და მუშას თვიური ზელფასიდან დარჩენილ ორიოდ გროშლა მიუგდებდა².

უპინაობა და საერთოდ უვარგისი ბინები ხდებოდა მიზეზი იმისა, რომ უცოლშვილო მუშების უმეტესობა მუშაობის დამთავრების შემდეგ დახეტილობდა სამიკიტნოებში და ყავახანებში, სადაც ძალაუნებურად უკანასკნელი გროშიც არაყში უნდა გადაეხადა, ან ზაი მაინც მოეთხოვა, რკომ მეღუქნეს გარეთ არ გამოერეკა ისინი³. ასეთ მდგომარეობაში მუშები დასვენების მაგივრად კიდევ უფრო იქანცებოდნენ. დამახასიათებელია ძველი მუშების მოგონებანი თბილისში ქარხნებთან არსებული სასადილოების შესახებ. „ბოზარჯიანცმა, — ამბობს ერთი მუშა, — ერთგვარად ზაგვეტა ფაბრიკაში — იქვე ეზოში გახსნა სასადილო. ქალაქის სასაკლაოზე თითქმის მუქთად აძლევდნენ ჭიგარსა და ნაწლავებს. ამ ჭიგარისაგან გვიკეთებდნენ ბინძურსა და მყრალ საუზმეს — ერთთავად ჭუჭყიანს. რასაკვირველია ძვირად, ფულს ზელფასიდან გვიკავებდნენ“⁴. „ეს სასადილო კი არა, რაღაც საძაგლობა იყო, — ამბობს მეორე მუშა, — ნესტიანი, ბინძური ოთახი. იქვე, სასადილოს გვერდით მოთავსებული იყო ერთიმეორეზე ოთხი საპირფარეშო. საპირფარეშოების სისუფთავეზე არავინ ფიქრობდა. აქედან წარმოსადგენია, თუ როგორი ჰაერი უნდა ყოფილიყო ჩვენს სასადილოში. საღილები მზადდებოდა მყრალი ხორცისაგან, რაღაც ნახშირის მაგვარი, რომლის ჰამა შეუძლებელი იყო. „საღილებში“ ფულის ნაცვლად მუშებს თუნუქის მარკები უნდა ეძლიათ. ეს მარკები მათ უნდა ეყიდნათ კანტორისაგან, წინააღმდეგ შემთხვევაში მთელი დღე მშიერი უნდა დაეღამებიათ. მთელი კვირის განმავლობაში თავისი ნამუშევრის ნახევარზე მეტს მუშები ამ „სასადილოში“ სტოვებდნენ“⁵.

¹ „კვალი“, 1898, № 33.

² «Кавказ», 1898, № 38.

³ М. Сегаль, Жилища рабочих... «Черноморский Вестник», 1902, № 120.

⁴ მლისფა, ფ. 34, საქ. 37, ფურც. 4.

⁵ ი. გ. ჯ, საქ. 107, ფურც. 3.

§ 2. მუშათა პირველი გაფიცვები საქართველოში

ჩვენ ვნახეთ, თუ შრომის რა მძიმე პირობებში მოექცნენ მუშათა მასე-ბი საქართველოში ფაბრიკა-ქარხნების გაჩენიდანვე, რამდენ გაჭირვებას განიცდიდნენ ისინი.

XIX საუკუნის 60-იანი წლებიდან ჩვენს საზოგადოებრივ ცხოვრებაში მომხდარმა ღრმა ცვლილებებმა გადატაკებულ გლეხსა და ქალაქის წვრილ მწარმოებელს მაგარი მუჭლუგუნი ჰკრეს, ისინი ერთ ბანაკში შეკრეეს და თავზე დაასვეს ახალი, უხილავი ბატონი, უფრო სასტიკი და უღმობელი. ქვეყნის ცხოვრებაში საერთოდ ეს იყო მთელი პროცესი, ზოგან სწრაფი თავისი ღრმა ტკივილებით, ზოგან ნელი და სუსტი. ბურჟუაზიული ურთი-ერთობის ზრდით განპირობებულმა ამ პროცესმა თავიდანვე აღძრა და გზა მისცა იმ მოძრაობას, რომელიც, როგორც მუშათა კლასის ბრძოლა ბურ-ჟუაზიის წინააღმდეგ, კარგახანს ჩვენი საზოგადოებრივი აზროვნების ყუ-რადღების გარეშე რჩებოდა.

მუშათა კლასმა საქართველოში 70-იანი წლებიდანვე განიცადა კაპი-ტალისტური ექსპლოატაციის მთელი სიმკაცრე.

70-იანი წლების დასაწყისში მუშათა მოძრაობა იწყება რუსეთშიც. გაფიცვის პირველივე შემთხვევის გამო მთავრობამ მთელი თავისი აპარ-ტი დარაზმა მუშათა მოძრაობის წინააღმდეგ. 1870 წლის 6 ივლისის შინაგან საქმეთა სამინისტრო კავკასიის უმაღლეს მმართველობას ნევის ბამბის საქსოვი ფაბრიკის მუშათა გაფიცვის გამო წერდა: „მიმდინარე წლის დასაწყისში პეტერბურგის ახლო მდებარე ერთ უდიდეს ფაბრიკაში მომუშავე მუშები გაიფიცნენ იმ მიზნით, რომ ფაბრიკის მეპატრონეს მოემატებინა მათთვის ხელფასი...“¹. ამასვე სწერდა სრულიად საიდუმ-ლოდ და ცირკულარულად მისი იმპერატორობითი უმაღლესობის კანცე-ლარიის მესამე განყოფილება თბილისის გუბერნიის ჟანდარმთა სამმართველოს უფროსს.

საფაბრიკო-საქარხნო ცხოვრებას საქართველოში თავიდანვე დაჰყვა მუშათა გაფიცვები. ჯერ კიდევ 1869 წელს ადგილი ჰქონდა გაფიცვებს თბილისის სამხედრო არსენალში. მთავრობამ ამ გაფიცვებს საწარმოდან მუშების დათხოვნით უპასუხა. ყველა შენიშნული და გაფიცვაში მონაწი-ლე მუშა დაითხოვეს².

ორი წელიწადი არ იყო გასული მირზოევის ფაბრიკის ამუშავეებიდან, რომ 1872 წელს იქ გაფიცვამ იფეთქა. ამ გაფიცვის შესახებ ვაზეთი „დროება“ გადმოგვცემს: „აპრილის პირველს, საღამოზე, ფულის დარი-გების დროს, ფაბრიკაში გამოუცხადებიათ, რომ თითო თოფის ქსოვაზე

¹ შლისტა, ფ. 37, საქ. № 24.

² შ. ჩოღრიშვილი, ჩემი თავგადასავალი, თბ., 1927, გვ. 77—78.

ორ-ორ შაურს დაგიკლებთო. ეს იმას ნიშნავს, რომ ორი ან სამი აბაზის მაგივრად მიეცემათ ექვსი ან ათი შაური (თოფზე ორი-სამი აბაზი ყოფილა აღრე). ძაშინ ხმა არ ამოუღიათ მუშებს. სამ აპრილს, დილით, მუშები რომ მოგროვილან, ერთად გამოსულან ფაბრიკიდან. „პრიკაზნიკების“ რჩევისათვის ყური არ უგდიათ: ყველა იმას იძახოდა — „არ ვიმუშავებთ, ერთ ლუკმა-პურს სხვაგანაც ვიშოვით“¹.

მირზოევის ფაბრიკაში 1872 წელს 500 მუშა იყო ჩაბმული. ხელფასის შემცირების გამო მუშების მიერ სამუშაოს ერთობლივად მიტოვება, უექველია, მათ წინასწარ შეთანხმებას გულისხმობს. ჩანს, მუშები ორი დღის განმავლობაში აწარმოებდნენ მოლაპარაკებას და ფაბრიკის აღმინისტრაციისაგან მოითხოვდნენ ხელფასის აღდგენას და 3 აპრილს, როცა ფაბრიკის მმართველმა უარით უპასუხა მათ მოთხოვნას², მუშებმა ფაბრიკა მიატოვეს. მუშაობა შეწყდა.

მაგრამ გაფიცულთა ნაწილი ისევ დაბრუნებია სამუშაოს, და თუმცა მუშებმა მარცხი განიცადეს და ხელფასის აღდგენას ვერ მიაღწიეს, მაგრამ ფაბრიკასაც დიდი ზარალი მოუვიდა: რამდენიმე კვირას წარმოება სანახევროდ შეწყდა.

მირზოევის ფაბრიკაში შემდეგ წლებშიც ხდებოდა გაფიცვები ხელფასის გამო. მეფაბრიკე შეპირებული დღიური ხელფასით იზიდავდა მუშებს და, როცა ისინი ძუშაობას შეუდგებოდნენ, ხელფასს უკლებდა. 1876—1877 წლებში ასობით მუშა ტოვებდა მირზოევის ფაბრიკას. მეფაბრიკე თავისი ნოქრებით უძლური იყო მოესყიდა გაფიცული მუშები, როცა ეს უკანასკნელნი კოლექტიურად მოითხოვდნენ დაპირებული ხელფასის მიცემას. „ტიფლისსკი ვესტნიკი“ 1877 წლის 19 იანვარს მირზოევის ფაბრიკის შესახებ წერდა: „გუშინ, 17 იანვარს, მირზოევის ფაბრიკაში მუშაობა შეწყდა, რადგან მუშებმა ვერ მიიღეს დაპირებული მომატება — თითო თოფ (31 არშინ) ნარმაზე ერთი შაური“³. უფრო გვიან, მაისში „ივერია“ წერდა: „შარშან უფ. მირზოევმა ვითომც საქმის გამოკეთებისათვის რუსეთიდან ას ოცი კაცი ქარხნის მუშები მოიყვანა. 1—2 თვის შემდეგ ამათ ისეთი დღე დაადგათ, რომ უკანვე დააპირეს წასვლა და როდესაც უფ. მირზოევმა გზის ხარჯი არ მისცა, უმაღლეს მთავრობას მიმართეს და მთავრობამ ეს მუშები თავის ჭარჯით გაისტუმრა და შემდეგ, რასაკვირველია, ქარხნის პატრონს სამაგიერო გადაახდევინა“⁴.

მირზოევის ფაბრიკაში მუშათა ხშირ ღენას ჰქონდა ადგილი და ამიტომ ძნელდებოდა კონტაქტი მუშათა შორის. ხელმძღვანელობის გარეშე

¹ „დროება“, 1872, № 15, გვ. 2.

² იქვე.

³ «Тифлисский Вестник», 1877, № 13.

⁴ „ივერია“, 1877, № 13.

სტიქიურად წარმოქმნილი გაფიცვები ამ ფაბრიკაში მუშათა დამარცხებით მთავრდებოდა. საგულისხმოა, რომ მეფაბრიკე არც ადგილობრივ მთავრობას იშველიებდა მუშათა გაფიცვების ჩასაქრობად და არც პოლიციას რევდა ამ საქმეში. ეს მდგომარეობა იმით აიხსნება, რომ მუშებს მუშათა მოძრაობის დაბალ საფეხურზე, როცა ისინი არ იყვნენ შეკავშირებულინი, არ ჰქონდათ ორგანიზაცია და არ შეეძლოთ ერთობლივი ინტენსიური ბრძოლა, ჩვეულებრივად სჭრიდა მეფაბრიკის ისეთი ფანდები, როგორც იყო მოფერება და დაყვავება, ხელფასის მომატებისა და სხვა მოთხოვნათა დაკმაყოფილების შეპირება. „უფ. მირზოევი, — წერდა „დროება“, — ხშირად თურმე არიგებს მუშებს და ეუბნება, რომ ეს ფაბრიკა საწყალი ხალხისათვის გაემართეო, რომ ლუკმა პური მოიპოვოთ... ნოქრებიც სულ იმას ჩასჩიჩინებდნენ მუშებს, რომ ლუკმა პურს ეს ფაბრიკა გაჰმევთო“¹. ასევე არიგებდა მუშებს მირზოევის ფაბრიკის მმართველი, რომელიც „მამაშვილურად“ მიმართავდა მათ, როცა უკვე მუშებს შეწყვეტილი ჰქონდათ მუშაობა და ხელფასის აღდგენას თხოულობდნენ. „სხვადასხვა დარიგება მიუცია მმართველს მუშებისათვის, ჩვეულებისამებრ როგორც ადრეცა სცოდნია“², — წერს „დროება“. მუშებსაც სჯეროდათ ამ „მამაშვილობისა“ და უბრუნდებოდნენ ფაბრიკას, თუკი შაურს მოუმატებდა მეფაბრიკე დაკლებული აბაზის ნაცვლად.

1877 წ. სექტემბერში თბილისში ზეიცერის ფაბრიკის მუშა-შეგირდები გაიფიცნენ. შეგირდებმა, როგორც ამას გაფიცვის მომსწრე მიხ. ჩოღრიშვილი გვიამბობს, ფაბრიკის პატრონს ასეთი მოთხოვნები წარუდგინა: 1. თითოეულ შეგირდს ყოველდღიურად მიეცეს პურის ფულად აბაზიდან ექვს შაურამდე. 2. თითოეულ შეგირდს ეძლეოდეს ტანისამოსის ფულად ორი მანეთი და ათი შაური თვეში; 3. აიკრძალოს კვირა-უქმე დღეებში მუშაობა; 4. ნება დაერთოს შეგირდებს თავისუფალ დროს ჟურნალ-გაზეთები იკითხოთ.

გაფიცვამ 3 კვირას გასტანა და მუშების გამარჯვებით დამთავრდა. მეფაბრიკე იძულებული გახდა მუშა-შეგირდების ყველა ეს მოთხოვნა დაეკმაყოფილებინა³.

გაფიცვის მომზადებასა და ჩატარებაში დიდი როლი შეასრულა მუშა-ხელოსანთა კავშირმა, რომლის აქტიურმა და მოწინავე წარმომადგენლებმა არა მარტო თავიანთი აგიტაციის გავლენის ქვეშ მოაქციეს შეგირდები, არამედ გარკვეული მიმართულებაც მისცეს მათ მოთხოვნებს⁴.

1878 წლის თებერვალში ზეიცერის ფაბრიკაში იფეთქა მეორე, უფრო

¹ „დროება“, 1872, № 15, გვ. 2.

² იქვე.

³ მ. ჩოღრიშვილი, ჩემი თავდასახვალი, თბ., 1927, გვ. 82.

⁴ იქვე.

დიდმა გაფიცვამ. „ამ წელს, — წერს მ. ჩოდრიშვილი, — ზეიცერს დიდძალი საქმეები ჰქონდა შეკვეთილი როგორც სახელმწიფო, ისე კერძო პირთაგან. განსაკუთრებით სახელმწიფო შეკვეთებს ძალიან აჩქარებდნენ. ამ ღროს რუსეთს ოსმალეთთან ომი ჰქონდა, მეფაბრიკეც ცდილობდა რათა მუშებს ხანგრძლივით ემუშავნათ, შეკვეთები ჩქარა ჩაებარებინათ. ამიტომ სამუშაო ღროს ერთი საათი მოუმატა. თუ წინად მუშა დღეში 15 საათს მუშაობდა, ეხლა სამუშაო ღრო 16 საათი გაუხდა, ხელფასი კი ისევ ძველი დაუტოვა. ამასთან, თუ წინათ დილით 5 საათზე იწყებოდა მუშაობა და საღამოს 8 საათზე თავდებოდა, ეხლა ოთხ საათზე იწყებოდა და საღამოს 8 საათზე თავდებოდა... დილის ოთხი საათიდან საღამოს 8 საათამდე უნდა ემუშავნათ. ამ 15—16 საათში მხოლოდ ერთი საათი იყო დასვენება, რაც მეტად ძვირე და აუტანელი ხდებოდა მუშებისათვის. სწორედ მიზეზიც ეს იყო, რომ 15 თებერვალს, 1878 წელს ზეიცერის ფაბრიკის მუშებმა საერთო გაფიცვა გამოავაცხადეთ“¹.

გაფიცვაში მონაწილეობას ღებულობდა ფაბრიკის ყველა მუშა. მას ხელმძღვანელობდა მუშა-ხელოსანთა კავშირი. მეფაბრიკეს წარედგინა შემდეგი მოთხოვნები: 1. ძველებურად დარჩეს სამუშაო ღრო — დილის 5 საათიდან საღამოს 8 საათამდე. ამ სამუშაო ღროში შედიოდეს დასვენება საუზმისათვის — ნახევარი საათი, საღილისათვის — 1,5 საათი; 2. დღიური ხელფასი გადიდდეს მანეთ ნახევრამდე; 3. ნარჯად მომუშავეს 20% მოემატოს; 4. წარმოებდეს მუშაობის აღრიცხვა საანგარიშო წიგნაკებით.

მეფაბრიკემ გაფიცული მუშების წინააღმდეგ პოლიციას მიმართა. ოთხი მეთაური მუშა დააპატიმრეს. გაფიცვა მაინც გაგრძელდა, თუმცა 70 მუშა ჩამოსცილდა გაფიცულ ამხანაგებს და ისევ დაუბრუნდა სამუშაოს. საყურადღებოა, რომ ოცდაათმა მუშამ, რომლებმაც ბრძოლაზე ხელი არ აიღეს, იმდენი იღონა, რომ აიძულა ის 70 კაცი კვლავ გაფიცულებს შეერთებოლნენ. ახლა უფრო მეტად იგრძნეს მეფაბრიკემ და მთავრობამ მუშების ძალა; მუშები მოითხოვდნენ დაპატიმრებული ამხანაგების განთავისუფლებას. ფაბრიკანტი იძულებული გახდა დაეთმო, მუშათა თითქმის ყველა მოთხოვნა დააკმაყოფილა. სამუშაო ღრო დაყვანილ იქნა 14 საათამდე. დაპატიმრებული მეთაურები გაათავისუფლეს, თუმცა ისინი ფაბრიკიდან დაითხოვეს².

ამრიგად, გაფიცვა დამთავრდა მუშათა გამარჯვებით. ამ მოვლენას არ შეიძლება გადავწყვიტოთ არ მოეხდინა სხვა ფაბრიკა-ქარხნების მუშებზე. უკმაყოფილების თესლი მათში შეიძლება გადავრევივინათ იმ მუშებსაც, რომლებიც ზეიცერის ფაბრიკაში აღარ დაუშვეს და სხვა საწარმოებში გადავიდნენ³.

¹ მ. ჩოდრიშვილი, ჩემი თავდასაჯალი, თბ., 1927, გვ. 83.

² იქვე, გვ. 83—86.

³ იქვე, გვ. 86—87.

1886 წელს გაიფიცნენ თბილისის რკინიგზის სახელოსნოების მუშები. გაფიცვამ იფეთქა სტიქიურად და გაგრძელდა სამი დღე. იგი გამოიწვია ხელფასის შემცირებამ და ოსტატების თავგასულობამ. მომდევნო წლის თებერვალში კვლავ გაიფიცნენ ამ სახელოსნოების მუშები. გაფიცვა გამოიწვია სამუშაო დროის გადიდება, რასაც თან დაერთო მუშათა საერთო უკმაყოფილება სახელოსნოებში გაბატონებული უწესრიგობისა და ადმინისტრაციის თვითნებობის გამო.

თბილისის რკინიგზის სახელოსნოებში მიღებული წესის თანახმად, შაბათობით მუშაობა ხუთ საათზე მთავრდებოდა, დანარჩენ დღეებში კი 5 საათსა და 30 წუთამდე გრძელდებოდა. 1887 წლის 14 თებერვლიდან ადმინისტრაციამ სცადა დაერღვია ეს წესი და სავალდებულოდ გაეხადა მუშებს შაბათობითაც ექვსის ნახევრამდე ემუშავნათ. ადმინისტრაციის დადგენილებას მუშები არ დაემორჩილნენ; არც საამქროების მოსყიდული ოსტატების მუქარამ გასჭრა. 14 და 21 თებერვალს მუშაობა წინანდებურად 5 საათზე შეწყდა. ადმინისტრაციის დაბეჯითებით მოთხოვნას, თვითნებურად არ მიეტოვებიათ სამუშაო და ეცნოთ ახალი წესი, მუშებმა გაფიცვით უპასუხეს.

28 თებერვალს, დილით 1000 მუშამ დატოვა სახელოსნოები და გაემართა რკინიგზის სამმართველოსაკენ. პოლიციამ ვერ შეძლო შეეკავებინა აღელვებული მუშები, რომლებიც სრულ წესრიგს იცავდნენ მოძრაობისას და „არავის არ აყენებდნენ შეურაცხყოფას არც სიტყვით, არც მოქმედებით“¹.

გაფიცულ მუშათა წარმომადგენლებმა რკინიგზის სამმართველოს წერილობით წარუდგინეს 9 მუხლად ჩამოყალიბებული მოთხოვნები: 1. შაბათობით მუშაობა წარმოებდეს მხოლოდ 5 საათამდის; 2. ხელფასის დარიგების დღე მუშებს ეთვლებოდეს მთელ და არა ნახევარ სამუშაო დღედ; 3. დაწესდეს რკინიგზის სამმართველოს მიერ დამტკიცებული ერთიანი ტარიფი სანარდო სამუშაოებზე ყველა საამქროსათვის; 4. იძულებითი ზომები არ იქნეს დაშვებული სანარდო მუშაობისათვის; 5. სამუშაოზე დაგვიანებისათვის არ იქნენ დაჯარიმებული ძუშები; 6. გაუქმდეს სხვადასხვა უბრალო შემთხვევით გამოწვეული ჭარიმები; 7. მიეცეთ დახმარება ხაშურის რკინიგზის სახელოსნოებიდან თბილისში გადმოყვანილ მუშებს; 8. ამ მოთხოვნების შედეგი გამოიკრას ცნობად თბილისის რკინიგზის სახელოსნოებში, ხოლო ეს შედეგი დაჩქარდეს; 9. დღევანდელი დღე — 28 თებერვალი — ჩაგვეთვალოს სრულ სამუშაო დღედ².

¹ მლისფა, ფ. 37, საქ. 34, საქართველოს გუბერნატორის მოხსენება კავკასიის საზოქალაქო მმართველობის უფროსისადმი.

² იქვე, ფ. 37, საქ. 34, ფურც. 2.

სახელოსნოების ადმინისტრაციას უკვე მიეღო ზომები და იმ ღროს, როცა სამმართველო ეცნობოდა გაფიცულ მუშათა ამ მოთხოვნებს, იქვე გაჩნდა პოლიცია და ჟანდარმერია კაზაკთა რაზმით¹. მათ სცადეს დაერწმუნებინათ მუშები, რომ ისინი ცუდებოდნენ, რომ გონიერება მოითხოვდა დაბრუნებოდნენ სამუშაოს, მაგრამ ხელისუფლების წარმომადგენლებმა მიზანს ვერ მიაღწიეს. მუშები მტკიცედ იცავდნენ თავიანთ მოთხოვნებს. პირველი და ორი მარტი უქმე დღეები იყო. 3 მარტს საყვირის ხმაზე მუშები გამოცხადდნენ სამუშაოზე, მაგრამ სახელოსნოებში არ შევიდნენ, შეგროვდნენ ეზოში. სასწრაფოდ იქ გაჩნდნენ გუბერნატორი, ჟანდარმთა სამმართველოს უფროსი და სხვ. გაფიცულებს აღუთქვეს, რომ პეტერბურგიდან გამოთხოვილი იქნებოდა ტარიფი, რომლის მიხედვით შეფასდებოდა ყველა სანარღო სამუშაო. არც ამ განმარტებას უმოქმედნია მუშებზე. ისინი აღარ დაუბრუნდნენ წარმოებას და განაგრძეს ჯგუფ-ჯგუფად შეკრება სახელოსნოების ეზოში. 4 მარტს სახელოსნოებს იცავდა საპოლიციო ჯარი. მუშებს სამუშაოზე დაბრუნება მოსთხოვეს, წინააღმდეგ შემთხვევაში საწარმოდან გაგდებით დაემუქრნენ.

სახელოსნოების ადმინისტრაცია იძულებული გახდა ნაწილობრივ დათმობაზე წასულიყო. მან ხელახლა შეადგინა საპასუხო განცხადება მუშათა მოთხოვნებზე. თბილისის გუბერნატორი აღნიშნავს: „მას შემდეგ, რაც მე გამოვეუცხადე მუშებს მათი მოთხოვნების ახლად შედგენილი პასუხი, მუშებმა დაკმაყოფილებულად ჩათვალეს თავი, შეგვიპირდნენ მუშაობის განახლებას“².

აშკარაა, რომ ეს ახალი პასუხი მხოლოდ დაპირება იყო. ადმინისტრაციამ აღუთქვა მუშებს, რომ იგი შეიმუშავებდა ტარიფს სანარღო სამუშაოებზე, მას შემდეგ რაც ამ ტარიფს მიიღებდა პეტერბურგიდან; მაგრამ სამმართველოს უფროსის მოხსენებაში აღნიშნულია, რომ ტარიფი თვით ალექსანდროვის ქარხანაშიც (პეტერბურგი) არ არის დაწესებული³. ადმინისტრაციის ეს პასუხიც რომ არ აკმაყოფილებდა მუშებს, იქიდანაც ჩანს, რომ მეორე დღეს, 4 მარტს, სახელოსნოებს პოლიცია იცავდა და მუშებს სათითაოდ, სათანადო გაჩხრეკისა და პირობის ჩამორთმევის შემდეგ, უშვებდნენ სამუშაოდ. 30-მა მუშამ უარი თქვა დაბრუნებოდა სამუშაოს⁴.

ასე დამთავრდა თბილისის რკინიგზის სახელოსნოს მუშების გაფიცვა.

¹ მლისფა, ფ. 37, საქ. 34, ფურც. 5—11, ამიერკავკასიის რკინიგზის სამმართველოს უფროსის მოხსენება გზათა სამინისტროს რკინიგზების დეპარტამენტისადმი.

² იქვე, გუბერნატორის მოხსენება, ფურც. 3.

³ იქვე, რკინიგზის სამმართველოს უფროსის მოხსენება.

⁴ იქვე, ფურც. 6.

რომელმაც 28 თებერვლიდან 4 მარტამდე გასტანა. მუშებმა, მართალია, მარცხი განიცადეს, მაგრამ მთავრობამაც იგრძნო მათი ძალა და შეეცადა უკმაყოფილების მიზეზი დაბალ მოხელეებზე გადაეტანა. თბილისის გუბერნიის უფროსი თავის მოხსენებაში კავკასიის მთავარმართებლისადმი ამ გაფიცვის გამო წერდა: „ვაცნობებ რა ზემოთქმულს თქვენს მაღალკეთილშობილებას, მოგახსენებთ, რომ, როგორც გამოირკვა, თბილისის რკინიგზის სახელოსნოს მუშების უკმაყოფილების უმთავრესი და ერთადერთი მიზეზი იყო ის გარემოება, რომ სანარლო სამუშაოს გაანგარიშება ხდება არა დაწესებული ნიხრის მიხედვით, არამედ რკინიგზის ხელისუფალთა შეხედულებით. მუშებმა ამჟამად თანხმობა გამოაცხადეს განაგრძონ მუშაობა, მაგრამ რადგან სანარლო სამუშაოებისათვის მათი დაკმაყოფილების წესი წინანდელი რჩება, საფუძველი გვაქვს ვიფიქროთ, რომ პირველივე გაუგებრობისთანავე ის უწყობიანი, რომელთაც ადგილი ჰქონდათ 27, 28 თებერვალს და 3 მარტს, შეიძლება კვლავ განმეორდნენ და ამასთან ისე გართულდნენ, რომ მათ დანაშაულებრივი ხასიათი მიეცეს. ასეთი მოვლენების აღსაკვეთად საჭიროდ მიმაჩნია, რომ გზათა სამინისტრომ დაავალდებულოს ამიერკავკასიის რკინიგზის ადმინისტრაციას, რათა მან უმოკლეს დროში გამოიმუშაოს და თბილისის სახელოსნოში დააწესოს ნიხრი სანარლო სამუშაოზე და ამით თავიდან აიცილოს შესაძლებელი თვითნებობა რკინიგზის სამმართველოს მხრივ და, მეორე მხრივ, მუშების სამართლიანი საყვედური“¹.

მაგრამ მთავრობა ხედავდა უკმაყოფილების გაღრმავების სხვა მიზეზსაც, რომლის საწინააღმდეგოდ არ აყოვნებდა ზომების მიღებას. იგი ითვალისწინებდა, კერძოდ, მოსული ელემენტის „უარყოფით“ გავლენას მუშებზე და ცდილობდა მისი იზოლაციით შეენელებინა საერთო მღელვარება, მაგრამ ცალკე მუშების იზოლაცია უფრო ზრდიდა მუშათა მღელვარებას და მოძრაობას. გაფიცვის მიზეზები, რასაკვირველია, უფრო ღრმა იყო, ვინემ ეს ადგილობრივ მთავრობას ჰქონდა. წარმოდგენილი, და პოლიციურ ზომებს უკვე აღარ შეეძლო შეენელებინა მუშების ბრძოლა, რადგან, როგორც თვით მთავრობის წარმომადგენლები აღიარებდნენ, „მუშები ისედაც უკმაყოფილონი იყვნენ თავიანთი მატერიალური მდგომარეობით“².

1887 წლის 16 ივნისს თბილისის რკინიგზის სახელოსნოების მუშებმა კვლავ მოაწყეს გაფიცვა. მთავრობამ სამხედრო ზომებით ჩააქრო იგი.

1889 წლიდან უფრო დიდი მასშტაბით იწყება გაფიცვები თბილისის

¹ მოსხვა, ფ. 37, საქ. 34, ფურც. 3—4; თბილისის გუბერნატორის მოხსენება.

² იქვე, ფურც. 10—11.

რკინიგზის სახელოსნოებში. ამ წლის აგვისტოდან ამიერკავკასიის რკინიგზა თავისი სახელოსნოებით გადაეცა ხაზინას და გაუქმდა ყველა ის შეღავათი, რომლითაც მანამდე სარგებლობდნენ მუშები. მათ მოესპოთ უფასო. მგზავრობა, დახმარება ავადმყოფობის დროს, უქმე დღეები, გარდაკვირისა (თვე ითვლებოდა 25 სამუშაო დღის მიხედვით) გაუქმდა დამატებითი სამუშაოების ხელფასი. ამ ცვლილებებმა დიდი უკმაყოფილება გამოიწვია მუშებში¹. მათ პირველ ხანებში არ სჯეროდათ, რომ მართლა ესპობოდათ წინანდელი შეღავათები. ამიტომ დასაწყისში ისინი განმარტების ძიებით დაკმაყოფილდნენ და მთავრობისაგან ელოდნენ დადებით პასუხს. მაგრამ, როცა პასუხი ამოიკითხეს თვით სახელოსნოებში გაკრულ განცხადებებში და გაიცნეს ახალი წესები, რომლებითაც თავიანთ შეღავათებს კარგავდნენ, საერთო გაფიცვა მოაწყვეს. თორმეტ ოქტომბერს სახელოსნოებში მუშაობა შეწყდა. ათასამდე მუშა გამოვიდა და დემონსტრაციულად იწყო სვლა ქუჩებში. ამასთანავე მათ მოასწრეს წარმომადგენლების არჩევა და დაავალეს დაეცვათ გაფიცული მუშების მოთხოვნები — აღდგენილი ყოფილიყო შეღავათები, რომელთაც მთავრობა აუქმებდა².

ადგილობრივმა მთავრობამ ჯარის საშუალებით გარეკა დემონსტრანტი მუშები, ხოლო სახელოსნოებს მცველად პოლიცია და ეანდარმთარაზში ჩაუყენა. მუშები წვილ-წამოვიდნენ. მიუხედავად იმისა, რომ შეკრების საშუალებას არ აძლევდნენ, მათ მაინც მტკიცედ ეჭირათ თავი და სამუშაოზე არ ცხადდებოდნენ. გაფიცვამ 28 ოქტომბრამდე გასტანა. გაძლიერებული რეპრესიებით მთავრობამ შეძლო მუშები დაებრუნებინა სამუშაოზე. გაფიცვის ყველა მეთაური დააპატიმრეს და მეტეხის ციხეში საიდუმლო კამერებში ჩასვეს.

საგულისხმოა, რომ გაფიცვის მარცხს მთავრობა მაინც არ სთვლიდა თავის გამარჯვებად და შიშობდა, რომ მუშათა მოთხოვნებზე უარის თქმა მალე ახალ უფრო სერიოზულ გაფიცვებს გამოიწვევდა.

მართლაც, 1898 წელს იფეთქა მუშათა გაფიცვებმა რკინიგზის დეპოსა და სახელოსნოებში. ეს იყო უფრო სერიოზული შეტევა. ამ დროიდან მუშათა მოძრაობას საქართველოში სოციალ-დემოკრატიული ორგანიზაცია უღებოდა სათავეში. გაფიცულთა მოთხოვნები ჩამოყალიბებული იყო პროკლამაციის სახით, სადაც უბრალოდ კი არ იყო ჩამოთვლილი, რას მოითხოვენ მებრძოლი მუშები, არამედ მკაცრად იყო დაგმობილი აღმინისტრაციის უხეში ღონისძიებანი. ასეთი პროკლამაციები არალეგალურად ვრცელდებოდა. მოწინავე მუშები მოხერხებულად გააკრავდნენ

¹ მლოსფა, ფ. 37, საქ. 34, ფურც. 24.

² იქვე.

ხოლმე პროკლამაციებს ქარხნის ადმინისტრაციის შენობის კარებზე, ქუჩაში ბოძებზე და ა. შ.

1898 წლის დეკემბრის გაფიცვის დროს პროკლამაციებს არალეგალურად ავრცელებდნენ გამოცდილი კონსპირატორები, ცნობილი მუშარევოლუციონერები სერგი ალილუევი და გიგო ლელაშვილი. სწორედ ამ საქმის გამო იყვნენ ისინი მიცემულნი პასუხისგებაში.

ეს იყო გარდატეხის ხანა საქართველოს მუშათა მოძრაობის ისტორიაში. ქართველი და რუსი მოწინავე მუშების კლასობრივი ბრძოლის ინტერნაციონალური ხასიათი განაპირობებდა რევოლუციური მოძრაობის შემდგომ აღმავლობას.

§ 1. საქალაქო თვითმმართველობანი 1875—1905 წწ.

1870 წლის საქალაქო დებულება, როგორც აღნიშნული იყო, გატარდა თბილისში, ქუთაისში, გორში, ახალციხეში, ფოთსა და ბათუმში. ამ ქალაქებმა მიიღეს თვითმმართველობა. მართალია, თვითმმართველობის უფლება ენიჭებოდა ქალაქის არა მთელ მოსახლეობას, არამედ მხოლოდ ზედაფენას და, ამდენად, თვითმმართველობანი ბურჟუაზიის ბატონობის ორგანოებად გადაიქცნენ, მაგრამ საქალაქო რეფორმას მაინც პროგრესული მნიშვნელობა ჰქონდა. იგი ერთ-ერთი მნიშვნელოვანი მომენტი იყო ფეოდალურიდან კაპიტალისტურ ფორმაციაზე გადასვლის პროცესში.

რეფორმის გატარებისას თბილისში საარჩევნო ხმის უფლება მიენიჭა 4 494 კაცს (მოსახლეობის 4—5%-ს). პირველი თანრიგის ამომრჩეველთა სიაში შეტანილ იქნა 45, მეორეში — 221, ხოლო მესამეში — 4 228 კაცი¹. ყოველი თანრიგი ირჩევდა 24 ხმოსანს. პირველი თანრიგის ცენზიან მოქალაქეებს სათათბიროში გაჰყავდათ ყოველ ორ ამომრჩეველზე ერთი, მეორე თანრიგის მოქალაქეებს — ყოველ 9 ამომრჩეველზე ერთი, მესამე თანრიგის მოქალაქეებს — ყოველ 176 ამომრჩეველზე ერთი ხმოსანი. ამდენად, თბილისის სათათბიროსა და საერთოდ თვითმმართველობაში გაბატონებული იყო მსხვილი და საშუალო ბურჟუაზია. წერილი ბურჟუაზია უმცირესობაში იმყოფებოდა.

თითქმის ასეთივე იყო შეფარდება, ერთი მხრივ, ცენზიან და უცენზო მცხოვრებთა, ხოლო, მეორე მხრივ, პირველი ორი თანრიგისა და მესამე თანრიგის ამომრჩეველებს შორის საქართველოს სხვა ქალაქებშიც. მაგალითად, 1880 წელს ახალციხის ამომრჩეველთა პირველ თანრიგში ითვლებოდა 20, მეორეში — 80, მესამეში კი 425 კაცი². 1889 წ. გორის ამომრჩეველთა სიაში შეტანილი იყო პირველი თანრიგიდან ათიოდე კაცი, მეო-

¹ სსცია, ფ. 192, ანაწ. 5, საქ. 308, ფურც. 1—62.

² იქვე, ფ. 17, ანაწ. 1, საქ. 479, ფურც. 23—26.

რედან — 72, ხოლო მესამე თანრიგიდან — 300-ზე ოდნავ მეტი¹. იმავე ხანებისათვის ქუთაისში ითვლებოდა 25—30 პირველი თანრიგის, 60—70 მეორე თანრიგის და 600—700 მესამე თანრიგის ამომრჩეველი².

ქალაქის მოსახლეობის სხვადასხვა ფენა მტრულად უპირისპირდებოდა ერთმანეთს. ყოველი მათგანი, ცდილობდა თვითმმართველობაში გაბატონებას და ამ დაწესებულების თავის ინტერესებისათვის გამოყენებას. საქალაქო სათათბიროები, გამგეობები და ქალაქის თავები უმეტესწილად მოსახლეობის ზედაფენების ინტერესებს გამოხატავდნენ და იცავდნენ. ქალაქის მოსახლეობის დაბალი მასა კი, არსებული საარჩევნო სისტემის პირობებში, თავის წარმომადგენელთა სათათბიროში გაყვანას იშვიათად ახერხებდა.

საქალაქო თვითმმართველობები თანდათან მეტ როლს ასრულებდნენ საზოგადოებრივ-პოლიტიკურ ცხოვრებაში. ამის კვალობაზე თანდათან მწვავედებოდა ბრძოლა მოსახლეობის სხვადასხვა ფენას შორის თვითმმართველობაში გაბატონებისათვის. იმის გამო, რომ საქართველოს ქალაქების მოსახლეობა მრავალეროვნული იყო, კლასობრივ და შინაკლასობრივ ბრძოლას ნაციონალური ელფერი ჰქონდა.

1889 წ. მთავარმმართველისათვის მიცემულ თხოვნაში ახალციხის ცენზიან მოქალაქეთა ერთი ჯგუფი წერდა, რომ თვითმმართველობის შემოღებამ ჩვენი მდგომარეობა გააუარესაო. ამის მიზეზი კი ისაა, რომ თვითმმართველობის ყველა დაწესებულება თავიდანვე ვაჭართა ერთმა ნაწილმა ჩაიგდო ხელთ და ქალაქის ხაზინას თვითნებურად განაგებსო. აღნიშნული პარტია მხოლოდ სომეხი გრიგორიანელებისაგან შედგება და ყოველხანად ცდილობს ქალაქის მართვა-გამგეობაში არ დაუშვას სხვა ერებისა და სარწმუნოების წარმომადგენლები. იმის გამო, რომ გამგეობაში სომეხები არიან გაბატონებული, არასომეხთა უბრალო თიხით აგებული ქოხი 3—4-ჯერ მეტად ფასდება, ვინემ სომეხთაგან აშენებული ქვიტკირის სახლები. ასეთი პოლიტიკის პირობებში საგადასახადო ტვირთის მთელი სიმძიმე მართლმადიდებლებსა და კათოლიკებს აწევს, სომეხი გრიგორიანელები კი, რომელნიც მოსახლეობის ორ მესამედს შეადგენენ და თანაც გაცილებით მდიდრები არიან, შედარებით მსუბუქად იბეგრებიანო.

ასეთი უსამართლობით აღშფოთებულა ახალციხელი მართლმადიდებლები და კათოლიკენი მოითხოვდნენ საქალაქო დებულების იგვერად შეცვლას, რომ მოსახლეობის ყოველ ეროვნულ-რელიგიურ ჯგუფს შესაფერისი ადგილი მისცემოდა ქალაქის თვითმმართველობაში. თუ ეს არ მოხდა, ვამჯობინებთ თვითმმართველობის გაუქმებას და საპოლიციო მმართველობის აღდგენასო. ამ დოკუმენტს ხელს აწერდა 216 ქართველი, 12

¹ „ივერია“, 1889, № 165.

² იქვე, 1892, № 9.

რუსი, 8 თურქი და 3 სომეხი კათოლიკე¹. ცხადია, სომეხი ბურჯუაზიის წინააღმდეგ ბრძოლის მთელ სიმძიმეს ახლად აღორძინებული ქართველი ბურჯუაზია იღებდა ტვირთად.

სომეხ და ქართველ ბურჯუაზიას შორის შინაკლასობრივი და ნაციონალური წინააღმდეგობანი საქმაოდ მწვავე იყო აგრეთვე გორში. XIX ს-ის 80-იან წლებში გორის თვითმმართველობაშიც სომეხი ბურჯუაზია იყო გაბატონებული. იგი ყოველნაირად აფერხებდა ქართველების არჩევას საქალაქო სათათბიროში. 1889 წლის არჩევნების დროს, მაგალითად, სომეხი ბურჯუები აშკარად ყვიროდნენ „არ გვინდა ანდრონიკაშვილი, არ გვინდა ჯაფარიძე, არ გვინდა გაბუნიაო“. „ამისთანა ხმებმა — წერდა „ივერიის“ კორესპონდენტი — ხალხში უკმაყოფილება გამოიწვია, მეორე მხარემაც ხმა ამოიღო და თავისებს დაუწყო სარჩლი“². ქართველ ამომრჩეველთა აქტიურობამ, რომლებსაც ქალაქის თვითმმართველობაში მემარცხენე პოზიცია ეკავათ, სათანადო ნაყოფი გამოიღო. მათ სათათბიროში გაიყვანეს ხმოსანთა მნიშვნელოვანი ნაწილი. მემარცხენე ფრთას უდიდესი გამარჯვება იყო ის, რომ 1891 წელს გორის ქალაქის თავად არჩეულ იქნა დ. ი. მუსხელიშვილი³.

ქართველი და სომეხი ბურჯუაზია განსაკუთრებით მტრულად იყო დაპირისპირებული თბილისის საქალაქო თვითმმართველობაში. მართალია, თვითმმართველობის გახსნის მომენტში, როგორც აღნიშნული იყო, მართვა-გამგეობას მიუჩვეველმა სომეხმა ბურჯუაზიამ ქართველებთან ერთად დიმიტრი ყიფიანი გაიყვანა ქალაქის თავად და პირველ ხანებში არ ამჟღავნებდა ანტიქართულ განწყობილებას, მაგრამ XIX ს-ის 80-იან წლებში მდგომარეობა არსებითად შეიცვალა. საქალაქო სათათბიროსა და გამგეობაში სომეხები გაბატონდნენ. ქალაქის თავის საეარქელი 1878-დან 1891 წლამდე შეუცვლელად ა. მატინოვს ეკავა და გამგეობის წევრებადაც უმეტეს შემთხვევაში სომეხები ირჩეოდნენ.

1890 წელს წინასაარჩევნო ბრძოლამ თბილისში მეტად მწვავე ხასიათი მიიღო. ბრძოლის ასპარეზზე ძირითადად სამი დაჯგუფება გამოვიდა. პირველს თანამედროვენი უწოდებდნენ „გამგეობის პარტიას“, რადგან მას შეთაურობდნენ ქალაქის თავი მატინოვი და გამგეობის ყველაზე გავლენიანი წევრი პ. იზმაილოვი. მეორე დაჯგუფება მონათლეს „ღვორცოვი ნომრების“ (ისიც სომხური ბურჯუაზიის დაჯგუფება იყო) პარტიის სახელწოდებით. მესამე დაჯგუფებას კი ქმნიდა სათათბიროს მემარცხენე ფრთა, რომელიც მტრულად იყო განწყობილი „ღვორცოვი ნომრებისადმი“ და უკანასკნელ ხანს ოპოზიციაში ჩაუდგა გამგეობას. ამიტომ ეს პარტია პრე-

¹ სსცია, ფ. 12, ანაწ. 7, საქ. 663, ფურც. 4—7.

² „ივერია“, 1889, № 165.

³ იქვე, 1891, № 70.

საში „ოპოზიციის“ სახელწოდებით იხსენიება. ზოგი პუბლიცისტი მას „ქართველთა პარტიას“-აც უწოდებდა.

„დვორცოვი ნომრებისა“ და „გამგეობის პარტიის“ სამოქმედო პროგრამა ერთმანეთისაგან თითქმის არ განსხვავდებოდა. ამ დაჯგუფებათა სოციალურ საყრდენს წარმოადგენდა თბილისის მსხვილი და ნაწილობრივ საშუალო ბურჟუაზია, რომელიც ნაციონალური შედგენილობით ძირითადად სომხური იყო. სომეხ ბურჟუაზიას ქალაქის ეკონომიკაში გაბატონებული მდგომარეობა ეკავა და თბილისის მართვა-გამგეობაშიც პირველობას იჩემებდა.

როცა ქართველი ნაციონალური ბურჟუაზია რამდენადმე მომძლავრდა, მისმა ნაღებმა თბილისს მოაშურა და სავაჭრო-სამრეწველო საქმიანობა დაიწყო, იგი ყოველი ფეხის ნაბიჯზე აწყდებოდა სომეხი ბურჟუაზიის წინააღმდეგობას. XIX საუკუნის 70—80-იან წლებში სომეხი და ქართველი ბურჟუაზია ერთმანეთს ებრძოდა ქალაქის ეკონომიკასა და ბაზარზე უპირატესი მდგომარეობის მოპოვებისათვის, მაგრამ ეს ბრძოლა ცხოვრების ზედაპირზე ნაკლებად ჩანდა. 80-იან წლებში მდგომარეობა უფრო დაიძაბა. თბილისის ბურჟუაზიის სწვადასხვა ფენა მტრულად დაუპირისპირდა ერთმანეთს ქალაქის თვითმმართველობაშიც.

ერთი ქალაქის ფარგლებში მოქმედი სომეხი და ქართველი ბურჟუაზიის ბრძოლა შინაკლასობრივ ხასიათს ატარებდა, მაგრამ ისინი თავის კლასობრივ ინტერესს საერთო ნაციონალურ ინტერესად აცხადებდნენ და ცდილობდნენ ამ ბრძოლაში ერის სხვა სოციალური ძალების ჩაბმასაც. ახლად აღორძინებული ქართველი ბურჟუაზია, მაგალითად, დახმარებისათვის მოუწოდებდა არა მარტო მოსახლეობის დაბალ ფენას, საიდანაც იგი იყო გამოსული, არამედ გაბურჟუების გზაზე დამდგარ ქართველ თავდაზნაურობასაც.

ქართველი თავდაზნაურული და რაზნოჩინური ინტელიგენცია, რომლის ერთი ნაწილი აშკარა აღმავალი ბურჟუაზიის ინტერესებს გამოხატავდა, ხოლო მეორე ნაწილი საერთოდ ხალხის ინტერესთა დაცვის ლოზუნგით გამოდიოდა, მხარს უჭერდა და ხელმძღვანელობდა კიდევ ქართველ ცენზიან მოქალაქეებს თვითმმართველობაში შესაფერისი აღვილის დასაკავებლად წარმოებულ ბრძოლაში.

პარტიებმა აქტიურად დაიწყეს ამომრჩეველთა „დამუშავება“. დვორცოვი ნომრებისა“ და „გამგეობის პარტიის“ ლიდერები საკუთარ სახლში გამართულ ბანკეტებზე და კლუბებში ეწეოდნენ აგიტაციას, მოუწოდებდნენ სომეხებს ხმა მიეცათ მათი კანდიდატებისათვის. ოპოზიცია კი თავის პროგრამის პროპაგანდას პრესის საშუალებით ეწეოდა. იგი მოით-

ხოვდა თბილისის სათათბიროს შემადგენლობის არსებით შეცვლას, მის გაღახალისებას ინტელიგენტური ძალებით¹.

წინასაარჩევნო აგიტაციაში აქტიურად ჩაება „ივერია“. გაზეთში დაბეჭდილ ერთ-ერთ წერილში გულისწყრომავა გამოთქმული იმის გამო, რომ ხმოსნობის კანდიდატთა წამოყენების საქმე ხელში აქვს ჩაგდებული თბილისის ორასიოდე მდიდარ მოქალაქეს, სამი ათასი კაცი კი მოკლებულია კანდიდატთა წამოყენების შესაძლებლობას. „შეძლებულს, — ნათქვამია წერილში, — იარაღად კლუბი და საკუთარი სახლი აქვს, შეუძლებულს მოედანზე თათბირიც კი არ შეუძლიან“. შემდეგ წერილში მოყვანილია ამომრჩეველთა აბსენტიზმის საილუსტრაციო ფაქტები, საიდანაც ჩანს, რომ წინა არჩევნებში მონაწილეობდა მხოლოდ ცენზიანთა 15—20%. ყველაზე მეტად პასიურობდნენ თურქე ქართველები. ეს გარემოება, წერს „ივერიის“ კორესპონდენტი, „მახვილივით უნდა მოხვედეს ყოველ იმ ქართველის გულს, ვისაც შეუძლია საზოგადო საქმეში მონაწილეობის მიღება, ხელის განძრევა და არას კი აკეთებს“. იგი ამხელს ქართველ ცენზიანთა დაუღვევრობას, რომელნიც თითქოს საჭიროდ არ თვლიდნენ „ამისთანა იწი მაწა საქმეში გარეჯას“. კორესპონდენტის ავტორი იმედოვნებს, რომ ქართველები შეიგნებენ ქალაქის თვითმმართველობის დიდ მნიშვნელობას და აქტიურად მიიღებენ მონაწილეობას არჩევნებში, რათა სათათბიროში გაიყვანონ თავის ინტერესთა გამომხატველი ხმოსნები².

პარტიების აგიტაციას გარკვეული შედეგები მოჰყვა. ამომრჩეველები ძირითადად ნაციონალური ნიშნის მიხედვით დაჯგუფდნენ. განსაკუთრებული აქტიურობა ამჟერად ქართველ ცენზიანებში შეინიშნებოდა. მესამე თანრიგის საარჩევნო კრებაზე გამოცხადებული 500 კაციდან 220 ქართველი იყო.

არჩევნები 1890 წლის დეკემბერში ჩატარდა. პირველი-მეორე თანრიგის ამომრჩეველებმა ძირითადად ხმა მისცეს სომეხ კანდიდატებს. მესამე თანრიგის არჩევნებში კი ოპოზიციამ გაიმარჯვა.

ხმოსანთა არჩევნების დამთავრებისთანავე „ნოვოე ობოზრენიემ“ ასე დაახასიათა თბილისის სათათბიროს ახალი შემადგენლობა: „ყველაზე მნიშვნელოვანი განსხვავება ახალი სათათბიროსი ძველისაგან მდგომარეობს ადგილობრივი ფინანსიური ტუზების გავლენის მნიშვნელოვან შემცირებაში. ინტელიგენცია, რომელსაც მდიდრები აქამდე თითქოსდა სამოწყალოდ ითმენდნენ, ამ დროიდან სათათბიროში ყალიბდება დამოუკიდებელი ჯგუფის სახით. ახალ სათათბიროში უდაოდ მას ეკუთვნის უპირატესობა. ინტელიგენციას შეუძლია მოიპოვოს 45 ხმოსნის მხარდაჭერა და

¹ «Новое обозрение», 1890, № 2284.

² „ივერია“, 1890, № 215.

იმოღვაწოს ქალაქის მეურნეობისა და მოსახლეობის მდგომარეობის გასაუმჯობესებლად¹.

წერილის ავტორი აჭარბებს. მართალია, ოპოზიციამ აიძულა ძველი ქალაქის თავი ა. მატინოვი გადამდგარიყო და მისი ადგილი ოპოზიციის კანდიდატმა ნ. არლუთაშვილ-მხარგრძელმა დაიკავა, მაგრამ ახალი შემადგენლობის სათათბიროშიც უმრავლესობა ინტელიგენციას კი არა, ვაჭარ-მრეწველებსა და ბანკირებს ეკუთვნოდა. სათათბიროში, კერძოდ, შედიოდნენ: ადელზანოვი — ტყავის ქარხნის მფლობელი და თბილისის საერთოერთო კრედიტის საზოგადოების თავმჯდომარე; ა. ანანოვი — ცნობილი კაპიტალისტი და მსხვილი მიწათმფლობელი; დ. ბარათაშვილი — ქართველი მემამულე, სოფლის მეურნეობის რაციონალიზატორი; გ. ევანგულოვი — ბანკირი; გ. ქართველიშვილი — მრეწველი და პოდრიადჩიკი; ა. მანთაშვილი — ნავთის მსხვილი მრეწველი და ექსპორტიორი, თბილისის კომერციული ბანკის გამგეობის თავმჯდომარე; ა. იონესიანი — ყურნალისტი და ბანკირი; ა. ფრიდონოვი — საბანკო კანტორის პატრონი; დ. სარაჯიშვილი — მსხვილი მრეწველი და სახლმთმფლობელი; მ. თამამშვილი — ბანკირი; ი. ყორღანოვი — მრეწველი. იმავე სათათბიროში შედიოდნენ ცნობილი საზოგადო მოღვაწეები — ნ. ნიკოლაძე, ი. მაჩაბელი, ვ. მიქელაძე, ნ. ცხვედაძე და სხვ.²

დასავლეთ საქართველოს ქალაქებშიც შეიმჩნეოდა კლასობრივი და შინაკლასობრივი ბრძოლის ეროვნული ნაშნით შეფერადების ტენდენცია. მაგრამ განსხვავება ის იყო, რომ ამ მხარის ეკონომიკაში ქართველი ბურჟუაზია დიდ როლს ასრულებდა და საქალაქო თვითმმართველობების მუშაობასაც უმეტესწილად ის აძლევდა ტონს. ქუთაისის, ფოთის, ბათუმის, სოხუმის და ოზურგეთის სათათბიროთა ხმოსნების უმრავლესობა ქართველები შეადგენდნენ.

ინტელიგენციას, მცირე გამოწაკლისის გარდა, საკმარისი ქონებრივი ცენზი არ გააჩნდა და ამიტომ არ შეეძლო პრაქტიკული მონაწილეობა მიეღო საქალაქო თვითმმართველობების საქმიანობაში. პროგრესული საზოგადო მოღვაწეები ცდილობდნენ როგორმე შემოეველოთ კანონისათვის და სათათბიროში გაეყვანათ ინტელიგენციის წარმომადგენლები. ქუთაისელებს ამისათვის გამოუყენებიათ საქალაქო დებულების ერთი მუხლი, რომლის თანახმად არჩევნებში მონაწილეობის უფლება ეძლეოდა ნოქრებსაც. ნოქრის მოწმობა კი არც ისე ძვირი ღირდა. ქუთაისის მკვიდრ რამდენიმე განათლებულ კაცს სწორედ ნოქრის მოწმობის აღებით მოუპოვებია როგორც აქტიური, ისე პასიური საარჩევნო უფლება. ეს მანევრი კანონ-

¹ «Новое обозрение», 1890, № 2401.

² იქვე, 1891, № 2423, № 2425.

ნის დამცველებს კარგა ხანს ვერ შეუმჩნევიათ, მაგრამ 1888 წელს გამო-
აშკარავებულა და ამომრჩეველთა სიიდან ამოუშლიათ ცნობილი მოღვა-
წეები — კ. ლორთქიფანიძე, ივ. მესხი, დ. დალიანი, დ. ბაქრაძე, ივ. ჯაიანი,
ნ. კანდელაკი, პ. ლორთქიფანიძე და სხვ. „ყველა ეს მოხსენებულნი კაც-
ნი, — წერდა „ივერია“, — ცნობილი არიან ქუთაისში... წარსულს ოთხის
წლის განმავლობაში ხმოსნებად იყვნენ აქაურს საბჭოში იმავე უფლებით,
რა უფლებითაც ახლა უნდოდათ ესარგებლათ, მაგრამ არ დასცალდათ,...
ამათი გამორიცხვა, — გულისტკივილით დასძენს რედაქცია, — დიდათ და-
ემჩნევა ქუთაისის საქალაქო რჩევას“¹. მართლაც, ამ განკარგულების წყა-
ლობით ქუთაისის საქალაქო სათათბაროში, რომელსაც აქამდე პირველი
ადგილი ეკავა ინტელიგენტი ხმოსნების რაოდენობით, ვაჭარ-მრეწველე-
ბი, მოხეელები და სხვა ჯურის საქმოსნები გაბატონდნენ.

უდავოა, საქალაქო თვითმმართველობების საქმიანობაში შეიმჩნეოდა
ნაკლოვანებები. რეაქციონერები ღვარძლიანად მიუთითებდნენ საქალაქო
თვითმმართველობათა მუშაობის სუსტ მხარეებზე და იყენებდნენ მას
თვითმმართველობის იდეის სახელის გასატეხად. ისინი მარჯვნიდან აკრი-
ტიკებდნენ ამ დაწესებულებებს, „ამტკიცებდნენ“, რომ საქალაქო მეურ-
ნეობის მოწესრიგების საქმეში მეტი და უკეთესი როლის შესრულება
შეუძლია მთავრობის ადმინისტრაციას და პოლიციას, ვინემ თვითმმართვე-
ლობასო.

თვითმმართველობის იდეას რეაქციონერთა შემოტევისაგან იცავდა
პროგრესული ინტელიგენცია. „იურიდიჩესკოე ობოზრენიეს“ მემარჯვენე
პუბლიცისტებთან კამათის დროს ნ. ნიკოლაძე, მაგალითად, პირველ რიგში
საქალაქო თვითმმართველობის სუსტ მხარეებზე მიუთითებდა, მაგრამ ამის
მიზეზად აცხადებდა მეფის მთავრობას და არსებულ კანონმდებლობას. სა-
ქალაქო თვითმმართველობა, აღნიშნავდა ნ. ნიკოლაძე, წმინდა ადმინის-
ტრაციული მიზნათაა დაარსებული და მას ითმენენ როგორც მთავრობის
აპარატის დამატებას და დამხმარე ორგანოს. ბევრმა არ იცის, რომ ქალა-
ქის შემოსავლის დიდი ნაწილი აუცილებლად უნდა დაიხარჯოს ჯარის, პო-
ლიციის, საპყრობილეთა და სხვ. საჭიროებისათვის. 1875 წელს ამ ხარ-
ჯებმა შთანთქა თბილისის ფინანსების 72%, ქალაქის უშუალო საჭიროე-
ბისათვის დარჩა 28%. ამდენად, დაასკვნიდა ნიკოლაძე, თვითმმართველო-
ბის ბიუჯეტისა და მოღვაწეთა შრომის ორი მესამედი მიღის არა ქალაქის
კეთილმოწყობაზე, არამედ იხარჯება ადმინისტრაციის საჭიროებისათვის².

მიუთითებდა რა საქალაქო თვითმმართველობათა ნაკლოვანებების
ობიექტურ მიზეზებზე ნ. ნიკოლაძე ამავე დროს იცავდა თვითმმართველო-
ბის იდეას. მემარჯვენე კრიტიკოსთა საყურადღებოდ იგი აცხადებდა: ზო-

¹ „ივერია“, 1888, № 10.

² «Юридическое обозрение», 1881, № 22, გვ. 839—873.

გიერთი პირები თავს ესხმიან თვითმმართველობის პრინციპს, ცდილობენ მოახდინონ ამ პრინციპის დისკრეტიზაცია. მე ვფიქრობ, რომ მთელი ჩვენი მომავალი დაკავშირებულია ამ პრინციპის განვითარებასა და სრულყოფასთან და როცა მას მოსახლეობის თვალში უსამართლოდ სვრიან, ჩემ პირდაპირ მოვალეობად მიმაჩნია თვითმმართველობის პრინციპის დაცვა¹.

ამრიგად, ნ. ნიკოლაძე კარგად ამჩნევდა საქალაქო თვითმმართველობის ნაკლოვანებებს, მაგრამ ამისათვის მისი უარყოფა და პოლიციური მმართველობისაკენ დაბრუნება, რასაც მოითხოვდნენ რეაქციონერები, დიდ ბოროტებად, პროგრესის დაღატად მიაჩნდა. ნ. ნიკოლაძისა და მის თანამოაზრეთა მოღვაწეობა იქითკენ იყო მიმართული, რომ ხელი შეეწყობოთ თვითმმართველობის პრინციპის განვითარებისა და თვითმმართველობათა მუშაობის გაუმჯობესებისათვის, რადგან „სრულყოფილი თვითმმართველობა“ მიაჩნდათ უკეთესი მომავლის ერთ-ერთ წინაპირობად.

პროგრესული ინტელიგენცია კარგად ხედავდა, რომ საქალაქო თვითმმართველობებში შეძლებული კლასები (თავადაზნაურობა, მსხვილი და საშუალო ბურჟუაზია) იყვნენ გაბატონებული, რომელნიც თავის კლასობრივი ინტერესების შესაბამის პოლიტიკას ატარებდნენ. თვითმმართველობის ორგანოებში დემოკრატიული ელემენტების გაძლიერება და თვითმმართველობის ამაღლება ქალაქის მოსახლეობის საერთო ინტერესების დონემდე პროგრესული ინტელიგენციის მთავარ მიზანს შეადგენდა. მაგრამ 1892 წლის ახალმა საქალაქო დებულებამ კიდევ უფრო შეკვეცა დემოკრატიული ფენების წარმომადგენლობა და ქალაქის თვითმმართველობები თითქმის მთლიანად ხელში ჩაუგდო ვაჭარ-მრეწველებს და სხვა მსხვილ მესაკუთრეებს.

ახალი საქალაქო დებულების საფუძველზე თბილისის, ბათუმის, ფოთის, ახალციხის და გორის თვითმმართველობათა რეორგანიზაცია მოხდა 1893—1894 წლებში. ეს დებულება გატარდა აგრეთვე ზოგ ისეთ ქალაქში, რომელსაც აქამდე პოლიცია განაგებდა. კერძოდ, 1894—1899 წლებში თვითმმართველობა მიენიჭა თელავს, სიღნაღს, ახალქალაქს, სოხუმსა და ოზურგეთს².

ახალი დებულებით არჩევნებში მონაწილეობის უფლება ეძლეოდა ყოველ მოქალაქეს თუ იგი რუსეთის ქვეშევრდომი იყო და ქალაქის ტერიტორიაზე ფლობდა არა ნაკლებ 1 000—1 500 მანეთის უძრავ ქონებას. საარჩევნო უფლებას იღებდნენ აგრეთვე პირველი-მეორე გილდიის ვაჭრები. ამ მუხლის მიხედვით ქალაქის ამომრჩეველთა რიცხვი 2—3-ჯერ

¹ «Юридическое обозрение», 1881, № 22, გვ. 839 — 873.

² სსცია, ფ. 13, ანაწ. 24, საქ. 519, ფურც. 1, 14—15.

შემცირდა. შეიკვეცა სათათბიროსა და გამგეობის კომპეტენცია. გაძლიერდა ჰთავრობის კონტროლი. საქალაქო თვითმმართველობის დაღვენილებანი ძალაში შედიოდა მხოლოდ გუბერნატორისაგან დამტკიცების შემდეგ. თვითმმართველობების თანამდებობებზე არჩეულ პირებს აპტიციებდა შინაგან საქმეთა მინისტრი, ხოლო რაიმე მიზეზით მათი დაუმტკიცებლობის შემთხვევაში, თანამდებობას იკავებდა მთავრობისაგან დანიშნული მოხელე.

განსაკუთრებით შეკვეცილი აღმოჩნდა ახალციხის, გორის, თელავის, სიღნაღის, ახალქალაქის და ოზურგეთის უფლებები. ამ ქალაქებში შემოღებულ იქნა თვითმმართველობის გამარტივებული სტრუქტურა. აქ ხმოსნების ნაცვლად ირჩევდნენ რწმუნებულებს, ხოლო ქალაქის თავის ნაცვლად — მამასახლისს. რწმუნებულთა კრებები და მამასახლისები ადმინისტრაციის კიდევ უფრო მკაცრი კონტროლს ქვეშ მოექცნენ.

სავალალო ისიც იყო, რომ ამიერკავკასიის ქალაქებისათვის 1899 წელს შემოიღეს განსაკუთრებული წესები. მთავარმმართველს უფლება ეძლეოდა თავის შეხედულებისამებრ საქალაქო სათათბიროდან გამოეყვანა არასაიმედო პირი. საგანგებო კანონი ამიერკავკასიის ქალაქთა თვითმმართველობების შესახებ ცარიზმის კოლონიური პოლიტიკის ერთ-ერთ გამოვლინებას წარმოადგენდა.

* * *

საქალაქო თვითმმართველობათა საქმიანობის შედეგიანობა კომუნალური მეურნეობის, სწავლა-განათლების, სამედიცინო მომსახურების, სანიტარიისა და სხვ. სფეროში ძირითადად დამოკიდებული იყო მათ განკარგულებაში არსებულ ფულად სახსრებზე. არსებული ღებულებით, ქალაქთა თვითმმართველობების საბიუჯეტო-ფინანსიური უფლებები ძალიან შეკვეცილი იყო. ქალაქის მოსახლეობაზე შეწერილ გადასახადთა მცირე ნაწილი მოდიოდა თვითმმართველობათა საშემოსავლო ბიუჯეტში, დიდი ნაწილი კი სახელმწიფო ბიუჯეტს ავსებდა.

1870 წ. ღებულების 128-ე მუხლის თანახმად, ქალაქის თვითმმართველობებს უფლება ჰქონდათ დაეწესებინათ გამოსაღებები: უძრავ ქონებაზე (მიწა, სახლები, ღუქან-მაღაზია-საწყობთა შენობები და სხვ.), სავაჭრო-სამრეწველო დაწესებულებებზე, ტრანსპორტზე და სხვ.

ქალაქთა ფულადი სახსრები იხარჯებოდა თვითმმართველობების არჩეულ თუ მოწვეულ მოსამსახურეთა ჯამაგირებზე, ქალაქის კეთილმოწყობის სამუშაოებზე, საზოგადოებრივ დაწესებულებათა საჭიროებაზე, სწავლა-განათლებაზე და მოსახლეობის სამედიცინო მომსახურებაზე. ქალაქე-

ბის ბიუჯეტიდან დიდი თანხები გამოიყოფოდა აგრეთვე ჯარისა და პოლიციის შესანახად.

ქალაქების ზრდის პარალელურად იზრდებოდა თვითმმართველობათა ბიუჯეტებიც. 1875 წ. თბილისის საშემოსავლო ბიუჯეტი უდრიდა 279 037 მან., 1883 წ. — 531 733 მან., 1894 წ. — 1 059 815 მან., 1900 წ. — 1 361 636 მანეთს. ქუთაისის თვითმმართველობის შემოსავალი შეადგენდა: 1881 წ. — 61 577 მან., 1884 წ. — 105 000 მან., 1900 წ. — 236 654 მანეთს. ფოთის საშემოსავლო ბიუჯეტი 1885 წ. უდრიდა 35 856 მან., 1890 წ. — 40 592 მან., 1895 წ. — 555 589 მან., 1900 წ. — 174 163 მანეთს. ქ. ბათუმის საშემოსავლო ბიუჯეტი XIX ს-ის 80-იან წლებში 50—100 ათას მანეთს არ აღწარბებდა, 90-იან წლებში კი 500—600 ათას მანეთს მიაღწია. საკმაოდ სწრაფად მატულობდა ქ. სოხუმის შემოსავალიც. ახალციხის, გორის, თელავის, სიღნაღის, ახალქალაქის, ოზურგეთისა და დუშეთის საშემოსავლო ბიუჯეტები კი მეტად ნელა იზრდებოდა.

ქალაქის ბიუჯეტის საგასავლო მუხლები ორ კატეგორიად იყოფოდა. კანონმდებლობით ჯარისა და პოლიციისათვის საჭირო თანხა საგასავლო ბიუჯეტის აუცილებელ მუხლებად ითვლებოდა. ქალაქის კეთილმოწყობისა და მოსახლეობის საჭიროებისათვის თანხის გამოყოფა კი, მთავრობის თვალსაზრისით არ იყო აუცილებელი და ამ მიზნისათვის გადაღებული სახსრები გასავლის არააუცილებელ მუხლებში შექქონდათ. საქართველოს ქალაქთა ბიუჯეტის დიდ ნაწილს აუცილებელი საერთო სახელმწიფო ხარჯები ნთქავდა. 1875 წ. თბილისის თვითმმართველობის შემოსავალი უდრიდა 279 037 მან. გასავალიდან კი მარტო თბილისში მდგარი ჯარის შესანახად დაიხარჯა 122 462 მანეთი. ქუთაისის თვითმმართველობის 1881 წლის ბიუჯეტიდან (77 261 მან.) ქალაქის პოლიციისათვის გათვალისწინებული იყო 20 521 მან., ჯარისათვის კი — 22 359 მანეთი. 1876 წლიდან 1888 წლამდე ახალციხის თვითმმართველობამ თავის ბიუჯეტიდან დახარჯა: ჯარზე — 165 434 მან., თვითმმართველობის აპარატის შენახვაზე — 90 767 მან., ქალაქის კეთილმოწყობაზე — 45 199 მან. და სხვ.

აუცილებელი არამწარმოებლური ხარჯების სიდიდის გამო ქალაქების არსებით მოთხოვნილებათა დასაკმაყოფილებლად მცირე თანხები რჩებოდა. თვითმმართველობები იძულებული იყვნენ სესხი აეღოთ. მთავრობის ნებართვით თბილისის თვითმმართველობამ 1881 წ. გამოუშვა პირველი, ხოლო 1887 წ. მეორე საობლიგაციო სესხი, 1 550 000 მანეთის რაოდენობით. 1886 წელს თბილისის ბიუჯეტი შემოსავლის ნაწილში უდრიდა 1 115 907 მან., საიდანაც 695 974 მან. მიღებული იყო საობლიგაციო სესხის რეალიზაციის შედეგად¹. საობლიგაციო სესხებს უშვებდნენ ბათუმი-

¹ ა. ბ ე ნ დ ი ა ნ ი შ ვ ი ლ ი, თბილისის საქალაქო თვითმმართველობა 1875—1917 წწ., თბ., 1960, გვ. 49.

სა და ფოთის თვითმმართველობებიც. საქართველოს სხვა ქალაქებმა კი, ბევრი ცდის მიუხედავად, მთავრობისაგან ასეთი სესხების გამოშვების ნებართვა ვერ მიიღეს.

სესხების აღება დროებით აჯანსაღებდა ქალაქთა ბიუჯეტს. მათი დაფარვა და 5 — 6%-იანი სარგებლის გადახდა ბიუჯეტის საგასავლო ნაწილს აწვევდა. ქალაქის თვითმმართველობები სესხებს ძირითადად იყენებდნენ შემოსავლიან წარმოება-დაწესებულებათა და სხვა ობიექტების მოსაწყობად და მათი სუფთა მოგებით ცდილობდნენ ვალების გადახდას. თბილისის თვითმმართველობამ, მაგალითად, ააშენა მუნიციპალური სასახლე, რომლის ქვედა სართული დუქნებად იქნა გაქირავებული, გაიყვანა საკმაოდ მომგებიანი ავჭალის წყალსადენი, ააგო ვერისა და მნაცაქანოვის ხიდები და სხვ. ფოთის საქალაქო თვითმმართველობამ, რომელსაც 1894-დან 1913 წლამდე ნ. ნიკოლაძე ედგა სათავეში, XIX — XX სს-ის მიჯნაზე მთავრობისაგან გარანტირებული 5 მლნ მანეთის საობლიგაციო სესხი გამოუშვა. ამ თანხით მოეწყო ფოთის შესანიშნავი ნავსადგური, მნიშვნელოვნად გაუმჯობესდა ქალაქის კომუნალური მეურნეობა (ქუჩა-მოედნები, განათების სისტემა, ტრანსპორტი და სხვ.), აგებულ იქნა მარგანეცის ელევატორი და სხვ.¹

ქალაქთა შემოსავალი XIX ს-ის 90-იანი წლებისათვის მნიშვნელოვნად გაიზარდა, მაგრამ ისიც უნდა აღინიშნოს, რომ დამტკიცებული ბიუჯეტების საშემოსავლო ნაწილი ფაქტიურად თითქმის არასდროს არ სრულდებოდა, რასაც მკაფიოდ ადასტურებს ქვემოთ მოტანილი ცხრილი. (იხ. ცხრ. 1).

საშემოსავლო ბიუჯეტის მიხედვით იგეგმებოდა გასავალიც. ამიტომ შემოსავლის შეუსრულებლობა გასავლის შეუსრულებლობას იწვევდა და ამდენად, ქალაქთა ბიუჯეტები უმეტესწილად დეფიციტური იყო.

საქალაქო თვითმმართველობების მთავარ ფუნქციას კომუნალური მეურნეობის გამგებლობა შეადგენდა. ნელა უმჯობესდებოდა ქალაქების გარეგანი სახე. მთავარ ქალაქებში თანდათან იზრდებოდა მოკირწყლული და მოასფალტებული ქუჩა-მოედნების რაოდენობა, მრავლდებოდა წყალსადენები. უმჯობესდებოდა ქალაქების განათება, ნავთის ფარნებს თანდათან გაზის ლამპიონები და ელექტრობა სცვლიდა. ინერგებოდა ქალაქის მასობრივი ტრანსპორტის ახალი სახეები. 1883 წ. თბილისში ამუშავდა კონკა, 1904 წ. კი — ელექტროტრამვაი და ფუნიკულიორი. XX ს-ის დამდეგს კონკა ქ. ფოთშიც ამუშავდა.

თანდათან მეტ როლს ასრულებდნენ თვითმმართველობები ჯანმრთელობის დაცვისა და სახალხო განათლების სფეროში.

1885 წ. თბილისის თვითმმართველობის გამგებლობაში გადავიდა ქა-

¹ მ. პ ა კ ო რ ი ა, ფოთის წარსულიდან, თბ., 1967, გვ.140—151.

ქალაქების დასახელება	1898 წ.		1899 წ.		1900 წ.	
	საშუალო ბიჭები გვერდი	ფაქტიური შემოსავალი	გვერდი	ფაქტიური შემოსავალი	გვერდი	ფაქტიური შემოსავალი
თბილისი					1 505 467	1 351 636
ახალციხე	83 015	37 118	85 331	40 973	62 946	
გორი	20 792	18 149	18 639	16 531	16 418	
დუშეთი	4 777	3 106	4 478	4 037	4 323	
სიზნალი	2 335	11 881	1 628	12 992	14 225	
თელავი	—	10 588	—	10 565	10 368	
ქუთაისი	158 553	127 376	200 467	140 366	223 654	
ბათუმი	631 385	563 990	825 251	532 105	611 542	
ფოთი	155 239	225 655	192 532	164 814	171 163	
სუბუში	47 465	44 602	54 263	52 825	56 222	
ოზურგეთი	7 929	5 410	11 002	5 949	9 245	

ლაქის ცენტრალური საავადმყოფო (მიხეილის პროსპექტზე). 1898 წ. თბილისში გაიხსნა ორი სპეციალური პუნქტი გადაადგილებული სნეულებებით დაავადებულთათვის. მოეწყო აგრეთვე სულით ავადმყოფთა თავშესაფარი — სამკურნალო 40 ადგილით. XX ს-ის დამდეგს თბილისში გაიხსნა სამშობიარო სახლი და არამიანცის სახელობის საავადმყოფო, რომელსაც ჰქონდა თერაპევტიული და ქირურგიული განყოფილებები 120 საწოლით. ამავე ხანებში აშენდა ზუბალაშვილის სახელობის ბავშვთა 80-ადგილიანი საავადმყოფო.

1901 წლისათვის თბილისის თვითმმართველობის საექიმო-სანიტარიული ნაწილის შტატში ირიცხებოდა 130 კაცი. აქედან, ექიმი იყო 16, ვეტერინარი — 4, ქიმიკოსი — 2, ფარმაცევტი — 6, ფერშალი — 29 და სხვ. თბილისის საქალაქო თვითმმართველობა თანდათან მეტ თანხას გამოყოფდა ჯანმრთელობის დაცვისათვის. 1899 წ. სამედიცინო-სანიტარიულ მომ-

¹ ЦГИА СССР, ф. 1287, оп. 28, д. 874, лл. 8—86.

სახურებაზე დაიხარჯა 102 925 მან., 1909 წ. კი — 243 726 მანეთი, რაც შეადგენდა თბილისის საგასავლო ბიუჯეტის 13,3%-ს¹.

საქართველოს სხვა ქალაქთა თვითმმართველობებიც თანდათან მეტ ყურადღებას აქცევდნენ სანიტარიულ-ჰიგიენური მდგომარეობის და სამედიცინო მომსახურებას გაუმჯობესებას, მაგრამ საამისოდ მათ შედარებით ნაკლები თანხები გააჩნდათ. 1900 წელს ქუთაისის თვითმმართველობამ სამედიცინო და სანიტარიულ მომსახურებაზე დახარჯა 15 086 მან. (7%). ბათუმის — 21 342 მან. (3,4%), ფოთის თვითმმართველობამ კი — 6 100 მანეთი (3,5%)². 1901 წელს იმავე საჭიროებისათვის ახალქალაქის თვითმმართველობამ გამოყო 605 მან. (1%), ახალციხის — 647 მან. (1%), გორის — 588 მან. (3,5%), თელავის თვითმმართველობამ — 376 მანეთი (2,9%)³.

თანდათან ფართოვდებოდა თვითმმართველობათა საქმიანობა სახალხო განათლებისა და კულტურის სფეროში.

1880 წ. თბილისის თვითმმართველობამ გახსნა სახელოსნო სასწავლებელი, 1881 წ. კი — 7 დაწყებითი სკოლა. XX ს-ის დამდეგს თბილისის თვითმმართველობის გამგებლობის ქვეშ არსებულ 22 დაწყებით სკოლაში ითვლებოდა 118 მასწავლებელი და 3 176 მოსწავლე. მუნიციპალურ მოღვაწეთა შორის აღმოცენდა საყოველთაო დაწყებითი განათლების განხორციელების იდეა, მაგრამ იგი ნელა მოღიოდა სისრულეში. 1913 წლისათვის თბილისის სასკოლო ასაკის ბავშვების რიცხვი 15—16 ათასს აღწევდა, რომელთაგან ქალაქის დაწყებით სკოლებში მხოლოდ 5 000 სწავლობდა⁴.

თბილისის თვითმმართველობამ არაერთხელ აღძრა შუამდგომლობა მთაკრობის წინაშე პოლიტექნიკური ინსტიტუტის და უნივერსიტეტის დაარსების ნებართვის თაობაზე. მაგრამ მიუხედავად იმისა, რომ უმაღლესი სასწავლებლების გახსნა კერძო შეწირულებათა გზით მიღებულა თანხის საფუძველზე იყო განზრახული, მეფის მთავრობამ ეს შუამდგომლობები უარყო.

თბილისის თვითმმართველობა თანდათან მეტ თანხას გამოყოფდა სწავლა-განათლების დაფინანსებისათვის. 1883 წელს სწავლა-განათლებაზე დაიხარჯა 42 845 მან., 1900 წ. — 116 492 მან., 1910 წ. — 272 270 მანეთი, რაც შეადგენდა საგასავლო ბიუჯეტის 13%-ს⁵.

საქართველოს სხვა ქალაქთა თვითმმართველობები შედარებით უმნიშვნელო როლს ასრულებდნენ სახალხო განათლების სფეროში. 1900 წელს

¹ ა. ბ ე ნ დ ი ა ნ ი შ ვ ი ლ ი, თბილისის საქალაქო თვითმმართველობა..., გვ. 80—82.

² ЦГИА СССР, ф. 1287, оп. 28, д. 906, лл. 6—9.

³ სსცია, ფ. 12, ანაწ. 6, საქ. 133, ფურც. 33—107.

⁴ ა. ბ ე ნ დ ი ა ნ ი შ ვ ი ლ ი, თბილისის საქალაქო თვითმმართველობა..., გვ. 83—85.

⁵ იქვე, გვ. 49—54.

სახალხო განათლებაზე საბიუჯეტო გეგმით უნდა დაეხარჯა: ქუთაისის თვითმმართველობას — 21 776 მან. (9%), ბათუმის — 30 800 მან. (5%), ფოთის — 8 091 მან. (5%), სოხუმის — 3 140 მან. (6%), ოზურგეთის — 260 მან. (3%), ახალქალაქის — 500 მან. (2%), ახალციხის — 999 მან. (1,4 %), გორის — 1 300 მან. (7,5 %), თელავის თვითმმართველობას კი მხოლოდ 160 მანეთი (1,6 %)¹.

* * *

პროგრესული ინტელიგენცია, როგორც აღვნიშნეთ, დიდი იმედით შეხვდა საქალაქო თვითმმართველობების შემოღებას, მაგრამ ეს იმედი მხოლოდ ნაწილობრივ გამართლდა. თვითმმართველობათა მუშაობის ნაკლოვანებანი ძირითადად ობიექტური პირობებით იყო გამოწვეული. 1870 წლის და განსაკუთრებით 1892 წლის დებულება ძალიან ზღუდავდა ამომრჩეველთა წრეს და თვითმმართველობის კომპეტენციას. თანდათან ყველასათვის ცხადი ხდებოდა, რომ არსებული კანონმდებლობა იყო საქალაქო თვითმმართველობათა კრიზისის ძირითადი მიზეზი.

ჯერ კიდევ 1899 წელს ნ. ნიკოლაძე წერდა: „დადგა დრო, როცა თვით თბილისის თვითმმართველობის ახლანდელმა მესვეურებმა აღიარეს, რომ მათ არ შეუძლიათ გაამართლონ მოსახლეობის იმედი და შეასრულონ ნაკისრი ვალდებულებანი... მაგრამ მათ ვერ გაუგიათ, რომ ბოროტების წყარო და წარუმატებლობის მიზეზი არ მოიხსნება, ვიდრე არსებობს ახლანდელი საქალაქო დებულება. თვითმმართველობის არსებული პირობები — განაგრძობს ნ. ნიკოლაძე — გონიერი პროგრამის წამოყენების შესაძლებლობას რომ იძლეოდეს, ნუთუ ქალაქის თავის სავარძლის ესოდენ ბევრ მაძიებელთა შორის არ აღმოჩნდა აქამდე ისეთი პირი, რომელიც შეძლებდა საარჩევნო ყუთის გვერდით დროშაც აღემატათა? თუ ასეთი პროგრამის შექმნა და განხორციელება დამოკიდებულია ჩვენს მოღვაწეებზე, რით აიხსნება ყველა ქალაქის თავის ჩავარდნა დაწყებული 1891 წლიდან?.. ცხადია, ყველაფერს ამას აქვს ერთი საერთო მიზეზი“.

ნ. ნიკოლაძე შემდეგ აღნიშნავდა, რომ არა მარტო თბილისში, არამედ თვით მოსკოვ-პეტერბურგშიც კი ვერ გაამართლესო თვითმმართველობებმა მათზე დამყარებული იმედები. ეს თვითმმართველობა პროგრესულად გამოიყურებოდა ქალაქთა მმართველობის რეფორმამდელ, პოლიციურ სისტემასთან შედარებით. დასავლეთ ევროპის ქალაქთა

¹ ЦГИА СССР. ф. 1287, оп. 28, д. 906, лл. 6—9; სსცია, ფ. 12, ანაწ. 6, საქ. 133, ფურც. 33—107.

თვითმმართველობასთან შედარებაზე კი ლაპარაკიც ზედმეტიაო. დასავლეთ ევროპაში ქალაქის მეურნეობის გაძლიერების საქმე მინდობილი აქვს მოსახლეობის იმ ფენებს, რომელნიც დაინტერესებული არიან მის წარმატებაში. იქ უკვე შემოღებულია საყოველთაო საარჩევნო სისტემა. რუსეთში კი მოქმედებს 1892 წლის დებულება, რომელიც საარჩევნო ხმის უფლებას აძლევს მხოლოდ მსხვილ მესაკუთრეებს. საარჩევნო ხმის უფლების ჩამორთმევა არა მარტო „შავი მასის“, არამედ ინტელიგენციისათვისაც არ შეიძლება უარყოფითად არ ასახულიყო ქალაქის მეურნეობაზე. ბოლოს ნიკოლაძე დასკვნის: ყველა, ვინც ითვისებს თვითმმართველობის კრიზისის მიზეზებს, ვისთვისაც ძვირფასია პროგრესის ინტერესი, დაგვეთანხმება, რომ ბოროტება შეიძლება თავიდან იქნეს აცილებული საყოველთაო საარჩევნო სისტემის დაწესებით და თვითმმართველობის მუშაობაში ინტელიგენციის მონაწილეობით. ამ აუცილებელი, ცხოვრების მიმდინარეობით ნაკარნახევი რეფორმის გატარება არ შეიძლება დიდხანს გადაიდოსო¹.

მეფის მთავრობა უარს ამბობდა საქალაქო რეფორმის გატარებაზე, თვითმმართველობის დემოკრატიზაციაზე. 1905—1907 წლების რევოლუციის ხანაში თბილისის, ქუთაისის, ბათუმისა და ფოთის თვითმმართველობათა მოღვაწეებმა გაბედეს თვითმპყრობელური რეჟიმის წინააღმდეგ ხმის ამალღება და მოითხოვეს ბურჟუაზიულ-დემოკრატიული გარდაქმნები. მუნიციპალური მოღვაწეები უდიდესი აღფრთოვანებით შეხვდნენ 17 ოქტომბრის მანიფესტს და იგი რევოლუციის გამარჯვებად გამოაცხადეს. „ამიერიდან — ამბობდა ერთი მათგანი სათათბიროს ტრიბუნიდან — რუსეთი დედინაცვალი აღარ იქნება ჩვენი“. ...აწინდელი ჩვენი მოქალაქეობრივი თავისუფლება უზრუნველყოფილი იქნება. ჩვენი ამოცანაა მოპოვებული თავისუფლება შევინარჩუნოთ და ცხოვრებაში გავატაროთ².

რევოლუციის განვითარების კულმინაციურ წერტილზე ბურჟუაზიის „რევოლუციური“ ალტყინება დაცხრა. მან ამჯობინა შერიგებოდა ცარიზმს და თვითმპყრობელობის მაგარი მუშტებით გასწორებოდა მშრომელ მოსახლეობას, რომელიც საფრთხეს უქმნიდა მის კლასობრივ ბატონობას.

1910 წ. ოდესაში მოწვეულ იქნა რუსეთის ქალაქთა წარმომადგენლების პირველი ყრილობა. მაგრამ მისი მუშაობის სფერო შეზღუდა მეფის მთავრობამ. კერძოდ, აიკრძალა ყრილობაზე განხილულიყო საქალაქო თვითმმართველობების უფლებათა გაფართოების და მოძველებული დებულებების გადასინჯვის საკითხი.

¹ Н. Николодзе, Органические пороки городского самоуправления, Кавказ, 1899, № 18.

² „ცნობის ფურცელი“, 1905, № 2929.

მომდევნო ხანაში ბურჟუაზიულ ოპოზიციას კვლავ დაეტყო სიცოცხლის ნიშანწყალი. 1911 წლის მაისში მოწვეულ იქნა კავკასიის ქალაქთა წარმომადგენლების პირველი ყრილობა. ყრილობამ შუამდგომლობა აღძრა მთავრობის წინაშე კავკასიაში ერობის შემოღების, საერთო-სახელმწიფო ვალდებულებებისაგან ქალაქთა განთავისუფლების, თვითმმართველობის უფლებათა გაფართოების და სხვ. შესახებ, მაგრამ მეფის მთავრობა დათმობაზე არ მიდიოდა.

უფრო გაბედულად გამოვიდნენ მუნიციპალური მოღვაწეები კავკასიის ქალაქთა წარმომადგენლების მეორე ყრილობაზე (1913 წ.). თბილისის ქალაქის თავმა ა. არლუთინსკიმ ხაზი გაუსვა კავკასიის ქალაქების მიძიმე მდგომარეობას და მოითხოვა რეფორმები. ქუთაისის ქალაქის თავმა თ. ჩიქოვანმა აღნიშნა, რომ მთავრობამ პირველი ყრილობის არც ერთი შუამდგომლობა არ დააკმაყოფილა, მაგრამ ჩვენ იარაღი როდი უნდა დაეყაროთ, დაყინებით უნდა მოვითხოვოთ საქალაქო თვითმმართველობის უფლებათა გაფართოება.

პირველი მსოფლიო ომის წლებში მეფის მთავრობა მეტ ანგარიშს უწევდა ბურჟუაზიას. ოპოზიციური ელემენტების დასაწყენარებლად შინაგან საქმეთა სამინისტრომ დაიწყო საქალაქო დებულების გადამუშავება. 1916 წ. გამოქვეყნდა წინასწარი თეზისები, რომელიც მოიწონა სრულიად რუსეთის ქალაქთა კავშირის თათბირმა. საყურადღებოა პირველი-მეორე თეზისი: 1. ქალაქის საზოგადოებრივი მმართველობის ორგანოები — სახელმწიფო მმართველობის ადგილობრივი ორგანოებია. 2. ქალაქთა საზოგადოებრივი მმართველობა უძღვება ადგილობრივი მნიშვნელობის ყველა საქმეს, რომელიც არ შედის სახელმწიფოს ცენტრალური ორგანოების კომპეტენციაში. თეზისების თანახმად მნიშვნელოვნად უნდა შემცირებულიყო საარჩევნო ცენზი¹.

ცარისტული რეჟიმის პირობებში საქალაქო თვითმმართველობის უფლებათა გაფართოებისა და დემოკრატიზაციის საქმე ამ ვარაუდებს არ გასცილებია. ადგილობრივი მმართველობის ეს ორგანოები ბოლომდე ცარიზმის სახელმწიფო აპარატის კომპეტენცია შეზღუდულ და უუფლებო დანამატს წარმოადგენდა.

§ 2. ერობის შემოღების საკითხი

საეროზო რეფორმის გატარება იმავე მიზეზებმა განაპირობა, რამაც საერთოდ აიძულა მეფის მთავრობა დროის მოთხოვნილების შესაბამისად

¹ «Известия», 1916, № 4—5, გვ. 3.

რამდენადმე გადაეკეთებინა რუსეთის იმპერიის სოციალურ-პოლიტიკური შენობა. მეფის მთავრობის მოხელეები რეფორმის მიზნად საერობო მეურნეობის რეორგანიზაციას ასახელებდნენ.

რუსეთში ყველა გადასახად-ვალდებულებანი ძველი დროიდანვე ორი მთავარი სახისა იყო: 1. საკუთრივ სამეფო, საერთო სახელმწიფო გადასახადები და 2. ადგილობრივი შესაკრებელი, რომლისგან მიღებული თანხა ადგილობრივ საჭიროებათა დაკმაყოფილებისათვის უნდა გამოყენებულიყო. დროთა მსვლელობაში მეორე სახის გადასახად-ვალდებულებებმა მიიღო „საერობო“ შესაკრებელის საერთო სახელწოდება. 1851 წ. დებულება-წესდებას საგუბერნიო საერობო შესაკრებელთან ერთად შემოჰქონდა სახელმწიფო საერობო შესაკრებელის ცნება, რაც ცარიზმის კანონმდებლობის არათანმიმდევრობაზე მიუთითებს¹, მაგრამ ეს გამოწვეული იყო სურვილით საერობო სახსრები გამოეყენებინათ საერთო-სახელმწიფოებრივი საჭიროებისათვის.

1851 წლის კანონით საერობო შესაკრებელ-ვალდებულებათა გამგებლობა ევალებოდა განსაკუთრებულ კომიტეტს და საკრებულოებს, რომელშიც მთავრობის მოხელეებთან ერთად შედიოდნენ თავადაზნაურთა სამაზრო და საგუბერნიო წინამძღოლები, ქალაქის თავები და წოდებათა წარმომადგენლები. საერობო ბიუჯეტის პროექტს ამტკიცებდა ფინანსთა მინისტრი. ბიუჯეტის პრაქტიკული შესრულება ევალებოდა საერთო-სახელმწიფო ორგანოებს¹.

ხანგრძლივმა გამოცდილებამ მეფის მთავრობა იმ დასკვნამდე მიიყვანა, რომ ადმინისტრაციას, რომელიც დაკავებული იყო თავის უშუალო მოვალეობის შესრულებით, არ შეეძლო საერობო შესაკრებელ-ვალდებულებათა გამგებლობა. მან გადაწყვიტა ეს საქმე ადგილობრივი საზოგადოების წარმომადგენელთა კომპეტენციაში გადაეცა. მაგრამ ფაქტიურად სარეფორმო საქმიანობის დროს საერობო ვალდებულებათა საკითხი მთავარი როლი იყო. რევოლუციური სიტუაციის ვითარებაში საერობო რეფორმა ძალიან შორს გასცდა ამ ვიწრო სფეროს და აღძრა ეკონომიური. საზოგადოებრივ-პოლიტიკური და კულტურული ცხოვრების ფართო საკითხები.

მეფის მთავრობა თავგამოდებით იცავდა თავის მონოპოლიურ უფლებას საერობო რეფორმის მომზადების საქმეში. მთავრობის კომისიებში თვით პრივილეგიური წოდების წარმომადგენლებიც კი არ ყოფილან დაშვებული. 1862 წ. გამოქვეყნდა „საერობო დაწესებულებათა მოწყობის მთავარი საწყისები“, 1864 წ. 1 იანვარს კი ალექსანდრე მეორემ და-

¹ Б. Веселовский, История земства за сорок лет, т. I, С.-Петербург, 1908, гл. 1—8.

ამტკიცა დებულება სამაზრო და საგუბერნიო საერობო დაწესებულებათა შესახებ, რომლის ძირითადი მუხლების შინაარსი ასეთი იყო:

ადგილობრივი სამეურნეო საქმეების გამგებლობისათვის იქმნებოდა საგუბერნიო და სამაზრო დაწესებულებანი. საერობო დაწესებულებათა ფუნქციებში შედიოდა: საერობო ქონების, კაპიტალების და ფულად შესაკრებელთა გამგებლობა; ერობის კუთვნილი შენობების, სხვა ნაგებობების და გზების მოწყობა-შეკეთება; ზრუნვა ვაჭრობა-მრეწველობის განვითარებისათვის, მონაწილეობა სახალხო განათლებისა და ჯანმრთელობის დაცვის საქმეში; ადგილობრივი ვითარების შესწავლა, მხარის საჭიროებაზე სათანადო ცნობების წარდგენა და მთავრობის წინაშე სხვადასხვა სახის შუამდგომლობების აღძვრა; საერობო არჩევნების ჩატარება და საერობო დაწესებულებების შენახვისათვის თანხის გამოყოფა; იმ საქმეთა გამგებლობა, რაც შესაძლოა მომავალში გადასცემოდა ერობის ფუნქციებს.

ყალიბდებოდა ორსაფეხურიანი ერობა. სამაზრო და საგუბერნიო ერობების განმკარგულებელ ორგანოებს წარმოადგენდნენ ხმოსანთა კრებები, მუდმივმოქმედ აღმასრულებელ ორგანოებს კი გამგეობები. დებულება საკმაოდ მაღალ საარჩევნო ცენზს აწესებდა. ყალიბდებოდა სამი საარჩევნო კურია — მაზრის მიწათმფლობელთა და ქალაქისა და სოფლის საზოგადოებათა კურიები. ისინი ირჩევდნენ სამაზრო ერობათა კრებების ხმოსნებს. საგუბერნიო ერობის ხმოსნები კი სამაზრო ერობის ხმოსანთა წრიდან აირჩეოდნენ. სამაზრო ერობის გამგეობა სამი, ხოლო საგუბერნიო ერობის გამგეობა 6 წევრისაგან შედგებოდა. გამგეობის თავმჯდომარეებს ამტკიცებდა გუბერნატორი და შინაგან საქმეთა მინისტრი¹.

ერობების მოქმედების სფერო ვიწრო იყო, ხოლო მათთვის მიცემული ძალაუფლება — მეტად სუსტი. მართალია, ერობების გამგებლობაში გადაიკა საგუბერნიო საერობო შესაკრებლით მიღებულ თანხა, მაგრამ მთავრობამ დააწესა ბიუჯეტის დახარჯვის გარკვეული წესი, რასაც საერობო მოღვაწეები გვერდს ვერ უვლიდნენ. ერობას პირველ რიგში თანხები უნდა გამოეყო მის რაიონში მდგარი ადგილობრივი სამოქალაქო მმართველობის და მომრიგებელი სასამართლოების შენახვის, დიდმნიშვნელოვანი გზების გაყვანა-შეკეთებისა და სხვ. სახელმწიფოებრივი საჭიროებისათვის. დანარჩენი თანხა ერობას შეეძლო თავისი შეხედულებისამებრ დაეხარჯა, მაგრამ საამისოდ ბევრი არაფერი რჩებოდა. 1871 წელს, მაგალითად, მთავრობის მითითებით დაიხარჯა საერობო ბიუჯეტის 58%, დანარჩენი თანხა ერობის არსებით საჭიროებათა დაკმაყოფილებას მოხმარდა.

მიუხედავად იმისა რომ ერობას ვიწრო ასპარეზი და შეზღუდული ძა-

¹ Земство, Политико-экономический сборник, С.-П. 1864, зб. 7—51.

ლაუფლება მიეცა, საერობო რეფორმის გატარება დადებით მოვლენას წარმოადგენდა. ერობა (ცოტა მოგვიანებით საქალაქო თვითმმართველობა) თავისი ორგანიზაციის ფორმით აშკარად დაუპირისპირდა თვითმპყრობელობის ძველ სოციალურ-პოლიტიკურ შენობას. აქამდე რუსეთის აბსოლუტურ მონარქიული სახელმწიფოსათვის სრულიად უცნობი იყო საარჩევნო პრინციპზე დამყარებული დაწესებულების არსებობა. ადგილობრივი თვითმმართველობის ორგანოები კი სწორედ ამ პრინციპის საფუძველზე ჩამოყალიბდნენ.

1864 წ. 1 იანვრის უმაღლესი ბრძანებით ერობები დაარსდა ევროპული რუსეთის 35 გუბერნიაში. სამაზრო ერობის ხმოსანთა 42%-ს შეადგენდნენ თავად-აზნაურები, 16%-ს — რაზნოჩინელები და 38⁰/₀-ს — გლეხები. საგუბერნიო ერობებში კი თავად-აზნაურთა წარმომადგენლობა უდრიდა 81%-ს. რაზნოჩინელების — 12%-ს, გლეხობის — 7⁰/₀-ს¹.

ვ. ი. ლენინი მიუთითებდა, რომ როგორც ყველა ბურჟუაზიული რეფორმა, ისე, კერძოდ, საერობო რეფორმა განპირობებული იყო რევოლუციური სიტუაციით. ცარიზმის მხრიდან ეს იყო ერთგვარი დათმობა. რომლის პოლიტიკურ მიზანს წარმოადგენდა ლიბერალური მოღვაწეების მთავრობის მხარეზე გადაბირება. საერობო რეფორმა იყო კონსტიტუციის მცირე ნაგლეჯი, რომლითაც გააჩუმეს კონსტიტუციისათვის მეზობლი ლიბერალები და რამდენადმე განამტკიცეს თვითმპყრობელობა.

ლენინი ხაზს უსვამდა ცარიზმის მისწრაფებას შეესუსტებინა, შეევიწროებინა და მთავრობის ადმინისტრაციისათვის დაექვემდებარებინა საერობო დაწესებულებანი. მისი განცხადებით „ერობას იმთავითვე არგუნა ბედმა რუსეთის მართვა-გამგეობის ურმის მეხუთე თვალი ყოფილყო, ისეთი თვალი, რომელსაც ბიუროკრატია მხოლოდ იმდენად ითმენდა, რამდენადაც მისი ყოვლისშემძლეობა არ ირღვეოდა, ხოლო მოსახლეობისაგან არჩეული დეპუტატების როლი განისაზღვრებოდა მარტოდენ პრაქტიკით, იმ ამოცანათა უბრალო ტექნიკური შესრულებით, რომლებიც იმავე მოხელეებმა დასახეს. ერობებს არ გააჩნდათ თავიანთი აღმასრულებელი ორგანოები, მათ უნდა ემოქმედათ პოლიციის საშუალებით; ერობები არ იყვნენ ურთიერთშორის დაკავშირებული და ერთბაშად დაექვემდებარნენ ადმინისტრაციულ კონტროლს და თავისთავად ასეთი უვნებელი დათმობის შემდეგ, მთავრობა ერობის შემოღების მეორე დღესვე შეუდგა მის სისტემატურ შევიწროებას და შეზღუდვას: ყოვლისშემძლე მოხელეთა ხროვას არ შეეძლო შეგუებოდა ყველა წოდებათაგან არჩეულ წარმომადგენლობას და ყოველნაირად სდევნიდა მას“².

¹ Б. Веселовский, История земства..., т. 3, гл. 680—681.

² ვ. ი. ლენინი, თხზ., ტ. 5, გვ. 42—43.

მიუხედავად ამისა ერობები ცხოვრების ზოგიერთ სფეროში სასარგებლოდ საქმიანობდნენ. მათ მნიშვნელოვნად გაამრავლეს დაწყებითი სკოლები, გიმნაზია-სემინარიები, გახსნეს საავადმყოფოები, წერილი საკრედიტო დაწესებულებები, ხელს უწყობდნენ სოფლის მეურნეობის პროგრესს.

იცავდა რა თავის უფლებებს, ერობა თითქმის ყოველთვის ოპოზიცი-აში ედგა მთავრობას. ეს იყო ბურჟუაზიულ-ლიბერალური, ლეგალური ოპოზიცია, მაგრამ მთავრობას იგი მაინც აშინებდა. ს. ვიტეს ერობა მი-აჩნდა ისეთ ორგანიზაციად, რომელიც შეუთავსებელი იყო თვითმპყრობე-ლურ წყობილებასთან და თავის ხასიათით წარმოადგენდა კონსტიტუციურ დაწესებულებას. ვ. ი. ლენინი მიუთითებდა საერობო ოპოზიციის გარკ-ვეულ დადებით მნიშვნელობაზე და მას განიხილავდა, როგორც დამხმარე ფაქტორს თვითმპყრობელობის წინააღმდეგ ბრძოლაში.

მეფის მთავრობამ რუსეთის იმპერიის განაპირა მხარეები მოუმზადებ-ლად მიიჩნია საერობო რეფორმისათვის. ერობა არ მიუღიათ არხანგელს-კის, ასტრახანის და ორენბურგის გუბერნიებს, რადგან იქ თითქმის სრუ-ლიად არ იყო თავადაზნაურობა. საერობო რეფორმა არ გატარებულა პო-ლონეთში, ბალტიისპირეთში, ბელორუსიაში, ციმბირში, კავკასიაში, ყაზახისტანსა და შუა აზიაში.

რუსეთის იმპერიის განაპირა მხარეები, რომელნიც განსაკუთრებით მწვავედ გრძობდნენ „ხალხთა საპყრობილეს“ სოციალურ-პოლიტიკური სისტემის „სიმშვენიერეს“, ცარიზმის კოლონიური პოლიტიკის სიმწვა-ვეს, ბუნებრივია, იბრძოდნენ თავის უფლებათა გაფართოებისათვის. გა-ნაპირა მხარეებში ადგილობრივი თვითმმართველობის იდეას გაცილებით მეტი მიზიდულობის ძალა ჰქონდა, ვინემ იმპერიის ცენტრალურ გუბერ-ნიებში.

* * *

საქართველოს პროგრესული ძალები კარგად ამჩნევდნენ საერობო რეფორმის კულდმოკვეცილ ხასიათს, მაგრამ არსებულთან შედარებით სა-ერობო დაწესებულებანი პროგრესის გზაზე წინ გადადგმულ ნაბიჯად მი-აჩნდათ და თავგამოდებით იბრძოდნენ მისი შემოღებისათვის.

რუსეთის 35 გუბერნიაში საერობო რეფორმის გატარების შემდეგ, საერობო თანხების გამგებლობის წესი რამდენადმე შეიცვალა სხვა მხა-რეებშიც. კავკასიის მართვა-გამგეობის შესახებ 1869 წლის კანონის თა-ნახმად ჩამოყალიბდა საერობო ვალდებულებათა განსაკუთრებული საკ-რებულო, რომელიც ერთ-ერთი დაწესებულების სახით შევიდა მეფის-

ნაცვლის მთავარსამმართველოში. განსაკუთრებულ საკრებულოს ჰქონდა მხოლოდ სათათბირო ფუნქციები. მის სხდომებზე განიხილებოდა საერობო შესაჯრებლის აკრეფის საკითხი და გამოითქმოდა ვარაუდები მიღებული თანხის დახარჯვის თაობაზე. საერობო ბიუჯეტის პრაქტიკული შესრულება დაკისრებული ჰქონდა მთავარსამმართველოს დეპარტამენტს და გუბერნია-მაზრების უფროსებს¹.

XIX ს-ის 80-იან წლებში კავკასიის ადმინისტრაციამ აღიარა, რომ თავის პირდაპირი დიდი მოვალეობის გამო, მას არ შეუძლია საერობო მეურნეობის გაძღოლა. უმაღლეს მთავრობაში გაიგზავნა შუამდგომლობა, რომ ამიერკავკასიაში, რუსეთის არასაერობო გუბერნიების მსგავსად, საერობო მეურნეობის გამგებლობისათვის დაეარსებინათ განმკარგულებელი კომიტეტები. მეფის მთავრობა. თითქოს თანაგრძნობით შეხვდა ამ იდეას. 1888 წელს ფინანსთა სამინისტროში შედგენილ იქნა სათანადო ბარათი, რომლის თანახმად საგუბერნიო განმკარგულებელი კომიტეტების მუშაობაში, მთავრობის მოხელეებთან ერთად, მონაწილეობა უნდა მიეღოთ ადგილობრივ მიწათმფლობელთა წარმომადგენლებსაც. ეს უკანასკნელნი განიხილავდნენ საერობო ბიუჯეტის პროექტებს, ნატურალური ვალდებულებების ფულზე გადაყვანის საკითხს და უძრავი ქონების შეფასების დროსაც იტყოდნენ თავის სიტყვას. სამინისტროს აზრით, ადგილობრივი საზოგადოების წარმომადგენლები გააუმჯობესებდნენ საგუბერნიო კომიტეტების — მთავრობის ამ დაწესებულებათა მუშაობას. ფინანსთა სამინისტროს კომპეტენტური აზრის მიუხედავად, უმაღლესი მთავრობის საწინააღმდეგო პოზიციის გამო, საგუბერნიო განმკარგულებელი კომიტეტები საქართველოსა და კავკასიაში არ დაარსებულა².

ყველასათვის ცხადი გახდა, რომ მეფის მთავრობა განგებ აძნელებდა და აჭიანურებდა განაპირა მხარეებში საერობო რეფორმის გატარებას, „ტუზემცებისათვის“ შეზღუდულ საერობო თვითმმართველობასაც კი არ იმეტებდა. ქართველი თავადაზნაურული და ბურჟუაზიული ლიბერალები, რომლებსაც ძალიან ხშირად დემოკრატებიც უჭერდნენ მხარს, საკმაოდ ენერგიულად საქმიანობდნენ, რათა აეძულებინათ ცარიზმი საერობო რეფორმა საქართველოშიც გაეტარებინა.

ჯერ კიდევ 1867 წელს გორის მაზრის თავადაზნაურთა კრებამ აღძრა საკითხი თბილისის გუბერნიაში საერობო დაწესებულებათა დაარსების თაობაზე³. მაგრამ ეს პირველი ხმა მეტად სუსტი იყო და სრულიად უყურადღებოდ იქნა დატოვებული.

¹ სსცია, ფ. 12, ანაწ. 11, საქ. 243, ფურც. 1—4.

² იქვე, ფ. 13, ანაწ. 10, საქ. 22, ფურც. 6—8.

³ იქვე, ფურც. 8—9.

თავადაზნაურთა წოდება საერთოდ არა თუ ერობის შემოღებას მოითხოვდა, არამედ წინააღმდეგიც კი იყო საერობო დაწესებულებათა დაარსებისა, რადგან ამას მოჰყვებოდა მისი მამულების დაბეგვრა. ამიტომ იყო რომ თავადაზნაურთა წოდებრივ ორგანიზაციას (დებუტატთა საკრებულოს) გორელთა გაუბედავი გამოსვლის შემდეგ დიდხანს ხმა აღარ ამოუღია ერობის საკითხზე.

ქართულ და რუსულ დემოკრატიულ პრესაში კი თითქმის ყოველთვის იბეჭდებოდა წერილები, რომლებშიც გარკვეულ ასახვას პოულობდა რუსეთის საერობო დაწესებულებათა საქმიანობა და თანაც გამოითქმოდა სურვილი ანალოგიური დაწესებულებების საქართველოში დაარსების თაობაზე.

XIX ს-ის 80-იანი წლების დამდეგს ილია ჭავჭავაძე წერდა: „თუ ერობის საქმე ისე მოწყობილია, რომ იგი მართლა ერობდეს, უკეთესი ნატვრა ჯერ ამხანად მაინც მეტის მეტი წადილი იქნება“. ამასთან ერთად ილია იწუნებდა ერობის შესახებ არსებულ ცარიზმის კანონმდებლობას, რომელიც აქტიურ და პასაურ საარჩევნო ხმას მხოლოდ მდიდრებს, ცენზიანებს აძლევდა და ერის ძირითად ნაწილს ადგილობრივი თვითმმართველობის გარეთ ტოვებდა. ილიას არც ის მოსწონდა, რომ კანონი თვით იძლეოდა საერობო დაწესებულებათა მოქმედების სქემას და ერობის საკუთარ ინიციატივას ძალზე ზღუდავდა. „თუ მაგალითად, კანონით დაიდვა, — წერს ილია, — რაც შეაგება მარტო ისა სთქვიო და რა წამალიც შევინდომო ის წამალი იხმარეო, მაშინ, ერობა ტვირთია და არა შვება და შეღავათი. მაშინ ერობა ერს კისერზე დააწვება მთელი თავისი სიმძიმითა, ხარჯებითა, გადასახადებითა და მუხუდოს ოღენა სიკეთესაც კი არ მოუტანს. ერობა, — განაგრძობს ილია, — ორკეცი რამ არის: ერთით მოვალეობაა და მეორით უფლება. ერთით ტვირთია, მეორით ღონეა სიკეთისა, რადგან ერი თვითონვე ბატონობს თავის თავს... რალა თქმა უნდა, ერობაში სანუკვარი უფრო მეორეა. აღამიანი ტვირთს ადვილად იკისრებს, როცა საჭიროა ეგ თავის თავისვე საკეთილოდ. მაშასადამე აქ ყველაფერი იმაზეა დამოკიდებული, რა მოედანი ექნება შემოზღუდული ერობას, რა ფართო გზა მოქმედებისა დაენიშნება და უკეთესთა მოჭირნახულეთა არჩევანი დაბრკოლდება რითიმე თუ არა“¹.

ილიას ეს სიტყვები ცხადყოფს, რომ მას არ მოსწონდა ცარიზმის ბიუროკრატიული აპარატის დამატების სახით არსებული ერობა და იბრძოდა ჭეშმარიტი ადგილობრივი თვითმმართველობის მოპოვებისათვის.

მეფის მთავრობა კი არათუ ერობების დემოკრატიზაციაზე და მათი კომპეტენციის გაფართოებაზე არ ფიქრობდა, არამედ პირიქით, მხოლოდ

¹ ი. ჭავჭავაძე, თხზ., ტ. 5, გვ. 135—136.

იმაზე ოცნებობდა, რომ უკან წაეღო XIX ს-ის 60-იანი წლების დათმობები. მეორე რევოლუციური სიტუაციის დამთავრებისა და რეაქციის დაწყების შემდეგ ცარიზმმა თანდათანობით განახორციელა თავის ეს მისწრაფება, გაატარა კონტრარეფორმები, მოახერხა ადგილობრივი თვითმმართველობის ორგანოები ადმინისტრაციის კიდევ უფრო მკაცრი კონტროლის ქვეშ მოექცია და თანაც შეეზღუდა მათი მოქმედების სფერო.

1882 წ. თბილისის გუბერნიის თავადაზნაურობის დეპუტატთა საკრებულოს სხდომაზე განხილულ იქნა საქართველოში ერობის შემოღების საკითხი. მთავრობაში გასაგზავნი დასაბუთებული შუამდგომლობის შედგენა დაევალა სპეციალურ კომისიას. მაგრამ მალე ყველასათვის ცნობილი გახდა, რომ უმაღლეს მთავრობაში მუშაობდნენ საერობო დაწესებულებათა რეორგანიზაციის პროექტზე, რომლის დამტკიცებამდე აზრი არ ჰქონდა შუამდგომლობის შედგენასა და გაგზავნას.

გავიდა ამის შემდეგ 12 წელი და თბილისის თავადაზნაურთა ერთ-ერთ სხდომაზე გ. თუმანიშვილმა განაცხადა, რომ ერობის შემოღებას ახლა აღარაფერი დააბრკოლებს, რადგან ჯერ კიდევ ოთხი წლის წინ დამთავრდა ახალი დებულების საფუძველზე საერობო დაწესებულებათა რეორგანიზაცია. მან თავადაზნაურობას მოუწოდა ესარგებლა ხელსაყრელი მომენტი, როცა მეფის მთავრობა წინა პლანზე აყენებდა თავადაზნაურთა ინტერესების დაცვას და აღეძრა შუამდგომლობა საქართველოში ერობის შემოღებას შესახებ. ამ მომენტის ხელიდან გაშვება დიდი ცოლვა იქნება ქვეყნისა და მომავალი თაობის წინაშე.

თავადაზნაურთა წინამძღოლებმა და დეპუტატებმა აღიარეს საკითხის დიდი მნიშვნელობა და საჭიროდ ჩათვალეს მისი გადაცემა კომისიისათვის. კომისიაში შევიდნენ საგუბერნიო და სამაზრო წინამძღოლები. გ. თუმანიშვილს დაევალა შესაფერისი პროექტის შედგენა. ამ უკანასკნელმა პირნათლად შეასრულა დავალება და 1896 წ. თებერვალში თბილისის გუბერნიის თავადაზნაურთა წინამძღოლს წარუდგინა ბარათი — „საქართველოში საერობო დაწესებულებათა დაარსების აუცილებლობის შესახებ“¹.

საერობო თვითმმართველობა, წერს გ. თუმანიშვილი თავის ბარათში, მოიცავს ადგილობრივ ინტერესთა ფართო სფეროს, რომლის დაკმაყოფილება შეიძლება მხოლოდ ადგილობრივი საზოგადოების აქტიური მონაწილეობით. ამას გვიჩვენებს ჩვენს პირობებში საქალაქო თვითმმართველობის მაგალითიც. საერობო მმართველობა უფრო ფართო სფეროს მოიცავს და მისმა წარმოებამ კანცელარული მეთოდებით არ შეიძლება არ მოახდინოს ქვეყნის სასიცოცხლო მისწრაფებათა პარალიზება.

¹ Записки и статьи о введении земских учреждений в Тифлисской губернии, сост. Г. М. Тумановым, Тиф., 1897, гл. 6—8.

თუ ჩვენი ქალაქები, განაგრძობს ბარათის ავტორი, ჯერ კიდევ 25 წლის წინათ ჩაითვალნენ თვითმმართველობისათვის მომზადებულად, თუ რუსეთის შიგა გუბერნიები საერობო თვითმმართველობისათვის მზად იყვნენ 31 წლის წინათ, არ შეიძლება დავეჭვდეთ იმაში, რომ თბილისის გუბერნიის მოსახლეობა ამჟამად მზადაა საერობო რეფორმისათვის.

შემდეგ გ. თუმანიშვილი აღნიშნავს, რომ თბილისის გუბერნიას არ ახასიათებს დიდად განახლებული სპეციფიკური პირობები და აქ სავსებით შესაძლებელია 1890 წლის დებულებას უცვლელად გადმოტანაო. გამონაკლისებსა და დამატებებზე შუამდგომლობის აღძვრა საქმის მსვლელობას დაავიანებსო. თავადაზნაურობა დარწმუნებული უნდა იყოს იმაში, რომ ერობის გარეშე შეუძლებელია მისი და მთელი მხარის მატერიალური და სულიერი აღორძინება, რომ ერობის შემოღება წარმოადგენს პირველ ნაბიჯს პროგრესის გზაზე. ბოლოს გ. თუმანიშვილმა მოუწოდა თავადაზნაურობას დაუყოვნებლივ აღედგა შუამდგომლობა საქართველოში საერობო დაწესებულებათა დაარსების თაობაზე¹.

1897 წ. 1 ივნისს თბილისის გუბერნიის თავადაზნაურთა საკრებულოს სხდომაზე განხილულ იქნა გ. თუმანიშვილის ზემოაღნიშნული ბარათი. დეპუტატთა ერთი ნაწილი არ დაეთანხმა ავტორის თვალსაზრისს. ი. ანდრონიკაშვილმა, სავანელმა, ჯაფარიძემ და ორბელიანმა განაცხადეს, რომ ჩვენთან ჯერ არ არის მომზადებული პირობები ერობის შემოსაღებადო².

ამ არჩირეაქციონერთა გამოსვლის შემდეგ სიტყვა მოითხოვა ილია ჭავჭავაძემ. „ ჩვენს განსახილველად შემოთავაზებულა საკითხი, — განაცხადა მან, — არც ისე რთულია. მისი გადაჭრა ამ სხდომაზევე შეიძლება. წინადადებას გვაძლევენ ვიყოთ ჩვენივე ფულის გამგებლნი. ჩვენ ამჟამად საერობო სალაროში შეგვაქვს 600 ათას მანეთზე მეტი წლიურად. რატომ ჩვენ თვითონ არ უნდა მივცეთ ამ თანხას ისეთი მიმართულება, როგორც ჩვენ გვსურს. ვინ შეიძლება გაილაშქროს ამის წინააღმდეგ?³

ილიას გამოსვლას საკრებულოს დეპუტატთა დიდი ნაწილი ოვაციით შეხვდა, მაგრამ თავადაზნაურთა უმცირესობა სხვანაირად აზროვნებდა. გუბერნიის თავადაზნაურთა წინამძღოლს წინადადებით საკითხი კვლავ კომისიას გადაეცა შესასწავლად⁴.

ამის შემდეგ პოლემიკა პრესის ფურცლებზე გაჩაღდა. ქართულ და რუსულ ჟურნალ-გაზეთებში საქმაო რაოდენობით გამოქვეყნდა ერობის მომხრეთა და მოწინააღმდეგეთა წერილები.

¹ Записки и статьи о введении земских учреждений в Тифлисской губернии, сост. Г. М. Тумановым, Тиф., 1897, გვ. 18—21.

² იქვე, გვ. 26—30.

³ იქვე, გვ. 51—52.

⁴ იქვე.

ნ. ნიკოლაძე უსაყვედურებს თავადაზნაურობას, რომ იგი არ არის და-
ინტერესებული საქართველოსათვის ესოდენ მნიშვნელოვანი საკითხის გა-
დაწყვეტით. პრივილეგიურ წოდებას თითქოს აშინებს გადასახადებით და-
ბეგვრა, მაგრამ ყველამ იცის, რომ ერობები ჯერ არ არის, თავადაზნაურობა
მამულეები კი უკვე დაიბეგრაო. გადასახადებს ყველა წოდებებისაგან იღე-
ბენ, მიღებული თანხის გამგებლობა კი პოლიციის ხელშიაო.

1864 წლის კანონებით რუსეთის შიდა გუბერნიებში პოლიციას ჩამო-
ერთვა სამართლის წარმოებისა და სამეურნეო გაძგებლობის ფუნქციები,
რომელიც გადაეცა ხალხის წარმომადგენლებს. 1864 წ. საერობო დებუ-
ლებას, — ხაზგასმით აღნიშნავს ნ. ნიკოლაძე, — ბევრი ნაკლოვანებები
აქვს. ჩვენთვის რომ მოეცათ ნება საკუთარი სურვილისამებრ გადაგვეწ-
ყვიტა საკითხი, ვინმე შეძლებდა მის უკეთესად გადაჭრას, მაგრამ სახელ-
მწიფოებრივი და საზოგადოებრივი საქმეები ამ ნიშნით როდი ფასდებაო.
საერობო დაწესებულებათა შესახებ ახალი 1890 წლის დებულება, აღნიშ-
ნავს ნიკოლაძე, კიდევ უფრო ავიწროებს ერობის მოქმედების სფეროს.
მაგრამ მის საფუძველზე მოწყობილ საერობო დაწესებულებებს ჩვენთვის
მიინც დადებითი მნიშვნელობა ექნებაო.

პოლიციას, განაგრძობს ნ. ნიკოლაძე, არც სურვილი აქვს და არც სა-
შუალება საერობო საქმეების მართვისა. ხოლო თუ ერობა ადგილობრივი
მოსახლეობის ხელში იქნება, მას აღმოაჩნდება ამ საქმის გაძღოლის სურ-
ვილიც და საშუალებაც. საქართველოში ჯერ არაა ერობა, მაგრამ მოსახ-
ლეობა ნებაყოფლობით იბეგრავს თავს ზოგან სკოლის მოწყობისათვის,
ზოგან არხისა თუ წყალსადენის გაყვანისათვის და სხვ. როცა ჩვენი მახ-
რები თვითმმართველობას მიიღებენ, ადგილობრივი შემოსავლის წყაროე-
ბი კიდევ უფრო გამრავლდებაო¹.

ამიერკავკასიაში ერობის შემოღების წინააღმდეგ გაილაშქრეს მხოლოდ
„ჩერნომორსკი ვესტნიკმა“ და „კავკაზმა“, მაგრამ მათი ხმა ცალად გაის-
მა თანამგრძნობ ჟურნალ-გაზეთთა ქოროში.

ამ ორი რეაქციული გაზეთიდან უფრო აშკარად გამოვიდა „ჩერნომორ-
სკი ვესტნიკი“, რომელმაც გამოაცხადა, რომ მხარე მომზადებული არ
არის ერობისათვისო. ჯერ უნდა გავრცელდეს სწავლა-განათლება და მერე
დავსვათ ერობის შემოღების საკითხიო. ამ გაზეთის ვაი პუბლიცისტებს
ავიწყდებოდათ, რომ საქართველო-ამიერკავკასიის საზოგადოებრიობა
სწორედ იმიტომ მოითხოვდა საერობო დაწესებულებათა შემოღებას, რომ
მათ უფრო ფართო ნიადაგზე დაეყენებინათ სწავლა-განათლება და მო-
სახლეობას დახმარებოდნენ სამეურნეო საქმიანობაში.

ქართველ თავადაზნაურთა წოდებრივ ორგანიზაციას არ შეეძლო ანგა-

¹ „მოამბე“, 1897, № 6, განყოფ. II, გვ. 28—52.

რიში არ გაეწია ფართო საზოგადოების მოთხოვნისათვის. ქუთაისის გუბერნიის თავადაზნაურობის დეპუტატთა საკრებულომ ერობის შემოღების თაობაზე შეიმუშავა ვრცელი პროექტი, რომელიც 1897 წ. 12 ნოემბერს გაავრცავნა დასამტკიცებლად უმაღლეს მთავრობაში.

აღმოსავლეთ საქართველოს თავადაზნაურობა უფრო ნელა მოქმედებდა. ამიტომ ქუთაისში გამოძვალა გაზეთი „მეურნე“ საყვედურით შენიშნავდა, რომ თბილისის გუბერნიის თავადაზნაურობისაგან მეტს მოველოდით, სინამდვილეში კი ერობის შემოღების თაობაზე შუამდგომლობის აღძვრა ქუთაისელებმა დაასწრესო. წერილის ავტორი შიშს გამოთქვამდა — თბილისის გუბერნიის თავადაზნაურთა მიერ საქმის კომისიისათვის გადაცემამ ვაი თუ ცუდი შედეგი გამოიღოს ქუთაისელთა შუამდგომლობის წარმატების საქმეში. ჯობდა სულ არ განეხილათ საკითხი, ვიდრე კომისიისათვის გადაეცათ ის საქმე, რომლის განხორციელებაზე მხარე აგერ 25 წელია ოცნებობსო¹.

ბოლოს და ბოლოს თბილისის გუბერნიის თავადაზნაურთა წოდებრივმა ორგანიზაციამაც, გ. თუმანიშვილის ზემოგანხილული ბარათების საფუძველზე, შეიმუშავა საქართველოში ერობის შემოღების პროექტი და 1899 წ. 31 დეკემბერს გაავრცავნა იგი უმაღლეს მთავრობაში.

მალე ამ მნიშვნელოვან საქმეს გამოეხმაურნენ სხვა საზოგადოებანი და დაწესებულებანი. ერობის შემოღების თაობაზე ორგზის აღძრა შუამდგომლობა (1899 და 1903 წელს) კავკასიის სოფლის მეურნეობის საზოგადოებამ. 1901 წ. ანალოგიური შუამდგომლობები იქნა აღძრული მეღვინეთა, მიწათმოქმედთა, მერძევეთა და კუსტარულ მრეწველთა ყრილობებს მიერ. 1904 წ. ამ საერთო მოძრაობას შეუერთდნენ და სათანადო შუამდგომლობები აღძრეს მებაძბეთა ყრილობამ, კავკასიის სამედიცინო და სოხუმის სოფლის მეურნეობის საზოგადოებებმა².

ამრიგად, საქართველოსა და ამიერკავკასიის საზოგადოებრიობა თითქმის ერთსულოვნად მოითხოვდა ერობის შემოღებას. მთავრობაც თითქოს არ იყო წინააღმდეგი ერობა ებოძებინა ამ განაპირა მხარისათვის, მაგრამ ბიუროკრატია, სხვადასხვა მოტივით ყოველთვის ახერხებდა საქმის გაჭიანურებას.

მხოლოდ მას შემდეგ, რაც მშვედლობიანი ადრესებისა და შუამდგომლობების ნაცვლად მეფის მთავრობას რევოლუციური მასების საბრძოლო ყიჟინა მოესმა, კავკასიის მეფისნაცვალს თვით გამოვიდა ერობის შემოღების ინიციატორად, რათა ამ მცირე დათმობით ლიბერალურ საზოგადოება დაეკმაყოფილებინა და იგი რევოლუციის წინააღმდეგ ბრძოლაში გამოეყენებინა.

¹ „მეურნე“, 1897, № 9, № 12.

² სსცია, ფ. 13, ანაწ. 10, საქ. 22, ფურც. 8.

მეფისნაცვალმა სპეციალური ცირკულარი დაუგზავნა გუბერნატორებსა და მაზრის უფროსებს, დაავალა მათ მოეწვიათ მოსახლეობის სხვადასხვა ფენის მიერ არჩეული წარმომადგენელთა საერობო თათბირები.

მშრომელმა მასებმა, რომელნიც ბოლშევიკებს მიჰყვებოდნენ, ბოიკოტი გამოუცხადეს ამ თათბირებს, რის გამო საქართველოს უმრავლეს რაიონებში საერობო კამპანია გაკოტრდა. მხოლოდ ლიბერალურმა ინტელიგენციამ, თავადაზნაურულ-ბურჟუაზიულმა წრეებმა მიიღეს მონაწილეობა საკითხის განხილვაში.

მეფის მთავრობის მოხელეები აღიარებდნენ, რომ ამიერკავკასიაში ერობის შემოღების გზაზე ყველა დაბრკოლება მოხსნილი იყო. მაგრამ ისინი საჭიროდ მიიჩნევდნენ იმის გამორკვევას ამ მხარისათვის განსაკუთრებული დებულების შედგენა იყო საჭირო, თუ შეიძლებოდა არსებული დებულებების გატარება¹.

1905 წ. 16 ივლისს შედგა მეფისნაცვლის საბჭოს გაფართოებული სხდომა, რომელშიც მონაწილეობა მიიღეს ადმინისტრაციისა და ადგილობრივი საზოგადოებრიობის წარმომადგენლებმა. სხდომის განხილვისას ვორონცოვ-დაშკოვმა განაცხადა: „შევიკრიბეთ რათა საფუძველი დავუდოთ კავკასიაში ერობის შემოღების საქმეს. თათბირები ღია იქნება, მაგრამ იმედი მაქვს, რომ იქ არ დაუშვებთ არაკეთილსაიმედო პირებს. უახლოესი მიზანია საერობო თათბირების ორგანიზაცია და ახლა მხოლოდ ამ საკითხზე გამოვთქვით ჩვენი აზრობა².“

მიუხედავად ამ გაფრთხილებისა, სხდომაზე გამოსულ ორატორთა ერთმა ნაწილმა არ იკმარა ასეთი ვიწრო სფერო. აგრონომმა სააკოვმა განაცხადა: უდავოა, საერობო რეფორმას დიდი მნიშვნელობა აქვს და მოსახლეობა მასზე დიდი ხანია ოცნებობს. საერობო საკითხი არა თუ მომწიფდა, არამედ გადამწიფდა კიდევ. მაგრამ რაც არ უნდა დიდი იყოს საერობო რეფორმის მნიშვნელობა, იგი მაინც არასაკმარისია მხარის დამშვიდებისათვის. საჭიროა დავაჩქაროთ აგრეთვე აგრარული, სასამართლო, სასკოლო და სხვა რეფორმების გატარება, რათა ჩვენი მხარე უფლებრივად გაუთანაბრდეს ცენტრალური რუსეთის გუბერნიებსო.

რამდენიმე წლის წინ, განაგრძო ორატორმა, მე გულწრფელად ვიცავდი 1864 წლის დებულებას და მწამდა, რომ ერობა განაახლებდა ჩვენი ხოფლის ცხოვრებას. მაგრამ ახლა ამის თქმა აღარ შემიძლია. ცხოვრება უკანასკნელ პერიოდში სწრაფად წავიდა წინ. მოსახლეობა მომწიფდა არა მარტო ფართო ადგილობრივი თვითმმართველობის, არამედ სახელმწიფოებრივი მმართველობისათვისაც. ახლა 1864 წლის დებულება არსებითად

¹ სსცია, თ. 13, ან. 10. საქ. 22. ფურც. 6, 9—10.

² К введению на Кавказе земского самоуправления (Сборник материалов сост. Г. М. Тумановым), Тиф., 1905, I, გვ. 59—60.

უნდა შეიცვალოსო. ორატორის აზრით, ეს ცვლილებები უნდა გამოხატულიყო შემდეგში: 1. აქამდე ერობა იყო წმინდა სამეურნეო დაწესებულება. ახლა კი მას უნდა მიეცეს საკანონმდებლო ინიციატივის და მხარის შესახები კანონების განხილვა-მოწონების უფლება; 2. 1864 წ. დებულებით გათვალისწინებული საარჩევნო ცენზი ძალიან მაღალია. ცენზი უნდა შემცირდეს მინიმუმამდე. კიდევ უკეთესი იქნება საერთოდ ცენზის გაუქმება; 3. ერობების ნაყოფიერი მუშაობის წინაპირობა იქნება მისი ადმინისტრაციისაგან სრული დამოუკიდებლობა; 4. საერობო დაწესებულებათა ფუნდამენტი და ძირითადი ბირთვი უნდა იყოს წვრილი საერობო ერთეული, რომელსაც განსაკუთრებული მნიშვნელობა ექნება ჩვენი მხარისათვის. ამ საფუძველზე ორგანიზებული ერობა, — დაასკენიდა სააკოვი. — სასარგებლო იქნება ქვეყნისათვის და მოსახლეობა კმაყოფილებით შეხვდება მასო.

საზოგადოებრიობის წარმომადგენლები სააკოვის გამოსვლას თანაგრძნობით შეხვდნენ. ადმინისტრაციის წარმომადგენელმა სულტანმა კრიმ-გირეიმ კი სცადა მოკამათებები ზომიერების ლიანდაგზე გადაეყვანა. მან განაცხადა, რომ მხარეში უნდა გატარდეს არსებულთაგან ერთი რომელიმე დებულება და საკითხის გართულება „სხვადასხვა სახის მაღალი მოსაზრებებით“ დიდი შეცდომა იქნებოდაო. ერობა არის სამეურნეო დაწესებულება და მისი საქმეების მართვაში მონაწილეობა მარტო საერობო შესაჯრებელის გადაზღვევებმა უნდა მიიღონ, ერობის უფლებამოსილების გაფართოების საკითხი მომავლის საქმეაო!

1905 წლის ოქტომბერში ჩატარდა ბათუმის ოლქის საერობო თათბირი; რომელმაც შეიმუშავა ბათუმის ოლქის საერობო დაწესებულებათა დებულების ძირითად საწყისთა პროექტი. პროექტის მიხედვით საერობო არჩევნებში მონაწილეობა უნდა მიეღო ყველა სრულწლოვან მოქალაქეს, რომელსაც მოცემულ ტერიტორიაზე ცხოვრების სამწლიანი ხანდაზმულობა ჰქონდა.

ახლად დაარსებულ საერობო დაწესებულებათა კომპეტენციაში უნდა შესულიყო: საერობო ქონების გამგებლობა, სასურსათო საქმე, ჯანმრთელობის დაცვა, ვეტერინარია, დაწყებითი და საშუალო განათლება, უმაღლესი სასწავლებლების გახსნა, იურიდიული დახმარება, წვრილი კრედიტის ორგანიზაცია, ადგილობრივი გზების გამგებლობა, ფოსტა-ტელეგრაფი, გლეხთა მიწათმოწყობის საკითხი, მიწის მორწყვა და ჭაობების ამოშრობა, შრომის ბიუროს ორგანიზაცია, ნორმალური სამუშაო დღის დაწესება, საზოგადოებრივი უშიშროების დაცვა და სხვ.

პროექტი ითვალისწინებდა საერობო დაწესებულებათა სრულ დამოუ-

¹ К введению на Кавказе земского самоуправления (Сборник материалов сост. Г. М. Тумановым), Тиф., 1905, I, гл. 60—66.

კიდებლობას. მთავრობას კონტროლი უნდა გაეწია მხოლოდ ერობის მოქმედების კანონიერებისათვის.

ზემოთქმული ცხადყოფს, რომ ბათუმის საოლქო საერობო თათბირი დიდად გასცილდა მთავრობის მიერ მიცემულ სამუშაო პროგრამას. რევოლუციის ხანაში ლიბერალური ინტელიგენციაც ბედებს რადიკალური კანონპროექტის შემუშავებას. ბათუმელთა პროექტი აუქმებდა საარჩევნო ცენზს და ახდენდა ერობის დემოკრატიზაციას. ამასთან, იგი ძალიან აფართოებდა ერობის კომპეტენციის სფეროს. კერძოდ, პროექტი ითვალისწინებდა სახაზინო მიწების ერობის ხელში გადასვლას, მიწის გამაჯვნისა და გლეხთა მიწათმოწყობის საკითხების გადაჭრას, პოლიციის ერობისათვის დაქვემდებარებას. საერთოდ, პროექტის ავტორები არსებითად მოითხოვდნენ მთავრობის ადგილობრივი ხელისუფლების ერობის ხელში გადაცემას და ამდენად ძველი ადმინისტრაციის ლიკვიდაციას¹.

საერობო თათბირები ქუთაისის გუბერნიის ზოგიერთ მაზრაშიც ჩატარდა. თავადაზნაურობისა და ბურჟუაზიის წარმომადგენლებმა შეიმუშავეს „დებულება ქუთაისის გუბერნიის საერობო დაწესებულებათა შესახებ“. იგი ბათუმელთა პროექტზე გაცილებით ზომიერი იყო, მაგრამ არსებულ დებულებებზე უფრო რადიკალური ჩანდა.

პროექტის ავტორები მოითხოვდნენ საყოველთაო საარჩევნო სისტემის შემოღებას და ერობის მოქმედების სფეროს მნიშვნელოვნად გაფართოებას. პროექტი ერობის კომპეტენციაში აქცევდა საზოგადოებრივი უშიშროების დაცვას, მომრიგებელ მოსამართლეთა არჩევას, მორწყვისა და ამოშრობის სამუშაოებს, ითვალისწინებდა მოსახლეობისათვის მიწის შეძენაში დახმარების გაწევას².

საერობო თათბირთა აღნიშნულ პროექტებს მეფისნაცვალმა რევოლუციის ხანაში დუმილით უპასუხა, რეაქციის დაღვომისთანავე კი ისინი არქივში გადაისროლა.

1905 წელს შედგენილი პროექტები, როგორც ვნახეთ, ითვალისწინებდა არა მარტო ადგილობრივ თვითმმართველობათა დემოკრატიზაციას, არამედ საერთოდ პოლიტიკური წყობილების მნიშვნელოვან შეცვლასაც. რეაქციის ხანაში, ლიბერალურმა ინტელიგენციამ, რომელიც დაღალა მოლოდინმა, სრულიად განსხვავებული პოზიცია დაიკავა. მან თავი დაანება ბევრზე ოცნებას და გადაწყვიტა მცირე დათმობები მაინც გამოეგლიჯა მეფის მთავრობისათვის.

მეფის მთავრობას არ შეეძლო სრულიად უყურადღებოდ დაეტოვებინა ლიბერალთა მოთხოვნები. კავკასიის ადმინისტრაციას რეაქციის ხანა-

¹ სსცია, ფ. 13, ანაწ. 10, საქ. 22, ფურც. 6—10.

² იქვე, ფურც. 10—11.

შიც აფრთხობდა პირველი რევოლუციის აჩრდილი. მეფისნაცვალს მიზან-
შეწონილად მიაჩნდა გარკვეული დათმობები გაეკეთებინა ქალაქისა და
სოფლის გაბატონებული კლასების, ლიბერალურა ინტელიგენციის სასარ-
გებლოდ და ამით საიმედო მოკავშირეები შეეძინა მომავალი რევოლუციის
წინააღმდეგ ბრძოლაში. ამ მიმართულებით კონკრეტული ნაბიჯიც გადა-
იღვა. 1909 წელს მეფისნაცვლის ცირკულიარის თანახმად საქართველოს
გუბერნიებსა და ოლქებში ჩატარდა საერობო თათბირები, მაგრამ საქმე
ერობის ტიპის გარშემო კამათსა და პროექტების შედგენას არ გასცილე-
ბია. პირველი მსოფლიო ომის წლებში ლიბერალურმა ინტელიგენციამ ერ-
თხელ კიდევ გაიბრძოლა, მაგრამ ამაოდ. მეფის მთავრობამ საქართველო-
სა და კავკასიას საერობო თვითმმართველობის ბოძებაზე ამჯერადაც უარი
უთხრა.

ცარიზმის დამხობის შემდეგ დროებითმა მთავრობამ მთელი რუსეთი-
სათვის ახალი საერობო დებულება შეიმუშავა, დაიწყო არსებულ ერო-
ბათა რეორგანიზაცია და საერობო დაწესებულებების შემოღება განაპირა
მხარეებში. ცოტა მოგვიანებით მენშევიკებმა მოახერხეს საქართველოში
საერობო დაწესებულებათა ჩამოყალიბება. მაგრამ ეს უკვე ანაქრონიზმი
იყო. ერობამ თავისი დრო მოჰამა. იგი უნდა შეეცვალა ადგილობრივი
თვითმმართველობის უფრო პროგრესულ ორგანოებს.

§ 1. მარქსისტული მიზდინარეობის წარმოშობა საქართველოში

საქართველოში მარქსისტული მოძრაობა იწყება გასული საუკუნის ოახმოცდაათიანი წლებიდან, როცა მუშათა მოძრაობის ზრდის ნიადაგზე, პლენანოვის „შრომის განთავისუფლების“ ჭგუფის გავლენით, ჩვენში გავრცელდა მარქსიზმი და შეიქმნა პირველი მარქსისტული ორგანიზაცია — „მესამე დასი“.

მოწინავე ქართველი ახალგაზრდობა, რომელიც მარქსიზმის შესათვისებლად უკვე მომზადებული იყო იმ დროს ჩვენი საზოგადოებრივი ცხოვრების ობიექტური (კაპიტალიზმის განვითარება და მუშათა მოძრაობის წარმოშობა) და სუბიექტური (ქართველი განმანათლებლების და ხალხოსნების რევოლუციურ-დემოკრატიული ტრადიციები და მემკვიდრეობა) პირობებით, აღფრთოვანებული შეეგება პლენანოვის ჭგუფიდან მომდინარე მარქსიზმს და პლენანოვის შრომების შემწეობით მარქსისტულ მოძღვრებას ხარბად დაეწაფა. მართალია, „შრომის განთავისუფლების“ ჭგუფს ჰქონდა ზოგიერთი შეცდომა და ვერც მუშათა მოძრაობასთან მეცნიერული სოციალიზმის შეერთება შეძლო, მაგრამ მან მაინც დიდი როლი შეასრულა რუსეთში მარქსიზმის გავრცელების საქმეში.

მარქსისტულ ლიტერატურას დიდი ინტერესით სწავლობდნენ მოწინავე მუშები და რევოლუციურად განწყობილი მოსწავლე ახალგაზრდობა. განსაკუთრებით დიდი იყო პლენანოვის ნაწარმოებებისადმი მისწრაფება. პლენანოვის ნაწერები „ჩვენთვის ერთგვარი სამოციქულო იყო“, — მოგვითხრობს იმ დროის ერთ-ერთი სოციალ-დემოკრატი; პლენანოვის შრომებმა, განსაკუთრებით მისმა „მონისტურმა შეხედულებამ“... ჩვენს შეხედულებებში ნამდვილი რევოლუცია მოახდინა, გაფანტა ნაროდნიკული ბურჟუასი და მარქსისტულ მსოფლმხედველობას გვაზიარაო, — ამბობს მეორე¹.

ისე როგორც რუსეთში, საქართველოშიც პირველი ქართველი მარქსისტები ყოფილი ხალხოსნები — „ნაროდოვოლები“ — იყვნენ. მოწინავე ქართველი ახალგაზრდობის რევოლუციურად და სოციალისტურად

¹ „რევოლუციის მატანე“, 1925, № 2, გვ. 85; 1923, № 3, გვ. 142.

განწყობილი წრე თავისი მოღვაწეობის დანიშნულებას მეფის მთავრობის დამხობასა და მუშა ხალხის სამსახურში ხედავდა, მაგრამ რა გზით უნდა განხორციელებულიყო ეს ამოცანა, მათთვის ჯერ კიდევ გაურკვეველი იყო. მარქსის მოძღვრებას ჯერ კიდევ არ იცნობდნენ, ძველი ნაროდნიკული გზა, „ნაროდნაია ვოლიას“ ტაქტიკა კი მათ უკვე აღარ აკმაყოფილებდათ. ისინი ახალ გზას დაეძებდნენ. ეს ძიება, საქართველოში დაწყებული მუშათა მოძრაობის პირობებში, პლენანოვის „შრომის განთავისუფლების“ ჯგუფისა და დასავლეთ ევროპის მუშათა სოციალ-დემოკრატიული მოძრაობის გავლენის შედეგად მარქსიზმის მიღებით დაგვირგვინდა. მოწინავე ქართველმა ახალგაზრდობამ მარქსიზმში პოვა საზოგადოებრივი ცხოვრების ახსნისა და რევოლუციური გარდაქმნის სულიერი იარაღი.

მ. ცხაკაია, მისივე განცხადებით, 80-იანი წლების მეორე ნახევარში გაცნობია მარქსის მოძღვრებას ჯერ ზიბერისა და ხალხოსნების, ხოლო შემდეგ „შრომის განთავისუფლების“ ჯგუფის საშუალებით.

1891—1893 წლებში ვარშავაში მყოფი ფ. მახარაძე რუს და პოლონელ მარქსისტთა წრეში გაეცნო პლენანოვის ჯგუფის მოღვაწეობას, შეისწავლა მარქსისტული ლიტერატურა და მარქსისტი გახდა. 1893 წელს ქენევაში რუს მარქსისტთა წრეში შევიდა, პლენანოვს დაუახლოვდა და მარქსის მოძღვრებას ეზიარა შემდეგში მენშევიკური პარტიის ცნობილი ლიდერი ნ. ჟორდანიას.

საქართველოში მარქსისტული მოძრაობის სათავეებთან ეგ. ნინოშვილი ჯგას. მან ყველაზე რელიეფურად ასახა და გამოხატა გარდატეხის ხანა, როცა მოწინავე ქართველი ახალგაზრდობა ძველ, ხალხოსნურ მსოფლმხედველობას ტოვებდა და ახალ, მარქსისტულ, სოციალ-დემოკრატიულ მოძღვრებას ითვისებდა. ნინოშვილი არ არის თავისუფალი უტოპიური, წვრილბურჟუაზიული სოციალიზმის გავლენისაგან. უდროოდ სიკვდილმა არ მისცა მას საშუალება დასრულებულ რევოლუციონერ მარქსისტად ჩამოყალიბებულიყო. ნინოშვილი რევოლუციური მოძრაობის სწორი გზების ძიებისას, კავშირს წყვეტს რა ხალხოსნობასთან, თვალს აპყრობს მუშათა კლასს და მარქსის მოძღვრებაში ეძებს საზოგადოების მეცნიერული ახსნისა და რევოლუციური გარდაქმნის სწორ თეორიას.

ჩოგორი იყო ეგ. ნინოშვილის შეხედულებები 1894 წლის დამდეგს, ამაზე შეიძლება ვიმსჯელოთ იმ მოგონებებით, რომლებშიც მწერლის ცხოვრების ეს უკანასკნელი პერიოდია ასახული. მისი ერთ-ერთი ახლო მეგობარი მოგვითხრობს, რომ ეგ. ნინოშვილმა ამ დროს უკვე საბოლოოდ მოძებნა პასუხი იმ კითხვაზე, რომელიც მაშინ მოწინავე, მარქსისტულად განწყობილ ქართველ ახალ თაობას ასე აღელვებდა: რით და როგორ, რა გზით და საშუალებით უნდა შეიცვალოს არსებული წყობილება? მას თავის მეგობრის რ. კალაძისათვის უთქვამს: „ამიერიდან ჩვენ

ერთადერთი გზის მაჩვენებელი, წინამძღოლი და მასწავლებელი მარქსი და ენგელსია და კიდევ ამათი ჯერ კიდევ ახალგაზრდა მოწაფე გიორგი პლენხანოვი. მუშათა კლასი! აი ვინ ყოფილა ქვეყნიერებისა და ცხოვრების ჩარხის მატრიალებელი. მუშათა მოძრაობა! აი ამ ჩარხის ბრუნვა! ერთი თუ ჩვენშიც დატრიალდა ეს ჩარხი, თუ ჩვენშიც გაჩაღდა მუშათა მოძრაობა, მაშინ ჩვენი ცხოვრებაც გადატრიალდება“¹.

ეგ. ნინოშვილის პუბლიცისტურ მემკვიდრეობას საპატიო ადგილი უკავია საქართველოში მარქსისტული მოძრაობის წარმოშობის ისტორიაში. სწორედ მის პუბლიცისტურ წერილებში იწყება ეგ. ნინოშვილის გადასვლა რევოლუციური დემოკრატიზმიდან პროლეტარულ რევოლუციონიზმზე. დიდმნიშვნელოვანია მისი პრაქტიკული მოღვაწეობაც პირველი მარქსისტული ორგანიზაციის — „მესამე დასის“ — შექმნის საქმეში.

ეგ. ნინოშვილის ინიციატივითა და მეთაურობით მოეწყო 1892—1893 წლებში პირველი არალეგალური კრებები, რომლებზედაც რევოლუციურად განწყობილი ქართველი ახალგაზრდობა დგამს პირველ ნაბიჯებს ხალხოსნობიდან მარქსიზმისაკენ.

1894 წლის მაისში ეგ. ნინოშვილის დასაფლავებაზე მოხდა ახალი თაობის — მარქსისტული ახალგაზრდობის — პირველი საჯარო, საპროგრამო გამოსვლა. განსაკუთრებით აღსანიშნავია სილ. ჯიბლაძის სიტყვა. მან ნათელყო ჩვენს ქვეყანაში მომხდარი ეკონომიური ცვლილებები, მკაცრად გააკრიტიკა ძველი საზოგადოებრივ-პოლიტიკური მიმდინარეობანი და ჩამოაყალიბა ახალი, მარქსისტული დასის სამოქმედო პროგრამა.

„ჩვენი აწინდელი ცხოვრება, — ამბობდა ჯიბლაძე, — წარმოადგენს ორს ახალ, ერთი-მეორის მოწინააღმდეგე წოდებას ანუ კლასს. ერთის მხრით — ფიზიკური და გონებრივი შრომის წარმომადგენელი, მეორე მხრით — მუქთახორა, ბურჟუა-კაპიტალისტები. პირველთა ხვედრია აუტანელი შრომა-გარჯა, მეორეთა კი — დასაკუთრება ამ შრომის ნაყოფისა. აი, სად ტყდება ხიდი ჩვენში და ზოგან კი კარგა ხანია ჩატეხილია; აი, სად ირღვევა უფსკრული და ბევრგან კარგა ხანია გარღვეულიცაა. ამ უკულმართობის დასამარცხებლად არის, ერთი მეცნიერის სიტყვით რომ ვთქვათ, ორსულად ახლანდელი ჟამთა ვითარება. ამ მშობიარობის დასაჩქარებლად და გასაადვილებლად იღწვიან და უნდა იღწვოდნენ კიდევაც საუკეთესო წარმომადგენელი ახალი თაობისა. ამ ახალ კვალზე დადგომა აშკარად ეტყობა ჩვენს ახალს „კვალსაც“ — ეს ჭეშმარიტება შეიგნო და მისკენ ქონდა მიმართული თავისი ქნარი ჩვენს შესანიშნავ ნიჭის მქონე ინგოროყვასაც“².

ქართველმა მარქსისტებმა სილ. ჯიბლაძის პირით აუწყეს საზოგადო-

¹ ე. ნ. ნ. ო. შ. ვ. ი. ლ. ი., თბზ., ტ.1, 1923, რ. კალაძის წინასიტყვაობა.

² „კვალ“, 1894, № 27.

ბას ახალი საზოგადოებრივ-პოლიტიკური მიმდინარეობის წარმოშობა, მარქსისტული მიმდინარეობის დაბადება. ამ ფორმალურ აქტს დიდი მნიშვნელობა ჰქონდა, მიუხედავად იმისა, რომ ეს ჯგუფი არ იყო ორგანიზაციულად ჩამოყალიბებული და ჯერ კიდევ არ ეწეოდა პრაქტიკულ მუშაობას.

ეგ. ნინოშვილის ჯგუფი გ. წერეთელმა „მესამე დასად“ მონათლა. ქართველი ინტელიგენციის სოციალ-პოლიტიკურ დასებად დანაწილების წერეთლისებური გაგება სწორად როლი აშუქებს საქართველოში მიმდინარე სოციალურ-პოლიტიკური ბრძოლის ისტორიას. მაგრამ თვით სახელწოდება „მესამე დასი“ მოსწრებული გამოდგა. მან მოქალაქეობრივი უფლებები მოიპოვა. სახელწოდება „მესამე დასი“ საქართველოს სოციალ-დემოკრატიის სინონიმად იქცა. ქართველი სოციალ-დემოკრატები ამ ზედმეტ სახელს დიღხანს ატარებდნენ, რაც უშთავრესად უთუოდ კონსპირაციული მოსაზრებით იყო ნაკარნახევი.

მოწინავე ქართველმა მუშებმა თავიანთი მსოფლმხედველობის ჩამოყალიბებას ისეთივე გზა განვლეს, როგორც მოწინავე ქართველმა მოსწავლე ახალგაზრდობამ. ისინი (გ. ჩოდრიშვილი, მ. ბოჭორიძე, ა. ოქუაშვილი, ვ. სტურუა. გ. ჩხეიძე და სხვ.), რომლებიც შემდეგ გამოჩენილი სოციალ-დემოკრატები გახდნენ, გატაცებულნი იყვნენ რევოლუციურ-ხალხოსნური მოძრაობით, განსაკუთრებით ყელიაბოვისა და მისი მეგობრების გმირული ბრძოლით. მათ სძულდათ მეფის თვითმკაცრობელობა და მის დახმობაზე ოცნებობდნენ. მაგრამ როგორ უნდა მომხდარიყო ეს, ამაზე ბუნდოვანი წარმოდგენა ჰქონდათ. მათ ცარიზმის წინააღმდეგ ბრძოლის გზა მაშინ გაუნათდათ, როცა ქართველი და რუსი სოციალ-დემოკრატების დახმარებით მარქსიზმს ეზიარნენ.

აღსანიშნავია, რომ თბილისელმა მუშებმა საკუთარი ხელნაწერი არალეგალური ჟურნალიც კი გამოუშვეს. 1889 წელს მათ გამოსცეს ჟურნ. „მუშა“, 1891 წელს — ჟურნ. „განთიადი“, 1892 წელს — ჟურნ. „სხივი“, რომლებშიც მონაწილეობდნენ: ვ. უჩინარიძე (ვ. ცაბაძე), მ. სიმონიძე (მ. მეტეხელი), მ. ბოჭორიძე, ა. ღლიურაშვილი (ა. ოქუაშვილი), ვ. დორელი (ვ. დოლბაშვილი), მ. მცხეთელი, ზ. ახალსოფლელი, მ. ხიდისთაველი და სხვ. ჟურნ. „მუშას“ პირველ გვერდზე გამოხატულია დურგალი, რომელიც ფიცარს რანდავს, სურათს ქვემოთ გაკეთებული აქვს წარწერა: „ვშრომობდეთ, ძმაო, მათ შუა არ ვშორდებოდეთ კრებასა, დაზავედ რანდით ვლამობდეთ ბრუნდი ხის გასწორებასა“.

მუშების აზრით, საზოგადოებრივი ცხოვრების უკუღმართობის მოსპობას უნდა წინამძღოლობდეს „მდაბიო ხალხი“, „საწყალი მუშა“. ჟურნალი მოუწოდებს მუშებს ერთმანეთს მხარში ამოუდგნენ და თამამად ააფრიალონ „თავისუფლების ღროშა“. „მუშა“ საყვედურით წერს, რომ საქარ-

თველოში ჯერ არ გამოჩენილან „ხეირიანი პირები“, რომლებსაც „მდაბიო ხალხი ეცნო“ და მათთვის „ჩაეგონებიათ რაჟე“. მიუხედავად ამისა, ყურნალის აზრით, მუშებმა მაინც მიაგნეს „ბოროტების ძირს“ და მიპყვებიან აწრებს, რომელთაც „ახალგაზრდობა მისდევს“. ყურნალი კითხულობს „რა დღეშია მუშა ხალხი?“ და თვითონვე უპასუხებს, რომ იგი „ტანჯვა-ვაებაშია“ და აი, „თუ მუშებში ფესვი გაუდგა სწავლა-განათლებამ“, მაშინ ისინი მოიპოვებენ თავისუფლებასაც და მათვე დარჩებათ „თავიანთი ნაწვევ-ნადაგი“.

ყურნ. „განთიადი“ მოუწოდებს „ოფლში ნაშობ საწყალ მუშას“, თავის თავს უპატრონოს და თვით მოძებნოს „ვზა სამართლისა“, ხოლო იმათ, რომლებსაც ეს ქვეყანა ხელში ჩაუგდიათ, „განთიადი“ ემუქრება, რომ ღრო დადგება და მათ წინააღმდეგ აღსდგებიან „მკვდრეთით მუშა დარბინი“, შეიარაღებულნი ცელით, ცულითა და „მყველფავთ შეშხარავი“ სხვა იარაღით.

ყურნ. „სხივი“ მოთავსებულია სურათი — ხმალამოლებული ქართველი, რომელიც მიმართავს ხანჯალს: „შენი ჭირიმე ხანჯალო“, შენ ხარ ერთადერთი იმედი „მტრისაგან გამოსხნასა“.

„სხივი“ პატრიოტიზმს სოციალიზმთან აერთებს და ამბობს, რომ „ვისაც უყვარს პატრიოტობა... მას სურს მხოლოდ სოციალისტობა“. საინტერესოა, რომ „სხივი“ სიყვარულით იხსენიებს შექსპირს, ბაირონს, რუსთაველს და მათში თავიანთ „ერთგულთ“ ხედავს.

ეს ხელნაწერი ყურნალები გვიჩვენებენ მოწინავე ქართველი მუშების შეგნების შედარებით მაღალ დონეს. მათში ჩანასახის სახით ის აზრია გამოთქმული, რომ მშრომელთა განთავისუფლება თვით მათივე საქმეა და რომ მისი მიღწევა შესაძლებელია არა თხოვნა-მუდარით, არამედ ბრძოლით. ამასთან მუშა-კორესპონდენტებს ჯერ კიდევ ბუნდოვანი წარმოდგენა აქვთ როგორც ბრძოლის საშუალებებზე, ისე ბრძოლის ამოცანებსა და ძიზნებზე. ისინი სწავლა-განათლების მნიშვნელობის გადაფასებას ახდენენ. მათ ჰგონიათ, რომ სწავლა-განათლება იხსნის მუშებს სილატაკისაგან. მათში გაისმის „სამშობლოსადმი“ „ძმობა-ერთობით“ სამსახურის ბურჟუაზიულ-პატრიოტული იდეის ქადაგება. გაისმის თხოვნის ზმაც: „შეიბრალებთ“, „მიეცით შვება“ საწყალ გლეხსო და სხვ.

ყურნალები ასახავენ მუშათა სტიქიურ მოძრაობას, როცა საქართველოს მოწინავე მუშებმა გამოიმუშავეს გაერთიანებისა და მეპატრონეთა წინააღმდეგ ბრძოლის იდეა, მაგრამ ჯერ კიდევ არ ჰქონდათ შეგნებული თავიანთი კლასობრივი ინტერესები და ისტორიული როლი, არ გააჩნდათ რევოლუციური, სოციალისტური შეგნება.

ყურნალები ასახავენ მუშათა მოძრაობის იმ ეტაპს, როცა მუშათა მოძრაობა სოციალიზმის გარეშე არსებობდა. „სწავლის შეძენის“ დაუცხრო-

მელი წყურვილი, რომლითაც გამსჭვალულია ჟურნალები, მეცნიერული სოციალიზმის მოძღვრებისაკენ მათი სტიქიური მისწრაფების თავისებური გამოხატულებაა.

როგორც „მუშა“, ისე „განთიადი“ და „სხივი“ არსებითად პატრიოტულ-დემოკრატიული და უტოპიურ-სოციალისტური შინაარსის ჟურნალებია. იმ დროს ბურჟუაზიული დემოკრატიიდან მუშათა კლასის გამოყოფა ჯერ კიდევ არ იყო დამთავრებული და პროლეტარულ-დემოკრატიული ნაკადი ნაროდნიკულ-დემოკრატიულ საერთო მდინარეებში შედიოდა.

„მუშა“ საქართველოს სოციალ-დემოკრატიული პრესის წინამორბედი იყო. იგივე შეიძლება ითქვას „განთიადისა“ და „სხივის“ შესახებ.

თვალსაზირობა რუსი სოციალ-დემოკრატების ღვაწლი საქართველოს მუშათა მოძრაობის გაღვივებაში, მარქსიზმის პროპაგანდისა და სოციალ-დემოკრატიული წრეების შექმნის საქმეში. კავკასიაში გადმოსახლებულმა რუსმა სოციალ-დემოკრატებმა, რომლებსაც რუსეთის სამრეწველო ცენტრებში ჰქონდათ რევოლუციური ბრძოლის სკოლა გავლანი, არაერთ ქართველ მუშასა და რევოლუციურად განწყობილ ინტელიგენტს ჩაუნერგეს არაღეგალური მარქსისტული ლიტერატურისადმი სიყვარული, მუშათა კლასის საქმის გამარჯვების რწმენა და რევოლუციური, პრაქტიკულ-ორგანიზაციული მუშაობა ასწავლეს.

90-იან წლებში საქართველოში მცხოვრები რუსი სოციალ-დემოკრატები ამიერკავკასიის სოციალ-დემოკრატიული ორგანიზაციის აქტიური წევრები იყვნენ. რუს მარქსისტებს (აფანასევს, რენინგერს, კოგანს, ლუზინს, ფრანჩესკის, კოზარენკოს და სხვ.) ახლო ურთიერთობა ჰქონდათ ქართველ მარქსისტებთან (ვ. ცაბაძე, ს. ჯიბლაძე, კ. ჩხეიძე, მ. ცხაკაია, ფ. მახარაძე, ა. წულუკიძე, ი. სტალინი და სხვ.) და მათთან ერთად დიდ მუშაობა ჩაატარეს მარქსიზმის გასავრცელებლად საქართველოში.

მესამედასეულთა დახმარებითა და აქტიური მონაწილეობით 1894 — 1895 წლებში ყალიბდება თბილისის მუშათა პირველი მარქსისტული წრეები, რომლებშიც მოწინავე მუშები რევოლუციური და პროლეტარული მოძრაობის ისტორიას ეცნობიან და სწავლობენ მარქსისტულ ლიტერატურას. თბილისის მუშების პირველი მარქსისტული არაღეგალური წიგნსაცავი საკმაოდ მდიდარი იყო. იქ მოიპოვებოდა პოპულარული ბროშურები მუშათა და გლეხთა ცხოვრების შესახებ, წიგნები პოლიტიკური ეკონომიისა და სოციალოგიის საკითხებზე, ბელეტრისტული ნაწარმოებები, „შრომის განთავისუფლების“ ჯგუფის თითქმის ყველა გამოცემა და სხვ.

„მესამე დასს“ ბათუმში ჰყავდა საკმაოდ ძლიერი ჯგუფი, რომელშიც

შედლოდნენ კ. ჩხეიძე, ი. რამიშვილი, გ. სოდორაშვილი, კ. გოგოლაძე, მუშა ი. მგელაძე და სხვ. მათთან იყვნენ დაკავშირებულნი ი. ლუზინი და გ. ფრანჩესკი. მათი მოღვაწეობა ვიწრო საწრეო მუშაობით იფარგლებოდა.

ბათუმელი სოციალ-დემოკრატების წრე ხშირად იკრიბებოდა. შეკრებები უმთავრესად ქალაქგარეთ იმართებოდა. წრის წევრები კონსპირაციის მიზნით სუფრას შემომსხდარნი საუბრობდნენ პოლიტიკურ თემებზე, კითხულობდნენ არალეგალურ მარქსისტულ ლიტერატურას და სხვ. წრემ შექმნა მუშათა სალარო და შეადგანა მისი წესდება, გაამრავლა მარქსის ფოტოსურათი და ფართოდ გაავრცელა ქალაქში.

ბათუმის სოციალ-დემოკრატიულმა წრემ იმ მიზნით, რომ ქართველი მუშებისათვის მარქსისტული ლიტერატურა მშობლიურ ენაზე მიეწოდებინა, თარგმნა და 1897 წელს ჰექტოგრაფზე დაბეჭდა კ. მარქსისა და ფ. ენგელსის „კომუნისტური პარტიის მანიფესტის“ პირველი თავი მთლიანად და სხვა თავების ზოგიერთი, უფრო მნიშვნელოვანი ადგილი. დაბეჭდვით 100 ცალამდე, 60 კარგად იყო დაბეჭდილი, სხვა კი მკრთალად გამოვიდაო, მოგვითხრობს მთარგმნელი გ. სოდორაშვილი. ეს იყო „კომუნისტური პარტიის მანიფესტის“ პირველი ქართული გამოცემა და პირველი შრომა მარქსისა და ენგელსის ნაწერებიდან ქართულ ენაზე თარგმნილი.

1894 წელს მ. ცხაკაია ქუთაისში გადავიდა. აქ მის გარშემო შემოიკრიბა მარქსისტულად განწყობილი ახალგაზრდობა. მას დაუახლოვდა რუსი მარქსისტი ნ. კოზარენკო. მ. ცხაკაიას გადმოცემით, ამ წრეს 1894 წელს ქუთაისში ქალაქგარეთ მოუწყვია პირველმაისობა, რომელსაც 50—60 კაცი დასწრებია. არაერთხელ ყოფილა მოწყობილი არალეგალური შეკრებები.

მესამედასეულთა მუშაობა უმთავრესად გამოიხატებოდა მოწინავე, ოპოზიციურად განწყობილ ოჯახებში რეფერატების კითხვით, ხშირად იკრიბებოდნენ ქუთაისის ბულვარში (ბაღში), აწყობდნენ საღამოებს; კამათში ძველი თაობიდან მონაწილეობდნენ ცნობილი ქართველი ჟურნალისტები: კ. ლორთქიფანიძე, დ. მიქელაძე და სხვ. „ჩვენი სახარება იყო ბელტოვის (პლენხანოვის) მონისტური შეხედულება ისტორიაზე“ — ამბობს ქუთაისის წრის ერთ-ერთი წევრი¹.

მესამედასეულთა ქადაგება მთელ საქართველოს მოედო და მრავალი მსმენელი მოიპოვა წრეებსა და შეკრებებზე, სადაც ცხარე პაექრობა იმართებოდა „კაპიტალიზმის ბედისა“ და მუშათა მოძრაობის მომავალზე. განსაკუთრებით დიდი მნიშვნელობა ჰქონდა მარქსიზმის პროპაგანდას ქართულ პრესაში. იგი ფართო მკითხველ საზოგადოებას ნახულობდა საქარ-

¹ „რევოლუციის მატთან“, 1925, № 2, გვ. 87.

თველოში და მოწინავე მუშებსა, შეგნებულ გლეხებსა და რევოლუციურად განწყობილ ქართველ ინტელიგენტთა წრეში თანაგრძნობას იწვევდა.

მარქსიზმის დროშით გამოაული ახალი თაობა ცხარე ბრძოლას უცხადებს ძველ საზოგადოებრივ-პოლიტიკურ მიმდინარეობებს და ქართულ ლეგალურ პრესაში მარქსისტული მოძღვრების ქადაგებას იწყებს. მესამედასელები ახალი, მარქსისტული მიმდინარეობის ლიტერატურული წარმომადგენლები იყვნენ და მარქსიზმს თეორიულად გზას უკაფავდნენ საქართველოში.

1894 წლის მაისში ეგ. ნინოშვილის დასაფლავებაზე ს. ჯიბლადის მიერ საჯაროდ პირველად წარმოთქმულმა მარქსისტულმა სიტყვამ ხალხოსნური და ლიბერალური მიმართულების პუბლიცისტთა ბანაკში დიდი აურზაური გამოიწვია. მათ განგაში ატეხეს, იარაღი აისხეს და გააფთრებული იერიში დაიწყეს ქართველი მარქსისტების წინააღმდეგ.

მოწინააღმდეგეებს პასუხი გასცეს მესამედასელებმა: ი. ლუზინმა, ჯ. მახარაძემ, ნ. ყორღანიამ, კ. ჩხეიძემ, მ. ცხაკაიამ და სხვ. მათ ქართველ მკითხველს მარქსისტული მოძღვრების ძირითადი დებულებები განუმარტეს.

„კვალში“ ნაჩვენები იყო, რომ მარქსისტული მოძღვრება, ერთი მხრივ, „გვეუბნება რა არის ისტორიის დედაძარღვი, როგორ და რანაირად მივდივართ, საიდან მოვდივართ“, ხოლო, მეორე მხრივ, „იკვლევს სპეციალურად კაპიტალისტურ წყობილებას და გამოყავს ის დასკვნა, რომ ეს წყობილება უნდა დაინგრეს“. იქ ერთმანეთისგან განსხვავებულია სოციალისტური და ბურჟუაზიულ-დემოკრატიული ამოცანები და „მოწინავე დასის“ მოქმედების უახლოეს მიზნად გამოცხადებულია „თავისუფლება მთელი ერისა და თვითეული პიროვნებისა“, ხოლო მუშა ხალხის ისტორიული დანიშნულება იმაშია დანახული, რომ „მან უნდა მოუღოს ბოლო ბრძოლას, რომელიც ატეხილია კაპიტალსა და შრომას შუა, მდიდრებსა და ღარიბებს შორის და უდაბნოში მოტანტალე კაცობრიობა აღთქმულ ქვეყანაში მიიყვანოს“.

მესამედასელებმა გამოააშკარავეს ხალხოსნების გადაგვარება და ამხილეს მისი რეაქციულ-უტოპიური ილუზიები.

ქართველი პუბლიცისტებმა მოწინააღმდეგეთა ბანაკიდან ოპტიმისტურად იმშვიდებდნენ თავს იმით, რომ კაპიტალისტური ურთიერთობანი სუსტად იყო მაშინ საქართველოში განვითარებული და ირონიულად შენიშნავდნენ: განა შესაწყნარებელია ის აზრი, ვითომ ჩვენში კაპიტალისტური წესწყობილება არსებობსო? მათ მკაცრი, დასაბუთებული პასუხი გასცეს მესამედასელებმა, რომლებიც იმეორებდნენ კ. მარქსის ცნობილ სიტყვებს „კაპიტალის“ პირველი ტომის გერმანული გამოცემის წინასიტყვაობიდან: „ინდუსტრიალური ოდრო განვითარებული ქვეყანა ნაკლებად განვითარებულ ქვეყანას მხოლოდ მისი მომავლის სურათს უჩვენ-

ნებს¹. ისინი ფაქტებით ამტკიცებენ, რომ რუსეთთან ერთად საქართველოც კაპიტალიზმის გზას დაადგა და მხურვალედ იცავენ მარქსის დებულებას იმის შესახებ, რომ აქ საქმე ეხება არა კაპიტალისტურ ურთიერთობათა გახვიდარების მაღალ ან დაბალ დონეს, არამედ თვით კაპიტალისტური წარმოების განვითარების კანონებს, ტენდენციებს, რომლებიც ხორციელდებიან რკინისებური აუცილებლობით. იძლეოდა რა ჩვენი ქვეყნის სამეურნეო ცხოვრების ანალიზს, ს. ჯაბლაძე აღნიშნავდა კაპიტალიზმის მიმართულებით მომხდარ ცვლილებებს, მიუთითებდა ფეოდალურ-პატრიარქალური წყობის რღვევისა და ახალ, ბურჟუაზიულ ურთიერთობათა შექმნისა და ჩამოყალიბების ფაქტზე და ამბობდა: „ჩვენ ქვეყანაში ეს 25—30 წელია დაიწყო ახალი ხანა, მისი ნიშნობლივი თვიაება გაშიშვლება განსაკუთრებულ ეკონომიურ ურთიერთობაში, რაც მოასწავებს აღებ-მიცემობას, ვაჭრობას. აქ ძველი ბატონი უთმობს თავის ალაგს ახალს — ფულს. ფული არღვევს ძველს, ამენებს ახალს, ის ყოფს ხალხს ორ ნაწილად. ცხოვრებაში ჩნდება ორი კლასი: მდიდრები და ღარიბები. ძველი წოდებრივი განსხვავება — ფიქციაა. აღებ-მიცემობა გამოწვეულია შრომის განაწილებით, საქონლის წარმოებით. საქონლის წარმოება კი იგივე კაპიტალიზმია“². ჩვენშიც შეიქმნა კაპიტალისტური წარმოების ორი პირობა: კაპიტალი და თავისუფალი მუშა. წარმოიშენნ ბურჟუა-კაპიტალისტები, თუმცა მათ „ჯერ მთელი ჩვენი ცხოვრება არ გარდაუქმნიათ“, მაგრამ დღითი დღე ძლიერდებიან, გლეხს ნიადაგი ეცლება, იგი კარგავს თავის ლატაკურ მამულს და ქალაქში გარბის, მრეწველობაში ებმება, გლეხობის წრიდან თავს ყოფს პროლეტარიატი, თუმცა „ჩვენი პროლეტარიატი არეულ სხეულს წარმოადგენს“, მაგრამ იგი დღითი დღე მრავლდება და ვითარდება. ძველი წოდებრივი განკერძოებულობა ქრება, წოდებათა შორის საზღვარი იშლება, ვითარდება საზოგადოებრივი ანტაგონიზმი, ღრმავდება კლასობრივი წინააღმდეგობა, მწვავდება კლასობრივი ბრძოლა³.

ანტიმარქსისტულ მიმდინარეობათა მხილებისა და მარქსიზმის გავრცელების საქმეში თვალსაჩინო როლი ითამაშა ფ. მახარაძის თეორიულმა მოღვაწეობამ. მას თავისი პირველი შრომები ჯერ კიდევ ვარშავაში ყოფნის დროს. 1892 წლის ოქტომბერში და 1893 წლის თებერვალში, დაუწყებია, მაგრამ მაშინ მათი გამოქვეყნება ვერ მოუხერხებია. მასი წერილები „უთავბოლოობის ნაყოფი“ და „მწარე ფიქრები“ ხელნაწერის სახით

¹ კ. მარქსი, „კაპიტალი“, ტ. 1, გვ. 7.

² „კვალი“, 1895, № 14.

³ იქვე, № 13.

ვრცელდებოდა მოსწავლე ახალგაზრდობაში და გარკვეულ როლს თამაშობდა იმ დროს გამართულ იდეოლოგიურ ბრძოლაში.

1895 წლის მაისში ფ. მახარაძე „კვალში“ აქვეყნებს სტატიას „გაკვრით პასუხი“. ეს იყო ფ. მახარაძის პირველი ლიტერატურული გამოხვედრა. ავტორი ილაშქრებს იმათ წინააღმდეგ, ვინც ამტკიცებდა, რომ ჩვენში შეუძლებელია კაპიტალიზმისა და მუშათა მოძრაობის განვითარება.

ფ. მახარაძე გვიჩვენებს საქართველოში „ერთი მხრივ, ნატურალისტური წარმოების გაქარწყლებას და, მეორე მხრივ, კაპიტალიზმის არსებობას, რომელიც „თავის ხელითვე იშაადებს თავის საკლავ დანას“¹.

ფ. მახარაძე მიუთითებს პროლეტარიატზე, რომელიც „ჩვენს დროში კაცობრიობის დიდ და შესანიშნავ ნაწილს შეადგენს“ და ლაპარაკობს იმაზე, თუ მოქმედების რა საზოგადოებრივი ასპარეზი დაულოცა პროლეტარიატს ისტორიულმა ევოლუციამ. ის მატერიალური პირობები, რომლებშიც ცხოვრობს პროლეტარიატი, ამზადებს მას იმისათვის, რომ „შეიგნოს თავისი ისტორიული მნიშვნელობა“.

ფ. მახარაძე იცავს მარქსის ცნობილ დებულებას: „როცა რომელიმე ქვეყანა თავს გაყოფს კაპიტალიზმის ჭახრაკში, მისგან თავის დაღწევა, რაც ასე სურდათ ქართველ ხალხსნებს, ყოვლად შეუძლებელია“, მაგრამ ეს როდი გამორიცხავს ადამიანთა მოქმედების მნიშვნელობას. ადამიანებს შეუძლიათ შეიცნონ საზოგადოებრივი განვითარების ეკონომიური კანონები და შეანელონ მშობიარობის ტკივილები, „შეამოკლონ და დაგვიახლოვონ ის ხანა, რომლის მატერიალურ პირობებს ხვით კაპიტალიზმი ამზადებს“.

ფ. მახარაძე აკრიტიკებს ერთიანი ნიადაგის თეორიას. იგი ილაშქრებს ბურჟუაზიისა და პროლეტარიატის საერთო-ეროვნულ ნიადაგზე თანამშრომლობის წინააღმდეგ, რასაც ასე თავგამოდებით იცავდნენ ყველა ჯურის ნაციონალისტები. მახარაძე გმობს ბურჟუაზიასთან პროლეტარიატის კავშირის იდეას და მოითხოვს ნაციონალური საკითხის გადაწყვეტას პროლეტარიატის კლასობრივი ინტერესების თვალსაზრისით.

„კლასთა შორის ბრძოლის თვალთახედვის წერტილიდან უყურებთ ჩვენ, — წერდა იგი, — თანამედროვე ეროვნულ კითხვასაც. პროლეტარიატი ერთ წუთსაც ვერ დატოვებს კლასობრივ თვალთახედვის ისარს. იმას საერთო არაფერი აქვს ბურჟუაზიასთან, სულ ერთია რომელ ერს ეკუთვნის ეს უკანასკნელი“².

ფ. მახარაძე არ კმაყოფილდება კაპიტალიზმის აუცილებლობისა და პროგრესულობის დასაბუთებით. იგი ააშკარავებს კაპიტალიზმის წყლულ-

¹ ფ. მახარაძე, თბ., ტ. VI, გვ. 56.

² იქვე, გვ. 54.

ლებს და მიუთითებს მისი დაღუპვის გარდუვალობაზე. მახარაძის თქმით, მარქსმა „წარმოგვიდგინა საზოგადო სურათი მთელი ისტორიისა“ და ნათლად დაგვანახა წარმოების ნიადაგზე, თუ როგორ ჩნდებიან და იცვლებიან საზოგადოებრივი ურთიერთობანი და როგორ ამზადებს ყოველი საზოგადოებრივი წყობილება თვით თავისივე დაღუპვის პირობებს. მარქსმა ეს ზოგადი მოსახრება კაპიტალისტური საზოგადოების მაგალითზე ფაქტებით შეამოწმა და თავის „შესანიშნავ გამოკვლევაში“, ცნობილ წიგნში — „კაპიტალი“, რომლის „ცალი ჯერ მეცნიერებამ არ იცის“, წარმოადგინა უფრო მეტი, ვიდრე თანამედროვე საზოგადოების ანატომიაა. „მან აშკარად დაგვანახა ამასთანავე, თუ რა პირობები მზადდება დღევანდელი საზოგადოების გულში არსებული წყობილების მოსასპობად“. მარქსმა დაამტკიცაო, დასძინს იქვე მახარაძე, როგორც ბურჟუაზიული წყობილება არის ნაყოფი და შედეგი წინანდელი წყობილებისა, ისე თანამედროვე წყობილება ამზადებს სხვა უკეთეს წყობილებას, რომელიც სრულიად მოსპობს ყოველგვარ კლასობრივ უთანასწორობას ისე, როგორც ბურჟუაზიულმა წყობილებამ მოსპო საშუალო საუკუნეების წოდებრივი დანაწილება¹.

მ. ცხაკაია უმთავრესად პრაქტიკულ-რევოლუციურ მუშაობას ეწეოდა, მაგრამ ამავე დროს აქვეყნებდა თეორიულ-პოლიტიკური ხასიათის სტატიებსაც. იგი თანამშრომლობდა ჟურნ. „კვალში“, აგრეთვე ჟურნ. „მეურნეში“, რომელიც ქუთაისში გამოდიოდა. ამ ჟურნალში 1895 წელს დაიბეჭდა მ. ცხაკაიას მიერ ნათარგმნი პ. ლაფარგის „მანქანა, როგორც ფაქტორი წარმატებისა“. იმავე წელს აქვე დაიბეჭდა მისი სტატია, რომელშიც გაკრიტიკებულია — „ჩვენ პაწია ქვეყანაში უკვე გამოჩეკილი ახალი კლასის“ — ბურჟუაზიის მოტრფიალე „ივერიის“ პუბლიცისტი, რომელიც კლასთა თანამშრომლობის მცდარ შეხედულებებს ქადაგებდა. ცხაკაიამ ამხილა სოციალური ჰარმონიის ბურჟუაზიულ-ნაციონალისტური თეორია და ცხადყო ბურჟუაზიული საზოგადოებისათვის დამახასიათებელი კლასობრივი დანაწილება და ბრძოლა საქართველოში².

ყურადღებას იპყრობს რუსი მარქსისტის ი. ლუზინის სტატიები, რომლებიც ჟურნ. „კვალში“ იყო გამოქვეყნებული. სტატიებს ლუზინი რუსულად წერდა, მათ შემდეგ ქართულად რედაქციის წევრები თარგმნიდნენ.

ლუზინი აშუქებს იმ „გზას, რომელზედაც რუსეთი კაი ხანია შედგა“. ეს არის კაპიტალიზმის გზა. ქვეყანაში მომხდარ ცვლილებათა სათავედ იგი 1861 წლის საგლეხო რეფორმას თვლის. ამ დროიდან ნაცვლად ნატურალური წარმოებისა ვითარდება საბაზრო წარმოება, ბაზარზე გასაყი-

¹ ფ. მახარაძე, თხზ., ტ. VI, გვ. 35.

² „მეურნე“, 1895, №№ 1—2, 4, 8, 10, 15.

დად გამოდის არა მარტო შრომის ნაყოფი, არამედ თვით სამუშაო ძალა, ძველ წყობილებას ნიადაგი ეკარგება და „ნატურალურ-ფეოდალური რუსეთი თანამედროვე ბურჟუაზიულ ელფერს ღებულობს“.

ლუზინი მიუთითებს, რომ ძველი ფეოდალური საზოგადოებრივი შენობა დაინგრა, თავადაზნაურობა და გლეხობა ერთმანეთში აირია და ახალ კლასებად დაიწილა. რაციონალური სოფლის მეურნე, „ველური მებატონე“ (როგორც უწოდებდა სალტიკოვი), წვრილი ბურჟუა, ქალაქის პროლეტარიატი — აი ვინ გამოვიდა სოციალურ და პოლიტიკურ სარბიელზე.

ლუზინი ააშკარავებს ლიბერალური ხალხოსნების წვრილბურჟუაზიულ უნაყოფო ოცნების რეაქციულ ხასიათს და ნათლად გვიჩვენებს, რომ „სოფლის იდილიის დამცველებმა რამდენიც უნდა ილაპარაკონ ქალაქის ცხოვრების „განრწნილობაზე“, რამდენიც უნდა იყვირონ ფაბრიკის მუშათა ლოთობაზე, დაცემაზე და მათ ფიზიკურ და გონებრივ გადაშენებაზე. მაინც დღესაც ცხადია, რომ მხოლოდ აქ და არა სოფლად იბადება ის შეგნება, რომ შენი ცხოვრების ცოტად თუ ბევრად ადამიანურად მოსაწყობად შენ თვითონ უნდა შეეცადო“. ლუზინი აცხადებს, რომ საქართველოს საზოგადოებრივ-პოლიტიკური ცხოვრების სარბიელზე მუშათა კლასის გამოსვლით „საბუთი გვაქვს ვიშახარობლოთ, რომ გამოჩნდა პირველი მერცხალი, რომელიც უტყუარი მომასწავებელია ნამდვილი გაზაფხულის მოახლოებისა“.

მესამედასელებმა მარქსისტული ფილოსოფიის პროპაგანდაც გააჩაღეს. მარქსისტული ფილოსოფია ვრცელდებოდა საქართველოში რეაქციული იდეალისტური ფილოსოფიისა და ხალხოსნური სუბიექტივისტური სოციოლოგიის წინააღმდეგ შეურიგებელ ბრძოლაში. ქართველმა მარქსისტებმა შეძლეს ფილოსოფიაში ანტიმარქსისტულ მიმდინარეობათა განადგურება და მარქსისტულ ფილოსოფიურ-სოციოლოგიურ შეხედულებათა ფართოდ გავრცელება.

„მესამე დასი“ საზოგადოებრივ ცხოვრებას მუდმივად ცვალებად პროცესად თვლის. ცხოვრება დაუცხრომელ დუღილშია. იგი მუდამ დელაეს. იცვლება და ვითარდება. ბატონყმური წყობილება კაპიტალისტურს არ ჰგავს, მომავალი, სოციალისტური წყობილება კაპიტალისტურის მსგავსი არ იქნება. განვითარების ეს დაუსრულებელი პროცესი მწერლობას ავალებს ცხოვრებას აედევნოს, მას ფეხდაფეხ მისდის და არა მარტო განახლებული ცხოვრება გვიჩვენოს, არამედ დაგვიხატოს ისიც, თუ განვითარების რა გზას დადგომია იგი. „არც ერთი მოვლენა, — წერდა ს. ჯიბლაძე, — არ არსებობს დაოთხკუთხებული, გათავებული, მისი ნიშნობილი თვისება — მოძრაობა, განვითარებაა. ამის გარეშე ის არ არის საქმე იმაშია, გამოირკვეს რა ეკუთვნის მომავალს და წარსულს“.

მესამედასელთა სიტყვით, „ივერიის“ პუბლიცისტების მეთოდი მეტაფიზიკურია, მოვლენებს უძრაობაში იხილავს და აყენებს პრინციპს: „პო ან არა“. მესამედასელები მას უპირისპირებენ დიალექტიკურ მეთოდს, რომელიც მოვლენებს ცვალებადობაში განიხილავს და აყენებს პრინციპს: „პოც და არა“. ყოველ მოვლენას ორი მხარე აქვს: კონსერვატორული და პროგრესული. მათი შეტაკება და ბრძოლა ყოველი მოვლენის მოძრაობის დაუშრეტელი წყაროა. მისგან ცხოვრება მუდმივ რღვევა-შენებაშია. თანდათანობით ცვალებადობას, ევოლუციას თან მოსდევს ნახტომი, „ევოლუციის დასკვნა რევოლუცია“ როგორც ბუნებაში, ისე საზოგადოებაში.

ეყრდნობა რა ენგელსის „ანტი-დიუჩინგს“ ს. ჯიბლაძე ამტკიცებს, რომ „შეირყენ და შეიცვალენ ეკონომიური პირობები, ირყევიან და იცვლებიან მათი შედეგებიც — საზოგადოებრივი ურთიერთობა და წესწყობილება“. საზოგადოებაში ისახება წინააღმდეგობა, ჩაღდება ბრძოლა ძველსა და ახალს შორის. მიმდინარეობს თანდათანობითი რაოდენობრივი ცვლილებების პროცესი, რომელსაც თავისი დასასრული, საზღვარი აქვს. ამ საზღვარზე „ისტორია აკეთებს, როგორც ერთი მეცნიერი ამბობს, ნახტომს... ისტორიაში იწყება ახალი ხანა“.

ისტორიული მოძრაობის ჩარხს ეკონომიური ურთიერთობა ატრიალებს. მატერიალური ურთიერთობა სულიერ ურთიერთობათა საფუძველია. მატერიალურ საფუძველს ემყარება პოლიტიკური და იურიდიული ზედნაშენები. პირველის ცვლილება მეორეს ცვლილებას იწვევს. პირველში ძევს მეორეს გასაღები. მხოლოდ პირველის გაგებით ხდება მეორე გასაგები.

დასელებმა პირდაპირ გადმოიღეს მარქსის „პოლიტიკური ეკონომიის კრიტიკის“ შესავლიდან ისტორიული მატერიალიზმის დახასიათება და იგი ქართველ მკითხველს მიაწოდეს. ჩვენ, წერდნენ ისინი, ვიცავთ იმ აზრს, რომ „დგება ეპოქა სოციალური რევოლუციისა და შესაფერი შეცვლით ნივთიერი ცხოვრებისა ძალაუნებურად იცვლება იურიდიული, პოლიტიკური და ზნეობრივი მხარე ცხოვრებისა და ფორმები ცნობიერებისა“.

მესამედასელებმა საზოგადოების ისტორია განიხილეს, როგორც კლასთა ბრძოლის ისტორია. კლასთა ბრძოლა უდევს საფუძვლად და ამოძრავებს საზოგადოებრივ ცხოვრებას. თუ კლასობრივი ბრძოლა უყურადღებოდ იქნა დატოვებული, მაშინ საზოგადოებას წყვედიანი მოიცავს და ხალხთა ისტორია მეფეთა და გმირთა ისტორიად გადაიქცევაო.

დასელებმა უარყვეს ქართველი პუბლიცისტების სუბიექტურ-იდეალისტური შეხედულება ისტორიაზე და ამხილეს მათი ფუჭი ცდა საზოგადოების ისტორია წარმოედგინათ მეფეთა ისტორიად და საზოგადოებაში მომხდარ ცვლილებათა ძირითადი მიზეზი მეფეთა ტახტზე ასვლა-ჩამოსვლაში ეძებნათ. მათ ნათელყვეს, რომ საზოგადოებრივი ცხოვრება

დამყარებულია ობიექტურ კანონებზე, რომელთა „მიღრეკილების თავის სურვილისამებრ რყევა-დრეკა აღემატება ადამიანის ძალღონეს“ და რომ „ყოველი შეგნებული საზოგადო შოღვაწე“ თვით ემორჩილება ამ კანონს, „იკვლევს მის ბუნებას და ხასიათს და ამისდაგვარად მოქმედებს თავის მიხნის მისაღწევად“¹.

დასელები მშრომელი მასების შემოქმედებაში ხედავენ იმ ძალას, რომელიც საზოგადოებრივი ცხოვრების ჩარხს ატრიალებს. მათი აზრით, საზოგადოებრივი ცხოვრების მაჯისცემა ხალხის მასების მოქმედებით განიზომება. ისტორიას ადამიანები ქმნიან, მაგრამ არა ცალ-ცალკე, ერთმანეთისაგან იზოლირებულად, არქედ ერთად. ერთ ისტორიულ უღელში შებმულნი. ამიტომ ისტორიის შემოქმედია არა ცალკე პიროვნება, არამედ „პიროვნებათა გუნდი“. დასელები გადმოგვცემენ ენგელსის შრომიდან „ლ. ფოიერბახი“ იმ დებულებას, რომ ადამიანები ისტორიას ქმნიან არა შეგნებულად, არამედ შეუგნებლად და სტიქიურად. ყოველი ადამიანი გარკვეულ მიზანს ისახავს და მის მისაღწევად მოქმედებს. ამ შემთხვევაში მისი მოქმედება შეგნებულია, მაგრამ საზოგადოება მრავალი პირისაგან შედგება და მათი სხვადასხვა მიმართულებით მოქმედ ინტერესთა და მისწრაფებათა შეჯახება და ურთიერთგადახლართვა შედეგად შეუგნებელ, ბრმა ისტორიულ პროცესს იძლევა.

დასელებმა აწილეს ქართველი სუბიექტივისტები, რომლებიც ცილს სწამებდნენ მარქსისტულ მოძღვრებას, თითქოს იგი უარყოფდეს „ზედნაშენის“ მნიშვნელობას საზოგადოების განვითარებაში. მათ მიუთითეს, რომ დიალექტიკური მატერიალიზმი „პოლიტიკურ ძალას თვლის ეკონომიური ცვლილებების იარაღად და ეკონომიურ ძალას — პოლიტიკური უფლებების ბურჯად“.

მესამედასელები გამოეკამათნენ ნ. ნიკოლაძეს, რომელიც ძალმომრეობას ბოროტებად თვლიდა და ამტკიცებდა ისტორიული კანონია სიმართლის არა ძალით, არამედ თავისთავად გამეფებაო. დასელებმა ისტორიიდან მოტანილი ფაქტებით დაამტკიცეს, რომ ძალა, „სისხლის ღვრა“, ხმალი და „ამბოხება“ მიუძღვოდა ყოველთვის საზოგადოებრივი ცხოვრების გარკვეული საფეხურისათვის შესაფერი სიმართლისა და სამართლიანობის დამყარებას, ეკონომიურად გაბატონებული ბურჟუაზია პოლიტიკურადც ბატონდება და პოლიტიკურ ძალას ეკონომიური გაძლიერებისათვის იყენებს. ეკონომიკა პოლიტიკის მიზეზად ხდება, ხოლო პოლიტიკა — ეკონომიკის. მუშათა კლასი, დასელების განცხადებით, ასე თავგანწირვით იმიტომ იბრძვის პოლიტიკური უფლებების მოპოებისათვის, რომ შეცვალოს თავისი ეკონომიური მდგომარეობა.

¹ „კვალი“, 1895, № 18.

დასელები ახდენდნენ რა მარქსისა და ენგელსის მიერ („წმინდა ოჯახში“) გამოთქმული დებულების პერეფრაზირებას, ამტკიცებდნენ, რომ იდეას შეუძლია მხოლოდ იდეა დაარღვიოს, ხოლო ადამიანის მდგომარეობას თვით ადამიანი ცვლის, რისთვისაც მატერიალურ ძალას იყენებს.

დასელებმა ანტიმარქსისტულ მიმდინარეობათა პუბლიცისტების ფილოსოფიურ-სოციოლოგიურ შეხედულებათა განხილვასა და მათი იდეალიზმისა და ხალხოსნური სუბიექტივიზმის მკაცრ კრიტიკასთან ერთად ვრცლად გადმოსცეს დიალექტიკური მატერიალიზმის ძირითადი პრინციპები. მიუხედავად დაშვებული შეცდომებისა და დამახინჯებებისა, უზრუნველყვეს ხალხოსნებისა და სხვათა იდეალისტურ შეხედულებებზე გამარჯვება, ახალი, მარქსისტული თეორიულ-ფილოსოფიური და ისტორიულ-მეცნიერული შეხედულებების ფართოდ გავრცელება.

„მესამე დასის“ პუბლიცისტებმა დიდი მუშაობა გასწიეს მარქსიზმის იდეების გასავრცელებლად საქართველოში. მათ ძირითადად გადალახეს მარქსიზმის მოწინააღმდეგეთა მიერ აღმართული იდეურა დაბრკოლებანი და თეორიული საფუძვლები ჩაუყარეს მარქსისტულ მოძრაობას საქართველოსა და ამიერკავკასიაში. გ. პლენანოვისა და მისი თანამებრძოლების მიერ რუსულ საზღვარგარეთულ პრესაში აღმართული მარქსიზმის დროშა ქართველმა მარქსისტებმა საქართველოში შემოიტანეს და დაამკვიდრეს ქართულ ლეგალურ პრესაში. მაგრამ მათ მოღვაწეობას თან ახლდა ნაკლოვანებანი: ისტორიული შეზღუდულობა და აბსტრაქტულობა, მცდარი შეხედულებები.

„მესამე დასი“ წარმოადგენდა ქართველი მარქსისტული ინტელიგენციის პატარა, არსებითად ლიტერატურულ-პოლიტიკურ ჯგუფს, რომელიც არ იყო დაკავშირებული მუშათა მასობრივ მოძრაობასთან. ქართველი მარქსისტების პირველი თაობა ჯერ კიდევ განზე იდგა მუშებისაგან. მათ ნაწიერებში ჩანს როგორც ნაროდნიკულ შეხედულებათა ნაშთები (ე. ნინოშვილი), ისე მომავალ მენშევიკურ და ნაციონალისტურ შეხედულებათა ჩანასახები (ნ. ჟორდანიას, კ. ჩხეიძე, ს. ჯიბლაძე).

მესამედასელები იზიარებდნენ დასავლეთ ევროპის სოციალ-დემოკრატიებს შორის გავრცელებულ შეხედულებას მოსახლეობის ნახევრად-პროლეტარული მასების რევოლუციური შესაძლებლობის უარყოფის შესახებ და იცავდნენ ფეოდალიზმის წინააღმდეგ ბრძოლაში ბურჟუაზიისა და პროლეტარიატის კავშირის პლენანოვისებურ იდეას. მართალია, მათ მიუთითეს მუშათა კლასის მეთაურ როლზე საერთო-დემოკრატიულ მოძრაობაში, დაინახეს, რომ მას შემდეგ, რაც მუშა ხალხი გამოვიდა პოლიტიკურ სარბიელზე, ევროპაში ბურჟუაზიამ დაკარგა რევოლუციური როლი, იგი მუშათა კუთვნილებად იქცა, ისიც აღნიშნეს, რომ სოციალურ და ნაციონალურ ცვლილებათა ინიციატორი თუ მოწინავე ქვეყნებ-

ში (ინგლისი, საფრანგეთი) ბურჟუაზია იყო, „უკან ჩამორჩენილ ქვეყნებში მუშა ხალხია“, მაგრამ ამ დებულებამ მათ ნაწერებში ვერ პოვა სათანადო დასაბუთება და განვითარება. მათ მონარქიულ-ფეოდალური წყობილების წინააღმდეგ ბრძოლაში დაუშვეს შესაძლებლობა ბურჟუაზიისა და მუშათა კლასის ერთობლივი ბრძოლისა, საერთო ძალით პოლიტიკური თავისუფლების მოპოვებისათვის. უორდანი წერდა, რომ იქ, სადაც ჯერ კიდევ ბურჟუაზია არ გაბატონებულა „მუშა ხალხი უნდა შეუერთდეს ბურჟუაზიას“, რომ საერთო ძალღონით დაღწეოს ძველი წყობილება¹. ჯიბლაძე კი ამტკიცებდა, რომ „მოსალოდნელია მესამე და მეორე დასი მომავალში დაუახლოვდნენ ერთმანეთს ღროებით, ჩაუნგრიონ ბუდე რეაქციონერებს, შემდეგ ერთმანეთის წინააღმდეგ მოიდერონ ყელი საბრძოლველად“².

დასელებმა გაილაშქრეს ეროვნული ჩაგვრის წინააღმდეგ და ეროვნული თავისუფლებისათვის მებრძოლი ძალა მშრომელ ხალხში დაინახეს. მათ ბრძოლა გამოუცხადეს სოციალურ და ეროვნულ ჩაგვრას და პირდაპირ განაცხადეს: ის, ვინც სამშობლოს თავისუფლების წინააღმდეგია, თავისი ერის მოღალატეა, ხოლო ის, ვინც იცავს უმცირესობას უმრავლესობის წინააღმდეგ, თავისი ერის მტერია, ვინაიდან „ერს შეაღგენს უმრავლესობა და არა უმცირესობა“. ამ დებულების დასამტკიცებლად მათ დაიმოწმეს ცნობილი ფრანგი მარქსისტის ყიულ გედის შემდეგი სიტყვები: ჩვენ უსამშობლოები როდი ვართ. ჩვენ პატრიოტები ვართ. პატრიოტები არიან არა ბურჟუები, არა მდიდრები, არამედ ისინი, რომლებიც სამშობლოს გაჭირვების დროს თავიანთი სისხლით იცავენ და ქვეყნის მთელ სიმდიდრეს ქმნიან³ ნ. უორდანიას თქმით, ისტორია არაერთ შემთხვევას იცნობს, როცა „სოციალური განხეთქილება უმაღლეს ხარისხს მიღწევს, კლასი დამჩაგვრელთა იწვევს უცხოელებს, წინააღმდეგ სამშობლოს დიდი უმრავლესობისა, რომ ამით კლასი დამჩაგრული დასძლიოს და დიდი უპირატესობა შეინარჩუნოს. მაშინ სამშობლოს ინტერესების დამცველთა და მეომართ გამოდის მხოლოდ უკანასკნელი, პირველი კი ემხრობა მტერთ“. ასე იყო მაგალითად, საფრანგეთში, როცა 1793 წ. არისტოკრატებმა მთელი ევროპა მიიწვია დიდი რევოლუციის ჩასაქრობად და 1871 წ., როცა ბურჟუაზიამ ტიერის მეთაურობით ბისმარკს შემწეობა თხოვა კომუნის დასამარცხებლად. ასე მოხდა საქართველოშიც, როცა მაღალი თავადაზნაურობა რუსეთის ცარიზმს მიეკედლა. ამ მარქსისტულ-პროლეტარულ თვალსაზრისს ნ. უორდანია ბოლომდე ვერ ინარჩუნებს.

ნ. უორდანია სიმპათიით აღწერდა ევროპის საზოგადოებრივ ცხოვრ-

1 „ქელი“, 1895, № 39.

2 იქვე, № 8.

3 „მომბე“, 1894, № 6.

ბას და ბურჟუაზიული დემოკრატიის იდეალიზაციას ახდენდა. მისი მტკიცებით, დასავლეთ ევროპაში საკითხი იმის შესახებ „ვინ უნდა მართოს ქვეყანა“, თითქოს გადაწყვეტილია „ხალხის სასარგებლოდ“ და იქ უკვე ღამყარდა „ხალხის მეფობა“.

ნ. ჟორდანიას, მისივე თქმით, თავის მოღვაწეობაში ემყარებოდა „ერის უმრავლესობას, მიუხედავად წოდებისა“, სახელდობრ, ქართველობის იმ ნაწილს, რომელიც „სამოქალაქო ასპარეზზე გამოსული და ილტვის თანამედროვე საშუალებებით (განათლება, აღებ-მიცემა, ხელოსნობა, შავი მუშაობა და სხვადასხვა) თავი ირჩინოს“. ამრიგად, მესამედსეულებთან თვალნათლივ ჩანს მარქსისტული თვალსაზრისიდან წვრილბურჟუაზიულ ეროვნულ-დემოკრატიულ თვალსაზრისისაკენ გადაზრის ტენდენცია¹.

„მესამე დასი“ იყო მარქსისტული, სოციალ-დემოკრატიული ორგანიზაცია, რომელმაც მარქსიზმი პირველმა შემოიტანა და გაავრცელა საქართველოში. დასელებმა სახელმძღვანელოდ გაიხადეს მარქსისა და ენგელსის „კომუნისტური პარტიის მანიფესტი“, რომელიც მუშა ხალხს ურჩევდა „პოლიტიკური უფლების მოპოვებას და მისი საშუალებით ეკონომიური მდგომარეობის გაუმჯობესებას“. დასელებმა მიზნად დაისახეს ქართველი მშრომელი ხალხის გაცნობიერება, მისი თვითმოქმედების გავიფხვება, მისი ერთიან, შეგნებულ რაზმად გადაქცევა. მათ დროშაზე ეწერა: „ყველაფერი ხალხისათვის, ყველაფერი ხალხითვე“.

„მესამე დასის“ ისტორიული მნიშვნელობა იმაშია, რომ იგი პლენარის „შრომის განთავისუფლების“ ჯგუფის კვალს გაჰყვა და მისი ანალოგიური როლი ითამაშა საქართველოში. ეს იყო ჩვენი პარტიის განვითარების პირველი პერიოდი, როცა საქართველოს სოციალ-დემოკრატია განიცდიდა „ჩანასახის განვითარების პროცესს“, იდეური მომზადების პერიოდს, ცალკეულ მცირერიცხოვან ჯგუფებსა და წრეებში მარქსიზმის პროპაგანდის ხანას. საქართველოს სოციალ-დემოკრატია იდეური მიმდინარეობის სახით ჩამოყალიბდა და მუშათა მოძრაობასთან შეერთებისაკენ წარიმართა².

¹ „კვალი“, 1900, № 2.

² მკვლევართა ერთი რიგი ვარაუდობს, რომ უკვე ამ დროს ადგილი ჰქონდა მწვევე უთანხმოებას მესამე დასის ოპორტუნისტულ და რევოლუციურ ფრთას შორის (იხ. „საქართველოს კომუნისტური პარტიის ისტორიის ნარკვევები“, ნაწ. I, თბ., 1957, გვ. 39. შმდ.). სხვა მკვლევარნი იმ აზრს ადგანან, რომ მესამედსეულთა შორის, მართალია, უკვე ამ პერიოდში ადგილი ჰქონდა შეკამათებას და აზრთა სხვადასხვაობას ცალკეულ საკითხებზე, მაგრამ ასეთი მწვევე ხასიათი უთანხმოებას ჯერ კიდევ არ მიუღია (იხ. ლ. გორგილაძე, მარქსი და საქართველო („ლიტერატურული საქართველო“, 1968, № 18). პლ. თავხელიძე, ვ. ი. ლენინი და რსდმპ კავკასიის კავშირი, 1969, გვ. 38—39; მისივე, Кавказский Союз РСДРП, и революционное движение в Закавказье, Автореферат докторской диссертации, Тб., 1970, გვ. 9; ლ. გორგილაძე, სოციალიზმის ისტორიიდან, II, 1970, გვ. 371—400).

XIX საუკუნის 90-იან წლებში რუსეთის მუშათა რევოლუციური მოძრაობას სათავეში ჩაუდგა ვ. ი. ლენინი. დაიწყო ლენინური ეტაპი მარქსიზმის განვითარებაში.

ვ. ი. ლენინის რევოლუციური მოღვაწეობის დაწყებამ, მისმა თეორიულმა შრომებმა და პრაქტიკულმა საქმიანობამ გადამწყვეტი ზემოქმედება მოახდინა და განსაზღვრა საქართველოში რევოლუციური მარქსიზმის დამკვიდრება, მარქსიზმის შეერთება მუშათა მოძრაობასთან, მასობრივ აგიტაციაზე გადასვლა.

1896 წელს, პეტერბურგის „ბრძოლის კავშირის“ მძლავრი ბიძგის შედეგად მოხდა თბილისში არსებული მარქსისტული წრეების გაერთიანება ერთიან სოციალ-დემოკრატიულ ინტერნაციონალურ ორგანიზაციად, რითაც საქართველოში საფუძველი ჩაეყარა სოციალ-დემოკრატიულ მოძრაობას. ამ დროიდან საქართველოში ჩნდება სოციალ-დემოკრატია, როგორც საზოგადოებრივ-პოლიტიკური მოძრაობა.

საქართველოში სოციალ-დემოკრატიული მოძრაობის წარმოშობის შესახებ ი. ბ. სტალინი 1901 წელს წერდა: „სოციალ-დემოკრატიულმა მოძრაობამ ხელშეუხებელი არ დატოვა ქვეყნის არც ერთი კუთხე. არ დაურჩა მას ხელშეუხებელი რუსეთის ის კუთხეც, რომელსაც კავკასიას ვუწოდებთ, და კავკასიასთან ერთად ჩვენი საქართველოც. საქართველოში სოციალ-დემოკრატიული მოძრაობა ხნიერი არ არის, სულ რამდენიმე წელიწადია, რაც ის წარმოიშვა, დანამდვილებით რომ ითქვას, საძირკველი ამ მოძრაობისა მხოლოდ 1896 წელს ჩაიყარა“¹.

კავკასიაში მომუშავე სოციალ-დემოკრატებს ახლო ურთიერთობა ჰქონდათ პეტერბურგის „ბრძოლის კავშირთან“. აფანასიევოს, ლუზინის, ფრანჩესკისა და სხვების შესახებ თბილისის ჟანდარმერიის კვლევა-ძიების საქმეში აღნიშნულია, რომ პეტერბურგშია საქართველოს სოციალ-დემოკრატიული პროპაგანდის ცენტრი, რომელიც „აერთიანებს ცალკეული სოციალ-დემოკრატიული ორგანიზაციების მოქმედებას“. აფანასიევისათვის პეტერბურგიდან გამოგზავნილ ამანათში, რომელიც ჟანდარმერიას ჩაუვარდა ხელში, არალეგალურ ლიტერატურასთან ერთად, აღმოჩენილ იქნა წერილი, რომლის ავტორიც დაკავშირებული ყოფილა პეტერბურგში „ბრძოლის კავშირის“ საქმეზე პასუხისგებაში მიცემულ პირებთან.

ამავე საქმიდან ჩანს, რომ ბათუმის სოციალ-დემოკრატიული წრე დაკავშირებულნი იყო „ბრძოლის კავშირთან“. გ. ფრანჩესკის ქალაქებში ნაპოვნი ბათუმის სოციალ-დემოკრატიული წრის წესდების მე-19 მუხლო-

¹ ი. ბ. სტალინი, თხზ., ტ. 1, გვ. 3—4.

დან „ირკვევა, ნათქვამია თბილისის უნდარმერიის კვლევა-ძიების დოკუმენტში, — რომ „მუშათა კლასის განთავისუფლებისათვის ბრძოლის კავშირი“ იმყოფება ქ. პეტერბურგში, სადაც განზრახული იყო კიდევ საზოგადოების სალაროს ფულის გადაგზავნა“¹. ამრიგად, პეტერბურგის „ბრძოლის კავშირი“ მჭიდროდ იყო დაკავშირებული საქართველოს სოციალ-დემოკრატიულ ორგანიზაციასთან, ხელმძღვანელობას უწევდა მას და საერთოდ დიდ ზემოქმედებას ახდენდა სოციალ-დემოკრატიულ მოძრაობაზე კავკასიაში.

სოციალ-დემოკრატი მუშებზე და ინტელიგენტებზე დიდი გავლენა მოახდინა „ბრძოლის კავშირის“ ხელმძღვანელობით პეტერბურგის 30 ათასი ფეიქარი მუშის გაფიცვამ 1896 წლის ზაფხულში. 1896 წ. პეტერბურგის „ბრძოლის კავშირი“ მჭიდროდ იყო დაკავშირებული საქართველოს სოციალ-დემოკრატებთან და ახალი ენერგია შემატა მათ. იმავე წლის დამლევსთვის თბილისში მუშათა სოციალ-დემოკრატიული წრეების რიცხვმა 25-მდე მიაღწია. ისინი შემოკრებილნი იყვნენ უნარიანი ორგანიზატორებისა და პროპაგანდისტებისაგან ამ დროისათვის უკვე ჩამოყალიბებული, მუშათა წრიდან გამოყოფილი „ხელმძღვანელ მუშათა კოლექტივის“ (ზ. ჩოდრიშვილის, ვ. სტურუას, მ. ბოჭორიძის, არ. ოქუაშვილის, გ. ჩხეიძის, ვ. ცაბაძისა და სხვ.) გარშემო.

1897—1898 წლებში მუშათა ამ ხელმძღვანელი ჯგუფის მუშაობაში ჩაებნენ მანამდე მასთან იდეურად დაკავშირებული მარქსისტი-ინტელიგენტები „მესამე დასის“ ჯგუფიდან. იქმნება მუშებისა და ინტელიგენტებისაგან შემდგარი პირველი სოციალ-დემოკრატიული „მუშათა ხელმძღვანელი კომიტეტი“, რომელშიც შედიან: ზ. ჩოდრიშვილი, ვ. ცაბაძე, მ. ბოჭორიძე, ლ. კეცხოველი, ა. ოქუაშვილი, ს. ჯიბლაძე, ს. ჯულელი, ალ. შატილოვი, რ. კალაძე და სხვ.

მუშათა ხელმძღვანელმა კომიტეტმა საგრძნობი მუშაობა გააჩაღა. თბილისის მუშები საბრძოლველად იღვიძებენ. 1896 წელს თბილისში, უმთავრესად მუშათა უბნებში, ფართოდ გავრცელდა ჰექტოგრაფზე დაბეჭდილი სხვადასხვა შინაარსის პროკლამაციები, რომლებიც მუშებს შეკავშირებისა და ბრძოლისაკენ მოუწოდებდნენ. ერთ-ერთ ფურცელში ნათქვამი იყო: „გიძღვნი, ძვირფასო ამხანაგებო, გულითად კეთილ სურვილს და გისურვებთ მამაც და კეთილგონიერ მოქმედებას. ჩვენი მხრით თქვენ მიიღებთ დახმარებას, იქნება ის თუ არა საჭირო, რადგან უდგივართ თქვენს საქმეს დარაჯად“².

ფურცლები მუშებს უხსნიდა, რომ „დროა გაიღვიძონ და იბრძოლონ

¹ მარქსიზმ-ლენინიზმის ინსტიტუტის საქართველოს ფილიალის პარტიული არქივი, ფ. 31, საქ. 35.

² მლისტვა, ფ. 31, საქ. 25.

მონური მდგომარეობიდან გამოსვლისათვის“. მოწოდებაში მოაგონებდა მუშათა „მწვალებლებს“ 80-იანი წლების ამბებს და უფრო „მკაცრ ფორმებში“ მათ განმეორებით ემუქრებოდა.

1896 წლის გაზაფხულზე ხელმძღვანელი მუშათა კოლექტივი შეეცადა რკინიგზის სახელოსნოებში გაფიცვის მოწყობას იმასთან დაკავშირებით, რომ ადმინისტრაციას უნდოდა სახელოსნოებში შემოეღო ახალი წესები, რომლებიც მუშების მდგომარეობას საგრძნობლად აუარესებდა. მაგრამ მოსალოდნელი გაფიცვით შეშინებული ადმინისტრაცია იძულებული გახდა თავის განზრახვაზე ხელი აეღო, დათმობაზე წასულიყო და მუშათა ძთელი რიგი მოთხოვნები დაეკმაყოფილებინა. ეს იყო თბილისელი მუშების მიერ ორგანიზებული ბრძოლით მოპოვებული პირველი გამარჯვება.

იმავე წლის ზაფხულში მუშათა კოლექტივმა შეძლო მოეწყო თბილისის თამბაქოს ფაბრიკების მუშათა დიდი გაფიცვა. გაფიცვა დაიწყო ივლისის პირველ რიცხვებში და გაგრძელდა ერთ თვეზე მეტ ხანს. მასში მონაწილეობდა 500-მდე მუშა. გაფიცული მუშები მოითხოვდნენ ხელფასის მომატებას, სამუშაო დღის შემცირებასა და სხვ. კუკიის სასაფლაოს იქით, მთის კალთებზე, ღამ-ღამობით ეწყობოდა მუშათა კრებები, რომლებსაც ესწრებოდა 100-დან 200 კაცამდე. ამ გაფიცვას სერიოზული მნიშვნელობა ჰქონდა როგორც თვით გაფიცული მუშებისათვის, მათი კლასობრივი ცნობიერების განვითარებისათვის, ისე გაფიცულთა მეთაურთათვის, რომლებმაც ხელმძღვანელობის პირველი გაკვეთილი მიიღეს. ამ გაფიცვის ერთ-ერთი მონაწილე მოგვითხრობს: „1896 წლის ზაფხულში ჩვენმა პარტიამ მოაწყო გაფიცვა ენფიანჯიანცის პაპიროსის ქარხანაში. აქაც მოთხოვნები წმინდა ეკონომიური იყო. ამ ქარხანაში მეტი ნაწილი შეუგნებელი მუშები იყვნენ, ყარაჩოხელი ბიჭები. გაფიცვა რომ კარგად ჩატარებულიყო და შტრეიკბრეხერები არ გამრავლებულიყვნენ, ჩვენ ვაწყობდით გაფიცულთა კრებებს ქალაქის გარეთ, ღამით. მახსოვს, პირველ კრებაზე რამდენიმე ამხანაგის შემდეგ ილაპარაკა მიხა ბოჭორიშვილმა. მიხა უკვე კარგად მომზადებული პროპაგანდისტი იყო. ყარაჩოხელი ბიჭები გაკვირვებით უსმენდნენ მიხას, რადგან ისინი რამდენიმე წლის წინათ იცნობდნენ მას, როგორც უბრალო ქმადიჭს; როდესაც მიხამ რამდენჯერმე იხმარა: „ექსპლოატაცია“, „კონცენტრაცია“, „ექსპროპრიაცია“ და სხვა უცხო სიტყვები, ერთი განიერ-შარვლიანი მუშა ეუბნება მეორეს: „ბიჭო, ერთი უცქირე მაგ პირძაღლ მიხაკოს, როგორ ჩეჩქივით აყრის ზაგრანიჩნი სიტყვებსო“. ბოლოს ილაპარაკა არაქელამ. ის ლაპარაკობდა სწორედ განიერ-შარვლიანების ენაზე და ისეთი ალტაცება გამოიწვია მსმენელებში, რომ ის სულ ბურთივით ისროლეს ხელში და თან გაიძახოდნენ: „შენი ჭირიმე არაქელჯან, ეგ რა მართალს ლაპარაკობო“... კრება დიდი აღფრთოვანებული დაიშალა“¹.

¹ მლსტპა, ფ. 34, საქ. 21.

1896 წლის მუშათა გაფიცვა თბილისში ეკონომიურ ხასიათს ატარებდა და ჯერ კიდევ სტიქიური მოძრაობის გამოხატულებას წარმოადგენდა. კავკასიაში მუშათა მოძრაობამ ყველაზე ადრე და თვალსაჩინოდ თბილისში იჩინა თავი. თბილისის მუშათა ავანგარდი რკინიგზის სახელოსნოების მუშები იყვნენ.

თბილისისა და, მასასადამე, საქართველოსა და ამიერკავკასიის მუშათა მოძრაობის ისტორიაში 1896 წელი გარდატეხის დასაწყისია. სოციალ-დემოკრატია ვიწრო კონსპირაციის ფარგლებიდან გამოსვლას იწყებს და საზოგადოებრივი მოძრაობის სახით წარმოგვიდგება. თუ 1896 წლამდე თბილისში მხოლოდ ვიწრო კონსპირაციული, თითებზე ჩამოსათვლელი რამდენიმე სოციალ-დემოკრატიული წრე არსებობდა, 1896 წლიდან მუშათა სოციალ-დემოკრატიული წრეები გამრავლდნენ. რევოლუციურმა პროპაგანდამ ფართო ხასიათი მიიღო. იგი მოედო მუშების საკმაოდ ნაწილს, მოეფინა მუშათა მასას და ბრძოლის ველზე გამოიყვანა იგი.

ასე აიღვა ფეხი საქართველოში მუშათა სოციალ-დემოკრატიულმა მოძრაობამ, რომელსაც უკვე იმ წლებში გაეცნო და დაუკავშირდა ვ. ი. ლენინი. ვ. ი. ლენინმა 90-იანი წლების დამდეგს სრულიად სანდო წყაროებიდან, მასთან ახლო მდგომ, მისი ნდობით აღჭურვილ პირთა საშუალებით, შეიტყო, თუ როგორ მტკიცედ იკიდებდა ფეხს მარქსისტული, სოციალ-დემოკრატიული მოძრაობა საქართველოში. ლენინს ჯერ კიდევ 1893—1894 წლებში ჰქონდა პირადი შეხვედრები და მიმოწერა იმ რუს რევოლუციონერებთან (პ. მასლოვი, მ. ნატანსონი და სხვ.), რომლებიც იმ დროს თბილისში იმყოფებოდნენ და ჩაბმულნი იყვნენ აქაურ რევოლუციურ მოძრაობაში. ამას ადასტურებს ვ. ი. ლენინის წერილები პ. მასლოვისადმი, რომლებიც 1893—1894 წლებშია დაწერილი. მასლოვს ლენინისათვის მიუწერია: თქვენი მისამართი არ ვიცოდი და იძულებული ვიყავი „მეძებნეთო“. ლენინი თავის პასუხში 1894 წლის 30 მაისის თარიღით გაკვირვებას გამოთქვამს, რატომ მოუხდა მასლოვს ლენინის „ძებნა“, აკი სთხოვა მან ნ. მ. ა-ს „პეტერბურგიდან თბილისში დაბრუნებისას“ ენახა მასლოვი და მისთვის ლენინის მისამართი გადაეცა¹.

ცხადია, რომ ამ პირთა საშუალებით ლენინი ინფორმირებული იქნებოდა თბილისური ამბებით და, შეიძლება ვიფიქროთ, ახორციელებდა კიდევ გარკვეულ კავშირთაღიერებებს თბილისელ რევოლუციონერებთან. ამავე პირთა საშუალებით უთუოდ უკვე მაშინ ჩამოაღწია ჩვენში ცნობამ სამოღვაწეო ასპარეზზე გამოსული დიდი რუსი რევოლუციონერისა და თეორეტიკოსის საქმიანობის შესახებ. ეს მით უფრო საფიქრებელია, რომ პ. მასლოვი, ს. დანდუროვის გადმოცემით, დიდად გაკვირვებული დარჩენილა თბილისში მარქსიზმის ასე ფართოდ გავრცელების გამო.

¹ ვ. ი. ლენინი, თხზ., სრ. კრებული, ტ. 46, გვ. 3 (რუს. გამოც.).

იგი თურმე არ ელოდა, სოფლის მეურნეობის ქვეყანაში, სადაც თავდაზნაურული ინტელიგენცია ჰარბობდა, ენახა სერიოზულად მომზადებული მარქსისტები, და ფიქრობდა, თვითონ გამოსულიყო მარქსიზმის მქადაგებლად საქართველოში. მასლოეს ამავე დროს არ შეიძლებოდა თბილისელ სოციალ-დემოკრატთა წრეში არაფერი ეთქვა ვ. ი. ლენინის შესახებ, რომელთანაც იგი ამ დროს აგრარულ საკითხზე ცხარე კამათს აწარმოებდა. ლენინმა სწორედ მასლოვისადმი მიწერილ ამ წერილებში ჩამოაყალიბა ის მნიშვნელოვანი დებულებანი, რომელთაც შემდეგ თავისი დასრულებული გამონახტულება პოვეს შრომაში „კაპიტალიზმის განვითარება რუსეთში“.

ამრიგად, თბილისში მომუშავე სოციალ-დემოკრატებთან ვ. ი. ლენინს გარკვეული კავშირითიერთობა ჯერ კიდევ 90-იან წლებში მყარდება. ლენინის სახელი უკვე მაშინ ხდება ცნობილი საქართველოში. ამ დროს თბილისში მუშაობდნენ რუსი სოციალ-დემოკრატები, რომლებიც ან პირადად იცნობდნენ ლენინს, ანდა მის მოღვაწეობას იცნობდნენ ლენინთან დაახლოებულ პირთა მეშვეობით. მათი საშუალებით ქართველი სოციალ-დემოკრატებისათვის უცნობი არ იყო ლენინის ხელმოწერილად თუ ფსევდონიმით გამოქვეყნებული ნაწერების ავტორის ვინაობა და ის დიდი პრაქტიკული მუშაობა, რომელსაც ლენინი ეწეოდა რევოლუციური მუშათა პარტიის შექმნისათვის ბრძოლის პირველ წლებში.

ცოტა უფრო გვიან საქართველოში ცნობილი ხდება ლენინის ადრინდელი პერაოლის შრომებიც. თბილისის პრესაში გამოჩნდა პირველი რეცენზიები ლენინის ნაშრომებზე, რომლებსაც ჩვენი იმდროინდელი პროგრესული პრესა დიდი ინტერესით ეხმაურება.

1899 წელს ვ. ი. ლენინმა გამოაქვეყნა თავისი უმნიშვნელოვანესი მეცნიერული შრომა „კაპიტალიზმის განვითარება რუსეთში“, რომელშიც დაასაბუთა, რომ აგრარული ურთიერთობის განვითარება რუსეთში კაპიტალისტურად მიმდინარეობს და რომ ამ განვითარებამ უკვე საბოლოოდ განსაზღვრა კაპიტალისტური გზა და კლასების კაპიტალისტური დაჯგუფება. ამ ნაშრომით ლენინმა დააბოლოვა ნაროდნიკების იდეური განადგურება¹.

ბურჟუაზიული პრესა ცდილობდა ყური მოეყრუებინა ლენინის ამ შრომაზე. ლენინი 1899 წლის 27 ივნისს წერილში პოტრესოვისადმი ირონიულად წერდა, რომ გაზეთი „რუსკოე ვედომოსტი“ „ტაქტით დუმილს“ განაგრძობს. მხოლოდ 1899 წლის შემოდგომაზე გამოქვეყნდა პირველი რეცენზიები, რომლებიც მტრულ ხასიათს ატარებდნენ.

ქართულ პრესაში ლენინის წიგნზე დადებითი რეცენზია გამოქვეყნდა ჯერ კიდევ 1899 წლის ზაფხულში; გაზ. „კვალის“ 25 ივლისის ნომერში დაიბეჭდა ი. ლუზინის ბიბლიოგრაფია „ვლადიმერ ილიანი. კაპიტალიზმის

¹ ვ. ი. ლენინი, თხზ., ტ. 16, გვ. 139.

განვითარება რუსეთში. მსხვილი მრეწველობის შინაური ბაზრის წარმოშობის პროცესი“. რეცენზენტი გადმოგვცემს ავტორის ძირითად დასკვნებს და ამბობს: „ვლ. ილინის წიგნი საყურადღებოა თავისი მკაცრი მეცნიერული, ობიექტური გამოკვლევით... ახალგაზრდა ეკონომისტმა ანალიზი უყო მთელ იმ მდიდარ მასალას, როგორსაც კი იძლევა საერობო და ოფიციალური სტატისტიკა. შესაფერ სისტემაში მოიყვანა ციფრები და, ამნაირად, სრულიად დაასაბუთა თავისი დასკვნები. მასთან ერთად მან სასტიკ კრიტიკაში გაატარა შეხედულებანი ბ. ბ. ვორანცოვების, ნ. ონების, კარიშევების, ჯაბალუკოვების და სხვათა და გამოამხეურა მათი „მეცნიერული უმეცრება“. რეცენზენტი „ამ შესანიშნავ ღრმა და საფუძვლიანი შრომის“ წაკითხვას ურჩევს „ყველა მკითხველს“¹.

რაკი რეცენზენტი ვლ. ილინს „ახალგაზრდა ეკონომისტად“ იხსენიებს, ჩანს, მან იცოდა ვის ეკუთვნოდა ეს ფსევდონიმი. ეს მით უფრო საფიქრბელია, რომ იგი არხანგელსკის გუბერნიაში გადასახლებაში ყოფნის დროს (1893—1896 წწ.) გაეცნო და დაუახლოვდა ლენინის მიერ სამარაში დაარსებული მარქსისტული წრის წევრს ა. პ. სკლიარენკოს (პოპოვს), ლენინის ახლო მეგობარს, რომელსაც გადასახლებაში ყოფნისას ლენინი მატერიალურად ეხმარებოდა. ლუზინი სკლიარენკოსთან მეგობრობდა. ისინი ერთად კითხულობდნენ მარქსის „კაპიტალს“ და ხშირად საუბრობდნენ. სკლიარენკოს საშუალებით ლუზინს არ შეიძლებოდა არ სცოდნოდა ლენინის რევოლუციური მოღვაწეობის შესახებ.

1899 წელს გაზ. „ნოვოე ობოზრენიეში“ მოთავსებული იყო ბაბლიოგრაფია ლენინის ნაშრომზე „შინამრეწველობის აღწერა პერმის გუბერნიაში 1894—95 წელს და „შინამრეწველობის“ ზოგადი საკითხები“. რეცენზენტი ლაპარაკობს სოფლად ფეოდალურ ურთიერთობათა დაშლისა და გლეხობის კლასობრივ დიფერენციაციაზე და აღნიშნავს, რომ ამ პროცესის გასაგებად შესანიშნავ მასალას იძლევა ვლ. ილინის სტატია „შინამრეწველობის აღწერა პერმის გუბერნიაში 1894—95 წელს და „შინამრეწველობის ზოგადი საკითხები“, რომელიც პირველად დაიბეჭდა 1893 წელს კრებულში — ვლ. ილინი, „ეკონომიური ეტიუდები და სტატეები“².

ლენინის ნაშრომები საქართველოში ცნობილი ხდება თითქმის გამოსვლისთანავე. ქართველი რევოლუციური ახალგაზრდობა ვულმოდგინედ სწავლობს ლენინის რევოლუციური მოღვაწეობის აღრინდელი წლების ნაწარმოებებს და მასში ნახულობს მძლავრ იდეურ იარაღს იმპრონდელი ისტორიული ვითარების მარქსისტული გაგებისა და რევოლუციური გარდაქმნისათვის ბრძოლაში.

¹ „კელო“, 1899, № 30.

² „ნოვოე ობოზრენიე“, 1899, № 292.

90-იანი წლების დამლევს რევოლუციურ მოძრაობაში ჩაება ლენინის მოღვაწეობით შთაგონებული ქართველ მარქსისტთა ახალი თაობა.

რუსეთის სოციალ-დემოკრატიული მუშათა პარტიის საქართველოს ორგანიზაციაში 1896 წელს შედის ა. წულუკიძე, 1897 წელს — ლ. კეცხოველი და 1898 წლის აგვისტოში — ი. სტალინი.

აღ. წულუკიძე თავადაზნაურული წრიდან იყო გამოსული, მაგრამ მალე შეიგნო ამ წოდების ცხოვრების არარაობა და მტკიცედ დაადგა ხალხისათვის სამსახურის გზას. 1896 წელს ა. წულუკიძე დაუახლოვდა ახალგაზრდა მარქსისტებს და ქუთაისის სოციალ-დემოკრატიული წრის წევრი გახდა¹.

1895—1896 წლებში გაზ. „ივერიაში“ ა. წულუკიძე აქვეყნებს კორესპონდენციებს, რომლებშიც ნათლად გამოსჭვივის ხალხის ცხოვრებისადმი ღრმა ინტერესი და მშრომელი ხალხის გულწრფელი სიყვარული. ამ დროს წულუკიძე ჯერ კიდევ განმანათლებლობის პოზიციებზე მდგომ რევოლუციონერ-დემოკრატად წარმოგვიდგება. 1895 წელს „ივერიაში“ „ქართველ სტუდენტთა საყურადღებოდ“ იგი წერდა: „დაუახლოვდით ხალხს, მოისმინეთ მისი მწუხარება, დაუმეგობრდით მას მისივე ვარამის გაზიარებით, შესძინეთ მისს გონების ბნელს სალაროს მცირე რამ გამოსადეგი თეორიული ცოდნა“. ამავე სტატიაში წულუკიძე ამტკიცებს, რომ კულტურულ-საგანმანათლებლო მოღვაწეობა, მაგალითად, სკოლების დაარსება „უპირველეს საშუალებას შეადგენს ქვეყნის გონებრივს, ზნეობრივს და მამსადამე მატერიალურს კეთილდღეობის გასაუმჯობესებლად“².

1897 წელს წულუკიძე მეცნიერული თეორიის შესწავლის წყურვილმა მოსკოვში წაიყვანა, სადაც იგი ორი წლის განმავლობაში საფუძვლიანად გაეცნო მარქსიზმის კლასიკოსთა ნაშრომებს და სხვა პოლიტიკურ-ეკონომიურ ლიტერატურას. იქ წულუკიძე საბოლოოდ ჩამოყალიბდა, როგორც რევოლუციონერი მარქსისტი. იგი ღრმად უფიქრდება კაცობრიობის აზროვნების საუკეთესო წარმომადგენელთა მიერ გადაწყვეტილ ამოცანას — რაა სოციალური უთანასწორობის მიზეზი და როგორ შეიძლება დავაღწიოთ თავი მას, — და ღრმა რწმენით აცხადებს, რომ ამ კითხვაზე პასუხის მოძებნი მხოლოდ „1847—48 წწ. მოველინა ევროპას და ჩვენც მოვალენი ვართ ვისმინოთ ეს ხმა“³. ესმის რა მარქსიზმი შემოქმედებითად, როგორც სახელმძღვანელო მოქმედებისათვის, იგი 1897 წლის 12 დეკემბერს წერილში მოსკოვიდან იწერება, რომ მას მარქსის „კაპიტალი“ სახელმძღვანელოდ, გზის მაჩვენებელ ლამპრად უნდა, დანარჩენი კი „აღამიანთა თანაგრძნობით უნდა გაკეთდესო“. იმავე წერილში წულუკიძე:

1 „პროლეტარიატის ბრძოლა“, 1905, № 9.
2 აღ. წულუკიძე, თხზულებანი, გვ. 266.
3 იქვე, გვ. 283.

შენატრის იმ დროს, როცა ამ „დიდებული მეცნიერის“ აზრები ჩვენს ცხოვრებაში გამოიღებს ნაყოფს და ჩვენს აზროვნებასაც მეცნიერული ხასიათი მიეცემა¹. 1898 წლის ოქტომბერ-ნოემბერში გაზ. „კვალში“ წულუკიძე აქვეყნებს თავის პირველ მარქსისტულ ნაწარმოებს — „ახალი ტიპი ჩვენს ცხოვრებაში“² და მას შემდეგ სისტემატურად თანამშრომლობს ქართულ პრესაში.

თუ ალ. წულუკიძე უმთავრესად მარქსიზმის პროპაგანდას ეწევა ლეგალურ პრესაში, ლ. კეცხოველი უმთავრესად პრაქტიკულ-ორგანიზაციულ მუშაობას აჩაღებს. ლ. კეცხოველი 1891 წელს გორის სასულიერო სასწავლებლის დამთავრების შემდეგ სწავლას აგრძელებს თბილისი სასულიერო სემინარიაში, სადაც იგი მალე შედის სემინარიელთა ლიტერატურულ-საგანმანათლებლო წრეში, რომელსაც ეგ. ნინოშვილი ხელმძღვანელობდა. კეცხოველი იყო სემინარიაში გამეფებული იეზუიტური რეჟიმის წინააღმდეგ 1893 წლის დეკემბერში მოწყობილი გაფიცვის ერთ-ერთი მეთაური. ამის გამო იგი გარაიჭეს სემინარიიდან. ლ. კეცხოველი ჯერ კიდევ 1894 წელს „ივერიაში“ ათავსებს კორესპონდენციებს, რომლებშიც რევოლუციური განმანათლებლობის თვალთახედვით აღწერს სოფლის ცხოვრებას, გლეხობის სიღუბსჭირებსა და ჭირ-ვარაშს და გამოხატავს სიძულვილის გრძნობას მჩაგვრელთა მიმართ. პირველი კორესპონდენცია სოფლის სკოლას შეეხება. სოფელ ტყვიავს სკოლა არ ჰქონია. „გლეხკაცობაში ძალიან იშვიათად თუ ვინმე იცის კითხვა“. სკოლის გახსნას წინააღმდეგი თვით გლეხები ყოფილან: „შენობას ვერ ავაშენებთ, მასწავლებლებს ჯამაგირს ვერ მივცემთ. კეცხოველი მხურვალედ მოუწოდებს — სკოლის საქმეს ზურგს ნუ შეაქცევთ. „დრო არის კაცმა კაცურად იცხოვროს და არა პირუტყვულად უღელში დალიოს თავისი სიცოცხლის დღენი“³. მეორე კორესპონდენციაში აღწერილია სოფელ ტყვიავის გლეხობის მდგომარეობა: „კაცი ვერ წარმოიდგენს, როგორ გაჭირვებაში არის ახლა ჩვენებური გლეხკაცი: ბეგარა, ფოსტის ფული. საქონლის ავადმყოფობა... სულ ერთად დააწვა მას კისერზე, და თუ მან დროზე არ გადაიხადა გადასახადი, ჩაფრები შეესევინა და თუ სახლში რაიმე აბადია, სულ ერთიანად წაართმევენ და გაუყდიან“⁴. მესამე კორესპონდენციაში კეცხოველი ისევ გლეხობის მდგომარეობაზე ლაპარაკობს: „ხალხი ძალიან შეწუხებულია სახელმწიფო ბეგარით და გადასახადებით. უწინ მოკრეფილი და, საცა ჯერ არს, არ წარადგენილი ფოსტის ფული გამოააშკარავა ახალ დაწესებულმა სოფლის სამმართველომ და

¹ ალ. წულუკიძე, თხზულებანი, გვ. 282.

² „კვალი“, 1898, №№ 44, 45, 48.

³ „ივერია“, 1894, № 51.

⁴ იქვე, № 146.

ხალხს რამდენისამე წლის დარჩენილი სახელმწიფო ხარჯი (ნედომიკები) სულ ერთბაშად დააწვა კისერზედ: ზედ დაემატათ წრევანდელი ხარჯი, ჩაფრისა და მამასახლისის ფული და ერთს ვაი-ვაგლახში არიან. ბევრის გლეხკაცისაგან გამოყავთ უკანასკნელი ხარი და სახაზინო ვალში უყიდიან“¹.

1894 წლის შემოდგომაზე კეცხოველმა მოახერხა კიევის სასულიერო სემინარიაში შესვლა. იგი დაუკავშირდა კიეველ სოციალ-დემოკრატებს და აქტიურად ჩაება რევოლუციურ მოძრაობაში. 1896 წლის აპრილში კეცხოველი დააპატიმრეს და სამი თვის პატიმრობის შემდეგ გადასახლეს მშობლიურ სოფელ ტყვიავში. 1897 წელს კეცხოველი შედის თბილისის სოციალ-დემოკრატიულ ორგანიზაციაში და ხდება არალეგალური გამოცემლობის შესანიშნავი ორგანიზატორი. 1897—1898 წლებში იგი თბილისის ერთ-ერთ კერძო სტამბაში მმართველის თანამდებობაზე მუშაობდა და შეისწავლა ბეჭდვის ტექნიკა. აქ მან დაბეჭდა პირველი არალეგალური წიგნაკი — დიკშტენის „ლუკმა პურის ამბავი“.

ი. სტალინმა 1894 წელს დაამთავრა გორის სასულიერო სასწავლებელი და იმავე წელს შევიდა თბილისის მართლმადიდებელთა სასულიერო სემინარიაში. სემინარიაში გამეფებული დამამცირებელი რეჟიმი და იეზუიტური მეთოდები ი. სტალინის მძაფრ პროტესტს იწვევდა და აღვივებდა მასში რევოლუციურ განწყობილებას.

1895 წელს ი. სტალინი დაუკავშირდა ამიერკავკასიაში მცხოვრებ რუს მარქსისტთა არალეგალურ ჯგუფებს და მათი გავლენით შეიყვარა მარქსისტული ლიტერატურა. 90-იანი წლების დამლევიდან ი. სტალინი ლენინის რევოლუციურ მოღვაწეობას ეცნობა და ლენინის მოწაფე ხდება.

ი. სტალინი 1896—1897 წლებში მარქსიზმის პროპაგანდას ეწევა თბილისის სასულიერო სემინარიის მოსწავლეთა შორის, ხოლო 1898 წლიდან უკავშირდება თბილისის მოწინავე მუშებს. რკინიგზის სახელოსნოების მოწინავე მუშათა წრეში მან მიიღო პრაქტიკული მუშაობის პირველი გაკვეთილები და თავისი პირველი საბრძოლო რევოლუციური ნათლობა.

ი. სტალინის რევოლუციური მოღვაწეობა განაპირობა ვ. ი. ლენინის თეორიულმა და პრაქტიკულმა საქმიანობამ. ლენინის რევოლუციური მოღვაწეობის გაცნობით შექმნილი წარუხოცელი შთაბეჭდილება ღრმად ჩაწვდა მას გულში და განსაზღვრა მისი რევოლუციური ბრძოლის გზა. ვ. ი. ლენინისა და მისი „ბრძოლის კავშირის“ თეორიული და პრაქტიკული მუშაობა ქართველი რევოლუციონერი მარქსისტებისათვის წარმოადგენდა შთამაგონებელ მაგალითსა და ნიმუშს მუშათა მოძრაობისა და სოციალიზმის შეერთებისათვის ბრძოლაში.

¹ „ივერა“, 1894, № 172.

90-იანი წლების დამლევს, როცა ჩვენში დასაბამი მიეცა აგიტაციას, მისი შემწეობით პროპაგანდამ კიდევ უფრო ფართო ხასიათი მიიღო. ამიერიდან პროპაგანდა და აგიტაცია ხელიხელჩაკიდებული გამოდის, მაგრამ მეტი მნიშვნელობა აგიტაციამ მოიპოვა და უპირატესობაც მას მიენიჭა.

მარქსისტული წრეები მუშებრსა და მოსწავლე ახალგაზრდობის ფართო მასას დაეუფლა და მთელ საქართველოს მოეფინა. არ დარჩენილა არც ერთი მსხვილი საწარმო, სადაც ერთი წრე მაინც არ ყოფილიყო მოწყობილი. მთავარ სახელოსნოებში წრეების ფართო ქსელი შეიქმნა, ხოლო სასულიერო სემინარია მრავალრიცხოვანი წრეების ბუდედ იქცა.

გარდაიქმნა მოსწავლე ახალგაზრდობის წრეების მეცადინეობა. თუ წინათ მოსწავლე ახალგაზრდობაში სჭარბობდა ლიტერატურულ-საგანმანათლებლო ხასიათის წრეები, ახლა შეიქმნა მკვეთრად გამოხატული პოლიტიკური მიმართულების წრეები, სადაც უმთავრესად კლასთა ბრძოლისა და მუშათა მოძრაობის საკითხებს იხილავდნენ.

მარქსისტულად განწყობილი მოსწავლე ახალგაზრდობა დაეწაფა თვითგანვითარებას. ისინი ბეჯითად სწავლობენ „კაპიტალს“, „კომუნისტური პარტიის მანიფესტს“ და მარქსისა და ენგელსის სხვა ნაწარმოებებს, ლენინის წიგნს „რანი არიან „ხალხის მეგობრები“ და როგორ ომობენ ისინი სოციალ-დემოკრატების წინააღმდეგ?“ და მის სხვა ნაწერებს. ეცნობიან მრავალ ხაზრომს ფილოსოფიის, პოლიტიკური ეკონომიის, ისტორიის, ბუნებისმეტყველების, ლიტერატურის საკითხებზე.

მამინ მარქსისტული ლიტერატურის შოვნა ძალიან ძნელი იყო, მაგრამ ქართველი ახალგაზრდობის მთავარი რევოლუციური თეორიის ხარბი, მოწყურებულ ძიებას ვერ აჩერებდა ვერავითარი საფრთხე და სიძნელე, რომელიც მარქსისტული ლიტერატურის შეძენასა და შესწავლასთან იყო დაკავშირებული. უდიდესი მისწრაფება მარქსიზმის შესწავლისადმი მოსწავლე ახალგაზრდობას მარქსისტული ლიტერატურის მოპოვების განსაცვიფრებელ ხერხებს აძებნინებდა. აი თბილისის სასულიერო სემინარიის მოსწავლეთა მარქსისტული წრის მიერ მარქსის „კაპიტალის“ უცნაური ექსპროპრიაციის საინტერესო ეპიზოდი: ერთი იმ დროის საკმაოდ ცნობილი „ხალხოსანი“ ბუკინისტი მეტად დიდ ფასად აქირავებდა როგორღაც მის ხელში ჩავარდნილ მარქსის „კაპიტალს“. ამ „ხალხოსანის“ ასეთი „განმანათლებელი“ მოქმედებით აღშფოთებულმა სემინარიელებმა პირდაპირ კავიკ-კავიკობით მოგროვილი ფულით ხელთ იგდეს სანატრელი ტომი და მოახდინეს მისი „ექსპროპრიაცია“ — ათ დღეში მთლიანად გადაწერეს მარქსის „კაპიტალი“¹.

გარდაიქმნა მუშათა მარქსისტული წრეების მუშაობა, რომელიც აგებულ იქნა 1898 წელს ი. სტალინის მიერ შედგენილი „მუშათა მარქსის-

¹ „მნათობი“, 1939, № 12.

ტულ წრეებში მეცადინეობის პროგრამის“ საფუძველზე. წინათ მუშათა წრეებში მეცადინეობა უმთავრესად ა. ბოგდანოვის „ეკონომიური მეცნიერების მოკლე კურსის“ მიხედვით წარმოებდა და განყენებულ ხასიათს ატარებდა. შეიცვალა სამეცადინო პროგრამა და გადაცემის მეთოდი. მეცადინეობა მუშებისათვის გასაგები და საინტერესო გახდა. მან ცოცხალი საუბრის ხასიათი მიიღო და მჭიდროდ დაუკავშირდა მუშათა ყოფაცხოვრების საჭირობოროტო საკითხებს. მეცადინეობის დროს პროპაგანდისტის წარმმართველი მოქმედებითა და მსმენელთა აქტიური მონაწილეობით იხილებოდა საკითხი: რატომ ვართ ღარიბნი და უუფლებონი და როგორ დავძლიოთ სიღარიბე და უუფლებობა? თვით მუშებისათვის ნაცნობ და მისაწელომ მაგალითებზე ირკვეოდა კაპიტალისტური ჩაგვრისა და ექსპლოატაციის მიზეზები, ბრძოლის საშუალებები და ორგანიზაციის ფორმები და ამოცანები. ასეთი მარქსისტული, სოციალ-დემოკრატიული წრეები მუშების პოლიტიკური აღზრდის ნამდვილ სკოლად იქცნენ¹.

რევოლუციონერი მარქსისტები ანტიმარქსისტულ მიმდინარეობათა მხილებითა და რევოლუციური მარქსიზმის პროპაგანდით როდი კმაყოფილდებიან. ისინი ახორციელებენ პროლეტარული მოძრაობის გრანდიოზულ ამოცანას, მარქსიზმს აერთებენ მუშათა მოძრაობასთან და საქართველოს მუშათა კლასის ბრძოლას პოლიტიკური ბრძოლის ხასიათს აძლევენ. საქართველოს მუშათა მოძრაობამ, რომელიც 1898 წლამდე სტიქიურ ხასიათს ატარებდა, 1899—1900 წლებში შეგნებული პოლიტიკური ბრძოლის ხასიათი მიიღო. მან თავისი წრიდან გამოჰყო ისეთი უნარიანი ხელმძღვანელები და ორგანიზატორები, როგორც იყვნენ მ. ბოჭორიძე, მ. ჩოდრიშვილი, ვ. სტურუა, გ. თელია და სხვ. მათ შეიგნეს ორგანიზებული პოლიტიკური ბრძოლის მნიშვნელობა და მუშათა გამოსვლების მეთაურებად გამოვიდნენ.

მასობრივ-პოლიტიკურ აგიტაციაზე გადასვლის საქმეში თვალსაჩინო როლი შეასრულეს ცნობილმა ლენინელმა ვ. კ. კურნატოვსკიმ და პეტერბურგის მუშათა მოძრაობის ერთ-ერთმა ხელმძღვანელმა და ორგანიზატორმა მ. ი. კალინინმა. კალინინი თბილისში ჩამოვიდა 1900 წლის ივნისში, კურნატოვსკი კი — შემოდგომის დასაწყისში, როცა აქ უკვე დაიწყო მუშათა მოძრაობის ახალი ეტაპი. მისი აქტიური მონაწილეობით ქართველმა რევოლუციონერმა სოციალ-დემოკრატებმა პრაქტიკულად განახორციელეს მასობრივ-პოლიტიკურ აგიტაციაზე გადასვლა. ძველი მუშები ა. ოქუაშვილი და გ. ჩხეიძე ვ. კურნატოვსკის იგონებენ, როგორც „მტკიცე და ურყევე რევოლუციონერს“, განათლებულ მარქსისტს, რომელსაც მუშები ხშირად მიმართავდნენ რჩევისათვის და მის აზრს

¹ ემ. ი ა რ ო ს ლ ა ვ ს კ ი, სკკპ (ბ) ისტორია (1883—1912 წწ.), უმაღლეს პარტიულ სკოლაში წაკითხული ლექციების კურსი, 1947, გვ. 180.

ყოველთვის უყოყმანოდ იღებდნენ¹. ა. ალილუევი მოგვითხრობს, რომ თბილისში ი. ფრანჩესკის ბინაში მასთან საუბრის დროს კურნატოვსკის დიდი სიყვარულით მოუგონებია ლენინი და აღფრთოვანებით ულაპარაკ-ნია მისი ნათელი გონებისა და ურყევი ნებისყოფის შესახებ².

თბილისის ჟანდარმთა სამმართველო კურნატოვსკის თვლიდა „მეტად, ენერგიულ ინტელიგენტ სოციალ-დემოკრატად“, და მიაკუთვნებდა მას ქართველ და რუს სოციალ-დემოკრატთა იმ ჯგუფს, რომელიც „მიზნად ისახავდა სისტემატური პროპაგანდით ადგილობრივ მუშებში უკმაყოფი-ლება გამოეწვია მათი მდგომარეობით, შთაენერგა მათთვის რევოლუციუ-რი იდეები და ამით ხელი შეეწყო მუშათა კლასის საერთო რევოლუციური მოძრაობის მომზადებისათვის“³.

კალინინი თბილისში ჩამოსვლისთანავე (1900 წლის ივლისში) შევიდა ადგილობრივ სოციალ-დემოკრატიულ ორგანიზაციაში და ჩაება მუშათა მასობრივ რევოლუციურ მოძრაობაში. მან თბილისის მუშებს გაუასცა პეტერბურგის მუშათა რევოლუციური გამოცდილება და მუშათა საქმი-სათვის ბრძოლის მაგალითი აჩვენა.

ჟანდარმერია პოლიციის დეპარტამენტს პეტერბურგში ატყობინებდა, რომ კალინინი თბილისში ჩამოსვლისთანავე მუშათა არალეგალურ კრება-ზე გამოვიდა მოხსენებით პეტერბურგის მუშათა მოძრაობის შესახებ. შექმნა სოციალ-დემოკრატიული მუშათა წრე და აქტიური მონაწილეობა მიიღო 1900 წლის აგვისტოს რკინიგზის მთავარი სახელოსნოებისა და დე-პოს მუშათა გაფიცვაში⁴.

რევოლუციონერი სოციალ-დემოკრატები მჭიდროდ უკავშირდებიან მუშათა მასობრივ მოძრაობას და პოლიტიკურად ხელმძღვანელობენ მას. 90-იანი წლების დამლევამდე საქართველოში გაფიცვები სტიქიური მოძ-რაობის გამოხატულებას წარმოადგენდა. მაგრამ სტიქიურობაც არის და სტიქიურობაც. 70—80-იანი წლების გაფიცვებთან შედარებით 90-იანი წლების გაფიცვებში მეტია შეგნებულობა და ორგანიზებულობა.

ლენინი ლაპარაკობდა რა პეტერბურგის 1896 წლის განთქმულ სამ-რეწველო ომსა და მის შემდგომ მუშათა გაფიცვებზე, აღნიშნავდა, რომ ეს სისტემატური, მასობრივი მუშათა მოძრაობა უკვე კლასობრივი ბრძო-ლის ჩანასახს წარმოადგენდა. მაგრამ მუშებს მაშინ ჯერ კიდევ არ ჰქონ-დათ და არც შეიძლებოდა ჰქონოდათ შეგნება მათი ინტერესების შეუბრ-ივებელი წინააღმდეგობისა არსებულ წყობილებასთან და ამიტომ თავის-

¹ მლისფა, ფ. 34, საქ. 175.

² ს. ალილუევი, განვლილი გზა, 1956, გვ. 54.

³ მლისფა, ფ. 33, საქ. 23.

⁴ იქვე, საქ. 215.

თავად აღებული იმდროინდელი მუშათა ეს გაფიცვები არა სოციალ-დემოკრატიულ, არამედ ტრედუნიონისტულ ბრძოლას წარმოადგენდნენ¹.

იგივე ითქმის 90-იანი წლების გაფიცვების შესახებ საქართველოში. ი. სტალინი 1897—1898 წლების გაფიცვებს თამბაქოს ფაბრიკებსა და რკინიგზის სახელოსნოებში სტიქიურ მოძრაობად თვლიდა².

გაზ. „ბრძოლამ“ საქართველოს მუშათა მოძრაობის განხილვას სპეციალური სტატია უძღვნა სათაურით: „მუშათა მოძრაობა კავკასიაში 1899—1901 წწ.“³. „ბრძოლამ“ საქართველოს მუშათა მოძრაობა სწორედ 1899—1901 წლებით შემოფარგლა იმიტომ, რომ იგი ამ წლებს უკავშირებს ჩვენში შეგნებული და ორგანიზებული სოციალ-დემოკრატიული ბრძოლის დაწყებას.

ლენინის თქმით, მუშათა მასობრივი მოძრაობის განვითარება რუსეთში სოციალ-დემოკრატიის განვითარებასთან დაკავშირებით სამი შესანიშნავი ვადასვლით ხასიათდება. იგივე უნდა ითქვას საქართველოს მუშათა მოძრაობის შესახებაც. პირველი, გადასვლა პრობაგანდისტული წრეებიდან ფართო ეკონომიურ აგიტაციაზე მასაში. ამას ჩვენში ადგილი ჰქონდა 1896—1898 წლებში. მეორე, გადასვლა დიდი მასშტაბის პოლიტიკურ აგიტაციაზე და აშკარა დემონსტრაციებზე ქუჩებში. ეს გადასვლა ჩვენში 1899 წელს დაიწყო და გაგრძელდა 1904 წლამდე. მესამე, გადასვლა უშუალოდ რევოლუციურ ბრძოლაზე, ხალხის შეიარაღებულ აჯანყებაზე. ეს უკვე 1905 წლის რევოლუციის პერიოდია. „თვითეული ეს გადასვლა მზადდებოდა, ერთი მხრივ, სოციალისტური აზრის უმთავრესად ერთი მიმართულებით მუშაობით, ხოლო, მეორე მხრივ, ღრმა ცვლილებებით მუშათა კლასის ცხოვრების პირობებში და მთელ მის ფსიქიკურ წყობაში, უფრო შეგნებული და აქტიური ბრძოლისათვის მისი ახალი და ახალი ფენების გაღვივებით“⁴.

90-იანი წლების დამლევი და 900-იანი წლების დამდეგი საქართველოს მუშათა მოძრაობის ისტორიაში აღინიშნება ცარიზმის წინააღმდეგ მძლავრი და განუხრელი მასობრივი პოლიტიკური ბრძოლის დაწყებით. ამ დროიდან ხდება ის განსაკუთრებით ღირსშესანიშნავი მოვლენები, რომლებიც აშკარა რევოლუციური ბრძოლის დაწყების მაუწყებელნი იყვნენ.

1898 წლის დეკემბერში მოეწყო თბილისის რკინიგზის მთავარი სახელოსნოების მუშათა პირველი დიდი გაფიცვა. გაფიცვა, როგორც ზემოთ დავინახეთ, ეკონომიურ ნიადაგზე მოხდა, რაც გამოიწვია იმან, რომ მთავრობის განკარგულებით ისპობოდა ის შეღავათები, რომლებითაც მუშები

¹ ვ. ი. ლენინი, თხზ., ტ. 5, გვ. 468.

² ი. ბ. სტალინი, თხზ., ტ. 1, გვ. 14.

³ „ბრძოლა“, 1901, № 2—3.

⁴ ვ. ი. ლენინი, თხზ., ტ. 8, გვ. 239.

სარგებლობდნენ ამიერკავკასიის რკინიგზის კერძო საზოგადოების ხელში ყოფნის დროიდან.

1898 წლის 14 დეკემბერს დილის 11 საათზე მუშებმა მიატოვეს მუშაობა. გაფიცულთა ნაწილმა, რამდენიმე ასეულმა კაცმა, სადგურთან დაიკავა რკინიგზა და შეაჩერა მოძრაობა. ჯარის ნაწილებმა მოძრაობის აღდგენა მხოლოდ საღამოს 5 საათზე მოახერხეს. ჯარმა ალყა შემოარტყა დეპო-სა და მთავარ სახელოსნოებს. იგი იცავდა აგრეთვე სადგურსა და მასთან მისასვლელ გზებს. შტრეიკბრეხერთა დასაცავად ყველა სააპქროში ჩაყენებულ იქნა ათ-ათი ჯარისკაცი. ცხენოსანი ჯარის ნაწილები და პოლიცია სახლამდე აცილებდა შტრეიკბრეხერებს. მიუხედავად ასეთი ძლიერი დაცვისა, გაფიცულმა მუშებმა არა ერთ და ორ შტრეიკბრეხერს სცემეს და აიძულეს მუშაობაზე უარი ეთქვათ. მეფის ადმინისტრაციამ მიმართა გაფიცული მუშების მასობრივ დაპატიმრებას, ჯართან შეტაკების დროს მრავალი მუშა დაიჭრა და დასახინჩრა. გზათა მინისტრმა გაფიცვის მიზეზთა გამოსარკვევად თბილისს კომისია მოავლინა. მეფის მთავრობა იძულებული გახდა დათმობაზე წასულიყო. იგი მუშებს შეპირდა საქმის გაპორკვევამდე ძველი წესების დატოვებას. 21 დეკემბერს გაფიცვა შეწყდა, მუშები მუშაობას შეუდგნენ¹.

თბილისის მუშების გაფიცვამ გამოძახილი პოვა სადგ. ხაშურის მუშებში. თბილისიდან ხაშურს ჩასულმა მუშებმა მოუწოდეს რკინიგზის მუშებს მხარი დაეჭირათ თბილისელთა გაფიცვისათვის. ხაშურელმა მუშებმა მუშაობა შეაჩერეს, მაგრამ ადმინისტრაციამ შეძლო მათი დაშოშმინება და ისინიც მუშაობას შეუდგნენ².

თბილისის რკინიგზის მთავარი სახელოსნოების მუშების 1898 წლის დეკემბრის გაფიცვა წინა წლების გაფიცვებისაგან განსხვავდებოდა თავისი ორგანიზებულობითა და შეგნებულობით, რაც სოციალ-დემოკრატიის ხელმძღვანელობას უნდა მიეწეროს. პეტერბურგიდან ჩამოსული კომისია იძულებული იყო ეღიარებინა, რომ გაფიცულნი ერთიანი გეგმით ისე ერთსულოვნად მოქმედებდნენ, რომ, უნდა ვიფიქროთ, „გაფიცვას გარეშე ძალა ხელმძღვანელობდა“³.

მაგრამ თბილისის მუშების ეს გამოსვლა მაინც სტიქიური მოძრაობის გამოხატულება იყო, უკეთ. რომ ვთქვათ, იგი მიჯნაა, რომელიც ამთავრებს საქართველოს მუშათა კლასის ავანგარდის — თბილისის რკინიგზის მთავარი სახელოსნოების მუშების — სტიქიურ მოძრაობას და კარებს უღებს მის შეგნებულ პოლიტიკურ ბრძოლას. მთავარი სახელოსნოების მუშათა ამ პირველმა დიდმა გაფიცვამ ყველას აშკარად დაანახვა, რომ კავკასიის

¹ შლისფა, ფ. 31, საქ. 110.

² იქვე, საქ. 110.

³ იქვე.

საზოგადოებრივ-პოლიტიკური ცხოვრების სარბიელზე გამოდის ახალი, მძლავრი რევოლუციური ძალა — მუშათა კლასი.

1899 წლის 19 აპრილს თბილისში, ქალაქგარეთ, მოეწყო მაისობა. ეს იყო პირველი მაისობა საქართველოში. მას დაესწრო სამოცდაათამდე მუშა. მაისობაზე შეკრებულმა მუშებმა შეფიცეს ერთმანეთს: შევერთდეთ, შემოვიკრიბოთ ყველა ჩვენი მოძმე და საერთო მტერს — მეფის თვით-მპყრობელობასა და ბურჟუაზიას — მედგრად შევეუტიოთო. ამ მაისობას უდიდესი მნიშვნელობა ჰქონდა. იმ დროიდან ჩვენში დასაბამი მიეცა მასობრივ აგიტაციას. მუშათა მოძრაობამ შეგნებულ და ორგანიზებული ხასიათი მიიღო და აშკარა პოლიტიკურ ბრძოლაზე გადავიდა. „ბრძოლა“ წერდა: „1899 წლის 19 აპრილს ერთბაშად, ერთი დაკვრით, დაირღვა ის საზარელი მყუდროება, რომელიც ხალხს ძილს გვრიდა მთელ კავკასიაში... თუმცა ყრუთ, მაგრამ საკმაოდ მედგრად გაისმა ხმები: „კავკასიის მუშებო შეერთდით: გაუმარჯოს თავისუფლებას, 8 საათის სამუშაო დღეს“ და სხვ... მაისობას დაესწრნენ ყველა ეროვნების და სხვადასხვა სამრეწველო დაწესებულებათა მუშები (უმთავრესად რკინიგზის დეპო-სახელოსნოდან, სადაც ყველაზე აღრე გაჩნდა მოძრაობა) და აგრეთვე რამდენიმე ინტელიგენტი. დღეობა მოხდა ქალაქ გარეთ ერთ მაღლობზე. მარტო იმ გარემოებაში, რომ ამდენ შეგნებულ მუშებს ერთად მოუყარა თავი საკუთარი რევოლუციური დროშის ქვეშ, დიდი შთაბეჭდილება მოახდინა მუშებზე, ხოლო ეს შთაბეჭდილება ერთი ათად გაძლიერდა იმის შემდეგ, როცა ინტელიგენტებმა და შემდეგ თვით მუშებმაც აღფრთოვანებული სიტყვები წარმოთქვეს. აღტაცებას საზღვარი აღარ ჰქონდა. დღესასწაულიდან მუშები დაბრუნდნენ ერთი ათად გატაცებულნი თავიანთი დიადი საქმით. ერთი ათად გამსჭვალულნი რევოლუციური მისწრაფებით. ეს მისწრაფება ვეღარ ეტეოდა მათში. მან ფართოდ გადმოხეთქა და მოედვა მრავალ სხვა მუშებსაც, რომლებსაც ისინი უამბობდნენ თავიანთი დღეობის ამბავს, უზიარებდნენ თავიანთ შთაბეჭდილებას და გატაცებით აცნობდნენ თავიანთ აზრებს და მიზნებს. ამგვარად მიეცა ჩვენში დასაბამი აგიტაციას, ამგვარად ის ტაქტიკა, რომელიც აქამდე მხოლოდ პრობაგანდაზე იყო დამყარებული, აგიტაციის გზას დაადგა“¹.

ეს ვრცელი ამონაწერი შესანიშნავად განმარტავს იმ დიდ მნიშვნელობას, რომელიც ამ მაისობას აქვს საქართველოს მუშათა მოძრაობის ისტორიაში.

თბილისელმა სოციალ-დემოკრატებმა მოახერხეს მაისობისადმი მიძღვნილი პროკლამაციის გამოცემა. ეს იყო პირველი ნაბეჭდი სოციალ-დემოკრატიული პროკლამაცია საქართველოში. პროკლამაციაში „პირველი მაისობა“ ნათქვამია: „თვითეული ქვეყნის სოციალ-დემოკრატია ღებუ-

¹ „ბრძოლა“, 1901, № 2—3, გვ. 8.

ლობს ყოველივე ღონეს პირველ მაისს მოხდეს მუშაობის შეჩერება და ეს დღე შეიქნეს დღეთ საერთო კლასიური მანიფესტაციისა და ამ კლასის მისწრაფების საჯაროდ გამოცხადებისა, იმ მისწრაფების, რომ არსებულ წყობილებას ბოლო მოეღოს სოციალური რევოლუციით, გააუქმოს კლასთა სხვადასხვაობა ერთსა და იმავე ერში და სხვადასხვა ერთა შორის დამყარდეს მშვიდობიანობა“. პროკლამაცია მიუთითებს, რომ პირველ მაისს „ბრძოლის ველზეა გამოსული მთელი ქვეყნის პროლეტარიატი“, და მოუწოდებს ქართველ მუშებს ჩაებან ამ საერთო ფერხულში და ამ გზით გაემართონ აღთქმული ქვეყნისაკენ¹.

თბილისის მუშების ამ პირველმაისობის შემდეგ ყველაზე საყურადღებო მოვლენას წარმოადგენდა თბილისის ცხენის რკინიგზის („კონკის“) მუშა-მოსამსახურეთა საყოველთაო გაფიცვა, რომელიც 1900 წლის პირველ იანვარს მოეწყო. გაფიცულებს შეტაკება მოუხდათ პოლიციასთან. 150-მდე მუშა დააპატიმრეს. აღმინისტრაცია იძულებული გახდა მუშათა მოთხოვნები თითქმის სავსებით დაეკმაყოფილებინა. გაფიცვაში ხელმძღვანელ როლს თამაშობდნენ ლ. კეცხოველი და რ. კალაძე.

1900 წლის 19 აპრილს ქალაქკარეთ ისევ მოეწყო მაისობა, რომელსაც 500-მდე მუშა დაესწრო. მარქსისა და ენგელსის სურათებით შემკული წითელი დროშის ქვეშ თავმოყრილმა მუშებმა კიდევ უფრო მტკაცედ შეფიცეს ერთმანეთს, რომ კლასობრივ მტრებთან საერთო ძალით იბრძობებდნენ. აი როგორ აგვიწერს ამ მაისობას მისი მონაწილე ს. ალილუევი: „დროშა, მარქსისა და ენგელსის პორტრეტებითა და მოწოდების ლოზუნგებით, აფრიალდა. იფეთქა „მარსელიოზამ“, რომელსაც შორს მთები გამოეხმაურა.

ერთიმეორეს ცვლიან ორატორები. ესენი იყვნენ რევოლუციონერი ინტელიგენტები, მუშები — ქარხნების წარმომადგენლები, რკინიგზელები: სოსო ჯულაშვილი, ვანო სტურუა, ზაქარია ჩოღრიშვილი, მიხო ბოჭორიძე... თბილისის მუშების მრავალრიცხოვანმა შეკრებულობამ პირველად მოისმინა ასე გაბედულად ნასროლი სიტყვები. ყოველ მხრიდან ისმოდა შეძახილები: „გაუმარჯოს პირველ მაისს! ძირს თვითმპყრობელობა!“... მუშები მაისობიდან დაბრუნდნენ ბედნიერნი, ბრძოლის სურვილითა და გამარჯვების რწმენით ღრმად გამსჭვალულნი“².

900-იანი წლების რევოლუციურ ამბავთა შორის განსაკუთრებით თვალსაჩინო და მნიშვნელოვანია თბილისის რკინიგზისა და დეპოს მუშათა გრანდიოზული გაფიცვა, რომელიც 1900 წლის აგვისტოში მოეწყო. მთელი ივლისი გაფიცვის მოლოდინში გავიდა. მუშები ღელავდნენ. მდგომარეობა დაძაბული იყო. ყველა გრძნობდა, რომ მუშები საყოველთაო გაფიცვებისათვის ემზადებოდნენ. 31 ივლისს ღამით გაფიცვის თავიდან

¹ მლისტვა, ფ. 33, საქ. 21.

² ს. ალილუევი, განვლილი გზა, 1956, გვ. 34.

აცილების მიზნით, დააპატიმრეს 68 მოწინავე მუშა. ამავე დროს სახელოსნოებში გამოაქრეს განცხადება, რომელშიც წესების დამრღვევ მუშებს ხელფასის დაკლებითა და დათხოვნით ემუქრებოდნენ. მუშების მოთმინების ფიალა აივსო. 1900 წლის პირველ აგვისტოს მთავარი სახელოსნოების ყველა სამაქროსა და დეპოში მუშაობა შეწყდა. გაიფიცა 4 ათასამდე მუშა. გაფიცვის მიზეზი მუშებს არ განუცხადებიათ, მათ არავითარი მოთხოვნა არ წაუყენებიათ. მხოლოდ შემდეგ, გაფიცვის მსვლელობაში, მუშებმა მოითხოვეს სამუშაო ღლის 8 საათამდე შემცირება, ხელფასის მომატება, შრომის პირობების გაუმჯობესება და სხვ.

გაფიცვას უშუალოდ საგაფიცვო კომიტეტი ხელმძღვანელობდა, საერთო ხელმძღვანელობას კი თბილისის კომიტეტი ახორციელებდა. გაფიცვის მომზადებასა და ჩატარებაში თვალსაჩინო როლს თამაშობდნენ მუშებიდან: მ. ჩოდრიშვილი, მ. კალინინი, ვ. სტურუა, ს. ალილუევი, გ. ჩხეიძე, ა. ოქუაშვილი და სხვ., ინტელიგენტებიდან: ი. სტალინი, ა. წულუკიძე, ა. ჯაფარიძე, ს. ჯიბლაძე და სხვ. გაფიცვამ ფართო გამოხატულება და დიდი მორალური მხარდაჭერა პოვა რუსეთის პროლეტარიატის მხრივ. გაფიცვის დროს გამოცემული ერთ-ერთი პროკლამაცია მუშებს სიხარულით ატყობინებდა, რომ ჩვენ მარტო არა ვართ, მივიღეთ დეპეშა ჩვენი ამხანაგი რუსი მუშებისაგან. ამ სოლიდარობის გამოცხადებამ გაამხნევა და სიმტკიცე შემატა გაფიცულ მუშებს.

მოწინავე, ოპოზიციურად განწყობილი ქართველი ინტელიგენცია თანაგრძნობით ადევნებდა თვალს აგვისტოს გაფიცვას და შეძლებისდაგვარად ეხმარებოდა მას. ექიმი ხუდადოვი, რომელიც მაშინ რკინიგზის საავადმყოფოში მუშაობდა, სამედიცინო დახმარებას უწევდა გაფიცვის დროს დაშავებულ მუშებს. მან აგრეთვე საგაფიცვო კომიტეტის წევრს ვ. სტურუას 300 მანეთი გადასცა გაფიცულთა ფონდისათვის, საიდანაც დახმარებას აძლევდნენ განსაკუთრებით ხელმოკლე მუშებსა და დაპატიმრებულთა ოჯახებს.

მუშათა ხელმძღვანელმა კომიტეტმა გაფიცვასთან დაკავშირებით გამოსცა ძრავალი სააგიტაციო ფურცელი-პროკლამაცია, რომლებიც გაფიცულ მუშებს განუმარტავდნენ, თუ როგორ უნდა ებძოლათ, ასწავლიდა მათ ეკონომიურ მოთხოვნათა დაკმაყოფილებისათვის ბრძოლის პოლიტიკურ ბრძოლასთან დაკავშირებას, უხსნიდა მუშათა კლასის რევოლუციურ-კლასობრივი ბრძოლის საარსებო ამოცანებს. ეს პროკლამაციები, რომლებიც მგზნებარე მოწოდებებს წარმოადგენდნენ, ამალვებდნენ მუშების სულისკვეთებას და რაზმავდნენ მათ ცარიზმის წინააღმდეგ აშკარა პოლიტიკური ბრძოლისათვის. ერთ-ერთ პროკლამაციაში ნათქვამი იყო: „ჩვენ გვაპატიმრებენ იმისათვის, რომ კანონის შესარულებას მოვითხოვთ, — მაშასადამე, მთავრობა კანონებს სცემს, რათა მოგვატყუოს, თვალი აგვიხვიოს. ჩვენ გვაპატიმრებენ იმისათვის, რომ მოვითხოვთ მა-

თხოვრული ხელფასის გადიდებას, — მაშასადამე, მთავრობას უნდა, ნახევრად მშვიერი, მხეცური ცხოვრება გვექონდეს. ჩვენ გვაპატიმრებენ იმისათვის, რომ მოვიტხოვთ, რათა მოგვეპყრონ, როგორც ადამიანებს, — მაშასადამე, მთავრობა ისე გვიყურებს, როგორც პირუტყვით, რომელთაც წიხლის კვრის ნებაც არა აქვთ.

დავისსომოთ ეს ძმებო! როცა დადგება მთავრობასთან ანგარიშის გასწორების დღე, — ეს დღე კი ახლოს არის, — ჩვენ პასუხს მოვითხოვთ ამისათვის.

ახლა, ძმებო, ერთსულოვნად ვიდგეთ ჩვენს მოთხოვნებზე და ვუჩვენოთ ჩვენს სისხლისმსმელებს და მთავრობის მაჩანჩალებს, რომ მათ საქმე აქვთ არა უბადრუკ მონებთან და პირუტყვებთან, არამედ ადამიანებთან, რომელთაც უნარი შესწევთ მოითხოვონ, უნარი შესწევთ იბრძოლონ, და თუ საჭირო იქნება, ეწამონ კიდევ წმინდა საქმისათვის“¹.

პროკლამაციების გამოცემა დიდ სიძნელეებთან იყო დაკავშირებული, მაგრამ მას წარმატებით სძლევდნენ. აი პროკლამაციების გამოცემის ერთი საინტერესო შემთხვევა. გაფიცვის ერთ-ერთი მონაწილე მოგვიტხოვრობს, რომ საბეჭდი დაზგის უქონლობის გამო ამიერკავკასიის რკინიგზის მოსამსახურეთა მომხმარებელი საზოგადოებიდან გამოტანილ მიმეოგრაფზე მას, ა. ჯაფარიძესა და ი. სტალინთან ერთად, დაუბეჭდავს სტალინის მიერ დაწერილი პროკლამაციები².

თბილისის კომიტეტი პროკლამაციებს უმთავრესად ბეჭდავდა პატარა არალეგალურ სტამბაში, რომელიც კრასნოგორსკის ქუჩაზე იყო მოწყობილი. იქ მუშაობდა ლასა მგელაძე. მას ეხმარებოდნენ ბ. ბიბინიშვილი, ნ. კალაძე, ერ. ჩანტლაძე, ხოლო ფურცლებს ს. ჯიბლაძე ადგენდა. პროკლამაციებს წერდნენ ი. სტალინი, ა. ჯაფარიძე და სხვები.

მუშათა ხელმძღვანელმა კომიტეტმა უზრუნველყო გაფიცვის კარგი ორგანიზაცია და მისცა მას აშკარა პოლიტიკური ხასიათი. გაფიცვა არსებითად მიმართული იყო ცარიზმის წინააღმდეგ. თბილისის ჟანდარმთა საგუბერნიო სამმართველო თავის მოხსენებით ბარათში იძულებული იყო ელიარებინა, რომ გაფიცვა პოლიტიკური ხასიათისა იყო და რომ „ამიერკავკასიის რკინიგზების დეპოსა და მთავარ სახელოსნოებში გაფიცვას მთლიანად სოციალ-დემოკრატიული პარტია ხელმძღვანელობდა“³.

გაფიცული მუშების წინააღმდეგ მიღებულ იქნა მკაცრი ზომები. მათ წინააღმდეგ მთავრობამ გამოიყვანა ქვეითი და ცხენოსანი ჯარი, რომელიც დაუნდობლად სცემდა გაფიცულ მუშებს შოლტსა და თოფის კონდახს. 800-ზე მეტი მუშა დააპატიმრეს. აქედან აღმინისტრაციული წესით თბილისიდან ეტაპით გადასახლეს 300-ზე მეტი მუშა, 164 სამართალში

¹ მლისფა, ფ. 33, საქ. 23.

² „ზარია ვოსტოკა“, 1926, 13 იანვარი.

³ მლისფა, ფ. 31, საქ. 162, გვ. 17.

მისცეს. სახელოსნოებიდან დაითხოვეს ათასამდე მუშა. 16 აგვისტოს გაფიცვა შეწყდა. იგი დამარცხდა, მაგრამ, მიუხედავად ამისა, დიდი როლი შეასრულა მუშების რევოლუციური აღზრდის საქმეში.

თბილისის მუშათა ხელმძღვანელი კომიტეტი აგვისტოს გაფიცვის შედეგების შესახებ წერდა: „მართალია, ჩვენი უკანასკნელი ბრძოლა მწვავე იყო, ჩვენი უკანასკნელი შეტაკება მტერთან სასტიკი შეტაკება იყო. მართალია, ეს ბრძოლა არ დაბოლოებულა ჩვენდა სასარგებლოდ, მან გამარჯვების ნაცვლად, რაღა დავმალოთ, დამარცხება მოგვიტანა, მარა ეს რა თავის გასამართლებელი საბუთია: ვისაც მგლის ეშინია, ის ტყეშიც არ უნდა დადიოდესო, ამბობს რუსული ანდაზა. ვისაც დამარცხების ეშინია, მას ბრძოლისაც უნდა ეშინოდეს — ამ ერთადერთი გამათავისუფლებელი საშუალებისა!

დიახ, ბრძოლაში და მხოლოდ ბრძოლაშია შეელა ამხანაგებო!.. ჩვენი შორაგება შეუძლებელია, ბრძოლა აუცილებელია. მამ მოვემზადოთ, ამხანაგებო, ამ ბრძოლისათვის მეტის მხნეობით, მეტის შეგნებით, მეტის ერთობით“¹.

თბილისის რკინიგზის სახელოსნოებისა და დეპოს მუშათა აგვისტოს გაფიცვის ისტორიული მნიშვნელობა ისაა, რომ ეს იყო პირველი პოლიტიკური ხასიათის გაფიცვა საქართველოსა და ამიერკავკასიაში. გაფიცვამ ერთმანეთს დაუპირისპირა მუშები და მეფის მთავრობა და ნათლად დაანახა საქართველოს მუშათა კლასს, რომ სანამ იგი არ დაამხობს მეფის მთავრობას, მანამდე შეუძლებელია ალაგმო ბურჟუაზია და თავი დააღწიო დატაკურ ცხოვრებას და უუფლებობას.

„ბრძოლამ“ აგვისტოს გაფიცვის მნიშვნელობა ასე შეაფასა: „აი ამ წუთიდან მუშათა მოძრაობა ჩვენში მტკიცედ აღგება პოლიტიკური ბრძოლის გზას... ჩვენი მუშები და მთავრობა პირისპირ დაუდგნენ ერთმანეთს და სამკვდრო-სასიცოცხლოდ შეეტაკნენ, რაღა თქმა უნდა, პირველ შეტაკებაშივე სრული გამარჯვება ძალიან ძნელი იყო მუშათათვის და ადრე თუ გვიან იძულებული უნდა გამხდარიყვნენ იარაღი დაეყარათ. ეს კიდევ ასე მოხდა: მუშებმა მართლაც დაყარეს იარაღი, თითქოს დამარცხდნენ... მაგრამ ეს დამარცხება ბევრ გამარჯვებას აღემატება თავისი მნიშვნელობით და შედეგებით, ეს დამარცხება ერთნაირი გამარჯვება იყო დამარცხებულთათვის.. ყოველ შემთხვევაში ეს დამარცხება მომასწავებელი იყო გამარჯვების მოახლოებისა... დამარცხდნენ რამ მუშები გუშინ, ამით მათ გამარჯვება მოამზადეს დღეისათვის“².

1900 წელს გაფიცვების ტალღა, გარდა რკინიგზის სახელოსნოებისა

¹ მლისფა, ფ. 33, საქ. 23.

² „ბრძოლა“, 1901, № 2—3.

და დეპოსი, მოედო თბილისის მთელ რიგ ფაბრიკა-ქარხნებს (ადელხანოვის ტყავის ქარხანა, საფაროვის ფეხსაცმლის სახელოსნო, იარაღოვის მექანიკური ქარხანა, ენფინჯიანცის და ბოზარჯიანცის თამბაქოს ფაბრიკები და სხვ.). თბილისის ჟანდარმთა საგუბერნიო სამმართველო პოლიციის დეპარტამენტისადმი გაგზავნილ მოხსენებით ბარათში აღნიშნავდა ამ გაფიცვების ორგანიზებულ ხასიათს და მიუთითებდა, რომ „თბილისში სოციალ-დემოკრატიული საქმიანობის გაჩაღებამდე თუმცა გაფიცვები ხდებოდა, მაგრამ ეს იყო მხოლოდ დამოუკიდებელი ერთეული შემთხვევები ამა თუ იმ ქარხანაში“. მიმდინარე 1900 წელს კი, დასძენდა ჟანდარმთა სამმართველო, გაფიცვები ერთსა და იმავე დროს ხდებოდა მთელ რიგ ფაბრიკა-ქარხნებში, რაც „სავსებით განსაზღვრავს მუშათა მღელვარების წყაროს“¹.

საქართველოს მუშათა მოძრაობის ისტორიაში აგვისტოს გაფიცვას განსაკუთრებით დიდი მნიშვნელობა ჰქონდა. ამიერიდან თბილისში რევოლუციურმა მოძრაობამ ფართო და ღრმა ხასიათი მიიღო. თუ რა დიდი გაქანება ჰქონდა ჩვენში მუშათა რევოლუციურ მოძრაობას ცხრაასიან წლებში, ნათლად ჩანს პეტერბურგის მუშათა მოძრაობის გამოჩენილი ბოღვაწის, ამ დროს თბილისის მუშათა მოძრაობის აქტიური მიზნაწილის, მ. კალინინის მოგონებიდან: „მე პირადად დამრჩა შთაბეჭდილება, — ამბობდა მ. კალინინი, — რომ საქართველოში მუშათა კლასისა და გლეხთა რევოლუციური მოქმედება გარეგნულად ყოველთვის გამოიხატებოდა უფრო მკვეთრ ფორმებში, ვიდრე რუსეთის სხვა ადგილებში“².

¹ მლისტვა, ფ. 31, საქ. 126, გვ. 18.

² „ბოლშევიკი“, 1940, № 5.

§ 1. ახალი ყოფა და ახალი კულტურა

ხალხის ყოფა-ცხოვრების განახლება. ეროვნულმა გაერთიანებამ და სოციალ-ეკონომიურმა წინსვლამ XIX საუკუნეში თანდათანობით შეცვალა ქართველი ხალხის ყოფა-ცხოვრება, მისი ტექნიკურ-მეურნეობრივი და კულტურულ-ეთნოგრაფიული სახე.

მანამდელი, ძველი ქართული საზოგადოება, ვაჭრობა-მრეწველობის ერთგვარი განვითარების მიუხედავად, მემამულისა და გლეხის ფეოდალურ ურთიერთობას ემყარებოდა.

XIX საუკუნის ქართული საზოგადოება ფეოდალიზმიდან კაპიტალიზმში გარდამავალი საზოგადოება იყო; ფეოდალურ-გლეხურ საკუთრებით ურთიერთობებთან ერთად მისი ეკონომიური საფუძველი წვრილბურჟუაზიული და ბურჟუაზიული საკუთრებაც იყო.

ქართველი თავადაზნაურობა, თავისი მრავალრიცხოვნებისა და ისტორიულად მკვიდრი ტრადიციების მიუხედავად, თანდათან კარგავდა წონას ერის ეკონომიურ და კულტურულ ცხოვრებაში, ხოლო ქართველი ბურჟუაზია მავრად ვერ იკიდებდა ფეხს რუსული, სომხური და ევროპული ბურჟუაზიის გვერდით.

ბურჟუაზიულმა ურთიერთობამ მაინც დიდი გავლენა მოახდინა ხალხის ყოფა-ცხოვრებაზე. მრავალრიცხოვანი და მოძრავი ვაზადა იგი, შეარყია მამაპაპური ზნე-ჩვეულება, მიაჩვია არაპრივილეგიური წარმოშობის ხალხის ნაწილი ისეთი საწარმოო იარაღის, ტანსაცმლის, ჭურჭლის და სამკაულის ხმარებას, რომელიც წინათ შეძლებულთათვისაც ძნელად იყო ხელმისაწვდომი. მესამე წოდების და მისი ზედაფენის — ბურჟუაზიის ახალი ყოფა-ცხოვრება სულ უფრო და უფრო მძლავრად იჩენდა თავს XIX საუკუნის საქართველოს ყველა კუთხეში, თუმცა განახლების ტენდენციებთან ერთად იგრძნობოდა მრავალსაუკუნოვანი ტრადიციებიც, რომლებიც მხოლოდ ფეოდალური როდი იყო. მრავალსაუკუნოვანი კულტურის მქონე ქართველი ხალხის ყოფა-ცხოვრებას ბოლომდე შერჩა სა-

ოჯახო და საზოგადოებრივი ცხოვრების მრავალი საღი ხალხური ზნე-ჩვეულებანი: ურთიერთდახმარება, სტუმართმოყვარეობა, ადამიანის პიროვნების პატივისცემა რელიგიური და ეროვნული კუთვნილების მიუხედავად, მშობლიური ენისა და მიწა-წყლის სიყვარული, რაინდული თავდადება, სიბრძნისმოყვარეობა, ფიცხი, მაგრამ რბილი ხასიათი. XIX საუკუნეში ამ უძველესი ტრადიციების განახლების წყალობით ჩამოყალიბდა ქართველი ხალხის ცხოვრების ახალი ყოფა, რომელიც ასაზრდოებდა არა მარტო ხალხურ შემოქმედებას, არამედ ინტელიგენციის მიერ შექმნილ პროფესიულ კულტურასაც.

ახალი ქართული კულტურის დამკვიდრება. ძველი ქართული კულტურის განახლების ხანგრძლივი პროცესი XIX საუკუნეში ახალი ქართული კულტურის შექმნით და საბოლოო დამკვიდრებით დავერგვინდა. რუსეთთან შეერთების შემდეგ საქართველოს გაერთიანებამ, მისი მატერიალური ცხოვრების აღორძინებამ, დაწინაურებულ ხალხებთან ურთიერთობის გაძლიერებამ ხელსაყრელი პირობები შექმნა ფორმით ეროვნული და შინაარსით ბურჟუაზიული ქართული კულტურის განვითარებისათვის. დიდი აღმავლობა განიცადა ახალმა ქართულმა ლიტერატურამ, დაარსდა ჟურნალ-გაზეთები, შეიქმნა ახალი სკოლები და თეატრი, აღორძინდა მეცნიერება საზოგადოების შესახებ, საფუძველი ჩაეყარა თანამედროვე სახვით ხელოვნებას, ხუროთმოძღვრებას და პროფესიულ მუსიკას.

გარდა იმისა, რომ ახალი ქართული კულტურა შეიცავდა ზოგ ისეთ დარგს (პრესა, თეატრი, ქანდაკება), რომელიც ძველად სუსტად იყო განვითარებული ან სულ არ არსებულა, საერთოდაც ახალი კულტურა დიდად განსხვავდებოდა ძველისაგან. ძველი ქართული კულტურა ასახავდა ნაკლებად ცვალებად, საუკუნეობრივ ტრადიციებზე დამყარებულ ფეოდალურ საზოგადოებას, რომლის წიაღში ძლიერი ეროვნული ბურჟუაზია ვერ შეიქმნა. ფეოდალიზმის ხანის ქართული მატერიალური და სულიერი კულტურა გლეხის ოჯახში, ამქრის სახელოსნოში, მონასტრის სენაკში, მეფის სასახლეში იქმნებოდა. მის მთავარ თემებს სიყვარული, რაინდობა და ქრისტიანული რელიგიის გაცდა შეადგენდა, მიუხედავად იმისა, რომ ძველმა ქართულმა კულტურამ მსოფლიოს მისცა ისეთი მონუმენტური და ჰუმანისტური ძეგლი, როგორც „ვეფხისტყაოსანია“.

ახალი ქართული კულტურა ნაკლებ მონუმენტური, მაგრამ უფრო რეალისტური, ჰუმანისტური და დემოკრატიულია, უფრო მღელვარე, მოძრავ საზოგადოებას ასახავს, საზოგადოების ყველა ფენას სწვდება. მის შემოქმედთა მოღვაწეობა მწერლის კაბინეტში, ჟურნალ-გაზეთის რედაქციაში, თეატრში ან სკოლაში მიმდინარეობს. ახალი კულტურის მთავარი თემაა ჩვეულებრივი ადამიანის სულიერი გაცდების, საზოგადოებრივი ყოფა-

ცხოვრების, ბუნების ჩვენება. მისი დანიშნულებაა არა განყენებული-ესთეტიკური ტკობა, არამედ პიროვნების აღზრდა, მისი განვითარება, ოჯახის, საზოგადოების და თვით ბუნების გარდაქმნა ჰუმანისტურ-დემოკრატიული იდეალების შესაბამისად.

ახალი ქართული კულტურის პროგრესული იდეურ-კლასობრივი შინაარსი ობიექტურად ბურჟუაზიულ-დემოკრატიული იყო, მაგრამ მის გამოჩენილ მოღვაწეთა იდეალები ხშირად მალღლებოდა მათი ეპოქისა და სოციალური წრის ინტერესებზე, ისინი უნაგაროდ იბრძოდნენ საზოგადოებრივი ცხოვრების გარდასაქმნელად¹.

§ 2. მოსახლეობის მატერიალური ყოფა

მოსახლეობა. საქართველოს აწინდელ ტერიტორიაზე, რომლის ფართობი 69 ათას კვ კილომეტრს, მოსახლეობა კი 5 მილიონ კაცს უახლოვდება, 1800 წელს მხოლოდ 675 000, 1865 წელს 1 327 000, ხოლო 1897 წელს 1 929 049 კაცი ცხოვრობდა. ამრიგად, XIX საუკუნის მანძილზე მთლიანად საქართველოს და საკუთრივ ქართველი მოსახლეობის რიცხვი ერთი სამად გაიზარდა. მოსახლეობის გამრავლება უმთავრესად ბუნებრივი ზრდის გზით მოხდა, მაგრამ დიდ როლს ასრულებდა მიგრაციით გამოწვეული მექანიკური ზრდაც. ამასთან, ქართველთა გამრავლების შედარებით დაბალი ტემპი იწვევდა მოსახლეობის საერთო რაოდენობაში მათი ხვედრითი წილის შემცირებას. თუ 1800 წელს არაქართველი მოსახლეობა საქართველოს მთელი მოსახლეობის მხოლოდ 11%-ს შეადგენდა, 1897 წელს არაქართველთა ხვედრითი წილი 32%-მდე გადიდა. იმავე წლებში ქართველი მოსახლეობა შესაბამისად 610 000 და 1 312 000 კაცს უდრიდა, მაგრამ ორჯერ გადიდების მიუხედავად, მთელი მოსახლეობის 89%-დან 1800 წელს 60%-მდე შემცირდა 1897 წელს². XIX საუკუნის დამლევისათვის საქართველო კიდევ უფრო მრავალეროვანი ქვეყანა იყო, ვიდრე წინა საუკუნეში: არაქართველი მოსახლეობით საქართველოს ტერიტორიის კოლონიზაციის გამო, რაც ადრეც მიმდინარეობდა, მაგრამ XIX საუკუნეში მნიშვნელოვნად გაძლიერდა. საქართველოს ტერიტორიაზე შეიქმნა მრავალი სოფელი, რომელთა მოსახლეობა მთლიანად არაქართველთაგან (სომხები, ბერძნები, რუსები) შედგებოდა და ყოფა-ცხოვრებით დიდად განსხვავდებოდა აბორიგენი მოსახლეობისაგან. ეროვნულად კიდევ უფრო

¹ ზ. ქიქოძე, თხზ., ტ. III, 1965, გვ. 164—169.

² პ. გუგუშვილი, საქართველოს მოსახლეობა 160 წლის მანძილზე („მოსალები საქართველოს ეთნოგრაფიისათვის“, 12—13, 1963, გვ. 74).

აჭრელდა ქალაქები, სადაც აღებ-მიცემობას უმთავრესად არაქართველნი მისდევდნენ. ერთნაირი არ იყო საქართველოს ტერიტორიაზე ძველთაგანვე მცხოვრებ აფხაზთა და ოსთა და თვით ქართული მოსახლეობის სხვადასხვა ტომთა (მეგრელები, სვანები) და თემთა (ქართლები, კახელები, თუშნი, ფშაველები, ხევსურნი, მოხევენი, მთიულნი, მესხნი, ჭავჭავაძეები, ინგილონი, იმერელები, გურულები, აჭარელები, რაჭველები, ლეჩხუმელები)¹, ბარისა და მთის, ქალაქისა და სოფლის მცხოვრებთა ყოფა და კულტურაც, იმის მიუხედავად რომ ახალი სოციალ-ეკონომიური და კულტურული ვითარება სულ უფრო და უფრო ანიველირებდა ტრადიციულ ჩვევათა სხვადასხვაობას და უმორჩილებდა საერთო-ეროვნული კონსოლიდაციის გაძლიერებულ პროცესს.

სოფლის მეურნეობა. საქართველოს მრავალფეროვანი ბუნება იმთავითვე ქმნიდა მრავალდარგოვანი სოფლის მეურნეობისა და ხელოსნობის განვითარების შესაძლებლობას. სოფლის მეურნეობის ტრადიციული დარგები იყო მემინდვრობა, მეცხოველეობა, მევენახეობა, მეხილეობა, მრეწველობისა — სამეურნეო იარაღების, ჩაცმულობის და საკვები პროდუქტების წარმოება. XIX საუკუნის დამდეგამდე ქართველი ხალხი საკუთარი სასოფლო-სამეურნეო და სახელოსნო წარმოებით არა მარტო საშინაო მოთხოვნილებებს იკმაყოფილებდა, არამედ ზოგი ნაწარმი მეზობელ ქვეყნებშიც გაჰქონდა. XIX საუკუნის დამდეგისათვის დიდად დაქვეითდა ქვეყნის მწარმოებლური ძალები, დაეცა სოფლის მეურნეობა და ხელოსნობა. მაგრამ საუკუნის პირველ ნახევარში კვლავ ფეხზე დადგა საქართველოს მეურნეობა, მეორე ნახევარში კი იმდენად მომაგრდა, რომ კაპიტალის მსოფლიო ბრუნვაში აღმოჩნდა ჩათრეული. აღორძინდა და განვითარდა მეურნეობის ტრადიციული დარგები, შეიქმნა ახალი დარგები, გაძლიერდა ვაჭრობა, საფუძველი ჩაეყარა თანამედროვე მრეწველობას და მაინც მთელი XIX საუკუნის მანძილზე საქართველო, დასავლეთ ევროპის ქვეყნებთან შედარებით, წარმოადგენდა სუსტად განვითარებულ აგრარულ ქვეყანას, რომელსაც ბორკავდა მიწათმფლობელობისა და მიწათსარგებლობის დრომოჭმული ფორმები.

ქართველი ხალხის ძირითად საქმიანობას XIX საუკუნეშიც მრავალდარგოვანი სოფლის მეურნეობა წარმოადგენდა. მრავალფეროვანი იყო შრომის იარაღებიც, რომელთა სიმრავლით მაშინდელი საქართველო ცოცხალ მუზეუმს მოგვაგონებდა².

მიწათმოქმედებისათვის დამახასიათებელი იყო შრომის მარტივი

¹ Народы Кавказа, II, под ред. Б. Гарданова, Г. Читая и др., 1962, გვ. 212.

² იხ. მ. გ. გ. შ. ი. ძ. ე., ქართველი ხალხის ყოფა XIX ს. მეორე ნახევარში, გვ. 8.

კოოპერაციის, მწარმოებელთა ურთიერთდანმარების სხვადასხვა ფორმა, რომელთაგან ყველაზე მეტად გავრცელებულად ითვლებოდა მოდგამი. მასში სეზონურად ერთიანდებოდა რამდენიმე ოჯახის მუშახელი, პირუტყვი ან ინვენტარი. ურთიერთდანმარების გვიანდელი ფორმები ძლიერ მიწათმოქმედთა მიერ სუსტთა ექსპლოატაციის ფარულ თუ აშკარა დაღს ატარებდა¹. შესრულებული სამუშაოს 25—40%-ს ეპატრონებოდა გუთნისდედა, რომელიც ოთხი მეხრისა და რვა უღელი ხარკამეჩის გამაერთიანებელ გუთნულში მთავარი იარაღის — გუთნის და შესაბამელთა მნიშვნელოვანი ნაწილის მფლობელი იყო².

მიწათმოქმედების ტრადიციულ იარაღებს საქართველოში გაბატონებული მდგომარეობა ეკავა მთელი XIX საუკუნის მანძილზე, თუმცა 50-იანი წლებიდან იწყება ევროპულ-ამერიკული მანქანა-იარაღების შემოტანაც. XX საუკუნის პირველ ათეულ წლებშიც საქართველოს სოფლის მეურნეობაში ქართული გუთანი და ნამგალი, იმერული ჩიხრისი და კვერი ბატონობდა.

XIX საუკუნეშიც მრავალსაუკუნოვანი ტრადიციები და წეს-ჩვეულებანი ედო საფუძვლად ქართულ მევენახეობა-მელვინეობას. ქართველმა ხალხმა თავისი ხანგრძლივი ისტორიის მანძილზე ამ დარგშიც თვითმყოფადი და მაღალი კულტურა შექმნა. ტრადიციული ქართული მარანი, მისი საწნახელით, ქვევრებით და ორშიშოთი, ღვინის საწყობიდან და შინამრეწველური სახელოსნოდან კაპიტალისტურ ქარხნად უნდა გადაქცეულიყო, მაგრამ ეს გარდაქმნა XIX საუკუნის საქართველოში ნელა, თანდათანობით ხორციელდებოდა. მოსახლეობის უმრავლესობისათვის მემინდვრეობა იყო საქმიანობისა და კეთილდღეობის მთავარი წყარო, მაგრამ თითქმის ყველგან მის აუცილებელ დამატებას მეცხოველეობა წარმოადგენდა, ზოგან კი მარტო მეცხოველეობას მისდევდნენ. მეცხოველეობის ტრადიციული ჩვევები თანდათანობით უთმობდა გზას ახალ ფორმებს. მაგალითად, მეცხოველეობაში კვდებოდა „დავარდნილთა წამოყენების“ პატრიარქალური ჩვეულება, მეცხვარეობაში ურთიერთდანმარებას თანდათანობით ცვლიდა ურთიერთბრძოლა გამდიდრებისათვის. სუსტებსა და ღარიბებსზე ბატონობდნენ ძლიერი მეპატრონენი და ვაჭრები³.

სოფლის მეურნეობისათვის დიდი მნიშვნელობა ჰქონდა მორწყვას, განსაკუთრებით აღმოსავლეთ საქართველოს ბარში, თუმცა ირიგაცია

¹ ალ. რობაქიძე, მოდგამი, როგორც ექსპლოატაციის ერთი ფორმა რევოლუციამდელ საქართველოში („მიმოხილველი“, 1, 1949, გვ. 418—419).

² პ. გუგუშვილი, საქართველოს და ამიერკავკასიის ეკონომიკური განვითარება, ტ. III, გვ. 21, 38, 40.

³ პ. გუგუშვილი, საქართველოს და ამიერკავკასიის..., ტ. V, გვ. 597.

აღრიდანვე ვითარდებოდა მთის პროვინციებში. სარწყავი არხების მშენებლობა და პერიოდული შეკეთება მთელი ხალხის ზრუნვის საგანს წარმოადგენდა. სარწყავი წყლის განაწილება მერუეებს ჰქონდათ მინდობილი. ადრე მერუეთა ინსტიტუტი არჩევითი ყოფილა, XIX საუკუნეში კი მერუენი ინიშნებოდნენ. ჩვეულებრივ რამდენიმე სოფლისაგან ან სოფლის ცალკე უბნებისაგან შემდგარ ჯგუფს ერთი საერთო არხი ჰქონდა. XIX საუკუნეში აშენდა რამდენიმე ახალი სარწყავი არხი (ოფშკითში, დიდ ჭიხაიში, ვარციხეში, ყარაიაში), მაგრამ მრავალდარგიანი სოფლის მეურნეობა სარწყავი წყლის დიდ ნაკლებობას განიცდიდა¹. მოძველებული პრიმიტიული ტექნიკისა და ტექნოლოგიის პირობებში მოსავლიანობა ურწყავ მიწათმოქმედებაში ატმოსფერულ ნალექებზე იყო დამოკიდებული. გვალვის წინააღმდეგ ბრძოლის რეალურ საშუალებებს მოკლებული ხალხი XIX საუკუნეშიც მიმართავდა „წვიმის გამოწვევის“ მაგიურ წეს-ჩვეულებებს. ეკლესიაც ხშირად აწყობდა პარაკლისებს „წვიმის გამოსაწვევად“². ეს გარემოება იმის თავისებური მაჩვენებელია, რომ სარწყავი წყალი ტრადიციულად მთელი საზოგადოების საზრუნავი საქმე იყო. მაგრამ ამ საზოგადოებრივი ხასიათის მოვლენასაც XIX საუკუნეში კერძო მესაკუთრის თვალთ დაუწყეს ყურება. ძლიერი მემამულენი ეპატრონებოდნენ სათემოდ აღიარებულ სარწყავ რუებს. ისინი რეფორმის შემდეგაც კი ზოგჯერ თემს მთლიანად ართმევდნენ სარწყავი წყლით სარგებლობის საშუალებას, ბეგრავდნენ გლეხებს სარწყავი რუებით სარგებლობისათვის, განშირდა წყლის რიგის გაყიდვის და მერუისათვის ქრთამის მიცემის შემთხვევები, გაძლიერდა სოფლებს შორის დავა, რაც ხშირად შეიარაღებულ შეტაკებადაც იქცეოდა ხოლმე. თემი ვეღარ უმკლავდებოდა წყლით სარგებლობაში მოძალებულ კერძო საკუთრებას. თემური ტრადიციების დამრღვევთა დასჯის ძველი საშუალებებიც (დარბევა, წყლის რიგის წართმევა, ჯარიმა) საქმეს არ შველოდა სოფლად კაპიტალისტური მეურნეობის აღმავლობის და სარწყავი წყლის ნაკლებობის ვითარებაში.

ხელოსნობა და მრეწველობა. საქართველოს სოფლის მცხოვრებთა სამეურნეო საქმიანობა XIX საუკუნეში მხოლოდ მიწათმოქმედებით და მეცხოველეობით არ შემოიფარგლებოდა. მათი უმრავლესობა სხვადასხვაგვარ ხელოსნობას, საოჯახო და შინამრეწველობასაც მისდევდა. მთელი XVIII საუკუნის დამლევსა და XIX საუკუნის განმავლობაში „გლეხის ოჯახი საკუთარი მოხმარების მრეწველობის პროდუქტთა უმნიშვნელოვა-

¹ მ. გ ე გ ე შ ი ძ ე , სარწყავი მიწათმოქმედება საქართველოში, გვ. 108, ქართველი ხალხის ყოფა მე-19 ს. მეორე ნახევარში.

² გ. ჩ ი ტ ა ი ა , ეთნოგრაფიული მოგზაურობიდან აღბუღლის რაიონში („საქართველოს მუზეუმის მოამბე“, 4, 1927).

ნეს ნაწილს მაინც თვითონვე, თავისი ძალებით აწარმოებდა¹. მეაბრეშუმე, მებაბზე, მეფუტყრე, მევენახე და მესაქონლე გლეხები შესაბამისად ქსოვილების, წინღების, ღვინის, თაფლის, ყველის და რძის სხვა პროდუქტთა მწარმოებლებიც იყვნენ. განსაკუთრებით მთის რაიონებში საუკუნის დამლევაზე საფეიქრო ნაწარმით ვაჭრობა ჯერ კიდევ სუსტად იყო განვითარებული და „ყოველსავე ტანსაცმელს კაცისას თუ ქალისას“ ქალები ამზადებდნენ. ბარის მცხოვრებთა საქმიანობიდან საოჯახო და შინამრეწველობის ტრადიციული დარგები უფრო სწრაფად იდევნებოდა, მაგრამ საუკუნის დამლეგს მთელ საქართველოში „ყოველ სოფელს თავისი ფეიქარი ჰყავდა, თავისი... ნაბღის მთელავი, თავისი შალის მქსოველი დედაკაცი“². საუკუნის ბოლოსაც სოფლის მოსახლეობის, განსაკუთრებით გლეხობის უდიდესი უმრავლესობა შემოსილი იყო „შინაური შალით და აბრეშუმით“.

ძველთაგანვე მაღალგანვითარებული ქართული ხელოსნობა XIX საუკუნის დამლეგიდან კიდევ უფრო ვითარდება. წარმოიქმნა ახალი ხელობანი, რომელთაგან ზოგი კოლონისტებმაც შემოიტანეს. დაარსდა სახელოსნო სასწავლებლები. გამრავლდა როგორც ბინადარ, ისე მოაარულ ხელოსანთა რიცხვი. ყოველი შეგირდისათვის ოსტატის წოდების მინიჭების რიტუალი პატრიარქალურ ტრადიციას ემყარებოდა. ოსტატად კურთხევისას შეგირდი თავის ოსტატს საჩუქარს მიართმევდა, ოსტატი კი თავის შეგირდს სამუშაო იარაღებით ასაჩუქრებდა, დალოცავდა, სამჯერ სილას გაართყამდა და მერე სხვებთან ერთად ეამბორებოდა. ბოლოს იწყებოდა ლხინი და ქალაქის ქუჩებში საზეიმო სვლა, რომელიც დილამდე გრძელდებოდა³.

საუკუნის დამლეგიდანვე ამქართა ცხოვრებაში იჭრება ვაჭრულ-მევახშური კაპიტალი, რომელსაც 40—50-იან წლებში უკვე გაბატონებული მდგომარეობა ეკავა.

ხელოსნური შინამრეწველობის ბედი ეწია ოჯახურ მრეწველობასაც, რომელიც კიდევ უფრო მოძველებულ, პრიმიტიულ ტექნიკას ემყარებოდა. XX საუკუნის დამლევისათვის გლეხთა ოჯახებში ნაკლებად მისდევდნენ ნედლეულის სამრეწველო გადამუშავებას, ნედლეულადვე ჰყიდდნენ მას ბაზარზე. სოფლად და ქალაქად წვრილი სასაქონლო წარმოების განვითარებისა და ბაზრის გაფართოების პროცესი დიდად გაძლიერდა უკვე

¹ პ. გ უ გ უ შ ი ლ ი, საქართველოს და ამიერკავკასიის ეკონომიკური განვითარება, ტ. V, გვ. 346.

² ი. მ ე უ ნ ა რ გ ი ა, ქართველი მწერლები, 1941, გვ. 41—42.

³ ი. გ რ ი შ ა შ ვ ი ლ ი, ძველი თბილისის ლიტერატურული ბიკემა (თხზ. კრებული, ტ. III, გვ. 160—163). პ. გ უ გ უ შ ი ლ ი, საქართველოს და ამიერკავკასიის..., ტ. V, გვ. 232.

XIX საუკუნის პირველ ნახევარში, ამავე დროს თანდათანობით გზას იკაფავდა მსხვილი სამრეწველო წარმოება, სოფლად იქმნებოდა მსხვილი რაციონალური მემამულური და ბურჟუაზიული მეურნეობანი, ქალაქად — კაპიტალისტური ფაბრიკა-ქარხნები.


ქალაქი და სოფელი. XIX საუკუნის მეორე ნახევარში რკინიგზების გაყვანის შემდეგ საქალაქო ცხოვრება კიდევ უფრო გაფართოვდა. თბილისი, ქუთაისი, ბათუმი, ფოთი, ჭიათურა, ტყიბული, მსხვილ სავაჭრო-სამრეწველო ცენტრებად იქცნენ. ბათუმიდან და ფოთიდან რუსეთისა და მსოფლიო ბაზრებისაკენ დაიძრა საქართველოს და ამიერკავკასიის მარგანეცი, ნავთი, აბრეშუმი, სიმინდი, მატყლი და სხვა ნედლეული, რომლის სანაცვლოდ ადგილობრივი მოსახლეობა რუსულ და დასავლეთევროპულ სამრეწველო საქონელს ღებულობდა.

ქალაქური ცხოვრების განვითარება ტექნიკურ-ეკონომიური და კულტურული განახლების თანდათანობითი, მაგრამ შედარებით დაჩქარებულ ტემპით მიდიოდა, განსწავებით სოფლის ყოფა-ცხოვრებისაგან, რომელიც თავს ვერ აღწევდა საუკუნეობრივ ჩამორჩენილობას. კაპიტალისტური ქალაქი ექსპლოატაციას უწევდა სოფელს. თბილისში წყალსადენს გაიყვანდნენ და ქალაქში სავაჭროდ ჩამოსულ სოფლელებს სატრანსპორტო ბაჟს დაადებდნენ. მტკვარზე ხიდს ააშენებდნენ და მისი ხარჯების ანაზღაურებასაც სოფლებიდან შემოსულ ტრანსპორტზე საბაჟო გადასახადის დაწესებით ცდილობდნენ¹. ეკონომიურ და სოციალურ-კულტურულ ნიადაგზე აღმოცენებული წინააღმდეგობა ქალაქსა და სოფელს შორის მათი ეკონომიური კავშირ-ურთიერთობის გაფართოების კვალობაზე სულ უფრო და უფრო ძლიერდებოდა.

საცხოვრებელი და სამეურნეო ნაგებობანი. ქალაქსა და სოფელს მოსახლეობის ეროვნული შემადგენლობისა და დასახლების ტიპის მიხედვითაც ერთმანეთისადმი დაპირისპირებული სახე ჰქონდათ. სოფლები უპირატესად ერთი ეროვნების მოსახლეობისაგან შედგებოდა, ქალაქებში სხვადასხვა ეროვნებათა წარმომადგენლები ცხოვრობდნენ.

ფეოდალიზმიდან კაპიტალიზმში გარდამავალი ეპოქის ქართული ქალაქის ნიშნებია ცენტრალურა მოედანი ადმინისტრაციული შენობებით, კომუნალური მეურნეობა, სავაჭრო ბაზრები და საწარმოო-დაწესებულებანი, ხოლო დედაქალაქ თბილისში ამასთან ერთად გამოირჩეოდა ცალკეული საცხოვრებელი კვარტალები ბურჟუაზიის, თავადაზნაურობის, ხელოსნებისა და მუშებისათვის. ბურჟუაზიულ ქალაქს ჰქონდა გარეუბანიც, სადაც გლეხობა სოფლის მეურნეობას მისდევდა. ევროპიზაციის

¹ პ. გ უ გ უ ვ ი ლ ი, საქართველოს და ამიერკავკასიის..., ტ. II, გვ. 872—875.



დარბაზი. გლეხის სახლი.

გზაზე დამღვარი საქალაქო დასახლება კიდევ უფრო მეტად უპირისპირდებოდა დასახლების როგორც სოფლურ, ისე ქალაქურ ეროვნულ ტრადიციებს, რომლებიც საქართველოს გეოგრაფიული გარემოს, სამეურნეო ყოფისა და კულტურულ-ისტორიული პირობების შესაბამისად დამკვიდრდა.

XIX საუკუნეშიც გავრცელებული იყო ძირითადად სამგვარი ტიპის ძველი ქართული საცხოვრებელი სახლები. მთის მოსახლეობის (სევანების, ხევსურების, მოხევეების, თუშების) საცხოვრებელი ბინები წარმოადგენდა ორ, სამ და ოთხსართულიან კოშკისებურ ნაგებობებს, რომლებშიც თავმოყრილი იყო როგორც ადამიანთა, ისე პირუტყვის სამყოფი, აგრეთვე სამეურნეო ინვენტარის მოსახმარი და პროდუქტების შესანახი ნაწილები. მიწის ფართო და განუყოფელი საცხოვრებელი ნაწილის ცენტრში კერა და დედაბოძი იყო. კერა გათბობისა და განათების გარდა ოჯახს საკმლის მომზადების საშუალებაც ჰქონდა გამოყენებული. მოსახლეობაში კერის კულტი სხვადასხვა წეს-ჩვეულებით იყო განმტკიცებული, მისდამი უპატივცემლო დამოკიდებულება სევანეთში ოჯახის შეურაცხყოფელ უმძიმეს დანაშაულად ითვლებოდა.

კერის დაქცევა საწყევარ გამოთქმად იხმარებოდა დასავლეთ საქარ-

თველოს ბარის (იმერეთის, სამეგრელოს, გურიის, აფხაზეთის) მოსახლეობაში. აქაც კერას ცენტრალური ადგილი ეჭირა საცხოვრებელ სახლში (ან მისგან გამოყოფილ სამზაღში, სამზარეულოში), რომელსაც იმერეთში საჯალაბო სახლი, სამეგრელოში ფაცხა, გურიაში ოდა ეწოდებოდა. კაპიტალიზმის ხანის დასავლეთ საქართველოს ბარში ოდის ტიპის სახლები გავრცელდა ყველაზე მეტად¹.

აღმოსავლეთ და სამხრეთ საქართველოში საცხოვრებელ ნაგებობათა ძირითად ტიპს წარმოადგენდა ქართლური დარბაზი (ერთობის სახლი) ანუ ერდოიან-გვირგვინიანი სახლი, რომელიც „მიწური ბანით მომთავრებულ და ჰორიზონტალურ დაგეგმარებაში განვითარებულ საცხოვრებელ და სამეურნეო ნაგებობათა კომპლექსს წარმოადგენდა: კომპლექსის ძირითადი სათავსო ანუ ადამიანის საცხოვრისი, როგორც წესი, სვეტებზე შედგმული სხვადასხვა ფორმის ერდოიანი გვირგვინით და მის ქვეშ ოთახის ცენტრში არსებული კერით ხასიათდებოდა“². კომპლექსში საცხოვრისთან ერთად შედიოდა ბეღელი, მარანი, სათონე, ჩარდახ-დერეფანი, საბძელი და ბოსელი. მიწურბანიანი ერდოიან-გვირგვინიანი სახლი საცხოვრებლის ძირითადი ტიპი იყო ქართლის, მესხეთ-ჯავახეთის და თრიალეთის (წალკის) როგორც ქართველ, ისე არაქართველ (სომეხ, აზერბაიჯანელ, ოს) მოსახლეობაში. ამგვარი სახლები მთელ ამიერკავკასიაში და მის ფარგლებს გარეთაც ყოფილა გავრცელებული.

კახეთის მოსახლეობა XIX საუკუნეში უმთავრესად ცხოვრობდა ერთსართულიან ქვის სახლებში, რომლებსაც მიშენებული ჰქონდა სამეურნეო ნაგებობანი. ამასთან, გამდიდრებული ზედაფენის წარმომადგენლები იშენებდნენ ორსართულიან სახლებს, რომლის პირველი სართული სამეურნეო დანიშნულებისა იყო, მეორე კი ოჯახის საცხოვრებელს წარმოადგენდა.

მდიდართა სახლები განსაკუთრებით XIX საუკუნის 80—90-იანი წლებიდან მრავლდება როგორც სოფლად, ისე ქალაქად, მაგრამ სოფლად ისინი მაინც აქა-იქ გამოიყურებოდნენ მრავალრიცხოვან ღარიბთა მიწური, ისლით გადახურული სახლების ფონზე. კიდევ უფრო მკვეთრად განსხვავდებოდა ერთმანეთისაგან შეძლებულთა და ღარიბთა სახლების შინაგანი სახე, მოწყობილობა და მორთულობა³.

ქართველი ხალხის მრავალმხრივი მეურნეობა იმთავითვე განაპირობებდა სხვადასხვა სამეურნეო შენობათა წარმოშობას (ბეღელი ანუ ხულა,

¹ Народы Кавказа, II, გვ. 281—288.

² თ. ჩიკოვანი, ამიერკავკასიის ხალხურ საცხოვრებელ ნაგებობათა ისტორიიდან, 1967, გვ. 42, 55, 63, 89.

³ იხ. И. А н т е л а в а, Государственные крестьяне Грузии в первой половине XIX века, т. I, 1955, გვ. 368—372.

სასიმიინდე, მარანი, ბოსელი, საბძელი, ჩამური, საზეთე, წისქვილი). ისინი, წისქვილის გამოკლებით, ადრე საცხოვრებელი სახლის კომპლექსში შედიოდა, XIX საუკუნის 70-იანი წლებიდან კი საცხოვრებლის მოშორებით მდგარ ცალკე შენობებს წარმოადგენდნენ. ამავე დროიდან დაწინაურებულ რაიონებში ერთხელ და სამუდამოდ იქნა უარყოფილი მამაკაპური მიწურბანიანი დარბაზების მშენებლობა, ისინი იცვლებოდნენ ქანობიან-სართულებიანი სახლებით, რომლებიც შეესაბამებოდნენ ბურჟუაზიული ეპოქის საოჯახო და სამეურნეო ურთიერთობას.

მიმოსვლის საშუალებანი. საქართველოს ბუნებრივ-სამეურნეო პირობების შესაბამისად ვითარდებოდა ხალხური სახმელეთო, სამდინარო და საზღვაო ტრანსპორტი. XIX საუკუნეში სახმელეთო ტრანსპორტის უთვისლო, ორთვლიანი ან შერეული ტიპის ტრადიციული საშუალებებიდან გავრცელებული იყო სხვადასხვანაირი მარხილები მთის რაიონებში. „ქართული ურემი“ მთელი ბარისა და მთის ქვედა ზოლში. ურემი ორულლიანიც იყო და ცალულელაც, საბაროც და სამთოც, სამგზავროც და სატვირთოც. XIX საუკუნის დასაწყისიდან გავრცელდა არაქართული წარმოშობის ტრანსპორტიც (რუსულ-ევროპული ორთვლიანი „დროშკა“ („ტაჩკა“) და და ოთხთვლიანი ფურგუნი). ქალაქად ფართოდ იყენებდნენ ეტლებს, საუკუნის ბოლოდან აგრეთვე ცხენის ტრამვაის („კონკა“). ტვირთს, წყალს და ნახშირს შეკურტნენი, მეთულუხჩენი და მენახშირეები ეზიდებოდნენ. ტრანსპორტის ძირითად გამწევე ძალად იყენებდნენ ხარებს, კამეჩებს, ცხენებს, სახედრებს. სამიმოსვლო გზებს ბილიკები, სამარხილე და საურმე გზები წარმოადგენდა. შორ მანძილზე ღვინის და სხვა ტვირთის გადაზიდვას ჩალვადრები აწარმოებდნენ. საუკუნის უკანასკნელ მესამედში გაყვანილმა რკინიგზებმა ბოლო მოუღო ჩალვადრობას და საქარავნო მიმოსვლას. მიუხედავად ამისა, საქართველოს მოსახლეობის ძირითადი სამგზავრო და სატვირთო ტრანსპორტი მაინც ტრადიციული იყო.

ტანსაცმელი. ჩაცმულობით ქართველი ხალხი ახალ დროშიც დიდხანს ტრადიციულად გამოიყურებოდა. რუსულად აღზრდილი ან რუსეთის სამხედრო და სამოქალაქო სამსახურში მყოფი მოსახლეობის ნაწილი ევროპულ კოსტიუმს ატარებდა. მოსახლეობის უდიდესი უმრავლესობა კი, მათ შორის თავადაზნაურობაც, XIX საუკუნის უკანასკნელ მესამედამდე უპირატესად ქართულ ეროვნულ ტანსაცმელს იცვამდა. მშრომელი მოსახლეობის ტანსაცმელი პრივილეგირებულ კლასთა ტანსაცმლისაგან უფრო ქსოვილთა ხარისხით და სამკაულით განირჩეოდა, ვიდრე ფორმით. ქართველ ქალთა ეროვნული კოსტიუმის ძირითადი ელემენტები იყო ქართული კაბა, ლეჩაქი, ჩიხტაკობი, წინდები, ქოშები, ხოლო მამაკაცისა—ჩოხა-ახა-



ყარაჩოხელები.

ლუხი, ნაბადი, ნაბდის ქუდი, ფაფანაკი ან ბოხოხა ქუდი, აზიურები ან ქალამნები. აღმოსავლეთ საქართველოს მაღალი წოდება მდიდრულ კაბას და ქულაჯასაც იცვამდა. ქალის ტანსაცმლის განუყრელი თანმხლები იყო მრავალგვარი სამკაული, მამაკაცის ტანსაცმლის აუცილებელი ატრიბუტი კი ხანჯალი. ქართული ეროვნული კოსტიუმის ეს ძირითადი ელემენტები მრავალნაირი თავისებურებით ხასიათდებოდა ქართლ-კახეთსა და ფშავ-ხევსურეთში. იმერეთსა და გურიაში, აჭარასა და აფხაზეთში. ასე იქმნებოდა ქართული ეროვნული ტანსაცმლის ურიცხვი სახესხვაობა, რომელნიც XIX საუკუნეშიც ინარჩუნებდნენ თავისთავადობას. საუკუნის ბოლოსათვის საყოველთაოდ გავრცელებული ჩანს იმერული ჩოხა და ხევსურული ნაბადი, ქართული კაბა და ბოხოხა ქუდი. იმავე დროს საქართველოს სამრეწველო რაიონებში ჩნდება მუშის თავისებური კოსტიუმი, რომელიც გლეხის ეროვნული ტანსაცმლის ზოგიერთ ელემენტს შეიცავდა. უფრო ადრე იქმნება მოქალაქე ვაჭარ-ხელოსანთა თავისებური კოსტიუმი, რომელიც მაღალი წოდების ზედა ტანსაცმელს ჰგავდა. მნიშვნელოვანი თავისებურებანი განასხვავებდა საერთო-ქართული ეროვნული კოსტიუმებისაგან გურიის. აჭარის, აფხაზეთისა და მთის ქართველთა ტანსაცმელსაც (ჩაქურა, აფხაზური და ოსური ჩერქესკა და სხვ.). XX საუკუნის დამდეგიდან

საქართველოში საყოველთაო გავრცელება იწყო ქალაქურმა კოსტიუმმა, რომელიც ევროპიდან იყო გადმოღებული. უფრო მოგვიანებით კი ძველი ქართული ეროვნული კოსტიუმი მხოლოდ ხალხურ დღესასწაულებსა და მხატვრული თვითმოქმედების კონცერტებზე გამოიყენებოდა.

საჭმელი. გამძლე აღმოჩნდა თვითმყოფადი ქართული კულინარული ხელოვნება, რომელიც აგრეთვე მრავალფეროვანი იყო. განსაკუთრებით მკვეთრად განსხვავდებოდა ბარისა და მთის, აღმოსავლეთ და დასავლეთ საქართველოს მცხოვრებთა საჭმელი. ხორცის, რძის და მცენარეულობისაგან დამზადებული მრავალნაირი მჟავე, ცხარე და ტკბილი საჭმელებიდან ბევრი XIX საუკუნისათვის მთელ ქართველ ხალხში იყო გავრცელებული. მრავალფეროვან საჭმელებთან ერთად სტუმართმოყვარე ქართველი ხალხი განსაკუთრებით ღვინით ამაყობდა. ღვინო საოჯახო სადილზე კვების პროდუქტებს უთანაბრდებოდა, სტუმრის გამასპინძლება-პატივისცემის უმთავრეს ატრიბუტად იყო მიჩნეული და დიდი ნაღიმების აუცილებელ კომპონენტს შეადგენდა. ღვინო თამადას მიჰყავდა და დიდხანს გრძელდებოდა, ზოგჯერ კი, განსაკუთრებით ქალაქებში, მასობრივ ღრეობადაც იქცეოდა ხოლმე. მახინჯ ხასიათს ღებულობდა გლეხის ოჯახებში თავად-აზნაურთა სტუმრობა-ჩასახლება, რასაც თან ახლდა შინაური პირუტყვის განადგურება. ეს ჩვეულება უფრო მეტად დასავლეთ საქართველოში იყო გავრცელებული. ახალ დროში სტუმართმოყვარეობის ტრადიციული ჩვეულებები ანგარების მიზნითაც გამოიყენებოდა. საერთოდ კი, ძველთაგანვე ჩვეულებად ქცეული ქართული მასპინძლობის უანგარობა და ჭამა-სმავში ზომიერების დაცვა XIX საუკუნეშიც მისაბამ ტრადიციად ითვლებოდა.


XIX საუკუნის მეორე ნახევარში საქართველოში ფართოდ გავრცელდა რუსული და ევროპული კერძებიც.

ჯანმრთელობის დაცვა. მრავალფეროვანი, მუდამ ახალი და სრულფასოვანი საჭმლით ზომიერი კვება ხალხის ჯანმრთელობის დაცვის ერთ-ერთი მთავარი საშუალება იყო. ზოგიერთ ქართულ კერძს და სასმელს სამკურნალოდაც კი იყენებდნენ. საერთოდ XIX საუკუნის საქართველოში ხალხის ჯანმრთელობის დაცვის განუვითარებელი, ტრადიციული საშუალებანი ბატონობდა; პროფესიული სამკურნალო დაწესებულებანი თვით XX საუკუნის დამდეგს ორმოცს ძლივს აღწევდა. ასეთ ვითარებაში ფართო გასაქანი ეძლეოდა სახალხო მედიცინას, რომელიც საქართველოში საექლესიო მედიცინის უარყოფით გავლენას განიცდიდა, მაგრამ რიგ დაავადებათა მკურნალობაში პრაქტიკულად სასარგებლო შედეგებს აღწევდა. სააფთიაქო დაწესებულებათა უკიდურესი სიმცირის პირობებში წამლების დამზადება უპირატესად სახალხო მედიცინის ტრადიციული საშუალებებით წარ-

მოებდა. XIX საუკუნის დამდეგს საქართველოში სახალხო ექიმების მიერ დამზადებულ 569 წამალს ხმარობდნენ¹.

სპორტული თამაშობანი. ხალხში კვლავაც დიდად იყო გავრცელებული ეროვნული სპორტული თამაშობანი: ფარიკაობა, ლახტი, ყაბახი, ისინდი, ბურთაობა, ჭიდაობა, კრივი და სხვ. ბურთის თამაშის ქართულ ნაირსახეობაში ერთმანეთს ერწყმოდა სირბილი, ხტომა, ცურვა და სხვ. ბურთის თამაშში სხვადასხვა ზომისა და ფორმის ჭოხებსაც იყენებდნენ. მთელ საქართველოში თამაშობდნენ ჩოგანბურთს ანუ ცხენბურთს, რომელშიც ორ გუნდად გაყოფილი ოცდაოთხი მხედარი მონაწილეობდა. ქალაქელ, განსაკუთრებით თბილისელ ხელოსანთა შორის გავრცელებული იყო კრივი, რომელშიც ხშირად მთელი ქალაქის ორ ბანაკად გაყოფილი ახალგაზრდობა მონაწილეობდა. ზოგჯერ ეს თამაშობა მსხვერპლითაც თავდებოდა. 1851 წელს გამართული ერთ-ერთი ამგვარი თამაშის დროს 300 კაცი დაჭრილა და 5 მომკვდარა². ამის შემდეგ სალდასტის კრივი ჯერ ქალაქგარეთ ეწყობოდა, მერე სულ აიკრძალა. მუშტის კრივმაც მხოლოდ 70-იან წლებამდე გაძლო. ხალხში ყველაზე მეტი პოპულარობითა და სიყვარულით სარგებლობდა ქართული ჭიდაობა, ურომლისოდაც არც ერთი სახალხო შეკრება და დღესასწაული არ ჩატარდებოდა.

საოჯახო ურთიერთობა. XIX საუკუნეში დიდი ცვლილება განიცადა ქართულმა ოჯახმა. სოფლად, განსაკუთრებით მთაში, ჯერ კიდევ იყო შემორჩენილი დიდი ქართული ოჯახები, რომლებიც რამდენიმე ძმის შთამომავლობას აერთიანებდნენ. მაგრამ ძველი საოჯახო თემი გადმონაშთს წარმოადგენდა, საუკუნის ბოლოს ქართული საზოგადოება შედგებოდა მცირე ოჯახებისაგან, რომლებშიც უპირატესად ცოლ-ქმარი და შვილები იყვნენ გაერთიანებული. სოფელ ადგილებში დაქორწინება უფრო ხში-



კინტო.

¹ Народы Кавказа, II, გვ. 296—337. იხ. აგრეთვე, მ. სააკაშვილი, ა. გელოაშვილი, ლ. ქვიციანი, ც. ჩხეიძე, საქართველოს მედიცინის ისტორია, IV, 1960.

² ი. გრიშაშვილი, ძველი თბილისის ლიტერატურული ბოქემა (თხზ. კრებული, ტ. III, 1963, გვ. 151—155).



მოქალაქე.

რად 19—25 წლის ასაკში ხდებოდა, თუმცა ქორწინდებოდნენ 17 — 18 წლის და ზოგჯერ უფრო ნაკლები ასაკის ახალგაზრდებიც. ჯერ არღაბადებულ ბავშვთა დაწინდვის არქაული ტრადიცია გადავარდა. ქალის მოტაცების ჩვეულებაც იშვიათი გახდა. ინტელიგენტურ წრეებში ნიშნობა-ქორწინების ძველ რიტუალსაც ზშირად აღარ იცავდნენ, მაგრამ მოსახლეობის უმრავლესობა კვლავ მისდევდა მაშელობა-გარიგების და ქალის მიერ მზითვის მიტანის ტრადიციულ წესებს. ადრინდელი ქართული მონოგამიური ოჯახის საფუძველი უფლებრივად თანასწორი და თანაბრად მშრომელი ორი ადამიანის ცოლქმრული კავშირი იყო. სიყვარული და ურთიერთპატივისცემა ცოლ-ქმარს შორის უფრო ქორწინების შემდეგ, ერთად ცხოვრებისა და

შრომის პროცესში ჩნდებოდა; ქორწინებამდე ისინი ხეირიანად თითქმის არ იცნობდნენ ერთმანეთს. შეილებიც საერთო საოჯახო შრომაში მშობლების გვერდით მონაწილეობდნენ, ამასთან, მათ სწამდათ უფროსების ზნეობრივი და გონებრივი უპირატესობა, იმის მიუხედავად, რომ მშობლების განათლება დიდი არ იყო და შედარებით მარტივი საყოფაცხოვრებო გამოცდილებით და მორალური ზნე-ჩვეულებებით განისაზღვრებოდა.

ფეოდალურ ურთიერთობათა რღვევისა და კაპიტალიზმის განვითარების პირობებში ოჯახის სამეურნეო ხასიათი შეიცვალა. მამაკაცს ზშირად გარე სამუშაოებზე უხდებოდა გასვლა. ქალს დიასახლისობადა რჩებოდა წილად, მწარმოებლიდან მომხმარებლად იქცეოდა. შეილებიც ხანგრძლივად წყდებოდნენ ოჯახს, საშოვარზე ან სკოლაში დადიოდნენ. მზითვეი, რომელიც ადრე ოჯახში ქალის მღვდომარეობის განმტკიცების დამატებით საშუალებად ითვლებოდა, ახლა ღარიბი საქმროს ოჯახის ეკონომიური კეთილდღეობის უპირველეს წყაროდ იქცეოდა. ფორმალურად თავისუფალ სიყვარულსა და თანასწორობაზე დამყარებული ცოლქმრული ურთიერთობა ფაქტიურ უთანასწორობამდე და სიძულვილამდე მიდიოდა. გათხოვება-ცოლის შერთვა გაძნელდა. მამაკაცი ქალის სულიერსა და გარეგნულ სილამაზეს აღარ აფასებდა და მხოლოდ მზითვეს მოითხოვდა. ეს შოვლენა ისე გავრცელებულა 70—90-იან წლებში, რომ ზოგ მამაკაცს

პრესის საშუალებითაც დაუწყია მზითვიანი საპატარძლოს ძებნა, თუმცა ამის საწინააღმდეგო პროპაგანდაც საჯაროდ გაჩაღებულა: „ცოლის შერთვის დროს უფრო ხასიათსა და ზნეს მიჰხედეთ, ვიდრე მზითვეს“¹. იმავე დროს საზოგადოების მაღალი, მატერიალურად უზრუნველყოფილი ფენების ცალკეულ წარმომადგენელთა ოჯახებს ცოლქმრული ღალატი ექცეოდათ ჩვეულებად. ცივილიზებული ვაჭრის თუ ჩინოვნიკისათვის ქალს „კაცისათვის გაჩენილ ტკბილეულობაზე“ მეტი ფასი არ ჰქონდა. მათი მორალის მიხედვით, წმიდა ქორწინება სიყვარულის ყვავილს უცხად აქნობდა, ცოლქმრობა და ნამდვილი სიყვარული დაშორებული იყო. ქალისათვის ქმარი ზნეობის ფარი და მატერიალური უზრუნველყოფის საშუალება უნდა ყოფილიყო, პირადი ცხოვრება კი ისე უნდა მოეწყო, როგორც ესიამოვნებოდა². ამგვარი მორალი უცხო იყო მშრომელი მოსახლეობის საოჯახო ტრადიციებისათვის, თუმცა ძველ, პრიმიტიულ ცოლქმრულ თანასწორობაზე დამყარებულ ოჯახს ყველგან ერღვეოდა საფუძველი: საზოგადოებრივი ცხოვრების განახლების შესაბამისად საოჯახო ურთიერთობაც ახლდებოდა.

§ 3. ხალხის სულიერი ყოფა

ხალხური გართობა-სანახაობანი. თავისი ხანგრძლივი ისტორიის მანძილზე ქართველ ხალხს შეუქმნია გართობა-სანახაობათა მრავალი თავისებური სახე, რომელთაგან ბევრი XIX საუკუნეშიც არსებობდა. რელიგიური თუ წარმართული დღესასწაულები, რომლებსაც თან ახლდა ეს გართობა-სანახაობანი, კარგავდა თავის პირვანდელ სახეს და ახალი შინაარსით ივსებოდა. ქალაქის მოსახლეობაში 90-იან წლებამდე დიდი პოპულარობით სარგებლობდა ყეენობა და ქუჩის სხვა წარმოდგენები. დაწესებულ დროს, შავ ორშაბათს, თბილისის თვითეულ უბანს საკუთარი ყეენი გამოჰყავდა, კარიკატურულად რთავდნენ სახეღარზე შესმულ ყეენს და მის ამაღას, რომელიც გამვლელ-გამომვლელ ხალხს ხარკს ართმევდა. ზეიმი მთავრდებოდა დამარცხებული ყეენის მტკვარში გადაგდებით და მასობრივი ღზინით ორთაჭალისა და ვერის ბალებში. ზეიმში მაღალი წოდებაც მონაწილეობდა. ერთ-ერთი ყეენობა თვით გრიგოლ ორბელიანის სახსრებითა და გეგმითაც მოუწყევიათ 60-იან წლებში. მოგვიანებით ყეენობამ მიმდინარე პოლიტიკური ცხოვრების ამსახველი შარჟის ფორმა მიიღო: ყეენს კაპიტნის ან პოლკოვნიკის მუნდირში გამოაწყობდნენ ხოლმე³.

¹ ნ. ნიკოლაძე, ნაწერი, I, 1890, გვ. 25.

² გ. წერეთელი, რჩ. ნაწერები, I, გვ. 384.

³ ი. გრიშაშვილი, ძველი თბილისის ლიტ. ბოქემა, გვ. 147.

მეფის ხელისუფალნი ამჩნევდნენ ყეენობის პატრიოტულ მიზანდასახულობას, მის ანტითვითმპყრობელურ ხასიათს და რამდენიმეჯერ ოფიციალურად აკრძალეს იგი, მაგრამ ხალხი თავისას არ იშლიდა და ამ სანახაობას მართავდა თბილისშიც და საქართველოს სხვა ქალაქებშიც. 1905 წლის 28 თებერვალს თელავში მოუწყვიათ ყეენობა. ადგილობრივ ბოქაულს ჯერ პირადად, მერე „სტრაენიკთა“ ძალებით მისი ჩაშლა განუზრახავს, მაგრამ სანახაობის მონაწილე ხალხს რევოლუციური დემონსტრაცია გაუმართავს და სამაზრო მმართველობა იძულებული გამხდარა ყეენობის გამართვის ნება მიეცა ხალხისათვის¹.

მაღალი საზოგადოება კერძო სახლებში მართავდა წარმოდგენებს, მდაბიო ხალხი — ქალაქის მოედნებზე და მინდორში. თბილისელ ხელოსნებს — ყარაჩოხელებს — წესად ჰქონდათ მოძრავი თეატრის მოწყობა, ქეიფი და ღამის თევა აბანოებსა და ორთაქალის ბალებში. თბილისური აბანოები სოფლებიდან ჩამოსული გლეხებისათვის სასტუმროს როლსაც ასრულებდა. საყდარი და აბანო იყო ქალთა შეკრების და გართობის ადგილიც. სხვა ქალაქებსა და სოფლებშიც არსებობდა თეატრალური წრეები, რომლებიც სახალხო წარმოდგენებს მართავდნენ, ზოგჯერ კი სპექტაკლებსაც დგამდნენ. 30-იან წლებში თბილისში დაუდგამთ ა. გრიბოედოვის „ვაი ჭკუისაგან“, 40-იან წლებში მეჩვერისხევეში უ. შექსპირის „ოტელო“ და გორისაში ოქროპირ წერეთლის „ქორწილი იმერეთის თავადისა“. 800-იან წლებში პ. კოვალენსკის თბილისში დაუარსებია სალონური თეატრი. იმავე დროს კეთილშობილთა სასწავლებელში „საჯარო აქტებს“ მართავდნენ. მოგვიანებით უფრო ვრცელდება ევროპული გართობა-სანახაობანი, ბალ-მასკარადები, საცეკვაო საღამოები. იქმნება ა. ჭავჭავაძის, მ. ორბელიანის და სხვათა სალონები². ამგვარი სალონები მთელი XIX საუკუნის მანძილზე არსებობდა. ქართული კულტურის გამოჩენილი წარმომადგენლების სახლებში სისტემატურად იმართებოდა ლიტერატურული საღამოები³, რომლებსაც ბევრი ინტელიგენტი ესწრებოდა. 90-იან წლებში იქმნება სახალხო თეატრები. გართობა-სანახაობათა ახალი ფორმების გავრცელების მიუხედავად, მოსახლეობის ფართო მასა უფრო მეტად მაინც ტრადიციულ სახალხო დღესასწაულებს ეტანებოდა. აუარებელ ხალხს იზიდავდა ბოლნისობა და მცხეთობა, თელეთობა და ელიაობა, კეცობა და ლაშარობა, ალავერდობა და გიორგობა და მრავალი სხვა რელიგიური დღესასწაული.

¹ ა. ბ უ რ თ ი კ ა შ ვ ი ლ ი, წერილები თეატრზე, 1964, გვ. 88—89.

² შ. ჩ ხ ე ტ ი ა, საქართველოში ბურჟუაზიული კულტურის გენეზისის საკითხისათვის (თბილისის პედინსტიტუტის შრომები, III, 1943, გვ.147).

³ ა. მ ა ხ ა რ ა ძ ე, ლიტერატურული შეკრება-საღამოები საქართველოში.

ხალხური სიმღერა და ცეკვა. გართობა-სანახაობებს და ლხინს საქართველოში მუდამ თან ახლდა სიმღერა და ცეკვა, რომლებშიც ასახული იყო ქართველი ხალხის შრომა და ბრძოლა, სულისკვეთება და ყოფა-ცხოვრება. გავრცელებულია თქმა, ქართველი კაცი სიმღერით იზადებოდა და სიმღერითვე აბარებდნენ სამარესო. ქართული ხალხური სიმღერა და ცეკვა ისევე მრავალფეროვანია, როგორც საქართველოს ბუნება და ქართველი ხალხის ყოფა-ცხოვრება. მრავალზმანი, უმთავრესად სამზმიანი ქართული სიმღერა და სინარნარითა და სიმკვირცხლით სავსე ქართული ცეკვა მოხდენილად ასახავს ხალხის ფიქრებსა და განცდებს. XIX საუკუნეში მიმდინარეობდა მრავალსაუკუნოვანი ქართული ხალხური სიმღერისა და ცეკვის შემდგომი სრულყოფა და განახლება. ძველთან ერთად სრულდებოდა და იქმნებოდა ახალი სიმღერები და ცეკვები, რომლებსაც ეროვნულ-განმათავისუფლებელი და სოციალური ბრძოლის სულისკვეთება ასაზრდოებდა („სულიკო“, „ციცინათელა“, „ჯან სულო“, „ძაბრაღე“, „სიმღერა ზვიანა ლობჯანიძესა და გულითად გავაშელაშვილზე“, „ჩაუფხტეთ ბარათაშვილსა“ და სხვ.). ქართული ხალხური სიმღერები აღმოსავლური და დასავლეთევროპული მუსიკალური ინსტრუმენტების თანხლებითაც სრულდებოდა (ზურნა, დუდუკი, გიტარა, ფორტეპიანო და სხვ.), მაგრამ უფრო მეტად გავრცელებული იყო ძველი ქართული მუსიკალური ინსტრუმენტები: სალამური, ჩონგურა, ფანდური, ჭიანური, ჭუნირი, გუდასტირი. დიბლიპიტო, დოლი, ჩანგი და სხვ.¹

ხალხური ზეპირსიტყვიერება. XIX საუკუნეშიც ხალხის სულიერი ყოფის განუყრელი ნაწილი იყო ხალხური პოეზია, რომელსაც ქმნიდნენ და თაობიდან თაობას ზეპირად გადასცემდნენ სახალხო მთქმელები და ზეპირად ძელექსენი, მესტიერენი და აშულები. XIX საუკუნეში ქართული პოეტური ფოლკლორი კიდევ უფრო გამდიდრდა. ტრადიციულ საგმირო, სატრფიალო, საყოფაცხოვრებო ნაწარმოებებს მიემატა ეროვნული და სოციალური თავისუფლებისათვის ბრძოლის ამსახველი ხალხური ლექსები, ბალადები, ზღაპრები. საუკუნის პირველ ათეულ წლებს მიეკუთვნება ლექსები „ამილახვარი ჩაძაღლდა“, „ბეჟან მიქელაძე და მისი ყმა“, „ხევსური თორღვა“, რომლებშიც დახატულია მემამულეებზე ყმა გლეხთა შურისძიების ფაქტები. 30-იან წლებში შეიქმნა ლექსების ციკლი და ვრცელი მესტიერული პოემა „არსენას ლექსი“, რომელთა მიხედვით ცარიზმისა და თავადაზნაურობის წინააღმდეგ მებრძოლი ყმა გლეხი არსენა ოძელაშვილი „მდიდარს ართმევდა და ღარიბს აძლევდა“, ჩაგრულებს მჩაგვრელებისაგან იფარავდა. 40—50-იან წლებში იქმნება ხალხური ლექ-

¹ დ. ა რ ა ყ ი შ ვ ი ლ ი, ქართული მუსიკა, 1925, გვ. 14, 32—33.

სები აჯანყებულ გურულ და მეგრელ გლეხთა ბრძოლაზე ბატონყმობის წინააღმდეგ („ბუნტი გურიაში“, „უტუ მიქავა“). 60-იან წლებში სახალხო მოლექსენი გამოხატავდნენ გლეხობის სიხარულს და იმედის გაცრუებას რეფორმის გამო („ბატონყმობის ლექსი“, „საგლეხო რეფორმაზე“). გლეხობის მძიმე ყოფა, მისი ფეოდალური და კაპიტალისტური ჩაგვრათა ასახული 70—90-იანი წლების ქართულ ფოლკლორში¹.

მრავალი ფოლკლორული თემა და სახე თავიანთ ნაწარმოებებში გამოიყენეს XIX და XX საუკუნეების ქართველმა მწერლებმა. თავის მხრივ ხალხური შემოქმედებაც ლიტერატურის დიდ გავლენას განიცდიდა, იქმნებოდა ლიტერატურულ ნაწარმოებთა ხალხური ვერსიები, რომელნიც არა მარტო ზეპირი, არამედ ბეჭდვის გზითაც ვრცელდებოდა XIX საუკუნის შორე ხახევრის საქართველოში. ლიტერატურულ და ხალხურ ნაწარმოებებს დიდი ტირაჟებით ბეჭდავდნენ და ღარიბი ხალხისათვის მისაწვდომ ფასად ავრცელებდნენ პეტრე უმიკაშვილი, ზაქარია ჭიჭინაძე და სხვ.² მათთან ერთად ქართული ფოლკლორის ნიმუშებს აგროვებდნენ და აქვეყნებდნენ ილია ჭავჭავაძე. აკაკი წერეთელი, გიორგი წერეთელი, ა. კელენჯერიძე და სხვ. XIX საუკუნის ქალაქურმა ფოლკლორმა შემოგვინახა ხელოსან აშულთა და პოეტთა არაერთი სახელი (იოსებ დავითაშვილი, ანტონ განჯისკარელი, იეთიმ გურჯი, ბეჩარა, ჰაზირა და სხვ.).

კიდევ უფრო მდიდარი და მრავალმხრივი იყო ხალხური პოეტური შემოქმედების ტრადიციები ქართულ სოფელში. მრავალი ქართლ-კახური, გურულ-აჭარული, იმერული, აფხაზური, ოსური თქმულება თუ ლეგენდა XIX საუკუნის დიდ ქართველ მწერალთა შემოქმედებითი შთაგონების ხალხურ წყაროებად იქცა. ხალხის კულტურის ამადლებამ, საქართველოს სხვადასხვა კუთხის ეკონომიური და კულტურული ურთიერთობის გაძლიერებამ ფართო გზა გაუხსნა ბარისა და მთის ადგილობრივ დიალექტებს აქტიური მონაწილეობა მიეღოთ ქართლური დიალექტის საფუძველზე შექმნილი საერთო-სახალხო ეროვნული ქართული ენის გამდიდრებასა და განვითარებაში. ხალხის ახალმა ყოფამ და კულტურამ გამოიწვია ქართული ენის შევსება ახალი სიტყვებითა და გამოთქმებით, მოძველებული სიტყვებისა და ასოების გადაგდება. ამ გარემოებას დიდი მნიშვნელობა ჰქონდა ახალი ქართული ენის დამკვიდრებისათვის ლიტერატურასა და ხალხის ცხოვრებაში.

¹ ქს. სიხარულიძე, ნარკვევები, 1958, გვ. 161—169, 175—180.

² ი. გ რ ი შ ა შ ვ ი ლ ი, ძველი თბილისის ლიტერატურული ბოჰემა.

ახალი ქართული ლიტერატურა. ქართული კულტურის უმთავრეს შემადგენელ ნაწილს XIX საუკუნეში მხატვრული ლიტერატურა წარმოადგენდა. ყველაზე მძლავრი აღმავლობა ლიტერატურამ განიცადა.

XIX საუკუნის ქართული მხატვრული ლიტერატურა, რომელსაც ჩვეულებრივ ახალ ქართულ ლიტერატურას უწოდებენ, წინა საუკუნეთა, უშუალოდ კი XVIII საუკუნის, ქართული მწერლობის ბუნებრივ გაგრძელებას და განვითარებას წარმოადგენს. ძველიდანვე პატრიოტიზმის, ჰუმანიზმისა და სოციალური სამართლიანობის იდეებით გამთბარი ქართული ლიტერატურა ახალ დროში კიდევ უფრო განიმსჭვალა მშობლიური ხალხისა და საკაცობრიო იდეალებისადმი სამსახურის სულისკვეთებით.

ახალი ქართული ლიტერატურის ერთ-ერთ ფუძემდებლად დიდი ქართველი პოეტი დავით გურამიშვილი (1705—1792 წწ.) უნდა ჩაითვალოს. მის შემოქმედებაში მძლავრად იჩინა თავი ანტიკლერიკალურმა შეხედულებებმა, განათლების ყოვლისშემძლეობის, სწავლისა და შრომის საჭიროების ქადაგებამ, სინამდვილისადმი რეალისტურმა დამოკიდებულებამ, ხალხურობამ, ახალმა სალიტერატურო ენამ და იდეებმა, ქანობრივ-თემატიკურმა მრავალფეროვნებამ. ამიტომ იგი ახლის მიმდევრად და დამცველად უფრო წარმოგვიდგება, ვიდრე ძველის მომხრედ. მისი ლიტერატურული მრწამსიც და შემოქმედებითი პრაქტიკაც დაფუძნებულია ქართული განმანათლებლური რეალიზმის პრინციპებზე. „დავითიანი“ ხალხის ცხოვრებისა და ზნეობის თავისებური სასწავლო ენციკლოპედიაა, რომლიდანაც ქართველობა სწავლობდა საქართველოს საშინაო და საგარეო მტრების სიძულვილს, კაცთმოყვარეობას და სამშობლოსადმი თავდადებას, შრომისა და განათლების უძლეველობას. მასში დაგმობილია უვიცობა და გონების სიბნელე, მონობა და ტირანია, ცხოვრების უკულმართობა და ხალხის ჩაგვრა¹.

განმანათლებლური რეალიზმის პრინციპებს ემყარებოდა XVIII საუკუნის ბოლო და XIX საუკუნის პირველი ათეული წლების, ე. წ. გარდამავალი ხანის ქართული ლიტერატურა, რომლის თვალსაჩინო წარმომადგენლები იყვნენ რუსულ და ევროპულ განმანათლებლურ იდეებს გაცნობილი ქართველი მოღვაწენი.

გარდამავალი ხანის ქართული განმანათლებლური რეალიზმის უდიდესი წარმომადგენელი იყო იოანე ბაგრატიონი (1772—1830 წწ.), მგზნებარე ქართველი პატრიოტი და მწერალ-განმანათლებელი. მისი რამდენიმე

¹ დ ა ვ ი თ გ უ რ ა მ ი შ ვ ი ლ ი, დავითიანი, 1955, გვ. 13, 17; ქართული ლიტერატურის ისტორია, ა. ბარამიძის, გ. იმედაშვილის, გ. მიქაძის რედ., 1966, II, გვ. 570—571.

ათეული ორიგინალური და ნათარგმნი ნაშრომიდან განსაკუთრებით მნიშვნელოვანია ერცელი ენციკლოპედიური ნაწარმოები „კალმასობა“, რომელიც ახალი ქართული ლიტერატურისა და საზოგადოებრივი აზროვნების ფრიად საყურადღებო ძეგლია. „კალმასობა“ 1813—1829 წლებში დაიწერა. დიალოგის ფორმის ამ ვეებერთელა წიგნში თავმოყრილია თავისი დროის ყველა დარგის მეცნიერული ცოდნა და რეალისტურადაა დახასიათებული საქართველოს ეროვნულ-პოლიტიკური, სოციალ-ეკონომიური და კულტურული მდგომარეობა XVIII საუკუნის ბოლოსა და XIX საუკუნის დამდეგს. „კალმასობას“ მკვეთრ ხაზებად გასდევს მხურვალე პატრიოტიზმი და სოციალური პროტესტანტიზმი, განმანათლებლური ჰუმანიზმი და უტოპიზმი.

XIX საუკუნის პირველ მესამედში ახალ ქართულ ლიტერატურას იოანე ბაგრატიონზე ღიდი განმანათლებელ-რეალისტი არ ჰყოლია. ამავე დროიდან ქართულ ლიტერატურაში რომანტიზმი ბატონდება. ქართული რომანტიზმიც განმანათლებლური რეალიზმის მძლავრ ნაკადს შეიცავდა. მისთვის უცხოა რეალური ცხოვრების ხელალებით უარყოფა, მისი მთავარი თემა ქართველი ხალხის ეროვნულ-პოლიტიკური და სოციალური მდგომარეობაა. მართალია, სოფლის სამღურავი და სინამდვილის პესიმისტური აღქმა, რომელიც ადრე ქართული ლიტერატურის მხოლოდ ერთ-ერთ მომენტს წარმოადგენდა, ქართველ რომანტიკოსთა შემოქმედებაში თითქოს ერთადერთ და უმთავრეს მომენტად იქცა, მაინც „ქართული რომანტიზმის ბოლოთქმა იყო ცხოვრების, სიცოცხლის სიყვარული და უკეთესი მომავლისათვის ზრუნვა. მისი მოწინავე წარმომადგენლები, მიუღებელი სინამდვილის წინააღმდეგ რომ ილაშქრებდნენ, თავიანთ შემოქმედებას ამჟღავნებდნენ სოციალური, მოქალაქეობრივი მოტივებით, უკეთესი მომავლისათვის ბრძოლის იდეებით“¹.

ქართული რომანტიზმის პირველი დიდი წარმომადგენელია ალექსანდრე ჭავჭავაძე (1786—1846 წწ.), საქართველოს პეტერბურგელი დესპანის შვილი და რუსეთის იმპერატორის ნათლული, ცარიზმის კოლონიური პოლიტიკის წინააღმდეგ ამხედრებული მგზნებარე ქართველი პატრიოტი და რუსეთის არმიის მამაცი გენერალი, კახელ გლეხთა აჯანყების ჩაქრობის მონაწილე და ბარკლაი დე-ტოლის ადიუტანტი ნაპოლეონის განადგურების დროს, უპირველესი ქართველი მემამულე და უნაზესი პოეტი-რომანტიკოსი. ლექსების წერა მას 15 წლისას დაუწყო. თავდაპირველად მისი შემოქმედება, განსაკუთრებით თარგმნილი, განმანათლებლური რეალიზმის პრინციპებს ემყარება. შემდეგაც, როცა იგი რომანტიზმის თვალსაზრისს ამკვიდრებს ქართულ პოეზიაში, რეალური ცხოვრების

¹ ახალი ქართული ლიტერატურის ისტორია, 1956, გვ. 66.

სიყვარული, მოქალაქეობრივი გულისტკივილი. ეროვნული და სოციალური უსამართლობის წინააღმდეგ მიმართული პროტესტი ასულდგმულებს მის მრავალ ნაწარმოებს („ახლოთ განჩხრეკილი კაცი“, „ვაჰ, სოფელსა ამას“).

ამქვეყნიური ტკობით გამოწვეულ სიხარულს ალექსანდრე ჭავჭავაძის ლირიკაში თან ახლავს დიდი წუხილი და სევდა რეალური ცხოვრების წარმავლობისა და მოუწყობლობის, მშრომელი ხალხისა და კაცობრიობის ბედუქულმართობის გამო. მსუბუქ, სანადიმო და სატრფიალო ლექსებთან ერთად („მუხამბაზი-ლათაიური“, „სიყვარულო ძალსა შენსა“), რომლებიც ახალი ქართული ლირიკის შედევრთა რიცხვს მიეკუთვნება, ალექსანდრე ჭავჭავაძემ შექმნა მსოფლიო სევდის გამომხატველი ნაწარმოებები, რომლებშიც მაღალმატერულადაა გადმოცემული პოეტის უკმაყოფილება ამქვეყნიური ცხოვრებით, საზოგადოებრივი ცხოვრების წარმავლობით და არარაობით („გოგა“). მისი სევდა უწინარეს ყოვლისა ქართველი ხალხის ეროვნული ჩაგვრითაა ნაკარნახევი. მისი რომანტიკული ლირიკის უმთავრესი შინაარსიც პატრიოტულია.

ქართული რომანტიზმის მეორე დიდი წარმომადგენლის გრიგოლ ორბელიანის (1804—1883 წწ.) შემოქმედების ძირითადი მოტივიც ეროვნული თავისუფლებაა. მისი ხანგრძლივი ცხოვრების გზა კიდევ უფრო წინააღმდეგობრივი იყო, ვიდრე ალექსანდრე ჭავჭავაძისა. დიდგვაროვანი ქართველი მემამულის შვილმა, რომელიც დედის მხრივ ერეკლე მეორის შთამომავალიც იყო, მთელი ცხოვრება რუსეთის მეფის სამსახურში გაატარა და თანამდებობრივად მასზე დიდი წარმატება მანამდე არც ერთ ქართველს არ რგებია. თავდაპირველად რუსეთის თვითმპყრობელობის წინააღმდეგ მებრძოლი გრიგოლ ორბელიანი შემდეგ აჯანყებული გურული გლეხების დამშვიდებაში და დაღესტნის დამორჩილებაში მონაწილეობს, ბოლოს კი, რამდენიმე ხნის განმავლობაში კავკასიის მეფისნაცვლის მოვალეობასაც ასრულებს. საქართველოს ეროვნულ-განმათავისუფლებელი მოძრაობის ერთ-ერთი აღრინდელი იდეოლოგი 60—70-იან წლებში ახალგაზრდა ეროვნულ დემოკრატებს ებრძვის იდეურად, პრაქტიკულად კი მათთან თანამშრომლობს.

გრიგოლ ორბელიანი, უწინარეს ყოვლისა, პატრიოტი პოეტია. მისი იდეალი, დაწინაურებულ ერთა თანასწორი, ჩაგვრისა და „ბნელი უმეცრებისაგან“ განთავისუფლებული, „სწავლის შუქით განათებული“ აღორძინებული და ძლიერი საქართველოა („თამარ მეფის სახე ბეთანიის ეკლესიაში“). იგი არასდროს არ შელევია რომანტიკულ ოცნებას განთავისუფლებულ სამშობლოზე. პოეტს „სული მარადის თავიუფლებისათვის“ უკენისის, იცის, რომ წინათ „თავისუფლება უმსხვერპლოდ, უსისხლოდ“ არავის მოუპოვებია და ახლაც „უამი არს მტერა მამულის, მისცე მახვილ-

სა ლესილსა“ („აღსარება“). პოეტი შენატრის, „მათ, ვინც თავისი სი-
ცოცხლე თვისსა მამულსა შექსწირა მსხვერპლად“ და თვითონაც მამული-
სათვის თავდადებულ გმირთა ძიების პირველ მოციქულად გამოდის ახალ
ქართულ პოეზიაში. ნიკოლოზ პირველის სუსხიანი რეჟიმის წინააღმდეგ
პირველად ქართველ პოეტთაგან ყველაზე გაბედულად გრიგოლ ორბე-
ლიანმა გაილაშქრა. მაგრამ, როცა ამ ლაშქრობიდან არაფერი გამოვიდა,
დამარცხებული და დამწუხრებული პოეტი იმავე ნიკოლოზ პირველს
ევედრებოდა: „თამარის დენი, დიდების დენი, შენ მოუვლინე შენსა
ივერსა... ჩვენდა დიდებად ბედნიერებად“... („სადღეგრძელო“). მან ვერ
დაინახა ეროვნული განთავისუფლების გზები და ძალები, ვერ განჭვრიტა
ქართველი ხალხის დიდი მომავალი და ცხოვრების დასასრულს ერთხელ
კიდევ მგრძნობიარედ დაიტირა ვითომ „დამხობილი“ სამშობლო („დავ-
ბერდი“).

გრიგოლ ორბელიანის შემოქმედებაში ადრევე იგრძნობოდა ჰუმანის-
ტურ-განმანათლებლური სულისკვეთებით გამთბარი რეალისტური
დინება („მუხამბაზი“, „დიმიტრი ონიკაშვილის დარდები“). ბუნების
სიმშვენიერას და ადამიანური გრძნობების სიფაქიზის რომანტიკული
განცდა მის ლექსებში ცოცხალი სინამდვილის მართალ დახასიათებას
ენასკვება. ადამიანის ღირსების საზომად მას მეგობრობა, სიყვარული და
ნიჭიერება მიაჩნია.

გრიგოლ ორბელიანს ჩაგრულთა და მჩაგვრელთა ცხოვრების მკვეთრი
დაპირისპირებაც არ დარჩენია შეუნიშნავი და მშრომელი ადამიანისადმი
მიძღვნილ ვრცელ ლექსში სოციალური უსამართლობის დაგმობის ამოძ-
ხილი ჩააქსოვა („მუშა ბოქულაძე“). მისი მემკვიდრე სამოციანელები
დევნიად ხმარობდნენ სოციალური უთანასწორობის უარყოფელ და
ჰუმანისტური იდეალის შემცველ პოეტურ აფორიზმს: „მიეცით ნიჭსა გზა
ფართო, თავყანის-ცემა ღირსებას; ნიჭს აძლევს ზენა მხოლოდ კაცს და
არა გვარიშვილობას!“¹.

ქართული რომანტიზმის გვირგვინია ნიკოლოზ ბარათაშვილის
(1817—1845 წწ.) პოეზია, რომლითაც დასრულდა ახალი ქართული ლიტე-
რატურის ჩამოყალიბების ადრინდანვე დაწყებული პროცესი: თუ დავით
გურამიშვილი, ილია ჭავჭავაძის თქმით, „ევროპიზმის დამნერგავია“ ქარ-
თულ ლიტერატურაში, ნიკოლოზ ბარათაშვილი „ევროპიზმის ბრწყინვალე
წარმომადგენელია“².

ბარათაშვილმა ღრმანზროვანი პასუხი გასცა მისი ღრრის საქართვე-
ლოს საზოგადოებრივი ცხოვრების საჭირბოროტო საკითხებს, დიდი

¹ გ რ ო რ ბ ე ლ ი ა ნ ი, თხზ. სრ. კრებული, ა. გაწერელის რედ.; იხ. აგრეთვე,
ქართული ლიტერატურის ისტორია, 1956, გვ. 131—135.

² ი. ჭ ა ვ ჭ ა ვ ა ძ ე, თხზ. კრებული, ტ. III.

გრძობით უმდგრა მაღალ საკაცობრიო იდეალებს და უნუგეშო აწმყოთი უკმაყოფილო პოეტმა ადამიანის დანიშნულება უკეთესი მერმისისათვის ბრძოლაში დაინახა: ამქვეყნიური ცხოვრება ამოებაც რომ იყოს, ადამიანის არსებობა უაზრობა მაინც არ არის, ცოცხალმა ადამიანმა „სოფლისთვის ზრუნვა“, მისი გარდაქმნისათვის აქტიური ბრძოლა უნდა გაიხადოსო მთავარ საქმედ („ფიქრნი მტკვრის პირას“), რათა მომავალ მოძმეს „სიძნელე გზისა გაუადვილდეს“. ბედთან ტიტანური ბრძოლის, ბოროტების უარყოფის, მარტოობისა და სულიერი ობლობის დაგმობასთან ერთად ბარათაშვილის პოეზია გამოხატავს უსაზღვრო მწუხარებასაც, მაგრამ მისი ცრემლიც ვაჟკაცურია, ეს არის არა უმწეო გლოვა და ვედრება, არამედ არსებულის წინააღმდეგ მიმართული პროტესტი და უკეთესი მომავლისათვის ბრძოლისაკენ მოწოდება. მას ღრმად სწამს, რომ ბოლოს და ბოლოს „გათენდება დილა მზიანი და ყოველს ბინდსა ის განანათლებს“ და ამიტომ სურს იყოს „ვარსკვლავი განთიადისა მორბედი“ („არ უკიეინო სატრფოო“). იგი სინამდვილეს მაინც მომავლის თვალთ უყურებს, რაოდენ ბუნდოვნად და აბსტრაქტულად არ უნდა ჰქონდეს წარმოდგენილი მშობლიური ქვეყნის მომავალი.

ნიკოლოზ ბარათაშვილის პოეზია რომანტიკულია როგორც შინაარსით, ისე სტილით, მაგრამ მის შემოქმედებაში ხშირად იჩენს თავს სინამდვილისადმი რეალისტური მიდგომის ტენდენციაც. „ბედი ქართლისაში“ გარკვეულად მეღავენდება მისწრაფება სინამდვილის რეალისტური ასახვისაკენ. პოეტმა დაიტირა საქართველოს დამოუკიდებლობის დაკარგვა, მაგრამ არ გაიზიარა ქართული პოლიტიკური რომანტიზმის სიცოცხლისუნარმოკლებული ოცნება და გაამართლა მეფე ერეკლეს მოქმედება, რომელიც რუსეთთან საქართველოს დაახლოების რეალური აუცილებლობით იყო ნაკარნახევი. იგი შეჰხაროდა რუსეთის გზით „მამულში განათლების“ შემოსვლას და იმ გარემოებას, რომ „სადაც აქამდინ ხმლით და ძალით ჰფლობდა ქართველი, მუნ სამშვიდობო მოქალაქის მართავს აწ ხელი“ („საფლავი მეფის ირაკლისა“). ამასთან იგი გმობდა ქართველი ხალხის ეროვნულ ჩაგვრას („სუმბული და მწირი“). თავისუფალი ერის, თავისუფალი ადამიანის ძლევაშისილი შემართების, უკეთესი მომავლისათვის ბრძოლის ყიყინა ისმის მის „მერანში“. „გასწი, გაფრინდი, ჩემო მერანო, გარდამატარე ბედის სამზღვარი, თუ აქამომდე არ ემონა მას, არც აწ ემონოს შენი მხედარისი..“.

ბარათაშვილს არ დაუწერია პროგრამული ხასიათის ნაწარმოებები, მაგრამ მისმა შემოქმედებამ ჰუმანისტური განმანათლებლურ-დემოკრატიული პროგრამის როლი შეასრულა ახალი ქართული ლიტერატურისა და აზროვნების განვითარებაში. სასოებით იმეორებდნენ მომავალი თაობანი დიდი პოეტის იმედიან სიტყვებს: „ცუდად ხომ მაინც არ ჩაივლის ეს

განწირულის სულის კვეთება, და გზა უვალი შენგან თელილი, მერანო ჩემო, მაინც დარჩება; და ჩემს შემდგომად მოძმესა ჩემსა სიძნელე გზისა გაუადვილდეს და შეუპოვრად მას ჰუნე თვისი შავის ბედის წინ გამოუქროლდეს“¹.

ქართულ რომანტიზმს სხვა, ნაკლებად გამოჩენილი წარმომადგენლებიც ჰყავდა (ვახტანგ ორბელიანი, სოლომონ რაზმაძე, მიხეილ თუმანიშვილი, გრიგოლ რჩეულიშვილი, ალექსანდრე ორბელიანი, ბარბარე ჯორჯაძე, მამია გურიელი). ზოგი მათგანი XIX საუკუნის ბოლომდე განაგრძობდა ლიტერატურულ მოღვაწეობას და გარკვეული წვლილი შეიტანა ახალი ქართული ლიტერატურის განვითარებაში, მაგრამ წარსულის კონსერვატიზმს ბოლომდე ვერ დააღწიეს თავი და არაიშვიათად პროგრესულ საზოგადოებრივ-ლიტერატურულ მისწრაფებებსაც უპირისპირდებოდნენ. 40—50-იან წლებამდე და შემდეგაც ქართველ რომანტიკოსთა შემოქმედებაში მთლიანად არასოდეს ჩაფერფლილა განმანათლებლურ-რეალისტური ნაკადი. დიდ ქართველ რომანტიკოსებს არც არსებული სინამდვილისათვის შეუქცევიათ ზურგი პიროვნების განცდათა პირველადობის დასამტკიცებლად, არც ადამიანის ინტელექტისათვის შეუხედავთ იჭვის თვალათ, არც აღრინდელ ლიტერატურულ ტრადიციებს დაპირისპირებიან მკვეთრად. მათაც განმანათლებლებსავით პიროვნება გარემოს პროდუქტად ჩათვალეს, თუმცა თვით გარემოს ხშირად სუბიექტაგენტურ განცდათა ქრილში ატარებდნენ და აბსტრაქტულად განიხილავდნენ მას განსაკუთრებით სოციალურ თემაზე მსჯელობის დროს.

40—50-იანი წლებიდანვე ქართულ ლიტერატურაში მთავარ ადგილს ცხოვრების რეალისტური ასახვა იკავებს და ძველი, განმანათლებლური რეალიზმი კრიტიკულ-რეალისტურ მიმდინარეობად ყალიბდება. სამშობლოსა და ერზე განყენებული მსჯელობა და წუხილი ხალხის ცხოვრების კონკრეტული ასახვით იცვლება. მხატვრული ლიტერატურის ერთ-ერთი ძირითადი თემა ხდება ბატონყმური წყობილების რღვევა, თავდაზნაურობის დაცემა, სავაჭრო კაპიტალიზმის განვითარება, გლეხობის ჩაგვრის გაძლიერება ცარიზმის მოხელეთა და ადგილობრივ მემამულეთა მიერ. პოეზიის გვერდით მძლავრად ვითარდება დრამატურგია და პროზა, ახალი რეალისტური ლიტერატურის მთავარ ქანრებად კომედია და მოთხრობა ხდება, ფართოვდება რეალისტური ხელოვნების პრინციპების კრიტიკულ-პუბლიცისტური პროპაგანდა, პრაქტიკულად დგება ახალი ენის დამკვიდრების გზით ლიტერატურის ხალხთან დაახლოების საკითხი².

¹ ნ. ბ ა რ ა თ ა შ ვ ი ლ ი, თხზულებანი, პ. ინგოროყვას რედ., გვ. 30; იხ. აგრეთვე ქართული ლიტერატურის ისტორია, 1956, გვ. 171, 196, 206.

² ჯ. ჭ უ მ ბ უ რ ი ძ ე, ქართული კრიტიკის ისტორია, 1966, გვ. 182.

რეალისტური ლიტერატურის აღორძინება XIX საუკუნის 50-იანი წლების საქართველოში დაკავშირებულია გიორგი ერისთავის, ზურაბ ანტონოვის, ლავრენტი არღაზიანის, რაფიელ ერისთავის, დანიელ ჭონქაძის, ივანე კერესელაძის, დიმიტრი ყიფიანის (1814—1887 წწ.), მიხეილ თუმანიშვილის (1818—1875 წწ.) მოღვაწეობასთან.

განსაკუთრებით დიდი როლი იმდროინდელი ქართული ლიტერატურისა და საერთოდ კულტურის განვითარებაში პოეტმა და დრამატურგმა, ახალი ქართული თეატრის და ლიტერატურული ჟურნალის დამაარსებელმა გიორგი ერისთავმა (1811—1864 წწ.) შეასრულა. ქსნის ერისთავთა შთამომავალს, ცარიზმის კოლონიური პოლიტიკის წინააღმდეგ მებრძოლ ქართველ პატრიოტს გიორგი ერისთავსაც ბედმა ერთხანს ბიუროკრატიული მმართველობის ჩვეულებრივ მოხელედ ყოფნა არგუნა, მაგრამ მას არც უნარი აღმოაჩნდა და არც სურვილი ამ ასპარეზზე თავის გამოჩენისა. 40-იანი წლების მეორე ნახევარში იგი სამსახურიდან გადადგა და ათიოდე წლის განმავლობაში ახალი ქართული კულტურის მესაჭის მძიმე ტვირთი ზიდა. 1850—1855 წლებში იგი უძღოდა ქართულ პროფესიულ თეატრს, 1852—1853 წლებში კი ჟურნალ „ცისკარსაც“.

გიორგი ერისთავის შემოქმედება არსებითად თავიდანვე რეალისტური იყო, თუმცა ადრე ხარკს უხდიდა რომანტიზმსაც¹. ქართული რეალისტური ეპოსის ერთ-ერთი ადრინდელი ნიმუშია მისი პოემა „ოსური მოთხრობა“ (1832 წ.), რომლის ძირითადი იდეა სამშობლოსათვის თავდადება და ეროვნული ჩაგვრისაგან მისი განთავისუფლებისაკენ მოწოდებაა. ეროვნული და სოციალური უსამართლობა კრიტიკულ-რეალისტურადაა ასახული მის მრავალ ლირიკულ ლექსშიც.

გიორგი ერისთავი ქართული ლიტერატურის ისტორიაში უწინარეს ყოვლისა აღიარებულია პირველ დიდ კომედიოგრაფად. მისი ორიგინალური თუ გადმოკეთებული კომედიები: „შეშლილი“, „დავა“ (1840 წ.), „გაყრა“ (1849 წ.), „ძუნწი“ (1850 წ.), „ყვარყვარე ათაბაგი“ და სხვ. რეალისტურად გვიხატავენ 50-იანი წლების საქართველოს საზოგადოებრივ ცხოვრებას, ფეოდალური მეურნეობის რღვევასა და თავადაზნაურობის დაცემას, კაპიტალიზმის განვითარებას და ცარიზმის ბიუროკრატ მოხელეთა გახრწნას, კონსერვატორ და ლიბერალ მემამულეებს, გაქნილ და გაძუნწებულ ვაჭრებს, გათვალთმაქცებულ შინამოსამსახურეებს. პირეკლიანი სატირით ჩხვლევს დრამატურგი ბატონყმური ცხოვრების სიდუხჭირეს, ვაჭრული საქმიანობის პედანტიზმს, ბიუროკრატიის შეზღუდულობას და ხან სიბრალოლის გრძნობა იპყრობს, ხანაც აშკარა პრო-

¹ ქართული ლიტერატურის ისტორია, 1956, გვ. 302.

ტესტს გამოთქვამს ადამიანთა მორალური გადაგვარების გამო. მისი თანამედროვე რომანტიკოსებისაგან გიორგი ერისთავი განსხვავდება სამწერლო ენითაც, რომელიც ახლო დგას ხალხურ, სასაუბრო მეტყველებასთან, მასავით სადა და უბრალოა.

გიორგი ერისთავის კრიტიკულ-რეალისტური ლიტერატურული სკოლიდან გამოვიდა დრამატურგი ზურაბ ანტონოვი (1820—1854 წწ.), რომლის სოციალურ კომედიებში („მზის დაბნელება საქართველოში“, „ტივით მოგზაურობა ლიტერატორთა“), საყოფაცხოვრებო დრამასა („ქორწილი ხევსურთა“) და ვოდვეილებში („ქმარი ხუთი ცოლისა“) თავად-აზნაურთა და ვაჭართა გვერდით დახატულია მათ მიერ ჩაგრული დაბალი წრის ხალხიც, უმთავრესად გლეხები. გიორგი ერისთავის რეალიზმი ზურაბ ანტონოვმა დემოკრატიზმით გაამდიდრა, თუმცა მის მიერ დახატული მდაბიონი მოკლებულნი არიან მებრძოლ განწყობილებას¹.

მშრომელი გლეხობის ჩაგრული და უმწეო მდგომარეობა მთავარ თემად იქცა პოეტის, დრამატურგის და ეთნოგრაფის რაფიელ ერისთავის (1824—1900 წწ.) შემოქმედებაში. ფეოდალური არისტოკრატიის უმაღლეს წრეში აღზრდილმა რაფიელ ერისთავმა თავისი ხანგრძლივი ცხოვრების უმეტესი დრო სახელმწიფო სამსახურში გაატარა. მან თანამიმდევრულად განვლო სამსახურებრივი კიბის მრავალი საფეხური კანცელარიის თარჯიმნიდან მაზრის უფროსამდე. ამას ხელი არ შეუშლია თავისი დროის გამოჩენილი სახალხო პოეტისათვის მშრომელი გლეხობის ჭირისუფალი და მზრუნველი ყოფილიყო.

რაფიელ ერისთავის სამწერლო მოღვაწეობა XIX საუკუნის 50-იანი წლების დამდეგს იწყება, მისი პირველი ლექსები 1852 წელს გამოქვეყნდა. თავდაპირველად იგი რომანტიკოსთა და ეპიკურელთა მიმდევარ ლირიკოსად გვევლინება. 1855—1857 წლებშია დაწერილი მისი სოციალური შინაარსის ნაწარმოებები („ბეჩავი“, „ნინო“, „მთხოვნელი მსაჯულისადმი“, „მთხოვარა გლახაკი“), რომლებშიც გამოთქმულია პროტესტი ბატონყმობის წინააღმდეგ და თანაგრძნობა დაჩაგრული მშრომელი ადამიანებისადმი.

რაფიელ ერისთავის პოეტური შემოქმედება 90-იანი წლების მიწურულამდე გრძელდებოდა. უმიწაწყლო და უმეცარ, გადატაკებულ და ჩაგრულ, მაგრამ სოციალურ სამართლიანობაზე მეოცნებე და სამშობლოს სიყვარულის გრძნობით გამსჭვალულ ქართველ გლეხობაზე ზრუნვა ბოლომდე დარჩა მისი პოეზიის მთავარ თემად („ბერუას ჩაფიქრება“, „ბერუას ჩივილი“, „თინიას მამითადი“, „სამშობლო ხევსურისა“). მაგრამ ამ თემის გააზრებაც და გადაწყვეტაც რაფიელ ერისთავს ქართული

¹ დ. გამეზარდაშვილი, ნარკვევები ქართული რეალიზმის ისტორიიდან, ტ. I, 1961, გვ. 245—246.

კრიტიკული რეალიზმის დასაწყისის პოეტად წარმოგვიდგენს¹. იგი რეალისტი და დემოკრატი მწერალია, მაგრამ მის გლახურ დემოკრატიზმში უფრო მეტად პასიური პროტესტია გამოთქმული: რაფიელ ერისთავის მიერ დახატულ გლახს ჩამოპყილებია ყველა — მემამულეც და მევახშეც. მამასახლისიც და გზირიც. იგი ოცნებობს „შავ მიწაზე“, რომელიც საყიდლად გაუხადეს, უსამართლობად მიიჩნია, რომ მიწას მემამულისგან ქირაობს და მხოლოდ თვითონ შრომობს, მაგრამ ამის იქით ვერაფერს ხედავს. თვითონ პოეტი კი გლახს ზეცისაკენ უთითებს, მოთმინებას და ქედმოხრილობას, ბედისადმი მორჩილებას, მცირედით დაკმაყოფილებას და სიმშვიდეს უქადაგებს: „ღმერთი დიდია, ღარიბო, გული ნუ შეგიშინდებოა“. და მაინც სასაუბრო, ხალხურ ენაზე ამღერებული, ბუნებრივი უშუალობით ნათქვამი მისი სოციალური და პატრიოტული ლექსები მშრომელთა ფართო მასის სულს მალამოდ ხედებოდა. თაობანი იმეორებდნენ მის მიერ დახატული ხევსურის გულშიჩამწვდომ სიტყვებს: „სამშობლო, დედის ძუძუი, არ გაიცვლების სხვაზედა, ორივე ტკბილია ძმობილო, მირჩვენის ორსავ თვალებდა“.

უმთავრესად რეალისტური ლიტერატურის აღმავლობამ განაპირობა მხატვრული პროზის აღორძინებაც, თუმცა 50-იან წლებში დაღმავალმა ქართულმა რომანტიზმმაც სცადა შერყეული პოზიციების განმტკიცება ორიგინალური (გრ. რჩეულიშვილის რომანები) თუ ნათარგმნი პროზაული ნაწარმოებებით. რომანტიკული პროზის მთავარი თემა გარდასულ დროთა დიდება იყო. რეალისტურმა პროზამ თანამედროვეობის დახატვას მიჰყო ხელი.

რეალისტური სოციალური რომანები შექმნა ლავრენტი არდაზიანმა (1815—1870 წწ.). სოციალური წარმოშობით იგი სასულიერო წოდებას ეკუთვნოდა, განათლებაც სასულიერო სასწავლებელში მიიღო, მაგრამ თბილისის სემინარიის ხელმძღვანელთა უსულგულობით აღშფოთებულნი სასულიერო წოდებიდან გასულა.

გამოჩენილი მწერლის სახელი ლავრენტი არდაზიანს სოციალურმა რომანებმა — „სოლომონ ისაკიჩ მეჯღანუაშვილმა“ (1861 წ.) და „მორჩილმა“ (1863 წ.) მოუხვეჭა. პირველ რომანში უმთავრესად ჰავაჭრო ბურჟუაზიის წარმოშობისა და განვითარების პროცესია ასახული, მეორეში — თავადაზნაურობის დაცემისა და გადაგვარების. შედარებით მკრთალად გვიჩვენებს მწერალი გლახობის ცხოვრებას, მაგრამ ორივე რომანში გამოთქმულია პროტესტი მშრომელთა ჩაგვრის საფუძვლის, ბატონყმობის წინააღმდეგ. თავადაზნაურობა მწერალს წარმოუდგება, ერთი მხრივ, გონებრივად და ზნეობრივად გადაგვარებულ მხეცებად, რომ-

¹ ქართული ლიტერატურის ისტორია, 1956, გვ. 476.

ლებსაც თავიანთ პირუტყვულ ვნებათა დაკმაყოფილების გარდა არაფერი აწუხებს (თეიმურაზი), მეორე მხრივ, განათლებულ, კეთილ, ამალღებულ ადამიანებად, რომლებსაც ჩაგრულებსა და დამცირებულებზე ჰუმანური ზრუნვა გაუხდიათ მთავარ საქმედ (ალექსანდრე რაინლიძე). ლავრენტი არაზიანნი გმობს ბოროტ მემამულეებს და იდეალად ესახება კეთილი მემამულენი, სოფლური ცხოვრების მყუდროებას შეფარებულნი, მეურნეობის განვითარების გზით გაძლიერებულნი, ჩაგრულებზე მზრუნველნი. მას აუცილებლად მიაჩნია მდაბალთა აღზევებაც ვაჭრობის გზით, მათი მისწრაფება გაუთანასწორდნენ ძლიერთა ამა ქვეყნისათა, მაგრამ არასასურველად თვლის გაძლიერებულ ვაჭართა მიერ სხვათა ჩაგვრას (სოლომონ ისაკიჩი). საზოგადოებრივი სიკეთის დამყარების ერთადერთ გზად მწერალი ყველა ადამიანის გამდიდრებას, განათლებასა და ზნეობრივ სრულყოფას მიაჩნევს. მისთვის არ არსებობს ბრძოლით მიწისა და თავისუფლების მოპოვების გზა. მის რომანებში მემამულე მემამულეს ეკინკლავება, ვაჭარი მემამულეს ებრძვის ან ელოლიავება, საზოგადოების მშრომელი უმრავლესობა კი ჩაგრულ, მაგრამ მძინარე მასად გამოიყურება. განყენებული ჰუმანიზმის საბურველით გარემოსილი კრიტიკული სულისკვეთების მიუხედავად, მშრომელთა და არამშრომელთა სოციალურ-კლასობრივი დაპირისპირების საფუძველზე აღმოცენებული კონფლიქტი უყურადღებოდა დატოვებული ლავრენტი არაზიანნის რეალისტურ სოციალურ რომანებში. მწერლის იდეალი სრულყოფილ ვაჭრობას, განათლებულ მემამულეობასა და გაძლიერებულ მდაბიოთა საზოგადოებას ვერ სცილდება, ხოლო ძლიერთა და სუსტთა სამართლიან, მამაშვილურ ურთიერთობაზე დაფუძნებული საზოგადოების შექმნის უმთავრეს საშუალებად იგი აღზრდას მიიჩნევს¹.

უფრო შორს იხედებოდა ქართული კრიტიკული რეალიზმის პირველი ეტაპის უკანასკნელი დიდი წარმომადგენელი დანიელ ჭონქაძე (1830—1860 წწ.), რომელიც თავისუფალი როდია კეთილ მემამულეთა და უწყინარ ვაჭართა გულკეთილობის საფუძველზე მებატონეთაგან ყმების განთავისუფლების შესაძლებლობის უტოპიისაგან (დურმიშხანის თავდახსნა, ოსმანდას გამდიდრება), მაგრამ წინა პლანზე სწევს ბატონყმობის მახინჯ მხარეთა კრიტიკას და ყმა გლეხთა ბრძოლას მიწისა და თავისუფლებისათვის (მებატონის მხეცური მოპყრობა ყმებისადმი, მებატონის ოჯახის ამოყლელთა ყმის მიერ). დანიელ ჭონქაძემ ღარიბი ხალხისათვის მისაწვდომი საშუალებებით დაასურათა ბატონყმობის დამხობის აუცილებლობა, თავადაზნაურობის და მისი მსახური სამღვდლოების¹ უსამართლობა, უსინდისოდ გამდიდრებულ ვაჭართა გაიძვერობა. მან ჯერ კიდევ ბატონ-

¹ დ. ვ ა მ ე ზ ა რ და შ ვ ი ლ ი, ნარკვევები ქართული რეალიზმის ისტორიიდან, ტ. 1, 1961, გვ. 335, 342.

ყმობის გადავარდნამდე პირველმა აშკარად და გაბედულად თქვა: „სანამ ჩვენ ბატონის ყმანი ვართ, ჩვენში ბედნიერება არ შეიძლება“. ეს იყო შეჯამება, განზოგადება, კულმინაციურ წერტილამდე მიყვანა ბატონყმობისადმი ოპოზიციური განწყობილებისა, რომელიც ქართულ ლიტერატურასა და საზოგადოებრივ აზროვნებაში დაღმასწავლებლობა, XIX საუკუნის პირველ ნახევარში კი სულ უფრო და უფრო ნათლად იჩენდა თავს.

იმავე დროს ქართულ განმანათლებლურ, რომანტიკულ და პირვანდელ კრიტიკულ-რეალისტურ ლიტერატურაში ბატონყმური ურთიერთობა ხშირად მამაშვილურ პატრონყმობად იყო მიჩნეული. გვიანდელი დაღმავალი რომანტიზმის და კონსერვატიული ლიბერალიზმის წარმომადგენლები (ალექსანდრე ორბელიანი, სარდიონ ალექსი-მესხიშვილი, დიმიტრი ყაფიანი, გრიგოლ ორბელიანი და სხვ.) საგლეხო რეფორმის წინა და მომდევნო ხანაშიც განაგრძობდნენ ამ კონსერვატიული თვალსაზრისის დაცვას. ისინი არ უარყოფდნენ ქართული ბატონყმობის განახლების საჭიროებას, მაგრამ ურყევად თვლიდნენ მის სოციალურ და იდეოლოგიურ საფუძვლებს რუსეთში საგლეხო რეფორმის გატარების შემდეგაც კი. სწორედ მაშინ, იწყებს ქართული ბატონყმობის უპირატესობის დასაბუთება კონსერვატორმა რომანტიკოსებმა, რომელთა წინააღმდეგ იყო მიმართული „სურამის ციხის“ ავტორის რადიკალურ-დემოკრატიული თვალსაზრისი ქართული ბატონყმური სისტემის უვარგისობის, დრომოჭმულობის, უსამართლობის, ბოროტების შესახებ. დანიელ ჭონქაძის აშკარა და მკაცრი პროტესტი ბატონყმობის წინააღმდეგ, მისი არაორაზროვანი მოწოდება — „სანამ ჩვენ ბატონის ყმანი ვართ, ჩვენში ბედნიერება არ შეიძლება“, — აგვირგვინებს განმანათლებლობისა და რეალიზმის პირველ ხანას ქართულ ლიტერატურასა და საზოგადოებრივ აზროვნებაში¹.

„სურამის ციხე“ 1860 წელსვე სწრაფად გავრცელდა, მაგრამ მისი შეფასება მხოლოდ 1863 წლიდან იწყებს კონსერვატორებმაც (ა. ორბელიანი) და დემოკრატებმაც (ა. ფურცელაძე). 1860 წელს გარდაცვლილი დანიელ ჭონქაძეც საჯაროდ, პრესაში მხოლოდ 1863 წელს დაიტირეს და ისიც არალეგალურად (ა. წერეთელი). დანიელ ჭონქაძის გაბედულმა გამოსვლამ ვერ დაარღვია ქართველ საზოგადოებრიობაში იმ დროს გამეფებული, ყრუ, თუმცა დენტის სუნიტ გაუდენთილი დუმილი. საჭირო გახდა კიდევ ერთი წელი, რათა ძველი და ახალი ლიტერატურულ-საზოგადოებრივი იდეების მომხრენი სამკვედრო-სასიცოცხლოდ შებმოდნენ ერთმანეთს. 1861 წელს საქართველოში დაბრუნდა ილია ჭავჭავაძე. იმავე წლის „ცისკრის“ აპრილის ნომერში დაიბეჭდა მისი წერილი „ორიოდე სიტყვა თ. რ. ერისთავის

¹ დ. ჭონქაძე, სურამის ციხე, მ. ზანდუკელის რედ.; დ. გამეზარდაშვილი, ნარკვევები ქართული რეალიზმის ისტორიიდან, ტ. I, 1961, გვ. 433; მ. გაფრინდაშვილი, დანიელ ჭონქაძე და ქართული განმანათლებლობა, „ცისკარი“, 1960, №11.

მიერ კოზლოვის „შეშლილის“ თარგმანზედა“, რომელშიც მკაცრად იყო გაკრიტიკებული საქართველოს საზოგადოებრივი ცხოვრების უარყოფითი მხარეები, მათი დამცველი სანტიმენტალურ-რომანტიკული ლიტერატურული მიმდინარეობა და წამოყენებული იყო ენისა და ლიტერატურის ხალხურობის, მწერლობის მიერ ნამდვილი ცხოვრების ასახვის რეალისტური პრინციპების დამკვიდრების მთლიანი პროგრამა. ამ პროგრამის წინააღმდეგ გაილაშქრეს სარდიონ ალექსი-მესხიშვილმა, ბარბარე ჯორჯაძემ, გიორგი ბარათაშვილმა, ექვთიმე წერეთელმა და ძველი თაობის სხვა წარმომადგენლებმა. ილია ჭავჭავაძეს მხარში ამოუდგნენ პეტერბურგის უნივერსიტეტში აღზრდილი აკაკი წერეთელი, კირილე ლორთქიფანიძე, სამსონ აბაშიძე და სხვ., ე. წ. თერგდალეულები. გაჩაღდა დიდი იდეურ-ლიტერატურული ბრძოლა ძველსა და ახალს შორის. დაიწყო ახალი ხანა ქართული ლიტერატურისა და აზროვნების ისტორიაში, — რევოლუციურ-დემოკრატიული განმანათლებლობისა და კრიტიკული რეალიზმის საბოლოოდ დამკვიდრებისა, რომელიც XIX საუკუნის დასასრულამდე გრძელდება. ლიტერატურა დაუახლოვდა ხალხის ცხოვრებას, გამდიდრდა ახალი უანრებით, მის ძირითად მოტივებად იქცა ჰუმანიზმი, დემოკრატიზმი, პატრიოტიზმი¹. 60—90-იან წლებში ქართული პოეზია, პროზა, დრამატურგია, კრიტიკა და პუბლიცისტიკა სტილისტურ-მეთოდოლოგიურადაც მრავალფეროვანი გახდა. ქართულ ლიტერატურაში საბოლოოდ დამკვიდრდა კრიტიკული რეალიზმი, რომლის უპირველესი და უდიდესი წარმომადგენელი ი. ჭავჭავაძე იყო.

ილია ჭავჭავაძის სამწერლო მოღვაწეობა 1857 წელს იწყება. ამ დროიდან იგი პეტერბურგის უნივერსიტეტში სწავლობდა. სტუდენტობის წლებში შექმნა მან ქართული პოეზიის მრავალი შედევრი, რომლებიც ინტიმურ და რელიგიურ განწყობილებებთან ერთად ჰუმანიზმის თვალსაზრისით სოციალური და ეროვნული უსამართლობის დაგმობის, ხალხის თავისუფლების, მისი უკეთესი მომავლისათვის ბრძოლის იდეებს შეიცავენ. აღაძინა, რომელიც კაცობრიობის ძნელბედობას დაუდარდინებია: („სიზმარი“, „როდემდის“), გუთნისდედა გლენი, რომლისთვის ზეცა წაურთმევიათ, მიწა დაუტოვებიათ საჩიჩქნად და პირუტყვთან გაუთანაბრებიათ („გუთნის-დედა“), გლენზე კიდევ უფრო ჩაგრული და უბედური პროლეტარი („მუშა“), ქართველის დედა, რომელიც წინათ სამშობლოს მტრებთან მებრძოლ გმირებს ზრდიდა, ახლა კი თვითონვე გამხდარა მამულიშვილური სულისკვეთებით აღსაზრდელი („ქართველის დედა“), ბუნებით შშვენიერი, მაგრამ მჩაგვრელთა მიერ დამონებული ბატონყმური ქვეყანა, რომლის უბედური ერი გამხდარა „უწყინარი, უჩინარი, ქედღრე-

¹ მ. ზანდუკელი, ახალი ქართული ლიტერატურა; ვ. კოტეტიშვილი, ქართული ლიტერატურის ისტორია.

კილი... უზრუნველი და მშვიერი“ („ბედნიერი ერი“), — ასე დახატა დიდმა ქართველმა პოეტმა-რეალისტმა თავისი დროის საქართველო. მან პოეზიის დანიშნულებად გამოაცხადა არა მარტო ტკბილ ხმაზე მღერა, არამედ „სიძულვილით სიყვარულის“ ქადაგებაც („ჩემო კალამო“), ერის წინამძღოლობა და მოძქეობა, მისი ბედისა და უბედობის გაზიარება, მისთვის ტანჯვის ცრემლის მოწმენდა („პოეტი“), განახლების ძალთა მოძებნა, ხალხის გამოღვიძება და ოპტიმისტური სულისკვეთებით აღზრდა. ილია ჭავჭავაძე უმღეროდა პარიზის კომუნართა „ტვირთმძიმეთ და მაშვრალთ მხსნელ დიდ დროშას“, ნატრობდა ეროვნული ბორკილის მსხვრევის ხმა სამშობლოშიც მოესმინა („მესმის, მესმის“), ოცნებობდა გმირზე, რომელიც სამშობლოს ჩაგვრისაგან იხსნიდა („ბაზალეთის ტბა“). გამობდა მისი დროის საქართველოს კონსერვატიულ ძალებს, რომლებმაც ხელი აიღეს ხალხის განთავისუფლებისათვის ბრძოლაზე, ჩაგრული ერი ჩინებსა და ჯვრებზე გაცვალეს, ხოლო „ლიბერალობა და პატრიოტობა სალანძღავ სიტყვად“ გადააქციეს („პასუხის პასუხი“, „გამოცანები“). ილიას ოპტიმისტური ლექსები ზრდიდა თაობებს, რომლებსაც „წინ უძღოდა ჭეშმარიტება“ და რჩებოდა „კვალი განათლებული“. ეროვნული და სოციალური თავისუფლებისათვის მებრძოლთა პროგრამად იქცა მისი მოწოდება:

„მას ნულარ ვსტირით, რაც დამარხულა,
რაც უწყალოს დროთ ხელით დანთქმულა,
მოვიკლათ წარსულ დროებზედ დარდი...
ჩვენ უნდა ვსდიოთ ახლა სხვა ვარსკვლავს,
ჩვენ უნდა ჩვენი ვშვათ მყოობადი,
ჩვენ უნდა მივეთ მომავალი ხალხს...“.

ჰუმანისტურ-განმანათლებლური, რევოლუციურ-დემოკრატიული იდეები უდევს საფუძვლად ილია ჭავჭავაძის ეპიკურ ნაწარმოებებსაც. პოემა „აჩრდილში“ (1859 წ.) დაგმობილია ეროვნული და ბატონყმური მონობა და ხოტბა აქვს შესხმული „შრომის სუფევას“, რომელზედაც უნდა დაფუძნებულიყო ახალი ქვეყანა. „ქართველის დედაში“ (1860 წ.) დახატულია საქართველოს და მთელი კავკასიის მომავალი განთავისუფლების სურათი. „კაკო ყაჩაღის“ (1860 წ.) ძირითადი აზრია ბატონყმობის ანტი-ჰუმანისტური ბუნების გამოაშკარავება, მისი მოსპობის თუ გაუქმების გზით ჩაგრული გლეხობის განთავისუფლების გარდუევალობის ჩვენება. „მეფე დიმიტრი თავდადებულში“ (1878 წ.) სამშობლოსათვის თავგანწირული პატრიოტის ამალღებული მხატვრული სახეა მოცემული. ილია ჭავჭავაძის ეპოსის გვირგვინია „განდგეილი“ (1883 წ.), რომელშიც დაგმობილია ქრისტიანული ასკეტიზმი, ადამიანის განდგომა რეალური ცხოვრებისაგან.

ეროვნული და სოციალური ჩაგვრის მოსპობის გზით ჰუმანისტურ-დემოკრატიული საზოგადოების შექმნის აუცილებლობა კიდევ უფრო ნათლად ნაჩვენებია ილია ჭავჭავაძის პროზაში. „მგზავრის წერილებში“ (1861 წ.) მშრომელი გლეხის პირით მთელი საქართველო მოითხოვდა: „ჩვენი თავი ჩვენადვე გვეყუდნესო“; „კაცი-ადამიანი“?!” (1863 წ.) ლუარსაბ თათქარიძის სახით ჯვარზეა გაკრული დავრდომილი და გადაგვარებული თავადაზნაურობა, რომელსაც საკუთარ კუჭზე ზრუნვისა და ბუზების თვლის მეტი საქმე აღარ დარჩენია და კაცურ-კაცობა, ადამიანობა პირუტყვეულ ცხოვრებაზე გაუცვლია. „გლახის ნამბობში“ (1859—1873 წწ.) ბატონყმურ მხეცობას მწერალმა დაუპირისპირა კაცთმოყვარეობისა და განათლების ყოვლისშემძლეობის იდეა, უსამართლობის წინააღმდეგ გლეხური პროტესტისა და ბრძოლის ამსახველი სურათები, პირბაღე ჩამოხადა თათქარიძეთა მემკვიდრე მებატონეებს, დაასამარა მაღალი წოდება, გააიდელა კულტრეგერი მღვდელი და მშრომელი გლეხი. ანტიჰუმანურ სოციალურ გარემოში ადამიანის ბუნება მახინჯდება, კაცი ისევე ნადირობს კაცზე, როგორც მხეცზე, თვით მოყვარულ „ბატონსა და ყმას შორის სიყვარულის ხიდი არ გაიდება“, ბატონყმობა კაცურ-კაცობის დავიწყებისა და სისხლისღვრის წყაროა, — ქადაგებდა ილია ჭავჭავაძე. უსამართლო წყობილების დროს პიროვნებისა და საზოგადოების ანტაგონისტური დაპირისპირებულობაა დახატული მოთხრობაში „სარჩობელაზედ“ (1877 წ.). შრომისა და განათლების გზით მაღალი და დაბალი წოდების ადამიანთა შორის ხიდჩატეხილობის დაძლევის პრობლემაჲ ძირითადი თემა ილია ჭავჭავაძის პროზაული შედეგის „ოთარანთ ქვრივისა“ (1887 წ.), რომელშიც ყველაზე უფრო ნათლად გამოვლინდა ქართული ჰუმანისტურ-განმანათლებლური რეალიზმის თავისებურებანი¹.

ჰუმანიზმის სულისკვეთებითაა გამსჭვალული აკაკი წერეთლის ლირიკული და ეპიკური პოეზია, დრამატურგია და პროზა. მისი შემოქმედებაც იმავე მთავარ საკითხებს დასტრიალებს, რასაც ილია ჭავჭავაძისა. აკაკის ლირიკის მთავარი თემებია დამონებული, მაგრამ აღორძინების გზაზე გამოსული „ცაფირუზ ხმელეთზურმუხტი“ სამშობლო („სალამური“. „განთაღი“, „სულიკო“, „(ვიკინათელა“), ბატონყმური ჩაგვრით გაწამებული გლეხობა („მუშური“, „გლეხის აღსარება“, „იმერული ნანი-ნა“), რომელიც ეროვნული და სოციალური მონობის წინააღმდეგ ბრძოლას იწყებდა („ნატვრა“, „ხანჯალი“, „ჭაღარა“, „თქვენი ჳირიმი“), ფართული სევდა ხალხის ცხოვრების ძნელებლობის გამო („ჩემო თავო“, „აღ-

¹ ი. ჭავჭავაძე, რჩეული თხზულებანი, შ. რაღიანის და ა. აბაშელის რედ., 1937; კ. აბაშიძე, ეტიუდები; ვ. კოტეტიშვილი, ქართული ლიტერატურის ისტორია; გ. ჯიბლაძე, ილია ჭავჭავაძე, 1966.

მართ-ალმართ“, „მუხამბაზი“). ერი და მშრომელი უმთავრესი საზრუნავია პოეტისა, რომლის სიმღერა მოწოდებულია „სიმართლეს მსახურებდეს... დაჩაგრულს იმ სიმღერით თვალთ ცრემლები ეშრობოდეს“, მჩაგვრელს კი გულში ისარი ესობოდეს („ჩონგურა“, „პოეტი“). საქართველოს და ქართველი ხალხის თავისუფლება აკაკი წერეთლისათვის მთელი კაცობრიობის განთავისუფლების ნაწილი იყო. გესლიანი სატირით სუსხავდა პოეტი ყველას, ვინც ჰუმანიზმისა და დემოკრატიზმის დროშის ქვეშ არ იდგა. და მაინც აკაკის მთელი შემოქმედება ქართველი ხალხის წარსულის, აწმყოს და მომავლის კრიტიკულ-რეალისტური ასახვაა უპირველეს ყოვლისა. საქართველოს გმირული ისტორია, სამშობლოსათვის თავდადებულ გმირთა პორტრეტები დახატა პოეტმა „ბაგრატ დიდსა“ (1875 წ.) და „თორნიკე ერისთავში“ (1884 წ.), „ნათელასა“ (1897 წ.), „პატარა კახსა“ (1890 წ.) და „ბაში-აჩუკში“ (1896 წ.). ხალხის უწმინდეს ზნე-ჩვეულებათა დაცვის, მეგობრობისა და სტუმართმოყვარეობის, აღზრდისა და ადამიანის ბუნების კონტრასტულ თვისებათა ყოვლისშემძლეობის ჰიმნია „გამზრდელი“ (1848 წ.). XIX საუკუნის მეორე ნახევრის საქართველოს ცხოვრებას მხატვრულ-დოკუმენტური სურათია „ჩემი თავგადასავალი“ (1894—1908 წწ.)¹. ხან თვალწარმტაცი სატრფოს, ხან დატყვევებული თუ დაავადებული ადამიანის, მიჯაჭვული ამირანის, სულიკოს, ციციანთელას და კიდევ ვისი და რისი სახით არ ზატავს პოეტი სამშობლოს და ცდილობს მისდამი დაუძლეველი სიყვარული ჩაუნერგოს ხალხს. ამ მიზნით იგი წარსულის გაიდევალებასაც არ ერიდება. ის საქართველოს ისტორიაში მხოლოდ იმ გმირებს ხედავს, რომლებსაც სწამთ: „ვინც მამულს სულსაც არ სწირავს, იმას არ ჰქვიან მამულიშვილი“. მხურვალე პატრიოტიზმის და დემოკრატიზმის, მხატვრულ საშუალებათა, უწინარეს ყოვლისა, ენის სისადავის გამო აკაკი წერეთელი მისი დროის ყველაზე პოპულარული პოეტი იყო. თავისი საუკეთესო ნაწარმოებებით მან ილია ჭავჭავაძესთან და იაკობ გოგებაშვილთან ერთად დიდი როლი შეასრულა ახალი ქართული ენისა და ლიტერატურის, ქართული ჰუმანიტურ-განმანათლებლური რეალიზმის განვითარებასა და საბოლოოდ დამკვიდრებაში. /

80—90-იან წლებში მათი სახელოვანი ტრადიციები გააღრმავეს და ქართული ლიტერატურა ორიგინალური, ჰუმანიტურ-რეალისტური შედეგებით გაამდიდრეს ალექსანდრე ყაზბეგმა, ვაჟა-ფშაველამ, დავით კლდიაშვილმა, რამდენიმედ აგრეთვე შიო არაგვისპირელმა და ვასილ ბარნოვმა.

ჰუმანიტური სიბრალული უდევს საფუძვლად დავით კლდიაშვილის (1862—1931 წწ.) ცრემლნარევი სიცილს, ნაზ იუმორს, რომლითაც იგი

¹ ა. წერეთელი, თხზ. სრ. კრებული, გ. აბზიანიძის რედ., ტ. I—X; ლ. ასათიანი, ცხოვრება აკაკი წერეთლისა, 1940; მ. ზანდუქელი, ახალი ქართული ლიტერატურა, 1962.

წარმოგვიდგენს მის მიერ დახატულ „შემოდგომის აზნაურთა“ ტრაგიკო-მიკურ მდგომარეობას („სოლომონ მორბელაძე“, „ქამუშაძის გაჭირვება“, „სამანიშვილის დედინაცვალი“, „დარისპანის გასაჭირი“). ჰუმანიზმია საფუძველი შიო არაგვისპირელის (1867—1926 წწ.) ნოველათა სეველიანი სურათებისა („ესაა ჩვენი ცხოვრება“, „ჩემო შვინდავ“, „მხრები-და ავიჩეჩე“). იმავე საფუძველს ემყარება ვასილ ბარნოვის (1856—1934 წწ.) ისტორიზმითა და სიყვარულის რელიგიით გატაცება („სულთა კავშირი“, „ტკბილი დუღუკი“, „თებერას დანიშნული“, „მიმქრალი შარავანდელი“, „ისნის ცისკარი“). მაგრამ თუ ამ მწერალთა ჰუმანისტურ-რეალისტური შემოქმედება ჯერ კიდევ არაა სავსებით განთავისუფლებული ემპირიზმისა და პროვინციალიზმის ელფერისაგან, ალექსანდრე ყაზბეგისა და ვაჟა-ფშაველას უაღრესად ეროვნული მხატვრული შემოქმედება იმავე დროს უაღრესად კაცობრიულიც არის¹.

ალექსანდრე ყაზბეგი თვითონვე ახასიათებს მოკლედ იმ სოციალურ სინამდვილეს, რომელმაც მისი უბრალო, მაგრამ დიდბუნებოვანი გმირები წარმოშვა: „ხალხოსნური ერთობა შეირყა და წყნარ-წყნარად ჰქრებოდა; მის მოადგილედ პირადი საჭიროება, პირადი სარგებლობა შეიქნა მოთხოვნილებად. ძმას ძმასთან აღარ ჰქონდა საქმე და მეზობელს მეზობელთან... თვითონ ბუნებაც კი იცვლებოდა, თითქო ჩვეულებრივი ძალა და ფეროვნება დაეკარგაო“. ამ ნიადაგზე აღმოცენებული ორი დაპირისპირებული სამყაროს, კეთილისა და ბოროტის ტიტანური ბრძოლის მხატვრული სურათებია მოცემული ალექსანდრე ყაზბეგის ყველა რომანსა და მოთხრობაში („მამის მკვლელი“, „ციკო“, „მოძღვარი“, „ციცია“, „განკიცხული“, „ელგუჯა“, „ელისო“, „ხევისბერი გოჩა“). კეთილშობილი ადამიანები მარცხდებიან ტლანქ და უაზრო ძალმომრეობასთან ბრძოლაში, თემს ეთხრება საუკუნეების გრძელ მანძილზე დამკვიდრებული მორალური საძირკველი და ცხოვრებაში ამორალური არამზადები ბატონდებიან („ელგუჯა“); საზოგადოებრივის და პირადულის შეტაკებაში იღუპება ის ადამიანიც, ვინც მაღალი სოციალური მორალის დამკველად გამოდის, და ისიც, ვინც სოციალურ ვალდებულებას ივიწყებს და თემს ეთიშება პირადი ბედნიერების მისაღწევად („ხევისბერი გოჩა“); დამპყრობელთა ძალადობა დაუძლეველ დაბრკოლებად ეღობება სიყვარულს გადალახოს სარწმუნოებრივ-ეროვნული ბარიერი („ელისო“); მჩაგვრელ მოძალადეთა მსხვერპლნი ხდებიან ეროვნული და აგარაჟული მოძრაობის მონაწილენი („მამის მკვლელი“, „ციკო“); მაგრამ საბოლოოდ კეთილის გამარჯვება ბოროტზე მაინც გარდუვალია. მწერლის აზრით, ამის თავდებია „ხალხის შეერთებული ძალა და მისი ამაღლებული სულიერი მდგომარეობა“, რო-

¹ გ. ქიქოძე, მეცხრამეტე საუკუნის ქართული ლიტერატურის ისტორიიდან (ტბ. თბ., ტ. III, 1965, გვ. 334, 398).

შელიც ალექსანდრე ყაზბეგის შემოქმედებაში საზოგადოებრივი ცხოვრების გადამწყვეტ ფაქტორადაა წარმოდგენილი. არა მარტო ქართულ, მსოფლიო ლიტერატურაშიც ბევრი როდია ნაწარმოები, რომელიც ისე იყოს გამსჭვალული მაღალი ზნეობრივი პათოსით, როგორც ალექსანდრე ყაზბეგის საუკეთესო მოთხრობები¹.

მხატვრულ სიტყვას უპირველეს ზნეობრივ ძალად მიიჩნევდა ვაჟაფშაველაც („ნუგეში მგოსნისა“, „სიტყვა ეული“), რომლის შემოქმედებაში ჰუმანიზმი კოსმოსურ სიმაღლეზეა აყვანილი და მთელი სამყარო წარმოდგენილია სიყვარულით გაცხოველებულ არსებად, ყოველი უსულო სულიერად, ყოველი უბრალო ბალახი სიბრაღულის ღირსად („შვლის ნუკრის ნაამბობი“, „ია“, „მთის წყარო“, „ქუჩი“, „მთანი მაღალნი“). მისი ღირიკის ძირითადი თემა ვაჟკაცობა, პატრიოტიზმი, ბუნებისა და ქალის სიყვარულია. ბუნება მის ლექსებში სინათლისა და სიბნელის, ბორბტებისა და სიკეთის დაუსრულებელი ჭიდილის სახითაა დახატული („მთიულის სიმღერა“, „გაზაფხული“, „დევების ქორწილი“). მაგრამ მისი კონტრასტები მაინც ერთმანეთს უთანხმდებიან და სამყაროს გასაოცარ ჰარმონიას ქმნიან. მთელი ბუნება მბრძანებელიცაა და მონაც, სიკეთის მქმნელიც და ავისაც, მაგრამ მაინც ლამაზია და სიტუტრფით ჰყვავის („ღამე მთაში“). გმირობისა და თავდადების სურათებია დახატული ვაჟას პატარა პოემებსა და ბალადებშიც („მაცნე“, „გიგი“, „ჩივილი ხმლისა“, „ბაკური“, „სიკვდილი გმირისა“, „ფშაველი ჯარისკაცის წერილი“, „არწივი“). თემისა და პიროვნების ურთიერთობის, ერთა სოლიდარობის, ადამიანის საზოგადოებრივი დანიშნულების პრობლემებისადმი მიძღვნილი ვაჟას საუკეთესო პოემები „ალუდა ქეთელაური“, „სტუმარ-მასპინძელი“, „ბახტრიონი“, „გველისმკვამელი“ და პიესა „მოკვეთილი“, რომლებშიც დახატულია ზოგადადამიანური ხასიათები და მკაფიოდ არის გამოთქმული ჰუმანისტური შეხედულება ადამიანის უმაღლეს იდეალებზე. ვაჟას პოემები, თვით ისეთნიც კი, რომელნიც განსაზღვრული ისტორიული ეპოქის მხატვრულ ასახვას წარმოადგენენ, ზოგადადამიანურ, ზეისტორიულ შთაბეჭდილებას ახდენენ („მოხუცის ნათქვამი“)². საერთოდ ჰუმანისტი რეალისტები არ კმაყოფილდებოდნენ ბუნებისა და საზოგადოების ობიექტივისტური აღწერით. ისინი სინამდვილეს გარკვეული ტენდენციის მიხედვით ხატავდნენ, ერთგვარად აიდეალებდნენ მას, რათა ეჩვენებინათ არა მარტო უფერული აწმყო, არამედ შეფერადებული, სასურველი წარსული და მომავალიც.

ჰუმანისტურ-რეალისტურ ნაკადთან ერთად XIX საუკუნის მეორე ნახევრის ქართულ ლიტერატურაში თავი იჩინა შეუფერავ-რეალისტურმა

¹ გ. ქ ი ქ ო ძ ე, რჩ. თხზ., ტ. III, გვ. 343; იხ. აგრეთვე, ა. ყ ა ზ ბ ე გ ი, რჩ. თხზ., ტ. I, II, გ. ნატროშვილის რედ., 1962.

² იქვე, გვ. 361—364.

ნაკადმა, რომლის წარმომადგენლებად პუბლიცისტიკაში ნიკო ნიკოლაძე უნდა ჩაითვალოს, ბელეტრისტიკაში — გიორგი წერეთელი¹, დრამატურგიაში — ავქსენტი ცაგარელი.

გიორგი წერეთლის ერთ-ერთი პირველი ბელეტრისტული ნაწარმოები იყო მხატვრულ-პუბლიცისტური ნარკვევი „მგზავრის წერილები“, რომელიც 1866 წელს გამოქვეყნდა და სამოციანელ ქართველ განმანათლებელთა რადიკალურ-დემოკრატიული მიმდინარეობის მანიფესტის როლი შეასრულა. „მგზავრის წერილები“ ბატონყმობის გაუქმების წინა ხანის საქართველოს ცხოვრებას წარმოგვიდგენს მხატვრული სახეების თუ პუბლიცისტურ მსჯელობათა საშუალებით. მკითხველი ამ ნაწარმოებში ნათლად ხედავს იმდროინდელ საზოგადოებრივ-პოლიტიკურ ვითარებას, ხალხის ყველა ფენის წარმომადგენელს, მათ დამოკიდებულებას ბატონყმობისადმი, ახალი საქართველოს დაბადების აუცილებლობას. „მგზავრის წერილებში“, მართლაც, ისე შეუფერავადაა ნაჩვენები სოციალური სინამდვილე, რომ მკითხველი ამ ნაწარმოების გმირთა ვრცელ გაღერებაში მისთვის ცნობილ, რეალურ პიროვნებებს პოულობდა. ცოცხალი ტიპების დახატვის გზით საზოგადოებრივი ცხოვრების ყოველმხრივი აღწერისა და გადმოცემის ეს მანერა მეტ-ნაკლებად გიორგი წერეთლის მთელი მხატვრული შემოქმედების დამახასიათებელია და სწორედ ამან მოუხვეჭა მწერალს XIX საუკუნის ქართული სინამდვილის მემატიანის სახელი. ბატონყმური საქართველოს ცოცხალი სურათია დახატული გიორგი წერეთლის მეორე ბელეტრისტულ ნაწარმოებში „ჩვენი ცხოვრების ყვაილში“, სადაც მთავარ მოქმედ პირად თვითონ ავტორის ოღნავ სახეშეცვლილი ორეულია გამოყვანილი. აქაც პუბლიცისტური პირდაპირობითაა დაგმობილი ბატონყმური ცხოვრება, მისი აღზრდის სისტემა, რომელიც ამახინჯებდა ახალთაობას. 80-იან წლებში გამოქვეყნდა გიორგი წერეთლის ორი საუკეთესო მოთხრობა „რუხი მგელი“ და „მამიდა ასმათი“, რომლებშიც ნაჩვენებია თავდაზნაურთა „დანგრეული ბუდეები“, მათი მატერიალური დაცემის და სულიერი გადაგვარების პროცესი. მაგრამ არსად ისე ნათლად, ყოველმხრივ და ობიექტურად არ დაუხატავს გიორგი წერეთელს XIX საუკუნის საქართველო, როგორც სოციალურ რომანებში „პირველ ნაბიჯსა“ (1890 წ.) და „გულქანში“ (1895 წ.). ამ რომანებში, ისევე როგორც მთელ თავის მხატვრულ შემოქმედებაში, მწერალი წარმოგვიდგება ფეოდალიზმიდან კაპიტალიზმში გარდამავალი საქართველოს საზოგადოებრივი ცხოვრების მიუდგომელ მემატიანედ, ბატონყმური და ბურჟუაზიული ჩაგვრის გაბედულ კრიტიკოსად, ქართველი ხალხის უკეთეს მომავალზე მგზნებარე მეოცნებედ.

თუ გიორგი წერეთელმა ბელეტრისტიკაში გააგრძელა გიორგი ერის-


¹ იხ. მ. გაფრინდაშვილი, გიორგი წერეთლის მსოფლმხედველობა, 1955, გვ. 252—270.

თავისა და ლავრენტი არდაზიანის რეალისტური ტრადიციები, კომედიო-გრაფიის დარგში მათ განმგრძობად გამოვიდა დრამატურგი ავქსენტო ცავარელი (1857—1902 წწ.). მის კომედიებში შეუფერავადაა ასახული ძველი თბილისის მოქალაქეთა ყოფა-ცხოვრება, დახატულია სიმპათიური ტიპები მხიარული, დარღიმანი, უანგარო ყარაჩოხელებისა („რაც გინახავს, ველარ ნახავ“, „ხანუმა“, „ციმბირელი“).

გლებთა ყოფა-ცხოვრება, ზნე-ჩვეულება და მსოფლმხედველობაა გადმოცემული ხალხოსან მწერალთა შემოქმედებაში. ხალხოსნურ რეალიზმს ანტონ ფურცელაძემ დაუღო საფუძველი („სამის თავგადასავალი“, „ვინ მართალთა“, „მაცი ხვითია“). ხალხოსნური რეალიზმის პრინციპების მიხედვითაა შექმნილი პოეტ იოსებ დავითაშვილის (1852—1887 წწ.) ლექსები, ზაქარია გულისაშვილის (1857—1913 წწ.), ეკატერინე გაბაშვილის (1851—1940 წწ.) მოთხრობები („მაგდანას ლურჯა“), ანასტასია ერისთავ-ხოშტარიას რომანი „მოლიპულ გზაზე“. ქართული ხალხოსნური რეალიზმის ყველაზე ტიპიური წარმომადგენლები არიან ნიკო ლომოური (1852—1915 წწ.) და სოფრომ მგალობლიშვილი (1851—1925 წწ.).

ნიკო ლომოურმა ლიტერატურული მოღვაწეობა ლექსების წერით დაიწყო („ყინვა და პატარა მოწაფე“), მაგრამ მას გლებთა რეფორმის შემდგომი ცხოვრების რეალისტი მხატვრის სახელი მოუპოვა პატარა მოთხრობებმა („გიგო ღრუბელაშვილი“, „ბედი უბედურთა“, „ყოველის მხრიდან“, „ალი“, „ქაჯანა“), რომლებშიც ნაჩვენებია ქართველ გლებთა სიღატაკე და უფიცობა, მათი რევოლუციური შეგნების პირველი გაელვება. სოფრომ მგალობლიშვილი ნაკლებ ზრუნავს ნაწარმოების ფორმაზე. მისი მოთხრობები უფრო ხალხოსნური იდეების ილუსტრაციაა, ვიდრე ცხოვრების მხატვრული ასახვა. იგი აიღვალავს ღარიბ გლებობას, გვიჩვენებს სოფლის სოციალურ დიფერენციაციას, გლებჯაცობის რევოლუციური შეგნების გაღვიძლებას, მუქი ფერებით, ნატურალისტის მიუდგომლობით ხატავს სოფლის ცხოვრებას („წარსულიდან“, „ღამის მეხრე ცეცო“, „ჯორზაქარა“). ნატურალისტურ მადგომას სინამდვილისადმი ამჟღავნებს ზოგი სხვა მწერალი თუ პოეტიც, რომლებმაც 90-იან წლებში დაიწყეს შემოქმედებითი გზა (ლალიონი, დუტუ მეგრელი, სილოვან ზუნდაძე, შიო მღვიმელი).

XIX საუკუნის ქართული ჰუმანისტურ-რეალისტური, შეუფერავ-რეალისტური და ხალხოსნურ-რეალისტური ლიტერატურის საუკეთესო ტრადიციების თავისებურ შეჯამებას წარმოადგენს ეგნატე ნინოშვილის (1859—1894 წწ.) შემოქმედება. ახალგაზრდობიდანვე გაურკვეველი პროტესტანტული სულით გამსჭვალულმა, სუსტი ჯანმრთელობის, მაგრამ უკომპრომისო ზასიათის მქონე ეგნატემ ღარიბი ინტელიგენტის მძიმე



ეგნატე ნინოშვილი.

ცხოვრების გზა განვლო. სასულიერო სასწავლებლიდან მგლის ბილეთით დათხოვნის შემდეგ მუდმივად ლუკმაპურის ძიებაში მყოფი მწერალი ჯერ წვრილ მოიჯარადრედ, კანტორის გამგედ და ტელეგრაფისტად მუშაობდა, მერე ასიათამწყოზად და პირად მდივნად, ბოლოს ტვირთმზიდვად და მუშად. საქართველოს სხვადასხვა პროვინციაში, მცირე ხნით აგრეთვე საფრანგეთში მოგზაურობისა და საზოგადოების სხვადასხვა წრეში ტრიალის წყალობით მან ცხოვრების მდიდარი გამოცდილება შეიძინა, რამაც დიდი როლი შეასრულა მისი შემოქმედებისა და მსოფლმხედველობის კრიტიკულ-რეალისტური და რევოლუციური სულისკვეთების ჩა-

მოყალიბებაში. იგი იყო თავისი დროის უაღრესად პოპულარული მწერალი და ამავე დროს 1893 წელს დაარსებული მესამე დასის ერთ-ერთი მეთაურა. მის დასაფლავებაზე, რაც პოლიტიკურ დემონსტრაციადა გადაიქცა, მესამედასელებმა პირველად გამოთქვეს საჯაროდ თავიანთი მარქსისტული პროგრამა. სამწერლო ასპარეზზე ეგნატე ნინოშვილი 1887 წელს გამოვიდა. მისი ერთ-ერთი პირველი ნაწარმოებია რომანი „ჯანყი გურიაში“, რომელიც ისტორიულ წყაროებზე დაყრდნობით გადმოგვცემს გურიის 1841 წლის აჯანყების ამბებს და ამავე დროს მხატვრულად წარმოგვიდგენს აჯანყების იდეურ მეთაურს, რომელიც უფრო სამოციანელ განმანათლებელ და ხალხოსან მოღვაწეებს ჰგავს, ვიდრე 40-იანი წლების ქართველ ინტელიგენტს. ოვითონ ეგნატე ნინოშვილიც, ახალი იდეური ჯგუფის ერთ-ერთი მეთაურთაგანი, სავსებით არასდროს განთავისუფლებულა განმანათლებლურ-ხალხოსნური შეხედულებებისაგან. იგი ილია ჭავჭავაძის ცალკეულ იდეებს თავის ნაწარმოებთა ეპიგრაფად იყენებდა, კაპიტალიზმის აუტოლებლობას თითქმის გიორგი წერეთლისებურად აღიარებდა და ხალხოსანთაგან ოცნებობდა ისეთ საზოგადოებაზე, სადაც შრომის პროდუქტი მშრომელს ღარჩებოდა და მთელ ერს, ერის ყოველ ნაწილს — თანასწორად შეეძლებოდა ფიზიკურად, გონებრივად და ზნეობრივად გან-

ვითარება¹. მისი გმირებიც ჰგვანან ჰუმანისტ, რადიკალ და ხალხოსან რეალისტთა გმირებს, მაგრამ თუ მათ ნაწარმოებებში ერთგვარად გაიდგალებულია ერი და მისი წვრილბურჟუაზიული ნაწილი, ეგნატე ნინოშვილის მოთხრობებში მეტი ობიექტურობაა დაცული, დაგმობილია სინამდვილის ყალბი რომანტიზაცია („ჯანყი გურიაში“) და სოფლის ხალხის იდეალიზაცია, ნაჩვენებია გლეხობის დანაწილების შედეგად კლასობრივი ბრძოლის გაძლიერება და ახლადფეხადგმული ქართველი ბურჟუაზიული კლასის უპერსპექტივობა („პალიასტომის ტბა“, „სიმონა“), ქართველი თავადაზნაურობის და ბიუროკრატიის საბოლოო გახრწნა ყალბი განათლების თუ საკუთრების კულტის პირობებში („ჩვენი დროის რაინდი“, „ქრისტიანე“, „მოსე მწერალი“). ერთი სიტყვით, ეგნატე ნინოშვილის შემოქმედებიდან ის დასკვნა გამომდინარეობდა, რომ ბიუროკრატიულ-პოლიციურ და თავადაზნაურულ-ბურჟუაზიულ საზოგადოებაში მარტო მაღალი წრეები კი არ იყვნენ დაავადებულნი, არამედ მთელი საზოგადოება საჭიროებდა მკურნალობას, გადახალისებას და გარდაქმნას. მწერალი ცდილობდა ჰუმანური გრძნობები გაედვიძებინა 90-იანი წლების ქართველ საზოგადოებაში, გამოეწვია სიბრაულის გრძნობა უსამართლოდ დაჩაგრული ხალხისადმი, სიძულვილისა — მჩაგვრელებისადმი². ამავე დროს ეგნატე ნინოშვილი, უფრო კი მისი უმცროსი თანამედროვე რევოლუციონერი პოეტი იროდიონ ევდოშვილი (1873—1916 წწ.), აღარ კმაყოფილდება „სიძულვილით სიყვარულის ქადაგებით“; ლიტერატურაში ჩნდება პირდაპირი და არაორაზროვანი მოწოდება მასობრივი პრაქტიკულ-რევოლუციური მოქმედებისაკენ („მეგობრებს“, 1895 წ.). იხურებოდა დიდი წიგნი ახალი ქართული კრიტიკულ-რეალისტური ლიტერატურისა, იშლებოდა პირველი ფურცლები უახლესი ქართული სოციალისტურ-რეალისტური ლიტერატურისა.

ყურანალ-გაზეთები და წიგნები. XIX საუკუნემდე ქართული ბეჭდვითი სიტყვა წიგნების გამოცემით შემოიფარგლებოდა. 1799 წელს იოანე ბაგრატიონის მიერ წამოყენებული იდეა ქართული გაზეთის დაარსების შესახებ ვერ განხორციელდა. პირველი ქართული გაზეთი გამოვიდა 1819 წლის 8 მარტს. მას ჯერ „საქართველოს გაზეთი“ ეწოდებოდა, მერე — „ქართული გაზეთი“. იგი ყოველკვირეულად გამოდიოდა 1821 წლის დამლევამდე. „ქართული გაზეთი“ ჯერ რუსულად იწერებოდა, შემდეგ ქართულად ითარგმნებოდა. უმთავრესად რუსული „ტიფლისკიე ვედომოსტის“ ქართულ თარგმანს წარმოადგენდა „ტფილისის უწყებანიც“, რომელიც 1828—1832 წლებში გამოდიოდა. საქართველოს ამ პირველი რუსული

¹ ე. ნინოშვილი, თხზ. სრ. კრებული, ტ. III, 1935, გვ. 57.

² გ. ქიქოძე, რჩ. თხზულებანი, ტ. III, 1965, გვ. 329.

გაზეთის რედაქტორი იყო პ. სენკოვსკი, რომელიც მისი ქართული ვარიანტის გამოცემას სოლომონ დოდაშვილის ხელმძღვანელობით ახორციელებდა. 1832 წელს ს. დოდაშვილმა „ტფილისის უწყებანის“ დამატების სახით გამოსცა ხუთი ნომერი ჟურნალისა „სალიტერატურონი ნაწილნი ტფილისის უწყებათანი“ — პირველი ქართული პერიოდული ორგანო, რომელიც თავის პირდაპირ მიზნად ისახავდა სამსახურს ქართული კულტურის აღმავლობისადმი. ჟურნალი პატრიოტულ იდეებს უწევდა პროპაგანდას და 1832 წლის შეთქმულებით შეშინებულმა მთავრობამ იგი დახურა. ამის შემდეგ 1838 წლამდე საქართველოში გაზეთი ან ჟურნალი აღარ გამოსულა. „კავკასიის ობლასტნიე ვედომოსტის“ და „საქართველოს ფუტკრის“ გამოცემის ცდამ 1834 და 1838 წლებში უნაყოფოდ ჩაიარა. 1838—1841 წლებში პლატონ იოსელიანი ყოველწლიურად ბეჭდავდა ქართულ კალენდარს. 1838 წლიდან გამოდიოდა გაზეთი „ზაკავკასკი ვესტნიკი“, რომლის ქართული თარგმანის გამოცემას 1845 წლიდან პლ. იოსელიანი აწარმოებდა. 1846 წელს თბილისში გამოსვლა იწყო ყოველკვირეულმა რუსულმა გაზეთმა „კავკაზმა“, რომელიც მთელი XIX საუკუნის მანძილზე მთავრობის ოფიციალურ ორგანოს წარმოადგენდა, მაგრამ ზოგიერთი თანამშრომლის წერილებით პროგრესულ იდეებსაც ქადაგებდა (ნ. ბერძენიშვილი, გ. თუმანიშვილი, დ. ჩუბინაშვილი და სხვ.). 40-იან წლებში ქართველი ინტელიგენციის ერთმა ნაწილმა სცადა გამოეცა პოლიტიკურ-ლიტერატურული ჟურნალები „სინათლე“ თბილისში და „არე“ პეტერბურგში, მაგრამ მიზანი ვერ განახორციელა. 50-იან წლებში ერთადერთი ქართული პერიოდული ორგანო იყო ჟურნალი „ცისკარი“, რომელიც გიორგი ერისთავმა დააარსა. მისი პირველი ნომერი გამოვიდა 1852 წლის იანვარში, უკანასკნელი 1853 წლის დეკემბერში. გიორგი ერისთავის რედაქტორობის დროს „ცისკარს“ არ ჰქონდა გარკვეული მიმართულება, ჟურნალს ეკრძალებოდა პოლიტიკური შინაარსის წერილების გამოქვეყნება, მაგრამ ლიტერატურულ-სამეურნეო ორგანოს სახითაც მან დიდი როლი შეასრულა ქართული კულტურის აღორძინების საქმეში. მის ფურცლებზე ქართველ მკითხველთა ფართო წრე პირველად გაეცნო როგორც იმდროინდელ, ისე ადრინდელ ქართველ, რუს და ევროპელ მწერალთა საუკეთესო ნაწარმოებებს.

1857 წელს „ცისკარი“ აღადგინა და განაახლა ივანე კერესელიძემ, რომლის რედაქტორობით ჟურნალი გამოცემის საბოლოოდ შეწყვეტამდე (1875 წ.) გამოდიოდა. განახლებული „ცისკარი“ უკეთ ემსახურებოდა ქართული კულტურის აღმავლობის საქმეს. მის ფურცლებზე ბევრი დიდმნიშვნელოვანი მხატვრული თუ პუბლიცისტური ნაწარმოები დაიბეჭდა, მაგრამ არც მას ჰქონდა გარკვეული მიმართულება, რაც განსაკუთრებით 60-იანი წლების ახალ ვითარებაში იდეურ-მხატვრული ჩამორჩენი-

ლობის მომასწავებელი იყო. ამ დროსაც მთავრობის ოფიციალური პოლიტიკის მთავარი პროპაგანდისტის როლს ასრულებდა გაზეთი „კავკაზი“, თუმცა იგი ზოგჯერ კვლავ ლიბერალური და თვით დემოკრატიული შინაარსის მასალასაც ბეჭდავდა, განსაკუთრებით იმგვარ დამატებებში, როგორც იყო, მაგალითად, ჟურნალი „ლიტერატურნი ლისტოკ“ (1864 წ.). მთავრობის ოფიციალურ თვალსაზრისს პროპაგანდას უწევდა პირველი ქართული საეკლესიო ჟურნალი „სასულიერო მახარობელი“ (1864 — 1868 წწ.), რომელიც გ. ხელაძის რედაქტორობით გამოდიოდა და „საქართველოს საეგზარქოსოს სასულიერო მოამბე“ (1891—1916 წწ.). უფრო პოპულარული იყო საღვთისმეტყველო და სასულიერო ჟურნალი „მწყემსი“ (1883—1910 წწ.), რომელსაც დ. ღამბაშიძე რედაქტორობდა. იგი ქართული სკოლისა და საქართველოს ისტორიის საკითხებსაც აშუქებდა და სწორედ ამით მოიპოვა ხალხის გარკვეული ნაწილის მხარდაჭერა.


საქართველოს ეროვნულ-განმათავისუფლებელი მოძრაობის ამოცანათა ლიტერატურული გამომხატველის როლის შესრულებას რეფორმის წინა ხანაში ცდილობდა „ცისკარი“, რომელსაც იმ დროს ი. კერესელიძესთან ერთად წამყვან თანამშრომლებად ჰყავდა გ. თუმანიშვილი, ლ. არდაზიანი, ა. სავანელი, ა. ორბელიანი, დ. ბაქრაძე, რაფ. ერისთავი, დ. ჭონქაძე, ი. მამაცაშვილი, გრ. ორბელიანი, ა. ფურცელაძე, ა. წერეთელი და სხვ. კონსერვატიზმის და ლიბერალიზმის მიუხედავად, „ცისკარმა“ დიდი როლი შეასრულა ცალკეული რუსული, ევროპული და ქართული განმანათლებლური იდეების გავრცელებაში.

პირველად „ცისკარში“ დაიბეჭდა დ. გურამიშვილის, ი. ბაგრატიონის, ა. ჭავჭავაძის, ნ. ბარათაშვილის, გ. ერისთავის, ი. ჭავჭავაძის, ა. წერეთლის მხატვრული ნაწარმოებები. მის ფურცლებზე დაიწყო ქართული ენის რეფორმა, დამწერლობის გამარტივება. ამასთან „ცისკარმა“ „აკვნობა“ გაუწია იმ ყმაწვილ მწერლებს, რომელთაც მერე, 60-იან წლებში, წინანდელ მწერლებთან ერთად „ისეთი ძლიერი ტალღა ჰკრეს ჩვენს აზრთა დენასა“¹. ახალი, რევოლუციურ-დემოკრატიული თაობის განმანათლებელთა გამოსვლამ და თანამშრომლობამ „ცისკარის“ ფურცლებზე 1861—1867 წლებში გამოაცოცხლა და განაახლა ჟურნალი², თუმცა მან ბოლომდე მაინც ვერ აუწყო ნაბიჯი ახალი ცხოვრების სვლას და ძირითადად კვლავ ლიბერალურ ორგანოდ დარჩა.

1863 წელს ილია ჭავჭავაძის რედაქტორობით გამოვიდა ჟურნალი „საქართველოს მოამბე“, რომლის თანამშრომლები დიდ ქართველ მწე-

¹ ი. ჭავჭავაძე, „ცისკარი“, 1857 წლიდან 1862 წლამდინ (თხ. სრ. კრებული, ტ. III, 1953, გვ. 221).

² ვ. ვახანიძე, ანტონ ფურცელაძის მსოფლმხედველობა, 1958, გვ. 42—50. ა. კალანდაძე, საქართველოს მოამბე, 1963, გვ. 8—11.



ურნ. „საქართველოს მოამბე“.

რალთან და მოაზროვნესთან ერთად იყვნენ კ. ლორთქიფანიძე, დავით ყიფიანი, მ. ჩიქვაძე, პ. ნაკაშიძე, ე. მაღალაშვილი, ს. აბაშიძე, ი. თქო-შკედლიშვილი, გ. წერეთელი, მ. ყიფიანი, ი. ბერიძე, გ. ჩიქოვანი, ს. ბარათაშვილი, ვ. თულაშვილი, ლ. ჯანდიერაშვილი, გ. სულხანიშვილი¹. „საქართველოს მოამბე“ იყო ეროვნულ-განმათავისუფლებელი მოძრაობის ჰუმანისტურ-დემოკრატიული მიმდინარეობის ორგანო, რომელმაც პირველმა დაიწყო სისტემატური სახით განმანათლებლური, ეროვნულ-რევოლუციური და უტოპიურ-სოციალისტური იდეების გავრცელება საქართველოში. უურნალმა მხოლოდ ერთი წელი გასძლო. 1863 წლის მე-12 ნომრით შეწყდა მისი გამოცემა შესაფერი ლიტერატურული მასალის უქონ-

ლობის და უსახსრობის გამო². მაგრამ „საქართველოს მოამბემ“ დიდი გავლენა მოახდინა ქართული დემოკრატიული პრესის, ლიტერატურის და აზროვნების განვითარებაზე 60—70-იან წლებში. მისი პირდაპირი გამგრძელებელი იყო „ივერია“ (1877—1906 წწ.), რომელიც ჯერ ყოველთვიური ურნალის, მერე ყოველდღიური გაზეთის სახით გამოდიოდა ილია ჭავჭავაძის რედაქტორობით. „ივერიის“ გამოცემაში უშუალოდ მონაწილეობდნენ ილია ჭავჭავაძის თანაშემწენი დ. მიქელაძე (მეველე), გ. ყიფშიძე, ა. სარაჯიშვილი, გ. ლასხიშვილი, ფ. გოგიჩაიშვილი და სხვები, ხოლო გაზეთში სხვადასხვა დროს თანამშრომლობდა ეროვნულ-განმათავისუფლებელი მოძრაობის თითქმის ყველა გამოჩენილი მოღვაწე, მათ შორის ჰუმანისტი განმანათლებლები ი. გოგებაშვილი, ა. წერეთელი, ვაჟა-ფშაველა, ხალხოსნები გ. მაიაშვილი, ს. ჭრელაშვილი, ა. ნანეიშვილი, ვ. წერეთელი და სხვ. „ივერია“ იყო ჰუმანისტური და ეროვნულ-დემოკრატიული აზროვნების ნამდვილი ენციკლოპედია, რომელშიც ფართოდ და ღრმად აისახა საქართველოს სოციალ-ეკონომიური, პოლიტიკური და კულტურულ-ლიტერატურული ცხოვრება განსაკუთრებით იმ

¹ ა. კალანდაძე, საქართველოს მოამბე, გვ. 62—64.

² იქვე, გვ. 316—317; იხ. აგრეთვე ა. ხახანაშვილი, ქართული სიტყვიერების ისტორია, 1913, გვ. 220; ი. მეუნარგია, ქართველი მწერლები, გვ. 28.

ნამ მეფის მთავრობა დახურავდა მას, ივანე შაჩაბელი ხელმძღვანელობდა. მათთან ერთად „დროების“ გამოცემაში უშუალოდ მონაწილეობდნენ ნ. ნიკოლაძე, კ. ლორთქიფანიძე, პ. უმიკაშვილი, დ. მიქელაძე (მეველე) და სხვ. მისი უახლოესი თანამშრომელი იყო ა. წერეთელი. 1871—1873 წლებში „დროების“ დამატებად გამოდიოდა ჟურნალი „კრებული“, რომელმაც „დროებასთან“ ერთად დიდი როლი შეასრულა რადიკალურ-დემოკრატიული და უტოპიურ-სოციალისტური იდეების გავრცელებაში. „დროებასთან“ მიმართულებით ახლო იდგნენ „სასოფლო გაზეთი“, რომელიც 1868—1871 წლებში გიორგი წერეთლის, ხოლო 1872—1879 წლებში პეტრე უმიკაშვილის რედაქტორობით გამოდიოდა. „დროების“ იდეების უცენზურო პრესაში თავისუფლად და ბუნებრივად გადმოცემის ნიმუშს წარმოადგენს ნიკო ნიკოლაძის, დავით მიქელაძის და პავლე იზმაილოვის მიერ 1873 წელს პარიზში პექტოგრაფიულად გამოცემული ქართული გაზეთი „დროშა“. რადიკალურ-დემოკრატიული სულისკვეთებითაა გამსჭვალული თბილისური რუსული გაზეთები — კ. ბებუთოვის „ტიფლისკი ვესტნიკი“ (1871—1880 წწ.), ნიკო ნიკოლაძის „ობზორი“ (1878—1880 წწ.), გ. თუმანიშვილის „ნოვოე ობზორენიე“ (1884—1897 წწ.), რომელთა ფურცლებიდან ქართველი დემოკრატები გაბედულად ილაშქრებდნენ ეროვნული და სოციალური ჩაგვრის წინააღმდეგ.

1893—1894 წლებში დაარსებული ქართული პერიოდული ორგანოებიდან „დროება“-„კრებულის“ მემკვიდრეობა იკისრეს დემოკრატიულმა გაზეთებმა „კვალმა“ (1893—1904 წწ.), „ცნობის ფურცელმა“ (1896—1906 წწ.) და ჟურნალმა „მოამბემ“ (1894 წ.), რომლებიც შემდეგ შესამედასელთა და ფედერალისტთა ორგანოები გახდნენ. ეს არც იყო შემთხვევითი. „დროება“ თავისი დროის ეროვნული და დემოკრატიული აზროვნების ცენტრი და ტრიბუნა იყო. მთელი ოცი წლის განმავლობაში ცდილობდნენ „დროების“ მესვეურნი თავიანთი გაზეთის ირგვლივ გაეერთიანებინათ ყველა პატრიოტი და დემოკრატი ეროვნულ-განმათავისუფლებელი მოძრაობის ერთიან რაზმად. ამასთან, თუ ყოველთვიურ ჟურნალ „საქართველოს მოამბეს“, როგორც მისი რედაქტორი ამბობდა, „დროის ინტერესი“ აკლდა, „დროება“ უწინარეს ყოვლისა თანამედროვეობით სუნთქავდა. იგი იყო პირველი ქართული საზოგადოებრივ-ლიტერატურული გაზეთი, რომლის ფურცლებზე მრავალმხრივად აისახა რეფორმის შემდეგდროინდელი ეპოქის საქართველოს საზოგადოებრივი ცხოვრების განვითარების მომწიფებელი მოთხოვნალებანი. 1877 წლიდან ამასვე ემსახურებოდა ილია ჭავჭავაძის „ივერიაც“, მაგრამ მისი პროგრამა რამდენიმედ განსხვავებული იყო „დროების“ პროგრამისაგან. 1880 წელს ს. მესხმა და ი. ჭავჭავაძემ სცადეს ამ განსხვავების უგულვებლყოფა და ეს ორი ორგანო შეაერთეს, მაგრამ ორი წლის შემდეგ კვლავ განცალკევდნენ.

ხალხოსნური მიმართულების ორგანოს ჰგავდა ყოველთვისური სამეცნიერო და სალიტერატურო ჟურნალი „მნათობი“, რომელიც 1869—1872 წლებში გამოდიოდა ნიკოლოზ ავალიშვილის რედაქტორობით. ჟურნალში თანამშრომლობდნენ ა. ფურცელაძე, ნ. ინაშვილი, ს. მგალობლიშვილი, ნ. ლომოური, მ. ქიქოძე, გ. იოსელიანი, დ. ბაქრაძე, გ. ჭალაღიდელი, ა. წერეთელი. ჟურნალი პატრიოტულ და უტოპიურ-სოციალისტურ იდეებს ქადაგებდა. „მნათობის“ გამოცემის შეწყვეტის შემდეგ მისი ერთ-ერთი ფაქტიური რედაქტორი ანტონ ფურცელაძე ივ. კერესელიძის რედაქტორობით ჯერ კიდევ 1862 წლიდან გამომავალ „მამულის პატრონობისა და ვაჭრობის გაზეთს“ — „გუთნის ღედას“ ჩაუდგა სათავეში და არა მარტო აგრონომიული ცოდნის, არამედ დემოკრატიული და უტოპიურ-სოციალისტური იდეების გასაერცვლებლად იყენებდა მას 1876 წლამდე. 1881—1883 წლებში ხალხოსნური სოციალიზმის იდეების სისტემატურ პროპაგანდას ეწეოდნენ ჟურნალი „იმედი“ მ. გურგენიძის რედაქტორობით და გაზეთი „შრომა“ დ. დადიანის რედაქტორობით. „გლეხური მიმართულების“ ამ ორგანოებში თანამშრომლობდნენ უმთავრესად ხალხოსნები ან მათთან ახლომდგომი პუბლიცისტები — რ. ზომლელო, გრ. ვოლსკი, დ. კეზელი, ს. კრელაშვილი, ნ. ხიზანიშვილი, ა. ფურცელაძე, ნ. ხუდადოვი, ე. ბოსლეველი და სხვ.

80—90-იან წლებში გამოსვლას იწყებს პირველი ქართული საბავშვო ჟურნალები — „ნობათი“ ანდრია ლულაძის რედაქტორობით (1883—1885 წწ.) და „ჯეჯილი“, რომელსაც ანასტასია თუმანიშვილი-წერეთლისა რედაქტორობდა (1890—1923 წწ.). ამ ჟურნალებმა, რომლებშიც იმ დროის ყველა გამოჩენილი ქართველი მწერალი თანამშრომლობდა, დიდი როლი შეასრულეს ახალგაზრდობის პატრიოტული და დემოკრატიული სულისკვეთებით აღზრდაში.

ზოგადი ზასიათის ჟურნალ-გაზეთებთან ერთად 80—90-იან წლებში გამრავლდა დარგობრივი ორგანოებიც, რომლებიც მეურნეობის და კულტურის ცალკეულ საკითხებს აშუქებდა. 1887 წელს ი. კერესელიძემ სცადა ძველი „ცისკრის“ აღდგენა და სამეურნეო გაზეთის სახით გამოცემა. 1888—1894 წლებში თბილისში ვასილ სულხანიშვილის რედაქტორობით, ხოლო 1895—1898 წლებში ქუთაისში ილია ჭყონიას რედაქტორობით გამოდიოდა ყოველთვისური ეკონომიური ჟურნალი „მეურნე“. 1883 წელს ეკატერინე ლორთქიფანიძე ქუთაისში ბეჭდავდა სალიტერატურო ჟურნალს „ქართულ ბიბლიოთეკას“. 1889—1891 წლებში მას მოჰყვა სალიტერატურო კრებული „ცდა“, ხოლო 1897—1900 წლებში „აკაკის თვისური კრებული“. 1885—1890 წლებში გამოდიოდა სალიტერატურო და სამხატვრო გაზეთი „თეატრი“, რომელსაც სხვადასხვა დროს რედაქტორობდნენ ვასო აბაშიძე, ვალერიან გუნია და ალ. ნებიერიძე. ვ. გუნია 1888—1898 წლებში რედაქტორობდა აგრეთვე „საქართველოს კალენ-

დარს“, რომელიც ისტორიულ-გეოგრაფიულ და ლიტერატურულ მასალებს აქვეყნებდა. XIX საუკუნის თბილისში გამოდიოდა აგრეთვე რამდენიმე სომხური და აზერბაიჯანული გაზეთი.

XIX საუკუნის მეორე ნახევრის საქართველოს მთელი პროგრესული პრესა, კერძოდ, როგორც ეროვნულ-განმათავისუფლებელი, ისე ხალხოსნური მოძრაობის ჟურნალ-გაზეთები საერთო-დემოკრატიული, ე. ი. არსებითად ბურჟუაზიულ-დემოკრატიული მიმართულების ორგანოები იყო. ცარიზმის კოლონიური პოლიტიკის, ბატონყმობისა და მისი ნაშთებს რევოლუციურ-დემოკრატიული კრიტიკა და ახალ საზოგადოებრივ ურთიერთობათა საფუძველზე მთელი ერის, მისი მშრომელი უმრავლესობის ეკონომიურ, პოლიტიკურ და კულტურულ ინტერესთა უტოპიური დაცვა იყო მათი ძირითადი შინაარსი XIX საუკუნის მეორე ნახევარში. იმდროინდელმა დემოკრატიულმა პრესამ ნიადაგი მოუშადა კლასობრივი ბრძოლის პროლეტარული პერიოდის ჟურნალ-გაზეთებს¹.

პრესასთან ერთად იზრდებოდა ქართული წიგნის გამოცემაც. მხოლოდ 1851—1867 წლებში დაიბეჭდა იმაზე მეტი ქართული წიგნი, რაც წინა 50 წლის მანძილზე. თუ წინათ რამდენიმე წლის განმავლობაში საშუალოდ ერთი წიგნი გამოდიოდა, 60-იან წლებში ყოველწლიურად 5—12 წიგნი იბეჭდებოდა, შემდეგ კი რამდენიმეჯერ მეტი. 1868 წელს დაიბეჭდა 11 სახელწოდების ქართული წიგნი, 1878 წელს — 45, 1893 წელს — 93, 1899 წელს — 112. XIX საუკუნის მარტო უკანასკნელ ათწლეულში თითქმის იმდენივე ქართული წიგნი დაიბეჭდა, რამდენიც მთელი აღრინდელი 275 წლის მანძილზე. უაღრესად გაფართოვდა ქართული წიგნის მკითხველთა წრე. ცოდნას დაეწაფა ხალხის დაბალი ფენებიდან გამოსული ახალგაზრდობა. წიგნი საყოველთაო სიყვარულისა და ზრუნვის საგანი ხდებოდა. ბეჭდვითი სიტყვა ნათლად გამოხატავდა საზოგადოებრივი მოძრაობის აჩქარებულ მაჩისცემას. ყველაზე მეტი წიგნი სახელმძღვანელოთა სახით იბეჭდებოდა. 1868—1892 წლებში 100 სახელწოდების ქართული სახელმძღვანელო გამოვიდა. დიდი ყურადღება ექცეოდა ძველი და ახალი ქართული ლიტერატურის კლასიკურ ძეგლთა გამოცემას, უცხოელ კლასიკოსთა ნაწარმოებების თარგმნას, ჰუმანიტარული და საბუნებისმეტყველო ხასიათის მეცნიერულ ნაშრომთა გამოქვეყნებას. გრძელდებოდა მისი საქართველოს გარეთ გამოცემის ტრადიცია, მაგრამ ქართული წიგნის გამოცემის ძირითადი კერები თვითონ საქართველოში შეიქმნა. თბილისი კვლავ ხდება ქართული წიგნის გამოცემის უმთავრესი ცენტრი. ბევრი წიგნი გამოდიოდა ქუთაისში და საქართველოს თითქმის ყველა პროვინციულ ცენტრში².

¹ შდრ. ვ. ი. ლენინი, თხზ., ტ. 20, გვ. 301.

² ქართული წიგნი, 1, 1941, გვ. XVI, XXI.

ქართული პრესისა და წიგნის გამოცემის მანამდე არნახული განვითარება საზოგადოებრივი ცხოვრების წინსვლისა, ხალხის ფართო მასების გამოღვიძების, ეროვნულ-განმათავისუფლებელი მოძრაობის გაძლიერების, მისი მეთაურების — გამოჩენილი ქართველი მწერლებისა და განმანათლებლების — თავდადებული მოღვაწეობის შედეგი იყო. ცარიზმი ყოველნაირად ცდილობდა დაებრკოლებინა ქართული კულტურის ამ უმნიშვნელოვანესი დარგის განვითარება, უარს ეუბნებოდა ეროვნულ-განმათავისუფლებელი მოძრაობის მოღვაწეებს დემოკრატიული ჟურნალ-გაზეთებისა და წიგნების გამოცემაზე, აწესებდა უმკაცრეს ცენზურას, ხურავდა გაზეთებს, სჯიდა რევოლუციურ-დემოკრატიული იდეების მქადაგებელ რედაქტორებს და პუბლიცისტებს. მეფის მთავრობის მოხელეებმა ნება არ მისცეს ნ. ნიკოლაძეს გამოეცა გაზეთები „რიონი“ და „კანდელი“ ქართულ ენაზე. ასევე მოექცნენ ისინი აკაკი წერეთელს 80-იან წლებში. ცენზურა ამახინჯებდა დემოკრატიული მოღვაწეთა ნაწერებს. მეფის მთავრობამ დახურა გაზეთი „ობზორი“ 1880 წელს, გაზეთი „დროება“ 1885 წელს, რვა თვით შეაჩერა გაზეთ „ივერიის“ გამოცემა 1895 წელს. წლების მანძილზე პოლიციური მეთვალყურეობის ქვეშ იმყოფებოდა „ივერიის“ რედაქტორი ი. ჭავჭავაძე, „ობზორის“ რედაქტორი ნ. ხიკოლაძე. ცარიზმი ეჭვის თვალით უყურებდა ყველა დემოკრატიული ჟურნალისტს, რომელნიც არ ეთანხმებოდნენ თვითმპყრობელურ-კოლონიური ჩაგვრის და ძალადობის პოლიტიკას. ამგვარ მძიმე ვითარებაში იქმნებოდა და ვითარდებოდა XIX საუკუნის მეორე ნახევრის ქართული ბეჭდვითი სიტყვა, რომელიც ძლევდა ყოველგვარ დაბრკოლებას და რაზმავდა ხალხს ეროვნული და სოციალური ჩაგვრის წინააღმდეგ საბრძოლველად.

§ 5. განათლება და მშენიარება

განათლება. მეფის მთავრობის კარიერისტი და რუსიფიკატორი მოხელენი, რომლებმაც არც იცოდნენ და არც სურდათ სკოლნოდათ საქართველოს მრავალსაუკუნოვანი კულტურა და განათლება, ქართველ ხალხს უკულტურობას აბრალებდნენ და თავს „საქართველოში განათლების პირველი სხივების შემომტანად“ ასალებდნენ.

რუსეთთან საქართველოს შეერთებისთანავე მეფის მთავრობამ გააუქმა ქართული ეროვნული სასწავლებლები და რუსული სკოლების დაარსებას შეუდგა. პირველი ასეთი სკოლა იყო ორკლასიანი დაწყებითი სასწავლებელი, რომელიც თბილისში დაარსდა 1802 წლის 22 სექტემბერს და მალე დაიხურა, რადგან მოწაფეებმა რუსულ ენაზე სწავლა ვერ შეძლეს. 1804 წელს გაიხსნა თბილისის კეთილშობილთა სასწავლებელი, რომელიც თა-

ვიდან ორკლასიანი იყო, 20-იანი წლებიდან ექვსკლასიანად გადაკეთდა, ხოლო 1830 წელს გიმნაზიად. ჩვენში ეს იყო პირველი ოფიციალური საერო სკოლა, სადაც აღიზარდნენ არა მარტო სამოქალაქო და საშხედრო მოხელენი, არამედ ქართული კულტურის გამოჩენილი მოღვაწენიც — გ. ორბელიანი, დ. ყიფიანი, ნ. ბარათაშვილი და სხვები. 1850 წელს გიმნაზია ქუთაისშიც გაიხსნა, ხოლო თბილისის პირველ გიმნაზიას მეორე, კომერციული გიმნაზიაც მიემატა. უფრო ადრე თბილისში დაარსდა ქალთა პირველი სკოლა-პანსიონი, რომელიც 1840 წელს ქალთა ინსტიტუტად გადაკეთდა. პანსიონები არსებობდა ვაჟთა გიმნაზიებთანაც. 50—60-იან წლებში თბილისისა და ქუთაისის გიმნაზიები დაამთავრეს გამოჩენილმა მწერლებმა და მოღვაწეებმა ი. ჭავჭავაძემ, ა. წერეთელმა, ნ. ნიკოლაძემ, გ. წერეთელმა, ს. მესხმა, ალ. ყაზბეგმა და სხვ. 1830 წელს საქართველოს შვიდ მაზრაში გაიხსნა დაწყებითი სასწავლებლები, რომლებსაც აგრეთვე საერო ხასიათი ჰქონდა. ეკლესიის მსახურთა მოსამზადებლად ცარიზში აარსებდა სასულიერო სასწავლებლებს. 1817 წელს გაიხსნა რუსული სასულიერო სემინარია თბილისში. 1818 წლიდან დაიწყეს სასულიერო სამაზრო და სამრევლო სასწავლებლების გახსნაც. სემინარი-აში ყველა წოდების ახალგაზრდებს ღებულობდნენ. იგი პრაქტიკულ ცოდნასაც უფრო მეტს. იძლეოდა, ვიდრე გიმნაზია. ამიტომ ხალხი მას უფრო ეტანებოდა. სხვადასხვა დროს თბილისის სემინარია დაამთავრეს ს. დოდაშვილმა, დ. ბაქრაძემ, ი. გოგებაშვილმა, დ. ჭონქაძემ, ნ. ლომოურმა, ალ. ცაგარელმა, ვ. პეტრიაშვილმა, ქართული კულტურისა და მეცნიერების ბევრმა სხვა გამოჩენილმა წარმომადგენელმა. გიმნაზიებსა და სემინარიებში სწავლა რუსულად მიმდინარეობდა, მაგრამ 60-იან წლებამდე ქართულ ენასა და ლიტერატურასაც ასწავლიდნენ, ზოგი სხვა საგანიც თავდაპირველად ქართულად ისწავლებოდა.

ცარიზში ნაკლებად ზრუნავდა სკოლებზე. 30-იან წლებამდე ზემოხსენებული სასწავლებლების შესანახად მთავრობას არც ერთი კაპიკი არ დაუხარჯავს. ისინი ადგილობრივი სახსრებით არსებობდნენ. სწავლისაკენ ხალხის სწრაფვა კი იზრდებოდა. ქალაქებსა და მსხვილ დაბებში აღმოცენება იწყეს კერძო სკოლებმა და პანსიონებმა, რომლებშიც შეძლებულნი სწავლობდნენ. 40-იანი წლებისათვის ძლიერ ცოტა იყო სასოფლო სკოლები გლეხობისათვის, განსაკუთრებით დასავლეთ საქართველოში. 1860 წელს საქართველოში იყო ყველა ტიპის 145 დაწყებითი და საშუალო სასწავლებელი, რომლებშიც 7 850 მოსწავლე ირიცხებოდა, ე. ი. ყოველი ათასი მცხოვრებიდან მხოლოდ 9—10 კაცი სწავლობდა.

გარდა იმისა, რომ სასწავლო ასაკის ახალგაზრდობის უდიდესი უმრავლესობა სკოლის გარეთ რჩებოდა, თვით სწავლა-აღზრდის პროცესიც წშირად არაღამაქმყოფილებელი იყო. როგორც სახელმწიფო, ისე განსა-

კუთრებით საეკლესიო და კერძო სკოლები ბევრ შემთხვევაში მოკლებულნი იყვნენ ელემენტარული მეთოდოლოგიური მომზადების მასწავლებლებსაც კი, რადგან პედაგოგთა კადრების მომზადებელი სპეციალური სასწავლებლები არ არსებობდა¹. იყვნენ კარგი მასწავლებლებიც, მაგრამ განათლების საქმე უმთავრესად მიწოდებული ჰქონდათ კანცელარიის მონელებს, დიაკვნებს, ნასალდათარ ადამიანებს. გიმნაზიებსა და სემინარიებში გამეფებული იყო პოლიციური რეჟიმი და უაზრო ზეპირობა, როზგი და „ლინეიკა“. სკოლები არ მარავდებოდა სათანადო სახელმძღვანელოებით და სასწავლო ინვენტარით. ცარცისა და დაფის მაგივრობას ხშირად კვლავ ნახშირი და მამაპაპური ხარის ბეჭის ძვალი ეწეოდა.

სკოლების სიმცირის და ხელმიუწვდომლობის გამო სწავლის წყურვილს დაბალი ხალხი კვლავაც სწავლა-აღზრდის ხალხური, ახალი დროისათვის უკვე შეუფერებელი საშუალებებით იკლავდა. საშინაო აღზრდაში მთავარი ადგილი ძველებურ ოსტატს, მღვდელს ან მეოჯახე ქალს ეკირა. წერა-კითხვასთან ერთად ისინი ხელობასაც ასწავლიდნენ. სპარტანული ფიზიკური აღზრდა წესად იყო. ქალებს სკოლებშიც კი უფრო მეტს ასწავლიდნენ, ვიდრე ვალებს. აქა-იქ შემორჩენილი იყო ბავშვის გაბარება-გაძიძების წესიც. სასწავლებელში ბავშვის პირველი წასვლა დღესასწაულს ჰგავდა. სკოლაში წასვლის წინ ბავშვს მდინარე წყალში ჩააყენებდნენ, ხელში წიგნს მისცემდნენ და „წყალივით კითხვას“ დაუბედებდნენ. ოჯახებში არსებობდა „ზეპირი სკოლები“, რომლებშიც „ვეფხისტყაოსანს“, „დავითიანს“, ზღაპრებს თუ ლექსებს სწავლობდნენ. საშინაო სკოლის აღმზრდელი „პროფესიული“ შემოსავლით ნაკლებ იყო დაინტერესებული, მას უფრო მეტად გაზრდილის გაზრდილობა ეამყებოდა. მოსწავლის ფიზიკური დასჯა არ ითვლებოდა აღზრდის საშუალებად².

რა მიმზიდველიც არ უნდა ყოფილიყო ქართული ხალხური აღზრდის ზოგი ძველი ტრადიცია, იგი XIX საუკუნის პირველ ნახევარში საქართველოში დამკვიდრებულ, დაბალ პედაგოგიკურ კულტურაზე დამყარებულ თვითმპყრობელურ-კოლონიურ საგანმანათლებლო სისტემასთან შედარებითაც კი ჩამორჩენილი ჩანდა. ხალხი სულ უფრო და უფრო რწმუნდებოდა სწავლა-განათლების ახალი მეთოდების უპირატესობაში და სკოლისაკენ მიილტვოდა. ცარიზმი ვერ აკმაყოფილებდა ხალხის მისწრაფებას განათლებისაკენ, მაგრამ საზოგადოებრივი ცხოვრების განვითარება და მოწინავე დემოკრატიული პედაგოგიკური აზროვნების თეორეტიკოსთა ბრძოლა აიძულებდა მას განათლების სისტემის ლიბერალური რეფორმა მაინც გაეტარებინა 60-იანი წლების რევოლუციური აღმავლო-

¹ გ. თ ა ვ ზ ი შ ვ ი ლ ი , სახალხო განათლებისა და პედაგოგიური აზროვნების ისტორია საქართველოში, ტ. II, 1948, გვ. 146.

² იქვე, გვ. 211—233.

ბის საპასუხოდ. ხალხი სახალხო და სასარგებლო ცოდნის მომცემ სკოლას. მოითხოვდა. 1864 წლის დებულებით დაწყებითი სახალხო სკოლების დაარსების უფლება მიეცა ყველა ადგილობრივ ორგანოს და კერძო პირს. სახალხო სკოლა შეიძლება ყოფილიყო სხვადასხვა ტიპისა, ხოლო მისი მოსწავლენი ყველა წოდებისანი.

კავკასიის სასწავლებელთა 1867 წელს დამტკიცებული ახალი დებულებით სასწავლებელთა მმართველობა შეიცვალა. ადრე კავკასიის სასწავლებლები ჯერ ყაზანის სასწავლო ოლქში, მერე ხარკოვის, 1853 წლიდან 1860 წლამდე კი კავკასიის დამოუკიდებელ სასწავლო ოლქში შედიოდნენ. ამ წელს კავკასიის დამოუკიდებელი სასწავლო ოლქი გააუქმეს და სასწავლებელთა ხელმძღვანელობა გუბერნატორებს დააკისრეს. 1864 წელს ოლქი კვლავ აღდგენილ იქნა, ხოლო 1867 წლის დებულებით სკოლებში რუსული ენის სწავლების გაფართოებასთან ერთად შემოღებულ იქნა ქართული ენის სწავლება, თუმცა ამისგან თავისუფლებოდნენ არაქართველი მოსწავლენი. 1873 წლის დებულებით ქართული ენა საშუალო სასწავლებელთა პროგიმნაზიულ კლასებში დატოვეს და ისიც არასავალდებულო საგნის სახით. სახალხო სკოლებში ქართულ ენაზე სწავლების საჭიროება მეფის მოხელეებს მაშინაც არ უარუყვიათ, მაგრამ სინამდვილეში ეს ხშირად არ სრულდებოდა. 1881 წლიდან კი მეფის მთავრობამ გადაწყვიტა დაწყებითი სკოლებიდანაც განედევნა მშობლიური ენა. ქართველი პატრიოტები და დემოკრატები, კერძოდ, გამოჩენილი პედაგოგები იაკობ გოგებაშვილი, ნიკო ცხვედაძე, ილია წინამძღვრიშვილი, ანთიმოზ ჯუღელი, ლუარსაბ ბოცვაძე, ივანე როსტომაშვილი თავგანწირულად იბრძოდნენ ქართული დაწყებითი სკოლის სრული რუსიფიკაციის თვითმპყრობელური გეგმის წინააღმდეგ, მაგრამ ბრძოლა მთავრობის გამარჯვებით დამთავრდა. 80-იანი წლების ბოლოს და 90-იანი წლების დამდეგიდან ქართული ენა თითქმის საბოლოოდ განდევნეს დაწყებითი სკოლებიდანაც.

მეფის მთავრობის რუსიფიკატორული საგანმანათლებლო პოლიტიკის მიუხედავად, XIX საუკუნის მეორე ნახევრის საქართველოში სწავლავანათლება საგრძნობლად გაფართოვდა. გაიზარდა სკოლების რიცხვი, გარდაიქმნა ძველი და შეიქმნა ახალი სკოლები როგორც ზოგადსაგანმანათლებლო, ისე პროფტექნიკური, ვაჟებისა და ქალებისათვის. თბილისის მეორე გიმნაზია რეალურ გიმნაზიად გადაკეთდა, პირველი კი ნახევრად-კლასიკურ გიმნაზიად. დაარსდა სახელოსნო სასწავლებლები, გამრავლდა ელემენტარული (დაწყებითი) სკოლები, აგრეთვე პანსიონები, მუსიკალური და სამხატვრო სკოლები. შეიქმნა სკოლამდელი და სკოლისგარეშე აღზრდის დაწესებულებანი (საბავშვო ბაღები და საკვირაო სკოლები), პედაგოგიკური სასწავლებლები. შემუშავდა და მკვიდრდებოდა აღზრდის ახალი თეორია და მეთოდოლოგია. 1865 წლის დამლევისათვის საქართველოში

არსებობდა ყველა ტიპის 251 სკოლა, რომლებშიც 11 868 მოსწავლე სწავლობდა. XIX საუკუნის დასასრულისათვის მოსწავლეთა რაოდენობა ბევრად უფრო მეტი იყო. მნიშვნელოვნად გაფართოვდა სასკოლო ქსელიც, განსაკუთრებით XX საუკუნის დამდეგიდან. 1901—1902 წლებში საქართველოში არსებობდა 420 დაწყებითი სკოლა და 10-ზე მეტი საშუალო სასწავლებელი, 1913 წელს კი მათი რიცხვი შესაბამისად 773-მდე და 34-მდე გაიზარდა¹. მიუხედავად იმისა, რომ ახლაც სასკოლო ასაკის ბავშვთა ორი მესამედი სკოლის გარეთ რჩებოდა, ამ დროს წერა-კითხვის-მცოდნეთა რიცხვის მიხედვით საქართველოს მოწინავე ადგილი ეკავა რუსეთის იმპერიაში. დიდი კულტურული ტრადიციების მქონე ქართველი ხალხის ბრძოლას განათლებისათვის ცარიზმის წინააღმდეგ უნაყოფოდ არ ჩაუვლია. ხალხის სწავლა-აღზრდის წინსვლის საქმეს აჩქარებდნენ ღივი განმანათლებლები და გამოჩენილი პედაგოგები.

სახალხო განათლების ქსელის გაფართოების საქმეში რეფორმის შემდეგ დიდი წვლილი შეიტანა ბატონყმობისაგან განთავისუფლებულმა, სწავლამოწყურებულმა გლეხობამ, რომელიც არავითარ ხარჯს არ ერიდებოდა, ოღონდ შვილებისათვის დაწყებითი განათლება მაინც მიეცა. ხალხის მნიშვნელოვან ნაწილს დაწყებითი სკოლაც აღარ აკმაყოფილებდა. ცარიზმის მიერ შევიწროებული სამწლიანი სკოლა, რომელშიც ხშირად სრულიად მოუძნალებელი და შეუფერებელი ადამიანები მასწავლებლობდნენ, ახალგაზრდობას ვერ აძლევდა საჭირო ზოგად და სპეციალურ განათლებას. ბევრად უკეთესი მდგომარეობა არ იყო არც გიმნაზიებსა და სამაზრო სასწავლებლებში, რომლებსაც მოსწავლეთა მცირე რიცხვი თუ ამთავრებდა.

ჩამორჩენილ სკოლაზე გულაყრილი და ღარიბი ხალხი განათლების მიღებას თვითგანვითარების გზით ცდილობდა. არასასკოლო სასწავლო დაწესებულებათა შექმნა საქართველოში 30-იანი წლებიდან დაუწყიათ. ამ დროს დაარსებულა პირველი კერძო საჯარო ბიბლიოთეკა. ბიბლიოთეკები არსებობდა სხვადასხვა დაწესებულებებთანაც, მაგრამ ისინი მხოლოდ მაღალი ფენებისათვის იყო ხელმისაწვდომი. 40-იანი წლების დასაწყისში ბიბლიოთეკა გაუხსნია ქართველი ინტელიგენციის ჯგუფს დიმიტრი ყიფიანის ხელმძღვანელობით. პირველი სახაზინო საჯარო ბიბლიოთეკა 1846—1848 წლებიდან არსებობდა, მაგრამ იგი მოსახლეობის ფართო ფენებს არასდროს მომსახურებია. 70-იანი წლებიდან ხალხი თვითგანათლებას იძენდა იაფფასიანი ლიტერატურით, რომელსაც ბეჭდავდა პოპულარული წიგნის ბევრი გამომცემელი (პ. უმიკაშვილი, ზ. ჭიჭინაძე და სხვ.). ამგვარი გამომცემანი ხშირად სათანადო დონეზე არ იდგა, მაგრამ

¹ გ. თ ა ვ ზ ი შ ვ ი ლ ი, სახალხო განათლებისა..., გვ. 416. საქართველოს ისტორია, ნ. ბერძენიშვილის რედ., ტ. II, 1962, გვ. 400.

ღარიბი ხალხი მათ მაინც ეტანებოდა. 70-იან წლებში დიდი პოპულარობით სარგებლობდა ქართველი ინტელიგენციის მიერ დაარსებული ივანოვის ბიბლიოთეკა თბილისში და ანტონ ლორთქიფანიძისა ქუთაისში, რომლებიც არსებითად განათლებული ახალგაზრდობის არაოფიციალურ კლუბებსაც წარმოადგენდნენ. მეფის მოხელეთა მიერ დევნა-შევიწროების მიუხედავად, 90-იანი წლებისათვის საქართველოს ქალაქები, დაბები და დიდი სოფლები მოფენილი იყო ბიბლიოთეკა-სამკითხველოთა საკმაოდ ფართო ქსელით. უფრო ადრე ქართული კულტურის მოღვაწეებმა შემოიღეს ლექციების საჯარო კითხვა, რომლებიც ხალხში დიდ ინტერესს იწვევდა. საჯარო ლექციებით გამოდიოდნენ ივანე თარხნიშვილი, გიორგი წერეთელი, აკაკი წერეთელი და სხვ. 60-იან წლებში დაარსდა და 90-იან წლებში ფართოდ გავრცელდა საკვირაო სკოლები, რომლებიც სამრევლო სკოლათა სასწავლო გეგმით ხელმძღვანელობდა და ქართულ ენაზე სწავლებას მნიშვნელოვან ადგილს უთმობდა. ცარიზმი ცდილობდა საკვირაო სკოლებიც რუსულ სკოლებად და გარუსების პოლიტიკის დასაყრდენად გადაექცია, მაგრამ უშედეგოდ. საკვირაო სკოლებში, ისევე როგორც რიგ ბიბლიოთეკა-სამკითხველოებსა და სასკოლო დაწესებულებებში XIX საუკუნის მეორე ნახევრას მანძილზე იზრდებოდა ეროვნულ-რევოლუციური და დემოკრატიული სულისკვეთებით გამსჭვალული არაერთი საზოგადო მოღვაწე.

საზოგადოებრივი ცხოვრების განვითარება და საშუალო განათლების გაფართოება უკვე XIX საუკუნის პირველ ნახევარში აუცილებელს ხდიდა ქართული უმაღლესი სასწავლებლის დაარსებას. საქართველოში უმაღლესი განათლების მრავალსაუკუნოვანი ტრადიცია განახლებას და განვითარებას საჭიროებდა. წინადადება თბილისის, თელავის და გორის უმაღლესი სასწავლებლების დაარსების შესახებ ჯერ კიდევ 1799 წელს აქნა წამოყენებული. მეფის მთავრობა თვით რუსეთშიც არ ზრუნავდა უმაღლესი განათლების განვითარებაზე, კოლონიურ საქართველოში კი 30-იან წლებამდე გიმნაზიაც არ დაუარსებია, რომ მის აღზრდილებს უფლება ჰქონოდათ უმაღლესი სასწავლებლის ნამდვილი სტუდენტები ყოფილიყვნენ. მეფის მოხელეებს „ველურ“ საქართველოში უმაღლესი სკოლის დაარსების წარმოდგენაც კი არ შეეძლოთ. მაგრამ 1832 წლის შეთქმულებამ ისინი აიძულა თბილისის გიმნაზიის ხუთიოდე კურსდამთავრებულისათვის მაინც მიეცათ რუსეთის უნივერსიტეტებში შესვლის უფლება, 1839 წელს კი, თბილისში „უნივერსიტეტისმაგვარი“ სასწავლებლის დაარსების შესახებაც იშუამდგომლეს იმპერატორთან. ეს იშუამდგომლობა პეტერბურგში ნაადრევად მიიჩნიეს, სამაგიეროდ 1849 წელს რუსეთის უმაღლეს სასწავლებლებში კავკასიიდან ყოველწლიურად ზუთას ნაცვლად 160 სტაპენდიანტის გაგზავნა დააწესეს. ამავე დროიდან


მოსკოვისა და პეტერბურგის უნივერსიტეტებში კავკასიელ სტუდენტთათვის ქართული ენის სწავლება შემოიღეს. 1854 წელს პეტერბურგის უნივერსიტეტის აღმოსავლეთის სიტყვიერების განყოფილება გადაკეთდა დამოუკიდებელ ფაკულტეტად, რომელთანაც ქართული ენისა და ლიტერატურის კათედრა დაარსდა. თბილისში უმაღლესი სასწავლებლის დაარსებაზე ალაპარაკდნენ ოფიციალური წრეებიც. 1857 წელს შეადგინეს ამიერკავკასიის ლიცეუმის გახსნის პროექტი, მაგრამ მეფის მთავრობამ მისი განხორციელება კვლავ ნაადრევად მიიჩნია.

ქართველ ხალხს და მის დემოკრატიულ ინტელიგენციას მთელი XIX საუკუნის მანძილზე არ შეუწყვეტია ბრძოლა უმაღლესი სასწავლებლის დაარსებისათვის. განმანათლებელ-დემოკრატებმა 1871 წელს თბილისში ჩამოსული იმპერატორისათვის მისართმევად გამზადებულ ადრესში უნივერსიტეტის გახსნის მოთხოვნის შეტანა გადაწყვიტეს. გავლენიანმა კონსერვატორებმა იგი კადეტთა კორპუსის მოთხოვნით შეცვალეს, მაგრამ ამის გამო ატეხილი საჯარო კამათი 90-იან წლებამდე არ შეწყვეტილა. XX საუკუნის დამდეგს მომავალი უნივერსიტეტისათვის შენობაც კი ააგეს, მაგრამ რუსეთის თვითმპყრობელობა ისე დაემხო, რომ ქართველ ხალხს უმაღლესი სასწავლებელი არ აღიარა.


ცარიზმის მიერ შექმნილ დაბრკოლებათა მიუხედავად, ქართველი ახალგაზრდობის მცირერიცხოვანი ნაწილი XIX საუკუნეში მაინც ახერხებდა უმაღლესი განათლების მიღებას. იგი არც მკაცრ კლიმატურ პირობებს უშინდებოდა, არც გზის სიშორეს და პეტერბურგის, მოსკოვის, კიევის, ოდესის, ყაზანის უმაღლეს სასწავლებლებში ეუფლებოდა რუსული და ევროპული მეცნიერებისა და კულტურის მიღწევებს. 30-იანი წლებიდან 90-იან წლებამდე რუსეთის უნივერსიტეტებსა და სპეციალურ უმაღლეს სასწავლებლებში მიიღო განათლება საქართველოს ეროვნულ-განმათავისუფლებელი მოძრაობისა და ქართული კულტურის მრავალმა გამოჩენილმა მოღვაწემ.

მეცნიერება. ახალი ქართული მეცნიერება XVIII საუკუნის მეორე ნახევარში ჩაისახა. მისი ფუძემდებელნი იყვნენ ისტორიკოსი და გეოგრაფოსი ვახუშტი ბაგრატიონი, ფილოსოფოსი ანტონ ბაგრატიონი, სოციოლოგი ალექსანდრე ამილახვარი და სხვ. XIX საუკუნის დამდეგს ადრინდელ ქართველ განმანათლებელთა მეორე თაობის წარმომადგენლებმა დავით ბაგრატიონმა, იოანე ბაგრატიონმა, სოლომონ დოდაშვილმა და სხვებმა გააღრმავეს წინამორბედთა მეცნიერული საქმიანობა.

იოანე ბაგრატიონმა (1772—1830 წწ.) თხუთმეტი წლის დაუღალავი შრომის შედეგად შექმნა ახალი დროის ქართული მეცნიერული ენციკლოპედია („კალმასობა“) და მრავალი ლექსიკოლოგიური, ისტორიოგრაფიული და სხვა ხასიათის ნაშრომი. დავით ბაგრატიონმა (1767—1819 წწ.)



მარი ბროსე.




დავით ჩუბინაშვილი.

რამდენიმე მეცნიერული ნაშრომი მიუძღვნა სამშობლოს ისტორიას („საქართველოს ისტორია“, „ახალი ისტორია“ და სხვ.). ისტორიოგრაფიასთან ერთად იგი საბუნებისმეტყველო მეცნიერებათა დარგშიც მუშაობდა. მის კალამს ეკუთვნის ფიზიკის სახელმძღვანელო, რომელშიც გათვალისწინებულია მაშინდელი მეცნიერების მონაპოვარი ამ დარგში. სოლომონ ღოდაშვილმა (1805—1836 წწ.) ჯერ კიდევ სტუდენტობის წლებში დაწერა და 1827 წელს გამოსცა ფილოსოფიური ნაშრომი „ლოგიკა“, რომელსაც მთელი რუსეთის საშუალო სასწავლებლებში სახელმძღვანელოდ იყენებდნენ. 1830 წელს მან გამოაქვეყნა აგრეთვე საენათმეცნიერო ნაშრომი („შემოკლებული ქართული გრამატიკა“) და შეადგინა ქართული წერის დედანი. იგი ქართული ლიტერატურის ისტორიასაც იკვლევდა. პეტრე რომანის ძე ბაგრატიონმა (1818—1876 წწ.) აღმოაჩინა მინერალ ორთიტის ახალი სახეობა („ბაგრატიონიტი“), შეიმუშავა ოქროს შოპოვება-დამუშავების (ციანიდების) რაციონალური ხერხი და გამოიგონა ახალი გალვანური ელემენტი, რითაც მნიშვნელოვანი წვლილი შეიტანა ფიზიკის განვითარებაში. თეიმურაზ ბაგრატიონი (1782—1846 წწ.) რუსეთის მეცნიერებათა აკადემიის საპატიო წევრად იყო არჩეული მეცნიერული ნაშრომებისათვის საქართველოს ისტორიისა („ივერიის ისტორია“)

და რუსთველოლოგიის დარგში. მარი ბროსემ (1802—1880 წწ.), რუსეთის მეცნიერებათა აკადემიის ნამდვილმა წევრმა, მრავალი ისტორიულ-ფილოლოგიური ნაშრომი (მაგალითად, „საქართველოს ისტორია“) გამოაქვეყნა საქართველოს კულტურული წარსულის შესახებ. მან ბ. ფალავანდიშვილთან და დ. ჩუბინაშვილთან ერთად 1841 წელს მეორედ გამოსცა შოთა რუსთაველის „ვეფხისტყაოსანი“. დავით ჩუბინაშვილმა (1814—1891 წწ.), პეტერბურგის უნივერსიტეტის აღმოსავლური ენებისა და სიტყვიერების ქართული ენისა და ლიტერატურის კათედრის პროფესორმა, შეადგინა ქართულ-რუსულ-ფრანგული, ქართულ-რუსული და რუსულ-ქართული ლექსიკონები, ქართული ლიტერატურის ქრესტომათია და ქართული ენის გრამატიკა. 50-იან წლებში მან პირველმა წამოაყენა ქართული ანბანის რეფორმის იდეა. პლატონ იოსელიანმა (1809—1875 წწ.) მრავალრიცხოვან ისტორიულ-ფილოლოგიურ ნაშრომებში გადმოსცა საქართველოს მდიდარი წარსულის ამსახველი ფაქტები. ამ მხრივ საყურადღებოა ვ. ბაგრატიონის, სულხან ბარათაშვილის ისტორიული ნაშრომებიც. გერასიმე ქიქოძემ 1858 წელს გამოაქვეყნა ვრცელი მეცნიერული ნაშრომი „ცდასეული ფსიქოლოგიის საფუძვლები“, რომელშიც მოცემულია იმ დროის საბუნებისმეტყველო მეცნიერების ფილოსოფიურ-ფსიქოლოგიური განზოგადება, „ქეშმარიტ“ რელიგიასთან ერთად მეცნიერების განვითარების საჭიროების დასაბუთება.

დიმიტრი ბაქრაძემ (1827—1890 წწ.), რუსეთის მეცნიერებათა აკადემიის წევრ-კორესპონდენტმა, მრავალი გამოკვლევა გამოაქვეყნა საქართველოს კულტურის, პოლიტიკური ისტორიის და არქეოლოგიის საკითხებზე („კავკასია ქრისტიანობის ძველ ძეგლებში“, „ქართული პალეოგრაფია“, „არქეოლოგიური მოგზაურობა გურიასა და აჭარაში“, „ისტორია საქართველოსი უძველესი დროიდან მე-10 საუკუნემდე“ და სხვ.). მან პირველად გამოსცა ვახუშტი ბაგრატიონის „აღწერა სამეფოსა საქართველოსა“, აღმოაჩინა და გამოაქვეყნა იოანე ბაგრატიონის „კალმასობა“. დ. ბაქრაძის თაოსნობით დაარსდა საეკლესიო მუზეუმი ქართული ისტორიული ძეგლებისა და ხელნაწერების დასაცავად. მისი მონაწილეობით ჩამოყალიბდა აგრეთვე „კავკასიის არქეოლოგიის მოყვარულთა საზოგადოება“, რომელმაც აღწერა ძველი საქართველოს მატერიალური კულტურის არაერთი ძეგლი. ამ საზოგადოების წინადადებით 1881 წელს თბილისში ჩატარდა რუსეთის არქეოლოგთა მე-5 ყრილობა, რამაც ხელი შეუწყო საქართველოს ისტორიის და არქეოლოგიის საფუძვლიანი შესწავლის დაწყებას. იაკობ გოგებაშვილმა (1840—1913 წწ.) შექმნა დაწყებოთი სკოლის მეცნიერული სახელმძღვანელოები „ქართული ანბანი და პირველი საკითხავი წიგნი შოსწავლეთათვის“ (1865 წ.), „ბუნების კარი“ (1868 წ.), „დედა ენა“ (1876 წ.), „რუსსკოე სლოვო“ (1887 წ.). მოსე ჯანაშვილმა (1855—

1934 წწ.) მეცნიერულად გამოსცა ძველი ქართული მწერლობის მრავალი ძეგლი, 1884 წელს კი გამოაქვეყნა საქართველოს ისტორიის სახელმძღვანელო. 90-იან წლებში გამოაქვეყნდა თედო ჟორდანის „ქრონიკების“ ერთი ნაწილი, აგრეთვე ნიკო მარის, ივანე ჯავახიშვილის, ექვთიმე თაყაიშვილის, თედო სახოკიას პირველი სამეცნიერო ნაშრომები. ალექსანდრე ცაგარელი (1844—1929 წწ.), პეტერბურგის უნივერსიტეტის დამსახურებული პროფესორი, დ. ჩუბინაშვილის შემცველი ქართული ენის კათედრაზე, მრავალმხრივ მუშაობას ეწეოდა ქართული ენის, ლიტერატურის და საქართველოს ისტორიის შესასწავლად. მას ეკუთვნის ვრცელი საენათმეცნიერო გამოკვლევა



ალატოხ იოსელიანი.

„მეგრული ეტიუდები“ (1880 წ.) და ლიტერატურულ-ისტორიული ნაშრომი „ჩვენი უბედური ლიტერატურა ამ საუკუნეში“ (1870 წ.). შემდეგ მან სამ ტომად გამოსცა ქართული მწერლობის ძეგლთა აღწერილობა, აგრეთვე დოკუმენტები, რომლებიც ასახავენ რუსეთ-საქართველოს ურთიერთობას XVIII საუკუნეში. ალექსანდრე ხახანაშვილმა (1862—1911 წწ.), მოსკოვის უნივერსიტეტის და ლაზარევის ინსტიტუტის პროფესორმა, მრავალი ნაშრომი უძღვნა საქართველოს ისტორიის საკითხების შესწავლას. 1895 წელს გამოაქვეყნდა პირველი წიგნი მისი ოთხტომიანი გამოკვლევისა „ქართული სიტყვიერების ისტორია“. ზაქარია ჭიჭინაძეს ეკუთვნის გამოკვლევები ძველი და ახალი ქართული კულტურის რიგ პრობლემათა და მოღვაწეთა შესახებ.

ივანე თარხნიშვილმა (1846—1908 წწ.), პეტერბურგის სამხედრო-სამედიცინო აკადემიის პროფესორმა, 1887 წლიდან, მისი მასწავლებლის ი. სეჩენოვის შემდეგ, ფიზიოლოგიის კათედრის გამგემ, ჯერ კიდევ 1871 წელს გაითქვა სახელი თბილისში წაკითხული ლექციით „ნერვული სისტემის როლი ცხოველთა მოძრაობაში“. შემდეგ მან გამოაქვეყნა მრავალი ნაშრომი, რომლებსაც საფუძვლად უდევს ფიზიოლოგიური პროცესების ექსპერიმენტული კვლევა. ვასილ პეტრიაშვილის (1845—1908 წწ.), ოდესის უნივერსიტეტის პროფესორის, მრავალრიცხოვან მეცნიერულ ნაშრომებში მთავარი ადგილი ეჭირა გამოკვლევებს აგროქიმიის დარგში. მისი ნაშრომები ზელს უწყობდა სოფლის მეურნეობის განვითარებას მეცნიერ-

რულ საფუძველზე, მეცნიერული ტექნოლოგიის დამკვიდრებას მეურნეობაში, კერძოდ, მის ისეთ დარგებში, როგორცაა მეღვინეობა. პეტრე მელიქიშვილი (1850—1927 წწ.), ოდესის უნივერსიტეტის ქიმიის კათედრის პროფესორი, შემდეგში თბილისის უნივერსიტეტის ერთ-ერთი დამაარსებელი და პირველი რექტორი, 1899 წელს მის მოწაფესთან ლ. პისარევესკისთან ერთად დაჯილდოებულ იქნა ლომონოსოვის პრემიით.

ნაწილობრივ საბუნებისმეტყველო, განსაკუთრებით კი საზოგადოებრივ მეცნიერებათა განვითარებას XIX საუკუნის საქართველოში დიდი სამსახური გაუწიეს ქართველ განმანათლებელთა ნაშრომებმა ქართული ენის, ლიტერატურის, ფილოსოფიის, ისტორიის, პედაგოგიკის საკითხებზე¹.

ცარიზმის კოლონიური პოლიტიკისა და XIX საუკუნის საქართველოში ეროვნულ-სამეცნიერო დაწესებულებათა არარსებობის გამო ქართველ მეცნიერთა უმრავლესობას სამშობლოს გარეთ უხდებოდა მოღვაწეობა. მიუხედავად ამისა, არა მარტო საქართველოს წარსული და იმდროინდელი საზოგადოებრივი ცხოვრების რუსეთში მომუშავე მკვლევართ, არამედ რუსული ბუნებისმეტყველების ქართველ წარმომადგენლებსაც კი თითქმის არასოდეს გაუწყვეტიათ კავშირი მშობლიურ კულტურასთან, რომლის განახლებისა და განვითარებისათვის ისინი საქართველოში მომუშავე მეცნიერებთან ერთად იღვწოდნენ. ამ ერთობლივი მუშაობის უმთავრესი შედეგი იყო ის, რომ XIX საუკუნეში, ერთი მხრივ, საფუძველი ჩაეყარა მრავალდარგოვან მეცნიერულ ქართველოლოგიას, ხოლო, მეორე მხრივ, ქართველმა მეცნიერებმა თავი გამოიჩინეს რუსეთის და მისი მეშვეობით დასავლეთ ევროპის მეცნიერების ფართო ასპარეზზე. ამ საფუძველზე ყალიბდება ჯერ კიდევ 90-იანი წლებიდან და განსაკუთრებით XX საუკუნის პირველი ათეული წლებიდან ქართული მეცნიერების ისეთი მნიშვნელოვანი დარგები, როგორცაა თანამედროვე ქართული ენათმეცნიერება, ისტორიოგრაფია, ლიტერატურისმცოდნეობა, ფილოსოფია, ფსიქოლოგია და სხვ., რომელთა შექმნასა და განვითარებას იმ დროს სათავეში ჩაუდგნენ სახელგანთქმული ქართველი მეცნიერები ნიკო მარი, ივანე ჯავახიშვილი, დიმიტრი უზნაძე, კორნელი კეკელიძე და სხვ.

ქართველი ხალხის წარსულმა XIX საუკუნეში რუს და უცხოელ მკვლევართა ყურადღებაც მიიპყრო. 1802 წელს გამოქვეყნდა ე. ბოლხოვიტინოვის ნაშრომი „საქართველოს პოლიტიკური, საეკლესიო და სასწავლო-საგანმანათლებლო მდგომარეობის ისტორიული მიმოხილვა“. ბევ-

¹ იხ. ნ. ბერძენიშვილი, ვ. დონდუა, მ. დუმბაძე, გ. მელიქიშვილი, შ. მესხია, პ. რატიანი, საქართველოს ისტორია, ტ. I, 1958. გვ. 468—471, 578—581.

რი საისტორიო მასალა თავმოყრილი მომდევნო ხანის არაერთი რუსი ისტორიკოსის (ბერაჟე, დუბროვინი, პოტო, ივანენკო, ბუტკოვი, მარკოვი, სეგალი, ეგიაზაროვი და სხვ.) ნაშრომებშიც, განსაკუთრებით „კავკასიის არქეოგრაფიული კომისიის აქტებში“, რომელიც რამდენიმე ტომად გამოიცა. დასავლეთევროპელ მეცნიერთაგან ერთ-ერთმა პირველმა ფრ. ალტერმა გამოაქვეყნა ნაშრომი „ქართული ლიტერატურის შესახებ“ ჯერ კიდევ 1798 წელს. მნიშვნელოვანია ა. ჰაქსტჰაუზენის „ამიერკავკასიის მხარეც“. ბროსეს და განსაკუთრებით ნიკო მარის ნაშრომების შემდეგ ქართულ კულტურას ნაშრომები უძღვნეს XX საუკუნის დამდეგს ა. პარნაქმა, რ. ბლეიკმა, ფრ. ფინკმა, ა. ბაუმსტარკმა, ი. კარსტმა და სხვ. უფრო ადრე საქართველოს კულტურის ისტორიის საკითხებს ეხებოდა პ. უსლარი, რომელმაც პირველმა შეადგინა აფხაზური ანბანი 1862 წელს.

განახლებისა და განვითარების მიუხედავად ქართული მეცნიერული აზროვნება 90-იან წლებამდე კვლავ რჩებოდა განმანათლებლობის ჩარჩოებში. მოვლენებისადმი მატერიალისტური მიდგომის საყურადღებო ცდები ვერ. სძლევა იდეალისტურ მეთოდოლოგიას, რომელიც გაბატონებული იყო საზოგადოებათმეცნიერებაში. იმ დროის ქართული მეცნიერება უმთავრესად ფაქტების შეგროვებით იფარგლებოდა. მაგრამ ამასაც დიდი მნიშვნელობა ჰქონდა მრავალსაუკუნოვანი ქართული მეცნიერული აზროვნების განახლებისა და აღორძინებისათვის, მომდევნო ხანაში ქართული მეცნიერების განვითარების ახალი, უფრო მაღალი ეტაპის მომზადებისათვის.

§ 6. ხელოვნება

ხუროთმოძღვრება. XIX საუკუნის პირველი ნახევრიდან საქართველოში ხუროთმოძღვრება უმთავრესად ქალაქების, კერძოდ, თბილისის განვითარებას უკავშირდება. ხალხური საცხოვრებელი სახლის ხუროთმოძღვრება იმ დროს კვლავ ტრადიციულ ეროვნულ ფორმებს ემყარება. ქალაქებშიც გავრცელებული იყო მცირე ზომის ორსართულიანი აივნისანი და ბანიანი სახლები. 40-იანი წლების თბილისში სხვა ტიპის სახლებს ეროლიან-გვირგვინიანი დარბაზები სჭარბობდნენ. უმეტესად ფერდობებზე განლაგებულ მდებრიო მოქალაქეთა დარბაზებისაგან შეიძლება დაარბაზები იმით განსხვავდებოდა, რომ ისინი უფრო კარგად ნაშენ, დიდ და ფართო ნაგებობებს წარმოადგენდა. XIX საუკუნის დამდეგს აშენდა გვიანდელი რუსული კლასიციზმის სტილის რამდენიმე სახაზინო შენობაც (მეფის-ნაცვლის პირვანდელი სასახლე).

50-იანი წლებიდან ადგილობრივი ტრადიციები სუსტდება და ქალაქების საცხოვრებელი სახლის ხუროთმოძღვრებაში უმთავრეს ადგილს იჭერს ეგრეთ წოდებული შემოსავლიანი, ესე იგი რამდენიმესართულიანი სახლი, რომელიც მრავალ გასაქირავებელ ბინას შეიცავდა. ვითარდება სავაჭრო-სამრეწველო და კულტურულ-საყოფაცხოვრებო მშენებლობაც. 60—70-იანი წლებიდან საქართველოს ქალაქების, განსაკუთრებით თბილისის ხუროთმოძღვრება მთლიანად წაილეკა იმპორტული ხუროთმოძღვრებით, რომელიც თავისი ხასიათით ეკლექტურად უკავშირებდა ერთმანეთს სხვადასხვა სტილის, ეპოქისა და ქვეყნის ხუროთმოძღვრების ცალკეულ ელემენტებს (რენესანსული, მავრული, კლასიციზმური, ბაროკული სტილი). ასეთი იყო, მაგალითად, 1864 წელს შედგენილი საკონკურსო პროექტები მეფისნაცვლის ახალი სასახლისა. ისინი არც ტრადიციას უწევდნენ ანგარიშს, არც ახალი თბილისის საჭიროებას. ეს პროექტები არ განხორციელებულა, რადგან ახალი სასახლის აშენების ნაცვლად ძველის რეკონსტრუქცია მოახდინეს. ძველი შენობა, რუსული კლასიციზმის ნიმუში, რენესანსულ-მავრული სტილის ნაგებობად აქციეს (ხუროთმოძღვარი ო. სიმონსონი). სპეციფიკურად თბილისური ფასადებისადმი დაპირისპირებული რენესანსული ფასადები ჰქონდა სასტუმრო „ორიანტს“ და კათოლიკეთა ეკლესიას (ხუროთმოძღვარი ი. ზალცმანი). რუსულ მართლმადიდებლურ ეკლესიებს რუსულ-ბიზანტიური სტილით აშენებდნენ, ქართული ეკლესიები როგორც სოფლად, ისე ქალაქად ტრადიციული ფორმებით შენდებოდა (სამების და მთაწმიდის ეკლესიები თბილისში, აბასთუმნის ეკლესია).

80-იანი წლებიდან საქალაქო მშენებლობაში სტილისტიკური ქაოსი მეფობდა: ხუროთმოძღვრება, რომელმაც კლასიციზმის შემდეგ რენესანსული სტილიზაციის საფეხური განვლო, ახლა ბაროკოს დეკორაციულ ფორმებს იყენებდა. სახაზინო თეატრისა და ქალაქის საბჭოს შენობათა, აგრეთვე რიგი საცხოვრებელი სახლების ფასადებში ეკლექტურადაა განმეორებული მავრული ხუროთმოძღვრების ფორმები. მეაბრეშუმეობის სადგურს, სასულიერო სემინარიას რუსული ხუროთმოძღვრული სამოსელი მოსავს. რენესანსულ-ბაროკული სტილით და მაღალი პროფესიული ოსტატობითაა ნაშენი დიდუბის ტაძარი, სურათების გალერეა, არტიტული საზოგადოების (ახლა რუსთაველის) თეატრი, კონსერვატორია, სასტუმრო „თბილისი“, აგრეთვე დიდი მთავრის სასახლეები ბორჯომში, ქუთაისის საოლქო სასამართლოს და გიმნაზიის შენობები. ამგვარ შენობათა შორის უდიდესი და უმნიშვნელოვანესია ქართული გიმნაზიის (უნივერსიტეტის) შენობა, რომელიც ევროპულად განათლებული პირველი ქართველი ხუროთმოძღვრის სიმონ კლდიაშვილის (1865—1920 წწ.) პროექტით იქნა აგებული. დღემდე იგი თბილისის საუკეთესო სასწავლო ნაგებობად ითვლება.

ხუროთმოძღვრებაში ეკლექტიზმის გამეფების, გენერალური გეგმების უქონლობის, ტრადიციული სახის დაკარგვის მიუხედავად, საქართველოს ქალაქებს მთელი XIX საუკუნის მანძილზე ქართულ იერს, მკაფიო თავისებურებას და ინდივიდუალობას უნარჩუნებდა ძველი დროიდან შემორჩენილი საცხოვრებელი კვარტალები და მონუმენტური ძეგლების ნაშთები, მკვეთრად გამოსახული რელიეფი, რომელსაც ითვალისწინებდნენ ტრადიციულისაგან მნიშვნელოვნად განსხვავებული თვით ახალი საცხოვრებელი სახლების მშენებლობის დროსაც (აივნები, ზოგან ბინების განლაგებაც)¹.

ქართული თეატრი. ქართული თეატრი აღდგენილ იქნა მხოლოდ 50-იანი წლების დამდეგს. იმ დროისათვის თბილისში არსებობდა რუსული დრამის და იტალიური ოპერის თეატრები, რომლებიც მდებარეობდნენ ხალხის ფართო მასისათვის ხელმიუწვდომელიც იყო და გაუგებარიც.

ახალი ქართული თეატრის შექმნის იდეა დაიბადა მანანა ორბელიანის სალონში. თეატრის ხელმძღვანელობა დრამატურგმა გიორგი ერისთავმა იკისრა. მანვე შექმნა მსახიობთა მუდმივი დასი. თეატრმა პირველი სპექტაკლი გამართა 1850 წლის 2 (14) იანვარს თბილისის გიმნაზიის შენობაში. წარმოდგენილ იქნა გ. ერისთავის კომედია „გაყრა“. სპექტაკლმა წარმატებით ჩაიარა. თეატრს ჰყავდა ნიჭიერი მსახიობებიც და დრამატურგებიც (გ. ერისთავი, ზ. ანტონოვი, გ. ჯაფარიძე, გ. დვანიძე, ი. კერესელიძე და სხვ.). გ. ერისთავი თეატრს 1854 წლამდე ხელმძღვანელობდა და მანამდე ყოველი თეატრალური სეზონიც წარმატებით მთავრდებოდა. მტკიცე საფუძველი ჩაეყარა ახალ ქართულ პროფესიულ რეალისტურ თეატრს, რომელიც მიზნად ისახავდა ქართველ საზოგადოებაში პატრიოტულ ძალთა გამოღვივებას, ცხოვრების განახლებისათვის ხელშეწყობას. მეფის მოხელენი ძალე მიხვდნენ, რომ ქართული თეატრი არისტოკრატიული ფენების გასართობი ადგილიდან ეროვნული სულისკვეთებით ხალხის აღზრდის კერად იქცეოდა და თეატრს მატერიალური დახმარება მოუსპეს, ხოლო მისი ხელმძღვანელი აიძულეს თბილისიდან წასულიყო. 1854 წლიდან თეატრს ჯერ ზურაბ ანტონოვი, მერე ივანე კერესელიძე ხელმძღვანელობდა, მაგრამ უბინაობისა და უსახსრობის გამო მისი საქმე სულ უარესდებოდა. 1856 წელს თეატრმა არსებობა შეწყვიტა.

არაოფიციალურად წარმოდგენები შემდეგაც იმართებოდა, მაგრამ 1879 წლამდე მუდმივი ქართული თეატრი აღარ არსებულა. ამ წლიდან იწყება ახალი, მაღალი საფეხური ქართული თეატრალური ხელოვნების განვითარებაში. ქართული კულტურის მოღვაწეთა ჯგუფმა ი. ჭავჭავაძისა და ა. წერეთლის ხელმძღვანელობით კვლავ აღადგინა პროფესიული თეატ-

¹ ვ. ბ. რ. ი. ძ. ე, ქართული ხუროთმოძღვრება 1865—1921 წწ. (ხელნაწერი), გვ. 2—20.

რი. ერთი წლის შემდეგ დრამატიული თეატრი დაარსდა ქუთაისშიც. XX საუკუნის დამდეგს პროფესიული თეატრი ჩამოყალიბდა ბათუმში. ქართულ თეატრში მღვდელმთავრები სცენის უნიჭიერესი ოსტატები, გამოჩენილი ქართველი მსახიობები და რეჟისორები — ვასო აბაშიძე (1854—1926 წწ.), ლადო მესხიშვილი (1857—1920 წწ.), ნატო გაბუნია (1859—1910 წწ.), მაკო საფაროვა-აბაშიძისა (1860—1940 წწ.), კოტე ყიფიანი (1849—1921 წწ.), კოტე მესხი (1859—1914 წწ.) და ვალერიან გუნია (1862—1938 წწ.). წარმატებით იღვმებოდა არა მარტო ქართველი, არამედ რუსი, სომეხი და დასავლეთევროპელი დრამატურგების კლასიკური ნაწარმოებები. 80—90-იანი წლების რეაქციის და პირველი რევოლუციის ხანაში ქართული თეატრის სცენა განმათავისუფლებელი მოძრაობის ტრიბუნად გადაიქცა. განსაკუთრებული პოპულარობით სარგებლობდა პატრიოტული პიესები „სამშობლო“ დავით ერისთავისა და „ღალატი“ ალექსანდრე სუმბათაშვილ-იუჟინისა.

ქართული პროფესიული თეატრი ძალებს იკრებდა თვითმოქმედი დრამატული წრეებიდან, რომლებსაც თავის მხრივ ყოველგვარ დახმარებას უწევდა. თვითმოქმედი თეატრალური ხელოვნების მძლავრმა ნაკადმა 90-იან წლებში პროფესიული თეატრის პარალელურად იწყო არსებობა სახალხო თეატრის სახით. სცენისმოყვარე ხელოსანთა ამხანაგობამ ვასო თევდორაშვილის მეთაურობით მუდმივი წარმოდგენების გამართვა იწყო ავჭალის მოედანზე მდებარე საჩაიეში. 1893 წლის 23 სექტემბერს სახალხო თეატრმა იოსებ იმედაშვილის რეჟისორობით დადგა პირველი ღია სახალხო წარმოდგენა „რაც გინაწავს, ვეღარ ნახავ“ ავქსენტო ცაგარლისა. მომდევნო წლებში იღვმებოდა როგორც ქართული („არსენა“ ა. ყაზბეგისა და სხვ.), ისე ნათარგმნი პიესები („პეპო“, „რევიზორი“, „ყაჩაღები“, „ურთელ აკოსტა“ და სხვ.). 1908 წელს აშენდა სახალხო სახლი (აწინდელი მარჯანიშვილის თეატრი), სადაც 1909 წლის აპრილიდან დაბინავდნენ თბილისის ქართული, სომხური და რუსული სახალხო თეატრები, შემდეგ კი მათ მიემატა აზერბაიჯანული და სხვა თვითმოქმედი წრეები. აქვე იმართებოდა კონცერტები და ლიტერატურული საღამოები. სახალხო თეატრები შეიქმნა აგრეთვე ქუთაისში, ბათუმში (ე. წ. „რკინის თეატრი“), თელავში, ხაშურში, ჭიათურაში, ხონში, კავკავში და სხვ. ქართული სახალხო თეატრების სპექტაკლებში დროდადრო პროფესიული თეატრის სახელგანთქმული ოსტატებიც მონაწილეობდნენ. სხვადასხვა დროს მას ხელმძღვანელობდნენ დ. კლდიაშვილი, ვ. შალიკაშვილი, ნიკო გოცირიძე, ა. იმედაშვილი და ქართული სასცენო ხელოვნების სხვა გამოჩენილი ოსტატები. სახალხო თეატრიც განმათავისუფლებელი იდეების პროპაგანდის კერა იყო.

სახვითი ხელოვნება. ახალი ქართული სახვითი ხელოვნების დარგებიდან XIX საუკუნეში ჯერ ფერწერა და გრაფიკა განვითარდა, ბოლოს ქანდაკებაც. ოქრომჭედლობის, ქარგვის, მინიატურის, ჩუქურთმის, ფრესკის ხალხურ ტრადიციებთან ერთად საუკუნის პირველი ნახევრიდანვე ვითარდება პროფესიული ფერწერის უნარი — პორტრეტი. იმ დროს ამ უნარს მიმართავდა არაერთი უცხოელი მხატვარი, რომლებიც თბილისში ჩამოდიოდნენ და აქ მცირე თუ ხანგრძლივი დროის განმავლობაში მოღვაწეობდნენ. უფრო გვიანაც არაქართველ ხელოვანთა მიერ იყო შექმნილი თბილისში დადგმული რამდენიმე ძეგლი (ვორონცოვის, პუშკინის, ვაგოლის, დიმიტრი ყიფიანისა). 1901 წელს გაიხსნა ქანდაკებისა და მხატვრობის სკოლა, აწინდელი თბილისის სამხატვრო აკადემიის წინამორბედი. უმაღლეს სამხატვრო განათლებას ქართველი ხელოვანნი რუსეთში და საზღვარგარეთ ღებულობდნენ.

პეტერბურგის სამხატვრო აკადემია დაამთავრა 1844 წელს ახალი ქართული პროფესიული მხატვრობის პირველმა წარმომადგენელმა, პოეტ ალექსანდრე ჭავჭავაძის ყოფილმა ყმა გლეხმა გრიგოლ მაისურაძემ (1810—1885 წწ.). იგი უმთავრესად პორტრეტისტი იყო. პორტრეტისტები იყვნენ რომანოზ გველესიანი და ალექსანდრე ბერიძეც, რომლებიც 80-იან წლებში აფართოებენ ქართული ფერწერის არეს, ამკვიდრებენ ხალხის ცხოვრების რეალისტურ ასახვას მხატვრობაში.

რომანოზ გველესიანმა (1859—1884 წწ.) 1881 წელს დაამთავრა თბილისის სამხატვრო სკოლა, 1884 წელს პეტერბურგის სამხატვრო აკადემია. მისი შემოქმედების საგანია ძველი თბილისის კუთხეები და მშობლიური კახეთი, გლეხობა და ახალი ინტელიგენცია. მის მიერ ზეთით შესრულებულ მცირე ზომის პორტრეტებსა და ეტიუდებში — „მოხუცი გლეხი“, „კახელი დოქით“, „უცნობი ქალი“, „უცნობი მხატვარი“ იგრძნობა აღქმისა და გადმოცემის უშუალოება და სიმართლე ყოველგვარი შელამაზების გარეშე.

ალექსანდრე ბერიძე (1858—1917 წწ.) ჯერ პეტერბურგში სწავლობდა, მერე ნეაპოლში, მაგრამ უსახსრობის გამო სწავლა არ დაუმთავრებია. 1880 წელს იტალიიდან გამოგზავნა ნახატების სერია, რომელიც ჯუზეპე გარიბალდის პორტრეტით იწყებოდა. საქართველოში დაბრუნების შემდეგ სოფლის მეურნეობას ეწეოდა მშობლიურ მცხეთაში. 1885 წლიდან აღ: ბერიძე თანამშრომლობდა ეურნალეებში „თეატრსა“ და „ჯეჯილში“. 1886 წელს დახატა ფარდა ქართული თეატრისათვის. შემდეგ კავკავში გადასახლდა და ხატვას ასწავლიდა. ალექსანდრე ბერიძის შემოქმედებაშიც მთავარია მცირე ზომის პორტრეტები.

ახალი ქართული რეალისტური ფერწერის დაფუძნებაში განსაკუთრე-

ბული როლი შეასრულა გიგო გაბაშვილმა (1862—1936 წწ.). ბავშვობიდანვე ხატვით გატაცებული გ. გაბაშვილი 1886 წლიდან პეტერბურგში სწავლობდა. 1897 წელს დაამთავრა მიუნხენის სამხატვრო აკადემია. იმოგზაურა იტალიასა და საბერძნეთში, ერთხანს შუა აზიაში ცხოვრობდა, საქართველოში დაბრუნების შემდეგ შემოიარა მისი სხვადასხვა კუთხე, კერძოდ, ხევსურეთი. გიგო გაბაშვილის ყველაზე ადრინდელი ნახატები 80-იანი წლების დასაწყისშია შექმნილი. 1890 წელს მონაწილეობდა თბილისელ მხატვართა და მხატვრობის მოყვარულთა გამოფენაში, 1891 წელს კი გამართა პერსონალური გამოფენა, რომელიც საერთოდ ქართველი მხატვრის პირველი დამოუკიდებელი გამოფენა იყო. მისი ნამუშევრების პერსონალური გამოფენები მოეწყო 1898, 1901 და 1910 წლებშიც. ამ დრომდეა შექმნილი მისი საუკეთესო ნაწარმოებები.

გიგო გაბაშვილმა ორი ათასზე მეტი სურათი შექმნა: პორტრეტები, პორტრეტულ-საყოფაცხოვრებო სცენები, ხევსურული, თბილისური, შუა აზიური ციკლის „ტიპები“ და მრავალფეგურიაანი სურათები, ნატურმორტები, პეიზაჟები.

იმ ქართველ მხატვართა შორის, რომლებიც უკვე 90-იანი წლების მიწურულში მხარში ამოუდგნენ გ. გაბაშვილს, თვალსაჩინო ადგილი უჭირავს ალექსანდრე მრეელიშვილს (1866—1933 წწ.). მან სამხატვრო განათლება მიიღო ჯერ მოსკოვის ფერწერის სასწავლებელში, შემდეგ პარიზში ეიულიენის კერძო აკადემიაში. მის შემოქმედებაში მთავარია პორტრეტები.

მოსე თოიძის (1871—1951 წწ.) სამხატვრო მოღვაწეობაც 90-იან წლებში დაიწყო. თბილისის სახელოსნო სასწავლებლის დამთავრების შემდეგ იგი პეტერბურგის სამხატვრო სასწავლებელში სწავლობდა დმიტრიევ-კავკაზსკისა და რეპინის ხელმძღვანელობით. თანამშრომლობდა გაზეთ „კვალში“. ხატავდა დაბალი ფენების წარმომადგენელთა ტიპებს („მოხუცი ებრაელი“, „მრეცხავი ქალი“) და მშობლიური ხალხის ყოფას („მცხეთობა“ და სხვ.).

ახალ ქართულ მხატვრობაში განსაკუთრებული ადგილი დაიმკვიდრა ნიკო ფიროსმანაშვილმა (1860—1918 წწ.), თვითნასწავლმა მოხეტიალე მხატვარმა, რომელიც ლუკმაპურის საშოვნელად ხატავდა თბილისის დუქნებსა და სამიკიტნოებში პირველყოფილი უბრალოების და ღიდი სიმარჯლის მაჩვენებელ ტილოებს. თემატიკური მრავალფეროვნებით ფიროსმანს მისი დროის ვერც ერთი ქართველი მხატვარი ვერ შეედრება. მას უყურადღებოდ არ დარჩენია ქართველი საზოგადოების არც ერთი ფენა, გარდა ინტელიგენციისა. სხვადასხვა სოციალურ ტიპებთან ერთად იგი ხატავს სოფლის ცხოვრებისა და ქალაქური ყოფის სცენებს, ისტორიულ სიუჟეტებს და პერსონაჟებს, ნატურმორტებს, ცხოველთა სამყაროს. მის სუ-

რათებში ქალაქისა და სოფლის მცხოვრებთა მთელი გალერეა მოცემული ცალკეული ფიგურების ან მოქმედ პირთა სახით.

XIX საუკუნის მეორე ნახევარში ფერწერაზე ნაკლებ, მაგრამ მაინც განვითარდა ქართული გრაფიკა, რაც უმთავრესად წიგნისა და ჟურნალ-გაზეთების გაფორმებას უკავშირდება. ქართულ ნაბეჭდ გამოცემათა გაფორმების საქმეს დიდი ამაგი დადო გრიგოლ ტატიშვილმა (1848—1911 წწ.). იგი თვითნასწავლი მხატვარი-გრაფიკოსი იყო. მისი გრაფიკებით იყო შორთული ი. გოგებაშვილის „ღეღა ენა“ და „ბუნების კარი“. მან შექმნა სათაური (სახედაო) ქართული ასოების დეკორატიულად დამუშავებული სერიები, წიგნის გასაფორმებელი ქართული ჩუქურთმების ალბომი, გაათორმა „ვეფხისტყაოსნის“ 1888 წლის ქართველიშვილისეული გამოცემა, მრავალი წიგნის გარეკანი და სატიტულო ფურცლები, ჟურნალ-გაზეთების სათაურები. ნატურად იგი უმეტესად ძველი ქართული ჩუქურთმის მოტივებს იყენებდა.

ქართული წიგნის მხატვრულ გაფორმებაში ახალი საფეხური იყო „ვეფხისტყაოსნის“ ქართველიშვილისეული გამოცემის ილუსტრაციები, რომლებიც ეკუთვნის უნგრელ მიხაი ზიჩს (1829—1906 წწ.). რეალური დაკვირვების უნარმა, ცხოველმა ფანტაზიამ და ქართველი ხალხის ყოფის შესწავლამ უცხოელ მხატვარს შესაძლებლობა მისცა ქართული ეროვნული სახეებით გადმოეცა პოემის სიუჟეტი. ამით მოიპოვა ზიჩის ილუსტრაციებმა დიდი პოპულარობა.

ქართველი მხატვრების, კერძოდ, ნაადრევად გარდაცვლილი ანტონ გოგიაშვილის (1878—1907 წწ.) გრაფიკული ნამუშევრები ქვეყნდებოდა „კვალსა“ და „ცნობის ფურცელში“. პირველი ქართველი მხატვარი, რომელმაც 1897 წელს პირველად დაასურათა ქართველი მწერლის ნაწარმოები (ვაჟა-ფშაველას „ბახტრიონი“) გოგიაშვილი იყო.

თუ ახალი ქართული ფერწერის და გრაფიკის საფუძვლები ასე თუ ისე შეიძლება მოიძებნოს ძველ ქართულ მხატვრობასა და ხელოსნობაში, ახალი ქართული ქანდაკება არსებითად ცარიელ ადგილზე აღმოცენდა XIX საუკუნის 90-იანი წლების ბოლოს. მისი ფუძემდებელი იყო იაკობ ნიკოლაძე (1876—1951 წწ.). ბათუმის სახელოსნო სასწავლებლის დამთავრების შემდეგ იგი გამოყენებითი ხელოვნების და ქანდაკების საფუძვლებს ეუფლებოდა მოსკოვსა და ოდესსაში. 1897 წელს კავკასიის მხატვართა მეხუთე გამოფენაზე საზოგადოება მოწონებით შეხვდა იაკობ ნიკოლაძის ძიერ გამოქანდაკებულ შოთა რუსთაველის ფიგურას¹.

¹ ვ. ბერიძე, ქართული ხელოვნება 1865 წლიდან 1921 წლამდე (ხელნაწერი), 33. 21 — 53.

ქართული მუსიკა. XIX საუკუნის დამდგენისათვის ძველი ქართული მუსიკა არსებობდა საეკლესიო საგალობლებისა და ხალხური სიმღერების სახით, რომლებსაც სახალხო ან პროფესიონალი მგალობელ-მომღერალნი ასრულებდნენ. ქართველი „საეკლესიო მგალობლები ძველთაგანვე კარგი საერო მომღერალნიც იყვნენ... ყოველ მეჭლისზე... ჯერ საეკლესიო გალობით უნდა დამტკბარიყვნენ, მერე საერო სიმღერით“¹. ახალი დროისათვის უძველესი ქართული სანოტო ნიშნები დავიწყებას მიეცა. აღმოსავლური მუსიკის მოძალებამ ქართული საერო პროფესიული მუსიკის განვითარების შეფერხებაც გამოიწვია. ხალხშიც და საზოგადოების მაღალ ფენებშიც ფეხი მოიკიდა ზურნამ და თარმა (განსაკუთრებით ქალაქებში). რუსეთთან შეერთების შემდეგ საქართველოში გავრცელება იწყო რუსულმა და დასავლეთევროპულმა მუსიკამ, რომელმაც გზა გადაუღობა აღმოსავლური ჰანგების შემდგომ განვითარებას. მაგრამ ახლა სხვაგვარი საშიშროების წინაშე აღმოჩნდა ქართული მუსიკა. რა დიდმნიშვნელოვანიც არ უნდა ყოფილიყო სამუსიკო კულტურის ზრდისათვის თბილისში 1851 წლიდან არსებული იტალიური ოპერა, იგი ქართული ეროვნული მუსიკის უშუალო განმავეითარებელი ვერ იქნებოდა. მრავალსაუკუნოვან და თვითმყოფად ქართულ მუსიკას პატრონი თვით ქართველობაში უნდა გამოსჩენოდა.

სამუსიკო ცხოვრების გამოცოცხლების მიუხედავად, 50—60-იანი წლების თბილისშიც კი პროფესიული მუსიკის განვითარების ღონე მაღალი არ იყო. იმ დროს მთელ ქალაქში ორად-ორი როიალი არსებულა. ხალხური საკრავების სრულყოფის საქმეც უყურადღებოდ რჩებოდა. მაინც მნიშვნელოვნად ძლიერდება ინტერესი ქართული ხალხური და საეკლესიო მუსიკისადმი, ჩნდება პროფესიონალი მუსიკოსები, იტალიური და რუსული საოპერო სპექტაკლების ანტრაქტებში ზოგჯერ ფორტპიანოზე გადაღებული ქართული მელოდიები და ცეკვებიც სრულდება, იმართება მსჯელობა ქართული მუსიკის აღდგენა-განვითარების საკითხებზე². 1860 წელს თბილისში, მოგვიანებით კი ქუთაისშიც არსდება ქართული საეკლესიო გალობის აღმდგენი კომიტეტი, რომელიც მიზნად ისახავდა აღმოსავლურ და დასავლურ ქართულ საეკლესიო გალობათა ჩაწერას და გამოცემას. მაგრამ ქართველ მუსიკოსთა კადრების არარსებობის გამო ქართული საგალობლების ჩაწერას ანდობდნენ არაქართველ მუსიკისმცოდნეთ, რომელთაც არ ესმოდათ ქართული მუსიკის თავისებურება და უცხოური მუსიკის კანონების მიხედვით ასწორებდნენ და ამახინჯებდნენ მას. საგალობელთა ჩაწერა-გამოცემის საქმე მკვიდრ ნიადაგზე მხოლოდ

¹ ვ ა ნ ო შ ი ლ ა კ ა ძ ე, ქართული ხალხური მუსიკის შესწავლისათვის, 1949, გვ. 99.


² დ. მ ჰ ა ბ ე ლ ი, საქართველოს ზნეობანი, „ცისკარი“, 1864, № 5.

მაშინ დადგა, როცა მას ხელი მოჰკიდეს მ. მაჭავარიანმა, ა. ბენაშვილმა, ი. გოგებაშვილმა, მ. იპოლიტოვ-ივანოვმა, პ. კარბელაშვილმა და ფ. ქორიძემ. 70—80-იან წლებში პირველად გამოიცა ქართული მუსიკის კრებულები, თუმცა მათში ხალხური სიმღერები ცოტა იყო. მომდევნო პერიოდში ქართული ხალხური სიმღერების შეკრებისა და გამოცემის საქმე მეცნიერულ საფუძველზე დაამკვიდრეს მელიტონ ბალანჩივაძემ, ზაქარია ჩხიკვაძემ, ია კარგარეთელმა, დიმიტრი არაყიშვილმა და ზაქარია ფალიაშვილმა.

ახალი ქართული სამუსიკო კულტურის ერთ-ერთი პირველი გამოჩენილი მოღვაწე იყო მომღერალი ხარლამპი სავანელი (1845—1890 წწ.). პეტერბურგის უნივერსიტეტის სტუდენტთა მოძრაობის მონაწილე, უნივერსიტეტიდან გარიცხვის შემდეგ პ. ჩაიკოვსკის თანაკურსელი პეტერბურგის კონსერვატორიაში. თბილისში სავანელმა თავი მოუყარა მუსიკის მოყვარულ ახალგაზრდობას, შეადგინა გუნდი და 1874 წლის 24 აპრილს გამართა პირველი კონცერტი. ამავე დროს დააარსა სამუსიკო სკოლა, ჯერ მარტო გუნდის კლასით, შემდეგ კი ვიოლინოს და თეორიის კლასებითაც. ეს იყო პირველი ქართული სამუსიკო სასწავლებელი, რომლის საფუძველზე შემდეგ საქართველოს კონსერვატორია შეიქმნა. სავანელთან ერთად სამუსიკო სასწავლებელში მოღვაწეობდნენ პიანისტი და კომპოზიტორი ალაოზ მიზანდარი (1838—1912 წწ.), მ. იპოლიტოვ-ივანოვი, ი. პიტოევი, კ. ალიხანოვი, ა. ყორღანოვი. 1888—1902 წლებში ეს სასწავლებელი დაუმთავრებია 89 კაცს, რომელთაგან 10 ქართველი ყოფილა.

ხარლამპი სავანელის შემდეგ ქართული გუნდი შეადგინა მელიტონ ბალანჩივაძემ. გუნდმა 1882 წელს ორი კონცერტი გამართა. უფრო დიდხანს იარსება სანდრო კავსაძის მიერ 1897 წელს დაარსებულმა ხალხური სიმღერების გუნდმა, რომელიც მთელ საქართველოში მართავდა კონცერტებს. იმავე ხანებში დასავლეთ საქართველოში ძუკუ ლოლუამ შექმნა მომღერალთა გუნდი, რომელიც მეგრულ, აფხაზურ, სვანურ სიმღერებს ასრულებდა.

ახალი ქართული მუსიკის განვითარებაში განსაკუთრებით დიდი როლი შეასრულა „ქართულმა საერო ხორომ“, რომელიც ლადო აღნიაშვილმა (1860—1904 წწ.), უზადო პატრიოტმა და საზოგადო მოღვაწემ, დააარსა. 1886 წელს. თავდაპირველად გუნდი უმთავრესად სემინარიაში მოსწავლე და აგრეთვე აღნიაშვილის მიერ მშობლიურ სოფელ შილდიდან ჩამოყვანილი გლეხი მომღერლებისაგან შედგებოდა. შემდეგ ამ გუნდში უმღერია ზაქარია და ივანე ფალიაშვილებს, ია კარგარეთელს და თვით ვანო სარაჯიშვილსაც. გუნდის მხატვრული ხელმძღვანელობა აღნიაშვილმა მიანდო ჩუხ მუსიკოსს იოსებ რატილს. აღნიაშვილი გუნდს მიზნად უსახავდა ქართული ხალხური მუსიკის პროფესიულ დონემდე აყვანას და მის პროპაგანდას



ლ. ილიაშვილის გუნდი.

საქართველოსა და მის ფარგლებს გარეთ. 1886 წლის 26 დეკემბერს გუნდმა ქართულ თეატრში გამართა პირველი კონცერტი, რომელიც ხალხმა აღფრთოვანებით მიიღო. არ გამართლდა მეფის ბიუროკრატების და ქართველი თავადაზნაურობის ზედაფენის ზოგი წარმომადგენლის წინასწარმეტყველება, ევროპული მუსიკის გვერდით ქართული სიმღერით საჩაროდ გამოსეულა სამარცხეინოდ დამთავრდებაო თავისი არსებობის მანძილზე გუნდმა მთელი საქართველო და ჩრდილოეთ კავკასია მოიარა და მძლავრი ბიძგი მისცა „ქართული ხოროების“ ჩამოყალიბებას არა მარტო საქართველოს, არამედ რუსეთის ქალაქებშიც, სადაც ხალხური სიმღერის კონცერტებს მართავენ ქართველი სტუდენტები. 90-იანი წლებიდან რუსეთის ქალაქებში ხშირად მართადა ქართული მუსიკის კონცერტებს მელიტონ ბალანჩივაძე. 1886—1888 წლებში იგი ლ. აღნიაშვილის გუნდსაც ლობჯარობდა. ეგრეთ წოდებულ რატილის რეპერტუარს, რომელიც ქართლ-კახურ, დასავლურქართულ და აფხაზურ სიმღერებთან ერთად უცხოურ სიმღერებსაც შეიცავდა და ქართული სიმღერებიც ზოგჯერ უცხოურ ყაიდაზე იყო გადაკეთებული, ნაკლიც ჰქონდა, მაგრამ იგი საფუძვლად დაედო მაშინდელი ქართული ხალხური სიმღერის გუნდების მუშაობას და დიდი როლი შეასრულა ქართული მუსიკის პროპაგანდის საქმეში¹.

90-იან წლებს მიეკუთვნება ახალი ქართული პროფესიული სამუსიკო ნაწარმოებების, სიმღერა-რომანსების და საგუნდო პიესების წარმოშობა. უფრო ადრე დ. ერისთავს უცდია ქართული საფორტეპიანო მუსიკის შექმნა, მაგრამ პირველ ორიგინალურ ქართულ ნაწარმოებთა ავტორად მაინც ძელიტონ ბალანჩივაძე (1862—1937 წწ.) უნდა ჩაითვალოს. 1891 წელს მან დაწერა ორი რომანსი („ნანა შეილო“, „შენ გეტრფი მარად“), რომლებმაც საფუძველი ჩაუყარეს სამუსიკო შემოქმედების ამ დარგს.

ქართული ოპერის შექმნის პირველი ცდაც მელიტონ ბალანჩივაძეს ეკუთვნის. 1896 წელს მან დაიწყო წერა ოპერა „თამარ ცხიერისა“, რომლის ხაწყეიტები მომდევნო წელს შესრულდა პეტერბურგის კეთილშობილთა საკრებულოში.

მეფის თვითმპყრობელობისა და ადგილობრივი თავადაზნაურულ-ბურჟუაზიული ზედაფენის რეაქციული პოლიტიკის მიუხედავად, ახალი ქართული მუსიკა, ისევე როგორც მთლიანად ახალი ქართული კულტურა, სულ უფრო და უფრო მკვიდრდებოდა ქართველი ხალხის ყოფა-ცხოვრებასა და აზროვნებაში.

¹ დ. არაყიშვილი, ქართული მუსიკა, 1925, გვ. 28 — 51; ე. შილაკაძე, ქართული ხალხური მუსიკის შესწავლისათვის, გვ. 69—100.

ახალი ქართული კულტურა უწინარეს ყოვლისა საქართველოს საზოგადოებრივი ცხოვრების განახლების, მრავალსაუკუნოვანი მოწინავე ტრადიციების აღორძინების შედეგი იყო. მაგრამ მასი ზრდა-განვითარებისათვის დიდი მნიშვნელობა ჰქონდა ქართველი ხალხის კულტურულ ურთიერთობათა გაფართოებას მეზობელ აფხაზ, ოს, სომეხ, აზერბაიჯანელ, დაღესტნელ, რუს, უკრაინელ, აგრეთვე დასაეღეთისა და აღმოსავლეთის რიგ ახლობელ და შორეულ ხალხებთან.

რუსეთთან შეერთებამდე საქართველო და ამიერკავკასია დიდი ხნის მანძილზე წინა აზიის კულტურის წრეში შედიოდა. თუმცა იმ დროს ქართველი ხალხი იქნობდა აზიისა და ევროპის შორეული ქვეყნების (ინდოეთი, ჩინეთი, იტალია, საფრანგეთი) კულტურულ მონაპოვრებსაც. XVIII საუკუნის მეორე ნახევრიდან ქართველმა ხალხმა საბოლოოდ იწყო შემობრუნება აღმოსავლეთიდან დასაეღეთისაკენ და ამის მიხედვით მისი კულტურაც ამიერკავკასიის სხვა ხალხთა კულტურასთან ერთად ევროპულ-რუსული კულტურას სფეროში მოექცა. რუსეთთან შეერთების შემდეგ ახალი დროის მოთხოვნილებათაგან დიდად ჩამორჩენილ „აზიურობას“ გზა გადაუღობა დაწინაურებულმა „ევროპიზმმა“, ე. ი. უწინარეს ყოვლისა ევროპის განვითარებულ ქვეყნებში დამკვიდრებულმა ახალმა კულტურამ. რომელიც არც მანამდე ყოფილა უცხო ქართველი ხალხისათვის, მაგრამ საბოლოოდ მხოლოდ XIX საუკუნეში გაბატონდა.

ახალი ქართული კულტურის გამარჯვება ერთბაშად არ მომხდარა, მისი დამკვიდრებას პროცესი კონსერვატიზმის თანდათანობითი დაძლევის გზით მიმდინარეობდა. არც სხვა ხალხებთან კულტურული ურთიერთობა განვითარებულა უეცრად და ერთნაირი ძალით. საკუთარი და სხვა ხალხების კულტურული ტრადიციებიდანაც ახალი ქართული კულტურა ერთბაშად მხოლოდ პროგრესულს როლი ითვისებდა. კონსერვატიულიც და ნოვატორულიც ზოგჯერ ტრადიციის ძალას ან მექანიკურ მიმზამძველობასაც ემყარებოდა. მაგრამ ბრძოლა ძველსა და ახალს შორის XIX საუკუნის საქართველოში ისე მძლავრად და სწრაფად განვითარდა, რომ საბოლოო ანგარიშით კულტურის ახალი ნაქადი აღმოჩნდა გამარჯვებული. საკუთარი მრავალსაუკუნოვანი კულტურის მოწინავე ტრადიციების შემდეგ ამ საქმეში ღიდი როლი შეასრულა დასაეღეთეევროპულმა და რუსულმა კულტურამ. აგრეთვე მეზობელი კავკასიელი ხალხების კულტურამ. ეს როლიც ორმაგი იყო, რამდენადაც ორი ერი არსებობდა ყოველ ერში, ორი კულტურა ყოველ ეროვნულ კულტურაში: კონსერვატიული და პროგრესული. რეაქციული იყო ყველა ჯურის პლუტოკრატების, დასაეღეთ-ევროპელი, რუსი, სომეხი, აზერბაიჯანელი, ქართველი მსხვილი

ფეოდალებისა და ბურჟუების ექსპლოატატორული ინტერესების დამცველი კულტურა. პროგრესის ინტერესებს გამოხატავდა დემოკრატიული კულტურა, თუმცა ორთვე კულტურას ხალხი ქმნიდა მისი განათლებული წარმომადგენლების მეშვეობით. XIX საუკუნის საქართველოს კულტურა კონსერვატიულ და პროგრესულ ნაკადს შეიცავდა და ამიტომ სხვა ხალხთა კულტურასთან ქართული კულტურის ურთიერთობაც ორგვარი იყო: ახალი ქართული კულტურის განვითარებაზე გაელენას ახდენდა საკუთარი და სხვათა როგორც კონსერვატიული, ისე პროგრესული კულტურა, ერთი ხელს უშლიდა და აბრკოლებდა მის განვითარებას, მეორე ხელს უწყობდა და აჩქარებდა. ცხადია, საბოლოო ანგარიშით პროგრესული იმარჯვებდა კონსერვატიულზე და ამის შედეგია ის დიდი კულტურული აღმავლობა, რომელიც XIX საუკუნეში შეიმჩნევა მსოფლიოს მრავალ ქვეყანაში, კერძოდ, საქართველოში.

ქართულ-კავკასიური კულტურული ურთიერთობანი. XIX საუკუნეშიც ქართველ ხალხს კულტურული ურთიერთობა უწინარეს ყოვლისა კავკასიელ ხალხებთან უხდებოდა. საქართველო თვითონვე წარმოდგენდა „პატარა კავკასიის“, რამდენადაც აქ კავკასიის თითქმის ყველა ხალხის წარმომადგენლები ცხოვრობდნენ. კავკასიელი ხალხების ყოფა-ცხოვრება და კულტურა ბევრი რამით ენათესაებოდა ერთმანეთს, რაც ურთიერთ-შემოქმედების შედეგი იყო. მათი ცხოვრებაც დაახლოებით ერთგვარ პირობებში მიმდინარეობდა, ერთად უხდებოდათ ბრძოლა ეროვნული და სოციალური ჩაგვრის წინააღმდეგ. თბილისი იყო კავკასიის ადმინისტრაციული და ამავე დროს ყველაზე მთავარი კულტურული ცენტრიც, სადაც მოღვაწეობდნენ კულტურის არა მარტო ქართველი, არამედ სომეხი, აზერბაიჯანელი, აფხაზი, ოსი, ყაბარდოელი მოღვაწენი. ბევრმა არა-ქართველმა მოღვაწემაც კარგად იცოდა ქართული ენა და კულტურა და მეგობრობდა ქართველ მოღვაწეებთან. ქართულ მწიგნობრულ ტრადიციებზე აღზრდილმა ოსმა პოეტმა ი. იალღუზიძემ (1770—1830 წწ.) ქართული ასოები გამოიყენა ოსური ანბანის შესაღგენად. ქართულიდან ოსურ ენაზე თარგმნა რამდენიმე ნაწარმოები და თვითონაც წერდა ლექსებს ქართულად. აფხაზი მოღვაწე მიხეილ შერვაშიძე ქართული კულტურის მოღვაწეც იყო. იგი ნაყოფიერად თანამშრომლობდა ქართულ პრესაში. ქართველი მოღვაწენიც ყოველნაირად ეხმარებოდნენ აფხაზ და ოს ხალხებს მშობლიური კულტურის განვითარებაში: აფხაზური სწავლადანათლების შექმნისათვის იღვწოდნენ ი. ჭავჭავაძე და ი. გოგებაშვილი. 1892 წელს კ. მაჭავარიანმა ჯ. გულიასთან ერთად გამოსცა „აფხაზური ანბანი“. 1865 წელს გამოცემული პირველი აფხაზური ანბანიც თბილისში დაიბეჭდა. თ. ეშბასთან ერთად აფხაზური სასწავლო წიგნების გამოცემის საქმე წინ წასწია ა. ჩოჩუამ. თბილისში დაიბეჭდა 1861 წელს პირველი

ყაბარდოელი ისტორიკოსის შ. ნოგმოვის (1801—1844 წწ.) ნაშრომი „ადილე ხალხის ისტორია“.

განათლება თბილისში მიიღო და აქ ეწეოდა შემოქმედებით მუშაობას სომხური და აზერბაიჯანული კულტურის არაერთი მოღვაწე. თბილისში გაატარა რამდენიმე წელი აზერბაიჯანელმა ისტორიკოსმა ა. ბაქიხანოვმა, რომელსაც ახლო ურთიერთობა ჰქონდა ა. ჭავჭავაძესა და გრ. ორბელიანთან. აქ გაიფურჩქნა აზერბაიჯანული განმანათლებლური ლიტერატურისა და აზროვნების გამოჩენილი წარმომადგენლის მირზა ფათალი ახუნდოვის შემოქმედებითი ნიჭი. 40-იანი წლების დამდეგს პოეტმა მირზა შაფი ეაზეჰმა თბილისში დააარსა აზერბაიჯანული ლიტერატურულ-ფილოსოფიური წრე. თბილისის საზოგადოებრიობა კარგად იცნობდა აზერბაიჯანული თეატრისა და გაზეთის დამაარსებელს ჰასან-ბეგ ზარდაბის.

სომეხი მოსახლეობისათვის თბილისში არსებობდა სკოლები, გამოდიოდა სომხური გაზეთები. დემოკრატიულ გაზეთს „ტიფლისკი ვესტნიკს“ სომეხი მოღვაწე კ. ბებუთოვი რედაქტორობდა. თბილისში დაიწერა სომხური რეალისტური პროზის ფუძემდებლის ხ. აბოვიანის (1805—1848 წწ.) ცნობილი ნაწარმოები „სომხეთის წყლულები“. თბილისის ინტელიგენციამ 1860 წელს საზეიმო შეხვედრა მოუწყო ცარიზმის მიერ დევნილ სომეხ განმანათლებელ-დემოკრატს მ. ნალბანდიანს. თბილისი იყო სომეხ მეცნიერთა და მწერალთა მთელი ჯგუფის სამოღვაწეო კერა. აქ ცხოვრობდა პოეტი არ. ალამდარიანი. ქართულ საზოგადოებრიობაში განსაკუთრებული პოპულარობით სარგებლობდა გამოჩენილი სომეხი დრამატურგი გ. სუნდუკიანი, რომლის „პეპო“ წარმატებით იდგმებოდა ქართულ სცენაზე.

კავკასიის ხალხთა კულტურის პროგრესულ მოღვაწეთა თანამშრომლობა ხელს უწყობდა მათი კულტურის გამდიდრებას, ურთიერთდაახლოებას, დარაზმეას ეროვნული და სოციალური ჩაგვრის წინააღმდეგ. მაგრამ ცარიზმის კოლონიური პოლიტიკის და კაპიტალიზმის განვითარების შედეგად სხვადასხვა ერის კონსოლიდაციის პირობებში ყოველთვის როდი ხერხდებოდა ხალხთა ინტერნაციონალური ერთობის იდეის თანამიმდევრული დაცვა და განხორციელება. მწვავე პოლემიკაც არაერთხელ გაჩაღებულა ქართული და სომხური კულტურის მოღვაწეთა შორის, განსაკუთრებით XIX საუკუნის უკანასკნელ მესამედში, როცა ქართველი თეატრალურების და გლეხობის ეკონომიური ჩაგვრის გზით გაძლიერებულმა სომხურმა ბურჟუაზიამ გაბატონება იწყო საქართველოს ქალაქებსა და სოფლებში. გამწვავებულმა კლასობრივმა ბრძოლამ, რომელსაც ცარიზმი ეროვნული შუღლის გაღვივებისა და სომეხ-ქართველთა ერთმანეთზე გადაკიდების მიზნით იყენებდა, ზოგი ინტელიგენტიც ააცდინა გზას, მაგრამ ქართული და სომხური კულტურის დიდი მესევეურნი ი. ჭავ-

კვაძე, ა. წერეთელი, ი. გოგებაშვილი, გ. წერეთელი, ნ. ნიკოლაძე, ხ. აბოვიანი, მ. ნალბანდიანი და სხვ. ყოველთვის ნათლად განასხვავებდნენ ერის მშრომელ უმრავლესობას ექსპლოატატორებისაგან და ხალხთა მეგობრობის განმტკიცებისათვის იბრძოდნენ.

ქართულ-რუსულ-ევროპული კულტურული ურთიერთობანი. ახალი ქართული კულტურის მოღვაწენი აცალკევებდნენ რუს ხალხს და მის პროგრესულ წარმომადგენლებს მეფის თვითმპყრობელობისა და მისი მსახური შოენისტებისაგან, პუშკინისა და ჩერნიშევსკის რუსეთს კატკოვისა და სუეოჩინის რუსეთისაგან. ისინი ებრძოდნენ ცარიზმს და მის იდეოლოგიებს, მაგრამ დიდად აფასებდნენ რუსულ განმანათლებლურ-რევოლუციურ-დემოკრატიულ კულტურას, სწავლობდნენ რუსი ხალხის საუკეთესო შეილებიდან, მიესალმებოდნენ რუს ხალხთან ქართველი ხალხის დაახლოებისაკენ გადადგმულ ყოველ ნაბიჯს.

ცარიზმის კოლონიური ჩაგერის პოლიტიკის მიუხედავად, XIX საუკუნეში რუსეთი იყო არა მარტო მფარველი საქართველოსი, არამედ განათლების წყაროც. რუს ხალხთან დაკავშირებამ ხელშემწყობი პირობები შეუქმნა ქართველ ხალხს საკუთარი მრავალსაუკუნოვანი კულტურის აღორძინებისა და განვითარებისათვის. რუსულ სკოლებსა და უმაღლეს სასწავლებლებში აღიზარდა ქართველი ახალგაზრდობის მრავალი თაობა. რუსული ენის და ხასიათის, პროგრესული რუსული კულტურის შესწავლა აფართოებდა ქართული კულტურის მოღვაწეთა ცოდნის სფეროს, დიდ როლს ასრულებდა მათი მსოფლმხედველობის ჩამოყალიბებაში. თავის მხრე ქართველებსაც მნიშვნელოვანი წვლილი შეჰქონდათ რუსული მეცნიერების და კულტურის განვითარებაში. რუსულ წიგნს, რუსულ ჟურნალ-გაზეთებს, რომლებიც საქართველოშიც გამოდიოდა და რუსეთიდანაც მრავლად ერცელდებოდა, განათლებული ქართველობა მშობლიურ მწიგნობრობასთან ერთად ეწაფებოდა. ქართულად ითარგმნებოდა რუსული მწერლობის საუკეთესო ნიმუშები. საქართველოს პრესაში ქვეყნდებოდა რუს პუბლიცისტთა ნაწერები, ქართველებისა კი რუსულ პრესაში. რუსები და ქართველები ერთობლივად ებრძოდნენ გარეშე მტრებს რუსეთისა და ქართველების ერთობლივად დასაცავად. რუსული სახელმწიფოს და მისი შემადგენელი ნაწილის საქართველოს დასაცავად. საქართველოში ნამსახური რუსი ჯარისკაცები ეცნობოდნენ ქართველი ხალხის ყოფას და კულტურას. ზოგი მათგანი არმიიდან დათხოვნის შემდეგ საქართველოში სახლდებოდა და ისეთივე მიწის მუშა ხდებოდა, როგორც ქართველი გლეხი იყო. ქართველებიც ეცნობოდნენ რუსულ ხასიათს და ზნე-ჩვეულებას. რუსეთიდან საქართველოში ჩამოდიოდნენ არა მარტო უსულგულო მოხელენი და დამსჯელი რაზმები, არამედ რუსი ხალხის საუკეთესო შეილებიც — მწერლები, მეცნიერები, ხელოვნების მუშაკები, თვითმპყრობელობის, ბატონყმობის და კაპიტალიზმის წინა-

აღმდეგ მებრძოლნი. რუსულ განმანათლებლურ-დემოკრატიულ, უტოპიურ-სოციალისტურ და კრიტიკულ-რეალისტურ მწერლობასა და აზროვნებაზე აღიზარდნენ XIX საუკუნის ქართველი მწერლები და განმანათლებლები. რომლებიც საქართველოს ეროვნულ-განმათავისუფლებელ მოძრაობას რუსი ხალხის რევოლუციურ-დემოკრატიული მოძრაობის თავისებურ, მაგრამ განუყოფელ ნაწილად თვლიდნენ. რუსეთისა და უკრაინის საუნივერსიტეტო ქალაქებში — პეტერბურგში, მოსკოვში, კიევში, ოდესაში — ხვდებოდა ქართველი მოსწაულე ახალგაზრდობა რუს, უკრაინელ, პოლონელ რევოლუციონერებს და მათთან ერთად მონაწილეობდა საერთო-რუსულ თუ საკუთრივ საქართველოს განმათავისუფლებელ დემოკრატიულ მოძრაობაში.

ქართულ-რუსული კულტურული ურთიერთობა წინათაც მნიშვნელოვანი იყო. მაგრამ XIX საუკუნეში იგი უაღრესად გაფართოვდა და ურთიერთზემოქმედების ხასიათი მიიღო. რუსეთთან საქართველოს შეერთებისთანავე რუსულიდან ქართულად და ქართულიდან რუსულად ითარგმნა რამდენიმე ლიტერატურული, ისტორიული და იურიდიული ძეგლი. პეტერბურგში გადაახლებული ქართველი მწერლები და მეცნიერები თვითონაც სწავლობდნენ რუსულ კულტურას და რუსულ საზოგადოებრიობასაც აცნობდნენ საქართველოს ისტორიას და კულტურას. 1802—1803 წლებში საქართველოში ცხოვრობდა რუსული რეალისტური რომანის ერთ-ერთი ფუძემდებელი ვ. ნარეჟნი. 20-იან წლებში საქართველოში ჩამოსახლებული ა. გრიბოედოვი, რუსი დეკაბრისტები და პოლონელი რევოლუციონერები დაუახლოვდნენ ა. ჭავჭავაძეს და საერთოდ ქართველ ინტელიგენციას. აქ შექმნა გრიბოედოვმა თავისი კლასიკური ნაწარმოებები. ოდოევსკიმ 58 ლექსიდან 13 საქართველოს მიუძღვნა. საქართველოში გაიფურჩქნა პოეტური ნიჭი მ. ლერმონტოვისა, რომელმაც ბევრ თავის შედეგს ქართული ხალხური თქმულებანი დაუდო საფუძვლად. 1829 წელს ქართველმა ინტელიგენციამ თბილისში დიდი სიყვარულით მიიღო ცარიზმის მიერ დევნილი ა. პუშკინი. იმავე წელს მთაწმინდამ შიიბარა ნუშტი ქართველი ხალხის მეგობრის ა. გრიბოედოვისა, რომელიც აკრიტიკებდა ცარიზმის კოლონიურ პოლიტიკას „თანამოქალაქე“ ქართველებისადმი. ა. შამკოვმა, რომელიც 1818—1824 წლებში საქართველოში ცხოვრობდა, რეალისტურად დახატა ჩაგრული ქართველი ხალხის მდგომარეობა და ნიღაბი აბაღა ცარიზმის კავკასიელ მოხელეთა ბოროტმოქმედებას. თბილისის რუსულ პრესაში დემოკრატიული იდეების პროპაგანდას ეწეოდა არაერთი რუსი მწერალი და პუბლიცისტი. საქართველოს უძაღლოდა თავის პოეტურ შემოქმედებას ი. პოლონსკი. ქართულ მელოდიებს იყენებდნენ თავიანთ სამუსიკო ნაწარმოებებში პ. ჩაიკოვსკი და იპოლიტოვ-ივანოვი, რუბინშტეინი და სხვა რუსი კომპო-

ზიტორები. საქართველოში დაიწერა ლ. ტოლსტოის და მ. გორკის პირველი თხზულებანი. საქართველო და საერთოდ კავკასია იქცა XIX საუკუნის რუსეთის არაერთი „პოეტური ტალანტის აყენად, მათი მუზის შთამაგონებლად, მათ პოეტურ სამშობლოდ“¹. უაღრესად პოპულარული იყო ქართველ ინტელიგენციაში ბ. ბელინსკის, ა. გერცენის, ნ. ჩერნიშევსკის, ა. დობროლიუბოვის, ნ. ნეკრასოვის, ტ. შევჩენკოს, პ. ლაეროვის რევოლუციურ-დემოკრატიული და უტოპიური იდეები. ი. ქავჭავაძე და ა. წერეთელი, ნ. ნიკოლაძე და გ. წერეთელი, ს. მესხი და ი. გოგებაშვილი, ა. ფურცელაძე და გ. მაიაშვილი მათ მოწაფეებად მიიჩნევენ თავს.

XIX საუკუნის რუსული კულტურა მჭიდროდ იყო დაკავშირებული დასავლეთ ევროპის და მსოფლიო კულტურასთან. განათლებული ქართველობა უმთავრესად რუსული ენისა და სკოლის მეშვეობით ითვისებდა ფრანგული, გერმანული, ინგლისური ლიტერატურის. საზოგადოებრივი აზროვნების და მეცნიერების მიღწევებს. დასავლეთეუროპელ განმანათლებელ და ჰუმანიტ მწერალ-მოაზროვნეთა ნაწერების თარგმნა საქართველოში ჯერ კიდევ XVIII საუკუნის მეორე ნახევრიდან დაიწყო, XIX საუკუნის პირველ ნახევარშიც არ შეწყვეტილა. ხოლო 60—70-იანი წლებიდან იმდენად განვითარდა, რომ ქართველი მკითხველი მშობლიურ ენაზე კითხლობდა უ. შექსპირისა და ვ. ჰიუგოს, ჟ. ბაირონისა და ი. გოეთეს. თ. ბალზაკისა და ე. ზოლას არაერთ ნაწარმოებს. დიდი პოპულარობა მოიპოვა შექსპირის ტრაგედიების კლასიკურმა თარგმანებმა, რომლებიც ი. მაჩაბელმა შეასრულა. ქართული კულტურის ზოგი მოღვაწე, მაგალითად, ნ. ნიკოლაძე ფრანგულ ენაზეც წერდა და ევროპაში აქვეყნებდა თავის ნაწარმოებებს. განათლებული ქართველობა განსაკუთრებულ ინტერესს იჩენდა დაწინაურებულ ხალხთა, აგრეთვე ჩაგრულ ერთა ცხოვრების ამსახველი ლიტერატურისადმი, დასავლეთეუროპული და ამერიკული განმანათლებლობის და უტოპიური სოციალიზმის იდეების გავრცელებას ემსახურებოდა ახალი ქართული პუბლიცისტიკა. დასავლეთშიც გამოქვეყნდა ქართულ თემაზე შექმნილი რამდენიმე ნაწარმოები. ქართველი ხალხის ცხოვრებით დაინტერესდა ზოგიერთი ევროპელი მწერალი, პუბლიცისტი და მეცნიერი. 50-იანი წლების ბოლოს საქართველოში იმოგზაურა და სამშობლოში დაბრუნების შემდეგ მის შესახებ დიდი წიგნი გამოაქვეყნა ფრანგმა რომანისტმა ა. დიუმა. 80-იანი წლებიდან თბილისში ცხოვრობდა გერმანელი მწერალი არტურ ლაისტი, რომელმაც ევროპას გააცნო ქართველი ხალხის ძველი და ახალი კულტურის მრავალი მხარე. 90-იანი წლებიდან ქართული კულტურის პროპაგანდას ინგლისურ ენაზე ეწეოდა ძარჯორი უორდროპი, რომელსაც არტურ

¹ ბ. ბელინსკი, რჩ. თხზ., ტ. I, 1952, გვ. 205.

ლაისტან ერთად მეგობრული ურთიერთობა ჰქონდა ილია ჭავჭავაძესა და სხვა ქართველ მოღვაწეებთან. ა. ლაისტმა და მ. უორდროპმა ევროპელ მკითხველს გააცნეს ქართული ლიტერატურის არაერთი შედეგი, მათ შორის „ეფთხისტყაოსანი“. საფუძველი ჩაეყარა საქართველოს ლიტერატურულ-კულტურულ ურთიერთობას პოლონეთთან, უნგრეთთან, ჩეხეთთან, ბულგარეთთან, რუმინეთთან, იუგოსლავიასთან. ქართველები დიდი ინტერესით ეკიდებოდნენ აზიის, აფრიკის და ამერიკის შორეული ხალხების — იაპონელების, ჩინელების, ვიეტნამელების, ავღანელების, არაბების, ჩრდილო და სამხრეთ ამერიკელთა კულტურასა და ყოფა-ცხოვრებასაც. მაგრამ ქართველი ხალხის კულტურული ურთიერთობა ამ ხალხებთან ცალმხრივი იყო. შორეული ხალხები ჯერ კიდევ არ იცნობდნენ მრავალსაუკუნოვან თვითმყოფელ ქართულ კულტურას. ამგვარი ცალმხრივობისაგან საესებით თავისუფალი არ იყო ქართულ-რუსულ-ევროპული კულტურული ურთიერთობაც. ევროპაში და თვით რუსეთშიც ბევრი ჯერ კიდევ ეგზოტიკის მოყვარულის თვლით უფრო უყურებდა საქართველოს, მისი კულტურის ცოდნას კი მოკლებული იყო. თვითმპყრობელური კოლონიური პოლიტიკისა და საქართველოს ცხოვრების განუვითარებლობის გამო თვითმყოფადმა და მრავალმხრივმა ქართულმა კულტურამ XIX საუკუნეში მხოლოდ სცადა ფართო სარბიელზე გასვლა, საქართველოს გეოგრაფიული საზღვრების — ჩრდილოეთით კავკასიის მთების, დასავლეთით შავი ზღვის — გადალახვა კი არსებითად ვერ მოახერხა. ქართულ-რუსულ-ევროპულ კულტურულ ურთიერთობაში ქართველი ხალხი უფრო მიმღები იყო, ეიდრე მიმწოდებელი. მიუხედავად ამისა, ბევრმა ქართველმა მეცნიერმა, რომელნიც უმთავრესად სამშობლოს საზღვრებს გარეთ მოღვაწეობდნენ, სახელი გაითქვეს მთელ რუსეთში და ევროპაშიც (ს. დოდაშვილი, რ. ბაგრატიონი, დ. ჩუბინაშვილი, გ. ქიქოძე, ა. ცაგარელი, ა. ხახანაშვილი, ვ. პეტრიაშვილი, პ. მელიქიშვილი). შედარებით ძნელად იკაფავდა გზას საქართველოს გარეთ ახალი ქართული ლიტერატურა და ხელოვნება, მაგრამ გვიან, რევოლუციის შემდეგ მათაც საყოველთაო აღიარება პოეზის საბჭოთა კავშირის ხალხთა ძმურ ოჯახშიც და საზღვარგარეთაც. ესეც იმას მოწმობს, რომ XIX საუკუნის ქართული კულტურა სხვა ხალხთა კულტურის უბრალო განმეორება არ იყო. ქართველ ერს იმ დროს პოლიტიკური დამოუკიდებლობა არ ჰქონდა, მაგრამ დამოუკიდებელი, თავისებური კულტურული სახე შეინარჩუნა. ახალი ქართული კულტურა, ისევე როგორც ძველიც, ქართველი ხალხის ეროვნულ თავისებურებებს ასახავდა, შინაარსისა და ფორმის ორიგინალურობით ხასიათდებოდა და სხვა დიდ თუ პატარა ერთა შემოქმედებებთან ერთად აღვიძრებდა საკაცობრიო კულტურის საგანძურს.

ს ა ძ ი ე ბ ე ლ ი *

ა) პირთა ხახელები

- აბა-მელოქოვი ნ. 422.
 აბაშიძეები 89, 187.
 აბაშელი ა. 24, 736.
 აბაშიძე გრიშა 799.
 აბაშიძე ვ. 659.
 აბაშიძე ვასო 810, 826.
 აბაშიძე კ. 33, 497, 506, 795, 797.
 აბაშიძე საჰსონ 636; 794, 806.
 აბაშიძე ქ. 635.
 აბესალომოვი გ. 324.
 აბესალომოვი სოლომონ 256.
 აბესაძე საჰსონ 402.
 აბზიანიძე გ. 24, 485, 498.
 აბოიანი ხ. 836, 837.
 აბშილავა ბახუტა (ანჩაბაძის ყმა) 166.
 აგიაშვილები 89.
 ავალიშვილები 240.
 ავალიშვილი ვიგო 596, 615.
 ავალიშვილი დ. 656.
 ავალიშვილი ნიკოლოზ 810.
 ავალიანი სიმონ 25, 155, 178, 525, 526, 534, 555—557.
 ავეგერინი 402.
 ადელხანოვი 387, 388, 389, 393, 417, 420, 423, 702.
 ალექსანდრე I 91.
 ალექსანდრე II 216, 218, 225, 230, 240, 252, 257, 272, 312, 460, 664.
 ალექსანდრე III 460, 668.
 აკაკი 267, 485—489, 492, 501, 593.
 ალექსეევი ნიკ. 600.
 ალამდარიანი რ. 836.
 ალილუევი ა. 755, 759, 760.
 ალხანოვი 425, 620, 622.
 ალხანოვი კ. 831.
 ალექსი-მესხიშვილი 793, 794.
 ალტერი ფრ. 823.
 ალხაზიშვილი 89.
 ამილახვრები 240.
 ამილახვარი ალექსანდრე 474, 818.
 ამილახვარი 60, 242, 450.
 ამილახვარი ივანე 206.
 ამირალთვი 425.
 ამირეჯიბი 443.
 ამირეჯიბი გიორგი 240.
 ამირეჯიბი მიხეილ 450.
 ამეტერი 367.
 ანანოვი 63, 425.
 ანანოვი ა. 702.
 ანანოვი აბგარ 367.
 ანანოვი ალექსანდრე 367.
 ანანოვი შირმან 367.
 ანდრეევი 626.
 ანდრეევესკი 82.
 ანდრონიკაშვილები 187.
 ანდრონიკაშვილი (თარჯიშანი) 584.
 ანდრონიკაშვილი გრიგოლ 47.
 ანდრონიკაშვილი თორნიკე 47.

* შედგენილია ივ. ჭავჭავაძის სახ. ისტორიის, არქეოლოგიისა და ეთნოგრაფიის ინსტიტუტის ახალი ისტორიის განყოფილების თანამშრომლების ნ. პაპუას, ნ. ნაცვლიშვილის, ლ. ჩიქოვანის, ლ. წინამძღვრიშვილის, თ. გიბასასა და ო. ჟორდანიას მიერ.

ანდრონიკაშვილი ზაქარია 205, 206.
ანდრონიკაშვილი ივანე მალხაზის ძე
198, 199, 202—204, 205—207.
ანდრონიკაშვილი ივანე 164.
ანთელავა ი. 27, 29, 30, 47, 143, 340,
346, 349, 395, 773.
ანტონოვი ალექს. 620, 621, 622.
ანტონოვი ზურაბ 789, 790, 825.
ანჩაბაძე ზ. 90.
ანჩაბაძე თემურჯუა 166.
არაგვისპირელი შოი 797, 798.
არაყიშვილი დ. 33, 833.
არღაზანი ლვარენტი 789, 791, 801,
805.
არდასიანოვი 612.
არტიუხოვი 251.
არღუთონსკი-დოღგორჯი 20, 712.
აღუთაშვილი-მხარგრძელი ნ. 324, 702.
ასათონი ლ. 24, 33, 667.
აფანასოვი 732, 744.
აფაქიძე ბათუ 596, 608.
აფცაური გერენა 355.
აფხაზი დიმიტრი 47.
აღნაშვილი ლადო 831, 833.
აშორდია 697.
ახელედანი ნ. 30.
ახუნდოვი შირაზ ფათალი 836.
აგრატიონი ან. 474, 519, 522, 818.
აგრატიონი არჩ. 475.
აგრატიონი ვახუშტი 474, 818, 820.
აგრატიონი თეიმურაზ 819.
აგრატიონი დ. 474, 818.
აგრატიონი იოანე 10, 17, 24, 464, 474,
793, 794, 803, 805, 818, 820.
აგრატიონი კ. 658.
აგრატიონ-მუხრანსკი ი. კ. 63, 324.
აგრატიონი ქეტრე 819.
აირონი ჟ. 731, 839.
აისაგულოვი დავით 96.
აისაგულოვი სპირიდონ 96.
აეკლანოვი (გენერალი) 211, 214.
აეკლანი 211, 214, 589.
ბაღანჩივაძე მელიტონ 831, 833.
ბალასი მ. 25, 362.
ბალაჯი ი. 839.
ბაებეუქ-მელიქოვი 255.

ბარამიძე ალ. 24.
ბარათაშვილი გიორგი 794.
ბარათაშვილი დ. 702.
ბარათაშვილი ნ. 7, 11, 24, 458, 464,
474, 475, 480, 787, 805, 813.
ბარათაშვილი ს. 806, 820.
ბარკლაი-დე-ტოლო 784.
ბარიატინსკი (მეფისნაცვალ) 124, 132,
135, 136, 176, 216, 220, 222, 228,
239, 274.
ბარნოვი ვ. 797, 798.
ბასილაშვილი სოსია 59.
ბასტია (ფრანგი ეკონომისტი) 65, 269,
270.
ბაღაშვილი კ. 636.
ბაუმსტარკი ა. 823.
ბაქიხანოვი ა. 836.
ბაქრაძე 28, 90, 242, 259, 384, 611.
ბაქრაძე დ. 24, 32, 440, 657, 659, 703,
805, 810, 813, 820.
ბაქრაძე დავით 402.
ბაქრაძე იოსებ 543, 595.
ბაქრაძე კონსტ. 597, 612, 615.
ბაქრაძე ნიკოლოზ 77.
ბახტაძე ე. 36.
ბახტაძე ი. 20, 142, 144, 596.
ბებუთოვი (გენერალი) 198, 199.
ბებუთოვი კ. 809, 836.
ბებურაშვილი 47.
ბეგთაბეგოვი ნ. 425.
ბეგიაშვილი გ. 59, 60.
ბეზაი ნიკოლოზ 150, 164, 172.
ბელინსკი ბ. 258, 480, 590, 839.
ბელტოვი (პლენანოვი) 733.
ბენაშვილი 831.
ბენდანიშვილი ალ. 30, 38.
ბეჟანიშვილი ს. 583.
ბერაძე 242.
ბერძიძე 625.
ბერძიძე ალ. 827.
ბერძიძე ი. 806.
ბერძე 823.
ბერძული (ინჟინერი) 88.
ბეჩარა 782.
ბერძენიშვილი ნ. 26, 30.
ბერძენოვი ნ. (გაზ. „კავკაზის“ კორეს-
პონდენტი) 792, 804.

- ზენეიშვილი 245.
 ბესოშინაძე 245.
 ბიზინეიშვილი ბ. 761.
 ბიკოვი 611.
 ხისპარკი 742.
 ბიჩკოვი 634.
 ბლანი ლ. 519.
 ბლეიკი რ. 823.
 ბოგდანოვი ა. 418, 754.
 ბოზარჩანტი 83, 389, 678, 687.
 ბოთარსკი 611.
 ბოლქვაძე ბუქუე 245.
 ბოროზდინი კ. 248.
 ბოსტოლანაშვილი დ. 583, 584.
 ბოლხოვიტინოვი 822.
 ბოსლეველი ე. 810.
 ბოცვაძე ი. 24, 37, 511, 658.
 ბოცვაძე ლუარსაბ 815.
 ბოქოროძე შ. 730, 745, 746, 754, 759.
 ბოქოროშვილი ს. 161.
 ბოქოროშვილი ფიჩან 161.
 ბროსე მარი 820, 823.
 ბრუნერი (გენერალი) 206.
 ბრუსილოვი 185.
 ბუთურაშვილი სოლომონ 58, 67.
 ბუნგე 385.
 ბურკულაძე ერშლო 30.
 ბურჩანაძე პ. 596.
 ბურჩანაძე ს. 630.
 ბუსლაევი 628.
 ბუტკოვი პ. 823.
 ბლაკიაშვილი 265, 266.
 გაბაევი შპ. 76.
 გაბაშვილი გრ. 506, 616, 828.
 გაბაშვილი ე. 660, 801.
 გაბიჩვაძე ე. 596, 599, 600, 615, 616.
 გაბიჩვაძე ი. 596.
 გაბიჩვაძე პ. 596, 615.
 გაბლანი ეგ. 575.
 გაბუნია ნ. 659, 826.
 გაგარინი (სენატორი) 140.
 გაგარინი (გენერალ-მაიორი) 178.
 გაგარინი ა. (გენერალ-გუბერნატორი) 218, 219, 222, 223, 232.
 გაგლოშვილი ა. 618.
 გაგოიძე ვ. 36.
 გამაზოვი 60.
 გამეზარდაშვილი დ. 24, 36, 37, 470, 520, 529, 798.
 გამილტონი ს. 192.
 გამყრელიძე 399.
 განი (სენატორი) 125, 127, 181.
 განჯისკარელი ან. 782.
 გარდანოვი ბ. 767.
 გარობალი 827.
 გარსიაშვილი შ. 641.
 გაფრინდაშვილი შ. 36.
 გაწერელია ა. 787.
 გედევანიშვილი 24.
 გედი ე. 742.
 გეიშანი (გენერალი) 442, 443.
 გელიშვილი პ. 31, 32.
 გერცენი 258, 516, 517, 590, 628, 839.
 გეწაძე ნ. 161.
 გვარამაძე ა. 633.
 გველესიანი რ. 827.
 გიორგაძე გრ. 26, 33.
 გლუხოვსკი 609.
 გოგებშვილი ი. 24, 32, 258, 452, 458, 479, 489, 490, 491, 492, 493, 501, 511, 524, 649, 652, 654, 656, 658, 659, 664, 797, 806, 813, 815, 829, 831, 835, 837, 839.
 გოგიაშვილი ან. 829.
 გოგიჩაიშვილი ფ. 431, 540, 549, 557, 806.
 გოგელაძე ს. 611.
 გოგოლაძე პ. 733.
 გოგოლაძე დ. 28, 67, 80, 87.
 გოგოლი ნ. 827.
 გოდო ალ. 395.
 გოთე ი. 480, 650, 839.
 გონალიშვილი შ. 617.
 გოლიცინი (თავადი) 84.
 გოლიცინი (მთავარმართებელი) 643.
 გოლოუინი (მთავარმართებელი) 185.
 გონაშვილი შ. 59, 60.
 გორგასლოძე ე. 623, 625.
 გორგილაძე ლ. 36, 743.
 გორკი შ. 839.
 გოციროძე ნიკო 826.
 გოციროძე ოტია 240.
 გოციროძე ფრიდონ 240.

გოშტრაზერი 80.
გუგუშვილი პ. 22, 26, 27, 36, 44, 73,
74, 80, 84, 122.
გულა დ. 835.
გულისაშვილი ზაქ. 618.
გულისაშვილი იოს. 596.
გულისაშვილი ლ. 618.
გულისაშვილი შ. 523, 630, 801.
გულუშაშვილი ს. 26, 377, 383, 410.
გუმბერძენი ქრისტესა 238, 240.
გუმუზოვი ი. 417.
გუნა ე. 810, 826.
გურამიშვილი დ. 458, 474, 480, 783,
786, 805.
გურგენიძე მ. 810.
გურგენიძე ნ. 161.
გურგენიძე ს. 63, 74.
გურიელი გიორგი 197, 203, 596.
გურიელი იასე 449.
გურიელი მალქია 203.
გურიელი მამია 788.
გურკო (გენერალი) 448.
გურული ივანე 76.
გურული კონსტანტინე 402.
გურჯი იეთიმ 782, 810.
გურჯა ე. 30, 556, 557.
გუჭაბიძე ან. 244.
გრიბოედოვი ა. 126, 780, 838.
გრიგოლაშვილი ლ. 631, 633.
გრიგუესკი 577, 578, 579.
გრიშაშვილი ი. 23.
გრუზინსკი ი. 324.

დადუშქელანები 221, 222, 296.
დადუშქელანი ალექსანდრე 222.
დადუშქელანი ბეჭირბეი 297, 298.
დადუშქელანი გელა 297, 298.
დადუშქელანი თენჯიზ 222, 223, 297,
298.
დადუშქელანი ისლამ 222, 223.
დადუშქელანი კონსტანტინე 221, 222,
223.
დადუშქელანი მოსოსტრი 297, 298.
დადუშქელანი ქანსულ 222.
დაღანები 217.
დაღანი გიორგი 222.

დაღანი გრიგოლ 212, 214, 231, 232,
579, 580.
დაღანი დავით 45, 166, 703, 810.
დაღანი ეკატერინე 213, 214, 215, 218,
219, 220, 225, 227, 230, 232.
დაღანი კონსტანტინე 212.
დაღანი ლევან 247.
დაღანი ნიკო 218, 221, 658.
დაღანი პეტრე 220.
დაღანი-მიურატი სალომე 218, 364.
დაღუნაშვილი ბეჭან 76.
დავითაშვილი ე. 425.
დავითაშვილი ზ. 633.
დავითაშვილი ი. 782, 801.
დავითაშვილი შ. 586, 596, 597, 601,
604, 605, 607, 612, 618, 620, 622,
630, 631, 632.
დავითაშვილი ქ. 630.
დანდუროვი ს. 747.
დაშკოვი (იუსტიციის მინისტრი) 181.
ერისთავი რაფიელ 219, 256, 258—260,
659, 789, 790, 805.
ერისთავები 77, 81, 83, 290.
ერისთავი რევაზ შალუას ძე 267, 793,
805.
ელოზიშვილი ალექ. 620.
ერისთავ-ხოშტარია ინასტასია 801.
ერიკოვი ა. 20.
ერმოლოვი ა. 147.
ესაძე ს. 25, 593.
ესქილე 650.
ეშბა თ. 835.
ეჭუბოვი ე. 425.

ვიინშტეინი ი. 471.
ვიზეპ, შირაშაშვილი 836.
ვილდე 650.
ვაიე ფშაეელა 24, 118, 479, 493, 497,
498, 499, 500, 501, 502, 503, 797,
798, 799, 806.
ვარდანეიშვილი ფირან 76.
ვართანოვი შერმაზან 96, 253, 256.
ვარლამი (არქიეპისკოპოსი) 171.
ვასილევსკია-ჩერნიშევსკია ი. 516.
ვაშაყმაძე ტატულა 240.
ვაჩინაძე რევაზ 571, 583, 584, 620.

ვახუშტის დავით 206, 423.
ვახუშტის 327.
ვახუშტის VI 141.
ვეზირი დიმიტრი 277.
ველაძის 158.
ვენეციის ს. 520.
ვერსის 20, 26.
ვეტეა 390.
ვილაძის 210, 214.
ვიტე ს. 88, 716.
ვილსის გ. 810.
ვირონი-დაშვილი 723.
ვირონი-მ. 53, 82, 97, 132, 133, 134,
152, 165, 188, 189, 195, 200, 201,
210, 642, 749, 827.

ზადორი 228, 229.
ზაქარია ს. დ. 81, 126, 156.
ზაქარია 82.
ზალდანი ა. 824.
ზანდუკი მ. 33.
ზარდაბი ქსან-ბეგ 836.
ზარნაძე მასილა 171.
ზარნაძე პერიკლა 171.
ზარნაძე გაბრიელა 171.
ზასულაძის 627.
ზაქსი 265, 266.
ზეჟმბაი (პოდპოლკოვნიკი) 213.
ზრნაოიჩი 31, 403, 610, 806, 839.
ზეტეარი 83, 690, 691.
ზიბერა 728.
ზიკო ს. 25.
ზიჩი მიხაი 829.
ზლატოვრატსკი 590.
ზოლა ე. 839.
ზურაბიშვილი გიგო 641.
ზუბალაშვილი ა. 425.
ზუბალაშვილი ს. 324.
ზუბალაშვილი ნ. 324.
ზუბალაშვილი 81, 85.
ზუგისი იაკ. 471.
ზუკაიშვილი (კახელი გლეხი) — 58,
67.

თავი ა. 32.
თავდგირიძე ნ. 596.
თავდგირიძე ქსან-ბეი 204.

თავიშვილი გ. 31.
თავხელიძე პ. 743.
თამაშაშვილი მ. 702.
თამარ მეფე 785.
თარხნიშვილები 165, 166.
თარხნიშვილი დ. 595.
თარხნიშვილი ი. 506, 814, 821.
თავთაქიძეები 240.
თავთაშვილი ე. 623, 625, 658.
თავთაშვილი ი. 821.
თედორაძე მაქსიმე 240.
თედორაშვილი ვასო 826.
თელა გ. 754.
თელაშვილი ბიძინა 59.
თოდუა კოჩა 235.
თოძე მ. 828.
თულაშვილი ალლო 630.
თულაშვილი კახ. 656, 806.
თუმანიშვილი გ. 719, 720, 722, 804, 805,
809.
თუმანიშვილი მიხ. 788, 789.
თუმანიშვილი-წერეთლას ან. 506, 810.

თაკიშვილი ალექ. 600, 609.
თაკიშვილი პავლე 620.
თალაშვილი ი. 835.
თარხნიშვილი კ. 481, 484, 643, 644, 649, 650,
651, 652, 657, 667.

თარხნიშვილი 393.
თარხნიშვილი ალა 440.
თარხნიშვილი ე. 823.
თარხნიშვილი მ. 630.
თარხნიშვილი (პოდპოლკოვნიკი) 239.
თარხნი 213.
თარხნიშვილი 242, 243.
თარხნიშვილი 250, 251.
თარხნიშვილი კ. 699, 809.
თარხნიშვილები 425.
თარხნიშვილი 324.
თარხნი ელ. 748, 749.
თარხნიშვილი ალ. 826.
თარხნიშვილი იოსებ 826.
თარხნიშვილი პ. 24, 36, 458, 482, 489, 788,
იონესიანი ა. 702.
თარხნიშვილი პლ. 596, 804, 820.
თარხნიშვილი გ. 810.

აბაქოვი ევ. 20, 258, 595, 610, 611,
512, 613, 615.

აბაქოვი ივანე 258, 606, 612, 614,
615.

აბაქოვი (პოლკოვნიკი) 212, 213, 450,
452.

აბოლიტო-ივანოვი შ. 831, 838.

აბრამოვი ლუკა 658.

აბრამოვი-ფაშა 230.

აბოვა (ავსტრიის ფელდმარშალი) 193.

აბოვა სანდრო 831.

აბოვა ნესტორ 402.

აბრამოვი ბესარიონ 245.

აბრამოვი ბიკია 246.

აბრამოვი გრიგოლ 246.

აბრამოვი ივანია 246.

აბრამოვი კაკაბა 246.

აბრამოვი არსენ 595, 616.

აბრამოვი ნ. 761.

აბრამოვი რ. 728, 745, 759.

აბრამოვი შ. 754, 755, 760, 763.

აბრამოვი 89.

აბრამოვი თეოფილე 618.

აბრამოვი ნესტორ 596, 703.

აბრამოვი 84, 94, 124, 125.

აბრამოვი დ. 618.

აბრამოვი კ. 33, 34.

აბრამოვი 517.

აბრამოვი სიმონ 595.

აბრამოვი პოლიექტორ 636, 659,
831.

აბრამოვი ია 831.

აბრამოვი ბეგან 59.

აბრამოვი 749.

აბრამოვი დავით 658.

აბრამოვი ი. 823.

აბრამოვი 79, 84.

აბრამოვი შ. 481, 638, 661, 837.

აბრამოვი დავით 593, 595, 810.

აბრამოვი ნ. 367.

აბრამოვი კორნელი 24, 33, 822.

აბრამოვი ა. 782.

აბრამოვი მათე 596.

აბრამოვი ივანე 440, 478, 596, 789,
804, 810, 825.

აბრამოვი ლადო 745, 750, 751, 752,
759.

აბრამოვი ა. 36.

აბრამოვი ლ. 235.

აბრამოვი შ. 36.

აბრამოვი კიკელა 238, 240.

აბრამოვი გოგია 240.

აბრამოვი 450.

აბრამოვი 595.

აბრამოვი აბელ 30.

აბრამოვი ფრიდონ 187.

აბრამოვი 153.

აბრამოვი დავით 797, 826.

აბრამოვი სიმონ 824.

აბრამოვი პეტრე 252.

აბრამოვი 213.

აბრამოვი 732.

აბრამოვი 148, 780.

აბრამოვი 732, 733.

აბრამოვი 794.

აბრამოვი 153, 215, 218, 219, 220,
233, 234, 241, 242, 243, 244,
449.

აბრამოვი 442.

აბრამოვი 636.

აბრამოვი 616.

აბრამოვი ვახტანგ 33, 34.

აბრამოვი ბეგან 161.

აბრამოვი გერმანე 354.

აბრამოვი გოგია 353.

აბრამოვი იოსებო 618.

აბრამოვი ლუარსაბ 59, 60.

აბრამოვი ბეგა 184.

აბრამოვი 520.

აბრამოვი 445.

აბრამოვი-გირჩი 724.

აბრამოვი 89.

აბრამოვი 224, 241.

აბრამოვი იოვანე 59.

აბრამოვი მახარე 59.

აბრამოვი 84.

აბრამოვი 585.

აბრამოვი 213.

აბრამოვი ვ. 754, 755.

აბრამოვი 555.

აბრამოვი ალექსანდრე 367.

ლაგარბი 628.
ლაგაროვი პეტრე 524, 589, 593, 594,
608, 839.
ლანგ-თემური 650.
ლასტი არტურ 839, 840.
ლალიონი 801.
ლასალ 594.
ლასხიშვილი გ. 29, 806.
ლფარგი პ. 737.
ლალაშვილი იოსებ 670, 671.
ლეგინინი 628.
ლევაშვილი (ქუთაისის საზ. გუბერნა-
ტორი) 297, 298, 299, 659.
ლევიცი 647.
ლევიციანი 585.
ლევიშვილი ზაქარია 354.
ლემონჯავა დ. 29.
ლენინი ე. ი. 25, 42, 47, 49, 74, 79, 357,
358, 360, 369, 371, 469, 588, 590,
591, 638, 715, 716, 743, 744, 747,
749, 750, 752, 755, 756.
ლესინგი გ. 480.
ლბი ერანტ 88.
ლოპოვანი 622.
ლონინე გ. 23.
ლორმონტოვი მ. 838.
ლოლუა ძუკუ 831.
ლომონოსოვი 822.
ლომოური ნიკო 523, 633, 801, 810, 813.
ლორთქიფანიძე ანტ. 325, 326, 616, 817
ლორთქიფანიძე გ. 236, 237.
ლორთქიფანიძე ვატიკარნე 810.
ლორთქიფანიძე ე. 511, 658, 703, 733,
794, 806, 809.
ლორთქიფანიძე პ. 703.
ლორის-მელიქოვი 82, 442, 444, 447,
638.
ლუზინი ი. 732, 733, 737, 738, 744, 748,
749.
ზადერა 390.
ზაზნაშვილი სიმონ 59.
ზაზნადაროვი 235, 238.
ზაისურაძე გრ. 827.
ზაისურაძე ს. 636.
ზალაზონია ლევ. 245.

ზალარი ემ. 395.
ზალადანოვი გეორგი 417.
ზალანოვსკი 628.
ზამატაშვილი ი. 805.
ზამატაშვილი კონსტ. 282, 283.
ზამინაიშვილი გოგია 244.
ზამატაშვილი ალ. 244.
ზამულაი 423.
ზანთაშვილი 324, 385, 393, 702.
ზანსეცაშვილი ი. 567, 595.
ზარგანნი გრ. 28.
ზარი ნიკო 821, 822, 823.
ზარკოვი ფ. 20, 340, 344, 823.
ზარქსი ე. 23, 144, 145, 210, 211, 347,
591, 728, 733, 734, 736, 737, 739,
741, 743, 749, 750, 753, 759.
ზარღნია ტიტუ 250.
ზარჯანიშვილი ე. 826.
ზასლოვი პ. 747.
ზატონოვი ა. 324, 699, 702.
ზაჩაბლები 188, 189, 240.
ზაჩაბელი გიორგი 205.
ზაჩაბელი ივ. 511, 656, 659, 665, 702,
809, 839.
ზაჩაბელი ს. 20, 349.
ზალაშვილი ე. 806.
ზალაშვილი ს. 630.
ზაყაშვილი ალ. 596, 615, 616.
ზაყაშვილი ი. 441, 596, 615, 616.
ზაქაეარანი (მილოცის მეთაური) 206.
ზაქაეარანი ილ. 596, 631.
ზაქაეარანი ე. 835.
ზაქაეარანი მ. 831.
ზაქუტაძეები 244, 245.
ზახარაშვილი ვახ. 162.
ზახარაძე აბ. 772.
ზახარაძე მელქისედეკ 615, 616.
ზახარაძე ნიკ. 37.
ზახარაძე ფ. 26, 29, 30, 617, 728, 732,
734, 735, 736, 737.
ზამბდ-ემინი 145, 199.
ზგალობლიშვილი ნ. 630.
ზგალობლიშვილი სოფ. 523, 570, 593,
596, 601, 604, 605, 612, 630, 632,
633, 801, 810.
ზგელაძე ი. 733.

- მგელაძე ლ. 761.
 შებაღიშვილი აბ. 641.
 მეგრელი ღებუ 801.
 მეგრელიშვილი ვაბ. 36, 608, 617.
 მეგრელიძე შ. 30.
 მედედევი 300, 545, 547, 552.
 მეიდელო (გენერალი) 206.
 მეიენარი კ. 82.
 მელენჯუი 620.
 მელიქიშვილი ე. 440.
 მელიქიშვილი პ. 256, 822, 840.
 მენთეშაშვილი სოლ. 59.
 მესროპოვი 386.
 მესხი ივ. 658, 703.
 მესხი კ. 659, 826.
 მესხი ს. 24, 34, 37, 250, 258, 326, 440,
 504, 510, 511, 512, 513, 514, 515,
 519, 593, 649, 659, 807, 809, 813,
 839.
 მესხიშვილი ლ. 659, 862.
 მეთისაშვილი ა. 440. —
 მელინიოვი 82.
 მეჩნიოვი ლ. 127, 137, 517.
 მთვარელაშვილი ნ. 658.
 მიზანდარი ა. 831.
 მირზოევი 387, 673, 688, 689, 690.
 მიჩიანაშვილი ა. 659.
 მიჩიანოევი 425.
 მირონიოვი 584.
 მირცხულავა ი. 30.
 მიტნიი 620.
 მიხეილ ნიკოლოზის ძე (მეფისნაცვალს)
 227, 248, 249, 252, 257, 292, 293,
 304, 600, 646, 667, 668.
 მიქაბერიძე ი. 259.
 მიქაეა უტუ 16, 230, 231, 232, 233, 234,
 235, 774.
 მიქელაძე დ. 324, 519, 733, 806, 809.
 მიქელაძე ე. 702.
 მიქელაძე კ. 205, 206, 219.
 მიქელაძე 450.
 მიჩიტაშვილი (კახელი გლეხი) 60, 67.
 მოსწრაფიშვილი ან. 244.
 მოლეშოტი 509.
 მოლოერი 650.
 მოსაშვილი ი. 59, 60.
 მოსაშვილი ქ. 60.
 მოსაშვილი ბ. 59.
 მოსეშვილი პ. 399, 402.
 მრეველიშვილი ალ. 828.
 მურავიოვი (გენერალი) 25, 210, 211,
 223, 224.
 მუსხელიშვილი (პოდპოლკოვნიკი) 443.
 მუშირ-კასიფ-ფაშა 214.
 მუხთარ-ფაშა 444, 446.
 მუხრან-ბატონი გ. 294.
 მუხრან-ბატონი ივ. 26, 47, 48, 209, 212,
 213, 280, 281, 282, 283, 359, 363,
 364, 415, 429, 526, 567.
 მუხრანსკი გ. 462.
 მღვიმელი შ. 801.
 მცხეთელი მ. 730.
 მკედლიშვილი ზაქ. 59.
 მკედლიშვილი ი. 583.
 მადედიანა-შავერდაშვილი 610, 611.
 მადირაძე თაზიკა 182.
 მადირაძე თანდილა 182.
 მადირაძე პ. 425.
 მადირ-შაჰი 650.
 მათაძე მოსე 596, 618.
 მათიევი 647.
 მაკაშიძე პ. 425, 806.
 მაკაშიძეები 241, 366.
 მაკაშიძე ი. 596.
 მაკაშიძე მელიტონი 596.
 მაკაშიძე მიხეილი 47.
 მალბანდიანი მ. 836, 837.
 მათაძე მ. 596.
 მანეიშვილი ალექსანდრე 620, 657, 806.
 მანეიშვილი 248.
 მანოლიონ III 143, 194, 784.
 მარსია გურგენ 246.
 მატანსონი მ. 747.
 მატროშვილი 205.
 მაცულაოვი ივანე 76.
 მაცელიშვილი კონსტანტინე 596, 606.
 მახიშოვი (ადმირალი) 199.
 ნებეიერიძე ალ. 810.
 ნეკრასოვი ნ. 839.
 ნესელროდე 193.
 ნიდიგერი 367.
 ნიკოლაძე იაკობი 829.

სიკოლაძე ნ. 24, 34, 37, 59, 118, 228.
256, 258, 301, 325, 401, 438, 515.
516, 517, 518, 519, 520, 521, 522.
523, 524, 559, 560, 593, 594, 649,
659, 665, 702, 703, 704, 707, 710,
711, 740, 800, 809, 812, 813, 721,
837, 839.

სიკოლაძე, ბარონი 63, 64, 157.

სიკოლაძე პირველი 122, 126, 132, 133,
186, 191, 192, 193, 194, 195, 196,
197, 200, 201.

სიციხორთი ნ. 20.

სინოშვილი ეგ. 728—730, 734, 741, 751,
801, 803.

სივარაძე ბ. 575.

სივარაძე შ. 836.

სივარაძე ს. 396, 397.

სივარაძე 628.

სოსელიანი დ. 20.

სუბაევი არტემი 641.

სობრუჩევი ნ. 628.

სოხაძე ზაქარია 417.

სოხაძე ნ. 628.

სოხაძე გ. 573.

სოხაძე ალ. 838.

სოხაძე 58.

სოხაძე 252.

სოხაძე 442.

სოხაძე-ფაშა 211, 212, 213, 214, 218.

სონიძე ა. 425.

სოხაძე ალექსანდრე 166, 269, 788,
793, 805.

სოხაძეანი გრიგოლ 17, 24, 243, 274,
277, 450, 464, 475, 476, 574, 585, 720,
779, 780, 785, 786, 793, 805, 813,
825, 836.

სოხაძეანი ვახტანგ 788.

სოხაძეანი ივ. 277.

სოხაძეანი ილია 148.

სოხაძეანი სულხან-საბა 458, 475, 480.

სოხაძე-ალა 261, 262.

სოხაძე-სოფი 79, 115.

სოხაძე-სოფი ი. 806.

სოხაძე-სოფი არ. 730, 745, 754, 760.

სოხაძე-სოფი ზაქარია 618.

სოხაძე-სოფი არსენა 793.

საქალაქი (არქივიპოსკოპი) 643, 653, 654,
671.

საქალაქი ნ. 471.

საქალაქი ეგნატე 240.

საქალაქი 385.

სასველი 125, 126, 127, 193, 236.

საქალაქი 61.

საქალაქი კახი 662.

საქალაქი ა. 628.

საქალაქი 620, 630.

საქალაქი 43.

საქალაქი ს. 627.

საქალაქი ე. 813, 821, 840.

საქალაქი ჯ. 632.

საქალაქი 402.

საქალაქი 594, 612.

საქალაქი ი. 822.

საქალაქი ი. 831.

საქალაქი 132.

საქალაქი 628.

საქალაქი ი. 838.

საქალაქი კ. 336, 612.

საქალაქი 84.

საქალაქი ე. 25, 184, 823.

საქალაქი გ. 727, 728, 729, 741, 743.

საქალაქი ე. 628, 630.

საქალაქი-კორბა 621.

საქალაქი 242, 246.

საქალაქი 612.

საქალაქი 594.

საქალაქი 827, 837, 838.

საქალაქი 627, 730.

საქალაქი 828.

საქალაქი თედო 658, 821.

საქალაქი ლევან 245.

საქალაქი ნ. 32, 728, 734, 741, 742, 743.

საქალაქი (გენერალ ი) 448.

საქალაქი შ. 250.

საქალაქი 628.

საქალაქი სოლომონ 788.

საქალაქი ი. 733.

საქალაქი ე. 454.

საქალაქი პრ. 36, 563.

საქალაქი იოსებ 831.

საქალაქი 366, 573.

რაროვი ქრისტინე 612, 616.
რაკველიშვილი ქრ. 33.
რეალი (გენ.) 201.
რევიანოვი 77.
რენენკამფი (გენერალი) 183, 184.
რენინგერი 732.
რეპინი 828.
რინდზიუნსკი პ. გ. 78.
რისაკოვი 627.
რიხნერი 385.
რომაქიძე 575, 760.
როდნაია ნ. 28, 79.
როზენი 101, 122, 163, 181, 182, 217.
როზენორდიუკი 80.
რომანოვი მ. (მეფისნაცვალ) 255,
366, 526, 642, 668.
როსტომაშვილი ი. 596, 606, 815.
როტშილდი 385, 683.
რუბინშტეინი ა. 838.
რუსთაველი შოთა 458, 475, 480, 648,
731, 820, 829.
რუსო ე. 480.
რუქსი 679.
რუხაძე დიმიტრი 240.
რჩეულშვილი გრიგოლ 788, 791.

ხაკოვი 723, 724.
ხადაძე მ. 244.
ხაენელი ხ. 720, 805, 831.
ხალტიკოვი (ხალტიკოვ-შჩედრინი) 520,
738.
ხამონაძე მ. 60.
ხამხაძე ვლახუა 161.
ხამლაშვილი ვასილ 596, 603, 514, 615,
616.
ხარაჭევი ამბარცუმ 417.
ხარაჭიშვილი ალ. 656, 806.
ხარაჭიშვილი დავით 389, 390, 393.
ხარაჭიშვილი ეანო 831.
ხარაჭიშვილი მიხეილ 658
ხაფაროვა მ. 659, 826.
ხაფაროვა არშაკ 616.
ხაფაროვი სანდრო 596.
ხახოია თედო 821.
ხეგალი ი. 25.
ხეგალი მ. 686, 687, 823.
ხელიშ-ფაშა 202, 203, 207.

ხემონოვი ე. 471.
ხენკოესკი პ. 804.
ხერებრაკოვი 201.
ხეჩენოვი ი. 821.
ხვანიძე 61.
ხვიატოპოლ-პირსკი 226. 251, 442, 447.
ხიფრაშვილი ე. 586.
ხიომინი 25.
ხიომინი 824.
ხიომინი მ. (მეტეხელი შ.) 730.
ხიხარულიძე ი. 29.
ხილაჩენკო ა. პ. (პოპოვი) 749.
ხმელალოვი გ. 669.
ხოგომონოვი 390.
ხოლომონ 1 205.
ხოლორაშვილი გ. 733.
ხობივეი 612, 615.
ხტალინი ი. ბ. 32, 124, 732, 744, 750,
752, 753, 756, 760, 761.
ხტოანოვი ალ. 653.
ხტრელყოვი 156.
ხტურა ე. 730, 745. 754. 759, 760.
ხუდეიკინი 639.
ხუკორინი 837.
ხულხანიშვილი 63.
ხულხანიშვილი გ. 806.
ხულხანიშვილი ვასილ 810.
ხულხანიშვილები 366.
ხულხანიშვილი ივანე 47.
ხულეიშან-ფაშა 448.
ხულტაროვი 623, 625.
ხუმბათაშვილები 366.
ხუმბათაშვილი-იუვეინი 826.
ხუნდუკიანი გ. 836.
ხურინოვიჩი 251.

ჯაბლანიშვილი გლახა 59.
ჯატიშვილი გრიგოლ 829.
ჯიერი 742.
ჯიზენაშვილი - 583, 585.
ჯიშოფეევი ს. 601.
ჯერ-აქოფოვი ა. 417.
ჯერ-გრიგორიანცი 620.
ჯერ-გუკასოვი გენ. 442, 443—444.
ჯერ-მინასოვი ე. 96.
ჯერ-პოლოსოვი 623, 625.

ტოლსტოი დ. (შინაგან საქმეთა მინისტრი)
638, 670.

ტოლსტოი ლ. 839.

ტორმასოვი 91, 171.

ტრუხაჩოვი 623, 624, 625.

ტყეშელაშვილი ნ. 28, 431.

ფთურგაული გ. 592, 614, 656.

უზნაძე დიმიტრი 822.

უმიკაშვილი პ. 511, 659, 782, 807, 809,
816.

უორდარობი მ. 839, 840.

უსლარი 222, 823.

უშინსკი 651.

უჩინარიძე ვ. (ცაბაძე ვ.) 730.

ფაელენიშვილი კოლა 596, 615.

ფაელენიშვილი რ. 595, 596, 612.

ფალაენდიშვილი ბ. 820.

ფალაშვილი ზაქარია 831.

ფალაშვილი ივანე 831.

ფანჩულიძე 450.

ფანცხავა ა. 58, 170.

ფანცხავა რ. (ხომლედი) 31, 810.

ფილა დიანოზ 246.

ფილა მესოეთ 252.

ფილაპოვი 612.

ფინკი ფრ. 823.

ფიროსმანიშვილი ნიკო 828.

ფირცხალავა ს. 24, 513.

ფირცხალაიშვილი ბიქია 246.

ფოიერბახი ლ. 740.

ფრანჩესკი ი. 732, 733, 744, 755.

ფრანც-იოსები 193.

ფრიდონოვი ნ. 425, 702.

ფრონელი (ალ. ყიფშიძე) 532—534,
536, 537.

ფუნტოპული 418.

ფურცელაძე ან. 24, 34, 37, 270, 271,
523, 596, 793, 801, 810, 839.

ფურცელაძე დ. 616.

ფურცელაძე ქაიხოსრო 596.

ფხოველიშვილი 586.

ჭადაგიძე ნ. 623, 624, 625.

ჭეთარაძე ალექსი 449.

ჭანანოვი გიორგი 59, 60, 702.

ჭაჭაია ვ. 24, 31.

ჭედხუდაშვილი ეგორ 84.

ჭიქოძე ათანასე 596.

ჭიქოძე გ. 32, 33, 34, 36, 767, 820, 840.

ჭიქოძე ისიდორე 595, 596, 597, 598,
599, 600, 612, 615.

ჭიქოძე მ. 816.

ჭიქოძე კ. 831.

ჭუთასოვი (გრაფი) 127, 137.

ჭუთულია ა. 32, 38.

ჭუქვა 252.

ღამბაშიძე დ. 805.

ღლონტი მაქსიმე 244.

ღოღობერიძე ბეს. 258, 656.

ღოღობერიძე ნიკ. 325, 402.

ღულაძე ანდრია 810.

ყაზბეგი ალ. 18, 24, 479, 493 — 499,
813, 826.

ყაზბეგი გ. 24, 440, 494.

ყაზარაშვილი სტეფანე 59, 60.

ყენა 242, 245.

ყიფიანი დიმიტრი 23, 67, 275—276,
282, 324, 475, 519, 571, 643, 649.
650, 655, 656, 659, 665, 667, 668—
671, 789, 793, 806, 813, 816
827.

ყიფიანი დავით 64, 806.

ყიფიანი კოტე 659, 826.

ყიფიახი შიხეილ 596, 597, 608, 609, 614,
630, 631, 658.

ყიფშიძე ვრ. 33, 618, 806.

ყორღანოვები 425.

ყორღანოვი 77, 82.

ყორღანოვი ა. 831.

ყორღანოვი ი. 702.

ყუბანეიშვილი ს. 24.

შავერდოვი 81.

შავიშვილი ან. 616.

შაიკოვი 60.

შალიკაშვილები 187.

შალიკაშვილი ვ. 826.

შალიკაშვილი სიმონ 47.

შამბა ოსმან 252.

შამილი 195, 197, 199, 225.

შარვაშიძე (მემაჟულე) 366, 576.
შარვაშიძე ელ.საბედ (მიშო უღოსასი პე-
ულდე) 631.
შარვაშიძე მიხეილ 201, 202, 217, 225—
226, 620, 635.
შატილოვი ალ. 745.
შა-აბაზი 650.
შეჩენო ტ. 839.
შერიფ-ბეგი 448.
შერემეტოვი 643.
შექსპირი 660, 731, 766, 839.
შეველი ს. 615.
შიოშვილი 187.
შიუკაშვილი შ. 627.
შიუკოვი 592.
შიშკოვი ა. 836.
შმერლინგი ასკარ (მხატვარი) 645.
შტუხე 92.
შულცი 82.
შუბილი ნურბე 252.
ჩაიკოვსკი პ. 831, 838.
ჩარეკოვი იოსებ 77.
ჩანტლაძე ერ. 761.
ჩახვაშვილი ნ. 30.
ჩერეპოვი 250, 251.
ჩერნიშევსკი 258, 480, 501, 516, 518,
520, 524, 590, 592, 593, 594, 837,
839.
ჩერნიშოვი (სამხ. მინისტრი) 132, 133,
182, 188.
ჩერტოვი პ. 831, 838.
ჩიკვაძე მ. 806.
ჩითახოვი 324.
ჩინგისხანი 650.
ჩიტაია გ. 767.
ჩიქოვანები 246.
ჩიქოვანი დავით (დადიანის სახლთუხუ-
ცესი) 230, 231, 806.
ჩიქოვანი თ. 712.
ჩიქოვანი რ. 247.
ჩიქვაძე მ. 45, 47, 63, 237.
ჩოღარიშვილი გ. 730.
ჩოღარიშვილი ზ. 745, 754, 759, 760.
ჩოღარიშვილი მ. 691.
ჩოლოყაშვილი ნიკ. 423.
ჩოჩუა ა. 835.

ჩუბინაშვილი დ. 804, 820, 821, 840.
ჩუბიძე ბეჟან 238.
ჩუბიძე გ. 730, 745, 754, 760.
ჩუბიძე კ. 732, 733, 734, 741.
ჩუბეტა შ. 22, 28, 29, 30, 132, 148, 375.
ჩუბიკაძე ზაქარია 831.
ჩუღეცი 670, 671.
ცაბაძე ვ. 732, 745.
ცაგარელი აექსენტი 800, 801, 826..
ცაგარელი ალ. 813, 840.
ციმერმანი 402.
ციციშვილი არჩილ 622.
ცეცხლაშვილი პეტრე 60, 61.
ცხაკია მ. 728, 732—734, 737.
ცხადაძე გიორგი 162.
ცხადაძე ივანე 162.
ცხადაძე სიმონ 162.
ცხვედაძე ალექსანდრე 596.
ცხვედაძე იოსები 618.
ცხვედაძე ნიკო 656, 702, 815.
ძაროანი 169.
წყალური შიო 355.
წინამძღვარიშვილი ილია 815.
წმინდა ნინო 663.
წულუკიძე ა. 32, 658, 732, 734, 750,
751, 760.
წულუკიძე პეტრე 402.
წერეთელი აკაკი 17, 24, 32, 33, 34, 258,
398, 458, 479, 485, 486, 487, 488,
489, 492, 501, 511, 579, 593, 649,
661, 662, 663, 665, 669, 782, 793,
794, 796, 797, 805, 806, 807, 809,
810, 812, 813, 825, 837, 839.
წერეთელი გიორგი 24, 32, 34, 38, 258,
440, 504, 505, 506, 507, 508, 509,
510, 511, 518, 519, 730, 782, 800,
802, 806, 807, 809, 813, 817, 837,
839.
წერეთელი გრიგოლ 163, 182.
წერეთელი ეასილ 806.
წერეთელი ექვთ. 794.
წერეთელი სოლომონ 402.
ჭავჭავაძე 140, 450.
ჭავჭავაძე ა. გ. 24, 126.

კეკელიძე დავით 363.
კეკელიძე ზაქარია 449.
კეკელიძე ილია 17, 24, 32—35, 258, 259,
263, 264, 266—269, 308, 358, 440,
464, 466, 479—481, 483, 492, 501,
511, 520, 524, 555, 558, 562, 563,
593, 646, 647, 651, 656, 657, 660,
661, 666, 782, 793—796, 802, 806,
809, 812, 813, 825, 827, 835—
840.

კეკელიძე ნიკო 205, 255, 284.
კალაღიძლე გ. 810.
კანკორაშვილი დავით 59, 60.
კილაშვილი (ნადვორნი სოვეტნიკი) 196.
კიკინაძე ა. 24.
კიკინაძე ზ. 24, 33, 658, 782, 816, 821.
კიკინაძე ი. 596, 615, 616.
კონჭაძე დ. 32, 258, 260, 262, 271,
478, 522, 523, 789, 792, 793.
კრელაშვილი სტ. 586, 595, 600, 616,
620, 621—623, 806, 810.
კყონია ერასტი 204.
კყონია ილია 810.

ზატისოვი 82.
ზაჩატურაიანი 385.
ზაკაპურიძე გ. 26, 29, 30, 186.
ზახანაშვილი ა. 33, 821, 840.
ზელაძე გ. 586.
ზელთუფლიშვილი ზ. 326.
ზიდისთაველი მ. 730.
ზიზანეიშვილი პეტრე 240.
ზიზანიშვილი ნიკ. 810.
ზითარიშვილი არუთინ 59.
ზიშმაშვილი ეანო 596.
ზიშმაშვილი შერიფ ბეგი 45, 440, 447.
ზიშმაშვილი 660.
ზომტარია ე. 28, 30, 69, 71, 73, 75, 78,
79, 80.

ზრისტოვი კ. 633.
ზრისტოფოროვი 595, 598, 599.
ზუბლაროვი 390.
ზუდაღოვი ნ. 760, 810.
ზუნდაძე სილოვან 801.
ზუნდაძე სამონ 24, 33, 34, 507.

ზურციძე მურზაყან 237, 240.
ზურციძე ჭაშინია 236, 240.
ზუშიტაშვილი 58.
ზუსიშვილი ნიკო 618.
ზუსიშვილი სოლომონ 24, 31.

ჯაბადარი ი. 595.
ჯაბალუკოვები 749.
ჯაფახიშვილი იე. 27, 29, 821, 822.
ჯანდიერი გიორგი 205.
ჯანდიერაშვილი ლ. 806.
ჯანუგაზოვი ალექსი 417.
ჯანაშვილი მოსე 820.
ჯანიევი 583, 584.
ჯალაშვილი ნინა 59.
ჯიანი ი. 326, 703.
ჯაყელი ი. 324.
ჯაფარიძე ა. 760, 761.
ჯაფარიძე გ. 825.
ჯაფარიძე 720.
ჯიბლაძე გ. 36.
ჯიბლაძე ს. 729, 732, 734, 735, 738, 739,
741, 742, 745, 760.
ჯიშეროვი 678.
ჯინჯიბუხაშვილი იოსებ 59.
ჯორჯაძე 575, 577, 581.
ჯორჯაძე ა. 33.
ჯორჯაძე ბარბარე 788, 794.
ჯორჯაძე დარიკო 596.
ჯორჯაძე ივანე 166.
ჯორჯაძე ზაქარია 362, 415, 422.
ჯორჯაძე სოფიო 596.
ჯულაშვილი სოსო 759.
ჯულაშვილი (ნოქარი) 630.
ჯულელი ანთიმოზ 815.
ჯულელი ს. 745.

ბაზირა 782.
ბარნაი ა. 823.
ბაკსტაშვილი 53, 62, 175, 823.
ბაქო-დაგუმოევა ბარბეგი 224.
ბეინე 260.
ბიუგო ე. 650, 839.
ბუსეინ-ხაში-ფაშა 446.

8) გეოგრაფიული და ეთნიკური სახელები

ახსთუმანი 202, 824.
 აბაშა 416, 421, 435.
 აბისი 240.
 აღრიანოპოლი 191.
 აზერბაიჯანელი 124, 132, 215, 442, 446,
 505, 773, 834, 835.
 აზია 91, 92, 195, 210, 224, 470, 495,
 834, 840.
 აელარ-ალაქი 446.
 აესტრა 191, 192, 193, 194, 201, 439,
 451.
 ავღანელები 840.
 აეპალ 826.
 აეოთი 203, 209, 213.
 ალავერდი 86, 87, 395, 396, 403, 420.
 ალაქის სიმბოლოები 446.
 ალი 107.
 ალისუბანი 169.
 ალექსანდროპოლი 128, 196, 198, 199,
 202, 442.
 ალექსანდროპოლის მარა 103.
 ალექსანდერსდორფი 123.
 ამბოლეზა 170, 235.
 ამეროკი 470, 471, 504, 840.
 ამიერკავკასია 7, 20, 44, 82, 83, 91, 92,
 93, 94, 95, 96, 97, 98, 99, 100, 112,
 113, 114, 121, 122, 123, 124, 125,
 126, 127, 128, 131, 132, 135, 137,
 188, 190, 194, 195, 198, 199, 209,
 210, 211, 215, 217, 280, 309, 317,
 320, 389, 417, 418, 419, 420, 424,
 425, 442, 448, 505, 517, 681, 682,
 694, 705, 717, 721, 723, 732, 741,
 747, 752, 757, 762, 769, 770, 771,
 773, 818, 834.
 ამტნისხევი 498.
 ანაგა 56, 57, 585, 586.
 ანაკლა 107, 203, 212, 394.
 ანანური 40.
 ანაბა 201.
 ანტოლია 86, 198, 199, 202, 210, 444,
 446, 447.
 ანუხვა 251.
 ანარატი 196.

აპსუელები 224.
 არაბები 840.
 არბო 420.
 არბოშოკი 57.
 არდაგანი 196, 198.
 ართვინი 443.
 ართვინის ოლქი 419.
 არტანი 443, 447, 449, 450, 645.
 არტანუჯი 443.
 არფაჩი 198.
 არხანგელსკის გუბერნია 716.
 ასტარხანი 520.
 ასტარხანის გუბერნია 716.
 ატენი 77.
 აფროკა 470, 840.
 აფეხა 250.
 აფხაზი 213, 226, 445, 459, 646, 834,
 835.
 აფხაზეთი 137, 152, 155, 196, 199, 200,
 201, 202, 209, 212, 215, 216, 217,
 223, 224, 225, 226, 250, 251, 252,
 253, 293, 295, 296, 301, 331, 335,
 337, 338, 342, 418, 445, 449, 644,
 773.
 აფხაზეთის სამთავრო 223, 224, 225,
 226, 252.
 აღბულალი 769.
 აღმოსავლეთ ამიერკავკასია 225.
 აღმოსავლეთ ევროპა 459.
 აშშ 400.
 ამხაბადი 423.
 აუა (სოფელი) 251.
 აწყური 81.
 აპარა 152, 198, 202, 335, 445, 447, 448,
 451, 452, 453, 644, 645, 775.
 აქი 242.
 ახალგორი 50, 51, 107.
 ახალსენაკი 416, 421, 435, 649.
 ახალსოფელი 730.
 ახალქალაქი 50, 62, 107, 109, 116, 420,
 426, 427, 432, 705, 706, 709, 710.
 ახალქალაქის მარა 310, 335, 417, 419.
 ახტალა 87.
 ახაშენი 641.

ახალიცხე 107, 109, 110, 116, 122, 128,
177, 196, 198, 199, 202, 236, 327,
328, 378, 421, 426, 427, 432, 434,
448, 449, 451, 705, 706, 708, 709,
710.
ახალიცხის მაზრა 41, 85, 110, 150, 152,
178, 190, 229, 257, 310, 419.
აჭაშვილი 240.
ბათუმი 202, 203, 206, 207, 211, 328,
384, 385, 392, 407, 415, 418, 419,
421, 425, 427, 428, 431, 432, 435,
436, 437, 442, 443, 445, 447, 449,
451, 452, 569, 653, 657, 667, 685,
687, 697, 702, 704, 706, 708, 709,
710, 732, 733, 771, 826, 829.
ბათუმის ოლქი 419, 724, 725, 744.
ბაიაზეთი 196, 442, 443.
ბაილეთი 243.
ბაკურცხე 583.
ბალკანეთი 439, 440, 448, 451.
ბალკანეთის ნახევარკუნძული 194.
ბალტიისპირეთი 716.
ბანოჯა 169.
ბარცხანა 452.
ბაქო 99, 128, 385, 423, 425.
ბაღდადი 235, 236, 238, 239.
ბაშკადილარი 199.
ბახეი 241.
ბელგია 400.
ბელორუსია 642, 716.
ბერლინი 418, 451, 452.
ბერძენი 86, 767.
ბესარაბია 193, 448.
ბზიფი 225, 250, 251.
ბრეთი 240.
ბოგუჩარი (ჭალაქი) 79.
ბოდბისხევი 187.
ბოლნისი 88.
ბორჩალო 40, 147, 313.
ბორჩალოს დისტანცია 110.
ბორჩალოს მაზრა 310, 335, 351,
367, 387, 417, 419, 541, 550, 551.
ბორჯომი 387, 668, 669, 670, 824.
ბორჯომის ხეობა 81, 126, 198.
ბოსლევები 169.
ბოსნია 439.

ბოსფორი 439.
ბულგარეთი 192, 193, 439, 448.
ბულგარელი 514.
გაეაზი 55.
გალიუპოლი 192, 193.
გელათი 169.
გელენჯიკი 200, 201.
გერმანია 400, 451, 471.
გიორგიწმინდა 143.
გოგორეთი 185.
გოგოლეთი 242, 243.
გოგოეთი 240.
გოდიგანი 170.
გომარეთი 657.
გორი 40, 77, 104, 107, 109, 110, 112,
114, 116, 118, 128, 145, 148, 177,
188, 199, 327, 328, 421, 426, 427,
432, 434, 504, 523, 573, 595, 633,
646, 697, 699, 705, 706, 708, 710,
751, 752, 780, 818.
გორის მაზრა 46, 69, 77, 104, 110, 138,
139, 140, 146, 147, 151, 152, 156,
158, 165, 167, 170, 171, 172, 173,
175, 176, 183, 205, 240, 257, 309,
310, 419, 420, 541, 550, 551,
717.
გორისჯვარი 50, 62.
გრემი 166.
გუმისთავი 169.
გურია 45, 101, 128, 151, 158, 159, 185,
186, 197, 199, 202, 204, 206, 209,
210, 211, 212, 213, 216, 217, 241,
243, 244, 246, 293, 294, 330, 334,
337, 423, 449, 539, 596, 641, 773,
782.
გურული 458, 646, 767, 782.
გუდაუთა 435, 445.
გუმი 251.
გურიანთა 241, 242, 243.
გურჯაანი 128.
დანდალო 452
დარდანელი 439.
დარიალი 493.
დარუბანდი 128, 135, 449.
დასავლეთ ევროპა 418, 457, 461, 463,

471, 472, 480, 481, 490, 504, 505,
510, 511, 521, 710, 711.
დასაეღოთ კიკასია 224, 225.
დაღესტანი 785.
დაღესტნელი 505.
დეკემბონის მთა 446, 447.
ღვაბზუ 101.
ღვალშეილები 238.
დიდი თანეთი 498.
დიდი საქობო 57.
დიდი ჭიხაიში 769.
დიღუბე 824.
დიში 169, 238.
დიღომი 657.
ღრე (სოფელი) 82.
ღუშეთის მზრა 110, 145, 156, 158,
175, 310, 335, 340, 354, 355, 417,
541, 550, 551.
ღუშეთი 109, 110, 112, 114, 116, 139,
177, 229, 328, 427, 432, 480, 706,
708.
ეგვიპტე 192.
ეგროპა 79, 92, 93, 95, 98, 100, 104,
191, 192, 194, 200, 201, 439, 450,
451, 456, 460, 463, 470, 471, 518—
520, 776, 882, 834, 839, 840.
ეგროპელი 481, 495, 516, 826, 840.
ეკატერინენსფელი 123.
ეკატერინოსლავის გუბ. 86.
ელზავეტპოლი 40, 128, 450, 609.
ელზავეტპოლის მზრა 103.
ენაგეთი 77.
ენგური 212, 213, 215, 224, 225, 232.
ენისელი 50, 55, 56, 58, 175.
ერეუანი 128, 135, 176, 196, 203, 223,
442.
ერეუანის მზრა 103.
ერზერუმი 96, 444, 446, 448.
ერთაწმინდა 420.
ერწო 498.
ეცერის თემი 298.
ეწერი 169.
ჯაკის უბანი 169.
ჯინის ქელი 101.
ჯანთა 240.
ჯარანი 489.

ჯარშავა 735.
ჯარტიხე 144, 769.
ჯაქირი 57, 583, 586.
ველისტიხე 55, 56, 60.
ვერა 779.
ეიარტის გუბერნია 86.
ვიეტნამელი 840.
ვილუისკი 520.
ვეფხვისტიხე 143, 145.
ვლადიკავკაზი 612.
ვლახეთი 143, 191, 192.
ვოლნის გუბერნია 86.
ვორონეჟი 78, 226.
ვორონეჟი 347.
ზაქათალა 197.
ზემო მაჩხანი 57, 583.
ზემო ქვალონი 235.
ზემო ზოდანენი 55, 58.
ზენობანი 238.
ზიდუხი 573.
ზუბი 214.
ზუგდიდი 80, 107, 209, 213, 215, 230,
232, 421, 427—429, 432, 434, 548,
549, 551.
ზუგდიდის მზრა 214, 293, 319, 357,
419, 420, 548.
თავისუფალი სვანეთი 299.
თავრიღა 86.
თალიში 128.
თამაქონი 247, 248, 249.
თბილისი 14, 38, 40, 44, 45, 46, 48, 50,
62, 70, 71, 72, 74, 78, 80, 82, 83,
92—97, 103—110, 112—119, 122,
123, 128, 145, 146, 183, 188, 198,
199, 203, 205, 246, 253—256, 315,
320, 321, 323, 324, 347, 378, 382,
383, 384, 386, 387, 389, 390, 392,
393, 408, 412, 414, 415, 417, 418,
419, 421, 423—425, 427, 428, 431,
432, 433, 435, 436, 453, 480, 489,
490, 493, 522, 523, 564, 566, 569,
574, 594, 606, 641, 654, 657, 663,
668, 672, 673, 676, 677, 684, 686,
687, 688, 692, 693, 694, 695, 697,
699, 700, 701, 704, 706—712, 719,

- 723, 724, 732, 744, 745—748,
750—754, 757—763, 770, 771,
777, 801, 804, 810—813, 817, 818,
822—825, 827, 828, 830, 836, 838.
- თბილისის გუბერნია 8, 15, 40, 41, 45,
49, 67, 86, 139, 152, 167, 172, 274,
288, 293, 294, 309, 310, 311, 386,
417, 421, 432, 525, 529, 531, 534,
535, 540, 544, 545, 546, 547,
549, 550, 551, 552, 556, 557, 664,
694, 717, 719, 720, 722.
- თბილისის მაზრა 60, 103, 107, 110, 151,
156, 158, 177, 229, 250, 310, 341,
419, 536, 551.
- თელავი 214.
- თელავი 50, 81, 104, 107, 109, 110, 114,
116, 128, 177, 328, 421, 426, 427,
432, 434, 497, 654, 663, 704, 705,
706, 708, 709, 710, 780, 817, 826.
- თელავის მაზრა 9, 41, 43, 54, 55, 56,
58, 59, 60, 103, 110, 138, 140, 143,
149, 151, 172, 173, 174, 175, 341,
347, 352, 420, 551.
- თელავა 169.
- თერჯოლა 154, 155, 161, 162, 169.
- თიანეთი 440, 657.
- თიანეთის მაზრა 310, 335, 351, 355,
417, 541, 550, 551.
- თიანეთის ოკრუგი 250.
- თრიალეთი 773.
- თუშეთი 150, 173.
- თუშეთის დისტანცია 110.
- თურქეთი 7, 40, 91, 95, 96, 98, 100,
104, 112, 121, 123, 127, 143, 144,
191, 192, 195—198, 200, 209—211,
214, 223, 431, 439, 440, 442, 444,
445, 449, 450, 451, 452, 453, 457,
494, 505, 511, 645, 646, 650, 657.
- თხილწყარო 169.
- თურქი 230, 458, 645, 699.
- თუში 147, 449, 767, 772.
- თაპონია 471.
- თაპონელი 840.
- თაშუაზი 251.
- თვანდილი 248.
- მბერეთი 45, 86, 101, 128, 144, 148,
154, 158—160, 170, 183, 186,
196, 202—204, 215, 216, 235,
293, 331, 334, 337, 338, 431, 485,
504, 538, 596, 664, 773.
- მბერელი 12, 62, 113, 149, 185, 458,
767.
- მბერხევი 451.
- მნგილო 458, 696, 767.
- მნგლისი 48, 89, 95, 100, 191—194,
199—201, 210, 400, 439, 450, 451,
741.
- მნგლისელი 653.
- მნღოეთი 89, 191, 834.
- მრანი 40, 93, 95, 97—99, 112, 121, 127,
191, 192, 457.
- მრანდია 100.
- მტალი 80, 470, 471, 827, 828, 834.
- მუგოსლაგია 840.
- მუარი 575.
- მუკავი 657, 826.
- მუკასია 37, 43, 51, 113, 114, 122, 123,
124, 127, 128, 134, 153, 176, 195—
198, 200, 202—203, 216, 224, 225,
252, 257, 440, 442, 445, 446, 459,
460, 642, 684, 692, 712, 716, 717,
722, 723, 725, 732, 744, 745, 756,
758, 767, 773, 777, 815, 835, 836,
839.
- მუკასიელი 834, 835.
- მუკოსხევი 50, 62, 240.
- მუღეთი 242.
- მალა 575.
- მამერეთი 62.
- მარალეთი 50, 62.
- მასპა 128.
- მასპოს ზღვა 92.
- მასათი 212, 213.
- მასეთი 9, 14, 26, 44, 58, 60, 143, 164,
183, 197, 293, 334, 337, 351, 353,
365, 480, 581, 583, 596, 773, 827.
- მასელი 458, 767.
- მასური (სოფელი გურიაში) 242, 243.
- მბადა 225.
- მეხვი 62.
- მეხვიანი 144.

კიევი 490, 752, 838.
კინტროში 449.
კირცხი 232.
კლარჯეთი 451.
კოკა 169.
კოკი 213.
კოლა 184.
კოლა-არტანი 451.
კონსტანტინოპოლი 80, 104, 191—193, 448.

კორიში 169.
კორცხელი 232.
კოსტრომის გუბ. 235.
კოტანი 57.
კოჯორი 122, 708.
კრეტი 192.
კუკია 50, 62.
კურსკის გუბერნია 86.
კუპტანი 55.

ლაილაში 101.
ლაიპციგი 93, 104.
ლანჩხუთი 101, 209.
ლანჩხუთის უბანი 241.
ლანჩხუთის ხეობა 204.
ლანჩხუთელი 458, 767.
ლფეთა 169.
ლედვი შდ. 207.
ლედგებიე 232.
ლენინგრადი 23.
ლესიპინე 81.
ლეჩხუმში 212, 213, 334, 566.
ლეჩხუმის მაზრა 293, 310, 338, 357, 551.

ლენწარწეშე 581.
ლლა 232, 579.
ლოლო 50, 62.
ლიხური 242, 243, 449.
ლიხის შთა 13.
ლიხნი 251.
ლონდონი 104, 418.
ლუგანსკი 89.

მაკეანეთი 242, 243.
მანგლისი 122.
მანდიკორი 169.

მარიენფელდი 123.
მარანი 101, 213.
მარტყოფი 349.
მატანი 250.
მალარო 57.
მაშნაარი 583.
მეგრელი 185, 458, 645, 767, 782.
მესტია 575.
მესხეთ-ჭავჭავთო 773.
მესხი 458, 767.
მეტეხი 167, 168.
მეჭერისხევი 420, 780.
მთაწმინდა 826.
მთიელი 458, 669.
მირზანი 57.
მიუნხენი 828.
მლეთი 349, 508.
მოგილევის გუბ. 86.
მოლდავეთი 191, 192, 193.
მოლიდი 238.
მოსკოვი 23, 43, 45, 80, 81, 86, 104, 134, 230, 258, 423, 439, 494, 710, 750, 818, 821, 828, 829, 838.

მობევე 458, 767, 772.
მტკვარი 443, 771, 779.
მუგუძირხე 250.
მუხური 101, 213.
მუხავსტატე 445.
მუხათა 445.
მუხაყრუა 169.
მუხურა 169.
მეორე აზია 193, 440, 442, 446, 448.
მცხეთა 657, 827.
მზურვალეთი 240.

ნაგარკევი 169.
ნაბოსლევი 169.
ნაგომარი 101.
ნალჩიკი 222.
ნაფარეული 532, 533.
ნაქალაქევი 50.
ნახქევიანის მაზრა 103, 128.
ნეაპოლი 827.
ნიგოეთი 204, 209, 245, 246.
ნიენი ნოეგორილი 97, 100, 104.
ნოეგორილი 611.
ნოეალექსანდროვსკა 354.

- ნოვომიხაილოვკა 347.
 ნოვოროსიისკი 201, 251, 569.
 ნოლა 169.
 ნუკრიანი 57.
 ობუქი 232.
 ოდესა 93, 569, 821, 822, 829, 838.
 ოდილაური 170.
 ოზანი 57.
 ოზურგეთი 98, 100, 107, 185, 186,
 328, 427, 428, 429, 432, 523, 566,
 573, 702, 704, 705, 706, 708, 710.
 ოზურგეთის მაზრა 45, 138, 151, 152,
 178, 202—206, 241, 244, 310,
 353, 419, 420, 434, 443, 538, 548,
 549, 551.
 ოლთისი 451.
 ოლთეისის გუბ. 235.
 ონი 101, 107.
 ონჯოხეთი 238.
 ორენბურგის გუბერნია 86, 716.
 ორთაქალა 779, 780.
 ორპირი 80.
 ოსეთი 173, 183, 185.
 ოსი 62, 188, 205, 459, 773, 834, 835.
 ოსმალეთი 91, 145, 191, 192, 197, 198,
 450, 451, 452, 691.
 ოსმალთ 233, 488.
 ოფშეითი 769.
 ოჩაჩირე 412, 435.
 პარიზი 418, 514, 516, 517, 518, 828.
 პატარა იანგი 446.
 პატარა საქობრი 57.
 პატარძეული 58, 143, 175.
 პენზა 86.
 პერმის გუბ. 235, 749.
 პეტერბურგი 19, 81, 86, 123, 134,
 194, 230, 231, 256, 258, 274 480,
 485, 504, 505, 510, 515, 516, 520,
 592, 623, 642, 693, 710, 745, 746,
 754, 755, 804, 817, 818, 821, 827,
 828, 831, 838.
 პლეენა 448.
 პოლონეთი 470, 504, 642, 716, 840.
 პოლოაკები 646.
 პრასიანი 57.
 პრუსია 191.
 უსხუელები 224.
 უენეა 517.
 რაკა 88, 154, 293, 334, 566.
 რაკის მაზრა 151, 178, 190, 310, 357,
 538, 551.
 რაქველი 458, 767.
 რედუტ-კალე 44, 89, 96, 98, 99, 203,
 209, 412.
 რიაზანის გუბ. 78.
 რიონი 203, 681.
 რიონის მხარე 196, 202.
 რომი 42.
 რუისი 420.
 რუმინეთი 448, 840.
 რუსეთი 7, 8, 40, 41, 45, 49, 68, 69, 79,
 80, 83, 84, 86, 88, 90, 91, 92, 93,
 94, 95, 96, 97, 98, 100, 102, 105,
 112, 113, 114, 116, 121, 122, 123,
 124, 125, 126, 127, 128, 143, 148,
 171, 191, 192, 194, 195, 196, 197,
 198, 200, 201, 209, 211, 213, 214,
 215, 216, 217, 218, 219, 220, 222,
 223, 225, 258, 272, 273, 303, 304,
 418, 420, 439, 440, 441, 442, 445,
 447, 448, 449, 450, 451, 452, 453,
 456, 457, 459, 460, 461, 462, 463,
 466, 470—473, 478, 479 — 481,
 485, 490, 491, 494, 504—506, 510—
 512, 517, 520, 521, 523, 524, 561,
 569, 587, 646, 650, 658, 670, 688,
 690, 704, 711, 712, 715, 716, 717,
 720, 721, 727, 732, 734, 744, 748,
 749, 771, 775, 784, 812, 816, 817,
 818, 822, 827, 830, 834, 837, 838,
 840.
 რუსეთის იმპ. 235.
 რუსი 17, 225, 461, 473, 479, 481, 492,
 494, 504, 523, 646, 653, 654, 767,
 779, 826, 834, 837, 838.
 რუხი 107, 212.
 ხაბუკი (სოფელი) 81.
 საბერძნეთი 192, 828.
 საბჭოთა კავშირი 840.
 საგარეჯო 50, 62, 175.

სადაღანო სენეთი 296.
სადაღეშქელიანო სენეთი 223, 296.
საზანო 169.
საინგილო 197.
სალოანი 50, 62.
სალობინო 232.
სამარა 86.
სამეგრელო 10, 16, 44, 45, 101, 113,
137, 152, 158, 186, 196, 199, 201,
209, 210, 211, 212, 213, 214, 215,
216, 217, 218, 219, 220, 221, 222,
223, 230, 233, 248, 249, 296, 330,
334, 337, 338, 423, 580, 596, 608,
645, 647, 654, 657, 664, 669.
სამთავისი 50, 62.
სამტრედია 169, 435.
სამურზაყანო 209, 216, 222, 236.
სამხრეთ ამეროკა 840.
სამწეერისი 50, 62.
სანაერლო 50, 55.
სანარპანიო 212, 213.
სანსტეფანო 450, 451.
სარატოეი 78, 86, 516.
სართიქალა 62.
სართიქალის უზანი 174.
საფრანგეთი 80, 191, 192, 193, 194, 199,
200, 201, 210, 270, 400, 451, 471,
472, 514, 518, 519, 741, 742, 834.
საჩხერე 101, 421.
საქართველო-იმერეთის გუბერნია 52,
103, 128, 129, 130, 135, 147, 177.
საქობო 583, 586.
საწერეთლო 160, 161.
საწირე 169.
სევესტოპოლი 200, 210, 211, 251.
სემიპალატინსკი 632.
სენაკი 101, 214, 423, 581, 657..
სენაკის მაზრა 293, 310, 353, 357, 419,
420, 548, 549, 551.
სერბია 191, 192, 193, 439.
სენეთი 137, 152, 216, 221, 222, 223,
296, 297, 299, 335, 342, 420, 575,
576, 577, 644, 645, 772.
სუნაი 458, 645, 647, 767, 772.
სიმონეთი 169.
სინოპი 199.
სილნალი 40, 105, 107, 109, 110, 112,

114, 116, 177, 328, 421, 427, 432,
434, 583, 585, 641, 704, 705, 708.
სილნალის მაზრა 9, 14, 56, 58, 59,
60, 103, 105, 110, 145, 151, 152,
156, 158, 173, 175, 310, 335, 352,
417, 541, 551, 641.
სკანდინავია 471.
სლავი 439.
სომხეთი 448.
სომეხი 124, 132, 215, 442, 446, 505,
645, 698, 699, 700, 764, 773, 826,
834, 836.
სორმონი (სოფელი) 169.
სორტა 209.
სოლანლული 60, 446.
სოკი 236.
სოჩხეთი 169.
სოხუმი 100, 107, 109, 110, 202, 203,
215, 226, 250, 251, 252, 328, 412,
418, 421, 427, 428, 429, 432, 434,
445, 569, 702, 704, 706, 708, 722.
სპარსეთი 91, 93, 94, 113, 114, 253.
სტავროპოლი 176, 226, 520, 671.
სტეფანწმინდა 493, 494.
სურამი 50, 51, 107, 435.
სუფსა (სოფ.) 242.
სუფსა (მდინარე) 204, 243.
სხალა 451.
სხეიტორი 485.
ტაშკენტი 423.
ტამბოვი 86.
ტამბოვის გუბ. 78.
ტიბაანი 57.
ტოლნანი 143.
ტრაპიზონი 96, 191, 211.
ტურისციხე 50, 55, 56.
ტყვიეი 603, 751, 752.
ტყიბული 89, 403, 680, 681, 771.
უბიზი 224, 225.
უღინი 646.
უკრაინა 642, 838.
უკრაინელი 834, 838.
უმლაური 170.
უნეიარ-ისევესი 191, 192.
უნგრეთი 193, 439, 470, 840.

ურიათუბანი 55, 58.

უშგული 575.

უხუთი 237—239.

ფანინი 57.

ფახულანი 579.

ფინეთი 420, 642.

ფოთი 109, 110, 251, 327, 328, 394, 412, 415—418, 421, 424, 427—429, 431—434, 520, 569, 681, 697, 702, 704, 706—710, 771.

ფსორცხა 251.

ფშავეთი 150.

ფშაველი 55, 147, 458, 646, 669.

ფშაეი 173, 458, 497, 767.

ფშავ-ხევსურეთი 110.

ფხენისი 240.

ჭარელი 240.

ჭართლი 26, 86, 240, 293, 334, 338, 365, 773.

ჭართლელი 458, 767.

ჭართები 458.

ჭართლ-კახეთი 361, 449, 664.

ქეშერეთი 50.

ქეხვი 50.

ქეაშხორი 233.

ქეელი 87.

ქეეშო მანხანი 57.

ქეეშო ქეიტორი 169.

ქეიანი 245.

ქისტაური 55.

ქობულეთი 101, 203, 209, 449.

ქსანი 573.

ქსნის ბეობა 240.

ქუთაისი 14, 73, 76, 78, 79, 89, 101, 107, 109, 110, 116, 118, 123, 128, 135, 177, 203, 204, 209, 215, 218, 219, 233, 236, 241, 246, 309, 324, 325, 347, 378, 389, 419, 423, 424, 427—429, 431, 432, 434—437, 480, 485, 504, 515, 523, 564, 566, 580, 606, 641, 657, 663, 667—669, 671, 697, 702, 703, 705, 706, 708,—712, 722, 723, 737, 771, 811, 817, 826, 830.

ქუთაისის გუბერნია 14, 50, 51, 66, 85,

110, 152, 155, 165, 166, 310, 311, 386, 418—420, 421, 531, 534, 535, 539, 540, 544—546, 548—552, 556, 557, 649, 664, 669, 670, 725.

ქუთაისის მაზრა 41, 45, 46, 69, 77, 139, 151, 173, 178, 190, 228, 235, 238, 239, 310, 353, 357, 419, 423, 548, 549, 551.

ქუთაისის ოლქი 169.

ღვარები 81.

ღუნები 225.

ყაბარდო 222.

ყაბარდოელი 835, 836.

ყარაბალი 128.

ყარაია 769.

ყარა-ჩიი 222.

ყარაქალი 140.

ყაზანი 516, 815.

ყაზახი 40, 147.

ყაზახეთი 716.

ყარსი 50, 62, 196, 198, 199, 210, 211, 214, 215, 442, 443, 444, 446, 447, 449.

ყვარელი 9, 50, 58, 62, 138, 140, 175, 480.

ყვირილა 421, 416, 435.

ყიზილ-თაფა 446.

ყინწყისი 240.

ყირიში 81, 145, 198, 200, 209, 210, 215—217, 223, 256, 443.

ყუბა 128.

ყუბანი 225.

ყუბანის მაზრა 225.

ყულევი 93, 100, 107, 211, 212, 215.

ყულისყარი 232.

შავი ზღვა 90, 92, 199, 200, 201, 202, 209, 223, 224, 225, 418, 440, 445, 840.

შავეთი 447, 451.

შალაური 555, 58, 143.

შამბულლი 86, 87, 395, 396.

შაშაღილი 40, 147.

შაქი 128.

შაქრიანი 55, 58.
შაშინი 140, 143, 341.
შეკვეთილი 98, 99, 412.
შემახი 135.
შემოქმედი 242, 243, 244.
შეეცარა 505.
შილა 9, 50, 55, 58, 60, 62, 175, 831.
შირენი 128.
შორაპანი 420, 566.
შორაპნის მარა 45, 151, 310, 352,
353, 357, 441, 548, 599.

შუა აზია 420.
შუამთა 420.
შუა ქვეტირი 169.
შულავერი 347.

ჩაბალურხვა 250.
ჩათახი 88.
ჩაილური 63.
ჩერკეზეთი 224.
ჩერკეზი 200.
ჩეხეთი 840.
ჩინეთი 834.
ჩინელი 840.
ჩოლოქი (მდინარე) 203, 204, 206, 207,
215.
ჩოხატური 202, 209.
ჩრდილო ამერიკა 840.
ჩრდილო კავკასია 81, 83, 201, 224, 225,
657.
ჩხარი 101, 169, 171, 421.

ცენტრ. ევროპა 439.
ციმბირი 122, 252, 256, 616, 716.
ციხისუბანი 238, 445.
ცხენისწყალი 213.
ცხინვალე 107, 420, 421, 435.
ცხუმარის თემი 298.

ძვერი 169.

წალკა 122, 773,
წებელდა 217, 222, 251, 252.
წედისი 87.
წინარეხი 657.

ქალა 62.
ქაქეინჯი 232.
ქითურა 14, 403, 408, 420, 421, 424,
437, 569, 675, 679, 680, 681, 685,
772, 826.
ქიკანი 55.
ქონაგვარი 245.
ქოგნარი 169.
ქოლევი 169.
ქოტორი 57.

ზარკოვი 78, 86.
ზატისთელეთი 62.
ზაშური 421, 777, 826.
ზევი 447.
ზეესურეთი 150, 828.
ზეესური 147, 458, 669, 767, 772.
ზეთა 209.
ზეითი 536.
ზელთუბანი 50, 62, 657.
ზერთისი 229, 447.
ზეითი 240.
ზიბულა 232.
ზიდისთავის უბანი 165.
ზისორეთი 169.
ზობი (მდინარე) 209, 232.
ზოდანე 56.
ზონი 12, 47, 101, 107, 423, 435, 826.
ზოიკული 60.
ზუცუბანი 445.

ჯავახეთი 86.
ჯავახელი 767.
ჯვარი 212, 232, 235.
ჯვარისა 169.
ჯიშითი 63.
ჯიქები 224.
ჯუგანი 57.
ჯუმათი 101.

მაშხურკი 418.
კერკოგოენა 439.
კოლანდი 400.

შემოკლებათა განმარტება

ანაწ. — ანაწერი

მსპრ — მასალები საქართველოსა და კავკასიის ისტორიისათვის

გლისფკა — მარქსიზმ-ლენინიზმის ინსტიტუტის საქართველოს ფილიალის პარტიული არქივი

საბ. — საქმე

სმ. — „საისტორიო მოამბე“

სსცია — საქართველოს სახელმწიფო ცენტრალური ისტორიული არქივი

იხ. — იხილეთ

ფ. — ფონდი

ფურც. — ფურცელი

შფრ. — შეადარე

АИЯЛИ — Абхазский институт языка, литературы и истории им. Д. И. Гула
АН Грузинской ССР

АКАК — Акты, собранные Кавказской археографической комиссией

ВПСЭРИ — Второе полное собрание законов Российской империи

ВУА — Военно-учебный архив

Д. — Дело

ДИГ — Документы по истории Грузии под редакцией проф. Ш. К. Чхетия

ЭКОСХ — Записки Кавказского общества сельского хозяйства

КК — Кавказский календарь

КПРЦА — Колониальная политика Российского царизма в Азербайджане

Л. — Лист

ЛЛ. — Листы

ТМКОНСХП — Труды местных комитетов о нуждах сельскохозяйственной промышленности

МИЭБКЭК — Материалы для изучения экономического быта государственных крестьян Закавказского края

ОП — Опись

ОРВЭК — Обзорение Российских владений за-Кавказом

РТКЭЖДКО — Район Тифлиско-Карско-Эреванской железной дороги в экономическом и коммерческом отношениях

ССДЗСХПГЭК — Сборник статистических данных о землевладении и способах хозяйства в пяти губерниях Закавказского края

ССДЗТКГ — Сборник статистических данных о землевладении в Тифлисской и Кутаисской губерниях

СМИЭБГКЭК — Свод материалов для изучения экономического быта государственных крестьян Закавказского края

СХАО — Сельское хозяйство и аграрные отношения. Сборник документов, составленный П. В. Гугушвили

ЦГВИАМ — Центральный государственный военно-исторический архив в Москве

ЦГИА СССР — Центральный Государственный исторический архив СССР

Ф. — Фонд

СССЧЗТКГ — Сборник статистических сведений о частном землевладении в Тифлисской и Кутаисской губерниях

ООП — Обзор отраслей промышленности

ს ა რ ჩ ე ვ ი

შესავალი (ი. ანთელავა, ა. ბენდიანიშვილი, მ. გაფრინდაშვილი)	5
თავი პირველი. ფედერალურ-ბატონყმური სისტემის რღვევა და ბურჟუაზიულ ურთიერთობათა განვითარება XIX საუკუნის 30—50-იან წლებში (წ 1 ი. ანთელავა, ე. ორჭონიყიძე, წ 2, 4 ე. ხომტარია, წ 3 ე. ორჭონიყიძე)	40
წ 1. ფედერალურ-ბატონყმური სისტემის რღვევა და კაპიტალისტურ ურთიერთობათა განვითარება სოფლის მეურნეობაში	40
წ 2. საქართველოს მრეწველობის განვითარება XIX ს-ის 30—60-იან წლებში	67
წ 3. ეაქრობა	90
წ 4. საქართველოს ქალაქების ზრდა XIX ს-ის რეფორმამდელ ხანაში. ცელილებები ქალაქში მცხოვრებ წოდებათა სოციალურ მდგომარეობაში	105
თავი მეორე. ცარიზმის კოლონიური პოლიტიკა საქართველოში XIX საუკუნის 30—50-იან წლებში. მმართველობის სისტემა (ი. ანთელავა)	121
წ 1. ქვეყნის კოლონიზაცია	121
წ 2. ეკონომიური პოლიტიკის ხასიათი	124
წ 3. მმართველობის სისტემა	127
წ 4. მმართველობის სისტემის შემდგომი ცვლილებანი. მ. კორონცოვი, ა. ბარიატინსკი	137
თავი მესამე. გლეხთა სოციალ-ეკონომიური მდგომარეობა და მათი ბრძოლა სოციალური და კოლონიური ჩაპვრის წინააღმდეგ XIX საუკუნის 30—50-იან წლებში (შირიშის ომამდე) (ი. ანთელავა)	137
წ 1. სახელმწიფო გლეხთა სოციალ-ეკონომიური მდგომარეობა	138
წ 2. საბატონო გლეხთა სოციალ-ეკონომიური მდგომარეობა	154
წ 3. საეკლესიო გლეხების სოციალ-ეკონომიური მდგომარეობა	167
წ 4. სხვადასხვა კატეგორიის გლეხთა საერთო მდგომარეობის ზოგადი დახასიათება	173
წ 5. გლეხების ბრძოლა სოციალური და ეროვნული ჩაგვრის წინააღმდეგ	180
თავი მეოთხე. შირიშის ომი და სამთავრომბის გაუქმება საქართველოში (ე. ორჭონიყიძე)	191

§ 1. ყირიმის ომი	191
§ 2. სამთავროების გაუქმება	216
თ ა ვ ი მ ე ხ უ თ ე . კლასობრივი ბრძოლის გავრცელება რეფორმის წინააღმდეგ	
ბანის საქართველოში. ანტიბატონეპური იდეოლოგიის ჩამოყალიბება (ი. ანთელავა)	227
§ 1. კლასობრივი ბრძოლის გაშფავეება რეფორმის წინააღმდეგ ბანის საქართველოში	227
§ 2. ანტიბატონეპური იდეოლოგიის ჩამოყალიბება	257
თ ა ვ ი მ ე ე ქ ე ს ე . საბლახო რეფორმა საქართველოში (ი. ანთელავა)	272
§ 1. რეფორმა აღმოსავლეთ საქართველოში	274
§ 2. რეფორმა დასავლეთ საქართველოში	292
§ 3. რეფორმის შედეგები და მნიშვნელობა	301
თ ა ვ ი მ ე შ ე ი დ ე . სოფლის საზოგადოებრივი მმართველობის უმჯობესება. სასაზოგადოებრო და სახალაქო რეფორმები (ალ. ბენდიანიშვილი)	303
§ 1. სოფლის საზოგადოებრივი მმართველობა	303
§ 2. სასაზოგადოებრო რეფორმა	312
§ 3. საქალაქო რეფორმა	320
თ ა ვ ი მ ე რ ე ე . კაპიტალიზმის განვითარება საქართველოში რეფორმის შემდეგ (1865—1900 წწ.) (§ 1 ალ. ბენდიანიშვილი, § 2, 3, 5 ე. ხოშტარია, § 4, ე. ორჭონიკიძე)	329
§ 1. კაპიტალისტური ურთიერთობის განვითარება სოფელში	329
§ 2. მრეწველობის განვითარება	375
§ 3. მუშათა კლასის ჩამოყალიბება	404
§ 4. ვაჭრობა და დეკრეტი	411
§ 5. ქალაქებისა და საეკონომიკური-სამრეწველო დაზღვის განვითარება	426
თ ა ვ ი მ ე ე ხ რ ე . რუსეთ-თურქეთის (1877—1878 წწ.) ომი და საქართველო (ალ. ბენდიანიშვილი)	439
თ ა ვ ი მ ე ა თ ე . ქართველი ერი და იროვნულ-განმათავისუფლებელი მოძრაობა XIX საუკუნის მეორე ნახევარში (მ. გაფრინდაშვილი)	454
§ 1. ქართველი ერი	454
§ 2. ეროვნულ-განმათავისუფლებელი მოძრაობა	459
§ 3. ეროვნულ-განმათავისუფლებელი მოძრაობის იდეური მიმდინარეობანი	470
თ ა ვ ი მ ე თ ე რ თ მ ე ტ ე . აბრარული ურთიერთობა საქართველოში რეფორმის მომდევნო ხანაში (60—90-იანი წლები) (ი. ანთელავა)	525
§ 1. მიწათმფლობელობის ფეოდალური ხასიათი. მემამულეთა კლასის სოციალ-ეკონომიური მდგომარეობა	525
§ 2. გლეხობის სოციალ-ეკონომიური მდგომარეობა	530
§ 3. კლასობრივი ბრძოლა	567
თ ა ვ ი მ ე თ ო რ მ ე ტ ე . ხალხოსნური მოძრაობა საქართველოში 70—80-იან წლებში (ი. ანთელავა)	587
§ 1. ნაროდნიკობის (ხალხოსნობის) სოციალ-პოლიტიკური არსი და ისტორიული მნიშვნელობა	587

§ 2. ნაროდნიკობის წარმოშობის ძირითადი მიზეზები	590
§ 3. ხალხოსნური მოძრაობა 70-იან წლებში	594
§ 4. ხალხოსნური მოძრაობა 80-იან წლებში	616
თ ა ვ ი მ ე ც ა მ ე ტ ე . 80-იანი წლების რევოლუცია და საქართველოს საზოგადო-	
დოქტრინის ძალაში (ა. იოსელიანი)	637
§ 1. პოლიტიკური რევოლუციის გაძლიერება	637
§ 2. ცვლილებანი კაციახის უმაღლეს მმართველობაში. კოლონიური ჩაგვრის გაძლიერება საქართველოში	641
§ 3. რევოლუციური ძალების შემოტევა ქართული ეროვნული კულტურის წინააღმდეგ	643
§ 4. ბრძოლა ცარიზმის რუსიფიკატორული პოლიტიკის წინააღმდეგ განათლებისა და ეკლესიის დარგში	648
§ 5. ქართული ეროვნულ-კულტურული და სამეურნეო საზოგადოება-დაწესებულებანი რევოლუციის წლებში	655
§ 6. 80-იანი წლების ქართული პრესა ცენზურის ბრკველებში	663
§ 7. რევოლუციის ძალების ახალი შემოტევა. დიმიტრი ყიფიანის მკვლელობა. ეროვნულ-განმათავისუფლებელი მოძრაობის ისტორიული მნიშვნელობა	666
თ ა ვ ი მ ე თ ო თ : ხ მ ე ტ ე . მუშათა კლასის მდგომარეობა XIX საუკუნის	
70—90-იან წლებში და მუშათა მოძრაობის პირველი ნაბიჯები	
(ა. კიციანი)	672
§ 1. მუშათა კლასის მდგომარეობა	672
§ 2. მუშათა პირველი გაფიცვები საქართველოში	699
თ ა ვ ი მ ე თ ხ უ მ ე ტ ე . საქალაქო თვითმმართველობანი 1875—1905 წწ.	
ეროვნის შემოღების საპრობლემი (ა. ბენდიანიშვილი)	697
§ 1. საქალაქო თვითმმართველობანი 1875—1905 წწ.	697
§ 2. ეროვნის შემოღების საკითხი	712
თ ა ვ ი მ ე თ ე ქ ე ს მ ე ტ ე . მარცხობის წარმოშობა და დამკვიდრება	
საქართველოში (ლ. გორგილაძე)	727
§ 1. მარქსისტული მიმდინარეობის წარმოშობა საქართველოში	727
§ 2. მუშათა მოძრაობისა და სოციალიზმის შეერთება საქართველოში	744
თ ა ვ ი მ ე ჩ ე ო დ მ ე ტ ე . ძარბული კულტურა XIX საუკუნეში (მ. გაფ-	
რინდაშვილი)	764
§ 1. ახალი ყოფა და ახალი კულტურა	764
§ 2. მოსახლეობის მატერიალური ყოფა	766
§ 3. ხალხის სულიერი ყოფა	779
§ 4. ლიტერატურა და პრესა	783
§ 5. განათლება და მეცნიერება	812
§ 6. ხელოვნება	823
§ 7. კულტურული ერთეულობა სხვა ხალხებთან	834
ს ა ძ ი ე ბ ე ლ ი	841
შ ე მ ო კ ლ ე ბ ა თ ა გ ა ნ მ ა რ ტ ე ბ ა	863

გამომცემლობის რედაქტორი ნ. გონაშვილი
მხატვარი ვ. გრიგოლია
მხატვრული რედაქტორი ნ. ოქრუაშვილი
ტექნიკური რედაქტორი ვ. ხუციშვილი
გამომშვები შ. ლუცუა
კორექტორები: ლ. არეშიძე, ნ. თაუაძე

გაზეთი წარმოებას 30/X-69 წ. ხელმოწერილია დასაბეჭდად 16/XI-70 წ.
ქალაქის ზომა 60X97¹/₁₆. ნაბეჭდი თაბახი 69,98+0,97 ჩაყრა.
სააღრიცხვო-საგამომცემლო თაბახი 54,17.

ფე 01735.

ტირაჟი 20.000.

შეკვ. № 1.

ფახი 8 მან. 85 კაპ.

გამომცემლობა „საბჭოთა საქართველო“
თბილისი, მარჯანიშვილის ს.

საქართველოს სსრ მინისტრთა საბჭოს ბეჭდვითი სიტყვის სახელმწიფო
კომიტეტის მთავარბოლიგრაფმრეწველობის სტამბა № 1, თბილისი,
ორჯონიკიძის ქ. № 50.

Типография № 1 Главполиграфпрома Госкомитета Совета
Министров Груз. ССР по печати. Тбилиси, ул. Орджоникидзе № 50.